











ਭਾਗਤਭਗਤ  
ਆਰੰਭ



# ଝରାଝର ମାସିକ

୮ମ ଖଣ୍ଡ

ଅକରବାଥ ରାୟ

କରୁଣା ପ୍ରେକାଶନୀ । କଲକାତା-୧୨

প্রথম প্রকাশ ভাদ্র ১৩৬২



প্রকাশক

বামাচরণ মুখোপাধ্যায়

১১ শ্রামাচরণ দে স্ট্রীট

কলকাতা-১২

মুদ্রাকর

অনিলকুমার বোষ

দি অশোক প্রিন্টিং ওয়ার্কস

২০২এ, বিধান সরণী

কলকাতা-৬

প্রচ্ছদশিল্পী

সুপ্রকাশ সেন





# আচার্য মধ্ব

ভারতের আত্মিক সাধনা ও ধর্ম-সংস্কৃতির ইতিহাসে দাক্ষিণাত্যের অবদান যেমনি বিপুল তেমনি বৈচিত্র্যময়। জ্ঞান, কর্ম ও প্রেমভক্তির নানা সাধনা ও দার্শনিকতার ধারা এই প্রাচীন ভূখণ্ডে হইতে উৎসারিত হইয়াছে, ছড়াইয়া পড়িয়াছে দেশের দিক্‌বিদিকে।

দক্ষিণভারত আমাদের উপটোকন দিয়াছে তাহার ষোড়শশতাব্দী-সম্পন্ন শৈবসাধক আর প্রেমভক্তি-সিদ্ধ আড়বার গোষ্ঠী, দিয়াছে শঙ্করের মত অদ্বৈতবাদের শ্রেষ্ঠ আচার্য। রামানুজ, মধ্ব, বিষ্ণুস্বামী, নিম্বার্ক বিজয়ানাথ, জ্ঞানদেব, তুকারাম প্রভৃতি সিদ্ধ সাধক ও ধর্ম্মনেতার একের পর এক এখানে ঘটিয়াছে অভ্যুদয়।

ত্রয়োদশ শতকে আচার্য মধ্বের আবির্ভাব শুধু দক্ষিণ ভারতেরই নয়, সমগ্র ভারতেরই এক স্মরণীয় ঘটনা। ব্রহ্মসূত্রের ভক্তিবাদী ব্যাখ্যার মধ্য দিয়া তিনি এক নবতর দ্বৈতবাদী দর্শনের প্রচার করেন। তাঁহার নৈষ্ঠিক বৈষ্ণবীয় সাধনা, ভাবময় প্রেরণা ও সংগঠনশক্তি ভক্তি-আন্দোলনকে নূতন প্রাণ-প্রাচুর্য্যে ভরিয়া তোলে। ভারতীয় জন-জীবনে আচার্য মধ্ব পরিচিত হইয়া উঠেন ভক্তিবাদী চতুঃসম্প্রদায়ের অন্ততম ব্রহ্মসম্প্রদায়ের প্রবর্তকরূপে। তাঁহার প্রচারিত তত্ত্ব ও ধর্ম্মাদর্শ যে গোড়ীয় বৈষ্ণব ও বল্লাভাচারীদের মতবাদকে অনেকাংশে প্রভাবিত করিয়াছে একথাও অস্বীকার করার উপায় নাই।

মধ্ব আবির্ভূত হন ১১৯৯ খৃষ্টাব্দে।<sup>১</sup> ভারতের দক্ষিণ-পশ্চিম



উপকূলের কাছাকাছি বেলে-গ্রামের পাজকা ক্ষেত্র তাঁহার জন্মভূমি। তখনকার দিনে এ অঞ্চল ছিল তুলুব দেশের অন্তর্গত। আজিকার দিনের ধারোয়ার জেলা, উত্তর ও দক্ষিণ কানাড়া এবং মহীশূর রাজ্যের পশ্চিম অংশ নিয়া গঠিত ছিল ত্রয়োদশ শতকের তুলুব। আজও ইহার একাংশ তুলুব নামে পরিচিত। শঙ্করের জন্মস্থান শৃঙ্গেরী ও ম্যালোলোরের দূরত্ব মধ্বের জন্মস্থান হইতে চল্লিশ মাইলের বেশী হইবে না।

পাজকার তিন ক্রোশ দূরেই সাগর বিধৌত পবিত্র তীর্থ উড়ুপী।<sup>১</sup> শেষশায়ী অনন্তেশ্বর বিষ্ণু ও চন্দ্রমৌলীশ্বর শিব, এই দুই জাগ্রত বিগ্রহের মন্দির এখানে অবস্থিত। দেশের দূর দূরাস্ত হইতে ভক্ত নরনারী এখানে সমবেত হয়, স্নান তর্পণ ও পূজা শেষে যে যাহার ঘরে ফিরিয়া যায়। বিষ্ণুভক্ত ও শিবভক্তদের এই মিলনভূমিই উত্তরকালে পরিচিত হইয়া উঠে আচার্য্য মধ্বের সাধনগীঠ ও লীলাকেন্দ্ররূপে। ভক্তি-সাধনার এক নূতন ধারা তাঁহার মাধ্যমে এখান হইতে উৎসারিত হয়। তাঁহার উত্তরসূরী ও ভক্ত শিষ্যদের স্মৃতিও এই পবিত্র তীর্থের সহিত নানাভাবে বিজড়িত রহিয়াছে।

মধ্বের পিতার নাম মধ্যাগেহ নারায়ণ ভট্ট। প্রতিভাধর আচার্য্য হিসাবে ভট্ট এ অঞ্চলে সুপরিচিত। বেদ-বেদান্তে তিনি পারঙ্গম, আবার সাধন-জীবনে নিষ্ঠাবান বিষ্ণুভক্ত। স্ত্রী বেদবতী যেমনি রূপসী তেমনি মহাভক্তিমতী। গৃহে নারায়ণ-শিলা প্রতিষ্ঠিত। এই শিলাময় দেববিগ্রহের সেবা, ভোগরাগ, ধ্যানরূপে অধিকাংশ সময় তাঁহাদের অতিবাহিত হয়। বিশেষ বিশেষ পার্বণের দিনে

উভয়ে ভক্তিভরে গিয়া উপস্থিত হন উড়ুপীতে। কুলদেবতা অনন্তেশ্বর নারায়ণের অর্চনায় প্রাণমন ঢালিয়া দেন।

মধ্যগেহ ভট্ট মোটেই বিস্তবান নন। সন্তালের মধ্যে রহিয়াছে পৈতৃক একটি বাসগৃহ আর একটি বাগিচা। এই বাগিচার ফসল আর অধ্যাপনার সামান্য কিছু আয় দিয়াই কোন মতে তাঁহার সংসারের ব্যয় নির্বাহ হয়।

ভট্টবংশ খুবই প্রাচীন। কর্মকাণ্ডের বিখ্যাত আচার্য কুমারিল ভট্টের অনুগামী ব্রাহ্মণ ইহারা। পঞ্চ বা ষষ্ঠ শতকের কাছাকাছি সময়ে বনবাসী কদম্ব রাজ ময়ূর বর্ষণ এই নৈষ্ঠিক ব্রাহ্মণদের কয়েকটি দলকে আমন্ত্রণ জানান। সেই সময় হইতে এই ভট্ট ব্রাহ্মণেরা তুলুবে অঞ্চলে আসিয়া বসতি স্থাপন করেন। যজ্ঞক্রিয়া, শাস্ত্রনিষ্ঠা ও শুদ্ধতর জীবনচর্য্যার মধ্য দিয়া ধীরে ধীরে এই আগন্তুক ব্রাহ্মণেরা সমাজনেতারূপে নিজেদের করেন সুপ্রতিষ্ঠিত।

এই ঔপনিবেশিক ব্রাহ্মণদের অনেকে ছই এক পুরুষের মধ্যেই শাক্তর অদ্বৈতবাদের অনুগামী হইয়া পড়েন। সাধারণভাবে তাঁহাদের মধ্যে শিবভক্তির প্রাবল্য দেখা যায়।

কালক্রমে এই ব্রাহ্মণদের মধ্যে কিছু সংখ্যক লোক বিষ্ণু-উপাসনার দিকে ঝুঁকিয়া পড়েন। আচার্য মধ্বের পিতা মধ্যগেহ ভট্ট ছিলেন এমনি এক ভক্তিপরায়ণ বৈষ্ণব ব্রাহ্মণ।

মধ্যগেহ ভট্টের ছই পুত্র ও এক কন্যা। কিন্তু ভাগ্যের কি নিদারুণ পরিহাস, নিতান্ত তরুণ বয়সে ছইটি পুত্রই একে একে ইহলোক ত্যাগ করিয়া চলিয়া গেল। শোকের আঘাতে ভট্টদম্পতি একেবারে মুষড়িয়া পড়িলেন।

কয়েক বৎসর ইতিমধ্যে অতিক্রান্ত হইয়াছে। কিন্তু পুত্রশোকের দহনজ্বালা মধ্যগেহ তখনো ভুলিতে পারেন নাই। তাছাড়া, মনে এক নূতন হুশিস্তাও প্রবল হইয়া উঠিয়াছে। নৈষ্ঠিক ব্রাহ্মণ তিনি। বার বারই ভাবিতে থাকেন, অপুত্রক অবস্থায় এদেহ ত্যাগ করিলে

পিণ্ডদান করার তো কেহ থাকিবে না। মাঝে মাঝে তাই উড়ুপীঠে অনন্তেশ্বর মন্দিরে গিয়া উপস্থিত হন, ইষ্টের চরণে নিবেদন করেন অন্তরের আকুতি।

সেদিন ছিল দশহরার শেষ দিন—নবমী। মধ্যগেহ ভট্ট উড়ুপীর নারায়ণ মন্দিরে বসিয়া একমনে জপ ধ্যান করিতেছেন। ভাবতন্ময় অবস্থায় প্রহরের পর প্রহর কি করিয়া কাটিয়া যায় হ'স নাই। রাত্রি ক্রমে গভীর হইয়া উঠে। ভক্ত দর্শনার্থীরা একে একে যে যাহার ঘরে ফিরিয়া গিয়াছে। ঠাকুরের শয়ান শেষে দীপ নিভাইয়া পূজারীরা নিজ নিজ কক্ষে বিশ্রামরত। শুধু ভক্তপ্রবর মধ্যগেহ ভট্ট শ্রীমূর্তির সম্মুখে রহিয়াছেন ধ্যানস্থ।

হঠাৎ গর্ভ-মন্দিরটি এক ঝলক শুভ্র স্নিগ্ধ স্বর্ণীয় জ্যোতিতে উদ্ভাসিত হইয়া উঠে। ভট্টের ধ্যান ভাঙ্গিয়া যায়। বিস্ময়ে আনন্দে তিনি অভিভূত। এসময়ে কানে আসে এক দৈবী কণ্ঠস্বর। করুণা বিগলিত কণ্ঠে ঠাকুর কহেন, “আমার প্রিয় ভট্ট, তুমি প্রচণ্ড শোক পেয়েছ তরুণ বয়সের পুত্র ছুটি হারিয়ে। কিন্তু কি করবে বল? প্রাক্তন খণ্ডিত হয়েছে, তাই তো আর তাদের থাকা সম্ভব হয় নি, মর্ত্য থেকে বিদায় নিয়ে চলে গেছে। দুঃখ ক'রো না ভট্ট,—শোক যেমন আঘাত হানে তেমনি আনে পরম কল্যাণ। শোক মানুষকে করে আত্মস্থ, করে পবিত্রতর।”

মধুর মোহময় ঝঙ্কার প্রভুর দিব্যকণ্ঠে। কিন্তু ভট্টের বৃকে তাহা অল্পরঞ্জন তোলে কই? উপযু্যপরি দুইটি পুত্রশোকে হৃদয় তাঁহার আজ মরুভূমি। তাহা শীতল হয় কই, শান্ত হয় কই?

প্রভু আবার স্নেহার্দ্ৰস্বরে বলিতে থাকেন, “ভট্ট, জেনে রাখো, মানুষ শূন্য হয় পূর্ণ হবে বলে, রিক্ত হয় সিক্ত হবে বলে। শোক-বিষাদের কালিমা ঝেড়ে ফেল। আর খেদ করো না। ঈশ্বরীয় বিধানে এক শুদ্ধাত্মা কুলপবিত্রকারী পুত্র আসবে তোমার গৃহে। নবতর ভক্তি আন্দোলনের পথিকৃৎ হবে সে। আজকে দশহরার

শেষ দিন—নবমী। তোমার একটি শিশুপুত্র ভূমিষ্ঠ হবে ঠিক একবৎসর পরে, এমনি পবিত্র তিথিতে।”

দৈবী বাণীর রেশ ধীরে ধীরে মিলাইয়া যায়, কিন্তু মধ্যগেহ ভট্টের হৃদয়ে এই বাণী তুলিয়া দেয় ভাবোচ্ছ্বাসের এক উত্তাল তরঙ্গ। অপার আনন্দে ও তৃপ্তিতে ভরপুর তট তখনই ছুটিয়া যান পালকায় নিজগৃহে। পুলকভরা কণ্ঠে গৃহিণী বেদবতীর কাছে বর্ণনা করেন মন্দিরের অত্যাশ্চর্য্য অভিজ্ঞতার কাহিনী। আনন্দাশ্রু ঝরিতে থাকে ছই নয়নে।

উড়ুপীর অনন্তেশ্বর মন্দিরের দৈববাণী ফলিয়া যায়। ঠিক এক বৎসরের ব্যবধানে, ১১৯৯ খৃষ্টাব্দের নবমী তিথিতে এক শুভলগ্নে ভট্টগৃহিণীর কোল আলো করিয়া আবির্ভূত হয় এক শিশুপুত্র— উত্তরকালে যে কীর্ত্তিত হইয়া উঠে মহাসাধক মঞ্চাচার্য্য নামে।

যেমনি অনিন্দ্যসুন্দর, তেমনি সর্ব্বশুলক্ষণযুক্ত এই শিশু। তন্তু ভট্টদম্পতির আনন্দের আর অবধি নাই। ঠাকুরের কৃপাপ্রসাদ-রূপে পাইয়াছেন এই পুত্রটিকে—কৃতজ্ঞ হৃদয়ে তাই তাহার নাম রাখিলেন বাসুদেব।

বাসুদেবের বাল্য জীবনের নানা অত্যাশ্চর্য্য ও অলৌকিক কাহিনী প্রচলিত আছে।<sup>১</sup> একদিন সাথীদের নিয়া সে খেলায়

১ মঞ্চ-শিষ্য পণ্ডিত জিবিক্রম আচার্য্যের পুত্র নারায়ণ আচার্য্য মঞ্চবিজয় ও মণিমঞ্জরী নামে নানা কাহিনী সম্বলিত সংস্কৃত কাব্যগ্রন্থ রচনা করেন। পৌরাণিক ভঙ্গীতে রচিত এই ছইটি গ্রন্থে মঞ্চ সম্বন্ধে কতকগুলি অলৌকিক ঘটনার উল্লেখ আছে। মঞ্চ জীবনের রূপরেখা অঙ্কনে নারায়ণ আচার্য্যের রচনা আমাদের সাহায্য করিলেও উগ্র সাম্প্রদায়িকতা ও অবৌদ্ধিক শব্দ বিরোধিতার ফলে গ্রন্থ দুইটির মূল্যহানি ঘটিয়াছে। আচার্য্য জিবিক্রম, নারায়ণ প্রভৃতি শিষ্যেরা মঞ্চকে বাহুর অবতার বলিয়া মনে করিতেন। মঞ্চ বৈষ্ণবের মতে, পৃথিবীতে যখনই নারায়ণ অবতার-রূপে আসিয়াছেন, তখনই তাহার সহায়ক হইয়া আসিয়াছেন বাহু। রাম ও কৃষ্ণ অবতারের সহায়ক হনুমান ও ভীম উভয়েই বাহুপুত্র। শেষ অবতার মঞ্চাচার্য্য।—প্রজ্ঞানানন্দঃ বেদান্তদর্শন, পৃষ্ঠা ৫১৮

মাতিয়া আছে। হঠাৎ দেখা গেল, একটি ছুঁদাস্ত বাঁড় নিকটস্থ রাস্তা দিয়া হেলিয়া ছলিয়া চলিতেছে। বালক বাসুদেবের কি এক অদ্ভুত ঝোক চাপিয়া যায়—তড়িৎবেগে বাঁড়ের পুচ্ছ ধরিয়া সে ঝুলিয়া পড়ে। বাঁড়টিও সঙ্গে সঙ্গে উত্তেজিত ও চঞ্চল হইয়া উঠে, দ্রুতবেগে ধাবিত হয় সম্মুখের এক নিবিড় অরণ্যে। সঙ্গী সাথীরা ভয়ে সন্ত্রস্ত, আতঙ্কিত সবাই চীৎকার করিতে থাকে, ভট্টগৃহের আশেপাশে মহা সোরগোল পড়িয়া যায়। ধর্-ধর্ শব্দে সবাই পশ্চাদ্ধাবনে রত হয়।

বাসুদেব সেদিন যেন এক উদ্দাম খেলায় মাতয়া উঠিয়াছে। পুচ্ছ হইতে সে যেমন তাহার বজ্রমুষ্টি শিখিল করিবে না, যণ্ডপ্রবরও কোনমতে হার মানিতে রাজী নয়। বন-বাদাড়, কণ্টকময় পথে কয়েক প্রহর ছুটাছুটির পর ক্লান্তদেহ বাঁড়টি অবশেষে মধ্যগেহের বাড়ীর কাছে আসিয়া ভূমিতে লুটাইয়া পড়ে। বালক বাসুদেবের চোখে মুখে তখন তৃপ্তির হাসি ফুটিয়া উঠিয়াছে। সকলের উদ্বেগ-ভরা প্রশ্নের উত্তরে সগর্বে সে তাহার অদ্ভুত বন-ভ্রমণের কাহিনী বর্ণনা করিতে লাগিল।

আর এক দিনের কথা। একটি বিশেষ পার্বণ উপলক্ষে সন্ধ্যার পর ভট্টদম্পতি বাসুদেবকে নিয়া উড়ুপীর অনন্তেশ্বর মন্দিরে গিয়াছেন। স্নান তর্পণ পূজা সমাপন করিতে বেলা গড়াইয়া যায়। তারপর সন্ধ্যার সময় বনপথ দিয়া সবাই গ্রামে ফিরিয়া চলিয়াছেন। এমন সময়ে হঠাৎ তাহাদের পথ রোধ করিয়া দাঁড়ায় এক ছুঁট অশরীরী প্রেত। মধ্যগেহ ও বেদবতী ভয়ে জড়সড়ো হইয়া পড়েন, কিন্তু বালক বাসুদেবের মধ্যে দেখা যায় এক অদ্ভুত প্রতিক্রিয়া। মুহূর্তমধ্যে তাহার চোখ মুখের ভাব একেবারে পরিবর্তিত হইয়া যায়। ক্রীবা সমুন্নত, চোখছুটি ক্রোধে আরক্ত হইয়া উঠিয়াছে। একটি পূর্ণবয়স্ক ব্যক্তির মত হৃৎস্পন্দে ঐ প্রেতের উদ্দেশে বিড়-বিড় করিয়া কি এক মারণ-মন্ত্র সে উচ্চারণ করিতেছে।

প্রতিটি তৎক্ষণাৎ ভীতভাবে তাঁহাদের সম্মুখ হইতে অন্তর্হিত হইয়া গেল। সঙ্গে সঙ্গে বাসুদেবও ফিরিয়া আসিল তাহার বালক স্বভাবে। ইষ্টনাম জপিতে জপিতে অতি সম্ভরণে বালককে বুকে করিয়া ভট্টদম্পতি ঘরে ফিরিয়া আসিলেন।

কৈশোরে বাসুদেবের উপনয়ন অনুষ্ঠান সম্পন্ন হইয়া গেল। এবার শাস্ত্র অধ্যয়নের জন্ত তাঁহাকে পাঠানো হয় গ্রামের টোলে। অসাধারণ মেধা ও প্রতিভা বাসুদেবের। অধ্যাপকেরা বিস্মিত হইয়া যান। দেখা যায় কয়েক বৎসরের মধ্যেই বিভিন্ন শাস্ত্র তিনি আয়ত্ত করিয়া ফেলিয়াছেন। তত্ত্বের নির্ণয় ও বিচার বিশ্লেষণে জগিয়াছে তাঁহার অসামান্য অধিকার।

ক্রীড়া অঙ্গনেও বাসুদেবের সুখ্যাতি কম নয়। অমিত সাহস, বজ্রকঠিন দেহ আর দুর্জয় সঙ্কল্প নিয়া যে কোন প্রতিযোগিতায় অনায়াসে তিনি শীর্ষস্থান অধিকার করিয়া নেন। দক্ষিণ কানাড়ার ব্রাহ্মণদের মধ্যে কুস্তী খেলার প্রচলন খুব বেশী। এই খেলায় বাসুদেব অদ্বিতীয়। তাই সঙ্গীরা রহস্য করিয়া তাঁহার নামকরণ করে ভীম।’

যৌবনে পদার্পণের সঙ্গে সঙ্গে দেখা গেল বাসুদেব পরিণত হইয়াছেন এক পূর্ণাঙ্গ মানবে। ব্যবহারিক ও আধ্যাত্মিক দুইয়েরই অপূর্ব সমাহার ঘটিয়াছে তাঁহার জীবনে। অসামান্য দৈহিক ও মানসিক উৎকর্ষের অধিকারী যেমন তিনি হইয়াছেন, তেমনি অর্জন করিয়াছেন শাস্ত্র-জ্ঞান ও ধ্যান মননের শক্তি। বিচারের শক্তিতেও কম দুর্ব্বল তিনি হন নাই।

১ অনেকের ধারণা, প্রথম জীবনের এইসব বৈদিক পরাক্রমের কথা শ্রবণ রাখিয়াই উত্তরকালে মধের অল্পগামীরা তাঁহাকে বাসুপুত্র বা বাসুর অবতার বলিয়া প্রচার করিতে শুরু করেন। নানাবর্ণ ভট্ট রচিত মধবিজয় ও মণিমঞ্জরীতে এই বাসু-ভাট্ট বার বার উল্লেখিত হইয়াছে।

কয়েকশত বৎসর আগে বাসুদেবের পূর্বপুরুষ ছিলেন কর্মকাণ্ডের অল্পগামী, যাগযজ্ঞে বিশ্বাসী। একাদশ শতকের কাছাকাছি ইহাদের মধ্যে এক দূরপ্রসারী পরিবর্তনের সূচনা দেখা যায়। এ সময়ে আচার্য্য রামানুজের অভ্যুদয় ঘটে এবং তাঁহার অভ্যুদয়ের মধ্য দিয়াই পরিণতি লাভ করে প্রেম-ভক্তি-সিদ্ধ আড়বারদের সাধনা ও মতবাদ। রামানুজীয় ভক্তিবাদ সারা দাক্ষিণাত্যে প্রবল ভাববত্তা প্রবাহিত করে, শঙ্কর বিরোধী দ্বৈতবাদের প্রভাব নানা স্থানে অল্পভূত হইতে থাকে। অনন্তশায়ী বিষ্ণু ও মুরলীধর কৃষ্ণের মহিমা কতকগুলি মঠ মন্দির ও সম্প্রদায়কে কেন্দ্র করিয়া ধীরে ধীরে ছড়াইয়া পড়ে। বাসুদেবের পিতা মধ্যগেহ ভট্ট ছিলেন ভক্তি রসপ্রাপ্ত সাধনধারার একজন ধারক ও বাহক। তাঁহার ইষ্ট অনন্তেশ্বর নারায়ণ, আর গৃহে পূজিত হইতেন শালগ্রাম শিলা। পুত্রের বাসুদেব নামকরণ হইতেও অনুমান করা যায়, মধ্যগেহ ভট্ট বেদান্তী বা কর্মকাণ্ডী সাধক ছিলেন না, সাধন-জীবনে ভক্তিমার্গই তিনি অঙ্গস্বরূপ করিয়া চলিতেন।

বলা বাহুল্য পিতার ঐতিহ্য ও ব্যক্তিত্বের প্রভাব আর গৃহের ভজন-পূজনময় পরিবেশ বাসুদেবের ধর্মীয় আদর্শ ও সাধন-জীবনকে অনেকাংশে প্রভাবিত করিয়া তোলে। অতি তরুণ বয়সেই এই প্রতিভাধর পণ্ডিত পরিণত হন এক শুদ্ধাচারী ভক্তিপরায়ণ সাধকে।

উড়ুপীতে শাস্ত্রবিদ আচার্য্য ও সাধু-সন্ন্যাসীর সংখ্যা কম নয়। ইহাদের মধ্যে বিত্তাবত্তা ও সাধনার দিক দিয়া বিশিষ্টতম হইতেছেন আচার্য্য অচ্যুতপ্রকাশ। বাসুদেব মনে মনে স্থির করিলেন, এবার এই মহাত্মার কাছেই বেদ-বেদান্ত ও ষড়্দর্শনের উচ্চতম পাঠ গ্রহণ করিবেন।

সেদিন অতি প্রত্যুষেই উড়ুপীতে অচ্যুতপ্রকাশের মঠে গিয়া তিনি উপস্থিত। প্রকৃতপক্ষে প্রণাম নিবেদন করিয়া নিজের পরিচয়

দিলেন, কহিলেন, “আচার্য্যবর, অনেক আশা নিয়ে আপনার চরণে শরণ নিতে এসেছি। আপনি আমায় কৃপা করুন, শাস্ত্রতত্ত্বের উপদেশ দিয়ে করুন কৃতকৃতার্থ।”

“বৎস, তোমার পিতা মধ্যগেহ নারায়ণ ভট্টকে আমি জানি। তিনি সুপণ্ডিত এবং বিষ্ণুর উপাসক। তাঁর ছেলে হয়ে আমার মত অদ্বৈত বেদান্তীর কাছ কেন তুমি শাস্ত্রের পাঠ নিতে এলে? এর রহস্য কি আমায় খুলে বলতো?” জিজ্ঞাসু নেত্রে চেয়ে থাকেন অচ্যুতপ্রকাশ।

“প্রভু, আমি আমার পিতার কাছে শুনেছি, অদ্বৈত বেদান্তী হয়েও আপনি ভক্তিমার্গের উপর খড়াহস্ত নন। চন্দ্রমৌলীশ্বর শিবের মন্দির আর শেবশায়ী-বিষ্ণু অনন্তেশ্বরের মন্দির, এই দুই পবিত্র পীঠেই রয়েছে আপনার স্বচ্ছন্দ গতায়াত। আর এ কথাও আমি শুনেছি, আপনার গুরু প্রাজ্ঞতীর্থ মহারাজ দশনামী সন্ন্যাসী হয়েও ভক্তিমার্গের প্রতি গভীরভাবে আকৃষ্ট ছিলেন। তাই অনেক ভেবে-চিন্তে আপনারই আশ্রমে আমি এসেছি।”

সুন্দর-সুঠাম দেহ এই তরুণ শিক্ষার্থীর দিকে সপ্রশংস দৃষ্টিতে তাকাইয়া থাকেন অচ্যুতপ্রকাশ। বাসুদেবের ছই নয়ন প্রতিভার দীপ্তিতে প্রোজ্জ্বল। আননে রহিয়াছে নির্ভা ও সঙ্কল্পের হৃতা। অচ্যুতপ্রকাশ অন্তরে মহা উৎফুল্ল হইয়া উঠিয়াছেন। বাসুদেবের সঙ্গে কিছুক্ষণ শাস্ত্রালাপের পর স্নেহপূর্ণস্বরে কহিলেন, “বৎস, আমি বুঝতে পারছি, পরমাত্মার কৃপায় তুমি দিব্য প্রতিভা নিয়েই জন্মেছো। একদিন দেশ ও ধর্মের মহা উপকার সাধিত হবে তোমার মনীষায় ও সাধনায়। আমি সানন্দে অমুমতি দিচ্ছি, আমার এ আশ্রমে থেকে উচ্চতর শাস্ত্রপাঠ তুমি গ্রহণ করতে পারো।”

সেদিন উড়ুপীর মঠে আচার্য্য অচ্যুতপ্রকাশের কাছে আশ্রয় লাভের পর হইতে বাসুদেবের জীবনে শুরু হইয়া গেল এক নতুনতর অধ্যায়।



জ্ঞান, সাংখ্য বেদ-বেদান্তের অধ্যয়ন অগ্রসর হয়, অপূর্ব্ব নিষ্ঠায় বাসুদেব এগুলি একের পর এক আয়ত্ত করিতে থাকেন। কিন্তু সব সময়েই দেখা যায়, গুরু অদ্বৈত-বেদান্তের পাঠ শুরু করিলেই বাসুদেব তাঁহার বিরুদ্ধে তুলিয়া ধরেন ভক্তিবাদী ব্যাখ্যা, আপন ক্ষুরধার বুদ্ধি ও অমাহুযী মনীষার সাহায্যে প্রয়োগ করেন বিস্ময়কর শাস্ত্র প্রমাণ ও যুক্তিতর্ক। ক্রমে উড়ুপীর বিভিন্ন মঠ-মন্দিরে ও সন্নিহিত অঞ্চলে আচার্য্য অচ্যুতপ্রকাশের এই প্রতিভাধর ছাত্রের খ্যাতি ছড়াইয়া পড়িতে থাকে।

পুত্র বাসুদেব এখন শাস্ত্র পারঙ্গম। বিজ্ঞাবত্তা ও চরিত্রনিষ্ঠায় বহু লোকের দৃষ্টি তিনি আকর্ষণ করিতেছেন। ভট্টদম্পতির অন্তর তাই গর্ব্ব ও তৃপ্তিতে ভরিয়া উঠিয়াছে।

একদিন অবসরমত মধ্যগেহে ভট্ট পুত্রকে নিকটে ডাকিলেন। প্রসন্ন কণ্ঠে কহিলেন, “বাসুদেব, তোমার মত কৃতী পুত্রকে পেয়ে আমি ও তোমার জননী পরম সুখী। কিন্তু বাবা, এখন তোমায় আমাদের একটা অনুরোধ রাখতে হবে। এবার তুমি গার্হস্থ্য আশ্রমে প্রবেশ করো। সুলক্ষণা একটি পাত্রী আমরা দেখে রেখেছি। তাকে তুমি বিবাহ করো, আর ঘরেই একটি অধ্যাপনার টোল খুলে ব'সো। সংসার জীবনে তুমি স্থির হয়ে বসলে আমরা একেবারে নিশ্চিন্ত হতে পারি।”

নতশিরে কিছুক্ষণ চুপ করিয়া থাকিয়া বাসুদেব উত্তর দেন, “পিতা, আপনি আমায় মার্জনা করুন। গার্হস্থ্য আশ্রম আমার জন্ত নয়। আমি সঙ্কল্প করেছি—অচিরেই একটি শুভদিন দেখে সন্ন্যাস গ্রহণ করবো, এবং আচার্য্য অচ্যুতপ্রকাশের কাছ থেকেই নেবো দীক্ষা ও সন্ন্যাস।”

ভট্ট চমকিয়া উঠেন। এ কি অদ্ভুত অপ্রত্যাশিত সঙ্কল্প তাঁহার পুত্রের! এ যে বিনা মেঘে বজ্রপাত! আর্দ্র কণ্ঠে কহেন, “বৎস,

কেন এমন মৰ্ম্মভেদী কথা বলছো ? তেবেছিলাম, তুমি সুপণ্ডিত ও ধৰ্ম্মনিষ্ঠ আচার্য্য হবে, যশ-অর্থ মানের হবে অধিকারী, আর তোমার হাতে ঘর-সংসারের ভার দিয়ে আমরা দিন কাটাবো ধ্যান ভজন নিয়ে—পরম নিশ্চিন্তে। তোমার তো সংসার ত্যাগ করা চলে না, বৎস।”

“সংসার অনিত্য বলে, মায়া-বিভ্রম বলে আমি সংসার ছাড়ছি, বাবা। সংসার ছাড়ছি, এ সংসারের প্রভু শ্রীনারায়ণের সেবায় লাগবো বলে। আপনাকে আর জননীকে যে তিনিই রক্ষা করবেন। আমার জীবনের লক্ষ্য চিরতরে স্থির হয়ে গেছে। সঙ্কল্প করেছি, ভক্তি-সাধনব্রত এই পৃথিবীতে ভক্তিবাদ নূতন করে প্রচার করতে হবে। আর সে প্রচার হবে শাস্ত্রভিত্তিক। আমি ভেতর থেকে শক্তি পেয়েছি, উপলব্ধি করেছি—এই ছরুহ ভগবৎ-কর্মে আমার একটা নির্দিষ্ট ভূমিকা রয়েছে।”

আত্মপ্রত্যয় ও সঙ্কল্পের দৃঢ়তা ফুটিয়া উঠে তরুণ বাসুদেবের চোখে মুখে।

ব্যাকুল কণ্ঠে পিতা কহেন, “বাবা, বাসুদেব, তোমায় যে আমরা লাভ করেছি অনন্তেশ্বর নারায়ণের কৃপায়। দীর্ঘদিন ব্রত উপবাস করে প্রভুর চরণে অস্তরের আবেদন জানিয়েছি, প্রসন্ন হয়ে তিনি তোমায় পাঠিয়েছেন আমাদের ঘরে।”

“প্রভুর বরে আমার জন্ম। তাইতো আমার দৃঢ় বিশ্বাস, প্রভুর আদিষ্ট কর্মযজ্ঞেই হবে আমার এ জীবন উৎসর্গিত।”

“সবই তো শুনলাম। কিন্তু বাবা, তুমি যে আমাদের একমাত্র পুত্র। তুমি সন্ন্যাস নিলে, তোমার পিতৃদান থেকেও যে আমরা বঞ্চিত হবো। এমনতর অধর্ম্মের কাজ তুমি ক’রো না, বাবা।”

নীরবে দাঁড়াইয়া কিছুকাল আত্মাবগাহন করেন বাসুদেব। তারপর ধীর প্রশান্তকণ্ঠে কহেন, “পিতা, আমার দ্বারা আপনার পারলৌকিক কল্যাণের কোন ক্ষতি না হয় তা আমি দেখবো।

বেশ, আচার্য্য অচ্যুতপ্রকাশের আশ্রয়ে থাকলেও, আমার সন্ন্যাস গ্রহণ আমি আপাততঃ স্থগিত রাখবো। আমার অন্তরাত্মা বলছে, অদূর ভবিষ্যতে আমার একটি অমুজ্জ্বল জন্মগ্রহণ করবে। তখন আর আপনাদের পিণ্ডলোপের ভয় থাকবে না। সে ভূমিষ্ঠ হবার পরেই আমি প্রবেশ করবো সন্ন্যাস আশ্রমে।”

পিতৃভক্ত বাসুদেব তাহার এ প্রতিজ্ঞা তজ্জ করেন নাই। উত্তর-কালে কনিষ্ঠভ্রাতার জন্মের পরই তিনি সংসার ত্যাগ করিয়াছিলেন।

সন্ন্যাস না নিলেও অচ্যুতপ্রকাশের কাছে দীক্ষা নিতে বাসুদেব বিলম্ব করেন নাই। আচার্য্যের মঠে থাকিয়া তাঁহার নির্দেশিত পথে অনন্ত নিষ্ঠায় তিনি উদ্যাপন করিয়া চলেন তাঁহার সাধনা ও স্বাধ্যায়। অচিরে সমগ্র কানাড়া অঞ্চলে তিনি পরিচিত হইয়া উঠেন এক অসামান্য পণ্ডিত ও সাধকরূপে।

এভাবে বারো বৎসর অতিক্রান্ত হওয়ার পর মধ্যাহ্নে নারায়ণ ভট্টের গৃহে আবির্ভূত হয় আর একটি পুত্রসন্তান।<sup>১</sup>

এবার বাসুদেবের অভীষ্ট সিদ্ধির পথে আর কোন বাধা থাকে না, জনক ও জননীর সন্মতি নিয়া তিনি চিরতরে গৃহত্যাগ করেন। পঁচিশ বৎসরের সাধননিষ্ঠ প্রতিভাদীপ্ত জীবনে শুরু হয় সন্ন্যাস আশ্রমের সুকঠোর ব্রত।

গুরু এই নবীন শিষ্যের সন্ন্যাস নাম দেন পূর্ণপ্রজ্ঞ-তীর্থ। পূর্ণপ্রজ্ঞে বাসুদেব ছিলেন আচার্য্য মধ্যাহ্নেহের পুত্র, এজ্ঞ আচার্য্য মধ্ব নামেও তিনি সে অঞ্চলে পরিচিত হইয়া উঠেন।

আচার্য্য অচ্যুতপ্রকাশের মঠে ছাত্র ও সন্ন্যাসী শিষ্যদের ভীড় লাগিয়াই আছে। নিত্যকার সাধনভজনের সঙ্গে সঙ্গে শিক্ষার্থী ও সাধুরা শাস্ত্রপাঠ ও বিচার বিতর্কে থাকেন সদা তৎপর। আর

---

১ উত্তরকালে এই শিষ্য পরিচিত হন বিষ্ণুতীর্থ নামে। পিতা ও মাতার দেহান্তের পর তিনিও জ্যেষ্ঠভ্রাতার অঙ্গসংগে সন্ন্যাস গ্রহণ করেন।

নবীন আচার্য্য মধ্বই ইহাদের মধ্যমণি। বিশেষ করিয়া বেদান্তের ভক্তিবাদী আলোচনায়, ভাগবত ও মহাভারত পুরাণের ব্যাখ্যানে তাঁহার সমকক্ষ কেহ নাই। ত্রায়শাস্ত্রে মধ্বের দখল অসামান্য। স্লযোগ পাইলেই বেদান্তের ভাষ্য নিয়া বর্ষায়ান গুরুর সঙ্গে তিনি বিতর্ক বাধাইয়া বসেন, গভীর শাস্ত্রজ্ঞান ও তর্কশক্তির সাহায্যে আচার্য্য শঙ্করের অদ্বৈতবাদের ক্রটি-বিচুতি উদ্ঘাটন করেন। এই মতবাদের উপর হানেন প্রচণ্ড আঘাত।

গুরু অচ্যুতপ্রকাশ কেবলাদ্বৈতী সন্ন্যাসী হইলেও অন্তরে অন্তরে ভক্তিরসের রসিক। ভক্তি আন্দোলনের একটা নূতন স্রোতধারা উড়ুপীর শেষশায়ী নারায়ণ বিগ্রহ অনন্তেশ্বরকে কেন্দ্র করিয়া বিস্তারিত হোক, এই আশা গোপনে এতকাল তিনি পোষণ করিতেছিলেন। এবার প্রতিভাধর নবীন শিষ্য মধ্বকে দেখিয়া, তাঁহার বিরাট প্রতিশ্রুতি লক্ষ্য করিয়া, তিনি মহা উল্লসিত। মনে প্রাণে সদাই উপলব্ধি করেন, উড়ুপীর মঠে যে উৎস তিনি রচনা করিতেছেন অদূর ভবিষ্যতে তাহার লোকপাবনী কল্যাণধারা ছড়াইয়া পড়িবে ভারতভূমির দিকে দিকে।

কয়েক বৎসরের মধ্যেই মঠের নেতৃত্ব তার মধ্বের উপর আসিয়া পড়ে। গুরু তাঁহাকে একদিন ডাকিয়া বলেন, “বৎস, আমার এ দেহ প্রাচীন হয়েছে, ক্রমে আরও অপটু হয়ে পড়বে। তাই আমার ইচ্ছে, তুমি এখানকার সন্ন্যাসীদের নেতা হয়ে বসো, আর মঠ পরিচালনার দায়িত্ব নিজ হাতে তুলে নাও।”

এক শুভদিনে অচ্যুতপ্রকাশ স্থানীয় সাধু-সন্ন্যাসী ও সঙ্জনদের আহ্বান করেন, সকলের সমক্ষে মধ্বের হাতে তাঁহার উড়ুপী মঠের সর্বসময় ক্ষমতা সঁপিয়া দেন। স্নেহপূর্ণ স্বরে কহেন, “বৎস, আজ হতে এই মঠের সমস্ত কর্তব্য সম্পাদনের ভার তোমার ওপর রইলো। এখানকার মঠাধীশরূপে তোমার নূতন নাম হলো—  
আনন্দ তীর্থ।”

উত্তরজীবনে মঞ্চকে তাঁহার সমস্ত শাস্ত্রগ্রন্থ ও ভাষ্যে গুরুদত্ত এই মঠাধীশ-নামই ব্যবহার করিতে দেখা গিয়াছে।

মঞ্চের সমকালীন ভারতে বিশেষতঃ দাক্ষিণাত্যে দার্শনিকতা ও ধর্মীয় মতবাদের দ্বন্দ্ব সংঘর্ষ নিতান্ত কম ছিল না। সারা দেশ তখন বহুতর খণ্ডরাজ্যে বিভক্ত। এই সব রাজসভায় তর্কদক্ষ পণ্ডিতদের সমাদর ছিল প্রচুর। ছোট বড় রাজারা যুদ্ধ বা বাদ-বিসম্বাদে লিপ্ত। পথ-প্রাস্তরের অবস্থাও তেমন নিরাপদ নয়। কিন্তু এই অশান্তিময় পরিবেশেও তর্কশূর বা বিচার-মল্লেরা পরমানন্দে দেশের সর্বত্র ঘুরিয়া বেড়াইতেন। তাঁহাদের সম্বর্ধনায় ও বিচার সভার অহুষ্ঠানে রাজা-প্রজা ধনী-নিধন সকলেরই উৎসাহ ও উল্লাসের সীমা থাকিত না।

বিচারমল্লতার জন্ত ঐ সব শাস্ত্রবিদ পণ্ডিতদের নানা উপাধি দেওয়া হইত। ইহাদের কেউ ছিলেন তর্ক-পঞ্চানন, কেউ বাদীসিংহ, কেউ বা খ্যাত ছিলেন প্রতিবাদী-ভয়ঙ্কর নামে। রাজসভা, মঠ-মন্দির বা ধর্ম অধিবেশনে এই সব তর্কদক্ষ হুর্দ্বর্ষ পণ্ডিতদের মর্যাদা ছিল অসাধারণ।

উড়ুপীর মঠে মাঝে মাঝে দেশ-বিদেশখ্যাত ভ্রাম্যমাণ পণ্ডিতদের আগমন ঘটিত। ইহাদের সহিত সংঘর্ষের জন্ত আচার্য্য মঞ্চ দীর্ঘদিন যাবৎ নিজেই প্রস্তুত করিয়া তুলিতেছেন। ইতিমধ্যেই সাধু-সন্ন্যাসী ও পণ্ডিতদের মধ্যে তাঁহার শাস্ত্রজ্ঞান ও বিচার নিপুণতার খ্যাতি কম ছড়াইয়া পড়ে নাই। বিদেশী পণ্ডিতেরা উড়ুপীতে আসিলেই আচার্য্য তাঁহাদের সহিত তর্কযুদ্ধে নামিতেন, ভক্তিবাদী ব্যাখ্যা ও বিচারের মধ্য দিয়া করিতেন তাঁহাদের পর্য্যদন্ত।

তর্কযুদ্ধে জয়ী হইলে পাণ্ডিত্যের খ্যাতি বাড়ে, বিপক্ষকে ধরাশায়ী করিয়া একটা আত্মতৃপ্তিও পাওয়া যায়, একথা ঠিক। কিন্তু মঞ্চ এইসব দ্বন্দ্ব-সংঘর্ষে উৎসাহী হইতেন আরও একটা বড় কারণে। তাঁহার জীবন একটি গঠনমূলক ঐশ্বরীয় কর্মের জন্ত উৎসর্গীত। ভক্তি-আন্দোলনের একটি নূতন ধারা তিনি প্রবর্তন করিতে চান।

একাজ করিতে হইলে প্রথমত চাই শব্বরের অদ্বৈতবাদের খণ্ডন, অপর দিকে চাই রামানুজের বিশিষ্টাদ্বৈত বাদ হইতে একটি পৃথক ও নূতনতর ভক্তিবাদের ধারা উৎসারিত করা। ইহা করিতে হইলে প্রথমে শাস্ত্র পারঙ্গম ও বিচারদক্ষ পণ্ডিতদের পরাভূত করা ও স্বমতে আনয়ন করা দরকার। নতুবা জনসাধারণ তাহা গ্রহণ করিতে চাহিবে কেন? এ সময়ে উড়ুপীতে আসিয়া য়াঁহারাই তর্কযুদ্ধে অবতীর্ণ হইয়াছেন তাঁহারাই মধ্বের তর্ক-শরজালে হইয়াছেন ভূতলশায়ী।

প্রিয় শিষ্যের কৃতিত্বে বুদ্ধ আচার্য্য অচ্যুতপ্রকাশ আনন্দ ও গর্বে তরপুর। সেদিন তাঁহাকে নিকটে ডাকাইয়া কহেন, “বৎস মধ্ব, যে সঙ্কল্প তুমি গ্রহণ করেছো, তাতে শুধু উড়ুপীর মঠে বসেই সিদ্ধ হবে না। হ্রগপ্রাকারের আড়ালে বসে থেকে ক’টি প্রতিপক্ষকে তুমি পরাস্ত করবে? এবার হ্রগের বাইরে যাও। আশ্চর্য্যকার মনোভাব ছেড়ে দিয়ে এগিয়ে পড়ো আক্রমণ করতে। আগে দাক্ষিণাত্যের রাজসভা ও মঠ-মন্দিরগুলিতে উপস্থিত হয়ে বিচার-যুদ্ধ আহ্বান করো। তারপর বেরিয়ে পড়ো উত্তর ভারতের ধর্ম্মনেতাদের প্রতিদ্বন্দ্বী হয়ে।”<sup>১</sup>

গুরুর নির্দেশ মধ্ব সানন্দে মানিয়া নেন। শুরু হয় সদলবলে তাঁহার দক্ষিণ ভারত পর্য্যটন ও শাস্ত্রবিচারের অমুষ্ঠান। এ সময়ে বিভিন্ন অঞ্চলের সাধক ও দার্শনিকদের তিনি তর্কযুদ্ধে পরাস্ত করিতে

১ তখনকার দিনে ভারতের সকল দার্শনিক কেজেই তাত্ত্বিকতা বুদ্ধি পাইয়াছিল। একাদশ শতাব্দী হইতে চতুর্দশ শতাব্দী পর্য্যন্ত জ্ঞান ও বোদ্ধান্তের ক্ষেত্রে বিচারমগ্নতা বেশ চলিয়াছে। এই সময়েই তাত্ত্বিক শিরোমণি ঈর্ষ মিজ, গদেশ উপাধ্যায়, চিৎস্থখাচার্য্য, আনন্দবোধ ভট্টারকাচার্য্য, লীলাবতীকার বরুণাচার্য্য, বেদান্ত দেশিকাচার্য্য ও বিদ্যারণ্য মুনীষরের আবির্ভাব। ইহারা সকলেই তাত্ত্বিক, এই কয়েক শতাব্দী তাত্ত্বিকতারই যুগ বলিলে অত্যুক্তি হয় না।—প্রবন্ধাঙ্কন : বেদান্তধর্ম্মের ইতিহাস পৃষ্ঠা ৫২০

সমর্থ হন। অবশেষে ঘুরিতে ঘুরিতে উপস্থিত হন বিষ্ণুমঙ্গলম তীর্থে।  
পুত্র অচ্যুতপ্রকাশও এখানে তাঁহার সহিত মিলিত হইয়াছিলেন।

মধ্ববিজয় ও মণিমঞ্জরীতে বলা হইয়াছে, ঋদ্ধি সিদ্ধি সম্পন্ন মধ্ব এই সময়ে তাঁহার সঙ্গীদের কাছে কিছু যোগৈশ্বর্য প্রকটিত করেন। পথ চলিতে চলিতে সেবার সবাই এক নিবিড় অরণ্যের মধ্য দিয়া অগ্রসর হইতেছেন। নিকটে কোন জনমানব নাই, আশ্রয় বা খাচ্চ সংগ্রহের কোন সম্ভাবনাও দেখা যাইতেছে না। অথচ সঙ্গীরা ক্ষুধা-তৃষ্ণায় কাতর হইয়া উঠিয়াছে। এভাবে আর কিছুক্ষণ চলিতে থাকিলে ক্ষুৎপিপাসা ও পথশ্রমে কয়েকজনের জীবনান্ত ঘটিবে সন্দেহ নাই।

এ সঙ্কটে কি করা যায়? ব্যগ্র ব্যাকুল মধ্ব সহযাত্রীদের নিয়া এক বৃক্ষতলে আশ্রয় গ্রহণ করেন। ইঠাৎ তাঁহার দেহে দেখা দেয় দিব্য ভাবের আবেশ। এক সঙ্গীর বুলিতে ভুক্তাবশিষ্ট এক টুকরা শুকনা রুটি পাওয়া যায়। ভাবাবিষ্ট মধ্ব অক্ষুটস্থরে বার বার কি যেন বলিতে থাকেন আর ঐ রুটিটি হাত দিয়া চাপিয়া ধরেন। ক্ষণপরেই সকলে সবিস্ময়ে দেখেন—সঙ্গীদের সবার উদরপূর্ব্বির উপযোগী একরাশ রুটি কোথা হইতে ঐ বুলির মধ্যে আসিয়া গিয়াছে।

ভক্ত পণ্ডিত নারায়ণাচার্য্যের লেখা গ্রন্থে যোগবিভূতি সম্পন্ন মধ্বের অমানুষী ভোজন সামর্থ্যের একটি চটকদার কাহিনী রহিয়াছে। অনেকের ধারণা, মহাভারতে বায়ুপুত্র ভীমের সম্বন্ধে যাহা বলা হইয়াছে এ কাহিনী অনেকটা তাহারই অনুরূপে রচিত।

নানা অঞ্চলের বিচার সভায় জয়ী হইয়া শিষ্যগণ সহ মধ্ব এবার ত্রিবেঙ্গ্রামে আসিয়া পৌঁছিয়াছেন। ভক্তিমান ও বিজ্ঞোৎসাহী বলিঙ্গা এখানকার রাজার খ্যাতি যথেষ্ট। মধ্ব তাঁহার সহিত সাক্ষাৎ করিলেন। আগন্তুক সন্ন্যাসীর নবীন বয়স, চোখে মুখে পাণ্ডিত্য ও প্রতিভার দীপ্তি ছড়ানো। প্রথম দর্শনেই রাজা তাঁহার প্রতি আকর্ষিত

হইলেন। সাদর সম্বর্জন্যের পর কহিলেন, “সন্ন্যাসীবর, আদেশ করুন, আপনার কোন্ সেবায় নিজেকে আমি নিয়োজিত করতে পারি।”

“মহারাজ আমি সর্বভ্যাগী সন্ন্যাসী, নিজের সেবার জন্ত আমি মোটেই আগ্রহী নই। এই ভক্তিহীন ভ্রষ্টাচার যুগে ভক্তিবাদ প্রচারের জন্ত আমি কৃতসঙ্কল্প। আপনি কালবিলম্ব না ক’রে একটি বিচার-সভা আহ্বান করুন, সেখানে ভক্তিহীন অদ্বৈতবাদের উপর হানবো আমি চূড়ান্ত আঘাত।”—ধীর গম্ভীর স্বরে বলেন আচার্য্য মধ্ব।

“আপনি কি রামানুজের বিশিষ্টাদ্বৈতবাদের অনুগামী?”

“না, মহারাজ, আমার ভক্তিবাদ তা থেকে একেবারে পৃথক। আমার মতে, ব্রহ্ম ও জীব নিত্য পৃথক—অর্থাৎ দুটি পৃথক বস্তু। কারণ ব্রহ্ম স্বতন্ত্র, জীব অস্বতন্ত্র। তাই এই দ্বৈতবাদকে বলা হয় স্বতন্ত্র-অস্বতন্ত্রবাদ। এতে রয়েছে শঙ্কর ও রামানুজ দুই-এরই চরম বিরোধিতা।”

“আপনার তত্ত্বের পূর্বসূরী কারা? তাঁদের নাম তো শুনি নি।”

“মহারাজ, সনৎকুমারই এ তত্ত্বের আদি গুরু। ঈশ্বরের কৃপায় আমার মাধ্যমেই এর পুনঃপ্রচার হতে যাচ্ছে।”

“কিন্তু যতিবর, আপনি কি আপনার এই মতবাদের সমর্থনকল্পে ব্রহ্মসূত্রের কোন ভাষ্য রচনা করেছেন? নইলে দেশের সাধু-সন্ন্যাসী ও পণ্ডিতসমাজ এ মতবাদ গ্রহণ করবে কেন?”

“মহারাজ, আমার সূত্রভাষ্য বিরাজিত রয়েছে আমার কণ্ঠেই। আপনি স্বয়ং বিচার-সভার ব্যবস্থা করুন, আর প্রতিপক্ষরূপে আমন্ত্রণ জানান কোন অদ্বৈতবাদী তর্কযোদ্ধাকে।”

“যতিবর, নিকটেই শৃঙ্গেরীতে বিরাজ করছেন আমার গুরু বিভাশঙ্কর মহারাজ। তিনি শুধু শৃঙ্গেরী মঠেরই অধীশ্বর নন, শঙ্কর অদ্বৈতবাদের এক শ্রেষ্ঠ স্তম্ভ সারা দাক্ষিণাত্যে। বেশ কথা, ওঁকেই আমি আমন্ত্রণ জানাচ্ছি আপনার প্রতিপক্ষ হিসাবে।”



ছই আচার্য্যের বিচার-সভা বিরাট চাকুলোর সৃষ্টি করে। প্রসিদ্ধ পণ্ডিত, সাধক ও অগণিত উৎসাহী জনগণের সম্মুখে শুরু হয় শাস্ত্রীয় যুক্তিতর্কের সুতীত্র সংঘাত। নবীন সন্ন্যাসী মধ্ব কিন্তু এই বিচার দ্বন্দ্বে তেমন সুবিধা করিতে পারেন নাই। অমামুখী প্রতিভার অধিকারী, বর্ষায়ান পণ্ডিত ও সাধক শিরোমণি বিভাশঙ্করের ঐতিহাসিক যুক্তিজাল তিনি ছিন্ন করিতে পারেন নাই। শেষটায় এই শক্তিধর প্রতিপক্ষের কাছে তাঁহাকে পরাজয় স্বীকার করিতে হয়।

এই পরাজয়ের গ্রানি মধ্বের জীবনে আনে এক সুদূরপ্রসারী প্রতিক্রিয়া। এখন হইতে শুধু অদ্বৈতবাদের উপরই তিনি খড়াহস্ত হন নাই, আচার্য্য বিভাশঙ্কর ও শূদ্রেরী মঠকেও জ্ঞান করিতে থাকেন তাঁহার প্রধান বৈরীরূপে।<sup>১</sup> বলা বাহুল্য, ত্রিবেঙ্গাম সভার সেদিনকার এ করুণ অভিজ্ঞতা মধ্বের বিরোধিতাকে তীব্রতর করিয়া তোলে, আর তাঁহার নিজস্ব দ্বৈতবাদ স্থাপনের সঙ্কল্পকে করে দৃঢ়তর।

তথ্য প্রমাণ হইতে দেখা যায়, ১২২৮ খৃষ্টাব্দের কাছাকাছি কোন সময়ে আচার্য্য তাঁহার দক্ষিণ-ভারত পর্য্যটন শেষ করেন এবং পর্য্যটনের শেষের দিকেই শূদ্রেরীর মঠাধীশ বিভাশঙ্করের সহিত হয় তাঁহার বিচার বিতর্ক।<sup>২</sup> নবীন সন্ন্যাসী মধ্বের বয়স তখন প্রায় ত্রিশ বৎসর।

ত্রিবেঙ্গাম হইতে মধ্ব সরাসরি চলিয়া যান রামেশ্বরধামে এবং সেখানে চারমাস কাল অতিবাহিত করেন নিভৃত তপস্যায়। এখানেও

১ শূদ্রেরী মঠ ও উড়ুপীর মধ্বমঠের দ্বন্দ্ব, বাহাছবাব ও শত্রুতা দীর্ঘকাল ধরিয়া চলে। কলে মধ্ব ও তাঁহার অহুগামীরা নামাভাবে নিগৃহীত হইতে থাকেন। প্রায় এক শতাব্দীর পরে মধ্ব-মত ব্যাপক জনসমর্থন লাভ করিলে উভয় মঠাধীশের মধ্যে মৈত্রী ও সৌজন্যমূলক সম্পর্ক গড়িয়া উঠে।

২ শূদ্রেরী মঠের অধ্যক্ষ-পত্নী হইতে দেখা যায়, স্বামী বিভাশঙ্কর গদীতে আরোহণ করেন ১২২৮ খৃষ্টাব্দে। অল্পবিত্ত হয়, ইহার কিছু পরেই মধ্বের সহিত তাঁহার লাক্ষ্য হয় ও লক্ষ্য বাধে।

অদ্বৈতবাদী পণ্ডিত ও সন্ন্যাসীরা দলে দলে আসিয়া তাঁহাকে বিচার-বিতর্কে আহ্বান জানান। কিন্তু তপস্চাপরায়ণ মঞ্চকে এসময়ে তর্কসভায় টানিয়া আনা সম্ভব হয় নাই। আপন মনে ইষ্টধ্যানে নিমগ্ন থাকিয়া তিনি সমাপ্ত করেন তাঁহার চাতুর্য্যম্ভ্রত।

অতঃপর সদলবলে তিনি ত্রীরঙ্গমে উপনীত হন। পরমপ্রভু নারায়ণের সেবা-অর্চনায় কিছুদিন কাটানোর পর পাল্লর নদীর তীর ধরিয়া বিষ্ণুকাঞ্চীতে প্রবেশ করেন। সেখান হইতে ফিরিয়া আসেন উড়ুপীতে।

বিষ্ণুকাঞ্চীতে থাকাকালে একটি চাঞ্চল্যকর ঘটনা ঘটে। নারায়ণ আচার্য্য ইহার বিবরণ দিয়াছেন। এই ঘটনাটির মধ্য দিয়া মঞ্চের অলৌকিক প্রতিভার প্রকাশ দেখা যায়। তাঁহার আগমনবার্তা শুনিয়া একদল অদ্বৈতী ও শৈব সন্ন্যাসী তাঁহাকে ফিরিয়া ধরেন এবং তাঁহাকে নানাভাবে উত্তেজিত করিয়া টানিয়া আনেন শাস্ত্র বিচারের দ্বন্দ্বে। মঞ্চের ভিতরে এ সময়ে দেখা যায় এক দিব্য ভাবের আবেশ। শাস্ত্রের এক একটি শব্দের বহুতর অর্থ ও ছোতনা তিনি প্রকাশ করিতে থাকেন তড়িৎবেগে ও অনর্গলভাবে। স্বয়ং সরস্বতী যেন এই নবীন সন্ন্যাসীর কণ্ঠে সেদিন আবির্ভূত। বিচারকামী পণ্ডিতেরা তাঁহার এই অমামুখী প্রতিভা ও অলৌকিক প্রজ্ঞা দেখিয়া বিস্ময়ে হতবাক্ হইয়া যান। বিষ্ণুকাঞ্চী ও শিবকাঞ্চী উভয় স্থানেই মঞ্চের জয়জয়কার ধ্বনিত হয়।

উড়ুপীর মঠে ফিরিয়া মঞ্চ গুরুদেব অচ্যুতপ্রকাশের পদবন্দনা করিলেন। সবিস্তারে বর্ণনা করিলেন নানা তীর্থের নানা বিচার সভার বিচিত্র অভিজ্ঞতা।

মঞ্চের মনোভাব বুঝিতে গুরুর ভুল হয় নাই। প্রশ্ন করিলেন, “বৎস, পর্য্যটন শেষে তোমার মন এমন ভারাক্রান্ত হয়ে আছে কেন, বলতো?”

বৃহৎ কণ্ঠে মঞ্চ নিবেদন করেন, “প্রভু, চলার পথে বহু বিচার-সভার

সম্মুখীন হয়েছি। জয় পরাজয় দুই-এরই অভিজ্ঞতা হয়েছে এবং পরাজয় থেকে জয়মালাই লাভ করেছি বেশীর ভাগ স্থানে। আমার আত্মবিশ্বাস বেড়েছে, ভক্তি-সাম্রাজ্য স্থাপনের সঙ্কল্পও আরো দৃঢ় হয়েছে সন্দেহ নেই। কিন্তু প্রভু, ত্রিবেন্দ্রামের সভায় শৃঙ্গেরীর অধ্যক্ষের কাছে যে ভাবে আমি পরাস্ত হয়েছি তার গ্লানি যে এখনো ভুলতে পারছি নে।”

“ভালোই হয়েছে বৎস। শক্তিমান প্রতিপক্ষের হাতে এ ধরণের আঘাতের তোমার প্রয়োজন ছিল। এ আঘাত থেকে নিশ্চয় বুঝতে পেরেছো, কোথায় কোন্ ক্রটি-বিচ্যুতি তোমার ভেতর লুকিয়ে রয়েছে। নিজের মতবাদের ভিত্তি আর তার দুর্গপ্রাকার আরো বেশী সতর্কতার সঙ্গে এবার গড়ে তোলো।”

“হ্যাঁ প্রভু, আমি ইপলব্ধি করেছি—একটা নূতন ভক্তিপন্থী দ্বৈতবাদ ভারতে আমি স্থাপন করতে চাই অথচ আমার স্বপক্ষে নেই আমার এই মতবাদের সমর্থক ব্যাসদেবের বেদান্তসূত্রের কোন নূতন ভাষ্য।”

“ঠিকই বলেছো, সূত্রভাষ্য ছাড়া দেশের সাধক ও দার্শনিকেরা তোমার নূতন মতবাদ গ্রহণ করবে কেন? তাই আমি বলছি, তুমি অতি সত্বর তোমার মতবাদের সমর্থক একটি গীতাভাষ্য রচনা কর। তারপর কয়েক বৎসর উড়ুপীতে নিবিষ্ট হয়ে বংসে সমাপ্ত করো ব্যাসসূত্রের ভাষ্য।”

“তারপর?”

“তারপর তুমি হিমালয়ে যাও। মহর্ষি ব্যাসদেবের কৃপালাভের চেষ্টা করো। নূতনতর সূত্রভাষ্য হাতে নিয়ে—দৃষ্টকণ্ঠে ঘোষণা করো নূতন ভক্তিবাদ এবং তারপর শুরু হোক উত্তর ভারতে তোমার বিজয়-অভিযান। বৎস, স্মরণ রেখো, শৃঙ্গেরী মঠই ভারতবর্ষ নয়। আর শুধু শাক্তর মতই তোমার প্রতিপক্ষ নয়। শাক্তর অদ্বৈতবাদ ছাড়াও তোমায় যুঝতে হবে ভাক্তর, রামানুজ প্রভৃতির মতবাদের

বিরুদ্ধে। এখন থেকে তোমার প্রস্তুতিকে আরো দুর্ভেদ্য, আরো নিখুঁত ক'রে তোল।”

গুরুর এই নির্দেশ মানিয়া নিয়া মধ্ব রত হইলেন নিজ মতের সমর্থক ভাষ্য রচনায়। কয়েক বৎসরের মধ্যে আরও কার্য্য সমাপ্ত হইয়া গেল। এবার তাঁহার দৃষ্টি পড়িল উত্তর ভারতের আধ্যাত্মিক প্রাণকেন্দ্র বারাণসী ও হরিদ্বারের দিকে।

মধ্ব মনে মনে স্থির করিলেন, প্রথমে স্বরচিত সূত্রভাষ্য নিয়া বারাণসীতে যাইবেন। সেখানকার সন্ন্যাসী, দার্শনিক ও পণ্ডিত সমাজ তাঁহার যে সমালোচনা করিবেন, তদনুযায়ী করা হইবে ভাষ্যের পরিবর্তন। তারপর হিমালয়ে গিয়া মাগিবেন ব্যাসদেবের আশীর্ব্বাদ। এই আশীর্ব্বাদে বলীয়ান হইয়া হরিদ্বারে নামিয়া আসিবেন—ঘোষণা করিবেন তাঁহার নূতনতর ভক্তিবাদ।

মূল্যবান পুঁথিপত্র বুলিতে ভরিয়া মধ্ব পদব্রজে উত্তর ভারতের দিকে রওনা হইলেন। সঙ্গে রহিল কয়েকটি অন্তরঙ্গ শিষ্য ও একদল তীর্থযাত্রী।

তখনকার দিনে তীর্থ পর্য্যটনে বিপদের অস্ত ছিল না। পথিমধ্যে প্রায়ই অতিক্রম করিতে হইত বড় বড় অরণ্য। এই সব অরণ্যে ছিল হিংস্র বাঘ ও সাপের ভয়, ইহা হইতেও বিপজ্জনক ছিল দস্যু ভয়। পথচারীরা ধনী কি নির্ধন, গৃহস্থ কি সন্ন্যাসী, কোন কিছু বিচার করিত না। সুর্যোগ পাইলেই অতর্কিতে ঝাঁপাইয়া পড়িয়া পথিকের সর্ব্বস্ব লুটিয়া নিত।

চলার পথে সঙ্গিগণসহ আচার্য্য মধ্বকেও বার বার কম বিপদে পড়িতে হয় নাই। কিন্তু কখনো ঈশ্বরের অনুগ্রহে, কখনো বা তাঁহার নিজের যোগশক্তির বলে আচার্য্য ও তাঁহার সঙ্গীরা চরম বিপদ ও লাঞ্ছনার হাত হইতে রেহাই পাইয়াছেন। নারায়ণ আচার্য্য

তঁাহার মধ্ববিজ্ঞয়ে এ ধরণের নানা অভ্যাশ্চর্য্য কাহিনীর বিবরণ দিয়াছেন :

মহারাত্ত্রের ঋগুরাজ্য দেবগিরিতে সেবার এক কৌতুকাবহ ঘটনা ঘটে। এখানকার তরুণ রাজা মহাদেব কিছুদিন আগে সিংহাসনে আরোহণ করিয়াছেন। তরুণ বয়স, অস্তুরে উৎসাহ উদ্দীপনার অবধি নাই। জনসাধারণের কল্যাণের জন্ত এক দীর্ঘ খাল খননের কাজে তিনি হাত দিয়াছেন। প্রকল্প অতি বৃহৎ এবং অল্প সময়ের মধ্যে তাহা সমাপ্ত করিতে হইবে। তাই রাজা মহাদেব অনেক সময় নিজে দাঁড়াইয়া থাকিয়াই খননের কাজ পরিদর্শন করেন।

ঢোল শোহরত করিয়া রাজার আদেশ জানানো হইয়াছে। যে কোন পথচারীই এই খালের নিকটবর্তী অঞ্চল দিয়া যাতায়াত করিবে, খননের কার্যে তাহাকে দিতে হইবে অস্তুত একদিনের কামিক পরিশ্রম। কাঁকি দিয়া কেহ এই কাজ এড়াইয়া না যায় এ জন্ত রাজার ভারী কড়া ব্যবস্থা।

মধ্ব ও তঁাহার শিষ্যেরা একদল তীর্থযাত্রীর সঙ্গে সেদিন খালের পাশ দিয়া যাইতেছেন। গ্রহরীরা তঁাহাদের আটক করিল। রাজার আদেশ শুনাইয়া দিয়া কহিল, “এবার তোমাদের ঝোলাঝুলি রেখে, কোদাল হাতে খাদের ভেতর নেমে পড়ো।”

মধ্বের শিষ্য ও সঙ্গীরা বুঝান, “ভাই, আমরা সাধু-সন্ন্যাসী। গঙ্গাভীরের তীর্থদর্শনে যাচ্ছি। রাজা যে আইন করেছেন, তঁার গৃহস্থ প্রজারা তা মেনে চলবে। ভিন্দেদশী মানুষ, পরিব্রাজক সাধু-সন্ন্যাসী, এদের ওপর তো এ আইনের প্রয়োগ চলতে পারে না।”

কিন্তু কে কাহার কথা শোনে? রাজরক্ষীরা জোর চেষ্টামেচি ও গালাগালি শুরু করিয়া দিল।

পাত্রমিত্র সঙ্গে নিয়া দেবগিরি-রাজ্য সেদিন খাল-খননের কাজ পরিদর্শন করিতে আসিয়াছেন। রক্ষী ও সাধুদের সোরগোল শুনিয়া সেদিকে তিনি আগাইয়া আসেন। গভীর স্বরে প্রশ্ন করেন,

“ব্যাপার কি ? কাজকর্ম না করে এখানে এত হট্টগোল করা হচ্ছে কেন ?”

রক্ষীদের পক্ষ হইতে সব বলা হইবার পর মধু রাজাকে উদ্দেশ্য করিয়া কহেন, “মহারাজ, প্রজাসাধারণের মঙ্গলের জন্য আপনি এই খাল খননের কাজে হাত দিয়েছেন, খুবই ভালো কথা। কিন্তু এতে সাধু-সন্ন্যাসীদের ধরে টানাটানি কেন ?”

“রাজার বিধান সাধু ও অসাধু সবার ওপরই প্রযোজ্য।”

“কাজের দায়িত্ব প্রধানতঃ রাজার আর তাঁর গৃহস্থ প্রজাদের। সাধু-সন্ন্যাসীরা কেন এতে কায়িক পরিশ্রম দিতে যাবে ?”

“কেন, সাধু-সন্ন্যাসীরা কি সমাজ থেকে কিছু পান না ? তাঁদের খাওয়া-পরা চলে কোথা থেকে ? জনসাধারণ তাঁদের খাবার যোগায়, প্রতিদানে জনকল্যাণের কাজে কিছুটা ভাগ তাঁদের নিতে হবে বৈ কি ?”

“মহারাজ, আপনি ভ্রান্ত। সাধু-সন্ন্যাসীর কাজকে আপনি স্থূল দৃষ্টিতে দেখছেন কেন। আসলে তাঁদের কাজ সম্পন্ন হয় সূক্ষ্ম স্তরে। তাঁদের ত্যাগ তিতিক্ষা, প্রেরণা ও আশীর্ব্বাদ এনে দেয় প্রকৃত কল্যাণ।”

বিরক্তির সুরে রাজা মহাদেব বলে উঠেন, “আপনার এতো কিছু তত্ত্বকথা শোন্বার সময় আমার নেই। রাজ-সরকার থেকে যে আদেশ প্রচার করা হয়েছে, সবাইকে নির্বিচারে তা মেনে চলতে হবে। আর এক মুহূর্ত্ত দেরী না করে খাল খননের কাজে আপনারা সবাই নেমে পড়ুন।”

“বেশ, মহারাজের আদেশমতই কাজ হবে, কিন্তু তার আগে একটা ক্ষুদ্র নিবেদন আছে।”—বিনীতভাবে বলেন আচার্য মধু।

“কি আপনার সেই নিবেদন ?”

“মহারাজ, আপনি এ রাজ্যের অধীশ্বর, প্রজাদের পিতা, রক্ষা-কর্তা। প্রজার মঙ্গলের জন্য পবিত্র অমুষ্ঠান আপনি শুরু করছেন,

তাতে আপনার মঙ্গল হস্তের স্পর্শ থাকা উচিত। এতো বড় একটা কাজ হতে যাচ্ছে, কিন্তু তাতে আপনার স্পর্শ পড়েছে কি?”

“না, তা পড়ে নি বটে,”—নরম সুরে স্বীকার করেন দেবগিরির রাজা।

“সে ভুল আজই এখনি সংশোধন করুন মহারাজ। আনুষ্ঠানিক-ভাবে কিছুটা মাটি কেটে তা মাথায় নিয়ে আপনি দূরে ফেলে আসুন, এতে আপনার কর্তব্য যেমন করা হবে, তেমনি প্রজারাও পাবে উৎসাহ ও প্রেরণা।”

“আপনি ঠিকই বলেছেন, সন্ন্যাসীবর। আমি সানন্দে এখনি খাল-খননের কাজে হাত লাগাচ্ছি।”—বলার সঙ্গে সঙ্গে কোদাল ও ঝুড়ি নিয়ে রাজা খালের ভিতর নামিয়া পড়েন।

খনন শুরু করার সঙ্গে সঙ্গে রাজা যেন ভূতাবিষ্ট হইয়া যান। হুই চক্ষু রক্তবর্ণ, নাসিকায় বহিতেছে ঘন ঘন দীর্ঘশ্বাস। যন্ত্রচালিত মানুষের মত কেবলই ঝুড়ি-ঝুড়ি মাটি কাটিয়া চলিয়াছেন, একাজে শ্রাস্তি নাই, ক্লান্তি নাই, নাই কোন বিরতি। প্রহরের পর প্রহর অতিবাহিত হইতেছে, কিন্তু বহু চেষ্টা করিয়াও রাজাকে কেহ থামাইতে পারিতেছে না। তবে কি তিনি উন্মাদ হইয়া গেলেন? অথবা কোন অশরীরী প্রেত তাঁহার উপর ভর করিয়াছে? মন্ত্রী ও রাজপরিষদেরা কিংকর্তব্য-বিমূঢ় হইয়া ইতস্তত ছুটাছুটি করিয়া বেড়াইতেছেন। প্রাসাদে খবর দেওয়া হইল, রাণী ও পুরনারীরা ভীত সন্ত্রস্ত হইয়া কান্না জুড়িয়া দিলেন।

তবে ইতিমধ্যে সবাই বুঝিয়া নিয়াছেন, রাজার এই অস্বাভাবিক অবস্থার জন্ত দায়ী সন্ন্যাসীবর মধব। মধবের এক শিষ্য অতঃপর ব্যাপারটা কাঁস করিয়া দেন। মুচকি হাসিয়া কহেন, “রাজার দুর্ভাগ্য, আমাদের আচার্য্য যে কতবড় মহাপুরুষ তা তিনি বুঝতে পারেন নি। মধব হচ্ছেন বায়ুর অবতার, প্রভু নারায়ণের লীলার প্রধান সহায়ক। রাজার ওপর তিনি ক্রুদ্ধ হয়েছেন, তাই বায়ুর ভর হয়েছে রাজার

ওপর। আচার্য্যকে প্রসন্ন না করলে, এবার রাজার আর রক্ষা নেই, এভাবে দিনরাত বৎসরের পর বৎসর তাঁকে যুক্তিকা খনন করে যেতে হবে।”

অতঃপর সবাই মিলিয়া মধ্বের চরণে বার বার ক্ষমা-প্রার্থনা করিতে থাকে। আচার্য্যের ক্রোধ প্রশমনের সঙ্গে সঙ্গে দেবগিরি-রাজের ভূতাবিষ্ট ভাব কাটিয়া যায়। সম্পূর্ণরূপে তিনি সুস্থ ও স্বাভাবিক হইয়া উঠেন।

এবার স্বজনগণসহ রাজা মধ্বের চরণে প্রণত হন, তাঁহার কৃপা ভিক্ষা করেন। প্রসন্ন মনে রাজাকে আশীর্ব্বাদ জানাইয়া মধ্ব বলেন, “মহারাজ, একটা কথা সদাই স্মরণ রাখবেন, সাধু-সন্ন্যাসীরা কর্ম্ম ও ধ্যান মননের ভেতর দিয়েই সমাজের প্রকৃত কল্যাণসাধন ক’রে যাচ্ছেন। ভগবান শ্রীনারায়ণের দর্শন ক’জন পায়? কিন্তু নারায়ণের চিহ্নিত সেবক সাধু-সন্ন্যাসীদের দর্শন সবাই অনায়াসে পেতে পারে। এঁদের ভেতর দিয়েই পৃথিবী আর বৈকুণ্ঠের ভেতর রচিত হয় যোগ-সূত্র। তাই লক্ষ্য রাখবেন, আপনার রাজ্যে সাধুদের অমর্যাদা যেন না হয়। আশীর্ব্বাদ জানাচ্ছি, আপনার এই খাল খননের কাজ অতি অল্প সময়ের মধ্যে সমাপ্ত হবে।”

অনুতপ্ত দেবগিরি-রাজ মধ্বের কাছে ক্ষমা ভিক্ষা করিয়া নিলেন। এই রাজ্যে কিছুদিন অবস্থানের জন্ত তাঁহাকে সান্ন্যাস্য অমুরোধও জানাইলেন, কিন্তু তাঁহাকে আর ধরিয়া রাখা গেল না।

আচার্য্য মধ্বের আশীর্ব্বাদ অচিরে ফলিয়া যায়। রাজা মহাদেব স্বহস্তে কোদাল নিয়া সারাদিন খাল কাটিয়াছেন এ সংবাদ বিদ্যুৎ-বেগে ছড়াইয়া পড়ে। সহস্র সহস্র প্রজা উৎসাহে মাতিয়া উঠে; খাল খননের কাজে লাগিয়া যায়। রাজার মনস্কাম এভাবে পূর্ণ হয়।

পণ্ডিত নারায়ণ-আচার্য্য মণিমঞ্জরীতে পরমগুরু মধ্বের যোগ-বিভূতি প্রদর্শনের কয়েকটি ঘটনা উল্লেখ করিয়াছেন :



পরিব্রাজকের পথে মধ্ব ও তাঁহার শিষ্যগণ সেবার উত্তর-পশ্চিম ভারতের এক তুর্কী-মুসলমান রাজার সীমান্তে আসিয়া পৌঁছিয়াছেন। রাজ্যে প্রবেশ করিতে যাইবেন এমন সময় রক্ষী সেনারা তাঁহাদের বাধা দিল। কিন্তু আচার্য্য মধ্ব পিছু হটিবার পাত্র নন, সেনাদের সম্মুখে দাঁড়াইয়া তিনি কতকগুলি বিশেষ মুদ্রা প্রদর্শন করিলেন, সঙ্গে সঙ্গে ঐ সেনাদলটি মন্ত্রমুগ্ধ সর্পের মত তাঁহার বশীভূত হইয়া পড়িল।

জনশ্রুতি আছে, মধ্ব অতঃপর সরাসরি ঐ মুসলমান রাজার সকাশে গিয়া উপস্থিত হন। আচার্য্য তুর্কী ভাষা কোনকালেই শিখেন নাই। কিন্তু সকলে সবিস্ময়ে দেখিলেন, বিদেশী ভিন্নধর্মী রাজার সহিত বিদেশী ভাষাতেই অবলীলায় তিনি কথাবার্তা চালাইয়া গেলেন।

মধ্বের সুগৌরব স্ঠাম দেহ, দিব্যকাস্তি ও প্রখর ব্যক্তিত্বে মুসলমান রাজা একেবারে মুগ্ধ। বার বার তিনি অমুরোধ জানান, আচার্য্য আরো কিছুকাল তাঁহার রাজ্যে সশিষ্য বসবাস করুন; তাঁহাদের সেবা-পরিচর্য্যার জন্য যে কোন পরিমাণ অর্থব্যয়ে রাজা কুণ্ঠিত হইবেন না। কিন্তু মধ্বের পক্ষে আর সেখানে বিলম্ব করা সম্ভব নয়। তুর্কীরাজকে আন্তরিক শুভেচ্ছা জানাইয়া সেখান হইতে তিনি বিদায় গ্রহণ করিলেন।

মধ্বের প্রিয় শিষ্য ও একান্ত সেবক সত্যতীর্থ সে-বার এক মহা-সঙ্কটে পতিত হন। পথ চলিতে চলিতে সাধুরা সবাই এক বিস্তীর্ণ অরণ্যের সম্মুখে আসিয়া উপস্থিত। সন্ধ্যার আর বেশী দেরী নাই, খানিক বাদেই চারিদিকে নামিয়া আসিবে ঘন অন্ধকার। এ সময়ে এই দীর্ঘ বনের মধ্য দিয়া পথ চলা কঠিন। তাই ভাবিয়া-চিন্তিয়া সবাই স্থির করিলেন, আজিকার মত এখানেই বিজ্রাম করা যাক, কাল প্রত্যুষে ডেরা-ডাণ্ডা উঠানো যাইবে।

সত্যতীর্থ তাঁহার ঝোলাবুলি নামাইয়া ডাড়াডাড়াই ঐ বনের

দিকে চলিয়া গেলেন। গুরু মহারাজের রাত্রের আহারের জন্ত কিছু ফলমূল এখনি তাঁহার সংগ্রহ করা চাই।

কিছুকাল পরেই বনমধ্যে শুনা গেল এক হিংস্র বাঘের গর্জন। সকলেই মহা উৎকণ্ঠিত। বেচারা সত্যতীর্থ এই বাঘের মুখে পড়ে নাই তো? দলবল নিয়া আচার্য্য মধ্ব তখনি সেইদিকে ছুটিয়া গেলেন।

বনের তিতর প্রবেশ করিতেই যে দৃশ্য দেখা গেল, তাহাতে সকলেরই চক্ৰবর্তী।

সত্যতীর্থ একটি বৃক্ষে আরোহণ করিয়াছে ফল-পাকড় সংগ্রহ করার জন্ত। আর তাহার অনতিদূরেই—থাবা গুটাইয়া বসিয়া আছে এক হিংস্র বাঘ। ভাঁটার মত দুই চোখ জল-জল করিতেছে। বৃক্ষস্থিত শিকারের দিকে লুক্ক দৃষ্টিতে তাকাইয়া মাঝে মাঝে ছাড়িতেছে হুঙ্কার-ধ্বনি।

শমন-সদৃশ এই বাঘকে দেখিয়া সাধুরা সবাই ভীত সন্ত্রস্ত। এমন সময়ে আচার্য্য মধ্বের দেহে দেখা গেল এক দিব্য ভাবের আবেশ। ভাবকম্পিত দেহে, ধীরপদে ঐ বাঘের দিকে তিনি অগ্রসর হইয়া গেলেন। সন্মোহিতের মত বাঘটি কিন্তু স্থির হইয়া বসিয়া আছে, চোখ দুইটি নিম্পলক, তর্জ্জন-গর্জ্জন একেবারে স্তব্ধ। উহার সম্মুখে দাঁড়াইয়া মধ্ব নীরবে কয়েকবার হস্ত সঞ্চালন করিলেন। সঙ্গে সঙ্গে হিংস্র বাঘ মাথা নত করিল, সেস্থান ত্যাগ করিয়া ধীরে ধীরে প্রবেশ করিল গভীর বনাঞ্চলে।

সবাই এবার হাঁক ছাড়িয়া বাঁচিলেন; সত্যতীর্থকে গাছ হইতে নামাইয়া আনা হইল।

সত্যতীর্থ যুক্ত করে নিবেদন করিলেন, “গুরুদেব, আপনার প্রতি কৃতজ্ঞতা প্রকাশের চেষ্টা আমি করবো না। কারণ, আপনার চরণেই নিজেকে আমি বিকিয়ে দিয়েছি। কিন্তু একটি প্রশ্ন আমি না ক’রে পারছি। আমার মত নগণ্য মানুষকে বাঁচানোর জন্ত আপনি কেন আপনার অমূল্য জীবন আজ বিপন্ন করতে গিয়েছিলেন?”

প্রশান্ত কণ্ঠে গুরু কহিলেন, “বৎস, তোমার জীবন যে বিষ্ণু-ভগবানের কৰ্মে উৎসর্গ করা। ঐশ্বরীয় কৰ্ম সম্পন্ন করার জন্য তোমার যে বেঁচে থাকা প্রয়োজন। তুমি আমার গীতাভাষ্য ও সূত্রভাষ্যের অনুলিপি লিখেছো। সেবায় ও কৰ্মে নানাভাবে আমায় সাহায্য করেছে। ঈশ্বরের আদিষ্ট কাজে আরো অনেক সাহায্য তুমি করবে। এই কথাটাই তো হিংস্র বাঘটাকে আকারে ইঙ্গিতে আমি বুঝিয়ে বললাম। তাই তো সে আর বিরক্ত না ক’রে তোমায় ছেড়ে চলে গেল।”

নিজের যোগবিভূতির কথা, ঐ অলৌকিক ঘটনার কথা, মঞ্চ কি সহজভাবেই না বর্ণনা করিলেন। শিষ্য ও সঙ্গীরা সবিস্ময়ে একে অশ্বেষের মুখে দিকে তাকাইতে লাগিলেন।

দীর্ঘ পরিত্রাজনের শেষে আচার্য্য মঞ্চ এবার বারাণসীতে আসিয়া উপস্থিত হন। এখানকার প্রধান প্রধান মঠ-মণ্ডলীর সহিত তাঁহার ঘনিষ্ঠতা হয়। গীতাভাষ্য ও ব্রহ্মসূত্র ভাষ্যে যে নূতন দ্বৈতবাদী ভক্তিবাদ তিনি ব্যাখ্যা করিয়াছেন, সে সম্বন্ধে স্থানীয় সাধক ও পণ্ডিতদের সহিত তাঁহার মত বিনিময়ের সুযোগ ঘটে। অতঃপর নিজের মতবাদের শাস্ত্রভিত্তিকে আরো দৃঢ় করিয়া নিয়া মঞ্চ উপনীত হন পবিত্র সাধন-ধাম হরিদ্বারে।

মঞ্চের অনেক দিনের আশা, ব্যাসগুহায় বসিয়া প্রাণ ভরিয়া তপস্শা করিবেন, লাভ করিবেন শ্রীনারায়ণের অবতার ব্যাসদেবের পুণ্যময় দর্শন, তারপর তাঁহার চরণে সমর্পণ করিবেন অরচিত বেদান্ত-সূত্রের ভাষ্য। সে আশা এবার এতদিনে পূর্ণ হইল। দীর্ঘ ধ্যান-মননের ফলে মহামুনি ব্যাস জ্যোতির্ময় মূর্তিতে আবির্ভূত হইলেন তাঁহার নয়ন সমক্ষে। যুহু মধুর হাস্তে সূত্রের ভাষ্য স্বহস্তে লুপিয়া নিয়া তাঁহাকে করিলেন কৃতকৃতার্থ।

মহামুনি অতঃপর কহিলেন, “মধ্ব, তোমার প্রতি আমি প্রসন্ন। তোমার মতবাদ ভারতীয় দর্শনকে পুষ্ট করেছে, এযুগের ভক্তিধর্মেরও করেছে বিস্তার সাধন। ভক্তি প্রচারের দিকে দৃষ্টি রেখে এবার তুমি মহাভারতের তাৎপর্য নির্ণয়কারী একটি গ্রন্থ রচনা করো। এতে তোমার আরঙ্গ পুণ্যকর্ম হয়ে উঠবে সহজতর।”

মধ্বের হাতে একটি সম্পূর্ণ তুলিয়া দিয়া স্নেহভরে আরো কহিলেন, “বৎস, এতে রয়েছে তিনটি পরমপবিত্র শালগ্রামশিলা। দেশে ফিরে গিয়ে এই শিলা যে-যে স্থানে তুমি স্থাপন করবে সেই সেই স্থান পরিচিত হয়ে উঠবে জাগ্রত গীঠ রূপে।”<sup>১</sup>

এই অযাচিত করুণায় মধ্ব একেবারে অভিভূত। ছুই নয়নে বহিতেছে আনন্দের অশ্রুধারা। মহামুনির চরণে সাষ্টাঙ্গ প্রণিপাত জানাইয়া, গুহা হইতে তিনি বাহির হইয়া আসেন।

হিমালয় ক্রোড়স্থিত মহাতীর্থগুলি পরিব্রাজন করার পর মধ্ব সমতল ভূমিতে অবতরণ করেন। এবার হইতে অধ্যাত্ম-ভারতের বৃহত্তর রঙ্গক্ষেত্রে আসিয়া তিনি দাঁড়ান, শুরু হয় ভক্তিসিদ্ধি মহাসাধক, অদ্বৈতবাদী মহাদার্শনিক, মধ্বাচার্য্যের অবিস্মরণীয় ভূমিকা।

নানা সম্প্রদায়ের বৈষ্ণবদের ভিতর মধ্ব-অনুগামীরা হইতেছেন আপোষহীন কট্টর দ্বৈতবাদী।

সারা জীবন মধ্ব শব্দের কেবলাদ্বৈতবাদের বিরুদ্ধে সংগ্রাম করিয়াছেন, নিজের গ্রন্থসমূহে উপস্থাপিত করিয়াছেন প্রচুর শাস্ত্রীয় উদ্ধৃতি, যুক্তিতর্ক ও তথ্য-প্রমাণ। কিন্তু একথাও স্বীকার করিতে হইবে যে, শব্দের মতবাদ খণ্ডন করিতে গিয়া ভ্রান্তি অপেক্ষা স্মৃতির

১ এই পরম পবিত্র শিলাত্রয় মধ্বাচার্য্য লাড়বরে প্রতিষ্ঠা করেন হরদ্বার, উড়ুপী ও মধ্যতল এই তিনটি মঠে।

উপরই তিনি নির্ভর করিয়াছেন, বেদ-উপনিষদ অপেক্ষা পুরাণশাস্ত্রের সহায়তাই নিয়াছেন বেশী।

রামানুজের বিশিষ্টাধৈতবাদ বৈষ্ণব আন্দোলনের এক বড় ভিত্তি। মধ্ব কিন্তু তাঁহার এই সর্বজনশ্রদ্ধেয় পূর্বসূরীর মতবাদের উপরও আঘাত হানিতে পশ্চাদপদ হন নাই।

মধ্ব মতের প্রধান ভিত্তি ভেদবাদ। ঈশ্বর ও জীব, সেব্যবস্তু ও সেবক নিত্য পৃথক, নিত্য ভেদযুক্ত। শুধু তাহাই নয়, ঈশ্বর স্বতন্ত্র, আর সবই অস্বতন্ত্র বা ঈশ্বর-নির্ভর। তাঁহার এই দ্বৈতবাদ দার্শনিক মহলে স্বতন্ত্র-অস্বতন্ত্রবাদ নামে পরিচিত। মধ্বপন্থীরা নিজেদের সম্প্রদায়কে বলেন—সদ্বৈষ্ণব।

মধ্বাচার্য্য ব্রহ্ম বা পরমাত্মার স্থলে স্থাপন করিয়াছেন বিষ্ণু বা নারায়ণকে। তিনি বলেন, সৃষ্টির আদিতে বিরাজিত ছিলেন এক ও অদ্বিতীয় আনন্দস্বরূপ ভগবান নারায়ণ, তখন ব্রহ্মা বা শিব কেহই ছিলেন না।<sup>১</sup>

সেই বিষ্ণুর দেহ হইতেই সৃষ্ট হইয়াছে এই বিষ্ণুচরাচর<sup>২</sup> এবং এই বিষ্ণু বা নারায়ণই একমাত্র সৎ বস্তু, অশেষ সদগুণের আধারও তিনি বটেন। তিনি নির্দোষ ও স্বতন্ত্র, তাঁহা ব্যতীত আর সমস্ত কিছুই অস্বতন্ত্র অর্থাৎ ঈশ্বরের অধীন।<sup>৩</sup>

জীব ও ঈশ্বরের এই কেবল-ভেদ ছাড়া আচার্য্য আরও পাঁচ প্রকার ভেদের অস্তিত্ব সমর্থন করিয়াছেন। জীব ও ঈশ্বরে ভেদ,

১ একো নারায়ণ আসীৎ ন ব্রহ্মা ন চ শঙ্করঃ,

আনন্দ এক এবাৎ আসীন্নারায়ণঃ প্রভু ॥

২ বিষ্ণোর্দেহাঙ্কগৎ সর্বমাবিরাসীৎ। ৩ মহোপোনিষদের—“বধা পক্ষী চ শূকর নানা বৃক্করনা বধা”—ইত্যাদি শ্লোকে আচার্য্য মধ্বের বৈতবাদের কতকটা আভাস পাওয়া যায়।

জড় ও ঈশ্বরে তেদ, জড় ও জীবে ভেদ এবং জীবসমূহ ও জড় পদার্থ সমূহের আভ্যন্তরীণ ও পরস্পর তেদ—এই পঞ্চ ভেদকে তিনি বলিয়াছেন প্রপঞ্চ।<sup>১</sup>

আচার্য্যের মতে, জীবের মোক্ষ বা মুক্তি তখনই হয় যখন তাহার জন্ম-মৃত্যুর যাতায়াত বা পুনর্জন্মের অবসান ঘটে এবং সে যখন বৈকুণ্ঠে নারায়ণের কাছে স্থিতি লাভ করে।

তিনি আরও বলেন, মুখ্য প্রাণবায়ুর উপাসনাই শ্রেষ্ঠ—এবং নারায়ণের পুত্র বায়ুর কৃপা ছাড়া জীবের মোক্ষলাভের কোন সম্ভাবনা নাই। মধ্বের অনুগামী বৈষ্ণবদের বিশ্বাস, এ যুগে মধ্বই হইতেছেন বায়ুর অবতার; তাই তিনিই মানুষের ত্রাণকর্তা। পুণ্যকর্মের জগ্নু মধ্ব ব্যবস্থা দিয়াছেন অক্ষয় স্বর্গবাস এবং মাধ্ব বৈষ্ণববাদের বিরোধী ব্যক্তিদের জগ্নু ব্যবস্থা করিয়াছেন অনন্ত নরকবাস।<sup>২</sup>

মধ্বের মতবাদ অনুসারে জীবাত্মা স্বাভাবিকভাবেই অবিচ্ছিন্ন দ্বারা আবৃত। এই অবিচ্ছিন্ন দূর হয় এবং মোক্ষলাভ সম্ভব হয় ভগবানের স্বরূপ সম্বন্ধে জ্ঞান লাভের পর। উন্নতশ্রেণীর জীবাত্মারাই এই জ্ঞান লাভ করিতে পারে এবং এজন্য তিনি প্রচার করিয়াছেন আঠারোটি অনুশাসন। এগুলির মধ্যে প্রধান হইতেছে—বৈরাগ্য, শম, গুরু-

১ বিশ্বকোষ, পৃঃ ১০২।

২ মধ্ব ছাড়া অপর কোন প্রথম শ্রেণীর ভারতীয় দার্শনিক বা সাধক অনন্ত নরকবাসের কথা প্রচার করেন নাই। তাই অনেকের ধারণা, খৃষ্টধর্মের মতবাদ দ্বারা প্রভাবিত হইয়াই মধ্ব একথা বলিয়াছেন। দক্ষিণ ভারতের কল্যাণপুর খৃষ্টানদের প্রাচীন উপনিবেশরূপে খ্যাত। ষষ্ঠ শতকেও পর্যটক কলমস্ ইন্ডিকো প্রয়টস্ কল্যাণপুরে এমন একজন ধর্মযাজককে দেখিতে পান যিনি পারস্ত হইতে এদেশে আসেন। এই কল্যাণপুর ছিল মধ্বের জন্মস্থান পাণ্ডকার কাছে, লম্বকের উপকূলে। কাছেই নিকটস্থ খৃষ্টানসমাজের ছই একটি খৃষ্টীয় তম মধ্বের মতবাদের সহিত মিশিয়া গেলে বিশ্বব্দের কিছু নাই—  
এঃ হেষ্টিংস এনসাইক্লোপিডিয়া অব রিলিজিয়ন অ্যান্ড এথিক্স, ভল্যু : ৬।

সেবা, ভগবৎ-চরণে ভক্তি, উপাসনা, পূর্বসীমাংসা অনুযায়ী শাস্ত্রীয় অনুষ্ঠান, অসত্য মতবাদের বিরোধিতা প্রভৃতি।

তাহার মতে, বিষ্ণু সেবার উপায় তিনটি : প্রথম—অঙ্কন বা সাধকের বিভিন্ন অঙ্গে বিষ্ণুর শঙ্খ-চক্র ইত্যাদির চিহ্ন ধারণ। দ্বিতীয়—নামকরণ অর্থাৎ বিষ্ণুর বিভিন্ন নাম অনুসারে পুত্রাদির নাম রাখা। তৃতীয়—কার্যিক, বাচিক ও মানসিক এই ত্রিবিধ ভজন।

জীবনের শেষপাদে আচার্য্য মধ্ব উড়ুপী ও অগ্ণ্যস্থানে কৃষ্ণ-মন্দির স্থাপন করিয়াছিলেন। কিন্তু অখিলরসামৃত-মূর্ত্তি শ্রীকৃষ্ণকে তিনি ইষ্টরূপে গ্রহণ করিয়াছেন বা মধুর ভজনের পথ অনুসরণ করিয়াছেন, এমন কোন প্রমাণ নাই।

কেহ কেহ মনে করেন, মধ্ব মতবাদ হইতেই গোড়ীয় বৈষ্ণব আন্দোলন উদ্ভূত হইয়াছে এবং গোড়ীয় বৈষ্ণব সম্প্রদায় মধ্ব সম্প্রদায়েরই অন্তর্ভুক্ত। আসলে এ ধারণার কোন ভিত্তি নাই।<sup>১</sup>

১ মহাপ্রভু ত্রিচৈতন্য নিজে বা তাহার বিশিষ্ট শিষ্য ও অনুগামীরা কোন সময়েই মধ্বকে আদিগুরু বলিয়া বর্ণনা করেন নাই বা নিজেদের মধ্ব সম্প্রদায়-ভুক্তও বলেন নাই। বরং নানা স্থানে মাধব বা তত্ত্ববাদীদের সমালোচনা করিয়াছেন। গোড়ীয় গণোদ্দেশ দীপিকায় উদ্ধৃত মধ্বমঠের একটি গুরু-পরম্পরা এবং বলদেব বিদ্যাতৃষণের উক্তি হইতেই ভ্রান্ত ধারণার উদ্ভব হইয়াছে। আধুনিক গবেষণায় গোড়ীয় গণোদ্দেশ দীপিকার স্লোকটি প্রক্ষিপ্ত বলিয়া প্রমাণিত হইয়াছে। বলদেব প্রথম জীবনে ছিলেন মাধব সম্প্রদায়ভুক্ত। পরে গোড়ীয় বৈষ্ণবসাধক রাখাধামোদর দাসের শিষ্যত্ব গ্রহণ করিয়া গোড়ীয় গোষ্ঠীতে যোগ দেন। মধ্ব-সম্প্রদায়ের প্রভাব ও আকর্ষণ বলদেব তখনও ছাড়িতে পারেন নাই। তাছাড়া, জয়পুরে থাকিতে তিনি অপর সম্প্রদায়ের বৈষ্ণবদের তীব্র বিরোধিতার সম্মুখীন হন। গোড়ীয় বৈষ্ণবেরা প্রতি-অনুগমন এবং তাহাদের নিজস্ব বেদান্ত-ভাষ্যই বা নাই কেন, এই সব প্রশ্নের উত্তর দিতে গিয়াও তাহাকে বিব্রত হইতে হয়। এই সব কারণে বলদেব গোড়ীয় সম্প্রদায়কে মধ্ব-সম্প্রদায়ের অন্তর্ভুক্ত বলিয়া ঘোষণা করিতে উৎসাহী হন।

ব্যাসগুহা, বদরীনারায়ণ প্রভৃতি হিমালয়ের জাগ্রত তীর্থসমূহে কিছুদিন অবস্থানের পর মধ্বাচার্য্য সমতল ভূমিতে নামিয়া আসেন। এ সময়ে উত্তর ভারতের প্রধান প্রধান তীর্থ-নগর তিনি পরিভ্রমণ করেন এবং প্রচার করেন নিজের ব্যাখ্যাত ভক্তিবাদ।

অতঃপর আচার্য্য প্রত্যাবর্তন করেন দাক্ষিণাত্যে। গোদাবরী তীরের তীর্থ ও জনপদে বহু নরনারী তাঁহার শিষ্যত্ব গ্রহণ করেন। শোভন ভট্ট ও স্বামী শাস্ত্রী নামে দুই পণ্ডিতের খুব প্রভাব প্রতিপত্তি ছিল এই অঞ্চলে। মধ্বের সহিত শাস্ত্র-বিচারে পরাস্ত হইয়া এবং তাঁহার ব্যক্তিগত ও সাধন-ঐশ্বর্য্যে আকৃষ্ট হইয়া এই দুই শাস্ত্রবিদ ব্রাহ্মণই তাঁহার শিষ্যত্ব গ্রহণ করেন। শোভন ভট্টের সন্ন্যাস নাম হয় পদ্মনাভতীর্থ। মধ্বের পরে তিনিই হন উড়ুপীর অধ্যক্ষ।

মধ্বের গুরু আচার্য্য অচ্যুতপ্রকাশ অদ্বৈতবাদী সন্ন্যাসী হইলেও ভক্তিবাদের উপর তাঁহার আকর্ষণ ছিল সহজাত। প্রতিভাধর প্রিয় শিষ্যের সাহচর্য্য ও আকর্ষণ, তাঁহার ভক্তি-পর শাস্ত্রব্যাখ্যা ও দ্বৈতবাদী নূতন সম্প্রদায়ের প্রবর্তন অচ্যুতপ্রকাশকে নবভাবে উদ্দীপিত

সাধ্য-সাধন সম্পর্কে চৈতন্ত-মত ও মধ্ব-মতে মূলগত পার্থক্য রহিয়াছে। চৈতন্তের ধর্ম্ম শ্রীমদ্ভাগবতের অল্পকূল, আর মধ্বের ধর্ম্ম মহাভারতের দ্বারা প্রভাবিত। চৈতন্ত গোপীশ্রোম, গোপীভজনকে উচ্চতম স্থান দিয়াছেন। মধ্ব বলিয়াছেন ইহার বিপরীত কথা। তাঁহার মতে, মহাভারতই শ্রেষ্ঠ শাস্ত্র। আরও বলিয়াছেন, কৃষ্ণভক্তিতে ব্রহ্মাই শ্রেষ্ঠ, গোপীরা ভক্তির অনেক নিয়ন্তরে অবস্থিত (ঙ্ঃ মধ্বাচার্য্য : ভাগবত তাৎপর্য্যম ১১।১২।২২)। তাছাড়া, “মধ্বাচার্য্য ব্রজবধুগণকে স্বর্বেশ্বার সহিত তুলনা করিয়া শ্রীমদ্ভাগবত ও শ্রীমদ্ভাগবতাহুগ গোড়ীর সম্প্রদায়ের পারকীয় নিদ্ধান্তকে হেয় প্রতিপাদন করিয়াছেন”—(ঙ্ঃ স্বন্দরানন্দ বিজ্ঞাবিনোদ : অচিন্ত্যভেদাভেদবাদ, ত্রীবলম্বেব বিভাভূষণ, পৃ ১২২)। সুতরাং মহাপ্রভুর স্বমহান গোড়ীর সম্প্রদায়কে মধ্ব-মতাবলম্বী বলার কোন যৌক্তিকতাই নাই। আসলে চৈতন্ত মহাপ্রভু স্বতন্ত্র পুরুষ—তিনি নিজেই নিজের ধর্ম্মসাম্রাজ্যের সংস্থাপক।



করিয়া তোলে। শেষটার মধ্বে দার্শনিক মতবাদ ও সাধনপ্রণালী তিনি গ্রহণ করেন।

উপরোক্ত পণ্ডিতদের আগমনে মধ্বে বৈষ্ণব-আন্দোলন পূর্বাপেক্ষা অনেক বেশী শক্তিশালী হইয়া উঠে। শত শত নরনারী উড়ুপীর মঠে আসিয়া গ্রহণ করে তাঁহার পরমাত্মর।

মধ্বে-মতের এই প্রসার এবং ভক্তিবাদীদের সংখ্যাধিক্য শৃঙ্গেরী মঠের কর্তৃপক্ষকে চিন্তিত করিয়া তোলে। নূতন বৈষ্ণব-সম্প্রদায়ের ভক্তিবাদ, ভজন-পূজনের সহজ পন্থা, জনসাধারণের কাছে অনেক বেশী সহজবোধ্য। ইহার সঙ্গে যুক্ত হইয়াছে নবদীক্ষিত পণ্ডিত ও সন্ন্যাসীদের ত্যাগ তিতিক্ষা ও উচ্ছন্ন। ফলে দিনের পর দিন আচার্য্য মধ্বে শিষ্য, ভক্ত ও অনুগামীর দল বাড়িয়া উঠিতেছে।

পদ্মতীর্থ তখন শৃঙ্গেরী মঠের অধ্যক্ষ। মঠের সন্ন্যাসীদের নিয়া তিনি এক গোপন সভা আহ্বান করিলেন। মধ্বাচার্য্যের প্রভাব কি করিয়া খর্ব্ব করা যায়, কিভাবে উড়ুপী মঠকে হীনবল করা যায় ইহাই বড় সমস্যা। বহু পরামর্শের পর স্থির হইল, মধ্বে ভক্তি-আন্দোলনকে একযোগে নানা দিক দিয়া আক্রমণ করিতে হইবে, চরম আঘাত হানিয়া করিতে হইবে বিধ্বস্ত। শৃঙ্গেরীর সন্ন্যাসীদের সবাইকে এই লড়াইয়ে নামিতে হইবে। যে সব রাজরাজড়া ও ধনী ব্যক্তির মঠের শিষ্য ও সমর্থক, তাঁহাদের যোগাইতে হইবে অর্থ ও লোকবল। প্রতি জনপদে, বিজ্ঞাক্ষেত্রে, মঠে, মন্দিরে খণ্ডন করিতে হইবে প্রতিপক্ষের মতবাদ। উড়ুপীর মঠে মধ্বাচার্য্য ভক্তিশাস্ত্রের এক বিরাট গ্রন্থশালা গড়িয়া তুলিয়াছেন। এই গ্রন্থশালাটি ধ্বংস করার গোপন ষড়যন্ত্রও এই সভায় করা হইল।

প্রচণ্ড উৎসাহে শৃঙ্গেরীর সন্ন্যাসীরা লড়াই-এ নামিয়া পড়েন। তাঁহাদের মঠ যেমন প্রাচীন, দলেও তেমনি আছে বহুসংখ্যক লোক। এ অঞ্চলের ধনী ও প্রভাবশালী ব্যক্তিদের অধিকাংশই তাঁহাদের সমর্থক। মধ্বে ও তাঁহার শিষ্যদের লাহনা ও শীড়নের সীমা থাকে

না। তাঁহাদের প্রাণপ্রিয় গ্রন্থশালাটি বিনষ্ট করা হয় স্নকোশলে। রাজ্যবোগে আকস্মিকভাবে একদিন ইহা লুপ্তিত হয়। যেসব হুপ্রাপ্য শাস্ত্র-গ্রন্থের উপর নির্ভর করিয়া মধ্ব তাঁহার নূতন মতবাদ স্থাপন করিয়াছেন, ভক্ত শিষ্যদের প্রস্তুতি গড়িয়া তুলিয়াছেন, ছুটের চক্রান্তে তাহা কোথায় উধাও হইয়া গেল। আচার্য্য এবং তাঁহার অল্পগামীরা এই চরম আঘাতে একেবারে মুৰ্ছিয়া পড়িলেন।

কিন্তু মধ্ব হার মানিবার পাত্র নন। যে দৈবরীয় কাজের ভার গ্রহণ করিয়াছেন, চরম দুর্দ্দেবের আঘাত আসিলেও সে কাজে তিনি বিরত হইবেন না। বিষ্ণুমঙ্গলের রাজা জয়সিংহ শৃঙ্গেরী মঠে যাতায়াত করিতেন, আবার এই রাজা আচার্য্য মধ্বের উপরও ছিলেন শ্রদ্ধাবান। তাবিয়া-চিস্তিয়া মধ্ব সেদিন জয়সিংহের কাছে গিয়া উপস্থিত হইলেন। কহিলেন, “মহারাজ, প্রাচীন পুঁথিপত্রের এই অপহরণ শুধু বৈষ্ণবদেরই ক্ষতি নয়, এ ক্ষতি দেশের সকল শাস্ত্রবিদের, সকল নরনারীর। ধর্ম ও সংস্কৃতির ভবিষ্যৎ গবেষক মাথেরই স্বার্থ-হানি হবে এতে। আপনি একটু উত্তোগী হয়ে শৃঙ্গেরীর মঠাধীশকে বুঝিয়ে বলুন, অমূল্য শাস্ত্রগ্রন্থের পুনরুদ্ধারে সহায়তা করুন।”

রাজা জয়সিংহ মধ্যস্থতা করিতে রাজী হন। শৃঙ্গেরীতে গিয়া মঠাধীশকে নানাভাবে তিনি বুঝান, আপন প্রভাব প্রতিপত্তি প্রয়োগ করেন। তাঁহার এই দৌত্যকার্য্য সফল হয় এবং শাস্ত্রগ্রন্থগুলি তিনি উড়ুপীর গ্রন্থাগারে ফিরাইয়া দিবার ব্যবস্থা করেন।

এ ঘটনার পরও বেশ কিছুদিন উভয় মঠের মতবিরোধ ও বৈরিতা চলিতে থাকে। উত্তরকালে অবশ্য এই মতবিরোধের অবসান ঘটে, মধ্ব বৈষ্ণব ও শৃঙ্গেরীর অদ্বৈতবাদী সন্ন্যাসীদের মধ্যে শান্তি স্থাপিত হয় এবং উভয়ে উভয়ের মর্যাদা ও সম্মান রক্ষার বদ্বান হন। এ সময়ে উড়ুপী ও শৃঙ্গেরী মঠে তীর্থকামী বৈষ্ণব ও অদ্বৈতবাদীরা যাতায়াত করিতেন, ইহার প্রমাণ আছে।

যে সব বৈষ্ণব-বিরোধী প্রভাবশালী পণ্ডিত আচার্য্য মধ্বের শরণ

নিয়া বৈষ্ণবধর্ম গ্রহণ করেন তাঁহাদের অন্ততম ত্রিবিক্রম আচার্য্য। ইনি ছিলেন একজন খ্যাতনামা শৈব। শুধু মধ্বেয় যুক্তিতর্ক ও বিচার-মল্লতা দেখিয়াই নয়, তাঁহার তাগ তিতিক্ষাময় জীবন ও অপূর্ব সাধনানিষ্ঠায় মুগ্ধ হইয়াই ত্রিবিক্রম আত্মসমর্পণ করেন। তাঁহার বৈষ্ণবমত গ্রহণ বহুতর শৈবকে মধ্বে-মতের অনুরাগী করিয়া তোলে। এই নবদীক্ষিত পণ্ডিতের পুত্র নারায়ণ আচার্য্যই উত্তর-কালে হন মধ্বেয় জীবন-কাহিনীর রচয়িতা, দীক্ষাদান কালে মধ্বে ত্রিবিক্রম আচার্য্যকে একখানি নয়নমন-লোভন কৃষ্ণমূর্ত্তি উপহার দেন। কোচিন রাজ্যে, দক্ষিণ কানাড়ায় আজিও ভক্ত বৈষ্ণবেরা সাগ্রহে এই অনুপম বিগ্রহটি তীর্থযাত্রীদের দর্শন করায়।

১২৭৫ খৃষ্টাব্দে মধ্বেয় পিতা দেহরক্ষা করেন। ইহার অল্পকাল মধ্যেই মধ্বেয় কনিষ্ঠ ভ্রাতা, পূর্ব পরিকল্পনা অনুযায়ী, সন্ন্যাস গ্রহণ করেন। দীক্ষার পর তাঁহার নূতন নাম হয় বিষ্ণুতীর্থ। আচার্য্য মধ্বেয় বৈষ্ণব আন্দোলনে সুপণ্ডিত বিষ্ণুতীর্থের অবদান প্রচুর।

জীবনের শেষপাদে মধ্বেয় ভক্তিসাধনা রূপান্তরিত হয়। নৈষ্ঠিক ভক্তিবাদ ধীরে ধীরে ঝুঁকিয়া পড়ে ভাবময়তা ও রসের দিকে। হৃদয়সনে এতকাল অধিষ্ঠিত ছিলেন শেষশায়ী বিষ্ণু, এবার তাহা অধিকার করেন অখিলরসামৃতসিদ্ধ—বালগোপালমূর্ত্তি—শ্রীকৃষ্ণ।

ধ্যান-সমাহিত মধ্বেয় নয়নসমক্ষে প্রভু বালগোপাল সেদিন আবির্ভূত হন। আবদারের সুরে কহেন, “আচার্য্য এত মঠ-মন্দির তো করলে, কিন্তু আমার জন্ত একটা ঠাই রাখলে না। তোমার ভক্তি-ভালবাসা কেমনতর গো? আমি শিগ্গীরই আসছি, আমার মূর্ত্তি তুমি পাবে। সাগর থেকে ফেরা নৌকোর ভেতর আমি থাকবো। আমায় তুলে নিয়ে স্থাপন করবে তোমাদের মন্দিরে।”

ঠাকুর অন্তর্হিত হন। মধ্বেয় হৃদয়ে অনুরণিত হইতে থাকে

তাঁহার মধুনিশ্চন্দী কণ্ঠের বন্ধার। দিব্য আনন্দে আচার্য্য মধ্বের দেহ-মন-প্রাণ আশ্বত হয়, দৈবী আশ্বাসের প্রেরণায় নব-চেতনায় তিনি উদ্বুদ্ধ হইয়া উঠেন।

কয়েকদিন পরের কথা। শিশু ও ভক্তদের আমন্ত্রণে মধ্ব সেদিন সমুদ্রতীরে মালপী বন্দরে গিয়াছেন। অতি প্রত্যাষে ধ্যানজপ সারিয়া আচার্য্য বন্দরের মুখে, তটভূমিতে একাকী পাদচারণা করিতেছেন। হঠাৎ দূরে নয়নপথে পড়িল একটি সমুদ্রগামী নৌকা। সাগর-মোহনার একপ্রান্তে কিছুদিন যাবৎ জাগিয়া উঠিয়াছে এক বিস্তৃত চড়া, নদীর উপরিভাগ হইতে সহসা ইহা দৃষ্টিগোচর হয় না। সমুদ্রগামী নৌকার মাঝি এই অদৃশ্য চড়ার কবলে বড় বিপন্ন হইয়া পড়িয়াছে। যদিকে সে নৌকা চালনা করে চড়ায় ঠেকিয়া যায়, বাহির হইবার কোন সন্ধানই পাইতেছেন না।

দূর হইতে আচার্য্য মধ্বকে দেখিয়া মাঝি ডাকিয়া কাঁহল, “সাধু-বাবা, আমি মহাবিপদে পড়োঁছ। চড়া থেকে নৌকো বাঁচাতে পারছিনে, দয়া করে গভীর জলে বেরুবার পথ বলে দিন।”

মধ্ব হাঁক দিয়া কহিলেন, “ভয় নেই, মাঝি। আমার এই উত্তরীয় যদিকে ধুরিয়ে ফিরিয়ে নাড়াছি তা লক্ষ্য করে তুমি নৌকো চালাও। পথের সন্ধান পেয়ে যাবে।”

বলা বাহুল্য, সিদ্ধপুরুষ মধ্ব তাঁহার অলৌকিক বিভূতির বলে নদীতলের অবস্থা সবই জানিয়া নিয়াছেন। ঠিক কোন্ পথে চলিলে নৌকাটি চড়ার হৃষ্টচক্র এড়াইতে পারিবে, গভীর জলে পড়িয়া আবার সচল হইবে মাঝিকে সে নির্দেশ দেওয়া দরকার। তাই তাঁরে দাঁড়াইয়া বার বার তিনি উত্তরীয় আন্দোলন করিতেছেন আর মাঝি সেই অনুসারে করিতেছে নৌচালনা। অবশেষে দুঃসহ পরিস্থিতির অবসান ঘটিল, চড়া হইতে মুক্ত হইয়া নৌকাটি বন্দরের একপাশে আসিয়া ভিড়িল।

মাঝির হৃদয় কৃতজ্ঞতায় ভরিয়া উঠিয়াছে। ভক্তিভরে মধ্বকে

প্রণাম করিয়া কহিল, “প্রভু, আপনার কৃপায় নৌকাটি আজ বাঁচাতে পারলাম, নইলে ধনে-প্রাণে নিজেও মারা যেতাম। আমার বাড়ী এই দক্ষিণেরই আদমা গ্রামে। দ্বারকায় মালপত্র বিক্রি করতে গিয়েছিলাম, ফেরবার পথে এই বিপত্তি। ভাগ্যিস এ সময়ে এখানে আপনার দর্শন পেলাম। প্রভু, আমার একান্ত ইচ্ছে, আপনাকে আমি কিছু অর্থ দিই, আর আপনি তা ঠাকুরের সেবায় লাগান।”

“বাবা, তোমার অর্থের লোভে আমি এই ভোরবেলায় বন্দরের মোহনায় এসে দাঁড়াইনি। তুমি এখানে আসবে, আর নৌকাটি চড়ায় ঠেকবে, এসব আগে থেকেই আমার জানা। যাক, নৌকোর খোলের ভেতর কি আছে বল?”

মাঝি ভাবিল, ‘সাধুবাবা নিশ্চয় ভেবে নিয়েছে, নৌকোর ভেতর বহুতর দামী মালপত্র আছে। তা থেকে তিনি কিছু বাছাই করে নিতে চান।’ হাসিয়া কহিল, “প্রভু, নৌকোর খোলে দামী বস্তু কিছুই নেই। রয়েছে শুধু একরাশ মাটির ঢেলা। দ্বারকায় সব মালপত্র বিক্রি হয়ে গেল। ফেরবার পথে শূন্য নৌকা কেবলই টাল খাচ্ছে। ভাবলুম, কিছু ভারী জিনিষ বোঝাই করা যাক। কাছেই গোপী-সরোবর। সেখানকার মাটি—গোপীচন্দন যাকে বলে, খুব পবিত্র। তারই কতকগুলো বড় বড় খণ্ড নৌকোর খোলে পুরে নিলাম। ভাবলাম, নৌকোর তলা ভারী করার কাজ এতে হবে, আবার ঐ গোপীচন্দন এখানকার ভক্ত মানুষদের বিলানোও যাবে। আর তো কোন দামী জিনিষপত্র আমার নেই।”

“ভাই, ঐ বস্তুই যে আমার কাছে মহাদামী, মহাপবিত্র।”—প্রসন্ন স্বরে উত্তর দেন আচার্য্য মধব। “তুমি ওর থেকে বেছে সব চাইতে বড় খণ্ডটি আমায় দাও। তোমার মাটির ঢেলায় কোন্ পরম বস্তু লুকোনো আছে, তা তুমি জানো না, ভাই।”

“বেশ তাই হবে, আপনার যেমন অভিক্রটি।” সানন্দে একথা

বলিয়া মাঝি একটি বৃহৎ গোপীচন্দন-খণ্ড নৌকোর তলা হইতে বাহির করিল, গড়াইয়া দিল আচার্য্য-মধ্বের দিকে ।

সঙ্গে সঙ্গে ঘটিয়া গেল এক অদ্ভুত কাণ্ড । উহার ভিতর হইতে বাহির হইয়া আসিল শিলাময় এক অনিন্দ্যানুন্দর বালগোপাল মূর্তি । গোপালের দক্ষিণহস্তে দধিমস্থনের দণ্ড, আর বামহস্তে মধ্বনদণ্ডের সূত্র ।

সম্প্রকটিত এই শ্রীমূর্তি নিয়া মধ্ব ও তাঁহার ভক্তশিষ্যেরা সাড়ম্বরে উড়ুপীতে আসিয়া পৌঁছেন । গোপীচন্দনলিপ্ত বালগোপালকে এখানকার বৃহত্তম সরোবরের<sup>১</sup> তীরে নামাইয়া স্নান-অভিষেক করানো হয়, পূজা অর্চনার শেষে স্থাপন করা হয় একটি নব-নির্মিত মঠে ।

আটজন প্রধান সন্ন্যাসী-শিষ্যের উপরে মধ্ব জ্ঞান্ত করেন তাঁহার পরমপ্রিয় বালগোপালের অর্চনা, ভোগরাগ ও সর্ববিধ সেবাকার্যের ভার ।<sup>২</sup>

মধ্বের দীর্ঘজীবন ত্যাগ তিতিক্ষা ও তপস্তায় ভরা । দার্শনিক মতবাদের বিস্তার, ভক্তিধর্মের আন্দোলন এবং বৈষ্ণবগ্রন্থের রচনা<sup>৩</sup> ও প্রচারের মধ্য দিয়া ভারতের ধর্ম-সংস্কৃতির উপর তিনি দূরবিস্তারী প্রভাব রাখিয়া গিয়াছেন । তাঁহার উত্তর-সাধকেরাও তাঁহার দ্বৈত-

১ এই সরোবর আজো হানীর জনসমাজে মধ্ব-সরোবর নামে পরিচিত ।

২ পরবর্তীকালে এই আটজন সন্ন্যাসী শিষ্য বিভিন্ন অঞ্চলে আটটি কৃষ্ণ-মন্দির প্রতিষ্ঠা করেন, এই আটটি মঠ আবার দুইটি করিয়া দ্বন্দ্বমঠ নামে পরিচিত হইয়াছে । উড়ুপীস্থিত মূল মধ্ব-মঠকে বলা হয়—উত্তরাধি মঠ । আচার্য্য মধ্বের পরে মূল মঠের অধ্যক্ষ হন তাঁহার মন্ত্রশিষ্য পদ্মনাভতীর্থ ।

৩ মধ্বের প্রধান গ্রন্থত্রয়ের নাম—সীতাভাষ্য, ব্রহ্মসূত্রভাষ্য, মহাভারত তাৎপর্যনির্ণয় । ইহা ছাড়াও আরো ৩৫টি ধর্মগ্রন্থ তিনি রচনা করিয়া গিয়াছেন ।

মতবাদ ও বৈষ্ণব আন্দোলনকে পরিপুষ্ট করার কাজে কম খ্যাতি অর্জন করেন নাই।<sup>১</sup>

আরব্ব ঈশ্বরীয় কর্মের এক বিরাট অধ্যায় সমাপন করিয়া আচার্য্য একদিন অন্তরঙ্গ ভক্ত-শিষ্যদের কাছে ব্যক্ত করেন তাঁহার মর্তলীলায় ছেদটানার অভিপ্রায়। ১৩৫৩ খ্রীস্টাব্দে শুক্লাবমী তিথি। এ সময়ে সরিদন্তর নামক স্থানে প্রধান শিষ্যদের কাছে আচার্য্য ঐতরেয় উপনিষদের ভক্তিমূলক ব্যাখ্যা প্রদানে রত রহিয়াছেন। এই সময়ে লীলা অবসানের পরমমুহূর্ত্তটি অগ্রসর হইয়া আসিল। ইষ্টধ্যানে সমাহিত হইয়া আচার্য্য মধ্য শেষ নিঃশ্বাস ত্যাগ করিলেন, প্রবিষ্ট হইলেন ইষ্টধামের নিত্যলীলায়।

শুধু দাক্ষিণাত্যেরই নয়, সারা ভারতের আধ্যাত্মিক আকাশ হইতে ঘটিল এক ইন্দ্রপাত।

১ মধ্বমতাবলম্বী দার্শনিক ব্যাসগোত্রের রচিত ‘জ্ঞানানুত’—অবৈতবাদ বিরোধী এক প্রধান গ্রন্থ। উত্তরকালে ভারতবিশ্বত মনীষী মধুসূদন সরস্বতীকে এই গ্রন্থের বুদ্ধিখণ্ডনে প্রচুর আয়াস স্বীকার করিতে হয়।

# সলাতন গোস্থামী

নীলাচল হইতে শ্রীচৈতন্য সে-বার নবদ্বীপে আসিয়াছেন। উদ্দেশ্য, জননীর চরণ দর্শন আর কিছুদিনের জ্ঞান পবিত্র গঙ্গাতীরে বাস। সে কাজ সাঙ্গ হইয়াছে। এবার প্রাণ কাঁদিয়া উঠিয়াছে বৃন্দাবনের জ্ঞান। প্রাণগোবিন্দের লীলাভূমিতে গড়াগড়ি দিতে মন হইয়াছে উতল, যমুনায় অবগাহনেব লোভও হইয়া উঠিয়াছে ছুনিবার। প্রভু তাই সাক্ষোপাঙ্গসহ তাড়াতাড়ি ব্রজের দিকে ছুটিয়া চলিলেন।

কিস্ত একি বিচিত্র কাণ্ড? ঝাড়খণ্ডের পথে না গিয়া তিনি হঠাৎ উত্তরের দিকে বাদশাহ হুসেন শাহের রাজধানী গোঁড়ের দিকে চলিলেন কেন? তিনি কি পথ ভুলিলেন? অথবা কি আছে তাঁহার মনে, কে জানে?

কৃষ্ণপ্রেমে প্রভু গর্গর মাতোয়ারা। সঙ্গীদের অন্তরেও লাগিয়াছে এই প্রেমের ঢেউ। নৃত্য কীর্তনে সারা পথটি মুখর হইয়া উঠিয়াছে। আর এই দেবপ্রতিম সন্ন্যাসীর পিছে পিছে চলিয়াছে ভাবাকুল এক বৃহৎ জনতা। চলিতে চলিতে সেদিন প্রভুর এই দলটি আসিয়া উপস্থিত হয় গোঁড়ের উপকণ্ঠে, রামকেনার অনতিদূরে।

রাত্রে প্রভু বিশ্রাম করিতেছেন। এমন সময় নিতান্ত দীনবেশে সেখানে সান্ধাৎ করিতে আসিলেন স্থানীয় দুই কৃত্তী পুরুষ, দুই সহোদর ভ্রাতা। ধর্মনিষ্ঠা আর শাস্ত্রজ্ঞানের সহিত ভক্তি প্রেমের অপক্লপ মিলন ঘটিয়াছে তাঁহাদের জীবনে।

যুক্তকরে, দস্তে তৃণ নিয়া, উভয়ে প্রভুর চরণে লুটাইয়া পড়েন। ভক্তেরা পরিচয় করাইয়া দেন, “প্রভু, এঁরা হুঁভাই গোঁড়ের বাদশা হুশেন শাহের প্রধান অমাত্য। বড় ভাই হচ্ছেন অমরদেব। রাজকীয় উপাধি—দবীর খাস। আর ছোটভাই সন্তোষদেব, সাকর মল্লিক বলে ইনি সরকারী মহলে পরিচিত। শাস্ত্রবিজ্ঞা,



ধর্ম্মাচরণ ও দানধ্যানের খ্যাতি যেমন এঁদের আছে তেমনি আছে অর্থ, প্রতিষ্ঠা ও মান-মর্যাদা। কিন্তু সর্ব্বোপরি রয়েছে সত্যকার কৃষ্ণভক্তি।”

প্রভুর চোখে মুখে ফুটিয়া উঠে প্রসন্নতার দীপ্তি। প্রবীণ ভক্ত অমর দেবকে সন্নেহে টানিয়া তোলেন, আবদ্ধ করেন প্রগাঢ় আলিঙ্গনে। মৃদু মধুর কণ্ঠে কহেন, “তোমার প্রেরিত পত্র আমি যথাসময়ে পেয়েছি, তার উত্তরও দিয়েছি। তোমরা ছুভাই যে কৃষ্ণ-কৃপার মহা অধিকারী! তাইতো তোমাদের দর্শনে ছুটে এলাম। ছাখো আমার কৃপাময় কৃষ্ণের কি অপূর্ব্ব লীলা! ব্রজধামে যাবার জন্ত বেরিয়েছি, কিন্তু সোজা সেদিকে না গিয়ে অজ্ঞাত আকর্ষণে ছুটে এলাম এই অঞ্চলে। গোড়ে আসবার আমার কোন প্রয়োজনই নেই। এসে পড়েছি শুধু তোমাদেরই জন্ত।”

বৃন্দাবন যাত্রী প্রভুর পথভ্রাস্তির মর্ম্ম এবার বুঝা গেল। ভক্তেরা নীরবে দাঁড়াইয়া একে অশ্রুর মুখ চাহিতে লাগিলেন।

প্রভুর একি অপার অনুগ্রহ, একি অহেতুক কৃপা! অমরদেব ও সন্তোষদেবের নয়ন বাহিয়া ঝরিতে থাকে পুলকাক্রম ধারা। পরিত্রাতা আজ স্বয়ং অযাচিতভাবে ছয়াতে আসিয়া উপস্থিত। এষে তাঁহাদের কল্পনারও অতীত। কালো আর আর্দ্রিতে উভয়ে ভাজিয়া পড়েন।

চরণতলে পতিত হইয়া দৈন্ত্যভরে নিবেদন করেন, “প্রভু, কৃপা করে যদি এলেই, এবার তবে এই অধমদের উদ্ধার সাধন করো। তোমার ত্রীচরণের সেবক করে নাও। বিষয়-বিষে এ জীবন হয়ে উঠেছে দুঃসহ।”

হুই ভাইকে আশিস জানাইয়া ত্রীচৈতন্য কহিলেন, “ভয় নেই তোমাদের। অচিরে কৃষ্ণ তোমাদের কৃপা করবেন, তাঁর নিজ কর্ম্মে করবেন নিয়োজিত। তোমাদের যে আমি দেখছি কৃষ্ণের চিহ্নিত সেবকরূপে। আজ থেকে তোমাদের আমি নূতন নামকরণ করলাম।

অমর আর সন্তোষ—এখন থেকে পরিচিত হবে সনাতন আর রূপ নামে।”

প্রভুর সেদিনকার দর্শন ও স্পর্শন সনাতন ও রূপের জীবনে বিপ্লব ঘটাইয়া দেয়। তাঁহার আন্তরিক আশীর্বাদ হইয়া উঠে অমোঘ। উত্তরকালে ছই ভাই প্রসিদ্ধি লাভ করেন প্রভুর অন্ততম পার্শ্বদরূপে। সনাতন গোস্বামী নিৰ্ম্মাণ করেন গোড়ীয় বৈষ্ণবধর্মের স্মৃৎ শাস্ত্রীয় ভিত্তি, স্থাপন করেন ভক্তিময় তপস্যার বলিষ্ঠ আদর্শ। আর তাঁহার অমুজ রূপ গোস্বামীর মাধ্যমে সাধিত হয় রাধাকৃষ্ণ লীলা-রসের পরিপুষ্টি ও বিস্তার—উদ্ঘাটিত হয় গোপীভজনের নিগূঢ় পদ্ধতি।

সনাতনের পূর্বপুরুষের জন্মভূমি দাক্ষিণাত্যে। চতুর্দশ শতকের মধ্যভাগে কর্ণাটদেশের পরাক্রমশালী নৃপতি ছিলেন সর্বজ্ঞ জগদগুরু। ইহার বংশধর রূপেশ্বরদেব এক সময়ে রাজ্যচ্যুত হইয়া গোড়দেশে আশ্রয় নিতে বাধ্য হন। শাস্ত্রবিজ্ঞা ও রাজকার্য্য ছুয়েতেই দেখা যাইত এই অভিজাত বংশের সমান পারদর্শিতা। তাছাড়া, দাক্ষিণাত্যের বৈষ্ণবীয় সাধনার ধারাও ইহাদের জীবনে কিছুটা বহমান ছিল।

এই বংশের কুমারদেবের গৃহে ভূমিষ্ঠ হন তিন পুত্র—অমর, সন্তোষ ও বল্লভদেব। জ্যেষ্ঠ পুত্র অমর জন্মগ্রহণ করেন ১৪৬৫ খৃষ্টাব্দে; ইনিই উত্তরকালের বহু বিজ্ঞত বৈষ্ণবসাধক—সনাতন গোস্বামী। বৃন্দাবনের ধর্মজীবনের নিয়ন্তারূপে, মহাপ্রতিভাধর ভক্তিশাস্ত্রবিদ-রূপে তাঁহার খ্যাতি সারা ভারতে প্রচারিত হয়। আর গোড়ীয় সাধকসমাজে তিনি গণ্য হন প্রভু ঐচ্ছৈতন্মের জীবন-দর্শনের অন্ততম শ্রেষ্ঠ ভাষ্যকাররূপে।

সনাতনের পিতার নাম মুকুন্দদেব। গোড় রাজসরকারের এক উচ্চপদে তিনি নিয়োজিত ছিলেন এবং তাঁহার বাসস্থান ছিল গোড়ের উপকণ্ঠস্থিত রামকেলীতে। ঐ স্থানটি কানাই-নাটশালা

নামেও সে সময়ে পরিচিত ছিল। মুকুন্দদেব নিজে ছিলেন ভক্তিমান সাধক। পূজা-পার্বণ, কৃষ্ণকীর্তন ও রামলীলার উৎসব অহুষ্ঠানে তাঁহার প্রাসাদভবন সদা থাকিত মুখরিত।

বালক পৌত্রদের লেখাপড়ার সুব্যবস্থা করিতে মুকুন্দদেব ক্রটি করেন নাই। সনাতন ও রূপের শিক্ষাদানের ভার পড়ে রামভদ্র বাণীবিলাস নামক পণ্ডিতের উপর। প্রাথমিক পাঠ সমাপ্ত হইলে ছই ভ্রাতাকে পাঠানো হয় তখনকার শ্রেষ্ঠ বিদ্যাকেন্দ্র নবদ্বীপে। সেখানে কয়েক বৎসরের মধ্যে নানা শাস্ত্রে তাঁহারা পারঙ্গম হইয়া উঠে।

প্রথমে শিক্ষাগুরুর পদে বৃত্ত হন প্রখ্যাত পণ্ডিত বাসুদেব সার্বভৌম। পরবর্তীকালে তাঁহার কনিষ্ঠ ভ্রাতা রত্নাকর বিদ্যা-বাচস্পতির টোলে থাকিয়া সনাতন ও রূপ শাস্ত্রের দুক্লহ তত্ত্বাদি অধ্যয়ন করেন। ছজনেই অসাধারণ মেধা ও প্রতিভার অধিকারী। তাই নবদ্বীপে থাকিতেই তাঁহাদিগকে সাহিত্য, ব্যাকরণ ও বিবিধ ধর্মশাস্ত্রে অসামান্য অধিকার অর্জন করিতে দেখা যায়।

কিন্তু সে যুগে সংস্কৃত সাহিত্য ও শাস্ত্র অধিগত করিলেই বৈষয়িক জীবনে উন্নতি সাধন করা যাইত না। বাদশাহের দরবারের ভাষা ছিল ফার্সী। এই ফার্সী ভালভাবে আয়ত্ত করিতে না পারিলে কোন দায়িত্বপূর্ণ কর্মে নিযুক্ত হওয়ার সম্ভাবনা ছিল না। পরিবারের কর্তা তাই সনাতন ও রূপের ফার্সী শিক্ষার ভাল ব্যবস্থা করেন। সপ্তগ্রামে তাঁহাদের পাঠাইয়া দেওয়া হয়। সেখানকার মুসলমান শাসনকর্তা ফকর উদ্দীন মুকুন্দদেবের বন্ধু। তাঁহার তত্ত্বাবধানে থাকিয়া উভয় ভ্রাতা ফার্সী ও আরবী বিশেষজ্ঞ মোল্লাদের কাছে পাঠ গ্রহণ করিতে থাকেন, অচিরে ঐ ভাষা দুইটি ভালভাবে আয়ত্ত করিয়াও ফেলেন।

ফার্সী ও আরবী সাহিত্যের ব্যুৎপত্তি কিন্তু সনাতন ও রূপের ব্যক্তিগত কৃষ্টি ও ধর্ম্যাচারণকে কোনদিন ব্যাহত করিতে পারে নাই।

রাজ-অমাত্যপদ তাঁহারা গ্রহণ করিয়াছেন, মুসলমান বাদশাহ ও আমীর ওমরাহদের সঙ্গে ঘনিষ্ঠতাও কম করেন নাই, কিন্তু নিজস্ব ধর্মীয় আচার-আচরণ ও ভাবধারাকে রক্ষা করিয়া চলিয়াছেন সতর্কভাবে।

তাঁহাদের রামকেলীর ভবন বরাবরই ছিল বিশিষ্ট সাহিত্যিক, শাস্ত্রবিদ ও ধর্ম্যাচার্যাদের মিলনস্থল। বিশেষ করিয়া শিক্ষক বিভাবাচস্পতি মহাশয়ের সহিত সনাতনের যোগ ছিল অত্যন্ত বেশী। এই ধর্মনিষ্ঠ আচার্য্যাকে তিনি গুরুব মতই শ্রদ্ধা করিতেন। পবন সমাদরে প্রায়ই তাঁহাকে বামকেলীতে আমন্ত্রণ করিয়া আনা হইত। তাঁহার সহিত শাস্ত্র পাঠ ও ধর্ম্যালোচনায় সনাতন দীর্ঘ সময় অতিবাহিত করিতেন। উত্তরকালে চৈতন্যচরণে আশ্রয় নিবার পর হইতে সনাতনের শাস্ত্র পাঠের আগ্রহ কেন্দ্রীভূত হয় ভক্তিশাস্ত্রের দিকে।

বৃন্দাবনবাসের প্রথম যুগে পরমানন্দ ভট্টাচার্য্য নামক এক বিশিষ্ট ভক্তিসিদ্ধ আচার্য্যের কাছেও তিনি শিক্ষা গ্রহণ করেন এবং ভাগবত ও অষ্টাঙ্গ ভক্তিশাস্ত্রের নিগূঢ় তত্ত্ব হয় তাঁহার অধিগত।

পিতামহ মুকুন্দদেবের লোকান্তরের পর, তাঁহারই পদে সনাতন রাজসরকাবে নিযুক্ত হন। তখন তাঁহার বয়স মাত্র আঠার বৎসর। তারপর ধীরে ধীরে নিজের প্রথর ব্যক্তিত্ব, বিচক্ষণতা ও কর্মনিষ্ঠার বলে পাঠান রাজ্যের অন্ততম প্রধান অমাত্যের পদে উন্নীত হন।

রাজ্যের প্রতিরক্ষা, শাসন প্রভৃতি সমস্ত গুরুত্বপূর্ণ কার্য্যেই সুলতান হুসেন শাহকে সনাতনের পরামর্শ গ্রহণ করিতে দেখা যাইত। সনাতন ক্রমে বাদশাহের দক্ষিণহস্ত স্বরূপ হইয়া উঠেন; তাঁহার অনুজ রূপ এবং অনুপমও তাঁহারই প্রভাবে উচ্চ রাজপদে নিযুক্ত হন।

তখনকার দিনে রামকেলীর দেবভ্রাতাদের পদমর্যাদা, প্রভাব ও বিস্ত-বিভবের খ্যাতি ছিল অসাধারণ। তাঁহাদের প্রাসাদের চারিদিকে ছড়ানো ছিল বহুসংখ্যক মন্দির, মণ্ডপ ও নাটশালা। খ্যাত-

নামা হিন্দু বিদ্বজ্জন, আচার্য্য ও সাধু-সন্ন্যাসী মাঝেই রামকেলীতে সনাতনের সভাকক্ষে পদার্পণ করিতেন, গ্রহণ করিতেন তাঁহার সেবা ও পৃষ্ঠপোষকতা। সনাতন ও তাঁহার ভ্রাতাদের বদান্ততায় দেশের দূর দূরান্তস্থিত শাস্ত্র-ব্যবসায়ী বহু ব্রাহ্মণ ও দীন দরিদ্র প্রতিপালিত হইত। এই সব কারণে রামকেলীর খ্যাতি ও সনাতনের প্রভাব প্রতিপত্তি সারা গোড়দেশে ছড়াইয়া পড়ে।

সনাতন ছিলেন হুসেন শাহের দবীর খাস—একান্ত সচিব। তৎকালীন যে কোন শিক্ষিত, সম্ভ্রান্ত মুসলমানের মত তিনি ফার্সী ও আরবীতে অনর্গল কথা বলিতে পারিতেন। বিধর্ম্মী সুলতান এবং ওমরাহদের সামাজিক জীবন ও রীতিনীতির অনেক কিছু তাঁহাকে অনুসরণ করিতে হইত। গোড় দরবার বা সুলতানের শিবিরে অবস্থান কালে তাঁহার বেশভূষা ও চালচলন দেখিয়া সাধারণ মানুষ তাঁহাকে ধরিয়া নিত মুসলমান ভাবাপন্ন বলিয়া। কিন্তু দিনান্তের কার্য্যশেষে রামকেলীতে গেলেই ফুটিয়া উঠিত তাঁহার আর এক রূপ। বাদশাহী দরবারের বাহ্য আচার-আচরণ, হাব-ভাব তিনি ত্যাগ করিতেন। স্নান তর্পণের পর শুরু হইত দানখ্যান, পূজা-অর্চনা, শাস্ত্রপাঠ ও ধর্ম্মীয় আলাপ-আলোচনা।

কিন্তু এত দানখ্যান, ধর্ম্মনিষ্ঠা ও দরবারী পদমর্য্যাদা সত্ত্বেও সনাতনের পরিবারের ভাগ্যে কিন্তু সামাজিক কোলিন্দ জুটে নাই। রক্ষণশীল হিন্দুসমাজের দৃষ্টিতে এই পরিবার ছিল পতিত—মুসলমানের ঘনিষ্ঠতা ও স্পর্শদোষের জন্য অবজ্ঞাত। এই জন্যই বঙ্গীয় কায়স্থদের কুলজীতে ইহাদের কোন উল্লেখ পাওয়া যায় না।

বিধর্ম্মীয় আচার-আচরণহুঁট সনাতন এতদিনে পাইয়াছেন প্রভু ত্রীচৈতন্তের চর্লভ দর্শন। সারা দেহ ও মনপ্রাণে আসিয়াছে দিবা আনন্দের জোয়ার। প্রভুর এই দর্শনের পরে নূতন মানুষে তিনি হইয়াছেন রূপান্তরিত।

সনাতনের জীবনের এ পরিবর্তন শুরু হইয়াছে দীর্ঘদিন যাবৎ, অগ্রসর হইয়াছে প্রচলিত ধারায়। বিস্তৃত বিষয় ও দরবারী মর্যাদার চাপে যে জীবন চাপা পড়িয়াছিল, আকুল হইয়া এতদিন তাহা কেবলি মাগিতেছিল বন্ধনমুক্তি। এবার সে মুক্তি সমাগত।

বাহ্যজীবনে সনাতন ছিলেন প্রভাবশীল রাজ-অমাত্য, আর অন্তরে দৈন্তময়, ত্যাগব্রতী মহাবৈষ্ণব। অন্তর্জীবনে তাই এতদিন ধীরে ধীরে জমিয়া উঠিতেছিল অধ্যাত্ম-সাধনার পরমসংকল্প, একান্ত-ভাবে গ্রহণ করিয়াছিলেন ভক্তি ও প্রেমধর্মের আদর্শ। তাঁহার এই গোপন প্রস্তুতিই সেদিন আকর্ষণ করিয়াছিল চৈতন্যদেবকে। স্নদুর রামকেলীতে প্রভু ছুটিয়া আসিয়াছিলেন। তবিশ্রুৎ জীবনের চিহ্নিত পার্শ্ব ও লীলা-পরিকর সনাতন ও রূপ এই দুই তাইকে তিনি অবলীলায় করিয়াছিলেন আত্মসাৎ।

সনাতনের জীবন ছিল বৈষ্ণবীয় সাধনার জগৎ উন্মুখ, সদা ভক্তি-ধৃত। তাঁহার পক্ষে ইহা আকস্মিক কিছু নয়। এ মনোবৃত্তি ও সাধনধারা তাঁহার পূর্বপুরুষের মধ্যেও বর্তমান ছিল। বংশগত বৈশিষ্ট্যটিই অপরূপ রূপে ফুটিয়া উঠিয়াছিল সাধননিষ্ঠ সনাতনের জীবনে। আর প্রভু ক্রীচৈতন্যের কৃপায় উত্তরকালে উহা লাভ করিয়াছিল চরম সার্থকতা।

হসেন শাহের বড় প্রিয়পাত্র ছিলেন সনাতন। রাজ্যের জটিল কর্মের দায়িত্বভার তাঁহার উপর ছাড়িয়া দিয়া বাদশাহ নিশ্চিন্ত থাকিতেন। শুধু শান্তির সময়েই নয়, যুদ্ধাভিযানে বাহির হইলেও হসেন শাহ তাঁহার এই প্রতিভাধর অমাত্যকে সঙ্গে রাখিতেন। কিন্তু এই রাজানুগ্রহ, এই দায়িত্বভার ও মর্যাদা ক্রমে তারতম্যরূপ হইয়া উঠে। বিষয়-কীট হইয়া দিন যাপন করা আর তাঁহার সন্ত হইতে চায় না। বাদশাহের সেনাধ্যক্ষেরা সে-বার নির্মমভাবে উড়িয়ায় দেব-দেবীর মূর্ত্তি ধ্বংস করে। তবু সনাতনের হৃদয় বিদীর্ণ হয়। শুরু হয় তীব্র অনুতাপের দহন। দিনের পর দিন তাবিতে

থাকেন, একি পাষণ্ডীর জীবন তিনি যাপন করিতেছেন? সদাই অমুসন্ধান করিতে থাকেন উদ্ধারের উপায়।

রামকেলী ও তাহার আশেপাশে সনাতন গড়িয়া তুলিয়াছেন এক অপূর্ব ধর্মীয় পরিবেশ। অজস্র মঠ-মন্দির নির্মিত হইয়াছে, খনন করা হইয়াছে পবিত্র কুণ্ড। প্রায়ই তিনি দেশ-দেশান্তর হইতে এখানে আমন্ত্রণ করিয়া আনেন বিশিষ্ট শাস্ত্রবিদ ও ভক্ত সাধকদের। গোড় দরবারের কাজ শেষ হইলেই রামকেলীর ভক্তিময় পরিবেশে আসিয়া হৃদয়ের জ্বালা জুড়াইতে বসেন, সাধন-ভজনে রত হন।

এমনি পরিবেশে থাকিয়া সনাতনের জীবনে জাগিয়া উঠে ভক্তিপ্রেমের স্মৃতি চেতনা। রামকেলীতে তাঁহার নিজের তৈরী কৃষ্ণ-লীলাস্থলগুলি ঘুরিয়া ঘুরিয়া আহরণ করেন দিব্য আনন্দ।

বাড়ীর নিকটে অতি নিভৃত স্থানেতে

কদম্ব কানন ধারা শ্যামকুণ্ড তাতে।

বৃন্দাবনলীলা তথা করয়ে চিস্তন,

না ধরে ধৈর্য নেন্দ্রে ধারা অমুক্ষণ ( ভক্তি রত্নাকর )

অতঃপর তীব্র আর্তি জাগে জীবনে, আর এই আর্তির মধ্য দিয়া নামিয়া আসে কৃষ্ণপ্রেমের রসস্রোত। সংসারের বিস্ত-বিভব, যশ মান সব কিছু নিরর্থক হইয়া উঠে। আকুলভাবে চিন্তা করিতে থাকেন—কোন্ পথে, কাহার নির্দেশে মিলিবে বহুবাহিত কৃষ্ণ দর্শন? কবে অপ্রাকৃত লীলারসে অবগাহন করিবেন? কবে এ জীবন হইবে কৃতকৃতার্থ?

এমনি সময়ে সনাতনের কাণে পৌছিল প্রভু শ্রীচৈতন্যের কথা। নীলাচলে তাঁহার অভ্যুদয় ঘটিয়াছে। প্রেমভক্তির প্রবল রসতরঙ্গে তিনি ভাসাইয়া নিতেছেন অগণিত ভক্ত সাধককে। এই তরঙ্গের ঢেউ সেদিন সনাতনেরও হৃদয়তটে আসিয়া আঘাত করে। জাগিয়া উঠে পরম উপলব্ধি—এই প্রভুই যে জীবের উদ্ধারকর্তা। আর ইনি যে তাঁহারই জীবনপ্রভু।

আকুল আবেদন জানাইয়া সনাতন স্রীচৈতন্যকে পত্র দিলেন—  
“প্রভু, তুমি আবির্ভূত হয়েছো জীবের উদ্ধারের জন্য। একটাবার  
আমার মত অধমজনের প্রতি কৃপা দৃষ্টিপাত করো। আমি একে  
বিষয়-কীট, তত্পরি স্বেচ্ছাচারী—পতিত। আমার মুক্তির কি কোন  
উপায় নেই? মনে প্রবল ইচ্ছা জেগেছে, এ ঘৃণ্য সংসারজীবন  
ত্যাগ করবো। আমায় অমুমতি দাও, তোমার চরণতলে নিজেকে  
উৎসর্গ করি, সারা জীবন কাটিয়ে দিই তোমার দিব্য মুখচন্দ্র  
নিরীক্ষণ করৈ।”

নীলাচলের অন্তরঙ্গ ভক্তেরা প্রভুকে এই দৈন্যময় পত্র দিলেন।  
কহিলেন, “গৌড়ের বাদশাহ, দোদীপ-প্রতাপ হুসেন শাহের  
ইনি প্রধান অমাত্য। রাজনৈতিক ও প্রশাসনিক কর্মকুশলতার  
দিক দিয়ে এঁর জুড়ি নেই। এমন মানুষও তোমার নর্তনে কীর্ণনে  
পাগল হয়ে উঠেছে; রাষ্ট্রস্বার্থ ছেড়ে দিয়ে তিখারী হতে চাচ্ছে—  
এ তো তোমার অলৌকিক কৃপালীলা ছাড়া আর কিছু নয়, প্রভু।”

প্রভুর অধরে যুহু মধুর হাসি দেখা দেয়। বার্তাবহের হস্তে  
তখনি তিনি এক পত্র প্রেরণ করেন। এ পত্রে আর কোন কথা  
নাই, আছে শুধু একটি মাত্র শ্লোকের উদ্ধৃতি—

পরব্যসিনি নারী ব্যগ্রাপি গৃহকর্মসু। তদেবাস্বাদয়ত্যন্তন বসজ  
রসায়নং ॥

অর্থাৎ, পরপুরুষে আসক্তা কোন নারী যেমন গৃহকর্মে থেকেও  
শ্রেমিকের স্মৃতি সদাই ধরে রাখতে পারে, তেমনি বিষয়ে লিপ্ত  
থেকেও চিন্তকে ডুবিয়ে রাখা যায় তাঁর প্রেম-রসে।

সনাতন মহাপণ্ডিত ব্যক্তি, সর্ব দর্শন ও অধ্যাত্মতত্ত্বে পারঙ্গম।  
তাই প্রভু তাঁহাকে ইচ্ছা করিয়াই স্বামী বিজ্ঞানেশ্বর সুপ্রসিদ্ধ গ্রন্থ  
পঞ্চদশী হইতে ঐ শ্লোকটি লিখিয়া পাঠান।

প্রভুর এই শ্লোকপত্রের ইঙ্গিত পরিষ্কার। সনাতন বুঝিলেন,  
মিলনলয় এখনো উপস্থিত হয় নাই, তাই প্রভু তাঁহার সান্নিধ্য অন্বেষণ



কোশলে এড়াইয়া গেলেন। হৃদয়ের আগুন চাপিয়া রাখিয়া এখনো কিছুদিন তাঁহাকে সংসারে বাস করিতে হইবে।

প্রভুর কাছ হইতে ঐ পত্র পাইবার পর হইতে সনাতনের ব্যাকুলতা আরো বাড়িয়া যায়। দিনের পর দিন অতিবাহিত হয় করুণ আর্তি ও কাণায়।

অবশেষে এই সেদিন রামকেলীতে বসিয়া প্রভুর কৃপা মিলিল। সুদূর পুরীধাম হইতে ছুটিয়া আসিয়া নিজের যাচিয়া সনাতনকে তিনি দর্শন দিলেন। সংসার ত্যাগের অমুমতি সেদিন না মিলিলেও তাঁহার প্রেমস্পর্শ ও আশ্বাসবাণী প্রাপ্ত হইয়া সনাতনের তাপিত হৃদয় কতকটা শান্ত হইল।

সনাতন ও রূপের নিকট বিদায় নেওয়া হইয়াছে, শ্রীচৈতন্য এবার বৃন্দাবনের দিকে রওনা হইবেন। তাঁহার নয়নাভিরাম রূপ, নর্তন-কৌতুক ও ভাবাবেশ এই কদিনের মধ্যেই সমগ্র অঞ্চলে আনিয়া দিয়াছে প্রাণচাঞ্চল্য। অগণিত নরনারী ভীড় করিয়াছে এই পুণ্য-দর্শন দেব-মানবের আশেপাশে। তাহাদের অনেকেই প্রভুর সঙ্গী হইতে ব্যগ্র।

সনাতন বিচক্ষণ ও দূরদর্শী; ব্যাপার দেখিয়া তিনি প্রমাদ গণিলেন। উত্তর-পূর্ব ভারতের বিভিন্ন অঞ্চল তখন রাজনৈতিক ঝড়-ঝাপ্টা চলিতেছে। এ সময়ে এত লোক সঙ্গে নিয়া চলিলে প্রভুর বিপদ হইতে পারে।

করজোড় তিনি নিবেদন করেন, “প্রভু, বৃন্দাবনেই যদি যাবে, এত লোক কেন সঙ্গে নিচ্ছে? আজকাল রাজা বাদশাহদের দ্বন্দ্ব সংঘর্ষ চলছে চারদিকে। এসময়ে জনসম্মুখিত্তি নিয়ে চলা মোটেই যুক্তিযুক্ত হবে না। তাছাড়া প্রভু, বৃন্দাবনে তো একান্তে কাঙাল বেশেই যেতে হয়।”

প্রবীণ রাজ-অমাত্য সনাতনের কথাগুলি যুক্তিযুক্ত। আবার ভক্তবৃন্দকে সন্তুষ্ট এবং নিরাশ করিতেও প্রভুর মন সায় দেয় না।

অগত্যা বৃন্দাবন-যাত্রা ত্যাগ করিয়া রওনা হইলেন শান্তিপুর অভিমুখে। সনাতন হাঁফ ছাড়িয়া বাঁচিলেন।

প্রভুর রামকেলীতে আগমন ও দর্শনদান যেন সনাতন ও রূপের নবজন্মের উন্মেষ। তাঁহার অলৌকিক শক্তির প্রভাবে উভয়ের জীবনে আসিয়াছে কৃষ্ণপ্রেমের নূতন জোয়ার। এই জোয়ারের উচ্ছ্বাসে তাঁহারা এবার ভাসিয়া চলিলেন।

অনতিবিলম্বে রামকেলীর প্রাসাদে বিশিষ্ট একজন শাস্ত্রজ্ঞ বৈষ্ণব সাধককে আমন্ত্রণ করিয়া আনা হইল। সনাতন ও রূপ তাঁহার সাহায্যে ভক্তিভরে কৃষ্ণমন্ত্ৰের পুরস্চরণ করিলেন। রাজকর্ম্ম এখন তাঁহাদের কাছে দুর্ব্বহ ভারস্বরূপ। যত তাড়াতাড়ি ইহা হইতে নিষ্কৃতি পাওয়া যায় ততই মঙ্গল।

উভয় ভ্রাতার মধ্যে সেদিন গভীর রাত অবধি গোপন পরামর্শ চলে। সিদ্ধান্ত স্থির হয়, রূপ আগে গৃহত্যাগ করিবেন, আর সনাতন বহির্গত হইবেন কিছুদিন পরে।

সনাতনের উপর বাদশাহের বহু দায়িত্বপূর্ণ কাজ হস্ত রহিয়াছে, তিনি অকস্মাৎ এখনি পদত্যাগ করিলে সারা দেশে চাঞ্চল্য পড়িয়া যাইবে, রাজকার্য্যে দেখা দিবে নানা বিশৃঙ্খলা। কাজেই তাঁহার নিষ্ক্রমণ সঙ্গত নয়। রাজকীয় দায়িত্বের বোঝা কিছুটা হালকা করিয়া তবেই তিনি স্নযোগমত একদিন সরিয়া পড়িবেন।

সনাতন ও রূপের আশ্রিত ব্রাহ্মণ পণ্ডিত ও সাধু সঙ্জনদের সংখ্যা নিতান্ত কম নয়। ইহাদের এবং আত্মীয়স্বজনদের ভরণ-পোষণের মোটামুটি ব্যবস্থার জন্ত রূপ তখনই তৎপর হইলেন। অল্প দিনের মধ্যে একাজ সম্পন্ন হইয়া গেল এবং পূর্ব্ব পরিকল্পনা অনুযায়ী রূপ চিরতরে করিলেন গৃহত্যাগ।

বাণ্যার আগে তিনি বিশ্বস্ত এক মুন্দির কাছে দশ হাজার টাকা

গচ্ছিত রাখিয়া গেলেন। কথা রহিল, জরুরী প্রয়োজন উপস্থিত হইলে সনাতন এই অর্থ তাঁহার কাজে লাগাইবেন।

রূপের নিষ্কমণের পর সনাতন আরো নিঃসঙ্গ হইয়া হইয়া পড়েন। বিষয়বিত্ত্ব চরমে উঠে। ক্রমে দরবারে যাতায়াতও বন্ধ হইয়া যায়। বাদশাহকে খবর পাঠান—তিনি অত্যন্ত গীড়িত, এখন হইতে স্বাভাবিকভাবে রাজসেবা সম্পন্ন করা তাঁহার পক্ষে আর সম্ভব হইবে না।

হুসেন শাহ বড় সন্দিগ্ধ হইয়া উঠেন। রূপ ইতিমধ্যে কাজকর্ম ছাড়িয়া কোথায় উধাও হইয়াছেন। দবীর খাসও তেমনি কোন মতলব আঁটে নাই তো? রাজ্যের চারিদিকে যুদ্ধবিগ্রহের মেঘ ঘনাইয়া আসিতেছে, ঠিক এসময়ে তাঁহার মত একজন বিশ্বস্ত ও কুশলী অমাত্য কর্মত্যাগ করিয়া বসিয়া থাকিলে যে মহাবিপদের কথা।

রাজবৈজ্ঞ প্রেরিত হইল সনাতনকে পরীক্ষা করার জন্ত। বৈজ্ঞ ফিরিয়া আসিলেন, মুচকি হাসিয়া জানাইলেন, “দবীর খাস শারীরিক বেশ সুস্থই আছেন, তাঁর জন্ত জাহাঁপনার চুশ্চিস্তার কোন কারণ নেই।”

হুসেন শাহ তো চটিয়া আগুন। পরদিনই তিনি অত্যন্ত সনাতনের রামকেলী-প্রাসাদে স্বয়ং উপস্থিত হন। দেখেন, দবীর খাসের দেহে রোগের চিহ্নমাত্র নাই, সাধু-সন্ন্যাসী ও শাস্ত্র-বিদদের দ্বারা পরিবৃত্ত হইয়া পরমানন্দে তিনি ধর্ম্মালোচনায় রত রহিয়াছেন।

বাদশাহ তাঁহাকে কার্যে যোগদানের জন্ত গীড়াগীড়ি করিলেন। অবশেষে ভীতি প্রদর্শন করিতেও ছাড়িলেন না। কিন্তু সনাতন তাঁহার সম্মুখে অটল। গৌড়েশ্বরের বদলে পরমেশ্বরের আসন

স্থাপিত হইয়াছে তাঁহার জীবনে, কোন চাওয়া-পাওয়ার প্রয়োজনই যে আজ আর তাঁহার নাই।

দৃষ্টিতে স্পষ্ট ভাষায় তিনি হুসেন শাহকে কহিলেন, “জাহাঁপনা, সত্য কথা বলতে কি, দরবারের কাজে আমি যোগদান করবো না বলেই স্থির করেছি। এখন থেকে আমি কেবলমাত্র শ্রীভগবানের দাস, আর কারুর নই। আমার এ সঙ্কল্প অপরিবর্তনীয়। আমায় আপনি মার্জনা করুন।”

ক্রুদ্ধ হইয়া বাদশাহ তখন সনাতনকে কারাগারে নিক্ষেপ করিলেন।

কিছুদিনের মধ্যেই রাজ্যে দেখা দিল এক জরুরী পরিস্থিতি। হুসেন শাহের সেনাপতি ইতিপূর্বে উড়িষ্যার যুদ্ধে পরাস্ত হইয়া ফিরিয়া আসিয়াছেন। এবার তিনি নিজেই সসৈন্তে রাজ্য প্রতাপরুদ্রের বিরুদ্ধে অগ্রসর হইতে চাহেন। প্রয়োজনীয় সব ব্যবস্থা প্রায় সমাপ্ত হইয়াছে। কিন্তু এসময়ে সনাতনের মত তীক্ষ্ণদী ও বিচক্ষণ অমাত্যের সাহায্য যে তাঁহার পক্ষে অপরিহার্য।

কারাগৃহ হইতে আনাইয়া বার বার সনাতনকে বুঝাইতে লাগিলেন, “দবীর খাস, এখনো তুমি তোমার পাগলামী ছাড়ো। আবার নিজের দায়িত্বপূর্ণ কাজে এসে যোগ দাও। আমার অনুরোধ শোন, আমার সঙ্গে তুমি উড়িষ্যা অভিযানে চল।”

সনাতন চরম কথা শুনাইয়া দিলেন,—“আপনার অভিযানের দৃষ্টে আমি মানসপটে চমৎকার দেখতে পাচ্ছি, জাহাঁপনা। আপনার সেনাবাহিনী সারা পথের দেবমন্দির ধ্বংস করবে, পবিত্র বিগ্রহ করবে কলুষিত। না—কোন মতে আমি আপনার এ পাপকার্যের সঙ্গী হতে পারবো না।”

অমাত্যকে তখন আবার কারাগারে প্রেরণ করিয়া হুসেন শাহ প্রতাপরুদ্রের বিরুদ্ধে যুদ্ধযাত্রা করিলেন।

সনাতনের এখন একমাত্র লক্ষ্য—কি করিয়া তিনি মুক্তিলাভ করিবেন, মিলিত হইবেন প্রাণপ্রভু শ্রীচৈতন্যের সঙ্গে ।

হঠাৎ সেদিন রূপের প্রেরিত এক পত্র গোপন পথে তাঁহার নিকট পৌঁছিল । তাহাতে নির্দেশ দেওয়া আছে— স্থানীয় মুদির কাছে যে টাকা গচ্ছিত আছে, তাহা হইতে, সনাতন যেন এই পত্র দেখাইয়া, সাত হাজার টাকা গ্রহণ করেন এবং উহা দ্বারা ক্রয় করেন নিজের মুক্তি ।

প্রভুর সহিত মিলনের জন্ত সনাতন উন্মত্তপ্রায় হইয়া উঠিয়াছেন । তাই উপায়ান্তর অভাবে কারামুক্তির জন্ত সেদিন রূপের প্রস্তাবিত পথই তাঁহাকে বাছিয়া নিতে হইল । রক্ষীকে উৎকোচে বশীভূত করিয়া তিনি বাহির হইয়া আসিলেন ।

শ্রীচৈতন্য এসময়ে বৃন্দাবনের পথে বারাণসীতে আসিয়া অবস্থান করিতেছেন । সনাতন আর এক মুহূর্ত্ত বিলম্ব না করিয়া পশ্চিম ভারতের দিকে ধাবিত হইলেন । সঙ্গে চলিল বহু দিনের বিখস্ত ভৃত্য দৈশান ।

মুক্তির অমোঘ আহ্বান আসিয়া গিয়াছে সনাতনের জীবনে । এই মুক্তির জন্ত চরমতম মূল্য দিতে তিনি আজ প্রস্তুত । ধন মান রাজসম্পদ সব কিছু অবলীলায় ত্যাগ করিয়া, নিষ্কিঞ্চন মুমুকু সাধক ব্রহ্মপদে ছুটিয়া চলিলেন ।

বাদশাহের বক্ষীরা তাঁহাকে অনুসরণ করিতে পারে, এ আশঙ্কা যথেষ্টই রহিয়াছে । তাই পথ চলিতে লাগিলেন দীন দরিদ্র দরবেশের ছদ্মবেশে ।

পথ চলিতে চলিতে সেদিন এক ক্ষুদ্র ভূঁইয়ার অধিকারে তাঁহারা আসিয়া পড়িয়াছেন । কোন পরিচয় নাই, কিন্তু সাক্ষাৎ মাত্রেই ভূঁইয়া তাঁহাদের মহাসমাদর শুরু করিয়া দিল, যেন সে কত দিনের বান্ধব ।

এই আতিশয্য দেখিয়া সনাতন কিন্তু সন্দেহ হইয়া উঠিলেন । এই

শ্রেণীর ভুঁইয়াদের কুকীর্তির কথা আগেই কিছু কিছু তাঁহার শোনা ছিল। ইহারা বিদেশী পর্য্যটকদের আশ্রয় দেয়, প্রচুর আদর-যত্ন করে, তারপর রাত্রিযোগে সুযোগমত যথাসর্ব্বশ্ব লুণ্ঠন করিয়া করে হত্যা। সনাতনের নিজের জ্ঞান চিন্তা নাই। তিনি তো কপর্দকহীন। কিন্তু ঈশান? সে তো অর্থাৎ লুকাইয়া রাখে নাই?

চাপে পড়িয়া ঈশান স্বীকার করিল—সাতটি মোহর সে সংগোপনে নিজের কাছে রাখিয়াছে। প্রয়োজন হইলে সনাতন বা তাহার নিজের কাছে এগুলি ব্যবহার করা হইবে, ইহাই ছিল উদ্দেশ্য।

সনাতন ক্রোধে জ্বলিয়া উঠিলেন, কঠোর ভাষায় ভৃত্যকে তিরস্কার করিয়া কহিলেন, “সর্ব্বশ্ব ত্যাগ করে, বৈরাগ্যসাধন নিয়ে, আমি পথে বেরিয়েছি। আর তুমি আমার সেই সাধনার পথে স্ফুট করেছো এমনিতর বিদ্রোহ! ছি—ছি!”

তখন ভুঁইয়ার সমীপে গিয়া কহিলেন, “আমার সঙ্গীর কাছে সাতটি সঞ্চিত মোহর রয়েছে। এগুলো আপনি গ্রহণ করুন, আর আমাদের নিরাপদে পার করে দিন সামনের ঐ দুর্গম পাহাড়।”

সনাতনের সততায় ও সত্যভাবে অর্থগৃহ্য ভুঁইয়া খুব খুশী। তখন সে নিজে সঙ্গে করিয়া অতিথিদ্বয়কে সেখানকার বিপজ্জনক অঞ্চল পার করিয়া দিল।

ভুঁইয়া প্রস্থান করিলে ঈশান কথা প্রসঙ্গে কহিল, “হজুর, একটা কথা আপনার কাছে গোপন করে আমি আরো অপরাধী হয়েছি। আমার কাছে আসলে আটটি মোহর ছিল। ভুঁইয়াকে সাত মোহর দিয়ে দেবার পর আর একটি মোহর অবশিষ্ট রয়েছে। মিথ্যা বলার জ্ঞান আপনার কাছে আমি মাপ চাইছি।”

সনাতনের আনন মুহূর্ত্তে কঠোর হইয়া উঠে। নৃচক্ষুরে কহেন, “ঈশান, আমার অনুসরণ করা তোমার ঠিক হবে না। এখনো অর্থের ওপর তোমার প্রবল আকর্ষণ রয়েছে। অর্থের উপর নির্ভর করেই তুমি চলতে চাও। আর আমি নিয়েছি বৈরাগ্য সাধনের

কঠিন পথ; একান্তভাবে নির্ভর করতে চাই ভগবানের উপর। নিষ্কিঞ্চন হয়ে জীবন যাপন না করলে আমি আমার ব্রত থেকে চ্যুত হবো। তুমি এখনি আমার কাছ থেকে বিদায় নিয়ে চলে যাও।”

মনিবকে প্রণাম করিয়া ঈশান সাশ্রনয়নে রামকেলীতে প্রত্যাবর্তন করিল।

দ্রুতপদে পথ চলিতে চলিতে সনাতন সেদিন শোনপুরে আসিয়া উপস্থিত। সেখানে তখন হরিহরছত্রের মেলা অনুষ্ঠিত হইতেছে। হঠাৎ মেলাক্ষেত্রে তাঁহার সাক্ষাৎ ঘটে ভগিনীপতি শ্রীকান্তের সঙ্গে। সনাতনেরই কৃপায় শ্রীকান্ত রাজসরকারের দায়িত্বপূর্ণ পদে অধিষ্ঠিত আছেন। ছত্রের মেলায় তিনি আসিয়াছেন বাদশাহের জ্ঞাত কয়েক লাখ টাকার ঘোড়া কিনিতে।

বহু অমুনয়-বিনয়েও শ্রীকান্ত সনাতনকে তাঁহার বৈরাগ্যের পথ হইতে বিচ্যুত করিতে পারিলেন না। শেষটায় ধরিয়া বসিলেন, “বেশ, যদি ঘর ছেড়ে যেতেই হয়, ভিখারীর বেশে যেতে দেবো না। অল্পমতি দিন, আমি আপনাকে কিছু নূতন পরিচ্ছদ কিনে দিই।”

সনাতন দৃঢ়স্বরে এ প্রস্তাব প্রত্যাখ্যান করিলেন। অগত্যা শ্রীকান্ত ধরিয়া বসিলেন, “এখন তো প্রচণ্ড শীত পড়েছে পশ্চিমে একখণ্ড ভোটকম্বল আপনাকে নিতেই হবে, নতুবা পথে যে কষ্টের অবধি থাকবে না।”

ভগিনীপতির নির্ব্বন্ধাতিশয্যে সনাতনকে ঐ কম্বলটি গ্রহণ করিতে হইল। সেটি কাঁধে ফেলিয়া আবার তিনি শুরু করিলেন পদযাত্রা। কয়েকদিন অবিরাম পথ চলার পর উপনীত হইলেন বারাণসীধামে।

বারাণসীতে পৌঁছিয়াই যে স্নানবাগিচা সনাতন গুনিলেন, তাহাতে তাঁহার আনন্দের অবধি রহিল না। প্রাণপ্রভু শ্রীচৈতন্য কিছুদিন

যাবৎ এখানেই অবস্থান করিতেছেন। তাঁহার নর্ভন-কীর্তনে কানীর ভক্তসমাজে এক প্রচণ্ড সাড় পড়িয়া গিয়াছে।

চন্দ্রশেখর মিশ্রের গৃহে প্রভু তখন অবস্থান করিতেছেন। দীনবেশে যুক্তকরে সনাতন মিশ্রের দ্বারে আসিয়া দাঁড়াইলেন।

গৃহের অভ্যন্তরে বসিয়া প্রভু ভক্তদের সঙ্গে ইষ্টগোষ্ঠী করিতেছেন। হঠাৎ চন্দ্রশেখর মিশ্রকে কহিলেন, “মিশ্র, আজ বড় শুভদিন। বাইরে গিয়ে আঁখো, তোমার দ্বারে সমাগত হয়েছেন এক মহাবৈষ্ণব। এখনি পরম সমাদরে তাঁকে আমার কাছে নিয়ে এসো।”

ভক্তেরা ত্রস্তব্যস্তে বাহিরে ছুটিয়া আসিলেন। কিন্তু কই, কোন বৈষ্ণব মূর্তি তো সেখানে নাই? ছয়ারে দণ্ডায়মান ছিন্নবাস পরিহিত এক দরবেশ। কণ্ঠিমালী, তিলক বা বৈরাগীর উত্তরীয় কোন কিছুই তাঁহার নাই। প্রভু অপর কাহারো কথা বলেন নাই তো!

কিছুক্ষণ ইতস্ততঃ করার পর চন্দ্রশেখর মিশ্র দরবেশ-বেশী সনাতনকে বাড়ীর ভিতরে নিয়া গেলেন।

প্রভুর দর্শন পাওয়া মাত্র সনাতনের ভাবাবেগ উথলিয়া উঠিল। ছুটিয়া গিয়া সাষ্টাঙ্গে তাঁহার চরণে প্রণত হইলেন। প্রাণপ্রিয় ভক্তের আগমনে প্রভুরও আনন্দের আর অবধি নাই। ভাবাবেগে সারা দেহ কম্পিত হইতেছে, নয়নে বহিতেছে পুলকাক্ষ। ভুলুষ্ঠিত সনাতনকে সহজে তুলিয়া ধরিয়া তখন আলিঙ্গনাবদ্ধ করেন।

দৈন্ত্রভরে সনাতন সরিয়া দাঁড়ান। কাতর স্বরে কহেন, “প্রভু, আমি অতি নীচ, হীনাচারী, তোমার দেবদূর্লভ অঙ্গ দিয়ে আমার এভাবে আর স্পর্শ করো না।”

চিহ্নিত লীলা-পার্বদ এতদিন পরে আজ প্রভুর চরণে আত্মসমর্পণ করিলেন। এ আনন্দ রাখার তাঁহার যে আর ঠাই নাই। প্রেমাবেগে বার বার সনাতনকে বক্ষে জড়াইয়া ধরিলেন—

প্রভু কহে তোমা স্পর্শি আত্ম পবিত্রিতে।

ভক্তি বলে পার তুমি ব্রহ্মাণ্ড শোধিতে।



অতঃপর প্রেমার্ককণ্ঠে সকলের কাছে সনাতনের নিগূঢ় পরিচয় জ্ঞাপন করিলেন, তাঁহার ত্যাগ ভিত্তিকা ও বৈরাগ্য সাধনের প্রশস্তি গাহিতে লাগিলেন উচ্ছ্বসিত কণ্ঠে।

মধ্যাহ্ন সমাগত। প্রভু কহিলেন, “সনাতন, বেলা অনেক হয়েছে। এবার তাড়াতাড়ি পতিতপাবনী গঙ্গার পুণ্য ধারায় স্নান তর্পণ সমাপন করে এসো। তারপর ভিক্ষা গ্রহণ করো।”

মিষ্ণুগৃহ হইতে একখণ্ড পুরাতন বস্ত্র সনাতন চাহিয়া নিলেন। উহা দ্বিখণ্ডিত করিয়া তৈরী করিলেন নিজের কৌপীন ও বহির্ব্বাস।

স্নানের ঘাট হইতে ফিরিয়া আসিতেই এক মারাঠী ব্রাহ্মণ সনাতনকে তাঁহার গৃহে ভোজনের নিমন্ত্রণ জানানাইলেন।

কিন্তু সনাতন তাহাতে সম্মত নন। কৃচ্ছ্রব্রত ও কাঙালের জীবনকেই যে তিনি পরম পথের প্রশস্তি হিসাবে আজ প্রাণপণে আঁকড়িয়া ধরিয়াছেন। সারা জীবন কাটিয়াছে বাদশাহী দরবারের ভোগ-বিলাস ও ঐশ্বর্য্যের চাকচিক্যের মাঝখানে। তাইতো বৈষয়িকতার সূক্ষ্মতম অঙ্গুরটিকে নিঃশেষে দন্ধ না করা অবধি তাঁহার স্বস্তি নাই। চরম বৈরাগ্যের মধ্য দিয়া পৌঁছিবেন কৃষ্ণ অনুরাগের মহাসমুদ্রে, ইহাই যে তাঁহার অভীক্ষা।

যুক্তকরে সনাতন নিবেদন করিলেন, “আপনারা আশীর্ব্বাদ করুন, নিষ্কিঞ্চন বৈষ্ণব হয়ে গৃহে গৃহে মাধুকরী করেই যেন আমি দিনাতিপাত করতে পারি।”

ভোট-কম্বলটি স্বন্ধে নিয়া, ভিক্ষার বুলি হস্তে সনাতন উঠিয়া দাঁড়াইলেন। এবার বাহির হইবেন দ্বারে দ্বারে ভিক্ষা মাগিতে।

প্রভু তো মহা উল্লসিত, বার বার গদগদ কণ্ঠে সবাইকে কহিতে লাগিলেন, “ছাখো ছাখো, সনাতনের কি অপূর্ব্ব বৈরাগ্য সাধন।”

প্রভু আনন্দ প্রকাশ করিতেছেন বটে, কিন্তু এই সঙ্গে তীক্ষ্ণ দৃষ্টিতে ঘন ঘন চাহিতেছেন সনাতনের স্বক্কাঙ্কিত ভোট-কম্বলটির দিকে।

তাঁহার এই দৃষ্টির গূঢ় তাৎপর্য্য বুঝিতে সনাতনের দেহী হইল না।

যুহুর্থে নিজ সিদ্ধাস্ত তিনি স্থির করিয়া কেলেদ, ছুটিয়া যান গজতীরে ।  
দীন দরিদ্র এক বৃদ্ধ নিকটস্থ ঘাটে বসিয়া তাহার জীর্ণ কাঁথাটি রৌদ্রে  
শুক করিতেছে । সনাতন তাহারই শরণ নিলেন । মিনতি করিয়া  
কহিলেন, “তাই, তুমি দয়া করে আমার একটা উপকার করো ।  
আমার এই নূতন কস্থলটির বদলে তোমার ঐ ছেঁড়া কাঁথাখানি  
আমায় দাও । এজন্ত চিরকৃতজ্ঞ থাকবো তোমার কাছে ।”

সংশয় ও সন্দেহে বৃদ্ধের ভ্রু কুঞ্চিত হইয়া উঠে । নূতন ভোট-  
কস্থলের বদলে এই অব্যবহার্য্য কাঁথা ? এ আবার কি অদ্ভুত  
প্রস্তাব ? এই বৈরাগীর মনে কোন অভিসন্ধি নাই তো ? না কি  
এ তাহার পরিহাস !

বহুক্ষণ নানাভাবে বুঝাইয়া সনাতন লোকটিকে রাজী করান ।  
তারপর মহাপ্রসন্ন মনে জীর্ণ কাঁথা গায়ে জড়াইয়া ফিরিয়া আসেন  
প্রভুর সমীপে ।

প্রভুর চোখে মুখে ফুটিয়া উঠে অপার আনন্দের দীপ্তি । বিশ্বায়ের  
ভান করিয়া জিজ্ঞাসা করেন, “একি সনাতন ! তোমার সেই ভোট-  
কস্থলটি কোথায় হারিয়ে এলে ?”

কস্থল বর্জনের কাহিনী শুনিয়া প্রভু আনন্দে ডগমগ । এই তো  
চাই । তাঁহার সনাতন যে লোকগুরু হওয়ার জন্ত আবির্ভূত । যে  
ভক্তি সাত্ত্বাজ্যের পন্থন প্রভু করিতেছেন তিনি যে তাহার অশ্রুতম  
নিয়ামক রূপে আগে হইতেই চিহ্নিত হইয়া আছেন । তাই তো  
লোকশিক্ষার জন্ত সনাতনের জীবনে প্রকটিত হওয়া প্রয়োজন ত্যাগ  
বৈরাগ্যের পরাকাষ্ঠা ।—

প্রভু কহে ইহা আমি করিয়াছি বিচার ।

বিষয় রোগ খণ্ডাইল কৃষ্ণ যে তোমার ।

সে কেন রাখিবে তোমার শেষ বিষয় ভোগ ।

রোগ খণ্ডি সঙ্কল্প না রাখে বিষয় রোগ ।

হসেন শাহের প্রধান অমাত্যের এই সর্বব্যাপী মহাবৈরাগীর

রূপটি শ্রীচৈতন্য সেদিন ইচ্ছা করিয়াই সর্বজন সমক্ষে প্রকটিত করিলেন। বৈষ্ণব সাধকসমাজের সম্মুখে রাখিয়া গেলেন কচ্ছুবরণ ও দৈন্যময়তার এক কালজয়ী আলোচ্য।

বারাণসীতে প্রভুর কাছে সনাতন এ সময়ে কিছুদিন অবস্থান করেন। ঘনিষ্ঠ সান্নিধ্যে রাখিয়া প্রভু তাঁহার এই চিহ্নিত পার্শ্বদিকে অনুপ্রাণিত করেন নিজ প্রবর্তিত বৈষ্ণবীয় সাধনায়। সাধ্য-সাধনার তত্ত্ব নিরূপণে দিনের পর দিন অতিবাহিত হয়। সনাতন প্রকৃত জিজ্ঞাসু, মহাপ্রতিভাধর, সর্বোপরি প্রভুর চরণে সমর্পিত-প্রাণ। পরমোৎসাহে একের পর এক তিনি প্রশ্ন করিয়া চলেন, আর প্রভু প্রসন্নোজ্জল মুখে উত্তর দিতে থাকেন। কিছুদিন আগে গোদাবরী-তীরে প্রভু ও রামানন্দের সংলাপের মধ্য দিয়া প্রকাশিত হইয়াছে গোড়ায় বৈষ্ণবধর্মের নির্যাস—ব্রজরসতত্ত্ব। আর আজ বারাণসীর গঙ্গাতীরে প্রভু ও সনাতনের প্রশ্নোত্তরের মধ্য দিয়া উদ্ঘাটিত হইল গোড়ায় বৈষ্ণবসাধনার ক্রম ও নিগূঢ় তত্ত্ব। প্রভুর ব্যাখ্যাত এই তত্ত্বের সংবাহকরূপেই সনাতন উত্তরকালে ব্রজমণ্ডলের বৈষ্ণব-সমাজের শীর্ষস্থানীয় হইয়া উঠিয়াছিলেন।

একে একে প্রভু বিবৃত করিলেন কৃষ্ণ-অবতার ও বৃন্দাবন-লীলার মর্মকথা। প্রকাশ করিলেন যুগলভজনের অপূর্ব পদ্ধতি। প্রথমে শ্রীমুখের বাণী শুনাইয়াই প্রভু সনাতনকে কৃতার্থ করিলেন। তারপর পরম কৃপাভরে তাঁহার মধ্যে করিলেন শক্তি-সঞ্চার। সনাতনের শিরে পদ্মহস্ত স্থাপন করিয়া কহিলেন, “সনাতন, আজ দেববাহিত যে সব তত্ত্ব তুমি শ্রবণ করলে, আশীর্বাদ করি, তা তোমার ভেতর সঞ্চারিত হয়ে উঠুক।”

ইতিপূর্বে রূপকেও প্রভু এমনি কৃপা করিয়াছেন। শক্তি সঞ্চার করিয়া পাঠাইয়া দিয়াছেন বৃন্দাবনধামে। এবার সনাতনকে সেখানে প্রেরণ করিলেন বিরাট দায়িত্বের ভার দিয়া। নির্দেশ দিলেন—

তুমিও করিহ ভক্তিরসের প্রচার ।  
 মথুরায় লুপ্ত ভীর্ষের করিহ উদ্ধার ।  
 বৃন্দাবনে কৃষ্ণসেবা বৈষ্ণব আচার ।  
 ভক্তি স্মৃতি শাস্ত্র করি করহ প্রচার ॥

আরো কহিলেন, “সনাতন, এর পর থেকে আমার কাছাকাড়-  
 ধারী কাঙাল বৈষ্ণবেরা দলে দলে ব্রজমণ্ডলে গিয়ে আশ্রয় নেবে ।  
 তুমি তাদের ওপর দৃষ্টি রেখো, রক্ষণাবেক্ষণ ক’রো ।”

প্রভুর এই আদেশ সনাতন নিষ্ঠাভরে পালন করিয়াছিলেন ।  
 প্রভুর ব্যাখ্যাত তত্ত্বের ধারক ও বাহকরূপে উত্তরকালে ব্রজমণ্ডলেই  
 তিনি স্থায়ীভাবে বাস করিতে থাকেন এবং অচিরকাল মধ্যে  
 সেখানকার বৈষ্ণবসমাজের মুখপাত্ররূপে চিহ্নিত হইয়া উঠেন ।

বৃন্দাবনে পৌঁছিয়াই প্রবীণ ভক্ত সুবুদ্ধি রায়, লোকনাথ গোস্বামী  
 ও ভৃগুর্ভ পণ্ডিতের সহিত সনাতন সাক্ষাৎ করিলেন । দৈন্ত্যভরে  
 তাঁহাদের চরণে দণ্ডবৎ করার পর আশ্রয় নিলেন যমুনা-পুলিনের  
 আদিত্যটিলায় ।

স্থানটি ঘন অরণ্যময় । এখানকার নির্জন সুগভীর পরিবেশ  
 ধ্যানভজনের বড় অনুকূল । নির্বিলম্ব সাধক সনাতনের এ জায়গাটি  
 বড় ভাল লাগিল । এখানে বসিয়া একান্ত নিষ্ঠায় তিনি সাধনভজন  
 শুরু করিয়া দিলেন ।

সনাতনের এই সময়কার ত্যাগ-বৈরাগ্যময়, ভজননিষ্ঠ জীবনের  
 চিত্র ‘ভক্ত পদাবলী’ হইতে পাওয়া যায়—

কভু কান্দে কভু হাসে কভু প্রেমানন্দে ভাসে

কভু ভিক্ষা কভু উপবাস ।

হেঁড়া কাঁথা, নেড়া মাথা মুখে কৃষ্ণ গুণগাথা

পরিধান-হেঁড়া বহির্বাস ।

কখনও বনের শাক অলবণে করি পাক

মুখে দেয় ছই এক গ্রাস ।

মাঝে মাঝে ভজনতন্ময় সাধকের স্বাভাবিক অবস্থা যখন কিরিয়া আসে, ঝুলি কাঁধে পদব্রজে মথুরায় চলিয়া যান। যৎকিঞ্চিৎ ভিক্ষা সেখানে মিলে, তাহাতেই হয় উদরপূর্তি।

কিছুদিনের মধ্যেই প্রভুর নির্দেশ মত সমাতন লুপ্ততীর্থ উদ্ধারে ব্রতী হন। আগে হইতেই লোকনাথ গোস্বামী এ কাজ কিছুটা শুরু করিয়াছেন। সনাতন তাঁহার সহিত নিজের প্রচেষ্টা যুক্ত করিলেন। যে সব প্রাচীন গ্রন্থে ব্রহ্মমাহাত্ম্য বর্ণিত আছে সেগুলি টুঁড়িয়া লুপ্ত তীর্থের সন্ধান বাহির করা এখন হইতে হয় তাঁহার এক বড় কাজ। এই উদ্দেশ্যে নিয়া দিনের পর দিন তিনি অরণ্যে পর্বতে ঘুরিয়া বেড়ান। শাস্ত্র, মহাজন বাক্য ও লোকগাথার ভিত্তিতে রাধাকৃষ্ণের এক একটি লীলাতীর্থ উদ্ধার করেন, আর আনন্দে উৎফুল্ল হইয়া স্থানীয় জনগণকে নিয়া মত্ত হন কীর্তনানন্দে।

বৎসরখানেক বৃন্দাবনে অতিবাহিত করার পর প্রভু শ্রীচৈতন্যের জন্ম সনাতনের প্রাণ চঞ্চল হইয়া উঠে। তাহাড়া, প্রভু তাঁহাকে একবার নীলাচলে ঘুরিয়া আসিতেও বলিয়াছিলেন। তাই হঠাৎ একদিন ঝুলি কাঁধে নিয়া উড়িষ্যার পথে ধাবিত হইলেন।

ঝাড়খণ্ডের মধ্য দিয়া সনাতন দিন রাত পথ চলিতেছেন। হঠাৎ একদিন দেখা গেল, দেহে তাঁহার বিষাক্ত কণ্ট্র রোগের আক্রমণ ঘটিয়াছে। নিবিবল সন্ন্যাসী মনে মনে ভাবিতে থাকেন, এই ছুট রোগের ছুর্ভোগ যে তাঁহার প্রাপ্য। দবীর খাস জীবনে স্নেহ সুলভানের অধীনে থাকিয়া যে সব অশ্রয়-অনাচার করিয়াছেন, এ যে তাহারই অনিবার্য পরিণতি। সঙ্গে সঙ্গে নিজ সঙ্কল্প স্থির করিয়া ফেলিলেন, ঘৃণ্য রোগে আক্রান্ত এই দেহভার আর শুধু শুধু বহন করিয়া বেড়াইবেন না। পুরীধামে পৌঁছিয়া শ্রীজগন্নাথ ও প্রভু

ঐচ্ছিক চন্দ্রবদন দর্শন করিবেন, তারপর রথচক্রতলে করিবেন  
প্রাণ বিসর্জন।

ধামে পৌঁছিয়াই সনাতন উপস্থিত হইলেন হরিদাসের তখন  
কুটিরে। হরিদাস নিজেকে মনে করেন যবন, পতিত, দীনাতিদীন।  
তাই ত্রীজগন্নাথের সেবক ও চৈতন্য-প্রভুর ভক্তদের স্পর্শ এড়াইয়া  
নগরের এক প্রান্তে নিজের পর্ণকুটির রচনা করিয়াছেন। সনাতনের  
মনেও এমন দৈন্ত্যভাব; নিজেকে মনে করেন আচারভ্রষ্ট ও অপবিত্র।  
তাই হরিদাসের কুটিরই যে তাঁহার আশ্রয়স্থল। জগদগুরু হরিদাস  
আর ত্যাগনিষ্ঠ শাস্ত্রবিদ সাধক সনাতন, এই দুয়ের মিলনে বিজ্ঞান  
টোটা মধ্যস্থ কুটির সরগরম হইয়া উঠে।

প্রভুর নিত্যকার এক কাজ ছিল পরম ভক্ত হরিদাসকে দর্শন  
দান। জগন্নাথের উপল ভোগের পর তিনি সাক্ষাৎসাক্ষ সহ এই  
কুটিরে উপস্থিত হইতেন, দীর্ঘ সময় কাটাইয়া গৃহে ফিরিতেন।

সেদিন প্রভু টোটায় পদার্পণ করা মাত্র সনাতন দৈন্ত্যভরে  
তাঁহাকে প্রণাম করিলেন। বাহু প্রসারিয়া প্রভু যতই আলিঙ্গন  
করিতে যান, সনাতন ততই পিছু হটেন। কাতর স্বরে বলেন,  
“প্রভু কৃপা করো, আমার মিনতি রাখ। এমন ক’রে তোমার  
দেবত্বভেদ দেহ দিয়ে আমায় স্পর্শ ক’রো না। আমি অতি হীন,  
ভ্রষ্টাচারী। তত্পরি সারা অঙ্গে রয়েছে কণ্ডুর ঘৃণ্য ক্লেদ। দোহাই  
তোমার, এই ক্লেদ তোমার গায়ে মেখে আমায় আর পাপের ভাগী  
ক’রো না।”

কিন্তু প্রভুকে রোধ করিবে এমন সাধ্য কার ? আনন্দের আবেশে  
বার বার প্রিয় পার্শ্বদকে বুকে জড়াইয়া ধরেন, কণ্ডুরস তাঁহার  
সারা শরীরে লিপ্ত হয়। আর সনাতন কেবলি জ্বলিতে থাকেন  
অন্তঃপ্রাণের তীব্র দহনে।

সনাতনের আত্মপ্রাণি কেবলি বাড়িতে থাকে। ভাবেন—কৃষ্ণ তাঁহাকে একি বিপদে ফেলিলেন। রোজই প্রভু তাঁহাকে এমনি ভাবে প্রেমালিঙ্গন দিবেন, আর তাঁহার দেহ হইবে অপবিত্র। এষে নিতান্ত অসহ। বরং এ পাপ-দেহ তাড়াতাড়ি বিসর্জন দেওয়াই যুক্তিযুক্ত।

সেদিন ভক্তগণসহ শ্রীচৈতন্য হরিদাসের ভজনকুটির আলো করিয়া বসিয়াছেন, তাবাবেশে ও দিব্য আনন্দে তিনি উদ্দীপিত। শ্রীমুখ হইতে কৃষ্ণকথার অমৃতধারা ঝরিয়া পড়িতেছে।

হঠাৎ প্রভু সনাতনের দিকে ফিরিয়া কহিলেন, “সনাতন, একটা কথা মনে রেখো, দেহত্যাগ করলেই কিন্তু কৃষ্ণ মিলে না; কৃষ্ণ মিলে কৃষ্ণভজনে। ওসব অশুভ সঙ্কল্প ছেড়ে দাও, ডুব দাও লীলাময়ের লীলারসের মহাপাধারে। আমি আশীর্বাদ করছি, অচিরে তোমার মনস্কামনা সিদ্ধ হবে, পাবে পরমপ্রভুর দর্শন।”

প্রভুর ইঙ্গিতের মর্ম্ম সনাতন বুঝিলেন। অন্তর্যামীর কাছে সনাতনের আত্মহত্যার গোপন ইচ্ছাটি অজানা থাকে নাই।

প্রেমাবেগে সনাতন তাঁহার চরণতলে নিপতিত হইলেন। কাদিতে কাদিতে কহিলেন, “প্রভু, আমি পতিত, তায় মহাপাতকী। তবে এ দেহ জ্বিইয়ে রেখে কি লাভ, বলো? শ্রীজগন্নাথের রথচক্রতলে আমি নিজেকে নিক্ষেপ করবো, আমার তুমি অনুমতি দাও।”

উত্তরে কৃপাময় প্রভু যে কথা কহিলেন, তাহার মধ্য দিয়া অন্তরঙ্গ ভক্ত সনাতনের মূল্যায়ন প্রকট হইয়া উঠে :

প্রভু কহে তোমার দেহ মোর নিজ ধন।

তুমি মোরে করিয়াছ আত্মসমর্পণ।

পরের জন্য তুমি কেন চাহ বিনাশিতে।

ধর্ম্মাধর্ম্ম বিচার কিবা না পার করিতে।

তোমার শরীর মোর প্রধান সাধন।

এ শরীরে সাধিব আমি বহু প্রয়োজন। ( চৈঃ চঃ )

চিহ্নিত পার্শ্বদ সনাতনকে দিয়া কি ঐশী কৰ্ম প্রভু করাইবেন তাহার আভাষ ইতিমধ্যেই কিছুটা ফুটিয়া উঠিয়াছে। কৃষ্ণভক্তি, কৃষ্ণ-সেবার প্রবর্তন, লীলাতীর্থ উদ্ধার, বৈরাগ্যময় আদর্শের প্রচার—এগুলি তাঁহার সঙ্কল্পে রহিয়াছে। একাজে সনাতন তাঁহার অন্ততম প্রধান সহায়। নিজে প্রভু মাতৃআজ্ঞায় নীলাচলে বাস করিতেছেন, তাই এস্থান ত্যাগ করার ইচ্ছা তাঁহার নাই। এদিকে প্রাণপ্রিয় ব্রজেশ্বনন্দনের লীলাধাম বৃন্দাবনের দিকে তাঁহার দৃষ্টি রহিয়াছে সতত নিবদ্ধ। সেখানকার নব উজ্জীবিত ভক্তিবর্ষ আন্দোলনের পুরোভাগে প্রিয় পরিকর সনাতনকেই যে তিনি স্থাপন করিতে চান। সনাতনের মাধ্যমেই যে তাঁহার নিজ প্রয়োজন অনেকাংশে সিদ্ধ করিবেন।

ভ্রমসনার পর সনাতন শির নত করিয়া রহিলেন। সত্যিই তো, প্রভুর চরণে যে জীবন উৎসর্গ করিয়াছেন, তাহার উপর যে তাঁহার সত্যাকার কোন অধিকার নাই। তবে সে জীবন এখন নিজ ইচ্ছায় কি করিয়া বিসর্জন দিবেন ?

প্রভুর বাণী শুনিয়া হরিদাসের আনন্দ আর ধরে না। প্রেমভরে সনাতনকে আলিঙ্গন করিয়া কহিলেন, “সনাতন, তোমার সৌভাগ্যের সীমা নেই। স্বয়ং প্রভু তোমার দেহকে নিজ ধন বলে দাবী করছেন। শুধু তাই নয়, নিজ দেহ দিয়ে যে কাজ সম্ভব নয়, তা করাতে মনস্থ করছেন তোমায় দিয়ে। তাই, তুমি সত্যিই ধন্য। আমরা নিতান্ত অধম, তাই প্রভুর কোন কাজে লাগতে পারলুম না।”

“এ কি অদ্ভুত কথা তুমি বলছো, শ্রীপাদ ?”—সনাতন যুক্তকরে উত্তর দেন। “প্রভুর এই মণ্ডলীতে তোমার মত ভাগ্যবান আর কে আছে ? প্রভুর আবির্ভাব নামধর্ম প্রচারের জন্ত। এ কাজে তুমিই যে সবার অগ্রগণ্য। প্রভুর ভক্তদের সবাই সাধনভজন করছে নিজ নিজ কল্যাণের জন্তে। কিন্তু তুমি হচ্ছেো ব্যতিক্রম। নিজের উদ্ধারের জন্ত ব্যগ্র না হয়ে, অবিরাম উচ্চ কণ্ঠে জপ ও কীর্তন করে



তুমি জীবের উদ্ধারের জন্য তৎপর হয়েছো বেশী। তোমার প্রেমের তুলনা কোথায়, শ্রীপাদ ?”

সনাতন ও হরিদাসের এমনিতর প্রণয়-দ্বন্দ্ব ভজনকুটির মুখর হইয়া উঠিতে থাকে।

শ্রীচৈতন্যের অন্তরঙ্গ ভক্ত জগদানন্দ পণ্ডিত দেশ হইতে নীলাচলে আসিয়া পৌঁছিয়াছেন। সেদিন তিনি সনাতনের সঙ্গে সাক্ষাৎ করিতে গেলেন। কিছুক্ষণ কৃষ্ণকথায় অতিবাহিত করার পর সনাতন কহিলেন, “পণ্ডিত, আপনি প্রভুর একান্ত আপনার জন। আপনি আমায় সহপদদেশ দিন। প্রভু রোজ আমায় আলিঙ্গন করেন, আর তাঁর কনককাস্তি দেহে লিপ্ত হয় আমার বীভৎস কণ্ডু-রোগের রস। এ এক মহা অপরাধে আমি অপরাধী হয়ে পড়েছি। প্রভুকে নিরস্ত করা অসম্ভব। তাই ভেবেছিলাম, আত্মহত্যা করে এ সমস্যার সমাধান করবো, তাও হলো না। অন্তর্যামী প্রভু আগে থেকে সব বুঝতে পেরে তাতে বাদ সাধলেন। এখন আমি কি করি, বলুন তো !”

জগদানন্দ স্বভাবতঃই প্রভু-অন্ত প্রাণ। প্রভুর শরীরে বিষাক্ত রোগের স্পর্শ নিত্য লাগিতেছে শুনিয়া তিনি শিহরিয়া উঠিলেন। ব্যাকুল কর্তে কহিলেন, “সনাতন, তুমি এক কাজ করো। বৃন্দাবনধাম থেকে তুমি ছুটে এসেছো প্রভুর দর্শনের জন্য, সেই আসল কাজটি তো ভাই সাজ হয়েছে। তবে আর এখানে থেকে রোজ বিপদ ডেকে আনছো কেন? সামনেই রথযাত্রা উৎসব—তারপরেই তাড়াতাড়ি বৃন্দাবনে চলে যাও। তোমাকে আর রূপ গোস্বামীকে প্রভু বৃন্দাবনের নেতৃত্ব দিয়েছেন, আরো দিয়েছেন কত চক্রবর্তী কাজের ভার। তোমার কি ভাই বৃন্দাবন ছেড়ে অন্ত্র বাস করা সাজে? বৃন্দাবন যে তোমার স্বস্থান। কাল-বিলম্ব না করে সেই স্বস্থানেই তো তোমার চলে যাওয়া উচিত।”

পণ্ডিতের কথাগুলি যুক্তিবৃত্ত। তাবিয়া-চিস্তিয়া সনাতন আত্মহাতে সায় দিলেন।

পরদিন হরিদাস ও সনাতনকে প্রভু দর্শন দিতে আসিয়াছেন। অভ্যাসমত সেদিনও তিনি সনাতনকে বন্ধে ধারণ করিলেন। তীক্ষ্ণ অনুশোচনার দহন শুরু হইল সনাতনের মনে। করজোড়ে কাতর কণ্ঠে নিবেদন করিলেন, “প্রভু, রোজ রোজ এই পাণীর দেহ তুমি স্পর্শ করো, বিবাক্ত কণ্ঠের ছোঁয়া তোমার পবিত্র দেহে লাগে। আর আমি জ্বলে পুড়ে মরি। প্রভু, এবার আমি স্থির করেছি, নীলাচলে আর থাকবো না, রথযাত্রার পরেই বৃন্দাবনে চলে যাবো। তাছাড়া, এইতো কাল পণ্ডিত জগদানন্দের সঙ্গে কথাবার্তা হলো। তিনিও আমার উপদেশ দিলেন, তাড়াতাড়ি এখান থেকে চলে যাবার জ্ঞান।”

প্রভু রোষে গর্জিয়া উঠেন। হৃৎকার দিয়া কহেন, “কি বলতে তুমি সনাতন! সেদিনকার জগা, সে আসে তোমায় উপদেশ দিতে এত বড় তার স্পর্ধা। সে কি জানে না—বুদ্ধিতে, শাস্ত্রজ্ঞানে, তজ্ঞ-সাধনে তুমি তার গুরু হবার যোগ্য? আমাকেও তুমি শাস্ত্রের নিগূঢ় তত্ত্ব শেখানোর শক্তি ধরো। তাছাড়া, তুমি আমার প্রাণাধিক প্রবীণ মুহূর্ত্ত। বালকবুদ্ধি জগা তোমায় উপদেশ দিতে আসে, এ ধৃষ্টতা তার কি করে হলো?”

প্রভুর ক্রোধোদ্দীপ্ত মূর্ত্তির দিকে সনাতন নির্নিমেষে চাহিয়া আছেন, গণ্ড বাহিয়া ঝরিতেছে প্রেমাক্ষর ধারা।

রূপপরে আত্মসম্বরণ করিয়া কহিলেন, “প্রভু, আজ আমার পরম সৌভাগ্য—তোমার এই প্রেমমনোহর রূপটি আমার সামনে এমনি করে উদ্ঘাটিত হলো। আরো বুঝলাম, ভক্তপ্রবর জগদানন্দের মত ভাগ্যবান খুব কমই রয়েছেন। তাঁকে তুমি যে কঠোর ভাষায় তিরস্কার করলে, তা করলে আত্মজন জ্ঞানে। তোমার সহজ আত্মীয়তার সে অধিকারী। একি সহজ কথা, প্রভু? আসলে দেখছি, প্রকৃত অন্তরঙ্গ জগদানন্দের জ্ঞান তুমি রেখেছ একাত্মকতার মধু। আর দূর ব্যবধান থেকে আমাদের পান করাচ্ছে গৌরবস্ততির নিম্ন নিশিলা রস।”

সনাতনের এই কথায় প্রভু একটু অপ্রস্তুত হইয়া পড়িলেন। তারপর প্রসন্ন মধুর কণ্ঠে কহিলেন, “সনাতন, আসল কথাটি শোন। তোমার চাইতে জগদানন্দ আমার প্রিয় নয়। আর জেনে রেখো, কারুর মর্যাদা লজ্জন আমি কখনো সহ্য করতে পারিনে। তোমায় উপদেশ দিতে এসে জগদানন্দ তোমার মত ব্যক্তির মর্যাদাকে লজ্জন করেছে। এই জন্তই আমি তাকে ভৎসনা করেছি। আর বহিরঙ্গ জ্ঞানে আমি তোমার প্রশংসা করেছি, তা মনে ক’রো না। তোমার নিজস্ব গুণই প্রশংসা উৎসারিত করে।”

ভক্তদের লক্ষ্য করিয়া প্রভু আরো কহিলেন, “তোমরা জানো, আমি সর্বব্যাপী সর্ববন্ধনমুক্ত সন্ন্যাসী—চন্দন ও পঙ্কে আমার সমজ্ঞান রাখাই তো উচিত। তবে সনাতনের কণ্ডুরস আমার গায়ে লাগায় তোমরা এত চঞ্চল হচ্ছে। কেন, বল তো?”

প্রবীণ ভক্ত হরিদাস এবার নিবেদন করিলেন, “প্রভু, তুমি স্বেচ্ছাময়, স্বতন্ত্র ঈশ্বর। তোমার লীলার মর্ম্ম আমরা কি বুঝবো? বৈষ্ণবাপরাধ করে বাসুদেব ঠাকুর কুষ্ঠরোগে আক্রান্ত হয়েছিল, তা সত্ত্বেও তুমি তার প্রতি কৃপা করতে কার্পণ্য করো নি। তোমার প্রসাদে তার হুরারোগ্য কুষ্ঠ হয়েছিল নিরাময়। অথচ আজ দেখতে পাচ্ছি, তোমাতে সমর্পিতপ্রাণ পরমভাগবত সনাতনের বিষাক্ত কণ্ড কিছুতেই দূর হচ্ছে না। এর রহস্য শুধু তুমিই জানো, প্রভু।”

মুচকি হাসিয়া প্রভু উত্তর দিলেন, “হরিদাস, সনাতন আমায় সমর্পণ করেছে তার দেহ মন প্রাণ। আর আমি আমার সব সমর্পণ করে বসে আছি আমার প্রাণপ্রভু কৃষ্ণের কাছে। সনাতনকে তিনি নিশ্চয়ই রক্ষা করবেন।”

ভক্তেরা সবিস্ময়ে লক্ষ্য করিলেন, কিছুদিনের মধ্যেই সনাতনের হুরারোগ্য ব্যাধি সম্পূর্ণরূপে দূরীভূত হইল, সারা দেহে ফুটিয়া উঠিল অগুরু লাবণ্যজ্বী।

ক্রমে রথযাত্রা আসিয়া যায়। গোড়ীয়া ভক্তগণ এ সময়ে সদলবলে নীলাচলে সমবেত হন, প্রাণপ্রভুকে কেন্দ্র করিয়া তাঁহাদের আনন্দরঙ্গ উচ্ছল হইয়া উঠে। এই সব প্রেমিক, প্রভুগতপ্রাণ ভক্তদের সাথে একে একে সনাতন পরিচিত হন, নিজেকে গণ্য করেন মহাভাগ্যবান।

এ সময়কার আর এক বড় আকর্ষণ—শ্রীজগন্নাথের রথের অগ্রভাগে ভাবাবিষ্ট শ্রীচৈতন্যের নর্তন। এবার এই অপূর্ব দৃশ্য দেখিয়া সনাতন আনন্দে আত্মহারা হইয়া যান।

চাতুর্মাস্ত শেষ হইলে গোড়ীয়া ভক্তগণ দেশে চলিয়া গেলেন। প্রভু কিন্তু সনাতনকে ছাড়িবেন না। তাই দোলযাত্রা অবধি সনাতনকে নীলাচলে অবস্থান করিতে হইল।

বারাণসীতে থাকা কালে বৈষ্ণব তত্ত্ব ও সাধনার যে শিক্ষা প্রভু সনাতনকে দিয়াছিলেন, এবার সমাপ্ত হয় তাহার পরবর্ত্তী অধ্যায়। তাছাড়া, বৃন্দাবনে প্রভু এক নূতন ভক্তিসাম্রাজ্য গঠন করিতে চান এবং তাহার ভিত্তি নির্মাণ ও সংগঠনের ভার দিয়াছেন প্রিয় পার্শ্বদ সনাতনেরই উপর। বিশেষ করিয়া এই দুইটি কারণে মাসের পর মাস সনাতনকে প্রভু ঘনিষ্ঠ সান্নিধ্যে রাখেন, দান করেন বহুতর গুরুত্বপূর্ণ নির্দেশ।

দোলযাত্রা উৎসব সাড়ম্বরে সমাপ্ত হইয়া গেল। এবার সাত্ৰ-নয়নে প্রভুর চরণে বিদায় নিয়া সনাতন নীলাচল ত্যাগ করিলেন।

বৃন্দাবনের আদিভ্য টিলার পর্ণকুটিরে বসিয়া আবার শুরু হইল তাঁহার ভজন কীর্তন ও প্রভুর নির্দেশিত কর্মসাধন।

স্থানটি ইষ্ট-ধ্যানের পক্ষে বড় অমূল্য। উপরে দিগন্তবিস্তৃত নীলাকাশ। নীচে কল্লোলিনী যমুনা বহিয়া চলিয়াছে অপক্লপ লীলাভঙ্গিমায়। দূরে বনানী বেষ্টিত পাহাড়ের শ্রেণীতে জড়ানো নীল সবুজের মাধুরিমা। সমগ্র পরিবেশে যেন ওতপ্রোত হইয়া আছেন প্রাণপ্রিয় ইষ্টবিগ্রহ—শ্রীমন্মন্দর। পরমানন্দে দিনের

পর দিন এই নির্জন রমণীয় অরণ্যাবাসে সনাতনের তপস্যা অগ্রসর হইয়া চলে।

বৃন্দাবনের আশেপাশে তখন জনমানবের বসতি খুব কম ছিল, তাই ভিক্ষা সংগ্রহ করিতে হইলে সাধুদের যাইতে হইত মথুরা অঞ্চলে। সনাতনকেও মাঝে মাঝে তাহাই করিতে হইত। হঠাৎ একদিন এই ভিক্ষার মধ্য দিয়া উন্মোচিত হইল তাঁহার সাধনজীবনের এক নূতন বাতায়ন। ইষ্টদেব প্রকটিত করিলেন তাঁহার এক নূতনতর সেবালীলা।

মাধুকরী করিতে গিয়া সনাতন সেদিন মথুরার দামোদর চৌবের বাড়ীতে উপস্থিত হইয়াছেন। অঙ্গনে পা দিতেই চোখে পড়িল নয়নাভিরাম বিগ্রহ, নাম শ্রীশ্রীমদনগোপাল। দর্শন মাত্রেই সনাতন কি জানি কেন এক অপূর্ব প্রেমাবেশে বিহ্বল হইয়া গেলেন। এই শ্রীমূর্তি যেন তাঁহার কত আপনার, কত পরিচিত। কত জন্মেব সাধনার ধন আজ যেন তাঁহার সম্মুখে আসিয়া উপস্থিত।

ভাবাবিষ্ট সাধকের অন্তরে জাগিয়া উঠে প্রবল আন্তি, আর জাগে এই শ্রীবিগ্রহ সেবার জন্ত হৃদমনীয় আকাজক্ষা। কিন্তু অতি কষ্টে তাঁহাকে আত্মসম্বরণ করিতে হয়। নিজে তিনি কাহ্নাকরজধারী কান্ধাল বৈষ্ণব, শ্রীমূর্তির সেবার সামর্থ্য তাঁহার কই? তাছাড়া, চৌবে পরিবার তো প্রাণ গেলেও এই ইষ্ট-বিগ্রহ ত্যাগ করিবে না। ভিক্ষা গ্রহণের শেষে, লোভাতুর নয়নে বার বার ঐ শ্রীমূর্তির দিকে দৃষ্টিপাত করিয়া তিনি স্থান ত্যাগ করিলেন।

আদিত্য টিলার বিজন আবাসে সনাতন কিরিয়া আসেন, দৈনন্দিন ধ্যানভজনে হন নিবিষ্ট। কিন্তু একি বিপদে আজ তিনি পড়িলেন? যখনই নয়ন মুদ্রিয়া ভজন-আসনে উপবেশন করেন. কোথা হইতে সেই মদনগোপাল মূর্তি মানসপটে ভাসিয়া উঠে, প্রাণ মন কাড়িয়া নিয়া আবার কোথায় মিলাইয়া যায়। সনাতনের মনে আর স্বস্তি নাই, শান্তি নাই। মাঝে মাঝেই কাজে বা অকাজে

মথুরায় ছুটিয়া যান, চৌবেজীর অঙ্গনে দাঁড়াইয়া নির্নিমেষে চাহিয়া থাকেন ঐ নয়নমনবিমোহন ঠাকুরের দিকে।

ক্রমে চৌবে পরিবারের সঙ্গে সনাতনের ঘনিষ্ঠতা জন্মে। চৌবেজীর বিধবা পত্নীর সেবার ভাবটি বড় সহজ সুন্দর। এই ত্রিবিগ্রহ তাঁহার আদরের বালগোপাল—নিজের বালক জ্ঞানেই দিনরাত তিনি ইহার সেবা পরিচর্যা করেন। চৌবে গৃহিণীর পুত্রের নাম সদন। এই সদন যেমন তাঁহার এক পুত্র, মদনগোপালজীও তেমনি আর একটি। প্রাণপ্রিয় ছই পুত্রের লালনপালন তিনি সম্পন্ন করেন এক ভাবে, একই সহজ সরল মাতৃভাবের মধ্য দিয়া।

নিষ্ঠাবান ভক্ত সনাতনের মন কিন্তু খুঁতখুঁত করিতে থাকে। ইষ্ট-বিগ্রহের সেবা পরিচর্যা চলিবে গৃহেরই একটি বালকের সমপর্যায়ের? প্রকৃত ইষ্টনিষ্ঠা থাকিবে না, ইষ্টের সেবা ও পূজার বিশেষ ব্যবস্থা থাকিবে না, এ কেমন কথা?

সেদিন চৌবের গৃহিণীকে ডাকিয়া কহিলেন, “মা, তুমি পরম স্নেহে মদনগোপালজীর সেবা যত্ন করে যাচ্ছে, তা ঠিক। কিন্তু আমার মনে হয়, এতে একটু ত্রুটি রয়ে যাচ্ছে। তুমি মাতৃভাবে, যশোদাভাবে, প্রভুজীকে লালন করছো। কিন্তু মা-যশোদার বাৎসল্য রস তো সাধারণ জীবের মধ্যে সঞ্চারিত হওয়া সম্ভব নয়। তাই আমার মনে হয়, তুমি প্রভুজীর সেবা সম্পন্ন করো সত্যকার ভক্তি ও শ্রদ্ধা নিয়ে। যে প্রণালীতে ভক্ত বৈষ্ণবেরা ভগবানকে সেবা পূজা করে, সেই প্রণালী তুমি অনুসরণ করো।”

মহিলা সবিনয়ে উত্তর দিলেন, “তাই তো, বাবাজী। তুমি যে আমায় নূতন করে ভাবিয়ে তুললে। বেশ, তাই হবে, তোমার উপদেশ মত এবার থেকে ঠাকুরের জন্ত বিধিমত সেবা-অর্চনার ব্যবস্থাই করবো।”

ইতিমধ্যে কয়েক দিন অতিবাহিত হইয়াছে। মদনগোপালজীর দর্শনের জন্ত সনাতন সেদিন মথুরায় গিয়াছেন, অঙ্গনে পদার্পণ

করামাত্রই চৌবে পত্নী তাড়াতাড়ি ছুটিয়া আসিলেন। শ্মিত হাস্তে কহিলেন, “নাঃ বাবাজী, তোমার কথামত কাজ আর করা গেল না। মদনগোপালজী বড় ক্ষুব্ধ হয়েছেন। সেদিন আমায় স্বপ্নাদেশ দিয়েছেন, - ‘ওগো, তুমি আমার মা হয়ে ছিলে, সেই তো ছিল ভালো। এখন ঠাকুর জ্ঞানে আমায় দূরে সরিয়ে রাখছো, পূজো অর্চনার ভীড় লাগিয়েছো। এ আমার ভালো লাগছে না, বাপু। তোমার দুই ছেলে, সদন আর মদনের ভেতর তফাৎ রাখা কি ভালো?’”

সনাতন চমকিয়া উঠিলেন। তাই তো। সহজাত প্রেম ও প্রাণের স্বাভাবিক টান—ইহাই যে ঠাকুরের সেবার শ্রেষ্ঠ উপচার! চৌবে গৃহিণীর স্বপ্নাদেশের মাধ্যমে এই মূলতত্ত্বটিই যে মদনগোপাল আজ তাঁহাকে বুঝাইয়া দিলেন। প্রভুজীর এই কৃপা নির্দেশের কথা স্মরণ করিয়া বার বার সনাতনের নয়ন ছুটি অশ্রু সজল হইয়া উঠিতে থাকে।

মদনগোপালজীর আকর্ষণ কিন্তু সনাতনের জীবনে দিন দিনই হইয়া উঠে দুর্নিবার। দৈন্যময় সাধকের অন্তরের অন্তস্তল হইতে নিয়ত উদগত হয় কাতর প্রার্থনা—“হে প্রভু, হে দয়াল, তোমার বিরহ যে আর আমি সহ্য করতে পারছিনে। তুমি এসো—এসো, এই দীনহীন কাজালের কোলে এসো। এই ছুর্ভাগার জীবনে যে ভীত দহন শুরু হয়েছে, তোমায় না পেলে তার নিবৃত্তি আর হবে না।”

অচিরে এই প্রার্থনা ও আশ্বিত্তির কল কলিয়া যায়। দামোদর পত্নী সেদিন স্নানমুখে সনাতনের কাছে আসিয়া দাঁড়ান। অশ্রুরুদ্ধ কণ্ঠে কহেন, “বাবাজী আজ থেকে তুমিই নাও আমার মদনগোপালের সেবার ভার। গোপাল এখন বড় হয়েছে, মায়ের আঁচলের তলে আর বসে থাকতে চাইবে কেন? তোমার বুপড়িতে যাবে বলে বায়না ধরেছে, কাল রাতে স্বপ্নে এ কথা বার বার আমায় জানালে। তাছাড়া, আমাদের সাংসারিক অবস্থাও ক্রমে অসচ্ছল হয়ে পড়ছে।

ঠাকুরকে পাছে কষ্ট দিতে হয়, এই চিন্তিস্থায়ই আমি মরছি। বাবাজী আজই এ বিগ্রহ তুমি নিয়ে যাও।”

সনাতনের প্রাণের আকাঙ্ক্ষা এভাবে পূর্ণ হইল। পরম আনন্দে শ্রীবিগ্রহ কোলে করিয়া তখন ছুটিয়া চলিলেন বৃন্দাবনের ভজনকুটির অভিমুখে। সেখানে সযতনে স্থাপন করিলেন তাঁহার প্রাণপ্রিয় এই কৃষ্ণমূর্ত্তি।

চৌবেজীর ঘর হইতে যে মদনগোপাল বিগ্রহ সনাতন লাভ করিয়াছেন তাহার একটি বিশেষ ঐতিহ্য রহিয়াছে। কথিত আছে, শ্রীকৃষ্ণের প্রপৌত্র মহারাজ বজ্রনাভ এক সময়ে সারা ব্রজমণ্ডলে অহুসঙ্কান চালাইয়া যে আটটি প্রাচীন বিগ্রহ আবিষ্কার করেন, মদনগোপাল শ্রীমূর্ত্তি তাঁহাদেরই অন্যতম।

প্রাণপ্রিয় বিগ্রহ তো হস্তগত হইল। কিন্তু এখন ইহার সেবা পরিচর্য্যার কি উপায়? সনাতন মহাসমস্যায় পড়িলেন। ভাবিয়া-চিন্তিয়া অবশেষে ভজনকুটিরের নিকটে এক ঝুপড়ি বাঁধিলেন, পরম যত্নে ঠাকুরকে সেখানে করিলেন সংস্থাপিত। সেবার জন্ত নূতন উৎসাহে শুরু হইল মাধুকরী। ভিক্ষাস্বরূপ সামান্য যাহা কিছু আটা মিলিত তাহাই পিণ্ডাকৃতি করিয়া আশুনে পোড়াইয়া নিতেন। তারপর প্রেমাপ্লুত হৃদয়ে দীন ভক্ত রোজ ইহা নিবেদন করিতেন প্রাণপ্রিয় ঠাকুরের সম্মুখে। অগ্নিদগ্ধ এই আটার পিণ্ডই ব্রজমণ্ডলের বৈষ্ণবসমাজে খ্যাতিলাভ করে সনাতন গোঁসাইর আঙাকড়ি-ভোগ নামে। উত্তরকালে বড় বড় ধনী ব্যক্তির মদনগোপালজীর সেবায় প্রচুর অর্থদান করিতে আগাইয়া আসেন। তখনকার সে বিপুল আয়োজন, ঐশ্বর্য ও আড়ম্বরের দিনেও কাজাল সনাতনের দগ্ধ আটাপিণ্ড ছিল শ্রীবিগ্রহের নিত্যকার ভোগের অপরিহার্য্য অঙ্গ।

আঙাকড়ি ছাড়া আর একটি বস্তুও সনাতনকে নিবেদন করিতে



দেখা যাইত। টিলার সান্নদেশে ইতস্ততঃ ছড়ানো ছিল নানা ধরনের বুনো শাক; রোজ তিনি এগুলি তুলিয়া আনিতেন। সৈন্ধব প্রায়ই জুটিত না, দীনহীন বৈষ্ণব অধিকাংশ দিনই অলবণে রান্না-করা ঐ শাক দ্বারা ভোগ চড়াইতেন।

এভাবে কিছুকাল অতিবাহিত হয়। অতঃপর শ্রীবিগ্রহ একদিন বড় গোল বাধাইয়া বসেন। স্বপ্নে সনাতনকে দর্শন দিয়া কহেন, “ওগো, তোমার দেওয়া এই ভোগ আর গলাধঃকরণ করা যাচ্ছে না। তোমার আঙা কড়ি আর সৈন্ধব-মসলাহীন রান্না খেয়ে আর কতকাল চালাবো, বল?”

সনাতনের নয়ন ছুটি অশ্রু ছলছল হইয়া উঠে। কাতরস্বরে নিবেদন করেন, “প্রভু, তুমি তো জানো, আমি তোমার এক নিষ্কিঞ্চন অধম সেবক। তুমি বিশ্বব্রহ্মাণ্ডের অধিরাজ, তোমার উপযুক্ত রাজভোগ আমি কি করে যোগাবো? দধি আটা আর এই শাক-সৈন্ধ খেতে রুচি না হয়, তুমি নিজেই নিজের সেবার যথাযোগ্য ব্যবস্থা করে নাও।”

বড় জটিল, বড় হৃৎক্লেশ প্রভুর লীলাখেলা। চৌবে গৃহিণীর এত দিনের বাৎসল্য ও সমাদর ছাড়িয়া স্থান নিয়াছেন এই সহায় সম্পদহীন কান্দাল সাধুর ঘরে। আবার এখানে আসিয়া বায়না ধরিয়াছেন রুচিকর আহার্যের জন্ত। কিন্তু ডোর-কোঁপীন মাত্র সম্বল সনাতন এ ব্যাপারে কি করিতে পারেন? তিনি যে একেবারে নিরুপায়।

দিনের পর দিন সনাতন চিন্তা করেন স্বপ্নে প্রভু মদনগোপালজীর দর্শনদানের কথা। অন্তর তাঁহার তীব্র ব্যথায় মুহুমান হয়, কপোল বাহিয়া ঝরিতে থাকে অশ্রুধারা।

নিরন্তর আকুতি ও অশ্রুর অর্ঘ্য এবার অন্তর্যামীর অন্তর স্পর্শ করে। ভক্তাধীন ভগবান অল্প কয়েক দিনের ভিতরই ভক্তের মনোবাঞ্ছা পূরণের ব্যবস্থা করিয়া দেন।

পাঞ্জাবের বিশিষ্ট ব্যবসায়ী রামদাস কাপুর সেদিন রাত্রে নৌকা

করিয়া বৃন্দাবনের পাশ দিয়া চলিয়াছেন। সঙ্গে একরাশ মূল্যবান মালপত্র, দূর শহরে গিয়া এগুলি বিক্রী করিবেন। হঠাৎ আদিত্য টিলার নীচে সূর্য্যঘাটের কাছে আসিয়া নৌকাটি এক বৃহৎ চড়ায় আটকাইয়া যায় ও সঙ্গে সঙ্গে কাৎ হইয়া পড়ে। মাঝি-মাল্লারা বহুক্ষণ ঠেলাঠেলির পর হার মানিতে বাধ্য হয়, মালভাণ্ডি ভারী নৌকা কোনমতেই নড়ানো সম্ভব হয় না।

কৃষ্ণপঙ্কের গভীর রাত্রি। বৃন্দাবনের অরণ্যে ও টিলায় টিলায় ঘন অন্ধকার জমাট বাধিয়া উঠিয়াছে। নিকটে কোথাও জনবসতির চিহ্ন দেখা যাইতেছে না। রামদাস কাপুর প্রমাদ গণিলেন। কিছু সংখ্যক স্থানীয় লোকজন সংগ্রহ করিতে পারিলে নৌকাটি চড়া হইতে টানিয়া বাহির করা যাইত। কিন্তু সে আশা ছরাশা। এই নিশ্চিতি রাত্রে, জনমানবহীন যমুনায় তীরে কে আর তাঁহাকে সাহায্য করিতে আসিবে?

ক্রমে রামদাসের হুশিচিন্তা বাড়িয়া চলে। নৌকা এরূপ কাৎ হইয়া থাকিলে অবশ্যই ডুবিলে এবং তাঁহার সর্ব্বস্ব বিলীন হইবে জলগর্ভে। তাছাড়া, না ডুবিলেও বিপদের আশঙ্কা কিছু কম নয়। তীব্রস্থিত এই বিজন অরণ্যে দম্ভ্যদের আনাগোনা আছে। কখন তাহারা হা-রে-রে করিয়া নৌকায় চড়াও হয়, মালপত্র, টাকাকড়ি লুটপাট করিয়া নেয়, কে জানে?

নিরুপায় হইয়া কেবলি ভাবিতেছেন। হঠাৎ চোখে পড়িল, অদূরস্থিত টিলায় এক মুহূ দীপশিখা। সঙ্গে সঙ্গে আশার আলো জলিয়া উঠে রামদাসের অন্তরে। একবার শেষ চেষ্টা করিয়া দেখা যাক না কেন? হয়তো টিলার উপরে কোন বসতি রহিয়াছে। ওখানকার কাহাকেও দিয়া কি আশপাশ হইতে লোকজন সংগ্রহ করা যায় না?

সাঁতরাইয়া তখন তীরে উঠিলেন, আলো লক্ষ্য করিয়া ত্রস্তপদে আরোহণ করিলেন টিলার শীর্ষদেশে।

সঙ্গে সঙ্গে নয়নপথে পতিত হইল এক পর্ণকুটির। ভিতরে প্রদীপের ক্ষীণ আলো মিটিমিটি জ্বলিতেছে, আর এক পাশে স্থাপিত রহিয়াছেন নয়নাভিরাম কৃষ্ণবিগ্রহ। সম্মুখে এক দেবপ্রতিম বৈষ্ণব সাধক ভজনরত। কি জ্ঞানি কেন এই সাধককে দর্শন করা মাত্র রামদাসের অন্তরে জাগিয়া উঠিল এক স্মৃষ্ট বিশ্বাস। ভক্তিরূপে সম্ভরণে তিনি প্রণাম নিবেদন করিলেন।

উঠিয়া দাঁড়াইতেই সপ্রসন্ন দৃষ্টিতে সনাতন আগন্তকের মুখের দিকে চাহিলেন। রামদাস করজোড়ে নিবেদন করিলেন তাঁহার বিপদের কাহিনী। কাতর কণ্ঠে মিনতি করিয়া কহিলেন, “মহারাজ, আমি আজ বড় বিপন্ন, যমুনাগর্ভে আমার সর্বস্ব খোয়াতে বসেছি। ভাগ্যক্রমে এই বিজন স্থানে আপনার মত মহাপুরুষের দর্শন পেলাম। আমার অন্তরাত্মা থেকে কে যেন কেবলি ডেকে বলছে, আপনার কৃপা ছাড়া আমার উদ্ধারের কোন আশা নেই। অকপটে চরণতলে আশ্রয় নিলাম, আপনি আমায় বাঁচান।”

আশ্বের কাতরোক্তিতে সনাতনের হৃদয় বিগলিত হইল। স্নিগ্ধমধুর কণ্ঠে কহিলেন, “বাবা, তুমি এত অধীর হ’য়ো না, শাস্ত হও, আমার মদনগোপালজী তোমায় কৃপা করবেন। এ বিপদ থেকে তুমি মুক্ত হবে। যাও নির্ভয়ে নেমে গিয়ে যমুনা তীরে অপেক্ষা করো।”

আশীর্বাদ ও অভয় লাভে রামদাসের হৃদয় কথঞ্চিৎ শান্ত হইল। টিলা হইতে অবতরণের আগে কহিলেন, “মহারাজ, আমি সঙ্কল্প করলাম, এ বিপদ থেকে উদ্ধার পেলে আমার এবারকার বাণিজ্যের সবটা মুনাফা আপনার এই দেববিগ্রহের সেবায় আমি নিয়োজিত করবো।”

সনাতনের শুভেচ্ছায় সেই রাতেই রামদাস কাপুরকে বিপদমুক্ত হইতে দেখা যায়। কোথা হইতে অলৌকিকভাবে যমুনাবক্ষে প্রবাহিত হয় নূতন স্রোতধারা। চড়ায় আবদ্ধ পণ্যবাহী বিপন্ন তরী আবার নিজপথে ভাসিয়া চলে।

বাণিজ্য হইতে কিরিয়া রামদাস কাপুর তাড়াতাড়ি বন্দাবনে চলিয়া আসেন। সনাতনের নিকট হইতে সস্ত্রীক দীক্ষা গ্রহণ করিয়া ধন্য হন। তাছাড়া, সেবারকার বাণিজ্যের সবটা লভ্যাংশ মদনগোপালজীর সেবায় তিনি উৎসর্গ করেন। সেই বিপুল অর্থ নিশ্চিত হয় শ্রীবিগ্রহের জগ্ন সুরমা মন্দির, জগমোহন ও নাটশালা। প্রচুর ভূসম্পত্তি ক্রয় করিয়া ঠাকুরের সেবা ও ভোগ বিতরণের স্থায়ী ব্যবস্থাও এই সঙ্গে করা হয়।

সনাতনের সেবিত এই মদনগোপাল কিন্তু ক্রমে জনসাধারণের কাছে মদনমোহন নামেই পরিচিত হইয়া উঠেন। উত্তরকালে নানা ঘটনাচক্রের মধ্য দিয়া এই লীলাময় শ্রীবিগ্রহ জয়পুরে স্থানান্তরিত হইয়াছিলেন।

ইষ্টদেবের মন্দির নির্মাণ ও সেবাকার্যের চমৎকার বন্দোবস্ত এভাবে আপনা হইতেই হইয়া যায়। সনাতনের সকল হুশিচিন্তা দূর হয়, প্রাণমন ভরিয়া উঠে অপার তৃপ্তিতে।

প্রেমপূরিত হৃদয়ে, গলদশ্রবণে শ্রীবিগ্রহের সম্মুখে দণ্ডবৎ করিয়া কহিতে থাকেন, “ঠাকুর, আগে ছিলে চোবে ভবনে, তারপর এলে কাকাল ভক্ত সনাতনের রূপভিতে। এবার তুমি এসে দাঁড়িয়েছো ব্রজমণ্ডলের তীর্থকামী ভক্তসমাজের নয়নসমক্ষে তীর্থরাজরূপে। জীবের কল্যাণের জগ্ন কৃপাভরে যে সেবালীলা এখানে তুমি প্রকট করেছো, তা অব্যাহত থাকুক, এই মোর একান্ত প্রার্থনা। এবার এখান থেকে আমার ছুটি দাও, প্রভু।”

নবনির্মিত সুরমা ঐ ইষ্ট মন্দিরে সনাতন কিন্তু একদিনও বাস করেন নাই। পূর্ববৎ বৃক্ষতল আর পর্ণকুটিরই হয় সর্বভাগী কৃচ্ছ্রবতী সাধকের একমাত্র আশ্রয়।

এখন হইতে কখনো গোবর্দ্ধনের পাদমূলে, কখনো রাধাকুণ্ডের তীরে, কখনো বা গোকুলের অরণ্য অঞ্চলে রূপভি বাঁধিয়া একান্ত নির্ভায় তিনি সাধন-ভজন করিতে থাকেন।

লুপ্ত তীর্থ উদ্ধারের যে নির্দেশ প্রভু শ্রীচৈতন্যের নিকট হইতে সনাতন পাইয়াছেন ক্রমেক্রমে তরৈও তিনি তাহা বিস্মৃত হন নাই। এ সময়ে যখন যেখানে অবস্থান করিতেন, তাহার চারিদিকে তীর্থ ও তীর্থবিগ্রহের আবিষ্কার চেষ্টা ছিল তাঁহার সাধনার অন্ততম অঙ্গ। প্রভুর প্রেরণায় উদ্ভুদ্ধ হইয়া সনাতন ক্রমে ক্রমে অনেকগুলি তীর্থকে পুনরুজ্জীবিত করেন, তারপর সেগুলিকে তুলিয়া ধরেন জন-চৈতন্যের সমক্ষে। এস্থলে বিশেষভাবে উল্লেখযোগ্য যে, নন্দগ্রামে নন্দ যশোদা, বলভদ্র ও কৃষ্ণবিগ্রহ স্থাপন করিয়া তিনি ভক্ত সমাজের ধন্যবাদভাজন হন।

লোকনাথ গোস্বামী ও ভূগর্ভ পণ্ডিত আগে হইতেই শ্রীচৈতন্যের নির্দেশ অনুযায়ী ব্রজমণ্ডলে সাধন-ভজন করিতেছেন। অতঃপর একে একে আসিয়া উপস্থিত হন রূপ গোস্বামী, গোপাল ভট্ট, রঘুনাথ ভট্ট, রঘুনাথদাস গোস্বামী প্রভৃতি। প্রত্যেকেই ভক্তিসাধনার এক একটি দিকপাল। ইহাদের অত্যাগ্র সাধনা, ত্যাগ, বৈরাগ্য ও শাস্ত্র-জ্ঞানের প্রভায় সারা উত্তর ভারতের অধ্যাত্মজীবন উদ্ভাসিত হইয়া উঠে। আর এই সাধকগোষ্ঠীর মধ্যমণিরূপে অধিষ্ঠিত থাকেন অশেষ শাস্ত্রবিদ ধীর-গম্ভীর আত্মকাম মহাপুরুষ সনাতন গোস্বামী।

প্রভু শ্রীচৈতন্যের নির্দেশ ছিল, ভক্তিশাস্ত্র উদ্ধার করিতে হইবে এবং প্রবল উত্তমে প্রচার করিতে হইবে নব নব বৈষ্ণবীয় দর্শন, স্মৃতি ও সাধন-ভজনের গ্রন্থ। এই নির্দেশ সনাতন একদিনের তরৈও বিস্মৃত হন নাই। ভক্ত ও অনুগত বহুবাক্যবদের সংখ্যা বৃদ্ধি পাইতে থাকিলে ইহাদের সাহায্যে দিনের পর দিন তিনি সংগ্রহ করেন অজস্র প্রাচীন ভক্তিশাস্ত্রের গ্রন্থ। শুধু তাহাই নয়, নবতর রচনার দিকেও তাঁহার দৃষ্টি প্রসারিত হয়। নিজে কতকগুলি শাস্ত্রগ্রন্থ যেমন রচনা করেন তেমনি তাঁহার আধ্যাত্মিক প্রেরণায় ও নেতৃত্বে লিখিত হয় গোড়ীয় বৈষ্ণবদর্শন, স্মৃতি, ও ভজন-পূজনের গ্রন্থ ও নানা ধরনের টীকা ভাষ্য।

গৌড়ীয় বৈষ্ণবদের শাস্ত্রাভিত্তি নির্মাণে ও গৌরবময় ঐতিহ্য গড়িয়া তুলিতে যে অবদান সনাতন গোস্বামী রাখিয়া গিয়াছেন তাহার তুলনা বিরল। এই মহান কর্মকে তিনি গণ্য করিয়াছিলেন প্রভু শ্রীচৈতন্যের আদিষ্ট ব্রতরূপে। বলা বাহুল্য এ ব্রত সাফল্যের সহিত তিনি উদ্‌যাপন করিয়া যান।

ত্যাগ তিতিক্ষা, বৈরাগ্যময় সাধনা ও কৃষ্ণপ্রেমের পরম অমুভূতির সহিত সনাতন গোস্বামীর জীবনে মিলিত হইয়াছিল অসাধারণ প্রতিভা, শাস্ত্রজ্ঞান ও শ্রমনিষ্ঠা। বহুতর নিজস্ব রচনা, সঙ্কলন ও সম্পাদনার মধ্যে তাঁহার এই জীবন বৈশিষ্ট্যের ছাপ পরিস্ফুট হইয়া রহিয়াছে।

পাণ্ডিত্যের শাস্ত্রচর্চা ও সাধকের প্রত্যক্ষীভূত সূক্ষ্মলোকের অমুভূতি—এই দুইটি পৃথক বস্তু। কিন্তু যে সব ক্ষেত্রে এই দুটির সমাবেশ ঘটে, তাহা হইয়া উঠে এক চূর্ণভ সম্পদ। সনাতনের রচনা ও সম্পাদনায় এই বৈশিষ্ট্য দৃষ্টিগোচর হয়। তাঁহার নিজস্ব গ্রন্থাদির মধ্যে রহিয়াছে : লীলাস্তুব, বৈষ্ণবীয় স্মৃতি হরিভক্তিবিলাসের ‘দিগ্‌ দর্শিনী’ টীকা, বৃহৎ ভাগবতামৃত, ভাগবতামৃতের টীকা ও বৃহৎ বৈষ্ণবতোষণী টীকা।

ইষ্ট-বিগ্রহের ভজন-পূজনের সময় আশুকাম সাধক সনাতনের শ্রীমুখ হইতে অজস্রধারে নির্গত হইত লীলামাহাত্ম্যের স্তব ও দৈন্যময় প্রার্থনা। ইহারই সঙ্কলন হইতেছে ‘লীলাস্তুব’।

গোস্বামী গোপাল ভট্টকৃত ‘হরিভক্তিবিলাস’ এক মহামূল্যবান বৈষ্ণব-স্মৃতি। গৌড়ীয় বৈষ্ণবদের কৃত্য ও আচারসমূহ ইহাতে বিস্তারিত ভাবে বর্ণিত হইয়াছে। গোপাল ভট্টের নামে এই গ্রন্থ প্রচারিত হইলেও ইহার সঙ্কলনে সনাতনের পাণ্ডিত্য ও প্রতিভার প্রভাব ছিল দূরপ্রসারী। সনাতন নিজে এই বিরাট স্মৃতিগ্রন্থের টীকা প্রণয়ন করেন। তাঁহার এই টীকার উদ্দেশ্য প্রামাণ্য শাস্ত্র বাক্যের উদ্ধৃতি ও যথোচিত যুক্তিতর্ক প্রয়োগের দ্বারা জটিল সমস্তা-

সমূহের সমাধান করা। ‘হরিভক্তি বিলাস’এর গ্রন্থকাররূপে বয়ঃকনিষ্ঠ গোপাল ভট্টকে আগাইয়া দিয়া দিক্‌পাল শাস্ত্রবিদ সনাতন যে ভাবে বিরাট বনস্পতির মত ছায়া বিস্তার করিয়াছেন, নানা সিদ্ধাস্তময়, বিতর্কবহুল ঐ স্মৃতিগ্রন্থের পৃষ্ঠরক্ষার্থ দণ্ডায়মান হইয়াছেন, তাহা তাঁহার মত প্রবীণ সাধক ও মনোবীরই উপযুক্ত।

বৃহৎ-ভাগবতামৃত নামক প্রসিদ্ধ গ্রন্থে সনাতন ভক্তিশাস্ত্র-সাগর মন্থন করিয়াছেন। একদিকে বৈষ্ণবধর্মের মর্ম্মকথা যেমন ইহাতে উদ্ঘটিত হইয়াছে, অপরদিকে তেমনি বিস্তারিত হইয়াছে বিভিন্ন অবতারের তত্ত্ব ও প্রেমভক্তি-ধর্মের সাধনপ্রণালী। বৈষ্ণব সাধকদের কাছে এই গ্রন্থ অমৃতের খনি বিশেষ। এ গ্রন্থের সিদ্ধাস্ত ও নির্দেশ সহজতর করার উদ্দেশ্যে সনাতন একটি বিস্তৃত টীকা প্রণয়ন করেন, তাহা ‘দিগ্‌দর্শিনী’ নামে পরিচিত।

সনাতনের শাস্ত্রসাধনার চরম অবদান—বৃহৎ বৈষ্ণবভোষণী নামক ভাগবতের টীকা। বেদান্তের নিগূঢ় পরমতত্ত্ব ও ভগবৎ ভক্তির অমৃতময় ব্যাখ্যার মহামিলন ঘটিয়াছে মহামুনি বেদব্যাস রচিত ক্রীমদ্ভাগবতে। বৈষ্ণবধর্মের শ্রেষ্ঠ প্রবর্তক ও টীকা-ভাষ্যকারেরা প্রধানতঃ প্রেমভক্তি-শাস্ত্রের এই অমৃতনির্বার হইতেই পরম পথের পাথের সংগ্রহ করিয়াছেন, যাঁর যাঁর নিজস্ব সিদ্ধাস্ত ও সাধনার ধারা উন্মুক্ত করিয়া নিয়াছেন। গোড়ায় বৈষ্ণবসমাজের পক্ষ হইতে প্রবীণ সাধক সনাতন এই মহান আকরগ্রন্থের দশম স্কন্দ বা কৃষ্ণ জন্মখণ্ডের এক বিস্তীর্ণ টীকা প্রণয়ন করেন। পাণ্ডিত্য ও রসমাধুর্যের দিক দিয়া সনাতনের বৈষ্ণবভোষণী ভক্তিশাস্ত্রের জগতে এক বিশিষ্ট স্থান অধিকার করিয়া আছে। বিশিষ্ট গবেষকদের মতে, সনাতনের ‘বৈষ্ণবভোষণী’ যে ভাবে ভাগবতের চূড়ান্ত স্থলের ব্যাখ্যায় আলোকপাত করিয়াছে, অনেক প্রাচীন টীকায়ও তাহা পাওয়া যায় না।

বৈষ্ণবভোষণী টীকা রচনা করার কালে সনাতন ছিলেন অতিশয় বৃদ্ধ, প্রায় চলৎশক্তিহীন। এসময়ে বয়ঃকনিষ্ঠ ও অল্পগত গোস্বামীষয়

রঘুনাথ তট্ট ও রঘুনাথ দাস সর্বদা তাঁহার সেবক ও সহকারীরূপে সঙ্গে থাকিয়া এই গ্রন্থ প্রণয়নে নানাভাবে সাহায্য করেন। বৈষ্ণব-তোষণীই সনাতন গোস্বামীর শেষ রচনা, যে বৎসর এই মহাগ্রন্থ সমাপ্ত হয়, সেই বৎসরই তাঁহার জীবনদীপ হয় নির্বাপিত।

সনাতনের দেহান্তের প্রায় পঁচিশ বৎসর পরে তাঁহার আত্মপুত্র, শিষ্যপ্রতিম শ্রীজীব গোস্বামী, সুবিস্তৃত বৈষ্ণবতোষণীর এক সংক্ষিপ্ত ও সহজবোধ্য সংস্করণ প্রকাশ করেন। ইহার নাম দেওয়া হয়  
॥ ।

অমূল্য রূপ গোস্বামীর সুপ্রসিদ্ধ গ্রন্থ ‘ভক্তিরসায়তসিদ্ধুর’ উপরও সনাতন গোস্বামীর যথেষ্ট প্রভাব ছিল। গোপাল ভট্টের হরিভক্তি-বিলাস-এর মত রূপের এই গ্রন্থখানির পশ্চাতেও রহিয়াছে সনাতনের অধ্যাত্ম-প্রেরণা, ক্ষুরধার পাণ্ডিত্য ও পরমতত্ত্বের ব্যাখ্যা বিশ্লেষণ। ভক্তিসাধনার নিগূঢ় প্রণালী ও ভাবরসের মাধুর্য্য প্রভৃতি যাহা কিছুই ইহাতে প্রকটিত হইয়াছে, অনেকাংশে তাহা সনাতনেরই প্রতিভা ও সাধনানুভূতির স্বাক্ষর বহন করে।

সমকালীন ব্রজমণ্ডলে গোড়ীয় সাধক ও শাস্ত্রবিদদের মধ্যে সনাতন ছিলেন বয়ঃকোষ্ঠ। তাছাড়া কৃচ্ছ্রব্রত, সাধনা, পাণ্ডিত্য ও প্রজ্ঞার দিক দিয়াও তাঁহার সমকক্ষ কেহ ছিলেন না। তাই দেখা যায়, এই মহাপুরুষের সুদীর্ঘ জীবনকালে সারা ব্রজমণ্ডল তাঁহার ব্যক্তিত্ব, প্রতিভা ও সিদ্ধির কাছে মস্তক অবনত করিয়া রহিয়াছে। ভক্তিশাস্ত্র সম্বন্ধে যিনিই যে গ্রন্থ এ সময়ে লিখিতেন, যে সিদ্ধান্ত ও মতবাদ স্থাপন করিতেন, সনাতনের সম্মতি ও সমর্থন ছাড়া তাহা ভক্ত সমাজে গৃহীত হইতে পারিত না।

ঐচ্ছিক নীলাচলে অপ্রকট হন ১৫৩৩ খৃষ্টাব্দে। এই হুঃসংবাদ শোনার পর হইতেই সনাতনের বহিঃজীবনে ছেদ পড়িতে দেখা যায়। কর্মজীবন হইতে নিজেকে প্রায় গুটাইয়া নিয়া ইষ্ট বিগ্রহের



নিরন্তর ধ্যান ও ভজনে তিনি তপস্বী হইয়া যান। তারপর ধীরে ধীরে মহাসাধক প্রবিষ্ট হন ভক্তি-সাধনার গভীরতম স্তরে।

সনাতনের ত্যাগ, বৈরাগ্য, পাণ্ডিত্য ও প্রেমভক্তি সাধনার ঐশ্বর্যের কথা ইতিমধ্যে শুধু ব্রহ্মমণ্ডলেই নয়, সারা উত্তর ভারতে ব্যাপ্ত হইয়া পড়ে। দূর দূরান্ত হইতে ভক্ত সাধকেরা দলে দলে আসিয়া তাঁহার দর্শনের জগু ভীড় জমায়। কুঞ্জকুটির আলো-করা এই দেবমানবের চরণে লুপ্তিত হইয়া সকলে হয় কৃতকৃতার্থ।

সনাতনের এ সময়কার সাধনৈশ্বর্য্য সম্বন্ধে নানা কাহিনী প্রচলিত আছে। সে-বার বারাণসী হইতে এক বৃদ্ধ ব্রাহ্মণ হস্তদন্ত হইয়া সনাতনের কুটিরে আসিয়া উপস্থিত। বর্দ্ধমান জেলার মানকড়ে তাঁহার বাড়ী, নাম জীবন ঠাকুর। সৎ ও ধর্ম্মনিষ্ঠ বলিয়া লোকে তাঁহাকে জানে; চির জীবন কাটাইয়া আসিয়াছেন দারিদ্র্যের সহিত নিরন্তর যুঝিয়া। কিন্তু বৃদ্ধ বয়সে আর যেন দমে কুলাইতেছে না। সেদিন আর্ন্তভাবে বিশ্বনাথের চরণে বার বার প্রার্থনা জানাইলেন, “বাবা, দারিদ্র্যের এ জ্বালা আর যে সহ্য হচ্ছে না, এবার কৃপা করে আমায় রক্ষা করো, অর্থ প্রাপ্তির কোন সন্ধান বলে দাও।”

নিশাযোগে প্রত্যাদেশ মিলিল—“ওরে, তুই শিগ্গীর ব্রহ্মমণ্ডলে চলে যা। সেখানে গিয়ে সনাতন গোস্বামীর শরণ নে। মহার্ষি রক্ত পড়ে রয়েছে তার সন্ধানে। তার করুণা হলে তোর সর্ব্ব দারিদ্র্য-দুঃখ চিবতরে দূর হবে।”

কালবিলম্ব না করিয়া জীবন ঠাকুর ব্রহ্মমণ্ডলে আসিয়া উপস্থিত হন। সনাতন গোস্বামীর পদতলে পড়িয়া সবিস্তারে নিবেদন করেন স্বপ্নাদেশের কথা।

এ কাহিনী শুনিয়া গোস্বামী প্রভু তো মহা বিস্মিত। নিজে তিনি কাজাল বৈষ্ণব, রিক্ত সন্ন্যাসী। ব্রাহ্মণের এই দারিদ্র্য তিনি কি করিয়া ঘুচাইবেন? আজকাল ভজন-পূজন সারিবার পর যেটুকু সময় অবশিষ্ট থাকে, তাহা অতিবাহিত হয় ইষ্টদেবের ধ্যান জপে।

বাতিরের কাহারো সঙ্গেই বড় একটা সম্পর্ক রাখেন না। এ ব্রাহ্মণের সাহায্যের জন্য কাহাকে ধরবেন, কাহার কাছে উপস্থিত হইবেন, ভাবিয়া পান না।

সহসা স্মৃতিপটে ভাসিয়া উঠে পুরাতন একটি ঘটনার কথা। তাই তো। দারিদ্র্যক্লিষ্ট এই মানুষটির সাহায্য তো তিনি করিতে পারেন। সে অনেক দিন আগের কথা। যমুনার তট ধরিয়া সনাতন আপন মনে ভজন করিতে করিতে যাইতেছেন, হঠাৎ পায়ে ঠেকিল এক দুর্লভ রত্ন। মৃত্তিকা হইতে তখনি তাড়াতাড়ি উহা তুলিয়া নিলেন। পরক্ষণেই মনে খেলিয়া গেল চিন্তার ঝলক। সর্বভাগী কৃচ্ছ্রব্রতী সন্ন্যাসী তিনি, এ রত্ন দিয়া তাঁহার কোন্ কাজ? বরং যত শীঘ্র এটিকে যমুনায় বিসর্জন দেওয়া যায় ততই মঙ্গল। আবার ভাবিলেন, শ্রীভগবানের কি ইচ্ছা তা কে জানে? হয়তো এই রত্ন দিয়া কোন দুঃখী বা বিপন্ন মানুষের প্রাণ বাঁচিতে পারে। জলে ফেলিয়া না দিয়া তটের বস্তু তটে রাখিয়া দেওয়াই সমীচীন। সামনেই একটি চিহ্নিত স্থানে রত্নটি প্রোথিত করিয়া সনাতন আপন কুটিরে ফিরিয়া আসিলেন।

এতকাল সেই রত্নের কথা তাঁহার স্মরণে ছিল না। এবার মহা উৎফুল্ল হইয়া ভাবিলেন, ভালই হইল, এই অভাবগ্রস্ত ব্রাহ্মণই তবে উহা গ্রহণ করুক।

যেস্থানে উহা প্রোথিত আছে তাহার সন্ধান বলিয়া দিলেন, প্রসন্ন মধুর কণ্ঠে কহিলেন, “বাবা, ঐ রত্ন তুমি এখনি তুলে নিয়ে যাও, দারিদ্র্যক্লেশ তোমার দূর হোক।” কথা কয়টি বলার পরই গোষামী আবার মগ্ন হইলেন ইষ্টধ্যানে।

জীবন ঠাকুর সোৎসাহে তখনি নদী তীরে ছুটিয়া আসেন। নির্দেশিত গোপন স্থান হইতে উদ্ধার করেন সেই দুর্লভ সম্পদ।

হস্তস্থিত রত্নখণ্ড সূর্য্যকরে ঝলসিয়া উঠে। দরিদ্র ব্রাহ্মণ বিস্ময়ে হন হতবাক। একি অদ্ভুত দৈবী লীলা প্রকটিত তাঁহার জীবনে?

সাত রাজার ধন মাণিক আজ যে তাঁহার মত চির কালালের মুঠোর মধ্যে। এই মহার্ঘ বস্তু বিক্রয় করা মাত্র মিলিবে অগণিত অর্থ, ঐশ্বর্যের তাঁহার সীমা থাকিবে না।

সনাতনের কৃপাতেই জীবন ঠাকুর আজ এই বিপুল সম্পদের অধিকারী। তাই তাঁহার কথা মনে হইতেই কৃতজ্ঞতায় নয়ন ছুটি অশ্রুসজ্জল হইয়া আসে।

হঠাৎ জীবন ঠাকুরের চেতনার দ্বারে এক প্রচণ্ড আঘাত লাগে। সমগ্র সত্তায় জাগে আলোড়ন। সবিস্ময়ে ভাবিতে বসেন, ধন-সম্পদের লোভে পুণ্যধাম বারাণসী হইতে বৃন্দাবন অবধি তিনি পদব্রজে ছুটিয়া আসিয়াছেন, আর সনাতনের কৃপার ফলে করায়ত্ত হইয়াছে রাজভোগ্য রত্ন। অথচ সেই সনাতন গোস্বামীর বিন্দুমাত্র ছাঁস নাই এই মহার্ঘ বস্তুটির দিকে। এতকাল এটির কথা বিস্মৃতই ছিলেন, যদিই বা আর্তের কাতর ক্রন্দনে সে কথা মনে পড়িয়াছে, তাহার সন্ধানটি বলিয়া দিয়াই আবার ডুবিয়া গেলেন ধ্যান ভঞ্জে। কোন্ অমৃত ভুঞ্জনের ফলে গোস্বামী এমন বিভোর হইয়া আছেন? কোন্ পরম ধনের অধিকারী তিনি যাহা এমন রাজবাহিত রত্নকে তুচ্ছ জ্ঞান করায়? অতুল বিত্তবৈভব, রাজসম্মান ত্যাগ করিয়া আসিয়া সনাতন ভজনানন্দে আত্মবিস্মৃত হইয়া আছেন, রূপান্তরিত হইয়াছেন দেবমানবরূপে। আর জীবন ঠাকুর শিবকৃপায় সেই দেবমানবেরই সান্নিধ্য ও কৃপাপ্রসাদ পাইয়া তুচ্ছ রত্নের মোহে হইয়াছেন আচ্ছন্ন, দৃশ্য বিষয়কীটের জীবন আঁকড়াইয়া ধরিতে চলিয়াছেন আরো দৃঢ়হস্তে।

পরম ধন লাভের তীব্র আকুতি জাগিয়া উঠে ব্রাহ্মণের অন্তরে। এক অভূতপূর্ব দিব্য চেতনায় হন উদ্ভূক্ত। মুহূর্ত্তমধ্যে সেই মহার্ঘ রত্ন লোষ্ট্রবৎ নিক্ষেপ করেন যমুনায়। তারপর ত্রস্ত পদে সনাতনের কুঞ্জে কিরিয়া যান। দণ্ডবৎ করিয়া গলদ্বার্লোকচনে নিবেদন করেন, “প্রভু, আমি অতি জীবাধম। নিজের তুচ্ছ ঘর সংসারের মায়ায়

আবদ্ধ হয়ে আছি। দারিদ্র্যে নিষ্পিষ্ট হয়ে সদাই উদগ্র হয়ে আছি অর্থলাভের জন্ত। আজ আপনার সান্নিধ্যে এসে আমার জ্ঞানচক্ৰ উন্মীলিত হয়েছে। যে ধনে ধনী হয়ে মণিকেও আপনি মণি বলে গণ্য করছেন না, কৃপা করে তারই কিছুটা আমায় দিন। অর্থের বদলে দিন পরমার্থ। আজ থেকে আপনার চরণেই নিজেকে উৎসর্গ করলাম।”

সনাতনের নিকট দীক্ষা গ্রহণের পর শুরু হয় জীবন ঠাকুরের অধ্যাত্মজীবনের অভিযাত্রা। নূতন মাহুবে তিনি রূপান্তরিত হন। উত্তরকালে তাঁহার বংশ খ্যাত হইয়া উঠে কাঠমাগুরার গোস্বামী পরিবার নামে।

জীবনের শেষ পর্যায়ে সনাতন নন্দীশ্বরের মানসগঙ্গা নামক পুণ্য সরোবরের তীরে আসিয়া সজোপনে অবস্থান করিতে থাকেন। উত্তরকালে এ স্থানটি বৈঠান বলিয়া খ্যাত হয়। নিকটেই চক্রেশ্বর মহাদেবের মন্দির। এই স্থানে এক বৃক্ষতলে বসিয়া মহাসাধক ত্রীতী হন তাঁহার চরম অধ্যাত্ম-সাধনায়। স্নানাহারের দিকে কোন হুঁস নাই, একেবারে অজগর বৃত্তি। অন্তরে সদা চলিয়াছে কৃষ্ণভজন আর কৃষ্ণসীলার অনুধ্যান।

সনাতন এ সময়ে অতিবৃদ্ধ, বয়স নব্বই বৎসরের কাছাকাছি। কথিত আছে এই বয়সে প্রাণপ্রিয় ভক্তের এই কৃচ্ছ্র সাধন দেখিয়া ইষ্টদেব নিজেই ব্যগ্রভাবে বৃক্ষতলে আসিয়া উপস্থিত হন। গোপ বালকের ছদ্মবেশে তার গ্রহণ করেন তাঁহার দৈনন্দিন আহার্যের। ‘ভক্তিরত্নাকর’ এই রসমধুর লীলার উল্লেখ করিয়া লিখিয়াছেন—

কৃষ্ণ গোপবালকের ছলে তৃষ্ণ লৈয়া।

দাড়াইলা গোস্বামী সন্মুখে, হর্ষ হৈয়া।

গোরক্ষক বেশ, মাথে উক্ষীষ শোভয়।

ছঙ্কভাণ্ড হাতে করি, গোস্বামীরে কয়।

আছহ নির্জনে, তোমা কেহ নাহি জানে ।

দেখিলাম তোমারে আসিয়া গোচারণে ।

এই হৃৎক পান কর, আমার কথায় ।

লইয়া যাইব তাত্ত, রাখিও এথায় ।

কুটিরে রহিলে, মো সত্যব সুখ হবে ।

ঐছে রহ, নহিলে ব্রজবাসী হুঃখ পাবে ।

( ৫ম তরঙ্গ, পৃ: ২৫০-২৫১ )

ক্রমে ভক্ত ভগবানের এই প্রেমলীলার কথা লোকমুখে প্রচারিত হইয়া পড়ে । সনাতনের ভক্ত ও গুণগ্রাহীরা ব্যাকুল হইয়া বৈঠানে ছুটিয়া আসেন । ইহাদের অনুরোধ উপরোধে সনাতন কৃচ্ছ্রসাধন হ্রাস করিতে বাধ্য হন । সবাই মিলিয়া ঐ বৃক্ষতলে তাঁহার জন্ম এক কুটির বাঁধিয়া দেন । এ কুটির ত্যাগ করিয়া সনাতন গোস্বামী বৃন্দাবনে আর ফিরিয়া যান নাই, শেষের দিন কয়টি এখানেই অতিবাহিত করেন । রূপ, রঘুনাথ প্রভৃতি বৃন্দাবনের গোস্বামীরা, সারা ভারতের দিগ্বিজয়ী পণ্ডিত ও সার্থকনামা সাধুরা, প্রায়ই আসিয়া উপস্থিত হইতেন বৈঠানের এই নিভৃত পর্ণ কুটিরে । আগুকাম সাধক সনাতনকে দর্শন করিয়া তাঁহার ধন্য হইতেন, তাঁহার উপদেশ গ্রহণ করিয়া হইতেন উপকৃত ।

গিরি গোবর্দ্ধনের পরিক্রমা ছিল সনাতনের জীবনের এক প্রধান ব্রত । এই পুণ্যগিরি বৈঠান হইতে বেশী দূরে নয় । প্রথম প্রথম জরাজীর্ণ অশক্ত দেহ নিয়াও সনাতন পরিক্রমা সম্পন্ন করিতেন । পরের দিকে আর দৈহিক সাধ্যে তেমন কুলাইয়া উঠিত না । তখন তাঁহার সারা মনপ্রাণ পড়িয়া থাকিত ইষ্টদেব ত্রীকৃষ্ণের স্মৃতিপূত ঐ গিরির প্রদক্ষিণ পথের দিকে । অনুশোচনা ও বেদনায় পরম ভাগবতের অন্তর হইয়া উঠিত ভারাক্রান্ত ।

ভক্ত হৃদয়ের আৰ্ত্তি আবার সেদিন টানিয়া আনে ইষ্টদেবকে । নল্লনাভিরাম মূর্তিতে গিরিধারীজী আবির্ভূত হন সনাতনের সমক্ষে ।

প্রসন্ন মধুর হাস্তে কহেন, “সনাতন, তোমার অন্তরে খেদ জেগেছে, আমার গোবর্দ্ধন গিরির পরিক্রমা আর তুমি করতে পারছো না। সেই জন্তেই তো আমি ছুটে এলাম। এই জ্বাখো, আমার হাতে রয়েছে গোবর্দ্ধনের শিলাখণ্ড। আর এতে অঙ্কিত রয়েছে আমার চরণচিহ্ন। এই চরণ-পাহাড়ী ভক্তিভরে তোমার কুটিরে স্থাপন করবে, ভজন শেষে রোজ করবে এটিকে প্রদক্ষিণ। তাতেই হবে তোমার গোবর্দ্ধন পরিক্রমণের ব্রত উদ্ঘাপন। এতে এই জীর্ণ-দেহে তোমার শ্রম লাঘব যেমন হবে, তেমনি আমারও বাড়বে আনন্দ।”১

এখন হইতে এই চরণ-পাহাড়ীকে কেন্দ্র করিয়াই সনাতনের ভজন ও তপস্তার ধারা বহিয়া চলে। অতঃপর ধীরে ধীরে সমাগত হয় ১৫৫৪ খৃষ্টাব্দের আষাঢ়ী পূর্ণিমার তিথি। সনাতন গোস্থানীর জীবনদ্বারে সেদিন ধ্বনিত হয় তাঁহার প্রাণাধিক নওলকিশোরের পরম আহ্বান। চরণ-পাহাড়ীর পুণ্যময় বেদীতে দণ্ডায়মান হইয়া জ্যোতির্ময় মূর্তিতে ইষ্টদেব তাঁহার পরম ভক্তকে দর্শন দেন। মায়িক জগতের যবনিকা ভেদ করিয়া সনাতন গোস্থানী প্রবিষ্ট হন শাস্ত্রত লীলাধামে।

এই মহাপ্রয়াণের ফলে উত্তর ভারতের বৈষ্ণবীয় সাধনার, সারস্বত সাধনার, এক তুঙ্গ শিখর যেন সেদিন ধ্বসিয়া পড়ে। সারা ব্রহ্মমণ্ডলে নামিয়া আসে করুণ শোকের ছায়া। আর গোড়ীয়

১ অলৌকিক ভাবে লব্ধ সনাতনের এই চরণ-পাহাড়ী একটি বটপত্রাকৃতি শিলাখণ্ড। গোড়ীয় ভক্তেরা মনে করেন, ইহা পুণ্যগিরি গোবর্দ্ধনের প্রতীক এবং ইহাতে শ্রীকৃষ্ণের চরণচিহ্ন অঙ্কিত রহিয়াছে। সনাতন মরলোক ত্যাগ করার পর শ্রীজীব গোস্থানী ঐ চরণ-পাহাড়ী নিজের ইষ্টবিগ্রহ রাধাধামোদরজীর মন্দিরে স্থাপন করেন ও পূজা অর্চনার ব্যবস্থা করেন। আজ অবধি এই পবিত্র শিলা সেখানেই রহিয়াছে।

বৈষ্ণবসমাজ তাহার দূর বিস্তারী আলোক স্তম্ভটি হারাইয়া বিহ্বল হইয়া পড়ে।

সহস্র সহস্র শোকাক্ত ব্রজবাসীর সম্মুখে, প্রভু মদনমোহনজীর মন্দিরপ্রাঙ্গণে সনাতন গোস্বামীর মরদেহ সমাধিস্থ করা হয়। অগণিত ভক্তের অর্দ্ধাৰ্থ আজিও নিবেদিত হয় সেই পবিত্র ভূমিতে।

# সমর্থ বামদাস

ছোট ছেলে নারায়ণকে নিয়া রাণুবান্ধি বড় বিপদে পড়িয়াছেন। গ্রামের স্কুলে লেখাপড়া সমাপ্ত প্রায়; সে তাহার দাদা গঙ্গাধরের সঙ্গে থাকিয়া কাজকর্ম করিবে, ঘর-সংসার করিবে, ইহাই রাণুবান্ধি চান। কিন্তু নারায়ণ এ কথায় কান পাতে না। সাধু-সন্তের খোজ পাইলেই তাঁহাদের পিছনে করে ঘোরাঘুরি, মাঝে মাঝে মঠে-মন্দিরে গিয়াও চোখ বুজিয়া বসিয়া থাকে। আর গঙ্গাধরের কাছে বলিয়া বেড়ায়, ঘরে তাহার মন মোটেই টিকে না, সন্ন্যাস নিয়া ইহাবে সে দেশত্যাগী।

জননী সেদিন নারায়ণকে নিকটে ডাকিলেন। যা হোক একটা বুঝাপড়া আজ তাহার সঙ্গে করিতেই ইহাবে। আর দেবী করা সঙ্গত নয়। কোমল স্বরে কহিলেন, “বাবা নারায়ণ, এখন তুমি বড় হয়েছিস, লেখাপড়াও কিছুটা শিখেছিস। তোর দাদা গঙ্গাধর তো সংসারের জন্ত খেটে খেটে সারা হল, তোর কি উচিত নয় তাকে সাহায্য করা, তার সংসারের ভার লাঘব করা? আরও একটা জরুরী কথা। আমার শরীর খারাপ হয়ে যাচ্ছে দিন দিন। বড় বউ পার্শ্বভীর উপর অণ্ডায় রকম সংসারের চাপ পড়েছে। তাকে সাহায্য করবার জন্ত বাড়িতে একটি বউ আনা দরকার। তাই আমি ঠিক করেছি, আসছে মাসেই তোর বিয়ে দেবো। ভাল ঘরের সুলক্ষণা একটি পাত্রীও আমি মনে মনে ঠিক করে ফেলেছি।”

“মা, তোমার ছোটো ইচ্ছের কোনটিই যে আমি পূরণ করতে পারছিনে। আমি বলি কি, আমার আশা বরং তুমি ছেড়েই দাও।” অবলীলায় উত্তর দেন নারায়ণ।



“এসব কি তুই বাজে বক্‌হিস ? এ শুধু তোর দায়িত্ব এড়ানোর একটা ছুতো।”

“না, মা, সত্যি কথাই বলছি। গৃহস্থী আমায় দিয়ে কখনো হবে না। জানিনে কেন এক অজানা রাজ্যের হাতছানি কেবলই আমায় ডাকছে। আর ছাখো মা, প্রায়ই আমি স্বপ্নে প্রভু রামজীকে দেখি, ভক্তবীর মারুতীকেও দেখি। শুধু তাই নয়, কি এক অদ্ভুত শূন্যতায় আমার হৃদয় ছটকট করে। আর ভেতর থেকে কে যেন বার বার অশ্রুট স্বরে বলে ওঠে—ওরে সাবধান, সাবধান—সংসারের জালে যেন জড়িয়ে পড়িসনে—সদগুরুর কাছে ছুটে যা, মন্ত্র নে তাঁর কাছ থেকে, আর এই মন্ত্রের ভেলায় চড়ে পৌঁছে যা প্রভু রামচন্দ্রজীর চরণে।”

পুত্রকে হারানোর আশঙ্কায় জননীর হৃদয় কাঁপিয়া উঠে। নিজেকে সামলাইয়া নিয়া রাগুবাঈ বলেন, “বেশ তো বাবা, মন্ত্র নিতে হয়, রামজীর ধ্যান-জপ করতে হয়—তা বাড়ীতে বসেই তো ওসব করা যায়। এজন্ম সংসার ছাড়া কেন, বলতো?”

“না, মা। সন্ন্যাসীর মুক্ত জীবনই আমি নেবো। গ্রামে যখন সাধু-সন্ন্যাসীর জমায়েত আসে, আমি তাঁদের দেখে দেখে মুগ্ধ হই। কোন পিছুটান নেই, সঞ্চয় নেই। নেই কোন বন্ধন বা জটিলতা। একমনে ইষ্টধ্যান করার পরম সুযোগ রয়েছে তাঁদের। এই জীবনই আমার বড় ভাল লাগে।”

“বাবা নারায়ণ, শুধু নিজের ভালো লাগার পিছনেই চলতে নেই, বাপ মায়ের ভালো লাগার দিকেও যে চাইতে হয়। ভেবে ছাখ্, প্রভু রামজী তাঁর বাপ-মায়ের কি বাধ্যই না ছিলেন। তাঁদের তৃপ্তির জন্য কি-ই না করতে পারতেন তিনি। তুইও তোর অভাগিনী মায়ের দিকে একটু ফিরে তাকাস্, বাবা। সাত বছর আগে ভোদের বাবা স্বর্গে গেছেন, ছটি নাবালক পুত্র আমার হাতে সঁপে দিয়ে। তোর তখন মাত্র পাঁচ বৎসর বয়স। কত দুঃখে কষ্টে

তোদের ছ'ভাইকে আমি মানুষ করেছে! তোর বাবার কথা মনে ক'রে, এই ছঃখিনী মায়ের মুখ চেয়ে, তুই ঘর-সংসারে থাক, আমাদের ছঃখের ভার লাঘব কর, বাবা। আর জেনে রাখিস, তুই যদি আমাদের ছঃখ না বুঝিস, কথার অবাধা হোস, তবে আমিও আমার পথ দেখাবো। হবো আত্মঘাতিনী।”—সাক্ষনয়নে কাতর কণ্ঠে একথা বলিতে বলিতে জননী নারায়ণের হাত ছুটি ধরিয়া ফেলিলেন।

মায়ের অশ্রু, পিতার মৃত্যুর করুণ স্মৃতি, নারায়ণের সঙ্কল্প টলাইয়া দেয়। মন তাহার কোমল হইয়া আসে। ছলছল নয়নে উত্তর দেয়, “মা, তুমি এমন করে কাঁদাকাটি ক'রো না। বেশ তো, তোমার ইচ্ছা অনুসারেই আমি কাজ করবো।”

“তা হলে, তোর বিয়ের সম্বন্ধ আমি পাকাপাকি করে ফেলি, কি বলিস? আসন্ গোঁও-এ এক সং গৃহস্থ রয়েছেন, নাম তাঁর ভন্জিপন্থ চোরালপুরকর। তাঁর একটি মেয়ে আছে, যেমনি সুন্দরী সুলক্ষণা, তেমনি স্বভাবটিও সুন্দর। প্রস্তাব নিয়ে তারা ঘোরাফেরা করছে। আমরা সম্মতি দিলেই হয়।” জননী রাগুবাদী এবার স্বস্তির নিঃশ্বাস ত্যাগ করেন। পরদিনই কন্যাপক্ষের সহিত কথা পাকা করার জন্ত লোক পাঠান। দিনক্ষণও ধার্য করা হয়।

বিবাহের রাত। বরষাত্রীরা সাড়ম্বরে কনের বাড়ীতে উপস্থিত হইয়াছেন। বরকর্তা গঙ্গাধর মহা উৎসাহে এদিক-ওদিক ছুটাছুটি করিতেছেন। আত্মীয়-কুটুম্বদের হাসি গান আনন্দ-কলরবে কান পাতা দায়। বাতুলতাও, মশালের আলো আর আতসবাজীতে আকাশ বাতাস সরগরম।

অল্লকাল মধ্যে অনুষ্ঠান শুরু হইয়া যায়। সুসজ্জিতা কনেকে নিয়া আসা হয় বিবাহ-সভায়। বরকনের মাঝখানে আড়াল রচনা

করিয়া আছে শুধু একটি পর্দা, এখনি উহা উত্তোলন করা হইবে, চার চোখের হইবে শুভ মিলন।

এমন সময় জ্বলন্ত মশালধারীদের সতর্ক করিতে গিয়া কে যেন গম্ভীর আওয়াজে বলিয়া উঠে—সাবধান ! বিদ্যুৎস্পৃষ্টের মত হঠাৎ শিহরিয়া উঠে বরবেশী নারায়ণ । চিস্তার ঝলক্ খেলিয়া যায় তাহার অন্তরে । সাবধান ? সে কি ! এ কথাটি যে তাহার পূর্বেকার শোনা ; অন্তর্লোক হইতে উদগত এই বাণী আরো কয়েকবার যে তাহার নিকট পৌঁছিয়াছে । আজো এই বাণী তাহারই উদ্দেশে উচ্চারিত । ভ্রান্তিবেশে সংসারের জালে আজ সে জড়াইতে যাইতেছে । আর তো কোন দিনই এই জাল ছিন্ন করিয়া সে বাহির হইতে পারিবে না । নাঃ, এই মুহূর্ত্তেই ইহার একটা প্রতিবিধান সে করিবে । বিবাহের শৃঙ্খল এড়াইয়া এখনই এই মুহূর্ত্তে এখান হইতে করিবে পলায়ন ।

সিদ্ধান্ত অনুযায়ী কাজ করিতে দেবী হয় না । তৎক্ষণাৎ বরের টোপের ও উত্তরীয় নারায়ণ ভূতলে নিক্ষেপ করে, ‘জয় রামজী’ বলিয়া উচ্চকণ্ঠে ধ্বনি দেয়, বিবাহের অঙ্গন হইতে ছুটিয়া বাহির হইয়া আসে । তারপর বাড়ীর পিছনের রাস্তা দিয়া ধাবিত হয় নিকটস্থ বনের দিকে ।

বিবাহ-সভায় উপস্থিত লোকজন এ কাণ্ড দেখিয়া হতবাক্ হইয়া গিয়াছে । ক্ষণপরেই তাহাদের চমক ভাঙিল—‘ধনু-ধনু’ শব্দে সবাই করিল পলাতক বরের পশ্চাদ্ধাবন ।

চারিদিকে অন্ধকার, রাস্তাঘাট কিছুই দেখা যায় না, ইতিমধ্যে সবার অলক্ষ্যে নারায়ণ কোথায় উধাও হইয়া গিয়াছে । অবশেষে উৎসাহী অনুসরণকারীরা নিবৃত্ত হয়, হতাশ হইয়া ঘরে ফিরিয়া যায় । আলো হাসি গান ভরা বিবাহ-বাড়ীতে নামিয়া আসে নৈরাশ্রের অন্ধকার । ভগ্নদূতের মত গঙ্গাধর গৃহে ফিরিয়া আসেন, জননীর কাছে বর্ণনা করেন এই দুর্দ্দৈবের কথা । মর্মান্তিকী কান্নায় জননী ভাঙিয়া পড়েন । পুত্র নারায়ণ প্রায়ই যে তাঁহার কাছে প্রকাশ

করিত গৃহত্যাগের সঙ্কল্প। জননী বুঝিলেন, বিবাহ-বাসর হইতে পলায়ন করিয়া সেই সঙ্কল্পই আজ সে সিদ্ধ করিতে চলিয়াছে। সংসারে সে আর কোনদিন ফিরিয়া আসিবে না।

এদিকে বিবাহ-বাসর হইতে লাফাইয়া পড়িয়া নারায়ণ উর্দ্ধ্বাসে চলিয়াছে। গ্রামের চেনা রাস্তা তাহার পক্ষে মোটেই নিরাপদ নয়, অহুসরণকারীরা যে কোন সময়ে ধরিয়া ফেলিতে পারে, তাই অন্ধকার বনপথ দিয়াই সে অগ্রসর হইতেছে। দুই পা ক্ষত-বিক্ষত, গাছের গুঁড়ির আঘাতে মাথা ফাটিয়া গিয়াছে, কিন্তু তাহাতে কোন ক্রম্পেদ নাই। উদ্গাদের মত কেবলই সে ছুটিয়া চলিয়াছে।

দীর্ঘপথ অতিক্রম করার পর মনে হইল, এবার সে অনেকটা নিরাপদ। শরীর তাহার বড় শ্রান্ত, ক্ষত ও আঘাতের বেদনায় কাতর। এবার কিছুটা বিশ্রাম না নিলে আর চলে না। কিন্তু এই অন্ধকার রাত্রে, দুর্গম বনের মধ্যে আশ্রয় কোথায় ?

সম্মুখে দণ্ডায়মান এক বিশাল বটবৃক্ষ। নারায়ণ স্থির করিল, এই বৃক্ষশাখে উঠিয়া রাত কাটাইয়া দিবে। শয়নের অসুবিধা হইলেও এ ব্যবস্থায় অন্তত হিংস্রজন্তুর আক্রমণের ভয় নাই। বৃক্ষের প্রশস্ত শাখায় অবসর দেহটি এলানোর সঙ্গে সঙ্গে নিজায় সে অভিভূত হইয়া পড়ে।

পরদিন আবার শুরু হয় পথ চলা। বনের প্রান্তদেশে গিয়া এক ব্রাহ্মণের কুটিরে নারায়ণ আশ্রয় পায়। সেখানে স্নানাহার সম্পন্ন করার পর শরীর অনেকটা সুস্থ হইয়া উঠে।

ভাগ্যক্রমে একদল তীর্থযাত্রীর সঙ্গে তাহার সাক্ষাৎ। এই দলটি যাইতেছে পঞ্চবটি দর্শনে। প্রভু জীরামচন্দ্রের পুণ্যময় লীলা-এই স্থান। নারায়ণের মনপ্রাণ আনন্দে নৃত্য করিয়া উঠে ;

তীর্থচারীদের দলে তখনই সে ভিড়িয়া পড়ে। তারপর এগারো দিনের পদযাত্রা শেষে উপনীত হয় পঞ্চবটিতে।

এই পরম পবিত্রতীর্থে অবস্থানের সময়ই নারায়ণের জীবনে হয় নব অরুণোদয়, গুরুকৃপা ও অনন্ত সাধনার বলে সে পরিণত হয় প্রভু-রামচন্দ্রের কৃপাধন্য এক মহান সাধকে। তাঁহার নব নামকরণ হয়—রামদাস। শাস্ত্রবিদ, যোগবিভূতিসম্পন্ন মহাপুরুষ, সমর্থ রামদাস শুধু এক সিদ্ধ রামাই সাধুই নন, মহারাষ্ট্রের উজ্জীবনে ও দক্ষিণ ভারতে রামভক্তির প্রচারণে তাঁহার অবদান অসামান্য। ছত্রপতি শিবাজীর নব মহারাষ্ট্র নির্মাণের, ধর্মরাজ্য স্থাপনের, প্রেরণা ও পরিকল্পনা উদ্ভূত হইয়াছিল এই মহাত্মার সিদ্ধজীবন হইতে। বৈরাগীর উত্তরীয়কে রাষ্ট্রের পতাকারূপে চিহ্নিত করিয়া দিয়া রামদাস ভারতের জনজীবনের পুরোভাগে স্থাপন করিয়াছিলেন ত্যাগ-বৈরাগ্য ও অধ্যাত্মশক্তির কালজয়ী মাহাত্ম্য।

হায়দ্রাবাদ নগরীর পনের মাইল দূরে জাম্ব্ নামক একটি ক্ষুদ্র গ্রাম। মহারাষ্ট্রের অন্ত্যন্ত অঞ্চলের মত এ স্থানটি রুক্ষ ও পিঙ্গল নয়, চারদিক রহিয়াছে শস্তশ্যামল ক্ষেত্র দিয়া ঘেরা। এই গ্রামে বাস করিতেন সূর্য্যজী পন্থ নামে এক সদাচারী ব্রাহ্মণ। তাঁহার পত্নী রাণুবাই-ও পরিচিতা ছিলেন ধর্মপ্রাণা মহিলারূপে।

পন্থজীর বয়স যৌবনের কোঠা পার হইতে চলিয়াছে, কিন্তু এ যাবৎ কোন সন্তানাদি হয় নাই। স্বামী-স্ত্রী উভয়েরই মনে বড় অশান্তি। তাই তগবৎ অন্নগ্রহ লাভের জন্য নানা ধর্ম্মানুষ্ঠান ও ব্রত উদ্‌যাপনে তাঁহারা ব্রতী হন, দেবজিজ্ঞাসার সেবায় করেন আত্মনিয়োগ। অতঃপর কয়েক বৎসরের ব্যবধানে ইহাদের দুইটি পুত্র ভূমিষ্ঠ হয়। প্রথমটির নাম গজাধর, দ্বিতীয়টি নারায়ণ। এই নারায়ণই হন ভারতবিজ্ঞত মহাসাধক—সমর্থ রামদাস।

দ্বিতীয় পুত্রের জন্মের অব্যবহিত পূর্বে রাণুবান্ধব অস্ত্রজীবনে নানা ভাবান্তর দেখা যায়। রামদাসের অন্ততম জীবনীকার গিরিধর লিখিয়াছেন, এই সময়ে প্রায়ই রাণুবান্ধবের দেহে দেখা দিত দিব্য ভাবের আবেশ। লোকের সঙ্গ এড়াইয়া তিনি নির্জনে আপন মনে ঘুরিয়া বেড়াইতেন।

একদিন রাণুবান্ধব স্বামীকে কহিলেন, “ভাখো, আজকাল প্রায়ই আমি বড় অদ্ভুত রকমের স্বপ্ন দেখে থাকি। আর সেই সব স্বপ্নদৃশ্তে আবির্ভূত হন প্রভু রামচন্দ্র, মা-জানকী, লক্ষণ প্রভৃতি। কখনো বা সামনে দাঁড়িয়ে অপূর্ব কণ্ঠে স্তবগান করছেন রামদাস মারুতী। একই ধরণের এই দৃশ্য কেন বার বার দেখছি, বলতো?”

“ভালোই তো। এতে বোঝা যাচ্ছে, প্রভু শ্রীরামচন্দ্রের কৃপা হয়েছে আমাদের ওপর। তোমার কোলে হয়তো আসছে রামজীরই কোন চিহ্নিত সেবক। যাক্, এসব কথা যেন কারুর কাছে প্রকাশ করো না, আর খুব সাবধানে থেকো।”

অল্পকাল মধ্যেই ভূমিষ্ঠ হয় সূর্য্যজী পন্থের বহু প্রত্যাশিত এই দ্বিতীয় তনয়—রামদাস। ১৬০৮ খৃষ্টাব্দের এই শুভ জন্মদিনটি, ১৫৩০ শকাব্দের চৈত্র মাসের শুক্লা নবমীর এই পবিত্র তিথিটি, মহারাষ্ট্রের ধর্ম-সংস্কৃতির ইতিহাসে সংযোজন করিয়াছে এক উজ্জ্বল অধ্যায়।

পিতা সূর্য্যজী পন্থ ছিলেন আচারনিষ্ঠ রক্ষণশীল ব্রাহ্মণ। রামদাসের যখন পাঁচ বৎসর বয়স, তখন তিনি তাঁহার উপনয়ন সংস্কার করান। তারপর পুত্রকে প্রেরণ করেন গুরুগৃহে। বিদ্যায়কর মেধা ও প্রতিভা বালকের। অল্প সময়ের মধ্যেই পাঠশালার বিদ্যা তিনি আয়ত্ত করিয়া ফেলেন।

স্বল্পবিত্ত হইলেও রামদাসের পরিবারে এতদিন সুখ শান্তির অভাব ছিল না। কিন্তু এবার একদিন তাহাদের উপর পতিত হয় দৈবের নিকরূপ আঘাত। মারাত্মক রোগে ভুগিয়া সূর্য্যজী পন্থ হঠাৎ

পরলোকে গমন করেন। দ্বিতীয় পুত্র রামদাসের বয়স তখন মাত্র সাত বৎসর।

এই দারুণ বিপদে রাণুবাসী একেবারে ধৈর্য্যাহারা হন নাই। কিছুদিনের জন্ত শক্ত হাতে সংসারের দায়িত্ব ভার তিনি গ্রহণ করেন এবং বড় ছেলে গঙ্গাধর বয়ঃপ্রাপ্ত হইয়া বোজগার শুরু করিলে তাঁহাকে বিবাহ করান। ইহার কয়েক বৎসর পরে জননী রামদাসকে গৃহস্থীতে প্রবেশ করাষ্টয়া নিশ্চিন্ত হইতে চাহেন। কিন্তু ভবিতবা ছিল অশ্রুপূর্ণ। পুত্রের সেদিনকার পলায়ন সংবাদ জননীর হৃদয়ে গিয়া বিদ্ধ হয় শেলের মত, ছুঃসহ শোকের ভারে তিনি মুহূর্ত্তমান হইয়া পড়েন।

বিবাহ-সভা হইতে নাটকীয় অন্তর্ধানের পর প্রায় একপক্ষকাল কাটিয়া গিয়াছে। পদব্রজে দীর্ঘপথ অতিক্রম করিয়া রামদাস এবার উপনীত হইয়াছেন গোদাবরী তীরে, নাসিকের নিকটে, পঞ্চবটির মহাতীর্থে।

এখানে পৌছানোর পর দীর্ঘ পথের শ্রম যেন মুহূর্ত্তে দূর হইয়া গেল। স্বর্গীয় আনন্দের শিহরণ তখন রামদাসের সারা দেহে-মনে। পুণ্যতোয়া নদীতে স্নান সমাপন করিয়া তাড়াতাড়ি ছুটিয়া গেলেন রামচন্দ্রজীর মন্দিরে। শ্রীবিগ্রহের দর্শন পাওয়া মাত্র নিমজ্জিত হইলেন দিব্য আনন্দের সাগরে।

পঞ্চবটির আশেপাশে রামচন্দ্রজীর স্মৃতিপুত বহু স্থান রহিয়াছে। কয়েকমাস রামদাস মনের আনন্দে এই সব লীলাস্থল দেখিয়া বেড়ান। পরিব্রাজক সাধু-সন্ন্যাসীদের জমায়েত এখানে লাগিয়াই আছে। তরুণ রামদাস সোৎসাহে ইহাদের সঙ্গ করেন, সাধ্যমত রত হন সাধুদের সেবায়। কোন কোন মহাত্মার কাছে ভক্তনের উপদেশ তিনি প্রাপ্ত হন, নিষ্ঠাভরে তাহাই অনুসরণ করিয়া চলেন।

যত দিন যায় রামদাসের মনের ব্যাকুলতা বাড়িতে থাকে।

ভাবে থাকেন—পরমার্থের জ্ঞান, রামচন্দ্রজীর জ্ঞান ঘর-সংসার ছাড়িয়াছেন, জননীর স্নেহ-মমতার বন্ধন কাটাইয়া আসিয়াছেন, কিন্তু সেই পরমবস্তু মিলিবার উপায় কই ?

বালক বয়স হইতেই সাধু-সন্তদের কাছে গুনিয়া আসিয়াছেন, ইষ্টলাভের জ্ঞান চাই সদগুরু, চাই অমোঘ দীক্ষামন্ত্র, চাই কঠোরতম সাধনা । কিন্তু তাঁহার জীবনে সর্বাত্মে প্রয়োজন সদগুরুর আবির্ভাব । তাহা তো এ যাবৎ সম্ভব হইল না । এ সম্বন্ধে কি করিবেন, কাহার কাছে যাইবেন ভাবিয়া কোন কুল-কিনারা পান না ।

কিন্তু নিজের যাহা সাধ্য তাহা তো রামদাস করিতে পারেন । প্রতিদিন অতি প্রত্যুষে উঠিয়া গোদাবরীর পবিত্র সলিলে স্নান করেন, তারপর অনশ্বনিষ্ঠায় গুরু হয় ইষ্ট শ্রীরামচন্দ্রের নামজপ ও কীর্তন । জপে নিবিষ্ট হইয়া কোন কোন দিন একেবারে বেহাঁস হইয়া পড়েন, সেদিন আর মাধুকরীতে যাওয়া হয় না । উপবাসেই দিনরাত কাটিয়া যায় ।

এই ব্যাকুলতা, কৃচ্ছ্র ও নামসাধনের ফল অচিরে ফলিল । সদগুরুর আবির্ভাব ঘটিল তাঁহার জীবনে ।

পঞ্চবাটির নির্জ্বল অরণ্যের একপ্রান্তে, বৃক্ষমূলে বসিয়া গুরু সাধক সেদিন সারা রাত নিবিষ্ট মনে জপ করিয়া চলিয়াছেন । ক্রমে রাত্রির অন্ধকার তরল হইয়া আসে । বনানীর শিরে দেখা দেয় উষার অরুণ রাগ, প্রভাত পাখীর কাকলী ছড়াইয়া পড়ে আকাশে বাতাসে । দেব-দেউলের কাঁসর ঘণ্টা আর সাধু-সন্তজনের ভজনের দূরগত বঙ্কার অন্তরলোকে উৎসারিত করে দিব্য আনন্দের ধারা । এমনি সময়ে বৃক্ষমূলে আসিয়া দাঁড়ান এক বৈরাগী মহাপুরুষ । গভীর কণ্ঠের আওয়াজ ধ্বনিত হয়, “বৎস, চোখ মেলে চাও । তোমার আশ্রিত আর ভজন-নিষ্ঠায় রামজী প্রসন্ন হয়েছেন, সেই আনন্দ সংবাদ দিতেই আজ এখানে আমার আগমন ।”



চোখ মেলিতেই রামদাস দেখেন—সম্মুখত দেহ, জটাজুট সমন্বিত এক মহাত্মা তাঁহার সম্মুখে দণ্ডায়মান। গলে বিলম্বিত একছড়া তুলসীর মালা। কোমরে একফালি কৌপীন ছাড়া আর কোন আচ্ছাদন নাই। বয়সে প্রাচীন হইলেও দেহের গৌরবাস্তি এখনো অপরিমিত। আয়ত নয়ন দুইটি দিব্য আনন্দের দ্ব্যতিতে ঝকঝক করিতেছে।

দর্শন মাত্রেই রামদাসের সর্বসত্তায় উঠে প্রবল আলোড়ন। অন্তরাঙ্গা হইতে উদ্ভিত হয় আশ্বাস বাণী—‘ওরে ভয় নেই, রামজীর কৃপাপ্রসাদ পেতে আর দেবী নেই, এই যে সম্মুখে এসে দাঁড়িয়েছেন তোমার সদগুরু, ইষ্টদেবের চরণে ইনিই যে তোকে দেবেন পৌঁছে।’

মোহাবিষ্টের মত এগিয়ে যান তরুণ সাধক রামদাস। মহাত্মার চরণে লুটিয়ে পড়েন, সাক্ষাৎকালে আবেদন জানান, “কৃপা ক’রে যদি এসেছেনই, দিন আপনার পরমাশ্রয়, জীবন আমার কৃতার্থ হয়ে উঠুক।”

“হ্যাঁ, বৎস, তোমায় আমি মন্ত্র দেবো, সন্ন্যাস দেবো। আর দেবী ক’রে না। তাড়াতাড়ি গোদাবরীর পবিত্র নীরে তুমি স্নান সমাপন ক’রে এসো।”

দীক্ষা ও সন্ন্যাস সমাপ্ত হইয়া গেজ।<sup>১</sup> গুরু তাঁর শিষ্যের নাম দিলেন রামদাস। কহিলেন, “বৎস, এখন থেকে শুধু নামেই রামদাস

১ এই গুরুর নামধার আজো অজ্ঞাত। রামদাসের চিঠিপত্র, রচনা ও সংলাপ অজ্ঞপ্রকাশিত হইয়াছে। কিন্তু দেখা যায়, সর্বত্রই তিনি গুরুর পরিচয় গোপন রাখিয়াছেন। হয়তো গুরুর নির্দেশেই তাঁহাকে এই গোপনীয়তা অবলম্বন করিতে হইয়াছিল। এ হলে উল্লেখযোগ্য যে, গুরুকরণ, গুরুদত্ত মন্ত্র ও গুরুশক্তিকে রামদাস অপরিহার্য মনে করিতেন।

গবেষকেরা মনে করেন, রামদাসের গুরু ছিলেন একজন বিশিষ্ট ব্রাহ্মইন্দ্র লাধু, তিনি ব্রাহ্মজী বা ব্রাহ্মানন্দী সাধক ছিলেন না। লাধু সাধন সম্পর্কে তাঁহার নিজস্ব মত ও আদর্শ ছিল। অবতার ব্রাহ্মচন্দ্রের তত্ত্ব এবং অবৈত বোদ্ধ, এই দুইয়ের সমন্বয় বাণী তিনি প্রচার করিতেন।

নও, কর্মেও সতত করবে শ্রীরামচন্দ্রজীর দাসত্ব। নিজের আদর্শরূপে রাখবে মহাবীর হনুমানজীকে, মারুতী মহারাজকে। মহাশক্তিদ্বর ছিলেন মারুতী, আর নিজের সর্বশক্তি তিনি নিয়োজিত করেছিলেন অবতার পুরুষ রামজীর ধর্মসংস্থাপনের মহান কর্মে। কত দুষ্কৃতের বিনাশ করেছিলেন এই রামভক্ত, আর কত সাধুদের করেছিলেন রক্ষণ। বহিরঙ্গ জীবনে মারুতীজীর এই কর্মসাধনা তুমি অনুসরণ করে চলবে। এই ভক্তবীরের অন্তর্লোকের সাধনতত্ত্বও তোমার অনুধাবন করা দরকার।”

“কৃপা করে, এ তত্ত্বটি বিশদ করে বলুন, মহারাজ।”

“মহাযোগী মারুতীর অন্তর্লোকে রামজী দীপ্যমান ছিলেন সচ্চিদানন্দ বিগ্রহরূপে। শ্রীরামচন্দ্রের এই অবতাররূপ আর সচ্চিদানন্দরূপ ছই-ই বিভাসিত ছিল রামভক্ত মহাসমর্থ মারুতীজীর সাধনজীবনে। এ কথাটি সব সময়ে স্মরণ রেখো, বৎস।”

গুরু মহারাজ সেদিন বিদায় গ্রহণ করিবেন। চরণতলে পতিত হইয়া রামদাস ডুকরিয়া কাঁদিয়া উঠিলেন। স্নেহে গুরু কহিলেন, “বৎস, অধীর হ’য়ো না, ধৈর্য্য ধরো। পরমার্থ লাভ করতে হলে চারটি কৃপা চাই। এ চারটি হলো—গুরু কৃপা, আত্ম কৃপা, শাস্ত্র কৃপা ও ইষ্ট কৃপা। গুরু কৃপার দ্বার তোমার সাধনজীবনের সম্মুখে উন্মুক্ত হয়েছে। এবার তোমার চাই আত্ম কৃপা, অর্থাৎ নিজের অনুষ্ঠিত কঠোর তপস্শ্রা, যার ভেতর দিয়ে সর্ব্ব অহমিকা ও দেহবোধ যাবে লুপ্ত হয়ে।”

একটু থামিয়া আবার কহিলেন, “আর চাই শাস্ত্র কৃপা। শাস্ত্রের নিগূঢ় তত্ত্বসমূহ ভেতর থেকে উদ্ভাসিত হবে তোমার অন্তর সন্তায়। তারপর ইষ্ট কৃপার অবতরণ হতে দেবী হবে না, বৎস। তোমায় প্রাণভরে আশীর্ব্বাদ করছি—অচিরে তুমি সিদ্ধকাম হও। আমার

অদর্শনে খেদ ক'রো না। প্রয়োজনমত আবার এই পুণ্যধামেই তুমি আমার সাক্ষাৎ পাবে।”

গুরু পরদিনই পঞ্চবটি ত্যাগ করেন; সাধক রামদাসও গুরু করেন তাঁহার মরণ-পণ তপস্শ্রা। দৈশ্র ও কৃচ্ছ্রসাধন হয় তাঁহার এই তপস্শ্রার বড় অবলম্বন। ক্ষুধা তৃষ্ণার বালাই নাই, আকাশবৃষ্টি নিয়া দিনাতিপাত করেন, ঈশ্বরের বিধানে যেদিন যেটুকু আহাৰ্য্য উপস্থিত হয় তাহা দিয়াই করেন ক্ষুৎপিপাসার নিবৃত্তি।

মাথা গুঁজিবার একটি ঝুপড়ি বা পৰ্ণকুটিরও তাঁহার নাই। একমাত্র আশ্রয় বৃক্ষতল। গুরুর মত একফালি কোপীন সম্বল করিয়া সেখানেই দিনরাত থাকেন, মাথার উপর দিয়া ঋতুর পর ঋতু গড়াইয়া যায়। শীত-গ্রীষ্ম সম্বন্ধে যেমন রামদাসের হুঁস নাই, তেমনি নাই বর্ষার ঝড় জলের নির্ঘাতনে বিন্দুমাত্র অশুবিধার বোধ। নবীন সন্ন্যাসীর এই ত্যাগ তিতিক্ষা, একনিষ্ঠা ও দৃশ্চর সাধনা দেখিয়া পঞ্চবটির তজনশীল প্রবীণ সাধকেরাও বার বার সাধুবাদ করিতে থাকেন।

অবশেষে রামদাসের সাধনা সফল হইয়া উঠে, ইষ্টদেব প্রভু শ্রীরামচন্দ্রের জ্যোতির্ময় মূর্তি উদ্ভাসিত হইয়া উঠে তাঁহার নয়ন সমক্ষে। দিব্য আনন্দের রসতরঙ্গে সর্বসত্তা তাঁহার প্রাবিত হয়, বাহ্যজ্ঞান হারাইয়া দেহখানি ভূমিতলে লুটাইয়া পড়ে।

সম্বিং ফিরিয়া আসিলে দেখিলেন, গুরু মহারাজ তাঁহার শিয়রে উপবিষ্ট। চোখে মুখে তাঁহার আনন্দের আভা। স্নিগ্ধকণ্ঠে রামদাসকে তিনি কহিলেন, “বৎস, তুমি ভাগ্যবান, ইষ্টদর্শন তোমার হয়েছে, তপস্শ্রার এক প্রধান ধাপ তুমি অতিক্রম করেছো।”

তাড়াতাড়ি ভূমিশয্যা ছাড়িয়া সাধক রামদাস উঠিয়া বসিলেন।

আনন্দাশ্রমধারায় স্নাত হইয়া সাষ্টাঙ্গে প্রণত হইলেন গুরু মহারাজের চরণতলে ।

পরের দিন গুরুজী তত্ত্ব রামদাসকে নিকটে ডাকিয়া কহিলেন, “বৎস, তোমার ইষ্টদর্শনের প্রাকালেই আমি উপস্থিত হয়েছিলাম। তোমার সাফল্য দেখে আমি প্রসন্ন হয়েছি।”

“প্রভু, এসবই আপনার কৃপা। আপনার প্রদত্ত মন্ত্র সাধনই হচ্ছে আমার বড় সম্বল।” নিবেদন করেন রামদাস।

“না বৎস, তোমার সাধনার ঐকান্তিকতা আর কৃচ্ছ্র, তোমার দৈন্য আর আত্মভিমানের বিলুপ্তি আমায় আনন্দ দিয়েছে। সাধনা ও আত্মগুদ্ধির বলে আত্ম-কৃপা তুমি পেয়েছো, শাস্ত্রের গূঢ় তত্ত্বসমূহ স্মরিত হয়েছে তোমার সাধনসত্তায়। এবার সেই অনুভূত তত্ত্বকে শাস্ত্র অধ্যয়নের মধ্য দিয়ে যাচাই করে নাও। আরো একটা কারণ আছে যে জন্ম তোমায় শাস্ত্র পারঙ্গম হতে হবে।”

“বুঝিয়ে বলুন, মহারাজ।”

“রামদাস, তুমি রামজীর দাস সর্ব্বতোভাবে, অন্তরঙ্গ ও বহিরঙ্গ এই দুইদিক দিয়ে। আশীর্ব্বাদ করি, অচিরে তোমার অন্তর্লোকে স্মরিত হোক প্রভু রামচন্দ্রের অদ্বৈত ব্রহ্মস্বরূপ। আর বাইরে তুমি অবতার জীরামের ধর্ম্মরাজ্য সংস্থাপনে তৎপর হও।”

“রামরাজ্য তো ত্রেতাযুগের প্রভু। এ যুগে তো তাঁর আসবার কথা নয়।” প্রশ্ন করেন রামদাস।

“বৎস, জীরামচন্দ্র হচ্ছেন পরম ঈশ্বর, পর-ব্রহ্ম। প্রতি যুগেই রয়েছে তাঁর অধিকার, রয়েছে তাঁর রাজ্যস্থাপনের কর্ম্মশ্রুতি। নামে কি আসে যায়, রামদাস। রামরাজ্য, ধর্ম্মরাজ্য, এ যুগেও প্রতিষ্ঠিত হতে যাচ্ছে।”

“এ বৃহৎ ঐশী কর্ম্মে আমার মত ক্ষুদ্র মানুষকীটের কি করবার আছে, প্রভু?”

“ভুল করলে, রামদাস। তিনি মহাযোগী হনুমানজীকে যেমন নিয়োজিত করেছিলেন, তেমনি কি কাঠবেড়ালীর সাহায্যও নেন নি ? তিনি আসছেন—তোমার আমার কাজ হচ্ছে, যে পথ দিয়ে তাঁর রথ আসবে সে পথকে কণ্টকমুক্ত করা।”

“এক্ষেত্রে আমার কি করার আছে ?”

“শোন রামদাস, বিধর্মীর অত্যাচারে জাতি পঙ্ক হয়ে গিয়েছে। ধর্মবুদ্ধি আজ বিলুপ্ত, নোংরা জঞ্জালে ভরা সর্বস্থান। পরম প্রভুর আসন পাত্‌বার মত ঠাঁই কোথাও নেই। এ সম্বন্ধে তুমি তোমার কাজ শুরু করো। মহারাষ্ট্র হোক তোমার কর্মক্ষেত্র। ধর্মবোধ ও অধ্যাত্মশক্তিকে ভিত্তি করে জাগিয়ে তোল এ দেশটাকে।”

“প্রভু, ভাবছি, আমার মত কাঙাল অসহায় ব্যক্তি, কি করে এ কাজে এগোবে।” দৈন্তের সুরে বলেন রামদাস।

“বৎস, ভেবো না। আমি তোমায় বর দিচ্ছি, অচিরে ঋদ্ধি-সিদ্ধি হবে তোমার করতলগত। দেশের শক্তিদর রাজা থেকে শুরু করে সাধারণ মানুষ সবাই দেবে তোমার এ মহান কর্মে সহায়তা।”

“নির্দেশ দিন, প্রভু, কিভাবে এ কাজে আমি অগ্রসর হবো।”

“এ ঐশী কর্মের দায়িত্ব ও গুরুত্ব অনেক, রামদাস। তাই এজ্ঞ প্রস্তুতি দরকার। এই প্রস্তুতি ঐশী কর্মেরই অঙ্গ ব্যতীত আর কিছু নয়। এখানে পঞ্চবটির তীড়ে এ কাজ হয়ে উঠবে না। গোদাবরীর অপূর্ণ তীরে তাকে রুলীতে তুমি চলে যাও। সেখানে নির্জনে বাস করো দশ বৎসর কাল। সমাপ্ত করো তোমার অবশিষ্ট সাধনা ও শাস্ত্র অন্বেষণ। জনগণের ভেতর তোমায় কাজ করতে হবে, সেখানে শুধু তত্ত্ব ও প্রেমিক সাধক হলেই চলবে না, আচার্য্য হয়েই তোমায় বসতে হবে। এজ্ঞ চাই অসামান্য শাস্ত্র ব্যুৎপত্তি। রামজীর কৃপার ভক্তিশাস্ত্র ও অদ্বৈত ব্রহ্মবাদ ছুইয়েতেই থাকবে তোমার অনায়াস অধিকার। যাও, বৎস, রামজীর উপর সকল ফলের আশা ছেড়ে দিয়ে, অনাসক্ত যোগীরূপে তুমি এখন থেকে বিরাজ করো।”

বার বার রামদাসকে উৎসাহিত করিয়া, অন্তরের গভীর আশীর্বাদ জানাইয়া, গুরু মহারাজ বিদায় গ্রহণ করিলেন।

তাকেরুলীতে রামদাস একাদিক্রমে অবস্থান করেন প্রায় বারো বৎসর। এই দীর্ঘ সময় ব্যাপিয়া একদিকে অগ্রসর হন গুরু প্রদর্শিত নিগূঢ় যোগ সাধনার মার্গে—অপর দিকে আয়ত্তে আনিতে থাকেন জটিলতর শাস্ত্রতত্ত্ব।

পঞ্চবটির দুই মাইল দূরেই তাকেরুলী। তদ্বী শ্রোতস্থিনী নন্দিনী এই স্থানটি বিধৌত করিয়া প্রবাহিত হইয়াছে, অদূরে গিয়া পতিত হইয়াছে পুণ্যতোয়া গোদাবরীতে। পিছনে রহিয়াছে একটি অম্লচ্ছ নির্জ্ঞন পাহাড়। এখানকার নৈসর্গিক সুসমা আর শাস্ত্র পবিত্র আবহাওয়া হইতে আধ্যাত্মিক প্রেরণা সহজে লাভ করা যায়। তাকেরুলী পাহাড়ের এক প্রান্তে একটি পর্ণকুটিরে রামদাস অতিবাহিত করেন তাঁহার সাধনজীবনের দ্বিতীয় পর্য্যায়।

অল্পকাল মধ্যে এই শাস্ত্রবিদ ভজনশীল সাধকের খ্যাতি চারিদিকে ব্যাপ্ত হইয়া পড়ে। নবাগত ভক্ত ও গুণমুগ্ধদের সহায়তায় বহু হুপ্রাপ্য গ্রন্থ রামদাস সংগ্রহ করিতে সমর্থ হন। এই সব গ্রন্থের অল্পশীলন ও বিচার বিশ্লেষণের পর তিনি ব্রতী হন তাঁহার নিজস্ব ভক্তিবাদের ভিত্তি গঠনে।

বারো বৎসরের শাস্ত্রচর্চা ও ভক্তি সাধনা রামদাসের জীবনে আনিয়া দেয় বিপুল আত্মবিশ্বাস ও প্রশান্তি। এবার গুরু নির্দেশিত ঐশী কর্মের উদ্যাপনের কথাও বার বার মনে পড়িতে থাকে। এই সময়ে একদিন ধ্যান সমাহিত থাকাকালে রামদাস আবার ইষ্টদেব শ্রীরামচন্দ্রের "দর্শন লাভ করেন। দিব্য করুণাধারায় হৃদয়কুন্ত কানায় কানায় পূর্ণ হইয়া উঠে।

ইহার অব্যবহিত পরেই আবার ঘটে গুরু মহারাজের আবির্ভাব।

স্নেহপূর্ণ স্বরে প্রিয় শিষ্যকে তিনি কহেন, “রামদাস, তোমার প্রস্তুতি-পর্ব সমাপ্ত প্রায়। আর যেটুকু বাকী আছে তাও এবার শেষ করে ফেল। ঐশী কাজ শুরু করার আগে সারা দেশটাকে একবার ঘনিষ্ঠভাবে দেখে নাও। পদব্রজে বেরিয়ে পড়ো, প্রধান তীর্থগুলো দর্শন করে এসো। এই সঙ্গে হৃদয়ে তোমার গ্রথিত হোক সারা ভারতের মর্মস্বাদ বাস্তব চিত্র।”

অতঃপর একদল সন্ন্যাসী সঙ্গীর সহিত রামদাস পরিব্রাজনে বাহির হন। উত্তরে হিমালয়-তীর্থ কেদারবদরী হইতে শুরু করিয়া দক্ষিণে রামেশ্বর ও সিংহল এবং পশ্চিমে দ্বারকা বৃন্দাবন হইতে শুরু করিয়া বারাণসী গয়া জগন্নাথধাম প্রভৃতি দর্শন করিয়া আবার পঞ্চবটিতে তিনি ফিরিয়া আসেন।

এবার শুরু হয় তাঁহার অধ্যাত্মজীবনের সর্বাপেক্ষা গুরুত্বপূর্ণ অধ্যায়। আচার্য্যের ভূমিকা গ্রহণ করিয়া রামাইং বৈষ্ণবধর্মের এক নব সম্প্রদায় তিনি গড়িয়া তোলেন। রামদাসী সম্প্রদায় নামে তাহা খ্যাত হইয়া উঠে।

রামদাস ও তাঁহার শ্রমদানোলনের প্রকৃত মূল্যায়ন করিতে হইলে তখনকার মহারাত্রের রাজনৈতিক ও সামাজিক পশ্চাদ্গতি জানিয়া নেওয়া দরকার। ইতিপূর্বে প্রায় তিনশত বৎসর কাল দাক্ষিণাত্য মুসলমান অধিকারে ছিল। চৌদ্দ শতক হইতে সতের শতক কাল অবধি দেখা যায় আমেদনগর ও বিজাপুর এই দুইটি রাজ্য উত্তরাগত মুঘল শক্তির প্রতিরোধে ব্যস্ত। রামদাসের সময়ে দক্ষিণাঞ্চলে মুঘল শক্তির প্রধান কেন্দ্র ছিল আমেদনগর; সম্রাট ঔরংজেব ইতিমধ্যে এই গুরুত্বপূর্ণ নগরটি দখল করিয়া নিয়াছিলেন।

মুসলমান রাজাদের যুদ্ধ বিগ্রহ ও অত্যাচার মারাঠার জন-জীবনে আনয়ন করে ঘোরতর অশান্তি ও উপজব। হিন্দুদের

দেব-দেউলের উপর বিশ্বাসীদের কোন শ্রদ্ধা ছিল না, সুযোগ পাইলেই দেববিগ্রহ তাহারা কলুষিত করিত, মঠ ও মন্দির করিত বিনষ্ট। ফলে হিন্দুদের মধ্যে দেখা দেয় হীনমস্ত ও অসহায়ের মনোভাব। সামরিক সংঘর্ষ প্রায়ই ঘটিতে থাকে, ফলে বিস্তীর্ণ অঞ্চল পড়িয়া থাকে অনাবাদী অবস্থায়। আর দরিদ্র চাষীরা পতিত হয় ঘোর সঙ্কটে। সরকারী ও বেসরকারী স্তরে উৎকোচ ও অশ্রান্ত দুর্নীতি চলিতে থাকে অবাধে। সমাজ-জীবন তাই ধীরে ধীরে হইয়া উঠে পঙ্গু ও নৈরাশ্রবাদী।

সব ক্রিয়ারই প্রতিক্রিয়া থাকে, মহারাষ্ট্রেও তাহার ব্যত্যয় দেখা যায় নাই। মারাঠার দূর দুর্গম স্থানগুলিতে মুঘলশক্তি তেমন দৃঢ় হইয়া বসিতে পারে নাই, এই সব স্থানে হিন্দু জাগৃতির চিহ্ন দেখা যাইতে থাকে। এই নব জাগৃতির মুখপাত্র শিবাজী ভোসলে। অসাধারণ নেতৃত্ব শক্তি, সংগঠন প্রতিভা ও রণচাতুর্য্য ছিল এই নেতার। এই সঙ্গে ছিল ধর্ম-ভিত্তিক হিন্দুরাজ্য গঠনের মহান পরিকল্পনা।<sup>১</sup> সিদ্ধপুরুষ রামদাসের অধ্যাত্ম-প্রেরণা শিবাজীকে যোগাইয়াছিল নূতনতর সঞ্জীবনী-শক্তি ও উদ্দীপনা।

স্বামী রামদাসের সমকালীন মহারাষ্ট্রে পক্ষারপুরের বৈষ্ণব আন্দোলনের প্রভাব বড় কম ছিল না। এই বৈষ্ণবেরা ছিলেন কৃষবিগ্রহ বিঠঠলজীর ভক্ত। অভঙ্গপদ কীর্ত্তন ও নাম প্রচারের মধ্য দিয়া মারাঠার জনজীবনকে অনেকাংশে ইঁহারা আত্মস্থ করেন, নূতনতর আত্মশক্তিতে উদ্বুদ্ধ করিয়া তোলেন।<sup>২</sup>

১ রাণাডে : রাইজ অব্‌ দ্য মারাঠা পাওয়ার—পৃষ্ঠা ২৭-৩৪

২ অনেকের ধারণা, মারাঠা বৈষ্ণব ও সাধক কবিরা মারাঠার জাতীয় অত্মদয়ে কোন সাহায্য করেন নাই। তাঁহাদের দৈন্ত ও ত্যাগ ভিত্তিকা বরং দেশবাসীকে হীনমস্ত ও হীনবল করিয়াছে। কিন্তু রাণাডে তাঁহার ‘রাইজ অব্‌ দ্য মারাঠা পাওয়ার’ গ্রন্থে প্রমাণ করিয়াছেন—এ ধারণা ভিত্তিহীন, ঐ সব বৈষ্ণব কবিরাই বরং মারাঠা জাগৃতির ভিত্তি গড়িয়া তোলে। শ্রবণ যত্নাধ, কিনকেড, রেভারেণ্ড এডওয়ার্ডস্‌ প্রভৃতি এক্ষেত্রে রাণাডের মতবাদের সমর্থক।



পঞ্চারপূরের বৈষ্ণবদের প্রধান ছিলেন জ্ঞানেশ্বর। ত্রয়োদশ খৃষ্টাব্দ তাঁহার অভ্যুদয় কাল। এই মহাপুরুষের লিখিত জ্ঞানেশ্বরী গীতায় যোগ ও ভক্তিবাদের সমন্বয় দেখা যায়। নামদেব, তুকারাম প্রভৃতির উপর সাধক জ্ঞানেশ্বরের প্রভাব প্রচুর। জ্ঞানেশ্বরের পরে চতুর্দশ শতকে আবির্ভূত হন নামদেব। তাঁহার ভক্তিবাদের ধারা মারাঠা হইতে শুরু করিয়া পাঞ্জাব অবধি বিস্তারিত হয়।

রামদাস এবং তুকারাম প্রায় সমসাময়িক। ঐতিহাসিক তথ্যাদি হইতে দেখা যায়, কৰ্ম্মক্ষেত্র ও বৈষ্ণবীয়তায় পার্থক্য থাকিলেও এই দুই মহাত্মা পরোক্ষভাবে উভয়ে উভয়কে সাহায্য করিয়াছিলেন। মারাঠার উজ্জীবনকে করিয়াছিলেন স্বরাশ্রিত।

বারো বৎসর ব্যাপিয়া সমগ্র ভারত পরিব্রাজনের পরে স্বামী রামদাস ১৬৪৪ খৃষ্টাব্দে মহারাত্রে কিরিয়া আসেন। দেশের যে চিত্র এই পরিব্রাজনের মধ্য দিয়া তাঁহার নয়ন সমক্ষে উদ্ঘাটিত হয় তাহা মন্থাস্তিক। এই ধর্ম্মযুত মহান দেশে ধর্ম্মবোধ সেদিন স্তিমিত। বিধর্ম্মীর প্রভাপের সম্মুখে দেশবাসী হারাইয়া বসিয়াছে তাহার আত্মবোধ, তাহার জাতীয় গৌরব। দেব-দেবীর মূর্ত্তি নানা স্থানে হইতেছে কলুষিত। সমাজ হইতে নীতিবোধ প্রায় লোপ পাইয়াছে। দারিদ্র্যের নির্যাতনও মানুষের মনুষ্যত্বকে কম অবনমিত করে নাই। এই পরিস্থিতিতে সদগুরু নির্দেশ তাঁহার মানসপটে জাগিয়া উঠিল। নিজ দেশ, লাঞ্চিত পদদলিত মহারাত্তিকে তিনি নির্বাচিত করিলেন তাঁহার কৰ্ম্মক্ষেত্ররূপে। নূতনতর উজ্জীবন ও ধর্ম্মরাজ্য সংস্থাপনের জন্ত হইলেন কৃতসঙ্কল্প।

নানা স্থান পরিভ্রমণের পর সাতারা অঞ্চলকে রামদাস বাছিয়া নিলেন তাঁহার কাজের প্রধান ক্ষেত্ররূপে। পশ্চিমঘাট পর্ব্বতমালার কাছে—শস্ত্র-শ্রামল নদী-উপত্যকার এক নয়নলোভন স্থান এই সাতারা। প্রাকৃতিক শোভায় ভরপুর। নদী, পাহাড় ও অরণ্যে ঘেরা এই অঞ্চলটিতে আসিয়া ভক্ত রামদাসের হৃদয় আনন্দে নাচিয়া

উঠিল। পাহাড়ের বুকে বসানো, নিভৃতি ও শান্তির নীড়, ছাকল গ্রাম। পাদদেশ দিয়া ক্ষীণকায়া এক তটিনী কুলকুলূরবে বহিয়া চলিয়াছে। এই গ্রামটির একপ্রান্তে কিছুকালের জন্য স্থাপিত হইল স্বামী রামদাসের সাধন-আশ্রম।

আশ্রম তো করা গেল, কিন্তু আশ্রমের বিগ্রহ কই? ইষ্টদেবের বিগ্রহ স্থাপন না করা অবধি রামদাসের মনে শান্তি নাই।

অল্পকাল মধ্যেই এ সমস্যা সমাধান হইয়া গেল। সেদিন গভীর রাতে ধ্যানাসনে বসিয়া স্বামী রামদাস এক অপূর্ব নির্দেশ পাইলেন। ইষ্টদেব রামচন্দ্র তাঁহাকে বলিতেছেন, “বৎস রামদাস, তোমার আশ্রম-মন্দিরে প্রবেশের জন্য যে আমি বহুকাল ধরে উৎসুক হয়ে আছি। তোমার স্নানের ঘাটের একপাশে নদীগর্ভে প্রোথিত রয়েছে আমার বিগ্রহ। কাল প্রত্যুষে এটিকে নদী থেকে উদ্ধার করো, স্থাপন করো তোমার আশ্রমে।”

শ্রীরামজীর এই প্রস্তাববিগ্রহ পরদিনই নদী হইতে উঠাইয়া আনা হইল। রামদাস পরম আনন্দে ইহার সেবা-পূজা শুরু করিলেন। কিছুদিন পর জাঁকজমক সহকারে মারুতীজীর একটি মূর্তিও এখানে স্থাপন করা হয়।

ছাকলের আশ্রমে রামদাস একাদিক্রমে বেশী দিন বাস করেন নাই। ইহার পর শিবধর নামক একটি অতি-নিভৃত স্থানে তিনি উপনীত হন। লোকালয় বর্জিত এই নির্জন অঞ্চলে প্রায় দশ বৎসর কাল তিনি অবস্থান করেন। বিশিষ্ট জীবনীকার ও শিষ্যদের মতে, এই স্থানটিতেই সমাপ্ত হয় রামদাসের অধিকাংশ জনপ্রিয় ধর্মসঙ্গীত ও তত্ত্বগ্রন্থের রচনা।

অতঃপর রামদাস আর নিভৃতি বা অবকাশ খুঁজিয়া বেড়ান নাই। বিপুল উদ্যম, কর্মশক্তি ও সৃজনী প্রতিভা নিয়া ঝাঁপাইয়া পড়েন ধর্ম সংগঠনের কাজে, মারাঠার জনজীবনে তোলেন অভূতপূর্ব আলোড়ন।

রামদাসের ব্যক্তিত্ব, আচার আচরণ ও ধর্মপ্রচার ছিল বড়ই আকর্ষণীয়। ভক্ত-শিষ্যগণসহ কোপীনধারী এই সর্বব্যাপী সন্ন্যাসী গ্রামে গ্রামে ঘুরিয়া বেড়াইতেন। শাস্ত্রের ব্যাখ্যা বিশ্লেষণ আর ভজন কীর্তনে তাঁহার ধর্মসভা জমজমাট হইয়া উঠিত। রামদাস একাধারে যেমন ছিলেন ভাবুক ভক্ত, কবি ও কীর্তন গায়ক, তেমনি বেদ-বেদান্ত, পুরাণশাস্ত্র ও যোগ মার্গে ছিল তাঁর অনায়াস অধিকার। বিশেষ করিয়া তাঁহার ভজন, কীর্তন ও ধর্মরাজ্য স্থাপনের আশ্বাস বাণী শত-শত ভক্ত নরনারীকে উদ্বুদ্ধ করিত নব প্রেরণায়।

গ্রামের উচ্চ নীচ, শিক্ষিত অশিক্ষিত, ধনী নিধন সকলেই পরম উৎসাহে ভীড় করে রামদাসের ধর্মসভায়। তাঁহার উজ্জল ব্যক্তিত্বকে ঘিরিয়া নানা স্থানে গড়িয়া উঠিতে থাকে সুস্বচ্ছ ভক্তগোষ্ঠী। ভাবাবেগের বহ্না উৎসারিত করিয়া, ভক্তদের হাসাইয়া কাঁদাইয়াই কিন্তু রামদাসের কর্তব্য শেষ হইত না। অসামান্য গঠন-প্রতিভা বলে অল্পকাল মধ্যে ভক্তদের নিয়া তিনি স্থাপন করিতেন এক একটি মঠ বা সাধন কেন্দ্র। ইষ্টদেব রামচন্দ্র আর মহাযোগী মারুতীজীর মূর্তির পূজা হইত সেখানে সাড়ম্বরে। এইভাবে এই মঠগুলিকে কেন্দ্র করিয়া বহিয়া চলে নব ভক্তিদর্শনের স্রোতধারা।

গুরুজী রামদাসকে বর দিয়াছিলেন, ঋদ্ধি-সিদ্ধি ছুই-ই তাঁহার করায়ত্ত হইবে। এবার সে বর ফলিয়া উঠিতে থাকে। কয়েক বৎসরের মধ্যেই রামদাসী রামাইং সম্প্রদায়কে মহারাষ্ট্রের নানা অঞ্চলে ছড়াইয়া পড়িতে দেখা যায়। মঠ-মন্দিরও নিশ্চিত হয় অজস্র সংখ্যায়। সহস্র সহস্র মারাঠীর দৃষ্টিতে রামদাস গণ্য হন রামজীর শ্রেষ্ঠ ভক্তরূপে, মহাবীর মারুতীজীর অবতার রূপে।

রামদাসের জীবনসাধনায় ভক্তি, জ্ঞান ও কর্ম এই তিনটির সমন্বয় লক্ষ্য করা যায়। অবতার পুরুষ রামচন্দ্রের উপাসনা ও অর্চনার কথা তিনি সারা জীবন ভরিয়া বলিয়া গিয়াছেন। আজো ঘোড়শোপচারে এই ইষ্টদেবের পূজা তাঁহার সম্প্রদায়ে প্রচলিত।

আবার প্রভু ৰামজাকেই তিনি স্থাপন কৰিয়াছেন পরম ব্রহ্মৰূপে । সে স্থলে দেখা যায়, অদ্বৈতবাদের তত্ত্বও তিনি নিষ্ঠাভৱে বিশ্লেষণ কৰিতেছেন । ৰামৰাজ্য অথবা ধৰ্ম্মৰাজ্য স্থাপনাৰ যে মহান ব্রত তিনি গ্রহণ কৰেন তাহাৰ মধ্য দিয়া ফুটিয়া উঠে ঐশী কৰ্ম্ম উদ্‌যাপনৰ আন্তৰিক প্ৰয়াস । তাঁহাৰ ৰচিত ভক্তিসঙ্গীত ও ধৰ্ম্মগ্ৰন্থগুলিও সেদিনকাৰ জনজীৱনে প্ৰবল উদ্দীপনাৰ সৃষ্টি কৰে ।

এই সময়ে মহাৰাষ্ট্ৰেৰ পঞ্চাৰপুৰকে কেন্দ্ৰ কৰিয়া ও ভক্তি-সাধনাৰ স্ৰোত প্ৰবাহিত হইতেছিল । জ্ঞানেশ্বৰ, একনাথ, নামদেব, প্ৰভৃতি মহাত্মাগণ ছিলেন এই ভক্তিধাৰাৰ উৎস । মহাৰাষ্ট্ৰেৰ প্ৰতি জনপদে ইহাদেৱ প্ৰভাব বৰ্ত্তমান ছিল, তাই ৰামদাসও এই প্ৰভাব হইতে মুক্ত থাকিতে পাৰেন নাই । তৰে তাঁহাৰ ভক্তিৰ আন্দোলন ছিল পঞ্চাৰপুৰ হইতে অনেকটা পৃথক । বিঠ্ঠলজী বা কৃষ্ণবিগ্ৰহ তাঁহাৰ ইষ্ট নয়, তাঁহাৰ ইষ্ট হইতেছেন ৰামচন্দ্ৰ । অবতায়ুৰূপী এই ৰামজীৱ পূজা ও তাঁহাৰ ধৰ্ম্মৰাজ্য প্ৰতিষ্ঠাৰ প্ৰয়াসই নিরন্তৰ তিনি কৰিয়া গিয়াছেন, আৰ ৰামজীৱ মধ্য দিয়াই সাধন জীৱনেৰ শেষে পৌঁছিতে চাহিয়াছেন সত্যম-শিবম-অদ্বৈতম-এ, —অদ্বৈতব্রহ্মাত্মজ্ঞানে ।

ৰামদাসেৰ গ্ৰন্থাদি হইতে দেখা যায়, বেদান্তেৰ অদ্বৈততত্ত্বেৰ উপৰ তাঁহাৰ একটা স্বাভাবিক প্ৰবণতা ছিল । মনে হয়, তাঁহাৰ ৰামাইংগুৰু ভক্তিবাদী হইয়াও অদ্বৈতবেদান্তে পাৱক্ৰম ছিলেন এবং তাঁহাৰ প্ৰভাব শিষ্য ৰামদাসেৰ উপৰ পাতত হয় । তখনকাৰ দিনে শৃঙ্গেৰী মঠেৰ বহু সাধক অদ্বৈতবেদান্তী হইয়াও ৰামচন্দ্ৰেৰ উপাসক ছিলেন । এমনও হইতে পাৰে, ইহাদেৱ কাহাৰো সহিত বিশেষ ঘনিষ্ঠতা হইবাৰ পৰ ৰামদাসেৰ মध्ये ৰামভক্তি ও অদ্বৈতবাদের এই সমন্বয় গড়িয়া উঠিয়াছিল । তাকেৰুলী ও ছাকলেৰ নিৰ্জন আবাসে থাকাকালৈ ৰামদাস দীৰ্ঘকাল গভীৰভাবে বেদান্ত, জ্ঞানেশ্বৰী-গীতা ও যোগ-বাশিষ্ঠ ৰামায়ণ অধ্যয়ন কৰেন । স্বভাবতই এই সব গ্ৰন্থেৰ

জ্ঞানমার্গীয় তত্ত্ব তাঁহার অধ্যাত্মজীবনে দৃঢ়রূপে প্রবিষ্ট হয় এবং উত্তর জীবনে তাঁহার ভক্তিবাদ অদ্বৈতবোধের দিকে ঝুঁকিয়া পড়ে।

অধ্যাত্ম-জীবনের উপাদান রামদাস যেখান হইতেই আহরণ করুন, নিজ মতবাদ ও তত্ত্বাদর্শকে তিনি যে একটি বিশিষ্ট রূপ দিতে সক্ষম হন, প্রধানতঃ তাঁহাকে কেন্দ্র করিয়াই যে এই রামভক্তিবাদের পরমতত্ত্ব বিকশিত হইয়া উঠে, তাহাতে সন্দেহের অবকাশ নাই।

দার্শনিক ব্যাখ্যা অথবা তত্ত্ববাদ সম্পর্কে রামদাস যাহাই বলুন বাবহারিক জীবনে, জনসাধারণের আচার্য্য ও উপদেষ্টারূপে তিনি রামভক্তি ও রাম উপাসনার উপরই বেশী জোর দিয়া গিয়াছেন। তাঁহার সম্প্রদায়ের মঠ মন্দিরে ভক্তি সাধনা, পূজা অর্চনা ও নাম-কীর্তনের প্রাধান্যই বেশী চোখে পড়ে। তাঁহার অজস্র ভক্তিগাথায় রহিয়াছে ইষ্টের কৃপাভিক্ষা, শরণাগতি ও অনুশোচনার আকুতি। করুণাষ্টকের একটি পদে সাধক কবি রামদাস প্রভুর চরণে সখেদে নিবেদন করিতেছেন :

হে রাম, নিতি নিতিই যে হৃদয় আমার  
যাচ্ছে জলে অনুতাপের দহনে।  
ঘোর চঞ্চল আমার এই মন,  
আমি পারছিনে তাকে বশে রাখতে।  
হে প্রভু, হে করুণাময়,  
ছিঁড়ে ফেলো আমার এই মায়ার বন্ধন,—  
যা সৃজন করে মরীচিকার মোহ।  
এসো, এসো, আমার হৃদয় কুটিরে,  
তোমা-হারা জীবনে এসেছে অবসাদের শূন্যতা,  
তোমার আরাধনা বিনা কেটেছে মোর দিন,  
বন্ধুজন আর বিস্ত্রবিভবের মাঝে  
নিজেকে হারিয়েছি ঈর্ষা আর স্বার্থাক্রতায়।

হে রঘুপতি, হে করুণাময়,  
 দাও আমায় তোমার মনের উদারতা,  
 যেন অক্লেশে বিলিয়ে দিতে পারি আমার সর্ব্বশ্ব—  
 একান্ত বিশ্বাসে নিতে পারি তোমার চরণে ঠাই।  
 ইন্দ্রিয়ের সেবায় কি করে পাবো পরমানন্দ ?  
 হে রঘুনাথ, তোমা বিনা  
 আমি যে হয়েছি রিক্ত, হতভাগ্য।  
 হে প্রভু তাই আশিস্ মাগি চরণে—  
 জীবন যেন মোর হয় ব্রহ্মময়।<sup>১</sup>

অপর একটি সংবেদনময় প্রার্থনায় রামদাস তাঁহার শরণাগতি  
 জানাইতেছেন :

হে প্রভু, কোটি কোটি জনম ধরে  
 হৃদয় আমার যাচ্ছে জলে-পুড়ে ছাই হয়ে  
 তাইতো হে কৃপালু রাম চাইছি তোমায়,  
 বস্ত্রার বিপুল প্লাবনে ছড়িয়ে পড়ো আমার বুকে  
 ছয়টা শত্রু ভেতর থেকে করছে প্রতিরোধ—  
 ভেঙ্গে চূরে দাও, ভাসিয়ে দাও তাদের।  
 হে রাম, তুমি বিনা কেই বা আছে আমার ?  
 কেই বা জানে আমার মর্ম্মভেদী হৃদশার কথা ?  
 হে রাঘব, শ্রান্ত ক্লান্ত আমি সাধন সমরে  
 এসো, এসো প্রভু করো আমায় পরিত্রাণ।

আবার প্রাপ্তির পরমানন্দে উচ্ছল হইয়া দাস রামদাস  
 একটি অভঙ্গপদে বলিতে শুনি :

হে দয়াল রঘুনাথ, হে আমার প্রভু,  
 কত পাপই যে করেছি এ জীবনে—  
 তার কোনটিই বা পায়নি তোমার ক্ষমা ?

১ উইলবার এল ডেমিং : রামদাস অ্যাণ্ড রামদাসীজ, পৃ: ৩২ ; ২০-২৫,

গুণরাশি তোমার খচিত রয়েছে  
 অসীম আকাশে সংখ্যাতীত নক্ষত্রের মত—  
 তার কোনটি রাখা যায় স্মৃতিপটে ?  
 কি করেই বা শুধ্বে তোমার অপার ঋণ ?  
 দিনের শরণ তুমি প্রভু, তুমি পরমাগতি—  
 আর এই পরিচয়ই যে তোমার আসল পরিচয় ।  
 সুখ দিয়েছো তুমি, পরম সুখও চাই তোমার কাছে,  
 এই কাঙালের যা কিছু আছে চাওয়া আর পাওয়া  
 সবই যে তোমার জানা ।  
 অন্তর যে আমার দিয়েছো দানে ভরে  
 হে প্রভু, হে রঘুনাথ, বলতো এ অভাগা—  
 কি দিয়ে শুধবে তোমার ঋণভার ?

রামদাসের প্রধান গ্রন্থ ‘দাসবোধ’ তাঁহার অনুগামীদের কাছে  
 গীতার মত নিত্য পাঠ্য । এই গ্রন্থে ও অগ্ণ্যান্ত রচনায় রামদাস  
 ভক্তিমার্গের সাধককে শ্রবণ, স্মরণ, অর্চনা প্রভৃতি নয় প্রকার  
 অনুষ্ঠানের উপদেশ দিয়াছেন । গুরুসেবা নামজপ ও নামকীর্তনের  
 উপর রামদাসকে সর্বাধিক গুরুত্ব আরোপ করিতে দেখা যায় ।  
 তাঁহার মতে ভক্তি মুক্তির মূলে রহিয়াছে সদগুরুর কৃপা । সদগুরুই  
 আপন শক্তিবলে শিষ্যের অধিকারকে পরিশুদ্ধ করেন, প্রস্তুত করেন

১ সমর্থ রামদাস স্বামী প্রধান রচনাগুলির নাম নিয়ে দেওয়া হইতেছে :

(১) দাসবোধ—১৭৫২ কবিতা সম্বলিত এই গ্রন্থটিকে রামদাসী সম্প্রদায়ের  
 লোকেরা সম্মান করিয়া বলে ‘গ্রন্থরাজ’ । (২) ত্রিগ্লোক মনাচে—মনকে  
 বশে রাখার উপদেশ এই পদগুলিতে নিহিত । সাধুরা ভিক্তা করার সময়  
 এগুলি গাহিয়া থাকেন । (৩) করুণাটকে—অনুশোচনা ও প্রার্থনায় ভরা  
 এই সমস্ত গ্লোক সাধ্যা ভজনের সময় গীত হয় । (৪) রামদাসের রামায়ণ  
 ( হৃদয়কাণ্ড, যুদ্ধকাণ্ড ও কিঙ্কিধ্যা কাণ্ড ) । (৫) শতক পঞ্চক ও ভূপালী  
 নামক প্রার্থনামূলক অভঙ্গপদ ।

তাঁহাকে ঈশ্বরপ্রাপ্তির জন্ত। তিনি বলেন, গুরু সেবার মধ্য দিয়া শিষ্যের অহমিকা যেমন ক্ষীণ হইয়া আসে তেমনি নামিয়া আসে গুরুকৃপার অমিয়ধারা।

নামজপ ও কীর্ত্তন সম্বন্ধে তাঁহার প্রসিদ্ধ রচনা শ্রীশ্লোক মনাচে-তে তিনি বলিয়াছেন :

হে মন, ভ্রাস্ত বুদ্ধিবশে এই নামকে করো না ত্যাগ,  
 অন্ধাভরে নিরস্তুর করো এর অমুখ্যান।  
 যা কিছু দেখছো এই প্রপঞ্চে,  
 সবই রয়েছে বিধৃত, প্রভুর নামের বলে।  
 কোন কিছুরই হয়না তুলনা এর সাথে।

আপন ইষ্টনাম, রামনামের মাহাত্ম্য বর্ণনা করিতে গিয়া ভক্ত সাধক রামদাস প্রেমভরে কহিতেছেন :

ভজন ও জপের নাম তো রয়েছে অনেক,  
 কিন্তু ভাই রামনামের তুল্য কোন্ নাম ?  
 হীন আর দুর্ভাগা যারা  
 কি করে জানবে তারা এই পরম বস্তুর মহিমা ?  
 বাসুকীর হলাহল পান করে  
 পার্বতীনাথ শঙ্কর জপেছিলেন এই মহানাম,  
 হয়েছিলেন তিনি মৃত্যুঞ্জয়—  
 তবে ছার মনুষ্য কেন করবেনা জপ  
 আমার প্রভুর এই অমৃতময় নাম ?

ভক্তি-মার্গীয় সাধনার প্রচারের সঙ্গে সঙ্গে বহুতর মঠ-মন্দিরের প্রতিষ্ঠা করেন রামদাস স্বামী। এইসব মঠকে তিনি পরিণত করেন তাঁহার ধর্মরাজ্যের এক একটি সুদৃঢ় ঘাটিকারে। ভক্তিদ্বারা প্রচার করিলেও রামদাস অতিরিক্ত ভাবোচ্কাসের প্রকাশ কখনো দেন নাই। রামচন্দ্রিত্বের সংঘম, সভ্যনিষ্ঠা ও জ্ঞানপরতাকে সত্তত তিনি



ভক্তদের নয়ন সমক্ষে তুলিয়া ধরিতেন। মঠ ও মন্দিরের মোহাস্ত বা পরিচালকদের করিতেন কঠোরভাবে নিয়ন্ত্রণ। একবার তাঁহার এক মঠের মোহাস্ত নীতিবিগর্হিত কোন কাজ করেন। রামদাস একজ্ঞ তাঁহার শাস্তিবিধান করেন—বেত্রাঘাত। অপর একজন মঠাধীশ উপযুক্ত প্রস্তুতির আগেই তাঁহার এক অনুগত ভক্তকে মজ্ঞ প্রদান করেন। দীক্ষার আগে কেন সতর্কতা অবলম্বন করা হয় নাই, এই দোষে রামদাস মঠাধীশকে কঠোরভাবে প্রহার করেন। কয়েকটি বিশিষ্ট কৌর্টনিয়া শিষ্যকে একবার তিনি দৃশ্চরিত্রা স্ত্রীলোকের সঙ্গ করিতে দেখিতে পান। কৌর্টনসভা হইতে ইহাদের তিনি তিন বৎসরের জ্ঞা বহিষ্কৃত করিয়া দেন। রামদাসের মঠ-মন্দিরের এই নীতিগত আদর্শবাদ ও নিয়মশৃঙ্খলা মারাঠার পুনর্গঠনে ও আত্মিক শক্তির উজ্জীবনে কম সাহায্য করে নাই।

আচার্য্য জীবনের শুরু হইতেই রামদাসের কাছে আশ্রয় গ্রহণ করেন একদল সং ও ধর্মনিষ্ঠ গুরুগতপ্রাণ শিষ্য। ইহাদের মধ্যে প্রথম সামিতে রহিয়াছেন—কল্যাণ, শ্রেষ্ঠ (রামদাসের ভ্রাতা), উদ্ধব গোসাবি, দিবাকর, বেনাবাঈ, আকাবাঈ প্রভৃতি।

শিষ্য কল্যাণ শুধু ত্যাগ তিতিক্ষা ও সাধনার দ্বারাই গুরুর অনুগ্রহলাভ করেন নাই, ডোমগাঁও মঠে রামদাসী সম্প্রদায়ের অন্ততম প্রধান মঠ স্থাপন করিয়া গুরুর আরব্ধ মহান কার্য্যকে তিনি অনেকাংশে সফল করিয়া তোলেন।

কল্যাণ ছিলেন রামদাসের সর্ব্বাপেক্ষা বিশ্বস্ত পরিকর। তাঁহার গুরুভক্তির একটি আখ্যায়িকা মহারাষ্ট্রে প্রচলিত আছে। রামদাস মাঝে মাঝে নানা অভিনব উপায়ে তাঁহার শিষ্য ও ভক্তদের ভক্তির দৃঢ়তা ও অনুগত্যের পরীক্ষা নিতেন।

একদিন শিষ্যদের তিনি নিকটে ডাকিলেন। হাতে একটি তরবারি নিয়া গভীর স্বরে কহিলেন, “জাখো, আজ থেকে কেউ আর আমার ভোরবেলার ধ্যানজপের পর যেন প্রণাম করিবে না। যে

করবে, আমি তার মস্তক ছেদন করবো। রামদাস কোন মানুষের সঙ্গই যেন সহ্য করিতে পারিতেছেন না। সকলেই মহা শঙ্কিত। স্বামীজী মহারাজকে তাঁহারা যতটা পারেন এড়াইয়া চলিতেছেন।

কয়েকদিন পরে রামদাস আশ্রম ত্যাগ করিলেন। পরনে মাত্র একখানি কোপীন, হাতে একটি তীক্ষ্ণ তরবারী। এই বেশে প্রবেশ করিলেন নিকটস্থ অরণ্যে। যাইবার সময়ে শাসাইয়া গেলেন, “সাবধান, কেউ যেন আমার এই নির্জনবাসের সময় আমার সামনে না যায়, আর আমার চরণ কেউ স্পর্শ না করে।”

আশ্রমিকরা তো ভয়ে জড়োসড়ো। কেহই তাঁহার সঙ্গ নিতে সাহসী হইলেন না। চারিদিকে সংবাদ রটিয়া গেল, স্বামী রামদাস পাগল হইয়া গিয়াছেন। একথা অচিরে স্বামীজীর শিষ্য ডোমগাঁও-এর মহাস্ত কল্যাণের কানে গেল। তৎক্ষণাৎ ব্যস্ত-সমস্ত হইয়া তিনি ছুটিয়া আসিলেন আশ্রমে। কহিলেন, “এ কেমনতরো কথা? স্বামীজী মহারাজ একলা অরণ্যে বাস করছেন, আর তোমরা কেউ তাঁর সঙ্গে গেলে না? আমরা থাকতে তাঁর সেবার ব্যবস্থা হবে না? বেশ, তোমরা না যাও আমি যাবো সেখানে।”

“কিন্তু ভাই, খোলা তলোয়ার নিয়ে স্বামীজী বনে বনে ঘুরে বেড়াচ্ছেন, কেউ প্রণাম করতে গেলেই নিশ্চয় হবে তার শিরশ্ছেদ।” আশ্রমের একজন সতর্ক করিয়া দেয়।

কল্যাণ উত্তরে বলেন, “বেশ তো, গুরু মহারাজের সেবায় এগিয়ে যদি তাঁর হাতে আমার প্রাণ যায়, তবে তা হবে আমার পরম সৌভাগ্য।”

আত্ম বলিদানের জন্য প্রস্তুত হইলেন কল্যাণ। রক্ত-চন্দন ললাটে লেপন করিলেন, মুখে গুঁজিয়া দিলেন পর্ণপত্র, তারপর গুরুর নিকট উপস্থিত হইলেন করজোড়ে।

রামদাস স্বামী প্রথমে রোষ-কষাণ্ডিত নেত্র, ক্রুদ্ধস্বরে বেশ খানিকটা তর্জন-গর্জন করিলেন, বার বার আন্দোলিত করিলেন

তাঁহার তরবারি। কল্যাণ কিন্তু নির্বিবকার। গুরু উদ্গাদই হোন আর যা-ই হোন, তিনি তাঁহার চরণে প্রণাম নিবেদন করিবেনই, তাঁহার সেবায় হইবেন তৎপর।

মূহূর্ত্তমধ্যে রামদাস মহারাজের ক্রোধের অভিনয় বন্ধ হয়। হাতের তলোয়ার দূরে নিক্ষেপ করিয়া পরম স্নেহে কল্যাণকে করেন আলিঙ্গন। ভাব-বিহ্বল কণ্ঠে কহেন, “বৎস, তোমার মত বীর, আত্মোৎসর্গে সদা প্রস্তুত শিষ্যই যে আমার চাই। তাছাড়া কি করে হবে প্রভু রামজীর ধর্মরাজ্য স্থাপন?”

নীলোপস্থ নামে রামদাসজীর এক গৃহী শিষ্য ছিলেন। একবার পরিব্রাজনের পথে ভক্ত সঙ্গে স্বামীজী তাঁহার গৃহে উপস্থিত হন। নীলোপস্থ তখন গ্রামের বাহিরে কি কাজে গিয়াছেন। তাঁহার পত্নী নিরুবাঙ্গি ব্যস্ত-সমস্ত হইয়া উঠিলেন। স্বামীজী ও তাঁহার সঙ্গীদের জন্য তাড়াতাড়ি কিছু ভোজনের ব্যবস্থা করা চাই। এ অঞ্চলে উপর্যুপরি কয়েকদিন ঝড়-জল হইয়া গিয়াছে, ঘরে আলানী কাঠ এক টুকরাও অবশিষ্ট নাই। অথচ স্বামীজী মহারাজকে বেনীক্ষণ ধরিয়া রাখা যাইবে না, এখনি গ্রামান্তরে যাইবার জন্যে তিনি তাড়া লাগাইতেছেন।

নিরুবাঙ্গির মাথায় আলানীর এক বিকল্প বাহির হইল। তৎক্ষণাৎ নিজের তোরঙ্গ খুলিয়া জামা কাপড় শাড়ী ও মূল্যবান শাল প্রভৃতি তুণীকৃত করিলেন, ঢুকাইয়া দিলেন উন্ননে। আলানীরূপে এগুলি ব্যবহার করিয়া পরমানন্দে প্রস্তুত করিলেন স্বামীজীর আহাৰ্য্য।

কিছুকাল পরেই নীলো পস্থ ঘরে ফিরিয়া আসেন। স্বামীজী মহারাজকে গৃহে পাইয়া তাঁহার আনন্দের আর সীমা নাই। বিদ্যার কালে স্বামী-স্ত্রী উভয়ে ভক্তিভরে গুরুর চরণে প্রণাম করিতেছেন, এমন সময় রামদাসজী প্রসন্ন কণ্ঠে কহিলেন, “নীলো পস্থ, তুমি জাগ্রাবান, এমন সাধ্বী স্ত্রী তোমার ঘরে রয়েছে। খোঁজ নিয়ে দেখাও, আমার আহাৰ্য্য তৈরী করতে গিয়ে মাতাজী নিরুবাঙ্গি তোমাদের

মূল্যবান পরিচ্ছদ সব আলিয়ে দিয়েছে। ভালোই করেছে, প্রপঞ্চের মায়া কিছু কেটেছে।”

নীলোপন্থ তো মহা খুশী। যুক্তকরে কহিলেন, “প্রভু, শত শত ভক্ত শিষ্য আপনার সেবার জন্য প্রাণপাত করছে। নিরুবাঙ্গি সে তুলনায় ভেমন কি আর করেছে? যাক্, যাবার আগে আপনি আমাদের আশীর্বাদ করুন। আপনার আশীর্বাদই যে হবে আমাদের পরম পাথের।”

ঝুলি হইতে রামদাসজী একটি ডাব তুলিয়া নিলেন, নীলোপন্থের হাতে এইটি দিয়া কহিলেন, “বৎস, নাও, এই রইলো আমার আশীর্বাদ। আমি জানি দীর্ঘদিন তোমরা অপুত্রক রয়েছো। আমার বরে মাতাজী নিরুবাঙ্গির কোল জুড়ে আসবে একটি শিশুপুত্র। প্রভু রামজীর প্রতি থাকবে তার অচলা ভক্তি।”

অতঃপর সঙ্গীগণ-সহ স্বামীজী মহারাজ ধীরে ধীরে সেখান হইতে নিজ্রাস্ত হইলেন। যথাকালে নিরুবাঙ্গি একটি পুত্র সন্তান লাভ করেন। উত্তরকালে এই পুত্র রামদাস মহারাজের কাছে দীক্ষা লাভ করিয়া ধন্ত হয়।

কল্যাণের গুরুভক্তির আর একটি কাহিনী প্রচলিত আছে। সেবার রামদাস মহারাজ স্থির করিলেন, কিছুদিনের জন্য নির্জনবাসে যাইবেন এবং একটি নিগূঢ় সাধনা সেখানে সমাপ্ত করিবেন। নদীর ওপারে রহিয়াছে এক দূর বিস্তারী অরণ্য, ইহারই এক কোণে পর্ণকুটির বাঁধিয়া স্বামীজী ধ্যানস্থ হইলেন।

কয়েকদিন পরেই ডোমগাঁও হইতে কল্যাণ সেখানে আসিয়া উপস্থিত। গুরুদেবের সঙ্কল্পের কথা শুনিয়া তিনি তো মহা চিস্তিত। বুঝিলেন, একান্তে সাধনভঞ্জন তাঁহার হয়তো ঠিকই চলিয়াছে, কিন্তু তাঁহার নিত্যকার আহাৰ্য্যের ব্যবস্থা কি? এজন্য নিশ্চয় তাঁহাকে কষ্ট পাইতে হইতেছে।

কল্যাণ স্থির করিলেন, এখন হইতে কিছুদিন একবার করিয়া

তিনি নদীর ওপারে স্বামীজীর ধ্যানকুটিরে যাইবেন, নিত্যকার খাবার দিয়া আসিবেন।

আগের দিন রাত্রে এ অঞ্চলে বর্ষার ঢল নামিয়াছিল। আশ্রমের সম্মুখস্থ ময়না নদী তাই ক্ষীতকায়া হইয়া উঠিয়াছে, শ্রোত বহিয়া চলিয়াছে খরবেগে। গুরুগতপ্রাণ কল্যাণ মোটেই দমিবার পাত্র নন। আহাৰ্য্যের পাত্র মাথায় বাঁধিয়া নিলেন। তারপর, জয় জয় রঘুবীর, জয় সমর্থ রামদাস স্বামী, বলিয়া বর্ষা-প্লাবিত নদীগর্ভে দিলেন ঝাঁপ। ওপারে গিয়া অনেক খোঁজাখুঁজির পর গুরুজীর সন্ধান পান, সম্মুখে দাঁড়াইয়া সমাপ্ত করান তাঁহার ভোজন। রামদাসজীর অরণ্যবাসের প্রতিটি দিন কল্যাণকে এই খরশ্রোতা বিপজ্জনক নদী সাঁতরাইয়া পার হইতে হয়।

হনুমন্ত স্বামীর রামদাস-চরিতে সমর্থ রামদাস স্বামীর বহুতর যোগবিভূতির বর্ণনা রহিয়াছে। ইহাদের একটি শিষ্য-প্রধান কল্যাণ সম্পর্কিত।

সেদিন গভীর রাত্রি অবধি স্বামীজী মহারাজ কতকগুলি অভ্যুপদ রচনা করিয়াছেন। শিষ্য-সেবকদের অনেকেই তখন নিদ্রায় অভিভূত। পান-সুপারী চর্কণের অভ্যাস তাঁহার বরাবরই ছিল। সেবকদের ডাকিয়া তুলিয়া কহিলেন, “গাখো তো কোঁটার তেতরে পান-সুপারী আছে কিনা। খানিকটা না চিবুতে পারলে ভালো লাগছে না।”

খুঁজিয়া দেখা গেল, কোঁটার সুপারী যথেষ্টই আছে কিন্তু পান একটিও নাই। “পান ছাড়া শুধু সুপারী কি ক’রে খাওয়া যায়—” এই বলিয়া রামদাস মহা হৈ-চৈ তুলিয়া দিলেন।

এত রাত্রে পাহাড়ে পান কোথায় পাওয়া যাইবে? যদি সংগ্রহ করিতেই হয়, নীচে নামিয়া গ্রামের অভ্যন্তরে যাইতে হইবে, যদি কোন গৃহস্থ বাড়ীতে সন্ধান মিলে। সেবকেরা সবাই এ উহার মুখ চাহিতেছেন, কিন্তু কল্যাণ তখনি উঠিয়া দাঁড়াইলেন। করজোড়ে

কহিলেন, “প্রভু আপনি কিছুকাল অপেক্ষা করুন। আমি নীচের গ্রাম থেকে এখনি কয়েকটি পান সংগ্রহ করে আনছি।”

একথা বলার সঙ্গে সঙ্গে অন্ধকার পাহাড়ী পথ দিয়া তিনি দ্রুত-পদে নীচে নামিতে লাগিলেন।

কয়েক মিনিট পরেই শোনা গেল কল্যাণের আর্ন্ত চীৎকার। একটি মিশ কালো কেউটে সাপের গায়ে পা দিতেই তৎক্ষণাৎ উহা তাহাকে ছোবল মারিয়াছে। রামদাস ও শিষ্য সেবকেরা মশাল নিয়া তখনি সেখানে ছুটিয়া গেলেন। সর্পদষ্ট কল্যাণ তখন ভূমিতে লুটাইয়া পড়িয়াছে। চোখে মুখে অসহ্য যন্ত্রণার ছাপ। মুখ দিয়া অবিরাম ফেন নির্গত হইতেছে।

রামদাস হাঁটু গাড়িয়া শিষ্যের সম্মুখে বসিয়া পড়েন। অশ্রুট স্বরে মন্ত্র উচ্চারণ করিয়া বার বার কল্যাণের দেহে করেন কর-সঞ্চালন, তারপর স্নেহপূর্ণ স্বরে বলিতে থাকেন, “বৎস কল্যাণ, এবার ওঠো—ওঠো।”

অল্পকাল মধ্যেই কল্যাণ চোখ মেলিয়া চান এবং ধীরে ধীরে উঠিয়া বসেন। বাহুজ্ঞান ফিরিয়া পাইয়া আবার উত্তত হন গুরু মহারাজের পান সংগ্রহের জন্ত।

সপ্রশংস দৃষ্টিতে শিষ্যের দিকে চাহিয়া গুরুজী বলেন, “বৎস, আর তোমায় কোথাও যেতে হবে না। এবার আশ্রমে ফিরে চল।”

পথ চলিতে চলিতে একটি তরুণ শিষ্য যুহুস্বরে মন্তব্য করেন, “এত গভীর রাতে, এভাবে একলা এমন করে চলে আসাটা কল্যাণের উচিত হয় নি।”

রামদাস স্বামী সহাস্তে উত্তর দেন, “জ্বাখো, যা ঘটেছে রামজীৱ কৃপাতেই ঘটেছে। আমরা নিমিত্ত মাত্র। রামজী আমায় ইঙ্গিত দিয়েছিলেন, কল্যাণের আয়ু আর নেই।”

“সেকি প্রভু, তা কেনেও আপনি এই অন্ধকারের ভেতর বনপথে ওকে যেতে দিলেন?” সবিস্ময়ে প্রশ্ন করেন এক সেবক।

“সর্পাঘাতে ওর জীবনান্ত হবার কথা। অথচ ঈশ্বরের কাছে ওকে অনেক কিছু করতে হবে। তাইতো পান-সুপারীর জন্তু চেষ্টা-মেচি করে ওকে পথে নামালাম। কালসাপ ওকে দংশন করবে তা আমি জানতাম। আমার কাছাকাছি থাকা কালে এই দুর্ঘটনা হয়ে ভালই হলো। রামজীর কৃপায় ওকে বাঁচাতে পারলাম।”

রামদাস স্বামীর অন্ততম জীবনীকার ভীমস্বামী শিরগাভ্কার একটি মনোরম আখ্যায়িকা বর্ণনা করিয়াছেন—

সেবার বারাণসীর এক প্রখ্যাত পণ্ডিত ঘুরিতে ঘুরিতে মহারাষ্ট্রে উপনীত হন। ইনি একজন প্রসিদ্ধ বিচার-মন্ত্ৰ, যেখানেই যান সোৎসাহে সাধুদের তর্কযুদ্ধে আহ্বান করেন। আত্মবিশ্বাস ইহার অত্যন্ত বেশী। সদাই গলদেশের উপবীতের সঙ্গে প্রকাশ্যে বুলানো থাকে একটি তীক্ষ্ণ ছুরিকা, দম্ভভরে এটি সবাইকে দেখাইয়া বলেন, “শাস্ত্র বিচারে যখন কেউ আমায় পরাস্ত করবে, তখনই তার সম্মুখে এই ছুরিকা দিয়ে নিজের হাতে আমি কেটে ফেলবো আমার জিহ্বা।”

মহারাষ্ট্রে লোকের ঘরে ঘরে তখন রামদাস স্বামীর ‘দাসবোধ’ পঠিত হয়, স্বামীজীর বিজ্ঞাবত্তা ও সাধন-বিভূতির প্রসিদ্ধিও নবাগত পণ্ডিতটি শুনিয়াছেন। একদিন তিনি সদলবলে ছাকলে আসিয়া উপস্থিত। সংবাদ দিলেন, স্বামীজীর সহিত অবিলম্বে তিনি তর্কতর্ক অবতীর্ণ হইতে চান।

রামদাস ব্যস্ত-সমস্ত হইয়া শিষ্যদের कहিলেন, “যাও, যাও, এখনি তোমরা ঐ মহাত্মাকে সসম্মানে আশ্রমে নিয়ে এসো। মশাল আর বাত্ৰভাণ্ড সঙ্গে নিতে ভুলো না। বারাণসীর এমন কৃতী পণ্ডিত! দেখো, কোন দিক দিয়ে যেন তাঁর অমর্যাদা না হয়?”

সাড়ঘরে শোভাযাত্রা করিয়া বারাণসীর তর্কশূরকে আশ্রমে

আনয়ন করা হয়। রামদাস স্বামী স্বয়ং অগ্রসর হইয়া তাঁহাকে অভ্যর্থনা ও অভিবাদন জ্ঞাপন করেন। কিন্তু স্বামীজীর অভিবাদনের দিকে পণ্ডিতের কোন লক্ষ্যই নাই। দর্পভরে কহেন, “আমার সময় অতি মূল্যবান। আর বিলম্ব না করে, আপনি আমার প্রশ্নগুলির উত্তর দিন, অবশ্য যদি সমর্থ হন।”

রামদাস সহাস্তে কহিলেন, “বিজ্ঞা মানেই সেই পরমবস্তু যা হৃদয় কন্দরকে আলোকিত করে। তবে শাস্ত্রপারঙ্গম হয়েও আপনি এমন অন্ধকারে ডুবে রয়েছেন কেন, বলুন তো?”

রোষে পণ্ডিতের ছই চোখ জ্বলিয়া উঠে, ছঙ্কার দিয়া বলেন, “বটে, এতো ঔদ্ধত্য তোমার? এখানে কার সম্মুখে দাঁড়িয়ে তুমি কথা বলছো, জানো?”

“খুব জানা আছে, পণ্ডিতবর। এবার একটু অনুগ্রহ করে আপনি আপনার শাস্ত্রতত্ত্বের প্রশ্ন উত্থাপন করুন, যথাযথ সব উত্তর এখনি পাবেন।” সবিনয়ে নিবেদন করেন রামদাস।

ক্রুদ্ধ উত্তেজিত পণ্ডিত তাঁহার প্রশ্নবাণ নিক্ষেপ করিলেন। সঙ্গে সঙ্গে স্বামী রামদাস প্রদর্শন করিলেন তাঁহার এক যোগবিভূতি। বহুলোক তাঁহাদের সম্মুখে ভীড় করিয়া আছে। এই ভীড়ের ভিতর হইতে একটি নিম্নশ্রেণীর অর্দ্ধশিক্ষিত মানুষকে রামদাস কাছে ডাকিলেন। কিছুক্ষণ একদৃষ্টে তাহার দিকে দৃষ্টি নিবদ্ধ রাখিয়া তাহার মধ্যে করিলেন শক্তি সঞ্চালন। এবার দৃঢ় কণ্ঠে দিলেন নির্দেশ, “বৎস, পণ্ডিতজীর সব ক’টা শাস্ত্রীয় প্রশ্নের যথাযথ উত্তর তুমি দিয়ে দাও।”

সর্বসমক্ষে ঘটিতে দেখা যায় এক অবিদ্বান্স কাণ্ড। অর্দ্ধশিক্ষিত লোকটির মুখ দিয়া অবিরলধারে নিঃসৃত হইতে থাকে শাস্ত্রের নানা হরুহ তত্ত্বের ব্যাখ্যা-বিশ্লেষণ। বারাণসীর পণ্ডিত মহারাজ তো বিস্ময়ে হতবাক। ইতিমধ্যে তিনি বুঝিয়া নিয়াছেন, রামদাস এক সিদ্ধ মহাত্মা। অলৌকিক প্রজ্ঞা ও অলৌকিক শক্তির তিনি



অধিকারী। এ হেন ব্যক্তির সমক্ষে বিস্তার দস্ত প্রকাশ করিয়া পণ্ডিত মারাত্মক ভুল করিয়াছেন।

রামদাসের চরণে পতিত হইয়া বার বার তিনি ক্ষমা ভিক্ষা মাগিতে থাকেন। নিজের জিহ্বা কর্তনের জন্তও উত্তত হন।

উপবীতে ঝুলানো ছুরিকাটি তৎক্ষণাৎ দূরে নিক্ষেপ করিয়া রামদাসজী পণ্ডিতকে কহিলেন, “আপনাকে অনেক আগেই আমি ক্ষমা করেছি পণ্ডিতবর। মনে রাখবেন, আপনার জিহ্বা, আপনার দেহ, সবই রামজীর। ছেদন করতে হয় তিনি করবেন। আপনার দেহ-মন-আত্মা কোন কিছুই ওপরই তো আপনার অধিকার নেই। ভালোই হলো, আপনার দর্প এবার ভূমিসাৎ হলো, এবার সত্যকার বিভা এলো আপনার আধারে।”

এই পণ্ডিত অতঃপর দীনভাবে রামদাসের শিষ্যত্ব গ্রহণ করেন। বারাণসীতে ফিরিবার সময় সাগ্রহে রামদাসের রচনা দাসবোধের একটি প্রতিলিপি তিনি সঙ্গে নিয়া যান।

সিদ্ধপুরুষ বলিয়া রামদাসের তখন খ্যাতি রটিয়াছে, একটি সুসম্বন্ধ ভক্তিবাদী সম্প্রদায়ের নেতা রূপেও মহারাষ্ট্রে তাঁহার বিরটি মর্যাদা। এই সময়ে এক শুভলগ্নে রামদাসের সহিত মিলন ঘটে রাজা শিবাজী ভৌসলের। এই মিলন যেন মণিকাঞ্চনের সংযোগ। রামরাজ্য, ধর্মরাজ্য, স্থাপনের যে স্বপ্ন রামদাস এতদিন দেখিয়া আসিতেছেন, যে স্বপ্নকে রূপায়িত করার জন্ত জীবন উৎসর্গ করিয়াছেন, রাজা শিবাজী হন সেই মহান ঐশী কন্ঠের ধারক ও বাহক। এই ছইয়ের মিলনে সারা মারাঠায় প্রবাহিত হয় আত্মিক শক্তি ও ক্ষাত্রশক্তির যুগ্মধারা। সারা ভারতেও ইহার ফল হয় সুদূরপ্রসারী। এক ও অখণ্ড ধর্মরাজ্যের পরম সম্ভাবনার আশা ছড়াইয়া পড়ে দেশের দিকে দিকে।

শিবাজীর অভ্যুদয়ের দিকে স্বামী রামদাস নিয়ত তাঁহার দৃষ্টি নিবদ্ধ রাখিয়াছেন। লক্ষ্য করিয়াছেন ঔরংজেবের নগণ্য ‘পার্বত্য মুখিক’ শিবাজী ভৌসলে ধীরে ধীরে গড়িয়া তুলিয়াছেন একটা দৃঢ় মূল স্বাধীন রাজ্যের বনিয়াদ। শুধু তাই নয় এই রাজ্য যাহাতে ধর্ম্মকৃত হয়, উচ্চাদর্শে অনুপ্রাণিত হয় সেজন্য তাঁহার ব্যাকুলতার সীমা নাই। অন্তরে অন্তরে রামদাস বুঝিয়া নিয়াছেন, শিবাজীকে তাঁহার সাহায্য নিতেই হইবে। তাঁহার কাছে আসিতেই হইবে। কিন্তু এখনই নয়, আরো কিছুকাল রামদাসকে অপেক্ষা করিতে হইবে, লগ্ন সমাগত হইলেই শিবাজী আকুল আগ্রহ নিয়া ছুটিয়া আসিবেন, গ্রহণ করিবেন রামদাসের পরমাশ্রয়।

সৈন্তবল ও রাজ্যপরিধির বিস্তারের সঙ্গে সঙ্গে শিবাজী ভৌসলের অন্তরেও জাগিয়াছে পরম কল্যাণের ভাবনা, আত্মিক উজ্জীবনের জন্ত তিনি ব্যগ্র হইয়া উঠিয়াছেন। যখন যে সাধু মহাত্মার সন্ধান পান, সাগ্রহে তাঁহাকে দর্শন করেন, সাধ্যমত করেন সেবা পরিচর্যা। সাধারণ সাধু-সন্ন্যাসী হইতে শুরু করিয়া পদ্ধারপুরের সাধু তুকারামজীর সঙ্গে, কোন কিছুই শিবাজী বাদ দেন নাই। কিন্তু মনের মাহুঘের সন্ধান, চিহ্নিত সঙ্গুরুর সন্ধান এখনও তিনি পান নাই।

রামদাস স্বামীর আদর্শ ও সংগঠনের নানা সংবাদ শিবাজী রাখেন, তাঁহার মহাত্ম্য ও যোগৈশ্বর্যের খ্যাতিও তাঁহার অজানা নয়। এই মহাপুরুষের আশ্রয় গ্রহণের জন্ত অন্তর তাঁহার বড় ব্যাকুল হইয়া পড়িয়াছে। রামদাস তখন কোন মঠেই স্থায়ীভাবে বাস করিতেন না। স্বেচ্ছামত ঘুরিয়া বেড়াইতেন। তাই কিভাবে কোথায় মহাত্মার দর্শন করা যায় শিবাজী মাঝে মাঝে ভাবিতেছিলেন।

নরসোমল্ নাথ নামে শিবাজীর এক কর্মচারী সেবার খবর দেন, স্বামীজী এখন ছাকলের মঠে অবস্থান করিতেছেন। কয়েকজন পার্শ্বরক্ষী নিয়া শিবাজী তখন সেখানে ছুটিয়া যান। কিন্তু সাক্ষাৎ

হইল না। শুনিলেন, রামদাস স্বামী তখন সে স্থান ত্যাগ করিয়া অন্ত্র চলিয়া গিয়াছেন।

ছাফলের মঠটি ছোট হইলেও বড় মনোরম। শিবাজী সাধুদের জিজ্ঞাসা করিলেন, কিভাবে কাহার আনুকূল্যে, এই সুন্দর মঠটি নিৰ্ম্মিত হইয়াছে।

সাধুরা সবিস্ময়ে কহেন, “সে কি মহারাজ, আপনি কি জানেন না, এটি যে আপনার প্রদত্ত অর্থেই তৈরী হয়েছে। কয়েক বৎসর আগে পুনাত্তে, আপনার পুরোহিতের ভবনে গিরি গোসাবি নাসিখর নামে এক কীর্ত্তনিয়া রামলীলা কীর্ত্তন করছিলেন। কীর্ত্তন শুনে খুলী হয়ে আপনি তাঁকে কিছু অর্থ দান করতে চান। ঐ কীর্ত্তনিয়া রামদাস মহারাজের একজন পরম ভক্ত। তিনি অনুরোধ জানান—মহারাজের প্রতিক্রান্ত অর্থ যেন রামদাস স্বামীজীকেই দেওয়া হয় ছাফলের রামমন্দির নিৰ্ম্মাণের জন্ত। এটিই তো সেই মন্দির। আপনার সরকার থেকে তিন শত স্বর্ণমুদ্রা দেওয়া হয়েছিল এই পবিত্র কাজের জন্ত।”

এ সংবাদে শিবাজী হুঁট হইলেন। মন্দিরের চারপাশে ঘুরিয়া দেখিলেন, নদীর খরশ্রোত উহার ভিত্তির দিকে অগ্রসর হইতে চাহিতেছে। সরকারী অধিকর্ত্তাকে ডাকিয়া তখন তিনি হুকুম দিলেন, “যে কোন উপায়ে এই নদীর শ্রোত-ধারাকে ঘুরিয়ে দাও, স্বামীজীর এই মন্দিরকে রক্ষা করো। এ জন্ত যে কোন অর্থব্যয়ে কার্পণ্য করো না।”

নির্দেশমত কার্য্য সম্পন্ন হইতে বিলম্ব হয় নাই। ফলে ছাফলের ঐ মন্দির ধ্বংসের হাত হইতে রেহাই পায়।

রামদাস স্বামীর কাছে শিবাজীর সব সংবাদই যথাসময়ে পৌঁছিল, ইহার কিছুদিন পরে শিবাজী মাছলীতে একটি ধর্ম্মানুষ্ঠানে

যোগ দিতে গিয়াছেন, সেখানে এক শুভ মুহূর্তে তাঁহার হাতে আসিল রামদাস স্বামীর এক ক্ষুদ্র লিপি। এ লিপি পাইয়া রাজা মহা উৎফুল্ল হইয়া উঠেন, সঙ্গে সঙ্গে মহাত্মাকে উত্তর দেন :

“হে মহাতাপস, আমি আপনার চরণে অপরাধী। আপনার হৃদয়ে রয়েছে অসীম করুণা—আপনার আশিস্পূত লিপি আমায় ভরপুর করে দিয়েছে পরম আনন্দে। কি ভাষায় আমি তার বর্ণনা দেব ? আপনি কৃপা করে আমার গুণগান করেছেন, কিন্তু আমি জানি আমি মোটেই তার উপযুক্ত নই। বহুদিন যাবৎ আপনার দর্শনের অভिलाবী রয়েছে, এবং সন্যোগ পেলে এখনই আমি উপস্থিত হতে পারি আপনার সকাশে। হে প্রভু, আপনি কি আমায় গ্রহণ করবেন ? আমার তৃষ্ণা কি করবেন দূর ?”

এই পত্র পাঠাইয়া দিয়া পরদিনই শিবাজী তাঁহার রক্ষীদল নিয়া উপনীত হন ছাফলে। সেখানে গিয়া শুনিতে পান, রামদাস মহারাজ তখন সিংগন-বাড়ীতে অবস্থান করিতেছেন। মঠের সাধুরা তাঁহাকে বলেন, “মহারাজ, এই সময়ে স্বামীজীর কাছে আপনার যাওয়া ঠিক হবে না। কারণ, এখন তিনি হুম্মানজীর মন্দিরে একটি বিশেষ পূজা অনুষ্ঠানে ব্যস্ত। পূজা অর্চনা সমাধা করে স্বামীজী মহারাজ নিজের হাতে বহুতর ভোগরাগ প্রস্তুত করবেন। তারপর মারুতীজীকে তা নিবেদন করে দিনশেষে বসবেন প্রসাদ গ্রহণের জন্য। আপনি বরং পরে আর কোনদিন তাঁর সঙ্গে সাক্ষাৎ করুন।”

শিবাজী একথা মানিলেন না। কহিলেন, “হৃদয় বড় ব্যাকুল হয়ে পড়েছে, আর ধৈর্য ধারণ করা আমার পক্ষে সম্ভব নয়। তাছাড়া, আজ তো বৃহস্পতিবার—গুরুবার, এই শুভদিনেই স্বামীজীকে আমি দর্শন করবো।”

রক্ষীদল পশ্চাতে রাখিয়া তাড়াতাড়ি তিনি অগ্রসর হন। দুইজন সঙ্গী নিয়া সিংগন-বাড়ীর মঠে উপস্থিত হন, লুটাইয়া পড়েন রামদাসজীর চরণতলে।

রামদাস স্বামীর হস্তে তখনো ধৃত রহিয়াছে শিবাজীর সত্তাপ্রাপ্ত লিপি। প্রসন্ন মধুর কণ্ঠে কহিলেন, “রাজা, আপনি আসবেন তা আমি জানতাম। কিন্তু জিজ্ঞেস করি, সাক্ষাতের জন্য আপনি এত ব্যগ্র, কিন্তু আরো আগে কেন আপনার সঙ্গে দেখা হয়নি?”

“হুঁভাগা আমি, তাই অভিলাষ থাকলেও এতদিন বঞ্চিত ছিলাম আপনার দর্শনে। প্রভু, এ অনিচ্ছাকৃত ক্রটির জন্য আমায় আপনি মার্জনা করুন। এখন দর্শন যখন মিলেছে, আর আমায় দূরে সরিয়ে রাখবেন না। অবিলম্বে দীক্ষা দিয়ে আমায় উদ্ধার করুন।”

শাস্ত্রীয় বিধান মত দীক্ষা অনুষ্ঠান সম্পন্ন হইয়া গেল। চৈতন্যময় মন্ত্র গ্রহণের পর গুরু মহারাজের কাছে শিবাজী চিরতরে আত্মসমর্পণ করিলেন। ১৬৪৯ খৃষ্টাব্দের এই শুভদিন, রামদাস ও শিবাজীর মিলনের দিন, মহারাষ্ট্রের ধর্ম-সংস্কৃতির ইতিহাসে স্মরণীয় হইয়া আছে।

গুরুর ধর্মরাজ্য স্থাপনের পরিকল্পনায় শিবাজীর অবদান যথেষ্ট। এই পরিকল্পনার পিছনে স্বামী রামদাস জোগাইয়াছেন অধ্যাত্মশক্তি, আর শিবাজী উৎসর্গ করিয়াছেন তাঁহার ক্ষাত্রতেজ ও অর্থবল। শিশ্য গ্রহণের পর হইতে শিবাজী তাঁহার রাজ্য কোষাগার উন্মুক্ত করেন নব নব মঠ-মন্দিরের প্রতিষ্ঠায়। বড় বড় জায়গীর দিয়া এই ধর্মকেন্দ্রগুলিকে দৃঢ় ভিত্তিতে স্থাপন করিতে তিনি সাহায্য করেন। গুরু ও শিষ্যের এই মহান যৌথ প্রয়াস সারা ভারতের রাষ্ট্রচিন্তা ও ধর্মাদর্শের সম্মুখে সেদিন উন্মোচন করে এক নূতন দিগন্ত, সহস্র সহস্র ধর্মপ্রাণ আদর্শবাদী মানুষের বুকে জাগাইয়া তোলে বিরাট প্রত্যাশার আলো।

রামদাস স্বামী একদিন শিবাজীকে নিম্নে ডাকিয়া কহেন, “শিবাজী, গুরুত্বপূর্ণ একটা কাজ তুমি অসম্পূর্ণ রেখেছো, এবার সেটা শেষ করতে হবে।”

“কি সে কাজ, প্রভু, আদেশ করুন, সর্বশক্তি দিয়ে আমি তা পালন করবো।”—যুক্তকরে নিবেদন করেন শিবাজী।

“তোমার রাজ্যাভিষেক তো এখনো হয় নি। শাস্ত্রীয় বিধান অনুযায়ী এ অনুষ্ঠান সম্পন্ন করতে হবে। ধর্মরাজ্যের অধীশ্বর তুমি। শুধু মারাঠাই নয় সারা ভারতভূমি আজ তোমার মুখের দিকে তাকিয়ে আছে। তোমার এই শাসনকে শাস্ত্রীয় সমর্থনের ভিত্তিতে আমি দাঁড় করাতে চাই। তোমার শক্তি সত্যকার ক্ষাত্রশক্তি বলে গণ্য হোক, তাও আমি চাই। ভারতের শ্রেষ্ঠ শাস্ত্রবিদ ব্রাহ্মণ, সাধু-মহাত্মা, সমাজনেতা ও জনগণের সমক্ষে—প্রাচীন ভারতীয় প্রথায়—তোমার অভিষেক হোক। পবিত্র যজ্ঞ হোম সম্পন্ন হোক। অবিলম্বে এর উদ্বোধন আয়োজন করো।”

গুরুর আদেশ শিরোধার্য করিয়া শিবাজী ভেঁসলে অচিরে এ কাজে ব্রতী হন। কাশীধামে তখন অশেষ শাস্ত্রবিদ্ গাঙ্গা ভট্টের প্রবল প্রতাপ। বেদের কর্মকাণ্ড ও জ্ঞানকাণ্ড দুইয়েতেই তিনি পারঙ্গম। তাঁহাকেই অভিষেক ক্রিয়ার প্রধান আচার্য্য রূপে মনোনীত করা হইল। ভারতের সর্বত্র ধর্মসংস্কৃতি ও সমাজের নেতাদের কাছে প্রেরিত হইল আমন্ত্রণ পত্র। সাড়ুস্বরে ও শাস্ত্রোক্ত বিধান অনুযায়ী শিবাজী মহারাজের অভিষেক উৎসব সুসম্পন্ন হইল।

কাজকর্ম শেষ হইয়া গিয়াছে, পণ্ডিতবর গাঙ্গা ভট্ট আগামী এক সপ্তাহের ভিতর বারাণসীর দিকে রওনা হইবেন। হঠাৎ একদিন ভট্টজী দেখেন, প্রভুাবে উঠিয়া শিবাজী ভক্তিভরে সর্বপ্রথমে মারাঠী ভাষায় লিখিত এক ধর্মগ্রন্থ পাঠ করিতেছেন।

“মহারাজ, এই মারাঠী পুঁথি কি রোজই আপনি এ সময়ে পাঠ করেন ?”—প্রশ্ন করেন ভট্টজী।

“হ্যাঁ, পণ্ডিতবর, এটি যে আমার প্রাত্যহিক কাজ এবং প্রধান কৃত্য।

“কি নাম এ গ্রন্থের ? কার রচিত ? কোন্ তত্ত্ব আছে এতে, খুলে বলুন তো ?”

“এ গ্রন্থ মারাঠীতে লেখা, নাম দাসবোধ, মহাত্মা রামদাস স্বামী, আমার গুরু মহারাজ এর রচয়িতা।”

“এ বড় অদ্ভুত কথা মহারাজ। আপনার মত বিচক্ষণ, শাস্ত্র-প্রেমিক ব্যক্তির একি রুচিহীনতা ? আপনার পক্ষে এ গ্রন্থপাঠ তো মোটেই শোভন নয়। বৈদিক ভাষা, সংস্কৃত ভাষা, তাই তো হবে আপনার আমার উপজীব্য। বেদ-বেদান্ত উপনিষদ সব কিছু ছেড়ে, শেষটায় আপনি মারাঠী দাসবোধ নিয়ে মেতে উঠলেন ? ছিঃ।”

মহারাজ শিবাজী সবিনয়ে উত্তর দেন, “পণ্ডিতবর, এ পুঁথি মারাঠীতে লেখা হলেও, আমাদের প্রাচীন শাস্ত্র থেকেই এর তত্ত্ব সঙ্কলিত হয়েছে। আমি মনে করি—প্রজ্ঞাবান্, যোগসিদ্ধ মহা-পুরুষের রচিত এ গ্রন্থ সব মানুষেরই কল্যাণ-সাধনে সক্ষম। তাই এটা আমার নিত্য পাঠ্য।”

গাগা ভট্ট শিবাজীর কথা দেখিয়া প্লেষাত্মক হাসি হাসিলেন। এ প্রসঙ্গ নিয়া আর ঘাঁটাঘাঁটি করিলেন না।

শিবাজী কিন্তু ভট্টজীর কথাগুলি বিস্মৃত হইলেন না। মনে মনে স্থির করিলেন, পণ্ডিতবরকে অচিরে সমুচিত শিক্ষা দিয়া তবে মহারাষ্ট্র হইতে ছাড়া হইবে।

দুই দিন পরেই রাজপ্রাসাদের চত্বরে স্বামী রামদাসের এক ধর্মসভার অনুষ্ঠান বসিল। এই সভায় প্রধান অঙ্ক—দাসবোধের ব্যাখ্যা ও রামলীলা কীর্তন। গাগা ভট্ট এবং অন্যান্য বড় পণ্ডিতদেরও এই সভায় নিমন্ত্রণ করা হইল।

সভা শুরু হইয়াছে। ইষ্টনাম ও ইষ্টলীলা গাহিতে গাহিতে স্বামী রামদাস দিব্যভাবে উদ্দীপিত হইয়া উঠিলেন। কখনো তিনি হাসিতেছেন, কখনো বা কাঁদিতেছেন—এ যেন মহাত্মার উৎসারক এক অনির্বচনীয় অবস্থা। অগণিত শ্রোতা ও মর্শনার্থী এই কৌশলবজ্জ

সর্বব্যাপী মহাপুরুষের দিকে নির্নিমেষে চাহিয়া আছে। তাঁহার ভাব-রসের উত্তাল তরঙ্গ ছলিতেছে, উঠিতেছে, নামিতেছে। রামদাসের এই লীলা বর্ণনা যেন জীবন্ত। ভাববিহ্বল শ্রোতাদের নয়ন সম্মুখে রাম, সীতা, লক্ষ্মণ, ভরত আর মারুতী এক একটি মূর্তি যেন ভাস্বর হইয়া ফুটিয়া উঠিতেছে। ভাব ও তত্ত্বের মিশ্রণে রচিত হইয়াছে দিব্যালোকের অপরূপ পরিমণ্ডল।

গাঙ্গা ভট্ট অনিমেঘ নয়নে এই ভাবময় ইন্দ্রজালের দিকে তাকাইয়া আছেন, আর হৃদয়ের অন্তস্তল হইতে উদ্গত হইতেছে এক ছনিবার আকৃতি। কোনমতে পণ্ডিত ধৈর্য ধরিয়া রহিলেন। তারপর সভার অন্তে আবেগভরে দুই হাতে জড়াইয়া ধরিলেন স্বামী রামদাসকে। গদগদ কণ্ঠে কহিলেন, “স্বামীজী, আমি আপনার কাছে মার্জনা ভিক্ষা চাই।”

“পণ্ডিতবর, না-না, এসব কথা বলে আমার পাপের পঙ্কে ডোবাবেন না।” বিনয়নম্র বচনে বলেন স্বামী রামদাস।

“না স্বামীজী, আমি সত্যই অপরাধী। আপনি যে কত বড় জ্ঞানী, কত বড় প্রেমিক পুরুষ, তা আমি বুঝতে পারি নি। আপনার মূল্য বুঝতে আমি ভুল করেছিলাম, আজ এই সভায় আপনার সত্যকার রূপ আমি চিন্তে পেরেছি।”

বারাণসীতে কিরিয়া গিয়াও স্বামী রামদাসের দিব্যোজ্জ্বল স্মৃতি গাঙ্গা ভট্ট দীর্ঘদিন ভুলিতে পারেন নাই। এই মারাঠী সাধকের প্রতি তাঁহার শ্রদ্ধা চিরদিন অটুট ছিল।

রামদাস স্বামীর অন্ততম জীবনীকার ভীমস্বামী সিরগাভকার স্বামীজীর বোগবিভূতির এক অত্যন্তর্য্য কাহিনী বর্ণনা করিয়াছেন। কয়েকটি শিশুসহ স্বামীজী তখন গ্রাম হইতে গ্রামান্তরে পরিভ্রমণ করিতেছিলেন। সেদিন একটি গ্রামের উপান্তে তাঁহার বিশ্রাম



করিতেছেন। পাশেই রহিয়াছে একটি শ্মশান। হঠাৎ এক সত্ত্ব বিধবার আর্ত কান্না ও চীৎকার স্বামীজীর কানে গেল। বড় মর্মভেদী এই কান্না। তাড়াতাড়ি শিষ্যদের নিয়া তিনি শ্মশানে ছুটিয়া যান। গিয়া দেখেন স্থানটি লোকে লোকারণ্য—গ্রামের পাটেল মারা গিয়াছে। এইমাত্র মৃতদেহ সেখানে আনা হইয়াছে। পাটেলের স্ত্রীর ললাট সিন্দূরলিপ্ত, পরিধানে লালপেড়ে একটি নূতন শাড়ী, সতীরূপে স্বামীর সহমরণে যাইতে তিনি প্রস্তুত। শাস্ত্রীয় অমুষ্ঠান শেষে চিতায় আরোহণ করিতে যাইবেন, এমন সময় সত্ত্ব বিধবা কান্নায় ভাজিয়া পড়েন, স্বামীর মৃতদেহটি জড়াইয়া ধরিয়া বিলাপ করিতে থাকেন।

বড় মর্মস্তুদ এই দৃশ্য। অসহায়া বিধবার ক্রন্দনে রামদাস স্বামীর হৃদয় বিগলিত হইল, মুহূর্ত্তে প্রকাশিত হইল করুণাঘন রূপ। অগ্রসর হইয়া কহিলেন, “মাঈ, তুমি শাস্ত হও। ত্য নেই, রামজীর কুপায় তোমার স্বামী আবার তাঁর প্রাণ ফিরে পাবেন।”

শবের পাশে কিছুক্ষণ ধ্যান-নিমীলিত নেত্রে রামদাস উপবিষ্ট থাকিলেন, তারপর কমণ্ডলু হইতে ছিটাইয়া দিলেন এক অঞ্জলি পবিত্র বারি। সঙ্গে সঙ্গেই দেখা গেল এক রোমাঞ্চকর দৃশ্য। মৃত পাটেল ধীরে ধীরে চোখ মেলিলেন।

জনতা তখন আনন্দে উৎফুল্ল হইয়া স্বামী রামদাসকে ঘিরিয়া ধরিয়াছে। আর স্বামীজীর শিষ্যগণ বার বার উচ্চারণ করিতেছে জয়ধ্বনি—জয় জয় সমর্থ রঘুবীর—জয় জয় সমর্থ রামদাস।

পাটেলের স্ত্রী এবার স্বামীজীর পা'ত্ৰটি জড়াইয়া ধরেন। সজল চক্ষে মিনতি করেন, “প্রভু, দয়া যদি একবার করেছেনই, তবে এই দাসীর উদ্ধারও আপনাকেই করতে হবে। আমার স্বামী আর আমাকে আপনি দীক্ষা দিন। আপনার পরমাঞ্জয়ে থেকে রামজীর নামজপ করে বাকী দিন ক'টা কাটিয়ে দিই।”

রামদাস প্রশান্ত স্বরে কহেন, “কিন্তু মা, আমি তো প্রস্তুতি ছাড়া

কাউকে দীক্ষা দিইনে। আমার পা ছাড়ো, শান্ত হয়ে উঠে বসো। জরুরী কাজ আছে আমার, এখনি আমায় যেতে হবে।”

“প্রভু, প্রস্তুতি কাকে বলে আমি জানিনে। কিন্তু আমার অন্তরাখ্যা কেবলি ডেকে বলছে, আপনিই আমার উদ্ধারকর্তা। বেশ, আপনি চলে যাচ্ছেন যান। আমি বাধা দেবো না। কিন্তু জানিয়ে রাখছি, আজ থেকে আমি আমরণ উপবাস ব্রত গ্রহণ করলাম। যে ক’টা দিন বাঁচি, কাটাবো প্রভু রামজীর ধ্যানে। আমি যদি সত্যকার সতী হই, আপনাকে আমায় উদ্ধার করতে আবার আসতেই হবে।”

রামদাস স্বামী অতঃপর কাধ্যাস্তরে চলিয়া যান। কিন্তু ভক্তি-মতী পাটেলের জ্বর সঙ্কল্প আবার তাঁহাকে এই গ্রামে টানিয়া আনে। একমাস পরে এখানে আসিয়া পাটেল ও তাহার স্ত্রীকে তিনি দীক্ষা দান করেন।

নিজের এক জন্মদিনে শিবাজী মহারাজ ছাকল মঠে রামদাসজীর আশীর্বাদ নিতে আসিয়াছেন। সঙ্গে আনিয়াছেন গুরুর জন্ত কয়েকটি মূল্যবান আঙুরাখা ও শাল।

প্রণাম ও কুশল প্রদানের পর উভয়ে নানা কথাবার্তা বলিতেছেন। বিশিষ্ট ভক্ত ও শিষ্যেরা আশেপাশে দণ্ডায়মান। হঠাৎ শিবাজী লক্ষ্য করিলেন, গুরুদেবের গায়ের উত্তরীয় কোঁপীন সব একেবারে ভেজা। মনে হয়, এই মাত্র তিনি যেন নদীতে স্নান সমাপন করিয়া আসিয়াছেন। সেবকেরা সবাই বিস্ময়ে হতবাক। স্বামীজী তো স্নান তর্পণ সূর্যোদয়ের অনেক পূর্বেই সারিয়াছেন, তারপর পরিধান করিয়াছেন তাহাদের দেওয়া শুষ্ক আঙুরাখা ও কোঁপীন। এমনভাবে কি করিয়া হঠাৎ তাহা জলসিক্ত হইল ?

কৌতূহলী হইয়া শিবাজী প্রশ্ন করিলেন, “প্রভু, বলুন তো কি

এর রহস্য। নদীর জল এলো কোথা থেকে, কি করেই বা আপনার শুষ্কবস্ত্র ভিজিয়ে দিল?”

“না, মহারাজ, নদীর জল নয়। এ সব ভিজিয়েছে সমুদ্রের জলে। এই ছাখো।” মুচকি হাসি হাসিয়া রামদাসজী মহারাজের অঞ্জলিতে ঢালিয়া দিলেন উত্তরীয় নিংড়ানো কিছুটা জল।

এ জল মুখে দিতেই শিবাজী চমকিয়া উঠিলেন। তাই তো, এ যে ঘোর লবণাক্ত, নদীর জল তো নয়—সমুদ্রের জলই বটে।

সপ্রশ্ন দৃষ্টিতে গুরুর দিকে তাকাইতেই তিনি কহিলেন, “মহারাজ, আজকের তারিখটা তুমি বিশেষভাবে মনে করে রেখো। ঠিক পনের দিন পরে এই সাগরজলের রহস্য উন্মোচিত হবে। তখন আশ্রমে এলে সব টের পাবে।”

নির্দারিত দিনে শিবাজী আবার ছাফলে আসিয়া উপস্থিত। দেখিলেন, একটি ধনী বণিক স্বামীজীর সহিত নিভূতে বসিয়া কথাবার্তা বলিতেছেন। শিবাজীকে দেখিয়াই গুরু স্নেহভরে তাঁহাকে কাছে ডাকিলেন। সহাস্তে কহিলেন, “মহারাজ, সেদিনকার সাগরজলের রহস্য, আজ বুঝা গেল। ইনি হচ্ছেন রাজাপুরের মুঞ্জাজী, আমার একজন আশ্রিত শিষ্য। এঁর মুখেই শোন সব কথা।”

মুঞ্জ এতক্ষণ স্বামীজীকে যে কাহিনী বলিতেছিলেন, শিবাজীর কাছে করিলেন তাহারই পুনরাবৃত্তি। মারাঠার উপকূল বাণিজ্যের অস্তুতম প্রধান বণিক এই মুঞ্জ। পনের দিন আগে জাহাজতর্পি মালপত্র নিয়া তিনি সমুদ্রপথে চলিতেছিলেন, হঠাৎ ঝড়ের কবলে পড়িয়া জাহাজটি জলমগ্ন হইতে থাকে। মুঞ্জ এই সময়ে গুরুদেব রামদাসজীর কথা স্মরণ করিয়া প্রাণপণ চীৎকারে তাঁহাকে ডাকিতে থাকেন, ধনপ্রাণ রক্ষার প্রার্থনা জানান। এই সময়ে জাহাজের খোলের উপরে জ্যোতির্ময় মূর্তিতে আবির্ভূত হন সমর্থ রামদাস স্বামী। বরাভয় দানে আশ্বস্ত করেন আশ্রিত শিষ্যকে। ক্ষণকাল পরেই ঝড়ের তাণ্ডব হ্রাস পায়, সমুদ্র শান্ত হইয়া আসে। মুঞ্জের দৃঢ়

বিশ্বাস, গুরুমহারাজের করুণাবলেই এ যাত্রা সে বাঁচিয়া গিয়াছে, জাহাজটিও রক্ষা পাইয়াছে ভরাডুবি হইতে। বন্দরে বন্দরে মাল পৌছাইয়া দিয়া মাত্র গতকালই মুক্ত দেশে ফিরিয়াছে। আজ আসিয়াছে স্বামীজীর চরণ দর্শনে।

শিবাজী প্রসন্ন করিয়া জানিলেন, পক্ষকাল আগে যে তারিখে ও যে সময়ে স্বামী রামদাসজীর বসন তিনি সিন্ধু দেখিয়াছেন, ঠিক সেই সময়েই বণিকের জাহাজটি ঝটিকা-ক্ষুর সাগরে বিপন্ন হইয়া পড়ে।

শিবাজীর জীবনে এখন একটানা সাফল্যের কাল। হুর্গের পর হুর্গ মুঘলের হাত হইতে তিনি ছিনাইয়া নিতেছেন, রাজ্যের পরিধি হইতেছে বিস্তৃততর। সেনাবল ও অর্থবলও বিপুল। কিন্তু প্রবীণ নৃপতি শিবাজীকে কিন্তু এই জাগতিক সমৃদ্ধি বিভ্রান্ত করিতে পারে নাই। বরং ধর্মরাজ্যের ভিত্তি গড়িয়া তুলিতে তিনি আরো তৎপর হইয়াছেন, গুরু রামদাস স্বামীর পরমাশ্রয় আঁকড়াইয়া ধরিতেছেন আরো দৃঢ় হস্তে। স্বামীজীও বিশ্বাস করেন, যে ঐশী কার্যের ভার তিনি নিয়াছেন তাহার প্রধান সহায় হইতেছেন শিবাজী। তাই শিবাজীর জীবনকে অধ্যাত্মরসে উজ্জীবিত করিয়া তুলিতে তাঁহার প্রয়াসের অন্ত নাই। অনন্ত আশা নিয়া, সদা সতর্ক দৃষ্টিতে এই রাজ শিশুর দিকে দিনের পর দিন তিনি চাহিয়া আছেন।

সে-বার পদব্রজে ঘুরিতে ঘুরিতে রামদাস স্বামী সাতারায় আসিয়াছেন। শিবাজী তখন রাজধানীর হুর্গেই অবস্থান করিতেছেন, কিন্তু গুরুজীর আগমন সংবাদ তখনো পান নাই। রামদাসজী স্থির করিয়াছেন, অপর শিশুদের সহিত কয়েকদিন অতিবাহিত করিয়া তারপর দর্শন দিবেন শিবাজী মহারাজকে।

পদব্রজে পরিভ্রাজন, আর মাধুকরী হুইটিই স্বামী রামদাসের

পরম প্রিয়। সাতারায় আসিয়া প্রতিদিনই তিনি দ্বারে দ্বারে ভিক্ষার তুল সংগ্রহ করিতেন।

শিবাজী সেদিন দুর্গের বারহুয়ারীতে বসিয়া অন্নচরদের সহিত আলাপ-আলোচনা করিতেছেন, হঠাৎ দৃষ্টি পড়িল সন্নিহিত মহল্লার এক কুটির দ্বারে। দেখিলেন, গুরুজী রামদাস স্বামী ভিক্ষাপাত্র হাতে সেখানে দণ্ডায়মান।

মুহূর্তে চিন্তার ঝলক খেলিয়া যায় তাঁহার মনে। একি অদ্ভুত কাণ্ড! রাজ্যের অধীশ্বর যাঁর পদানত—যাঁর বিশ্বস্ত সেবক, সেই রাজগুরু মহাসমর্থ রামদাস স্বামী রাজ্যের দ্বারে দ্বারে ঘুরিবেন দীন কালালের বেশে, ভিক্ষায় করিবেন জীবনধারণ? না-না, শিবাজী কিছুতেই তা আর চলিতে দিবেন না।<sup>১</sup>

বিশ্বস্ত অন্নচর বালাজীকে ডাকিয়া তখনি তাহার হাতে এক পত্র দিলেন। কহিলেন, “গুরুজী ভিক্ষার ঝুলি নিয়ে পথে বেরিয়েছেন, কিছুক্ষণের মধ্যেই এসে পড়বেন দুর্গদ্বারে। তুমি আমার এই পত্র তাঁর চরণতলে রেখে দিও।”

দুর্গ তোরণে দাঁড়ানো মাত্র শিবাজীর পত্র রামদাসজীকে দেওয়া হইল। কৌতূহলভরে তিনি এটি পাঠ করিলেন। মহারাজ শিবাজী লিখিয়াছেন,—“প্রভু, আপনার এই ভিক্ষাবৃত্তির দৃশ্য আমি আর সহ করতে পারছি নে। এই সমগ্র রাজ্য, আর আমার যা কিছু ব্যক্তিগত বিস্তৃতি আছে সবই আমি আপনার চরণে উৎসর্গ করলাম। আপনি কৃপা করে এসব গ্রহণ করুন, ক্ষান্ত হোন ভিক্ষাবৃত্তিতে।”

যুহু হাশ্বে পত্রটি হাতে নিয়া রামদাস সেদিন সেখান হইতে চলিয়া যান। পরের দিনই সাক্ষাৎ করেন শিবাজীর সঙ্গে। বলেন, “মহারাজ, তোমার সবই তো দান করেছো আমায়, তোমার নিজের বলতে আর তো কিছু অবশিষ্ট নেই। এবার তবে আমার সঙ্গে

---

১ স্ত্রী বহুনাথ সরকার : শিবাজী অ্যাণ্ড হিজ টাইম্‌স্ পৃ: ৮ ; অ্যাকওয়ার্ড : মারাঠী ব্যালাড্‌স : কৃত্রিকা।

হুগের বাইরে এসে দাঁড়াও। আমার প্রকৃত চেলা হয়ে আমার সঙ্গে শুরু করো মাধুকরী।”

সানন্দে ভিক্ষাবুলি কাঁধে নিয়া শিবাজী গুরুর অনুসরণ করেন, দ্বারে দ্বারে মাগিয়া ফিরেন।

ভিক্ষকের বেশে শিবাজী মহারাজ উপস্থিত। ঘরে ঘরে সোরগোল পড়িয়া যায়, সসঙ্কোচে, কম্পিত হস্তে রাজভিখারীকে মুষ্টিভিক্ষা দিয়া গৃহস্থেরা সরিয়া দাঁড়ায়।

দিন শেষে রাজধানীর উপাস্তে এক অরণ্যে বসিয়া গুরু শিষ্য উভয়ে ভিক্ষার ভোজন করিলেন। প্রসন্ন হাসি হাসিয়া রামদাস এবার কহিলেন, “বৎস শিবাজী, পরীক্ষায় তুমি উত্তীর্ণ হয়েছে। তোমার রাজ্য ও রাজৈক্য আমায় দান করে তুমি ভিক্ষুক হয়েছিলে। আজ সব কিছু আবার আমি তোমাকেই ফিরিয়ে দিলাম। তুমি আবার রাজসিংহাসনে বসবে বটে, কিন্তু চিরদিনই হবে আমারই প্রতিনিধি রূপে। আমার গেরুয়া গাত্রবাস তোমায় দান করছি, বৈরাগীর এই উত্তরীয়ই হবে তোমার রাষ্ট্র-পতাকা।”

এই গেরুয়া পতাকা বা ভগোয়া ঝাণ্ডা মহারাজা শিবাজীর রাজ্যে যতদিন উড্ডীয়মান ছিল, ভারতবাসীর হৃদয়পটে ততদিন ত্যাগ-বৈরাগ্যের পরম আদর্শ ছিল দেদীপ্যমান। আজো সে আদর্শের স্মৃতি এদেশ বিন্দ্বিত হয় নাই।

একদল ভক্ত ও শিষ্য নিয়া রামদাসজী একদিন দূর গ্রামের এক মঠে যাইতেছেন। দীর্ঘ হুগম পথ। চলিতে চলিতে সঙ্গীর ক্ষুণ্ণিপাসায় কাতর হইয়া পড়িয়াছে। সম্মুখেই একটি তুটার ক্ষেত। ভক্তেরা নিবেদন করে, “প্রভু, এখানে তো কাছাকাছি কোন লোকালয় দেখছিনে। আমরা সবাই শ্রান্ত অবসন্ন। ক্ষুধার জ্বালায় পথ চলা সম্ভব হচ্ছে না। আমরা বলছি কি, ক্ষেত থেকে কিছু তুটা তুলে

আমরা প্রাণ বাঁচাই, তারপর অল্প সময়ে ক্ষেতের মালিককে এর দাম দিয়ে দিলেই হবে।”

শিষ্যদের দুর্দশা দেখিয়া স্বামীজী এ প্রস্তাবে সায় দিলেন। প্রয়োজনীয় ভুট্টা সংগৃহীত হইল, সামনের এক বটগাছের নীচে আগুন জ্বালাইয়া, দগ্ধ ভুট্টা ভোজনোর পর সকলে শ্রুত হইলেন।

এমন সময়ে যমদূতের মত গ্রামের পাটেল সেখানে আসিয়া উপস্থিত। ভুট্টার ক্ষেতটি তাহারই। সাধুদের কাণ্ড দেখিয়া সে ক্ষিপ্ত হইয়া উঠে। অকথ্য ভাষায় দলের নেতা রামদাসজীকে গালি-গালাজ করিতে থাকে। ভুট্টার কয়েকটি অবশিষ্ট আঁটি সম্মুখে পড়িয়া ছিল, সেগুলি উঠাইয়া নিয়া পাটেল সজোরে রামদাসজীকে আঘাত করিতে থাকে। স্বামীজীর দেহের নানা স্থানে কাটিয়া যায়, রক্ত ঝরিতে থাকে। আঘাতকারীকে কোন প্রকার বাধা না দিয়া স্বামী রামদাস প্রশান্ত বদনে রহেন দণ্ডায়মান।

স্বামীজীর এই সমদর্শিতা ও নিব্বিকার ভাব তত্ত্ব-শিষ্যদের থাকিবে কেন? তাহারা ক্রোধে জ্বলিয়া উঠে, সবাই মিলিয়া পাটেলকে জাপটাইয়া ধরে, মুষ্ঠ্যাঘাতে করে তাহাকে ধরাশায়ী।

রামদাসজীকে এবার উত্তেজিত হইতে দেখা যায়। শিষ্যদের হটাইয়া দিয়া পাটেলকে তিনি মুক্ত করেন, তিরস্কারের সুরে কহেন, “এ তোমাদের অগ্র্যায়। ভুট্টার ক্ষেতের মালিক এই পাটেল। তার ভুট্টা খেয়ে, আবার তাকেই ধরে মারবে এ কেমন কথা? না—একে তোমরা কিছু বলো না, অপরাধ তো বরং আমাদেরই। পরজন্ম না বলে আমরা নিয়েছি।”

এই ঘটনার কয়েকদিন পরে শিবাজী মহারাজ একদিন গুরুর সঙ্গে দেখা করিতে আসেন। কৌপীনবস্ত্র রামদাসজী খালি গায়ে নিজ আসনে বসিয়া বিজ্ঞানভালাপে রত, হঠাৎ তাহার দেহের কাঁচা ঘায়ের দিকে শিবাজীর দৃষ্টি পড়িল। ব্যস্ত-সমস্ত হইয়া এ বিষয়ে তিনি প্রশ্ন করিলেন। কিন্তু স্বামীজী একেবারে নিরুত্তর।

পার্শ্বে দণ্ডায়মান এক সেবক কিন্তু মূল কথাটা কাঁস করিয়া দেয়।

ক্ষেতের মালিক পাটেলের মারধোরের কাহিনী সবিস্তারে বর্ণনা করে।

আনুপূর্ব্বক সব শুনিয়া শিবাজী তো মহারুগ্ন। উদ্বেজিত কণ্ঠে কহিলেন, “রাজগুরুর প্রতি এই অত্যাচার। আচ্ছা, এখনি এই পাটেলের সমুচিত দণ্ডবিধান আমি করছি।”

স্বামী রামদাস সহাস্তে বলেন, “বৎস, মনে রেখো, তুমি রাজ-সিংহাসনে বসলেও আসলে তুমি হচ্ছে। ধর্মের প্রতিনিধি, ভিক্ষুক সন্ন্যাসীর প্রতিনিধি। এ স্থলে অপরাধ হয়েছে আমাদেরই, পাটেলের নয়। ভক্তেরা ভুট্টা খাবার প্রস্তাব করার সময় আমি ভেবেছিলাম, পরে এসে ক্ষেতের মালিককে এর মূল্য দিয়ে যাবো। তুমি বরং আমার হয়ে তাই দাও এই পাটেলকে। তাকে কয়েক বিঘা জমি তুমি পুরস্কার স্বরূপ দান করো, তবেই আমি লাভ করবো অপার সন্তোষ।”

বলা বাহুল্য, গুরুর এই নির্দেশ প্রতিপালিত হইতে সেদিন বিলম্ব হয় নাই।

গুরুর প্রতি শিবাজীর আত্মসমর্পণ ও ভক্তিপ্রেমের তথ্য গবেষকেরা কতকগুলি চিঠিপত্র হইতে আবিষ্কার করিয়াছেন। রাজা শিবাজীর একটি পত্রের অনুবাদ নিম্নরূপ :

শ্রীস্বামীজী মহারাজ ! মহত্তম গুরো !

আমি শিবাজী হচ্ছি আপনার শ্রীচরণের ধূলি। শ্রীচরণে প্রণাম নিবেদন করে জানাচ্ছি আমার এই আবেদন। হে পরমপূজ্য, আপনি আমায় দীক্ষা দান করে ডেলে দিয়েছেন কল্যাণবহু আশীর্ব্বাদ। একটি স্বাধীন রাজ্যগঠন, ধর্মসংস্থাপন, দেবদ্বিজের আরাধনা, জন-গণের রক্ষণ ও দুঃখ দূরীকরণ—এইসব মহৎ কার্য সাধনের নির্দেশ আপনি আমায় দিয়েছিলেন। তাছাড়া পরম বস্তুর অন্বেষণেও আপনি আমায় উদ্বুদ্ধ করেছিলেন, আর আশ্বাস দিয়েছিলেন—আমার সকল



কিছু প্রচেষ্টা সফল হয়ে উঠবে প্রভু শ্রীরামজীর কৃপায়। তদনুসারে আমিও এগিয়ে চলেছি আমার কর্মসূচী নিয়ে। সফল হয়েছি ছুঁই মুসলমান শক্তির দমনে, বিপুল ধনরত্ন এসেছে আমার অধিকারে, নির্মাণ করেছি দুর্জয় দুর্গসমূহ। এ সবই, প্রভু, সম্ভব হয়েছে আপনার আশীর্বাদের বলে।

—বোধহয় আপনার মনে আছে, একদিন আমি আপনার চরণে স্নেহ দিয়েছিলাম আমার সমগ্র রাজ্য ও বৈভব। বলেছিলাম—আমি আপনার সেবায় নিজেকে করবো উৎসর্গ। আপনি তখন উত্তরে বলেছিলেন, আমি যদি আমার রাজকর্তব্য নিষ্ঠাভরে পালন করে যাই, তবে তাই গণ্য হবে আপনার শ্রেষ্ঠ সেবাকার্যরূপে।

—আর এক প্রার্থনা ছিল, শ্রীরামজীর মন্দির যেন আমার কাছাকাছি কোথাও নির্মিত হয়, তাহলে আমরা পরস্পরের সঙ্গে দেখা সাক্ষাৎ করতে পারবো, আর রামদাসী সম্প্রদায়ও ছড়িয়ে পড়তে পারবে দিকে দিকে। হে আমার পরমপূজ্য, আপনি আমার সে প্রার্থনা শুনেছিলেন। আমার নিকটবর্তী পর্বতগুহায় এসে আপনি বাস করতে থাকেন, ছাফল-এ প্রভু রামজীর মন্দিরও নির্মিত হয়, এরপর সম্প্রদায়ের ভক্ত শিষ্যদের প্রভাবও বেড়ে চলে দিনের পর দিন। তাছাড়া, আরো একটা আন্তরিক অনুরোধ আমার ছিল। আমার আরো আবেদন ছিল, শ্রীরামজীর পূজায়, উৎসব-অনুষ্ঠানের ব্যয় নির্বাহে, ছাফল মন্দিরের নির্মাণকাজে এবং অন্যান্য স্থানের মূর্তির সেবায় আমি যেন কিছু পরিমাণ জমিখণ্ড দান করতে পারি। তার উত্তরে আপনি আমাকে জানিয়েছিলেন,—এজ্ঞ আমি যেন চিন্তিত না হই, যেসব জমি আমি এ উদ্দেশ্যে দান করা প্রয়োজন মনে করি তা যেন দিই, এবং সম্প্রদায়, রাজ্য এবং জাতির কল্যাণে যেন আত্মনিয়োগ করি। তারপর আমি আমার রাজকীয় নির্দেশনামা প্রদান করি এবং বিভিন্ন অঞ্চলে সরকার হইতে জমি অর্পণের ব্যবস্থা করা হয়। ছাফলের চারপাশে যে ১২১টি গ্রাম রয়েছে

তাদের প্রত্যেকটি থেকে ১১ বিঘা জমি দান করার নির্দেশ ইতিমধ্যে দেওয়া হয়ে গিয়েছে।<sup>১</sup>

অভিষেকের পর হইতেই শিবাজীর জীবনে অধ্যাত্ম-তৃষ্ণা বাড়িয়া উঠিতে থাকে ; স্বামী রামদাসের উপরও আসে পূর্বাপেক্ষা অনেক বেশী নির্ভরতা। যে কোন প্রশ্ন, তাহা সাধনভঙ্গ সম্পর্কেই হোক, সামাজিক বা রাজনীতি সম্পর্কেই হোক, গুরুকে দিয়া তাহার মীমাংসা করিয়া না নিলে শিবাজীর চলে না। তাছাড়া, এখন হইতে গুরুর সঙ্গ ও ঘনিষ্ঠ সাহচর্যের জন্তও তাঁহার মন বড় বেশী ব্যাকুল হইয়া উঠে।

কিন্তু রামদাসজীকে কোন একটি বিশেষ স্থানে ধরিয়া রাখিবার জো নাই। তীর্থে-তীর্থে মঠে-মঠে স্বেচ্ছামত তিনি ঘুরিয়া বেড়ান।

পরলী দুর্গটি শিবাজীর অধিকারে আসার পর তিনি স্থির করেন, গুরুর জন্ত এখানে একটি স্থায়ী আবাস নির্মাণ করিয়া দিবেন। অনেক অমুনয় করিয়া রামদাসজীকে রাজী করানো হয়। শিবাজীর নির্দেশমত দুর্গ-শীর্ষে রামদাসজীর এক নূতন ভবনকে কেন্দ্র করিয়া গড়িয়া উঠে সাধু-সন্ন্যাসীদের একটি মঠ এবং উপনিবেশ। সাধু-সজ্জনের আবাস-ভূমি—তাই ইহার নাম দেওয়া হয় সজ্জনগড়। দুর্গের চারদিকের গ্রামগুলির আয় শিবাজী দান করিলেন এই সাধু-উপনিবেশের জন্ত। রামদাসজীর প্রবর্তিত বড় বড় ধর্ম-উৎসবগুলি সাড়ম্বরে এখানে পালন করা হইত। সে ব্যয়ও নির্ব্বাহ হইত সরকারের প্রদত্ত নজরানা হইতে।

সজ্জনগড় সাতারা হইতে বেশী দূর নয়। শিবাজীর প্রিয় দুর্গ রায়গড়ও খুবই কাছাকাছি। শিবাজী প্রায়ই রায়গড়ে যাইতেন এবং নিকটবর্তী গুরুস্থান সজ্জনগড় ছিল তাঁহার এক বড় আকর্ষণ। অবসর পাইলে সেখানে গুরুজীর সমীপে গিয়া উপস্থিত হইতেন, গ্রহণ করিতেন সাধনভজন ও রাজকাৰ্য্যের নানা গুরুত্বপূর্ণ নির্দেশ।

অনেকের ধারণা, রামদাস স্বামী তাঁহার শিষ্য শিবাজীর রাজ-নৈতিক জীবন ও রাষ্ট্র চিন্তার নিয়ামক ছিলেন, এবং ইহাই স্বামীজীর বড় পরিচয়। কিন্তু এ ধারণা একেবারেই যুক্তিসহ নয়। শিবাজী রামদাসজীর আশ্রয়ে আসেন জীবনের শেষপাদে। ধর্মমুগ্ধ রাজ্যের যে সঙ্কল্প তাঁহার মনে ছিল, রামদাসজীর শিষ্যত্ব গ্রহণের পর সে সঙ্কল্প আরো দৃঢ় হইয়া উঠে। প্রকৃতপক্ষে সিদ্ধপুরুষ রামদাসজী ছিলেন রাজা শিবাজীর অধ্যাত্মজীবনের আলোকদিশারী এবং তাঁহার সাধন জীবনেরই নিয়ন্তা। উত্তর জীবনে শিবাজীর মুমুক্ষা তীব্রতর হইয়া উঠে এবং গুরুর চরণে করেন তিনি আত্মসমর্পণ।

এ সম্পর্কে রামদাস স্বামীর অশ্রুতম জীবনীকার যাহা বলিতেছেন তাহা প্রাণিধানযোগ্য, তাঁহার মতে, “শিবাজীর উপর রামদাসের আধ্যাত্মিক প্রভাবই ছিল মুখ্য, রাজনৈতিক প্রভাব গৌণ। তথ্য প্রমাণ হইতে পরিষ্কারভাবে দেখা যায়, শিবাজীর রাজনৈতিক ও সামরিক জীবনে রামদাস খুব একটা গুরুত্বপূর্ণ ভূমিকা গ্রহণ করেন নাই। কাজেই রামদাসের রাজনৈতিক প্রভাবকে বড় করিয়া তোলাটা শুধু যে ঐতিহাসিক তথ্য দ্বারা অসমর্থিত তা-ই নয়, ইহা দ্বারা মহারাজা শিবাজী এবং স্বামী রামদাস উভয়কেই খাটো করা হয়। ধর্ম ও অধ্যাত্মসাধনার ক্ষেত্রে স্বামীজী ছিলেন সর্বময় প্রভু, এবং ইতিহাস নিশ্চয়ই তাঁহার এই প্রভুত্বকে স্বীকৃতি দিতে বাধ্য থাকিবে। কারণ, ধর্ম ও অধ্যাত্মসাধনা সম্পর্কে তাঁহার জ্ঞান ছিল সুগভীর এবং সেখানকার সমস্তার সমাধানে তিনি ছিলেন অতি-মাত্রায় দক্ষ। প্রধানতঃ ধর্মগুরুরূপে স্বীকৃতি না দিয়া তাঁহাকে যদি রাজনৈতিক গুরু বলিয়া আমরা প্রচার করি তবে তাঁহার প্রকৃত স্বরূপ নির্ণয়ে, ভুল করিব। একথা সত্য যে বড় জীবনের শেষ ভাগে প্রিয় শিষ্য ও আদর্শবাদী রাজা শিবাজীর কাজকর্মের ধারা দেখিয়া তিনি পরিতুষ্ট হন এবং রাষ্ট্রীয় ব্যাপারে প্রয়োজন মত মাঝে মাঝে নির্দেশও তিনি দিতেন। তাঁহার ধর্মগ্রন্থ দাসবোধের শেষ অংশে

সামাজিক ও রাজনৈতিক উপদেশ কিছুটা রহিয়াছে। শিবাজী মহারাজ শেষ জীবনে গুরুজীর কাছে আসিয়া রাষ্ট্রীয় চিন্তা ও কাজকর্ম সম্বন্ধেও তাঁহার মতামত জানিয়া নিতেন, কারণ স্বামীজীর জ্ঞান ও বুদ্ধিমত্তার উপর তাঁহার গভীর আস্থা ছিল। এই দিক দিয়া দেখিতে গেলে স্বামী রামদাস ভক্ত-ভুকারাম বা অগ্রাণু বৈষ্ণব সাধক হইতে ভিন্ন ধরনের ছিলেন। কিন্তু এই সঙ্গে এ কথাও স্বীকার করিতে হইবে যে রাষ্ট্রীয় কর্ম, সম্প্রদায়ের সংগঠন কর্ম প্রভৃতি ব্যবহারিক ক্ষেত্রের গুরুত্ব স্বীকার করিলেও স্বামী রামদাস মুখাত ছিলেন একজন সিদ্ধসাধক ও জনকল্যাণকর অধ্যাত্ম-আন্দোলনের নেতা।”১

সজ্জনগড়ের পরিবেশ ছিল বড় পবিত্র, বড় রমণীয়। চারিদিকে শস্ত্র-শ্যামল উপত্যকা বিস্তারিত। নদী-নালাব বন্ধিম রেখায় রেখায় প্রকৃতি যেন ক্ষীণ-শুভ্র আলপনা আঁকিয়া রাখিয়াছে পরম প্রভুর আগমন প্রতীক্ষায়। উর্দ্ধাকাশের মহাবিস্তারে তাকাইলে প্রাণমন মুহূর্ত্তে কোথায় যেন উধাও হইয়া যায়। এই অমূল্য পরিবেশে আসিয়া রামদাস ধ্যান-ভজনে বিভোর হইয়া পড়েন। পাহাড়ের চূড়ায় ঘনিষ্ঠ ভক্তশিষ্য নিয়া তিনি বাস করিতে থাকেন।

মঠ এবং মণ্ডলীর সংখ্যা ও পরিধি বাড়িয়াছে, কাজও অনেক বাড়িয়াছে। কিন্তু রামদাসের জীবনে আসিয়াছে প্রচুর অবসর। বিশ্বস্ত, কর্মকুশল ও ত্যাগব্রতী শিষ্যেরা মঠ-মন্দিরগুলি সুষ্ঠুভাবে পরিচালনা করিতেছেন, তত্পরি রাজশিষ্য শিবাজীর জনবল ও কোষাগার সতত রহিয়াছে গুরুর সেবায় নিয়োজিত। প্রয়োজন বোধে মঠের মোহস্তেরা, শিবাজী ও তাঁহার উচ্চকর্মচারীরা, সজ্জনগড়ের শীর্ষে ছুটিয়া আসেন, স্বামী রামদাসের পরামর্শ ও আদেশে হয় তাঁহাদের সমস্তার সমাধান।

স্বামীজীর সজ্জনগড়ের এই পরিবেশটি কিন্তু দীর্ঘস্থায়ী হয় নাই।

অল্পদিনের মধ্যেই নেপথ্যের মহানাট্যকার তাঁহার জীবনলীলাকে ঠেলিয়া দেন শেষ অঙ্কের দিকে।

১৬৭৯ খৃষ্টাব্দের শেষের দিকে শিবাজী একবার গুরুর সঙ্গে দেখা করিতে আসেন। নানা প্রসঙ্গের পর গুরু রহস্যময় হাসি হাসিয়া কহেন, “মহারাজ, মাটির মানুষ আমি, রঘুনাথজীর এক দীন সেবক। তাকে তুমি পাহাড়ের শীর্ষে আকাশে তুলে এনে রেখেছো। আকাশ হাতছানি দিচ্ছে বার বার। মহারাজ, স্পষ্টই বুঝতে পারছি, মরজীবনে ছেদ পড়তে বেশী বাকী নেই।”

“তা কি করে হয় গুরুদেব। লক্ষ লক্ষ লোক যে আপনার যুগ চেয়ে আছে, আপনার অভয় বাণী শোনার জন্য উৎকর্ষ হয়ে আছে। এত তাড়াতাড়ি আপনার চলে যাওয়া কি করে হয়? তাছাড়া, ধর্মরাজ্য স্থাপনের অনেক কিছুই যে এখনো বাকী।”—যুক্তকরে নিবেদন করেন শিবাজী।

“মহারাজ, আমরা বৃদ্ধ মাত্র, আমরা শুধু একটা ক্ষীণতম ক্ষীণ স্পন্দন তুলতে পারি। যা করবার সচ্চিদানন্দ ব্রহ্ম শ্রীরামচন্দ্রই করবেন। তবে তাঁর ভক্ত ও অনুচর হিসেবে আমরা তোমায় তাঁর পুনরাবির্ভাবের পটভূমি কিছুটা রচনা করতে হবে। তাঁর আসন পাতে হবে। ধর্মরাজ্যের আদর্শ আমরা তুলে ধরলাম, বীজ ছড়িয়ে গেলাম—এই তো ছিল আমাদের কর্তব্য।”

নতশিরে শিবাজী গুরুর চরণসমীপে বসিয়া আছেন। মুখে একটি শব্দ নাই।

গুরু আবার কহিলেন, “বৎস, অতিরিক্ত পরিশ্রমে তোমার শরীর দুর্বল হয়েছে, অপটু হয়েও পড়েছে। খুব সাবধানে থেকো। রায়গড়ে গিয়ে তুমি পূর্ণ বিশ্রাম করো।”

শিবাজী রায়গড়ে ফিরিয়া গেলেন, কিন্তু উপযুক্ত পরিচর্যা সাময়িক অভিব্যক্তি চালানোর কলে স্বাস্থ্য তাঁহার একেবারে ভাঙিয়া পড়িয়াছে, আর তাহা জোড়া লাগে নাই।

১৬৮০ খৃষ্টাব্দের ৫ই এপ্রিল শিবাজী মহারাজ চিরবিদায় গ্রহণ করিলেন। স্বামী রামদাসের দক্ষিণবাহু যেন তাকিয়া পড়িল, ধর্মরাজ্যে স্থাপনা ছিল রামদাসজীর কাছে এক মহান ঐশী ব্রত। আদর্শবাদী পরম ধার্মিক মহারাজা শিবাজীর আনুগত্য ও সেবা ছিল তাঁহার এই কর্মের বড় সহায়। বিধির বিধানে আজ তাহা অন্তর্হিত হইল।

রামদাস-শিষ্য শিবাজীর প্রকৃত মূল্যায়ন বিদেশী ঐতিহাসিকেরা করিতে পারেন নাই। পরবর্তীকালে এ দেশের মনীষী গবেষকেরা তাঁহার আত্মিক জীবন ও ধর্মীয় জীবনের স্বরূপ নির্ণয় করিয়াছেন। এ যুগের শ্রেষ্ঠ কবি রবীন্দ্রনাথের অননুক্রমণীয় ভাষায়ও মূর্ত হইয়া উঠিয়াছে শিবাজীর ধর্মযুত জীবনের পরম বৈশিষ্ট্য। একাধারে বিপুল আশা, আশ্বাস ও প্রতিশ্রুতি বিশ্বকবির অমর কণ্ঠে ধ্বনিত হইয়াছে :

সেদিন গুনিনি কথা—আজ মোরা তোমার আদেশ

শির পাতি লব।

কণ্ঠে কণ্ঠে বক্ষে বক্ষে ভারতে মিলিবে সর্বদেশ

ধ্যানমন্ত্রে তব।

ধ্বজা করি উড়াইব বৈরাগীর উত্তরীবসন

দারিদ্র্যের বল।

‘এক ধর্মরাজ্য হবে এ ভারতে’ এ মহাবচন

করিব সম্বল।

এবার পরপারের ডাক আসিয়া গিয়াছে সমর্থ রামদাসস্বামীর অন্তরসত্তায়। প্রাণপ্রভু রামজীর চরণকমলে নিজেকে এবার তিনি বিলীন করিতে চান। দিনরাতের অধিকাংশ সময়ই অতিবাহিত হয় ইষ্টধ্যানে। ধ্যান তত্ত্বরতা তাক্সাইয়া সেবকেরা মাঝে মাঝে চোঁট

করেন খাওয়ানোর জন্ত, কিন্তু প্রায়ই তাহা সম্ভব হইয়া উঠে না। উপবাসে তন্মু দিন দিন ক্ষীণ হইতে থাকে।

প্রধান শিষ্য কল্যাণ ব্যাকুল হইয়া ছুটিয়া আসিলেন। কয়েকটি নিগূঢ় নির্দেশ নিয়া গুরু মহারাজের আদেশে ফিরিয়া গেলেন আপন কর্ম্মক্ষেত্রে। অশ্বাশ্ব মঠ-মন্দিরের পরিচালক ও ভক্ত-শিষ্যেরা শেষবারের মত স্বামীজীকে দর্শন করিয়া গেলেন।

প্রধান শিষ্য উদ্ধব ও ভক্তিমতী আকাবাই গুরুজীর শয্যাপার্শ্বে সদা উপস্থিত। প্রাণপণে তাঁহারা সেবা করিয়া চলিয়াছেন, শঙ্কাকুল চিন্তে অপেক্ষা করিয়া আছেন বিচ্ছেদের মর্ম্মস্তদ মুহূর্ত্তটির জন্ত।

কয়েকদিন আগে স্বামীজী তাঁহার অভিলাষ অনুযায়ী রাম, সীতা, লক্ষ্মণ ও মারুতীজীর নূতন নূতন নয়নলোভন বিগ্রহ গড়াইয়া আনিয়াছেন। এই বিগ্রহগুলি এবার তাঁহার শয়নঘরে স্থাপন করিতে বলিলেন। বহুক্ষণ ইহাদের সম্মুখে রহিলেন ধ্যানাবিষ্ট।

শয়নগৃহে তখন উপস্থিত একনিষ্ঠ সেবিকা আকাবাই আর প্রধান শিষ্য উদ্ধব। ধ্যান হইতে ব্যাখিত হইয়া আকাবাই-এর হাত হইতে গুরু গ্রহণ করিলেন একপাত্র চিনির সরবৎ। তারপর প্রসন্ন মধুর হাস্তে কহিলেন, “বৎসে, এবার তবে তোমরা আমায় বিদায় দাও।”

কাল্মায় ভাজিয়া পড়িলেন আকাবাই। সান্ত্বনা দিয়া গুরুজী কহিলেন, “চির আনন্দধামে যাচ্ছি, সচ্চিদানন্দ বিগ্রহ শ্রীরামজীর লীলা নিকেতনে আমি রওনা হচ্ছি। পরম মধুর মিলন-ক্ষণে এই কাল্মা কেন?”

“প্রভু, মরদেহ ছেড়ে যাচ্ছেন, আর তো শুনতে পাবো না আপনার অমৃতবাণী, আর পাবো না আপনার পরম আশ্রয়।”

“এতদিন কি আমার কাছে থেকে তোমরা শুধু এই শিখলে? প্রপঞ্চস্বরূপ এ দেহ একদিন তো ত্যাগ করতেই হবে। প্রাণপ্রভুর নির্দেশ এসেছে, সানন্দে তাই আমি চলে যাচ্ছি। তবু কেন গো, তোমাদের? এ মুখের কথা নাই বা শুনলে, কিন্তু ‘দাসবোধ’ তো

আছে। তাই রইল আমার মর্শ্বকথা। ‘দাসবোধ’ তোমরা সবাই নিত্যপাঠ করবে, থাক্বে রামজীর নিত্যদাস হয়ে।”

ইষ্টবিগ্রহের দিকে প্রেমাপ্লুত নয়নে তাকাইয়া রামদাস স্বামী যুগ্মকণ্ঠে উচ্চারণ করিলেন, “হর হর—রাম রাম, জয় সমর্থ রঘুবীর।” সঙ্গে সঙ্গে সিদ্ধ মহাপুরুষের প্রাণবায়ু ব্রহ্মরক্ত পথ দিয়া করিল উৎক্রমণ।

১৬৮১ খৃষ্টাব্দের এই মহাপ্রয়াণের দিনে সারা মারাঠার ভক্ত-সমাজে পতিত হয় গভীর শোকের ছায়া। রামদাসী সম্প্রদায়ের শত শত লোক সাধুনয়নে আসিয়া উপস্থিত হয়। উদ্ধব গোসাবী ও অন্যান্য প্রধান শিষ্য ও মহাস্তেরা ভারাক্রান্ত হৃদয়ে গুরুর শেষ-কৃত্যের আয়োজন সম্পূর্ণ করিলেন। পবিত্র তুলসীতরু আলাইয়া রামদাস স্বামীর মরদেহ করা হইল ভস্মীভূত।

প্রভু রঘুবীরজীর নিত্যদাস—সমর্থ রামদাস ইহলোক ছাড়িয়া চলিয়া গেলেন। কিন্তু তাঁহার ধর্মরাজ্যের, রামরাজ্যের, ধ্যানকল্পনার বীজ ছড়াইয়া দিয়া গেলেন সারা ভারতের আকাশে বাতাসে।



## একনাথ স্বামী

মারাঠার ভক্তি আন্দোলনের আদি ও প্রধান উৎস পঙ্কারণুর। এখানকার জাগ্রত বিগ্রহ বিঠ্ঠলজীকে কেন্দ্র করিয়া ত্রয়োদশ ও চতুর্দশ শতকে প্রেমভক্তির যে প্লাবন উৎসারিত হয় তাহার নায়ক ছিলেন জ্ঞানদেব ও নামদেব। এই দুই মহাত্মার প্রয়াণের পর ভক্তি আন্দোলন কিছুটা স্তিমিত হইয়া আসে, সমাজজীবনে দেখা দেয় অনাচার, বিশৃঙ্খলা ও ধর্মবিমুখতা। এই অবনতি ও অবক্ষয়ের দিনে, জ্ঞানদেব ও নামদেবের প্রায় দুইশত বৎসর ব্যবধানে আবির্ভূত হন একনাথ স্বামী। মারাঠার বৈষ্ণব আন্দোলনে তিনি সঞ্চারিত করেন নূতন প্রাণপ্রবাহ, ভক্তি ও প্রপত্তির পরম পাথেয় পৌছাইয়া দেন সমাজের উচ্চনীচ ধনৌ নির্ধন সকল মানুষের অঙ্গনে।

পঞ্চদশ শতকের তৃতীয় পাদের কথা। এসময়ে পৈঠান বা প্রতিষ্ঠানপুরে অভ্যুদয় ঘটে সাধকপ্রবর ভানুদাসের। একজন সিদ্ধ বৈষ্ণব বলিয়া এ অঞ্চলের সর্বত্র তিনি পরিচিত ছিলেন। পঙ্কারণুরের বিঠ্ঠলজী বিগ্রহের পুনঃপ্রতিষ্ঠা ও সেবা পূজার প্রবর্তন করিয়াও ভানুদাস প্রসিদ্ধ হন। মুসলমান রাজাদের অত্যাচারে পঙ্কারণুরের মন্দির দুইবার বিধ্বস্ত হয়। বিজয়নগরের রাজা কৃষ্ণরায় তাই বিঠ্ঠলজী বিগ্রহের নিরাপত্তা বিধানের জন্ত তৎপর হইয়া উঠেন এবং নিজের রাজধানী হাম্পি নগরে এক নূতন মন্দিরে করেন ইহাকে সংস্থাপিত। রাজনৈতিক অশান্তি ও উপদ্রব অতঃপর কমিয়া যায় এবং পঙ্কারণুরের ভক্তসাধক ভানুদাসের নেতৃত্বে বিঠ্ঠলজীকে দেশে ফিরাইয়া আনার ব্যবস্থা হয়। কথিত আছে, সাধক ভানুদাসই বিজয়নগর হইতে এই ত্রীমূর্তি বহন করিয়া আনেন এবং প্রবর্তন করেন সেবা পূজার নবপর্যায়ের ব্যবস্থা।

এই ভাষ্যদাসেরই বংশে তাঁহার প্রপৌত্ররূপে ১৫৩৩ খৃষ্টাব্দে জন্মগ্রহণ করেন সার্বকনামা ভক্তসাধক একনাথ ।

একনাথের পিতার নাম সূর্য্যনারায়ণ, মাতা কল্পিনী বাঈ । একনাথ যখন ছোট শিশু, তখন তাঁহার পিতা মাতা উভয়েরই প্রাণ-বিয়োগ ঘটে । অতঃপর পিতামহ ও পিতামহীর যত্নে তিনি পালিত হইতে থাকেন ।

শুভ সংস্কার নিয়া জন্মিয়াছেন, তাই বালককাল হইতেই একনাথের জীবনে প্রকাশ পায় ভগবদ্-ভক্তি । খেলাধুলায় কোন উৎসাহ নাই, স্বভাবে চাপল্য নাই—সৌম্য শান্ত বালক অবসর পাইলেই গ্রামের উপাস্তে শিব-মন্দিরটিতে গিয়া উপস্থিত হয়, সারা দিন সেখানে কাটাইয়া ঘরে ফিরিয়া আসে ।

অপূর্ব্ব মেধা বালকের । মন্দিরে পুরাণপাঠ ও শাস্ত্রের ব্যাখ্যা-বিশ্লেষণ যাহা হয়, সবই তাঁহার কণ্ঠস্থ । ধর্ম্মজীবনের কাহিনী শুনিতে বসিলেই সে মাতিয়া উঠে, এবং প্রহ্লাদের পুণ্য কথা ভাবিতে ভাবিতে মন কোথায় উধাও হইয়া যায় ।

একনাথের বয়স তখন বারো বৎসরের বেশী নয় । একদিন জনবিরলপথে শিবমন্দির হইতে তিনি বাড়ীতে ফিরিয়া আসিতেছেন, হঠাৎ কানে আসে এক দৈবী প্রত্যাদেশ, “ওরে, বুখা কেন আর কাল ক্ষেপণ করছিস, চলে যা দেবগড়ে জনার্দন স্বামীর কাছে । তিনিই যে তোর চিহ্নিত সদগুরু, তোর জীবনের চাবিকাঠি রয়েছে তাঁরই হাতে ।”

বালকের মর্ম্মমূলে কে যেন এক প্রচণ্ড ঝাঁকুনি দিয়া যায় । অজানা লোকের অদৃশ্য ইঙ্গিত মনকে বার বার উচ্চকিত, উদ্ভ্রান্ত করিয়া তোলে । সেইদিনই পিতামহীর সেহনীড় ছাড়িয়া, কাহাকেও কিছু না জানাইয়া পদব্রজে সে বাহির হইয়া পড়ে দেবগড়ের উদ্দেশে ।

কে এই জনার্দন স্বামী, কি তাঁহার পরিচয়, কিছুই একনাথের

জানা নাই। পথ চলিতে চলিতে লোকের মুখে শোনে, তিনি দেবগড়ের কেল্লাদার, মুসলমান রাজার এক অতি বিশ্বাসভাজন ব্যক্তি। যুদ্ধকুশল ও রাজনীতিবিদ বলিয়া যেমন তাঁহার খ্যাতি আছে, তেমনি খ্যাতি আছে সিদ্ধ সাধকরূপে। সুপ্রসিদ্ধ মহাপুরুষ মুসিংহ সরস্বতী তাঁহার গুরু। সমর্থগুরুব কৃপা ও আপন সাধনবলে জনার্দনের সাংসারিক জীবন আর অধ্যাত্মজীবনের ঘটিয়াছে এক বিশ্বয়কর সমাহার। হিন্দু মুসলমান উভয় সম্প্রদায়ের লোকেই তাঁহাকে শ্রদ্ধা করে, ভালবাসে আন্তরিকভাবে।

কেল্লার ভিতরে জনার্দন স্বামীর দর্শন ঘটিল। সাষ্টাঙ্গ প্রণত হইয়া একনাথ কহিলেন, “প্রভু, আমি পৈঠানের লোক, ভানুদাসজীর প্রপৌত্র—একনাথ। ঈশ্বর কি বস্তু, কি করে তা লাভ করা যায়, কিছুই আমি জানিনি। কিন্তু কি জানি কেন, এক প্রচণ্ড ব্যাকুলতার বেগ আমায় কেবলি ঠেলে নিয়ে যাচ্ছে।”

“ভানুদাসের প্রপৌত্র তুমি? অতি আনন্দের কথা। তিনি ছিলেন পরম বৈষ্ণব, আমাদের সকলের নমস্কার। তা বংশ, এত সাধু সন্ত থাকতে আমার মত কেল্লাদারের কাছে তুমি এলে কেন বলতো?” প্রশ্ন করেন জনার্দন স্বামী।

“প্রত্যাদেশ শুনেছি, আপনিই আমার গুরু, আমার ইহকাল পরকালের চাবিকাঠি আপনারই হাতে।”

“কি করে বুঝলে, বালক, এ প্রত্যাদেশ সত্য?”

“আমার অন্তরাত্মা কেবলই ডেকে বলছে, এ দৈবী আদেশ এসেছে আমারই পরম কল্যাণের জন্ত।” কিছুক্ষণ নীরব থাকিয়া অশ্রুসঞ্ছল চক্ষে একনাথ বলেন, “প্রভু, শৈশবে পিতামাতা হারিয়ে অসহায় হয়ে পড়ি, ঈশ্বরের কৃপায় পিতামহীর আশ্রয় পাই। আজো আবার তেমনি অসহায় হয়ে এই বালক আপনার আশ্রয় চাচ্ছে, আপনি কি কৃপা করবেন না?”

“বংশ, শাস্ত হও। আমি তোমায় আশ্রয় দিবো। সত্য বলতে কি,

তোমার আগমন আমার অপ্রত্যাশিত নয়। তোমার ছবি আগে থেকেই আমার মানসপটে ফুটে উঠেছে। জন্মান্তরের ভালো সংস্কার আছে তোমার ভেতর। তাইতো এ বয়সে ঈশ্বরের জন্তে এমন ব্যাকুল হয়েছে।”

পরম যত্নে জনার্দন স্বামী একনাথকে দীক্ষা দেন, সেই সঙ্গে দেন নিগূঢ় ভক্তিসাধনার উপদেশ। বালক শিশুর শাস্ত্র পুরাণ অধ্যয়নের উপরও গুরুত্ব দেওয়া হয়। জ্ঞানেশ্বরী গীতা ও ভাগবতের তত্ত্বসমূহে অচিরে একনাথের আয়ত্তে আসিয়া যায়। তাছাড়া, একনিষ্ঠ সাধনার ফলে ভক্তির নবধা লক্ষণও তাঁহার সাধন-সত্তায় প্রকট হইয়া উঠিতে থাকে।

গুরুগৃহে একাদিক্রমে ছয় বৎসর অতিবাহিত হয়। বালকশিষ্য ক্রমে পদার্পণ করে যৌবনে। শাস্ত্রজ্ঞান, প্রেমাবেগ ও কাব্য প্রতিভার অপরূপ স্ফুরণ দেখা যায় তাঁহার মধ্যে। অপার স্নেহ মমতা দিয়া গুরুজী একনাথকে গড়িয়া তুলিয়াছেন, তাঁহার এই রূপান্তর দেখিয়া সেদিন তাঁহাকে নিভৃতে ডাকিয়া কহেন, “বৎস, একনাথ, তোমার সাধনা ও শিক্ষা অনেক দূর এগিয়ে এসেছে। এবার তোমায় গুরু করতে হবে জীবনের একটা ছরুহ পর্য্যায়। সাধনজীবন ও অধ্যাত্ম-জীবনকে নিয়ে দূরে নিভৃতে সরে থাকলে চলবে না। এ সাধন দৃঢ়মূল হয়েছে কিনা তা যাচাই হবে নিত্যকার ব্যবহারিক জীবনে। উপলব্ধিতে আনতে হবে শ্রীমদ্ভাগবতের পরমতত্ত্ব। সচ্চিদানন্দ বিগ্রহ কৃষ্ণই রূপায়িত হয়ে আছেন সৃষ্টির প্রত্যেকটি বস্তুতে। সর্ব্বঘটে ব্যাপ্ত রয়েছে মহাকাশ। তেমনি সর্ব্ব বস্তুতে সর্ব্ব ঘটে কৃষ্ণ বিরাজিত। তাই তোমার কৃষ্ণসেবা হবে সর্ব্বত্র পৰিব্যাপ্ত। এই তত্ত্ব ও সাধনকে জীবনে রূপায়িত করতে হলে ব্যবহারিক জীবন বা সাংসারিক জীবনের প্রত্যেকটি কর্ম করতে হবে কৃষ্ণের কর্ম বলে। আমি ভাবছি, তোমার অধ্যাত্মসাধনার সঙ্গে ব্যবহারিক জীবনের শিক্ষাও তোমাকে দেবো। ছোটোকে মিলিয়ে যদি চলতে

পারো, তবেই সার্থক হয়ে উঠবে তোমার এই ভাগবত-ভিত্তিক ধর্মসাধনা।”

অতঃপর একনাথকে গুরু সরকারী কাজকর্মের নানাবিধ শিক্ষা দান করেন। ছুর্গের কিছু কিছু দায়িত্বপূর্ণ কাজও ধীরে ধীরে তাঁহার উপর হস্ত হয়।

জনশ্রুতি আছে, এই সময়কার একটি ঘটনায় তরুণ একনাথ যে সাহস, বুদ্ধিমত্তা ও প্রত্যাশপূর্ণমতির পরিচয় দেন, তাহার ফলে দেবগড় কেল্লা রক্ষা পায় এবং কেল্লাদার জনার্দন স্বামীও এক ভয়ঙ্কর বিপদ এড়াইতে সক্ষম হন।

সেদিন গভীর রাত্রির অন্ধকারে নিতান্ত আকস্মিকভাবে শত্রুর এক সেনাবাহিনী দেবগড় আক্রমণ করিয়া বসে। জনার্দন স্বামী তখন কেল্লার অভ্যন্তরে একটি নির্জন কক্ষে রহিয়াছেন ধ্যানাবিষ্ট। শত্রুসেনা রণহুঙ্কার দিয়া প্রাণপণে গুলীবর্ষণ করিতেছে, হুই একটি দল পাহাড়ের গা বাহিয়া উপরে উঠার চেষ্টাও করিতেছে। এই সঙ্কট সময়ে কেল্লার নায়কের দেখা নাই, কেল্লার রক্ষীদল কিংকর্তব্য-বিমূঢ় হইয়া ইতস্ততঃ ছুটছুটি করিতেছে।

তরুণ একনাথ চকিতে এ বিপদের গুরুত্ব বুঝিয়া নিয়াছেন। গুরুদেবকে ধ্যানাসন হইতে উঠানোর উপায় নাই, অথচ শত্রুর প্রতিরোধ করিতেই হইবে। তড়িৎবেগে তিনি জনার্দন স্বামীর কক্ষে ঢুকিয়া পড়েন, নিজেকে সজ্জিত করেন তাঁহার বর্ম, শিরজ্ঞাণ ও অস্ত্রশস্ত্রে। তারপর ছুর্গপ্রাকারে দাঁড়াইয়া দক্ষ নায়কের মত দেন প্রতি-আক্রমণের নির্দেশ। রাত্রির অন্ধকারে যুদ্ধের হাঁকডাক ও উত্তেজনায় একনাথকে কেহই চিনিতে পারে নাই, ভাবিয়াছে ছুর্গের নায়ক জনার্দন স্বামীই তাঁহার হৃদেভগ্ন বর্ম শিরজ্ঞাণ পরিধান করিয়া দিতেছেন কৌশলপূর্ণ সামরিক নির্দেশ।

ভীত প্রতিরোধের ফলে শত্রুসেনার মনোবল সেদিন ভাঙ্গিয়া পড়ে, পরাস্ত হইয়া তাহারা পলায়নপর হয়।

ইতিমধ্যে জনার্দন স্বামী ধ্যান হইতে ব্যথিত হইয়াছেন। বাহুজ্ঞান পাইবার সঙ্গে সঙ্গে ঘটনার গুরুত্ব বুঝিয়া নিতে তাঁহার দেহী হইল না। এ ঘোর বিপদে একনাথের উপস্থিত বুদ্ধি, বীরত্ব ও নেতৃত্বই আজ অসাধ্য সাধন করিয়াছে। শত্রু সেনা যেমন বিধ্বস্ত হইয়াছে তেমনি দুর্গবাসীদেরও হইয়াছে প্রাণরক্ষা।

একবার জনার্দন স্বামী সরকারের একটি জটিল হিসাব নিয়া বড় বিপদে পড়েন। হিসাবে একটা মারাত্মক ভুল রহিয়াছে কিন্তু সে ভুলের সূত্রটি খুঁজিয়া পাওয়া যাইতেছে না। কয়েকদিন ধরিয়া অবিরত চেষ্টা চলিল, কিন্তু সমস্তার সমাধান হইল না। একনাথের একটা বিশেষ গুণ, যখনি যে কাজে সে হাত দেয়, নিষ্ঠা ও দায়িত্ব নিয়া সে তাহা সম্পন্ন করে। জনার্দন স্বামী তাঁহার এই হিসাবের গরমিল সংশোধনের ভার শিশুর উপরই দিলেন।

একনাথ একাগ্র হইয়া এই হিসাব নিয়া পড়িলেন এবং বহু পরিশ্রমের পর ভুলের সূত্র খুঁজিয়া পাওয়া গেল। জনার্দন স্বামী তো মহা আনন্দিত। কহিলেন, “বৎস, একনাথ, তোমার নিষ্ঠা ও মনঃ-সংযম প্রশংসনীয়। এমনভাবে অধ্যাত্ম-সাধনের উপরেও মনকে করতে হবে কেন্দ্রীভূত। তোমার আমি একটি নিগূঢ় সাধন এবার দেবো। কেল্লার বাইরে যে অরণ্য রয়েছে, সেখানে বসে এই প্রক্রিয়াটি তুমি দীর্ঘকাল ধরে অনুষ্ঠান করো। আশীর্বাদ করি, তোমার সাধনা অচিরে জয়যুক্ত হয়ে উঠুক।”

গুরুর এই আশীর্বাদ সফল হইয়া উঠে, হস্তিপ্রেম-সিদ্ধ একনাথ জীহ্বির দর্শনলাভে হন কৃতকৃতার্থ।

শিশুর এ সাফল্যে জনার্দন স্বামীর খানন্দের অবধি নাই। স্নেহপূর্ণ স্বরে কহিলেন, “বৎস, একনাথ, আমার এখানে আর তোমার অবস্থান করার প্রয়োজন নেই। ইষ্টদেবের নাম স্মরণ করে, বেরিয়ে পড়ো, দর্শন করো দেশের প্রধান প্রধান দেবমন্দির ও তীর্থগুলি।”

পিতৃসম মমতায় গুরু এ কয়টি বৎসর একনাথকে সম্বীৰিত

রাখিয়াছেন, গুরুরূপে তাঁহার সাধনজীবনকে করিয়াছেন উদ্দীপিত। এবার আসিয়াছে বিচ্ছেদের পালা।

সজলচক্ষে করজোড়ে একনাথ কহেন, “প্রভু, এ ক’টি বৎসর এমন নিবিড় করে আপনাকে পেয়েছিলাম, কোনদিন ভাবতেও পারি নি, এভাবে আপনি আমায় দূরে সরিয়ে দেবেন।”

“না, বৎস, দূরে আমি কোনদিনই থাকবো না, দীক্ষামন্ত্রের মধ্যোই যে থাকে গুরুর নিবাস, ইষ্টধ্যানে জড়িয়ে থাকেন তিনি ওতপ্রোত হয়ে। তোমায় আমায় বিচ্ছেদ কোন দিনই হবে না, আর শোন— তীর্থ পরিক্রমায় একটা বড় লাভ আছে।”

“বুঝিয়ে বলুন আমায়, প্রভু।”

“হ্যাঁ, এই পরিক্রমা উপলক্ষে পথে প্রান্তরে, বনে জঙ্গলে কত ঘুরে বেড়াতে হবে, সাধু তপস্বর, যোগী ভোগী সবারই মুখোমুখী হতে হবে। পর্যটনের জীবনে আসবে কত সুখ-দুঃখ কত উত্থান পতন, কত বিচিত্র অভিজ্ঞতা। এই উত্থান-পতনের মধ্যে নামজপ আর ইষ্টধ্যান ঠিক থাকে কিনা, ইষ্টের উপলব্ধি আরো দৃঢ় হয় কিনা, সঠিকভাবে তা যাচাই করা হয়ে যাবে।”

পরিত্রাজন ও তীর্থদর্শনে কয়েক বৎসর অতিবাহিত হয়, তারপর একনাথ দেবগড়ে গুরুর সকাশে উপনীত হন। গুরু শিষ্যের পুনর্মিলনে দিব্য আনন্দ উৎসারিত হইয়া উঠে।

স্নেহপূর্ণ স্বরে জনার্দন স্বামী কহেন, “বৎস, তোমার উপর আমি প্রসন্ন হয়েছি। ঈশ্বর উপলব্ধি তোমার দৃঢ়তর হয়েছে, সাধনায় হয়েছে। তুমি সকলকাম। এবার নিজের ঘরে ফিরে যাও। বিবাহ করে সংসারী হও।”

একথা শোনা মাত্র আংকিয়া উঠেন একনাথ। তিনি কিছু বলার আগেই জনার্দন স্বামী হাসিয়া কহেন, “এতে বিস্মিত বা ক্রুদ্ধ

হবার কিছু নেই, একনাথ ! সাধনজীবনে জ্ঞান ভক্তি কর্মের সমন্বয় ফুটিয়ে তোলার উপদেশ দিয়েছিলেন আমার গুরুদেব শ্রীনৃসিংহ সরস্বতী। তার কিছুটা নিদর্শন তুমি দেবগড়ে থেকে প্রত্যক্ষ করেছে। তোমাকেও তেমনি জীবন যাপন করতে হবে। হ্যাঁ, তুমি বিবাহ করো,—যাপন করো অনাসক্ত কৃষ্ণভক্তের জীবন। কৃষ্ণ আর কৃষ্ণের রচিত এই বিশ্বসংসার এই উভয়কেই অবলম্বন করে থাকো। কৃষ্ণময় হও তুমি, আর প্রতি ভক্ত-মানুষের হৃদয়ে গড়ে তোল এক একটি কৃষ্ণমন্দির। আমার আর একটা নির্দেশ, সাধারণ চক্রমানুষের উপযোগী সুখবোধ্য ভক্তি-গ্রন্থাদি তুমি রচনা করো, পুরাণ শাস্ত্রের তত্ত্ব ও কাহিনীকে জনমানসের গ্রহণীয় করে দিকে দিকে ছড়িয়ে দাও।”

গুরুর নির্দেশ একনাথ শিরোধার্য করিয়া নেন। পৈঠানে ফিরিয়া গিয়া মিলিত হন বৃদ্ধ পিতামহ ও পিতামহীর সঙ্গে। অতঃপর বিজ্ঞাপুরের এক সং ব্রাহ্মণের কন্যাকে তিনি বিবাহ করেন। নাম তাঁহার গিরিজাবাঈ। একনাথের সাধনা ও ধর্মাচরণে পতিব্রত। গিরিজাবাঈ চিরকাল অকুণ্ঠ চিন্তে সহযোগিতা করিয়া গিয়াছেন।”

এবার পৈঠানে বসিয়া একনাথ রচনা করেন বহুতর ভক্তিমূলক গ্রন্থ। ইহাদের মধ্যে সাহিত্য, দর্শন ও ভাবসম্পদের দিক দিয়া সর্বাপেক্ষা গরীয়ান তাঁহার ভাগবতের ব্যাখ্যা। একাদশ স্কন্ধকে ভিত্তি করিয়া এটি রচিত। মারাঠী জনসাধারণ এ গ্রন্থকে বলে একনাথী ভাগবত। বিশহাজার পদ-সমন্বিত এই মহান গ্রন্থ মারাঠী সাহিত্যের এক অক্ষয় কীর্তি।

ভাবার্থ রামায়ণ একনাথের অন্ততম সার্থক আধ্যাত্মিক সাহিত্য কীর্তি। একনাথ নিজে বলিয়া গিয়াছেন—রামভক্তির এক দৈবী প্রেরণায় উদ্ধুদ্ধ হইয়া এই গ্রন্থ রচনা তিনি শুরু করেন। কিন্তু যুদ্ধ-কাণ্ডের চতুর্দশ অধ্যায় অবধি গিয়া আর এটি তিনি শেষ করিয়া যাইতে পারেন নাই। তাঁহার অন্ততম প্রিয় শিষ্য গাবোয়া এটি সমাপ্ত



করেন। কল্পিণী স্বয়ম্বর একনাথের আর এক উল্লেখযোগ্য সৃষ্টি। কৃষ্ণ-কল্পিণীর সুমধুর প্রেমরসের ভি়ান চড়ানো হইয়াছে ইহাতে। ইহা ছাড়া, তাঁহার অশ্রান্ত রচনার মধ্যে রহিয়াছে চতুঃশ্লোকী ভাগবত, স্বাত্মমুখ ও কয়েক শত মনোজ্ঞ অভঙ্গপদ। এই সব রচনায় একনাথের অধ্যাত্ম অনুভূতি ও জীবনদর্শনই শুধু প্রকাশিত হয় নাই, তাঁহার কবিত্ব শক্তির মহিমাও চমৎকার রূপে ফুটিয়া উঠিয়াছে।

উত্তরসূরী জ্ঞানদেব ও নামদেবের প্রভাব একনাথের মধ্যে যথেষ্টই আছে, কারণ জ্ঞানদেবের জ্ঞানেশ্বরী গীতা, অমৃতানুভব এবং নামদেবের প্রেম-ভক্তি-আপ্লুত অভঙ্গের দ্বারা তিনি অনেকাংশে অনুপ্রাণিত। কিন্তু তৎসঙ্গেও নিজ সাহিত্য-কৃতিতে একনাথের স্বকীয়তা ফুটিয়া উঠিয়াছে। ভক্তিরসাত্মক সাহিত্য সৃষ্টি করিলেও জ্ঞানদেব ও নামদেব তাঁহাদের গুরু নাথযোগীদের দার্শনিক মতবাদ এড়াইতে পারেন নাই। কিন্তু একনাথের সময়ে মারাঠার ভক্তি-আন্দোলনে রামায়ণ, মহাভারত, ভাগবত প্রভৃতি পুরাণ শাস্ত্রের প্রচার বাড়িয়াছে, ভক্তিদর্শন তাহার উৎস খুঁজিয়া পাইয়াছে সনাতন ধর্ম ও অবতার পুরুষদের লীলা কাহিনীতে। এই উৎস হইতেই, বিশেষ করিয়া ভাগবত পুরাণ হইতে একনাথ সংগ্রহ করিলেন তাঁহার অধ্যাত্ম-সাহিত্যের মূল রস, তারপর গুরুর নির্দেশ অনুযায়ী সহজ ভাষায়, সর্বজনীন সংবেদনে, তাহা পরিবেশন করিলেন ভক্ত সাধারণের কাছে। ফলে অল্পকালের মধ্যে একনাথ চিহ্নিত হইয়া উঠিলেন এক ভক্তিসিদ্ধ আচার্য্যরূপে। তাঁহাকে কেন্দ্র করিয়া এক নবতর খাতে হরিকথা ও হরিভক্তির রসপ্রবাহ সারা দেশে বিস্তারিত হইয়া পড়িল। পৌরাণিক ভক্তিদর্শন মারাঠায় পুনরুজ্জীবিত হইয়া উঠিল তাঁহারই জীবন সাধনা ও সাহিত্যকৃতির মধ্য দিয়া।

অধ্যাপক পটবর্ধন একনাথের সাধনজীবন ও কবিত্ব শক্তির ব্যাখ্যা-বিশ্লেষণ করিতে গিয়া একস্থানে বলিয়াছেন—একনাথের রচনায় অন্তরের আবেগধর্মিতা ও ভাবরসের সহিত মিলিত হইয়াছে

ভক্তি-সাধনার পরমতত্ত্ব। তাই দেখা যায়, একনাথ শুধু একজন ভক্তি-সিদ্ধ মহাপুরুষ মাত্র ছিলেন না, এই সঙ্গে তিনি ছিলেন অতি উচ্চ শ্রেণীর একজন ভাবুক কবি। প্রধানতঃ এই কারণেই একনাথ কীর্তিত হন একজন অতিশয় জনপ্রিয় ধর্মগুরু রূপে।<sup>১</sup>

ভক্ত কবি সিদ্ধপুরুষ একনাথের খ্যাতি পৈঠান ও পদ্ধারপুর অঞ্চলে পরিব্যাপ্ত হইয়া পড়ে। শত শত লোক আসিয়া ভীড় জমায় তাঁহার কীর্তনের অঙ্গনে। মহারাষ্ট্রের সর্বত্র তিনি পরিচিত হইয়া উঠেন একনাথ স্বামী নামে।

একনাথের রচিত অভঙ্গপদে গুরুভক্তি ও গুরুর পদে আত্ম-সমর্পণের তত্ত্ব বার বার প্রচারিত হইয়াছে। একটি অভঙ্গে কৃতজ্ঞতা জানাইয়া তিনি বলিতেছেন—

গুরুর দেওয়া বিপুল ঋণ  
কি করে একনাথ শুধবে তার এই জীবনে ?  
গুরু দেখিয়েছেন এক চমকপ্রদ ইন্দ্রজাল—  
শিষ্য একনাথের অহমিকার ভীত বিধ  
নিঃশেষে করেছেন তিনি পান,  
দৃষ্টি টেনে নিয়েছেন অন্তরের গভীরে,  
যেখানে রয়েছে সেই দিব্য আলোকের উদ্ভাসন—  
নেই কখনো যার উদয় আর অস্ত। ( অভঙ্গ ৪ )

গুরুর কৃপা হইতেছে পরশ-পাথর, যাহার স্পর্শগুণে শিষ্য বস্ত্র হয়, তাহার সর্বসত্তায় ঘটে রূপান্তর। একনাথ আর একটি পদে গুরুদেব জনার্দন স্বামীর মহিমা জ্ঞাপন করিতেছেন :

এ কি পরম বিশ্বয় ঘটালেন গুরু আমায় দিয়ে,  
হৃদয় কন্দরে করিলেন শ্রীভগবানের দর্শন।

আর এমনি কৃপালু তিনি  
 ত্যাগ দুঃখের চরম মূল্য থেকে  
 দিলেন আমায় অব্যাহতি।  
 শোন তবে গুরু-কৃপার গোপন রহস্য।  
 এই কৃপার আলোয় সর্ব বস্তু আর সর্ব চরাচর  
 হয়ে ওঠে ঈশ্বরময়।  
 চোখে যা দেখি, কানে যা শুনি,  
 যে আশ্বাদ গ্রহণ করি জিহ্বায়,  
 সব কিছতেই পাই ঈশ্বরের পরিচয়। ( অভঙ্গ ৮ )

ভক্তি আর নাম-সাধনা সম্পর্কে একনাথের বাণী বড় মর্মস্পর্শী।  
 তাঁহার মতে জীবন-প্রভু ঈশ্বরের নিরন্তর স্মরণই জীবন। আর  
 ঈশ্বরের বিমুক্ততা ও বিস্মরণ হইতেছে মায়া-বিক্রম।

স্মরণ মনন ও জপ কীর্তনের যে কোন সাধনই শ্রীভগবানকে  
 অমোঘ শক্তিতে আকর্ষণ করে, তিনি ছুটিয়া আসেন এই ধূলার  
 ধরণীতে। একটি পদে একনাথ গাহিতেছেন—‘সদা অমুখ্যানের  
 ফলেই তো। তিনি ত্রাণ করলেন যখন কোপন স্বভাব ঋষি ও তাঁর  
 ব্রাহ্মণ শিষ্যেরা এসে চাইলেন ক্ষুধার অন্ন; অর্জুনের ভাবনায় সদা  
 জাগ্রত ছিলেন কৃষ্ণ, তাই তো প্রভু বাঁচিয়েছিলেন তাঁকে বার বার।  
 ভক্তিতে শুধু শ্রীভগবান দর্শনই দান করেন না, ভক্তের বশুতাও তিনি  
 স্বীকার করেন। এমনি তাঁর মহত্ত্ব, আর এমনি ভক্তি-সাধনার  
 সাহায্য’ :

সদা ভক্ত-বশ আমার পরম প্রভু—  
 জ্যোপদীকে করেন উদ্ধার তার চরম বিপদে,  
 সুদামার দারিদ্র্য-দুঃখ মুহূর্ত্তে করেন দূর,  
 পরীক্ষিতকে মাতৃজঠরে বাঁচাতো কে  
 যদি না হতো তাঁর কৃপাঘন দৃষ্টিপাত ?

গোবর্ধন ধারণ ক'রে, তার নীচে গিরিধর  
রক্ষা করেন গাভী আর গোপগোপীদের ।  
গোরা কুমোরের সাথে বসে প্রভু আমার  
শুকিয়ে তোলেন ভেজা মাটির ভাণ্ড ।  
চোখা মেলার সাথে চড়ান পশুর দল,  
সাওতা মালীর পাশে বসে কাটেন বুনো ঘাস  
কবীরের সাথে টানা-পোড়েনে বুনেন কাপড়,  
রুইদাসের সঙ্গী হয়ে চামড়ায় রং লাগান,  
সজ্জন কষাইর মাংস বিক্রয়  
আর স্বর্ণকার নরহরির সোনা গালানোর কাজে  
হাত এগিয়ে দেন কুপালু প্রভু ।  
জনাবাদীর গোবর সানন্দে বহন করেন তিনি,  
আবার ভূমিকা নেন দামাজীর পারিয়া দূতের ।

মহারাত্ত্রের জনগণ পৌরাণিক সংস্কৃত সাহিত্যের সহিত বিশেষ  
পরিচিত ছিল না । একনাথ স্বামী এই পরিচয় সাধিত করিলেন  
প্রধানতঃ তাঁহার একনাথী ভাগবত ও রামায়ণ ভাষ্যের মধ্য দিয়া ।

জ্ঞানদেবের জ্ঞানেশ্বরী গীতার প্রভাব একনাথের সাধনজীবন  
ও সাহিত্যকর্মের উপর যথেষ্ট ছিল । একনাথ নিজের তাহা অকুণ্ঠ  
চিন্তে স্বীকার করিয়াও গিয়াছেন । কিন্তু তথা প্রমাণ হইতে দেখা  
যায়, গুরুর আদেশে ভাগবত-অনুকূল ভক্তিপ্রেমের যে সাধনা তিনি  
গ্রহণ করিয়াছেন, গুরুকৃপায় যে সাধনায় সিদ্ধ হইয়াছিলেন, উত্তর  
কালে তাঁহার ব্যক্তিত্ব ও জীবনদর্শনে তাই প্রতিকলিত হইয়া উঠে  
অধিক পরিমাণে ।

নিজের প্রেমভক্তি সাধনার অন্ততম উৎস ভাগবত সম্পর্কে  
একনাথের উক্তিটি বড় মনোরম । তিনি বলিতেছেন : শ্রীভাগবত  
হচ্ছে একটি বড় ক্ষেত্র । ব্রহ্মা প্রথমে এর জন্ত প্রদান করেন শস্ত্র-  
বীজ । নারদ এই ক্ষেত্রের অধিকারী, ঐ শস্ত্র-বীজ তিনিই বপন

করেন তাঁর নিপুণ হস্তে। ব্যাসদেব করেন ঐ ক্ষেতের নিরাপত্তার ব্যবস্থা—দশটি বাঁধ দিয়ে বেঁধে দেন এর চারদিকে। ফলে সে স্থান ভরে ওঠে দিব্য আনন্দ আর শান্তির ফসলে। শুক এই ফসল পাহারা দেবার ভার গ্রহণ করেন। হরিনাম অবিরত নিক্ষেপ করেন তিনি, আর পাপরূপ পাখীরা যায় দূরে পালিয়ে। ভক্ত উদ্ধব করেছিলেন কেটে-আনা শস্তের ঝাড়ু-বাছাই। কৃষ্ণজীর পরম বাণীর মূল্যবান শশুকণা বার করে রেখেছিলেন তা' থেকে। এ থেকে তৈরী হয়েছে দিব্যালোকের সৌরভ মাখানো কত আহাৰ্য্য। পরীক্ষিৎ এলেন তারপর। সংসার থেকে বিচ্ছিন্ন হয়ে বসে, শুক-দেবের মুখে পবিত্র ভাগবত কথা শুনে পান করেন তিনি ভাগবতী আনন্দের সুখ। তাঁর পদাঙ্ক অনুসরণ করে শ্রীধর ভাগবতের নিগূঢ় মর্ম্মকথার ওপর করেন আলোকপাত, দিব্য আনন্দ লাভ করে নিজে হন কৃতকৃতার্থ। জনার্দন স্বামীর প্রিয় মক্ষিকা, একনাথ তাঁর মারাঠী ভাষার দুটি পাখনা মেলে উড়ে গিয়ে বসেছে সেই লোভনীয় আহাৰ্য্যের ওপর, প্রাণভরে ভোজন করে হয়েছে ধন্ত।”

ভক্তি-সাধনকে একনাথ স্বামী বলিয়াছেন—পরম ধামে যাইবার প্রশস্ত রাজকীয় পথ। শ্রীহরি স্বয়ং এ পথের রক্ষণাবেক্ষণকারী, পথে তিনি চক্র হস্তে দাঁড়াইয়া থাকেন। আক্রমণকারী দম্ব্য বা বৈরীদের করেন হনন। নিজস্ব অস্ত্র দিয়া প্রভু আরো একটি বড় কৃপার কাজ করেন। সাধনপথের বড় শত্রু—সাধকের অহংবোধ। এই অহং-বোধকে কৃপালু প্রভু চূর্ণ করেন তাঁর গদার আঘাতে। তাঁর মঙ্গল শব্দের ধ্বনিতে শুচিশুভ হয়ে ওঠে ভক্তের অন্তর, জ্ঞানালোক প্রবেশ করে তাতে। আর শ্রীহস্তের প্রস্ফুটিত কমল দিয়ে আপ্তকাম ভক্তের করেন তিনি সম্বর্দ্ধনা।

আদর্শ ভক্ত ও তাঁহার ভক্তিসিদ্ধির যে বর্ণনা একনাথ দিয়েছেন তাহা ভাগবত হইতেই নেওয়া :

—এই চরম অবস্থার পথ ও লক্ষ্যবস্তু এক হয়ে ওঠে—ঈশ্বরের

বরণীয়, কৃপাপ্রাপ্ত হুই-চারিটি সাধকের ভাগেই এটা ঘটতে দেখা যায়। এককনিষ্ঠা আর শরণাগতির ফলে, সাধক গুরুর কৃপা লাভে ধন্য হন, উপলব্ধি করেন আত্মার স্বরূপ। তিনি দেখতে পান, সব মানুষের হৃদয়েই বিরাজিত রয়েছে শ্রীহরির মন্দির। শ্রীহরিকে দেখেন তিনি ভিতরে ও বাইরে, সর্বত্র সর্ববস্তুতে। তারপর ধাতা আর ধোয়ের তেতর থাকে না কোন পার্থক্য। ভক্ত নিজেই হয়ে যান ভগবান—যিনি সারা বিশ্ব ব্রহ্মাণ্ডে রয়েছেন ওতপ্রোত। এখন থেকে অবস্থান, চলাফেরা সব কিছু ভগবানের মধ্যে, ভগবানের সারূপ্য লাভ করেন তিনি। নাম রূপ, কার্য কারণের বিভেদ ঘুচে যায়, এ অবস্থায় সর্ববস্তুর মধ্যে প্রকৃত ভগবৎ-সত্তাকে তিনি দেখতে পান। সৃষ্টির এত কিছু বৈচিত্র্য, বৈষম্য ও ভেদের মধ্যে—এক ও অদ্বিতীয় পরমবস্তু শ্রীভগবানকে নিরন্তর করেন তিনি প্রত্যক্ষ। একনাথ বলেন, সর্বভূতে ভগবৎ-দর্শন—এই হচ্ছে ভক্তি সাধনার চরম কথা। কিন্তু এ অবস্থা ভক্ত লাভ করতে পারে না—যদি না প্রভুর কৃপার আলোয় তাঁর হৃদয় হয় উদ্ভাসিত।<sup>১</sup>

গুরু জনার্দন স্বামীর কৃপায় ও নিজের সাধন বলে একনাথ-স্বামী পরিণত হন এক ভক্তিসিদ্ধ মহাপুরুষরূপে। নিজ জীবনে এই সিদ্ধি কি ভাবে আসিল, কি ছিল তখনকার অতীন্দ্রিয় অভিজ্ঞতা, এ তথ্য তাঁহার কতকগুলি অভঙ্গপদে নিহিত রহিয়াছে।

একটি পদে তিনি গাহিতেছেন :

অস্তুরাত্মায় অধ্যাত্ম-সূর্য্যের ঘটলো দীপ্তিময় প্রকাশ—

দেখলাম আমি, এ প্রকাশের নেই উষা,

নেই মধ্যাহ্ন বা অস্তাচল।

নেই এর কোন আদি বা অন্ত।

সম্মুখে আমার আত্মিক সূর্য্যের চির উদ্ভাসন,

পূর্ব্ব-পশ্চিমের পার্থক্য চিরকালের মত গেছে ঘুচে।

কর্ম আর নৈকর্ম্য দুই-ই হয়ে গেছে অর্থহীন

দিনের আকাশে চাঁদের ছায়ার মত ।

একনাথ স্বামী ভক্তিসিদ্ধ মহাপুরুষ । বহুজনের বন্দিত, বহুজনের সাধনপথের আলোক দিশারী তিনি । কিন্তু গুরুদেব জনার্দন স্বামীর নির্দেশে, চিরদিন তিনি লোকালয়েই বাস করিয়াছেন, বাপন করিয়াছেন সাধারণ ভক্ত বৈষ্ণবের গৃহস্থ জীবন । ঘৃতের প্রদীপের মত এই জীবন পবিত্রতা আর স্নিগ্ধতায় ভরা, এই প্রদীপের আলো বিকীর্ণ হয় প্রায় চল্লিশ বৎসর ব্যাপিয়া । মহারাষ্ট্রের সহস্র সহস্র ভক্তের সাধনজীবন এই কল্যাণময় আলোকের দীপ্তিতে উজ্জ্বল হইয়া উঠে ।

পৈঠানে একনাথের দিনচর্যা ছিল এইরূপ : প্রত্যুষে উঠিয়া তিনি কিছুটা সময় ধ্যান-ভজনে অতিবাহিত করিতেন । তারপর নদীতে গিয়া সমাপন করিতেন স্নান তর্পণ । এবার শাস্ত্রপাঠের পর্ব । ভাগবত ও গীতার পাঠ ব্যাখ্যার আসরে সমবেত হইত অন্তরঙ্গ ভক্তমণ্ডলী । দিব্যভাবে আবিষ্ট পরম বৈষ্ণবের মুখনিঃসৃত বাণী ও উপদেশ সকলে উৎকর্ণ হইয়া শুনিতেন । মধ্যাহ্ন-ভোজনের একটা বিশেষ অঙ্গ ছিল অতিথি সংকার । অতিথিদের সঙ্গে নিয়া মিঠাহারী একনাথ আহার ক্রিয়া সম্পন্ন করিতেন । বিজ্রামের পর অপরাহ্নে আবার ভক্তিগ্রন্থ পাঠ । জ্ঞানেশ্বরী গীতা বা ভাগবত এই দুইটি প্রিয় গ্রন্থ প্রধানতঃ তিনি আলোচনা করিতেন । শ্রোতাদের মধ্যে তখন বহিয়া যাইত প্রেম-ভক্তি রসের প্রবাহ । সর্বাপেক্ষা আকর্ষণীয় ছিল একনাথের সাক্ষ্য সংকীর্তন । নিজের রচিত অভঙ্গ পদ গাহিয়া-গাহিয়া একনাথ স্বামী ভাবরসে উদ্বেল হইয়া উঠিতেন । ভক্তদের মধ্যে জাগিয়া উঠিত ভক্তিপ্রেমের প্রবল উদ্দীপনা । দূর-দূরান্ত হইতে বহু দর্শনার্থীর আগমন ঘটিত পৈঠানের এই বৈষ্ণব মহাত্মাকে দর্শনের জন্য ।

একনাথ ছিলেন প্রকৃত বৈষ্ণব, ভক্তেরা ভগবানের আপনজন,

প্রিয়জন, তাঁহাদের মধ্যে বর্ষ বৈষম্য থাকিবে, তাঁহার কাছে এই চিন্তা ছিল অসহনীয়। কীর্তনের আসরে উচ্চ নীচ, ব্রাহ্মণ অন্ত্যজ, সকলের সঙ্গে তিনি একসঙ্গে উপবেশন করেন, নির্বিচারে যে কোন জাতির ভক্ত অতিথিদের নিয়া ভোজনে বসেন, গ্রামের ব্রাহ্মণেরা ইহা সূচক্ষে দেখেন নাই। কঠোর ভাষায় তাঁহারা একনাথের এই আচরণের বিরুদ্ধে বলাবলি করিতে থাকেন।

একনাথ এ বিষয়ে একেবারে নির্বিকার ; স্বরচিত অভঙ্গপদে তিনি গাহিলেন—

হো কাঁ বর্ণামাজী অগ্রণী ।

যো বিমুখ হরিচরণী ।

ত্যাহুনি স্বপচ শ্রেষ্ঠ মানী—

জো ভগবদ্ ভজনী প্রেমল ।

—শ্রীহরির চরণকমল থেকে যে বিমুখ, বর্ণের দিক দিয়ে অগ্রণী হয়েও সে যে নিষ্ফল, বার্থ। তার থেকে সেই চণ্ডালও শ্রেষ্ঠ যদি সে প্রেমভরে করে ভগবদ্ ভজন।

পৈঠান ও তাহার কাছাকাছি গ্রামের উচ্চবর্ণের লোকেরা স্বভাবতঃই রক্ষণশীল। একনাথ স্বামীর নৃত্য কীর্তন ও ধর্ম উপদেশ সমাজে বিশৃঙ্খলা আনিতেছে, সমাজকে ধ্বংসের পথে টানিয়া নিতেছে বলিয়া তাহারা সোরগোল তুলিলেন। জনগণের মধ্যে একনাথের প্রভাব দিন দিনই বৃদ্ধির পথে, ইহাতেও অনেকের ঈর্ষার অবধি নাই। গুরু হইল নানা নিন্দাবাদ। বিরোধীরা রটাইলেন, একনাথের-গুরুকরণ হয় নাই। সত্যকার কোন সাধনা ও সিদ্ধিও তাঁহার নাই। যশ ও অর্থের লোভে তিনি ভূয়া আচার্য্যগিরি করিতেছেন, লোক ঠকাইয়া বেড়াইতেছেন।

এই সব চূর্ণাম একনাথ স্বামী শুনিলেন, কিন্তু তাঁহাকে কিছুমাত্র



বিচলিত হইতে দেখা গেল না। উদার ক্ষমান্দের সাধক ইহার উত্তরে যাহা লিখিলেন যে কোন সাধক বা সমাজ-সংস্কারকের কাছে তাহা চিরকাল স্মরণ রাখার মত।

নিন্দক কামাচা কামাচা।

গড়ী আত্মারামাচা।

নিন্দক আমুচী গঙ্গা।

আমুচী পাতকেঁ নেতে ভঙ্গা।

নিন্দক আমুচা সখা।

আমুচী বস্ত্রে ধুনো ফুকা।

নিন্দক আমুচী কাশী।

আমুচী পাতকেঁ অবধী নানী—

নিন্দক আমুচা গুরু

একা জনার্দিন থোরু।<sup>১</sup>

—নিন্দুকেরা আমার অতি প্রিয়, কারণ তারা যে সৃষ্ট একক আত্মারামের দ্বারা। নিন্দুকেরা যেন গঙ্গার পবিত্র ধারা, আমাদের যত কিছু পাপরাশি করছে বহন। নিন্দুকেরা আমাদের সখা, আমাদের কলুষিত বস্ত্র বিনামূল্যে দিচ্ছে ধুয়ে। নিন্দুকেরা আমার কাশী, সব কিছু পাপ করছে বিনষ্ট। নিন্দুকেরা আমার গুরু, কারণ, তারাই যে আমায় গড়ে তুলেছে জনার্দিন স্বামীর শিষ্যরূপে।

সাধক-কবি হিসাবে একনাথ স্বামীর দুইটি অবদান ধর্মসংস্কৃতির ইতিহাসে অমর হইয়া থাকিবে। প্রথমত, আপন রচনার মাধ্যমে বেদান্তের তত্ত্বকে তিনি সাধারণ মানুষের কাছে সহজবোধ্য করিয়া তুলিয়াছেন। দ্বিতীয়ত, তাঁহার ভক্তি সাহিত্য মারাঠী ভাষায় রচিত হওয়ার ফলে মারাঠী জনগণের অশেষ কল্যাণ সাধিত হইয়াছে।

বেদান্তের উচ্চতর তত্ত্বের আলোচনা আগে শুধু সংস্কৃতে শিক্ষিত মুষ্টিমেয় মানুষের মধ্যেই সীমাবদ্ধ ছিল। এবার তাহার জনপ্রিয়তা বৃদ্ধি পায়, সমাজের স্তরে স্তরে ছড়াইয়া পড়িতে থাকে। একনাথের অভঙ্গপদ গ্রামে গ্রামে নগরে নগরে গীত হইত। একনাথী ভাগবত ও রামায়ণ পঠিত হইত বহুতর ধর্মসভায়। কাজেই তাঁহার তত্ত্ব ও আদর্শের প্রচার দ্রুতবেগে বাড়িয়া চলে।

পূর্বসূরী জ্ঞানদেব তাঁহার গীতাভাষ্যে বেদান্তের তত্ত্ব আলোচনা যথেষ্টই করিয়াছেন, কিন্তু জ্ঞানদেবের দার্শনিক তত্ত্ব ও তাঁহার ভাষা ছিল জটিল ও দুর্বোধ্য। তাঁহার দর্শন-ব্যাখ্যা ছিল মেঘলোকের মত ধোঁয়াটে, সাধারণ মানুষের ধরা ছোঁয়ার উর্দ্ধে। কিন্তু একনাথের ব্যাখ্যা ছিল অতি প্রাঞ্জল, গ্রাম্য মানুষের পক্ষেও তাহার রসস্বাদ গ্রহণ করা কঠিন হইত না। মর্তের মানুষের কাছে স্বর্গীয় সুখ তিনি যেন নির্বিচারে অকুপণ করে বিলাইয়া গেলেন।<sup>১</sup>

মারাঠিতে রচিত একনাথের ধর্মসাহিত্যের প্রশংসায় মুখর হইয়া অধ্যাপক পটবর্দ্ধন লিখিয়াছেন : “পণ্ডিতদের জ্ঞান লিখে নাম-যশের অধিকারী হবার ইচ্ছে একনাথের ছিল না। তিনি লিখেছিলেন সমাজের সর্ব স্তরে সত্যবোধ ও জ্ঞানের আলোক বিস্তারের জ্ঞান। স্বীলোক, শূদ্র ও অশিক্ষিত জনসাধারণের কল্যাণেই লেখনী ধারণ করেছিলেন তিনি। পণ্ডিতের ঘৃণাকে তিনি করতেন ঘৃণা, আর লক্ষ লক্ষ নিরক্ষর দেশবাসীর দাবীকে অগ্রাধিকার দিয়ে সদাই লিখে চলতেন দেশজ ভাষায়।

“দেশজ ভাষার জ্ঞান তাঁকে অসম সাহসে যুঝতে হয়েছিল—এবং এতকালের ব্যবধানও, আজকের দিনেও, দেশজ ভাষার লড়াই আমাদেরও কম চালিয়ে যেতে হচ্ছে না। তখনকার দিনে সংস্কৃত জানা পণ্ডিতরা ছিলেন গর্ব্বফীত—মারাঠী ভাষা হচ্ছে অশিক্ষিত, নিম্নস্তরের গ্রাম্য লোকের ভাষা, এ ভাষায় লিখে নিজেকে হয়

করবো কেন—এই ছিল তাঁদের মনোভাব। একনাথ তাঁর মহান পূর্বসূরী জ্ঞানদেবেরই অনুসরণ করে চললেন। অন্ধ মূক জনগণের জন্ত তাঁহার হৃদয় কেঁদে উঠেছিল। তিনি উপলব্ধি করেছিলেন—ঐ হতভাগ্য জনগণের হৃদয়ে প্রবেশের পথ হচ্ছে তাদের মাতৃভাষা। তাই সেই ভাষাতেই নিজের ভক্তি সাহিত্য তিনি রচনা করলেন।”

দেশজ ভাষায় ধর্মগ্রন্থ রচনার জন্ত কাশীর শাস্ত্রবিদ পণ্ডিতেরা একনাথকে তীব্র ভাষায় ধিকার দিয়াছিলেন। মহারাষ্ট্রের রক্ষণশীল বিরোধিতাও বার বার তাঁহার বিরুদ্ধে উদগ্র হইয়া উঠে। এমনকি ঘরের মধ্যে নিজের পুত্রের গঞ্জন ও তাঁহাকে কম সহ্য করিতে হয় নাই। এই প্রতিকূল পরিবেশে যে দৃঢ়তা ও আত্মপ্রত্যয় নিয়া তিনি নিজের আরক্স ব্রত উদ্‌যাপন করিয়াছেন তাহা বিস্ময়কর।

পুত্র হরি শাস্ত্রী সংস্কৃতশাস্ত্র অধ্যয়ন করিয়াছেন, ব্রাহ্মণ-সমাজে তাঁহার যথেষ্ট প্রতিষ্ঠা। একদিন পিতাকে তিনি খুব চাপিয়া ধরিলেন, কহিলেন, “পিতা, শাস্ত্রজ্ঞ ব্রাহ্মণের বংশে আমাদের জন্ম। সারা দেশের এক শ্রেষ্ঠ সাধকরূপে,—সুপণ্ডিত ও আদর্শবাদী আচার্য্যরূপে, আপনার কত সুনাম। আপনার মত লোক মারাঠী ভাষায় ধর্মগ্রন্থ লিখবেন, ভাষণ দেবেন? উত্তর ও দক্ষিণ ভারতের বিশিষ্ট পণ্ডিতেরা এ নিয়ে আপনার কত নিন্দাবাদ করছেন।”

“এসব তো আমার অজানা নয়, বৎস, তা এখন তোমার মূল বক্তব্যটা কি বল দেখি?” প্রশান্ত কণ্ঠে বলেন একনাথ স্বামী।

“আমার বক্তব্য আর সারা দেশের পণ্ডিতসমাজের বক্তব্য একই। এখন থেকে আপনি সংস্কৃত ভাষাতেই রচনা করুন আপনার ধর্মগ্রন্থ। প্রয়োজনমত মারাঠী সাহিত্যিকেরাই তা থেকে অনুবাদ করে নেবেন। হ্যাঁ, আমাদের বিশেষ অনুরোধ, মারাঠী ভাষায় আপনি আর লিখবেন না, ভাষণও দেবেন না।”

“এ অনুরোধ অগ্রায়। জাতির পক্ষে দেশের পক্ষে অকল্যাণকর, বৎস।”

অতঃপর স্বরচিত একটি অভঙ্গপদে একনাথ দেশবাসীকে  
উপরোক্ত প্রশ্নের উত্তর দিলেন :

সংস্কৃত বাণী দেবেঁ কেলী—

প্রাকৃত ওরী চোরাপাস্থনী ঝালী  
অসোত যা অভিমান ভুলী ।

বৃথা বোলী কায় কাজ—  
আঠা সংস্কৃত অথবা প্রাকৃত ।

ভাষা ঝালী জে হরি কথা  
তে পাবনাচে তত্ত্বটা

সত্য সর্বথা মানলী—  
দেবাসি নাই বাচাভিমান

সংস্কৃত প্রাকৃত তায় সমান ।  
জ্যা বাণী জাহলে ব্রহ্মকথন  
ত্যা ভাষা শ্রীকৃষ্ণ সন্তোষে ॥

—সংস্কৃত ভাষা কি দেবতার সৃষ্টি ?  
আর প্রাকৃত সৃষ্টি করেছে চোরেরা ?  
আসলে অহমিকার জালে  
ভুল করে বলা হয় এমনতরো কথা ।  
আসলে সংস্কৃত বা প্রাকৃত যা-ই হোক,  
যে ভাষা বর্ণনা করে হরিকথা—  
পবিত্র আর সত্য বাণী রূপে  
সবাই মোরা দিই তার সম্মান ।  
ভাষা নিয়ে দেবতার নেই পক্ষপাত,  
সংস্কৃত আর প্রাকৃত দুই-ই তুল্য তাঁর কাছে ।  
ব্রহ্মবাণী, ব্রহ্মজ্ঞান যে ভাষাতে হয় বর্ণন  
তাতেই যে হয় প্রভু শ্রীকৃষ্ণের সন্তোষ ।

পৈঠান এবং পদ্ধারপুরকে কেন্দ্র করিয়া একনাথ স্বামী অতিবাহিত করেন প্রায় চল্লিশ বৎসর। কর্মময় ও সাধনময় এই দীর্ঘ জীবনে তাঁহাকে ঘিরিয়া গঠিত হয় একটি বিরাট তন্ত্র দল। শত শত ভক্ত সাধকে অন্তরঙ্গ ভক্তিসাধন দিয়া তিনি কৃতার্থ করেন, আর সহস্র সহস্র সাধারণ মানুষ তাঁহার ভাবসমৃদ্ধ কীর্তন, ভাষণ ও ধর্মসাহিত্য হইতে লাভ করে প্রেমভক্তির উদ্দীপনা।

১৫৯৯ খৃষ্টাব্দে ৬৬ বৎসর বয়সে পৈঠানে নিজ গৃহের অঙ্গনে হরিকথা বলিতে বলিতে এই হরিময় ভক্তিসিদ্ধ মহাপুরুষ সজ্জানে অমরলোকে প্রয়াণ করেন।

# বিশ্বজ্ঞানন্দ সরস্বতী

উত্তর ভারতের সাধক ও সারস্বত সমাজের এক অত্যাঙ্কল ব্যক্তি ছিলেন স্বামী বিশ্বজ্ঞানন্দ সরস্বতী। উনিশ শতকের দ্বিতীয়পাদ হইতে শুরু করিয়া অর্ধশত বৎসরেরও অধিককাল অধ্যাপ্ত-ভারতের প্রাণকেন্দ্র বারাণসীতে এই মহাত্মা বিরাজিত থাকেন, বিস্তারিত করেন তাঁহার তপস্তার আলোক। সন্ন্যাসী ও গৃহস্থ দুই-ই দলে দলে শরণ নিত এই মহাত্মার চরণে। ত্যাগ বৈরাগ্য ও জ্ঞানের হরিহর-মুষ্টি এই মহাসাধকের জীবন হইতে সংগ্রহ করিত মুক্তিপথের পাথর।

বিশ্বজ্ঞানন্দের পূর্বাশ্রমের পিতার নাম সংগমলাল, মাতা যমুনা দেবী। উত্তর প্রদেশের বোড়ী গ্রামে এক সদাচারী ব্রাহ্মণ বংশে সংগমলালজীর জন্ম। সংসারে আর্থিক সচ্ছলতা তেমন ছিল না। ভাগ্য অশেষে দেশের নানাস্থানে ঘোরাফেরা করিয়া অবশেষে তিনি হায়দ্রাবাদ অঞ্চলের কল্যাণী নামক স্থানে আসিয়া উপস্থিত হন। সবসুখরাম এখানকার নবাব সরকারের এক উচ্চপদস্থ ব্যক্তি, ইহারই আশ্রয়ে থাকিয়া সংগমলাল সরকারী কাজে নিযুক্ত হন। কিছুদিন পরে সবসুখরামের ভগিনী যমুনাদেবীকে বিবাহ করেন।

১৮০৯ খৃষ্টাব্দে, ভাদ্রমাসের জন্মাষ্টমীর পুণ্যদিনে মাতুলগৃহে বিশ্বজ্ঞানন্দের জন্ম হয়। গৌরকান্তি, অনিন্দ্যসুন্দর এই নবজাত শিশুটিকে পাইয়া সকলের আনন্দের অবধি নাই।

জন্মাষ্টমীর পবিত্র দিনে জন্ম, তাই ভাবিয়া-চিন্তিয়া শিশুর নাম রাখা হইল—বংশীধর। পিতা সংগমলালজী তাড়াতাড়ি ছুটিয়া গিয়া শহরের এক জ্যোতিষীকে ডাকাইয়া আনিলেন। ইতিপূর্বে পর পর দুইটি সন্তান ভূমিষ্ঠ হওয়ার অল্পকাল মধ্যে মারা গিয়াছে। তাই নবজাত শিশুটিকে নিরা হুশিস্তার অবধি নাই। কিন্তু জন্মলগ্ন বিচার

করিয়া জ্যোতিষী কহিলেন, “আপনারা ঘাবড়াবেন না। আমি দেখতে পাচ্ছি, এ শিশু দীর্ঘজীবী হবে, শুধু তাই নয় সহস্র সহস্র মানুষকে সে দেবে আশ্রয়।”

বৎসর খানেক পরে ধুমধাম করিয়া বংশীধরের অন্নারস্ত উৎসব সম্পন্ন হয়। শিশুর কল্যাণের জন্ত পূজা হোম যাগযজ্ঞের অমুষ্ঠানও কম করা হয় নাই। কিন্তু দুর্ভাগ্যক্রমে অল্পকালের মধ্যে বংশীধর আক্রান্ত হয় তুশ্চিকিৎস রোগে। তাহার দেহে দেখা দেয় মূর্ছা বা অপস্মার রোগ। এ রোগের আক্রমণের শেষে দেহটি দুর্বল ও অসাড় হইয়া পড়িত।

দিন দিন শিশুর দেহ ক্ষীণ হইয়া আসিতে থাকে। সকলেরই ধারণা হয়, এ মৃগী রোগ আর সারিবার নয়। সারা গৃহে নামিয়া আসে বিষাদ ও হতাশার অন্ধকার।

মাতুল সবসুখরাম বড় ভালবাসেন বংশীধরকে। অবসর পাইলেই মাঝে মাঝে তাহাকে নিয়া বেড়াইতে বাহির হন, নানা গল্পকথায় তাহাকে উৎফুল্ল রাখিতে চেষ্টা করেন।

বংশীধরের বয়স তখন চার বৎসর। মাতুলের সঙ্গে একদিন সে ভ্রমণে বাহির হইয়াছে। পথ চলিতে চলিতে হঠাৎ দেখা যায় বালকের অদ্ভুত ভাবান্তর। চোখদুটি বিফারিত, ভাবাবেশে সারা দেহ থরথর করিয়া কাঁপিতেছে। মাতুলের হাতটি সজোরে আঁকড়াইয়া ধরিয়া হঠাৎ সে থামিয়া পড়ে। ব্যগ্র দৃষ্টিতে তাকাইয়া সবসুখরাম প্রশ্ন করেন, “কিরে বংশীধর কি হয়েছে? অমন করছিস কেন? আমায় কিছু বলবি?”

“মামাজী, মামাজী! আমার কেতাব কোথায়?” উত্তেজিত স্বরে বলিতে থাকে বালক বংশীধর।

“কোন কেতাব, কিসের কেতাব, ভাল করে বুঝিয়ে বল, এখনই তোকে আমি তা কিনে দিচ্ছি।”

“আমার নিজের সেই কেতাবটি এনে দাও। তা পেলেই আমার

ব্যারাম সেরে যাবে। আমি ভালো হয়ে উঠবো।” মোহগ্রস্তের মত কথাটি সে বার বার আওড়ায়।

সবসুখরাম ভাবেন, রোগে ভুগিতে ভুগিতে বালকের মস্তিষ্কের ধারণশক্তি কমিয়া গিয়াছে। মাথায় হঠাৎ খেয়াল চাপিয়াছে, একটা বই চাই। তাই নিয়াই সে এমন উত্তেজিত। বাড়ীতে ফিরিয়া রংবেরং-এর বই দুই চারটি আনিয়া দিলেন, কিন্তু বংশীধরের সেদিকে কোন দৃষ্টিপথই নাই। এগুলি দূরে ছুঁড়িয়া ফেলিয়া সে কাঁদিতে বসে তাহার কোন্ এক কাল্পনিক বই-এর জন্ত।

মাতুল সান্ত্বনা দেন, “বেশ তো, বংশী, এনে দেবো তোর বই। কিন্তু কোথায় রয়েছে তা তো বলবি।”

সজলচক্ষে বালক উত্তর দেয়, “তা রয়েছে আমার কুঠিয়ায়। শিগ্গীর তোমরা খুঁজে নিয়ে এসো। নইলে আমি বাঁচবো না।” এ অদ্ভুত কথার কি রহস্য তা কে জানে? বাড়ীর লোকেরা আর ইহা নিয়া মাথা ঘামান নাই।

অসুখ কি করিয়া ভাল হইবে, এই চিন্তায় জননীর মনে কিন্তু একটুও শান্তি নাই। সাধুসন্তের সন্ধান পাইলেই তাড়াতাড়ি সেখানে ছুটিয়া যান। শাস্ত্রজ্ঞ ব্রাহ্মণ দেখিলেই তাঁহাকে ঘরে আনাইয়া শান্তি-স্বস্ত্যয়ন করান, কিন্তু কোন কিছুতেই কাজ হইতেছে না। যমুনাদেবী ক্রমে একেবারে হতাশ হইয়া পড়েন।

কল্যাণীতে সে-বার এক সতীদাহ অনুষ্ঠিত হইবে। একটি ক্ষত্রিয়া নারী পতির চিতায় আরোহণ করার সঙ্কল্প নিয়াছেন; সংবাদ পাইয়া দলে দলে লোক ছুটিয়া চলিয়াছে শ্মশানের দিকে।

সাধারণ মানুষের ধারণা, চিতাশয্যায় উপবিষ্টা সতী নারীর আশীর্ব্বাদ একেবারে অমোঘ, তাহা কখনো ব্যর্থ হয় না। যমুনাদেবী স্থির করিলেন, বালক বংশীধরকে নিয়া সতীর কাছে যাইবেন, রোগমুক্তির জন্ত মাগিবেন তাঁহার আশীর্ব্বাদ।

চিতাশয্যার কাছে গিয়া সাধুনয়নে পুত্রের জটিল রোগের কথা



নিবেদন করা মাত্র সতী বলিয়া উঠেন, “বহিন, তুমি তোমার এ ছেলের জন্য মোটেই ভেবো না। সিদ্ধযোগীর চিহ্ন রয়েছে এর দেহে। অকালমৃত্যু কখনো এর ঘটবে না। তবে একে হয়তো তোমরা ধরে রাখতে পারবে না, ঘর ছেড়ে এ ছেলে সন্ন্যাসী হবে।”

পুত্রকে নিয়া যমুনাদেবী গৃহে ফিরিয়া আসেন। যে কারণেই হোক, বেশ কিছুদিন বংশীধর মূর্ছা-রোগে আক্রান্ত হয় নাই। কিন্তু বৎসরখানেক বাদে আবার ইহার পুনরাবুত্তি ঘটিতে শুরু করে। আত্মীয়স্বজনদের উদ্বেগ আরো বাড়িয়া যায়।

কল্যাণীর কাছেই কীর্ণা ও মঞ্জিরা নদীর পবিত্র সঙ্গমস্থল। প্রতি বৎসর হাজার হাজার নরনারী এখানে স্নান করিতে আসে। একটি বৃহৎ মেলা উৎসবও এই উপলক্ষে অনুষ্ঠিত হয়।

সবসুখরাম আত্মপরিজন ও বন্ধুদের নিয়া সে-বার এই মেলায় আসিয়াছেন। স্নান-তর্পণের শেষে একজন সঙ্গী কহেন, “এখানে ঘাটের খুব কাছেই একটা পর্ণ কুটিরে একান্তে বাস করেন এক বড় মহাত্মা। যাবে তাঁকে দর্শন করতে?”

সাধুদর্শনের কথায় সবাই মহা উৎসাহী হইয়া উঠে। সবসুখরাম বিচক্ষণ ব্যক্তি। তিনি বলেন, “না, এত লোক নিয়ে গিয়ে মহাত্মার শান্তিভঙ্গ করা ঠিক নয়। ছোট ছেলেমেয়েরা এই ঘাটে বসে থাকুক। চল, আমরা আর সবাই সেখানে যাই।”

সঙ্গীরা সবাই এ কথায় সায় দেয়—কিন্তু গোল বাধাইয়া বসে পাঁচ বৎসরের বালক বংশীধর। সে বায়না ধরে, “না—আমি যাবোই সাধুজীকে দেখতে। আমায় নিয়ে চল। আমি এখানে থাকবো না।”

বালককে বুঝাইয়া নিরস্ত করা যায় না, তখনি সে শুরু করে চীৎকার আর কান্না। মাতুলকে হার মানিতে হয়, বংশীধরসহ সবাইকে নিয়া উপস্থিত হন সাধুর আশ্রমে।

প্রণাম নিবেদনের পর সাধু একে একে সবাইকে আশীর্বাদ জ্ঞাপন করেন। এবার বালকের দিকে সহাস্তে তাকাইয়া মাতুল

সবসুখরাম কহেন, “বংশী এখানে আসবার জন্ত তো এতো কাদাকাটি করলি। কিন্তু এসে কি তোর লাভ হলো, বলতো?”

বলিক ইতিমধ্যে ভাবাবিষ্ট হইয়া পড়িয়াছে। পর্ণকুটিরের এদিক ওদিকে তীক্ষ্ণ দৃষ্টিতে কি যেন সে খুঁজিয়া বেড়ায়। হঠাৎ দৃঢ় স্বরে সে বলিয়া বসে, “মামাজী, এই তো, এই কুঠিয়ার ভেতরেই আছে আমার সেই কেতাব, আমার নিজের হাতে লেখা কেতাব। হ্যাঁ, এখানেই রয়েছে।”

মহাত্মার দিকে ফিরিয়া সবসুখরাম যুক্তকরে বলেন, “প্রভু, দেখুন এ বালক কি বলছে। তার নিজের হাতে লেখা একটা বই নাকি এখানে রয়েছে। এ বইয়ের কথা আগেও ওর মুখে আমরা শুনেছি। কিন্তু ব্যাপারটা কি, এর ভেতরে কোনও রহস্য আছে কিনা, তা আমরা কি করে বুঝবো?”

মহাত্মা শাস্ত্র স্বরে কহেন, “আর কি বলে এই বালক, আমায় খুলে বল তো?”

“প্রভু, আমার এই ভাগ্যেটি মৃগীরোগে ভুগছে অনেকদিন। শরীর বড় দুর্বল, আর বেশী দিন বাঁচবে বলে মনে হয় না। এই বই প্রসঙ্গে বালক কিন্তু একটা অদ্ভুত কথা বলে। এ বই ওর নিজস্ব বই, আর এটা খুঁজে পেলে ওর রোগ নাকি সেরে যাবে। এখন আপনার আশ্রমে এসে তো দৃঢ়স্বরে বলছে বইটি এখানেই রয়েছে।”

ক্ষণকাল চুপ করিয়া থাকিয়া সাধু মহারাজ কহেন, “ত্যাগো, এ বালক কিন্তু ঠিক বালকভাব থেকে কথাগুলো বলছে না, একটা দিব্যভাবে আবিষ্ট হয়ে রয়েছে। তোমরা তন্ন তন্ন করে আমার কুটিরে অনুসন্ধান করো। কোন পুরাণো হাতে-লেখা পুঁথি আছে কিনা, ত্যাগো।”

ছোট খড়ো ঘর। গ্রন্থপেটিকা ছাড়া অশ্রু আসবাবপত্র তেমন বেশী কিছু নাই। অনুসন্ধানের কাজ শেষ হইল, কিন্তু বালকের কথিত বই-এর পাভুলিপি কোথাও পাওয়া গেল না।

ভাবাবিষ্ট বংশীধরের দেখা গেল এক নূতন রূপ। কি এক অজ্ঞাত আনন্দে সে ভরপুর। সারা দেহ রোমাঞ্চিত, কম্পমান। ছুই চোখ বাহিয়া ঝরিতেছে পুলকাক্রম, নাসিকায় ঘন ঘন বহিতেছে দীর্ঘশ্বাস। আত্মপ্রত্যয়ের সুরে সে বলিয়া ওঠে, “কুটিরের চালের বাতা ভাল করে খুঁজে ছাখো। ওখানেই পাষে আমার বই। হ্যাঁ, আর ভয় নেই, এবারে আমার রোগ যাবে পালিয়ে, তোমাদেরও আর থাকবে না কোন কষ্ট।”

বালকের নির্দেশিত সেই স্থানটিতেই পাওয়া গেল একখানি পুরাতন হস্তলিখিত জীর্ণ পুঁথি, এক খণ্ড কাপড় দিয়া সযত্নে জড়ানো।

বংশীধরের হাতে বইয়ের মোড়কটি দেওয়া মাত্র চোখ-মুখ উজ্জল হইয়া উঠে, ভাবাবেশ অন্তর্হিত হয়। স্বাভাবিক বালক-ভাব আবার ফুটিয়া উঠে তাহার দেহে-মনে

সাধুজী গ্রন্থটি সতর্কভাবে পরীক্ষা করেন, বিস্ময়ে তাঁহার চোখ দুইটি বিস্ফারিত হইয়া উঠে। সজল চক্ষে আবেগভরা কণ্ঠে কহেন, “এ যে আমার গুরুদেবের স্বহস্ত লিখিত গ্রন্থ। গীতার নির্ঘ্যাস এতে তিনি লিখেছেন, এ গ্রন্থ তাঁর বড়ই প্রিয় ছিল। পাঁচ বৎসর আগে, তাঁর দেহান্তের প্রাকালে বার বার এটি তিনি চেয়েছিলেন। তখন খুঁজে পাওয়া যায় নি এবং এ জন্ত মর্মান্বিত হয়ে শেষ নিঃশ্বাস ত্যাগ করেন।”

উপস্থিত সকলে তো এ কাহিনী শুনিয়া মহা বিস্মিত। সবসুখরাম কোতুহলভরে প্রশ্ন করেন, “মহারাজ, সেই গ্রন্থের সঙ্গে এ বালকের কি সম্পর্ক তাতো বুঝতে পারছিনে। একটু বিশদ করে বলুন।”

“ভগবান গীতাতে বলেছেন, মৃত্যুর সময়ে মানুষ যে ভাবে ভাবিত হয় পরবর্তী জীবনে সেই ভাব ও সেই সংস্কার উদ্‌গত হতে দেখা যায় তার ভেতর। তোমাদের এই জাতিস্মর বালক পূর্বজন্মে ছিলেন আমাদের গুরুদেব। এ আশ্রমেরই অধ্যক্ষ তিনি ছিলেন। এখন থেকে এর দেহ রোগমুক্ত হলো। তোমরা দেখো, অনুর

ভবিষ্যতে এর সাঙ্খিক সংস্কার জেগে উঠবে। আর পূর্বজন্মের মত এ জন্মেও গ্রহণ করবেন সন্ন্যাস-জীবন।”

অতঃপর বাড়ির সবার সঙ্গে বংশীধর কল্যাণীতে ফিরিয়া আসে। এই ঘটনার পর হইতে আর কোনদিন কিন্তু মূর্চ্ছা-রোগে সে আক্রান্ত হয় নাই। ধীরে ধীরে সে একটি সুস্থ সবল কিশোরে পরিণত হয়।

কিশোর বংশীধরের জীবনে এবার আসে এক বড় দুর্দ্দৈব। অল্পদিনের ব্যবধানে পিতামাতা উভয়েই ইহলোক ত্যাগ করিয়া চলিয়া যান। মাতুল সবসুখরাম এই কিশোর ভাগ্নেটিকে বড় ভালোবাসেন। এখন হইতে তিনিই গ্রহণ করেন বংশীধরের সকল কিছু দায়িত্ব। শিক্ষার সর্বপ্রকার সুযোগ দিয়া প্রকৃত মানুষরূপে তাহাকে গড়িয়া তোলার জন্য তিনি সচেষ্ট হন।

ভট্টজী নামে এক বিখ্যাত পণ্ডিত নিকটেই থাকেন, তাঁহার টোলে বংশীধরকে পড়িতে দেওয়া হয়। বালক অতি অল্প সময়ে সংস্কৃত ব্যাকরণ, কাব্য, অলঙ্কার প্রভৃতির পাঠ শেষ করিয়া ফেলে। স্মৃতিশক্তি তাহার অতিশয় প্রখর, একবার যাহা শ্রবণ করে, আর কখনো বিস্মৃত হয় না। শিক্ষাগুরু ভট্টজী এজন্য তাহাকে বড়ই স্নেহ করিতেন, ডাকিতেন ঋতিধর বলিয়া।

কয়েক বৎসর সংস্কৃত সাহিত্য ও বেদ বেদান্ত পাঠে অতিবাহিত হয়। অতঃপর সবসুখরাম বংশীধরের ফার্সী ও মারাঠী ভাষা শিক্ষার ব্যবস্থা করেন। এই দুইটি ভাষার উপর দখল না থাকিলে তখনকার দিনে দাক্ষিণাত্যে কেহ সরকারী দপ্তরে উন্নতি করিতে পারিত না। তাই সবসুখরাম তাড়াতাড়ি ভাগ্নেকে এই ভাষা দুইটি শিখাইয়া নিতে চেষ্টিত হন। প্রতিভাধর বংশীধরও অনতিবিলম্বে ইহাতে ব্যুৎপন্ন হইয়া উঠেন।

বংশীধর তখন সবেমাত্র যৌবনে পদার্পণ করিয়াছেন। সুন্দর স্মৃতিম দেহ ও পরিপূর্ণ স্বাস্থ্য সহজেই আকর্ষণ করে। খেলার মাঠে

দৈহিক শক্তি ও মনোবলের দিক দিয়া কেহই তাঁহার সঙ্গে আঁটিয়া উঠিতে পারে না।

মাতুল সবসুখরাম নবাব সরকারের সেনাবিভাগের একজন উচ্চপদস্থ কর্মচারী। তাছাড়া, নবাব মমতাজুল ওমরাহ্ তাঁহার প্রতি স্নেহসম। তাই সবসুখরাম ভাবিলেন, ভাগ্যনেকে সেনা বিভাগে ভর্তি করাইয়া দিবেন। দৈহিক বল, সাহস ও দক্ষতা বংশীধরের যথেষ্ট। কাজেই এ বিভাগের কাজে তাড়াতাড়ি সে উন্নতি করিতে পারিবে। এসব ভাবিয়া বংশীধরকে অশ্বচালনা ও যুদ্ধবিজ্ঞায় নিপুণ করিয়া তুলিতে তিনি উद्यোগী হন। অল্প কিছুদিনের মধ্যেই দেখা যায়, বংশীধর একজন সুদক্ষ ঘোড়সওয়ার হইয়া উঠিয়াছে। অতঃপর সুযোগমত মাতুল তাঁহাকে সেনাদলের শিক্ষা-নবীশের কাজে ভর্তি করিয়া দিলেন।

নবাবের সেনা শিবিরে সেদিন একটি তেজী আরবী ঘোড়া কেনা হইয়াছে। বড় ছরস্ত ও চঞ্চল এই ঘোড়াটি, সহজে বশে আসিতে চায় না। সওয়ার তেমন দক্ষ নয় বুঝিলেই ঝাঁকুনি দিয়া তাহাকে ফেলিয়া দেয়। তাই এ ঘোড়াটি নিয়া কর্তৃপক্ষ বড় সমস্তায় পড়িয়া গিয়াছেন। বংশীধর কহিল, “আপনারা যদি অনুমতি দেন, আমি এই দুই ঘোড়াটাকে সায়েস্তা করতে পারি।”

দুর্ভিক্ষ ঘোড়াটি নিয়া শিবিরের অধ্যক্ষের দৃষ্টিস্তার অবধি নাই। কহিলেন, “এতো খুব ভালো কথা। বংশীধর, তুমি এখনই ঘোড়াটাকে কিছুক্ষণ ছুটিয়ে নিয়ে এসো।”

বংশীধরের অপর দুই শিক্ষানবীশ বন্ধু সেখানে দণ্ডায়মান। ইহাদের একজন নবাবের পুত্র মেহেদি হুসেন, অপরজন বকর হুসেন—নবাবের অগ্রতম ভ্রাতৃপুত্র। সেনাবিভাগের নূতন শিক্ষার্থীদের মধ্যে বংশীধর সাহস, কৌশল ও দক্ষতায় শীর্ষস্থানীয়। তাই উপরোক্ত দুই বন্ধুর কিছুটা ঈর্ষা আছে তাঁহার প্রতি। বংশীধরকে কোন কৃতিত্বের সুযোগ দিতে তাহারা ইচ্ছুক নয়। ভয় দেখাইয়া তাহারা

বলে, “এই পাগ্‌লা ঘোড়াটায় সওয়ার হয়ে, কেন ভাই শুধু শুধু প্রাণটা খোয়াবি?”

বংশীধর নিরস্ত হওয়ার পাত্র নয়। হাসিয়া বলে, “দেখি একবার কে জেতে, ঘোড়া না তার সওয়ার।”

এই আরবী ঘোড়ার উপর অবলীলায় সে চড়িয়া বসে। অদ্বুত কৌশলে তাকে আয়ত্তে আনে, তারপরে সপাসপ্‌ চাবুক চালাইয়া বহুদূরে এটিকে নিয়া উধাও হইয়া যায়। উর্দ্ধ্বাসে কয়েক ঘণ্টা অবিরাম দৌড়ানোর পর ঘোড়াটি ক্লান্ত হইয়া পড়ে। শিবিরে ফিরিলে দেখা যায়—পূর্বের সে অবাধ্যতা আর নাই, দুর্জয় আরবী ঘোড়া সম্পূর্ণরূপে তাহার সওয়ারের বশে আসিয়া গিয়াছে। উপস্থিত অনেকেই বংশীধরকে সাধুবাদ করিতে থাকে।

ঘোড়াটিকে দানাপানি দিয়া আদর জানাইয়া বংশীধর ঘরে ফিরিয়া যায়। পরের দিন ভোরে উঠিয়াই কিন্তু শুনে এক দুঃসংবাদ। এত পরিশ্রম করিয়া যে ঘোড়াটাকে সে আয়ত্তে আনিয়াছে গত রাত্রে সেটি হঠাৎ মারা গিয়াছে।

শিবিরের অধ্যক্ষ বড় ভীত সম্বস্ত হইয়া পড়েন। নবাব বাহাদুর নিজে সখ করিয়া, বহু অর্থব্যয়ে এই তেজী আরবী ঘোড়াটি বিদেশী বণিকদের কাছ হইতে কিনিয়াছেন। এটির মৃত্যু হইয়াছে শুনিলে তাহার ক্রোধের সীমা থাকিবে না।

এদিকে বংশীধরের সাক্ষ্যে নবাবের পুত্র ও ভ্রাতৃপুত্রেরও গুরু হয়েছে গাত্রদাহ। তাড়াতাড়ি নবাবকে তাহারা ঘোড়াটির মৃত্যু-সংবাদ দেয়। আরো জানায়, “এজন্য দায়ী বংশীধর। অবিরাম চাবুক মেরে ঘোড়াটাকে অনর্থক সে দূর দূরান্তে ছুটিয়েছে। অতিরিক্ত শ্রান্ত হবার ফলেই ঘটেছে তার মৃত্যু।”

নবাব বাহাদুর ক্রোধে অধীর হইয়া উঠেন। বংশীধরকে তখনি সেখানে ডাকাইয়া আনা হয়। অভিযোগ শুনিয়া শাস্ত্বরে সে বলে, “হজুর, কাল সন্ধ্যার পর আস্তাবলে কিরে এসে ঐ ঘোড়া আমার

হাত থেকে সাগ্রহে দানাপানি খেয়েছে। অসুস্থ অবস্থায় পশুরা সহজে কোন কিছু খেতে চায় না। কিন্তু এ ঘোড়াটি খেতে তখন কোন অনিচ্ছা প্রকাশ করে নি। কাজেই বহুক্ষণ ছুটাছুটির পরেও সে বেশ সুস্থই ছিল। মৃত্যু ঘটেছে গভীর রাতে। হয় কোন সংক্রামক রোগে, নয় তো সহিসদের দোষে এ দুর্ঘটনা ঘটেছে। এজ্ঞা আমাদের দায়ী করা কি সম্ভব ?”

নবাব রুষ্ট হইয়াই আছেন, এ কথায় কোন কান দিলেন না। বংশীধরের জ্ঞান ব্যবস্থা হইল হাজতবাসের। মাতুল সবসুখরাম দরবারের প্রভাবশালী ব্যক্তি, তিনি কাছে থাকিলে নবাবকে বুঝাইয়া নরম করিতে পারিতেন। দুর্ভাগ্যক্রমে সরকারী কাজে কয়েকদিনের জ্ঞান তিনি হায়দাবাদে গিয়াছেন। কাজেই বংশীধরকে হাজতে প্রবেশ করিতেই হইল।

কয়েকদিনের মধ্যেই সবসুখরাম কল্যাণীতে ফিরিয়া আসিলেন। আত্মপূর্বিক সব ঘটনা শুনিয়া তিনি তো স্তম্ভিত। অতঃপর নবাব বাহাদুরকে অনেক বুঝাইয়া সুঝাইয়া তিনি শাস্ত করেন, ভাগিনেয়কে মুক্ত করেন হাজতবাস হইতে।

এদিকে এ কয়দিন কারাকক্ষে বাস করার ফলে বংশীধরের অন্তরে জাগিয়াছে নির্বেদ, সংসারের সব কিছুতে আসিয়াছে চরম বিরক্তি। বসিয়া বসিয়া কেবলই ভাবেন, যেখানে প্রতি পদে ঈর্ষা, স্বার্থবুদ্ধি আর বিশ্বাসঘাতকতার সঙ্গীন উঁচানো, সেখানে কোথায় আনন্দ, কোথায় শান্তি? নাঃ, এমন স্থানে বাস করার কোন সার্থকতা নাই। এর চাইতে সন্ন্যাসী হইয়া পাহাড়ে জঙ্গলে ঘুরিয়া বেড়ানো অনেক ভাল।

কল্যাণীর একপ্রান্তে লোকালয় হইতে দূরে একটি প্রাচীন শিব মন্দির আছে। মনে শান্তি নাই, নানা হুচিস্তায় ভারাক্রান্ত বংশীধর

আজকাল প্রায়ই সেখানে ছুটিয়া যান, নির্জনে আপন মনে চূপচাপ বসিয়া থাকেন। সেদিন সেখানে আসিয়া উপস্থিত হন জটাজুটমণ্ডিত সৌম্যদর্শন এক প্রবীণ সন্ন্যাসী। পরমহংসজী নামে এ অঞ্চলে তিনি খ্যাত। পূর্বাশ্রমে ছিলেন পেশোয়া বংশের সন্তান। মোক্কালাভের আশায় বহুদিন আগে ঘর ছাড়িয়া বাহির হন, কঠোর তপস্যায় হন আপ্তকাম।

পরমহংসজীকে দেখা মাত্র বংশীধর উচ্চকিত হইয়া উঠেন, নিকটে গিয়া নিবেদন করেন সাষ্টাঙ্গ প্রণাম।

আশিস্ জানাইয়া পরমহংসজী কহেন, “বৎস, দেখছি, অন্তরে তোমার শাস্তি নেই। এক দুঃসহ জ্বালা বয়ে নিয়ে বেড়াচ্ছে। কি তোমার সঙ্কট, আমায় খুলে বল।”

“প্রভু, আপনি সর্বজ্ঞ, ঠিকই ধরেছেন। অন্তরের জ্বালা আমার অসহনীয় হয়ে উঠেছে। সংসারের সব কিছুই হয়ে গিয়েছে তিক্ত, বিশ্বাস অর্থশূন্য। স্থির করেছি, মনের দুঃখ-জ্বালা এড়াবার জন্য গ্রহণ করবো সন্ন্যাসীর জীবন।”—কাতর স্বরে নিবেদন করেন বংশীধর।

“এই তরুণ বয়সে, কেন সংসারের প্রতি তোমার এই বিরক্তি, বৎস?”

“সাত বৎসর বয়সে পিতামাতা দুই-ই হারিয়েছি। বালক-জীবনের ওপর পড়েছে বিধাতার নির্দম আঘাত। তারপর মাতুলের আশ্রয়ে দিন মোটামুটি ভালোই কাটছিল। কিন্তু এবার যেন জীবনের বাস্তব রূপ, নিষ্ঠুর রূপটাই, আমার অভিজ্ঞতায় বেশী ধরা পড়েছে।”

“বিশদ করে সকল কথা আমায় বলো, বৎস।”

“যাদের আমি অকৃত্রিম বন্ধু বলে জানতাম, তাদের চক্রান্তে আমায় যেতে হয়েছে কারাগারে। দেশের শাসক ও প্রতিপালক মতিচ্ছন্ন হয়েছেন, ঘোরতর অবিচার করেছেন আমার প্রতি। কয়েকদিনের কারাবাসই আমার জ্ঞানচক্ষু খুলে দিয়েছে। বুঝেছি, গোটা গৃহস্থ-জীবনই আসলে একটা বন্দী জীবন। শাস্তি নেই,



আনন্দ নেই, এখানে পড়ে পড়ে অদৃষ্টের মার খাওয়া ছাড়া আর কোন উপায়ও নেই। তাই তো সন্ন্যাস নেবো বলে সঙ্কল্প করেছি কৃপা করে আপনি আমায় এ বিষয়ে সাহায্য করুন।”

“বৎস, যিনি তোমার আমার প্রভু, সবার প্রভু, তিনি আগে থেকেই তোমার অবস্থার কথা আমায় জানিয়ে দিয়েছেন। এজ্ঞাই ঠিক এই সময়ে তোমার সমক্ষে আমার আগমন।”

“আশা হচ্ছে, আনন্দ হচ্ছে, আপনার কথা শুনে। এবার কৃপা করে বলুন, কি আমায় করতে হবে।”

“বৎস, সন্ন্যাস বড় কঠিন ব্রত। এ ব্রত নেবার আগে যথেষ্ট প্রস্তুতি চাই। শুধু গৃহত্যাগ করলেই হবে না। সন্ন্যাসীকে এ জন্মেই ব্রহ্মলাভ করতে হবে এবং এজ্ঞ সর্বাত্মে চাই ত্যাগ বৈরাগ্য, ব্রহ্মচর্য্য—চাই শাস্ত্রাভ্যাস ও কঠোর সাধনা। প্রস্তুতির এই ধাপগুলি পেরিয়ে যেতে পারলে তবেই আসবে পরাশাস্তি ও পরাজ্ঞান—যেজ্ঞ অজানিতে তোমার মন ব্যাকুল হয়ে উঠেছে।”

“বেশ প্রভু, আপনার কথিত মত দীর্ঘ-প্রস্তুতির পথই আমি বেছে নেবো। কিন্তু একটা প্রার্থনা। কৃপা করে যখন এসেছেনই, আপনি আমায় দীক্ষা দিন, সন্ন্যাস দিন, এ জীবন কৃতার্থ হোক।”

“না—বৎস, আমি তোমার গুরু নই। তোমার চিহ্নিত গুরু রয়েছেন উত্তর ভারতে। যথা সময়ে তাঁর দর্শন পাবে। হ্যাঁ, এবার শোন আমার কথা। প্রথমে তুমি পুণ্যতীর্থ নাসিকে যাও। সেখানে বৈরাগ্য ও ব্রহ্মচর্য্য অবলম্বন করে বেদ বেদান্তের অধ্যয়ন শুরু করো।”

“আপনার দর্শন ও উপদেশ আবার কবে পাবো, প্রভু?” সজল চক্ষে প্রশ্ন করেন বংশীধর।

“প্রয়োজনমত আমি নিজেই আবির্ভূত হবো তোমার সকাশে।” একথা বলার পর পরমহংসজী মন্দির চত্বর ছাড়িয়া প্রবেশ করেন সন্নিহিত অরণ্যে। তারপর ধীরে ধীরে অদৃষ্ট হইয়া যান।

ঘরে কিরিয়া আসিয়া বংশীধর মাতুল সবস্বখরামের উদ্দেশে এক চিঠি লিখিলেন। সতের বৎসরের বালকের সেই চিঠির মর্ম্ম :

“জীবনে যেটুকু অভিজ্ঞতা এই অল্প বয়সে আমার হয়েছে, তাতে দেখেছি—এ সংসার নিতান্ত দুঃখময়। এর জটিল জালে জড়িয়ে অসহায়ের মত কেবলি নির্ঘাতন সহ্য করতে হয়। আর এটাও আমি বুঝেছি—সংসারের সব কিছুই নশ্বর, ক্ষণস্থায়ী। একমাত্র ঈশ্বরই অবিনশ্বর, তাঁর ধামেই রয়েছে পরম শান্তি, পরম আনন্দ। আমি ঈশ্বরলাভের আকাঙ্ক্ষা নিয়েই চিরতরে গৃহত্যাগ করে যাচ্ছি। আমায় অনুসন্ধান করার চেষ্টা করবেন না, কারণ ঘরে ফেরা আমার কোন মতেই সম্ভব নয়। পুত্রনির্বিশেষে আপনি আমায় পালন করেছেন, মাতা পিতার অভাব বুঝতে দেন নি কোনদিন, আপনার স্নেহ মমতা ও কল্যাণেচ্ছার ঋণ কখনো শোধ করার নয়। আমায় আপনি মার্জনা করবেন, গ্রহণ করবেন আমার শ্রদ্ধাপূর্ণ প্রণাম।”

সেই রাত্রেই গোপনে বংশীধর কল্যাণী ত্যাগ করিলেন। পদব্রজে চলিলেন নাসিকের উদ্দেশে। পরের দিন তাঁহার চিঠি পড়িয়া মাতুল মাথায় হাত দিয়া বসিয়া পড়েন। সারা গৃহে নামিয়া আসে নৈরাশ্রের অন্ধকার।

নাসিকের এক নিষ্ঠাবান সুপণ্ডিত ব্রাহ্মণের আশ্রয়ে থাকিয়া বংশীধর বেদ বেদাঙ্গ অধ্যয়ন করেন। অসাধারণ প্রতিভা ও ধীশক্তি তাঁহার। তিন বৎসরের মধ্যে শিক্ষাগুরুর গ্রন্থাদি তিনি আয়ত্ত করিয়া ফেলেন। শাস্ত্রপাঠের সঙ্গে সঙ্গে তপস্যার জগ্গ, প্রত্যক্ষ অনুভূতি লাভের জগ্গও তিনি ব্যাকুল হইয়া পড়েন। কোথায় তাঁহার চিহ্নিত সদগুরু, কবে তাঁহার কৃপা পাইবেন, কোন্ সাধন নিয়া অগ্রসর হইবেন, ভাবিয়া কুল-কিনারা পান না।

বিবাদ-খিন্ন হৃদয়ে গোদাবরীর ঘাটে সেদিন বসিয়া আছেন, এমন

সময়ে দ্বিতীয়বার দর্শন দিলেন কল্যাণকামী সন্ন্যাসী পরমহংসজী স্নেহমাখা স্বরে কহিলেন, “বৎস বংশীধর, তুমি এবার পদব্রজে বেরিয়ে পড়ো উত্তর ভারতের দিকে। পথে ওঙ্কারনাথের জ্যোতির্লিঙ্গ আ উজ্জয়িনীর মহাকাল দর্শন করে যেও। ব্রহ্মচারীদের পক্ষে মহাকাল মন্দিরে ব’সে শিবপঞ্চাক্ষর মন্ত্রের জপ সাধকদের পক্ষে কল্যাণকর তুমি এই জপ-সাধন সেখানে সম্পন্ন ক’রো।”

ওঙ্কারনাথ তীর্থ লক্ষ্য করিয়া বংশীধর চলিতে থাকেন। তখনকা দিনের পথঘাট মোটেই নিরাপদ ছিল না। মারাঠা শক্তির সো মাত্র পতন ঘটিয়াছে। তাই চারিদিকেই রাজনৈতিক অশান্তি আ সামাজিক বিশৃঙ্খলা। পথে ঠগী ও ডাকাতদের উপদ্রবও বৃদ্ধি পথে। এ অবস্থায় একাকী কোথাও যাওয়া অত্যন্ত বিপজ্জনক একদল বণিকের সঙ্গে মিলিত হইয়া বংশীধর পথ চলিতেছেন।

এই দলে কখন যে কয়েকজন ডাকাত কারবারীর বেশে ঢুকিয় পড়িয়াছে তাহা কেহ বুঝিতে পারে নাই। বংশীধরের কারি সুগৌর, দেহ সুন্দর সুঠাম, চোখে মুখে আভিজাত্যের ছাপ ডাকাতরা ভাবিল, নিশ্চয়ই এ যুবক কোন সম্ভ্রান্ত জমিদারের পুত্র কোন জরুরী কাজে দূরদেশে যাইতেছে। কোমরের পেটিতে প্রচুর অর্থ যে লুকানো আছে তাহাতেও কোন সন্দেহ নাই। স্থির করিল পথের মধ্যে কোথাও তাহাকে হত্যা করিয়া টাকাকড়ি ও সোনাধান লুটিয়া নিবে।

যাত্রীদল সেদিন দৌলতাবাদের কাছে আসিয়া পৌঁছিয়াছে এ সময়ে এক চটিতে অবস্থান করার সময় ছবুঁস্তেরা বংশীধরো খাচ্ছে বিষ মিশাইয়া দেয়। অল্পক্ষণের মধ্যেই সে ভূমিতে লুটাইয় পড়ে, দেহটি হয় নীলবর্ণ, অসাড়—মুখ দিয়া ঘন ঘন ফেনা নির্গত হইতে থাকে। সঙ্গীরা প্রমাদ গণিতে থাকে। এই মুমূর্ষু যুবক সম্বন্ধে আর মাথা না ঘামাইয়া ভাড়াভাড়ি সেখান হইতে তাহার প্রস্থান করে। ডাকাতেরা দেহ তল্লাস করিয়া দেখে টাকাকড়ি

বংশীধরের কাছে কিছুই নাই। অগত্যা তাহারাও সেখানে হইতে চম্পট দেয়।

স্থানীয় এক বিদ্বান পাটেল এই সময়ে দৌলতাবাদের দিকে যাইতেছিলেন। চটির সম্মুখে আসিয়া দেখেন, এক সুদর্শন যুবক মৃতপ্রায় হইয়া পড়িয়া আছে। ব্যাকুল হইয়া তখন তিনি গ্রাম হইতে এক চিকিৎসক ডাকাইয়া আনেন। চিকিৎসা ও পরিচর্যার ফলে বংশীধর অনেকটা সুস্থ হইয়া উঠেন। যুবকটির উপর পাটেলের ইতিমধ্যে বড় মমতা পড়িয়া গিয়াছে। পরম যত্নে তাঁহাকে তিনি এবার দৌলতাবাদের নিজ গৃহে নিয়া যান, সেবা ও শুশ্রূষার যথোচিত ব্যবস্থা করেন। অতঃপর কয়েকদিনের মধ্যেই বংশীধরকে অনেকটা ভালো হইয়া উঠিতে দেখা যায়।

পাটেলের স্ত্রী সানন্দে গ্রহণ করিয়াছেন বংশীধরকে। মায়ের মমত্ব ও স্নেহ দিয়া সদাই তাঁহাকে ঘিরিয়া রাখিতে তিনি ব্যস্ত। বংশীধরকে তিনি জানাইয়া দেন, “ছাখো বাবা, ভগবানের দয়ায় মৃত্যুর মুখ থেকে তুমি উঠে এসেছ। স্বাস্থ্য তো একেবারেই ভেঙ্গে পড়েছে। সাফ কথা বলে দিচ্ছি—তোমার শরীর না সারলে আমরা তোমায় কোথাও যেতে দেবো না। মনের আনন্দে আমাদের কাছে কয়েকমাস থাকো, ভালো করে খাওয়া-দাওয়া করো, তারপর যাবার কথা ভাববে।”

শুধু স্নেহময়ী গৃহকর্ত্রীই নয়, বাড়ীর আর সকলেও বড় ভালো-বাসিয়া ফেলিয়াছে বংশীধরকে, কেহই তাঁহাকে ছাড়িয়া দিতে রাজী নয়। অগত্যা কিছুদিনের জন্য তাঁহাকে স্থান ত্যাগের সঙ্কল্প ত্যাগ করিতে হয়।

পরম আনন্দে ও আরামে দিনগুলি কাটিয়া যাইতেছে। এভাবে প্রায় তিন মাস অতিক্রান্ত হইল। পাটেলের বৃদ্ধা জননী বংশীধরকে

নিজের নাতির মতই স্নেহ করেন, বংশীধরও তাঁহার প্রতি কম  
 আদর নয়। প্রতিদিন সন্ধ্যায় বুদ্ধাকে তিনি ভাগবত পাঠ করিয়া  
 শুনান। সেদিনও পাঠ চলিতেছে। প্রসঙ্গক্রমে জড়ভরতের  
 উপাখ্যান শুরু হয়। রাজ্য, বিত্তবিভব ও আত্মপরিজন সব কিছু  
 ত্যাগ করিয়া আসিয়া বনবাসী রাজা শেষটায় আবদ্ধ হন এক  
 হরিণশিশুর মায়ায়। অদৃষ্টের একি নিদারুণ পরিহাস! এই করুণ  
 কাহিনীটি বর্ণনা করিতে গিয়া বংশীধর ক্রন্দন করিতে থাকেন, গণ্ড  
 বাহিয়া ঝরিতে থাকে অশ্রুধারা।

বুদ্ধা চমকিয়া উঠেন, ব্যাকুল হইয়া প্রশ্ন করেন, “বংশী, কি হয়েছে  
 তোমার? এমন করে তুমি কাঁদছো কেন? কেউ কি তোমায়  
 গালমন্দ দিয়েছে, দুঃখ দিয়েছে?”

“না—দাদী, দুঃখ আমিই দিয়েছি আমার নিজেকে। দুঃখের  
 সাগরে পড়ে এখন হাবুডুবু খাচ্ছি। আমার অবস্থা ভরত রাজারই  
 মত—অথবা তাঁর চাইতে আরো শোচনীয়। সন্ন্যাস নেবো বলে  
 আত্মীয়স্বজনের স্নেহ প্রেম ঠেলে ফেলে এসেছিলাম। কিন্তু কি  
 চরম দুর্ভাগ্য আমার—এখানে দৌলতাবাদে এসে এ গৃহপরিজনদের  
 মায়ায় আবদ্ধ হয়ে পড়েছি। নাঃ—আর নয়। আজই আমি এ স্থান  
 ত্যাগ করবো, সিদ্ধ করবো নিজের পবিত্র সঙ্কল্প।”

বুদ্ধা দাদী অনেক করিয়া বুঝাইলেন। পাটেলের স্ত্রী আসিয়া  
 শুরু করিলেন করুণ ক্রন্দন। কিন্তু বংশীধর নিজ সিদ্ধান্তে রহিলেন  
 অচল অটল।

আঁচলে চোখ মুছিয়া পাটেলের স্ত্রী কহিলেন, “বেশ বেটা,  
 সন্ন্যাসের পথে তুমি যখন যাবেই, যাও। আর তোমায় আমরা  
 বাধা দেবো না। কিন্তু তোমায় আমি নিজ সন্তানের মত দেখি,  
 এভাবে কপর্দকহীন অবস্থায় তুমি যেতে পারবে না। আমার  
 নিজের কাছে জমানো রয়েছে পঞ্চাশটি সোনার মোহর। এগুলো  
 তোমায় সঙ্গে নিতে হবে। খাওয়া-পরা আর আরামের জন্ত

এগুলো তুমি খরচ করবে। হ্যাঁ, এতে তুমি আপত্তি ক'রো না, বেটা।”

“ঘোর আপত্তি আছে আমার। ঘর-সংসার ছেড়ে কাঙাল সন্ন্যাসীর জীবন যে গ্রহণ করতে চলেছে, একগাদা মোহর সে কি করে কোমরে বেঁধে রাখবে? কেনই বা রাখবে? ছি-ছি এ প্রলোভন আমায় আপনারা যেন দেখাবেন না। তাছাড়া, এই তো সেদিন নিজের অভিজ্ঞতা থেকে দেখলাম। সঙ্গে একটি কানাকড়ি নেই, অথচ ডাকাতেরা আমায় বিষ খাওয়ালো। সোনার মোহর সঙ্গে থাকলে কি আর রক্ষে আছে? না—এসব দেবেন না?”

সাক্ষরনয়নে বাড়ীর সবাই বংশীধরকে বিদায় দেন। স্নেহাঙ্ক পাটেল গৃহিণী কিন্তু এক সময়ে এক কাণ্ড করিয়া বসেন। সামনেই আসিতেছে প্রচণ্ড শীত ঋতু। তাই ঝুলিতে ভরিয়া বংশীধরের জন্ম একটি জীর্ণ কাঁথা দেওয়া হয়। পাটেল গৃহিণী গোপনে এই কাঁথাটির ভাঁজে পঞ্চাশটি মোহর তাড়াতাড়ি সেলাই করিয়া দেন। মনের একান্ত ইচ্ছা, পথে অর্থের প্রয়োজন হইলে বংশীধর ইহার সদ্যবহার করিবেন।

অনেকটা দূর পথ চলিয়া আসিয়াছেন। ইঠাৎ একসময়ে বংশীধরের হাতে ঠেকিল ঐ জীর্ণ কন্বার একপ্রান্ত। স্থানটি যেন বড় ভারী ঠেকিতেছে। ভাঁজ খুলিয়া তো তাঁহার চক্ষু স্থির। দেখেন, পঞ্চাশটি মোহর গাদাগাদি করিয়া সেখানে সেলাই করিয়া রাখা হইয়াছে।

মাতৃরূপিণী মহিলার এই স্নেহ নিদর্শন দেখিয়া চোখ দুটি তাঁহার শ্রদ্ধায় কৃতজ্ঞতায় অশ্রুসজল হইয়া আসে। কিন্তু কোনমতেই যে তাঁহার পক্ষে এগুলি গ্রহণ করা সম্ভব নয়। পথ চলতে চলিতে স্থির করিলেন, অচিরে কোন দরিদ্র এবং যোগ্য পাত্রকে মোহরগুলি দান করিবেন।

কয়েকদিন পথ চলার পর বংশীধর গুজরনাথে আসিয়া পৌঁছেন। পুরাণে বর্ণিত সুপ্রসিদ্ধ জ্যোতির্গিরি এখানে বিরাজিত।

দর্শন করিয়া বংশীধরের আনন্দের সীমা নাই। দীর্ঘ সময় মন্দিরে ধ্যানজপ করিয়া কাটাইয়া দিলেন, নিবেদন করিলেন প্রাণের আকৃতি। করজোড়ে কহিলেন, “প্রভু, অদৃশ্যলোক থেকে তোমার হাতছানিই আমায় ঘর-সংসার ত্যাগ করিয়েছে। দেখো, ত্যাগ-বৈরাগ্য থেকে, তোমার আরাধনার পথ থেকে, কোনদিন যেন বিচ্যুত না হই।”

সঙ্গে সঙ্গে মনে পড়িয়া যায়, কাঁথায় সেলাই করা স্বর্ণমুদ্রাগুলির কথা। সামুন্নেয়ে মহেশ্বরের চরণে প্রার্থনা জানান, “প্রভু, এ সোনার শৃঙ্খল আর যে সহ্য করতে পারছি নে। তোমার সত্যকার কোন দরিদ্র ভক্তকে এগুলো দিয়ে দাও।”

মন্দির হইতে বংশীধর নামিয়া আসিয়াছেন, হঠাৎ প্রাজ্ঞের একপাশে তাঁহার দৃষ্টি পড়িল। এক দরিদ্র বৃদ্ধ ব্রাহ্মণ ভাবাবেগ জড়িত কণ্ঠে শিবস্তোত্র পাঠ করিয়া চলিয়াছেন—জ্যোতির্ময়্যায় পুনরুদ্ভব বারণায়, দারিদ্র্য-দুঃখ দহনায় নমঃ শিবায়।

বংশীধরের অন্তর হইতে কে যেন ডাকিয়া বলে,—ওরে এই তো তোর স্বর্ণমুদ্রার ভার লাঘব করার সুযোগ উপস্থিত, যোগ্যপাত্র যে সামনেই রয়েছে।

নীরবে ঐ বৃদ্ধ ব্রাহ্মণের পাশে কিছুক্ষণ তিনি বসিয়া থাকেন। তারপর স্তোত্রপাঠ সাজ হইলে সবিনয়ে নিবেদন করেন—

“দ্বিজবর, দেবাদিদেব আপনার প্রার্থনা শুনেছেন। দারিদ্র্য-দুঃখ থেকে আপনাকে ত্রাণ করার জন্ত আমার হাত দিয়ে পাঠিয়েছেন কিছু অর্থ। আপনি তা গ্রহণ করুন।”

উত্তরে ব্রাহ্মণ কহেন, “দেখুন, নিজে আমি পরম আনন্দে আছি। শিবধামে বাস করি, আকাশবৃষ্টিই আমার সম্বল। প্রভু নিজেই তাই নিত্যকার আহার জুটিয়ে দেন। আমার স্তোত্রপাঠ ও ধন-প্রার্থনা সেজন্ত নয়।”

“তবে কিসের জন্ত।”

“আমার একটি কন্যা অনেক দিন বিবাহযোগ্য হয়েছিল। সম্প্রতি একটি পাত্রের সন্ধানও মিলেছে। কিন্তু আমার মত ভিক্ষুকের পক্ষে বিবাহের ব্যয় নির্বাহ করার মত টাকাকড়ি কই? তাই তো রোজ এখানে এসে মহেশ্বরের চরণে প্রার্থনা জানাচ্ছি।”

“আপনার প্রার্থনা সফল হয়েছে, দ্বিজবর।” বলিয়াই বংশীধর জীর্ণ কাঁথার সেলাই খুলিয়া ঝকঝকে একরাশ স্বর্ণমুদ্রা ব্রাহ্মণের কৌচড়ে ঢালিয়া দেন।

বিস্ময় বিক্ষারিত নয়নে ব্রাহ্মণ তাঁহার কৌচড়ের দিকে তাকাইয়া আছেন। মুখে কোন কথা সরিতেছে না।

বংশীধরের চোখে মুখে তৃপ্তির হাসি। কহিলেন, “দ্বিজবর নিশ্চিন্ত মনে এগুলো গ্রহণ করুন। এ অর্থ অতি শুদ্ধ, কোন অসৎ উপায়ে অর্জিত হয়নি। কোন সম্পন্ন সং-গৃহস্থ এই মোহরগুলো জমিয়েছিলেন। পুত্রাধিক স্নেহে তা আমায় দান করেছেন। আমি কাঙাল, ত্যাগ-বৈরাগ্য ও সন্ন্যাসের পথে বেরিয়েছি। এসব দিয়ে আমি কি করবো? বরং এ অর্থ আপনার মত ভক্ত দরিদ্র ব্রাহ্মণের কাজে লাগুক। প্রভু জ্যোতির্লিঙ্গের কৃপাতেই আমাদের এ যোগাযোগ সাধিত হয়েছে, তাতে সন্দেহ নেই।”

অপার ঐশী কৃপার এই স্পর্শ পাইয়া, দারিদ্র্য-দুঃখ দহনের এই চমৎকারিতা দেখিয়া ব্রাহ্মণ একেবারে স্তব্ধ, আবেগ বিহ্বল। ছুই নয়নে তাঁহার কেবলি ঝরিতেছে পুলকাক্রম।

অতঃপর কয়েকদিন পদব্রজে পথ চলার পর বংশীধর উজ্জয়িনী তীরে আসিয়া উপস্থিত হন। প্রাচীনকাল হইতেই এখানকার মহাকাল মন্দিরের প্রসিদ্ধি রহিয়াছে। তাছাড়া, সাধু সন্ন্যাসী ও ভক্ত গৃহস্থেরা মহাকাল বিগ্রহকে পরম জাগ্রত বলিয়াও মনে করেন। পরমহংসজ্ঞী বংশীধরকে এখানকার মন্দিরে শিবপঞ্চাক্ষর মন্ত্র জপের



নির্দেশ দিয়াছিলেন। বংশীধর পরমনিষ্ঠায় সে নির্দেশ প্রতিপালন করেন। জপসিদ্ধির ফলে অন্তর তাঁহার পরম শান্তিতে ভরিয়া উঠে, নূতনতর অধ্যাত্ম-চেতনায় উদ্দীপিত হয়।

প্রায় একমাস কাল তিনি মহাকাল মন্দির চত্বরে অবস্থান করেন। কৃচ্ছ্রসাধন ও কঠোর তপস্তার জগ্ম মন তাঁহার আকুল। একাদি-ক্রমে পাঁচদিন কাটে নিরন্তর উপবাসের মধ্য দিয়া। অবশিষ্ট দিনগুলি আকাশবৃত্তি করিয়াই অতিবাহিত করেন। এই সময়ে এক বৃদ্ধা চানাওয়ালী দিনান্তে বংশীধরকে একমুঠা ভিজ্জা ছোলা দিয়া যাইত, তাহা দিয়াই বৈরাগ্যবান তরুণ সাধক করিতেন ক্ষুধার নিবৃত্তি। দেবাদিদেব মহেশ্বরের ধ্যানরূপে এসময়ে এমন গভীরভাবে তিনি নিমগ্ন থাকিতেন যে দিনরাত কোথা দিয়া চালিয়া যাইত, হুঁস থাকিত না।

এই সময়ে আর একবার ঘটে তাঁহার জীবনের অগ্রতম পথ-প্রদর্শক পরমহংসজ্ঞীর আবির্ভাব। পরমহংসজ্ঞী কহেন, “বৎস, এখানে আর তোমার থাকার প্রয়োজন নেই। তাড়াতাড়ি উত্তর ভারতের গঙ্গাতীরের দিকে অগ্রসর হও। বিঠৌরে বান্মীকি তপোবনে রয়েছেন অশেষ শাস্ত্রবেত্তা, প্রবীণ সাধক, রাঘবেন্দ্র স্বামী। তাঁর আশ্রয়ে কিছুকাল বাস ক’রে শাস্ত্রের উচ্চতর পাঠ তুমি আয়ত্ত ক’রে নাও। তোমার সাধন প্রস্তুতির এ হবে একটা বড় অঙ্গ। আরও একটা কথা। পথে আজকাল নানা গোলযোগ হচ্ছে, ইঠাৎ কোন বিপদে পড়লে ঘাবড়ে যেয়ো না। প্রভু মহেশ্বর তোমায় রক্ষা করবেন।”

কয়েকজন পথচারীর সহিত মিলিত হইয়া বংশীধর সিদ্ধিয়া রাজ্যের মধ্য দিয়া চলিয়াছেন। এখানকার শাসনব্যবস্থায় তখন চরম বিশৃঙ্খলা ও গোলযোগ। উত্তরাধিকারীরা সিংহাসনের দাবী নিয়া উদগ্র হইয়া উঠিয়াছে। চারিদিকে চলিয়াছে চক্রৌদের ষড়যন্ত্র, গ্রেপ্তার ও নির্যাতন। সন্দেহবশে বংশীধরও কয়েকজন সঙ্গীসহ ধৃত হন। নিক্ষিপ্ত হন কারাগারে। কয়েকদিনের মধ্যে কর্তৃপক্ষ

নিজেদের ভুল বুঝিতে পারিয়া তাঁহাদের মুক্ত করিয়া দেন। ইহার কয়েকদিন পরেই বিদ্যাচলের তীর্থাদি পরিক্রমা করিয়া বংশীধর কানপুরের কাছে বিঠৌরে উপনীত হন।

সুপ্রাচীন যুগে মহর্ষি বাল্মীকির আশ্রম বিরাজিত ছিল আধুনিক বিঠৌরের সংলগ্ন পবিত্র ভূমিতে। আদিকবির পুণ্যময় স্মৃতিকে জনমানসে চির উজ্জ্বল রাখার জন্ত পণ্ডিতবর রাঘবেন্দ্রজী এখানে একটি উচ্চতর শাস্ত্র অধ্যয়নের চতুষ্পাঠী খুলিয়াছেন, নাম বাল্মীকি তপোবন।

এখানে পৌঁছিয়াই বংশীধর রাঘবেন্দ্রজীর চরণে প্রণত হইলেন, নিবেদন করিলেন অন্তরের আকাজক্ষা। দিব্যকাস্তি, বৈরাগ্যবান এই ব্রহ্মচারীকে দেখিয়া আচার্য্য প্রীত হইলেন। দুই একটি প্রশ্ন জিজ্ঞাসা করার পর প্রশ্ন কণ্ঠে কহিলেন, “বৎস, এ আশ্রমে তোমায় আমি আশ্রয় দিচ্ছি। সঙ্গে সঙ্গে এ আশাও পোষণ করছি, শ্রদ্ধা ও নিষ্ঠার সঙ্গে অধ্যয়ন সমাপ্ত করে তুমি তৈরী করবে তোমার অধ্যাত্মজীবনের শাস্ত্র-ভিত্তি।”

বিঠৌরের এই আশ্রমে বংশীধর তিন বৎসরকাল অধ্যয়ন করেন। তাঁহার অমানুষী মেধা, প্রতিভা ও শ্রমনিষ্ঠা দেখিয়া আচার্য্যের বিস্ময়ের অবধি নাই। পরম যত্নে নিজের অধীত বিদ্যা তাঁহাকে শিখাইতে থাকেন।

এই সময়ে ঘটনাচক্রে একদিন বংশীধর তাঁহার অসাধারণ গুরু-ভক্তির পরিচয় দেন। আচার্য্য রাঘবেন্দ্রজী সন্ধ্যাবেলায় প্রায়ই শিষ্যদের নিয়া গঙ্গাতীরে বেড়াইতে যাইতেন। সেদিনও গিয়াছেন। বর্ষার প্লাবন দেখা দিয়াছে কিছুদিন যাবৎ। ক্ষীণকায় গঙ্গা খরবেগে বহিয়া চলিয়াছে। আশ্রমের কয়েকটি ছাত্র আনন্দ কলরব করিতে করিতে নান গুরু করিয়া দিল। একটু পরেই দেখা গেল, ইহাদের

একজন প্রবল শ্রোতের টানে ভাসিয়া চলিয়াছে। রক্ষার কোনই উপায় নাই। কিংকর্তব্যবিমূঢ় হইয়া সবাই শঙ্কিত হৃদয়ে ঐ অসহায় ছাত্রটির দিকে তাকাইয়া আছে।

চরম বিপদের আর দেৱী নাই। ক্ষণকাল পরেই অবসন্নদেহ ছাত্রটি গঙ্গাগর্ভে ডুবিয়া যাইবে। রাঘবেন্দ্র আচার্য্য উত্তেজিত স্বরে ছাত্রদের কহিলেন, “পুরাণে তোমরা তো গুরুভক্তির কত কথাই পড়েছো। তোমাদের ভেতর এমন একজনও কি নেই যে গুরুর আশ্রিত এ যুবকটিকে উদ্ধার করে আনতে পারে?”

বংশীধর নীরবে উঠিয়া দাঁড়ান, মুহূর্ত্ত মধ্যে ঝাঁপাইয়া পড়েন বর্ষা-বিক্ষুব্ধ উত্তাল গঙ্গায়। সম্ভরণে চিরদিনই তিনি পটু, দেহের শক্তি ও সাহসও যথেষ্ট। শ্রোতের অল্পকূলে প্রায় এক ক্রোশ সাঁতরাইয়া গিয়া শেষটায় বিপন্ন ছাত্রটিকে ধরিয়া ফেলিলেন, টানিয়া আনিলেন তীরের দিকে।

ইতিমধ্যে রাত্রির অন্ধকার গঙ্গার দুইকূল ছাইয়া ফেলিয়াছে। আচার্য্য রাঘবেন্দ্রজী মশাল হাতে, অগ্ন্যাশ্র ছাত্রদের সঙ্গে নিয়া, বংশীধর ও তাঁহার সহপাঠীকে খুঁজিতে বাহির হইয়াছেন। অবশেষে তাহাদের দেখা মিলিল। সকলে হাঁফ ছাড়িয়া বাঁচিলেন।

বার বার আশীর্ব্বাদ জানাইয়া গুরু কহিলেন, “বংশীধর, তুমি ধন্ত। তোমার মত অন্তঃবাসী পেয়ে আচার্য্য হিসেবে আমি গর্ব্ব বোধ করছি। তোমার এই গুরুভক্তি, পরহিতে প্রাণ বিপন্ন করবার এই মহৎ প্রয়াস সবাইকে উদ্ধৃত্ত করুক, এই আমার কামনা।”

শাস্ত্রচর্চায় অনেকদিন অতিবাহিত হইয়াছে, এবারে বংশীধরের হৃদয়ে জাগিয়া উঠে যোগসাধনার আকাঙ্ক্ষা। জ্ঞান সাধনার উপর বেশী ঝোঁক থাকিলেও ঈশ্বরলাভের অগ্ন্যাশ্র শাস্ত্রসম্মত পথের অভিজ্ঞতাও তিনি পাইতে চান। এবার তাই বিঠৌর ত্যাগ করিয়া

তিনি উপনীত হন হিমালয়ে, উচ্চকোটির যোগীমহাত্মাদের অনুসন্ধান শুরু করেন। কয়েকদিন হরিদ্বার কন্থল ও হ্রদিকেশ কাটাইয়া অবশেষে আসিয়া পৌঁছান কেদার বদরীর মহাতীর্থে।

এখানে থাকাকালে সংবাদ পান, নীচে বিষ্ণুপ্রয়াগের পর্বতগুহায় হঠযোগে সিদ্ধ এক মহাপুরুষ বাস করেন। বড় দুর্গম ও জনহীন সেই অঞ্চল। বহু দুঃখ কষ্ট ও পথশ্রম স্বীকার করিয়া বংশীধর যোগীবরের গুহায় গিয়া উপস্থিত হন। ভক্তিভরে প্রণাম নিবেদনের পর ব্যক্ত করেন মনের অভিলাষ। এই যোগীর কৃপায় ও নিজের অনন্ত নিষ্ঠায় কয়েক বৎসরের মধ্যে হঠযোগে তিনি পারঙ্গম হইয়া উঠেন।

হঠযোগের ফলে বংশীধরের দেহকান্তি উজ্জ্বল হইয়া উঠে, দেহে মনে উদ্ভূত হয় এক অভূতপূর্ব শক্তি। সিদ্ধাই ও যোগসামর্থ্যও ধীরে ধীরে দেখা দেয়। কিন্তু এসব কোন কিছুতেই বংশীধরের শাস্তি নাই, আনন্দ নাই। এতকালের পরিত্রাঙ্কন, তপস্যা ও শাস্ত্রচর্চার মধ্য দিয়া ঈশ্বরলাভের জন্ত, ব্রহ্মসাক্ষাৎকারের জন্ত, মন তাঁহার উদগ্র অধীর হইয়া উঠিয়াছে—পরম প্রাপ্তির সঙ্কল্প হইয়াছে দৃঢ়তর। কিন্তু হঠযোগের সাধনক্রমের মধ্য দিয়া জীবনের সেই লক্ষ্যে তো পৌঁছিতে পারিতেছেন না।

নিরপেক্ষ মন নিয়া দিনের পর দিন ভরিয়া দেখিলেন, নিজের সম্পর্কে বিচার-বিশ্লেষণও কম করিলেন না। চিন্তের যে শুদ্ধতা, প্রশান্তি ও স্থৈর্য সাধিত হইলে পরা চৈতন্যের উদয় হয়, হঠযোগের সাধনায় তাহা লাভ করা দুষ্কর। বরং এই যোগ সাধনার ফলে যে সিদ্ধাই ও বিভূতির স্মরণ হয়, তাহার ফলে নবীন সাধকের আত্ম-ভিমান বাড়িবারই আশঙ্কা থাকে। হৃদয়ে তাঁহার এবার দৃঢ় প্রতীতি জন্মিল, রাজযোগের পথ ছাড়া পরমপ্রাপ্তির অন্য পথ নাই। এবার সেই রাজযোগের রাজপথই তিনি অনুসরণ করিবেন একান্ত নিষ্ঠায়।

অন্তঃপর শিক্ষাদাতা হঠযোগী মহাত্মাকে অন্তরের গভীর কৃতজ্ঞতা

জানাইয়া বংশীধর বিষ্ণুপ্রয়াগ হইতে বাহির হইয়া পড়েন। উপস্থিত হন দ্ব্যধিকেশে।

দ্ব্যধিকেশে তখন গোবিন্দ-গুরুজী আশ্রমের খুব প্রসিদ্ধি। এই আশ্রমে স্বামী পূর্ণাশ্রম ও সতুয়া স্বামী নামে দুই মহাত্মা অবস্থান করিতেছেন। বেদান্তের ব্রহ্মাত্মজ্ঞান ও রাজযোগের ব্যাখ্যা বিশ্লেষণে ইঁহারা পারঙ্গম। ইঁহাদের সান্নিধ্য ও সাহায্য পাইবার জন্ত বংশীধর গোবিন্দ-গুরুজী আশ্রমে আশ্রয় নিলেন।

সুদর্শন, শাস্ত্রবিদ, বংশীধর অল্পদিনের মধ্যেই প্রবীণ স্বামীজীদ্বয়ের অত্যন্ত স্নেহভাজন হইয়া উঠেন। নবীন সাধক হঠযোগে পারদর্শী হইয়া আসিয়াছেন, এজন্ত স্বামীজীরা আদর করিয়া তাঁহার নাম দেন—বীরভদ্র। এখানকার শাস্ত্রচর্চা ও সাধন-অনুকূল পরিবেশে পরমানন্দে বংশীধর প্রায় তিন বৎসর কাটাইয়া দেন।

এই সময়ে আবার একদিন তাঁহার সম্মুখে আবিভূত হন তাঁহার চিরকল্যাণকামী পরমহংস মহারাজ, প্রদান করেন তাঁহাকে প্রয়োজনীয় নির্দেশ।

প্রসন্ন মধুর কণ্ঠে পরমহংসজী বলেন, “বৎস বংশীধর, তোমার ব্রহ্মলাভের আকৃতি দেখে, শাস্ত্রবুৎপত্তি দেখে, আমি আনন্দিত হয়েছি। ইতিমধ্যে হঠযোগ-সাধন তুমি নিয়েছো ভালোই করেছে। হঠযোগে ব্রহ্মলাভ হয় না, কিন্তু ব্রহ্মলাভের জন্ত দৃষ্টির তপস্যা করতে হয়—তাতে অবশ্যই সাহায্য হয়। দেহ হঠযোগ-কুশল ও দৃঢ় থাকলে কচ্ছ ও ত্যাগ বৈরাগ্যের প্রস্তুতি ভালোভাবে গড়ে ওঠার অবকাশ পায়। কিন্তু বৎস, সদাই দৃষ্টি নিবদ্ধ করতে হবে মূল লক্ষ্যের ওপর। আর সে দৃষ্টি যে তোমার আছে, তা আমি জানি। রাজযোগই তোমার আসল পথ, এ পথ নিজেই তুমি খুঁজে নিতে বেরিয়েছো এটা বড় আনন্দের কথা। হ্যাঁ বৎস, এবার তোমায় আমি একটা নূতন নির্দেশ দেবো।”

“মহারাজ, আপনার আশীর্বাদই আমায় এগিয়ে দিচ্ছে ধাপে

ধাপে। আপনার কল্যাণ কামনা আমার সতত রক্ষা করছে বর্ষের মত। আপনার যে কোন নির্দেশ আমার শিরোধার্য।” যুক্তকরে নিবেদন করেন বংশীধর।

“বৎস, সময় হয়ে এসেছে। তোমার চিহ্নিত সঙ্গুরু তোমার প্রতীক্ষায় বসে আছেন। অবিলম্বে তুমি কাশীধামে যাও। সেখানে গুরুর কাছে তত্ত্বজ্ঞান লাভ করো। ব্রহ্মসাক্ষাৎকার ক’রে জীবন তোমার সফল হয়ে উঠুক।

পরমহংসজীর নির্দেশপালনে বংশীধর আর বিলম্ব করেন নাই। দীর্ঘদিনের তিতিক্ষা, তপস্তা ও প্রত্যাশা সফল করার জন্ত তিনি উপনীত হন কাশীধামে।

আনন্দদায়িনী কাশী বিভাদায়িনী কাশী—মোক্ষদায়িনী কাশী। যুগ যুগ ধরিয়া শাস্ত্রত ভারতের ললাটে শুচিশুভ্র তিলকরূপে জ্বলজ্বল করিতেছে এই পুণ্যময়ী তীর্থনগরী। বিশ্বনাথ আর অন্নপূর্ণার লীলা-নিকেতন এই কাশীকে বেষ্টন করিয়া রহিয়াছে গঙ্গার পবিত্র ধারা, আর রহিয়াছে অগণিত ব্রহ্মবিদ পুরুষদের তপস্তার অনন্ত প্রবাহ। তেজঃপুঞ্জকলেবর ব্রহ্মবিদ মহাত্মা, ব্রহ্মচারী সাধকদল ও মুমুক্শুদের দর্শন যেমন এখানে পাওয়া যায়, তেমনি পাওয়া যায় শাস্ত্রবিদ আচার্য্য আর সনাতন ধর্ম ও সমাজের বিশিষ্ট ধারক বাহকদের। এখানকার কত মঠে মন্দিরে সোৎসাহে চলিতেছে বেদান্ত ও ব্রহ্মবিদ্যার অনুশীলন, আবার কত বড় বড় ধর্মসভায় অনুষ্ঠিত হইতেছে নানা দেশ হইতে আগত তর্ক-শূরদের বিচার দ্বন্দ্ব। অধ্যাত্ম-জীবন আর সারস্বত জীবনের মিলিত আলোকচ্ছটায় এই পুণ্যময়ী নগরীর দিক্-দিগন্ত উদ্ভাসিত। তাই এই কাশীধামে উপনীত হইয়া বংশীধরের আনন্দের অবধি নাই।

কয়েকদিন ঘুরিয়া ঘুরিয়া তিনি নগরীর শ্রেষ্ঠ মঠ মন্দির পীঠস্থান

ও বিছাকেশ্রগুলি দর্শন করিয়া বেড়ান। আশ্রয়ের স্থান কোথাও মিলে নাই, ব্রহ্মচারী বেশে যত্রতত্র ঘুরিয়া বেড়ান, সত্রে একবেলা আহার জুটিয়া যায়, তারপর নিশাযোগে দশাশ্বমেধ ঘাটের সিঁড়িতে ঘাটিয়ালাদের ছাতার নীচে শয়ন করিয়া গভীর নিদ্রায় ঢলিয়া পড়েন।

কাশীতে তখন শক্তিধর মহাত্মাদ্বয় তৈলঙ্গ স্বামী ও ভাস্করানন্দের খুব প্রসিদ্ধি। বংশীধর সাগ্রহে ইঁহাদের দর্শন করিলেন, ভক্তিভরে প্রণাম নিবেদন করিয়া ফিরিয়া আসিলেন।

অন্তরে তাঁহার বড় প্রশ্ন—কোথায় তাঁহার চিহ্নিত সদগুরু যাঁহার নিকট হইতে নিবেন সন্ন্যাস দীক্ষা, যাঁহার চরণে চিরতরে করিবেন আত্মসমর্পণ। মনপ্রাণ তাঁহার রাজযোগের সাধন গ্রহণে উন্মুখ হইয়া উঠিয়াছে। এ সাধন যিনি দিবেন তাঁহাকে একাধারে হইতে হইবে বৈরাগ্যবান, তপস্তাপরায়ণ, বেদান্তের অদ্বৈত বিচারে পারঙ্গম এবং রাজযোগের নিগূঢ় সাধনায় সিদ্ধকাম। যে সাধন-প্রস্তুতি এ যাবৎ বংশীধরের জীবনে গড়িয়া উঠিয়াছে তাহাকে সার্থক করিয়া তুলিতে হইলে এমনি এক মহাত্মাকে খুঁজিয়া বাহির করিতে হইবে।

পরমহংসজী আশ্বাস দিয়াছেন, এই কাশীধামেই গুরু তাঁহার জন্ম অপেক্ষমান। ব্রহ্মবিদ পুরুষের এ আশ্বাসবাণী তো কখনো মিথ্যা হইবার নয়। আশায় আশায় দিন গুণিতে থাকেন বংশীধর।

ইতিমধ্যে সংবাদ পাইলেন, গঙ্গাতীরে মহাযোগী অহল্যাবাদীর প্রতিষ্ঠিত মঠে এক পরমজ্ঞানী অশেষ শাস্ত্রবেত্তা মহাপুরুষ অবস্থান করেন। বিশেষ করিয়া বেদান্ত বিচারে ও রাজযোগের সাধনায় তাঁহার তুল্য ব্যক্তি সমকালীন উত্তর ভারতে কেহ নাই।

প্রত্যুষে গঙ্গান্নান সারিয়া ভাস্ক-ভূষিত ললাটে, প্রদীপ্ত ভাস্করের মত সন্ন্যাসীবর গোড়স্বামী অহল্যাঘাটে শিষ্যগণ সহ বসিয়া আছেন। ছরুহ শাস্ত্রতত্ত্ব ও সাধনতত্ত্বের ব্যাখ্যা ও আলোচনা চলিয়াছে। আর প্রবীণ অন্তরঙ্গ শিষ্যেরা তৃষ্ণার্ত চাতকের মত স্বামীজীর অমৃতবাণী শ্রবণ করিতেছেন।

অনেকক্ষণ যাবৎ এই তত্ত্বালোচনা শুরু হইয়াছে। মণ্ডলীর এক কোণে বংশীধর নীরবে নির্নিমেষে প্রজ্ঞানঘন দিব্যোজ্জ্বল মূর্তির দিকে চাহিয়া আছেন। সর্ব্ব অস্তর দিয়া উপলব্ধি করিতেছেন,—যে পরম বস্তুলাভের জ্ঞান তিনি সংসার ছাড়িয়াছেন, ভিত্তারীর মত দেশ দেশান্তরে ঘুরিয়া মরিতেছেন, তাহা এই মহান পুরুষেরই করায়ত্ত। আত্মসমর্পণ করিতে হয় তো এমন মহাত্মার চরণেই করিতে হয়।

শাস্ত্র ব্যাখ্যা ও আলোচনার শেষে বংশীধর উঠিয়া দাঁড়ান, আচার্য্য গোড়স্বামীর পদপ্রান্তে ভক্তিভরে লুটাইয়া পড়েন। তারপর নিজের পরিচয় দিয়া করজোড়ে নিবেদন করেন তাঁহার অস্তরের আকাজক্ষা—“প্রভু, সারা দক্ষিণ ও উত্তর ভারত পরিভ্রম্য করে এই অভাগার জীবনতরী আজ আপনার চরণপ্রান্তে এসে ঠেকেছে। আপনি এর ভার নিন। কৃপা করে আমায় সন্ন্যাস দান করে, খুলে দিন মোক্ষপথের দ্বার।”

অনিন্দ্যাসুন্দর যুবক, চোখে-মুখে প্রতিভা ও সাধন-নিষ্ঠার ছাপ। আচার্য্য গোড়স্বামী মুগ্ধনয়নে কিছুক্ষণ বংশীধরের দিকে চাহিয়া আছেন। তারপর প্রশান্ত স্বরে প্রশ্ন করা শুরু করেন। কি তাহার নাম, বংশপরিচয়, কোথায় কোন্ আচার্য্যের কাছে কোন্ কোন্ শাস্ত্র অধ্যয়ন করিয়াছেন, কোন্ সাধন নিয়া কতটা অগ্রসর হইয়াছেন, খুঁটিনাটি সকল তথ্যই স্বামীজী মহারাজ জানিয়া নিলেন।

শাস্ত্রালাপ শুরু করিতেই দেখা গেল, বয়সে তরুণ হইলেও বংশীধর একজন অসামান্য শাস্ত্রবেত্তা। দীর্ঘদিনের ত্যাগ বৈরাগ্যের সহিত জ্ঞানাত্মশীলন তাঁহার জীবনে যুক্ত হওয়ায় ব্রহ্মকারা বৃত্তির এক বিরাট আধার রূপে সে পরিণত হইয়াছে। বহুদিন যাবৎ অস্তরে অস্তরে ব্রহ্ম-সাধনার এমনি এক উপযুক্ত অধিকারী পুরুষের, এমনি এক উত্তরসূরীর প্রতীক্ষায় ছিলেন গোড়স্বামী।

তৃপ্তি ও প্রসন্নতায় আচার্য্যের স্মৃগৌর আননখানি প্রদীপ্ত হইয়া উঠিয়াছে। কিন্তু বংশীধরকে তাঁহার এ ভাবান্তর বুঝিতে দিলেন না।



কণ্ঠস্বরে গান্ধীর্ষ্য টানিয়া আনিয়া কহিলেন, “বৎস, উত্তম কথা। আমি তোমায় আমার কাছ থেকে সন্ন্যাস নেবার সুযোগ দেবো। কিন্তু তার আগে কয়েকটা মাস আমার কাছে নূতন করে তোমায় বেদান্তের পাঠ নিতে হবে। তোমার গ্রহণ ক্ষমতা যদি সন্তোষজনক হয়, তবেই তোমায় দীক্ষা দেবো, নতুবা আর কোথাও তোমায় যেতে হবে।”

বংশীধর তো আকাশের চাঁদ হাতে পাইলেন। বুঝিলেন, আচার্য্য তাঁহাকে কঠোরভাবে পরীক্ষা করিয়া নিতে চান। বেশ, তাহাতেই তিনি সন্মত।

আচার্য্য গোড়স্বামী আবার কহেন, “হ্যাঁ বৎস, আর একটা কথা। আমার এ আশ্রমে এখন তোমার স্থান হবে না। তুমি যেমনভাবে দিনাতিপাত করছো, তাই করে যাবে। আর প্রতিদিন দুই বেলা আশ্রমে এসে গ্রহণ করবে তোমার পাঠ।”

“যে আজ্ঞে মহারাজ। আপনার নির্দেশ আমার শিরোধার্য্য”। আচার্য্যকে প্রণাম জানাইয়া নির্বিকার চিত্তে বংশীধর স্থান ত্যাগ করেন।

এবার গোড়স্বামীর ভক্ত শিষ্যদের মধ্যে শুরু হয় মৃৎ গুণ্জন। আচার্য্য কোতূহলী হইয়া প্রশ্ন করেন, “তোমরা কি আমায় কিছু বলতে চাও?”

“হ্যাঁ, প্রভু, আমাদের একটা নিবেদন আছে।” সবিনয়ে বলেন এক প্রধান শিষ্য। “আপনার এই বৃহৎ আশ্রমে স্থানের অভাব বিন্দুমাত্র নেই, রাজকীয় ভাণ্ডারা তো প্রায়ই লেগে আছে। তবে নবাগত ব্রহ্মচারীটিকে এখানে স্থান দিলেন না কেন, বুঝতে পারছিলাম না। ওকে তো বৈরাগ্যবান ও তপস্শ্রা-পরায়ণ বলেই মনে হলো।”

“ঠিকই বলেছো। এ যুবকটির ভেতর বিরাট সম্ভাবনা লুকিয়ে রয়েছে। আধার বড় ও শুদ্ধ বলেই তো পরীক্ষা হবে কঠোরতর

সত্রেয় শুকনো রুটি খেয়ে আর ঘাটিয়ালের ছাতার নীচে রাত্রিবাস করে আরো কিছুদিন কাটিয়ে দিক। ত্যাগ বৈরাগ্যের শোধন ওকে পাকা সোনায় পরিণত করুক। এটাই আমি চাই।

কিছুক্ষণ নীরব থাকিয়া গৌড়স্বামী আপন মনে কহিতে থাকেন, “ভালো মন্দের কথা নয়—তবে একটা পরিবর্তনের সূচনা কিন্তু দেখা যাচ্ছে। কাশীর মঠ-মন্দির ও বিছাকেন্দ্রে এতদিন দক্ষিণী দণ্ডী সন্ন্যাসীদেরই ছিল একচেটিয়া নেতৃত্ব। উত্তর ভারতের এই প্রতিভাধর যুবকটি সেই ধারা এবার পাণ্টে দেবে বলে মনে হচ্ছে।”

পরের দিন হইতেই বংশীধর গৌড়স্বামীর কাছে পাঠ নেওয়া শুরু করেন। ত্যাগ-বৈরাগ্যময় পথে জীবনযাত্রা তাঁহার আগেকার মতই চলিতে থাকে।

গৌরকান্তি, সমুন্নত দেহ, প্রতিভা-সমুজ্জ্বল বংশীধরের প্রতি এ সময়ে অনেক মঠ-মণ্ডলীর মোহান্তের দৃষ্টি আকৃষ্ট হয়। নানা প্রলোভন দেখাইয়া এই শাস্ত্রবিদ তরুণকে তাঁহারা দলে ভিড়ানোর চেষ্টা করিতে থাকেন। কিন্তু তাঁহাদের সকল চেষ্টাই হয় ব্যর্থ। গৌড়স্বামী এখন বংশীধরের জীবন-আকাশের ধ্রুবতারা, অনন্ত-নিষ্ঠায় এই কুপালু আচার্য্যের দিকে লক্ষ্য রাখিয়া অধ্যাত্মপথের অভিযাত্রায় তিনি অগ্রসর হইতে থাকেন।

উত্তর ভারতে তখন সিপাহী যুদ্ধের ঘোর তাণ্ডব চলিয়াছে। বারাণসীতেও এই সময়ে বিক্ষোভ ও সংঘর্ষ দেখা দিতে থাকে। শাস্তিরক্ষার জন্ত কর্তৃপক্ষ এ অঞ্চলে একদল গোরা সৈন্য মোতায়েন রাখেন। কিছু সংখ্যক সেনা মাঝে মাঝে গঙ্গাবক্ষে টহল দিয়া বেড়ায়—সেদিনও তাঁহারা নদীতে ঘুরিয়া বেড়াইতেছে। ইংরেজ সেনার আবির্ভাব দেখিয়া ঘাটের লোকজন ভয়ে দূরে সরিয়া পড়িয়াছে। এমন সময়ে বংশীধর ঘুরিতে ঘুরিতে নদীতীরে আসিয়া উপস্থিত।

নির্জন ঘাটে কে এই লোকটি, কি তাহার অভিসন্ধি ? বজরার ইংরেজ সৈনিকেরা সন্দিহান হয়, তাড়াতাড়ি তীরে নামিয়া আসে বহির্বাস-পরা অর্জনগ্ন বংশীধরের সম্মুখে তাঁহারা সজীন উঁচাইয়া ধরে ভাঙ্গা-ভাঙ্গা হিন্দিতে নানা প্রশ্নবাণ বর্ষণ করিতে থাকে । বংশীধরও যথাযথ উত্তর দেন । এই প্রশ্নোত্তরের মর্ম্মার্থ—

“ওহে, একলাটি এখানে তুমি ঘুরে বেড়াচ্ছে কেন, বলতো ?”  
গোরা সৈনিকেরা জিজ্ঞাসা করে ।

“কেন, আমায় দেখে কি বিজ্রোহী বলে মনে হচ্ছে ? পরিচ্ছদ দেখে বুঝতে পারছো না যে আমি একজন ভিক্ষাজীবী সাধু ?”  
—বংশীধর মুচকি হাসিয়া উত্তর দেন ।

বংশীধরকে আপাদমস্তক নিরীক্ষণ করিয়া, তাহার সপ্রতিভ হাসি দেখিয়া গোরারা একটু আশ্বস্ত হয়, বলে—“না, তোমায় দেখে মনে হচ্ছে তুমি বদমায়েস নও । তুমি সাধু—জ্যোতিষী । আচ্ছা, তুমি জ্যোতিষী গণনা করতে পারো ?”

“কি তোমাদের প্রশ্ন বলই না সাহেব, একবার চেষ্টা করে দেখি পারি কিনা ।” সকৌতুকে বলেন বংশীধর ।

“তাঁখো, সাধু, এলাহাবাদে এখন জোর লড়াই চলছে । বিজ্রোহী সিপাইরা ইংরেজ সরকারের কেলা ধিরে ফেলেছে । আমরা বড় ছশ্চিন্তায় আছি । বলতে পারো ঐ কেল্লার পতন ঘটেছে কিনা ?”

“খুব পারি । আচ্ছা তোমরা আমার পায়ের কাছে মাটির দিকে তাকিয়ে দেখতো । কি দেখছো ? পিঁপড়ের সারি মাটির একটা উঁচু চক্রের চারপাশ ঘিরে রয়েছে, ভেতরে ঢুকছে না,—তাই না ? এলাহাবাদ দুর্গের অবস্থাও এমনি । সিপাইরা দুর্গ অবরোধ করেছে, কিন্তু ঢুকে পড়ার মত শক্তি সঞ্চয় এখনো করে নি ।”

গোরা সৈনিকেরা এ সংবাদে উৎফুল্ল হইয়া উঠে । বলে, “সাধু, তুমি বড় ভালো লোক । আচ্ছা যাও, তুমি তোমার খুশী মত নদীর ঘাটে চলাফেরা করতে পারো ।”

নির্ব্বিকার চিত্তে বংশীধর ঘাটের এক কোণে বসিয়া পড়েন, তারপর ধ্যান-ভজনে রত হন।

কয়েকমাস গত হইয়াছে। সাধনা, স্বাধ্যায় ও গুরুসেবার মধ্যে দিয়া বংশীধর আচার্য্য গোড়স্বামীর আরো ঘনিষ্ঠ আরো প্রিয় হইয়া উঠিয়াছেন। পরীক্ষার কয়েকটি পর্য্যায় সমাপ্ত হইয়াছে। গুরু এবার নবীন তপস্বীকে সন্ন্যাস দীক্ষাদানের সিদ্ধান্ত করিলেন। উত্তরায়ণের পূর্ণিমায়, শুভ নক্ষত্রে, এই অনুষ্ঠান সম্পন্ন হইয়া গেল। বংশীধরের সন্ন্যাস নাম হইল—বিশুদ্ধানন্দ সরস্বতী।

অলৌকিক মেধা প্রতিভার অধিকারী, সং ব্রাহ্মণকুলে জাত এই নবীন শিষ্য। গুরু মনে মনে স্থির করিয়াছেন তাঁহাকেই করিবেন গদির উত্তরাধিকারী, তাঁহার সন্ন্যাসী মণ্ডলীর ভবিষ্যৎ-নেতা। কাশীধামের সারস্বত সমাজে ও শাস্ত্রবিদ সন্ন্যাসী সমাজে যাহাতে সে শীর্ষস্থানীয় হইয়া উঠে, সে প্রস্তুতি সাধনেও গোড়স্বামী কোন ক্রটি রাখিলেন না। প্রাচীন শাস্ত্র ও অধিবিজ্ঞায় তাঁহাকে পারঙ্গম করিয়া তুলিতে লাগিলেন।

মীমাংসা দর্শন, বেদান্ত, প্রাচীন ও নব্যজ্ঞায়, কপিল দর্শন, শৈবতন্ত্র, প্রভৃতির মূল, প্রকরণ, টীকা ভাষ্য বিশুদ্ধানন্দ সরস্বতী একে একে আয়ত্ত করিয়া ফেলেন। কয়েক বৎসরের মধ্যে গুরু তাঁহাকে নিজস্ব সন্ন্যাসী সম্প্রদায়ের অধ্যাপনা কার্য্যেরও দায়িত্ব অর্পণ করেন।

কাশী ও উত্তর ভারতের শাস্ত্রার্থ বিচারসভাগুলিতে অশেষ শাস্ত্র-বিদ বিশুদ্ধানন্দ মহারাজ আবির্ভূত হইতেন অলস পাবকের মত। শাস্ত্রের নিহিতার্থ উদ্ঘাটনে, সনাতন ধর্ম্মের বিজয়কেতন সংস্থাপনে তিনি ছিলেন এক অপ্রাতদ্বন্দ্বী নেতা। কাশীর মঠ মণ্ডলী আখড়া

ও গৃহীমণ্ডল যেখানেই বিশুদ্ধানন্দ যাইতেন, লাভ করিতেন সকলের স্বতঃস্ফূর্ত শ্রদ্ধা ও সম্মম। শিষ্যের এই সাফল্যে আচার্য্য গোড়স্বামীর আনন্দের সীমা নাই।

এ সময়ে মণ্ডলীর সকল সন্ন্যাসীকে একদিন তিনি সমবেত করিলেন, ঘোষণা করিলেন,—তঁাহার দেহান্তের পর বিশুদ্ধানন্দ সরস্বতীই হইবেন মঠ-মণ্ডলীর মোহান্ত এবং পরিচালক। তাই যতদিন এই মহাত্মা জীবিত ছিলেন, মঠের ভাবী উত্তরাধিকারী বিশুদ্ধানন্দের আচার-আচরণ ও আদর্শের বিশুদ্ধতা রক্ষার দিকে ছিল তঁাহার সূতীক্ষ্ণ দৃষ্টি। প্রিয় শিষ্যের অন্তরে আত্মাভিমান যেন কখনো না আসে, ত্যাগ-বৈরাগ্যের সাধনায় তঁাহার জীবন যেন সদাই থাকে সমুজ্জ্বল, এ জন্ম তঁাহার সতর্কতার অবধি ছিল না। মঠের একদিনকার একটি ক্ষুদ্র ঘটনায় ইহার প্রমাণ মিলে।—

বিশুদ্ধানন্দের আগমনের কয়েকবৎসর পূর্বে আচার্য্য গোড়স্বামী তিনজন ব্রহ্মচারীকে সন্ন্যাস দেন। ইহাদের মধ্যে স্বামী বিশ্বরূপ ছিলেন প্রবীণতম এবং গুরুদেবের সর্ব্বাপেক্ষা স্নেহভাজন। সেদিন একটি তত্ত্বের মীমাংসা নিয়া বিশুদ্ধানন্দের সহিত স্বামী বিশ্বরূপের বিতর্ক উপস্থিত হয়। উভয়েই দক্ষতার সহিত শাস্ত্র প্রমাণ উপস্থাপিত করিতে থাকেন এবং অবশেষে বিশুদ্ধানন্দই জয়ী হন। কিন্তু বিতর্কের কালে হঠাৎ এক সময়ে বিশুদ্ধানন্দ শাস্ত্রভাব হারাইয়া ফেলেন, ক্রুদ্ধস্বরে প্রধান গুরুভ্রাতাকে কিছু কড়া কথাও তাঁহাকে বলিতে শুনা যায়।

এভাবে বিশুদ্ধানন্দ তাঁহার চিন্তের প্রশাস্তি হারাইবেন, গুরু তাহা ভাবিতে পারেন নাই। তাই দুঃখিত অন্তরে তাঁহার দিকে একবার দৃষ্টিপাত করিয়াই তিনি তুষ্ণীভাব অবলম্বন করিলেন, দীর্ঘ সময় কাহারো সহিত কোন বাক্যালাপ করিলেন না।

বিশ্বদ্বানন্দ বুকিলেন, সাময়িক উদ্বেজনা বশে গুরু-মহারাজের অন্তরে আজ তিনি আঘাত দিয়াছেন। তখন ছুটিয়া গিয়া আচার্য্য গোড়স্বামীর পদতলে পতিত হইলেন, ক্ষমা ভিক্ষা করিলেন অকূষ্ঠ চিত্তে। দৃঢ়স্বরে কহিলেন, “প্রভু, আপনি প্রসন্ন হোন। আপনাকে আমি কথা দিচ্ছি, স্বামী বিশ্বরূপজীকে এখন থেকে আমি পরমপূজ্য জ্যেষ্ঠ ভ্রাতার মতই দেখবো, আজীবন গুরুজ্ঞানে তাঁর সেবা করে যাবো। এতে কোনদিনই অশুধা হবে না।”

এ অঙ্গীকার বিশ্বদ্বানন্দ কোনদিন বিন্ধ্যুত হন নাই, উত্তরকালে অক্ষরে অক্ষরে ইহা পালন করিয়া গিয়াছেন।

১৮৫৯ খৃষ্টাব্দে আচার্য্য গোড়স্বামী ইহলোক ত্যাগ করিয়া যান। সন্ন্যাসী মণ্ডলীর সবাই সর্বসম্মতিক্রমে বিশ্বদ্বানন্দকে তাঁহার উত্তরাধিকারীরূপে বরণ করেন, কিন্তু আপত্তি উঠে বিশ্বদ্বানন্দজীর দিক হইতে। প্রবীণ গুরু-ভ্রাতা বিশ্বরূপজীর চরণে প্রণাম করিয়া তিনি বলেন, “মণ্ডলীর সবাকার স্নেহ ও সমর্থন আমার ওপর আছে জেনে আমি আনন্দিত, গৌরবান্বিত। কিন্তু আপনি বর্তমান থাকতে আমি এ পদাধিকার গ্রহণ করতে পারি নে। আপনি বয়োজ্যেষ্ঠ, আপনিই এ পদের উপযুক্ত। তা ছাড়া, আপনি নিজেই অবগত আছেন, আপনাকে গুরুজ্ঞানে এত বৎসর যাবৎ আমি সেবা করে আসছি। আপনাকে মঠের মোহান্ত গুরুরূপে রেখে সেই সেবাকর্মই অব্যাহত রাখতে চাই।”

বিশ্বরূপ স্বামী চমকিয়া উঠেন। বলেন, “এ তুমি কি অদ্ভুত প্রস্তাব করছো বিশ্বদ্বানন্দ। গুরু মহারাজ স্বয়ং তোমায় ঘোষণা করে গেছেন তাঁর উত্তরাধিকারী বলে। আমরা সবাই সাগ্রহে আজ সে মনোনয়ন সমর্থনও করছি। আর তুমি বলতে চাচ্ছো—আমি বয়োবৃদ্ধ। তা হলে কি হয়, আমি তো জানি আমার চাইতে বয়সে ছোট হলেও তুমি—জ্ঞানবৃদ্ধ। তাছাড়া, গুরুজীর অবর্তমানে তুমি যদি আমাকেই গুরু বলে মানতে চাও, তবে তোমায় আমি আদেশ

দিচ্ছি, অবিলম্বে তুমি মোহাস্তের গদীতে অধিষ্ঠিত হও, সবারই অভিলাষ পূর্ণ করো।”

বিশুদ্ধানন্দজী গুরু গোড়ামীর গদীতে আরোহণ করিলেন। কিন্তু যতকাল তিনি বাঁচিয়া ছিলেন, জ্যেষ্ঠ গুরুভ্রাতা ও গুরুপ্রতিম বিশ্বরূপ স্বামীর পরামর্শ না নিয়া কোন কৰ্ম্মে ব্রতী হন নাই, কোন গুরুতর সিদ্ধাস্তও গ্রহণ করেন নাই।

একাদিক্রমে দীর্ঘ উনচল্লিশ বৎসরকাল কাশীর অধ্যাত্ম-সমাজে ও সারস্বত-সমাজে বিশুদ্ধানন্দ সরস্বতী একাধিপত্য করেন। প্রতিদিন গঙ্গান্নান ও ধ্যান-জপের পর ভস্ম-তিলকাস্থিত ললাটে এই সন্ন্যাসী-ভাস্কর শিষ্য ও ভক্ত দর্শনার্থীদের সম্মুখে পরমতত্ত্বের উপদেশ দিতেন। তাঁহার ত্রীমুখ নিঃসৃত বেদাস্তের অদ্বৈত বিচার ও রাজযোগের নিগূঢ় সাধন তত্ত্ব শুনিয়া শত শত শ্রোতা হইত কৃতকৃতার্থ।

সনাতন ধর্ম্মের দুর্গশিখরের শীর্ষপতাকা ছিলেন স্বামী বিশুদ্ধানন্দ সরস্বতী। উত্তর ভারতের সন্ন্যাসী সম্প্রদায়ের তিনি ছিলেন অগ্রতম অগ্রণী সাধক ও শক্তিধর নেতা। ধর্ম্ম ও সমাজের বহুতর সমস্যা, বহুতর বিচার বিতর্ক উপস্থাপিত করা হইত এই মহাপুরুষের সম্মুখে। বেদোজ্জ্বলা বুদ্ধির সাহায্যে সব কিছু সমস্যা, সংশয় ও বিতর্কের সমাধান অনায়াসে তিনি করিয়া দিতেন।

শাস্ত্রার্থ বিচারসভায় অমুগামী সন্ন্যাসীদের নিয়া বিশুদ্ধানন্দ বিরাজিত থাকিতেন শাস্ত্রমূর্তিরূপে, ব্রহ্মসাধনার নিফল দীপশিখা রূপে। সাধু সন্ন্যাসী, শাস্ত্রজ্ঞ ব্রাহ্মণ ও নিরক্ষর জনগণ সকলেরই সহজ শ্রদ্ধা, প্রেম ও আনুগত্য কি করিয়া তিনি অনায়াসে লাভ করিতেন তাহা ছিল এক পরম বিস্ময়।

পুরীধামের সর্বজনশ্রদ্ধেয় আত্মজ্ঞানী সন্ন্যাসী নাজাবাবার সহিত বিশুদ্ধানন্দজী দীর্ঘদিনের সখ্যতানুজ্ঞে আবদ্ধ ছিলেন। কাশীতে

আসিলেই নাজাবাবা মহারাজ প্রায়শঃ তাঁহার মঠে আসিয়া দর্শন দিতেন। ছই ব্রহ্মবিদ মহাত্মার মিলনে আনন্দের তরঙ্গ উচ্ছলিত হইয়া উঠিত। অসিঘাটের হরিহরবাবা ও বনপুরোয়ার বীতরাগানন্দজী তখন নবীন সাধক। এ সময়ে প্রায়ই তাঁহারা বিজ্ঞানন্দজীর চরণতলে গিয়া উপবেশন করিতেন, লাভ করিতেন শাস্ত্র ও সাধনার নিগূঢ় উপদেশ।<sup>৮</sup> মণ্ডলী ও সম্প্রদায় নির্বিশেষে জিজ্ঞাসু ও মুমুকু সন্ন্যাসীরা বিজ্ঞানন্দজীকে সর্বদা দর্শন করিতে আসিতেন, জানিয়া নিতেন পরম তত্ত্বের রহস্য।

সন্ন্যাসী শিরোমণি বিজ্ঞানন্দজীর সারস্বত প্রতিভা দেশ-বিদেশ হইতে বহু বিদ্যার্থীকে আকর্ষণ করিয়া আনিয়াছে। উত্তরকালে ইহাদের এক একজন চিহ্নিত হইয়াছেন দিকপাল পণ্ডিতরূপে।<sup>৯</sup>

উত্তর ভারতের রাজরাজড়াদের মধ্যে স্বামীজীর প্রতিষ্ঠা ছিল অসামান্য। ইহাদের কেহ কেহ ছিলেন তাঁহার গুণমুগ্ধ, কেহ বা ভক্ত শিষ্য। কিঙ্করের মত তাঁহার আদেশ পালনে ইহাদের অনেকে যত্নবান ছিলেন।<sup>১০</sup> স্বামীজীর আদেশে বহু সত্র, সন্ন্যাসী-মঠ ও আশ্রমাদায় এই রাজারা অন্নবস্ত্রের যোগান দিতেন।



আর্য্য সমাজের প্রবর্তক, সংস্কারপন্থী নেতা, দয়ানন্দ স্বামী তখন সনাতন ধর্মের উপর প্রবল আঘাত হানিতেছেন। উত্তর ভারতের সর্বত্র সফর করিয়া পণ্ডিত ও সাধু মণ্ডলীকে স্বমতে আনয়নের জ্ঞাত্তাহার প্রয়াসের অন্ত নাই। সেবার কাশীতে আসিয়াও তিনি বহু ভাষণ দিতে থাকেন। কাশীর মহারাজা ঈশ্বরীপ্রসাদ শাস্ত্রার্থ নির্ণয়ের জ্ঞাত্ত এক বিচারসভার অনুষ্ঠান করেন। এই সভায় দয়ানন্দের প্রতিপক্ষ রূপে উপস্থিত থাকেন স্বামী বিগ্গন্ধানন্দ ও তাঁহার ছাত্র কাশীরাজের সভাপণ্ডিত তারাচরণ তর্করত্ন। বিচারে দয়ানন্দের পরাজয় ঘটে, এবং ইহার পর উত্তর-পূর্ব ভারতে তাঁহার নূতন মতবাদ আর বেশী বিস্তারিত হওয়ার সুযোগ পায় নাই।

১৮৯০ সালের কুম্ভমেলায় যোগদান স্বামীজীর জীবনের এক উল্লেখযোগ্য ঘটনা। ধর্ম্মমেলায় যোগদান তো নয়, এ যেন এক বিজয় অভিযাত্রা। সন্ন্যাসী, ভক্ত ও শাস্ত্রবিদ পণ্ডিতদের এক বিরাট বাহিনী মন্থরগতিতে অগ্রসর হয় বিগ্গন্ধানন্দজীর সঙ্গে। চলার পথে যেখানেই যান, কাশীধামের এই বহুলখ্যাত মহাত্মার শিবিরের চারিপাশে দেখা যায় ভক্ত জনতার ভীড়। রাজরাজড়া ও শেঠের দল থাকেন স্বামীজী মহারাজের সেবায় সদা তৎপর।

মেলাক্ষেত্রে শাস্ত্রমূর্ত্তি, ব্রহ্মবিদ এই মহাপুরুষ প্রতিভাত হন এক দর্শনীয় পুরুষ রূপে। সহস্র সহস্র মুমুক্শু নরনারী সদা তাঁহাকে বেষ্টন করিয়া থাকে। আর্ত ভক্তেরা সমাগত হয় দলে দলে। স্বামীজীর কৃপাপ্রসাদ লাভ করিয়া তাহারা আনন্দ সাগরে নিমজ্জিত হয়।

মেলা হইতে ফিরিবার পথে কাশ্মীরের মহারাজা রণবীরসিংজীর অনুরোধে স্বামীজী ত্রীনগরে পদার্পণ করেন। এই কাশ্মীর যাত্রাকে উপলক্ষ্য করিয়া স্বামীজী সে-বার উত্তর-পশ্চিম ভারতের সহস্র সহস্র নরনারীকে দর্শন দেন, সর্বত্র সঞ্চারিত করেন নূতনতর আধ্যাত্মিক উদ্দীপনা।

অতঃপর আটবৎসর স্বামীজী মরদেহে অবস্থান করেন এবং এই

সময়ে কাশীধাম ত্যাগ করিয়া আর কোথাও তিনি গমন করেন নাই। ভারতের শ্রেষ্ঠ অধ্যাত্মগীঠ ও বিজ্ঞানক্ষেত্রে সন্ন্যাসী সমাজের শ্রেষ্ঠ পুরুষ বিরাজিত থাকেন এক অত্যাঙ্গুল আলোক স্তম্ভরূপে।

বিধি নির্দিষ্ট কর্ম প্রায় উদ্ঘাপিত হইয়াছে। এখন শেষ লগ্নটির জন্ত স্বামীজী প্রতীক্ষমান। শরীর প্রাচীন হইয়া পড়িয়াছে, আজকাল মঠের বাহিরে কোথাও তাঁহার যাওয়া হয় না, চিত্তবৃত্তি সদাই থাকে ব্রহ্মধ্যানে নিমগ্ন। মাঝে মাঝে স্বেচ্ছামত সন্ন্যাসী শিষ্যদের স্বাধ্যায়ে তিনি সহায়তা করেন।

গঙ্গাতীরে অহল্যাবান্ধ ঘাটের উপরেই স্বামীজীর মঠ। মঠের দ্বিতলকক্ষে বসিয়া উদাস নেত্রে সেদিন গঙ্গার স্রোতধারার দিকে তাকাইয়া আছেন। এক নবীন সন্ন্যাসী শিষ্য একখণ্ড কঠোপনিষৎ নিয়া চরণতলে উপবেশন করেন। প্রসন্ন মধুর হাস্তে ঐশ্বর্য হাতে তুলিয়া নিয়া স্বামীজী ধীরে ধীরে গুরু করেন তাঁহার পাঠ ও ব্যাখ্যান। ক্রমে আসিয়া পড়ে সেই প্রসিদ্ধ কারিকাটি যাহাতে বলা আছে—সুবুঝা নাড়ীর কথা। দেহের শত শত নাড়ীর মধ্যে এই নাড়িটি মুর্দ্ধস্থলে গিয়া সংলগ্ন হয় এবং এই পথেই আপ্তকাম যোগীর প্রাণ উৎক্রমণ করে।

কারিকাটি ব্যাখ্যা করার সময় নবীন সন্ন্যাসী ছাত্রটি হঠাৎ একটু উনমনস্ক হইয়া পড়ে। বড় বিরক্তি বোধ করেন স্বামীজী মহারাজ। দৃঢ়স্বরে বলিয়া উঠেন, “এখন তো এ নাড়ীর কথায় কান দিচ্ছো না, দেখো অতি শীঘ্রই এই নাড়ী পথে হবে আমার দেহান্ত। তারপর এই নাড়ীর কথা আর হয়তো তোমার স্মৃতি থেকে মুছে যাবে না।”

নবীন সন্ন্যাসী বড় লজ্জিত হন, বার বার করজোড়ে গুরু মহারাজের ক্ষমা ভিক্ষা করিতে থাকেন।

কয়েকদিন পরেই বিশুদ্ধানন্দ মহারাজের প্রতীক্ষিত পরম লগ্নটি আসিয়া পড়ে।

১৮৯৮ খৃষ্টাব্দের চন্দন একাদশীর পুণ্যতিথি। সময় আসন্ন জানিয়া স্বামীজী শিষ্যদের আদেশ দেন, “আর কালবিলম্ব না ক’রে আমার দেহটি স্থাপন করো গঙ্গা বিধৌত ঐ বুরুজের ওপর। তোমরা সবাই তাড়াতাড়ি তৈরী হয়ে নাও।”

শিষ্যেরা শোকবিহ্বল হইয়া পড়েন। যুহু কণ্ঠে স্বামীজী তাঁদের আশ্বাস দেন, “শোক কেন বলতো? আত্মজ্ঞানীর জন্মই বা কই, মৃত্যুই বা কই? তোমরা চিন্তের স্থৈর্য্য অটুট রাখো।”

বুরুজের উপর নিয়া যাওয়া হইলে জরাজীর্ণ দেহটি নিয়া স্বামীজী ঋজু হইয়া উপবেশন করেন। তারপর সজ্জানে প্রাণবায়ুকে চালিত করেন সুষুম্নার মধ্য দিয়া ব্রহ্মরন্ধ্রের পথে।

তৎক্ষণাৎ চারিদিকে এ সংবাদ রটিয়া যায়। দশাশ্বমেধ ঘাটে সমবেত হয় সহস্র সহস্র ভক্ত ও দর্শনার্থী নরনারী। ব্রহ্মলীন মহাত্মার মরদেহটি পুষ্পচন্দনে সুসজ্জিত করিয়া বিসর্জন দেওয়া হয় পুতসলিলা-গর্ভে।

# স্বামী বিবেকানন্দ

ভাগীরথীর ছই তীরে নামিয়া আসিয়াছে সঙ্ঘার অঙ্ককার।  
আকাশের বৃকে ছই চারিটি তারা মিটমিট করিয়া জ্বলিতেছে।  
নদীবক্ষ স্তব্ধ, নিস্তরঙ্গ, নোঙর-করা বজ্রাখানিতেও তেমনই অখণ্ড  
নীরবতা। একটি সুদর্শন যুবক ত্রস্তপদে সিঁড়ি বাহিয়া উপরে  
উঠিয়া আসেন, নিভৃত কক্ষের দ্বারে বার বার করেন করাঘাত।

সৌম্য, প্রশান্ত মূর্ত্তি এক বৃদ্ধ ধ্যান-কক্ষ হইতে বাহির হইয়া  
আসেন। স্নেহপূর্ণ স্বরে প্রশ্ন করেন, “কি বাবা, কি চাই তোমার?”

যুবকের চোখে-মুখে উদ্বেজনার ছাপ। ব্যাকুল কণ্ঠে বলিয়া  
উঠেন, “মশাই, আপনি কি ঈশ্বর দর্শন করেছেন? আমায়ও কি  
দর্শন করাতে পারেন?”

ধ্যানোখিত বৃদ্ধ তাপস সর্বজনশ্রদ্ধেয় ব্রাহ্ম নেতা—দেবেন্দ্রনাথ  
ঠাকুর। গঙ্গার উপরে এই হাউস বোটে নিভৃত তপস্তায় কিছুদিন  
যাবৎ দিন কাটাইতেছেন। তাঁহার সম্মুখে দণ্ডায়মান যুগ্ম তরুণ—  
নরেন্দ্রনাথ দত্ত।

যুবকের হৃদয়োচ্ছ্বাস ও ব্যাকুলতার মর্ম্ম বৃষ্টিতে দেবেন্দ্রনাথের  
বিলম্ব হইল না। স্নেহে নিকটে বসাইয়া তাহাকে শান্ত করিলেন,  
দিলেন নানা আশ্বাস ও উপদেশ। তারপর নিম্পলক নেত্রে কিছুক্ষণ  
চাহিয়া থাকিয়া বলিলেন, “বাবা, তোমার চোখ ছুটি ঠিক যোগীদের  
মত। একনিষ্ঠ হয়ে সাধন করো। তুমি সফলকাম হবে।”

নরেন্দ্রনাথ বজরা হইতে নিজস্ব হইলেন। দেবেন্দ্রনাথের  
ব্যক্তি ও প্রবোধবাক্য তাঁহার উদ্বেজনা হ্রাস করিয়াছে সত্য, কিন্তু  
প্রাণের অদম্য পিপাসা মিটিল কই? মূল প্রশ্নের উত্তর তো তিনি  
সাধক দেবেন্দ্রনাথের কাছে পাইলেন না।

নরেন্দ্রনাথের জীবন-জিজ্ঞাসার আর এক চিত্র। দক্ষিণেশ্বরের গঙ্গা তীরে দেবী ভবতারিণীর মন্দিরে সন্ধ্যারতির কঁাসর-ঘণ্টা বাজিয়া সবেমাত্র শেষ হইয়াছে। ঠাকুর শ্রীরামকৃষ্ণ তত্ত্ব পরিবৃত্ত হইয়া বসিয়া আছেন। নরেন্দ্রনাথ ধীরে ধীরে সম্মুখে আসিয়া দাঁড়ান। ঝড়ের আলোড়ন তাঁহার অন্তরে। ব্যাকুল কণ্ঠে প্রশ্ন করেন, “মশাই আপনার কি ঈশ্বর সাক্ষাৎকার হয়েছে?”

বহু সাধু-পুরুষকে একথা বার বার তিনি জিজ্ঞাসা করিয়াছেন। কেহই তো এ পর্য্যন্ত ‘হাঁ’ বলেন নাই। ইনিও যদি আজ তাঁহাকে নিরাশ করেন?

সহজ কণ্ঠে, প্রত্যয়ের সুরে, অবিলম্বে রামকৃষ্ণ উত্তর দিলেন, “সে কি গো! দেখেছি বই কি? এই যেমন তোমাদের দেখছি—এমনি করেই তো রোজ দেখছি। শুধু তাই নয়, তোমাকেও দেখাতে পারি। কিন্তু আমার কথামত চলতে হবে।” সঙ্গে সঙ্গে স্মিতহাস্তে বটুয়া হইতে কিছুটা সুপারী তুলিয়া লইয়া ঠাকুর চিবাইতেছেন। নরেন্দ্রনাথ অপার বিশ্বয়ে এই দেব-মানবের দিকে নির্নিমেষে তাকাইয়া আছেন। বাক্য মনের অতীত ঈশ্বরকে এমন করিয়া পাওয়া যায়, এই ছুঃসাহসের কথা এমন সহজ প্রত্যয় ভরা কণ্ঠে কেহ তো আজ অবধি বলে নাই।

যে প্রশ্ন তিনি আজ দক্ষিণেশ্বরের পূজারী ব্রাহ্মণের পদতলে বসিয়া করিলেন, তাহা শুধু তাঁহার নিজ জীবনেরই প্রশ্ন নয়, তাহা যে ঊনবিংশ শতাব্দীর সকল বুদ্ধিজীবীদেরই সংশয় পীড়িত প্রশ্ন। যুক্তি, বিজ্ঞান ও অধিবিচার জটিল গ্রন্থি ভেদ করিয়া প্রত্যক্ষ অনুভূতি ও দর্শনের কামনা ইহাতে নিহিত।

দীর্ঘদিনের সেই প্রশ্নের উত্তর আজ মিলিয়াছে। সে উত্তর বাস্তব অনুভূতিতে প্রোজ্জ্বল, সহজ প্রত্যয়ে পূর্ণ। ঠাকুর অকুণ্ঠ কণ্ঠে দাবী করিতেছেন, তিনি তাঁহাকে ভগবৎ দর্শন করাইয়া দিবেন, যেমনটি নিজে দর্শন করিয়াছেন তেমন করিয়াই দিবেন।

এবার বলিবার পালা নরেনের। আত্মসমর্পণের প্রয়োজন সর্ব্বাধিক, সে প্রস্তুতি আজ তাঁহার কোথায়? রামকৃষ্ণের তত্ত্ব তাঁহার হৃদয়ে ফুটিয়া উঠিতে পারিতেছে কই? এই অর্দ্ধোন্মাদ অর্দ্ধশিক্ষিত সাধকের পদে তাঁহার সমস্ত কিছু ব্যক্তিত্ব, শিক্ষা-দীক্ষা উৎসর্গ করিতে পারিতেছেন কই?

কিন্তু নরেনকে পারিতে হইয়াছিল। দীর্ঘ পাঁচ বৎসরের পরীক্ষা নিরীক্ষার ফলে এই আত্মসমর্পণকে আমরা সম্ভব হইতে দেখি। এই পাঁচ বৎসরের ইতিহাস ঠাকুরেরই করুণালীলার এক নিরবচ্ছিন্ন ইতিহাস। দিনে দিনে পলে পলে সহজ স্বচ্ছন্দ ভালবাসার মধ্য দিয়া রামকৃষ্ণ তাঁহার স্বরূপটিকে, তাঁহার পরমতত্ত্বকে নরেন্দ্রনাথের জীবনে প্রতিকলিত করিয়া তুলিয়াছেন। ঠাকুরের এই আত্মসাৎ-ক্রিয়াই নরেনের আত্মসমর্পণকে সহজতর করিয়া তোলে, অধ্যাত্মশিল্পী রামকৃষ্ণের মহান সৃষ্টি তাঁহারই মধ্যে ধীরে ধীরে রূপায়িত হইয়া উঠে। আচার্য্য বিবেকানন্দের ঘটে চমকপ্রদ অভ্যুদয়। ভারতবর্ষের অধ্যাত্ম-জীবনে এ অভ্যুদয় ঘটায় কল্যাণকর উজ্জীবন, হরাস্থিত করে প্রাচ্য ও পাশ্চাত্যের আত্মিক সেতুবন্ধন।

এক ছুজ্জের্য্য ঐশীশক্তির আকর্ষণে যুবক নরেন্দ্রনাথ দক্ষিণেশ্বরে ঠাকুরের পদপ্রান্তে উপনীত হইয়াছিলেন। এই একই ঐশীশক্তির লীলা তাঁহার বাল্য ও কৈশোর জীবনকে নিয়ন্ত্রিত করিয়াছে, স্রোত-ধারার গতিপথের মোড় ঘুরাইয়াছে বার বার—উত্তরণ ঘটাইয়াছে মুক্তির মহাসাগরে।

শিমুলিয়ার অভিজাত দত্ত-পরিবারে নরেন্দ্রনাথ জন্মগ্রহণ করেন। এই বংশের রামমোহন দত্ত ছিলেন সুপ্রীম কোর্টের প্রতিষ্ঠাবান উকিল। বিপুল বিত্তবিষয় তিনি রাখিয়া যান, কিন্তু পুত্র দুর্গাচরণ ইহাতে আকৃষ্ট হন নাই, পঁচিশ বৎসর বয়সে পন্নী ও একমাত্র শিশু-পুত্র বিশ্বনাথের মায়া কাটাইয়া তিনি সন্ন্যাস গ্রহণ করেন। এই বিশ্বনাথ দত্তই স্বামী বিবেকানন্দের জনক।

বিশ্বনাথ কলিকাতার প্রসিদ্ধ এটর্নী রূপে পরিচিত হইয়া উঠেন। ধনজনপূর্ণ বিশাল ভবনে রাজসিকতার সহিত বাস করিতে তিনি অভ্যস্ত হন। উদার ও আশ্রিত জনের পালক বলিয়া তাঁহার খ্যাতি ছিল। আর পত্নী ভুবনেশ্বরী ছিলেন এক ধর্মপ্রাণা প্রাচীনপন্থী মহিলা। প্রতিদিন স্বহস্তে শিবপূজা না করিয়া তিনি জল গ্রহণ করিতেন না। ইষ্টনিষ্ঠা, তেজস্বিতা ও কর্মকুশলতায় তিনি ছিলেন অনন্ত-সাধারণ।

একদিন ভুবনেশ্বরী শিবার্চনায় বসিয়াছেন। সেদিন কি জানি কেন এক গভীর ধ্যানতন্ময়তা তাঁহাকে পাইয়া বসে। প্রায় সমস্ত দিনই ধ্যানাবেশে কাটিয়া যায়, তারপর রাত্রিতে ক্লান্ত দেহে পূজা-কক্ষেই নিজায় অভিভূত হইয়া পড়েন।

এই সময়ে তিনি এক বিচিত্র স্বপ্ন দেখেন। জটাজুটমণ্ডিত রক্ত-গিরিসন্নিভ মহেশ্বর তাঁহার সম্মুখে আবির্ভূত হইয়া সম্ভানরূপে ক্রোড়ে আসিতে চাহিতেছেন। ‘শিব—শিব’ উচ্চারণ করিতে করিতে ভুবনেশ্বরী নিজা হইতে উথিত হইলেন।

ইহার পরের বৎসর, ১৮৬৩ সালের ১২ই জানুয়ারী ভুবনেশ্বরী দেবীর অঙ্ক আলো করিয়া আসে এক সুদর্শন শিশু। সেদিন ছিল পৌষ-সংক্রান্তি, মকর-বাহিনী পূজার দিন। এই নবাগত শিশুপুত্রই নরেন্দ্রনাথ, উত্তরকালের শক্তিদর সন্ন্যাসী,—স্বামী বিবেকানন্দ।

বাল্যকাল হইতেই নরেন্দ্র ছরস্তু, প্রাণচঞ্চল। কি যেন এক অব্যক্ত অধীরতা নিয়া সে ছুটাছুটি করিয়া বেড়ায়। আবার এই অশান্ত বালকের আধারে কখনো কখনো এক হৃজের ধ্যানের ধারা নামিয়া আসে, অকস্মাৎ কি করিয়া সে রূপান্তরিত হইয়া যায়।

বালক তাহার সাথীদের সহিত একদিন পূজা-অর্চনার খেলায় রত। চক্ষু মুদিয়া ধ্যানজপের অভিনয়ও বেশ শুরু হইয়াছে। হঠাৎ কোথা হইতে এক গোখরা সাপ ফণা নাচাইয়া আসিয়া উপস্থিত। খেলার সঙ্গীরা তো ভীত ব্রন্ত হইয়া সেখান হইতে ছুটিয়া পলাইল।

নরেনের কিন্তু কোনই ছঁস নাই। হুই চকু মুদিয়া অচঞ্চলভাবে উপবিষ্ট, সম্মুখে সাপটিও ফণা মেলিয়া স্থির হইয়া আছে। বালকের খেলার অভিনয় কোন্ অজানা মুহূর্তে ধ্যানের গভীরে তলাইয়া গিয়াছে কে জানে? বাড়ীর লোকে মহা সন্তুষ্ট, পাছে বালকের অনিষ্ট হয় এই ভয়ে সবাই চুপ করিয়া আছে। কিছুকাল পরে সাপটি ধীরে ধীরে সেখান হইতে চলিয়া গেল, আর আশ্বীয়-স্বজনেরা স্বস্তির নিঃশ্বাস ফেলিয়া বাঁচিলেন।

নরেন পরে বলিয়াছেন, “বালক বয়সে একদিন ধ্যান করিতে-ছিলাম। ধ্যান শেষে চুপ করিয়া বসিয়া আছি, হঠাৎ দেখিলাম—ঘরের দক্ষিণ দেয়াল ভেদ করিয়া এক জ্যোতির্ময় দিব্য মূর্তি সম্মুখে দণ্ডায়মান। মূণ্ডিত মস্তক, হাতে দণ্ড ও কমণ্ডলু, নয়নে অপরূপ স্নিগ্ধতা। জ্যোতির্ময় পুরুষ কি যেন বলিতে যাইতেছিলেন। অবাক হইয়া তাঁহার দিকে এতক্ষণ চাহিয়াছিলাম। হঠাৎ যেন ভয় হইল—দরজা খুলিয়া বাহিরে আসিয়া পড়িলাম।” কোন্ এক দিব্য পুরুষ যেন তাঁহার উপর লক্ষ্য রাখিতেছেন।

বালক নরেনের নিজার ভঙ্গিটিও বড় অদ্ভুত। উপুড় হইয়া তাঁহার শয়নের অভ্যাস। নিজা আকর্ষণের সময়ে, বহির্জগতের চেতনা ধীরে ধীরে কমিয়া আসে, আর সঙ্গে সঙ্গে দেখা দেয় এক অলৌকিক অমুভূতি। দেখেন, আলোকোজ্জ্বল পথ বাহিয়া একটি দিব্য বালক একটি গোলাকার জ্যোতির্ময় পিণ্ড ঠেলিয়া নিয়া তাঁহার দিকে অগ্রসর হইতেছে। এই জ্যোতি-গোলক ক্রমে তাঁহার জন্মধ্যে আসিয়া স্থির হয়, তারপর জ্যোতির রাশি অজস্র ধারায় উহা হইতে বরিয়া ঝরিয়া পড়ে। এই দিব্য আলোক ধারায় তলাইয়া গিয়া অতঃপর ধীরে ধীরে সে নিজায় চলিয়া পড়ে।

নরেনের নিজের কিন্তু ইহা বিশ্বয়কর মনে হইত না। ভাবিতেন, এ তো সকলেরই নিজার অভিজ্ঞতা। শ্রীরামকৃষ্ণ উত্তরকালে এই



অমৃত্যুর কথা শুনিয়া বলিয়াছিলেন, “এটা যে ধ্যান-সিদ্ধির লক্ষণ গো।”<sup>১</sup>

নরেনের তখন চৌদ্দ বৎসর বয়স, রায়পুরে পিতার সঙ্গে বায়ু পরিবর্তনে আসিয়াছেন। একদিন একাকী গো-শকটে বিদ্যা পাহাড় দিয়া যাইতেছেন। এখানে হঠাৎ তাঁহার এক অলৌকিক অভিজ্ঞতা হয়। পাহাড়ের গায়ে তৈরী হইয়াছে একটি মৌমাছির চাক। সে দিকে হঠাৎ দৃষ্টি পড়িতেই অন্তরে জাগিয়া উঠে এক অভূতপূর্ব আনন্দের শিহরণ। উত্তরকালে স্বামীজী নিজে এ সম্বন্ধে বলিয়াছেন, “বিশ্বয়ে মগ্ন হইয়া সেই মক্ষিকা রাজ্যের আদি অন্তের কথা ভাবিতে ভাবিতে মন জগৎ-নিয়ন্তা ঈশ্বরের অনন্ত উপলব্ধিতে এমনভাবে তলাইয়া গেল যে, কিছুকালের জন্ত বাহ্য-সংজ্ঞার লোপ হইল। কতক্ষণ যে ঐভাবে গো-যানে পড়িয়াছিলাম, স্মরণ হয় না। যখন পুনরায় চেতনা হইল তখন দেখিলাম উক্ত স্থান অতিক্রম করিয়া অনেক দূরে আসিয়া পৌঁছিয়াছি।” প্রথম জীবনে নরেনের ধ্যানাবেশের ইহা এক অপূর্ব নিদর্শন।

১৮৭৯ সালে নরেন্দ্রনাথ এনট্রান্স পাস করিয়া কলেজে ঢুকিলেন। ব্যক্তিত্ব, মেধা ও প্রাণশক্তি তাঁহার প্রচুর, তাই ক্লাসের ছেলেদের নেতা হইয়া উঠিতে দেবী হইল না। অধ্যাপকেরাও তাঁহাকে চিনিয়া নিলেন এক অসাধারণ ছাত্র বলিয়া। জেনারেল এসেম্বলীতে তখন প্রতিভাবান ছাত্রের অভাব ছিল না। ব্রজেন্দ্রনাথ শীলও তখন এখানেই পড়িতেন, নরেন্দ্রনাথের এক ক্লাস উপরে। একবার এক বিতর্কসভায় নরেনের উপর খুসী হইয়া দর্শনবেত্তা অধ্যক্ষ হেষ্টি সাহেব বলেন, “এই তরুণ দর্শনশাস্ত্রের এক প্রতিভাধর ছাত্র। আমার মনে হয়, জার্মানী ও ইংলণ্ডের বিশ্ববিদ্যালয়েও এর মত একটি ছাত্র খুঁজে পাওয়া যাবে না।”

নরেন তখনও এক-এ পরীক্ষা দেন নাই। কিন্তু ডেকার্ট, হিউম ও বেন-এর নৃশাস্ত্র দার্শনিক তত্ত্ব তিনি পড়িয়া ফেলিয়াছেন। ডারুইন ও স্পেন্সারের চিন্তাধারার সহিতও তাঁহার পরিচয় নিবিড়। পাশ্চাত্য দার্শনিকদের যুক্তিবাদ ও বিচার বিতর্কের মধ্যে সত্যের প্রকৃত পথটি তিনি খুঁজিয়া পাইতেছেন না। দিক্‌ভ্রান্ত পথিকের মত অবস্থা তাঁহার।

বাংলায় সংস্কার আন্দোলন চলিতেছে প্রায় সাত বৎসর যাবৎ। রামমোহনের ধর্ম দেবেন্দ্রনাথ ও কেশবের দ্বারা কিছুটা রূপান্তরিত। নৈতিক জীবনের দৃঢ় আদর্শ ও সমাজজীবনে আত্মপ্রকাশ করিতেছে। কিন্তু তাহাতে নরেনের প্রাণের পিপাসা মিটিতেছে কই? অধ্যাত্ম-সাধনার রসে জীবনের শুষ্কতরু মুঞ্জরিত হইয়া উঠে, প্রত্যক্ষ অনুভূতির মধ্য দিয়া সাধকের প্রাণে আসে পরম শান্তি। কই সে শান্তি তো পাওয়া যাইতেছে না?

পাশ্চাত্য দর্শনের বিচার-বিশ্লেষণে নব্য শিক্ষিত নরেন দিশেহারা। ব্রাহ্মসমাজের ছায়াতলে আসিয়া দাঁড়াইলেন, ভাবিলেন, শাস্ত্রত সত্যের সন্ধান এবার হয়তো মিলিবে, কিন্তু কোথায় তাহা? সংশয় জাগে মনে, ঈশ্বর কি সত্যই আছেন? জীবন পথের শেষে অমৃত কুণ্ডলি হাতে নিয়া যে জীবনপ্রভু প্রসন্ন মধুর হাসি হাসেন, তিনি কি শুধু কবির কল্পনা?

সন্দেহ সংশয় যাহা কিছু আসুক না কেন নরেন্দ্র কিন্তু ব্যবহারিক জীবনের পবিত্রতা, বিশুদ্ধতা একই ভাবে রক্ষা করিয়া যাইতেছেন। শুভ সংস্কার নিয়া তিনি জন্মিয়াছেন। বড় হইয়াও উচ্চতর প্রেরণায় তিনি উদ্ভুদ্ধ—ত্যাগী সাধকের জীবনই যাপন করিতেছেন।

সংশয় ও বিচার বুদ্ধির গহন অরণ্যে কিন্তু এক দিব্য অনুভূতি মাঝে মাঝে স্কুরিত হইয়া উঠে। ধ্যান করিতে যখন বসেন, তখন তো কোন অবিশ্বাস অসন্তোষের ছায়াপাত অন্তরে হয় না? স্বচ্ছন্দ ধ্যানাবেশে তিনি অন্তর্লীন হইয়া যান।

প্রায়ই একটা জ্যোতিঃপুঞ্জ আবির্ভূত হয় আর তাঁহার নয়ন সমক্ষে এক ত্রিভুজ যন্ত্রের অপরূপ ছবি রচনা করে। অজানা আনন্দে নরেন্দ্রনাথের হৃদয় রসায়িত হইয়া উঠে। ভাবেন, এ কোথাকার ইঙ্গিত? অতীন্দ্রিয়লোকের অন্তরালে তবে তো তাঁহার জীবন-প্রভু বিরাজ করিতেছেন। কিন্তু কে তাঁহাকে এই পরমধন মিলাইয়া দিবে? অন্তর মথিত করিয়া প্রশ্ন উঠিতে থাকে, কোথায় সেই সত্যজ্ঞষ্ঠা মহাপুরুষ যিনি ভগবৎ সাক্ষাৎকার করিয়াছেন, অতীপ্তিত পথে তাঁহাকে যিনি চালনা করিবেন?

১৮৮০ খৃষ্টাব্দের নবেম্বর মাস। শিমুলিয়া পল্লীতে একটি ক্ষুদ্র আনন্দোৎসবের ব্যবস্থা হইয়াছে। নরেনের প্রতিবেশী সুরেন্দ্রনাথ মিত্র পরম ভক্তিভরে দক্ষিণেশ্বরের শ্রীরামকৃষ্ণকে নিয়া আসিয়াছেন। ভক্তি সঙ্গীত গাওয়া হইবে, তাই নরেনের ডাক পড়িল। নরেন যেমন নানা বৈঠকে ঘুরিয়া বেড়ান—তেমনই আসিয়া উপস্থিত। তাঁহার কণ্ঠে গান শুনিয়া পরমহংসদেবের আনন্দের অবধি নাই। সন্মুখে নিকটে ডাকিয়া এই প্রিয়দর্শন যুবকের দেহলক্ষণ মিলাইয়া দেখেন। পরিচয় গ্রহণের পর আমন্ত্রণ জানান, “দক্ষিণেশ্বরে একবার যোগো, কেমন?”

এক, এ পরীক্ষার ব্যস্ততায় কয়েক মাস নরেন দক্ষিণেশ্বরের কথা ভুলিয়াই ছিলেন। আত্মীয় রাম দত্ত ও প্রতিবেশী সুরেন্দ্রনাথ ঠাকুরের ভক্ত। তাঁহাদের কথায় সেদিন ঠাকুরের কথা মনে পড়িল, কয়েকজন বন্ধুসহ দক্ষিণেশ্বরে উপস্থিত হইলেন।

উত্তরকালে রামকৃষ্ণ এই ঐতিহাসিক সাক্ষাতের বিবরণ দিয়াছেন—“দেখলাম, নরেনের নিজের দেহের দিকে কোনই লক্ষ্য নেই। মাথার চুল ও বেশভূষার বাহার নেই। বাইরের কোন জিনিষেই ইতর সাধারণের মত আঁট নেই। সবই যেন আলগা। চোখ দুটো

দেখে মনে হয়, ওর মনের অনেকটা কে যেন ভেতর থেকে টেনে রেখেছে। মনে হল, বিষয়ী লোকের জায়গা কলকাতায় এতবড় সবুগুণী আধার থাকাও সম্ভব।”

ঠাকুর রামকৃষ্ণের সম্মুখে নরেন উদাস সুরে গান ধরিলেন—

মন চল নিজ নিকেতনে,  
সংসার বিদেশে বিদেশীর বেশে  
ভ্রম কেন অকারণে ?  
বিষয় পঞ্চক আর ভুতগণ  
সব তোর পর কেহ নয় আপন,  
পর প্রেমে কেন হয়ে অচেতন  
ভুলেছ আপন জনে ?

নিজের অজ্ঞাতসারে এ কি গান নরেন গাহিলেন ? যাহার কাছ হইতে আসিয়াছেন, যাহার কাছেই আবার ফিরিতে হইবে, এ যে সেই পরমাত্মীয় পরমাত্মার কথা।

সেই পরমাত্মারই আনন্দধন ঠাকুর রামকৃষ্ণ এখানে বসিয়া আছেন। ঠাকুরকে নরেন সেদিন চিনেন নাই, কিন্তু ঠাকুর নরেনকে তখনি চিনিয়াছেন। মন প্রাণ ঢালিয়া নরেন গাহিলেন—আর ঠাকুর ততক্ষণে হইয়াছেন ভাবাবিষ্ট। ক্রমে বাহুজ্ঞান তাঁহার তিরোহিত হইল।

নবপরিচিত রামকৃষ্ণ সেদিন ‘আপনজনের’ মতই তাঁহার সহিত ব্যবহার করিলেন। লৌকিক জীবনের চেনা-পরিচয়ের উর্দ্ধে, জন্ম-জন্মান্তরের যোগসূত্রে গাঁথা রহিয়াছে এই আত্মীয়তার বোধ।

নরেনকে হাতছানি দিয়া ঠাকুর উত্তরের বারান্দায় নিভৃত স্থানে নিয়া যান। দুই নয়নে দরবিগলিত প্রেমাশ্রুর ধারা। ঘনিষ্ঠ মুহূর্তের মত বলিতে থাকেন “এত দিন পরে আসতে হয় ? আমি যে এককাল অপেক্ষা করে আছি, তা ভাবতে নেই ? বিষয়ী লোকের

বাজে কথা শুনতে শুনতে আমার কান বলসে যাচ্ছে। প্রাণের কথা বলতে না পেয়ে পেট ফুলে গেল!”

তারপর ঠাকুরের অবিশ্রান্ত কান্না। নরেন তো বিস্ময়ে হতবাক। আবার এই উন্মাদ ব্রাহ্মণ হাত জোড় করিয়া তাঁহাকে সাশ্রনয়নে বলিতেছেন, “জানি, জানি প্রভু, তুমি সেই ঋষি, জীবের দুর্গতি দূর করতে তুমি এসেছ।”

বিশ্বনাথ দত্তের পুত্র, ব্রাহ্মসমাজের সভ্য, আধুনিক শিক্ষা-দীক্ষায় উদ্বুদ্ধ তরুণকে এই ব্রাহ্মণ কি বলিতে চাহিতেছেন? যেন কোন্ এক প্রচ্ছন্ন দেবতার উদ্বোধনের জন্ত তাঁহার এই আকুতি। অথবা এটা কল্পনা বিলাস? নরেনের চিন্তাধারা বিপর্যাস্ত হইয়া যায়!

ঠাকুর ক্ষণকাল পরেই নিজের ঘরে ছুটিয়া যান। কিছু মাখন মিছরি ও সন্দেশ আনিয়া নরেনকে স্বহস্তে খাওয়াইয়া দিতে থাকেন। নরেন তাঁহার সঙ্গীদের সহিত এসব ভাগ করিয়া খাইতে উৎসুক—কিন্তু তাহা শুনে কে?

রামকৃষ্ণ স্নেহমাখা স্বরে বলেন, “ওরা খাবে এখন। তুমি আগে খেয়ে নাও।”

সবটা ভোজন করাইয়া ঠাকুর হাত ধরিয়া অনুনয় করিতে থাকেন, “বল শিগ্গীর আর একদিন এখানে আসবে, একজাতি আমাব কাছে আসবে!” নরেনকে কথা দিতেই হয়। তারপর সঙ্গীদের কাছে ফিরিয়া গিয়া তিনি হাঁফ ছাড়েন।

নরেনের অন্তরে তখন চিন্তার ঝড় বহিতেছে। এই ব্রাহ্মণ কি উন্মাদ? আর তাই বা কি করিয়া হয়? ঈশ্বরের জন্তই তো সর্বস্ব ছাড়িয়াছেন। উত্তরকালে তিনি বলিয়াছেন, “নির্বাক হইয়া ভাবিতে লাগিলাম, উন্মাদ হইলেও ঈশ্বরের জন্ত ঐরূপ ত্যাগ জগতে খুব কম লোকই করিতে সক্ষম। উন্মাদ হইলেও এ ব্যক্তি মহাপণ্ডিত, মহাত্যাগী এবং ঐজন্ত মানব হৃদয়ের আস্থা, পূজা ও সম্মান পাইবার যথার্থ অধিকারী। ঐরূপ ভাবিতে ভাবিতে সেদিন তাঁহার চরণ

বন্দনা ও তাঁহার নিকটে বিদায় গ্রহণপূর্বক কলিকাতায় ফিরিয়া আসিলাম।”

নরেন চলিয়া গেলে ঠাকুরের কি অবস্থা ? তাঁহার নিজের বর্ণনায়, “নরেন চলে গেলে, তাকে দেখবার জন্তে প্রাণের ভেতরটা চকিবশ ঘণ্টা এমন ব্যাকুল হয়ে রইল যে বলবার নয়। সময় সময় এমন যন্ত্রণা হত যে মনে হত বুকের ভেতরটা যেন কে গামছা নিংড়ানোর মত জোর করে নিংড়াচ্ছে। নিজেকে তখন সামলাতে পারতুম না। ঝাউতলায় নির্জনে গিয়ে ডাক্ ছেড়ে কাঁদতুম,—ওরে তুই আয়রে, তোকে না দেখে আর থাকতে পারছি না।”

এ আহ্বান আত্মার আত্মীয়ের। এ আহ্বান ঈশ্বরীয় কর্মযজ্ঞের। এ অমোঘ আহ্বান নরেনকে চুম্বকের মত ধীরে ধীরে আকর্ষণ করিয়া আনিয়াছিল।

মাসখানেক পরে নরেন আবার দক্ষিণেশ্বরে আসিলেন। রামকৃষ্ণ একাকী তক্তাপোষের উপর বসিয়া আছেন। নরেনকে দেখিয়াই তিনি আনন্দে অধীর। পরম স্নেহে শয্যার এক পাশে তাঁহাকে বসাইলেন। ইহার পরই একেবারে ভাবাবিষ্ট। কিছুক্ষণ অশ্রুটস্বরে কি বলিতে বলিতে নরেনের কাছে আসিয়া দক্ষিণ পদ দিয়া তাঁহাকে স্পর্শ করিলেন। সঙ্গে সঙ্গে ঘটিল নরেনের দিব্য ভাবাস্তর।

তিনি নিজেই ইহা বিবৃত করিয়াছেন, “আমার এক অপূর্ব উপলব্ধি উপস্থিত হইল। চাহিয়া দেখিতে লাগিলাম, দেয়ালগুলির সহিত গৃহের সমস্ত বস্তু বেগে ঘুরিতে ঘুরিতে কোথায় লীন হইয়া যাইতেছে এবং সমগ্র বিশ্বের সহিত আমার আমিষ যেন এক সর্ব-প্রাসী মহাশূন্যে একাকার হইতে ছুটিয়া চলিয়াছে! তখন দারুণ আতঙ্কে অভিভূত হইয়া পড়িলাম, মনে হইল—আমিষের নাশেই মরণ, সেই মরণ সম্মুখে, অতি নিকটে! সামলাইতে না পারিয়া চীৎকার করিয়া বলিয়া উঠিলাম, ‘ওগো তুমি আমায় একি করলে, আমার যে বাপ মা আছেন! অদ্ভুত পাগল আমার ঐকথা শুনিয়া

খল্খল্ করিয়া হাসিয়া উঠিলেন, এবং হস্তদ্বারা আমার বক্ষ স্পর্শ করিতে করিতে বলিতে লাগিলেন, “তবে এখন থাক্। একবারে কাজ নেই, কালে হবে।”<sup>১</sup>

ইহার পরই নরেন্দ্র আত্মসম্বিং ফিরিয়া পান। স্থির হইয়া তিনি ভাবিতে থাকেন, এই উন্মাদ ব্রাহ্মণের মধ্যে কোন্ বিরাট শক্তি বিরাজিত? নরেনের শ্রায় স্বাতন্ত্র্যবাদী, দৃঢ়চেতা, বিচারশীল যুবকের ইচ্ছাশক্তিকে অবলীলায় ইনি চূর্ণ করতে পারেন। শুধু তাহাই নয়, একতাল কাদার মত উহাকে ছানিয়া স্বেচ্ছামত রূপ দান করিতেও তিনি সক্ষম। দিব্যশক্তিসম্পন্ন এমন মানুষকে পাগল বলিয়া উড়াইয়া দেওয়াই বা যায় কি করিয়া?

আর এক দিনের অলৌকিক অভিজ্ঞতাও অনুরূপ। দক্ষিণেশ্বরে যত্ন মল্লিকের বাগানে ঠাকুর ও নরেন সেদিন বেড়াইতেছেন। কিছুক্ষণ পর ঠাকুর ধ্যানবিষ্ট হইয়া পড়েন। তারপর অকস্মাৎ নরেন্দ্রকে স্পর্শ করামাত্র তাঁহার সংজ্ঞা লোপ পায়।

বাহুজ্ঞান ফিরিয়া আসিলে নরেন দেখেন, রামকৃষ্ণ তাঁহার বক্ষে যত্নভাবে হাত বুলাইতেছেন, আননখানি তাঁহার দিব্য আনন্দের আভায় সমুজ্জল।

এই দিনকার বাহুজ্ঞান লোপের অবস্থায় নরেনের সহিত ঠাকুর রামকৃষ্ণের এক অলৌকিক প্রাশ্নোত্তর চলিয়াছিল। অতীন্দ্রিয় রাজ্যের এ কথোপকথনের সারমর্ম ঠাকুর উত্তরকালে ভক্তদের কাছে নিজেই বর্ণনা করিয়াছিলেন।

বিলুপ্ত-সংজ্ঞা নরেনকে সেদিন তিনি তাঁহার স্বরূপ ও পরিচয় জিজ্ঞাসা করেন। কোথা হইতে, কেন সে আসিয়াছে এবং কোন্ কর্মসাধনের দায়িত্ব তাঁহার, এই প্রশ্নও তাহাকে করা হয়। নরেন ঠাকুরকে যথাযথ উত্তর প্রদান করেন। ঠাকুর বলিতেন, “এ থেকেই জেনেছিলাম, নরেন যেদিন জানতে পারবে সে কে, সেদিন আর

ইহলোকে থাকবে না। দৃঢ়সঙ্কল্প সহায়ে যোগমার্গে সে তার দেহ ত্যাগ করে চলে যাবে। নরেন যে ধ্যানসিদ্ধ মহাপুরুষ।”

ঠাকুরের দিব্য দেহের এতটুকু স্পর্শ, তার ফলেই একি বিচিত্র অধ্যাত্ম-অমুভূতি। নরেন ভাবিতে থাকেন, তবে কি এই মহা-সাধকের করুণা সম্পাতে অসম্ভবও সম্ভব হয়? মানুষের জন্ম-জন্মান্তরের সংস্কাররাশি হয় অপমৃত? তাঁহার নিজ দেহের গবেষণা-গারেই যে ইহার কিছুটা সত্যতা প্রমাণিত হইয়াছে।

এই সঙ্গে যুক্তিবাদী মনের নানা সন্দেহও দেখা দেয়। এই দিব্যকাস্তি ব্রাহ্মণ কোন সম্মোহন বিভ্রা আয়ত্ত্ব করে নাই তো? নরেনের আত্মবিশ্বাসের মূলে এক প্রচণ্ড আঘাত লাগে। স্থির করেন,—বেশ কিছুদিন খুঁটিয়া খুঁটিয়া না দেখিয়া, পরীক্ষা-নিরীক্ষা না চালাইয়া রামকৃষ্ণকে তিনি গ্রহণ করিবেন না।

ঠাকুর কিন্তু দিব্যদৃষ্টি বলে জানিয়া বসিয়া আছেন, নরেন তাঁহারই বাণীবাহ, তাঁহার ঐশী নির্দিষ্ট লীলার সে প্রধান পরিচর। নরেন যে তাঁহার চোখে এক সহস্রদল কমল—কবে এটি ফুটিয়া উঠিবে রঙে রসে সৌগন্ধে, এ জ্ঞানই যে তিনি প্রতীক্ষমান। একথা মাঝে মাঝে লোকের কাছে প্রকাশ করিয়াও বসেন।

একদিন দক্ষিণেশ্বরে কেশব সেন ও বিজয়কৃষ্ণ প্রভৃতি পরিবৃত হইয়া রামকৃষ্ণ ধর্মকথা কহিতেছেন। সহসা ভাবাবিষ্ট হইয়া কেশব, বিজয় ও নরেনের দিকে তাকাইতে লাগিলেন। কি যেন তিনি ইহাদের মধ্যে খুঁজিতেছেন।

সভা ভাঙ্গিয়া গেলে কহিলেন, “দেখলাম, কেশবের ভেতরে একটা শক্তি, যার ফলে সে জগৎ বিখ্যাত হয়েছে। আর নরেনের ভেতর সেরকম আঠারোটা শক্তি বর্ত্তমান। আবার দেখলাম, কেশব ও বিজয়ের হৃদয়ে প্রদীপের মত জ্ঞানালোক জ্বলছে, কিন্তু



নরেনের দিকে চেয়ে দেখি—তার ভেতরে জ্ঞান সূর্য্য উদিত হয়ে রয়েছে। মায়া মোহের লেশ পর্য্যন্ত নেই।”

নরেন চমকিয়া উঠেন। প্রতিবাদ করিয়া বলেন, “মশাই কি সব বলছেন? লোকে যে আপনাকে উন্মাদ বলবে। কোথায় জগদ্বিখ্যাত কেশব ও মহামনা বিজয়কৃষ্ণ, আর কোথায় আমার মত এক নগণ্য ছোড়া!”

ঠাকুর অসহায়ের মত উত্তর দেন, “কি করবো রে, তুই কি ভাবিস যে আমি এসব বলেছি। মা যে আমাকে সমস্ত দেখালেন, তাই তো বল্লুম। মা তো আমাকে সত্য বই মিথ্যা কখনো দেখাননি, তাই তো আমি একথা বলেছি।”

তেজস্বী, তর্কবিশারদ নরেন সহজে ছাড়িবার পাত্র নহেন। বলিয়া বসেন, “ওসব অতীন্দ্রিয় রূপ-টুপ, মা কালীর দর্শন, নির্দেশ, আপনার নিজের মাথার খেয়াল। দেহ-বিজ্ঞান বলছে, আমাদের ইন্দ্রিয়ের বিকার অনেক সময় আমাদের প্রভাবিত করে।”

ঠাকুর যেন ছোট বালকটি, ভীত হইয়া ভাবেন—তাই তো! সত্যনিষ্ঠ নরেন তাঁহাকে ভুল বুঝাইতে যাইবে কেন?

মা জগদম্বার নিকট সব কিছু জিজ্ঞাসা করিয়া তবে তিনি আশ্বস্ত হন। বলিতে থাকেন, “মা আমাকে বলে দিলেন, ওর (নরেনের) কথা শুনিস কেন? কিছুদিন পরে ও সব কথাই সত্য বলে মানবে।”

তরুণ ভক্তদের কথা উঠিলেই রামকৃষ্ণ নরেনের প্রশংসায় পঞ্চমুখ। বলেন, “নরেনের মত একটি ছেলেও দেখতে পেলুম না। যেমন গাইতে বাজাতে, তেমনি লেখাপড়ায়, তেমনি বলতে-কইতে, আবার তেমনি ধর্ম্ম বিষয়ে। সে রাতভোর ধ্যান করে, ধ্যান করতে করতে সকাল হয়ে যায়, হুঁস থাকে না।—আমার নরেনের ভেতর এতটুকু মোঁকি নেই। বাজিয়ে দেখ টং টং করছে। আর সব ছেলেদের দেখি, যেন চোখ-কান টিপে কোনও রকমে দু-তিনটে পাস করছে, বাস্, এই পর্য্যন্ত। ঐ করতেই যেন তাদের সব শক্তি

বেরিয়ে গেছে। নরেনের কিন্তু তা নয়—হেসে খেলে সব কাজ করে, পাস করাটা যেন তার কাছে কিছুই নয়! সে ব্রাহ্ম সমাজেও যায়, সেখানে ভজন গায়, কিন্তু অশ্রু সকল ব্রাহ্মের মতন নয়—সে যথার্থ ব্রহ্মজ্ঞানী। ধ্যান করতে বসে তার জ্যোতি দর্শন হয়। সাথে কি তাকে ভালবাসি!”

নরেনের সম্বন্ধে ঠাকুরের বড় সহজ প্রত্যয়। প্রায়ই বলেন,—  
“ও খাপ খোলা তলোয়ার, ও অখণ্ডের ঘর, ধ্যানসিদ্ধ ঋষি।”

নিজের আচার-ব্যবহারেও এই তরুণ ভক্তের অসামান্যতাকে সকলের সামনে ফুটাইয়া তুলেন। দক্ষিণেশ্বরের বণিক সম্প্রদায়ভুক্ত অনেক ভক্ত যাওয়া-আসা করিত, ঠাকুরের জন্তু নিয়া যাইত ফলমূল মিষ্টি। এই সব সকাম নিবেদনের বস্তু ঠাকুর নরেনকেই খাইতে দিতেন। বলিতেন, “ওর কোন হানি হবে না।”

নরেন ব্যক্তিস্বাতন্ত্র্যবাদী, বাহ্বাফোর্ট তাঁহার বড় কম ছিল না। একদিন ভক্তমণ্ডলী পরিবৃত ঠাকুরের সম্মুখে আসিয়া দর্পভরে বলেন, “মশায়, আজ হোটেলে, সাধারণে যাকে অখাণ্ড বলে তাই খেয়ে এসেছি।” ঠাকুর এ কথায় গুরুত্ব না দিয়া উত্তর দেন, “ওরে তোর ওতে দোষ লাগবে না। শোর গরু খেয়ে যদি কেউ ভগবানে মন রাখে, তা হবিষ্যের তুল্য, আর শাকপাতা খেয়ে যদি কেউ বিষয় বাসনায় ডুবে থাকে তবে তা শোর গরু খাওয়ারই সমান।”

সমাগত ভক্তদের দিকে চাহিয়া বলিতেন, “নরেনের ব্যতিক্রমে দোষ নেই। ওর ভেতরে জ্ঞানায়ি সব সময়ে জ্বলছে, আহারের সব রকম দোষকে ভস্ম করে দিচ্ছে। এসব অনাচারে ওর মন কলুষিত হবে না।”

তার পর সকলের বিশ্বয় উৎপাদন করিয়া ঠাকুর এই চিহ্নিত ভক্ত সম্বন্ধে বলেন, “ও জ্ঞান-খড়্গ সহায়ে মায়াময় সব বন্ধনকে খণ্ড বিখণ্ড করে কেলেছে। মহামায়া তাই তো ওকে নিজের আয়ত্তে আনতে পারছে না!”

নরেন কিন্তু মনের দ্বিধাদ্বন্দ্ব, মতবিরোধ সবকিছু সকলের সাক্ষাতে স্পষ্টভাবে ব্যক্ত করেন। শুধু তাহাই নয়, তাঁহার তীব্র গ্লোমে, যুক্তি আর বাক্যবাণে সকলে জর্জরিত হন।

নরেন সাধারণ ব্রাহ্ম সমাজের সদস্য, নিয়মিত প্রার্থনায় সেখানে যোগ দেন। ঠাকুরের সাকার আরাধনা, তাঁহার অদ্বৈত উপলব্ধির কথা, স্বেচ্ছামত হাসিয়া উড়াইয়া দেন। রামকৃষ্ণের কিন্তু তাঁহার এই ভাবী উত্তরসাধকের উপর স্থির বিশ্বাস। এই রাজকীয় শিকারকে, লক্ষ্যবস্তু এই সিংহকে, আয়ত্তে আনার সুযোগের প্রতীক্ষা তিনি করিতেছেন।

শীঘ্রই এক আকস্মিক ঘটনায় তাঁহার ও নরেনের সম্পর্ক নিকটতর হইল। নরেন ব্রাহ্ম-সমাজ হইতে বিচ্ছিন্ন হইয়া পড়িলেন।

নরেন কিছুদিন দক্ষিণেশ্বরে আসিতেছেন না। ঠাকুর তাঁহার অদর্শনে অধীর। তাই এক রবিবার তাঁহার সহিত সাক্ষাতের জন্ত সোজা সাধারণ ব্রাহ্ম-সমাজে গিয়া তিনি উপস্থিত। রামকৃষ্ণের সংস্পর্শে আসিয়া কেশব, বিজয়, চিরঞ্জীব, প্রভৃতি ব্রাহ্ম-নেতাদের পরিবর্তন ঘটিয়াছে।<sup>১</sup> শিবনাথ প্রভৃতি একদল ব্রাহ্ম আচার্য্য তাই তাঁহার সংশ্রব তেমন পছন্দ করিতেছেন না। তাঁহার সংস্পর্শ যথা-সম্ভব এড়াইয়া চলিতেই তাঁহারা চান। কিন্তু আগ্রহাকুল রামকৃষ্ণের এতকিছু ভাবিবার অবসর কোথায়? নরেনের খোঁজে, বৎসহারা গাভীর মত সেদিন তিনি সমাজগৃহে আসিয়া উপস্থিত।

সমাজ মন্দিরে ঢুকিয়াই ঠাকুর ভাবাবিষ্ট। দেহ রোমাঙ্কিত, পা দুটি টলিতেছে। এই অবস্থায় বেদীর দিকে অগ্রসর হইলেন। নরেন্দ্র প্রতি রবিবারে সমাজ-গৃহে আসেন। সেদিনও উপস্থিত। ঠাকুর কেন আসিয়াছেন, বুঝিতে তাঁহার বিলম্ব হইল না।

<sup>১</sup> মাক্স মুলের : রামকৃষ্ণ—হিজ্ লাইফ্ এণ্ড্ সেইন্স্

বেদীর আচার্য্য বা আর কোন ব্রাহ্ম নেতাই কিন্তু ঠাকুরকে অভ্যর্থনা জানাইলেন না। শিষ্টাচার বর্জিত এক বিরূপ পরিবেশ। ঠাকুরের কিন্তু কোন হুঁসই নাই, অচিরে সমাধিস্থ হইয়া পড়িলেন। কোঁতূহলী জনতার ভীড় এড়ানোর জন্ত মন্দিরের গ্যাসের আলোক নিভাইয়া দেওয়া হইল। অতিকষ্টে ঠাকুরকে নিয়া নরেন মন্দির হইতে নিষ্কাশিত হইলেন, উপনীত হইলেন দক্ষিণেশ্বরে।

তঁাহার সহিত সাক্ষাতের জন্তই ঠাকুরের এই অপমান বরণ। নরেনের মর্মে এ ঘটনাটি তীক্ষ্ণভাবে বিদ্ধ হইল। ভালবাসা উপলব্ধির সঙ্গে সঙ্গে ক্রোধও কম হয় নাই। রামকৃষ্ণের এই দুর্বলতার জন্ত তঁাহাকে তীব্র ভাষায় তিরস্কার করিলেন। তারপর ভয় দেখাইয়া বলিলেন, “মশাই, শেবটায় এই মায়ার জন্ত আপনাকে বিপদে পড়তে হবে। পুরাণে আছে, ভরত রাজা হরিণের কথা ভাবতে ভাবতে—হরিণ হয়ে যান, আপনারও ভাগ্যে আছে তেমনি পরিণাম।

রামকৃষ্ণ যেন জগদম্বার বালক পুত্রটি। বিষম মনে তখনই মায়ের নিকট ছুটিয়া যান। আবার তঁাহার বাক্যে আশ্বাসিত হইয়া যখন ফিরিয়া আসেন, আননখানি আনন্দের আভায় উজ্জ্বল। স্মিত হাস্তে নরেনকে বলিতে থাকেন, “যা শালা! আমি তোর কথা শুনবো না। মা বলে দিলেন,—তুই যে ওকে সাক্ষাৎ নারায়ণ বলে জানিস। তাই এত ভালোবাসিস। যেদিন ওর ভেতর সেই নারায়ণকে না দেখতে পাবি, সেদিন ওর মুখ দেখতেও পারবি না।”

এই দেব-শিশুর কাছে, জগন্মাতার চরণে সমর্পিত-প্রাণ সম্ভানের কাছে, নরেন্দ্রনাথকে সেদিন হার মানিতে হইয়াছিল।

নরেন দক্ষিণেশ্বরে আসিলেই ঠাকুরের আনন্দ উথলিয়া উঠে। মাঝে মাঝে তঁাহাকে দেখিয়া এমন উদ্দীপনা হয় যে তিনি সমাধিস্থ হইয়া পড়েন।

সামনেই বি-এ পরীক্ষা। পড়া তৈরী করার জন্ত নরেন কিছুদিন

যাবৎ ব্যস্ত, দক্ষিণেশ্বরে আসিতে পারিতেছেন না। ঠাকুর তাঁহার জগ্ন অঙ্গুর হইয়া পড়িলেন। একদিন নরেনের সহিত সাক্ষাতের জগ্ন নিজেই কলিকাতায় আসিয়া উপস্থিত। পড়াশুনা ও ধ্যান-ধারণার সুবিধার জগ্ন নরেন্দ্র তখন তাঁহার মাতামহীর বাসাবাড়ীর এক নিভৃত কক্ষে বাস করিতেছেন। দোতলার এই ক্ষুদ্র ঘরটির নামকরণ করিয়াছেন “টং।” একটি ক্ষুদ্র তক্তাপোষের উপর মাত্র পাতা, চারিদিকে ছড়ানো রহিয়াছে বইখাতা। মেজের একদিকে স্তূপ করা তামাকুর গুল ও ছাই! অপর দিকে তানপুরা ও বাঁয়া-তবলা। ঘরের মালিকের অশাস্ত মনেরই এ যেন এক ছবছ প্রতিচ্ছবি।

ঠাকুর নীচ হইতে ‘নরেন, নরেন’ বলিয়া চীৎকার করিতে থাকেন। নরেন ছুটিয়া আসিয়া, ঠাকুরকে অভ্যর্থনা করিয়া উপরে নিয়া যান। সাক্ষাৎকালে, গদগদ স্বরে ঠাকুর বলিতেছেন, “তুই এতদিন যাসনি কেন রে? তুই এতদিন যাসনি কেন?”

প্রেমলীলার শেষ এখানেই নয়। দক্ষিণেশ্বর হইতে গামছায়া বাঁধিয়া নরেনের জগ্ন সন্দেশ আনিয়াছেন। ব্যগ্রভাবে তাহা খুলিয়া বলিলেন, “ধর খা, খা।”

স্নেহপূর্ণ স্বরে কহেন, “একটা গান শোনা দেখি, অনেকদিন তোর কণ্ঠ শুনিনি।”

বড় অযাচিত এ আগমন আর বড় অহেতুক এ কৃপা। নরেন অভিভূত হইয়া গিয়াছেন। তানপুরা লইয়া ধীর কণ্ঠে সঙ্গীত শুরু করিলেন—

জাগ মা কুলকুণ্ডলিনী,

( তুমি ) ব্রহ্মানন্দ স্বরূপিণী।

( তুমি ) নিত্যানন্দ স্বরূপিণী,

প্রমুগ্ধ ভুজগাকারা

আধার-পদ্ম-বাসিনী।

ঠাকুরের মন তখন ধীরে ধীরে উর্দ্ধতর চেতনায় উঠিয়া যাইতেছে।  
ক্রমে সমাধিমগ্ন হইয়া পড়িলেন।

নরেন ঠাকুরের ধরণ-ধারণ আজকাল কিছুটা বৃদ্ধিয়া নিয়াছেন।  
ভজন গানের মাধ্যমেই ঠাকুরকে বাহু-জ্ঞানের ভূমিতে অবতরণ  
করাইতে হইবে। তাই গাহিতে লাগিলেন, ‘একবার তেম্নি তেম্নি  
তেম্নি করে নাচ মা শ্রামা।’

ধীরে ধীরে ঠাকুর সহজ অবস্থায় আসেন। তারপর আদরের  
ধন নরেনকে দক্ষিণেশ্বরে নিয়া গিয়া তবে শান্ত হন।

স্বার্থগন্ধহীন এই অপার্থিব প্রেমের বশা দিনের পর দিন যেন  
নরেনের জীবনের ভিত্তিমূল শিথিল করিয়া দিতেছে। ইহারই  
উল্লেখ করিয়া স্বামী বিবেকানন্দ উত্তরকালে বলিতেন, “ঠাকুরের  
এই ভালবাসাই আমাকে চিরকালের মত বাঁধিয়া ফেলিয়াছে।  
এক। তিনিই ভালবাসিতে জানিতেন ও পারিতেন—সংসারের অশ্রু  
সকলে স্বার্থসিদ্ধির জন্য ভালবাসার ভানমাত্র করিয়া থাকে।”

দিব্য প্রেমের চুম্বকাকর্ষণে নরেন ধীরে ধীরে ঠাকুরের অস্তিত্বের  
সহিত মিশিয়া যাইতেছেন। কিন্তু ইহার পরই আসে ঠাকুরের আর  
এক রকম পরীক্ষা। কিছুদিন পর্য্যন্ত তিনি নরেনের দিকে মোটেই  
দৃষ্টি দেন না। অহেতুক কুপার ধারাটি যেন প্রত্যাহার করিয়া  
নিয়াছেন। নরেনকে দেখা মাত্র আগে উল্লসিত হইয়া উঠিতেন।  
এখন আর সেরূপটি দেখা যায় না। ডাকিয়া একবার একটি কথাও  
জিজ্ঞাসা করিতেছেন না। নরেননাথেরও যেন এই তাচ্ছিল্যে  
আজকাল তেমন আর কিছু যায় আসে না। পূর্ববৎ নিয়মিত ভাবে  
ঠাকুরকে গিয়া তিনি দর্শন করেন। তারপর ভক্তদের সহিত  
বাক্যালাপ করিয়াই ফিরিয়া আসেন নিজগৃহে।

এই অবহেলা ও ওদাসীত্বের পালা প্রায় একমাস চলিল।  
ঠাকুর একদিন জিজ্ঞাসা করিলেন, “আচ্ছা, আমি তো তোকে ডেকে

আজকাল একটা কথাও বলি না। তবে তুই এখানে কি করতে আসিস্ বল দেখি ?”

নরেন্দ্র অবলীলায় উত্তর দিলেন, “আপনার কথা শুনতে তো আসি না। আপনাকে ভালবাসি, সব সময়ে দেখতে ইচ্ছে করে—তাই আসি।”

হুর্কর্ষ সিংহ এইবার ধরা পড়িয়াছে শিকারীর জাল বেষ্টনীতে। নরেনের এই অকপট স্বীকারোক্তিতে ঠাকুরের তাই আনন্দের অবধি নাই। স্মিত হাস্তে বলিলেন, “আমি তোকে বিড়ে (পরীক্ষা করে) দেখছিলাম—আদর-যত্ন না পেলে তুই পালিয়ে যাস্ কিনা : তোর মত আধারই এতটা ত্যাগিল্য সহ্য করতে পারে।”

রামকৃষ্ণ একদিন দক্ষিণেশ্বরে বসিয়া নরেনকে অদ্বৈত তত্ত্বের মর্ম্ম-কথা বুঝাইতেছেন। বলিতেছেন, জীব ও ব্রহ্ম অভেদ। নরেন ব্রাহ্ম-সমাজের দ্বারা প্রভাবিত, এমন কট্টর অদ্বৈতবাদের কথায় তাঁহার মন সায় দেয় না। মন্দির চত্বরের এক পাশে প্রতাপ হাজরা থাকেন। নরেন সেখানে বসিয়া মাঝে মাঝে গল্পগুজব করেন, তামাক খান। কথা প্রসঙ্গে নরেন হাজরার সম্মুখে বসিয়া সেদিন বলিতেছেন, “আচ্ছা মশাই, একি কখনো হতে পারে ? ঘটিটা ঈশ্বর, বাটিটা ঈশ্বর, যা কিছু হুঁচোখে দেখছি সকলই ঈশ্বর !”

হাজরাও এ কথার উপর ব্যঙ্গ করিয়া এক মন্তব্য করেন। উভয়ের মধ্যে হাসির রোল উঠে। ঠাকুর তাঁহার কক্ষে ভাবাবিষ্ট। নরেনের হাস্তরব কানে যাইতেই বাহিরে চলিয়া আসেন। নয়ন আধ-নিমীলিত, পরনের কাপড়খানি বালকের মত বগলে ধরা। নিকটে আসিয়া স্মিত হাস্তে অস্ফুট স্বরে প্রশ্ন করিলেন, “তোরা কি বলছিস রে ?” তারপর একটু কাছে ঘেঁষিয়া নরেনকে স্পর্শ করিতেই ঘটে এক অদ্ভুত কাণ্ড। নরেন সমাধিমগ্ন হইয়া যান।

এ যেন ঐশ্বর্যজালিকের স্পর্শ ! হাস্ত-পরিহাসরত নরেনের সস্তায় বিপ্লব ঘটয়া গেল । মুহূর্ত্ত মধ্যে সমস্ত চেতনার, সমস্ত অস্তিত্বের যেন এক বিরাট রূপান্তর সাধিত হইয়া গিয়াছে । সঙ্গে সঙ্গে নরেনের উপলব্ধি হইল, ঈশ্বর ভিন্ন বিশ্বব্রহ্মাণ্ডে আর কিছুই কোন অস্তিত্ব নাই । এই অপূর্ব দিব্য অনুভূতি জাগ্রত রহিল সারাদিন ব্যাপিয়া ।

তারপর বাড়ীতে ফিরিয়া আসিলেও দেখা গেল এই চৈতন্যময় অবস্থা অক্ষুণ্ণ রহিয়াছে । আহায়ে বসিয়া তিনি প্রত্যক্ষ করিতেছেন, অন্ন, খালা, পরিবেশনকারী, সব কিছুই সেই এক পরম ব্রহ্মেরই রূপায়ণ । রাস্তা-ঘাটে, কলেজে সেই একই অভিজ্ঞতা । শুধু দুই একদিন নয়, কয়েকদিন এই চিন্ময় অনুভূতি সর্বসম্মত ওস্তাদে রহিল ।

স্বামীজী বলিয়াছেন, “যখন আচ্ছন্ন ভাবটা একটু কমে যেত তখন জগৎটাকে মনে হত স্বপ্ন । হেড়য়া পুকুরে বেড়াতে গিয়ে তার চারদিকের লোহার রেলিঙে মাথা ঠুঁকে দেখতাম, যা সব দেখছি তা স্বপ্নময় না বাস্তব । হাত পা’র অসাড়তার জন্ত মনে হত, পক্ষাঘাত হবে না তো ? বেশ কিছুকাল এই ভাবের ঘোর ও আচ্ছন্নতার হাত থেকে পরিত্রাণ পাই নি । যখন প্রকৃতিস্থ হলাম তখন ভাবলাম—এই হচ্ছে অদ্বৈত বিজ্ঞানের আভাস । তবে তো শাস্ত্রে যা লেখা আছে, তা মিথ্যে নয় । সেই অবধি অদ্বৈততত্ত্বের ওপর আর সন্দেহ জাগে নি ।”

শুদ্ধতম প্রেমের হৃর্ভেজ বেড়াজালে ঠাকুর নরেনকে জড়াইয়া কেলিয়াছেন । এইবার বাস্তব অনুভূতি ও প্রত্যক্ষ দর্শনের মধ্য দিয়া ধীরে ধীরে তাঁহাকে চৈতন্যের তোরণ-দ্বারে উপস্থিত করিয়া দিলেন । পরিহাস ও অস্বীকৃতির মধ্য দিয়া স্বাধীনচেতা যুক্তিবাদী নরেন তাঁহার অনুসন্ধান শুরু করিয়াছিলেন । পূর্ণ প্রত্যয়ের মধ্য দিয়া ধীরে ধীরে আজ তাহারই ঘটিল আত্মপ্রকাশ ।



সিংহ এবার এক লক্ষ লক্ষ্যবস্তুর উপরে ঝাঁপাইয়া পড়িয়াছে—  
রামকৃষ্ণতত্ত্ব প্রবিষ্ট হইয়াছে নরেনের সর্বসম্ভায় ।

নরেনের স্বীকৃতি ও শরণাগতির এক অপূর্ব চিত্র শরৎ মহারাজ  
অঙ্কিত করিয়া গিয়াছেন । ১৮৮৪ সালের শীতকাল । শরৎ ও  
শশীর সহিত হেতুয়ায় বেড়াইতে বেড়াইতে নরেন তাঁহার প্রত্যয়তরা  
মন্ত্র-কথা উদ্ঘাটন করিলেন । রামকৃষ্ণের ঐশী নির্দিষ্ট কর্মলীলার  
আভাস তখন তিনি পাইয়াছেন । তাঁহার কৃপাবলে কত শরণাগত  
ভক্তের কত সংস্কার বন্ধন কাটিতেছে, দিব্য আনন্দের অধিকারী  
তাঁহারা হইতেছেন, ইহার অপূর্ব বর্ণনা দিলেন । প্রত্যক্ষ অনুভূতি-  
লাভে তিনি নিজেও যে আজ ধন্ত । তারপর সজল নয়নে প্রেম  
গদগদ স্বরে নরেন গান ধরিলেন—

প্রেমধন বিলায় গোরা রায়,  
চাঁদ নিতাই ডাকে আয় আয়,  
( তোরা কে নিবিরে আয় । )  
প্রেম কলসে কলসে ঢালে

তবু না ফুরায় ।

তরুণ সাধকের হৃদয়ের কপাটখানি সেদিন উন্মুক্ত । আপন  
মনে অক্ষুট স্বরে তিনি কহিয়া যাইতে লাগিলেন, “হ্যাঁ, সত্য সত্যই  
তিনি বিলাচ্ছেন । যা কিছু শ্রেয়, প্রেম বল, ভক্তি বল, জ্ঞান বল,  
মুক্তি বল, গোরা রায় যাকে যা ইচ্ছে তাকে যেন তাই বিলাচ্ছেন ।  
কি অদ্ভুত শক্তি !—রাজে বিছানায় শুয়ে আছি, সহসা আকর্ষণ করে  
দক্ষিণেশ্বরে হাজির করালেন—শরীরের ভেতরে যেটা আছে  
সেইটাকে । তারপর কত কথা কত উপদেশের পর আবার ফিরতে  
দিলেন । সব করতে পারেন—দক্ষিণেশ্বরের গোরা রায় সত্যিই  
সব করতে পারেন ।”

অতীন্দ্রিয়লোকের অভ্যন্তরে, পরম চেতনা ও শক্তির মর্ম্মকেন্দ্রে  
মহাসাধক রামকৃষ্ণ সমাসীন । তাঁহার সহিত নরেন্দ্রনাথের পরিচয়

এইবার সাধিত হইতেছে। সেই নিগূঢ় অধ্যাত্মলোকের চমকপ্রদ বার্তারই আভাস তাঁহার সেদিনকার কথায় ফুটিয়া উঠে।

সাধনপথের দিগ্‌নির্গম হইয়াছে—নরেন্দ্র শ্রীরামকৃষ্ণকে তাঁহার জীবনপ্রভুরূপে স্বীকার করিয়াছেন। তাই বৃষ্টি এবার ঠাকুর স্তব করিলেন নরেনের পরীক্ষা ও জীবনমন্ডন। দারিদ্র্যের পীড়ন আসে বার বার। তারপর ঘটে পিতার আকস্মিক মৃত্যু। এই দুর্দ্দৈবময় অধ্যায়ের সূত্রপাত হয় ১৮৪৪ খৃষ্টাব্দের প্রথমভাগে। ইহার কিছুকাল আগে নরেন বি, এ, পরীক্ষা দিয়া উঠিয়াছেন।

পিতা বিশিষ্ট এটর্নী হইলেও তিনি ছিলেন অমিতব্যয়ী। সঙ্কল্প নুরের কথা ঋণের বোঝা-ই কিছুটা রাখিয়া গিয়াছেন। আর সেই সঙ্গে রহিয়াছে মা ও কয়েকটি ভাইবোনের খাওয়া পরার দায়িত্ব। মাতা ও পুত্র সাহসের সহিত এই সংগ্রামে রত হইয়াছেন। যে সংসারের মাসিক ব্যয় হাজার টাকা, আজ তাহা ত্রিশ টাকায় চালাইতে হইতেছে। কিন্তু এই টাকারই বা সংস্থান কোথায়?

এই সময়কার সঙ্কটের বাস্তব চিত্রটি উদ্ভবকালে বিবেকানন্দের নিজের ভাষায়ই ফুটিয়া উঠিয়াছে, “মৃত্যুশৌচের অবসান হইবার পূর্বে হইতেই কর্মের চেষ্টায় ফিরিতে হইয়াছিল। অনাহারে নগ্নপদে চাকুরির আবেদন হস্তে লইয়া মধ্যাহ্নের প্রথর রৌদ্রে অফিস হইতে অফিসান্তরে ঘুরিয়া বেড়াইতাম—অস্তুরঙ্গ বন্ধুগণের কেহ কেহ হৃৎকের হৃৎখী হইয়া সঙ্গে থাকিত, কোনদিন থাকিতে পারিত না, কিন্তু সর্বত্রই বিফল হইয়া ফিরিতে হইয়াছিল। সংসারের সহিত এই প্রথম পরিচয়েই বিশেষভাবে আমার হৃদয়ঙ্গম হইতেছিল, স্বার্থশূন্য সহানুভূতি এখানে অতীব বিরল—দুর্ব্বলের, দরিদ্রের এখানে স্থান নাই। দুইদিন পূর্বেও যাহারা আমাকে সাহায্য করিতে পারিলে ধন্য হইত, সময় বৃষ্টিয়া তাহারাই এখন আমাকে দেখিয়া মুখ বাঁকাইতেছেন।...যেদিন বৃষ্টিতাম গৃহে সকলের প্রচুর আহাৰ্য্য নাই এবং হাতে পয়সা নাই সেদিন মাতাকে ‘আমার নিমন্ত্রণ আছে’

বলিয়া বাহির হইতাম এবং সামান্য কিছু খাইয়া, কোনদিন বা অনশনে, কাটাইয়া দিতাম।”

এত কিছু দুঃখ-কষ্ট ও অভাব-অনটনের উপর ছিল জ্ঞাতীদের শ্রুতি। বাড়ী হইতে উচ্ছেদ করার জন্য তাহারা জোর মামলা শুরু করিয়া দিয়াছেন।

এই সব উৎপীড়নের সঙ্গে আছে আর এক ধরনের উৎপাত। এক ধনী মহিলার দৃষ্টি আগে হইতেই সুদর্শন তরুণ নরেনের উপর পড়ে। সুযোগ বুঝিয়া এবার তিনি লোভ দেখাইতে থাকেন, তাঁহাকে গ্রহণ করিলে নরেন অচিরে এই অর্থকষ্ট হইতে নিষ্কৃতি লাভ করিতে পারেন। নরেন্দ্র কিন্তু ঘৃণাভরে এ প্রস্তাব প্রত্যাখ্যান করেন।

এক ধনী বন্ধু আমোদ-প্রমোদের জন্য এই সময়ে নরেনকে তাঁহার বাগান বাড়ীতে নিয়া যায়। নরেন গিয়া দেখেন, সুরা এবং বারান্দারও ব্যবস্থা সেখানে রহিয়াছে। সকলে যুক্তি করিয়া জীলোকটিকে হঠাৎ নরেনের বিজ্ঞান-কক্ষে প্রেরণ করে। যুবতীর দিকে স্থির দৃষ্টিতে তাকাইয়া তেজস্বী নরেন প্রশ্নের পর প্রশ্ন করিতে থাকেন,—কেন সে এই পাপের পথে নামিয়াছে? সত্যকারের সুখ তাঁহার জীবনে কখনো মিলিয়াছে কি?

তারপর তীক্ষ্ণ পৌরুষদৃষ্ট কণ্ঠে বলিয়া উঠেন, “বাছা, এই ছাইভস্ম দেহটার তৃপ্তির জন্য তো কত কিছু করলে। কিন্তু মৃত্যু কি তোমায় ছাড়বে? সে তো ক্রমেই এগিয়ে আসছে। পারের সম্বল কিছু করেছ কি? এসব ছেড়ে, ভগবানকে ডাকো।”

রমণী লজ্জিতা ও অশ্রুতপ্তা হয়, ফিরিয়া আসিয়া অনুযোগের সুরে বলে, “ছিঃ এমন লোকের কাছেও কি আমায় পাঠাতে হয়।”

সাহস ও অকপটতা নরেনের আজন্ম বৈশিষ্ট্য। বাগানবাড়ী হইতে ফিরিয়া আসিয়াই সবাইকে বলিতে থাকেন, “জানো, আজ বাগানে গিয়া কত আমোদ-প্রমোদ করে এসেছি। তাছাড়া, মদ, মেয়েমানুষ সবই সেখানে ছিল।”

এ সব কথা পল্লবিত হইয়া পরমহংসদেবের কানে পৌঁছিল। নরেন অধঃপাতে গিয়াছে। রামকৃষ্ণ গজিয়া উঠিলেন, “চূপ কর, শালারা। মা বলেছেন, সে কখনো অমন হতে পারে না। যোষিৎ-সংসর্গ ওর হবে না। আর কখনো আমাকে ওসব কথা বললে আমি তোদের মুখ দেখবো না।”

নরেনের জীবনপ্রভু তাঁহার জ্যোতিঃনিশ্চন্দী তৃতীয় নয়নটি যে সতত তাঁহার দিকেই নিবদ্ধ রাখিয়াছেন। সে নয়নের দৃষ্টি-সীমা এড়াইয়া চলার উপায় তাঁহার কই?

কখনো অভিমানে, কখনো বা দারিদ্র্যের পেষণে নরেন তাঁহার উন্মাদ প্রকাশ করেন, ঈশ্বরের অস্তিত্বে সন্দেহ জানান। কিন্তু ঠাকুরের সহিত সাক্ষাতের পর হইতে যে প্রত্যক্ষ অনুভূতি তিনি লাভ করিয়াছেন, যে অপ্রাকৃত দর্শন তাঁহার হইয়াছে, তাহা তো বিশ্বৃত হইবার নয়। অন্তঃসঞ্চারী আলোকস্রোত ধীরে ধীরে তাঁহার জীবনের গভীরে প্রবাহিত হইতে আরম্ভ করিয়াছে। আর ঠাকুর রামকৃষ্ণের কৃপার উৎস হইতেই যে সে প্রবাহ নামিয়া আসিতেছে তাহা স্বীকার করিবার উপায় কই?

নরেন্দ্রনাথ তখন বেকার। সেদিন ভগ্ন হৃদয়ে অবসন্ন দেহে গৃহে কিরিতেছেন। শেখটায় রাস্তার পাশে বারান্দায় শুইয়া পড়িতে বাধ্য হন। চেতনা তখন বিলুপ্ত প্রায়। এই সময়ে আগিয়া উঠে এক বিশ্বয়কর অতীন্দ্রিয় অনুভূতি। উত্তরকালে নিজেই তিনি ইহা বিবৃত করিয়াছেন,—“সহসা উপলব্ধি করিলাম, কোন্ এক দৈবশক্তি প্রভাবে একের পর অন্য—এইরূপে ভিতরের অনেকগুলি পর্দা যেন উন্মোচিত হইল। তখন শিবের সংসারে অশিব কেন, ঈশ্বরের কঠোর জায়গরতা ও অপার করুণার সামঞ্জস্য কোথায়—এই প্রশ্নের যে সকল বিষয় নির্ণয় করিতে না পারিয়া মন এতদিন

নানা সন্দেহে আকুল হইয়াছিল, সেই সকল বিষয়ের স্থির মীমাংসা অন্তরের নিবিড়তম প্রদেশে দেখিতে পাইলাম। আনন্দে উৎফুল্ল হইয়া উঠিলাম। অনন্তর বাটী ফিরিবার কালে দেখিলাম, শরীরে বিন্দুমাত্র ক্লান্তি নাই, মন অমিত বল ও শাস্তিতে পূর্ণ; এবং রজনী অবসান হইবার স্বপ্নই বিলম্ব আছে।”

ইহার পর অন্তরে শুরু হয় এক নূতনতর আলোড়ন। তীব্র বৈরাগ্যের ঝড় বহিতে থাকে। জীবনের ক্ষয়-ক্ষতি, নিন্দা-প্রশংসায় তাঁহার কি আসে যায়? জাগিয়া উঠে দৃঢ় প্রত্যয়,—সংসারের গণ্ডিতে আবদ্ধ হইয়া থাকার জন্ম তাঁহার জন্ম হয় নাই। মুক্তির আশ্বাদ তাঁহাকে গ্রহণ করিতেই হইবে। স্থির করিলেন, সংসার ত্যাগ করিয়া নিবেন সন্ন্যাস জীবন।

কয়েকদিন পরে রামকৃষ্ণ কলিকাতায় এক ভক্তগৃহে আসিয়াছেন। নরেনকে সেদিন এক রকম জোর করিয়াই তিনি দক্ষিণেশ্বরে নিয়া গেলেন। ঘরের মধ্যে বহু ভক্তের সমাগম। ঠাকুর ভাবাবিষ্ট হইয়া বসিয়া আছেন। হঠাৎ নরেনের নিকটে আসিয়া একদৃষ্টিতে তাঁহার দিকে তাকাইয়া থাকেন। তারপর সজল চক্ষে গুণ্গুন স্বরে গান ধরেন,—

কথা কহিতে ডরাই

না কহিতেও ডরাই,

( আমার ) মনে সন্দ হয়

বুঝি তোমায় হারাই, হা—রাই !

এ প্রচ্ছন্ন ইঙ্গিতের মর্ম্ম বুঝিতে নরেনের দেৱী হইল না। সর্ব্বজ্ঞ ঠাকুর তাঁহার সন্ন্যাস গ্রহণের সঙ্কল্পটি ধরিয়া ফেলিয়াছেন। আসন্ন বিচ্ছেদের ব্যথা তাঁহার এই গানের পদে লুকানো।

নরেনের মনের রুদ্ধ ভাবপ্রবাহ যেন মুহূর্ত্তে অর্গলযুক্ত হইয়া গেল। ঠাকুরের মত তাঁহার চোখ দুটিও অশ্রু ছিলছিল।

উভয়ের এই রহস্যময় আচরণে বিম্বিত হইয়া সবাই নীরবে

বসিয়া আছেন। ঠাকুর সহাস্তে তাঁহাদের দিকে তাকাইয়া বলিলেন, “আমাদের ভেতর একটা ব্যাপার হয়ে গেল।”

সেই রাতে দক্ষিণেশ্বরে নরেনকে ডাকিয়া রামকৃষ্ণ গোপনে বলিলেন, “ওরে আমি জানি, তুই মায়ের কাজের জ্ঞানই এসেছিস্। সংসারে থাকা তোমর হবে না। কিন্তু আমি যতদিন আছি, আমার জ্ঞান থাক্।” কথা কয়টি নরেন্দ্রনাথের জীবনে যেন আলোক-সংকেত। সরাসরি মৰ্ম্মমূলে গিয়া এগুলি বিদ্ধ হইল। আর ইহার সঙ্গে সঙ্গে মনে পড়িল ঠাকুরের ছলছল দুটি আয়ত নয়ন আর অন্তরের প্রেম-প্রবাহ। এ প্রবাহ নরেন্দ্রনাথের মত ঐরাবতকেও ভাসাইয়া নিবার পক্ষে যথেষ্ট।

বাড়ীর মামলা ক্রমে আরো জটিল হয়। জ্ঞাতিরা উৎখাতের মামলায় তাঁহাকে কাবু করিতে চাহিতেছে। পুস্তক প্রকাশক ও এটর্নীর অফিসে চূড়ান্ত পরিশ্রম করিয়া এই সময়ে কিছু কিছু উপার্জন করেন বটে, কিন্তু তাহাতে মা ও ভাই-বোনদের অন্ন-সংস্থান হয় না। তত্পরি মোকদ্দমার ব্যয়। অর্থাভাব ক্রমে চরমে উঠিল।

আত্ম-পরিজনের অন্নকষ্ট আর সহ্য হয় না। নরেন একদিন ঘর হইতে ছুটিয়া বাহির হইলেন। স্থির করিলেন, যে ঠাকুরের উপর জীবনের সমস্ত ভার চাপাইয়া তিনি বসিয়া আছেন, আজ মা ও ভাই-বোনের অন্নসংস্থানের জ্ঞান তাঁহারই কৃপা ভিক্ষা মাগিয়া নিবেন। সর্ব্ব অন্তর খুঁজিয়া দেখিলেন, শ্রীরামকৃষ্ণই যে তাঁহার জীবনের একমাত্র সম্বল। ঐহিক পারত্রিক যাহা কিছু চাহিবার, তাঁহার নিকট ছাড়া আর কাহার কাছে চাহিবেন? আধ্যাত্মিক ও সাংসারিক দুই জীবনেরই বোঝা আজ তিনি ঠাকুরের পদে সমর্পণ করিতে পারিলে বাঁচেন। আত্মবিশ্বাস তাঁহার চিরতরে ধূলিসাৎ হইয়া গিয়াছে।

তখন দক্ষিণেশ্বরে গিয়া ঠাকুরকে চাপিয়া ধরিলেন। কহিলেন,

“মশায়, সংসারের ভাবনা আর আমি ভাববো না। আপনি মাকে বলে যা হয় একটা ব্যবস্থা করুন।”

“ওরে, আমি যে ওসব কথা বলতে পারি না। তুই নিজে মাকে জানাস্ না কেন? মাকে যে মানিস না, তাই এত বিপদ হচ্ছে। কালীঘরে গিয়ে মায়ের কাছে আজ তুই যা চাইবি, মা তোকে তাই দেবেন। মা যে আমার চিন্ময়ী, ব্রহ্মশক্তি। ইচ্ছেমাত্র সবকিছু করতে পারেন। তুই যা না তাঁর কাছে।”

গভীর রাত। নরেন ধীর পদে ভবতারিণীর মন্দিরে গিয়া বসেন। নিবিড় ভাবের ঘোরে তিনি আবিষ্ট। সেদিনকার অনুভূতি সম্বন্ধে বিবেকানন্দ পরে বলিয়াছেন, “যাইতে যাইতে একটা গাঢ় নেশায় সমাচ্ছন্ন হইয়া পড়িলাম, পা টলিতে লাগিল। মাকে সত্য সত্য দেখিতে ও তাঁহার শ্রীমুখের বাণী শুনিতে পাইব—এইরূপ স্থির বিশ্বাসে মন অস্ত্র সকল বিষয় ভুলিয়া অত্যন্ত একাগ্র ও তন্ময় হইয়া ঐ কথাই ভাবিতে লাগিল। মন্দিরে উপস্থিত হইয়া দেখিলাম, সত্য সত্যই মা চিন্ময়ী, সত্য সত্যই তিনি জীবিতা এবং অসীম প্রেম ও সৌন্দর্যের প্রস্রবণরূপিণী। ভক্তি ও প্রেমে হৃদয় উচ্ছ্বসিত হইল, বিহ্বল হইয়া বারংবার প্রণাম করিতে করিতে বলিতে লাগিলাম, ‘মা বিবেক দাও, বৈরাগ্য দাও, জ্ঞান দাও, ভক্তি দাও, যাতে তোমার অবাধ দর্শন নিত্য লাভ করি, এইরূপ করে দাও।’ শান্তিতে প্রাণ আশ্রুত হইল, জগৎ সংসার নিঃশেষে অন্তর্হিত হইয়া একমাত্র মা-ই হৃদয় পূর্ণ করিয়া রহিলেন।”

পাষণ প্রতিমায় ঘটিয়াছে চিন্ময়ী জগজ্জননীর দিব্য আবির্ভাব। নরেনের সমগ্র সত্তার মূলে জাগিয়াছে প্রচণ্ড আলোড়ন। অন্নবস্ত্রের নগণ্য সমস্তা তিনি একেবারে বিস্মৃত হইয়াছেন, তাই মায়ের কাছে তাহা জানাইতে পারেন নাই। ঠাকুরের নির্দেশে তিন তিন বার মন্দিরে গিয়া বসিলেন। কিন্তু সে প্রশ্ন আর উঠাইতে পারিলেন কই?

বার বারই ভাবেন, কোন্ লজ্জায় এই তুচ্ছ কথা জগজ্জননী আত্মাশক্তিকে তিনি জানাইতে যাইবেন? ঠাকুরের মূল্যবান কথাটি অমনি তাঁহার মনে পড়িয়া যায়। ভক্তদের প্রায়ই তিনি বলিতেন, “রাজার প্রসন্নতা লাভ করে তাঁর কাছে তুচ্ছ লাউ-কুমড়া চাওয়া—সে যে নির্বোধের কাজ রে।”

মায়ের কাছে সেদিন শুধু জ্ঞানভক্তি প্রার্থনা করিয়াই নরেন্দ্রনাথ ফিরিয়া আসিলেন।

সহসা এই ঘটনার অর্থ তাঁহার নিকট পরিষ্কার হইয়া উঠিল। বুঝিলেন, ইহা ঠাকুরেরই এক রহস্যময় লীলা। নতুবা যে সমস্তার কথা বলিতে তিনি ব্যাকুল হইয়া দক্ষিণেশ্বরে আসিয়াছেন, মুখ ফুটিয়া তাহা বলিতে এমন ভুল বার বার হইবে কেন?

বাড়ীর অন্নকষ্ট নিবারণের জন্ত এবার তাই ঠাকুরকেই ধরিয়া বসিলেন। উপায়ান্তর অভাবে রামকৃষ্ণকেই সেদিন বলিতে হয়, “আচ্ছা, যা মোটা ভাত-কাপড়ের কষ্ট কখনো হবে না।”

সব কিছু ভালমন্দ ঠাকুরের পায়ে নরেন ইতিপূর্বে বিলাইয়া দিয়াছেন। কিন্তু মা ভাই-বোনের কর্তব্যের বোঝাকেও সেখানে নামানোর কথা তো কখনো ভাবেন নাই? রামকৃষ্ণ আজ যেন নিজেই কৃপা করিয়া এ বোঝা কাড়িয়া নিলেন। দায়িত্ববোধ ও আত্ম-প্রত্যয়ের সঙ্গে জড়িত থাকে একটা সূক্ষ্ম অহংবোধ। তাও ঠাকুর নরেনের জীবন হইতে বুঝি মুছিয়া ফেলিতে চাহিলেন।

চিন্ময়ী জননীর অপরূপ দর্শন। এ দর্শন নরেনের অন্তরে সেদিন অবিরাম আনন্দের প্রস্রবণ বহাইয়া দেয়। ঠাকুরকে ধরিয়া তখনই জগজ্জননীর এক স্তুতি-গান শিখিয়া নেন। আনন্দাবেশে সারা রাত তাঁহার ঘুম হয় না, গানের কলি কেবলই কণ্ঠে গুঞ্জন করিয়া ক্ষিরিত্তে থাকে—

তোরে জানি মা ও দীনদয়াময়ী,  
( আমার ) মা ঝুঁহি তারা।



তুমি ত্রিশূলধরা পরাংপরা ।

তোরে জানি মা ও দীনদয়াময়ী

তুমি দুর্গমেতে দুঃখহরা ।”

নরেন ব্রহ্মময়ীকে দেখিয়াছেন, ব্রহ্মের সাকার রূপ মানিয়া  
নিয়াছেন, তাই রামকৃষ্ণের আজ্ঞা আনন্দের অবধি নাই। বালকের  
মত তিনি হাস্যমুখর। সবাইকে ডাকিয়া বার বার বলিতেছেন,  
জানো, “নরেন মাকে মেনেছে! বেশ হয়েছে—না?”

পরদিন নরেন কলিকাতায় ফিরিবেন। প্রণাম করিতেই ঠাকুর  
ভাবাবিষ্ট। ছোট ছেলেটির মত নরেনের কোলে উঠিয়া বসেন,  
ভাবজড়িত কণ্ঠে কহেন, “দেখছি কি—এটা ( নিজের দেহ ) আমি,  
আবার ওটাও ( নরেনের দেহ ) আমি। সত্য বলছি, কিছুই তফাৎ  
বুঝতে পারছি না। যেমন গঙ্গার জলে একটা লাঠি ফেলায় ছোটো  
ভাগ দেখাচ্ছে—সত্য সত্য কিছু ভাগাভাগি নেই, একটাই রয়েছে।  
—তা, মা ছাড়া আর কি আছে বল, কেমন?”

অর্দ্ধবাহ অবস্থায় ঠাকুর এবার তামাক খাইতে শুরু করিলেন।  
তারপর কল্কেটি নরেনের মুখের সামনে নিয়া কহিতে লাগিলেন,  
“খা, আমার হাতেই খা।” নরেন সসঙ্কোচে মুখ ফিরাইয়া নেন,  
কিন্তু ছাড়া পাইবার উপায় নাই। ঠাকুরের হস্তে তাঁহাকে এই  
তামাক খাইতেই হইল।

কিন্তু কল্কেটি ঠাকুর যেই নিজ মুখে লাগাইতে যাইবেন নরেন  
শিহরিয়া উঠিলেন, হাত চাপিয়া ধরিলেন। খাবারের অগ্রভাগ  
কাহাকেও দেওয়া হইলে ঠাকুর উচ্ছিষ্ট জ্ঞানে তাহা গ্রহণ করিতেন  
না। এখন যেন সবই বিপরীত।

ঠাকুর ক্রুদ্ধ হইয়া কহিলেন, “দূর শালা! তোর বড় ভেদ বুদ্ধি।  
তুই আর আমি কি আলাদা?”

ঠাকুরের এই আচরণ গুরু ও শিষ্যের একাত্মকতা ও অভেদত্ব যেমন বুঝাইতে চাহিতেছে, তেমনি সামনে তুলিয়া ধরিতেছে অশেষ-অমুভূতির আদর্শ।

আর একদিনের কথা। রামকৃষ্ণ সেদিন নিভূতে নরেনকে দক্ষিণেশ্বরের পঞ্চবটীতে ডাকিয়া নিয়া যান, তারপর স্নেহ-পূর্ণ স্বরে কহেন, “ছাখ্, তপস্তার ফলে আমার ভেতর অনেক কাল হল অগ্নিমান্নি বিভূতি সব এসে গেছে। কিন্তু আমি তা দিয়ে কি করবো? যার পরনের কাপড় ঠিক থাকে না, এসব সে কি করে কাজে লাগাবে? কিন্তু মা তো বলেছেন, তোকে তাঁর অনেক কাজ করতে হবে। তোর ভেতরে শক্তি সঞ্চার করে ওগুলো। এবার দিয়ে দি, তুই কাজে লাগাতে পারবি। কি বলিস?”

ঈশ্বর লাভের দৃঢ় সঙ্কল্প তখন নরেনের হৃদয়ে জাগিয়া উঠিয়াছে। যোগ বিভূতির ঐশ্বর্য্য প্রলোভন তাঁহাকে টলাইতে পারিবে কেন? উত্তর দিলেন, “কিন্তু মশায়, এসব তো আমার ঈশ্বর দর্শনে সাহায্য করবে না! তবে এতে আমার কি লাভ? আগে ভগবৎ-দর্শনরূপ আসল কাজটি হয়ে যাক্, তারপর এর কথা ভাবা যাবে।

প্রিয় ভক্তের এই নিস্পৃহতায় ঠাকুরের চোখে-মুখে সেদিন ফুটিয়া উঠে অপার প্রসন্নতার দীপ্তি।

ভক্তজন পরিবৃত্ত রামকৃষ্ণ একদিন স্বীয় কক্ষে বসিয়া ধর্ম্মকথা কহিতেছেন। ‘সর্ব্বজীবে দয়া’ কথাটি বলিতে বলিতেই তিনি সমাধিস্থ হইয়া পড়িলেন। তারপর বাহ্যজ্ঞান ফিরিয়া আসিলে আবেশজড়িত কণ্ঠে বলিতে লাগিলেন, “জীবে দয়া—জীবে দয়া? দূর শালা! কীটাণুকীট তুই—জীবে দয়া কি করবি? দয়া করবার তুই কে? না, না, জীবে দয়া নয়—শিবজ্ঞানে সেবা!”

নরেন সকলের সঙ্গে বসিয়া ঠাকুরের অমুভবানী শ্রবণ করিতে

ছিলেন। এক মুহূর্তে তাঁহার অন্তর্লোক হইতে একটা পর্দা যেন উঠিয়া গেল। ঠাকুরের প্রজ্ঞানঘন বাণীতে আত্মপ্রকাশ করিল সেবা-ধর্মের মহিমা।

বিবেকানন্দ উত্তরকালে মুমুকু গুরুভ্রাতাদের কহিয়াছিলেন, “কি অদ্ভুত আলোকই সেদিন ঠাকুরের কথায় দেখিতে পাইলাম! শুক, কঠোর ও নির্মম বলিয়া প্রসিদ্ধ বেদান্ত জ্ঞানকে ভক্তির সহিত সম্মিলিত করিয়া কি সহজ, সরস ও মধুর আলোকই তিনি প্রদর্শন করিলেন। অদ্বৈত জ্ঞান লাভ করিতে হইলে, সংসার ও লোকসঙ্গ সর্বতোভাবে বর্জন করিয়া বনে যাইতে হইবে এবং ভক্তি ভালবাসা প্রভৃতি কোমল ভাবসমূহকে হৃদয় হইতে সবলে উৎপাটিত করিয়া চিরকালের মত দূরে নিক্ষেপ করিতে হইবে—এই কথাই এতকাল শুনিয়া আসিয়াছি। কিন্তু ঠাকুর আজ যাহা ভাবাবেশে বলিলেন, তাহাতে বুঝা গেল—বনের বেদান্তকে ঘরে আনা যায়, সংসারের সকল কাজে উহাকে অবলম্বন করিতে পারা যায়। মানব যাহা করিতেছে, সে সকলই করুক তাহাতে ক্ষতি নাই, কেবল প্রাণের সহিত এই কথা সর্বত্রো বিশ্বাস ও ধারণা করিলেই হইল—ঈশ্বরই জীব ও জগৎরূপে তাহার সম্মুখে প্রকাশিত রহিয়াছেন। জীবনের প্রতি মুহূর্তে সে যাহাদিগের সম্পর্কে আসিতেছে, যাহাদিগকে ভালবাসিতেছে, যাহাদিগকে শ্রদ্ধা, সম্মান অথবা দয়া করিতেছে, তাহার। সকলেই তাঁহার অংশ—তিনি। সংসারের সকল ব্যক্তিকে যদি সে ঐরূপে শিবজ্ঞান করিতে পারে, তাহা হইলে আপনাকে বড় ভাবিয়া তাহাদিগের প্রতি রাগ, দ্বেষ, দম্ব অথবা দয়া করিবার তাহার অবসর কোথায়? ঐরূপে ‘শিবজ্ঞানে জীবের সেবা’ করিতে করিতে চিত্তশুদ্ধ হইয়া সে স্বল্পকালের মধ্যে আপনাকেও চিদানন্দময় ঈশ্বরের অংশ, শুদ্ধবুদ্ধ যুক্ত স্বভাব বলিয়া ধারণা করিতে পারিবে।

“ঠাকুরের ঐ কথায় ভক্তিপথেরও বিশেষ আলোক দেখিতে পাওয়া যায়। সর্বভূতে ঈশ্বরকে যতদিন না দেখিতে পাওয়া যায়,

ততদিন যথার্থ ভক্তি বা পরাভক্তি লাভ সাধকের পক্ষে সুদূরপর্যায় থাকে। শিব বা নারায়ণ-জ্ঞানে জীবের সেবা করিলে ঈশ্বরকে সকলের ভিতর দর্শনপূর্বক যথার্থ ভক্তিসাধনে ভক্তসাধক স্বল্পকালেই কৃতকার্য হইবে, একথা বলা বাহুল্য। কর্ম বা রাজযোগ অবলম্বনে যে সকল সাধক অগ্রসর হইতেছে তাহারাও ঐ কথায় বিশেষ আলোক পাইবে। কারণ, কর্ম না করিয়া দেহী যখন একদণ্ডও থাকিতে পারে না, তখন ‘শিবজ্ঞানে জীবসেবা’-রূপ কর্মামুষ্ঠানই যে কর্তব্য এবং উহা করিলেই তাহারা আগু লক্ষ্যে পৌছাইবে, একথা আর বলিতে হইবে না। যাহা হউক ভগবান যদি কখনো দিন দেন তো আজ যাহা শুনিলাম, এই অদ্ভুত সত্য সংসারে সর্বত্র প্রচার করিব,—পণ্ডিত মূর্থ, ধনী দরিদ্র, ব্রাহ্মণ, চণ্ডাল সকলকে শুনাইয়া মোহিত করিব।”<sup>১</sup>

ঠাকুরের কথাগুলি নরেনের জীবনে সেদিন উপস্থিত হয় নূতন দিগ্‌দর্শনরূপে। উত্তরকালে এই দিগ্‌দর্শন তিনি কাজে লাগাইয়া ছিলেন।

ভক্ত শিষ্যদের ঠাকুর প্রধানতঃ ভক্তি-শাস্ত্র পড়িতে বলিতেন। কিন্তু নরেনের জ্ঞান অগ্নি ব্যবস্থা। জানিতেন, নরেন উত্তরকালে চিহ্নিত হইবেন এক বিশ্বখ্যাত আচার্য্যরূপে, বিশ্বজনীন অদ্বৈতবাদের ব্যাখ্যাতা রূপে। তাই অদ্বৈতত্ববাদের উদ্দীপক শাস্ত্রাদি যখন নরেন পড়িতে বসিতেন, ঠাকুর বরং আনন্দিতই হইতেন। নরেনকে এ সময়ে প্রায়ই উপনিষদ, ব্রহ্মসূত্র, যোগবাশিষ্ঠ প্রভৃতি গভীরভাবে অধ্যয়ন করিতে দেখা যাইত।

সহজাত জ্ঞান-বৈরাগ্যের অধিকারী ছিলেন নরেন, কিন্তু তাহার সত্যের গভীরে লুকানো ছিল প্রেমভক্তির এক বিপুল উৎস। ঠাকুর তাই বলিতেন, “এ রকম চোখ কি শুদ্ধজ্ঞানীর কখনো থাকে রে ?

জ্ঞানের সঙ্গে ভক্তির ভাবও যে তোর ভেতরে বয়ে যাচ্ছে।” বাহিরে জ্ঞানমার্গী হইলে কি হয়, ঠাকুর যখন কীর্তনানন্দে মাতিতেন, দেখা যাইত—নরেনও সকলের সঙ্গে হাত ধরাধরি করিয়া ভাবাবেগে নৃত্য শুরু করিয়া দিয়াছেন।

রামকৃষ্ণ জানিতেন, নরেন নিত্যসিদ্ধ, মুক্তপুরুষ, সর্ব মায়ামোহের উর্দ্ধে সে অবস্থিত। তাই কেবলি তাঁহার ভয় হইত—মায়ার প্রভাব নরেনের উপর কিছুটা না থাকিলে ঐশী নির্দিষ্ট কর্ম তো সে সম্পন্ন করিতে পারিবে না। নিজের স্বরূপ চিনিতে পারিয়া যে কোন মুহূর্তে দেহটি ছাড়িয়া দিবে, চলিয়া যাইবে স্বস্থানে। সজল নয়নে ঠাকুর তাই জগজ্জননীর কাছে প্রার্থনা জানান, “মাগো, ওর ভেতর তুই একটুখানি মায়া প্রবেশ করিয়ে দে, নতুবা কোন কাজই তো করতে পারবে না।”

১৮৮৪ খৃষ্টাব্দে নরেন ও অন্যান্য ভক্তদের জীবনে আসে চরম দুর্দৈব। ঠাকুর শ্রীরামকৃষ্ণের গলায় ছুরারোগ্য ক্যান্সার রোগের আক্রমণ ঘটে। চিকিৎসার জন্য তাঁহাকে কিছুদিন কলিকাতায় রাখা হয়, তারপর নিয়া যাওয়া হয় কাশীগুরের বাগানে।

ঠাকুরের সেবা শুশ্রূষা ও সান্নিধ্যকে কেন্দ্র করিয়াই এই সময়ে ভক্তমণ্ডলীর পরম প্রস্তুতিটি গড়িয়া উঠিতে থাকে। তরুণ সাধকদল নরেনের নেতৃত্বে ঠাকুরের সেবায় একান্তভাবে আত্মনিয়োগ করেন। আর গুরুর অধ্যাত্ম-শক্তি ধীরে ধীরে তাঁহাদের ভিতরে প্রবিষ্ট হইতে থাকে। বীজাকারে রামকৃষ্ণ মণ্ডলীর সূচনা এইখানে।

যুবক ভক্তেরা পালাক্রমে ঠাকুরের সেবা করেন আর অবসর পাইলেই জপ, ধ্যান ও কীর্তনে নিবিষ্ট হইয়া থাকেন। নরেন এই সময়ে ঈশ্বর লাভের জন্য একান্ত ব্যাকুল। পরমহংসদেবের অনুমতি নিয়া এ সময়ে পঞ্চাশটাতলে প্রায়ই তিনি সাধন করিতেন।

বিষবৃক্ষতলে রাতের পর রাত ধুনি জ্বালানো থাকিত। আর নরেন উহার সম্মুখে নয়ন নিম্নীলিত করিয়া থাকিতেন গভীর ধ্যানে নিমগ্ন। এ সময়ে ধ্যান করিতে করিতে তিনি প্রায়ই দর্শন করিতেন একটা ত্রিকোণাকৃতি জ্যোতি। ঠাকুরকে এই দর্শন সম্পর্কে প্রশ্ন করিলে সংক্ষেপে উত্তর দেন, “ওরে, ওটা ব্রহ্মায়োনী।”

এক একদিন নরেনের ধূনির ধারে অতীন্দ্রিয় রাজ্যের অপূর্ব দর্শন সব ঘটিতে থাকে। চিন্ময়লোকের দেবদেবীরা অনেকে সেখানে আবির্ভূত হন। এই সময়কার সাধনকালে সাধক নরেনের প্রাণে বিরাজিত ছিল অপূর্ব শান্তি ও স্থৈর্য্য। শক্তির প্রকাশও মাঝে মাঝে দেখা যাইত।

একদিন কালী তপস্বী (স্বামী অভেদানন্দ) ও তিনি পাশাপাশি বসিয়া ধ্যান করিতেছেন। হঠাৎ নরেনের ইচ্ছা হইল, কালীকে তিনি স্পর্শ করিবেন। এ ইচ্ছা কার্য্যে পরিণত করার সঙ্গে সঙ্গে ঘটিল এক চাঞ্চল্যকর কাণ্ড। স্পর্শ করা মাত্রই গুরুভ্রাতার দেহে বৈদ্যুতিক তেজের মত এক শক্তি সঞ্চারিত হইয়া গেল, বাহুজ্ঞান হারাইয়া দিব্য চেতনায় তিনি আচ্ছন্ন হইয়া পড়িলেন।

সদা সজাগ দৃষ্টি রামকৃষ্ণ তৎক্ষণাৎ নরেন্দ্রনাথকে ডাকাইলেন। তাঁহাকে সতর্ক করার জন্য সহাস্ত্রে কহিলেন,—“কি কচ্ছিস্ রে! এ যে দেখছি, না জমাতেই খরচ?”

কালীগুরে ও দক্ষিণেশ্বরের পঞ্চবটীতে নরেনের সাধন চলিয়াছে। ধীরে ধীরে তিনি ধ্যানলোকের গভীর স্তরে ডুবিয়া যাইতেছেন। এক এক দিন বিচিত্র অমুভূতি ও অপ্রাকৃত দর্শনাদিও হইতেছে। ধ্যানাবস্থার পর একদিন দেখিলেন, তাঁহারই এক অবিকল প্রতিমূর্ত্তি চিন্ময় দেহে সম্মুখে আবির্ভূত। এই অপ্রাকৃত মূর্ত্তি প্রায়ই বহুক্ষণ ধরিয়া তাঁহার সম্মুখে অবস্থান করিত। তাঁহারই হাবভাব ও কথা-বার্তা অনুকরণ করিয়া যাইত। রামকৃষ্ণ ইহা শুনিলেন। নরেনকে আশ্বস্ত করিয়া বলিলেন, “এতো ধ্যানের উচ্চাবস্থার লক্ষণ রে!”

এই সময়ে একদিন নরেনের মন গোতম বুদ্ধের তপশ্চাক্ষেত্র, বুদ্ধগয়া দর্শনের জন্য ব্যাকুল হইয়া উঠে। স্থির করেন, সেখানে গিয়া কয়েকদিন সাধনা করিবেন। গুরুভাই তারক ও কালী সহ তিনি হঠাৎ একদিন দক্ষিণেশ্বর ত্যাগ করিলেন, কাহাকেও কিছু বলিয়াও গেলেন না। ব্যস্ত হইয়া সকলে ঠাকুরকে এ সংবাদ জানাইলেন। শ্রিতহাস্তে তিনি উত্তর দিলেন, “তোরা ভাবিস নি, নরেন কোথাও যাবে না, তাকে এখানে আসতেই হবে।—এদিক ওদিক এখন যাচ্ছে বটে, কিন্তু এখানে যে রস পেয়েছে সে রস ছেড়ে যাবে কোথায়?”

বুদ্ধগয়ার পবিত্র পরিবেশে ধ্যান করার সময় নরেন এক দিব্য অনুভূতি লাভ করেন। কিন্তু তৎসঙ্গেও মন সেখানে টিকে নাই। অল্প কিছুদিন পরেই পরমহংসদেবের জন্য ব্যাকুল হইয়া নবীন সাধকেরা দক্ষিণেশ্বরে ফিরিয়া আসেন।

ঠাকুরের ভক্ত বুড়োগোপাল নানা তীর্থ দর্শন করিয়া কাশীপুরে প্রত্যাবর্তন করিয়াছেন। তাঁহার অভিলাষ, এই উপলক্ষে সাধুদিগকে ভোজন করান ও কিছু দান করেন। রামকৃষ্ণের কাছে এ ইচ্ছা ব্যক্ত করিলে বলিয়া উঠিলেন, “কোথায় আর সাধু খুঁজে খুঁজে বেড়াবি, বলতো? এই সব ছেলেদের খাইয়ে দে। তাতেই তোর কাজ হবে।”

নির্দেশ মত ব্যবস্থাদি করা হইল। প্রত্যেক তরুণ ভক্তকে এই উপলক্ষে ঠাকুর নিজ হাতে একটি করিয়া গৈরিক বস্ত্র, বহির্কাস, মালা ও কমণ্ডলু দান করিলেন। আনুষ্ঠানিক কৃত্যে ঠাকুর সেদিন যান নাই, কিন্তু এই গৈরিক দানের মধ্য দিয়া প্রচ্ছন্নভাবে সূচনা করিলেন তাঁহার গৈরিকধারী সাধক-বাহিনীর।

সমাধির গভীরে ডুব দিবার জন্য নরেন এবার ব্যাকুল হইয়া

উঠিয়াছেন। নির্বিবাক্ত সমাধির জন্ত বার বার ঠাকুরকে এসময়ে তিনি ধরিয়া বসেন, উদ্ভ্যাক্ত করিতে থাকেন।

পরমহংসদেব একদিন আশ্বাস দিলেন, “ওরে আমি ভাল হয়ে উঠলে, তুই যা চাইবি তাই দেব।”

নরেন্দ্রনাথ তখন পরম প্রাপ্তির আগ্রহে অধীর চঞ্চল। অবুঝ বালকের মত বলিয়া বসেন, “কিন্তু, আপনি যদি আর ভাল না হন, তবে আমার দশা কি হবে?”

অস্ফুটস্বরে ঠাকুর মন্তব্য করেন, “শালা বলে কি?”

দেহী বা বিদেহী যে কোন অবস্থায়ই থাকুন, ঠাকুর তাঁহার আশ্বাসবাণীকে রূপায়িত করিবেন, এই সহজ প্রত্যয় থাকাই তো নরেনের পক্ষে স্বাভাবিক! নরেনের কথায় ইহার ব্যতিক্রম দেখা গেল। ঠাকুর বুঝিলেন, শিষ্যের ব্যগ্রতা সীমা ছাড়াইয়া যাইতে বসিয়াছে। ধীর প্রশান্তকণ্ঠে জিজ্ঞাসা করিলেন, “আচ্ছা, ঠিক করে বল দেখি তুই কি চাস?”

নরেন্দ্রনাথ এবার সোৎসাহে বলিয়া উঠিলেন, “আমার ইচ্ছা হয়, শুকদেবের মত একেবারে পাঁচ ছয় দিন সমাধিতে ডুবে থাকি। তারপর শুধু শরীর রক্ষার জন্ত খানিকটা নৌচে নেমে এসে আবার সমাধিতে চলে যাই।”

রামকৃষ্ণ এইবার উত্তেজিত হইয়া উঠিয়া বসেন। তিরস্কারের সুরে নরেনকে বলেন, “ছি! ছি! তুই এত বড় আধার তোর মুখে এই কথা? আমি ভেবেছিলুম, বটগাছের মত হবি, তোর ছায়ায় হাজার হাজার লোক আশ্রয় পাবে, তা না হয়ে তুই কিনা নিজের মুক্তি চাস! এতো তুচ্ছ কথা, অতি হীন কথা রে! না না অত ছোট নজর করিস্নি। আমি বাপু সব ভালবাসি—মাছ খাবো তো ভাজাও খাবো, সিদ্ধও খাবো, ঝোল অদ্বলও খাবো। তাঁকে সমাধি অবস্থায় নিগূর্ণভাবে উপলব্ধি করি, আবার নানা

ঐর ভেতর ঐহিক সম্বন্ধের বোধেও ভোগ করি। এক্ষেত্রে



ভাল লাগে না—তুইও তাই কর। একাধারে জ্ঞানী আর ভক্ত হুই-ই হ।”

কিন্তু এই তিরস্কারের কয়েক দিন পরে পুরস্কারের ব্যবস্থাও ঠাকুর করিয়াছিলেন। নরেন এক রাত্রিতে কানীপুরের নিভৃত কক্ষে বসিয়া ধ্যানমগ্ন। সঙ্গে অপর এক বয়স্ক ভক্তও সাধন নিরত—ইহাকে নরেন গোপালদা বলিয়া ডাকেন। নিবিড় ধ্যানে আবিষ্ট নরেন হঠাৎ এক সময় চীৎকার করিয়া বলিতে থাকেন, “গোপালদা, ও গোপালদা! আমার শরীর কোথায় গেল?”

গোপালদা বার বার তাঁহার অঙ্গে করাঘাত করিতেছেন, কিন্তু দেহে চেতনার কোন লক্ষণই নাই। ক্রমে অন্য গুরুভ্রাতারাও সেখানে উপস্থিত হইলেন।

এই সংবাদটি শুন্যার পর পরমহংসদেবের সংক্ষিপ্ত মন্তব্য হইল, “বেশ হয়েছে, থাক্ খানিকক্ষণ ঐরকম হয়ে। ওরই জন্ম যে আমায় জ্বালাতন করে তুলেছিল।”

গভীর রাত্রে বাহুজ্ঞান ফিরিয়া আসে, নরেন ধীরপদে ঠাকুরের শয্যাপাশে গিয়া উপস্থিত হন। ঠাকুর বলেন, “কেমন, মা তো আজ তোকে সব দেখিয়ে দিলেন। চাবি কিন্তু আমার হাতে রইল। এখন তোকে কাজ করতে হবে—যখন আমার এই কাজ শেষ হয়ে যাবে তখন আবার চাবি খুলবো।”

নরেন নির্নিমেষে দিব্যালোকের এই ঐন্দ্রজালিকের দিকে চাহিয়া রহিলেন। তারপর অসীম শ্রদ্ধায় শক্তিদয় গুরুর চরণে নিবেদন করিলেন তাঁহার প্রণতি ও আত্মসমর্পণ।

উত্তরকালে বিবেকানন্দ বলিয়াছিলেন, “সেদিন দেহাদি বুদ্ধি একেবারে তিরোহিত হয়েছিল। প্রায় লয় হয়ে গিয়েছিলুম আর কি। একটু ‘অহং’ ছিল, তাই সেই সমাধি থেকে ফিরেছিলুম। ঐরূপ সমাধিকালেই ‘আমি’ আর ব্রহ্মের ভেদ চলে যায়—সব এক

হয়ে যায়। যেন মহাসমুদ্রে জল, জল ছাড়া আর কিছুই নেই। ভাব আর ভাষা সব ফুরিয়ে যায়।”

সমাধি হইতে বাখানের পর সেদিন নরেনের মনে হইতেছিল — যেন মস্তক ব্যতীত তাঁহার দেহের আর সমস্ত কিছুই অস্তিত্ব অবলুপ্ত হইয়া গিয়াছে।

তারপরই অর্দ্ধবাহু অবস্থা আসার সঙ্গে সঙ্গে পার্শ্বে উপবিষ্ট গোপালদাকে ব্যাকুল কণ্ঠে ডাকিয়া উঠিয়াছিলেন।

আর একদিনের কথা। গিরিশ ঘোষের সহিত নরেন এক বৃক্ষতলে ধ্যানে বসিয়াছেন। মশার দংশনে গিরিশচন্দ্র ভোঁ অতিষ্ঠ। খানিক বাদেই তিনি আসন ত্যাগ করিলেন। ততক্ষণে নরেন্দ্রনাথ ধ্যানের গভীরে ডুবিয়া গিয়াছেন। শরীরে এত মশা বসিয়াছে যে মনে হয়, দেহখানি কালো কবলে আবৃত। গিরিশ উচ্চ স্বরে নরেনকে ডাকিতে থাকেন, কিন্তু তাঁহার দেহে চেতনার কোনই লক্ষণ নাই। অবশেষে আসন ধরিয়া তাঁহাকে টানিয়া ফেলা হইল। দেখা গেল, দেহ একেবারে বাহুজ্ঞানহীন—মৃতবৎ কঠিন। বহুক্ষণ পরে সেদিন নরেনের জ্ঞান সঞ্চার হয়।

সাধন ভজন ও ধ্যানের মধ্য দিয়া নরেন গুরুকৃপার বহুতর নিদর্শন পাইতেছেন। দিব্য আনন্দে হইতেছেন ভরপুর। এই সঙ্গে মনে জাগিতেছে প্রবল আশঙ্কা। পরম কারুণিক শ্রীরামকৃষ্ণ যে আর বেশীদিন এই মরদেহে থাকিবেন না, এই হৃদয়স্তা এবার তাঁহাকে পাইয়া বসে।

একদিন মনে এক দৃঢ় সঙ্কল্প করিলেন। কালরোগের কবল হইতে শ্রীরামকৃষ্ণকে উদ্ধার করিতে পারে এমন এক ঐশী শক্তির আবাহন তিনি করিতে চান। সেদিন সন্ধ্যার পর হইতে সমস্ত রাত্রি তিনি উন্মাদের মত ‘রাম’ নাম উচ্চারণ করিতে করিতে

বাগানের চারিদিক প্রদক্ষিণ করিতে থাকেন। তাঁহার বাহ্যজ্ঞান তখন তিরোহিতপ্রায়।

উন্মত্ত অধীর নরেনের ‘রাম রাম’ শব্দ ক্রমশঃ উচ্চতর হইতেছে। গভীর রাতে ঠাকুরের কানে পশিল এই নামের ধ্বনি। তাঁহার আদেশে অর্দ্ধবাহু অবস্থায় নরেনকে ধরিয়া আনা হইল। স্নেহমধুর কণ্ঠে পরমহংসদেব কহিলেন, “ওরে, কেন তুই এসব করে এত কষ্ট পাচ্ছিস? তোর মত এমন উন্মত্ত যে আমি বারো বছর ছিলাম! এক রাস্তিরে তুই আর কতটা করবি, বাপু?”

ঠাকুরের দিব্য সান্নিধ্য ও প্রশান্ত মুখচ্ছবি নরেনের হৃদয়ে সাস্তুনার স্নেহ-প্রলেপ বুলাইয়া দেয়, তিনি শান্ত হন।

দেহত্যাগের কিছুদিন পূর্ব হইতে প্রতি সন্ধ্যায় রামকৃষ্ণ নরেনের সহিত নিভূতে সাক্ষাৎ করিতেন। গুরু-শিষ্যের এই মিলন ছিল বড় রহস্যময়। অপর ভক্তগণ তখন ঠাকুরের নির্দেশে কক্ষ হইতে বাহির হইয়া যাইতেন, আর রুদ্ধদ্বার কক্ষে ঠাকুর ও নরেন্সনাথ দুই তিন ঘণ্টা কাল নিমজ্জিত থাকিতেন অধ্যাত্ম-চেতনার গভীরে।

শেষের দিনটি আসন্ন। ঠাকুর সেদিন নরেনকে আহ্বান করিয়া সম্মুখে বসাইয়াছেন। নিম্পলক দৃষ্টিটি নরেনের দিকে স্থির নিবদ্ধ। ধীরে ধীরে ঠাকুর সমাধিস্থ হইয়া পড়িলেন। নরেনের সত্তার গভীরে চলিয়াছে অবিরাম মন্তন। উপলব্ধি করিতেছেন—শ্রীরামকৃষ্ণের শরীর হইতে তড়িৎ কম্পনের মত একটা সূক্ষ্ম তেজ-রশ্মি তাহার দেহের ভিতরে সঞ্চালিত হইতেছে।

নরেন ক্রমে বাহ্যজ্ঞানশূন্য হইয়া পড়েন। চৈতন্য লাভের পর তিনি দেখেন, নীরবে উপবিষ্ট ঠাকুরের চোখে অশ্রুধারা।

“একি রহস্য, কিছুই যে আমি বুঝতে পারছিনে।” প্রশ্ন করেন নরেন্সনাথ।

ঠাকুর ধীর কণ্ঠে কহেন, “ওরে, আজ যথাসর্বস্ব তোকে দিয়ে

ফকির হলাম। তুই এই শক্তিতে জগতের অনেক কাজ করবি। কাজ শেষ হলে তারপর ফিরে যাবি।”

নরেনের দুই চোখও অশ্রু ছিলছিল হইয়া উঠিয়াছে। জীবন-প্রভুর দিকে তাকাইয়া অসহায় বালকের মত তিনি কাঁদিতে লাগিলেন।

ঠাকুরের মরলীলা সংবরণের দুইদিন পূর্ব্বেকার কথা। ঠাকুর সেদিন বাগ্‌ভাবে নরেনকে নিজের কক্ষে আহ্বান করিলেন। কহিলেন, “জাখ্ নরেন, তোর হাতে আমি এদের সবাইকে দিয়ে যাচ্ছি। তুই সবার চাইতে বুদ্ধিমান, শক্তিধর। এদের ভালবাসা দিয়ে বেঁধে রাখবি। যাতে এরা ঘরে ফিরে না গিয়ে সাধনভজন নিয়ে পড়ে থাকে, তার ব্যবস্থা কিন্তু তোকেই করতে হবে।”

নরেন্দ্রনাথ নত মস্তকে স্তব্ধ হইয়া ঠাকুরের নিকটে বসিয়া আছেন। বুঝিলেন, ঠাকুরের দেহত্যাগের দিনটি প্রায় সমাগত। যে ঐশী কণ্ঠের আভাস ঠাকুর মাঝে মাঝে তাঁহাকে দিতেন, আজ কি তাহাই করিলেন স্পষ্টতর? অনেক কিছুই দায়িত্বভার কি তাঁহাকে দিয়া গেলেন? নরেনের মনে পড়ে, কিছুদিন আগেকার কথা। ঠাকুরের সামনে বসিয়া ডাঃ মহেন্দ্রলাল সরকার নরেনের প্রশংসা করিতেছিলেন। ইহার উত্তরে শ্রীরামকৃষ্ণ সোৎসাহে বলিয়া উঠেন, “ওগো, কথায় বলে অদ্বৈতের হৃদয়েই গৌর নদীয়ায় এসেছিলেন—সেই রকম নরেনের জন্তেই তো সব গো। ওর জন্তেই এবার আমার আসা।”

ঠাকুর শুইয়া আছেন। দর্শনার্থী ও ভক্তেরা মাঝে মাঝে তাঁহার কক্ষে আসা-যাওয়া করিতেছে। হঠাৎ ঠাকুরের কি খেয়াল হইল, এক টুকরা কাগজ চাহিয়া নিয়া ধীরে ধীরে লিখিলেন—“নরেন লোকশিক্ষা দিবে।”

আধ্যাত্মিক মণ্ডলীর নায়করূপে প্রিয়তম শিষ্যকে তিনি নির্বাচন করিয়া রাখিয়া গেলেন, ভক্তদের মধ্যে এ তথ্যটিই কি তিনি সেদিন

জানাইয়া দিলেন ? কিন্তু নরেনের অন্তরের সম্মতি ইহাতে মিলিতেছে কই ? তিনি বলিয়া উঠেন, “আমি কিন্তু ওসব পারবো না।”

দৃঢ়কণ্ঠে রামকৃষ্ণের আদেশ উচ্চারিত হইল, “তোকে কণ্ঠেই হবে, তোর ঘাড় করবে।”

১৮৮৬ খৃষ্টাব্দের ১৬ই আগস্ট। ঠাকুরের মহাপ্রয়াণের দিন। ভক্তদল চরম মুহূর্তটির কথা চিন্তা করিয়া মুহমান। এই সঙ্কটে নরেন বিষাদখিন্ন হৃদয়ে চূপচাপ বসিয়া আছেন। হঠাৎ মাথায় বিছাৎ-ঝলকের মত খেলিয়া গেল একটা বড় প্রশ্ন। ঠাকুর তাঁহার ভগবৎ-সত্তা সম্বন্ধে নানা ধরণের ইঙ্গিত এযাবৎ জানাইয়াছেন। কিন্তু মরলীলা অবসানের পূর্ব মুহূর্তে তাঁহার প্রকৃত স্বরূপটি কি স্পষ্টরূপে জানাইয়া যাইবেন না ? এই ভক্তদল যাঁহার সহিত নিবিড় যোগসূত্রে আবদ্ধ, শেষের দিনে সেই দেবমানবের পরিচয় তাঁহারই শ্রীমুখে ধ্বনিত হইয়া উঠুক, ইহাই নরেনের অন্তরের আকুল প্রার্থনা।

সর্বজ্ঞ সৎগুরু সমস্তই বুঝিয়াছেন। রোগযন্ত্রণা বিস্মৃত হইয়া তিনি নরেনের দিকে মুখ ফিরাইলেন। অন্তঃ, তীক্ষ্ণ কণ্ঠে কহিলেন, “ওরে এখনও তোর জ্ঞান হলো না ? সত্যি সত্যি বলছি, যে রাম যে কৃষ্ণ, সে-ই ইদানীং এ শরীরে রামকৃষ্ণ—তবে তোর বেদান্তের দিক দিয়ে নয়।”

নরেন তো বিস্ময়ে একেবারে হতবাক্। ভাবাবেগে তাঁহার নয়ন দুটি অশ্রুসজল হইয়া আসিল।

ঠাকুর রামকৃষ্ণের মুখোচ্চারিত এই কথা কয়টিই উত্তরকালের মহান আচার্য্য, স্বামী বিবেকানন্দকে জোগায় দিব্য প্রেরণা, উদ্বুদ্ধ করে তাঁহাকে বিশ্বব্যাপী কর্মসাধনায়।

ঠাকুর চলিয়া গিয়াছেন। শিষ্যদের তাপিত হৃদয় তখন শুধু মরু প্রান্তরের মত খাঁ খাঁ করিতেছে। জীবনের পরমাশ্রয় দূরে সরিয়া

গিয়াছে; আশা, আনন্দ ও উৎসাহের লেশমাত্র কাহারো জীবনে অবশিষ্ট নাই।

নরেন ও তাঁহার এক গুরুভাই সেদিন শোকাকুল হৃদয়ে কালীপুরের বাগানে ঘুরিয়া বেড়াইতেছেন। হৃদয়ে তাঁহাদের প্রচণ্ড শূন্যতা। ভাবিতেছেন, ঠাকুর মরদেহ ত্যাগ করিয়া তাঁহাদের এ কোন্ নিরালস্য অবস্থায় রাখিয়া গেলেন? এমন সময় অদূরে ভাসিয়া উঠে এক অভাবনীয় দৃশ্য? নরেন দেখেন, গুরুদেবের দিব্যদেহ অদূরে দণ্ডায়মান। সর্ব্বশরীর তাঁহার অব্যক্ত আনন্দে শিহরিয়া উঠে। তবে কি মহাপ্রয়াণের পরেও ঠাকুর তাঁহার ভক্তদের উপর পূর্ববৎ কৃপাদৃষ্টি রাখিতেছেন! চিন্ময় দেহে আবির্ভূত হইয়া দিতেছেন পরম আশ্বাস!

হৃদয়ের চাঞ্চল্য দমন করিয়া নরেন মৌন হইয়া আছেন। মনে আশঙ্কাও কম নাই। ওই অলৌকিক দর্শন তাঁহার নিজের দুর্বল মনের ভ্রান্তি নয় তো?

সর্ব্ব সন্দেহের নিরসন করিয়া সঙ্গীয় গুরুভাই এবার চীৎকার করিয়া উঠেন, “নরেন, ঐ ছাখো, ঐ ছাখো!”

জ্যোতির্ময় দেহে ঠাকুরের এই আবির্ভাব! অধ্যাত্ম-সন্তানদের এ আবির্ভাবের মধ্য দিয়া বুঝাইয়া দিলেন—শিষ্যেরা যেমন আছেন, তেমনি আছেন তাঁহাদের সদগুরু। আনন্দে অধীর হইয়া উচ্চকণ্ঠে তাঁহারা অপর গুরুভাইদের ডাকিতে লাগিলেন। ঠাকুরের অলৌকিক মূর্ত্তি ততক্ষণে অস্তুহিত হইয়া গিয়াছে!

শ্রীরামকৃষ্ণের তিরোধানের পর কালীপুরের বাগান ছাড়িয়া দেওয়া হইয়াছে। কিন্তু এবার তরুণ সন্ন্যাসীদের মাথা গুঁজিবার ঠাই হইবে কোথায়?

ঠাকুরের পরমভক্ত সুরেন মিত্র এ হৃৎসময়ে আগাইয়া আসেন।

কহেন, “একটা বাড়ী ভাড়া করে একত্রে থাকো, ঠাকুরের স্মৃতি বুকে নিয়ে সাধনভজন করো। এর মাসিক ভাড়া আমি চালিয়ে যাবো।” নরেন প্রভৃতি যুবক-ভক্তেরা হাঁফ ছাড়িয়া বাঁচেন।

বরাহনগরে গঙ্গার ধারে যৎসামান্য ভাড়ায় একটি বাড়ী নেওয়া হয়। জঙ্গলাকীর্ণ বাড়ীটি পুরাতন এবং দীর্ঘদিন মনুষ্য পরিত্যক্ত। ইহাই বরাহনগরের মঠ।

এইবার নরেন্দ্রনাথের নেতৃত্বের পালা। ভক্তদের কেহ কেহ তখন পরীক্ষার পড়া তৈরীর জন্ত স্বগৃহে বাস করিতেছিলেন। নরেন এক একদিন বাড়ের মত তাঁহাদের উপর নিপতিত হন, তেজোদৃষ্ট কর্তে বলেন, “তোরা এই অমূল্য জীবনটা কি একজামিন দিয়েই কাটাবি, ঠিক করেছিস? এই কি ঠাকুরের উপদেশ পালন করা? এ জন্তই তিনি জগতে এসে এত কষ্ট করে গেলেন? তোরা সন্ন্যাসী, ত্যাগমস্ত্রে দীক্ষিত—তবু একজামিন পাস করে সংসারের উন্নতি কামনা করিস? ত্যাগ আর ভোগ-বাসনা কি এক সঙ্গে থাকতে পারে? ধিক্ ধিক্ তোদের! শিগগীর ও সব ছেড়ে-ছুঁড়ে দিয়ে মঠে চল।”

নরেনের সাহস, প্রেরণা ও বৈরাগ্যের আহ্বান তরুণদলকে প্রভাবিত করে। একে একে তাঁহারা মঠে যোগ দিতে থাকেন। ইতস্ততঃ বিক্ষিপ্ত এই ভক্তদল নিয়া যে নবগঠিত সঙ্ঘ আত্মপ্রকাশ করিল, নরেন হইলেন তাহার অধিনায়ক।

এই গুরুভ্রাতাগণ অতি সহজেই নরেনের হাতে আত্মসমর্পণ করিতে পারিয়াছিল। কারণ, তাঁহারা মনেপ্রাণে বিশ্বাস করিত—নরেন ঠাকুরেরই প্রতিনিধি, তাঁহার নেতৃত্ব মানিয়া চলা, তাঁহাকে আনুগত্য দেওয়া মানেই ঠাকুরের সন্তুষ্টি বিধান করা।

ঈশ্বর দর্শনের জন্ত ব্যাকুল ভক্তদল এবার ঘর ছাড়িয়া বাহির হইয়াছেন। একান্ত নিষ্ঠায়, হৃচ্চর সাধন-পথ অতিক্রম করিতে তাঁহারা কৃতসঙ্কল্প। এই পথের কোন বাধা কোন হৃৎদহনই তাঁহারা আমল দিতে চায় না।

বিবেকানন্দ উত্তরকালে বলিতেন, “বরাহনগরে এমন কত দিন গিয়েছে যে খাবার কিছুই নেই, ভাত জোটে তো হুন্ জোটে না। দিন কয়েক হয়তো হুন্-ভাত চললো, কিন্তু কাহারও গ্রাহ্য নাই। জপ-ধ্যানের প্রবল তোড়ে তখন আমরা ভাসছি। কখন কখন শুধু তেলাকুচো পাতাসিদ্ধ ও হুন্-ভাত—এই মাসাবধি চলছে। আহা, সেসব কি দিনই গেছে! সে দিনের কঠোরতা দেখলে ভৃত পালিয়ে যেত।”

কৌপীন-সম্বল এই ভক্তদের একযোগে ঘরের বাহিরে যাইবারও উপায় ছিল না। দেওয়ালে একখানা মাত্র কাপড় টাঙানো থাকিত, যে যখন মঠবাড়ীর বাহিরে যাইত, এই কাপড়খানিই থাকিত তাহার কোমরে জড়ানো।

এই চরম দুরবস্থার মধ্যেই কিন্তু তাঁহাদের ধর্মালোচনার বা দর্শনের কুটতর্কের বিরাম ছিল না। কঠোর সাধনায় রাত্রির পর রাত্রি অতিবাহিত হইয়া যাইত। তপস্যার অগ্নিতে প্রদীপ্ত এক এক জনের চক্ষু হইতে যেন অগ্নি বসিত হইত। মঠে দেখা করিতে গিয়া ঈশ্বরোন্মাদ এই তরুণদল ও তাঁহাদের দলপতিকে দেখিয়া সকলের বিস্ময়ের সীমা থাকিত না।

এই সময়ে এক একদিন রামকৃষ্ণের স্মৃতিতে উদ্দীপিত হইয়া নরেন কহিতেন, “সত্যের প্রচার কার্যে অনেকেই ব্যস্ত হয় কিন্তু তারা না জেনেই তা করে। আমি সেটা জেনে—তারপর করবো।”

ইহার অব্যবহিত পরেই নরেনের জীবনে দেখা যায় এক নূতন অধ্যায়ের সূত্রপাত। সারা ভারত পর্য্যটন ও তীর্থ পরিভ্রমার তীব্র আকাঙ্ক্ষা তাঁহাকে পাইয়া বসে। পরিধানে গৈরিকবাস, হস্তে দণ্ড কমণ্ডলু দিব্যকাস্তি সন্ন্যাসী সেদিন মঠের বাহির হইয়া পড়েন।



কখনো ‘নারায়ণ হরি’ বলিয়া গৃহস্থদের দ্বারে ভিক্ষার জন্ত দাঁড়ান, কখনো বা করেন আকাশবৃষ্টি। অভিজ্ঞতা ও অমুভূতির বৈচিত্র্যে এই পরিত্রাজন ভরপুর হইয়া উঠে।

সে-বার নরেন্দ্রনাথ বৃন্দাবনের পথে চলিয়াছেন। ক্ষুৎপিপাসা ও পরিশ্রমে দেহ অবসন্ন। পথপার্শ্বে বসিয়া এক দরিদ্র, নীচ জাতীয় ব্যক্তি ধূমপান করিতেছে। নরেন তাহার নিকট কলিকাটি চাহিলে সে ব্যস্তসমস্ত হইয়া বলিল, “মহারাজ, ম্যায় ভাগী হুঁ।”

উত্তর শুনিয়া সন্ন্যাসীটির নিরস্ত হন, কিন্তু কিছুদূর গিয়াই তাবিতে থাকেন, ‘নাঃ এতো ঠিক নয়। ঠাকুরের এত আশীর্বাদ, অদ্বৈত-বাদের এত বিচার-বিশ্লেষণ—ইহার পরও দেখছি আমার ভেদজ্ঞান তিরোহিত হয় নি? জাতিভেদের সংস্কার যে মনের অন্তস্তলে আজও তেমনি উদগ্ৰ হয়ে আছে।’ তৎক্ষণাৎ তিনি ফিরিয়া আসেন। সেই মেথরের হাত হইতে কলিকাটি টানিয়া নিয়া ধূমপান করেন। তারপর তাঁহার হৃদয় শান্ত হয়।

স্বামীজী বৃন্দাবনে আসিয়াছেন। রাধাকুণ্ডের তীরে কৌপীনটি রাখিয়া উলঙ্গ হইয়া তিনি স্নানে নামিলেন। জল হইতে উঠিয়া দেখেন, একটি বানর এটি টানিয়া নিয়া দূরে পলাইয়া গেল। বহু চেষ্টার পর ইহা পুনরুদ্ধার করা গেল বটে, কিন্তু তখন কৌপীনটি একেবারে ছিন্নভিন্ন। লজ্জা নিবারণের কোনই উপায় নাই। বড় অভিমান জাগে এবার স্বামীজীর মনে। কুণ্ডেশ্বরী রাধা-রাণীর নিকট সঙ্কল্প জানান, লোকালয়ে আর না আসিয়া বনাঞ্চলেই তিনি বাস করিবেন। দেখা যাক্ তাঁহার জন্ত কোন সুব্যবস্থা হয় কিনা।

অরণ্যে প্রবেশ করা মাত্র ঘটে এক অদ্ভুত কাণ্ড। স্বামীজী দেখেন—এক ব্যক্তি তাঁহাকে পিছন দিক হইতে ডাকিতেছে, ছুটিয়া আসিতেছে দ্রুতবেগে। উলঙ্গ স্বামীজীও ধাবিত হইয়াছেন সম্মুখের দিকে। কিছুক্ষণ পরে কোনক্রমে নিকটস্থ হইয়া হাঁপাইতে হাঁপাইতে

লোকটি নিবেদন করিল, “মহারাজ, এই বনের পাশেই আমার ঘর। কৃপা করে আপনি সেখানে পদার্পণ করুন, আপনাকে নববস্ত্র ও ভোজ্য নিবেদন করে আমরা কৃতার্থ হই।”

বলা বাহুল্য স্বামীজী সানন্দে স্বীকৃত হইলেন, ভোজন ও নববস্ত্র পরিধানের পর বাহির হইলেন লোকালয়ে।

আর একবার গাজীপুরের অপর পারে তিনি এক স্টেশনে বসিয়া আছেন। পথশ্রমে ও ক্ষুধাতৃষ্ণায় বড় কাতর, দেহভার আর যেন বহিতে পারিতেছেন না। নিকটস্থ বৃক্ষছায়ায় বসিয়া এক শেঠজী সোৎসাহে প্রচুর পুরী-কচুরী-হালুয়া উদরস্থ করিতেছে। ভোজন শেষে লোকটি বিজ্ঞপ্তি শুরু করে, সংসার-ত্যাগী মহারাজ কপর্দকহীন, আর তাহার মত সংসারীরা খাইয়া-দাইয়া কেমন পরম সুখে দিনযাপন করিতেছে।

ইহাৎ কিন্তু এক বিস্ময়কর কাণ্ড ঘটিল। এক ব্যক্তি ত্রস্তবাস্তে পুটলীতে বাঁধিয়া কিছু মিষ্টজব্য ও এক কুঁজো জল নিয়া স্বামীজীর সম্মুখে উপাস্ত। সশ্রদ্ধভাবে খাওয়া নিবেদন করিয়া সে তৎক্ষণাৎ তামাক সাজিতে বসিয়া যায়। স্বামীজীর প্রশ্নের উত্তরে জানায়, নিকটেই তাহার একটি খাবারের দোকান রহিয়াছে—জাতিতে সে হালুইকর। আজই প্রত্যুষে সে দেখে এক বিচিত্র স্বপ্ন। এক সন্ন্যাসীবাবা তাঁহাকে কহিতেছেন—স্টেশনের একপ্রান্তে এক সাধু অনাহারে রহিয়াছেন অবিলম্বে সে যেন তাঁহার সেবা নিব্বাহ করে। প্রথমবারের স্বপ্ন-দর্শনকে হালুইকর তেমন গুরুত্ব দেয় নাই। তারপর শয্যায় শুইয়া আরও দুইবার সে একই রকমের স্বপ্নাদেশ পায়। তাই এমন ব্যস্তসমস্ত হইয়া ছুটিয়া আসিয়াছে।

স্বামীজীর দুই চোখ অশ্রুসজল হইয়া উঠে। পরমাত্মদাতা ঠাকুরের কৃপার ধারা মরজগতের পরপার হইতেও তাঁহার জন্ত এমনিভাবে বহিয়া আসিতেছে।

গাজীপুরে উপনীত হইয়া স্বামীজী পণ্ডারীবাবার সান্নিধ্যে আসেন। সিদ্ধপুরুষ বলিয়া এ অঞ্চলে তাঁহার খুব প্রসিদ্ধি। তা ছাড়া, পণ্ডারীবাবার গুহায় শ্রীরামকৃষ্ণের একখানি ছবি টাঙ্গানো রহিয়াছে দেখিয়া তিনি এই সাধুর প্রতি আকৃষ্ট হইলেন।

স্বামীজী এই সময়ে অজীর্ণ ও কোমরের বাতরোগে ভুগিতে ছিলেন। ভাবিলেন, পণ্ডারীবাবার নিকট হঠযোগ ও রাজযোগের শিক্ষা কিছুটা গ্রহণ করিলে ক্ষতি কি? এই মহাআর কাছে দীক্ষা নিবেন বলিয়াও তিনি স্থির করিলেন। পণ্ডারীবাবা সম্মতি জ্ঞাপন করিলেন এবং অনুষ্ঠানের দিনক্ষণও স্থির হইয়া গেল।

দীক্ষার পূর্বদিন রাত্রে কিন্তু এক বিচিত্র ব্যাপার ঘটে। স্বামী বিবেকানন্দের অধ্যাত্মজীবনে এ ঘটনাটির গুরুত্ব অপরিমিত।

স্বামীজী শয্যা শয়ন করিয়া আছেন। অকস্মাৎ লক্ষ্য করিলেন, তাঁহার কক্ষটি দিব্যালোকের শুভ্র জ্যোতিতে উদ্ভাসিত হইয়া উঠিয়াছে। আর উহার মধ্যে ফুটিয়া উঠিয়াছে শ্রীরামকৃষ্ণের মূর্তি। ঠাকুরের কারুণ্যভরা নয়ন দুইটি স্বামীজীর দিকে নিবদ্ধ, অপরিমেয় স্নেহ মমতা উহা হইতে ঝরিয়া পড়িতেছে।

গুরুদেবের এই অলৌকিক আবির্ভাব তাঁহার সমগ্র সস্তার মূলে জাগাইয়া তোলে প্রচণ্ড আলোড়ন। আত্মগ্লানির আগুনে হৃদয় জ্বলিতে থাকে। এ তিনি কি করিতে যাইতেছেন? ঠাকুরের প্রাতি যে অচলা ভক্তি, যে আত্মসমর্পণ এতকাল ছিল তাহা কি লোপ পাইয়াছে? তিনি কি গুরুদেবের অবিশ্বাসী শিষ্য? উত্তেজনায় তাঁহার শরীর কম্পিত ও ঘর্মাক্ত হইয়া উঠে। তারপর স্বামীজী উচ্চ স্বরে স্বগতোক্তি করিয়া উঠেন, “না, না, কখনোই তা হবে না। শ্রীরামকৃষ্ণ ব্যতীত আর কেউ এ হৃদয়ে ঠাই পাবে না। প্রভু, এ দাস যে চিরদিন তোমারই চরণে বিক্রান্ত। জয় রামকৃষ্ণ!”

ইহার পরেও কয়েকদিন ধরিয়া ঠাকুরের দর্শন তিনি প্রাপ্ত হন। সবিস্ময়ে ভাবিতে থাকেন, সত্যিই তো, বিদেহী রামকৃষ্ণের সদাজাগ্রত

চক্ষু দুইটি আজিও তাঁহার প্রিয় শিষ্যের সতর্ক প্রহরায় নিযুক্ত ! স্বামীজী শিহরিয়া উঠেন, ঠাকুরের করুণার স্বরূপ উপলব্ধি করিয়া দুই নয়নে ঝরিতে থাকে পুলকাক্ষ ।

ইহার পর নৈনিতালের নিকটে, হিমালয় ক্রোড়ে স্বামীজীর এক চূর্ণিত অধ্যাত্ম-অনুভূতি লাভ হয় । সঙ্গী গঙ্গাধর মহারাজকে ডাকিয়া সেদিন তিনি আনন্দোচ্ছল হৃদয়ে বলিয়াছিলেন, “গঙ্গাধর, আজ এই অশ্বখবৃক্ষের তলে আমার জীবনের এক অমূল্য ক্ষণ উপস্থিত হয়েছিল । এর ফলে আমার জীবনের একটা প্রধান সমস্যার সমাধান হয়ে গিয়েছে ।”

তখনকার দিনলিপিতে স্বামীজী তাঁহার নিগূঢ় সাধন-অনুভূতির কথা লিখিয়াছিলেন—আমি আজ ক্ষুদ্র দেহপিণ্ড আর বিরাট মহা-সৃষ্টির একাত্মকতা অনুভব করেছি । বিশ্বের যা কিছু সব এই ক্ষুদ্র দেহমধ্যেই রয়েছে । উপলব্ধি করলাম, প্রতি পরমাণুর মধ্যেই বিশ্ব-সংসার রয়েছে বিরাজমান ।

হৃষিকেশের বিখ্যাত সাধু ধনরাজ-গিরির আশ্রমে স্বামীজী কিছুদিন ছিলেন । কয়েকজন গুরুভ্রাতাও এই সময় তাঁহার সঙ্গে থাকিতেন । হিমালয়ে বসিয়া কঠোর তপস্যায় কিছুদিন কাটাইবেন বলিয়া স্বামীজী মনে মনে স্থির করিয়াছেন । কিন্তু কোথা হইতে এক আকস্মিক দুর্দৈব আসিয়া উপস্থিত হয়, তিনি এক ছাশ্চিক্যেস্ত ধরণের জ্বরে আক্রান্ত হন । একদিন অবস্থা নিতান্ত সঙ্কটাপন্ন হইয়া পড়ে । দেখা যায়, সর্বশরীর তিম হইয়াছে, নাড়ীর গতি স্তব্ধপ্রায় । অন্তিমকাল উপস্থিত জানিয়া গুরুভ্রাতারা শোকে মুগ্ধমান, কেহ কেহ ইষ্টনামও স্মরণ করিতেছেন ।

ইহাং তাঁহার কুটিরদ্বারে আসিয়া দাঁড়ান জটা-জুটমণ্ডিত এক বৃদ্ধ সাধু । তরুণ সন্ন্যাসীদের এই সঙ্কটের কথা শুনিয়া তাঁহার হৃদয় বিগলিত হয় । গৃহমধ্যে ঢুকিয়া মৃতকল্প স্বামীজীকে তিনি কিছুটা মধু ও পিপুল চূর্ণ খাওয়াইয়া দিলেন । অতি সাধারণ একটি ঔষধ

কিন্তু তাঁহার ক্রিয়া যেন অমোঘ মন্ত্রোষধির মত। রোগী ধীরে ধীরে চক্ষু মেলিয়া চাহিলেন। ইতিমধ্যে বৃদ্ধ সাধুটি পাহাড়িয়া পথে নামিয়া কোথায় অদৃশ্য হইয়া গিয়াছেন।

সুস্থ হইয়া উঠিয়া স্বামীজী গুরুভাইদের কাছে ডাকিলেন, কহিলেন, “বাহুজ্ঞানহীন অবস্থায় পড়ে থাকবার সময় কি দেখেছিলাম জানিস? দেখলাম, আমি যেন জগতে বিধাতার এক বৃহৎ কাজের ভার নিয়ে এসেছি। সে ঐশী কাজ যতদিন শেষ না হবে, আমার যেন বিশ্রাম নেই—শান্তি নেই।”

এখন হইতে গুরুভাইরা স্বামীজীর জীবনে এক উল্লেখযোগ্য পরিবর্তন লক্ষ্য করেন। তাঁহার কর্মজীবনে আসে নূতনতর উৎসাহ, প্রাণচাঞ্চল্য ও উদ্দীপনা, আর অধ্যাত্মজীবন হইয়া উঠে আত্মবিশ্বাসে ভরপুর।

স্বামীজী ও তাঁর গুরুভাইরা স্পষ্টতই বুঝিতে পারিলেন, মৃত্যুর দ্বারে গিয়াও নরেন এক অদৃশ্য কল্যাণময় শক্তির ইঙ্গিতে ফিরিয়া আসিলেন। ঐ বৃদ্ধ সন্ন্যাসী ছিলেন সেই অদৃশ্য নিয়ন্তা-শক্তিরই দূত। স্বামীজীর জীবনে ঐ ঘটনাটির মধ্য দিয়া এক নূতন পরিবর্তন ঘটিয়া গেল।

ইহার পর হইতে স্বামীজী একাকী সমগ্র ভারত পরিভ্রাজন করিতে থাকেন। ১৮৯১ খৃষ্টাব্দ হইতে শুরু করিয়া কয়েক বৎসর তিনি গুরুভ্রাতাদের হইতে নিজেকে বিচ্ছিন্ন করিয়া নেন, নিঃসঙ্গ জীবন যাপন করিতে থাকেন। এই সময়ে তাঁহাকে বলিতে শুনা যাইত, “গুরুভাইদের মায়াও মায়া—বরং তা আরও প্রবল। এ মায়ার পাকে পড়লে সাধনার পথে বিপ্লব ঘটে। আমি আর কোন মায়ার বেড়া-ই রাখতে চাইনে।”

ভাগী দণ্ডী সন্ন্যাসীর বেশে স্বামীজী ভারতবর্ষের দিক্‌দিগন্তে

ঘুরিয়া বেড়ান। এ দেশের অগণিত পল্লী ও জনপদে—ভাকী, দোসাদ ও দিনমজুরের গৃহ হইতে নৃপতির রাজপ্রাসাদে, ভারত-আত্মার সন্ধানে তাঁহার এই অভিযান! ভারতের মুক্তিকার বৃকে কান পাতিয়া শুনিলেন তাঁর হৃদস্পন্দন, ভারতের লক্ষ লক্ষ মানুষের চোখে মুখে রূপায়িত দেখিলেন পরমাত্মার ছায়া। অদ্বৈতবাদী সন্ন্যাসীর মুক্তির সঙ্গীতে আসিল নূতন স্পন্দন, নূতন গতিবেগ।

এই ভারত পরিক্রমা স্বামীজীর অধ্যাত্মজীবনের এক বড় প্রস্তুতি। বেদান্তবাদের নব প্রচারক, সন্ন্যাসী-সৈনিক বিবেকানন্দের যোদ্ধা-জীবনের পাথেয় এই সময়েই সঞ্চিত হইয়া উঠে।

আলোয়ার, খেতড়ি, পোরবন্দর, রামনাদ প্রভৃতি রাজাদের শ্রদ্ধা ও আনুগত্য তিনি এই সময়ে প্রাপ্ত হন। এই নিস্পৃহ, তেজস্বী সন্ন্যাসীর পদপ্রান্তে এই রাজগৃহদের শির সেদিন লুটাইয়া পড়ে।

স্বামীজী সে সময়ে খেতড়ির মহারাজের সম্মানীয় অতিথি। একদিন মহারাজার জয়পুরস্থিত রাজ-উজ্জানে বসিয়া নানা ধর্মকথা হইতেছে। এমন সময় এক সুকণ্ঠী বাদ্যীজীকে আহ্বান করিয়া আনা হইল, রাজ-অতিথির সম্মুখে সে ভজন সঙ্গীত গাহিবে।

স্বামীজী কিন্তু এই রমণীকে দেখিয়াই স্থান ত্যাগের জন্ত উঠিয়া দাঁড়ান। তরুণী সঙ্গীত-ব্যবসায়িনীর সম্মুখে বসিয়া গান শুনিতে তাঁহার সংস্কারে বাধিল। খেতড়ির নৃপতি সাহুনয়ে বলেন, “স্বামীজী, এ কিন্তু চমৎকার ভজন গায়। এর গান শুনে অনেকেই মুগ্ধ হয়েছেন। আপনি দয়া করে একটু শুনুন।”

ঐ নারীর কণ্ঠে বৈষ্ণব-সাধক সুরদাসের প্রার্থনা ঝঙ্কত হইয়া উঠে—

প্রভু মেরা অগুণ চিত না ধরো,  
সমদরশী হ্যায় নাম তুমহারো।  
এক লোহা পুজামে রহত হ্যায়।

এক রহে ব্যাধ ঘর পর  
পরশকে মন দ্বিধা নাহি হোয়  
হুঁহু এক কাঞ্চন করো।

সুর-মূর্ছনা বার বার ঘুরিয়া ফিরিয়া একই তত্ত্বকে উদ্ঘাটিত করিতে চাহিতেছে আর বলিতেছে—“অজ্ঞানোসে ভেদ হ্যায়, জ্ঞানী কাহে ভেদ করো।”

স্বামীজী উচ্চকিত হইয়া উঠেন। মুহূর্ত্তে চক্ষুর সম্মুখ হইতে একটি পর্দা সরিয়া যায়। সংস্কার হয় বিদূরিত। সত্যিই তো! সমদর্শী তিনি কায়মনোবাক্যে হইতে পারেন নাই। ভেদবুদ্ধি ও সংস্কারের মূল অন্তস্তল হইতে উৎপাটিত আজিও হয় নাই। সর্ব্বভূতে ব্রহ্মানুভূতির জগৎ, পরম উপলব্ধির জগৎ, তপস্তা গুরু করিয়াছেন। কিন্তু সে তপস্তার মূলেই যে আপন ভেদবুদ্ধি দিয়া কুঠারাঘাত হানিয়া বসিয়াছেন। এই বাঈজীর ভজন গানের মধ্য দিয়া তাই কি ঠাকুর তাঁহার জীবনে অভেদজ্ঞানের সাড়া নূতন করিয়া আজ জাগাইয়া তুলিলেন?

তখনি গায়িকা নারীর কাছে অগ্রসর হইয়া কহিলেন. “মা, আমি তোমার নিকট ঘোর অপরাধ করেছি। তোমাকে ঘৃণা করে আমি এস্থান ত্যাগ করতে চেয়েছিলাম। কিন্তু তোমার এই গানের মধ্য দিয়ে তুমি আমার চৈতন্যকে জাগ্রত করেছো।”

দেশীয় রাজ-রাজড়া ও অমাত্য যখনই যিনি স্বামীজীর দর্শনে আসিতেন, তিনি তাঁহার সম্মুখে নিজের নবাবিষ্কৃত ভারতকেই তুলিয়া ধরিতেন।

স্বদেশের পরিচয় তাঁহার নিকট ছুইরূপে পরিস্ফুট হয়। একটি তাহার শাস্ত্ররূপ—প্রাচীন ঐতিহ্য ও আধ্যাত্মিক সম্পদের গরিমায় ভাস্বর। আর একটি তাহার বর্তমানের রূপ—যাহা দারিদ্র্য, কুসংস্কার ও নিপীড়িত আত্মার হাহাকারে ভরা।

ভারতের আত্মিক পরিচয়ের মধ্য দিয়াই দেশাত্মবোধ ও আত্ম-

মর্যাদাকে জাগাইয়া তুলিতে হইবে, ঋষিদের শিক্ষাদীক্ষার পুনঃপ্রবর্তন করিতে হইবে, দেশীয় রাজসভাগুলির নিকট ইহাই ছিল তাঁহার বক্তব্যের নির্যাস। আরো কহিতেন, “ধর্ম ভারতের বর্তমান দুর্দশার কারণ নয়, ধর্মের অভাবই দায়ী এই দুর্দশার জন্য। ধর্মের শক্তি তখনই বাড়ে যখন তা মানুষের কর্মজীবনে হয় রূপায়িত।”

দেশীয় রাজাদের অনেকে তাঁহাকে শ্রদ্ধাভক্তি দেখাইয়াছেন কেহ কেহ গুরুজ্ঞানে পদসেবাও করিয়াছেন। কিন্তু কখনো এই রাজসেবার আকর্ষণ বা মোহে তিনি পড়েন নাই। এই তেজস্বী অপ্রতিগ্রাহী রাজ-সন্ন্যাসীর পদে রাজাদের শির বার বার লুণ্ঠিত হইয়াছে, স্বামীজীর অকুতোভয়তা ও বৈরাগ্য তাঁহাদের বিস্মিত করিয়াছে।

একবার মহাশূররাজ স্বামীজীকে একটি উপহার গ্রহণের জন্য পীড়াপীড়ি করিতে থাকেন। সন্ন্যাসীকে মূল্যবান দ্রব্য গ্রহণ করিতে নাই বলিয়া স্বামীজী এড়াইতে চান, কিন্তু মহারাজও ছাড়িবেন না। অগত্যা স্বামীজী সকলকে বিস্মিত করিয়া সামান্য একটি ছঁকা চাহিয়া বসিলেন। সর্ভ থাকিল—উহাতে কোন ধাতুর সংস্রব থাকিবে না। মহারাজ অবিলম্বে দেশীয় শিল্পীদের কারুকার্যে খচিত একটি সুদৃশ্য ছঁকা তাঁহাকে উপহার দিলেন। মাদ্রাজে পৌঁছবার পরই কিন্তু এই ছঁকার সদৃশি হইয়া গেল। এক ভদ্রলোকের বাড়ীতে স্বামীজী আশ্রয় নিয়াছেন। লক্ষ্য করিলেন, তাঁহার পাচক ব্রাহ্মণ এই ছঁকাটির দিকে বার বার লুক্ক দৃষ্টিতে তাকাইতেছে। স্বামীজী এই ছঁকাটি তৎক্ষণাৎ তাহাকে দিয়া দিলেন। মহারাজের উপহারের মূল্য তাঁহার নিকট যেন এক কানাকড়িও নয়।

গুজরাটের পোরবন্দর রাজসভায় স্বামীজী উপস্থিত হইয়াছেন। শঙ্কর পাণ্ডুরং সেখানকার এক প্রখ্যাত পণ্ডিত। তিনি তখন বেদের অনুবাদ করিতেছিলেন। স্বামীজী নয় মাস কাল সেখানে থাকিয়া



তঁাহার কাজের সহায়তা করেন এবং বেদ এবং পতঞ্জলির মহাভাষ্য এই সময়েই পাণ্ডুরাং-এর সাহায্যে তিনি আয়ত্ত করিয়া নেন।

নবীন সন্ন্যাসীর অপূৰ্ব্ব শক্তির পরিচয় পাইয়া পণ্ডিতশিরোমণি পাণ্ডুরাং বলিয়াছিলেন, “স্বামীজী, আমার মতে আপনার মনীষা ও প্রতিভার উপযুক্ত মর্যাদা শুধু পাশ্চাত্য দেশেই হতে পারে। আপনি সেখানে আমাদের সনাতন সভ্যতার তত্ত্ব ব্যাখ্যা করুন। পাশ্চাত্য ও প্রাচ্য উভয় দেশেরই কল্যাণ হবে।”

পাশ্চাত্য দেশ পর্যটনের চিন্তা বীজাকারে স্বামীজীর অন্তরে এই সময় হইতেই প্রবেশ করে।

ঠাকুর রামকৃষ্ণের বাণী—জীবরূপী শিবের সেবা—বার বার তঁাহার মনে পড়ে। ভাবেন, মাতৃভূমি ভারতের কোটি কোটি নিরন্ন শিক্ষা-দীক্ষাহীন মানুষকে অন্ন জোগাইতে হইবে—আধ্যাত্মিক চেতনায় তাহাদিগকে স্বপ্রতিষ্ঠা করিতে হইবে। কিন্তু তার আগে প্রয়োজন জনগণের দারিদ্র্য ও তামসিকতা দূর করা।

কিন্তু সে উদ্দেশ্য সফল করিবার উপকরণ কই? মনে তাই দৃঢ় প্রতীতি জন্মিল—পাশ্চাত্যদেশে যাওয়া ছাড়া আর উপায় নাই। ভোগসর্ব্বশূন্য, উদ্ভাস্ত জড়বাদের কেন্দ্রে তিনি ভারতের অধ্যাত্মবাণী প্রচার করিবেন আর ইহার পরিবর্তে আনিবেন সে দেশের সাহায্য, যাঙ্গ দ্বারা এ দেশ হইবে সমৃদ্ধতর :

ঐশী নির্দিষ্ট ব্রতের জগ্নু ত্রীরামকৃষ্ণ তঁাহাকে চিহ্নিত করিয়া গিয়াছিলেন। তাহারই উদ্বোধনপর্ব যেন এই সময়ে অনুষ্ঠিত হইতে দেখিতেছি। এই সময়ে গুরুতাই অভেদানন্দজীর সহিত বোম্বাইতে স্বামীজীর সাক্ষাৎ হয়। স্বামীজীর অন্তরলোকের প্রস্তুতির কথাটি স্বামী অভেদানন্দ বর্ণনা করিয়াছেন—“এই সময়ে স্বামীজীর হৃদয়টি যেন অগ্নিকুণ্ডের মত হইয়াছিল। আর কোন চিন্তা নাই। কেবল কি করিয়া ভারতের প্রাচীন আধ্যাত্মিকতার পুনঃপ্রতিষ্ঠা করা যায়—অহর্নিশ তাহাই ভাবিতেন।...স্বামীজীকে তখন দেখিলে মনে হইত

যেন একটা প্রচণ্ড ঝড়বাত। আমাকে তিনি একদিন বলিয়াছিলেন—  
 ‘জাখ্ কালী, আমার ভেতর এমন একটা শক্তি জমেছে যে, ভয় হয়  
 পাছে কেটে যাই।’

এই সময়ে মাদ্রাজে স্বামীজীর প্রকাণ্ড এক ভক্তদল জুটিয়া গেল।  
 ইহাদের উৎসাহে ও নিজ অন্তরের প্রেরণায় তিনি পাশ্চাত্য দেশে  
 ধর্মপ্রচারে যাওয়ার সিদ্ধান্ত স্থির করিলেন। সিকাগোতে বিশ্বধর্ম-  
 সম্মেলন অনুষ্ঠিত হইবে। সেখানে তাঁহাকে প্রেরণের জন্ত সকলেই  
 অত্যন্ত ব্যগ্র।

স্বামীজীর ভক্ত আলাসিজা পেরুমল প্রভৃতির চেষ্টায় জনসাধারণ  
 হইতে চাঁদাও কিছু উঠিল। মাদ্রাজী শিষ্যদের কাছে স্বামীজী  
 নিজের অভিপ্রায় স্পষ্টভাবেই ব্যক্ত করিলেন,—“এখন হিন্দুধর্মকে  
 জগৎবাসীর কাছে প্রচার করার সময় এসে গিয়েছে। ঋষিদের  
 এই মহান ধর্মকে আর সঙ্কীর্ণ বেঠানার মধ্যে আবদ্ধ করে রাখলে  
 চলবে না, জগৎময় একে ছড়িয়ে দিতে হবে। সনাতন ধর্মের প্রাচীন  
 দুর্গ জীর্ণ হয়েছে, শুধু বৈদেশিক আক্রমণ থেকে তাকে কোন রকমে  
 রক্ষা করে জড়ের মত বসে থাকলে চলবে না। এর পুনঃসংস্কার করে  
 জগতের সমক্ষে বার হতে হবে, পূর্ণ উত্তমের সঙ্গে চারদিকে প্রচার  
 করতে হবে এর মহিমা।”

আমেরিকায় যাওয়ার জন্ত চাঁদা তোলা হয়। কিন্তু স্বামীজী  
 পতিত হন মহা সমস্যায়। অন্তরে প্রশ্ন জাগে, কেন তিনি বিদেশে  
 যাইতে উত্তত হইয়াছেন? দেশের কাজে? ধর্মের কাজে? না নিজের  
 প্রচ্ছন্ন অহংবোধ তাঁহাকে এদিকে ঠেলিয়া নিতেছে?

ভগবানের নিগূঢ় উদ্দেশ্য যদি কিছু থাকিয়া থাকে, তাহা জানিবার  
 উপায় কই? এযাবৎ কোন স্পষ্ট নির্দেশ তো তিনি পান নাই।  
 এক্ষেত্রে বিদেশ গমনের পরিকল্পনা স্থগিত রাখাই সমীচীন। ভক্ত ও  
 বজ্রবান্ধবদের এ সিদ্ধান্ত তখন জানাইয়া দিলেন। সংগৃহীত চাঁদার  
 অর্থ দরিদ্রের মধ্যে বিতরণ করিয়া দেওয়া হইল।

কিন্তু মাজাজের তত্ত্ব শিষ্যেরা দমিবার পাত্র নন। কিছুদিন পরেই তাঁহাদের উত্তম ও হৈ-চৈ আবার শুরু হয়। তাঁহাদের উৎসাহের স্রোতে পড়িয়া স্বামীজীও আবার ভাবিতে বসেন। ঠাকুর সশরীরে নাই, তাঁহার নির্দেশ পাইবার আশা আর কোথায়? কিন্তু শ্রীমা তো রহিয়াছেন। তিনি তো তাঁহারই অংশস্বরূপিণী। মায়ের অনুমতি চাহিয়া পাঠাইলেই তো সব সমস্তার সমাধান হয়? স্থির করিলেন, তাঁহার নির্দেশ চাহিয়া এখনি পত্র দিবেন। ইতিমধ্যে সেদিন এক অসৌক্যিক কাণ্ড ঘটয়া গেল।

স্বামীজী রাত্রে শয়ন করিয়া আছেন, ঘুম আসিতেছে না। এমন সময়ে হঠাৎ এক অতীন্দ্রিয় দৃশ্য উদ্ঘাটিত হয় তাঁহার নয়ন সমক্ষে। দেখেন, শ্রীরামকৃষ্ণের জ্যোতিষ্মন দিব্যমূর্তি ভারত সাগরের তীর হইতে দেশান্তর অভিযুখে যাত্রা করিয়াছে। সোজাসুজি সমুদ্রের উপর দিয়া ঠাকুর অপর পারে চলিয়াছেন, সঙ্গে সঙ্গে স্বামীজীকেও আদেশ দিতেছেন তাঁহাকে অনুসরণ করার জন্ত। বিস্মিত স্বামীজী শয্যায় উঠিয়া বসিলেন। তবে কি এটাই ঠাকুরের অভিপ্রেত? ঠাকুরের অক্ষুট ধ্বনি তখনও তাঁহার কানে বাজিয়া চলিয়াছে—“আয়, আয়।” তবে দ্বিধা-দ্বন্দ্বের অবকাশ আর কোথায়?

অবিলম্বে স্বামীজী সারদা দেবীকেও একখানা পত্র লিখিলেন। তখন আর মতামত চাওয়া নয়, ঠাকুরের নির্দেশে সঙ্কল্প তিনি স্থিরই করিয়াছেন। এবার মাতা ঠাকুরাণীর আশীর্ব্বাদটি তাঁহার চাই।

লিখিলেন, “মাগো, মহাবীর যেমন রামনাম স্মরণ করিয়া সমুদ্রের উপর দিয়া লক্ষ প্রদান করিয়াছিলেন, আমিও তেমনি শ্রীশ্রীঠাকুরের নাম লইয়া সমুদ্রের পরপারে চলিলাম।”

নরেন অনেকদিন হয় একলা নানা স্থান ঘুরিতেছেন, সারদামণি বেশ কিছুদিন তাঁহার সংবাদ পান নাই। পত্র পাইয়া তাঁহার আনন্দের আর সীমা রহিল না। নরেন তাঁহার দৃষ্টিতে শুধু ঠাকুরের প্রধান শিষ্যই নয়—এই শিষ্যের মাধ্যমে ঠাকুর একটা বড় ঐশীকাজ সম্পন্ন

করিবেন ইহাও সারদা দেবী মনে প্রাণে জানেন। ঠাকুরের মরদেহ ত্যাগ করার পর অলৌকিক অনুভূতির মধ্য দিয়া এ তত্ত্বটি তাঁহার কাছে পরিস্ফুট হইয়া উঠিয়াছিল। একদিন স্বচক্ষে দেখিয়াছিলেন— ঠাকুরের জ্যোতির্ময় সূক্ষ্ম দেহ ধীরে ধীরে নরেনের দেহে প্রবেশ করিতেছে। ঠাকুর একদিন নরেনের দেহের মাধ্যমেই তাঁহার মহা-লীলার বিস্তার সাধন করিবেন, এ বিশ্বাস এখনো তাঁহার আছে।

আজ সেই নরেন ঠাকুরের কর্ণযজ্ঞের ঋদ্ধিক রূপে পাশ্চাত্যদেশে যাইতে অনুমতি চাহিতেছে। আর এই সম্বন্ধে প্রত্যাদেশও যে ইতিমধ্যে শ্রীমা প্রাপ্ত হইয়াছেন! তিনিও ধ্যানবেশে দেখিয়াছেন,— সমুদ্র তরঙ্গের উপর দিয়া ঠাকুর অগ্রসরমান, আর নরেন্দ্র তাঁহার অনুগামী। নরেনকে তাঁহার নিজের এই অলৌকিক দর্শনের কথা জানাইয়া তিনিও তখনই পত্র দিলেন। জানাইলেন অন্তরের পরিপূর্ণ আশীর্ব্বাদ।

স্বামীজী তাঁহার ভক্ত শিষ্যদের আহ্বান করিলেন, সানন্দে কহিলেন, “আমেরিকায় যেতে এবার আমি সম্পূর্ণরূপে প্রস্তুত। আমার আশীর্ব্বাদ আমি পেয়ে গেছি!”

মাদ্রাজের ভক্তদের উৎসাহ এবং স্বামীজীর শিষ্য খেতড়ি-রাজের<sup>১</sup> ধানুকুল্যে স্বামীজীর যাত্রার বন্দোবস্ত সম্পূর্ণ হইল।

১৮৯৩ সালের ৩৩শে মে তারিখ। বোম্বাই হইতে জাহাজে গনি জম্মভূমি ত্যাগ করিলেন। পরিধানে রঙীন রেশমী আংরাখা ও ক্ষীৰ। পরিচয়ের জন্তু থাকিল নূতন একটি নাম—স্বামী বিবেকানন্দ।

শ্রীরামকৃষ্ণের দেহান্তের পর শিষ্যেরা আঁটপূরে বিরজা হোম করিয়া নেন। এই সময়ে নরেন্দ্রনাথের নাম হয় - বিবিদিষানন্দ।

ও ভারতের অগ্রাগ্রা অঞ্চলে পরিব্রাজন কালে স্বামীজী রাজ নানা সময়ে নানা নাম গ্রহণ করিতেন। এবার বিদেশে

যাওয়ার প্রাক্কালে কি নাম নিবেন ভাবিতেছিলেন। প্রিয় শিষ্য খেতড়ি-রাজ বলিলেন, “স্বামীজী আপনি জগতের বিবেক উন্মেষ করার জন্য তৈরী হচ্ছেন—আপনার এবাবকার নাম হোক, বিবেকানন্দ।”<sup>১</sup>

সিকাগোতে তখন বিশ্ব-মেলার অবিবেশন বসিয়াছে। এইখানেই বিশ্ব-ধর্মসভা বসিবার কথা। সেখানে পৌঁছিয়া খরখর করার পর তো স্বামীজীর চক্ষুস্থির। প্রতিনিধি নির্বাচনের শেষ তারিখ গত হইয়াছে। তাছাড়া, তখন জুলাই মাস—সেপ্টেম্বরের আগে ধর্মসভার অবিবেশনও বসিবে না। তিনি নিজে বা তাঁহার উৎসাহী ভক্তেরা কেহই আগে হইতে এ বিষয়ে সংবাদ সংগ্রহ করার প্রয়োজন বোধ করেন নাই। আগামী কয়েক মাসের ব্যয় নির্বাহ কি করিয়া হইবে তাহাই এক বড় সমস্যা।

আমেরিকায় পদার্পণ করিবার সময় তাঁহার নিকট মাত্র ১৭৯ পাউণ্ড অবশিষ্ট ছিল। সামান্য পুঁজি, আর দেশটিও ব্যয়বহুল। অর্থ যা কিছু ছিল তাড়াতাড়ি ফুরাইয়া আসিতেছে। সম্মুখে মার্কিন দেশের নিদারুণ শীত। পর্যাপ্ত শীতবস্ত্রও তিনি সঙ্গে আনেন নাই। এই দেশ ভারত নয়, জড়বাদী ডলার পূজারীদের দেশ। এখানে সন্ন্যাসীর ভিক্ষা মিলে না—স্বামীজী বিষম বিপদে পড়িলেন।

কিছু এ অবস্থায় হাল ছাড়িবার পাত্রও তিনি নহেন। খরচ কমানোর জন্য কিছুদিন সিকাগো ছাড়িয়া বোস্টন শহরে গিয়া বাস করিতে থাকেন। এই সময়েই থাকস্মিকভাবে হার্ভার্ড বিশ্ব-বিদ্যালয়ের গ্রীক ভাষার অধ্যাপক মিঃ রাইটের সহিত তাঁহার পরিচয় হয়। স্বামীজীর লোকোত্তর প্রতিভা ও বিদ্যাবস্তা দর্শনে অধ্যাপক তো বিমুগ্ধ। সোৎসাহে তখনি তাঁহাকে ধর্মসভায় গ্রহণ করিতে তিনি উদ্যোগী হইলেন।

হিন্দুধর্মের প্রতিনিধিত্ব করার কোন নিদর্শনপত্র স্বামীজীর কাছে নাই, একথা রাইট সাহেবকে তিনি জানাইলেন। সুবিজ্ঞ অধ্যাপক তৎক্ষণাৎ উত্তর দিলেন, “স্বামীজী, আপনার কাছে এই নিদর্শন চাওয়া, আর সূর্য্যকে তার কিরণ দেবার অধিকার সম্বন্ধে প্রশ্ন করা—একই কথা।”

ধর্মসভার প্রতিনিধি যে সংস্থা নির্বাচন করেন তার সভাপতি ছিলেন মিঃ রাইটের বন্ধু। স্বামীজীর পরিচয়পত্রে তিনি সেই বন্ধুকে লিখিলেন, “ইনি এমনি একজন মনোবী যে, আমাদের বিশ্ব-বিদ্যালয়গুলির সব ক’টি বিজ্ঞ অধ্যাপকের বিজ্ঞা একত্র করলেও তা এর পাণ্ডিত্যের সমতুল হয় না।”

স্বামীজীর অর্থাতাব রহিয়াছে বুঝিতে পারিয়া সহৃদয় অধ্যাপক তাঁহাকে সিকাগো স্টেশনের একখানি টিকেট আর মেলা অভ্যর্থনা কমিটির নামে একটি পরিচয়পত্র দিয়া রওনা করিয়া দেন।

কিন্তু স্বামীজীর পরীক্ষার যেন আর শেষ নাই। সিকাগো শহরে পৌঁছিয়া দেখেন, মেলা স্থানের ঠিকানাটি তিনি হারাইয়া ফেলিয়াছেন। শীতের রাত্রি ঘনাইয়া আসিয়াছে, এ অপরিচিত স্থানে আশ্রয় পাইবারও কোন সম্ভাবনা নাই।

ধনী লোকের দরজায় গেলেই পরিচারকের! তাঁহাকে নিগ্রো ভাবিয়া দ্বার রুদ্ধ করিতেছে। রাত্রির জগু মাথা গুঁজিবার একটা স্থানও মিলিতেছে না। অনশ্রোপায় হইয়া সে রাত্রির মত স্টেশনের এক খালি প্যাকিং বাগ্গের ভিতরে আশ্রয় নিতে হয়। পরদিন প্রভাতে ক্ষুধার্ত হইয়া দুই এক স্থানে ভিক্ষার চেষ্টা করেন। কিন্তু সে দেশে ভিক্ষা দিবার রীতি নাই। প্রাপ্ত ক্লান্ত মলিন বেশধারী এই বিদেশীকে বহু ধনী গৃহস্থই তাড়াইয়া দেয়। এক বর্ষায়সী মহিলা ঘরের জানালা দিয়া দেখিতে পান নিরাশ্রয় বিদেশী তরুণ অর্থের জগু ঘোরাঘুরি করিতেছেন, কিন্তু কোথাও কিছু মিলিতেছে না। মনে তাঁহার জাগিয়া উঠিল সহানুভূতি। তখনি নীচে নামিয়া

আসিয়া স্বামীজীকে দোর খুলিয়া দিলেন—দিলেন আহার ও আশ্রয়। এই মহিলার নাম মিসেস হেইল।

স্বামীজী সুস্থ হইলে এই সহৃদয়্য মহিলা তাঁহাকে ধর্ম্মমেলায় পৌছাইয়া দিলেন। পরম কারুণিক ঠাকুরের কৃপাদৃষ্টি তাঁহার উপর সতত নিবন্ধ রহিয়াছে, অনেকবারের মত এবারও স্বামীজী এই ঘটনায় তাহা উপলব্ধি করিলেন।

১৮৯৩ সালের ১১ই সেপ্টেম্বর। সিকাগোর আর্ট ইনষ্টিটিউটের প্রাসাদোপম ভবনে সাড়ম্বরে বিশ্বধর্ম্ম মহাসম্মেলন আরম্ভ হইয়াছে। কাউন্সিল গিবন্সকে কেন্দ্র করিয়া সারা পৃথিবীর ধর্ম্মপ্রতিনিধিরা উপস্থিত। জ্যোতাদের মধ্যে রহিয়াছেন ইউরোপ আমেরিকার বহু মনোবী, অধ্যাপক ও শ্রেষ্ঠ নাগরিক।

তরুণ সন্ন্যাসী স্বামী বিবেকানন্দ মঞ্চোপরি উপবিষ্ট। গৈরিক রঙে রঞ্জিত রেশমী আংরাখা ও উষ্ণীষে ভূষিত এই হিন্দু প্রতিনিধির আকর্ষণ যেন সবাইকে ছাড়াইয়া গিয়াছে। সুন্দর স্মৃঠাম দেহ, চোখে মুখে প্রাতিভার দীপ্তি। আভিজাত্য ও আত্মপ্রত্যয়ে ভরা এই সন্ন্যাসী যেন এক স্বতন্ত্র পুরুষ। দৃপ্তভঙ্গী ও তেজ দেখিয়া মনে হয়, আদর্শবাদ ও ধর্ম্মের ক্ষেত্রে ইনি যেন এক হৃদ্বর্ষ ক্রান্তিহীন যোদ্ধা—চিহ্নিত অধিনায়ক।

স্বামীজীকে তাঁহার জীবনে এমন গুরুগম্ভীর, এমন গুরুত্বপূর্ণ বক্তৃতা মঞ্চে কখনও দাঁড়াইতে হয় নাই। পাশ্চাত্য সমাজের শ্রেষ্ঠ দার্শনিক ও ধর্ম্ম-নেতাগণ ইহাতে ভাষণ দিতেছেন। নিজ নিজ সম্প্রদায়ের মতবাদ তাঁহার অগূর্ব্ব পাণ্ডিত্য ও বাগ্মিতার সহিত বিশ্লেষণ করিতেছেন। স্বামী বিবেকানন্দকেও তাঁহার ধর্ম্মের তত্ত্ব, পৃথিবীর প্রাচীনতম ও বৃহত্তম ধর্ম্মের তত্ত্ব জানাইতে হইবে—এবং এখনই তাহা জানাইতে হইবে। অসংখ্য প্রতিনিধিদের মত পূর্ব্ব

হইতে কোন কিছু লিখিয়া বা তৈরী হইয়াও তিনি আসেন নাই। পৃথিবীর শ্রেষ্ঠ ধর্ম্মাধিবেশনের সভামঞ্চে বসিয়া এই ত্রিশ বৎসর বয়স্ক ছুঃসাহসী যুবকের হৃদয় আজ যেন হঠাৎ কাঁপিয়া উঠিল।

এবার স্বামী বিবেকানন্দের ভাষণের পালা। সভাপতি আহ্বান জানাইলেন তাঁহাকে। স্বামীজী কিন্তু এড়াইয়া গেলেন, কহিলেন, ইহার পরে তিনি বক্তৃতা করিবেন। কিছুক্ষণ পরে আবার তাঁহার ডাক পড়ে, ঘণ্টা বাজাইয়া তাঁহাকে ডাকা হয়। কিন্তু এবারও বিবেকানন্দ উত্তর দিলেন—এখন নয়। সভাপতি আর তাঁহাকে এড়াইতে দিতে রাজী নন। দৃঢ়স্বরে বলিয়া বসিলেন, ইহাই এই প্রতিনিধির বক্তৃতা প্রদানের শেষ সুযোগ। কি আর করা যায়, স্বামীজীকে এইবার উঠিয়া দাঁড়াইতে হয়।

ইষ্টনাম গ্রহণ করিয়া সমবেত নরনারীকে তিনি আহ্বান জানাইলেন, “আমেরিকাবাসী ভগ্নি ও ভ্রাতৃবৃন্দ !” মুহূর্ত্ত মধ্যে যেন এক ইন্দ্রজাল ঘটিয়া যায়। এই আহ্বানের আন্তরিকতা অভিভূত করিয়া ফেলে সভার প্রতিনিধি ও দর্শকদের। যুবক সন্ন্যাসীর অভিনন্দন আর শ্রোতাদের করতালি ধ্বনি যেন থামিতে চাহে না। শত শত লোক উঠিয়া দাঁড়াইয়া জানায় বিপুল সম্বর্দ্ধনা।

ক্ষণকাল মধ্যেই স্বামীজীর আত্মবিস্মৃতি কাটিয়া গেল। বুঝিলেন, এই অভিনন্দন ও এই স্বীকৃতি শ্রীরামকৃষ্ণেরই ইচ্ছায়। জগজ্জননী আত্মশক্তির এ এক নিগূঢ় লীলা। এ লীলারই ক্রৌড়নক হিসাবে আজ তিনি এখানে দণ্ডায়মান। স্বভাবসিদ্ধ সাহস ও নেতৃত্ব ফিরিয়া পাইতে স্বামীজীর বিলম্ব হইল না। অতঃপর হৃদয়ের অনর্গল উৎস হইতে বহিতে থাকে তাঁহার চাঞ্চল্যকর ভাষণ।

অমোঘ শক্তিমন্তায় মগ্নিত হইয়া স্বামীজী সেদিন ধর্ম্ম-সভার চিন্তা জয় করিলেন। সমগ্র পৃথিবীর ধর্ম্মপ্রচারক ও দার্শনিকদের সমক্ষে ইহা যেন এক চাঞ্চল্যকর বিস্ফোরণ। শ্রোতাদের মধ্যে মার্কিন সমাজের বুদ্ধিজীবীর সংখ্যাই অধিক। ইহাদেরই স্বীকৃতির



মধ্য দিয়া মার্কিন দেশের সম্মুখে সেদিন ফুটিয়া উঠিল বিবেকানন্দের ভাস্বর মূর্তি। বেদান্তধৃত সনাতন হিন্দুধর্মের সংবাহকরূপে পাশ্চাত্য দেশের প্রাণ-কেন্দ্রে ঘটিল তাঁহার অভ্যুদয়। এক বিরাট সম্ভাবনা সূচিত হইল ইহার মাধ্যমে।

রামকৃষ্ণ-বিবেকানন্দের লীলা-জীবনে সেদিনকার এই ঘটনাটি ছিল বড়ই তাৎপর্যপূর্ণ। রামকৃষ্ণ ছিলেন সচ্চিদানন্দ সাগরবিহারী এক রাজহংস। ধ্যানময় প্রশান্ত মহাকারণে তাঁহার সত্তা সদা ভাসমান। আর বিবেকানন্দ সেই রাজহংসেরই পক্ষ-বিধূনন। ধর্ম-মহাসভার সেদিনকার এই আলোড়ন—গতি-চঞ্চলতা কি এই পক্ষ বিধূননেরই প্রথম প্রতিক্রিয়া ?<sup>১</sup>

বিবেকানন্দ তাঁহার আনন্দচঞ্চল শ্রোতাদের নিকট ঘোষণা করিলেন, “পৃথিবীর প্রাচীনতম সন্ন্যাসীসঙ্ঘের পক্ষ থেকে আমি আজ আপনাদের সাধুবাদ জানাচ্ছি। সর্বধর্মের জননী-স্বরূপা সনাতন ধর্মের প্রতিনিধিরূপে, সকল জাতীর সকল মতের কোটি কোটি হিন্দুর পক্ষ থেকে আপনারা গ্রহণ করুন আমার আন্তরিক ধন্যবাদ।”

সনাতন ধর্মের সমন্বয়কারী রূপটি উদ্ঘাটন করিয়া তিনি আরও বলেন, “যে ধর্ম সমগ্র জগৎকে পরমতসহিষ্ণুতা এবং সকল মতের সর্বজনীন স্বীকৃতি শিক্ষা দিয়েছে, আমি সেই ধর্মভূক্ত বলে গৌরব করে থাকি। আমরা কেবল সর্বজনীন পরমতসহিষ্ণুতায়ই বিশ্বাসী নই, আমরা সকল ধর্মকেই সত্য বলে বিশ্বাস করি। যে জাতি পৃথিবীর সর্বদেশের উৎপীড়িত ও আশ্রয়প্রার্থীদের জাতিবর্ণ নির্বিশেষে আশ্রয় দিয়েছে, আমি সেই জাতির অন্যতম মানুষ বলে মনে মনে গর্বিত। আমি আপনাদের গর্বের সঙ্গে বলবো, যে বৎসর রোমানরা ইহুদীদের পবিত্র দেবালয়গুলো ধ্বংস করে কেলে, সেই বৎসর হতাবশিষ্ট ইসরাইল বংশীয়দের আমরাই দক্ষিণ ভারতবর্ষে

স্থান দিয়েছিলাম। যে ধর্ম জরথুষ্ট্রপন্থী মহান পারসীক জাতির অবশিষ্টাংশকে আশ্রয় দিয়েছে, অত্যাধি লালন-পালন করছে, আমি সেই ধর্মভূক্ত বলে গৌরব বোধ করছি।”

ধর্ম-মহাসভার বিরাট কক্ষ প্রতিধ্বনিত করিয়া স্বামীজীর উদাস্তকণ্ঠে নির্গত হইল সেই পবিত্র শ্লোক। অগণিত ভারতবাসী শৈশবকাল হইতে যাহা আবৃত্তি করে—

রুচীনাং বৈচিত্র্যাদ্ভুতকুটিল

নানাপথ জুযাং।

নৃণামেকো গম্যন্তমসি

পয়সামৰ্ণব ইব ॥

—নদ-নদী সকল যেমন নানা ধারায় নানা পথে সাগর অভিযুগে বহিয়া যায়, তেমনি রুচির বৈচিত্র্যাহেতু, সরল ও কুটিল নানা পথগামী মানব-ধারার, হে প্রভো, তুমিই একমাত্র গন্তব্যস্থল।

গীতা-প্রচারিত মহান সত্যের কথাও তিনি শুনাইলেন। পুরুষোত্তম বলিয়া গিয়াছেন—যে আমাকে যেভাবে উপাসনা করে, আমি তাহার নিকট সেই ভাবেই প্রকাশিত হই। হে পার্থ, মহুগুণ সর্বতোভাবে আমার নির্দিষ্ট পথেই চলিয়া থাকে।

ভারতধর্মের মূল সুরটি ব্যাখ্যা করার পর ধর্মসভার সম্মুখে অপরূপ আশার বাণীও তিনি ধ্বনিত করিলেন “সাম্প্রদায়িকতা, গোড়ামী ও ধর্মাক্রতার মৃত্যুকাল আসন্ন। আমি সর্বাঙ্গকরণে ভরসা করি, এই মহাসমিতির উদ্বোধনে আজ প্রভাতে যে ঘণ্টাধ্বনি বেজে উঠলো তা ধর্মোন্নতির মৃত্যুবর্তী জগতে ঘোষণা করুক। একই চরম লক্ষ্যে মানব জাতি আজ এগিয়ে চলেছে, এবার তার ভেতরকার পারস্পরিক সন্দেহ ও অবিশ্বাস দূর হোক, তরবারি বা লেখনীর দ্বারা পরপীড়নের দুর্মতির ঘটুক অবসান!”

মনীষী রম্যা রল্যান্ড ভাষায় - সম্মেলনের অপর বক্তারাও প্রত্যেকেই ভগবানের কথাই বলিয়াছিলেন—কিন্তু সে ভগবান

ছিলেন তাঁহাদের স্ব-সম্প্রদায়ের ভগবান। কিন্তু বিবেকানন্দ—একা বিবেকানন্দ সকলের ভগবানের কথা বলিলেন, সকলের ভগবানকে বিশ্বসত্তায় মিলাইয়া দিলেন। ইহা ছিল রামকৃষ্ণেরই উষ্ণ নিশ্বাস, যাহা সমস্ত বাধা-বিলম্ব অতিক্রম করিয়া আজ তাঁহার শ্রেষ্ঠ শিষ্যের মাধ্যমে উদ্গত হইল। আর বিশ্বধর্ম সম্মেলন এই তরুণ সন্ন্যাসীকে জ্ঞাপন করিল তাহার স্বতোৎসারিত অভিনন্দন।

ইহার পর স্বামীজীকে প্রায় দশ বারটি বক্তৃতা এই সম্মেলনে দিতে হয়। মুক্তি, প্রেরণা এবং আদর্শবাদিতার শক্তিতে তাহা অমোঘরূপে আত্মপ্রকাশ করে। সম্মেলনের সদস্যদের ডিঙাইয়া তাঁহার প্রচারিত শাস্ত্র সত্যের মহাবার্তা অবিলম্বে জনচিহ্ন আলোড়িত করিয়া তুলে। বিশ্বধর্ম মহাসভার প্রখ্যাত মনীষী ও জনসাধারণ, একযোগে উভয়ের চিত্ত স্বামী বিবেকানন্দ অবলীলায় অধিকার করিয়া বসেন। এই বিবেকানন্দ কিন্তু তাঁহারই শিষ্য যিনি ব্যবহারিক শিক্ষার কোন ধারই ধারিতেন না, নিজ নাম দস্তখত করিতে গিয়া লিখিতেন ‘রামকেষ্ট।’ স্বামীজীর সর্বকর্মের প্রচলন নিয়ামক সেই শ্রীরামকৃষ্ণ। শ্রীরামকৃষ্ণেরই তিনি যেন এক ক্ষুদ্র জাতিদণ্ড। জাতিদণ্ডধারী ঠাকুর সেদিন বুঝি বা সবার অলক্ষ্যে মিটি মিটি হাসিতে ছিলেন।

মাকিন সংবাদপত্রগুলি স্বীকার করিয়া নেয়, স্বামী বিবেকানন্দ নিঃসন্দেহে ধর্মমেলার শ্রেষ্ঠ ব্যক্তিত্ব। নিউইয়র্ক হেরাল্ড এই সময়ে লিখে, “ইহার বক্তৃতা শুনিবার পর মনে হইবে, ভারতবর্ষের জাতি জ্ঞানৈশ্বর্যমণ্ডিত দেশে আমাদের দেশের ধর্মপ্রচারক প্রেরণ করা নির্বুদ্ধিতার কাজ।”

মাকিন দেশের মনীষী, সমাজনেতা ও ধনকুবেরগণ স্বামীজীর প্রজ্ঞা পাণ্ডিত্য ও ব্যক্তিত্বে একেবারে মুগ্ধ হইয়া গেলেন। তাঁহার এই

জনপ্রিয়তাকে ধর্মসম্মেলনের সভাপতিও তাঁহার কাজে লাগাইতে ছাড়িতেন না। নীরস তত্ত্বাসৌচনার আসরে যখন শ্রোতাদের ধৈর্য্যচ্যুতি ঘটিতে থাকিত তিনি তখন ঘোষণা করিতেন, অধিবেশনের শেষের দিকে স্বামী বিবেকানন্দ তাঁহার ভাষণ দিবেন। জনমণ্ডলী অমনি আগ্রহী হইয়া উঠিত, স্বামীজীর বক্তৃতা শোনার আকর্ষণে ধৈর্য্য ধরিয়া বক্তার পর ঘণ্টা অপেক্ষা করিত।

স্বামীজীর ভক্ত ও অনুরাগী পাশ্চাত্য দেশীয় চরিতকারেরা লিখিয়া গিয়াছেন, “সিকাগোর বিরাট ধর্ম-মহাসভায় স্বামীজী যে মহাসভা প্রচার করেন, যে বিশ্বয়কর আশার বাণী শ্রবণ করান, খ্রীষ্টের পর আর কোন প্রাচ্যবাসীর মুখ থেকে পাশ্চাত্য দেশ তেমন কথা শ্রবণ করে নাই। তাঁর ভাবরাশি চিরদিন পাশ্চাত্যের ধর্মোন্নতি ও ধর্ম বিস্তারের সহায়করূপে গণ্য হবে, গৃহীত হবে জগতের ভবিষ্যৎ অধ্যাত্মজ্ঞানের প্রধান অবলম্বনরূপে।”<sup>১</sup>

শুধু মাত্র কয়েকটি প্রাণস্পর্শী বক্তৃতা এবং ব্যক্তিত্বের বলে জন-মানসের এমন দিগ্বিজয় পৃথিবীতে খুব কমই দেখা গিয়াছে।

এই অপ্রত্যাশিত সম্মান ও খ্যাতির প্লাবন স্বামীজীর অন্তরে সেদিন কিরূপ প্রতিক্রিয়ার সৃষ্টি করে? প্রসিদ্ধ সংবাদপত্রগুলির স্তম্ভে স্তম্ভে তখন তরুণ হিন্দু সন্ন্যাসীর বিজয়গাথা। এই জয়গৌরব কিন্তু স্বামীজীর হৃদয়কে ভিতরে ভিতরে ভারাক্রান্ত করিয়া তোলে। ভাবিতে থাকেন, খ্যাতির একি বিড়ম্বনা আজ শুরু হইয়াছে তাঁহার জীবনে? ত্যাগী এবং একান্তচারী সন্ন্যাসী জীবনে মুক্ত বিহঙ্গের মত তিনি ছিলেন স্বাধীন, স্বতন্ত্র। সে জীবন কি আর ফিরিয়া পাইবেন না? তপস্শ্রাম্য জীবন, ঈশ্বরধৃত জীবন—তাঁহারও ঘটিতেছে অবসান। আশঙ্কা আসে অন্তরে। আমেরিকায় আসিয়া এ যাবৎ পদে পদে দারিদ্র্য ও প্রত্যাখ্যানের সহিত তাঁহাকে যুঝিতে হইয়াছে—এইবার বুঝি ঐশ্বর্য্যের প্রাচুর্য্য তাঁহাকে গ্রাস করিতে চায়।

স্বামীজী রাতারাতি সমগ্র মার্কিন দেশে প্রসিদ্ধ হইয়া উঠিয়াছেন। কোটিপতি গুণগ্রাহিগণ তাঁহার যে কোন আজ্ঞা নিমেষে পালন করিতে সমুৎসুক। এক রাত্রে এক ধনী প্রাসাদে তিনি আতিথ্য গ্রহণ করিয়াছেন। চারিদিকে বিলাসের প্রাচুর্য্য। রসনাতৃপ্তিকর ভোজ্যভব্যের অবধি নাই। ভোজন ও আপ্যায়ন শেষে সুকোমল শয্যায় শয়ন করিলেন। কিন্তু ঘুম আসিল না। এই বিলাস বৈভবের পরিবেশে তাঁহার হৃৎখনি জগন্মুমির স্মৃতি বৃষ্টিচকের মত দংশন করিয়া উঠিল। নিরল্প শিক্ষা-দীক্ষাহীন কোটি কোটি দেশবাসীর হৃৎখে তিনি মুহুমান হইলেন। সমস্ত রাত্রি ভূতলে শয়ন করিয়া রহিলেন, নিদ্রা আসিল না।

স্বামী বিবেকানন্দের ব্যক্তিত্ব ও বাগ্মিতা তখন সম্মোহনের কাজ করিতেছে। এই সময়ে এক গুণগ্রাহিনী ধনাঢ্য তরুণী স্বামীজীকে নিবেদন করিতে চায় তাঁহার বিস্ত-বিষয় ও রূপযোবন। প্রশান্ত কণ্ঠে তিনি উত্তর দেন, “আমার কাছে এমনতর প্রস্তাব করতে নেই। আমি যে সন্ন্যাসী! নিখিল বিশ্বের সমস্ত নারীই যে আমার—মা।”

আমেরিকার বহুতা প্রতিষ্ঠানগুলির মধ্য দিয়া স্বামীজী যেন ঝটিকাবেগে বিভিন্ন অঞ্চলে নিপতিত হইতে থাকেন। বেদান্ত ও মানবধর্মের শাস্তরূপ ফুটিয়া উঠে তাঁহার শক্তিদৃপ্ত ভাষণে। সংবাদপত্রে তাঁহাকে অভিহিত করা হয় ‘সাইক্লোনিক হিন্দু’ নামে।

গৌতম বুদ্ধের আড়াই হাজার বৎসর পরে ভারত বহির্দেশে এই তাহার প্রথম প্রচারক ও বাণীবাহককে প্রেরণ করিয়াছে। প্রতীচ্য সভ্যতার অগ্রদূত মার্কিনদেশে তাঁহার সেই বাণী এবার কান পাতিয়া শুনিল।

পৃথিবীর প্রাচীনতম সভ্যতা স্বামী বিবেকানন্দের মাধ্যমে তাহার সভ্যাবিকারের অপূর্ব উপহার লইয়া আজ পশ্চিমের দ্বারে উপস্থিত।

আর সেই বিবেকানন্দ হইতেছেন শ্রীরামকৃষ্ণের সম্ভান—শ্রীরাম-কৃষ্ণেরই অধ্যাত্মসত্তার তিনি প্রাণময় প্রকাশ। এই শক্তিদ্বার দৃতকে সহসা ফিরাইয়া দিবার উপায় কই ?

প্রতীচ্য সভ্যতার মধ্যকেন্দ্র, আমেরিকা তাই বিবেকানন্দকে গ্রহণ করিল। শুধু তাঁহার বাগ্মিতার মধ্য দিয়া নয়—ব্যক্তিগত, সত্যনিষ্ঠা ও ত্যাগধৃত জীবনের প্রতি অন্ধাধিত হইয়াই তাঁহাকে গ্রহণ করিল।

ইহার জন্ম কিছুটা প্রাথমিক প্রস্তুতিও মার্কিন দেশের ছিল, একথা অস্বীকার করিবার যো নাই। বিবেকানন্দ ঊনবিংশ শতকের শেষ দশকে আমেরিকায় উপস্থিত হন। মার্কিন বুদ্ধিজীবীদের মধ্যে তখন যে মানসিকতা বর্তমান, তাহা তাঁহার ধর্ম-প্রচারের পক্ষে কিছুটা অনুকূলই ছিল। মনোবী এমার্সন এবং থোরো ইতিপূর্বে তাঁহাদের রচনায় ভারতীয় ব্রহ্মবাদ ও অতীন্দ্রিয় অনুভূতির সমর্থন জানাইয়া গিয়াছেন। খ্রিস্টিয়ান সায়েন্স-এর সমর্থকেরা ও কবি হুইটম্যানের আধ্যাত্মিকতাও যেন একশ্রু কিছুটা ভূমি প্রস্তুত করিয়া রাখিয়াছিল।

কবি হুইটম্যানের কবিতায় বুদ্ধি ভারতদূত বিবেকানন্দেরই আসন্ন পদধ্বনির ইঙ্গিত ফুটিয়া উঠিয়াছিল :

হে মোর নগরী.....

ঐ ছাখো, আমাদেরই দ্বারে

আসছে ঐ আদি-মাতা।

তাঁহার প্রথম কাকলী

শোনা গিয়েছিলো তাঁর নীড়ে,

আর, সমস্ত কাব্যের ছিল সে উৎস-মুখ

সুপ্রাচীন তাঁর বংশধারা.....

ঐ শোন, আসছে সে,

—ব্রহ্মের সন্ততি।”

আবার অপর দিকে দেখি, মার্কিন সমাজে সাধারণ মানুষ ভোগ-সর্বস্ব জীবনের পিছনে ছুটিয়া হইতেছে দিশাহারা, মানসিক ভারসাম্য সে হারাওয়া বসিয়াছে। এই উদ্ভ্রান্ত, শ্রান্ত ক্লান্ত মানুষদের সামনে স্বামীজী তুলিয়া ধরিলেন আত্মিক জীবনের আদর্শ, প্রচার করিলেন ভারত-আত্মার শাস্ত্র বাণী। রামকৃষ্ণের প্রত্যক্ষ অধ্যাত্ম-শক্তির স্পন্দনে তাহা প্রাণবন্ত, বিবেকানন্দের নিজের প্রত্যক্ষ দর্শন ও অমুভূতির প্রত্যয়ে তাহা প্রোজ্জ্বল—মস্ত্রচৈতন্যময়!

স্বামীজী তখন প্রচারের উৎসাহে মত্ত। প্রতি সপ্তাহে বার চৌদ্দটি করিয়া বক্তৃতা তাঁহাকে দিতে হয়। এক এক দিন শরীর ও মন ক্লান্তিতে নিস্তেজ হইয়া পড়ে। নূতন বক্তব্যও অনেক সময় যেন খুঁজিয়া পান না। ভয় হয়, তবে কি তাহার জ্ঞানের পুঞ্জি নিঃশেষিত? আবার এই সংশয় ও নৈরাশ্যের মুহূর্ত্তে হঠাৎ হৃদয়ে জাগিয়া উঠে অলৌকিক অমুভূতি, প্রত্যয় ও প্রাণের আবেগে উচ্ছল হইয়া উঠেন। এক এক দিন রাত্রে তন্দ্রাবেশে শুনিতে পান পরবর্ত্তী দিনের ভাষণটি কে যেন তাঁহার কানের কাছে পরিষ্কাররূপে বলিয়া যাইতেছে। পরের দিনের বক্তৃতায় এই অলৌকিক ভাষণের স্মৃতিই তাঁহাকে সাহায্য করিত।

বিবেকানন্দের চতুর্দিকে এবার আরো ভীড় জমিয়া উঠে। এ ভীড় মুমুকু, অধ্যাত্মপন্থী, সংশয়বাদী, আর অল্পস্বল্প-প্রিয় নরনারীর। সত্যানুরাগী তেজদগ্ধ সন্ন্যাসীর নিকট রবাহৃত জন-সংঘট্ট ভাল লাগে না। জনসভায় দাঁড়াইয়া প্রশ্ন করেন, 'খৃষ্টান বলে তোমরা পরিচয় দাও, কিন্তু খৃষ্টের আত্মার কি সম্মান তোমরা দিয়েছো? যীশু আবার যদি আসেন তাঁর শয়নের জন্ত একখণ্ড প্রস্তরও কি আজ তাঁর জুটেবে?

তীব্র কষাঘাতে পাজীদল ক্লেপিয়া যায়। শ্রোতাদের কাহারো কাহারো চৈতন্য সত্য সত্যই জাগিয়া উঠে, স্বামীজীর কাছে তাহার। করে আত্মসমর্পণ।

স্বাধীনচেতা স্বামীজী কিছুদিনের ভিতর বক্তৃতা-প্রতিষ্ঠানদের কবল হইতে নিজেকে মুক্ত করিয়া নিলেন। ইহার ফলে প্রচুর আর্থিক ক্ষতি হইল, কিন্তু তিনি তাহাতে দৃকপাত করিলেন না। ধনী বন্ধুরা তাঁহার কাজের জন্য এই সময়ে অজস্র অর্থ দিতে চান, কিন্তু সর্ব—তাঁহাদের অনুমোদিত সমাজ ছাড়া স্বামীজী অপর স্থানে মিশিতে পারিবেন না। ক্রুদ্ধ হইয়া তিনি বলিলেন, “শিব! শিব! কখনো দেখেছো কি, পৃথিবীর কোনও বিরাট কাজ ধনীরা করতে সক্ষম হয়েছে? হৃদয় আর মস্তিষ্কই সৃষ্টি করে—টাকার খলির সে ক্ষমতা নেই।”

গঠনমূলক কাজ এখন হইতে শুরু হয়। স্থির করেন, সত্যিকার মুক্তিকামী নরনারী যাহারা, ঘনিষ্ঠ সান্নিধ্যে থাকিয়া তাহাদের মধ্যে বিতরণ করিবেন তত্ত্ব উপদেশ। কয়েকজন দরিদ্র ভক্তের আর্থিক সহায়তা নিয়া কাজ আরম্ভ হয়।<sup>১</sup> নিউইয়র্কের এক সাধারণ অঞ্চলে গুটিকয়েক ঘর ভাড়া নেওয়া হয়। আসবাবপত্র-হীন কক্ষে পাশ্চাত্য ভক্তগণ পা মুড়িয়া ঘণ্টার পর ঘণ্টা বসিয়া থাকেন। স্থান সঙ্কুলান না হওয়ায় বহু লোক সিঁড়িতে বসিয়াও শোনেন তাঁহার ভাষণ ও বাখ্যা। কিছুদিন পরে, বেদান্ত শিক্ষার এই প্রতিষ্ঠানটি প্রশস্ততর ভবনে স্থানান্তরিত হয়।

এই সময়ে ধীরে ধীরে স্বামীজীর চারিদিকে আসিয়া জুটেন একদল বিশ্বস্ত ভক্ত ও কর্মী। ইহাদের মধ্যে উল্লেখযোগ্য—ম্যাডাম মেরী লুইস (স্বামী অভয়ানন্দ), ডাঃ স্মাগুসবার্গ (স্বামী কৃপানন্দ), মিসেস ওলি বুল, মিস ওয়াল্ডো গুডউইন, মিঃ লিগেট, মিস মেরী ফিলিপ, মিসেস আর্থার স্মিথ, মিসেস গুডউইয়ার, প্রভৃতি।

ইহাদের উপলক্ষ করিয়া স্বামীজী যে ভাষণ দেন তাহা হইতে সঙ্কলিত হয় তাঁহার রাজযোগ, জ্ঞানযোগ ও ভক্তিযোগ। এই গ্রন্থ কয়টি প্রকাশের পর পাশ্চাত্য সমাজে আলোড়ন পড়িয়া যায়।

১ মেরী লুই বার্ক : স্বামী বিবেকানন্দ ইন্ আমেরিকা



শিষ্য ও শিষ্যাদের শুধু প্রেরণা দিয়াই তিনি ক্লান্ত হইতেন না। আধ্যাত্মিক সাধনের পথে ইহাদের তিনি সতর্কভাবে পরিচালিত করিতেন। এই সময়ে বিবেকানন্দের জীবনে ঐশী শক্তির নানা প্রকাশ ঘটিতে দেখা যায়। সিস্টার ক্রিষ্টিনের স্মৃতিকথায় ইহার কিছু কিছু উল্লেখ রহিয়াছে। স্বামীজীর বিশ্বস্ত শিষ্য ও লিপিকার গুডউইন সম্পর্কিত এক ঘটনাতে ইহার প্রমাণ মিলে। একদিন গুডউইন জড়বাদের সমর্থন করিয়া স্বামীজীর সহিত তুমুল তর্ক জুড়িয়া দিয়াছেন। কিছুতেই বিতণ্ডার অবসান হইতেছে না। হঠাৎ স্বামীজীর মনশ্চক্ষে গুডউইনের অতীত জীবনের চিত্রগুলি একের পর এক ভাসিয়া উঠিতে থাকে। স্বামীজী সেই ঘটনাবলীর উল্লেখ করিয়া দৃঢ়স্বরে গুডউইনকে বলেন, “তুমি তো এই ধরণের জীবনই যাপন করে এসেছো? তোমার বুদ্ধিতে আর কত ধরবে, বল?”

অতীন্দ্রিয় শক্তির সাক্ষাৎ পরিচয়ে প্রচণ্ড ধাক্কা খাইলেন গুডউইন। জড়বাদ সমর্থন করিয়া যে গলাবাজী করিতেছিলেন, তখনি তাহা নীরব হইয়া পড়িল।

নিউইয়র্কে স্বামীজী তাঁহার স্থায়ী সংগঠন ‘বেদান্ত সমিতি’ স্থাপন করিলেন। বিশ্বস্ত কয়েকটি শিষ্য-শিষ্যার উপর কর্মভার হস্ত করিয়া অতঃপর তিনি প্রচার কার্যের জন্য উপনীত হন ইংল্যাণ্ডে। ইংল্যাণ্ড সতর্ক ও রক্ষণশীল দেশ। কিন্তু এখানেও স্বামীজীর ব্যক্তিত্ব যথেষ্ট আলোড়নের সৃষ্টি করে। বহু ইংরেজ সাধক স্বামীজীর উপদেশ নিয়া অধ্যাত্মপথে অগ্রসর হন।

স্বনামখ্যাত রাজনৈতিক নেতা ও মনীষী বিপিনচন্দ্র পাল ১৮৯৬ সালের ফেব্রুয়ারী মাসে ইংল্যাণ্ডে অবস্থান করিতেছিলেন। তাঁহার এক চিঠিতে সেখানকার সমাজে বিবেকানন্দের কর্মসাক্ষ্যের পরিচয় রহিয়াছে। তিনি লিখিয়াছেন, “আমি ইতিপূর্বে ‘দি ডেড পুলপিট’ নামক প্রবন্ধ থেকে ‘বিবেকানন্দ-ইজম’ সম্বন্ধে যে অংশটি উদ্ধৃত

১ সিস্টার ক্রিষ্টিন : আন্থাংলিশ্ ড রেমিনিসেন্স

করেছি, তা থেকেই আপনি অবগত হয়েছেন যে, বিবেকানন্দের প্রচারিত মতবাদের প্রসারহেতু বহুশত ব্যক্তি প্রকাশ্যভাবে খুঁটান চার্চের বন্ধন ছিন্ন করেছেন।...এছাড়া, আমি বহু শিক্ষিত ইংরেজ তত্ত্বলোককে দেখেছি যারা ভারতকে শ্রদ্ধা করতে শিখেছেন এবং ভারতীয় ধর্মমত ও আধ্যাত্মিক তত্ত্ব শ্রবণ করবার জন্য সততই আগ্রহ প্রকাশ করে থাকেন।”

ইংল্যাণ্ডে অধ্যাপক ম্যাক্সমুলার এবং জার্মানীতে দার্শনিক পল ডয়সনের সহিত স্বামীজীর গভীর সৌহার্দ্য স্থাপিত হয়। কিন্তু স্বামীজীর ইউরোপ ভ্রমণের শ্রেষ্ঠ ফল হইতেছে তাঁহার একদল একনিষ্ঠ ভক্তের আত্ম-নিবেদন। মিস মুলার, মিস নোবল ( ভগ্নি নিবেদিতা ) মি: স্টার্ডি ও সেভিয়ার দম্পতি ইহাদের অন্যতম। এই শিষ্য-শিষ্যাগণ স্বামীজী ও ভারতবর্ষের জন্য নিজ নিজ জীবন উৎসর্গ করিয়া ধন্য হন।

আমেরিকার রামকৃষ্ণ মিশন ও শিক্ষাকেন্দ্রের কাজ তখন দিন দিন বাড়িতেছে। প্রধান ভক্তেরা গুরুর পতাকা একান্ত নিষ্ঠায় বহন করিয়া চলিয়াছেন। কিন্তু বিবেকানন্দের সম্মুখে যেন নূতনতর জীবনের দৃশ্যপট খুলিয়া যাইতেছে। ভারতবর্ষের দুঃখ-দারিদ্র্য মোচনের জন্য, বিদেশ হইতে সাহায্য সংগ্রহের জন্য আমেরিকায় তাঁহার আগমন! কিন্তু উদ্দেশ্য তাঁহার তো সফল হয় নাই। দেশে তাই ফিরিতে তিনি এবার ইচ্ছুক। ভারতে বসিয়াই যে ভারতকে আজ বাঁচাইতে হইবে! রোগীর সঞ্জীবনী শক্তি রহিয়াছে তাহার অন্তঃসঞ্চারী প্রাণধারায়, সেই শক্তি দিয়াই তাকে উজ্জীবিত করিতে হইবে। বিবেকানন্দ এবার ভারত-ভূমির দিকেই দৃষ্টি ফিরাইলেন। কিন্তু সেই স্বভাব-যোদ্ধার অন্তরলোকে আজ যেন নূতনতর, নিগূঢ়তর জীবনের আশ্বাদ!

১৮৯৬ সালের ৬ই জুলাই তারিখে স্বামীজী তাঁহার ভক্ত মি: ক্লাফিস লেগেটকে এক পত্র লিখেন। তাঁহার জীবনধারার গুরুত্বপূর্ণ



ঐন্দ্রজালিক রামকৃষ্ণের জাহ্নদণ্ড দেশে ও বিদেশে নূতন নূতন দৃশ্যপট উন্মোচন করিয়া চলিয়াছে।

অগণিত দেশবাসী বিবেকানন্দের সম্বন্ধনায় সেদিন উন্মত্ত। স্কুল কলেজের ছাত্র আর দেশীয় রাজ-রাজড়া সবাই হাত মিলাইয়াছে, একযোগে টানিতেছে তাঁহার শোভাযাত্রার গাড়ী। সে এক অপূর্ব দৃশ্য। ধনী-নিধন রাজা প্রজা সকলেরই মধ্য দেখা দিয়াছে স্বতন্ত্র আনন্দ উচ্ছ্বাস। এই সন্ন্যাসী প্রতিনিধির জয়-গৌরবের পটভূমিকায় ভারতবাসী তাহার নিজের রূপ, নিজের পরিচয়, যেন নূতন করিয়া দেখিয়া নিতে চাহিতেছে। জাতীয় উল্লাস ও গর্বের যে বিস্ফোরণ সেদিন ঘটয়া গেল, তাহার মধ্য দিয়া আমাদের নব-জাগৃতির ইতিহাসে দেখা দিল এক নূতন পদক্ষেপ।

এই রাজোচিত সম্মান ও সম্বন্ধনার উত্তরে বিবেকানন্দ কহিলেন, “এ সম্বন্ধনা আমার নয়, আমার মধ্য দিয়া দেশবাসী আজ সম্বন্ধনা জানাইয়াছে ভারতের সন্ন্যাস-ধর্মকে, ভাগ্যপূত জীবনকে, আর নিজের অধ্যাত্মশক্তিকে।

রুগ্ন-ক্লান্ত দেহে তিনি স্বদেশে ফিরিয়াছেন—দীর্ঘ অবকাশ ও বিক্রাম এবার তাঁহার প্রয়োজন। কিন্তু যোদ্ধা সন্ন্যাসীর সত্যকার অবসর কোথায়? জীর্ণ অপটু দেহ নিয়াই কর্মশ্রোতে তাঁহাকে ঝাঁপাইয়া পড়িতে হইল। তাঁহার দেশই যে তাঁহার ঐশীত্র্যত উদ্‌যাপনের প্রধান ক্ষেত্র।

স্বামীজী চাহিয়াছিলেন, আমেরিকায় গিয়া ভারতের অধ্যাত্ম-সম্পদ সেখানে বিলাইবেন, পাশ্চাত্যের ভোগ সর্বস্ব জীবনের সম্মুখে তুলিয়া ধরিবেন আত্মিক জীবনের বার্তা। আর ইহার পরিবর্তে ব্যবহারিক জীবনে দক্ষ, বিস্তারিত মার্কিন সমাজ হইতে এদেশের জন্ত আনিবেন আর্থিক উন্নয়নের চাবিকাঠি। নিরলস মৃতকল্প জনগণকে বাঁচাইয়া তুলিবেন অন্নবস্ত্র ও প্রাণ-প্রাচুর্য্য দিয়া। সে উদ্দেশ্য তাঁহার ব্যর্থ হইয়াছে বটে, কিন্তু প্রকাণ্ড জয়-গৌরব নিয়া তিনি দেশে

ফিরিয়াছেন। পাশ্চাত্যদেশে অধ্যাত্ম-ভারতের জয়পতাকা তিনি প্রোথিত করিয়া আসিয়াছেন। ফলে জাতির লাভ হইয়াছে—দুইটি বিরাট বস্তু। একটি, নিদ্রিত ভারতের জাগরণ—অপরটি, ধর্ম-মহাসভার বিজয় ও পাশ্চাত্য ভ্রমণের মধ্য দিয়া আধুনিক ভারতের জনসমাজে বিবেকানন্দের নেতৃত্ব প্রতিষ্ঠা। পাশ্চাত্যের জয়মালা লাভের ফলে দেশের জনমানসের অধিকার অবলীলায় তাঁহার করায়ত্ত হইয়াছে। জাতির আশা ও আকাঙ্ক্ষা আজ তাঁহাতেই কেন্দ্রীভূত হইতে চাহিতেছে। আর এই কেন্দ্রস্থল হইতেই স্বামীজী তাঁহার অধ্যাত্মশক্তির উষ্ণ ধারাস্রোত সমগ্র সমাজ দেহে সঞ্চালিত করিলেন।

দেশকে জাগাইয়া তুলিতে, তাহার প্রাণশক্তির উদ্বোধন করিতে যে প্রয়াস এতদিন করিয়া আসিয়াছেন, তাহা কি এবার সার্থক হইবে? মহান হিমগিরির তুষার স্তূপ এবার তবে কি গলিয়া ঝরিয়া পড়িবে?

দেশবাসী উৎকর্ণ হইয়া বিবেকানন্দের বাণী শুনিল। এ বাণী ভারতাত্মার বাণী, রামকৃষ্ণের অধ্যাত্ম-সন্তানের বাণী—পাশ্চাত্যের ধর্মযুদ্ধের অভিজ্ঞতায় ইহা সমৃদ্ধ। ভারতবর্ষের প্রতি ধূলি-কণার প্রতি শ্রদ্ধায় ইহা ভরপুর, আধ্যাত্মিক ভারতের চেতনায় ইহা মহিমময়। আধুনিক ভারত এমন শক্তি-দৃপ্ত এমন উদ্দীপনাময় ভাষণ আর কখনও শুনে নাই।

স্বামীজী আহ্বান জানাইলেন, “হে আমার ভারত! জাগ্রত হও! কোথায় তোমার জীবনী শক্তি? সে শক্তি যে তোমারই প্রাণ্মায়া।”...প্রত্যেক ব্যক্তির মতই প্রত্যেক জাতির জীবনেও একটি করিয়া মূল সুর বর্তমান থাকে। ইহাই তাহার প্রধান ও কেন্দ্রীয় সুর, ইহাকে কেন্দ্র করিয়াই গড়িয়া উঠে তাহার মহান জীবনের একতান। ভারতবর্ষের এই মূল সুর রহিয়াছে তাঁহার অধ্যাত্ম-সত্যায়। ইহাকেই ধারণ করিয়া জাতির পুনরুজ্জীবন সাধনের নির্দেশ

তিনি দিলেন। কহিলেন, “তোমার ধর্মের প্রাণশক্তির মধ্য দিয়েই সমাজ সংস্কার আর রাজনীতির কথা প্রচার করতে হবে। প্রত্যেক মানুষকে তার নিজের পথটি বেছে নিতে হয়, তেমনি প্রত্যেক জাতিও তার নিজের পথ গ্রহণ করে। আমরা ভারতবাসী, আমাদের পথ অনেক আগেই বেছে নিয়েছি। সে পথ হলো—অবিনশ্বর আত্মার প্রতি বিশ্বাস।”

ভাষণ শুনিয়া মনে হয় জাতির চৈতন্য উদ্বোধনের জন্তু স্বামী বিবেকানন্দ ডুব দিয়াছেন, প্রাচীন ভারতের আত্মার গভীরে। সেখান হইতে প্রাণরস আকর্ষণ করিয়া আনিয়া নব জাগ্রত ভারতবাসীর মানসক্ষেত্রে ভারতধর্মের বীজ বপন করিয়া চলিয়াছেন।

ভারতের এই আধ্যাত্মিক চেতনার বিকাশ শুধু তাহার নিজের জাগরণের জন্তু, নিজের স্বাক্ষর সিদ্ধির জন্তু নয়। সারা পাশ্চাত্য জগৎও রহিয়াছে ইহারই প্রতীক্ষায়। এই চেতনাকে উদ্ভুদ্ধ করিয়া স্বামীজী ডাক দিলেন, “তোমার হাতে যে শক্তি আছে তা ব্যবহার কর। সে শক্তি এত বিরাট যে, যদি তুমি শুধু তাহা মনে-প্রাণে উপলব্ধি কর ও নিজেকে তার যোগ্য করে তোল, তবে তুমি বিশ্বের আমূল পরিবর্তন সাধন করতে পারবে। কারণ, ভারতবর্ষ হচ্ছে—বিশ্বজগতের মানস-গঙ্গা।”

এদেশের সমাজজীবনে তখন সংস্কার আন্দোলন প্রবল বেগে চলিতেছে। কিন্তু এ আন্দোলন ছিল পাশ্চাত্য শিক্ষা-দীক্ষা হইতে উদ্ভূত। স্বামীজী মনেপ্রাণে বুঝিয়াছিলেন, এ সংস্কার আন্দোলন জাতির মর্ম্মমূলে প্রবেশ করিতে পারে নাই। ভারতের ঐতিহাসিক ধারা এবং সনাতন ধর্মের বিশেষত্ব ও স্বাতন্ত্র্য সংস্কারকামীরা বুঝিতে পারেন নাই। তাই ইহাদের সহিত পার্থক্য জানাইয়া নিজ আদর্শ তিনি ঘোষণা করিলেন—“সমাজকে ভেঙে-চুরে সংস্কারকেরা উন্নয়নের যে পথ দেখালেন তা সাকল্যের পথ নয়। এই সংস্কারকদের আমি বলতে চাই, তাদের চাইতে আমি আরও বড় সংস্কারক। তাঁরা

এক-আধটুকু সংস্কার চান—আর সেন্সলে আমি চাই আমূল সংস্কার। আমাদের পার্থক্য সংস্কারের কৰ্ম-পদ্ধতিতে। তাঁদের প্রণালী ভেঙে-চুরে ফেলা—আমার প্রণালী সংগঠন। আমি সংস্কারে বিশ্বাসী নই, আমি স্বাভাবিক এবং মূলগত উন্নতিতে বিশ্বাসী।”

এই ধ্বংসমূলক সংস্কার আর যুক্তিহীন রক্ষণশীলতা—এই দুইটি হইতেই বিবেকানন্দ নিজেকে পৃথক করিয়া নিলেন। বেদান্তের তত্ত্বকে সমাজের সর্বস্বত্বের ছড়াইয়া দিয়া এক অখণ্ড অধ্যাত্মসমাজ তিনি গড়িয়া তুলিতে চান। তামসিক জড়বুদ্ধি ও সামাজিক ভেদ-বৈষম্য এই দেশে এক চরম বিপর্যয় আনিয়াছে। ইহার বিরুদ্ধে স্বামীজী ঘোষণা করিলেন বৈদান্তিক অভেদ-তত্ত্ব। সর্বজীবের অভ্যন্তরে অনুস্থিত রহিয়াছেন শিব। এই শিবের পূজায় জানাইলেন আহ্বান—“যিনি তোমার অন্তরে বাহিরে, তুমি যাহার স্থলদেহ ও যিনি ‘সর্বত পাণিপাদে’, শুধু সেই বিরাট আত্মার পূজা কর।” জাতি সংগঠনের জন্ত চাই বৈরাগ্যবান তেজস্বী কৰ্ম্মীদল। এ জন্তও তিনি সেদিন জানান তাঁহার উদাত্ত আহ্বান।

শ্রীরামকৃষ্ণের সাধন-তত্ত্বে শক্তি, ভক্তি ও জ্ঞান এই তিনেরই সমন্বয় রহিয়াছে। সর্ব মত ও পথকেও ঠাকুর মিলাইয়া নিয়াছেন। কিন্তু স্বামীজীর মধ্যে যেন তাহার কিছুটা ব্যতিক্রম দেখা যাইতেছে। বিবেকানন্দ তাঁহার পরম প্রিয় অধ্যাত্ম-সন্তান। অদ্বৈতবাদের প্রতি তাঁহার আত্যন্তিক নিষ্ঠা যেন একদেশদর্শিতার পরিচয় দিতেছে। ঠাকুরের সমন্বয়ের বাণীর মূলকথা কি তাঁহার শ্রেষ্ঠ শিষ্য ভুলিয়া বসিয়াছেন?

স্বামীজীর ‘বেদান্তের আদর্শ’ নামক বক্তৃতায় এ প্রশ্নেরই উত্তর সেদিন পাওয়া গেল : “আমি অভিযোগ শুনেছি যে, আমি অদ্বৈত-বাদের কথা খুব বেশী করে বলি আর দ্বৈতবাদের কথা খুব কম বলি। হ্যাঁ, আমি খুব ভাল করেই জানি, দ্বৈতবাদের মধ্যে কি অপরিমেয় ভাব রসের উদ্গাদনা, কি অসীম আনন্দোচ্ছ্বাস রয়েছে। সমস্তই

আমি জানি। কিন্তু এখন আমাদের কঁাদবার সময় নয়—এখন কোমল হবার সময়ও নয়। এই কোমলতা এদেশে যুগ যুগ যাবৎ বর্তমান—আর আমরা যেন তুলার মতই নরম হয়ে গিয়েছি। আজ আমাদের দেশ যা চায়, তা হলো লোহের পেশী, ইস্পাতের স্নায়ু, বিপুল ইচ্ছাশক্তি, যা অপ্রতিরোধ্য, যা অমোঘ। এতে যদি সমুদ্রের অতল গভীরে নামতে হয়, মৃত্যুর মুখোমুখি দাঁড়াতে হয়, তাতেও ক্ষতি নেই। তাই আজ আমাদের একান্ত প্রয়োজন দৃঢ়তা। এ দেশকে গড়ে তুলবার জ্ঞান, শক্তিশালী ও সুপ্রতিষ্ঠিত করবার জ্ঞান, আবশ্যক অদ্বৈতবাদের আদর্শকে উপলব্ধি করা—ঐক্যের আদর্শকে উপলব্ধি করা, আয়ত্ত্ব করা। আমাদের চাই বিশ্বাস, বিশ্বাস—প্রবল আত্মবিশ্বাস।”

১৮৯৭ সালের ১লা মে স্বামীজী বলরামবাবুর ভবনে শ্রীরামকৃষ্ণের গৃহী ও সাধু ভক্তদের এক সভা আহ্বান করিলেন। সকলের অনুমোদনক্রমে স্থাপন করা হইল ‘রামকৃষ্ণ মিশন’। বিবেকানন্দ হইলেন ইহার মূল সভাপতি আর স্বামী ব্রহ্মানন্দ কলিকাতা কেন্দ্রের সভাপতি।

মিশন প্রতিষ্ঠিত হইল বটে, কিন্তু গুরুতাইদের অনেকে প্রথমটায় স্বামীজীর আদর্শ ও কর্মসূচী সোৎসাহে গ্রহণ করিতে পারিতেছেন না। কাহারও কাহারও মনে নানা দ্বিধা দ্বন্দ্ব আসে, প্রশ্ন জাগে—‘জীব-সেবা, লোকশিক্ষা, সভা-সমিতি এসব কি শ্রীরামকৃষ্ণের অতিপ্রেরিত ছিল? নিজের কথা-বার্তায়, উপদেশে, আচরণে ঠাকুর কি ঈশ্বর উপলব্ধির উপরই সর্বদা জোর দিতেন না? স্বামীজীর পথে চলতে গিয়ে ঠাকুরের পথ থেকে কি তারা দূরে সরে যাচ্ছেন না?

শ্রীরামকৃষ্ণের উপদেশের নূতন ভাষ্য করিতেছেন বিবেকানন্দ। কেউ কেউ এ ভাষ্যের বিরুদ্ধে মত প্রকাশ করিলেন।

স্বামীজী উদ্বেজনায় ফাটিয়া পড়িলেন। কহিলেন, “অনন্ততাবমর ঠাকুরকে তোরা বুঝি তোদের বুদ্ধির গণ্ডিতে বদ্ধ করে রাখতে চাস? ”



তা হবে না। আমি এ গণ্ডি ভেঙ্গে তাঁর ভাব সারা পৃথিবীময় ছড়িয়ে দিয়ে যাব। আমাকে তিনি কখনও তাঁর পূজা প্রচার করতে বলেন নি। ধ্যান ধারণা আর ধর্মের যে সব উঁচু তত্ত্ব আমাদের শিখিয়ে গেছেন, সেগুলি উপলব্ধি করে জগৎকে শিক্ষা দিতে হবে। মনে করিসনি, আমি আর একটা নূতন দল স্থাপন করতে বসেছি। প্রভুর পদতলে আশ্রয় পেয়ে আমরা সবাই ধন্য হয়েছি। এবার ত্রিজগতের লোকের কাছে তাঁর ভাব বিতরণ করতে হবে। একাজের জন্তই যে আমাদের জন্ম!”

ইহার পর স্বামীজী দৃঢ় কণ্ঠে যাহা বলিলেন, তাহা আত্মপ্রত্যয়ের শক্তিতে উদ্ভূক্ত, আর ঠাকুরের সাক্ষাৎ প্রেরণায় সমুজ্জ্বল। বলিলেন, “আমি, প্রভুর দয়ার বহু নিদর্শন আমি এ জীবনে পেয়েছি। বেশ অনুভব করেছি, তিনি আমার পেছনে দাঁড়িয়ে এসব কাজ করিয়ে নিচ্ছেন। যখন খেতে না পেয়ে আমি গাছতলায় পড়ে থাকতুম, যখন কোপীন বাঁধবার কাপড় পর্যাপ্ত ছিল না, যখন এক পয়সাও সম্বল নেই অথচ পৃথিবীটা ঘুরবো মনে করেছি, তখনও দেখেছি তাঁর দয়ায় যেখানে আমি গিয়েছি, সেখানেই সাহায্য পেয়েছি। আবার যখন বিবেকানন্দকে দেখবার জন্ত সিকাগোর রাস্তায় মেয়ে মদ্রর গাঁদি লেগে যেত তখনও তাঁরই দয়ায় তত মানসম্মত—যার শতাংশের একাংশ পেলেও সাধারণ লোক একেবারে ক্ষেপে যায়—অনায়াসে হজম করেছি। প্রভুর ইচ্ছায় যেখানে গেছি, বিজয় লাভ করেছি। এখন চাই এই দেশের জন্ত কিছু করতে। তোরা সন্দেহ ছেড়ে আমার কাজে সাহায্য কর, দেখবি তাঁর ইচ্ছায় সকলেরই কল্যাণ হবে।”

আর একদিনের বাদানুবাদেও স্বামীজী গজিয়া উঠিয়া ধ্যান ভজন-পরায়ণ, ঈশ্বর দর্শনের জন্ত ব্যাকুল গুরুভাইদের বলেন, “মনে করেছিস্ এতেই তোদের মুক্তি আসছে হাতের মুঠোয়? আর শেষের দিনে রামকৃষ্ণঠাকুর এসে তোদের হাতে ধরে একেবারে গোলোকে টেনে নিয়ে যাবেন। আর জ্ঞানের চর্চা, লোকশিক্ষা এবং আর্ন্ত অনাথের

সেবা, এ সব মায়া—কেননা পরমহংসদেব ওসব করেননি। আর কাকে কাকে নাকি বলেছিলেন, ‘আগে ভগবান লাভ কর—তারপর আর সব। পরের উপকার করতে যাওয়া ‘অনধিকার চর্চা’—যেন ভগবান লাভ করা মুখের কথা। ভগবান একটা খেলনা কিনা যে, খুঁজলেই মুঠোর মধ্যে এসে পড়বে।’

বিবেকানন্দ মনেপ্রাণে বিশ্বাস করেন, ঠাকুর শ্রীরামকৃষ্ণ ঐশী কৰ্ম্মের মহানায়ক। ঠাকুরের করুণাঘন রূপটিই তাঁহার অন্তরে চির-ভাস্বর হইয়া রহিয়াছে। তাই তাঁহার শ্রীমুখের বাণী—শিবজ্ঞান জীবের সেবা—স্বরূপ রাখিয়াই ব্যাকুল হইয়াছেন সেবাধর্ম্ম অনুসরণের জন্ত, কৰ্ম্মযোগের একটা ভিত্তিভূমির জন্ত। করুণাঘন ঠাকুরের জীব-প্রেমের ভিত্তিতে স্বামীজী তাঁহার সেবাধর্ম্মের নব ব্যাখ্যা—কৰ্ম্মযোগানুষ্ঠানের নব পরিকল্পনা স্থির করিলেন।

গুরুভ্রাতারা বিশ্বাস করিতেন, ঠাকুর তাঁহার প্রিয়তম সন্তান স্বামীজীর মধ্য দিয়াই তাঁহার লীলা প্রকটিত করিতেছেন। অপার স্নেহ ভালবাসায় ও নেতৃত্ব শক্তিতে স্বামীজীও তাঁহাদের বাঁধিয়া রাখিয়াছেন। কিন্তু তবুও সন্দেহের যে ছায়াপাত মাঝে মাঝে হয়, আজ তাহা দূরীভূত হইল।

ইহার পর দেখা যায়—দৃশ্যপট একেবারে বদলাইয়া গিয়াছে। যে রামকৃষ্ণানন্দ ঠাকুরের পূজা ও ভোগরাগ ছাড়িয়া বার বৎসরের মধ্যে একদিনও মঠের বাহিরে যান নাই, তিনি মাত্রাজে প্রচার-কার্য্যে বাহির হইলেন। অখণ্ডানন্দ মুর্শিদাবাদের স্থানিক ত্রাণকার্য্যে আত্মনিয়োগ করিলেন। সারদানন্দ এবং অভেদানন্দ ইতিপূর্বে প্রচারের উদ্দেশে ভারতের বাহিরে চলিয়া গিয়াছেন। লোকহিতে ব্রতী ‘মিশনের’ প্রকৃত ভিত্তি এইবার ধীরে ধীরে গড়িয়া উঠিল।

আমেরিকা হইতে স্বামীজী যে অর্থ সংগ্রহ করিয়া আনেন, মঠ নির্মাণের উদ্দেশ্যে তাহা দ্বারা পয়তাল্লিশ বিঘা জমি ক্রয় করা হয়। অথচ এই মঠ ও সেবা-সংস্থার এই ভিত্তিকে গোড়াতেই তিনি

কিন্তু প্রয়োজনবোধে উড়াইয়া দিতে চাহিয়াছিলেন। কলিকাতায় তখন প্লেগের মহামারী শুরু হইয়াছে জনগণ আতঙ্কে অস্থির। মঠের কর্মীদের স্বামীজী সেবাকার্য্যে উদ্বুদ্ধ করিতেছেন, এমন সময়ে একজন প্রশ্ন তোলেন, প্রচুর অর্থ ছাড়া এ কাজ সম্ভব নয়। কিন্তু সে অর্থ কোথা হইতে পাওয়া যাইবে ?

মহাবৈরাগী বিবেকানন্দ তৎক্ষণাৎ উত্তর দিলেন, “প্রয়োজন হলে এখনি মঠের সবটা জমি বিক্রি করে দেবো, কাজ চালিয়ে যাবো। আমরা ফকির, মুষ্টিভিক্ষা করে আর গাছতলায় শুয়ে দিন কাটাতে পারি। যদি জায়গা জমি বিক্রয় করলে হাজার হাজার লোকের প্রাণ বাঁচাতে পারি, তবেই তো এসব সার্থক। নইলে কিসের এই জায়গা, কিসের জমি ?” সারা জীবনের আদর্শকে নিঃশেষে অবলুপ্ত করার এমন সাহস ও মনোবৃত্তি কয়জনের আছে ? ভাগ্যক্রমে সেবাব্রতীদের কর্ম উদ্যাপনে এই চরম ব্যবস্থার প্রয়োজন দেখা দেয় নাই।

সেদিন বিবেকানন্দ এক ভক্তকে বেদান্ত পড়াইতেছেন। এমন সময় গিরিশ ঘোষ সেখানে আসিয়া উপস্থিত। স্বামীজী তাঁহাকে উদ্দেশ্য করিয়া রহস্যচ্ছলে কহিলেন, “জি-সি, তুমি তো এসব কিছুই পড়লে না, শুধু কোষ্টো বিষ্টু নিয়েই দিন কাটালে।”

গিরিশচন্দ্র উত্তর দিলেন—“স্বামীজী. ওসবে তোমারই বেশী প্রয়োজন। কারণ, তোমাকে দিয়েই ঠাকুর লোকশিক্ষা দিতে চেয়েছিলেন।”

তারপর গিরিশচন্দ্রের কোশলে এক বিচিত্র দৃশ্যের অবতারণা হইল। গিরিশ মুচকি হাসিয়া ধীরে ধীরে বলিতে আরম্ভ করিলেন, “আচ্ছা নরেন, তুমি তো বেদবেদান্ত চের পড়েছ, কিন্তু তাতে অগণিত হুঃখীর হুঃখ, বুভুক্ষুর আর্তনাদ, আর পাপাচারগুলো নিবারণিত হয় কি ?” সঙ্গে সঙ্গে প্রতিভাবান নাট্যকার তাঁর অনবত্ত ভাষায় হুঃখ দারিদ্র্যাক্রিষ্ট বাস্তব জগতের এক হুঃসহ, বীভৎস চিত্র আঁকা শুরু

করিলেন। স্বামীজীর হৃদয় ততক্ষণে বেদনায় বিকোচে অধীর হইয়া উঠিয়াছে। নয়নের উদ্গত অশ্রু গোপনের জগ্না তিনি দ্রুতপদে কক্ষ হইতে বাহির হইয়া যান। গিরিশ তখন উপস্থিত ভক্তটিকে যে কথাটি বলিলেন, বিবেকানন্দের অধ্যাত্ম-জীবনের তাহা এক চমৎকার ভাষ্যস্বরূপ। বলিলেন, “দেখলি তো তোর গুরুর হৃদয়টা! এই যে পরের দুঃখে এমন অশ্রুমোচন, এই যে মহাপ্রাণতা—এই জগ্নাই আমি তাঁকে বড় বলে মানি, তাঁর বিদ্যেবুদ্ধির জগ্না নয়! দুঃখ-হৃদশার কথা যেই শোনা, অমনি বেদ-বেদান্ত ফেলে উঠে যাওয়া। সমস্ত বিদ্যে-বুদ্ধি যেন পরপ্রমে গলে গেল। তোদের স্বামীজী যেমন জ্ঞানী ও পণ্ডিত, তেমনি ঈশ্বরভক্ত ও লোকসেবক।”

১৮৯৮ সালের জুলাই মাস। উত্তর ভারতের বিভিন্ন স্থানে ভ্রমণ করার পর স্বামীজী অমরনাথ দর্শনে রওনা হইলেন। সঙ্গে রহিয়াছেন স্নেহধরা শিষ্যা নিবেদিতা। বুটেন-কন্যা নিম্ন মার্গারেট নোবল একদিন স্বামীজীর আত্মিক প্রেরণায় উদ্বুদ্ধ হন এবং স্বামীজীকে গুরুরূপে বরণ করেন। তারপর গুরুর মাতৃভূমি ভারতের সেবায় নিজেকে করেন নিবেদন। নাম হয় তাঁর নিবেদিতা। এ সময়ে স্বামীজীর শিক্ষা ও প্রেরণায় সাধিকা নিবেদিতার আত্ম-নিবেদনের সার্থকতম রূপটি যেন মূর্ত হইয়া উঠিতেছে। স্বামী বিবেকানন্দের মানস-কণ্ডারূপে ঘটিতেছে তাঁহার আত্মপ্রকাশ।

নিবেদিতার আগে কোন পাশ্চাত্য রমণী হিন্দুধর্মের সন্ন্যাসাশ্রম গ্রহণ করে নাই এদিক দিয়া তিনি অনন্য। এই পাশ্চাত্য-শিষ্যার জীবনে যেটুকুও বা ভাবালুতার স্পর্শ বর্তমান ছিল স্বামীজীর কঠোর নিয়ন্ত্রণ ও সাধন-নির্দেশ তাহা নিকরুণভাবে মুছিয়া দিয়াছিল।

স্বামীজী চাহিয়াছিলেন, নিবেদিতা হিন্দু নারীদের শিক্ষায় ব্রতী হোক, কায়মনোবাক্যে শুদ্ধাচারিণী হিন্দু নারীরূপে গড়িয়া উঠুক। এ বিষয়ে স্পষ্ট নির্দেশও দিয়াছিলেন—‘তোমার এখন চিন্তায়, ভাবে, অভ্যাসে ও প্রয়োজনে সম্পূর্ণ হিন্দু হইতে হইবে। তোমার জীবনকে

এখন ভিতরে বাইরে নৈষ্ঠিক ব্রাহ্মণ-ব্রহ্মচারিণীর আদর্শে গঠিত করিতে হইবে। যদি তোমার খুব প্রবল আগ্রহ থাকে তবে উপায় ঠিক জুটিয়া যাইবেই। কিন্তু তোমার অতীত জীবনটাকে ভুলিতে হইবে—এমন কি তার স্মৃতিটুকু পর্য্যন্ত তুমি রাখিতে পারিবে না।” নিবেদিতা ছিলেন স্বামীজীর চরণে উৎসর্গীত পাশ্চাত্যের শ্রেষ্ঠ অর্থ্যা। গুরু তাঁহার এই শিষ্যাকে ভারতীয় ধর্ম ও সমাজের সেবায় এক যোগিনীরূপে গড়িয়া তুলিয়াছিলেন।

অমরনাথে যাওয়ার কালে দেখা যায় স্বামীজীর এক অদ্ভুত রূপান্তর। অদ্বৈতবাদের পতাকাবাহী সেই যোদ্ধা সন্ন্যাসী আর নাই। এখন তিনি এক তীর্থচারী ভক্ত সাধক, প্রভু অমরনাথের নিষ্ঠাবান উপাসক। শ্রীরামকৃষ্ণের ভক্তি-আপ্নুত সত্তাখানি যেন তাঁহাতে এবার সঞ্চারিত হইয়াছে। গুরুদেবের এই নতুন মূর্তি ও দিব্য কমিনীয়তা দর্শনে সেদিন শিষ্যা নিবেদিতার বিস্ময়ের অন্ত ছিল না।

স্নানান্তে অমরনাথের তুষার-লিঙ্গের সম্মুখে স্বামীজী সাষ্টাঙ্গে প্রণত হইলেন। গুহামধ্যে শত শত ভক্তের কণ্ঠে উদ্গীত হইতেছে স্তবগান। এই স্তবগানের অনুরণন চলিয়াছে আগ্রহাকুল দর্শনার্থীদের হৃদয়ে। শিব বিগ্রহের দর্শনে ভাগ্যবান সাধকেরা লাভ করিতেছেন দিব্য অনুভূতি।

প্রভু অমরনাথের দিব্য দর্শন পাইলেন স্বামীজী, ধ্যানাবিষ্ট দেহ হারাইয়া ফেলিল বাহুজ্ঞান। বহুক্ষণ পরে চেতনা ফিরিয়া আসিলে দেখা গেল, চোখ মুখ স্বর্গীয় আনন্দের ছটায় উদ্ভাসিত।

সঙ্গীরা বার বার প্রশ্ন করেন, অতীন্দ্রিয় লোকের কোন্ দর্শন কোন্ অভিজ্ঞতা স্বামীজীর হইয়াছে। কিন্তু উত্তরে তিনি কোন কিছুই সেখানে প্রকাশ করিলেন না।

উত্তরকালে ঘনিষ্ঠ মহলে স্বামীজী এই প্রসঙ্গে বলিতেন—স্বয়ং অমরনাথ তাঁহাকে কৃপা করিয়া এই সময়ে দর্শন দেন এবং প্রভু

তঁাহাকে ইচ্ছামৃত্যুর বরও প্রদান করেন। সমাধিমগ্ন মহাযোগী শব্দর চিরদিনই বিবেকানন্দের উপাস্ত। তঁাহার দিব্য দর্শন সেদিন স্বামীজীর সর্বসম্ভায় আনন্দময় অমুভূতির তরঙ্গ তুলিয়া দেয়। অন্তরলোকে ‘শিব শিব’ ধ্বনি নিরন্তর ধারায় স্পন্দিত হইতে থাকে।’

অমরনাথ হইতে নামিয়া আসিয়া বিবেকানন্দ আবার এক নূতনতর ভাবময় রাজ্যে প্রবেশ করিলেন। আত্মশক্তির ধ্যানে দেহ-মন প্রাণ তখন তন্ময় হইয়া উঠিয়াছে। তিনি দেখিতেছেন, চারিদিকে জগজ্জননী মহামায়ার লীলা প্রকটিত, আর স্বামীজী যেন তঁাহারই অঙ্কের এক ক্ষুদ্র শিঙাটি হইয়া রহিয়াছেন। মুখে নিরন্তর রামপ্রসাদী সুরের গুণ্‌গুনানি, আর অন্তরে স্বর্গীয় আনন্দের উচ্ছ্বাস।

শিষ্যদের একদিন কহিলেন, “যে দিকে ফিরছি, কেবলই মায়ের বরাভয় মূর্তি দেখছি! তিনি যেন আমায় ছোট ছেলের মত করে, নিজের হাতে ধরে নিয়ে, বেড়িয়ে বেড়াচ্ছেন।”

মাতৃসাধকের অন্তরে তখন ভক্তির প্রবল প্রস্রবণ বহিতেছে। কাশ্মীরের ডাল-হুদের উপর হাউসবোটে অবস্থান করিতেছেন। মুসলমান মাঝির কণ্ঠাটিও তঁাহার চোখে যেন আত্মশক্তির এক কল্যাণময়ী প্রকাশ। জননী উমা জ্ঞানে যখন এই বালিকা মুসলমান কুমারীটিকে তিনি অর্চনা করিতে বসিতেন, ভক্ত ও দর্শনার্থীদের নয়ন অশ্রুসঞ্জল হইয়া উঠিত।

ধ্যান-তন্ময়তার মধ্য দিয়া ক্রমে বিবেকানন্দের হৃদয়ে জাগিয়া উঠে ব্রহ্মময়ী মহাকালীর উপলব্ধি। ‘জননী মহাকালী’ নামক কাব্য-বন্দনাটি এই সময়ে তঁাহার লেখনী হইতে নিঃসৃত হয়। ভাবাবিষ্ট অবস্থায় ইহা রচনা করিবার পরই স্বামীজীর বাহ্য চেতনা দীর্ঘ সময়ের জগ্গ বিলুপ্ত হইয়া যায়।

অদ্বৈতবাদী, বেদান্তকেশরী স্বামীজীর অন্তর এখন মাতৃধ্যানে

ভরপুর। আত্মশক্তির প্রলয়ধরী মূর্তির উপাসনা যেন তাঁহাকে পাইয়া বসিয়াছে। এই সময়ে প্রায়ই বলিতেন, “ভীমার উপাসনা দ্বারাই যে ভয় থেকে পরিত্রাণ পাওয়া যায়, অনন্ত জীবন লাভ করা যায়। মৃত্যুকে চিন্তা কর—লোলরসনা কালীকে ধ্যান কর। মা-ই স্বয়ং ব্রহ্ম। তাঁর আঘাত, অভিশাপও যে আশীর্বাদ! হৃদয়টিকে শ্মশান করে ফেল। তবেই না মার দেখা পাবে!”

‘নাচুক তাহাতে শ্যামা’ কবিতায় স্বামীজীর অন্তরলোকে উদ্ভাসিত এই সংহাররূপিণী তত্ত্বটি ফুটিয়া উঠিয়াছে :—

সত্য তুমি মৃত্যুরূপা কালী,  
সুখ বনমালী - তোমার ছায়া।  
করালিনী কর কণ্ঠচ্ছেদ,  
হোক মায়া ভেদ—  
সুখ স্বপ্নে দেহ দয়া ॥

স্বামীজী সেদিন কাশ্মীরের ক্ষীরভবানী দেবী-বিগ্রহ দর্শন করিতে আসিয়াছেন। কি এক দৈবী মায়ায় এই প্রাচীন বিগ্রহের প্রতি তিনি খুব আকৃষ্ট হইয়া পড়েন। কয়েকদিন মায়ের মন্দিরে বসিয়া নিবিষ্ট হন পূজা ও ধ্যান-জপে।

একমনে সেদিন মন্দিরে বসিয়া জপ করিতেছেন। এক সময়ে দৃষ্টি নিবদ্ধ হইল ভগ্ন দেউলের উপর। বিধর্মীর আক্রমণ ও অত্যাচারে স্থানে স্থানে ইহা বিধ্বস্ত হইয়াছে। এক অব্যক্ত ব্যথায় সাধকের অন্তর বার বার গুমরিয়া উঠে। মনে খেলিয়া যায় চিন্তার ঝলক, “মায়ের ভক্তেরা মন্দির ও বিগ্রহের এই অত্যাচার অবমাননা কি করিয়া সহ্য করেছে? আমি সে সময়ে উপস্থিত থাকলে কিছুতেই এটা ঘটতে দিতুম না, নিজের প্রাণ আহুতি দিয়ে করতুম মায়ের মন্দির রক্ষা।’

সহসা শোনা যায় এক অলৌকিক কণ্ঠস্বর!—“ওরে, আমার মন্দির ভেঙ্গেছে, তোর তাতে কি? তুই কি আমায় সর্বত্র রক্ষা করিস,—না আমিই তোকে রক্ষা করি? আমার ইচ্ছায় কি এখানে সাত-তলা স্বর্ণখচিত মন্দির এখনি গড়ে উঠতে পারে না?”

বিবেকানন্দ চমকিয়া উঠিলেন। এই দৈববাণীর আঘাত তাঁহার অন্তর-সত্তায় তুলিল প্রচণ্ড আলোড়ন। সত্যই তো। আত্মাশক্তি, জগজ্জননী যিনি, সর্বশক্তির উৎস যিনি, তাঁহার শক্তিকে এমন সীমিত বলিয়া তিনি ভাবিবেন কেন? কেন তাঁহার এই ধৃষ্টতা? মায়ের নিরাপত্তা বিধান তিনিই করিবেন, কেনই বা তাঁহার এই অহংবোধ? মায়ের সংসার মা-ই তো চালাইয়া থাকেন। পরাশক্তি তিনি—তাঁহার শক্তিতে বিশ্বব্রহ্মাণ্ড বিধৃত। গ্রহ-তারা দল তাঁহারই প্রেমের সূত্রে গাঁথা। তাঁহারই জ্ঞানে সর্বসৃষ্টি চৈতন্যময়, স্পন্দিত। বিশ্বব্রহ্মাণ্ডের এক কোণে, ক্ষুদ্র অঙ্গনে ক্রৌড়ারত শিশু, এই বিবেকানন্দের শক্তি সত্যই কতটুক?

ক্ষীরভবানী মন্দিরের অলৌকিক অভিজ্ঞতা স্বামীজীর জীবনে এক নূতন অধ্যায়ের সূচনা করিয়া দেয়। শ্রীনগরে যখন ফিরিলেন, সঙ্গীরা তাঁহার চোখে মুখে দিব্য জ্যোতির আভা দেখিয়া চমকিয়া উঠিলেন।

দেবী ভবানীর প্রসাদীফুল সকলের মাথায় ঠেকাইয়া, ভাব গদগদ স্বরে, বিবেকানন্দ বলিলেন, “ওরে, এখন আর ‘হরি ওঁ’ নয়। এখন আমার শুধু—‘মা’ আর ‘মা’। মা যে নিজে আমায় বৃহত্তম সত্যটি বুঝিয়ে দিলেন, তাঁর সংসার তিনি নিজেই দেখছেন, আমার কেন একে রক্ষা করবার এমন স্পধা? তবে স্বদেশের ভাবনা ভাব্বারই বা আমার কি দরকার? ব্রহ্মময়ী মায়ের কোলে আমি যে একটি ক্ষুদ্র সন্তান মাত্র।”

. তারপর বিন্ময়াবিষ্ট শিষ্যদের লক্ষ্য করিয়া কহিলেন, “আর যা



কিছু বলবার ব্যাপার আছে-- তা প্রকাশ করতে পারছিলেন। বলার আদেশ নেই।”

সকল মায়িক আবরণের উর্দ্ধে নিজের অধ্যাত্ম-সত্তাকে প্রসারিত করিয়া দিতে বিবেকানন্দ এবার প্রয়াসী হইয়াছেন। ব্যবহারিক জীবনের চারিদিকে বহুতর কর্মের তন্তু জড়ানো। ক্ষীর-ভবানীর কল্যাণ-বাণী আজ সেগুলি শিথিল করিয়া দিল।

অন্তরের অন্তস্তলে স্বামীজী উপলব্ধি করিতে চাহিতেছেন, আর তিনি কোন ধর্ম্মান্দোলনের স্রষ্টা নহেন, জননেতা নহেন, তিনি এখন সর্ব্ব মায়ামোহ-ছিন্ন সন্ন্যাসী—জগজ্জননীর কোলে উপবিষ্ট তিনি এক বৈরাগী বালক।

ধ্যানতন্ময় স্বামীজী এই সময়ে প্রায়ই একলা থাকিতে পছন্দ করিতেন। ভাবাবেশে মাঝে মাঝে কোথায় কোন্ সুদূরে যেন অদৃশ্য হইয়া যাইতেন।

একদিন সঙ্গীরা বিস্মিত হইয়া দেখেন, কোথা হইতে মস্তক মুগুন করিয়া এক দীন সন্ন্যাসীর বেশে তিনি আসিয়া উপস্থিত। মুখে স্বরচিত—‘জননী মহাকালীর’ শ্লোকগাথা। মায়ের প্রলয়ঙ্করী শক্তির বর্ণনা দিতে গিয়া বলিয়া উঠিলেন, “ছাখ্, এর প্রত্যেকটা কথা সত্য। আর আমি তা কাজেও প্রমাণ করেছি। ছাখ্, আমি মৃত্যুকে বরণ করেছি।”

মায়ার সূক্ষ্মতম আবরণ তিনি দূর করিয়াছেন, সর্ব্ব বন্ধন-জাল করিয়াছেন ছিন্ন,—এই কি তাঁর মৃত্যুবরণ?

বেলুড়ে সেদিন মঠ স্থাপনের উৎসব দিবস। গঙ্গাস্নান করার পর স্বামীজী ঠাকুরের ভিক্ষান্ধিপূর্ণ তাত্রা আধারটি শিরে বহন করিয়া চলিলেন। নূতন মঠে করা হইল ইহার প্রতিষ্ঠা।

এই সময়ে তিনি এক সন্ন্যাসীকে বলিয়াছিলেন, “ঠাকুর আমায়

বলেছিলেন, ‘তুই কাঁধে করে আমায় যেখানে নিয়ে যাবি, আমি সেখানেই যাবো, সেখানেই থাকবো—সে গাছতলাই কি আর কুঁড়ে ঘরই কি?’ সেজগ্রেই আজ আমি নিজেই এই আত্মারামের কোটা মাথায় বয়ে নিয়ে এলাম।”

মঠের ব্রহ্মচারী শিষ্যদের অন্তরে সন্ন্যাস জীবনের ত্যাগপূত মহিমা স্বামীজী সর্বদা কীর্তন করিতেন। জীবসেবার মূল তত্ত্বটিও তাহাদের অন্তরে প্রবেশ করাইয়া দিতেন। তাঁহার তেজোগর্ভ বাণীতে তরুণ শিষ্যদের মধ্যে জ্বলিয়া উঠিত ত্যাগ ও আত্মবিশ্বাসের অগ্নিশিখা।

উৎকর্ণ হইয়া তাহারা শুনিত স্বামী বিবেকানন্দের অত্যন্ত বাণী, “ওরে, ভয় পাসনে। জগতের ইতিহাস হচ্ছে কতকগুলো আত্ম-শক্তিতে বিশ্বাসবান লোকের ইতিহাস। প্রকৃত বিশ্বাসই ভেতরকার দৈবীশক্তিকে জাগ্রত করে তোলে।...মনে রাখিস, গুটিকয়েক শক্তিমান লোক জগৎ টলমল করে ফেলতে পারে।”

স্বামীজীর দৃষ্টিতে তাঁহার গুরুর নামাঙ্কিত মঠ ও মিশন ছিল জীবসেবা ও ঈশ্বরোপলব্ধির পবিত্রভূমি। ইহাদের স্বাভাব্য বৈশিষ্ট্য ও গৌরবকে কোন মতেই ক্ষুণ্ণ হইতে দিতেন না। এ বিষয়ে একদিন দৃপ্তভঙ্গীতে তিনি তাঁহার মতবাদ ঘোষণা করিয়াছিলেন—“ছাখো, মঠের ব্যাপারে কিন্তু গৃহস্থদের কোনই কর্তৃত্ব চলবে না। সন্ন্যাসীরাও টাকাওয়ালা লোকের সঙ্গে ব্যক্তিগত সম্পর্ক রাখবে না। গরীবদের সাথেই তাদের কারাবার। গরীবদেরই যত্ন করবে, ভালবাসবে ও যথাসাধ্য সেবা করবে। এ দেশের অধিকাংশ মঠ ও সন্ন্যাসী সম্প্রদায় বড় মানুষের দাসত্ব করেছে—তাদের দয়ার উপর নির্ভর করেছে, তাই তো তারা উচ্ছন্ন গেছে। প্রকৃত সন্ন্যাসী তাদের ত্রিসীমায় যাবে না। কাম-কাঞ্চনের দাস যারা, তারা কি করে কাম-কাঞ্চনত্যাগীর প্রকৃত শিষ্য, প্রকৃত বান্ধব হতে পারে?”

তরুণ ব্রহ্মচারীদের সন্ন্যাস নির্ভার প্রতি বিবেকানন্দের দৃষ্টি ছিল

সদা জাগ্রত, শাসন ছিল অতি কঠোর। তিনি বলিতেন, “একথাটা যেন ভুলো না। যখন দেখবে সন্ন্যাস-আদর্শ থেকে পিছিয়ে পড়ছ, এ কঠোর জীবনের পক্ষে তুমি অল্পপযুক্ত, তখন গার্হস্থ্য আশ্রমে প্রবেশ করা বরং ভাল, কিন্তু সন্ন্যাসাশ্রম কলুষিত করা অমুচিত। সকালে উঠবে, ধ্যানজপ করবে, আর খুব তপস্তা লাগাবে। স্বাস্থ্য আর সময়মত খাওয়া-দাওয়ার উপর নজর রাখবে। আর কথাবার্তা কইবে শুধু ধর্ম্য সম্বন্ধে। সাধনাবস্থায় এমন কি খবরের কাগজ পড়া বা গৃহস্থদের সঙ্গে মেশাও সমীচীন নয়।”

সাধনার্থী তরুণ ব্রহ্মচারীদের জন্য এমন কঠোর বিধিনিয়মই এ সময়ে তিনি প্রবর্তন করিয়া যান।

সে-বার কাশ্মীরের তীর্থদর্শন হইতে ফিরিয়া আসিয়া স্বামীজী দেখেন একটি তরুণ ব্রহ্মচারী মা-সারদামণির আশ্রমে কাজকর্ম দেখাশুনা করিতেছে। ব্রহ্মচারীটি সৎ এবং শুদ্ধস্ব, কিন্তু স্বামীজী কান্দারো কথায় নিবৃত্ত হইবার পাত্র নন। তৎক্ষণাৎ গর্জিয়া উঠিয়া তিরস্কার করিতে লাগিলেন। শ্রীমায়ের আশ্রমে নারী ভক্তগণ বাস করিতেন, শ্রীমাকে দর্শনের জন্যও মহিলাদের সমাগম ছিল। ব্রহ্মচারী ভক্তদের পক্ষে এই নারী সান্নিধ্যকে স্বামীজী ক্ষতিকারক মনে করিতেন। এমনই ছিল তরুণ সাধকদের সম্পর্কে তাঁহার ব্রহ্মচর্যের নৈষ্ঠিক বিধান। এই ভৎসনার পর অবিলম্বে মায়ের আশ্রমের কাজে একজন প্রবীণ সন্ন্যাসীকেই নিযুক্ত করা হয়।

‘শিববোধে জীবের সেবায়’ মঠের কর্মীদের বিবেকানন্দ সদাই অল্পপ্রাণিত করিতেন। ভাবময় উদাস্ত কণ্ঠে কহিতেন,—“ওরে, সর্ব-জীবের সমষ্টি যে ভগবান, একমাত্র সেই ভগবানেই আমি বিশ্বাস করি। সকল জাতির যারা হৃৎকৃত, দরিদ্র ও নিপীড়িত তারাই যে আমার ভগবান। এই ভগবানের জন্য আমি বারে বার জন্মাতে চাই; একজন্ম জন্ম জন্ম হুঃখ পেলেও আমার খেদ নেই।”

যুগ যুগ ধরিয়া এদেশের নরম মৃত্তিকায় ভাবানু ও কোমল

মানুষের জন্ম হইয়াছে। কঠোর সংযম, নিষ্ঠা ও শক্তির অভাবে অনেক কিছু মহতী প্রচেষ্টা বিফল হইয়া গিয়াছে। তাই নবীন সন্ন্যাসীদের উদ্দেশ্য করিয়া স্বামীজী তাঁহার সতর্ক বাণী বার বার উচ্চারণ করিয়া গিয়াছেন।

আজীবন বিবেকানন্দ স্বপ্ন দেখিয়াছেন; সে স্বপ্ন সফল করার জন্তু করিয়াছেন জীবনপণ। তিনি চাহিয়াছেন, আত্মত্যাগী সর্বস্ব-পণকারী শত শত তরুণ সন্ন্যাসী তাঁহাকে করিবে অনুসরণ। ভারতের আত্মিক উজ্জীবনে, তাঁহার ধ্যানের ভারত গঠনে তাহারা করিবে জীবনপাত। সে স্বপ্ন তাঁহার সফল হয় নাই, ধ্যানকল্পনা রূপায়িত হয় নাই। কিন্তু বিবেকানন্দের অভ্যুদয় কি বার্থ হইয়াছে? তাহা তো হয় নাই। তাঁহার বিপুল অধ্যাত্মশক্তি ও কর্মব্রতের মধ্য দিয়া ভারতাত্মা সেদিন জাগিয়া উঠে— ধর্ম ও সমাজে উঠে নূতনতর প্রাণ-স্পন্দন। আর সমাজের সংস্কার ও ধর্মের পরিবর্তে জাগিয়া উঠে নৃসিংধর্মী দৃষ্টিভঙ্গী। সনাতন অধ্যাত্ম-জীবনের উৎস হইতে প্রাণশক্তি আহরণে জাতি প্রবৃত্ত হয়। এই জাগরণের পরোক্ষ ফলশ্রুতি বাংলার অগ্নিযুগের সৃষ্টিপ্রয়াস, তিলক ও গান্ধীজীর মুক্তি-সংগ্রাম। স্বামী বিবেকানন্দের আন্দোলনের ফলে ভারতের অস্তুনিহিত ঐক্যের বোধও সবার অলক্ষ্যে জাতীয় জীবনে আত্মপ্রকাশ করিতে থাকে।

শ্রীরামকৃষ্ণের অন্ততম শ্রেষ্ঠ শিষ্য নাগমশাই একদিন বেলুড় মঠে বিবেকানন্দকে দর্শন করিতে আসিয়াছেন। নাগমশাই ছিলেন ভক্তি ও দৈন্তের মূর্ত্ত বিগ্রহ। এই সাধক সম্বন্ধে স্বামীজী বলিতেন, “জ্ঞাখো, সারা পৃথিবীটা ঘুরে এলাম কিন্তু নাগমশাইর মত মহাপুরুষ চোখে পড়লো না।”

বিবেকানন্দ ও নাগমশায়ের এই সাক্ষাতের পটভূমিকায় স্বামীজীর অধ্যাত্ম-পরিচয়টি ভক্ত ও দর্শনার্থীদের কাছে সেদিন স্পষ্টতর হইয়া উঠে।

নাগমশাই স্বামীজীর চরণ বন্দনার উদ্দেশ্যে সাষ্টাঙ্গে

হইলেন। “ও কি করছেন, ও কি করছেন,”—বলিয়া স্বামীজী তখন উঠিয়া দাঁড়াইয়াছেন। নাগমহাশয় করজোড়ে বলিয়া উঠেন, “আমি যে দিব্যচক্ষে দেখছি—আজ সাক্ষাৎ শিবের দর্শন পেলাম। আপনার দর্শনে আমার ভবক্ষুধা একেবারে দূর হয়ে গেল। জয় ঠাকুর রামকৃষ্ণ! জয় ঠাকুর রামকৃষ্ণ!”

বেদান্ত পাঠ নিরত ব্রহ্মচারী ও সন্ন্যাসীদের স্বামীজী আহ্বান করিলেন। মুক্তপুরুষ নাগমশাই ঠাকুরের কথা আজ ইহাদের কিছু শুনাইবেন, ইহাই তাঁহার অভিলাষ। কিন্তু অহং-বোধ বিরহিত সাধু নাগমশাইকে দিয়া এসব বলানো শূকঠিন। তিনি বলিয়া উঠিলেন, “আমি আর কি বোলবো, আমি আর কি বোলবো? আমি এখানে শুধু দেখতে এসেছি—ঠাকুরের লীলার সহায়ক মহাবীরজীকে দেখতে এসেছি। জয় রামকৃষ্ণ!”

কিছুক্ষণ ভাবাবিষ্ট থাকার পর নাগমহাশয় আবার কহিলেন, “আপনাকে কে বুঝবে? দিব্যদৃষ্টি না খুললে তো চেনবার যো নেই। একমাত্র ঠাকুরই চিনেছিলেন; আর সকলে, তাঁর কথায় বিশ্বাস করে মাত্র, কিছুই বোঝে না।”

সিংহবিক্রম, ভূবনবিজয়ী যোদ্ধা সন্ন্যাসী মুহূর্ত্ত মধ্যে তাঁহার মহিমার উন্নত শিখর হইতে নামিয়া আসেন। বালকের সরলতা ফুটিয়া উঠে চোখে মুখে। বিনয় নম্র বচনে প্রবীণ গুরুতাইকে বলেন, “নাগমশাই, কি যে করছি, কি না করছি—কিছুই বুঝতে পারছি। এক এক সময়ে এক এক দিকে মহা ঝাঁক আসে, আর সেই মত কাজ করে যাই। এতে ভাল কি মন্দ হচ্ছে—কিছুই বুঝতে পারছি।”

নাগমশাই উত্তরে কহিলেন, “মনে নেই? ঠাকুর যে বলেছিলেন, চাবি দেওয়া রইল। তাই এখন বুঝতে দিচ্ছেন না। বুঝা মাত্রই যে লীলা ফুরিয়ে যাবে!”

গুরু চরণে নিবেদিত-প্রাণ নাগমশাই ছিলেন এক সিদ্ধপুরুষ। দৈন্ত ও আত্মগোপনভার আড়ালে অবস্থিত এই মহাপুরুষকে

বিবেকানন্দ ভালরূপেই চিনতে ন। তাই স্বীয় আরক্ত কার্যে তাঁহার আশীর্বাদ সেদিন তিনি চাহিয়া নিলেন।

১৮৯৯ সালের মধ্যভাগে স্বামীজীকে আর একবার আমেরিকা ও ইউরোপে যাইতে হয়। পাশ্চাত্য-বিজয়ের সে পূর্বতন উৎসাহ উদ্ভাদনা এবার নাই। এবার শুধু কৰ্ম্মকেন্দ্রসমূহের তত্ত্বাবধান ও সংগঠনের পালা। পাশ্চাত্যের দ্বারে আগের বার যে আশা পোষণ করিয়া তিনি আসিয়াছিলেন, অনেক দিন হয় সে আশাকে বিসর্জন দিয়াছেন। প্রাচ্য ও পাশ্চাত্যের প্রকৃত স্বরূপ আজ তাঁহার নিকট উদ্ঘাটিত। ইহারই উল্লেখ করিয়া স্বামীজী একদিন বলিয়াছিলেন,— “পাশ্চাত্যের জীবনযাত্রা যেন এক অট্টহাস্তের মত— কিন্তু তাহার তলায় রয়েছে মর্মান্বোধী কান্না। এর পরিণতিও কান্নাতেই। হাসি, ঠাট্টা ভামাসা যা কিছু সব রয়েছে উপরিভাগে, কিন্তু ভিতরটা এর বড়ই করুণ। আর ভারতে উপরেই যত বিধাদ, যত কান্না—ভিতরে আছে নির্বিকার এক পরম চেতনা, আর নিরবচ্ছিন্ন আনন্দ।”

মহান কৰ্ম্মযোগী বিবেকানন্দের ব্রত উদ্‌যাপনের সময় যেন নিকটতর হইয়া আসিয়াছে। রামকৃষ্ণের জ্যা-মুক্ত তীর কি এবার তাহার গতিবেগের শেষ প্রান্তে আসিয়া পৌঁছিতেছে? স্বামীজীর ভক্ত শিষ্যা মিস্ ম্যাকলিয়ডের নিকট লিখিত পত্রে তাঁহার তৎকালীন মানসিকতা কিছুটা বুঝা যায়। তিনি লিখিতেছেন—“আমি ভালই আছি। লড়াই-এ হার জিত দুই-ই হলো, পুঁটলী-পোঁটলা বেঁধে সেই মহান ‘মুক্তিদাতার’ প্রতীক্ষায় বসে আছি। অব্ শিব পার কর মেরে নাইয়া—হে শিব, আমার তরী এবার পায়ে নিয়ে যাও, প্রভু!...যতই যা হোক, আমি যে এখনও পূর্বের সেই বালক বই আর কেউ নই—যে বালক দক্ষিণেশ্বরের পঞ্চবটি তলায় জীরামকৃষ্ণের ন্মস্তবানী অবাক হয়ে শুনতো, আর বিস্তার হয়ে

যেতো। সেই তো আমার সত্যিকারের স্বভাব! কৰ্ম আর অপরের কল্যাণ, সেগুলো আমার বহিরাবরণ মাত্র। এবার আবার তাঁর ডাক শুনতে পাচ্ছি, সেই চিরপরিচিত মধুর কণ্ঠস্বর—যা স্মরণ হলেই মন আনন্দে নেচে ওঠে।—বন্ধন সব খসে যাচ্ছে, মানুষের মমতা উড়ে যাচ্ছে, কৰ্ম আজ বিশ্বাদে ভরা। জীবনের মোহ কেটেছে— রয়েছে তার স্থলে কেবল আমার প্রভুর আহ্বান ধ্বনি। যাই প্রভু, যাই। ঐ তিনি বলছেন, ‘মৃতের সংকার মৃতের দলই করুকগে, তুই ও সব ছুঁড়ে ফেলে দিয়ে আমার পিছু পিছু চলে আয়।’ যাই প্রভু যাই!”

“হ্যাঁ, এইবার আমি ঠিক চলেছি। সম্মুখে অনন্ত শান্তিময় নির্বাণ সমুদ্র! মায়ায় এতটুকু তরঙ্গভঙ্গ তার শান্তি বিঘ্নিত করছে না!...সেই শিক্ষাদাতা, গুরু নেতা, আচার্য্য বিবেকানন্দ কিন্তু আজ আর নেই। পড়ে আছে শুধু পূর্বের সেই বালক, প্রভুর চির-শিষ্য, গুরু চরণাশ্রিত চির-ভৃত্য!...এতদিন আমার কৰ্ম্মের মধ্যে মান-যশের ভাব উদ্গত হত, ভালবাসার মধ্যে পাত্রাপাত্র বিচার আসতো, পবিত্রতার পশ্চাতে থাকতো ফলভোগের সূক্ষ্ম আকাঙ্ক্ষা। আমার নেতৃত্বের ভেতর প্রভুত্বের স্পৃহাও আসতো। এখন সে সব অস্তহিত হয়েছে—আমি উদাস প্রাণে ভেসে চলেছি। যাই মা, যাই। তোমার স্নেহ কোমল কোলে উঠে, তুমি যেখানে নিয়ে যেতে চাচ্ছে। সেই চির-নীরব অরূপ অজ্ঞাত রাজ্যে। অভিনেতার ভাব সম্পূর্ণ বিসর্জন দিয়ে, কেবলমাত্র জড় বা সাক্ষীর মত সরে যেতে আমার আজ আর কোন দ্বিধা নেই।”

বিশ্ববন্দিত পরাক্রমশালা আচার্য্যের, যোদ্ধা সন্ন্যাসীবীর বিবেকানন্দের এ কোন্‌ দুর্জয় পথযাত্রার সঙ্কেত! রামকৃষ্ণের সেই প্রহেলিকাময় “চাবী” কি পরাশাস্তির তোরণ-দ্বার আজ উন্মুক্ত করিতে চাহিতেছে?

স্বামীজী স্বদেশে বেলুড় মঠে এবার কিরিয়া আসিলেন। কৰ্ম্মমুখর

জীবনের গতি আজ স্বর্গীয় আনন্দের ও চির প্রশান্তির দ্বারে আসিয়া থমকিয়া দাঁড়াইয়াছে।

মঠের হাঁস, গরু, ছাগলছানা মটরু আজ তাঁহার খেলার সাথী, কুকুর 'বাঘা' তাঁহার বিশ্বস্ত অনুচর। এ যেন দিবাসভায় মত্তিত এক মানব শিশু, অধ্যাত্ম-সিদ্ধির পরিপক্বতার ফলে ইহা পেলব, নিটোল ও রসমধুর। ব্রহ্মচারীর দল ও গুরুভ্রাতারা তাঁহার আনন্দের স্বর্গীয় আভা দেখিয়া অবাক হইয়া চাহিয়া থাকেন।

ক্লান্ত দেহে রোগের প্রকোপ বাড়িয়াই চলিয়াছে। শেষের দিনটি সমাগত—তরঙ্গায়িত তুর্বার নদী এবার মহাসাগরে আত্মবিলুপ্তির জ্ঞপ্তি প্রতীক্ষমান। স্বামীজী যেন তাহার পরম সন্তার সহিত মুখো-মুখি পরিচয় সাধন করিয়াছেন, প্রশান্ত হৃদয়ে বসিয়া আছেন মহা-মিলনের প্রতীক্ষায়। সেবারত ভক্তের সাহায্যে পঞ্জিকার কি একটা বিশিষ্ট দিন তিনি দেখিয়া রাখিলেন। অপরাহ্নে একদিন মঠের ময়দানে ধীরপদে বেড়াইতেছেন। সহসা খামিয়া যান, গম্ভীর স্বরে সঙ্গী ভক্তকে একটি বিশেষ স্থান অঙ্গুলি দিয়া দেখাইয়া বলেন, “তোরা ঐখানেই আমার দেহের সংস্কার করিস্।”

১৯০২ সালের ৪ঠা জুলাই। বিবেকানন্দের প্রতীক্ষিত দিবসটি আসিয়া গিয়াছে। এবার তাঁহার বিদায়ের পালা। ধ্যানমগ্ন মহাপুরুষ ধীরে ধীরে নিমজ্জিত হইলেন মহাসমাধিতে।

মনীষী রম্যা রল্যা সেদিনকার এই মহাপ্রয়াণের মধ্যে দেখিয়াছেন এক নূতন সম্ভাবনা, নূতন কল্যাণের ইঙ্গিত। অমুকরণীয় ভাষায় তিনি বলিয়াছেন :

“বিবেকানন্দের নিকট জীবন ও সংগ্রাম ছিল একার্থ বাচক। তাঁহার জীবনের দিনগুলিও ছিল অতি সংক্ষিপ্ত। রামকৃষ্ণের ও তাঁহার এই মহান শিষ্যের মৃত্যুর মধ্যে ব্যবধান ছিল মাত্র বোল বৎসর। কিন্তু এই অল্প সময়ের ব্যবধানেই বিবেকানন্দ প্রজ্জ্বলিত



করেন অগ্নিময় উদ্দীপনা। তারপর চল্লিশ বৎসরেরও কম বয়সে এই মহান যোদ্ধা চিতা-শয্যা গ্রহণ করেন।

“কিন্তু সে চিতাগ্নি আজিও নির্বাপিত হয় নাই। প্রাচীনকালের ফিনিক্স পক্ষীর মতই তাঁহার চিতাভস্ম হইতে নূতন করিয়া উত্থিত হইয়াছে ভারতের বিবেক—এ যেন কিম্বদন্তীর আর এক ইন্দ্রজালময় পক্ষী। এ বিবেকময় বাণী উত্থিত হইয়াছে ভারতের শাস্ত্রত, সাধনময় জীবন হইতে, মনুষ্যের আশা ও প্রত্যয় নিহিত বহিয়াছে ইহাতে। এই বাণীর কথা ভারতের প্রাচীন ধ্যানী ও দ্রষ্টার দল বৈদিক যুগ হইতে চিন্তা করিয়া আসিয়াছেন। এই বাণীর নিহিতার্থ আজ ভারতবাসীকে উদ্ঘাটন করিতে হইবে, ছড়াইয়া দিতে হইবে অবশিষ্ট মানবজাতির মধ্যে।”





# আচার্য মধ্ব

ভারতের আত্মিক সাধনা ও ধর্ম-সংস্কৃতির ইতিহাসে দাক্ষিণাত্যের প্রবদান যেমনি বিপুল তেমনি বৈচিত্র্যময়। জ্ঞান, কর্ম ও প্রেমভক্তির যানা সাধনা ও দার্শনিকতার ধারা এই প্রাচীন ভূখণ্ডে হইতে ঐসারিত হইয়াছে, ছড়াইয়া পড়িয়াছে দেশের দিক্‌বিদিকে।

দক্ষিণভারত আমাদের উপর্যুক্তকন দিয়াছে তাহার ষোড়শশতাব্দী-স্পন্ন শৈবসাধক আর প্রেমভক্তি-সিদ্ধ আড়বার গোষ্ঠী, দিয়াছে ঈশ্বরের মতো অদ্বৈতবাদের শ্রেষ্ঠ আচার্য। রামানুজ, মধ্ব, বিষ্ণুস্বামী, নম্বার্ক বিহারণ্য, জ্ঞানদেব, তুকারাম প্রভৃতি সিদ্ধ সাধক ও মনোতার একের পর এক এখানে ঘটয়াছে অভূতদয়।

ত্রয়োদশ শতকে আচার্য মধ্বের আবির্ভাব শুধু দক্ষিণ ভারতেরই নয়, সমগ্র ভারতেরই এক স্মরণীয় ঘটনা। ব্রহ্মসূত্রের ভক্তিবাদী ব্যাখ্যার মধ্য দিয়া তিনি এক নবতর দ্বৈতবাদী দর্শনের প্রচার করেন। গাহার নৈষ্ঠিক বৈষ্ণবীয় সাধনা, ভাবময় প্রেরণা ও সংগঠনশক্তি ভক্তিবাদোন্নয়নকে নূতন প্রাণ-প্রাচুর্যে ভরিয়া তোলে। ভারতীয় জন-পীতনে আচার্য মধ্ব পরিচিত হইয়া উঠেন ভক্তিবাদী চতুঃসম্প্রদায়ের প্রথম ব্রহ্মসম্প্রদায়ের প্রবর্তকরূপে। তাঁহার প্রচারিত তত্ত্ব ও ধর্মাদর্শ য় গোড়ীয় বৈষ্ণব ও বল্লাভাচারীদের মতবাদকে অনেকাংশে প্রভাবিত রিয়াছে একথাও অস্বীকার করার উপায় নাই।

মধ্ব আবির্ভূত হন ১১৯৯ খৃষ্টাব্দে।<sup>১</sup> ভারতের দক্ষিণ-পশ্চিম

---

১ মতান্তরে ১২৩৮ খৃষ্টাব্দে। দ্র: Subba Rao : Bhagabat Gita. . G. Bhandarkar : Vaishnavism, Saivism and Minor Religious Systems pp. 59—। স্বরচিত গ্রন্থ 'ভারত তাৎপর্য নির্ণয়'-এ মধ্ব পিন জন্ম সনকে যে শকাব্দের উল্লেখ করিয়াছেন তাহা ১১৯৯ খৃষ্টাব্দেরই দর্শনা দেয়। শ্রীকৃষ্ণ-এ মধ্বের প্রশিষ্ট স্বামী নরহরি তীর্থের এক অঙ্কশাসন বিবৃত হইয়াছে। এই অঙ্কশাসন মধ্বের জীবনকাল নির্ণয়ের সহায়ক।

উপকূলের কাছাকাছি বেলে-গ্রামের পাজকা ক্ষেত্র তাঁহার জন্মভূমি। তখনকার দিনে এ অঞ্চল ছিল তুলুব দেশের অন্তর্গত। আজিকার দিনের ধারোয়ার জেলা, উত্তর ও দক্ষিণ কানাড়া এবং মহীশূর রাজ্যের পশ্চিম অংশ নিয়া গঠিত ছিল ত্রয়োদশ শতকের তুলুব। আজিকার দিনেও ইহার একাংশ তুলুব নামে পরিচিত। শঙ্করের জন্মস্থান শৃঙ্গেরী ও ম্যাঙ্গোলোরের দ্বন্দ্ব মন্দিরের জন্মস্থান হইতে চল্লিশ মাইলের বেশী হইবে না।

পাজকার তিন ক্রোশ দূরেই সাগর বিধৌত পবিত্র তীর্থ উড়ুপী<sup>১</sup>। শেষশায়ী অনন্তেশ্বর বিষ্ণু ও চন্দ্রমৌলীশ্বর শিব, এই দুই জাগ্রত বিগ্রহের মন্দির এখানে অবস্থিত। দেশের দূর দূরান্ত হইতে ভক্ত নরনারী এখানে সমবেত হয়, স্নান তর্পণ ও পূজা শেষে যে যাহার ঘরে কিরিয়া যায়। বিষ্ণুভক্ত ও শিবভক্তদের এই মিলনভূমিই উত্তরকালে পরিচিত হইয়া উঠে আচার্য মন্দিরের সাধনপীঠ ও লীলাকেন্দ্ররূপে। ভক্তি-সাধনার এক নূতন ধারা তাঁহার মাধ্যমে এখান হইতে উৎসারিত হয়। তাঁহার উত্তরসূরী ও ভক্ত শিষ্যদের স্মৃতিও এই পবিত্র তীর্থের সাহিত নানাভাবে বিজড়িত রহিয়াছে।

মন্দির পিতার নাম মধ্যগেহ নারায়ণ ভট্ট। প্রতিভাধর আচার্য হিসাবে ভট্ট তখন এ অঞ্চলে সুপরিচিত। বেদ-বেদান্তে তিনি পারঙ্গম, আবার সাধন-জীবনে নিষ্ঠাবান বিষ্ণুভক্ত। স্ত্রী বেদবতী যেমনি রূপ-লাবণ্যবতী তেমনি মহাভক্তিমতী। গৃহে নারায়ণ-শিলা প্রতিষ্ঠিত। এই শিলাময় দেববিগ্রহের সেবা, ভোগরাগ, ধ্যানজপে অধিকাংশ সময় তাঁহাদের অতিবাহিত হয়। বিশেষ বিশেষ পূজা পার্বণের দিনে উভয়ে ভক্তিভরে গিয়া উপস্থিত হন উড়ুপীতে। কুলদেবতা অনন্তেশ্বর নারায়ণের অর্চনায় প্রাণমন ঢালিয়া দেন।

১ উড়ু অর্থে নক্ষত্র, 'প' হইতেছে পতি। নক্ষত্রপতি অর্থাৎ চন্দ্রের নাম উড়ুপ। চন্দ্রের তপস্বীর প্রসঙ্গ যে শিব তিনিই এ স্থানে অধিষ্ঠিত। তাই চন্দ্রমৌলীশ্বর শিবের নাম অনুসারে এ তীর্থের নাম হইয়াছে উড়ুপী। প্রাচীন কালে উড়ুপী রজতপীঠপূর নামেও আখ্যাত হইত।

পণ্ডিত মধ্যগেহ ভট্ট মোটেই বিস্তবান্ নন। সম্বলের মধ্যে রহিয়াছে পৈতৃক একটি বাসগৃহ আর একটি বাগিচা। এই বাগিচার ফসল আর অধ্যাপনার সামান্য কিছু আয় দিয়াই কোনো মতে তাঁহার সংসারের ব্যয় নির্বাহ হয়।

এই ভট্টবংশ খুবই প্রাচীন। কর্মকাণ্ডের বিখ্যাত আচার্য কুমারিল ভট্টের অনুগামী সাগ্নিক ব্রাহ্মণ ইঁহারা। পঞ্চ বা ষষ্ঠ শতকের কাছাকাছি সময়ে বনবাসী কদম্বরাজ ময়ূরবর্মণ এই নৈষ্ঠিক ব্রাহ্মণদের কয়েকটি দলকে আমন্ত্রণ জানান। সেই সময় হইতে এই ভট্ট ব্রাহ্মণেরা তুলু ব অঞ্চলে আসিয়া বসতি স্থাপন করেন। যজ্ঞক্রিয়া, শাস্ত্রনিষ্ঠা ও শুদ্ধতর জীবনচর্চার মধ্য দিয়া ধীরে ধীরে এই আগন্তকেরা সমাজের নেতাক্রমে নিজেদের করেন সুপ্রতিষ্ঠিত।

এই ঔপনিবেশিক ব্রাহ্মণদের অনেকে ছই এক পুরুষের মধ্যেই শাস্ত্র অদ্বৈতবাদের অনুগামী হইয়া পড়েন। সাধারণভাবে তাঁহাদের মধ্যে শিবভক্তির প্রাবল্য দেখা যায়।

কালক্রমে ইঁহাদের মধ্যে কিছু সংখ্যক লোক বিষ্ণু-উপাসনার দিকে ঝুঁকিয়া পড়েন। আচার্য মধ্বের পিতা মধ্যগেহ ভট্ট ছিলেন এমনি এক ভক্তিপরায়ণ বৈষ্ণব ব্রাহ্মণ।

মধ্যগেহ ভট্টের ছই পুত্র ও এক কন্যা। কিন্তু ভাগ্যের কি নিদারুণ পরিহাস, নিতান্ত তরুণ বয়সে ছইটি পুত্রই একে একে ইহলোক ত্যাগ করিয়া চলিয়া গেল। শোকের আঘাতে ভট্টদম্পতি একেবারে মুর্খাডিয়া পড়িলেন।

কয়েক বৎসর ইতিমধ্যে অতিক্রান্ত হইয়াছে। কিন্তু পুত্রশোকের দহনজ্বালা মধ্যগেহ তখনো ভুলিতে পারেন নাই। তাছাড়া, মনে এক নূতন হুঁচিন্তাও প্রবল হইয়া উঠিয়াছে। নৈষ্ঠিক ব্রাহ্মণ তিনি। বার বারই ভাবিতে থাকেন, অপুত্রক অবস্থায় এদেহ ত্যাগ করিলে পিণ্ডদান করার তো কেহ থাকিবে না। মাঝে মাঝে তাই উড়ুপীতে অনন্তেশ্বর মন্দিরে গিয়া উপস্থিত হন, ইষ্টের চরণে নিবেদন করেন অন্তরের আকুতি।

সেদিন ছিল দশহরার শেষ দিন—নবমী। মধ্যগেহ ভট্ট উড়ুগীর নারায়ণ মন্দিরে বসিয়া একমনে জপ ধ্যান করিতেছেন। ভাবতন্ময় অবস্থায় প্রহরের পর প্রহর কি করিয়া কাটিয়া যায় হুঁশ নাই। রাত্রি ক্রমে গভীর হইয়া উঠে। ভক্ত দর্শনার্থীরা একে একে যে বাহার ঘরে ফিরিয়া গিয়াছে। ঠাকুরের শয়ান শেষে দীপ নিভাইয়া পূজারীরা নিজ নিজ ক্ষেত্রে বিশ্রামরত। শুধু ভক্তপ্রবর মধ্যগেহ ভট্ট শ্রীমূর্তির সম্মুখে রহিয়াছেন ধ্যানস্থ।

ইঠাৎ গর্ভ-মন্দিরটি এক বলক শুভ স্নিগ্ধ স্বর্ণীয় জ্যোতিতে উদ্ভাসিত হইয়া উঠে। ভট্টের ধ্যান ভাঙিয়া যায়। বিস্ময়ে আনন্দে তিনি অভিভূত। এসময়ে কানে আসে এক দৈবী কণ্ঠস্বর। করুণা বিগলিত কণ্ঠে ঠাকুর কহেন, “আমার প্রিয় ভট্ট, তুমি প্রচণ্ড শোক পেয়েছ তরুণ বয়সের পুত্র ছুটি হারিয়ে। কিন্তু কি করবে বল? প্রাক্তন খণ্ডিত হয়েছে, তাই তো আর তাদের থাকা সম্ভব হয় নি, মর্ত্য থেকে বিদায় নিয়ে চলে গেছে। হুঃখ ক’রো না ভট্ট,—শোক যেমন আঘাত হানে তেমনি আনে পরম কল্যাণ। শোক মানুষকে করে আত্মস্থ, করে পবিত্রতর।”

মধুর মোহময় বাক্যর প্রভুর দিব্যকণ্ঠে। কিন্তু ভট্টের বৃকে তাহা অল্পরঞ্জন তোলে কই? উপযুপরি দুইটি পুত্রশোকে হৃদয় তাঁহার আজ মরুভূমি। তাহা শীতল হয় কই, শাস্ত হয় কই?

প্রভু আবার স্নেহার্দ্দস্বরে বলিতে থাকেন, “ভট্ট, জেনে রাখো, মানুষ শূন্য হয় পূর্ণ হবে বলে, রিক্ত হয় সিক্ত হবে বলে। শোক বিষাদের কালিমা তুমি ঝেড়ে ফেল। আর খেদ ক’রো না। ঈশ্বরীয় বিধানে এক শুদ্ধাত্মা কুলপবিত্রকারী পুত্র আসবে তোমার গৃহে। নবতর ভক্তি আন্দোলনের পথিকৃৎ হবে সে। আজকে দশহরার শেষ দিন—নবমী। তোমার একটি শিশুপুত্র ভূমিষ্ঠ হবে ঠিক এক বৎসর পরে, এমনি পবিত্র তিথিতে।”

দৈবী বাণীর রেশ ধীরে ধীরে মিলাইয়া যায়, কিন্তু পণ্ডিত মধ্যগেহ ভট্টের হৃদয়ে এই বাণী তুলিয়া দেয় ভাবোচ্ছ্বাসের এক উত্তাল

তরঙ্গ। অপার আনন্দে ও তৃপ্তিতে ভরপুর ভট্ট তখনই ছুটিয়া যান পাজকায় নিজগৃহে। পুলকভরা কণ্ঠে গৃহিণী বেদবতীর কাছে বর্ণনা করেন মন্দিরের অত্যাশ্চর্য অভিজ্ঞতার কাহিনী। আনন্দাশ্রু বরিতে থাকে ছই নয়নে।

উড়ুপীর অনন্তেশ্বর মন্দিরের দৈববাণী কলিয়া যায়। ঠিক এক বৎসরের ব্যবধানে, ১১৯৯ খৃষ্টাব্দের নবমী তিথিতে এক শুভলগ্নে ভট্টগৃহিণীর কোল আলো করিয়া আবির্ভূত হয় এক শিশুপুত্র— উত্তরকালে যে কীর্তিত হইয়া উঠে মহাসাধক মধ্বাচার্য নামে।

যেমনি অনিন্দ্যসুন্দর, তেমনি সর্বশূলক্ষণযুক্ত এই শিশু। ভক্ত ভট্টদম্পতির আনন্দের আর অবধি নাই। ঠাকুরের কুপাপ্রসাদ-রূপে পাইয়াছেন এই পুত্রটিকে—কৃতজ্ঞ হৃদয়ে তাই তাহার নাম রাখিলেন বাসুদেব।

বাসুদেবের বাল্যজীবনের নানা অত্যাশ্চর্য ও অলৌকিক কাহিনী প্রচলিত আছে।<sup>১</sup> একদিন সাথীদের নিয়া সে তাহার খেলায় মাতিয়া আছে। হঠাৎ দেখা গেল, একটি হৃদাস্ত ষাঁড় নিকটস্থ রাস্তা দিয়া হেলিয়া ছলিয়া চলিতেছে। বালক বাসুদেবের কি এক অদ্ভুত যৌক চাপিয়া যায়—তড়িৎবেগে ষাঁড়ের পুচ্ছ ধরিয়া সে ঝুলিয়া পড়ে। ষাঁড়টিও সঙ্গে সঙ্গে উত্তেজিত ও চঞ্চল হইয়া উঠে, দ্রুতবেগে ধাবিত হয় সম্মুখের এক নিবিড় অরণ্যে। সঙ্গী সাথীরা ভয়ে সম্ভ্রান্ত,

১ মধ্ব-শিষ্য পণ্ডিত ত্রিবিক্রম আচার্যের পুত্র নারায়ণ আচার্য মধ্ববিজয় ও মণিমঞ্জরী নামে নানা কাহিনী সংবলিত সংস্কৃত কাব্যগ্রন্থ রচনা করেন। পৌরাণিক ভঙ্গীতে রচিত এই ছইটি গ্রন্থে মধ্ব সম্বন্ধে কতকগুলি অলৌকিক ঘটনার উল্লেখ আছে। মধ্ব জীবনের রূপরেখা অঙ্কনে নারায়ণ আচার্যের রচনা আমাদের সাহায্য করিলেও উগ্র সাম্প্রদায়িকতা ও অযৌক্তিক শব্দ বিবরণিতার কলে গ্রন্থ দুইটির মূল্যহানি ঘটিয়াছে। আচার্য ত্রিবিক্রম, নারায়ণ প্রভৃতি শিষ্যেরা মধ্বকে বায়ুর অবতার বলিয়া মনে করিতেন। মধ্ব বৈষ্ণবদের মতে, পৃথিবীতে যখনই নারায়ণ অবতার-রূপে আসিয়াছেন, তখনই তাহার সহায়ক হইয়া আসিয়াছেন বায়ু। রাম ও কৃষ্ণ অবতারের সহায়ক হনুমান ও ভীম উভয়েই বায়ুপুত্র। শেষ অবতার মধ্বাচার্য।—প্রজ্ঞানানন্দ : বৈদ্যদর্শনের ইতিহাস



আর্তস্বরে সবাই চিৎকার করিতে থাকে, ভট্টগৃহের আশেপাশে মহা সোয়গোল পড়িয়া যায়। ধর্-ধর্ শব্দে সবাই পশ্চাদ্ধাবন করে।

বাসুদেব সেদিন যেন এক উদ্দাম খেলায় মতিয়া উঠিয়াছে। পুচ্ছ হইতে সে যেমন তাহার বজ্রমুষ্টি শিথিল করিবে না, যশুপ্রবরও কোনোমতে হার মানিতে রাজী নয়। বন-বাদাড় কণ্টকময় পথে কয়েক প্রহর ছুটাছুটির পর ক্লাস্তদেহ ঝাঁড়টি অবশেষে মধ্যাগেহের বাড়ির কাছে আসিয়া ভূমিতে লুটাইয়া পড়ে। বালক বাসুদেবের চোখে মুখে তখন তৃপ্তির হাসি ফুটিয়া উঠিয়াছে। সকলের উদ্বেগ-ভরা প্রশ্নের উত্তরে সগর্বে সে তাহার অন্তত বন-ভ্রমণের কাহিনী বর্ণনা করিতে থাকে।

আর এক দিনের কথা। কোনো একটি বিশেষ পার্বণ উপলক্ষে সন্ধ্যার পর ভট্টদম্পতি বাসুদেবকে নিয়া উড়ুপীর অনন্তেশ্বর মন্দিরে গিয়াছেন। স্নান তর্পণ পূজা সমাপন করিতে বেলা গড়াইয়া গেল। তারপর সন্ধ্যার সময় বনপথ দিয়া সবাই গ্রামে কিরিয়া আসিতেছেন, এমন সময়ে হঠাৎ তাহাদের পথ রোধ করিয়া দাঁড়ায় এক ছুট অশরীরী প্রেত। পণ্ডিত মধ্যাগেহ ও বেদবতী ভয়ে জড়সড়া হইয়া পড়েন, কিন্তু বালক বাসুদেবের মধ্যে দেখা যায় এক অন্তত ধরনের প্রতিক্রিয়া। মুহূর্তমধ্যে তাহার চোখ মুখের ভাব তখন একেবারে পরিবর্তিত হইয়া যায়। গ্রীবা সমুন্নত, চোখছটি ক্রোধে আরক্ত হইয়া উঠিয়াছে। একটি পূর্ণবয়স্ক ব্যক্তির মতো দৃঢ়স্বরে ঐ প্রেতের উদ্দেশে বিড়বিড় করিয়া কি এক মারণ-মন্ত্র সে উচ্চারণ করে। প্রেতটি তৎক্ষণাৎ ভীতভাবে তাঁহাদের সম্মুখ হইতে অন্তর্হিত হইয়া যায়। সঙ্গে সঙ্গে বাসুদেবও কিরিয়া আসে তাহার বালক স্বভাবে। ইষ্টনাম জপিতে জপিতে অতি সন্তুর্পণে বালককে বুকে করিয়া ভট্টদম্পতি ঘরে কিরিয়া আসেন।

কিশোর বয়সে বাসুদেবের উপনয়ন অনুষ্ঠান সম্পন্ন হয়। এবার শাস্ত্র অধ্যয়নের জন্ত তাঁহাকে পাঠানো হয় গ্রামের টোলে।

অসাধারণ মেধা ও প্রতিভা বাসুদেবের। অধ্যাপকেরা বিস্মিত হইয়া যান। দেখা যায় কয়েক বৎসরের মধ্যেই বিভিন্ন শাস্ত্র তিনি আয়ত্ত করিয়া ফেলিয়াছেন। তত্ত্বের নির্ণয় ও বিচার বিশ্লেষণে জন্মিয়াছে তাঁহার অসামান্য অধিকার।

ক্রীড়া অঙ্গনেও বাসুদেবের সুখ্যাতি কম নয়। অমিত সাহস, বজ্রকঠিন দেহ, আর হুর্জয় সঙ্কল্প নিয়া যে কোনো প্রতিযোগিতায় অনায়াসে তিনি শীর্ষস্থান অধিকার করিয়া নেন। দক্ষিণ কানাড়ার ব্রাহ্মণদের মধ্যে কুস্তী খেলার প্রচলন খুব বেশী। এই খেলায় বাসুদেব অদ্বিতীয়। তাই সঙ্গীরা রহস্য করিয়া তাহার নামকরণ করে ভীম<sup>১</sup>।

যৌবনে পদার্পণের সঙ্গে সঙ্গে দেখা গেল বাসুদেব পরিণত হইয়াছেন এক পূর্ণাঙ্গ মানবে। ব্যবহারিক ও আত্মিক উৎকর্ষ দুইয়েরই অপূর্ব সমাহার ঘটিয়াছে তাঁহার জীবনে। অসামান্য দৈহিক ও মানসিক শক্তি ও দক্ষতার অধিকারী যেমন তিনি হইয়াছেন, তেমনি অর্জন করিয়াছেন শাস্ত্র-জ্ঞান ও ধ্যান তত্ত্বয়তা। বিচারের শক্তিতেও কম দুর্ধর্ষ তিনি হন নাই।

কয়েকশত বৎসর আগে বাসুদেবের পূর্বপুরুষ ছিলেন কর্মকাণ্ডের অমুগামী, যাগযজ্ঞে বিশ্বাসী। একাদশ শতকের কাছাকাছি ইহাদের মধ্যে এক দূরপ্রসারী পরিবর্তনের সূচনা দেখা যায়। এ সময়ে আচার্য রামানুজের অভ্যুদয় ঘটে এবং তাঁহার অভ্যুদয়ের মধ্য দিয়াই পরিণতি লাভ করে প্রেম-ভক্তি-সিদ্ধ আড়বারদের সাধনা ও মতবাদ। রামানুজীয় ভক্তিবাদ সারা দক্ষিণাত্যে প্রবল ভাববল্য প্রবাহিত করে, শঙ্কর বিরোধী দ্বৈতবাদের প্রভাব নানা স্থানে অমুভূত হইতে থাকে। অনন্তশায়ী বিষ্ণু ও মুরলীধর কৃষ্ণের মহিমা কতকগুলি

১ অনেকের ধারণা, প্রথম জীবনের এইসব দৈহিক পরাক্রমের কথা স্মরণ রাখিয়াই উত্তরকালে মধ্বের অমুগামীরা তাঁহাকে বায়ুপুত্র বা বায়ুর অবতার বলিয়া প্রচার করিতে শুরু করেন। নারায়ণ ভট্ট রচিত মধ্ববিজয় ও মণিমঞ্জরীতে এই বায়ু-তত্ত্বটি বার-বার উল্লেখিত হইয়াছে।

মঠ মন্দির ও সম্প্রদায়কে কেন্দ্র করিয়া ধীরে ধীরে ছড়াইয়া পড়ে। বাসুদেবের পিতা পণ্ডিত মধ্যগেহ ভট্ট ছিলেন ভক্তি রসাম্বিত সাধন-ধারার একজন বিশিষ্ট ধারক ও বাহক। তাঁহার ইষ্ট অনন্তেশ্বর নারায়ণ ; আর গৃহে পূজিত হইতেন শালগ্রাম শিলা। পুত্রের বাসুদেব নামকরণ হইতেও অনুমান করা যায়, মধ্যগেহ ভট্ট বেদান্তী বা কর্মকাণ্ডী সাধক ছিলেন না, সাধন-জীবনে ভক্তিমার্গই তিনি অনুসরণ করিয়া চলিতেন।

বলা বাহুল্য পিতার ঐতিহ্য ও ব্যক্তিত্বের প্রভাব আর গৃহের ভজন-পূজনময় পরিবেশ বাসুদেবের ধর্মীয় আদর্শ ও সাধন-জীবনকে অনেকাংশে প্রভাবিত করিয়া তোলে। অতি তরুণ বয়সেই এই প্রতিভাধর পণ্ডিত পরিণত হন এক শুদ্ধাচারী ভক্তিপরায়ণ সাধকে।

উড়ুপীতে শাস্ত্রবিদ আচার্য ও সাধু-সন্ন্যাসীর সংখ্যা কম নয়। ইহাদের মধ্যে বিভাবত্তা ও সাধনার দিক দিয়া বিশিষ্টতম হইতেছেন আচার্য অচ্যুতপ্রকাশ। বাসুদেব মনে মনে স্থির করিলেন, এবার এই মহাত্মার কাছেই বেদ-বেদান্ত ও ষড়দর্শনের উচ্চতম পাঠ গ্রহণ করিবেন।

একদিন অতি প্রত্যুষে উড়ুপীতে অচ্যুতপ্রকাশের মঠে গিয়া তিনি উপস্থিত। শ্রদ্ধাভরে প্রণাম নিবেদন করিয়া নিজের পরিচয় দিলেন, কহিলেন, “আচার্যবর, অনেক আশা নিয়ে আপনার চরণে শরণ নিতে এসেছি। আপনি আমায় কৃপা করুন, শাস্ত্রতত্ত্বের উপদেশ দিয়ে করুন কৃতকৃতার্থ।”

“বৎস, তোমার পিতা মধ্যগেহ নারায়ণ ভট্টকে আমি জানি। তিনি সুপণ্ডিত এবং বিষ্ণুর উপাসক। তাঁর ছেলে হয়ে আমার মতো অদ্বৈত বেদান্তীর কাছে কেন তুমি শাস্ত্রের পাঠ নিতে এলে? এর রহস্য কি, আমায় তা খুলে বলতো?” জিজ্ঞাসু নেত্রে চেয়ে থাকেন অচ্যুতপ্রকাশ।

“প্রভু, আমি আমার পিতার কাছে শুনেছি, অদ্বৈত বেদান্তী

হয়েও আপনি ভক্তিমার্গের উপর মোটেই খড়্গহস্ত নন। চন্দ্রমৌলীশ্বর শিবের মন্দির আর শেষশায়ী-বিষ্ণু অনন্তেশ্বরের মন্দির, এই দুই পবিত্র পীঠেই রয়েছে আপনার স্বচ্ছন্দ গত্যাত। আর এ কথাও আমি শুনেছি, আপনার গুরু প্রাজ্ঞতীর্থ মহারাজ দশনামী সন্ন্যাসী হয়েও ভক্তিমার্গের প্রতি গভীরভাবে আবুষ্ট ছিলেন। তাই অনেক ভেবে-চিন্তে আপনারই আশ্রমে আমি এসেছি।”

সুন্দর-সুঠামদেহ তরুণ ব্রাহ্মণ শিক্ষার্থীর দিকে সপ্রশংস দৃষ্টিতে তাকাইয়া থাকেন অচ্যুতপ্রকাশ। বাসুদেবের দুই নয়নে প্রতিভার দীপ্তিতে প্রোজ্জ্বল। আননে রহিয়াছে নিষ্ঠা ও সঙ্কল্পের দৃঢ়তা। অচ্যুতপ্রকাশ অন্তরে মহা উৎফুল্ল হইয়া উঠিয়াছেন। বাসুদেবের সঙ্গে কিছুক্ষণ শাস্ত্রালাপের পর স্নেহপূর্ণস্বরে কহিলেন, “বৎস, আমি বুঝতে পারছি, পরমাত্মার কৃপায় তুমি দিব্য প্রতিভা নিয়েই জন্মেছো। একদিন দেশ ও ধর্মের মহা উপকার সাধিত হবে তোমার মনীষায় ও সাধনায়। আমি সানন্দে অনুমতি দিচ্ছি, আমার এ আশ্রমে থেকে উচ্চতর শাস্ত্রপাঠ তুমি গ্রহণ করতে পারো।”

সেদিন উড়ুপীর মঠে আচার্য অচ্যুতপ্রকাশের কাছে আশ্রয় লাভের পর হইতে বাসুদেবের জীবনে শুরু হইয়া গেল এক নতুনতর অধ্যায়।

গ্রাম, সাংখ্য বেদ-বেদান্তের অধ্যয়ন শুরু হয়। অপূর্ব নিষ্ঠায় বাসুদেব এগুলি একের পর এক আয়ত্ত করিতে থাকেন। কিন্তু সব সময়েই দেখা যায়, গুরু অদ্বৈত-বেদান্তের পাঠ শুরু করিলেই বাসুদেব তাঁহার বিরুদ্ধে তুলিয়া ধরেন ভক্তিবাদী ব্যাখ্যা, আপন ক্ষুরধার বুদ্ধি ও অমানুষী মনীষার সাহায্যে প্রয়োগ করেন বিস্ময়কর শাস্ত্র প্রমাণ ও যুক্তিতর্ক। ক্রমে উড়ুপীর বিভিন্ন মঠ-মন্দিরে ও সন্নিহিত অঞ্চলে আচার্য অচ্যুতপ্রকাশের এই প্রতিভাধর ছাত্রের খ্যাতি ছড়াইয়া পড়িতে থাকে।

পুত্র বাসুদেব এখন শাস্ত্রপারঙ্গম। বিজ্ঞাবজ্ঞা ও চরিত্রনিষ্ঠায়ও

বহু লোকের দৃষ্টি তিনি আকর্ষণ করিতেছেন। ভট্টদম্পতির অন্তর তাই গর্বে ও তৃপ্তিতে ভরিয়া উঠিয়াছে।

একদিন অবসরমতো মধ্যগেহ ভট্ট পুত্রকে নিকটে ডাকিলেন। প্রসন্ন কণ্ঠে কহিলেন, “বাসুদেব, তোমার মতো কৃতী পুত্রকে পেয়ে আমি এবং তোমার জননী পরম সুখী। কিন্তু বাবা, এখন তোমার আমাদের ছুজনার একটা অল্পরোধ রাখতে হবে। এবার তুমি গার্হস্থ্য আশ্রমে প্রবেশ করো। সুলক্ষণা একটি পাত্রী আমরা দেখে রেখেছি। তাকে তুমি বিবাহ করো, আর ঘরেই একটি অধ্যাপনার টোল খুলে বসো। সংসারজীবনে তুমি স্থির হয়ে বসলে আমরা একেবারে নিশ্চিন্ত হতে পারি।”

নত শিরে কিছুক্ষণ চুপ করিয়া থাকিয়া বাসুদেব উত্তর দেন, “পিতা, আপনি আমায় মার্জনা করুন। গার্হস্থ্য আশ্রম আমার জন্ম নয়। তাছাড়া, আমি সঙ্কল্প করেছি—অচিরেই একটি শুভদিন দেখে সন্ন্যাস গ্রহণ করবো, এবং আচার্য অচ্যুতপ্রকাশের কাছ থেকেই নেবো দীক্ষা ও সন্ন্যাস।”

ভট্ট চমকিয়া উঠেন। এ কি অদ্ভুত অপ্রত্যাশিত সঙ্কল্প তাঁহার পুত্রের? এ যে বিনা মেঘে বজ্রপাত। আর্ত কণ্ঠে কহেন, “বৎস, কেন এমন মর্মভেদী কথা বলছো? ভেবেছিলাম, তুমি সুপণ্ডিত ও ধর্মনিষ্ঠ আচার্য হবে, যশ অর্থ মানের হবে অধিকারী, আর তোমার হাতে ঘর-সংসারের ভার দিয়ে আমরা দিন কাটাবো ধ্যান ভজন নিয়ে—পরম নিশ্চিন্তে। তোমার তো! সংসার ত্যাগ করা চলে না, বৎস।”

“সংসার অনিত্য বলে, মায়া-বিভ্রম বলে আমি সংসার ছাড়ছি, বাবা। সংসার ছাড়ছি, এ সংসারের প্রভু ত্রীনারায়ণের সেবার লাগবো বলে।” আপনাকে আর জননীকে যে তিনিই রক্ষা করবেন। আমার জীবনের লক্ষ্য চিরতরে স্থির হয়ে গেছে। সঙ্কল্প করেছি, ভক্তি-সাধনভ্রষ্ট এই পৃথিবীতে ভক্তিবাদ নূতন ক’রে প্রচার করতে হবে। আর সে প্রচার হবে শাস্ত্রভিত্তিক। আমি ভেতর থেকে শক্তি

পেয়েছি, উপলব্ধি করেছি—এই দুর্লভ ভগবৎ-কর্মে আমার একটা নির্দিষ্ট ভূমিকা রয়েছে।”

আত্মপ্রত্যয় ও সঙ্কল্পের দৃঢ়তা ফুটিয়া উঠে তরুণ বাসুদেবের চোখে মুখে।

ব্যাকুল কণ্ঠে পিতা কহেন, “বাবা বাসুদেব, তোমায় যে আমরা লাভ করেছি অনন্তেশ্বর নারায়ণের কৃপায়। দীর্ঘদিন ত্রত উপবাস ক’রে প্রভুর চরণে অন্তরের আবেদন জানিয়েছি, প্রসন্ন হয়ে তিনি তোমায় পাঠিয়েছেন আমাদের ঘরে।”

“প্রভুর বরে আমার জন্ম। তাইতো আমার দৃঢ় বিশ্বাস, প্রভুর আদিষ্ট কর্মযজ্ঞেই হবে এ জীবন উৎসর্গিত।”

“সবই তো শুনলাম। কিন্তু বাবা, তুমি যে আমাদের একমাত্র পুত্র। তুমি সন্ন্যাস নিলে, তোমার পিণ্ডদান থেকেও যে আমরা বঞ্চিত হবো। এমনতর অধর্মের কাজ তুমি ক’রো না, বাবা।”

নীরবে দাঁড়াইয়া কিছুকাল আত্মাবগাহন করেন বাসুদেব। তারপর ধীর প্রশান্তকণ্ঠে কহেন, “পিতা, আমার দ্বারা আপনার পারলৌকিক কল্যাণের কোনো ক্ষতি না হয়, তা আমি দেখবো। বেশ, আচার্য অচ্যুতপ্রকাশের আশ্রয়ে থাকলেও, আমার সন্ন্যাস গ্রহণ আমি আপাতত স্থগিত রাখবো। আমার অন্তরাঙ্গা বলছে, অদূর ভবিষ্যতে আমার একটি অমুজ্জ জন্মগ্রহণ করবে। তখন আর আপনাদের পিণ্ডলোপের ভয় থাকবে না। সে ভূমিষ্ঠ হবার পরেই আমি প্রবেশ করবো সন্ন্যাস আশ্রমে।”

পিতৃভক্ত বাসুদেব তাঁহার এ প্রতিজ্ঞা ভঙ্গ করেন নাই। উত্তর-কালে কনিষ্ঠভ্রাতার জন্মের পরই তিনি সংসার ত্যাগ করিয়াছিলেন।

সন্ন্যাস না নিলেও, অচ্যুতপ্রকাশের কাছে দীক্ষা নিতে বাসুদেব বিলম্ব করেন নাই। আচার্যের মঠে থাকিয়া তাঁহার নির্দেশিত পথে অনন্ত নির্ভায় তিনি উদ্‌যাপন করিয়া চলেন তাঁহার সাধনা ও স্বাধ্যায়। অচিরে সমগ্র কানাড়া অঞ্চলে তিনি পরিচিত হইয়া উঠেন এক অসামান্য পণ্ডিত ও সাধকরূপে।

এভাবে বারো বৎসর অতিক্রান্ত হওয়ার পর মধ্যগেহ নারায়ণ ভট্টের গৃহে আবির্ভূত হয় আর একটি পুত্রসন্তান।<sup>১</sup>

এবার বাসুদেবের অভীষ্ট সিদ্ধির পথে আর কোনো বাধা থাকে না, জনক ও জননীর সম্মতি নিয়া তিনি চিরতরে গৃহত্যাগ করেন। পঁচিশ বৎসরের সাধননিষ্ঠ প্রতিভাদীপ্ত জীবনে শুরু হয় সন্ন্যাস আশ্রমের সুকঠোর ব্রত।

শুরু এই নবীন শিষ্যের সন্ন্যাস নাম দেন, পূর্ণপ্রজ্ঞ-তীর্থ। পূর্বাশ্রমে বাসুদেব ছিলেন আচার্য মধ্যগেহের পুত্র, এজ্ঞ আচার্য মধ্ব নামেও তিনি সে অঞ্চলে পরিচিত হইয়া উঠেন।

আচার্য অচ্যুতপ্রকাশের মঠে ছাত্র ও সন্ন্যাসী শিষ্যদের ভিড় লাগিয়াই আছে। নিত্যকার সাধনভজনের সঙ্গে সঙ্গে শিক্ষার্থী ও সাধুরা শাস্ত্রপাঠ ও বিচার বিতর্কে থাকেন সদা তৎপর। আর এ সময়ে নবীন আচার্য মধ্বই ইহাদের মধ্যমণি। বিশেষ করিয়া বেদান্তের ভক্তিবাদী আলোচনায়, ভাগবত ও মহাভারত পুরাণের ব্যাখ্যানে তাঁহার সমকক্ষ কেহ নাই। শ্রায়শাস্ত্রেও মধ্বের দখল অসামান্য। সুযোগ পাইলেই বেদান্তের ভাষ্য নিয়া বর্ষায়ান্ শুরুর সঙ্গে তিনি বিতর্ক বাধাইয়া বসেন, গভীর শাস্ত্রজ্ঞান ও তর্কশক্তির সাহায্যে আচার্য শঙ্করের অদ্বৈতবাদের ক্রটি-বিচ্যুতি উদ্ঘাটন করেন, এই মতবাদের উপর হানেন প্রচণ্ড আঘাত।

শুরু অচ্যুতপ্রকাশ একজন কেবলাদ্বৈতী সন্ন্যাসী হইলেও অন্তরে অন্তরে ভক্তিরসের পরম রসিক। ভক্তি আন্দোলনের একটা নূতনতর প্রোতধারা উড়ুপীর শেষশায়ী নারায়ণ বিগ্রহ অনন্তেশ্বরকে কেন্দ্র করিয়া বিস্তারিত হোক, এই আশা গোপনে এতকাল তিনি পোষণ করিতেছিলেন। এবার প্রতিভাধর নবীন শিষ্য মধ্বকে দেখিয়া, তাঁহার বিরাট প্রতিশ্রুতি লক্ষ্য করিয়া, তিনি মহা উল্লসিত। মনে

১ উত্তরকালে এই শিষ্য পরিচিত হন বিষ্ণুতীর্থ নামে। পিতা ও মাতার দেহান্তের পর তিনিও জ্যেষ্ঠভ্রাতার অনুসরণে সন্ন্যাস গ্রহণ করেন।

প্রাণে সদাই উপলব্ধি করেন, উড়ুপীর মঠে যে উৎস তিনি রচনা করিতেছেন অদূর ভবিষ্যতে তাহার লোকপাবনী কল্যাণধারা ছড়াইয়া পড়িবে ভারতভূমির দিকে দিকে।

কয়েক বৎসরের মধ্যেই মঠের নেতৃস্থ মধ্বের উপর আশ্রয় পড়ে। গুরু তাঁহাকে একদিন ডাকিয়া বলেন, “বৎস, আমার এ দেহ প্রাচীন হয়েছে, অচিরে এটি আরও অপটু হয়ে পড়বে। তাই আমার ইচ্ছে, তুমি এখানকার সন্ন্যাসীদের নেতা হয়ে বসো, আর মঠ পরিচালনার দায়িত্ব নিজ হাতে তুলে নাও।”

এক শুভদিনে অচ্যুতপ্রকাশ স্থানীয় সাধু-সন্ন্যাসী ও সজ্জনদের আহ্বান করেন, সকলের সমক্ষে মধ্বের হাতে তাঁহার উড়ুপী মঠের সর্বময় ক্ষমতা সঁপিয়া দেন। স্নেহপূর্ণ স্বরে কহেন, “বৎস, আজ হতে এই মঠের সমস্ত কর্তব্য সম্পাদনের ভার তোমার ওপর রইলো। এখানকার মঠাধীশরূপে তোমার নূতন নাম হলো— আনন্দ তীর্থ।”

উত্তরজীবনে মধ্বকে তাঁহার সমস্ত শাস্ত্রগ্রন্থ ও ভাষ্যে গুরুদত্ত এই মঠাধীশ-নামই ব্যবহার করিতে দেখা গিয়াছে।

মধ্বের সমকালীন ভারতে, বিশেষত দাক্ষিণাত্যে দার্শনিকতা ও ধর্মীয় মতবাদের দ্বন্দ্ব সংঘর্ষ নিতান্ত কম ছিল না। সারা দেশ তখন বহুতর খণ্ডরাজ্যে বিভক্ত। এই সব রাজসভায় তর্কদক্ষ পণ্ডিতদের সমাদর ছিল প্রচুর। ছোট বড় রাজারা যুদ্ধ বা বাদ-বিসম্বাদে লিপ্ত। পথ-প্রান্তরের অবস্থাও তেমন নিরাপদ নয়। কিন্তু এই অশান্তিময় পরিবেশেও তর্কশূর বা বিচার-মগ্নেরা পরমানন্দে দেশের সর্বত্র ঘুরিয়া বেড়াইতেন। তাঁহাদের সংবর্ধনায় ও বিচার সভার অনুষ্ঠানে রাজা-প্রজা ধনী-নিধন সকলেরই উৎসাহ ও উল্লাসের সীমা থাকিত না।

বিচারমগ্নতার জগৎ ঐ সব শাস্ত্রবিদ পণ্ডিতদের নানা উপাধি দেওয়া হইত। ইহাদের কেউ ছিলেন তর্ক-পঞ্চানন, কেহ বাদীসিংহ, কেউ বা খ্যাত ছিলেন প্রতিবাদী-ভয়ঙ্কর নামে। রাজসভা, মঠ-



মন্দির বা ধর্ম অধিবেশনে এই সব তর্কদক্ষ চূর্ধ্ব পণ্ডিতদের মর্বাদা ছিল অসাধারণ ।

উড়ুপীঠ মঠে মাঝে মাঝে দেশ-বিদেশখ্যাত ভ্রাম্যমাণ পণ্ডিতদের আগমন ঘটিত । ইহাদের সহিত সংঘর্ষের জন্য আচার্য মঞ্চ দীর্ঘদিন যাবৎ নিজেকে প্রস্তুত করিয়া তুলিতেছেন । ইতিমধ্যেই সাধু-সন্ন্যাসী ও পণ্ডিতদের মধ্যে তাঁহার শাস্ত্রজ্ঞান ও বিচার নিপুণতার খ্যাতি কম ছড়াইয়া পড়ে নাই । বিদেশী পণ্ডিতেরা উড়ুপীঠে আসিলেই আচার্য তাঁহাদের সহিত তর্কযুদ্ধে নামিতেন, ভক্তিবাদী ব্যাখ্যা ও বিচারের মধ্য দিয়া করিতেন তাঁহাদের পর্যুদন্ত ।

তর্কযুদ্ধে জয়ী হইলে পাণ্ডিত্যের খ্যাতি বাড়ে, বিপক্ষকে ধরাশায়ী করিয়া একটা আত্মতৃপ্তিও পাওয়া যায়, একথা ঠিক । কিন্তু আচার্য মঞ্চ এইসব দ্বন্দ্ব-সংঘর্ষে উৎসাহী হইতেন আরও একটা বড় কারণে । তাঁহার জীবন একটি গঠনমূলক মহান ঐশ্বরীয় কর্মের জন্য উৎসর্গীত । ভক্তি-আন্দোলনের একটি নূতন ধারা তিনি প্রবর্তন করিতে চান । একাজ করিতে হইলে প্রথমত চাই শঙ্করের অদ্বৈতবাদের খণ্ডন, অপর দিকে চাই রামানুজের বিশিষ্টাদ্বৈতবাদ হইতে একটি পৃথক ও নূতনতর ভক্তিবাদের ধারা উৎসারিত করা ।

এজ্ঞা চাই, প্রথমে শাস্ত্র পারঙ্গম ও বিচারদক্ষ পণ্ডিতদের পরাভূত করা ও স্বমতে আনয়ন করা । নতুবা জনসাধারণ তাহা গ্রহণ করিতে চাহিবে কেন ? এ সময়ে উড়ুপীঠে আসিয়া ষাঁহারাই তর্কযুদ্ধে অবতীর্ণ হইয়াছেন তাঁহারাই মঞ্চের তর্ক-শরজালে হইয়াছেন ভূতলশায়ী ।

প্রিয় শিষ্যের কৃতিত্বে বৃদ্ধ আচার্য অচ্যুতপ্রকাশ আনন্দ ও গর্বে ভরপুর । সেদিন তাঁহাকে নিকটে ডাকাইয়া কহেন, “বৎস মঞ্চ, যে সঙ্কল্প তুমি গ্রহণ করেছো, তাতো শুধু উড়ুপীঠ মঠে বসেই সিদ্ধ হবে না । চূর্ণপ্রাকারের আড়ালে বসে থেকে ক’টি প্রতিপক্ষকে তুমি পরাস্ত করবে ? এবার চূর্ণের বাইরে যাও । আত্মরক্ষার মনোভাব ছেড়ে দিয়ে এগিয়ে পড়ো আক্রমণ করতে । আগে দাক্ষিণাত্যের রাজপুত্র ও মঠ-মন্দিরগুলিতে উপস্থিত হয়ে বিচার-যুদ্ধ আহ্বান

করো। তারপর বেরিয়ে পড়ো সারা উত্তর ভারতের ধর্মনেতাদের প্রতিদ্বন্দ্বী হয়ে।”১

গুরুর নির্দেশ মধ্ব সানন্দে মানিয়া নেন। গুরু হয় সদলবলে তাঁহার দক্ষিণ ভারত পর্যটন ও শাস্ত্রবিচারের অনুষ্ঠান। এ সময়ে বিভিন্ন অঞ্চলের সাধক ও দার্শনিকদের তিনি তর্কযুদ্ধে পরাস্ত করিতে সমর্থ হন। অবশেষে ঘুরিতে ঘুরিতে উপস্থিত হন বিষ্ণুমঙ্গলম তীর্থে। গুরু অচ্যুতপ্রকাশও এস্থানে তাঁহার সহিত মিলিত হইয়াছিলেন।

মধ্ববিজয় ও মণিমঞ্জরীতে বলা হইয়াছে, ঋদ্ধি-সিদ্ধিসম্পন্ন মধ্ব এই সময়ে তাঁহার সঙ্গীদের কাছে কিছু যোগৈশ্বর্য প্রকটিত করেন। পথ চলিতে চলিতে সে-বার সবাই এক নিবিড় অরণ্যের মধ্য দিয়া অগ্রসর হইতেছেন। নিকটে কোনো জনমানব নাই, আশ্রয় বা খাদ্য সংগ্রহের কোনো সম্ভাবনাও দেখা যাইতেছে না। অথচ সঙ্গীরা ক্ষুধা-তৃষ্ণায় অত্যন্ত কাতর হইয়া উঠিয়াছে। এভাবে আর কিছুক্ষণ চলিতে থাকিলে ক্ষুৎপিপাসা ও পথশ্রমে কয়েকজনের জীবনান্ত ঘটিবে সন্দেহ নাই।

এ সঙ্কটে কি করা যায়? ব্যগ্র ব্যাকুল মধ্ব সহযাত্রীদের নিয়া এক বৃক্ষতলে আশ্রয় গ্রহণ করেন। হঠাৎ তাঁহার দেহে দেখা দেয় দিব্য ভাবের আবেশ। এক সঙ্গীর বুলিতে ভুক্তাবশিষ্ট এক টুকরা গুকনা রুটি পাওয়া যায়। ভাবাবিষ্ট মধ্ব অক্ষুটস্বরে বার বার কি যেন বলিতে থাকেন আর ঐ রুটিটি হাত দিয়া চাপিয়া ধরেন। ক্ষণ-পরেই সকলে স্বেচ্ছায় দেখেন—সঙ্গীদের সবার উদরপুষ্টির উপযোগী একরাশ রুটি কোথা হইতে ঐ বুলির মধ্যে আসিয়া গিয়াছে।

১ তখনকার দিনে ভারতের সকল দার্শনিক ক্ষেত্রেই তार्কিকতা বুদ্ধি পাইয়াছিল। একাদশ শতাব্দী হইতে চতুর্দশ শতাব্দী পর্যন্ত ত্যায় ও বেদান্তের ক্ষেত্রে বিচারমঞ্জতা বেশ চলিয়াছে। এই সময়েই তार्কিক শিরোমণি ত্রীহর্ষ মিশ্র, গঙ্গেশ উপাধ্যায়, চিৎস্বখাচার্য, আনন্দবোধ ভট্টারকচার্য, লীলাবতীকার বল্লভাচার্য, বেদান্ত দেশিকাচার্য ও বিদ্যারণ্য মুনীশ্বরের আবির্ভাব। ইহারা সকলেই তार्কিক, এবং এই কয়েক শতাব্দী তार्কিকতারই যুগ বলিলে অত্যুক্তি হয় না।—প্রজ্ঞানানন্দ : বেদান্তদর্শনের ইতিহাস

ভক্ত পণ্ডিত নারায়ণ আচার্যের লেখা গ্রন্থে ষোণবিভূতিসম্পন্ন মন্দের অমানুষী ভোজন সামর্থ্যের একটি চটকদার কাহিনী রহিয়াছে। অনেকের ধারণা, মহাভারতে বায়ুপুত্র ভীমের সম্বন্ধে যাহা বলা হইয়াছে এ কাহিনী অনেকটা তাহারই অনুকরণে রচিত।

নানা অঞ্চলের বিচারসভায় জয়ী হইয়া শিগ্ৰুগণ সহ মঞ্চ এবার ত্রিবেঙ্গামে আসিয়া পৌঁছিয়াছেন। ভক্তিমান ও বিদ্যোৎসাহী বলিয়া এখানকার রাজার খ্যাতি যথেষ্ট। আচার্য মঞ্চ তাঁহার সহিত সাক্ষাৎ করিলেন। আগন্তুক সন্ন্যাসীর নবীন বয়স, চোখে মুখে পাণ্ডিত্য ও প্রতিভার দীপ্তি ছড়ানো। প্রথম দর্শনেই রাজা তাঁহার প্রতি আকৃষ্ট হইলেন। সাদর সংবর্ধনার পর কহিলেন, “সন্ন্যাসীবর, আদেশ করুন, আপনার কোন্ সেবায় নিজেকে আমি নিয়োজিত করতে পারি।”

“মহারাজ, আমি সর্বভ্যাগী সন্ন্যাসী, নিজের সেবার জন্ত আমি মোটেই আগ্রহী নই। এই ভক্তিহীন ভ্রষ্টাচার যুগে ভক্তিবাদ প্রচারের জন্ত আমি কৃতসঙ্কল্প। আপনি কালবিলম্ব না ক’রে একটি বিচার-সভা আহ্বান করুন, সেখানে ভক্তিহীন অদ্বৈতবাদের উপর হানবো আমি চূড়ান্ত আঘাত।”—বীর গম্ভীর স্বরে বলেন আচার্য মঞ্চ।

“আপনি কি রামানুজের বিশিষ্টাদ্বৈতবাদের অনুগামী?”

“না, মহারাজ, আমার ভক্তিবাদ তা থেকে একেবারে পৃথক। আমার মতে, ব্রহ্ম ও জীব নিত্য পৃথক—অর্থাৎ দুটি পৃথক বস্তু। কারণ, ব্রহ্ম হচ্ছেন স্বতন্ত্র, জীব অস্বতন্ত্র। তাই এই দ্বৈতবাদকে বলা হয় স্বতন্ত্র-অস্বতন্ত্রবাদ। এতে রয়েছে শঙ্কর ও রামানুজ দুই-এরই চরম বিরোধিতা।”

“আপনার তত্ত্বের পূর্বসূরী কারা? তাঁদের নাম তো শুনি নি।”

“মহারাজ, সনৎকুমারই এ তত্ত্বের আদি গুরু। ঈশ্বরের কৃপায় আমার মাধ্যমেই এর পুনঃপ্রচার হতে যাচ্ছে।”

“কিন্তু যতিবর, আপনি কি আপনার এই মতবাদের সমর্থনকল্পে ব্রহ্মসূত্রের কোনো ভাষ্য রচনা করেছেন? নইলে দেশের সন্ন্যাসী ও পণ্ডিতসমাজ এ মতবাদ গ্রহণ করবে কেন?”

“মহারাজ, আমার সূত্রভাষ্য বিরাজিত রয়েছে আমার কণ্ঠেই। আপনি সমস্ত বিচার-সভার বাবস্থা করুন, আর প্রতিপক্ষরূপে আমন্ত্রণ জানান কোনো অদ্বৈতবাদী তর্কযোদ্ধাকে।”

“যতিবর, নিকটেই শৃঙ্গেরীতে বিরাজ করছেন আমার গুরুদেব বিদ্যাশঙ্কর মহারাজ। তিনি শুধু শৃঙ্গেরী মঠেরই অধীশ্বর নন, শাক্তর অদ্বৈতবাদের এক শ্রেষ্ঠ স্তম্ভ সারা দাক্ষিণাত্যে। বেশ কথা, ওঁকেই আমি আমন্ত্রণ জানাচ্ছি আপনার প্রতিপক্ষ হিসাবে।”

দুই আচার্যের বিচার-সভা বিরাট চাঞ্চল্যের সৃষ্টি করে। প্রসিদ্ধ পণ্ডিত, সাধক ও অগণিত উৎসাহী জনগণের সম্মুখে শুরু হয় শাস্ত্রীয় যুক্তিতর্কের সূত্রের সংঘাত। নবীন সন্ন্যাসী মধ্ব কিন্তু এই বিচার-দ্বন্দ্বের সেদিন তেমন সুবিধা করতে পারেন নাই। অমায়ুষী প্রতিভার অধিকারী, বর্ষায়ান পণ্ডিত ও সাধক শিরোমণি বিদ্যাশঙ্করের ঐতিহাসিক যুক্তিজাল তিনি ছিন্ন করিতে পারেন নাই। শেষটায় এই শক্তিশ্বর প্রতিপক্ষের কাছে তাঁহাকে পরাজয় স্বীকার করিতে হয়।

এই পরাজয়ের প্লানি মধ্বের জীবনে আনে এক সুদূরপ্রসারী প্রতিক্রিয়া। এখন হইতে শুধু অদ্বৈতবাদের উপরই তিনি খড়াহস্ত হন নাই, আচার্য বিদ্যাশঙ্কর ও শৃঙ্গেরী মঠকেও জ্ঞান করিতে থাকেন তাঁহার প্রধান বৈরীরূপে।<sup>১</sup> বলা বাহুল্য, ত্রিবেঙ্গাম সভার সেদিনকার করুণ অভিজ্ঞতাই মধ্বের বিরোধিতাকে তীব্রতর করিয়া তোলে, আর তাঁহার নিজস্ব দ্বৈতবাদ স্থাপনের সঙ্কল্পকে করে দৃঢ়তর।

তথ্য প্রমাণ হইতে দেখা যায়, ১২২৮ খ্রীষ্টাব্দের কাছাকাছি কোনো সময়ে আচার্য তাঁহার দক্ষিণ-ভারত পর্ষটন শেষ করেন এবং এই পর্ষটনের শেষের দিকেই শৃঙ্গেরীর মঠাধীশ বিদ্যাশঙ্করের সহিত হয়

১ শৃঙ্গেরী মঠ এবং উড়ুপীর মধ্বমঠের দ্বন্দ্ব, বাণাহুবাদ ও শক্রতা দীর্ঘকাল ধরিয়া চলে। কলে মধ্ব ও তাঁহার অনুগামীরা নানাভাবে নিগৃহীত হইতে থাকেন। প্রায় এক শতাব্দীর পর মধ্ব-মত ব্যাপক জনসমর্থন লাভ করিলে উভয় মঠাধীশের মধ্যে মৈত্রী ও সৌজন্যমূলক সম্পর্ক গড়িয়া উঠে।

তঁাহার বিচার বিতর্ক।<sup>১</sup> নবীন সন্ন্যাসী আচার্য মধ্বের বয়স তখন প্রায় ত্রিশ বৎসর।

ত্রিবেঙ্গাম হইতে মধ্ব সরাসরি চলিয়া যান রামেশ্বরধামে এবং সেখানে চারমাস কাল অতিবাহিত করেন নিভৃত তপস্তায়। এখানেও অদ্বৈতবাদী পণ্ডিত ও সন্ন্যাসীরা দলে দলে আসিয়া তঁাহাকে বিচার-বিতর্কে আহ্বান জানাইতে থাকেন। কিন্তু তপস্তাপরায়ণ মধ্বকে এসময়ে তর্কসভায় টানিয়া আনা সম্ভব হয় নাই। আপন মনে ইষ্টধ্যানে নিমগ্ন থাকিয়া তিনি সমাপ্ত করেন তঁাহার চাতুর্য্যশ্রু ব্রত।

অতঃপর সদলবলে তিনি শ্রীরঙ্গমে উপনীত হন। পরমপ্রভু নারায়ণের সেবা-অর্চনায় কিছুদিন কাটানোর পর পালর নদীর তীর ধরিয়া বিষ্ণুকাঞ্চীতে প্রবেশ করেন। সেখান হইতে ফিরিয়া আসেন উড়ুপীতে।

বিষ্ণুকাঞ্চীতে থাকাকালে একটি চাঞ্চল্যকর ঘটনা ঘটে। নারায়ণ আচার্য ইহার বিবরণ দিয়াছেন। এই ঘটনাটির মধ্য দিয়া মধ্বের অলৌকিক প্রতিভার প্রকাশ দেখা যায়। তঁাহার আগমনবার্তা শুনিয়া একদল অদ্বৈতী ও শৈব সন্ন্যাসী তঁাহাকে ঘিরিয়া ধরেন এবং তঁাহাকে নানাভাবে উত্তেজিত করিয়া টানিয়া আনেন শাস্ত্র বিচারের দ্বন্দ্বে। মধ্বের ভিতরে এ সময়ে দেখা যায় এক দিব্য ভাবের আবেশ। শাস্ত্রের এক একটি শব্দের বহুতর অর্থ ও ত্রোতনা তিনি প্রকাশ করিতে থাকেন তড়িৎবেগে ও অনর্গলভাবে। স্বয়ং সরস্বতী যেন এই নবীন সন্ন্যাসীর কণ্ঠে সেদিন আবির্ভূত। বিচারকামী পণ্ডিতেরা তঁাহার এই অমানুষী প্রতিভা ও অলৌকিক প্রজ্ঞা দেখিয়া বিস্ময়ে হতবাক হইয়া যান। বিষ্ণুকাঞ্চী ও শিবকাঞ্চী উভয় স্থানেই মধ্বের জয়জয়কার ধ্বনিত হয়।

উড়ুপীর মঠে ফিরিয়া মধ্ব গুরুদেব অচ্যুতপ্রকাশের পদবন্দনা

১ শৃঙ্গেরী মঠের অধ্যক্ষ-পঞ্জী হইতে দেখা যায়, স্বামী বিদ্যাপ্রসাদ গদীতে আরোহণ করেন ১২২৮ খ্রীষ্টাব্দে। অল্পমিত হয়, ইহার কিছু পরেই মধ্বের সহিত তঁাহার সাক্ষাৎ হয় ও সংঘর্ষ বাধে।

করিলেন। সবিস্তারে বর্ণনা করিলেন নানা তীর্থের নানা বিচার-সভার বিচিত্র অভিজ্ঞতা।

মধ্বের মনোভাব বুঝিতে গুরুর ভুল হয় নাই। প্রশ্ন করিলেন, “বৎস, পর্বটন শেষে তোমার মন এমন ভারাক্রান্ত হয়ে আছে কেন, বলতো?”

মুহু কণ্ঠে মধ্ব নিবেদন করেন, “প্রভু, চলার পথে বহু বিচার-সভার সম্মুখীন হয়েছি। জয় পরাজয় দুই-এরই অভিজ্ঞতা হয়েছে এবং পরাজয় থেকে জয়মালাই লাভ করেছি বেশীর ভাগ স্থানে। আমার আত্মবিশ্বাস বেড়েছে, ভক্তি-সাম্রাজ্য স্থাপনের সঙ্কল্পও আরো দৃঢ় হয়েছে সন্দেহ নেই। কিন্তু প্রভু, ত্রিবেঙ্গামের সভায় শৃঙ্গেরীর অধ্যক্ষের কাছে যেভাবে আমি পরাস্ত হয়েছি তার গ্লানি যে এখনো ভুলতে পারছি নে।”

“ভালোই হয়েছে বৎস। শক্তিমান্ প্রতিপক্ষের হাতে এ ধরনের আঘাতের তোমার প্রয়োজন ছিল। এ আঘাত থেকে নিশ্চয় বৃদ্ধি পেয়েছো, কোথায় কোন্ ত্রুটি-বিচ্যুতি তোমার ভেতর লুকিয়ে রয়েছে। নিজের মতবাদের ভিত্তি আর তার দুর্গপ্রাকার আরো বেশী সতর্কতার সঙ্গে এবার গড়ে তোলো।”

“হ্যাঁ প্রভু, আমি উপলব্ধি করেছি—একটা নূতনতর তত্ত্বপন্থী দ্বৈতবাদ ভারতে আমি স্থাপন করতে চাই, অথচ আমার সপক্ষে নেই আমার এই মতবাদের সমর্থক ব্যাসদেবের বেদান্তসূত্রের কোনো নূতন ভাষ্য।”

“ঠিকই বলেছো, সূত্রভাষ্য ছাড়া দেশের সাধক ও দার্শনিকেরা তোমার নূতন মতবাদ গ্রহণ করবে কেন? তাই আমি বলছি, তুমি অতি সত্বর তোমার মতবাদের সমর্থক একটি গীতাভাষ্য রচনা করো। তারপর কয়েক বৎসর উড়ুপীতে নিবিষ্ট হয়ে বৎসে সমাপ্ত করো ব্যাসসূত্রের ভাষ্য।”

“তারপর?”

“তারপর তুমি হিমালয়ে যাও। মহর্ষি ব্যাসদেবের কৃপালাভের

চেষ্টা করো। নূতনতর সূত্রভাষ্য হাতে নিয়ে—দৃপ্তকণ্ঠে ঘোষণা করো নূতন ভক্তিবাদ এবং তারপর শুরু হোক উত্তর ভারতে তোমার বিজয়-অভিযান। বৎস, স্মরণ রেখো, শৃঙ্গেরী মঠই ভারতবর্ষ নয়। আর শুধু শাক্তর মতই তোমার প্রতিপক্ষ—নয়। শাক্তর অদ্বৈতবাদ ছাড়াও তোমার যুগে হবে ভাক্তর, রামানুজ প্রভৃতির মতবাদের বিরুদ্ধে। তাই এখন থেকে তোমার প্রস্তুতিকে আরো দৃঢ়ভেদ, আরো নিখুঁত ক'রে তোলা।”

শুরুর এই নির্দেশ মধব মানিয়া নেন, রত হন নিজ মতের সমর্থক ভাষ্য রচনায়। কয়েক বৎসরের মধ্যে আরক্ত কার্য সমাপ্ত হইয়া গেল। এবার তাঁহার দৃষ্টি পড়িল উত্তর ভারতের আধ্যাত্মিক প্রাণকেন্দ্র বারাণসী ও হরিদ্বারের দিকে।

মধব মনে মনে স্থির করিলেন, প্রথমে স্বরচিত সূত্রভাষ্য নিয়া বারাণসীতে যাইবেন। সেখানকার সন্ন্যাসী, দার্শনিক ও পণ্ডিত সমাজ তাঁহার যে সমালোচনা করিবেন, তদনুযায়ী করা হইবে ভাষ্যের পরিবর্তন। তারপর হিমালয়ে গিয়া মাগিবেন ব্যাসদেবের আশীর্বাদ। এই আশীর্বাদে বলীয়ান হইয়া হরিদ্বারে নামিয়া আসিবেন—ঘোষণা করিবেন তাঁহার নূতনতর ভক্তিবাদ।

মূল্যবান পুঁথিপত্র ঝুলিতে জরিয়া মধব পদব্রজে উত্তর ভারতে দিকে রওনা হইলেন। সঙ্গে রহিল কয়েকটি অন্তরঙ্গ শিষ্য ও একদল তীর্থযাত্রী।

তখনকার দিনে তীর্থ পর্যটনে আপদ বিপদের অন্ত ছিল না। পথিমধ্যে প্রায়ই অতিক্রম করিতে হইত বড় বড় অরণ্য। এই সব অরণ্যে ছিল হিংস্র বাঘ ও সাপের ভয়, ইহা হইতেও বিপজ্জনক ছিল দস্যু ভয়। পথচারীরা ধনী কি নির্ধন, গৃহস্থ কি সন্ন্যাসী, কোনো কিছু বিচার তাহারা করিত না। সন্ধ্যোগ পাইলেই অতিক্রান্তে কাঁপাইয়া পড়িয়া পথিকের সর্বস্ব লুটিয়া নিত।

এই চলার পথে সঙ্গিগণসহ আচার্য মধবকেও বার বার কম বিপদে

পড়িতে হয় নাই। কিন্তু কখনো ঈশ্বরের অমুগ্রহে, কখনো বা তাঁহার নিজের যোগশক্তির বলে আচার্য ও তাঁহার সঙ্গীরা চরম বিপদ ও লাঞ্ছনার হাত হইতে রেহাই পাইয়াছেন। নারায়ণ আচার্য তাঁহার মধববিজয়ে এ ধরনের নানা অভ্যাশ্চর্য কাহিনীর বিবরণ দিয়াছেন :

মহারাষ্ট্রের খণ্ডরাজ্য দেবগিরিতে সেবার এক কৌতুকাবহ ঘটনা ঘটে। এখানকার রাজা মহাদেব অল্প কিছুদিন আগে সিংহাসনে আরোহণ করিয়াছেন। তরুণ বয়স তাঁহার, অন্তরে উৎসাহ উদ্দীপনার অবধি নাই, জনসাধারণের কল্যাণের জন্ত এক দীর্ঘ খাল খননের কাজে তিনি হাত দিয়াছেন। প্রকল্প অতি বৃহৎ এবং অল্প সময়ের মধ্যে তাহা সমাপ্ত করিতে হইবে। তাই রাজা মহাদেব অনেক সময় নিজে দাঁড়াইয়া থাকিয়াই খননের কাজ পরিদর্শন করেন।

ঢোল শোহরত করিয়া রাজার আদেশ জানানো হইয়াছে। যে কোনো পঞ্চারীই এই খালের নিকটবর্তী অঞ্চল দিয়া যাতায়াত করিবে, খননের কার্যে তাহাকে দিতে হইবে অন্তত একদিনের কায়িক পরিশ্রম। কাঁকি দিয়া কেহ এই কাজ এড়াইয়া না যায়, এ জন্ত রাজার ভারী কড়া ব্যবস্থা।

মধব ও তাঁহার শিষ্যেরা একদল তীর্থযাত্রীর সঙ্গে সেদিন খালের পাশ দিয়া যাইতেছেন। প্রহরীরা তাঁদের আটক করিল। রাজার আদেশ শুনাইয়া দিয়া কহিল, “এবার তোমাদের ঝোলাঝুলি রেখে, কোদাল হাতে খাদের ভেতর নেমে পড়ো।”

মধবের শিষ্য ও সঙ্গীরা বুঝান, “ভাই, আমরা সাধু-সন্ন্যাসী। গঙ্গাতীরের তীর্থদর্শনে যাচ্ছি। রাজা যে আইন করেছেন, তাঁর গৃহস্থ প্রজারা তা মেনে চলবে। ভিন্দেশী মানুষ, পরিব্রাজক সাধু-সন্ন্যাসী, এদের ওপর তো এ আইনের প্রয়োগ চলতে পারে না।”

কিন্তু কে কাহার কথা শোনে? রাজরক্ষীরা জোর চেষ্টামেচি ও গালাগালি শুরু করিয়া দিল।

পাত্রমিত্র সঙ্গে নিয়া দেবগিরি-রাজ সেদিন খাল-খননের কাজ



নিজেই পরিদর্শন করিতে আসিয়াছেন। রক্ষী ও সাধুদের সোরগোল শুনিয়া সেদিকে তিনি উপস্থিত হন। গম্ভীর স্বরে প্রশ্ন করেন, “ব্যাপার কি? কাজকর্ম না ক’রে এখানে এত হট্টগোল করা হচ্ছে কেন?”

রক্ষীদের পক্ষ হইতে সব বলা হইবার পর মঞ্চ রাজাকে উদ্দেশ্য করিয়া কহেন, “মহারাজ, প্রজাসাধারণের মঙ্গলের জন্ত আপনি এই খাল খননের কাজে হাত দিয়েছেন, খুবই ভালো কথা। কিন্তু এতে সাধু-সন্ন্যাসীদের ধরে টানাটানি কেন?”

“রাজার বিধান সাধু ও অসাধু সবার ওপরই প্রযোজ্য।”

“কাজের দায়িত্ব প্রধানত রাজার আর তাঁর গৃহস্থ প্রজাদের। সাধু-সন্ন্যাসীরা কেন এতে কার্যিক পরিশ্রম দিতে যাবে?”

“কেন, সাধু-সন্ন্যাসীরা কি সমাজ থেকে কিছু পান না? তাঁদের খাওয়া-পরা চলে কোথা থেকে? জনসাধারণ তাঁদের খাবার যোগায়, প্রতিদানে জনকল্যাণের কাজে কিছুটা ভাগ তাঁদের নিতে হবে বৈ কি?”

“মহারাজ, আপনি ভ্রান্ত। সাধু-সন্ন্যাসীর কাজকে আপনি স্থূল দৃষ্টিতে দেখছেন কেন? আসলে তাঁদের কাজ সম্পন্ন হয় সুক্ষ্ম স্তরে। তাঁদের ত্যাগ তিতিক্ষা, প্রেরণা ও আশীর্বাদ সর্বত্র এনে দেয় প্রকৃত কল্যাণ।”

বিরক্তির সুরে রাজা মহাদেব বলিয়া উঠেন, “আপনার এতো কিছু তত্ত্বকথা শোনার সময় আমার নেই। রাজ-সরকার থেকে যে আদেশ প্রচার করা হয়েছে, সবাইকে নির্বিচারে তা মেনে চলতে হবে। আর এক মুহূর্ত দেরি না ক’রে খাল খননের কাজে আপনারা সবাই নেমে পড়ুন।”

“বেশ, মহারাজের আদেশমতোই কাজ হবে, কিন্তু তার আগে একটা ক্ষুদ্র নিবেদন আছে।”—বিনীতভাবে বলেন আচার্য মঞ্চ।

“কি আপনার সেই নিবেদন?”

“মহারাজ, আপনি এ রাজ্যের অধীশ্বর, প্রজাদের পিতা, রক্ষা-

কর্তা। প্রজার মঙ্গলের জন্ত পবিত্র অনুষ্ঠান আপনি শুরু করছেন, তাতে আপনার মঙ্গল হস্তের স্পর্শ থাকা উচিত। এতো বড় একটা কাজ হতে যাচ্ছে, কিন্তু তাতে আপনার স্পর্শ পড়েছে কি?”

“না, তা পড়ে নি বটে,”—নরম সুরে স্বীকার করেন দেবগিরির রাজা।

“সে ভুল আজই এখনি সংশোধন করুন মহারাজ। আনুষ্ঠানিক-ভাবে কিছুটা মাটি কেটে তা মাথায় নিয়ে আপনি দূরে কেলো আসুন, এতে আপনার কর্তব্য যেমন করা হবে, তেমনি প্রজারাও পাবে উৎসাহ ও প্রেরণা।”

“আপনি ঠিকই বলেছেন, সন্ন্যাসীবর। আমি সানন্দে এখনি খাল-খননের কাজে হাত লাগাচ্ছি।”—বলার সঙ্গে সঙ্গে কোদাল ও বুড়ি নিয়ে রাজা খালের ভিতর নামিয়া পড়েন।

খনন শুরু করার সঙ্গে সঙ্গে রাজা যেন ভূতাবিষ্ট হইয়া যান। দুই চক্ষু রক্তবর্ণ, নাসিকায় বহিতেছে ঘন ঘন দীর্ঘশ্বাস। যন্ত্রচালিত মানুষের মতো কেবলই বুড়ি-বুড়ি মাটি কাটিয়া চলিয়াছেন, একাজে শ্রান্তি নাই, ক্লান্তি নাই, নাই কোনো বিরতি। প্রহরের পর প্রহর অবিবাহিত হইতেছে, কিন্তু বহু চেষ্টা করিয়াও রাজাকে কেহ ধমাইতে পারিতেছে না। তবে কি তিনি উন্মাদ হইয়া গেলেন? অথবা কোনো অশরীরী প্রেত তাঁহার উপর ভর করিয়াছে? মন্ত্রী ও রাজপারিষদেরা কিংকর্তব্যবিমূঢ় হইয়া ইতস্তত ছুটাছুটি করিয়া বেড়াইতেছেন। প্রাসাদে খবর দেওয়া হইল, রানী ও পুত্রনারীরা ভীত সন্ত্রস্ত হইয়া কান্না জুড়িয়া দিলেন।

তবে ইতিমধ্যে সবাই বুঝিয়া নিয়াছেন, রাজার এই অস্বাভাবিক অবস্থার জন্ত দায়ী সন্ন্যাসীবর মঞ্চ। মঞ্চের এক শিষ্য অতঃপর ব্যাপারটা ফাঁস করিয়া দেন। মুচকি হাসিয়া কহেন, “রাজার দুর্ভাগ্য, আমাদের আচার্য যে কত বড় মহাপুরুষ তা তিনি বুঝতে পারেন নি। মঞ্চ হচ্ছেন বায়ুর অবতার, প্রভু নারায়ণের লীলার প্রধান সহায়ক। রাজার ওপর তিনি ক্রুদ্ধ হয়েছেন, তাই বায়ুর ভর হয়েছে রাজার

ওপর। আচার্যকে প্রসন্ন না করলে, এবার রাজার আর রক্ষা নেই, এভাবে দিনরাত, বৎসরের পর বৎসর, তাঁকে মৃত্তিকা খনন ক'রে যেতে হবে।”

অতঃপর সবাই মিলিয়া মন্ধের চরণে বার বার ক্ষমা প্রার্থনা করিতে থাকে। আচার্যের ক্রোধ প্রশমনের সঙ্গে সঙ্গে দেবগিরি-রাজের ভূতাবিষ্ট ভাব কাটিয়া যায়। সম্পূর্ণরূপে তিনি সুস্থ ও স্বাভাবিক হইয়া উঠেন।

এবার স্বজনগণসহ রাজা মন্ধের চরণে প্রণত হন, তাঁহার কৃপা ভিক্ষা করেন। প্রসন্ন মনে রাজাকে আশীর্বাদ জানাইয়া মধ্ব বলেন, “মহারাজ, একটা কথা সদাই স্মরণ রাখবেন, সাধু-সন্ন্যাসীরা কর্ম ও ধ্যান মননের ভেতর দিয়েই সমাজের প্রকৃত কল্যাণসাধন ক'রে যাচ্ছেন। ভগবান্ ত্রীনারায়ণের দর্শন ক'জন পায়? কিন্তু নারায়ণের চিহ্নিত সেবক সাধু-সন্ন্যাসীদের দর্শন সবাই অনায়াসে পেতে পারে; এঁদের ভেতর দিয়েই পৃথিবী আর বৈকুণ্ঠের ভেতর রচিত হয় যোগ-সূত্র। তাই লক্ষ্য রাখবেন, আপনার রাজ্যে সাধুদের অমর্যাদা যেন না হয়। আশীর্বাদ জানাচ্ছি, আপনার এই খাল খননের কাজ অতি অল্প সময়ের মধ্যে সমাপ্ত হবে।”

অনুতপ্ত দেবগিরি-রাজ মন্ধের কাছে ক্ষমা ভিক্ষা করিয়া নিলেন। এই রাজ্যে কিছুদিন অবস্থানের জন্ত তাঁকে সাহুনয় অনুরোধও জানাইলেন, কিন্তু তাঁহাকে আর ধরিয়া রাখা গেল না।

আচার্য মন্ধের আশীর্বাদ অচিরে ফলিয়া যায়। রাজা মহাদেব স্বহস্তে কোদাল দিয়া সারাদিন খাল কাটিয়াছেন এ সংবাদ বিদ্যাৎ-বেগে ছড়াইয়া পড়ে। সহস্র সহস্র প্রজা উৎসাহে মাতিয়া উঠে; খাল খননের কাজে লাগিয়া যায়। রাজার মনস্কামনা পূর্ণ হয়।

পণ্ডিত নারায়ণ আচার্য মণিমঞ্জরীতে পরমগুরু মন্ধের যোগ-বিভূতি প্রদর্শনের কয়েকটি ঘটনা উল্লেখ করিয়াছেন :

পরিত্রাজনের পথে মধ্ব ও তাঁহার শিষ্যগণ সেবার উত্তর-পশ্চিম

ভারতের এক তুর্কী-মুসলমান রাজার সীমান্তে আসিয়া পৌঁছিয়াছেন। রাজ্যে প্রবেশ করিতে যাইবেন এমন সময় রক্ষী সেনারা তাঁহাদের বাধা দিল। কিন্তু আচার্য মধব পিছু হটিবার পাত্র নন, সেনাদলের সম্মুখে দাঁড়াইয়া তিনি কতকগুলি বিশেষ গুপ্তা প্রদর্শন করিলেন, সঙ্গে সঙ্গে ঐ সেনাদলটি মন্ত্রমুগ্ধ সর্পের মতো তাঁহার বশীভূত হইয়া পড়িল।

জনশ্রুতি আছে, মধব অতঃপর সরাসরি ঐ মুসলমান রাজার সকাশে গিয়া উপস্থিত হন। আচার্য তুর্কী ভাষা কোনোকালেই শিখেন নাই। কিন্তু সকলে সর্বস্বয়ং দেখিলেন, বিদেশী ভিন্নধর্মী রাজার সহিত বিদেশী ভাষাতেই অবলীলায় তিনি কথাবার্তা চালাইয়া গেলেন।

মধবের সুগৌরব স্মৃতিম দেহ, দিব্যকান্তি ও প্রথর ব্যক্তিত্বে মুসলমান রাজা একেবারে মুগ্ধ। বার বার তিনি অনুরোধ জানান, আচার্য আরো কিছুকাল তাঁহার রাজ্যে সশিষ্ট বসবাস করুন; তাঁহাদের সেবা-পরিচর্যার জন্য যে কোনো পরিমাণ অর্থব্যয়ে রাজা কুণ্ঠিত হইবেন না। কিন্তু মধবের পক্ষে আর সেখানে বিলম্ব করা সম্ভব নয়। তুর্কীরাজকে আন্তরিক শুভেচ্ছা জানাইয়া সেখান হইতে তিনি বিদায় গ্রহণ করিলেন।

মধবের প্রিয় শিষ্য, একান্ত সেবক, সত্যতীর্থ সে-বার এক মহা-সঙ্কটে পতিত হন। পথ চলিতে চলিতে সাধুরা সবাই এক বিস্তীর্ণ অরণ্যের সম্মুখে আসিয়া উপস্থিত। সন্ধ্যার আর বেশী দেরি নাই, খানিক বাদেই চারিদিকে নামিয়া আসিবে ঘন অন্ধকার। এই সময়ে এই দীর্ঘ বনের মধ্য দিয়া পথ চলা কঠিন। তাই ভাবিয়া-চিন্তিয়া সবাই স্থির করিলেন, আজিকার মতো এখানেই বিশ্রাম করা যাক, কাল প্রত্যুষে ডেরা-ভাণ্ডা উঠানো যাইবে।

সত্যতীর্থ তাঁহার ঝোলাঝুলি নামাইয়া তাড়াতাড়ি ঐ বনের দিকে চলিয়া গেলেন। গুরু মহারাজের রাত্রের আহ্বানের জন্য কিছু কলমূল এখনি তাঁহার সংগ্রহ করা চাই।

কিছুকাল পরেই বনমধ্যে শোনা গেল এক হিংস্র বাঘের গর্জন।

সকলেই মহা উৎকণ্ঠিত । বেচারী সত্যতীর্থ এই বাঘের মুখে পড়ে নাই তো ? দলবল নিয়া আচার্য মধ্ব তখনই সেইদিকে ছুটিয়া গেলেন ।

বনের ভিতর প্রবেশ করিতেই যে দৃশ্য দেখা গেল, তাহাতে সকলেরই চক্ষুস্থির !

সত্যতীর্থ একটি বৃক্ষে আরোহণ করিয়াছে ফল-পাকড় সংগ্রহ করার জন্য । আর তাহার অনতিদূরেই—থাবা গুটাইয়া বসিয়া আছে এক প্রকাণ্ড হিংস্র বাঘ । ভাঁটার মতো দুই চোখ জলজল করিতেছে । বৃক্ষস্থিত শিকারের দিকে লুক্ক দৃষ্টিতে তাকাইয়া মাঝে মাঝে ছাড়িতেছে হুঙ্কার-ধ্বনি ।

শমন-সদৃশ এই বাঘকে দেখিয়া সাধুরা সবাই ভীত সন্ত্রস্ত । এমন সময়ে আচার্য মধ্বের দেহে দেখা গেল এক দিব্য ভাবের আবেশ । ভাবকম্পিত দেহে, ধীরপদে ঐ বাঘের দিকে তিনি অগ্রসর হইয়া গেলেন । সন্মোহিতের মতো বাঘটি কিন্তু স্থির হইয়া বসিয়া আছে, চোখ দুইটি নিম্পলক, তর্জন-গর্জন একেবারে স্তব্ধ । উহার সম্মুখে দাঁড়াইয়া মধ্ব নীরবে কয়েকবার হস্ত সঞ্চালন করিলেন । সঙ্গে সঙ্গে হিংস্র বাঘ মাথা নত করিল, সেন্ধান ত্যাগ করিয়া ধীরে ধীরে প্রবেশ করিল গভীর বনাঞ্চলে ।

সবাই এবার হাঁক ছাড়িয়া বাঁচিলেন ; সত্যতীর্থকে গাছ হইতে নামাইয়া আনা হইল ।

সত্যতীর্থ যুক্ত করে নিবেদন করিলেন, “গুরুদেব, আপনার প্রতি কৃতজ্ঞতা প্রকাশের চেষ্টা আমি করবো না । কারণ, আপনার চরণেই নিজেকে আমি বিকিয়ে দিয়েছি । কিন্তু একটি প্রশ্ন আমি না করে পারছি নে । আমার মতো নগণ্য মানুষকে বাঁচানোর জন্য আপনি কেন আপনার অমূল্য জীবন আজ বিপন্ন করতে গিয়েছিলেন ?”

প্রশান্ত কণ্ঠে গুরু কহিলেন, “বৎস, তোমার জীবন যে বিষ্ণু-ভগবানের কর্মে উৎসর্গ করা । ঐশ্বরীয় কর্ম সম্পন্ন করার জন্য তোমার বেঁচে থাকা প্রয়োজন আছে । তুমি আমার গীতাভাষ্য ও শ্রুতভাষ্যের অনুলিপি লিখেছো । সেবার ও কর্মে নানাভাবে আমার

সাহায্য করেছে। ঈশ্বরের আদিষ্ট কাজে আরো অনেক সাহায্য তুমি করবে। এই কথাটাই তো হিংস্র বাঘটাকে আকারে ইঙ্গিতে আমি বুঝিয়ে বললাম। তাই তো সে আর কোনো দ্বিধাক্তি না ক'রে তোমায় ছেড়ে চলে গেল।”

নিজের যোগবিভূতির কথা, ঐ অলৌকিক ঘটনার কথা, মধ্ব কি সহজভাবেই না বর্ণনা করিলেন! শিষ্য ও সঙ্গীরা সবিস্ময়ে তখন একে অন্তের মুখের দিকে তাকাইতেছেন।

দীর্ঘ পরিত্রাজনের শেষে আচার্য মধ্ব এবার বারাণসীতে আসিয়া উপস্থিত হন। এখানকার প্রধান প্রধান মঠ-মণ্ডলীর সহিত তাঁহার ঘনিষ্ঠতা হয়। গীতাভাষ্য ও ব্রহ্মসূত্র ভাষ্যে যে নূতন দ্বৈতবাদী ভক্তিব্যবস্থা তিনি ব্যাখ্যা করিয়াছেন, সে সম্বন্ধে স্থানীয় সাধক ও পণ্ডিতদের সহিত তাঁহার মত বিনিময়ের সুযোগ ঘটে। অতঃপর নিজের মতবাদের শাস্ত্রাভিত্তিকে আরো দৃঢ় করিয়া নিয়া মধ্ব উপনীত হন পবিত্র সাধন-ধাম হরিদ্বারে।

মধ্বের অনেক দিনের আশা, ব্যাসগুহায় বসিয়া প্রাণ ভরিয়া তপস্বী করিবেন, লাভ করিবেন ত্রীনারায়ণের অবতার ব্যাসদেবের পুণ্যময় দর্শন। তারপর তাঁহার চরণে সমর্পণ করিবেন স্বরচিত বেদান্তসূত্রের ভাষ্য। সে আশা এবার এতদিনে পূর্ণ হইল। দীর্ঘ ধ্যান-মননের কলে মহামুনি ব্যাস জ্যোতির্ময় মূর্তিতে আবির্ভূত হইলেন তাঁহার নয়ন সমক্ষে। যুহু মধুর হাশ্বে সূত্রের ভাষ্য স্বহস্তে তুলিয়া নিয়া তাঁহাকে করিলেন কৃতকৃতার্থ।

মহামুনি অতঃপর কহিলেন, “মধ্ব, তোমার প্রতি আমি প্রসন্ন। তোমার মতবাদ ভারতীয় দর্শনকে পুষ্ট করেছে, এ যুগের ভক্তিব্যবস্থারও করেছে বিস্তার সাধন। ভক্তিবাদ প্রচারের দিকে দৃষ্টি রেখে এবার তুমি মহাভারতের তাৎপর্য নির্ণয়কারী একটি গ্রন্থ রচনা করো। এতে তোমার আরও পুণ্যকর্ম হয়ে উঠবে সহজতর।”

মধ্বের হাতে একটি সম্পূর্ণ তুলিয়া দিয়া স্নেহভরে আরো কহিলেন,

“বৎস, এতে রয়েছে তিনটি পরম পবিত্র শালগ্রামশিলা। দেশে ফিরে গিয়ে এই শিলা যে-যে স্থানে তুমি স্থাপন করবে সেই সেই স্থান পরিচিত হয়ে উঠবে আগ্রত পীঠ রূপে।”<sup>১</sup>

এই অযাচিত করুণায় মব্ব একেবারে অভিভূত। দুই নয়নে বহিতেছে আনন্দের অশ্রুধারা। মহামুনির চরণে সাষ্টাঙ্গ প্রণিপাত জানাইয়া, গুহা হইতে তিনি বাহির হইয়া আসেন।

হিমালয় ক্রোড়স্থিত মহাতীর্থগুলি পরিভ্রাজন করার পর মধ্ব সমতল ভূমিতে অবতরণ করেন। এবার হইতে অধ্যাত্ম-ভারতের বৃহত্তর রঙ্গমঞ্চে আসিয়া তিনি দাঁড়ান, শুরু হয় ভক্তিসিদ্ধি মহাসাধক, দ্বৈতবাদী মহাদার্শনিক, মধ্বাচার্যের অবিস্মরণীয় ভূমিকা।

নানা সম্প্রদায়ের বৈষ্ণবদের ভিতর মধ্ব-অনুগামীরা হইতেছেন আপোসহীন কট্টর দ্বৈতবাদী।

সারা জীবন মধ্ব শঙ্করের কেবলাদ্বৈতবাদের বিরুদ্ধে সংগ্রাম করিয়াছেন, নিজের গ্রন্থসমূহে উপস্থাপিত করিয়াছেন প্রচুর শাস্ত্রীয় উদ্ধৃতি, যুক্তিতর্ক ও তথ্য-প্রমাণ। কিন্তু একথাও স্বীকার করিতে হইবে যে, শঙ্করের মতবাদ খণ্ডন করিতে গিয়া ঋতি অপেক্ষা স্মৃতির উপরই তিনি নির্ভর করিয়াছেন, বেদ-উপনিষদ অপেক্ষা পুরাণশাস্ত্রের সহায়তাই নিয়াছেন বেশী।

রামানুজের বিশিষ্টাদ্বৈতবাদ বৈষ্ণব আন্দোলনের এক বড় ভিত্তি। মধ্ব কিন্তু তাঁহার এই সর্বজনশ্রদ্ধেয় পূর্বসূরীর মতবাদের উপরও আঘাত হানিতে পশ্চাদপদ হন নাই।

মধ্ব মতের প্রধান ভিত্তি ভেদবাদ। ঈশ্বর ও জীব, সেব্যবস্ত্ত ও সেবক নিত্য পৃথক, নিত্য ভেদযুক্ত। শুধু তাহাই নয়, ঈশ্বর স্বভক্ত, আর সবই অস্বভক্ত বা ঈশ্বর-নির্ভর। তাঁহার এই দ্বৈতবাদ দার্শনিক

১ এই পরম পবিত্র শিলাত্রয় মধ্বাচার্য সাড়ফরে প্রতিষ্ঠা করেন হুভ্রঙ্গা, উড়ুপী ও মধ্যতল এই তিনটি মঠে।

মহলে স্বতন্ত্র-অস্বতন্ত্রবাদ নামে পরিচিত। মধ্বপন্থীরা নিজেদের সম্প্রদায়কে বলেন—সদ্বৈষ্ণব।

মধ্বাচার্য ব্রহ্ম বা পরমাত্মার স্থলে স্থাপন করিয়াছেন বিষ্ণু বা নারায়ণকে। তিনি বলেন, সৃষ্টির আদিতে বিরাজিত ছিলেন এক ও অদ্বিতীয় আনন্দস্বরূপ ভগবান্ নারায়ণ, তখন ব্রহ্মা বা শিব কেহই ছিলেন না।<sup>১</sup>

সেই বিষ্ণুর দেহ হইতেই সৃষ্টি হইয়াছে এই বিশ্বচরাচর<sup>২</sup> এবং এই বিষ্ণু বা নারায়ণই একমাত্র সৎ বস্তু, অশেষ সদ্বশুণের আধারও তিনি বটে। তিনি নির্দোষ ও স্বতন্ত্র, তাহা ব্যতীত আর সমস্ত কিছুই অস্বতন্ত্র অর্থাৎ ঈশ্বরের অধীন।<sup>৩</sup>

জীব ও ঈশ্বরের এই কেবল-ভেদ ছাড়া আচার্য আরও পাঁচ প্রকার ভেদের অস্তিত্ব সমর্থন করিয়াছেন। জীব ও ঈশ্বরে ভেদ, জড় ও ঈশ্বরে ভেদ, জড় ও জীবের ভেদ এবং জীবসমূহ ও জড় পদার্থ-সমূহের আভ্যন্তরীণ ও পরস্পর ভেদ—এই পঞ্চ ভেদকে তিনি বলিয়াছেন প্রপঞ্চ।<sup>৪</sup>

আচার্যের মতে, জীবের মোক্ষ বা মুক্তি তখনই হয় যখন তাহার জন্ম-মৃত্যুর শাতায়াত বা পুনর্জন্মের অবসান ঘটে এবং সে যখন বৈকুণ্ঠে নারায়ণের কাছে স্থিতি লাভ করে।

তিনি আরও বলেন, মুখ্য প্রাণবায়ুর উপাসনাই শ্রেষ্ঠ—এবং নারায়ণের পুত্র বায়ুর কৃপা ছাড়া জীবের মোক্ষলাভের কোনো সম্ভাবনা নাই। মধ্বের অনুগামী বৈষ্ণবদের বিশ্বাস, এ যুগে মধ্বই হইতেছেন

১ একো নারায়ণ আসীৎ ন ব্রহ্মা ন চ শব্দরঃ,

আনন্দ এক এবাৎ আসীন্নারায়ণঃ প্রভু ॥

২ বিষ্ণোর্দেহাজ্জগৎ সর্বমাবিরাসীৎ ।

৩ মহোপোনিষদের—“যথা পক্ষী চ নৃজ্ঞঃ নানা বৃক্ষসো যথা”—ইত্যাদি শ্লোকে আচার্য মধ্বের স্বৈত্ববাদের কতকটা আভাস পাওয়া যায়।

৪ বিশ্বকোষ, পৃঃ ১০২।



বান্ধুর অবতার ; তাই তিনিই মানুষের ত্রাণকর্তা । পুণ্যকর্মের জন্ত মধ্য ব্যবস্থা দিয়াছেন অক্ষয় স্বর্গবাস, আর মধ্য বৈষ্ণববাদের বিরোধী ব্যক্তিদের জন্ত ব্যবস্থা করিয়াছেন অনন্ত নরকবাস ।<sup>১</sup>

মধ্বের মতবাদ অনুসারে জীবাত্মা স্বাভাবিকভাবেই অবিভা দ্বারা আবৃত । এই অবিভা দূর হয় এবং মোক্ষলাভ সম্ভব হয় ভগবানের স্বরূপ সম্বন্ধে জ্ঞান লাভের পর । উন্নতশ্রেণীর জীবাত্মারাই এই জ্ঞান লাভ করিতে পারে এবং এজন্য তিনি প্রচার করিয়াছেন আঠারোটি অনুশাসন । এগুলির মধ্যে প্রধান হইতেছে—বৈরাগ্য, শম, দুর-সেবা, ভগবৎ-চরণে ভক্তি, উপাসনা, পূর্বমীমাংসা অনুযায়ী শাস্ত্রীয় অনুষ্ঠান, অসত্য মতবাদের বিরোধিতা প্রভৃতি ।

তাহার মতে, ত্রীবিধের সেবার উপায় তিনটি : প্রথম—অঙ্কন বা সাধকের বিভিন্ন অঙ্গে বিষ্ণুর শঙ্খ-চক্র ইত্যাদির চিহ্ন ধারণ । দ্বিতীয়—নামকরণ অর্থাৎ বিষ্ণুর বিভিন্ন নাম অনুসারে পুত্রাদির নাম রাখা । তৃতীয়—কায়িক, বাচিক ও মানসিক, এই ত্রিবিধ ভজন ।

জীবনের শেষপাদে আচার্য মধ্য উড়ুপী ও অগ্ন্যাত্ম স্থানে কৃষ্ণ-মন্দির স্থাপন করিয়াছিলেন<sup>২</sup> কিন্তু অখিলরসামৃত-মূর্তি ত্রীকৃষ্ণকে তিনি ইষ্টরূপে গ্রহণ করিয়াছেন বা মধুর ভজনের পথ অনুসরণ করিয়াছেন, এমন কোনো প্রমাণ নাই ।

কেহ কেহ মনে করেন, মধ্বের মতবাদ হইতেই গোড়ীয় বৈষ্ণব

১ মধ্য ছাড়া অপর কোনো প্রথম শ্রেণীর ভারতীয় দার্শনিক বা সাধক অনন্ত নরকবাসের কথা প্রচার করেন নাই । তাই অনেকের ধারণা, ত্রীধর্মের মতবাদ দ্বারা প্রভাবিত হইয়াই মধ্য একথা বলিয়াছেন । দক্ষিণ ভারতের কল্যাণপুর জীতানদের প্রাচীন উপনিবেশরূপে খ্যাত । ষষ্ঠ শতকেও পর্বটক কস্মন্ ইন্ডিকা প্রয়স্টন্ কল্যাণপুরে এমন একজন ধর্মযাজককে দেখিতে পান যিনি পারস্ত হইতে এদেশে আগেন । এই কল্যাণপুর ছিল মধ্বের জন্মস্থান পাল্লভার কাছে, সমুদ্রের উপকূলে । কাজেই নিকটস্থ জীতানসমাজের ছুই একটি তত্ত্ব মধ্বের মতবাদের সহিত মিশিয়া গেলে বিশ্বাসের কিছু নাই । অঃ—  
হেষ্টিংস : এনলাইক্লোপিডিয়া অব রিলিজিয়ন অ্যান্ড এথিক্স, ভল্যু : ৬ ।

আন্দোলন উদ্ভূত হইয়াছে এবং গোড়ীয় বৈষ্ণব সম্প্রদায় মধব সম্প্রদায়েরই অন্তর্ভুক্ত। আসলে এ ধারণার কোনো ভিত্তি নাই।

ব্যাসগুহা, বদরীনারায়ণ প্রভৃতি হিমালয়ের জাগ্রত তীর্থসমূহে কিছুদিন অবস্থানের পর মধবাচার্য সমতল ভূমিতে নামিয়া আসেন। এ সময়ে উত্তর ভারতের প্রধান প্রধান তীর্থ-নগর তিনি পরিভ্রমণ করেন এবং প্রচার করেন নিজের ব্যাখ্যাত ভক্তিবাদ।

অতঃপর আচার্য প্রত্যাবর্তন করেন দাক্ষিণাত্যে। গোদাবরী তীরের তীর্থ ও জনপদে বহু নরনারী তাঁহার শিষ্যত্ব গ্রহণ করেন। শোভন ভট্ট ও স্বামী শাজী নামে দুই পণ্ডিতের খুব প্রভাব প্রতিপত্তি ছিল এই অঞ্চলে। মধবের সহিত শাস্ত্র বিচারে পরাস্ত হইয়া এবং তাঁহার ব্যক্তিত্ব ও সাধন-ঐশ্বৰ্যের আকৃষ্ট হইয়া এই দুই শাস্ত্রবিদ ব্রাহ্মণই তাঁহার শিষ্যত্ব গ্রহণ করেন। শোভন ভট্টের সন্ন্যাস নাম হয় পদ্মনাভতীর্থ। মধবের পরে তিনিই হন উড়ুপীর অধ্যক্ষ।

১ মহাপ্রভু খ্রীষ্টচৈতন্য নিজে বা তাঁহার বিশিষ্ট শিষ্য ও অনুগামীরা কোনো সময়েই মধবকে আদিগুরু বলিয়া বর্ণনা করেন নাই বা নিজদের মাধব সম্প্রদায়-ভুক্তও বলেন নাই। বরং নানাস্থানে মাধব বা তত্ত্ববাদীদের সমালোচনাই করিয়াছেন। গোড়ীয় গণোদ্দেশ লীপিকায় উদ্ধৃত মধবমঠের একটি গুরু-পরম্পরা এবং বলদেব বিজ্ঞানভূষণের উক্তি হইতেই ব্রাস্ত ধারণার উদ্ভব হইয়াছে। আধুনিক গবেষণায় গোড়ীয় গণোদ্দেশ লীপিকার লোকটি প্রকিষ্ট বলিয়া প্রমাণিত হইয়াছে। বলদেব প্রথম জীবনে ছিলেন মাধব সম্প্রদায়ভুক্ত। পরে গোড়ীয় বৈষ্ণবসাধক রাধাকামোদর দাসের শিষ্যত্ব গ্রহণ করিয়া গোড়ীয় গোষ্ঠীতে যোগ দেন। মাধব-সম্প্রদায়ের প্রভাব ও আকর্ষণ বলদেব তখনও ছাড়িতে পারেন নাই। তাছাড়া, জয়পুরে থাকিতে তিনি অপর সম্প্রদায়ের বৈষ্ণবদের তীব্র বিরোধিতার সম্মুখীন হন। গোড়ীয় বৈষ্ণবেরা শ্রুতি-অনুগম নয় এবং তাঁহাদের নিজস্ব বেদান্ত-ভাস্কর্য বা নাই কেন, এইসব প্রশ্নের উত্তর দিতে গিয়াও তাঁহাকে বিব্রত হইতে হয়। এই সব কারণে বলদেব গোড়ীয় সম্প্রদায়কে মাধব-সম্প্রদায়ের অন্তর্ভুক্ত বলিয়া ঘোষণা করিতে উৎসাহী হন।

মধ্বের গুরু আচার্য অচ্যুতপ্রকাশ অদ্বৈতবাদী সন্ন্যাসী হইলেও ভক্তিবাদের উপর তাঁহার আকর্ষণ ছিল সহজাত। প্রতিভাধর প্রিয় শিষ্যের সাহচর্য ও আকর্ষণ, তাঁহার ভক্তি-পর শাস্ত্রব্যাখ্যা ও দ্বৈত-বাদী নূতন সম্প্রদায়ের প্রবর্তন অচ্যুতপ্রকাশকে নবভাবে উদ্দীপিত করিয়া তোলে। শেষটায় মধ্বের দার্শনিক মতবাদ ও সাধকপ্রণালী তিনি গ্রহণ করেন।

উপরোক্ত পণ্ডিতদের আগমনে মধ্বের বৈষ্ণব-আন্দোলন পূর্বাপেক্ষা অনেক বেশী শক্তিশালী হইয়া উঠে। শত শত নরনারী উড়ুগীর মঠে আসিয়া গ্রহণ করে তাঁহার পরমাশ্রয়।

মধ্ব-মতের এই প্রসার এবং ভক্তিবাদীদের সংখ্যাধিক্য শৃঙ্গেরী মঠের কর্তৃপক্ষকে চিন্তিত করিয়া তোলে। নূতন বৈষ্ণব-সম্প্রদায়ের ভক্তিবাদ, ভজন-পূজনের সহজ পন্থা, জনসাধারণের কাছে অনেক বেশী সহজবোধ্য। ইহার সঙ্গে যুক্ত হইয়াছে নবদীক্ষিত পণ্ডিত ও সন্ন্যাসীদের ত্যাগ তিতিক্ষা ও উত্তম। ফলে দিনের পর দিন আচার্য মধ্বের শিষ্য, ভক্ত ও অনুগামীর দল বাড়িয়া উঠিতেছে।

পদ্মতীর্থ তখন শৃঙ্গেরী মঠের অধ্যক্ষ। মঠের সন্ন্যাসীদের নিয়া

সাধা-সাধন সম্পর্কে চৈতন্ত-মত ও মধ্ব-মতে মূলগত পার্থক্য রহিয়াছে। চৈতন্তের ধর্ম ত্রীমদ্ভাগবতের অনুকূল, আর মধ্বের ধর্ম মহাভারতের দ্বারা প্রভাবিত। চৈতন্ত গোপীপ্রেম, গোপীভজনকে উচ্চতম স্থান দিয়াছেন। মধ্ব বলিয়াছেন ইহার বিপরীত কথা। তাঁহার মতে, মহাভারতই শ্রেষ্ঠ শাস্ত্র। আরও বলিয়াছেন, কৃষ্ণভক্তিতে ব্রহ্মাই শ্রেষ্ঠ, গোপীরা ভক্তির অনেক নিরন্তরে অবস্থিত (দ্রঃ মধ্বাচার্য্যঃ ভাগবত ভাঃপর্বঃ ১১।১২।২২)। তাছাড়া, “মধ্বাচার্য্য ব্রহ্মবধুগণকে স্বর্বেশ্বর সহিত তুলনা করিয়া ত্রীমদ্ভাগবত ও ত্রীমদ্ভাগবতানুগ গোড়ীর সম্প্রদায়ের পারকীর সিদ্ধান্তকে হেয় প্রতিপাদন করিয়াছেন”—(দ্রঃ হুম্মরানন্দ বিজ্ঞাভিনোদ : অচিন্ত্যভোগভেদবাদ, ত্রীবলদেব বিজ্ঞানভূষণ, পৃ ১১১)। সুতরাং মহাপ্রভুর হুম্মহান্ গোড়ীর সম্প্রদায়কে মধ্ব-মতাবলম্বী বলার কোনো বৌদ্ধিকতাই নাই। আসলে চৈতন্ত মহাপ্রভু স্বত্ত্ব পুরুষ—তিনি নিজেই নিজের ধর্মসাম্রাজ্যের সংস্থাপক।

তান এক গোপন সভা আহ্বান করিলেন। মধ্বাচার্যের প্রভাব কি করিয়া ধর্ম করা যায়, কিভাবে উড়ুপী মঠকে হীনবল করা যায় ইহাই বড় সমস্যা। বহু পরামর্শের পর স্থির হইল, মধ্বের ভক্তি-আন্দোলনকে একযোগে নানা দিক দিয়া আক্রমণ করিতে হইবে, চরম আঘাত হানিয়া করিতে হইবে। যে সব রাজরাজড়া ও ধনী ব্যক্তির মঠের শিষ্য ও সমর্থক, তাঁহাদের যোগাইতে হইবে অর্থ ও লোকবল। প্রতি জনপদে, উড়ুপীর মঠে, মন্দিরে খণ্ডন করিতে হইবে প্রতিপক্ষের মতবাদ। উড়ুপীর মঠে মধ্বাচার্য ভক্তিশাস্ত্রের এক বিরাট গ্রন্থশালা গড়িয়া তুলিয়াছেন। এই গ্রন্থশালাটি ধ্বংস করার গোপন যড়যন্ত্রও এই সভায় করা হইল।

প্রচণ্ড উৎসাহে শৃঙ্গেরীর সন্ন্যাসীরা লড়াই-এ নামিয়া পড়েন। তাঁহাদের মঠ যেমন প্রাচীন, দলেও তেমনি আছে বহুসংখ্যক লোক। এ অঞ্চলে ধনী ও প্রভাবশালী ব্যক্তিদের অধিকাংশই তাঁহাদের সমর্থক। মধ্ব ও তাঁহার শিষ্যদের লাঞ্ছনা ও পীড়নের সীমা থাকে না। তাঁহাদের প্রাণপ্রিয় গ্রন্থশালাটি বিনষ্ট করা হয় স্নকৌশলে। রাত্রিযোগে আকস্মিকভাবে একদিন ইহা লুপ্তিত হয়। যেসব হুত্বাপ্য শাস্ত্রগ্রন্থের উপর নির্ভর করিয়া মধ্ব তাঁহার নূতন মতবাদ স্থাপন করিয়াছেন, ভক্ত শিষ্যদের প্রস্তুতি গড়িয়া তুলিয়াছেন, ছুটের চক্রান্তে তাহা কোথায় উধাও হইয়া গেল। আচার্য এবং তাঁহার অনুগামীরা এই চরম আঘাতে একেবারে মুষড়িয়া পড়িলেন।

কিন্তু মধ্ব হার মানিবার পাত্র নন। যে ঈশ্বরীয় কাজের ভার গ্রহণ করিয়াছেন, চরম ছুর্দেবের আঘাত আসিলেও সে কাজে তিনি বিরত হইবেন না। বিষ্ণুমঙ্গলের রাজা জয়সিংহ শৃঙ্গেরী মঠে যাতায়াত করিতেন, আবার এই রাজা আচার্য মধ্বের উপরও ছিলেন শ্রদ্ধাবান। ভাবিয়া চিন্তিয়া মধ্ব সেদিন জয়সিংহের কাছে গিয়া উপস্থিত হইলেন। কহিলেন, “মহারাজ, প্রাচীন পুঁথিপত্রের এই অপহরণ শুধু বৈষ্ণবদেরই ক্ষতি নয়, এ ক্ষতি দেশের সকল শাস্ত্রবিদের, সকল নয়নারীর। ধর্ম ও সংস্কৃতির ভবিষ্যৎ গবেষক যাজ্ঞেরই স্বার্থ-  
জা. সা. (৮-৩)

হানি হবে এতে। আপনি একটু উত্তোঙ্গী হয়ে শৃঙ্গেরীর মঠাধীশকে বুঝিয়ে বলুন, অমূল্য শাস্ত্রগ্রন্থের পুনরুদ্ধারে সহায়তা করুন।”

রাজা জয়সিংহ মধ্যস্থতা করিতে রাজী হন। শৃঙ্গেরীতে গিয়া মঠাধ্যক্ষকে নানাভাবে তিনি বুঝান, আপন প্রভাব প্রতিপত্তি প্রয়োগ করেন। তাঁহার এই দৌত্যকার্য সফল হয় এবং শাস্ত্রগ্রন্থগুলি তিনি উড়ুপীর গ্রন্থাগারে ফিরাইয়া দিবার ব্যবস্থা করেন।

এ ঘটনার পরও বেশ কিছুদিন উভয় মঠের মতবিরোধ ও বৈরিতা চলিতে থাকে। উত্তরকালে অবশ্য এই মতবিরোধের অবসান ঘটে, মধ্ব বৈষ্ণব ও শৃঙ্গেরীর অদ্বৈতবাদী সন্ন্যাসীদের মধ্যে শান্তি স্থাপিত হয় এবং উভয়ে উভয়ের মৰ্যাদা ও সম্মান রক্ষায় যত্ববান হন। এ সময়ে উড়ুপী ও শৃঙ্গেরী মঠে তীর্থকামী বৈষ্ণব ও অদ্বৈতবাদীরা যাতায়াত করিতেন, ইহার প্রমাণ আছে।

যে সব বৈষ্ণব-বিরোধী প্রভাবশালী পণ্ডিত আচার্য মধ্বের শরণ নিয়া বৈষ্ণবধর্ম গ্রহণ করেন তাঁহাদের অষ্টম ত্রিবিক্রম আচার্য। ইনি ছিলেন একজন খ্যাতনামা শৈব। শুধু মধ্বের যুক্তিতর্ক ও বিচার-মন্ত্রতা দেখিয়াই নয়, তাঁহার ত্যাগ তিতিক্ষাময় জীবন ও অপূর্ব সাধননিষ্ঠায় মুগ্ধ হইয়াই ত্রিবিক্রম আত্মসমর্পণ করেন। তাঁহার বৈষ্ণবমত গ্রহণ বহুতর শৈবকে মধ্ব-মতের অনুসারী করিয়া তোলে। এই নবদীক্ষিত পণ্ডিতের পুত্র নারায়ণ আচার্যই উত্তরকালে হন মধ্বের জীবন-কাহিনীর রচয়িতা। দীক্ষাদান কালে মধ্ব ত্রিবিক্রম আচার্যকে একখানি নয়নমন-লোভন কৃষ্ণমূর্তি উপহার দেন। কোচিন রাজ্যে, দক্ষিণ কানাড়ায়, আজিও ভক্ত বৈষ্ণবেরা সাগ্রহে এই অমূল্যম বিগ্রহটি তীর্থযাত্রীদের দর্শন করায়।

১২৭৫ খ্রীস্টাব্দে মধ্বের পিতা দেহরক্ষা করেন। ইহার অল্পকাল মধ্যেই মধ্বের কনিষ্ঠ ভ্রাতা, পূর্ব পরিকল্পনা অনুযায়ী সন্ন্যাস গ্রহণ করেন। দীক্ষার পর তাঁহার নূতন নাম হয় বিষ্ণুতীর্থ। আচার্য মধ্বের বৈষ্ণব আন্দোলনে সুপণ্ডিত বিষ্ণুতীর্থের অবদান প্রচুর।

জীবনের শেষপাদে মধ্বের ভক্তিসাধনা রূপান্তরিত হয়। নৈষ্ঠিক ভক্তিবাদ ধীরে ধীরে ঝুঁকিয়া পড়ে ভাবময়তা ও রসের দিকে। হৃদয়সনে এতকাল অধিষ্ঠিত ছিলেন শেষশায়ী বিষ্ণু, এবার তাহা অধিকার করেন অখিলরসামৃতসিন্ধু—বালগোপালমূর্তি—শ্রীকৃষ্ণ।

ধ্যান-সমাহিত মধ্বের নয়নসমক্ষে প্রভু বালগোপাল সেদিন আবির্ভূত হন। আবদারের সুরে কহেন “আচার্য, এত মঠ-মন্দির তো করলে, কিন্তু আমার জন্ম একটা ঠাঁই রাখলে না। তোমার ভক্তি-ভালবাসা কেমনতর গো? আমি শিগ্গীরই আসছি, আমার মূর্তি তুমি পাবে। সাগর থেকে ফেরা নৌকোর ভেতর আমি থাকবো। আমার তুলে নিয়ে স্থাপন করবে তোমাদের মন্দিরে।”

লীলাময় ঠাকুর অন্তর্হিত হন। মধ্বের হৃদয়ে অম্লরগিত হইতে থাকে তাঁহার মধুনিশ্চন্দ্রী কণ্ঠের ঝঙ্কার। দিব্য আনন্দে আচার্য মধ্বের দেহ-মন-প্রাণ আগুত হয়, দৈবী আশ্বাসের প্রেরণায় নব-চেতনায় তিনি উদ্বুদ্ধ হইয়া উঠেন।

কয়েকদিন পরের কথা। শিষ্য ও ভক্তদের আমন্ত্রণে মধ্ব সেদিন সমুদ্রতীরে মালপী বন্দরে গিয়াছেন। অতি প্রত্যাষে ধ্যানজপ সারিয়া আচার্য বন্দরের মুখে, নিরালা তটভূমিতে সানন্দে পাদচারণা করিতেছেন। হঠাৎ দূরে নয়নপথে পড়িল একটি সমুদ্রগামী নৌকা। এটি বন্দরে ফিরিতেছে। কিন্তু সাগর-মোহনায় একপ্রান্তে আগিয়া উঠিয়াছে এক বিস্তৃত চড়া, নদীর উপরিভাগ হইতে সহসা ইহা দৃষ্টি-গোচর হয় না। নৌকার মাঝি এই অদৃশ্য চড়ার কবলে পড়িয়া বড় বিপন্ন। বোদিকে সে নৌকা চালনা করে, চড়ার ঠেকিয়া যায়, বাহির হইবার কোনো সন্ধানই পাইতেছে না।

দূর হইতে আচার্য মধ্বকে দেখিয়া মাঝি ডাকিয়া কহিল, “সাধু-বাবা, আমি মহাবিপদে পড়েছি। চড়া থেকে নৌকা বাঁচাতে পারছিনে, দয়া ক’রে বাঁচবার পথ বলে দিন।”

মধ্ব হাঁক দিয়া কহিলেন, “ভয় নেই, মাঝি। আমার এই উত্তরীয়

যেদিকে ঘুরিয়ে ফিরিয়ে নাড়াচ্ছি তা লক্ষ্য করে তুমি নৌকো চালাও। পথের সন্ধান পেয়ে যাবে।”

বলা বাহুল্য, সিদ্ধপুরুষ মধব তাঁহার অলৌকিক বিভূতির বলে নদীতলের অবস্থা সবই জানিয়া নিয়াছেন। ঠিক কোন্ পথে চলিলে নৌকাটি চড়ার দুষ্টচক্র এড়াইতে পারিবে, গভীর জলে পড়িয়া আবার সচল হইবে, মাঝিকে সে নির্দেশ দেওয়া দরকার। তাই তীরে দাঁড়াইয়া বার বার তিনি উত্তরীয় আন্দোলন করিতেছেন আর মাঝি সেই অনুসারে করিতেছে নৌচালনা। অবশেষে দুঃসহ পরিস্থিতির অবসান ঘটিল, চড়া হইতে মুক্ত হইয়া নৌকাটি বন্দরের একপাশে আসিয়া ভিড়িল।

মাঝির হৃদয় কৃতজ্ঞতায় ভরিয়া উঠিয়াছে। ভক্তিভরে মধবকে প্রণাম করিয়া কহিল, “প্রভু, আপনার কৃপায় নৌকাটি আজ বাঁচাতে পারলাম, নইলে ধনে-প্রাণে নিজেও মারা যেতাম। আমার বাড়ি এই দক্ষিণেরই আবমা গ্রামে। দ্বারকায় মালপত্র বিক্রি করতে গিয়েছিলাম, ফেরবার পথে এই বিপত্তি। ভাগ্যিসু এ সময়ে এখানে আপনার দর্শন পেলাম। প্রভু, আমার একান্ত ইচ্ছে, আপনাকে আমি কিছু অর্থ দিই, আর আপনি তা ঠাকুরের সেবায় লাগান।”

“বাবা, তোমার অর্থের লোভে আমি এই ভোরবেলায় বন্দরের মোহনায় এসে দাঁড়াই নি। তুমি এখানে আসবে, আর নৌকাটি চড়ায় ঠেকবে, এসব আগে থেকেই আমার জানা। বাক, নৌকোর খোলের ভিতর কি আছে বল?”

মাঝি ভাবিল, ‘সাধুবাবা নিশ্চয় ভেবে নিয়েছে, নৌকোর ভেতর বহুতর দামী মালপত্র আছে। তা থেকে তিনি কিছু বাছাই করে নিতে চান।’ হাসিয়া কহিল, “প্রভু, নৌকোর খোলে দামী বস্তু কিছুই নেই। রয়েছে শুধু একরাশ মাটির ঢেলা। দ্বারকায় সব মালপত্র বিক্রি হয়ে গেল। ফেরবার পথে শূন্য নৌকা কেবলই টাল খাচ্ছে। ভাবলুম, কিছু ভারী জিনিস বোঝাই করা যাক। কাছেই গোপী-স্রোতের।” সেখানকার মাটি—গোপীচন্দন যাকে বলে, খুব পবিত্র।

ভারই কতকগুলো বড় বড় খণ্ড নৌকোর খোলে পুরে নিলাম। ভাবলাম, নৌকোর তলা ভারী করার কাজ এতে হবে, আবার ঐ গোপীচন্দন এখানকার ভক্ত মানুষদের বিলানোও যাবে। আর তো কোনো দামী জিনিসপত্র আমার নেই।”

“ভাই, ঐ বস্তুই যে আমার কাছে মহাদামী, মহাপবিত্র।”— প্রসন্ন সুরে উত্তর দেন আচার্য মধব। “তুমি ওর থেকে বেছে সব চাইতে বড় খণ্ডটি আমায় দাও। তোমার মাটির ঢেলায় কোন্ পরম বস্তু লুকানো আছে, তা তুমি জানো না, ভাই।”

“বেশ তাই হবে, আপনার যেমন অভিরুচি।” সানন্দে একথা বলিয়া মাঝি একটি বৃহৎ গোপীচন্দন-খণ্ড নৌকোর তলা হইতে বাহির করিল, গড়াইয়া দিল আচার্য-মধবের দিকে।

সঙ্গে সঙ্গে ঘটয়া গেল এক অদ্ভুত কাণ্ড। উহার ভিতর হইতে বাহির হইয়া আসিল শিলাময় এক অনিন্দ্যাসুন্দর বালগোপাল মূর্তি। গোপালের দক্ষিণহস্তে দধিমহুনের দণ্ড, আর বামহস্তে মহনদণ্ডের সূত্র।

সত্তপ্রকটিত এই ত্রীমূর্তি নিয়া মধব ও তাঁহার ভক্তশিষ্যেরা নাড়স্বরে উড়ুপীতে আসিয়া পৌঁছেন। গোপীচন্দনলিপ্ত বালগোপালকে এখানকার বৃহত্তম সরোবরের<sup>১</sup> তীরে নামাইয়া স্নান-অভিষেক করানো হয়, পূজা অর্চনার শেষে স্থাপন করা হয় একটি নব-নির্মিত মঠে।

আটজন প্রধান সন্ন্যাসী-শিষ্যের উপরে মধব গ্রাস্ত করেন তাঁহার পরমপ্রিয় বালগোপালের অর্চনা, ভোগরাগ ও সর্ববিধ সেবাকার্যের ভার।<sup>২</sup>

১ এই সরোবর আজো স্থানীয় জনসমাজে মধব-সরোবর নামে পরিচিত।

২ পরবর্তীকালে এই আটজন সন্ন্যাসী শিষ্য বিভিন্ন অঞ্চলে আটটি কৃষ্ণ-বন্দীর প্রতিষ্ঠা করেন, এই আটটি মঠ আবার দুইটি করিয়া দ্বন্দ্বমঠ নামে পরিচিত হইয়াছে। উড়ুপীস্থিত মূল মধব-মঠকে বলা হয়—উত্তরাদি মঠ। আচার্য মধবের পরে মূল মঠের অব্যাক্ত হন তাঁহার ব্রহ্মশিষ্য পদ্মনাভতীর্থ।



মধ্বেশ্বর দীর্ঘজীবন ত্যাগ তিতিক্ষা ও তপস্যায় ভরা। দার্শনিক মতবাদেব বিস্তার, ভক্তিমধ্বেশ্বরের আন্দোলন এবং বৈষ্ণবগ্রন্থের রচনা<sup>১</sup> ও প্রচারের মধ্য দিয়া ভারতের ধর্ম-সংস্কৃতির উপর তিনি দূরবিস্তারী প্রভাব রাখিয়া গিয়াছেন। তাঁহার উত্তর-সাধকেরাও তাঁহার দ্বৈত-মতবাদ ও বৈষ্ণব আন্দোলনকে পরিপুষ্ট করার কাজে কম খ্যাতি অর্জন করেন না<sup>২</sup>।

আরক্ত ঈশ্বরীয় কর্মের এক বিরাট অধ্যায় সমাপন করিয়া আচার্য একদিন অন্তরঙ্গ ভক্ত-শিষ্যদের কাছে বাক্য করেন তাঁহার মর্ত্যলীলায় ছেদটানার অভিপ্রায়। ১৬০৩ খ্রীষ্টাব্দে শুক্লাবসন্তী তিথি। এ সময়ে সরিদম্বর নামক স্থানে প্রধান শিষ্যদের কাছে আচার্য ঐতরেয় উপনিষদের ভক্তিমূলক ব্যাখ্যা প্রদানে রত রহিয়াছেন। এই সময়ে লীলা অবসানের পরমমুহূর্তটি অগ্রসর হইয়া আসিল। ইষ্টধ্যানে সমাহিত হইয়া আচার্য মধ্বে শেষ নিঃশ্বাস ত্যাগ করিলেন, প্রবিলম্বিত হইলেন নিত্যলীলার পরমধামে।

শুধু দার্শনিকাতোয়ই নয়, সারা ভারতের আধ্যাত্মিক আকাশ হইতে সেদিন ঘটিল এক ইন্দ্রপাত।

১ মধ্বেশ্বর প্রধান গ্রন্থত্রয়ের নাম—গীতাভাষ্য, ব্রহ্মসূত্রভাষ্য, মহাভারত ত্যাগপর্বনির্ণয়। ইহা ছাড়াও আরো ৩৫টি ধর্মগ্রন্থ তিনি রচনা করিয়া গিয়াছেন।

২ মধ্বেশ্বরমতাবলম্বী দার্শনিক ব্যাসরাজের রচিত ‘ভাস্যামৃত’—অদ্বৈতবাদ বিরোধী এক প্রধান গ্রন্থ। উত্তরকালে ভারতবিশুদ্ধ বাঙালী মনীষী মধুসূদন সরস্বতীকে এই গ্রন্থের ব্যুত্থাপনে প্রচুর আগ্রাস বীকার করিতে হয়।

# সনাতন গোস্থামী

নীলাচল হইতে ত্রীচৈতন্য সে-বার নবদ্বীপে আসিয়াছেন। উদ্দেশ্য, জননীর চরণ দর্শন আর কিছুদিনের জন্ত পবিত্র গঙ্গাতীরে বাস। সে কাজ সাক্ষ হইয়াছে। এবার প্রাণ কাঁদিয়া উঠিয়াছে বৃন্দাবনের জন্ত। প্রাণগোবিন্দের লীলাভূমিতে গড়াগড়ি দিতে ৭ন হইয়াছে উভল, যমুনায় অবগাহনের লোভও হইয়া উঠিয়াছে ছনিবার। প্রভু তাই সাক্ষোপাস্তসহ তাড়াতাড়ি ব্রজের দিকে ছুটিয়া চলিলেন।

কিন্তু একি বিচিত্র কাণ্ড? বাড়খণ্ডের পথে না গিয়া তিনি হঠাৎ উত্তরের দিকে বাদশাহ হুসেন শাহের রাজধানী গোড়ের দিকে চলিলেন কেন? তিনি কি পথ ভুলিলেন? অথবা কি আছে তাঁহার মনে, কে জানে?

কৃষ্ণপ্রেমে প্রভু গর্গর মাতোয়ারা। সঙ্গীদের অন্তরেও লাগিয়াছে এই প্রেমের ঢেউ। নৃত্য কীর্তনে সারা পথটি মুখর হইয়া উঠিয়াছে। আর এই দেবপ্রতিম সন্ন্যাসীর পিছে পিছে চলিয়াছে ভাবাকুল এক বৃহৎ জনতা। চলিতে চলিতে সেদিন প্রভুর এই দলটি আসিয়া উপস্থিত হয় গোড়ের উপকণ্ঠে, রামকেলীর অনতিদূরে।

রাত্রে প্রভু বিশ্রাম করিতেছেন। এমন সময় নিতান্ত দীনবেশে সেখানে সাক্ষাৎ করিতে আসিলেন স্থানীয় ছই কৃতী পুরুষ, ছই সহোদর ভাতা। ধর্মনিষ্ঠা আর শাস্ত্রজ্ঞানের সহিত ভক্তি প্রেমের অপরূপ মিলন ঘটিয়াছে তাঁহাদের জীবনে।

যুক্তকরে, দস্তে তৃণ নিয়া, উভয়ে প্রভুর চরণে লুটাইয়া পড়েন। ভক্তেরা পরিচয় করাইয়া দেন, “প্রভু, এঁরা ছ’তাই গোড়ের বাদশাহ হুসেন শাহের প্রধান অমাত্য। বড় ভাই হচ্ছেন অমরদেব। রাজকীয় উপাধি—দবীর খাস। আর ছোটভাই সন্তোষদেব, সাকর মল্লিক বলে ইনি সরকারী মহলে পরিচিত। শাস্ত্রবিজ্ঞা, ধর্মীচরণ ও দানধ্যানের

খ্যাতি যেমন এঁদের আছে তেমনি আছে অর্থ, প্রতিষ্ঠা ও মান-মর্যাদা। কিন্তু সর্বোপরি রয়েছে সত্যাকার কৃষ্ণভক্তি।”

প্রভুর চোখে মুখে ফুটিয়া উঠে প্রসন্নতার দীপ্তি। প্রবীণ ভক্ত অমরদেবকে সন্নেহে টানিয়া তোলেন, আবদ্ধ করেন প্রগাঢ় আলিঙ্গনে। মৃত্ত মধুর কণ্ঠে কহেন, “তোমার প্রেরিত পত্র আমি যথাসময়ে পেয়েছি, তার উত্তরও দিয়েছি। তোমরা দু’তাই যে কৃষ্ণকৃপার মহা অধিকারী! তাইতো তোমাদের দর্শনে ছুটে এলাম। ছাখো আমার কৃপাময় কৃষ্ণের কি অপূর্ব লীলা! ব্রজধামে যাবার জন্ত বেরিয়েছি, কিন্তু সোজা সেদিকে না গিয়ে অজ্ঞাত আকর্ষণে ছুটে এলাম এই অঞ্চলে। গোড়ে আসবার আমার কোনো প্রয়োজনই নেই। এলি পড়েছি শুধু তোমাদেরই জন্ত।”

বৃন্দাবনযাত্রী প্রভুর পঞ্চভ্রান্তির মর্ম এবার বুঝা গেল। ভক্তেরা নীরবে দাঁড়াইয়া একে অশ্রুর মুখ চাহিতে লাগিলেন।

প্রভুর একি অপার অনুগ্রহ, একি অহেতুকী কৃপা! অমরদেব ও সন্তোষদেবের নয়ন বাহিয়া ঝরিতে থাকে পুলকাক্ষর ধারা! পরিজ্ঞাতা আজ স্বয়ং অযাচিতভাবে ছয়ায়ে আসিয়া উপস্থিত! এষে তাঁহাদের কল্পনারও অতীত। কাল্পা আর আর্তিতে উভয়ে ভাঙিয়া পড়েন।

চরণতলে পতিত হইয়া দৈন্ত্যভরে নিবেদন করেন, “প্রভু, কৃপা করে যদি এলেই, এবার তবে এই অধমদের উদ্ধার সাধন করো। তোমার ত্রীচরণের সেবক করে নাও। বিষয়-বিষে এ জীবন হয়ে উঠেছে দুঃসহ।”

হুই ভাইকে আশিস্ জানাইয়া ত্রীচৈতন্ত্য কহিলেন, “ভয় নেই তোমাদের। অচিরে কৃষ্ণ তোমাদের কৃপা করবেন, তাঁর নিজ কর্মে করবেন নিয়োজিত। তোমাদের যে আমি দেখছি কৃষ্ণের চিহ্নিত সেবকরূপে। আজ থেকে তোমাদের আমি নূতন নামকরণ করলাম। অমর আর সন্তোষ—এখন থেকে পরিচিত হবে সনাতন আর রূপ নামে

প্রভুর সেদিনকার দর্শন ও স্পর্শন সনাতন ও রূপের জীবনে বিপ্লব ঘটাইয়া দেয়। তাঁহার আন্তরিক আশীর্বাদ হইয়া উঠে অমোঘ। উত্তরকালে ছই ভাই প্রসিদ্ধি লাভ করেন প্রভুর অগ্রতম পার্শ্বদরূপে। সনাতন গোস্বামী নির্মাণ করেন গোঁড়ীয় বৈষ্ণবধর্মের সুদৃঢ় শাস্ত্রীয় ভিত্তি, স্থাপন করেন ভক্তিময় তপস্যার বলিষ্ঠ আদর্শ। আর তাঁহার অমুজ রূপ গোস্বামীর মাধ্যমে সাধিত হয় রাধাকৃষ্ণ লীলা-রসের পরিপুষ্টি ও বিস্তার—উদ্ঘাটিত হয় গোপীভজনের নিগূঢ় পদ্ধতি।

সনাতনের পূর্বপুরুষের জন্মভূমি দাক্ষিণাত্যে। চতুর্দশ শতকের মধ্যভাগে কর্ণাটদেশের পরাক্রমশালী নৃপতি ছিলেন সর্বজ্ঞ জগদগুরু। ইহার বংশধর রূপেশ্বরদেব এক সময়ে রাজ্যচ্যুত হইয়া গোড়দেশে আশ্রয় নিতে বাধ্য হন। শাস্ত্রবিদ্যা ও রাজকাৰ্য্য দুয়েতেই দেখা যাইত এই অভিজাত বংশের সমান পারদর্শিতা। তাছাড়া, দাক্ষিণাত্যের বৈষ্ণবীয় সাধনার ধারাও ইহাদের জীবনে কিছুটা বহমান ছিল।

এই বংশের কুমারদেবের গৃহে ভূমিষ্ঠ হন তিন পুত্র—অমর, সন্তোষ ও বল্লভদেব। জ্যেষ্ঠ পুত্র অমর জন্মগ্রহণ করেন ১৪৬৫ খ্রীষ্টাব্দে; ইনিই উত্তরকালের বহু বিখ্যাত বৈষ্ণবসাধক--সনাতন গোস্বামী। বৃন্দাবনের ধর্মজীবনের নিয়ন্তারূপে, মহাপ্রতিভাধর ভক্তি-শাস্ত্রবিদ-রূপে তাঁহার খ্যাতি সারা ভারতে প্রচারিত হয়। আর গোড়ীয় সাধকসমাজে তিনি গণ্য হন প্রভু খ্রীচৈতন্তের জীবন-দর্শনের অগ্রতম শ্রেষ্ঠ ভাষ্যকাররূপে।

সনাতনের পিতার নাম মুকুন্দদেব। গোড় রাজসরকারের এক উচ্চপদে দীর্ঘদিন তিনি নিয়োজিত ছিলেন এবং তাঁহার বাসস্থান ছিল গোড়ের উপকণ্ঠস্থিত রামকেলীতে। ঐ স্থানটি কানাই-নাটশালা নামেও সে সময়ে পরিচিত ছিল। মুকুন্দদেব নিজে ছিলেন ভক্তিমান সাধক। পূজা-পার্বণ, কৃষ্ণকীর্তন ও রামলীলার উৎসব অল্পষ্ঠানে তাঁহার প্রাসাদভবন সদাই ঋণাকিত মুখরিত।

বালক পৌত্রদের লেখাপড়ার সুব্যবস্থা করিতে মুকুন্দদেব ক্রটি

করেন নাই। সনাতন ও রূপের শিক্ষাদানের ভার পড়ে রামভদ্র বাণীবিলাস নামক পণ্ডিতের উপর। প্রাথমিক পাঠ সমাপ্ত হইলে ছই ভ্রাতাকে পাঠানো হয় তখনকার শ্রেষ্ঠ বিজ্ঞানেক্সনবদীপে। সেখানে কয়েক বৎসরের মধ্যে নানা শাস্ত্রে তাঁহারা পারদ্রম হইয়া উঠেন।

প্রথমে শিক্ষাগুরুর পদে বৃত্ত হন প্রখ্যাত পণ্ডিত বাসুদেব সার্বভৌম। পরবর্তীকালে তাঁহার কনিষ্ঠ ভ্রাতা রত্নাকর বিজ্ঞা-বাচস্পতিয় টোলে থাকিয়া সনাতন ও রূপ শাস্ত্রের ছরুহ তত্বাদি অধ্যয়ন করেন। ছুজনেই অসাধারণ মেধা ও প্রতিভার অধিকারী। তাই নবদীপে থাকিতেই তাঁহাদিগকে সাহিত্য, ব্যাকরণ ও বিবিধ ধর্মশাস্ত্রে অসামান্য অধিকার অর্জন করিতে দেখা যায়।

কিন্তু সে যুগে সংস্কৃত সাহিত্য ও শাস্ত্র অধিগত করিলেই বৈষয়িক জীবনে উন্নতি সাধন করা যাইত না। বাদশাহের দরবারের ভাষা ছিল ফার্সী। এই ফার্সী ভালভাবে আয়ত্ত করিতে না পারিলে কোনো দায়িত্বপূর্ণ কর্মে নিযুক্ত হওয়ার সম্ভাবনা ছিল না। পরিবারের কর্তা তাই সনাতন ও রূপের ফার্সী শিক্ষার ভাল ব্যবস্থা করেন। সপ্তগ্রামে তাঁহাদের পাঠাইয়া দেওয়া হয়। সেখানকার মুসলমান শাসনকর্তা ফকর উদ্দীন মুকুন্দদেবের বন্ধু। তাঁহার তত্বাবধানে থাকিয়া উভয় ভ্রাতা ফার্সী ও আরবী বিশেষজ্ঞ মোল্লাদের কাছে পাঠ গ্রহণ করিতে থাকেন, অচিরে ঐ ভাষা ছইটি ভালভাবে আয়ত্ত করিয়াও ফেলেন।

ফার্সী ও আরবী সাহিত্যের ব্যুৎপত্তি কিন্তু সনাতন ও রূপের ব্যক্তিগত কৃষ্টি ও ধর্মাচরণকে কোনোদিন ব্যাহত করিতে পারে নাই। রাজ-অমাত্যপদ তাঁহারা গ্রহণ করিয়াছেন, মুসলমান বাদশাহ ও আমীর ওমরাহদের সঙ্গে ঘনিষ্ঠতাও কম করেন নাই, কিন্তু নিজস্ব ধর্মীয় আচার-আচরণ ও ভাবধারাকে সদাই রক্ষা করিয়া চলিয়াছেন সতর্কভাবে।

তাঁহাদের রামকেলীর ভবন বরাবরই ছিল বিশিষ্ট সাহিত্যিক, শাস্ত্রবিদ ও ধর্মাচারীদের মিলনস্থল। বিশেষ করিয়া শিক্ষক বিজ্ঞা-

বাচস্পতি মহাশয়ের সহিত সনাতনের যোগ ছিল অত্যন্ত বেশী। এই ধর্মনিষ্ঠ আচার্যকে তিনি গুরুর মতোই শ্রদ্ধা করিতেন। পরম সমাদরে প্রায়ই তাঁহাকে রামকেলীতে আমন্ত্রণ করিয়া আনা হইত। তাঁহার সহিত শাস্ত্র পাঠ ও ধর্মালোচনায় সনাতন দীর্ঘ সময় অতিবাহিত করিতেন। উত্তরকালে চৈতন্যচরণে আশ্রয় নিবার পর হইতে সনাতনের শাস্ত্র পাঠের আগ্রহ কেন্দ্রীভূত হয় ভক্তিশাস্ত্রের দিকে।

বৃন্দাবনবাসের প্রথম যুগে পরমানন্দ ভট্টাচার্য নামক এক বিশিষ্ট ভক্তিসিদ্ধ আচার্যের কাছেও তিনি শিক্ষা গ্রহণ করেন এবং ভাগবত ও অষ্টাঙ্গ ভক্তিশাস্ত্রের নিগূঢ় তত্ত্ব হয় তাঁহার অধিগত।

পিতামহ মুকুন্দদেবের লোকান্তরের পর, তাঁহারই পদে সনাতন রাজসরকারে নিযুক্ত হন। তখন তাঁহার বয়স মাত্র আঠার বৎসর। তারপর ধীরে ধীরে নিজের প্রথম ব্যক্তিত্ব, বিচক্ষণতা ও কর্মনিষ্ঠার বলে পাঠান রাজ্যের অগ্ৰতম প্রধান অমাত্যের পদে উন্নীত হন।

রাজ্যের প্রতিরক্ষা, শাসন প্রভৃতি সমস্ত গুরুত্বপূর্ণ কার্যেই শুলতান হুসেন শাহকে সনাতনের পরামর্শ গ্রহণ করিতে দেখা যাইত। সনাতন ক্রমে বাদশাহের দক্ষিণহস্ত স্বরূপ হইয়া উঠেন; তাঁহার অনুজ রূপ এবং অনুগমও তাঁহারই প্রভাবে উচ্চ রাজপদে নিযুক্ত হন।

তখনকার দিনে রামকেলীর দেবভ্রাতাদের পদমর্যাদা, প্রভাব ও বিস্ত-বিভবের খ্যাতি ছিল অসাধারণ। তাঁহাদের প্রাসাদের চারিদিকে ছড়ানো ছিল বহুসংখ্যক মন্দির, মণ্ডপ ও নাটশালা। প্যাতনামা হিন্দু বিদ্বজ্জন, আচার্য ও সাধু-সন্ন্যাসী মাঝেই রামকেলীতে সনাতনের সভাকক্ষে পদার্পণ করিতেন, গ্রহণ করিতেন তাঁহার সেবা ও পৃষ্ঠ-পোষকতা। সনাতন ও তাঁহার ভ্রাতাদের বদান্ততায় দেশের দূর দূরান্তস্থিত শাস্ত্র-ব্যবসায়ী বহু ব্রাহ্মণ ও দীন দরিদ্র প্রতিপালিত হইত। এই সব কারণে রামকেলীর খ্যাতি ও সনাতনের প্রভাব প্রতিপত্তি সারা গোড়দেশে ছড়াইয়া পড়ে।

সনাতন ছিলেন হুসেন শাহের দবীর খাস—একান্ত সচিব। তৎকালীন যে কোনো শিক্ষিত, সম্ভ্রান্ত মুসলমানের মতো তিনি কার্ণী

ও আরবীতে অনর্গল কথা বলিতে পারিতেন। বিধর্মী সুলতান এবং ওমরাহদের সামাজিক জীবন ও রীতিনীতির অনেক কিছু তাঁহাকে অল্পসরণ করিতে হইত। গোড় দরবার বা সুলতানের শিবিরে অবস্থান কালে তাঁহার বেশভূষা ও চালচলন দেখিয়া সাধারণ মানুষ তাঁহাকে ধরিয়া নিত মুসলমান ভাবাপন্ন বলিয়া। কিন্তু দিনান্তের কার্খশেষে রামকেলীতে গেলেই ফুটিয়া উঠিত তাঁহার আর এক রূপ। বাদশাহী দরবারের বাহ্য আচার-আচরণ, হাব-ভাব তিনি ত্যাগ করিতেন। স্নান তর্পণের পর শুরু হইত দানধান, পূজা-অর্চনা, শাস্ত্রপাঠ ও ধর্মীয় আলাপ-আলোচনা।

কিন্তু এত দানধান, ধর্মনিষ্ঠা ও দরবারী পদমর্যাদা সত্ত্বেও সনাতনের পরিবারের ভাগ্যে কিন্তু সামাজিক কৌলিগ্য জুটে নাই। রক্ষণশীল হিন্দুসমাজের দৃষ্টিতে এই পরিবার ছিল পতিত—মুসলমানের ঘনিষ্ঠতা ও স্পর্শদোষের জন্য অবজ্ঞাত। এই জন্যই বঙ্গীয় কায়স্থদের কুলজীতে ইহাদের কোনো উল্লেখ পাওয়া যায় না।

বিধর্মীয় আচার-আচরণহুই সনাতন এতদিনে পাইয়াছেন প্রভু ত্রীচৈতন্যের দুর্লভ দর্শন। সারা দেহ ও মনপ্রাণে আসিয়াছে দিব্য আনন্দের জোয়ার। প্রভুর এই দর্শনের পরে নূতন মান্নয়ে তিনি হইয়াছেন রূপান্তরিত।

সনাতনের জীবনের এ পরিবর্তন শুরু হইয়াছে দীর্ঘদিন যাবৎ, অগ্রসর হইয়াছে প্রচলিত ধারায়। কিন্তু বিষয় ও দরবারী মর্যাদার চাপে যে জীবন চাপা পড়িয়াছিল, আকুল হইয়া এতদিন তাহা কেবলি মাগিতেছিল বন্ধনমুক্তি। এবার সে মুক্ত সমাগত।

বাহ্যজীবনে সনাতন ছিলেন প্রভাবশীল রাজ-অমাত্য, আর অন্তরে দৈন্তনয়, ত্যাগব্রতী মহাবৈষ্ণব। অন্তর্জীবনে তাই এতদিন ধীরে ধীরে জমিয়া উঠিতেছিল অধ্যাত্ম-সাধনার পরমসংকল্প, একান্তভাবে গ্রহণ করিয়াছিলেন ভক্তি ও প্রেমধর্মের আদর্শ। তাঁহার এই গোপন প্রকৃতিই সেদিন আকর্ষণ করিয়াছিল প্রভু চৈতন্যমহাশয়কে। সনাতন

রামকেলীতে ছুটিয়া আসিয়াছিলেন। ভবিষ্যৎ জীবনের চিহ্নিত পার্শ্বদ ও লীলা-পরিকর সনাতন ও রূপ এই দুই ভাইকে তিনি অবলীলায় করিয়াছিলেন আত্মসাৎ।

সনাতনের জীবন ছিল বৈষ্ণবীয় সাধনার জ্ঞান উন্মুখ, সদা ভক্তি-ধৃত। তাঁহার পক্ষে ইহা আকস্মিক কিছু নয়। এ মনোবৃত্তি এবং সাধনধারা তাঁহার পূর্বপুরুষের মধ্যেও বর্তমান ছিল। বংশগত বৈশিষ্ট্যটিই অপরূপ রূপে ফুটিয়া উঠিয়াছিল সাধননিষ্ঠ সনাতনের জীবনে। আর প্রভু শ্রীচৈতন্যের কৃপায় উত্তরকালে তাহা লাভ করিয়াছিল চরম সার্থকতা।

হুসেন শাহের বড় প্রিয়পাত্র ছিলেন সনাতন। রাজ্যের জটিল কর্মের দায়িত্বভার তাঁহার উপর ছাড়িয়া দিয়া বাদশাহ্ নিশ্চিন্ত থাকিতেন। শুধু শান্তির সময়েই নয়, যুদ্ধাভিযানে বাহির হইলেও হুসেন শাহ্ তাঁহার এই প্রতিভাধর অমাত্যকে সঙ্গে রাখিতেন। কিন্তু এই রাজ্যহুগ্ৰহ, এই দায়িত্বভার ও মর্যাদা ক্রমে ভারস্বরূপ হইয়া উঠে। বিষয়-কীট হইয়া দিন যাপন করা আর তাঁহার সহ্য হইতে চায় না। বাদশাহের সেনাধ্যক্ষেরা সে-বার নির্মমভাবে উড়িয়ায় দেব-দেবীর মূর্তি ধ্বংস করে। ভক্ত সনাতনের হৃদয় বিদীর্ণ হয়। শুরু হয় তীব্র অমুতাপের দহন। দিনের পর দিন ভাবিতে থাকেন, একি পাষাণী জীবন তিনি যাপন করিতেছেন? সদাই অহুসঙ্কান করিতে থাকেন উদ্ধারের উপায়।

রামকেলী ও তাহার আশেপাশে সনাতন গড়িয়া তুলিয়াছেন এক অপূর্ব ধর্মীয় পরিবেশ। অজস্র মঠ-মন্দির নির্মিত হইয়াছে, খনন করা হইয়াছে পবিত্র কুণ্ড। প্রায়ই তিনি দেশ-দেশান্তর হইতে এখানে আমন্ত্রণ করিয়া আনেন বিশিষ্ট শাস্ত্রবিদ ও ভক্ত সাধকদের। গোড় দরবারের কাজ শেষ হইলেই রামকেলীর ভক্তিময় পরিবেশে আসিয়া হৃদয়ের জ্বালা জুড়াইতে বসেন, সাধন-ভজনে রত হন।

এমনি পরিবেশে বাস করিয়া সনাতনের জীবনে জাগিয়া উঠে ভক্তিপ্রেমের স্রুগু চেতনা। রামকেলীতে তাঁহার নিজের



তৈরি কৃষ্ণ-লীলাঙ্গলগুলি ঘুরিয়া ঘুরিয়া আহরণ করেন দিব্য আনন্দ ।

বাড়ীর নিকটে অতি নিভৃত স্থানেতে

কদম্ব কানন ধারা শ্যামকুণ্ড তাতে ।

বুন্দাবনলীলা তথা করয়ে চিন্তন,

না ধরে ধেরষ নেত্রে ধারা অমুক্ষণ । ( ভক্তি রত্নাকর )

যতঃপর তীব্র আতি জাগে জীবনে, আর এই আর্তির মধ্য দিয়া নামিয়া আসে কৃষ্ণপ্রেমের রসস্রোত । সংসারের বিস্ত-বিভব, বশ মান, সব কিছু নিরর্থক হইয়া উঠে । আকুলভাবে চিন্তা করিতে থাকেন—কোন পথে, কাহার নির্দেশে মিলিবে বল্বাঙ্কিত কৃষ্ণ দর্শন ? কবে অপ্রাকৃত লীলারাস অবগাহন করিবেন ? কবে এ জীবন হইবে কৃতকৃতার্থ ?

এমনি সময়ে সনাতনের কানে পৌঁছিল প্রভু শ্রীচৈতন্যের কথা । নীলাচলে তাঁহার অভ্যুদয় ঘটিয়াছে । প্রেমভক্তির প্রবল রসতরঙ্গে তিনি ভাসাইয়া নিতেছেন অগণিত ভক্ত সাধককে । এই তরঙ্গ সেদিন সনাতনেরও হৃদয়তটেও আসিয়া আঘাত করে । জাগিয়া উঠে পরম উপলব্ধি—এই প্রভুই যে জীবের উদ্ধারকর্তা ! আর ইনি যে তাঁহারই জীবনপ্রভু !

আকুল আবেদন জানাইয়া সনাতন শ্রীচৈতন্যকে পত্র দিলেন—  
“প্রভু, তুমি আবির্ভূত হয়েছো জীবের উদ্ধারের জন্ত । একটিবার আমার মতো অধমজনের প্রতি কৃপা দৃষ্টিপাত করো । আমি একে বিষয়-কীট, তদুপরি স্নেহাচারী—পতিত । আমার মুক্তির কি কোনো উপায় নেই ? মনে প্রবল ইচ্ছা জেগেছে, এ ঘৃণ্য সংসারজীবন ত্যাগ করবো । আমার অমুমতি দাও, তোমার চরণভলে নিজেকে উৎসর্গ করি, আর সারা জীবন কাটিয়ে দিই তোমার দিব্য মুখচন্দ্র নিরীক্ষণ করে ।”

নীলাচলের অন্তরঙ্গ ভক্তেরা প্রভুকে এই দৈনন্দিন পত্র দিলেন । কহিলেন, “গৌড়ের বাদশাহ, দোদগ-প্রতাপ হুসেন শাহের ইনি

প্রধান অমাত্য। রাজনৈতিক ও প্রশাসনিক কর্মকুশলতার দিক দিয়ে এঁর জুড়ি নেই। এমন মানুষও তোমার নর্তনে কীভাবে পাগল হয়ে উঠেছে; রাজৈশ্বর্য ছেড়ে দিয়ে ভিখারী হতে চাচ্ছে—এ তো তোমার অলৌকিক কৃপালীলা ছাড়া আর কিছু নয়, প্রভু।”

প্রভুর অধরে মুহূ মধুর হাসি দেখা দেয়। বার্তাবাহের হস্তে তখনি তিনি এক পত্র প্রেরণ করেন। এ পত্রে আর কোনো কথা নাই, আছে শুধু একটি মাত্র শ্লোকের উদ্ধৃতি—

পরবাসিনী নারী ব্যাপি গৃহকর্মসু। তদেবাস্বাদয়ত্যন্তনবসঙ্গ  
রসায়নং ॥

অর্থাৎ, পরপুরুষে আসক্তা কোনো নারী যেমন গৃহকর্মে থেকেও প্রেমিকের স্মৃতি সদাই ধরে রাখতে পারে, তেমনি বিষয়ে লিপ্ত থেকেও চিন্তকে ডুবিয়ে রাখা যায় তাঁর প্রেম-রসে।

সনাতন মহাপণ্ডিত ব্যক্তি, সর্দ দর্শন ও অধ্যাত্মতত্ত্বে পারঙ্গম। তাই প্রভু তাঁহাকে ইচ্ছা করিয়াই স্বামী বিদ্যারণ্যের সুপ্রসিদ্ধ গ্রন্থ পঞ্চদশী হইতে ঐ শ্লোকটি লিখিয়া পাঠান।

প্রভুর এই শ্লোকপত্রের ইঙ্গিত পরিকার। সনাতন বুঝিলেন, মিলনলয় এখনো উপস্থিত হয় নাই, তাই প্রভু তাঁহার সাজনয়ন অনুবোধ কোশলে এড়াইয়া গেলেন। হৃদয়ের আগুন চাপিয়া রাখিয়া এখনো কিছুদিন তাঁহাকে সংসারে বাস করিতে হইবে।

প্রভুর কাছ হইতে ঐ পত্র পাইবার পর হইতে সনাতনের ব্যাকুলতা আরো বাড়িয়া যায়। দিনের পর দিন অতিবাহিত হয় করুণ আর্তি ও কান্নায়।

অবশেষে এই সেদিন রামকেলীতে বসিয়া প্রভুর কৃপা মিলিল। সুন্দর পুরীধাম হইতে ছুটিয়া আসিয়া নিজে ব্যচিয়া সনাতনকে তিনি দর্শন দিলেন। সংসার ত্যাগের অনুমতি সেদিন না মিলিলেও তাঁহার প্রেমস্পর্শ ও আশ্বাসবাণী প্রাপ্ত হইয়া সনাতনের তাপিত হৃদয় কতকটা শান্ত হইল।

সনাতন ও ক্লপের নিকট বিদায় নেওয়া হইয়াছে, ক্রীতচক্রে এবার

বৃন্দাবনের দিকে রওনা হইবেন। তাঁহার নয়নাভিরাম রূপ, নর্তন-কীর্তন ও ভাবাবেশ এই কদিনের মধ্যেই সমগ্র অঞ্চলে আনিয়া দিয়াছে প্রাণচাঞ্চল্য। অগণিত নরনারী ভিড় করিয়াছে এই পুণ্য-দর্শন দেব-মানবের আশেপাশে। তাহাদের অনেকেই প্রভুর সঙ্গী হইতে ব্যগ্র।

সনাতন বিচক্ষণ ও দূরদর্শী; ব্যাপার দেখিয়া তিনি প্রমাদ গণিলেন। উত্তর-পূর্ব ভারতের বিভিন্ন অঞ্চলে তখন রাজনৈতিক ঝড়-ঝাপ্টা চলিতেছে। এ সময়ে এত লোক সঙ্গে নিয়া চলিলে প্রভুর বিপদ হইতে পারে।

করজোড়ে তিনি নিবেদন করেন, “প্রভু, বৃন্দাবনেই যদি যাবে, এত লোক কেন সঙ্গে নিচ্ছে? আজকাল রাজা বাদশাদের দ্বন্দ্ব সংঘর্ষ চলছে চারদিকে। এসময়ে জনসম্মুখে নিজে চলা মোটেই যুক্তিযুক্ত হবে না। তাছাড়া প্রভু, বৃন্দাবনে তো একান্তে কাঙাল বেশেই যেতে হয়।”

প্রবীণ রাজ-অমাত্য সনাতনের কথাগুলি যুক্তিযুক্ত। আবার ভক্তবৃন্দকে সঙ্গচ্যুত এবং নিরাশ করিতেও প্রভুর মন সায় দেয় না। অগত্যা বৃন্দাবন-যাত্রা ত্যাগ করিয়া রওনা হইলেন শাস্তিপুর অভিমুখে। সনাতন হাঁক ছাড়িয়া বাঁচিলেন।

প্রভুর রামকেলীতে আগমন ও দর্শনদান যেন সনাতন ও রূপের নবজন্মের উন্মেষ! তাঁহার অলৌকিক শক্তির প্রভাবে উভয়ের জীবনে আসিয়াছে কৃষ্ণপ্রেমের নূতন জোয়ার। এই জোয়ারের উচ্ছ্বাসে তাঁহারা এবার ভাসিয়া চলিলেন।

অনতিবিলম্বে রামকেলীর প্রাসাদে বিশিষ্ট একজন শাস্ত্রজ্ঞ বৈষ্ণব সাধককে আমন্ত্রণ করিয়া আনা হইল। সনাতন ও রূপ তাঁহার সাহায্যে ভক্তিভরে কৃষ্ণমন্ত্রের পুরস্চরণ করিলেন। রাজকর্ম এখন তাঁহাদের কাছে দুর্বহ ভারস্বরূপ। যত তাড়াতাড়ি ইহা হইতে নিষ্কৃতি পাওয়া যায় ততই মঙ্গল।

উভয় ভ্রাতার মধ্যে সেদিন গভীর রাত অবধি গোপন পরামর্শ চলে। সিদ্ধান্ত স্থির হয়, রূপ আগে গৃহত্যাগ করিবেন, আর সনাতন বহির্গত হইবেন কিছুদিন পরে।

সনাতনের উপর বাদশাহের বহু দায়িত্বপূর্ণ কাজ হস্ত রহিয়াছে, তিনি অকস্মাৎ এখনি পদত্যাগ করিলে সারা দেশে চাঞ্চল্য পড়িয়া যাইবে, রাজকার্যে দেখা দিবে নানা বিশৃঙ্খলা। কাজেই তাঁহার নিষ্ক্রমণ সঙ্গত নয়। রাজকীয় দায়িত্বের বোঝা কিছুটা হালকা করিয়া তবেই তিনি সুযোগমতো একদিন সরিয়া পড়িবেন।

সনাতন ও রূপের আশ্রিত ব্রাহ্মণ পণ্ডিত ও সাধু সঙ্জনদের সংখ্যা নিতান্ত কম নয়। ইহাদের এবং আত্মীয়স্বজনদের ভরণ-পোষণের মোটামুটি ব্যবস্থার জন্ত রূপ তখনই তৎপর হইলেন। অল্প দিনের মধ্যে একাজ সম্পন্ন হইয়া গেল এবং পূর্ব পরিকল্পনা অনুযায়ী রূপ চিরতরে করিলেন গৃহত্যাগ।

যাওয়ার আগে তিনি বিশ্বস্ত এক মুদির কাছে দশ হাজার টাকা গচ্ছিত রাখিয়া গেলেন। কথা রহিল, জরুরী প্রয়োজন উপস্থিত হইলে সনাতন এই অর্থ তাঁহার কাজে লাগাইবেন।

রূপের নিষ্ক্রমণের পর সনাতন আরো নিঃসঙ্গ হইয়া পড়েন। বিষয়বিত্ত্ব চরমে উঠে। ক্রমে দরবারে যাতায়াতও বন্ধ হইয়া যায়। বাদশাহকে খবর পাঠান—তিনি অত্যন্ত পীড়িত, এখন হইতে স্বাভাবিকভাবে রাজসেবা সম্পন্ন করা তাঁহার পক্ষে আর সম্ভব হইবে না।

হুসেন শাহ বড় সন্দেহ হইয়া উঠেন। রূপ ইতিমধ্যে কাজকর্ম ছাড়িয়া কোথায় উধাও হইয়াছেন। দবীর খাসও তেমনি কোনো মতলব আঁটে নাই তো? রাজ্যের চারিদিকে যুদ্ধবিগ্রহের মেঘ ঘনাইয়া আসিতেছে, ঠিক এসময়ে তাঁহার মতো একজন বিশ্বস্ত ও কুশলী অমাত্য কর্মত্যাগ করিয়া বসিয়া থাকিলে যে মহাবিপদের কথা।

রাজবৈভব প্রেরিত হইল সনাতনকে পরীক্ষা করার জন্ত। বৈভব কিরিয়্যা আসিলেন, মুচকি হাসিয়া জানাইলেন, “দবীর খাস শারীরিক বেশ সুস্থই আছেন, তাঁর জন্ত জাহাঁপনার হুশিয়ার কোনো কারণ নেই।”

হুসেন শাহ তো চটিয়া আগুন। পরদিনই তিনি অতর্কিতে সনাতনের রামকেলী-প্রাসাদে স্বয়ং উপস্থিত হন। দেখেন, দবীর খাসের দেহে রোগের চিহ্নমাত্র নাই, সাধু-সন্ন্যাসী ও শাস্ত্রবিদদের দ্বারা পরিবৃত হইয়া পরমানন্দে তিনি ধর্মালোচনায় নিরত।

বাদশাহ তাঁহাকে কার্ধে যোগদানের জন্ত পীড়াপীড়ি করিলেন। অবশেষে ভীতি প্রদর্শন করিতেও ছাড়িলেন না। কিন্তু সনাতন তাঁহার সঙ্কল্পে একেবারে অটল। গোড়েশ্বরের বদলে পরমেশ্বরের আসন স্থাপিত হইয়াছে তাঁহার জীবনে, কোনো চাওয়া-পাওয়ার প্রয়োজনই যে আজ আর তাঁহার নাই।

দৃঢ়স্বরে স্পষ্ট ভাষায় তিনি হুসেন শাহকে কহিলেন, “জাহাঁপনা, সত্য কথা বলতে কি, দরবারের কাজে আমি যোগদান করবো না বলেই স্থির করেছি। এখন থেকে আমি কেবলমাত্র শ্রীভগবানের দাস, আর কারুর নই। আমার এ সঙ্কল্প অপরিবর্তনীয়। আমায় আপনি মার্জনা করুন।”

ক্রুদ্ধ হইয়া সুলতান তখনি সনাতনকে কারাগারে নিক্ষেপ করিলেন। -

কিছুদিনের মধ্যেই রাজ্যে দেখা দিল এক জরুরী পরিস্থিতি। হুসেন শাহের সেনাপতি ইতিপূর্বে উড়িষ্যার যুদ্ধে পরাস্ত হইয়া কিরিয়্যা আসিয়াছেন। এবার তিনি নিজেই সসৈন্তে রাজ্য প্রতাপরুজের বিরুদ্ধে অগ্রসর হইতে চাহেন। প্রয়োজনীয় সকল কিছু ব্যবস্থা প্রায় সমাপ্ত হইয়াছে। কিন্তু এসময়ে সনাতনের মতো তীক্ষ্ণবী ও বিচক্ষণ অমাত্যের সাহায্য যে তাঁহার পক্ষে অপরিহার্য।

কারাগৃহ হইতে ডাকিয়া আনিয়া বার বার সনাতনকে বুঝাইতে প্রাণিলেন, “দবীর খাস, এখনো তুমি তোমার পাগলামী ছাড়ো।

আবার নিজের দায়িত্বপূর্ণ কাজে এসে যোগ দাও। আমার অনুরোধ শোন, আমার সঙ্গে তুমি উড়িয়া অভিযানে চল।”

সনাতন চরম কথা শুনাইয়া দিলেন, “আপনার অভিযানের দৃশ্য আমি মানসপটে চমৎকার দেখতে পাচ্ছি, জাহাঁপনা। আপনার সেনাবাহিনী সারা পথের দেবমন্দির ধ্বংস করবে, আর পবিত্র বিগ্রহ করবে কলুষিত। না—কোনোমতে আমি আপনার এ পাপকার্যের সঙ্গী হতে পারবো না।”

অমাত্যকে তখন আবার কারাগারে প্রেরণ করিয়া হুসেন শাহ্ যুদ্ধ-অভিযান শুরু করিলেন।

সনাতনের এখন একমাত্র লক্ষ্য—কি করিয়া তিনি মুক্তিশ্রান্ত করিবেন, মিলিত হইবেন প্রাণপ্রভু খ্রীচৈতন্যের সঙ্গে।

হঠাৎ সেদিন রূপের প্রেরিত এক পত্র গোপন পথে তাঁহার নিকট পৌঁছিল। তাহাতে নির্দেশ দেওয়া আছে—স্থানীয় মুদির কাছে যে টাকা গচ্ছিত আছে, তাহা হইতে, সনাতন যেন এই পত্র দেখাইয়া, সাত হাজার টাকা গ্রহণ করেন এবং উহা দ্বারা ক্রয় করেন নিজের মুক্তি।

প্রভুর সহিত মিলনের জন্ত সনাতন উন্মত্তপ্রায় হইয়া উঠিয়াছেন। তাই উপায়ান্তর অভাবে কারামুক্তির জন্ত সেদিন রূপের প্রস্তাবিত পথই তাঁহাকে বাছিয়া নিতে হইল। রক্ষীকে উৎকোচে বশীভূত করিয়া তিনি বাহির হইয়া আসিলেন।

খ্রীচৈতন্য এসময়ে বৃন্দাবনের পথে বারাণসীতে আসিয়া অবস্থান করিতেছেন। সনাতন আর এক মুহূর্ত বিলম্ব না করিয়া ধাবিত হইলেন পশ্চিম ভারতের দিকে। সঙ্গে চলিল বহু দিনের বিখস্ত ও পুরাতন ভৃত্য, ঈশান।

মুক্তির অমোঘ আহ্বান আসিয়া গিয়াছে সনাতনের জীবনে। এই মুক্তির জন্ত চরমতম মূল্য দিতে তিনি আজ প্রস্তুত। ধন মান রাজসম্পদ সব কিছু অবলীলায় ত্যাগ করিয়া, নিঃকলন মুহূর্ত সাধক ব্রহ্মপদে ছুটিয়া চলিলেন

মূলভানের রক্ষীরা তাঁহাকে অনুসরণ করিতে পারে, এ আশঙ্কা যথেষ্টই রহিয়াছে। তাই পথ চলিতে লাগিলেন দীন দরিদ্র দরবেশের ছদ্মবেশে।

পথ চলিতে চলিতে সেদিন এক ক্ষুদ্র ভূঁইয়ার অধিকারে তাঁহারা আসিয়া পড়িয়াছেন। কোনো পরিচয় নাই, কিন্তু সাক্ষাৎ মাত্রেই ভূঁইয়া তাঁহাদের মহাসমাদর শুরু করিয়া দিল, যেন সে কত দিনের বান্ধব।

এই আতিশয্য দেখিয়া সনাতন কিন্তু সন্দিগ্ধ হইয়া উঠিলেন। এই শ্রেণীর ভূঁইয়াদের কুকীর্তির কথা আগেই কিছু কিছু তাঁহার শোনা ছিল। ইহারা বিদেশী পৰ্বটকদের আশ্রয় দেয়, প্রচুর আদর-যত্ন করে, তারপর রাত্রিযোগে স্বেযোগমতো যথাসর্বস্ব লুণ্ঠন করিয়া করে হত্যা। সনাতনের নিজের জন্ত কোনো চিন্তা নাই। তিনি তো কপর্দকহীন। কিন্তু ঈশান? সে তো অর্থাৎ লুকাইয়া রাখে নাই?

চাপে পড়িয়া ঈশান স্বীকার করিল—সাতটি মোহর সে সংগোপনে নিজের কাছে রাখিয়াছে। প্রয়োজন হইলে সনাতন বা তাহার নিজের কাছে এগুলি ব্যবহার করা হইবে, ইহাই ছিল উদ্দেশ্য।

সনাতন ক্রোধে জ্বলিয়া উঠিলেন, কঠোর ভাষায় ভৃত্যকে তিরস্কার করিয়া কহিলেন, “সর্বস্ব ত্যাগ ক’রে, বৈরাগ্যসাধন নিয়ে, আমি পথে বেরিয়েছি। আর তুমি আমার সেই সাধনার পথে সৃষ্টি করেছো এমনিতর বিঘ্ন! ছি—ছি!”

তখন ভূঁইয়ার সমীপে গিয়া কহিলেন, আমার সঙ্গীর কাছে সাতটি সঞ্চিত মোহর রয়েছে। এগুলো আপনি গ্রহণ করুন, আর আমাদের নিরাপদে পার ক’রে দিন সামনের ঐ দুর্গম পাহাড়।”

সনাতনের সততায় ও সত্যভাবে অর্থগৃহ্য ভূঁইয়া খুব খুশী। তখন সে নিজে সঙ্গে করিয়া অতিথিদ্বয়কে সেখানকার বিপজ্জনক অঞ্চল পার করিয়া দিল।

ভূঁইয়া গ্রহণ করিলে ঈশান কথা প্রসঙ্গে কহিল, “হজুর, একটা কথা আপনার কাছে গোপন ক’রে আমি আরো অপরাধী হয়েছি।

আমার কাছে আসলে আটটি মোহর ছিল। তুঁইয়াকে সাত মোহর দিয়ে দেবার পর আর একটি মোহর অবশিষ্ট রয়েছে। মিথ্যা বলার জন্য আপনার কাছে আমি মাপ চাইছি।”

সনাতনের আনন মুহূর্তে কঠোর হইয়া উঠে। দৃঢ়স্বরে কহেন, “ঈশান, আমার অনুসরণ করা তো তোমার ঠিক হবে না। এখনো অর্থের ওপর তোমার প্রবল আকর্ষণ রয়েছে। অর্থের উপর নির্ভর ক’রেই তুমি চলতে চাও। আর আমি নিয়েছি বৈরাগ্য সাধনের কঠিন পথ; একান্তভাবে নির্ভর করতে চাই ভগবানের উপর। নিষ্কিঞ্চন হয়ে জীবন যাপন না করলে আমি আমার ব্রত থেকে চ্যুত হবো। তুমি এখনি আমার কাছ থেকে বিদায় নিয়ে চলে যাও।”

মনিবকে ভক্তিতে প্রণাম করিয়া ঈশান সাক্ষাৎকারে রামকেলীতে প্রত্যাবর্তন করিল।

ঋতপদে পথ চলিতে চলিতে সনাতন সেদিন শোনপুরে আসিয়া উপস্থিত। সেখানে তখন হরিহরছত্রের মেলা অনুষ্ঠিত হইতেছে। হঠাৎ মেলাক্ষেত্রে তাঁহার সাক্ষাৎ ঘটে ভগিনীপতি শ্রীকান্তের সঙ্গে। সনাতনেরই কৃপায় শ্রীকান্ত রাজসরকারের দায়িত্বপূর্ণ পদে অধিষ্ঠিত আছেন। ছত্রের মেলায় তিনি আসিয়াছেন সুলতানের জন্ত কয়েক লাখ টাকার ঘোড়া কিনিতে।

বহু অনুন্নয়-বিনয়েও শ্রীকান্ত সনাতনকে তাঁহার বৈরাগ্যের পথ হইতে বিচ্যুত করিতে পারিলেন না। শেষটায় ধরিয়া বসিলেন, “বেশ, যদি ঘর ছেড়ে যেতেই হয়, ভিখারীর বেশে যেতে দেবো না। অনুমতি দিন, আমি আপনাকে কিছু নূতন পরিচ্ছদ কিনে দিই।”

সনাতন দৃঢ়স্বরে এ প্রস্তাব প্রত্যাখ্যান করিলেন। অগত্যা শ্রীকান্ত ধরিয়া বসিলেন, “এখন তো প্রচণ্ড শীত পড়েছে পশ্চিমে। একখণ্ড ভোটকম্বল আপনাকে নিতেই হবে, নতুবা পথে যে কষ্টের অবধি থাকবে না।”



ଭଗିନୀପତିର ନିର୍ବକ୍ତାଭିଷେଷେ ସନାତନକେ ଐ କହଣଟି ଶ୍ରବଣ କରିତେ ହଇଲ । ସେଟି କାଁଧେ କେଲିଆ ଆବାର ତିନି ଶୁରୁ କରିଲେନ ପଦସାଜା । କରେକଦିନ ଅବିରାମ ପଥ ଚଳାର ପର ଉପନୀତ ହଇଲେନ ବାରାଣସୀଧାମେ ।

ବାରାଣସୀରେ ପୌଛିଆଇ ସେ ସୁସଂବାଦଟି ସନାତନ ଶୁନିଲେନ, ତାହାତେ ତାହାର ଆନନ୍ଦର ଅବଧି ରହିଲ ନା । ପ୍ରାଣପ୍ରଭୁ ଶ୍ରୀଚୈତନ୍ୟ କିଛିଦିନ ଯାବତ୍ ଏଥାନେଇ ଅବସ୍ଥାନ କରିତେଲେନ । ତାହାର ନର୍ତ୍ତନ-କୀର୍ତ୍ତନେ କାଶୀର ଭକ୍ତସମାଜେ ଏକ ପ୍ରଚଣ୍ଡ ସାଢ଼ା ପଡ଼ିଆ ଗିଆହେ ।

ଚନ୍ଦ୍ରଶେଖର ମିଶ୍ରର ଗୃହେ ପ୍ରଭୁ ତখন ଅବସ୍ଥାନ କରିତେଲେନ । ଦୀନ-ବେଶେ ଯୁକ୍ତକରେ ସନାତନ ମିଶ୍ରର ଦ୍ଵାରେ ଆସିଆ ଦାଁଡ଼ାଇଲେନ ।

ଗୃହର ଅଭ୍ୟନ୍ତରେ ବସିଆ ପ୍ରଭୁ ଭକ୍ତଦେବ ସଙ୍ଗେ ଇଚ୍ଛାମୋକ୍ଷ କରିତେଲେନ । ହାତୀ ଚନ୍ଦ୍ରଶେଖର ମିଶ୍ରକେ କହିଲେନ, “ମିଶ୍ର, ଆଜ ବଡ଼ ଶୁଭଦିନ । ବାଈରେ ଗିୟେ ଛାଆ, ତୋମାର ଦ୍ଵାରେ ସମାଗତ ହୟେଲେନ ଏକ ମହାବୈଷ୍ଣବ । ଏଥନି ପରମ ସମାଦରେ ତାଁକେ ଆମାର କାହେ ନିୟେ ଏସୋ ।”

ଭକ୍ତେରା ଶ୍ରବଣେକାନ୍ତେ ବାହିରେ ଛୁଟିଆ ଆସିଲେନ । କିନ୍ତୁ କହି, କୋନୋ ବୈଷ୍ଣବ ମୂର୍ତ୍ତି ତୋ ସେଥାନେ ନାହିଁ ? ଛୁଆରେ ଦଶାୟମାନ ଛିନ୍ନବାସ ପରିହିତ ଏକ ଦୟାବେଶ । କଞ୍ଚିମାଳା, ତିଳକ ବା ବୈରାଗୀର ଉତ୍ତରୀୟ କୋନୋ କିଛିହି ତାହାର ନାହିଁ । ପ୍ରଭୁ ଅପର କାହାରୋ କଥା ବଲେନ ନାହିଁ ତୋ ।

କିଛିକ୍ଷଣ ଇତସ୍ତତ କରାର ପର ଚନ୍ଦ୍ରଶେଖର ମିଶ୍ର ଦୟାବେଶ-ବେଶୀ ସନାତନକେ ବାଢ଼ିର ଭିତରେ ନିଆ ଗଲେନ ।

ପ୍ରଭୁର ଦର୍ଶନ ପାଶୁଆ ମାତ୍ର ସନାତନର ଭାବାବେଗ ଉଠିଲିଆ ଉଠିଲ । ଛୁଟିଆ ଗିଆ ସାଣ୍ଟାଜେ ତାହାର ଚରଣେ ପ୍ରଣତ ହଇଲେନ । ପ୍ରାଣପ୍ରିୟ ଭକ୍ତେର ଆଗମନେ ପ୍ରଭୁର ଓ ଆନନ୍ଦର ଆର ଅବଧି ନାହିଁ । ଭାବାବେଗେ ନାରୀ ଦେହ କମ୍ପିତ ହଇତେଲେ, ନୟନେ ବହିତେଲେ ପୁଲକାଞ୍ଚ । ହୃଦୟସ୍ପର୍ଶ ସନାତନକେ ସକ୍ଷେ ତୁଲିଆ ଧରିଆ ତଥନି ଆଲିଙ୍ଗନାବଦ୍ଧ କଲେନ ।

ଦୈନ୍ୟତ୍ଵରେ ସନାତନ ସରିଆ ଦାଢ଼ାନ । କାତର ଅରେ କହେନ, “ପ୍ରଭୁ, ଆମି ଅତି ନୀଚ, ହୀନାଚାରୀ, ତୋମାର ଦେବହୃଦୟ ଅଙ୍ଗ ଦିୟେ ଆମାର ଶ୍ରୋତାବେ ଆମ୍ଭ ସ୍ପର୍ଶ କରୋ ନା ।”

চিহ্নিত লীলা-পার্বদ এতদিন পরে আজ প্রভুর চরণে আত্মসমর্পণ করিলেন। এ আনন্দ রাখার তাঁহার যে আর ঠাই নাই। প্রেমাবেগে বার বার সনাতনকে বক্ষে জড়াইয়া ধরিলেন—

প্রভু কহে তোমা স্পর্শি আত্ম পবিত্রিতে  
ভক্তি বলে পার তুমি ব্রহ্মাণ্ড শোধিতে।

অতঃপর প্রেমার্ককণ্ঠে সকলের কাছে সনাতনের নিগূঢ় পরিচয় জ্ঞাপন করিলেন, তাঁহার ভাগ্য তিতিক্ষা ও বৈরাগ্য সাধনের প্রশস্তি গাহিতে লাগিলেন উচ্ছ্বসিত কণ্ঠে।

মধ্যাহ্ন সমাগত। প্রভু কহিলেন, “সনাতন, বেলা অনেক হয়েছে। এবার তাড়াতাড়ি পতিতপাবনী গঙ্গার পূণ্যধারায় স্নান তর্পণ সমাপন ক’রে এসো। তারপর ভিক্ষা গ্রহণ করো।”

মিশ্রগৃহ হইতে একথণ্ড পুরাতন বস্ত্র সনাতন চাহিয়া নিলেন। উহা দ্বিখণ্ডিত করিয়া তৈরি করিলেন নিজের কোঁপীন ও বহির্বাস।

স্নানের ঘাট হইতে ফিরিয়া আসিতেই এক মারাঠী ব্রাহ্মণ সনাতনকে তাঁহার গৃহে ভোজনের নিমন্ত্রণ জানাইলেন।

কিন্তু সনাতন তাহাতে সম্মত নন। কল্কুব্রত ও কাঙালের জীবনকেই যে তিনি পরম পথের প্রস্তুতি হিসাবে আজ প্রাণপণে আঁকড়িয়া ধরিয়াছেন। সারা জীবন কাটিয়াছে বাদশাহী দরবারের ভোগ-বিলাস ও ঐশ্বর্যের চাকচিক্যের মাঝখানে। তাইতো বৈষয়িকতার নৃশংসতম অঙ্কুরটিকে নিঃশেষে দগ্ধ না করা অবধি তাঁহার স্বস্তি নাই। চরম বৈরাগ্যের মধ্য দিয়া পৌঁছিবেন কৃষ্ণ-অনুরাগের মহা-সমুদ্রে, ইহাই যে তাঁহার অভীশা।

যুক্তকরে সনাতন নিবেদন করিলেন, “আপনারা আশীর্বাদ করুন, নিকিঞ্চন বৈষ্ণব হয়ে গৃহে গৃহে মাধুকরী ক’রেই যেন আমি দিনাতিপাত করতে পারি।”

ভোট-কলসটি স্বক্কে নিয়া, ভিক্ষার কুলি হস্তে সনাতন উঠিয়া দাঁড়াইলেন। এবার বাহির হইবেন দ্বারে দ্বারে ভিক্ষা মাগিতে।

প্রভু তো মহা উল্লসিত, বার বার গদগদ কণ্ঠে সবাইকে কহিতে লাগিলেন, “জাখো জাখো, সনাতনের কি অগূর্ব বৈরাগ্য সাধন।”

প্রভু আনন্দ প্রকাশ করিতেছেন বটে, কিন্তু এই সঙ্গে তীক্ষ্ণ দৃষ্টিতে ঘন ঘন চাহিতেছেন সনাতনের স্বকৃষ্ণিত ভোট-কম্বলটির দিকে।

তাঁহার এ দৃষ্টির গূঢ় তাৎপর্য বুঝিতে সনাতনের দেরি হয় নাই। মুহূর্তে নিজ সিদ্ধাস্ত তিনি স্থির করিয়া ফেলেন, ছুটিয়া যান গঙ্গাতীরে। দীন দরিদ্র এক বৃদ্ধ নিকটস্থ ঘাটে বসিয়া তাহার জীর্ণ কাঁথাটি রোজে শুক করিতেছে। সনাতন তাহারই শরণ নিলেন। মিনতি করিয়া কহিলেন, “ভাই, তুমি দয়া ক’রে আমার একটা উপকার করো। আমার এই নূতন কম্বলটির বদলে তোমার ঐ ছেঁড়া কাঁথাখানি আমার দাও। এজন্ত চিরকৃতজ্ঞ থাকবো তোমার কাছে।”

সংশয় ও সন্দেহে বৃদ্ধের ভ্রু কুঞ্চিত হইয়া উঠে। নূতন ভোট-কম্বলের বদলে এই অব্যবহার্য কাঁথা? এ আবার কি, অদ্ভুত প্রস্তাব? এ অচেনা বৈরাগীর মনে কোনো অভিসন্ধি নাই তো? না কি এ তাহার পরিহাস!

বহুক্ষণ নানাভাবে বুঝাইয়া সনাতন লোকটিকে রাজী করান। তারপর মহাপ্রসন্ন মনে জীর্ণ কাঁথা গারে জড়াইয়া ফিরিয়া আসেন

প্রভুর চোখে মুখে ফুটিয়া উঠে অপার আনন্দের দীপ্তি। বিস্ময়ের ভান করিয়া জিজ্ঞাসা করেন, “একি সনাতন! তোমার সেই ভোট-কম্বলটি কোথায় হারিয়ে এলে?”

কম্বল বর্জনের কাহিনী শুনিয়া প্রভু আনন্দে ডগমগ। এই তো চাই। তাঁহার সনাতন যে লোকগুরু হওয়ার জন্য আবির্ভূত। যে ভক্তি সাত্ত্বিকের পন্থন প্রভু করিতেছেন তিনি যে তাহার অন্তঃস্বয়ং নিয়ামকরূপে আগে হইতেই চিহ্নিত হইয়া আছেন। তাই তো লোকশিক্ষার জন্য সনাতনের জীবনে একটিই হওয়া প্রয়োজন ত্যাগ বৈরাগ্যের পন্থাকাষ্ঠা।—

প্রভু কহে ইহা আমি করিয়াছি বিচার।

বিষয় রোগ খণ্ডাইল কৃষ্ণ যে তোমার।

সে কেন রাখিবে তোমার শেষ বিষয় ভোগ

রোগ খণ্ডি সন্দেশ্য না রাখে বিষয় রোগ।

হুসেন শাহের প্রাক্তন প্রধান অমাত্যের, এই সর্বভাগী মহা-বৈরাগী রূপটি প্রভু শ্রীচৈতন্য সেদিন ইচ্ছা করিয়াই সর্বজন সমক্ষে প্রকটিত করিলেন। বৈষ্ণব সাধকসমাজের সম্মুখে তুলিয়া ধরিলেন কল্লুবরণ ও দৈন্তময়তার এক কালজয়ী আলেখ্য।

বারাণসীতে প্রভুর কাছে সনাতন এ সময়ে কিছুদিন অবস্থান করেন। ঘনিষ্ঠ সান্নিধ্যে রাখিয়া প্রভু তাঁহার এই চিহ্নিত পার্শ্বদিকে অনুপ্রাণিত করেন নিজ প্রবর্তিত বৈষ্ণবীয় সাধনায়। সাধ্য-সাধনার তৎপন্ন রূপে দিনের পর দিন অতিবাহিত হয়। সনাতন প্রকৃত জিজ্ঞাসু, মহাপ্রতিভাধর, সর্বোপরি প্রভুর চরণে সমর্পিত-প্রাণ। পরমোৎসাহে একের পর এক তিনি প্রশ্ন করিয়া চলেন, আর প্রভু প্রসন্নোজ্জ্বল মুখে উত্তর দিতে থাকেন। কিছুদিন আগে গোদাবরী-তীরে প্রভু ও রামানন্দের সংলাপের মধ্য দিয়া প্রকাশিত হইয়াছে গোড়ীয় বৈষ্ণবধর্মের নির্ধাস-ব্রজরসতত্ত্ব। আর আজ বারাণসীর গঙ্গাতীরে প্রভু ও সনাতনের প্রশ্নোত্তরের মধ্য দিয়া উদ্ঘাটিত হইল গোড়ীয় বৈষ্ণবসাধনার ক্রম ও নিগূঢ় তত্ত্ব। প্রভুর ব্যাখ্যাত এই তত্ত্বের সংবাহকরূপেই সনাতন উত্তরকালে ব্রজমণ্ডলের বৈষ্ণব-সমাজের শীর্ষস্থানীয় হইয়া উঠিয়াছিলেন।

একে একে প্রভু বিবৃত করিলেন কৃষ্ণ-অবতার ও বৃন্দাবন-লীলার মর্মকথা। প্রকাশ করিলেন যুগলভজনের অপূর্ব পদ্ধতি। প্রথমে শ্রীমুখের বাণী শুনাইয়াই প্রভু সনাতনকে কৃতার্থ করিলেন। তারপর পরম কৃপাভরে তাঁহার মধ্য করিলেন শক্তি-সঞ্চার। সনাতনের শিরে পদ্মহস্ত স্থাপন করিয়া কহিলেন, “সনাতন, আজ দেববাহিত যে সব তত্ত্ব তুমি শ্রবণ করলে, আশীর্বাদ করি, অচিরে তা তোমার ভেতর স্মৃতি হইবে উঠুক।”

ইতিপূর্বে রূপকেও প্রভু এমনি কৃপা করিয়াছেন। শক্তি সঞ্চার করিয়া পাঠাইয়া দিয়াছেন বৃন্দাবনধামে। এবার সনাতনকে সেখানে প্রেরণ করিলেন বিরাট দায়িত্বের ভার দিয়া। নির্দেশ দিলেন—

তুমিও করিহ ভক্তিরসের প্রচার।

মথুরায় লুপ্ত তীর্থের করিহ উদ্ধার ॥

বৃন্দাবনে কৃষ্ণসেবা বৈষ্ণব আচার।

ভক্তি স্মৃতি শাস্ত্র করি করহ প্রচার ॥

আরো কহিলেন, “সনাতন, এর পর থেকে আমার কন্বাকরঙ্গধারী কাঙাল বৈষ্ণবেরা দলে দলে ব্রজমণ্ডলে গিয়ে আশ্রয় নেবে। তুমি তাদের উপর দৃষ্টি রেখো, রক্ষণাবেক্ষণ ক’রো।”

প্রভুর এই আদেশ সনাতন নিষ্ঠাভরে পালন করিয়াছিলেন। প্রভুর ব্যাখ্যাত তত্ত্বের ধারক ও বাহকরূপে উত্তরকালে ব্রজমণ্ডলেই তিনি স্থায়ীভাবে বাস করিতে থাকেন এবং অচিরকাল মধ্যে সেখানকার বৈষ্ণবসমাজের মুখপাত্ররূপে চিহ্নিত হইয়া উঠেন।

বৃন্দাবনে পৌঁছিয়াই প্রবীণ ভক্ত সুবুদ্ধি রায়, লোকনাথ গোস্বামী ও ভৃগুর্ভ পণ্ডিতের সহিত সনাতন সাক্ষাৎ করিলেন। দৈন্ত্যভরে তাঁহাদের চরণে দণ্ডবৎ করার পর আশ্রয় নিলেন যমুনা-পুলিনের আদিভাটিলায়।

স্থানটি ঘন অরণ্যময়। এখানকার নির্জন সুগভীর পরিবেশ ধ্যানভজনের বড় অনুকূল। নিবিষ্ট সাধক সনাতনের এ জায়গাটি বড় ভাল লাগিল। এখানে বসিয়া একান্ত নিষ্ঠায় তিনি সাধনভজন শুরু করিয়া দিলেন।

সনাতনের এই সময়কার ত্যাগ-বৈরাগ্যময়, ভজননিষ্ঠ জীবনের চিত্র ‘ভক্ত পদাবলী’ হইতে পাওয়া যায়—

কভু কান্দে কভু হাসে কভু প্রেমানন্দে আসে

কভু ভিক্ষা কভু উপবাস

হেঁড়া কাঁধা, নেড়া মাথা মুখে কৃষ্ণ গুণগাথা

পরিধান হেঁড়া বহির্বাস ।

কখনও বনের শাক অলবণে করি পাক

মুখে দেয় ছই এক গ্রাস ।

মাঝে মাঝে ভজনভঙ্গ্য সাধকের স্বাভাবিক অবস্থা যখন ফিরিয়া আসে, বুলি কাঁধে পদব্রজে মথুরায় চলিয়া যান । যৎকিঞ্চিৎ ভিক্ষা সেখানে মিলে, তাহাতেই হয় উদরপূতি ।

কিছুদিনের মধ্যেই প্রভুর নির্দেশ মতো সনাতন লুপ্ততীর্থ উদ্ধারে ব্রতী হন । আগে হইতেই লোকনাথ গোস্বামী এ কাজ কিছুটা শুরু করিয়াছেন । সনাতন তাহার সহিত নিজের প্রচেষ্টা যুক্ত করিলেন । যে সব প্রাচীন গ্রন্থে ব্রজমাহাত্ম্য বর্ণিত আছে সেগুলি তুঁড়িয়া লুপ্ত তীর্থের সন্ধান বাহির করা এখন হইতে হয় তাঁহার এক বড় কাজ । এই উদ্দেশ্যে নিয়া দিনের পর দিন তিনি অরণ্যে পর্বতে ঘুরিয়া বেড়ান । শাস্ত্র, মহাজনবাক্য ও লোকগাথার ভিত্তিতে বাধাক্ষেপের এক একটি লীলাতীর্থ উদ্ধার করেন, আর আনন্দে উৎফুল্ল হইয়া স্থানীয় জনগণকে নিয়া মত্ত হন কীর্তনানন্দে ।

বৎসরখানেক বৃন্দাবনে অতিবাহিত করার পর প্রভু শ্রীচৈতন্যের জন্ত সনাতনের প্রাণ চঞ্চল হইয়া উঠে । তাছাড়া, প্রভু তাঁহাকে একবার নীলাচলে ঘুরিয়া আসিতেও বলিয়াছিলেন । তাই হঠাৎ একদিন বুলি কাঁধে নিয়া উড়িষ্যার পথে ধাবিত হইলেন ।

ঝাড়খণ্ডের নধ্য দিয়া সনাতন দিন রাত পথ চলিতেছেন । হঠাৎ একদিন দেখা গেল, দেহে তাঁহার বিযাক্ত কণ্ঠ রোগের আক্রমণ ঘটিয়াছে । নিবিষ্ট সন্ন্যাসী মনে মনে ভাবিতে থাকেন, 'এই ছুট রোগের তুর্ভোগ যে আমার অবশ্য প্রাপ্য । দবীরখাস জীবনে স্নেহ সুলভানের অধীনে থাকিয়া যে সব অশ্রায়-অনাচার করেছি, 'এ যে তারই অনিবার্য পরিণতি ।' সঙ্গে সঙ্গে নিজ সঙ্কল্প স্থির করিয়া কেলিলেন, 'যুগ্য রোগে আক্রান্ত এই দেহকে আর শুধু শুধু বহন করিয়া বেড়াইবেন না । পুরীধামে পৌঁছিয়া শ্রীজগদ্বাণ ও প্রভু

ত্রীচৈতন্যের চন্দ্রবদন দর্শন করিবেন, তারপর রথচক্রতলে করিবেন প্রাণ বিসর্জন।

ধামে পৌঁছিয়াই সনাতন উপস্থিত হইলেন হরিদাসের ভজন কুটিরে। হরিদাস নিজেকে মনে করেন যবন, পতিত, দীনাতিদীন। তাই ত্রীজগন্নাথের সেবক ও চৈতন্য-প্রভুর ভক্তদের স্পর্শ এড়াইয়া নগরের এক প্রান্তে নিজের পর্ণকুটির রচনা করিয়াছেন। সনাতনের মনেও এমন দৈন্ত্যভাব; নিজেকে মনে করেন আচারভ্রষ্ট ও অপবিত্র। তাই হরিদাসের কুটিরই যে তাঁহার আশ্রয়স্থল। জপসিদ্ধ হরিদাস আর ত্যাগনিষ্ঠ শাস্ত্রবিদ সাধক সনাতন, এই দুয়ের মিলনে বিজন টোটা-মধ্যস্থ কুটির সরগরম হইয়া উঠে।

প্রভুর নিত্যকার এক কাজ ছিল পরম ভক্ত হরিদাসকে দর্শন দান। জগন্নাথের উপল ভোগের পর তিনি সঙ্গোপাঙ্গ সহ এই কুটিরে উপস্থিত হইতেন, দীর্ঘ সময় কাটাইয়া গৃহে ফিরিতেন।

সেদিন চৈতন্যপ্রভু টোটার পদার্পণ করামাত্র সনাতন দৈন্ত্যভরে তাঁহাকে প্রণাম করিলেন। বাছ প্রসারিয়া প্রভু যতই আলিঙ্গন করিতে যান, সনাতন ততই পিছু হঠেন। কাতর স্বরে বলেন, “প্রভু কৃপা করো, আমার মিন্তি রাখো। এমন ক’রে তোমার দেবত্বলভ দেহ দিয়ে আমার স্পর্শ ক’রো না! আমি অতি হীন, ভ্রষ্টাচারী। তত্পরি সারা অঙ্গে রয়েছে কণ্ডুর ঘৃণ্য ক্লেদ। দোহাই তোমার, এই ক্লেদ তোমার গায়ে মেখে আমার আর পাপের ভাগী ক’রো না।”

কিন্তু প্রভুকে রোধ করিবে এমন সাধ্য কার? আনন্দের আবেশে বার বার প্রিয় পার্শ্বদকে বুকে জড়াইয়া ধরেন, কণ্ডুরস তাঁহার সারা শরীরে লিপ্ত হয়। আর সনাতন কেবলি জ্বলিতে থাকেন অগ্নুতাপের তীব্র দহনে।

সনাতনের আত্মগ্নানি কেবলি বাড়িতে থাকে। ভাবেন—কৃষ্ণ তাঁহাকে একি বিপদে ফেলিলেন! রোজই প্রভু তাঁহাকে এমন-ভাবে প্রেমালিঙ্গন দিবে, আর তাঁহার দেহ হইবে অপবিত্র। এবে

নিতান্ত অসহ। বরং এ পাপ-দেহ তাড়াতাড়ি বিসর্জন দেওয়াই যুক্তিযুক্ত।

সেদিন ভক্তগণসহ শ্রীচৈতন্য হরিদাসের ভজনকুটির আলো করিয়া বসিয়াছেন, ভাবাবেশে ও দিব্য আনন্দে তিনি উদ্দীপিত। শ্রীমুখ হইতে কৃষ্ণকথার অমৃতধারা ঝরিয়া পড়িতেছে।

হঠাৎ প্রভু সনাতনের দিকে কিরিয়া কহিলেন, “সনাতন, একটা কথা সদাই মনে রেখো, দেহত্যাগ করলেই কিন্তু কৃষ্ণ মিলে না ; কৃষ্ণ মিলে কৃষ্ণভজনে। ওসব অশুভ সঙ্কল্প ছেড়ে দাও, ডুব দাও লীলাময়ের লীলারসের মহাপাথারে। আমি আশীর্বাদ করছি, অচিরে তোমার মনস্কামনা সিদ্ধ হবে, পাবে পরমপ্রভুর দর্শন।”

প্রভুর ইঙ্গিতের মর্ম সনাতন বুঝিলেন। অন্তর্যামীরা কাছে সনাতনের আত্মহত্যার গোপন ইচ্ছাটি অজানা থাকে নাই।

প্রেমাবেগে সনাতন তাঁহার চরণতলে নিপতিত হইলেন। কঁাদিতে কঁাদিতে কহিলেন, “প্রভু, আমি পতিত, তায় মহাপাতকী। তবে এ দেহ জিইয়ে রেখে কি লাভ বেলো ? শ্রীজগন্নাথের রথচক্রতলে আমি নিজেকে নিক্ষেপ করবো, আমায় তুমি অনুমতি দাও।”

উত্তরে কৃপাময় প্রভু যে কথা কহিলেন, তাহার মধ্য দিয়া অন্তরঙ্গ ভক্ত সনাতনের মূল্যায়ন প্রকট হইয়া উঠে :

প্রভু কহে তোমার দেহ মোর নিজ ধন।

তুমি মোরে করিয়াছ আত্মসমর্পণ।

পরের দ্রব্য তুমি কেন চাহ বিনাশিতে।

ধর্মধর্ম বিচার কিবা না-পার করিতে।

তোমার শরীর মোর প্রধান সাধন।

এ শরীরে সার্থক আমি বহু প্রয়োজন। (চৈঃ চঃ)

চিহ্নিত পার্শ্বদ সনাতনকে দিয়া কি ঐশী কর্ম প্রভু করাইবেন তাহার আভাস ইতিমধ্যেই কিছুটা ফুটিয়া উঠিয়াছে। কৃষ্ণভক্তি, কৃষ্ণসেবার প্রবর্তন, লীলাতীর্থ উদ্ধার, বৈরাগ্যময় আদর্শের প্রচার—এগুলি তাঁহার সঙ্কল্পে রহিয়াছে। একান্তে সনাতন তাঁহার অন্ততম



প্রধান সহায়। নিজে প্রভু মাতৃআজ্ঞায় নীলাচলে বাস করিতেছেন, তাই এস্থান ত্যাগ করার ইচ্ছা তাঁহার নাই। এদিকে প্রাণপ্রিয় ব্রজেন্দ্রনন্দনের লীলাধাম বৃন্দাবনের দিকে তাঁহার দৃষ্টি রহিয়াছে সতত নিবদ্ধ। সেখানকার নব উজ্জীবিত ভক্তিবর্ধ আন্দোলনের পুরোভাগে প্রিয় পরিকর সনাতনকেই যে তিনি স্থাপন করিতে চান। সনাতনের মাধ্যমেই যে তাঁহার নিজ প্রয়োজন অনেকাংশ সিদ্ধ করিবেন।

ভৎসনার পর সনাতন শির নত করিয়া রহিলেন। সত্যিই তো, প্রভুর চরণে যে জীবন উৎসর্গ করিয়াছেন, তাহার উপর যে তাঁহার সত্যকার কোনো অধিকার নাই। তবে সে জীবন এখন নিজ ইচ্ছায় কি করিয়া বিসর্জন দিবেন?

প্রভুর বাণী শুনিয়া হরিদাসের আনন্দ আর ধরে না। প্রেমভরে সনাতনকে আলিঙ্গন করিয়া কহিলেন, “সনাতন, তোমার সৌভাগ্যের সীমা নেই। স্বয়ং প্রভু তোমার দেহকে নিজ ধন বলে দাবি করছেন। শুধু তাই নয়, নিজ দেহ দিয়ে যে কাজ সম্ভব নয়, তা করাতে মনস্থ করছেন তোমায় দিয়ে। ভাই, তুমি সত্যিই ধন্য। আমরা নিতান্ত অধম, তাই প্রভুর কোনো কাজে লাগতে পারলুম না।”

“এ কি অদ্ভুত কথা তুমি বলছো, ত্রীপাদ?”—সনাতন যুক্তকরে উত্তর দেন। “প্রভুর এই মণ্ডলীতে তোমার মতো ভাগ্যবান আর কে আছে? প্রভুর আবির্ভাব নামধর্ম প্রচারের জন্ত। এ কাজে তুমিই যে সবার অগ্রগণ্য! প্রভুর ভক্তদের সবাই সাধনভজন করছে নিজ নিজ কল্যাণের জন্তে। কিন্তু তুমি হচ্ছেো ব্যতিক্রম। নিজের উদ্ধারের জন্ত ব্যগ্র না হয়ে, অবিরাম উচ্চ কঠে জপ ও কীর্তন ক’রে তুমি জীবের উদ্ধারের জন্ত তৎপর হয়েছো বেশী। তোমার প্রেমের ভুলনা কোথায়, ত্রীপাদ?”

সনাতন ও হরিদাসের এমনিতর প্রণয়-বন্দে ভজনকুটির মুখর হইয়া উঠিতে থাকে।

ত্রীচৈতন্তের অস্তরঙ্গ ভক্ত অগদ্যানন্দ পশ্চিম দেশ হইতে নীলাচলে

আসিয়া পৌছিয়াছেন। সেদিন তিনি সনাতনের সঙ্গে সাক্ষাৎ করিতে গেলেন। কিছুক্ষণ কথকথায় অতিবাহিত করার পর সনাতন ক'হলেন, “পণ্ডিত, আপনি প্রভুর একান্ত আপনার জন। আপনি আমায় সহুপদেশ দিন। প্রভু রোজ আমায় আলিঙ্গন করেন, আর তাঁর কনককাস্তি দেহে লিপ্ত হয় আমার বাঁভংস কণ্ডু-রোগের রস। এ এক মহা অপরাধে আমি অপরাধী হয়ে পড়িছি। প্রভুকে নিরন্তর করা অসম্ভব। তাই ভেবোঁছিলাম, আত্মহত্যা করে এ সমস্যার সমাধান করবো, তাও হলো না। অন্তর্মামী প্রভু আগে থেকে সব বুঝতে পেরে তাতে বাদ সাধলেন। এখন আমি কি করি, বলুন তো!”

জগদানন্দ স্বভাবতই প্রভু-মন্ত প্রাণ। প্রভুর শরীরে বিমোহিত হইয়া স্পর্শ নিত্য লাগিতেছে শুনিয়া তিনি শিহরিয়া উঠিলেন। ব্যাকুল কণ্ঠে ক'হলেন, “সনাতন, তুমি এক কাজ করো। বৃন্দাবনধাম থেকে তুমি ছুটে এসেছো প্রভুর দর্শনের জন্য, সেই আসল কাজটি তো তাই সাজ হয়েছে। তবে আর এখানে থেকে রোজ বিপদ থেকে আনছো কেন? সামনেই রয়েছে রথযাত্রা উৎসব- তারপরেই তাড়াতাড়ি বৃন্দাবনে চলে যাও। তোমাকে আর কপ গোষ্মাকে প্রভু বৃন্দাবনে নেতৃত্ব দিয়েছেন, আরো দিয়েছেন কত দুঃস্বাদ কাজের ভার। তোমার কি তাই বৃন্দাবন ছেড়ে অশ্রদ্ধা বাস করা সাজে? বৃন্দাবনই যে তোমার স্বস্থান। কাল-বিলম্ব না করে সেই স্বস্থানেই তো তোমার চলে যাওয়া উচিত।”

পণ্ডিতের কথাগুলি শ্রুতযুক্ত। ভাবিয়া-চিন্তিয়া সনাতন তাহাতে সায় দিলেন।

পরদিন হরিদাস ও সনাতনকে প্রভু দর্শন দিতে আসিয়াছেন। অভ্যাসমতো সেদিনও তিনি সনাতনকে বন্ধে ধারণ করলেন। তীব্র অনুশোচনার দহন শুরু হইল সনাতনের মনে। করজোড়ে কাতর কণ্ঠে নিবেদন করিলেন, “প্রভু, রোজ রোজ এই পাপীয় দেহ তুমি স্পর্শ করো, বিমোহিত করো হোয়া তোমার পবিত্র দেহে লাগে, আর আমি জলে পুড়ে মরি। প্রভু, এবার আমি স্থির করছি, নীলাচলে আর

ধাকবো না, রথযাত্রার পরেই বৃন্দাবনে চলে যাবো। তাছাড়া, এইতো কাল পণ্ডিত জগদানন্দের সঙ্গে কথাবার্তা হলো। তিনিও আমার উপদেশ দিলেন, তাড়াতাড়ি এখান থেকে চলে যাবার

প্রভু রোষে গর্জিয়া উঠেন। হৃদয় দিয়া কহেন, “কি বল্লে তুমি সনাতন! সেদিনকার জগা, সে আসে তোমায় উপদেশ দিতে! এত বড় তার স্পর্ধা। সে কি জানে না—বুদ্ধিতে, শাস্ত্রজ্ঞানে, ভজন-সাধনে তুমি তার গুরু হবার যোগ্য? আমাকেও তুমি শাস্ত্রের নিগূঢ় তত্ত্ব শেখানোর শক্তি ধরো। তাছাড়া, তুমি আমার প্রাণাধিক প্রবীণ সুহৃদ। বালকবুদ্ধি জগা তোমায় উপদেশ দিতে আসে, এ ধুষ্টতা তার কি ক’রে হলো?”

প্রভুর ক্রোধোদ্বীগু মূর্তির দিকে সনাতন নির্নিমেষে চাহিয়া আছেন, গণ্ড বাহিয়া ঝরিতেছে প্রেমাক্ষর ধারা।

কণপরে আত্মসংবরণ করিয়া কহিলেন, “প্রভু, আজ আমার পরম সৌভাগ্য—তোমার এই প্রেমমনোহর রূপটি আমার সামনে এমনি ক’রে উদ্ঘটিত হলো। আরো বুঝলাম, ভক্তপ্রবর জগদানন্দের মতো ভাগ্যবান ভক্ত খুব কমই রয়েছেন। তাঁকে তুমি যে কঠোর ভাষায় তিরস্কার করলে, তা করলে একান্ত আশ্চর্য জ্ঞানে। তোমার সহজ আত্মীয়তার সে অধিকারী। একি সহজ কথা, প্রভু? আসলে দেখছি, প্রকৃত অন্তরঙ্গ জন জগদানন্দের জন্য তুমি রেখেছ একাত্মকতার মধু। আর দূর ব্যবধান থেকে আমাদের পান করাচ্ছে গৌরবস্ততির নিঃশিলা রস।”

সনাতনের এই কথায় প্রভু একটু অপ্রস্তুত হইয়া পড়িলেন। তারপর প্রসন্ন মধুর কণ্ঠে কহিলেন, “সনাতন, আসল কথাটি শোন। তোমার চাইতে জগদানন্দ আমার প্রিয় নয়। আর জেনে রেখো, কারুর মর্বাদা লজ্জন আমি কখনো সহ্য করতে পারিনে। তোমার উপদেশ দিচ্ছে এসে জগদানন্দ তোমার মতো ব্যক্তির মর্বাদাকে লজ্জন করেছে। এই জন্যই আমি তাকে ভৎসনা করেছি। আর বহিঃস্ব

জ্ঞানে আমি তোমার প্রশংসা করেছি, তা মনে ক'রো না। তোমার নিজস্ব গুণই প্রশংসা উৎসারিত করে।”

ভক্তদের লক্ষ্য করিয়া প্রভু আরো কহিলেন, “তোমরা জানো, আমি একজন সর্বভাগী সর্ববন্ধনমুক্ত সন্ন্যাসী—চন্দন ও পঙ্কে আমার সমস্তান রাখাই তো উচিত। তবে সনাতনের কণ্ঠস্বর আমার গায়ে লাগায় তোমরা এত চঞ্চল হচ্ছে। কেন, বল তো?”

প্রবীণ ভক্ত হরিদাস এবার নিবেদন করিলেন, “প্রভু, তুমি স্বেচ্ছাময়, স্বতন্ত্র ঈশ্বর। তোমার লীলার মর্ম আমরা কি বুঝবো? বৈষ্ণবাপরাধ ক'রে বাসুদেব ঠাকুর কুষ্ঠরোগে আক্রান্ত হয়েছিল, তা সত্ত্বেও তুমি তার প্রাতঃকৃপা করতে কার্পণ্য করো নি। তোমার প্রসাদে তার হৃদরোগ্য কুষ্ঠ হয়েছিল নিরাময়। অথচ আজ দেখতে পাচ্ছি, তোমাতে সমর্পি-প্রাণ পরমভাগবত সনাতনের বিষাক্ত কণ্ডু কিছুতেই দূর হচ্ছে না। এর রহস্য শুধু তুমিই জানো, প্রভু।”

মুচকি হাসিয়া প্রভু উত্তর দিলেন, “হরিদাস, সনাতন আমার সমর্পণ করেছে তার দেহ মন প্রাণ। আর আমি আমার সব সমর্পণ ক'রে বসে আছি আমার প্রাণপ্রভু কৃষ্ণের কাছে। সনাতনকে তিনি নিশ্চয়ই রক্ষা করবেন।”

ভক্তেরা সবিস্ময়ে লক্ষ্য করিলেন, কিছুদিনের মধ্যেই সনাতনের হৃদরোগ্য ব্যাধি সম্পূর্ণরূপে দূরীভূত হইল, সারা দেহে ফুটিয়া উঠিল অপূর্ব লাবণ্যশ্রী।

ক্রমে পবত্র রথযাত্রা আসিয়া পড়ে। গোড়ীয়া ভক্তগণ এ সময়ে সদলবলে নীলাচলে সমবেত হন, প্রাণপ্রভুকে কেন্দ্র করিয়া তাঁহাদের আনন্দরঙ্গ উচ্ছল হইয়া উঠে। এই সব প্রেমিক এবং প্রভুগতপ্রাণ ভক্তদের সাথে একে একে সনাতন পরিচিত হন, নিজেকে গণ্য করেন মহাভাগ্যবান।

এ সময়কার আর এক বড় আকর্ষণ—শ্রীজগন্নাথের রথের অগ্রভাগে ভাবাবিষ্ট শ্রীচৈতন্যের নর্তন। এবার এই অপূর্ব দৃশ্য দেখিয়া সনাতন আনন্দে আত্মহারা হইয়া যান।

চাতুর্মাশ শেষ হইলে গোড়ীয়া ভক্তগণ দেশে চলিয়া গেলেন। প্রভু কিন্তু সনাতনকে কিছুতেই ছাড়িবেন না। তাই দোলযাত্রা অবধি সনাতনকে নীলাচলে অবস্থান করিতে হইল।

বারাণসীতে থাকা কালে বৈষ্ণব তত্ত্ব ও সাধনার যে শিক্ষা প্রভু সনাতনকে দিয়াছিলেন, এবার সমাপ্ত হয় তাহার পরবর্তী অধ্যায়। তাছাড়া, বৃন্দাবনে প্রভু নূতন ভক্তিসাম্রাজ্য গঠন করিতে চান এবং তাহার ভিত্তি নির্মাণ ও সংগঠনের ভার দিয়াছেন প্রিয় পার্শ্বদ সনাতনেরই উপর। বিশেষ করিয়া এই দুইটি কারণে মাসের পর মাস সনাতনকে প্রভু ঘনিষ্ঠ সান্নিধ্যে রাখেন, দান করেন বহুতর গুরুত্বপূর্ণ নির্দেশ।

দোলযাত্রা উৎসব সাড়ম্বরে সমাপ্ত হইয়া গেল। এবার সাশ্র-নয়নে প্রভুর চরণে বিদায় নিয়া সনাতন নীলাচল ত্যাগ করিলেন।

বৃন্দাবনের আদিত্য টিলার পর্ণকুটীরে বসিয়া আবার শুরু হইল তাঁহার ভজন কীর্তন ও প্রভুর নির্দেশিত কর্মসাধন।

স্থানটি ইষ্ট-ধ্যানের পক্ষে বড় অনুকূল। উপরে দিগন্তবিস্তৃত নীলাকাশ। নিচে কল্লোলিনী কৃষ্ণপ্রিয়া যমুনা বহিয়া চলিয়াছে অপরূপ লীলাভঙ্গিমায়। দূরে বনানী বেষ্টিত সারি সারি পাহাড়ের গায়ে জড়ানো নীল সবুজের মাধুরিমা। সমগ্র পরিবেশে যেন ওতপ্রোত হইয়া আছেন প্রাণপ্রিয় ইষ্টবিগ্রহ—শ্যামসুন্দর। পরমানন্দে দিনের পর দিন এই নির্জন রমণীয় অরণ্যাবাসে সনাতনের তপস্থা অগ্রসর হইয়া চলে।

বৃন্দাবনের আশেপাশে তখন জনমানবের বসতি খুব কম ছিল, তাই ভিক্ষা সংগ্রহ করিতে হইলে সাধুদের যাইতে হইত মথুরা অঞ্চলে। সনাতনকেও মাঝে মাঝে তাহাই করিতে হইত। হঠাৎ একদিন এই ভিক্ষার মধ্যে দিয়া উন্মোচিত হইল তাঁহার সাধনজীবনের এক নূতন বাতায়ন। ইষ্টদেব প্রকটিত করিলেন তাঁহার কাছে এক নূতনতর সেবালীলা।

মাধুকরী করিতে গিয়া সনাতন সেদিন মথুরার দামোদর চৌবের

বাড়িতে উপস্থিত হইয়াছেন। অঙ্গনে পা দিতেই চোখে পড়িল নয়নাভিরাম বিগ্রহ, নাম শ্রীশ্রীমদনগোপাল। দর্শন মাত্রেই সনাতন কি জানি কেন এক অপূর্ব প্রেমাবেশে বিহ্বল হইয়া গেলেন। এই শ্রীমূর্তি যেন তাঁহার কত আপনার, কত পরিচিত। কত জন্মের সাধনার ধন আজ যেন তাঁহার সম্মুখে আসিয়া উপস্থিত।

ভাবাবিষ্ট সাধকের অন্তরে জাগিয়া উঠে প্রবল আতি, আর জাগে এই শ্রীবিগ্রহ সেবার জন্য দুর্দমনীয় আকাজক্ষা। কিন্তু অতি কষ্টে তাঁহাকে আত্মসংবরণ করতে হয়। নিজে তিনি কত্য়াকরঙ্গধারী কাঙাল বৈকুণ্ঠ, শ্রীমূর্তির সেবার সামর্থ্য তাঁহার কই? তাছাড়া, চোবে পরিবার তো প্রাণ গেলেও এই ইষ্ট-বিগ্রহ ত্যাগ করিবে না। ভিক্ষা গ্রহণের শেষে, লোভাতুর নয়নে বার বার ঐ শ্রীমূর্তির দিকে দৃষ্টিপাত করিয়া তিনি স্থান ত্যাগ করিলেন।

আদিত্য টিলার বিজন আবাসে সনাতন কিরিয়া আসেন। দৈনন্দিন ধ্যানভজনে হন নিবিষ্ট। কিন্তু এক বিপদে আজ তিনি পড়িলেন? যখনই নয়ন মুদ্রিয়া ভজন-আসনে উপবেশন করেন, কোথা হইতে সেই মদনগোপাল মূর্তি মানসপটে ভাসিয়া উঠে, প্রাণ মন কাড়িয়া নিয়া আবার কোথায় মিলাইয়া যায়। সনাতনের মনে আর স্বস্তি নাই, শান্তি নাই। মাঝে মাঝেই কাজে বা অকাজে মথুরায় ছুটিয়া যান, চৌবেজীর অঙ্গনে দাঁড়াইয়া নিনিমেঘে চাহিয়া থাকেন ঐ নয়নমনবিমোহন ঠাকুরের দিকে।

ক্রমে চোবে পরিবারের সঙ্গে সনাতনের ঘনিষ্ঠতা জন্মে। চৌবেজীর বিধবা পত্নীর সেবার ভাবটি বড় সহজ সুন্দর। এই শ্রীবিগ্রহ তাঁহার আদরের বালগোপাল—নিজের বালক জ্ঞানেই দিনরাত তিনি ইহার সেবা পরিচর্যা করেন। চোবে গৃহিণীর পুত্রের নাম সদন। এই সদন যেমন তাঁহার এক পুত্র, মদনগোপালজীও তেমনি আর একটি। প্রাণপ্রিয় ছই পুত্রের লালনপালন তিনি সম্পন্ন করেন এক ভাবে, একই সহজ সরল মাতৃভাবে মধ্য দিয়া।

নিষ্ঠাবান ভক্ত সনাতনের মন কিন্তু খুঁতখুঁত করিতে থাকে। ইষ্ট-

বিগ্রহের সেবা পরিচর্যা চলিবে গৃহেরই একটি বালকের সমপর্ষায় ? প্রকৃত ইষ্টনিষ্ঠা থাকিবে না, ইষ্টের সেবা ও পূজার বিশেষ ব্যবস্থা থাকিবে না, এ কেমন কথা ?

সেদিন চৌবের গৃহিণীকে ডাকিয়া কহিলেন, “মা, তুমি পরম স্নেহে মদনগোপালজীর সেবা যত্ন ক’রে যাচ্ছে, তা ঠিক। কিন্তু আমার মনে হয়, এতে একটু ত্রুটি রয়ে যাচ্ছে। তুমি মাতৃভাবে, যশোদাভাবে, প্রভুজীকে লালন করছো। কিন্তু মা-যশোদার বাৎসল্য রস তো সাধারণ জীবের মধ্যে সঞ্চারিত হওয়া সম্ভব নয়। তাই আমার মনে হয়, তুমি প্রভুজীর সেবা সম্পন্ন করো সত্যকার ভক্তি ও শ্রদ্ধা নিয়ে। যে প্রণালীতে ভক্ত বৈষ্ণবেরা ভগবানকে সেবা পূজা করে, সেই প্রণালী তুমি অনুসরণ করো।”

মহিলা সবিনয়ে উত্তর দিলেন, “তাই তো, বাবাজী। তুমি যে আমায় নৃতন ক’রে ভাবিয়ে তুললে। বেশ, তাই হবে, তোমার উপদেশ মতো এবার থেকে ঠাকুরের জন্তু বিধিমতো সেবা-অর্চনার ব্যবস্থাই করবো।”

ইতিমধ্যে কয়েক দিন অতিবাহিত হইয়াছে। মদনগোপালজীর দর্শনের জন্তু সনাতন সেদিন মথুরায় গিয়াছেন, অঙ্গনে পদাঙ্গণ করামাত্রই চৌবে পত্নী তাড়াতাড়ি ছুটিয়া আসিলেন। স্মিত হাস্তে কহিলেন. “নাঃ বাবাজী, তোমার কথামতো কাজ আর করা গেল না। মদনগোপালজী বড় ক্ষুব্ধ হয়েছেন। সেদিন আমায় স্বপ্নাদেশ দিয়েছেন,—‘ওগো, তুমি আমার মা হয়ে ছিলে, সেই তো ছিল ভালো। এখন ঠাকুর জ্ঞানে আমায় দূরে সরিয়ে রাখছো, পূজো অর্চনার ভিড় লাগিয়েছো। এ আমার ভালো লাগছে না, বাপু। তোমার ছুই ছেলে, সদন আর মদনের ভেতর তকাত রাখা কি ভালো?’”

সনাতন চমকিয়া উঠিলেন। তাই তো। সহজাত প্রেম ও প্রাণের স্বাভাবিক টান—ইহাই যে ঠাকুরের সেবার শ্রেষ্ঠ উপচার! চৌবে গৃহিণীর স্বপ্নাদেশের মাধ্যমে এই মূলতত্ত্বটিই যে মদনগোপাল

আজ তাঁহাকে বুঝাইয়া দিলেন। প্রভুজীর এই কৃপা নির্দেশের কথা স্মরণ করিয়া বার বার সনাতনের নয়ন দুটি অশ্রু সজল হইয়া উঠিতে থাকে।

মদনগোপালজীর আকর্ষণ কিন্তু সনাতনের জীবনে দিন দিনই হইয়া উঠে দুর্নিবার। দৈনন্দিন সাধকের অন্তরের অন্তস্তল হইতে নিয়ত উদগত হয় কাতর প্রার্থনা—“হে প্রভু, হে দয়াল, তোমার বিরহ যে আর আমি সহ্য করতে পারছি নে। তুমি এসো—এসো, এই দীনহীন কাঙালের কোলে এসো। এই দুর্ভাগ্য জীবনে যে তীব্র দহন শুরু হয়েছে, তোমায় না পেলে তার নিবৃত্তি আর হবে না।”

অচিরে এই প্রার্থনা ও আত্মিক ফল ফলিয়া যায়। দামোদর পত্নী সেদিন স্নানমুখে সনাতনের কাছে আসিয়া দাঁড়ান। অশ্রুধারা কণ্ঠে কহেন, “বাবাজী, আজ থেকে তুমিই নাও আমার মদনগোপালের সেবার ভার। গোপাল এখন বড় হয়েছে, মায়ের আঁচলের তলে আর বসে থাকতে চাইবে কেন? তোমার বুপড়িতে যাবে বলে বায়না ধরেছে, কাল রাতে স্বপ্নে এ কথা বার বার আমায় জানালে। তাছাড়া, আমাদের সাংসারিক অবস্থাও ক্রমে অসচ্ছল হয়ে পড়ছে। ঠাকুরকে পাছে কষ্ট দিতে হয়, এই দুশ্চিন্তায়ই আমি মরছি। বাবাজী, আজই এ বিগ্রহ তুমি নিয়ে যাও।”

সনাতনের প্রাণের আকাঙ্ক্ষা এভাবে পূর্ণ হইল। পরম আনন্দে ত্রিবিগ্রহ কোলে করিয়া তখনি ছুটিয়া চলিলেন বৃন্দাবনের ভজনকুটির অভিমুখে। সেখানে সযতনে স্থাপন করিলেন তাঁহার প্রাণপ্রিয় এই কৃষ্ণমূর্তি।

চৌবেজীর ঘর হইতে যে মদনগোপাল বিগ্রহ সনাতন লাভ করিয়াছেন তাহার একটি বিশেষ ঐতিহ্য রহিয়াছে। কথিত আছে, ত্রিক্ষের প্রপৌত্র মহারাজ বজ্রনাভ এক সময়ে সারা ব্রজমণ্ডলে অনুসন্ধান চালাইয়া যে আটটি প্রাচীন বিগ্রহ আবিষ্কার করেন, মদনগোপাল ত্রিমূর্তি তাঁহাদেরই অন্যতম।



প্রাণপ্রিয় বিগ্রহ তো হস্তগত হইল। কিন্তু এখন ইহার সেবা পরিচর্যার কি উপায়? সনাতন মহাসমগ্রায় পড়িলেন। ভাবিয়া-চিন্তিয়া অবশেষে ভজনকুটিরের নিকটে এক ঝুপড়ি বাধিলেন, পরম যত্নে ঠাকুরকে সেখানে করিলেন সংস্থাপিত। সেবার জন্ম নূতন উৎসাহে শুরু হইল মাধুকরী। ভিক্ষাস্বরূপ সামান্য বাহা কিছু আটা মিলিত তাহাই পিণ্ডাকৃতি করিয়া আগুনে পোড়াইয়া নিতেন। তারপর প্রেমাপ্ত হৃদয়ে দীন ভক্ত রোজ ইহা নিবেদন করিতেন আরাধ্য ঠাকুরের সম্মুখে। অগ্নিদগ্ধ এই আটার পিণ্ডই ব্রজমণ্ডলের বৈষ্ণবসমাজে খ্যাতিলাভ করে সনাতন গোসাঁইর আঙাকড়ি-ভোগ নামে। উত্তরকালে বড় বড় ধনী ব্যক্তির। মদনগোপালজীর সেবায় প্রচুর অর্থদান করিতে আগাইয়া আসেন। তখনকার সে বিপুল আয়োজন, ঐশ্বর্য ও আড়ম্বরের দিনেও কাঙাল সনাতনের দগ্ধ আটাপিণ্ড ছিল জীবিগ্রহের নিত্যকার ভোগের অপরিহার্য অঙ্গ।

আঙাকড়ি ছাড়া আর একটি বস্তুও সনাতনকে নিবেদন করিতে দেখা যাইত। টিলার সান্নদেশে ইতস্তত ছড়ানো ছিল নানা ধরনের বুনো শাক; রোজ তিনি এগুলি তুলিয়া আনিতেন। সৈন্ধব প্রায়ই জুটিত না, দীনহীন বৈষ্ণব অধিকাংশ দিনই অলবণে রান্না-করা ঐ শাক দ্বারা ভোগ চড়াইতেন। এভাবে কিছুকাল অতিবাহিত হয়। অতঃপর জীবিগ্রহ একদিন বড় গোল বাধাইয়া বসেন। স্বপ্নে সনাতনকে দর্শন দিয়া কহেন, “ওগো, তোমার দেওয়া এই ভোগ আর গলাধঃকরণ করা যাচ্ছে না। তোমার আঙাকড়ি আর সৈন্ধব-মসলাহীন রান্না খেয়ে আর কতকাল চালাবো, বল?”

সনাতনের নয়ন দুটি অশ্রু ছলছল হইয়া উঠে। কাতরস্বরে নিবেদন করেন, “প্রভু, তুমি তো জানো, আমি তোমার এক নিষ্কিঞ্চন অধম সেবক। তুমি বিশ্বব্রহ্মাণ্ডের অধিরাজ, তোমার উপযুক্ত রাজভোগ আমি কি ক’রে যোগাবো? দগ্ধ আটা আর এই শাক-সৈন্ধ খেতে রুচি না হয়। তুমি নিজেই নিজের সেবার যথাযোগ্য ব্যবস্থা ক’রে নাও।”

বড় জটিল, বড় ছুস্তের প্রভুর লীলাখেলা। চৌবে গৃহিণীর এত দিনের বাংসল্য ও সমাদর ছাড়িয়া স্থান নিয়াছেন এই সহায় সম্পদ-হীন কাঙাল সাধুর ঘরে। আবার এখানে আসিয়া বায়না ধরিয়াছেন রুচিকর আহাৰ্বেষ জন্ত। কিন্তু ডোর-কোঁপীন মাত্র সঞ্চল সনাতন এ ব্যাপারে কি করিতে পারেন? তিনি যে একেবারে নিরুপায়।

দিনের পর দিন সনাতন চিন্তা করেন স্বপ্নে মদনগোপালজীর দর্শনদানের কথা। অন্তর তাঁহার তীব্র ব্যথায় মুহূমান হয়, কপোল বাহিয়া ঝরিতে থাকে অশ্রুধারা।

নিরন্তর আকুতি ও অশ্রুর অর্ঘ্য এবার অন্তর্যামীর অন্তর স্পর্শ করে। ভক্তাধীন ভগবান্ অল্প কয়েক দিনের ভিতরই ভক্তের মনো-বাঞ্ছা পূরণের ব্যবস্থা করিয়া দেন।

পাঞ্জাবের বিশিষ্ট ব্যবসায়ী রামদাস কাপুর সেদিন রাত্রে নৌকা করিয়া বৃন্দাবনের পাশ দিয়া চলিয়াছেন। সঙ্গে একরাশ মূল্যবান মালপত্র, দূর শহরে গিয়া এগুলি বিক্রি করিবেন। হঠাৎ আদিত্য টিলার নিচে সূর্যঘাটের কাছে আসিয়া নৌকাটি এক বৃহৎ চড়ায় আটকাইয়া যায় ও সঙ্গে সঙ্গে কাত হইয়া পড়ে। মাঝি-মাল্লারা বহুক্ষণ ঠেলাঠেলির পর হার মানিতে বাধ্য হয়, মালভর্তি ভারী নৌকা কোনোমতেই নড়ানো সম্ভব হয় না।

কৃষ্ণপঙ্কের গভীর রাত্রি। বৃন্দাবনের অরণ্যে ও টিলায় টিলায় ঘন অন্ধকার জমাট বাঁধিয়া উঠিয়াছে। নিকটে কোথাও জনবসতির চিহ্ন দেখা যাইতেছে না। রামদাস কাপুর প্রমাদ গণিলেন। কিছু সংখ্যক স্থানীয় লোকজন সংগ্রহ করিতে পারিলে নৌকাটি চড়া হইতে টানিয়া বাহির করা যাইত। কিন্তু সে আশা ছরাশা। এই নিশুভি রাতে, জনমানবহীন ষমুনার তীরে কে আর তাঁহাকে সাহায্য করিতে আসিবে?

ক্রমে রামদাসের হৃচ্চিন্তা বাড়িয়া চলে। নৌকা একরূপ কাত হইয়া থাকিলে অবশ্যই ডুবিবে এবং তাঁহার সর্বস্ব বিলীন হইবে অলগর্ভে। তাছাড়া না ডুবিলেও বিপদের আশঙ্কা কিছু কম নয়।

তীরস্থিত এই বিজ্ঞান অরণ্যে দস্যুদের আনাগোনা আছে। কখন তাহারা হা-রে-রে করিয়া নৌকায় চড়াও হয়, মালপত্র, টাকাকড়ি লুটপাট করিয়া নেয়, কে জানে ?

নিরুপায় হইয়া কেবলি ভাবিতেছেন, হঠাৎ তাঁহার চোখে পড়ে, অদূরস্থিত টিলায় এক মুছ দীপশিখা। সঙ্গে সঙ্গে আশার আলো জ্বলিয়া উঠে, রামদাসের অন্তরে। একবার শেষ চেষ্টা করিয়া দেখা যাক না কেন ? হয়তো টিলার উপরে কোনো বসতি রহিয়াছে। ওখানকার কাহাকেও দিয়া কি আশপাশ হইতে লোকজন সংগ্রহ করা যায় না ?

সাঁতরাইয়া তখনি ভীরে উঠিলেন, আলো লক্ষ্য করিয়া ত্রস্তপদে আরোহণ করিলেন টিলার শীর্ষদেশে।

সঙ্গে সঙ্গে নয়নপথে পতিত হইল এক পর্ণকুটির। ভিতরে প্রদীপের ক্ষীণ আলো মিটিমিটি জ্বলিতেছে, আর এক পাশে স্থাপিত রহিয়াছেন নয়নাভিরাম কৃষ্ণবিগ্রহ। সম্মুখে এক দেবপ্রতিম বৈষ্ণব সাধক ভজনরত। কি জানি কেন এই সাধককে দর্শন করা মাত্র রামদাসের অন্তরে জাগিয়া উঠিল সুদৃঢ় বিশ্বাস। অতি ভক্তিবরে সম্বর্পণে তিনি প্রণাম নিবেদন করিলেন।

উঠিয়া দাঁড়াইতেই সপ্রশ্ন দৃষ্টিতে সাধক সনাতন আগন্তকের মুখের দিকে চাহিলেন। রামদাস করজোড়ে নিবেদন করিলেন তাঁহার বিপদের কাহিনী। কাতর কণ্ঠে মিনতি করিয়া কহিলেন, “মহারাজ, আমি আজ বড় বিপন্ন, যমুনাগর্ভে আমার সর্বস্ব খোয়াতে বসেছি। ভাগ্যক্রমে এই বিজ্ঞান স্থানে আপনার মতো মহাপুরুষের দর্শন পেলাম। আমার অন্তরাত্মা থেকে কে যেন কেবলি ডেকে বলছে, আপনার কৃপা ছাড়া আমার উদ্ধারের কোনো আশা নেই। অকপটে চরণতলে আশ্রয় নিলাম, আপনি আমার বাঁচান।”

আর্তের কাতরোক্তিতে সনাতনের হৃদয় বিগলিত হইল। স্নিগ্ধ-মধুর কণ্ঠে কহিলেন, “বাবা, তুমি এত অধীর হ’য়ে না, শাস্ত হও, আমার মদনগোপালজী তোমায় কৃপা করবেন। এ বিপদ থেকে

তুমি মুক্ত হবে। যাও নির্ভয়ে নেমে গিয়ে যমুনা তীরে অপেক্ষা করো।”

আশীর্বাদ ও অভয় লাভে রামদাসের হৃদয় কণ্ঠস্থ শাস্ত্র হইল। টিলা হইতে অবতরণের আগে কহিলেন, “মহারাজ, আমি সঙ্কল্প করলাম, এ বিপদ থেকে উদ্ধার পেলে আমার এবারকার বাণিজ্যের সবটা মুনাফা আপনার এই দেববিগ্রহের সেবায় আমি নিয়োজিত করবো।”

সনাতনের শুভেচ্ছায় সেই রাত্রেই রামদাস কাপুরকে বিপদমুক্ত হইতে দেখা যায়। হঠাৎ কোথা হইতে অলৌকিকভাবে যমুনাবক্ষে প্রবাহিত হয় নূতন শ্রোতধারা। চড়ায় আবদ্ধ পণ্যবাহী বিপন্ন তরী আবার নিজপথে ভাসিয়া চলে।

বাণিজ্য হইতে কিরিয়া রামদাস কাপুর তাড়াতাড়ি বৃন্দাবনে চলিয়া আসেন, সনাতন গোস্বামীর নিকট হইতে সঙ্গীক দীক্ষা গ্রহণ করিয়া ধন্য হন। তাছাড়া, সেবারকার বাণিজ্যের সবটা লভ্যাংশ মদনগোপালজীর সেবায় তিনি উৎসর্গ করেন। সেই বিপুল অর্থ নিমিত্ত হয় শ্রীবিগ্রহের জগৎ সুরম্য মন্দির, জগমোহন ও নাটশালা। প্রচুর ভূসম্পত্তি ক্রয় করিয়া ঠাকুরের সেবা ও ভোগ বিতরণের স্থায়ী ব্যবস্থাও এই সঙ্গে করা হয়।

সনাতনের সেবিত এই মদনগোপাল কিন্তু ক্রমে জনসাধারণের কাছে মদনমোহন নামেই পরিচিত হয়ে উঠেন। উত্তরকালে নানা ঘটনাচক্রের মধ্য দিয়া এই লীলাময় শ্রীবিগ্রহ জয়পুরে স্থানান্তরিত হইয়াছিলেন।

ইষ্টদেবের মন্দির নির্মাণ ও সেবাকার্যের চমৎকার বন্দোবস্ত এভাবে আপনা হইতেই হইয়া যায়। সনাতনের সকল হুশিচিন্তা দূর হয়, প্রাণমন ভরিয়া উঠে অপার তৃপ্তিতে।

প্রেমপূরিত হৃদয়ে, গলদঞ্জননে শ্রীবিগ্রহের সম্মুখে দণ্ডবৎ করিয়া কহিতে থাকেন, “ঠাকুর, আগে ছিলে চোঁবে ভবনে, তারপর এলে কাঙাল ভক্ত সনাতনের রূপড়িতে। এবার তুমি এসে দাঁড়িয়েছো

ব্রজমণ্ডলের তীর্থকামী ভক্তসমাজের নয়নসমক্ষে তীর্থরাজরূপে। জীবের কল্যাণের জন্তু রূপাভরে যে সেবালীলা এখানে তুমি প্রকট করেছো, তা অব্যাহত থাকুক, এই মোর একান্ত প্রার্থনা। এবার এখান থেকে আমায় ছুটি দাও, প্রভু।”

নবনির্মিত সুরমা ঐ ইষ্ট মন্দিরে সনাতন কিন্তু একদিনও বাস করেন নাই। পূর্ববৎ বৃক্ষতল আর পর্ণকুটিরই হয় সর্বত্যাগী কুল্লুব্রতী সাধকের একমাত্র আশ্রয়।

এখন হইতে কখনো গোবর্ধনের পাদমূলে, কখনো রাধাকুণ্ডের তীরে, কখনো বা গোকুলের অরণ্য অঞ্চলে রূপড়ি বাঁধিয়া একান্ত নির্ভায় তিনি সাধনভজন করিতে থাকেন।

লুপ্ত তীর্থ উদ্ধারের যে নির্দেশ প্রভু শ্রীচৈতন্যের নিকট হইতে সনাতন পাইয়াছেন ক্ষণেকের তরেও তিনি তাহা বিস্মৃত হন নাই। এ সময়ে যখন যেখানে অবস্থান করিতেন, তাহার চারিদিকে তীর্থ ও তীর্থবিগ্রহের আবিষ্কার চেষ্টা ছিল তাঁহার সাধনার অত্যন্তম অঙ্গ। প্রভুর প্রেরণায় উদ্বুদ্ধ হইয়া সনাতন ক্রমে ক্রমে অনেকগুলি তীর্থকে পুনরুজ্জীবিত করেন, তারপর সেগুলিকে তুলিয়া ধরেন জন-চৈতন্যের সমক্ষে। এস্থলে বিশেষভাবে উল্লেখযোগ্য যে, নন্দগ্রামে নন্দ যশোদা, বলভদ্র ও কৃষ্ণবিগ্রহ স্থাপন করিয়া তিনি ভক্ত সমাজের ধন্যবাদভাজন হন।

লোকনাথ গোস্বামী ও ভূগর্ভ পণ্ডিত আগে হইতেই শ্রীচৈতন্যের নির্দেশ অনুযায়ী ব্রজমণ্ডলে সাধনভজন করিতেছেন। অতঃপর একে একে আসিয়া উপস্থিত হন রূপ গোস্বামী, গোপাল ভট্ট, রঘুনাথ ভট্ট, রঘুনাথদাস গোস্বামী প্রভৃতি। প্রত্যেকেই ভক্তিসাধনার এক একটি দিকপাল। ইহাদের অত্যাগ্র সাধনা, ত্যাগ, বৈরাগ্য ও শাস্ত্র-জ্ঞানের প্রভাৱ সারা উত্তর ভারতের অধ্যাত্মজীবন উদ্ভাসিত হইয়া উঠে। আর এই সাধকগোষ্ঠীর মধ্যমণিরূপে অধিষ্ঠিত থাকেন অশেষ-শাস্ত্রবিদ ধীর-গম্ভীর আত্মকাম মহাপুরুষ সনাতন গোস্বামী।

প্রভু শ্রীচৈতন্যের নির্দেশ ছিল, ভক্তিশাস্ত্র উদ্ধার করিতে হইবে

এবং প্রবল উদ্যমে প্রচার করিতে হইবে নব নব বৈষ্ণবীয় দর্শন, স্মৃতি ও সাধনভজনের গ্রন্থ। এই সুস্পষ্ট নির্দেশ সনাতন কোনোদিন বিস্মৃত হন নাই। ভক্ত ও অনুগত বন্ধুবান্ধবদের সংখ্যা বৃদ্ধি পাইতে থাকিলে ইহাদের সাহায্যে দিনের পর দিন তিনি সংগ্রহ করেন অজস্র প্রাচীন ভক্তিশাস্ত্রের গ্রন্থ। শুধু তাহাই নয়, নবতর রচনার দিকেও তাঁহার দৃষ্টি প্রসারিত হয়। নিজের কতকগুলি শাস্ত্রগ্রন্থ যেমন রচনা করেন তেমনি তাঁহার আধ্যাত্মিক প্রেরণায় ও নেতৃত্বে লিখিত হয় গোড়ীয় বৈষ্ণবদর্শন, স্মৃতি, ও ভজন-পূজনের গ্রন্থ ও নানা ধরনের টীকা ভাষ্য।

গোড়ীয় বৈষ্ণবদের শাস্ত্রভিত্তি নির্মাণে ও গৌরবময় ঐতিহ্য গড়িয়া তুলিতে যে অবদান সনাতন গোস্থামী রাখিয়া গিয়াছেন তাহার তুলনা বিরল। এই মহান্ কর্মকে তিনি গণ্য করিয়াছিলেন প্রভু ঐচ্ছৈতন্মের আদিষ্ট ব্রতরূপে। বলা বাহুল্য এ ব্রত সাফল্যের সহিতই তিনি উদ্‌যাপন করিয়া যান।

ত্যাগ ভিত্তিকা, বৈরাগ্যময় সাধনা ও কৃষ্ণপ্রেমের পরম অনুভূতির সহিত সনাতন গোস্থামীর জীবনে মিলিত হইয়াছিল অসাধারণ প্রতিভা, শাস্ত্রজ্ঞান ও শ্রমনিষ্ঠা। বহুতর নিজস্ব রচনা, সংকলন ও সম্পাদনার মধ্যে তাঁহার এই জীবন-বৈশিষ্ট্যের ছাপ পরিস্ফুট হইয়া রহিয়াছে।

পণ্ডিতের শাস্ত্রচর্চা ও সাধকের প্রত্যক্ষীভূত সূক্ষ্মলোকের অনুভূতি—এই দুইটি পৃথক বস্তু। কিন্তু যে সব ক্ষেত্রে এই দুটির সমাবেশ ঘটে, তাহা হইয়া উঠে এক তুর্লভ সম্পদ। সনাতনের রচনা ও সম্পাদনায় এই বৈশিষ্ট্য দৃষ্টিগোচর হয়। তাঁহার নিজস্ব গ্রন্থাদির মধ্যে রহিয়াছে : লীলাস্তুব, বৈষ্ণবীয় স্মৃতি হরিশক্তিবিলাসের ‘দিগ্‌ দর্শিনী’ টীকা, বৃহৎ ভাগবতায়ত, ভাগবতায়তের টীকা ও বৃহৎ বৈষ্ণবভোষণী টীকা।

ইষ্ট-বিগ্রহের ভজন-পূজনের সময় আপু্যকাম সাধক সনাতনের ত্রীমুখ হইতে অজস্রধারে নির্গত হইত লীলামাহাত্ম্যের স্তব ও দৈনন্দিন প্রার্থনা। ইহারই সংকলন হইতেছে ‘লীলাস্তুব’।

গোস্বামী গোপাল ভট্টকৃত 'হরিভক্তিবিলাস' এক মহামূল্যবান বৈষ্ণব-স্মৃতি। গোড়ীয় বৈষ্ণবদের কৃত্য ও আচারসমূহ ইহাতে বিস্তারিতভাবে বর্ণিত হইয়াছে। গোপাল ভট্টের নামে এই গ্রন্থ প্রচারিত হইলেও ইহার সংকলনে সনাতনের পাণ্ডিত্য ও প্রতিভার প্রভাব ছিল দূরপ্রসারী। সনাতন নিজে এই বিরাট স্মৃতিগ্রন্থের টীকা প্রণয়ন করেন। তাহার এই টীকার উদ্দেশ্য, প্রামাণ্য শাস্ত্র বাক্যের উদ্ধৃতি ও যথোচিত যুক্তিতর্ক প্রয়োগের দ্বারা জটিল সমস্যা-সমূহের সমাধান করা। 'হরিভক্তি বিলাস'এর গ্রন্থকাররূপে বরংকনিষ্ঠ গোপাল ভট্টকে আগাইয়া দিয়া দিকপাল শাস্ত্রবিদ সনাতন যে ভাবে বিরাট বনস্পতির মতো ছায়া বিস্তার করিয়াছেন, নানা সিদ্ধান্তময়, বিভর্কবহুল ঐ স্মৃতিগ্রন্থের পৃষ্ঠরক্ষার্থ দণ্ডায়মান হইয়াছেন, তাহা তাহার মতো প্রবীণ সাধক ও মনীষীরই উপযুক্ত।

বৃহৎ-ভাগবতামৃত নামক প্রসিদ্ধ গ্রন্থে সনাতন ভক্তিশাস্ত্র-সাগর মন্ডন করিয়াছেন। একদিকে বৈষ্ণবধর্মের মর্মকথা যেমন ইহাতে উদ্ঘাটিত হইয়াছে, অপরদিকে তেমনি বিস্তারিত হইয়াছে বিভিন্ন অবতারের তত্ত্ব ও প্রেমভক্তি-ধর্মের সাধনপ্রণালী। বৈষ্ণব সাধকদের কাছে এই গ্রন্থ অমৃতের খনি বিশেষ। এ গ্রন্থের সিদ্ধান্ত ও নির্দেশ সহজতর করার উদ্দেশ্যে সনাতন একটি বিস্তৃত টীকা প্রণয়ন করেন, তাহা 'দিগদর্শিনী' নামে পরিচিত।

সনাতনের শাস্ত্রসাধনার চরম অবদান—বৃহৎ বৈষ্ণবভোষণী নামক ভাগবতের টীকা। বেদান্তের নিগূঢ় পরমতত্ত্ব ও ভগবৎ ভক্তির অমৃতময় ব্যাখ্যার মিলন ঘটিয়াছে মহামুনি বেদব্যাস রচিত শ্রীমদ্ভাগবতে। বৈষ্ণবধর্মের শ্রেষ্ঠ প্রবর্তক ও টীকা-ভাষ্যকারেরা প্রধানত প্রেমভক্তি-শাস্ত্রের এই অমৃতনিব্বার হইতেই পরম পথের পাথের সংগ্রহ করিয়াছেন, যার যার নিজস্ব সিদ্ধান্ত ও সাধনার ধারা উন্মুক্ত করিয়া নিয়াছেন। গোড়ীয় বৈষ্ণবসমাজের পক্ষ হইতে প্রবীণ সাধক সনাতন এই মহান্ আকরগ্রন্থের দশম স্কন্দ বা কৃষ্ণ জন্মখণ্ডের এক বিস্তীর্ণ টীকা প্রণয়ন করেন। পাণ্ডিত্য ও রসমাধুর্যের দিক দিয়া সনাতনের বৈষ্ণবভোষণী

ভক্তিশাস্ত্রের জগতে এক বিশিষ্ট স্থান অধিকার করিয়া আছে। বিশিষ্ট গবেষকদের মতে, সনাতনের 'বৈষ্ণবতোষণী' যে ভাবে ভাগবতের ছরুহ স্থলের ব্যাখ্যায় আলোকপাত করিয়াছে, অনেক প্রাচীন টীকায়ও তাহা পাওয়া যায় না।

বৈষ্ণবতোষণী টীকা রচনা করার কালে সনাতন ছিলেন অতিশয় বৃদ্ধ, প্রায় চলৎশক্তিহীন। এসময়ে বয়ঃকনিষ্ঠ ও অল্পবয়স্ক গোস্বামীদ্বয় রঘুনাথ ভট্ট ও রঘুনাথ দাস সর্বদা তাঁহার সেবক ও সহকারীরূপে সঙ্গে থাকিয়া এই গ্রন্থ প্রণয়নে নানাভাবে সাহায্য করেন। বৈষ্ণবতোষণীই সনাতন গোস্বামীর শেষ রচনা, যে বৎসর এই মহাগ্রন্থ সমাপ্ত হয়, সেই বৎসরই তাঁহার জীবনদীপ হয় নির্বাপিত। সনাতনের দেহান্তের প্রায় পঁচিশ বৎসর পরে তাঁহার ভ্রাতৃপুত্র, শিষ্যপ্রাতিম ক্রীড়াব গোস্বামী, সুবিস্তৃত বৈষ্ণবতোষণীর এক সংক্ষিপ্ত ও সহজবোধ্য সংস্করণ প্রকাশ করেন। ইহার নাম দেওয়া হয় 'লঘুতোষণী'।

অল্পজ্ঞ রূপ গোস্বামীর সুপ্রসিদ্ধ গ্রন্থ 'ভক্তিরসামৃতসিন্ধু'র উপরও সনাতন গোস্বামীর যথেষ্ট প্রভাব ছিল। গোপাল ভট্টের হরিভক্তি-বিলাস-এর মতো রূপের এই গ্রন্থখানির পশ্চাতেও রহিয়াছে সনাতনের অধ্যাত্ম-প্রেরণা, ক্ষুরধার পাণ্ডিত্য ও পরমভক্তের ব্যাখ্যা বিশ্লেষণ। ভক্তিসাধনার নিগূঢ় ভাবরসের মাধুর্য প্রভৃতি যাহা কিছুই ইহাতে প্রকটিত হইয়াছে, অনেকাংশে তাহা সনাতনেরই প্রতিভা ও সাধনানুভূতির স্বাক্ষর বহন করে।

সমকালীন ব্রজমণ্ডলে গোড়ীয় সাধক ও শাস্ত্রবিদদের মধ্যে সনাতন ছিলেন বয়ঃজ্যেষ্ঠ। তাছাড়া বৃহত্ত্বত, সাধনা, পাণ্ডিত্য ও প্রজ্ঞার দিক দিয়াও তাঁহার সমকক্ষ কেহ ছিলেন না। তাই দেখা যায়, এই মহাপুরুষের সুদীর্ঘ জীবনকালে সারা ব্রজমণ্ডল তাঁহার ব্যক্তিত্ব, প্রতিভা ও সিদ্ধির কাছে মস্তক অবনত করিয়া রহিয়াছে। ভক্তিশাস্ত্র সম্বন্ধে যিনিই যে গ্রন্থ এ সময়ে লিখিতেন, যে সিদ্ধান্ত ও মতবাদ স্থাপন করিতেন, সনাতনের সম্মতি ও সমর্থন ছাড়া তাহা স্তম্ভ সমাজে গৃহীত হইতে পারিত না।



শ্রীচৈতন্য নীলাচলে অপ্রকট হন ১৫৩৩ খ্রীষ্টাব্দে । এই ছঃসংবাদ শোনার পর হইতেই সনাতনের বহিরঙ্গ জীবনে ছেদ পড়িতে দেখা যায় । কর্মজীবন হইতে নিজেকে প্রায় গুটাইয়া নিয়া ইষ্ট বিগ্রহের নিরন্তর ধ্যান ও ভজনে তিনি তন্ময় হইয়া যান । তারপর ধীরে ধীরে মহাসাধক প্রবিষ্ট হন ভক্তি-সাধনার গভীরতম স্তরে ।

সনাতনের ভাগ, বৈরাগ্য, পাণ্ডিত্য ও প্রেমভক্তি সাধনার গ্রন্থখণ্ডের কথা ইতিমধ্যে শুধু ব্রজমণ্ডলেই নয়, সারা উত্তর ভারতে ব্যাপ্ত হইয়া পড়ে । দূর দূরাস্থ হইতে ভক্ত সাধকেরা দলে দলে আসিয়া তাঁহার দর্শনের অশ্রু ভিড় জমায় । কুঞ্জকুটির আলো-করা এই দেবমানবের চরণে লুপ্তিত হইয়া সকলে হয় কৃতকৃতার্থ ।

সনাতনের এ সময়কার সাধনৈশ্বর্য সম্বন্ধে নানা কাহিনী প্রচলিত আছে । সে-বার বারাণসী হইতে এক বৃদ্ধ ব্রাহ্মণ হস্তদস্ত হইয়া সনাতনের কুটিরে আসিয়া উপস্থিত । বর্ধমান জেলার মানকড়ে তাঁহার বাড়ি, নাম জীবন ঠাকুর । সৎ ও ধর্মনিষ্ঠ বলিয়া লোকে তাঁহাকে জানে ; চির জীবন কাটাইয়া আসিয়াছেন দারিদ্র্যের সহিত নিরন্তর যুঝিয়া । কিন্তু বৃদ্ধ বয়সে আর যেন দমে কুলাইতেছে না । সেদিন আত্মভাবে বিশ্বনাথের চরণে বার বার প্রার্থনা জানাইলেন, “বাবা, দারিদ্র্যের এ জ্বালা আর যে সহ হচ্ছে না, এবার কৃপা করে আমার রক্ষা করো, অর্থ প্রাপ্তির কোনো সন্ধান বলে দাও ।”

নিশাযোগে প্রত্যাদেশ মিলিল—“ওরে, তুই শিগ্গীর ব্রজমণ্ডলে চলে যা । সেখানে গিয়ে সনাতন গোস্বামীর শরণ নে । মহার্ঘ রত্ন পড়ে রয়েছে তার সন্ধানে । তার করুণা হলে তোর সর্ব দারিদ্র্য-ছঃখ চিরতরে দূর হবে ।”

কালবিলম্ব না করিয়া জীবন ঠাকুর ব্রজমণ্ডলে আসিয়া উপস্থিত হন । সনাতন গোস্বামীর পদতলে পড়িয়া সবিস্তারে নিবেদন করেন স্বপ্নাদেশের কথা ।

এ কাহিনী শুনিয়া গোস্বামী প্রভু তো মহা বিস্মিত । নিজে তিনি কাঙাল বৈষ্ণব, রিক্ত সন্ন্যাসী । ব্রাহ্মণের এই ছঃখ দারিদ্র্য তিনি কি

কারয়া ঘুচাইবেন? আজকাল ভজন-পূজন সারিবাব পর যেটুকু সময় অবশিষ্ট থাকে, তাহা অতিবাহিত হয় ইষ্টদেবের ধ্যান জপে। বাহিরের কাহারো সঙ্গে বড় একটা সম্পর্ক রাখেন না। এ ব্রাহ্মণের সাহায্যের জন্য কাহাকে ধরবেন, কাহার কাছে উপস্থিত হইবেন, ভাবিয়া পান না।

সহসা তাঁহার স্মৃতিপটে ভাসিয়া উঠে পুরাতন একটি ঘটনার কথা। তাই তো! দারিদ্র্যক্রিষ্ট এই মানুষটির সাহায্য তো তিনি করিতে পারেন। সে অনেক দিন আগের কথা। যমুনার বালুকা-তট ধরিয়া সনাতন আপন মনে ভজন করিতে করিতে যাইতেছেন, হঠাৎ পায়ে ঠেকিল এক দুর্লভ রত্ন। মৃত্তিকা হইতে তখনি তাড়াতাড়ি উহা তুলিয়া নিলেন। পরক্ষণেই মনে খেলিয়া গেল চিন্তার বলক। সর্বত্যাগী কৃচ্ছ্রব্রতী সন্ন্যাসী তিনি, এ রত্ন দিয়া তাঁহার কোন্ কাজ? বরং যত শীঘ্র এটিকে যমুনায় বিসর্জন দেওয়া যায় ততই মঙ্গল। আবার ভাবিলেন, শ্রীভগবানের কি ইচ্ছা তাহা কে জানে? হয়তো এই রত্ন দিয়া কোনো দুঃখী বা বিপন্ন মানুষের প্রাণ বাঁচিতে পারে। জলে ফেলিয়া না দিয়া তটের বস্তু তটে রাখিয়া দেওয়াই সমীচীন। সামনেই একটি চিহ্নিত স্থানে রত্নটি প্রোথিত করিয়া সনাতন আপন কুটিরে ফিরিয়া আসিলেন।

এতকাল সেই রত্নের কথা তাঁহার স্মরণে ছিল না। এবার মহা উৎফুল্ল হইয়া ভাবিলেন, ভালই হইল, এই অভাবগ্রস্ত ব্রাহ্মণই তবে উহা গ্রহণ করুক।

যেস্থানে উহা প্রোথিত আছে তাহার সন্ধান তখনি বলিয়া দিলেন, প্রসন্ন মধুর কণ্ঠে কহিলেন, “বাবা, ঐ রত্ন তুমি এখনি তুলে নিয়ে যাও, দারিদ্র্যরোষণ তোমার দূর হোক।” কথা কয়টি বলার পরই গোস্বামী প্রভু আবার মগ্ন হইলেন ইষ্টধ্যানে।

জীবন ঠাকুর মোৎসাছে তখনি যমুনার তীরে ছুটিয়া যান। নির্দেশিত গোপন স্থান হইতে উদ্ধার করেন সেই দুর্লভ সম্পদ।

হস্তস্থিত রত্নখণ্ড সূর্যকরে ঝলসিয়া উঠে। দরিদ্র ব্রাহ্মণ বিস্ময়ে

হন হতবাক। একি অদ্ভুত দৈবী লীলা প্রকটিত তাঁহার জীবনে ? সাত রাজার ধন মানিক আজ যে তাঁহার মতো চির কাঙালের মুঠোর মধ্যে। এই মহার্ঘ বস্তু বিক্রয় করা মাত্র মিলিবে অগণিত অর্থ, ঐশ্বৰ্যের তাঁহার সীমা থাকিবে না।

সনাতনের কৃপাতেই দরিদ্র ব্রাহ্মণ আজ এই বিপুল সম্পদের অধিকারী। তাই তাঁহার কথা মনে হইতেই কৃতজ্ঞতায় নয়ন ছুটি অশ্রুসজ্জল হইয়া আসে।

হঠাৎ জীবন ঠাকুরের চেতনার দ্বারে এক প্রচণ্ড আঘাত লাগে। সমগ্র সত্তায় জাগে আলোড়ন। সবিস্ময়ে ভাবিতে বসেন, ধন-সম্পদের লোভে পুণ্যধাম বারাণসী হইতে বৃন্দাবন অবধি তিনি পদব্রজে ছুটিয়া আসিয়াছেন, আর সনাতনের কৃপার ফলে ধনায়ত্ত হইয়াছে রাজভোগ্য রত্ন। অথচ সেই সনাতন গোস্বামীর বিন্দুমাত্র হুঁশ নাই এই মহার্ঘ বস্তুটির দিকে। এতকাল এটির কথা বিস্মৃতই ছিলেন, যদিই বা আর্তের কাতর ক্রন্দনে সে কথা মনে পড়িয়াছে, তাহার সন্ধানটি বলিয়া দিয়াই আবার ডুবিয়া গেলেন ধ্যান ভঞ্জে। কোন্ অমৃত ভুঞ্জনের ফলে গোস্বামী এমন বিভোর হইয়া আছেন ? কোন্ পরম ধনের অধিকারী তিনি যাহা এমন রাজবাঞ্ছিত রত্নকে তুচ্ছ জ্ঞান করায় ? অতুল বিত্তবৈভব, রাজসম্মান ত্যাগ করিয়া আসিয়া সনাতন ভজনানন্দে আত্মবিস্মৃত হইয়া আছেন, রূপান্তরিত হইয়াছেন দেবমানবরূপে। আর জীবন ঠাকুর দৈবীকৃপায় সেই দেবমানবেরই সান্নিধ্য ও কৃপাপ্রসাদ পাইয়া তুচ্ছ রত্নের মোহে হইয়াছেন আচ্ছন্ন, ঘৃণ্য বিষয়কীটের জীবন আঁকড়াইয়া ধরিতে চলিয়াছেন আরো দৃঢ়হস্তে।

পরম ধন লাভের তীব্র আকৃতি জাগিয়া উঠে ব্রাহ্মণের অন্তরে। এক অদ্ভুতপূর্ব দিব্য চেতনায় হন উদ্বুদ্ধ। মুহূর্তমধ্যে সেই মহাধন রত্ন লোষ্ট্রবৎ নিক্ষেপ করেন যমুনায়া। তারপর ব্রহ্ম পদে সনাতনের কুঞ্জে কিরিয়া যান। দণ্ডবৎ করিয়া গলদশ্রু লোচনে নিবেদন করেন, “প্রভু, আমি জীবাধম। তাই নিজের তুচ্ছ ধন সংসারের মায়ায়

আবদ্ধ হয়ে আছি। দারিদ্র্যে নিম্পিষ্ট হয়ে সদাই উদগ্র হয়ে আছি অর্থশূন্যে অন্ধ। আজ আপনার সান্নিধ্যে এসে আমার জ্ঞানচক্ষু উদ্বীলিত হয়েছে। যে ধনে ধনী হয়ে মণিকেও আপনি মণি বলে গণ্য করছেন না, কৃপা ক'রে তারই কিছুটা আমার দিন। অর্থের বদলে দিন পরমার্থ। আজ থেকে আপনার চরণেই নিজেকে উৎসর্গ করলাম।”

সনাতনের নিকট দীক্ষা গ্রহণের পর শুরু হয় জীবন ঠাকুরের অধ্যাত্মজীবনের অভিযাত্রা। নূতন মাহুবে তিনি রূপান্তরিত হন। উত্তরকালে তাঁহার বংশ খ্যাত হইয়া উঠে কাঠমাণ্ডয়ার গোস্বামী পরিবার নামে।

জীবনের শেষ পর্বায়ে সনাতন নন্দীশ্বরের মানসগঙ্গা নামক পুণ্য সরোবরের তীরে আসিয়া সজোপনে অবস্থান করিতে থাকেন। উত্তরকালে এ স্থানটি বৈঠান বলিয়া খ্যাত হয়। নিকটেই চক্রেস্বর মহাদেবের মন্দির। এই স্থানে এক বৃক্ষতলে বসিয়া মহাসাধক ত্রুতী হন তাঁহার চরম অধ্যাত্ম-সাধনায়। স্নানাহারের দিকে কোনো হুঁশ নাই, একেবারে অজগর বৃত্তি। অন্তরে সদা চলিয়াছে কৃষ্ণভজন আর কৃষ্ণলীলার অনুধ্যান।

সনাতন এ সময়ে অতিবৃদ্ধ, বয়স নব্বই বৎসরের কাছাকাছি। কথিত আছে, এই বয়সে প্রাণপ্রিয় ভক্তের এই কৃষ্ণসাধন দেখিয়া ইষ্টদেব নিজেই ব্যগ্রভাবে বৃক্ষতলে আসিয়া উপস্থিত হন। গোপ বালকের হৃদবেশে তার গ্রহণ করেন তাঁহার দৈনন্দিন আহারের। ‘ভক্তিরত্নাকর’ এই রসমধুর লীলার উল্লেখ করিয়া লিখিয়াছেন—

কৃষ্ণ গোপবালকের ছলে হৃদ্য লৈল।

দাঁড়াইলা গোস্বামী সম্মুখে, হর্ব হৈল।

মোরক্ষক বেশ, মাখে উকীল শোভল।

হৃদভাঙ হাতে করি, গোস্বামীরে কর।

আছহ নির্জনে, তোমা কেহ নাহি জানে।

দেখিলাম তোমায়ে আসিয়া পৌঁছায়ণে।

এই হৃৎ পান কর, আমার কথায় ।  
 লইয়া যাইব ভাণ্ড, রাখিও এখায় ।  
 কুটিরে রহিলে, 'মো সত্যের সুখ হবে ।  
 ঐছে রহ, নহিলে ব্রজবাসী হুঃখ পাবে ।

( ৫ম তরঙ্গ )

ক্রমে ভক্ত ভগবানের এই প্রেমলীলার কথা লোকমুখে প্রচারিত হইয়া পড়ে । সনাতনের ভক্ত ও গুণগ্রাহীরা ব্যাকুল হইয়া বৈঠানে ছুটিয়া আসেন । ইহাদের অনুরোধ উপরোধে সনাতন কল্লুসাধন হ্রাস করিতে বাধ্য হন । সবাই মিলিয়া ঐ বৃক্ষতলে তাঁহার জন্য এক কুটির বাঁধিয়া দেন । ঐ কুটির ত্যাগ করিয়া সনাতন গোস্বামী বৃন্দাবনে আর কিরিয়া যান নাই, শেষের দিন করটি এখানেই অতিবাহিত করেন । কপ, রঘুনাথ প্রভৃতি বৃন্দাবনের গোস্বামীরা, সারা ভারতের দিগ্‌বিজয়ী পণ্ডিত ও সার্থকনামা সাধুরা, প্রায়ই আসিয়া উপস্থিত হইতেন বৈঠানের এই নিভৃত পর্ণকুটিরে । আপ্তকাম সাধক সনাতনকে দর্শন করিয়া তাঁহারা যত্ন হইতেন, তাঁহার উপদেশ গ্রহণ করিয়া হইতেন উপকৃত ।

গিরি-গোবর্ধনের পরিক্রমা ছিল সনাতনের জীবনের এক প্রধান ব্রত । এই পুণ্যগিরি বৈঠান হইতে বেশী দূরে নয় । প্রথম প্রথম জন্মার্জি অশক্ত দেহ নিয়াও সনাতন পারিক্রমা সম্পন্ন করিতেন । পরের দিকে আর দৈহিক সাধ্যে তেমন কুলাইয়া উঠিত না । তখন তাঁহার সারা মনপ্রাণ পড়িয়া থাকিত ইষ্টদেব ঐশ্বর্যের স্মৃতিপূত ঐ গিরির প্রদক্ষিণ পথের দিকে । অমুশোচনা ও বেদনায় পরম ভাগবতের অন্তর হইয়া উঠিত ভাস্করাস্ত ।

ভক্ত হৃদয়ের আতি আবার সেদিন টানিয়া আনে ইষ্টদেবকে । নয়নাভিরাম মূর্তিতে গিরিধারীজী আবিস্কৃত হন সনাতনের সমক্ষে । প্রথম মধুর হান্তে কহেন, “সনাতন, তোমার অন্তরে খেদ জেগেছে, আমার গোবর্ধন গিরির পরিক্রমা আর তুমি করতে পারছো না । কুলাই যেতেই তো আমি ছুটে এলাম । এই জাখো, আমার হাতে

রয়েছে গোবর্ধনের শিলাখণ্ড। আর এতে অঙ্কিত রয়েছে আমার চরণচিহ্ন। এই চরণ-পাহাড়ী ভক্তিভরে তোমার কুটিরে স্থাপন করবে, আর ভজন শেষে রোজ করবে এটিকে প্রদক্ষিণ। তাতেই হবে তোমার গোবর্ধন পরিক্রমণের ব্রত উদ্‌ঘাপন। এতে এই জীর্ণ দেহে তোমার শ্রম লাঘব যেমন হবে, তেমনি আমারও বাড়বে আনন্দ।”<sup>১</sup>

এখন হইতে এই চরণ-পাহাড়ীকে কেন্দ্র করিয়াই সনাতনের ভজন ও তপস্তার ধারা বহিয়া চলে। অতঃপর ধীরে ধীরে সমাগত হয় ১৫৫৪ খ্রীষ্টাব্দের আষাঢ়ী পূর্ণিমার তিথি। সনাতন গোস্বামীর জীবনদ্বারে সেদিন ধ্বনিত হয় তাঁহার প্রাণাধিক নওলকিশোরের পরম আহ্বান। চরণ-পাহাড়ীর পুণ্যময় বেদীতে দণ্ডায়মান হইয়া জ্যোতির্ময় মূর্তিতে ইষ্টদেব তাঁহার পরম ভক্তকে দর্শন দেন। মায়িক জগতের স্ববনিকা ভেদ করিয়া সনাতন গোস্বামী প্রবিষ্ট হন শাশ্বত লীলাধামে।

এই মহাপ্রয়াণের কলে উত্তর ভারতের বৈষ্ণবীয় সাধনার, সারস্বত সাধনার, এক তুঙ্গ শিখর যেন সেদিন ধসিয়া পড়ে। সারা ব্রহ্মাণ্ডে নামিয়া আসে করুণ শোকের ছায়া। আর গোড়ীর বৈষ্ণবসমাজ তাহার প্রেমভক্তির মহান আলোক তন্তুটি হারাইয়া বিহ্বল হইয়া পড়ে।

সহস্র সহস্র শোকাক্ত ব্রজবাসীর সম্মুখে, প্রভু মদনমোহনজীর মন্দিরপ্রাঙ্গণে সনাতন গোস্বামীর মরদেহ সমাধিস্থ করা হয়। অগ্নিশিত ভক্তের প্রকার্য্য আজিও নিবেদিত হয় সেই পবিত্র ভূমিতে।

১. অলৌকিকভাবে লব্ধ সনাতনের এই চরণ-পাহাড়ী একটি বটপত্রাকৃতি শিলাখণ্ড। গোড়ীর ভক্তেরা মনে করেন, ইহা পুণ্যসিঁরি গোবর্ধনের প্রতীক এবং ইহাতে ঐক্ককে চরণচিহ্ন অঙ্কিত রহিয়াছে। সনাতন বরলোক ত্যাগ করার পর ঐহীক গোস্বামী এই চরণ-পাহাড়ী নিজের ইষ্টবিগ্রহ রাধাকামোদরায়ীর মন্দিরে স্থাপন করেন ও পূজা অর্চনার ব্যবস্থা করেন। আজ অবধি এই পবিত্র শিলা সেখানেই প্রতিষ্ঠিত।

# সমর্থ বাসুদাস

ছোট ছেলে নারায়ণকে নিয়া রাণুবাসি বড় বিপদে পড়িয়াছেন । গ্রামের স্কুলে তাহার লেখাপড়া সমাপ্তপ্রায় ; এবার সে দাদা গঙ্গাধরের সঙ্গে থাকিয়া কাজকর্ম করিবে, ঘর-সংসার করিবে, ইহাই রাণুবাসি চান । কিন্তু নারায়ণ এ কথায় কান পাতে না । সাধু-সন্তের খোঁজ পাইলেই তাঁহাদের পিছনে ক'রে ঘোরাঘুরি, মাঝে মাঝে মঠে-মন্দিরে গিয়াও চোখ বুজিয়া বসিয়া থাকে । আর গঙ্গাধরের কাছে বলিয়া বেড়ায়, ঘরে তাহার মন মোটেই টিকে না, সন্ন্যাস নিয়া হইবে সে দেশভ্যাগী ।

জননী সেদিন নারায়ণকে নিকটে ডাকিলেন । যা হোক একটা বুঝাপড়া আজ তাহার সঙ্গে করিতেই হইবে । আর দেখি করা সঙ্গত নয় । কোমল স্বরে কহিলেন, “বাবা নারায়ণ, এখন তুই বড় হয়েছিস, লেখাপড়াও কিছুটা শিখেছিস । তোর দাদা গঙ্গাধর তো সংসারের জন্ত খেটে খেটে সারা হল, তোর কি উচিত নয় তাকে সাহায্য করা, তার সংসারের ভার লাঘব করা ? আরও একটা জরুরী কথা । আমার বয়স হয়েছে, শরীর খারাপ হচ্ছে দিন দিন । বড় বউ পার্বতীর উপর অজায় রকমে সংসারের কত চাপ পড়েছে । তাকে সাহায্য করবার জন্ত বাড়িতে আর একটি বউ আনা দরকার । তাই আমি ঠিক ক'রে কেলেছি, আসছে মাসেই তোর বিয়ে দেবো । ইতিমধ্যে ভালো ঘরের সুলক্ষণা একটি পাত্রীও আমি মনে মনে ঠিক ক'রে রেখেছি ।”

“মা তোমার ছোটো ইচ্ছের কোনোটিই যে আমি পূরণ করতে পারছিনে । আমি বলি কি, আমার আশা বরং তুমি ছেড়েই দাও ।” অবলীলায় উত্তর দেয় নারায়ণ ।

“এসব কি তুই বাজে বকছিস ? এ শুধু তোর দারিদ্র্য এড়ানোর একটা ছুতো ।”

“না, মা, সত্যি কথাই বলছি। গৃহস্থী আমার দিগে কখনো হবে না। জানিনে, কেন এক অজানা রাজ্যের হাতছানি কেবলই আমার ডাকছে। আর ত্যাগে মা, প্রায়ই আমি স্বপ্নে প্রভু রামজীকে দেখি, ভক্তবীর মারুতীকেও দেখি। শুধু তাই নয়, কি এক অদ্ভুত শূণ্যতায় আমার হৃদয় ছটকট করে। আর ভেতর থেকে কে যেন বার বার অক্ষুট স্বপ্নে বলে ওঠে—ওরে সাবধান, সাবধান—সংসারের জালে যেন জড়িয়ে পড়িসনে—সদগুরুর কাছে তুই ছুটে যা, মন্ত্র নে তাঁর কাছে থেকে, আর এই মন্ত্রের ভেলায় চড়ে পৌঁছে যা প্রভু রামচন্দ্রজীর চরণে।”

পুত্রকে হারানোর আশঙ্কায় জননীর হৃদয় কাঁপিয়া উঠে। নিজেকে সামলাইয়া নিয়া রাণুবাসী বলেন, “বেশ তো বাবা, মন্ত্র নিতে হয়, রামজীর ধ্যান-তপ করিতে হয়—তা বাড়িতে বসেই তো ওসব করা যায়। এজন্ত সংসার ছাড়া কেন, বলতো?”

“না, মা। সন্ন্যাসীর মুক্ত জীবনই আমি নেবো। গ্রামে যখন সাধু-সন্ন্যাসীর জমায়েত আসে, আমি তাঁদের দেখে দেখে মুগ্ধ হই। কোনো পিছুতান নেই, সঙ্কল্প নেই। নেই কোনো বন্ধন বা জটিলতা। একমুখে ইষ্টধ্যান করার পরম সুযোগ রয়েছে তাঁদের। এই জীবনই আমার বড় ভালো লাগে।”

“বাবা নারায়ণ, শুধু নিজের ভালো লাগার পিছনেই চলতে নেই, বাপ মায়ের ভালো লাগার দিকেও যে চাইতে হয়। ভেবে ত্যাগ, প্রভু রামজী তাঁর বাপ-মায়ের কি বাধ্যই না ছিলেন। তাঁদের তৃপ্তির জন্ত কি-ই না করতে পারতেন তিনি। তুইও তোর অভাগিনী মায়ের দিকে একটু ফিরে তাকাস, বাবা। সাত বছর আগে তোদের বাবা স্বর্গে গেছেন, ছুটি নাবালক পুত্র আমার হাতে সঁপে দিয়ে। তোর তখন মাত্র পাঁচ বৎসর বয়স। কত হৃদয়ে কষ্টে তোদের হৃৎকটিকে আমি এতকাল মানুস করছি। তোর বাবার কথা মনে কর, এই হৃৎখিনী মায়ের মুখ চেয়ে, তুই বহু-সংসারে থাক, আমাদের হৃৎখের জার লাগব কম, বাবা। আর কেনে রাখিস, তুই



বদি আমাদের ছুখ না বুঝিস, কথার অবাধ্য হোস, তবে আমিও আমার নিজের পথ দেখবো। হবো আত্মঘাতিনী।”—সাক্ষনয়নে কাতর কণ্ঠে একথা বলিতে বলিতে জননী নারায়ণের হাত ছুটি চাপিয়া ধরিলেন।

মায়ের নয়নের অশ্রু, পিতার মৃত্যুর করুণ স্মৃতি, নারায়ণের সঙ্কল্প টলাইয়া দেয়। মন তাহার কোমল হইয়া আসে। ছলছল নয়নে উত্তর দেয়, “মা, তুমি এমন ক’রে কাঁদাকাটি ক’রো না। বেশ তো, তোমার ইচ্ছে অনুসারেই আমি কাজ করবো।”

“তা হলে, তোর বিয়ের সম্বন্ধ আমি পাকাপাকি ক’রে কেলি, কি বলিস? আসন্ গাঁও-এ এক সৎ গৃহস্থ রয়েছেন, নাম তাঁর ভনুজিপস্থ চোরালপুরকর। তাঁর একটি মেয়ে আছে, যেমনি সুন্দরী, সুলক্ষণা, তেমনি স্বভাবটিও সুন্দর। প্রস্তাব নিয়ে তারা ঘোঁরাকেরা করছে অনেকদিন ধরে। আমরা সম্মতি দিলেই হয়।” জননী রাগুবাসী এবার স্বস্তির নিঃশ্বাস ত্যাগ করেন। পরদিনই কন্যাপক্ষের সহিত কথা পাকা করার জন্ত লোক পাঠান, দিনক্ষণও ধার্য করা হয়।

বিবাহের রাত। বরষাজীরা সাড়ম্বরে কনের বাড়িতে উপস্থিত হইয়াছেন। বরকর্তা গঙ্গাধর মহা উৎসাহে এদিক-ওদিক ছুটাছুটি করিতেছেন। আত্মীয়-কুটুম্বদের হাসি গান আনন্দ-কলরবে কান পাতা দায়। বাজাভাণ্ড, মশালের আলো আর আতসবাজীতে আকাশ বাতাস সরগরম।

অল্পকাল মধ্যে অহুষ্ঠান শুরু হইয়া যায়। সুসজ্জিত কনেকে নিম্না আসা হয় বিবাহ-সভায়। বরকনের মাঝখানে আড়াল রচনা করিয়া আছে শুধু একটি পদা, এখনি সেটি উত্তোলন করা হইবে, চার চোখের হইবে শুভ মিলন।

এমন সময় অসম্ভব মশালধারীদের সতর্ক করিতে গিয়া কে খেন গভীর আওরাজে বলিয়া উঠে—মাবধান! বিহ্বলমুগ্ধদের মধ্যে হঠাৎ শিহরিয়া উঠে বরবেশী নারায়ণ। চিন্তার বলক খেলিয়া যায় তাহার

অন্তরে ! সাবধান ? সে কি ! এ কথাটি যে তাহার পূর্বকার শোনা ; অন্তরলোক হইতে উদগত এই বাণী আরো কয়েকবার যে তাহার নিকট পৌঁছিয়াছে । আজো এই বাণী তাহারই উদ্দেশ্যেই উচ্চারিত । ভ্রান্তিবশে সংসারের জালে আজ সে জড়াইতে বাইতেছে । আর তো কোনো দিনই এই জাল ছিন্ন করিয়া সে বাহির হইতে পারিবে না । নাঃ, এই মুহূর্তেই ইহার একটা প্রতিবিধান সে করিবে । বিবাহের শৃঙ্খল এড়াইয়া এখনি এই মুহূর্তে এখান হইতে করিবে পলায়ন ।

সিদ্ধান্ত অনুযায়ী কাজ করিতে দেরি হয় না । তৎক্ষণাৎ বরের টোপর ও উত্তরীয় নারায়ণ ভূতলে নিক্ষেপ করে, ‘জয় রামজী’ বলিয়া উচ্চকণ্ঠে ধ্বনি দেয়, বিবাহের অঙ্গন হইতে ছুটিয়া বাহির হইয়া আসে । তারপর বাড়ির পিছনের রাস্তা দিয়া ধাবিত হয় নিকটস্থ জঙ্গলের দিকে ।

বিবাহ-সভায় উপস্থিত লোকজন এ কাণ্ড দেখিয়া হতবাক্ হইয়া যায় । ক্ষণপরেই তাহাদের চমক ভাঙে—‘ধব-ধব, শব্দে সবাই করিতে থাকে পলাতক বরের পশ্চাদ্ধাবন ।

চারিদিকে অন্ধকার, রাস্তাঘাট কিছুই দেখা যায় না, ইতিমধ্যে সবায় অলক্ষ্যে নারায়ণ কোথায় উধাও হইয়া গিয়াছে । অবশেষে উৎসাহী অনুসরণকারীরা নিবৃত্ত হয়, হতাশ হইয়া ঘরে ফিরিয়া যায় । আলো হাসি গানে ভরা বিবাহ-বাড়িতে নামিয়া আসে নৈরাশ্রের অন্ধকার । ভগ্নদুতের মতো গজাধর গৃহে ফিরিয়া আসেন, জননীর কাছে বর্ণনা করেন এই দুর্দৈবের কথা । মর্মভেদী কান্নায় জননী ভাঙিয়া পড়েন । পুত্র নারায়ণ প্রায়ই যে তাঁহার কাছে প্রকাশ করিত গৃহভ্যাগের সঙ্কল্প । জননী বুঝিলেন, বিবাহ-বাসর হইতে পলায়ন করিয়া সেই সঙ্কল্পই আজ সে সিদ্ধ করিতে চলিয়াছে । সংসারে সে আর কোনোদিন ফিরিয়া আসিবে না ।

এদিকে বিবাহ-বাসর হইতে লাকাইয়া পড়িয়া নারায়ণ উল্লসে চলিয়াছে । গ্রামের চেনা রাস্তা তাহার পক্ষে মোটেই নিরাপদ নয়,

অনুসরণকারীরা যে কোনো সময়ে ধরিয়া কেলিতে পারে, তাই অন্ধকার বনপথ দিয়াই সে অগ্রসর হইতেছে। ছুই পা ক্ষত-বিক্ষত, গাছের গুঁড়ির আঘাতে মাথা কাটিয়া গিয়াছে, কিন্তু তাহাতে কোনো ক্রক্ষেপ নাই। উদ্গাদের মতো কেবলি সে ছুটিয়া চলিয়াছে।

দীর্ঘপথ অতিক্রম করার পর তাহার মনে হইল, এবার সে অনেকটা নিরাপদ। শরীর তাহার বড়ই শ্রান্ত, ক্ষত ও আঘাতের বেদনায় কাতর। এবার কিছুটা বিশ্রাম না নিলে আর চলে না। কিন্তু এই অন্ধকার রাত্রে, দুর্গম বনের মধ্যে আশ্রম কোথায় ?

সম্মুখে দণ্ডায়মান এক বিশাল বটবৃক্ষ। নারায়ণ স্থির করিল, এই বৃক্ষশাখে উঠিয়া এই রাতটা কাটাইয়া দিবে। শয়নের অসুবিধা হইলেও এ ব্যবস্থায় অন্তত হিংস্রজন্তুর আক্রমণের ভয় নাই। বৃক্ষের প্রশস্ত শাখায় অবসর দেহটি এলানোর সঙ্গে সঙ্গে নিজায় সে অভিভূত হইয়া পড়ে।

পরদিন আবার শুরু হয় পথ চলা। বনের প্রান্তদেশে গিয়া এক ব্রাহ্মণের কুটিরে নারায়ণ আশ্রয় পায়। সেখানে স্নানাহার সম্পন্ন করার পর শরীর অনেকটা সুস্থ হইয়া উঠে।

ভাগ্যক্রমে ঘটে একদল তীর্থযাত্রীর সঙ্গে তাহার সাক্ষাৎ। দলটি যাইতেছে পঞ্চবটি দর্শনে। প্রভু জীরামচন্দ্রের পুণ্যময় লীলাভূমি এই স্থান। নারায়ণের মনপ্রাণ আনন্দে নৃত্য করিয়া উঠে ; তীর্থ-চারীদের দলে তখনই সে ভিড়িয়া পড়ে। তারপর এগারো দিনের পদযাত্রা শেষে উপনীত হয় পঞ্চবটিতে।

এই পরম পবিত্রতীর্থে অবস্থানের সময়ই নারায়ণের জীবনে হয় নব অরুণোদয়, গুরুকৃপা ও অনন্ত সাধনার বলে সে পরিণত হয় প্রভু-রামচন্দ্রের কৃপাশ্রয় এক মহান সাধকে। তাঁহার নব নামকরণ হয়—রামদাস। শাস্ত্রবিদ, যোগবিভূতিসম্পন্ন মহাপুরুষ, সমর্থ রামদাস শুধু এক সিদ্ধ রামাইৎ সাধুই নন, মহারাষ্ট্রের উজ্জীবনে ও দক্ষিণ ভারতে রামভক্তির প্রচারকর্মে তাঁহার অবদান অসামান্য। ছত্রপতি শিবাজীর নব মহারাষ্ট্র নির্মাণের, ধর্মরাজ্য স্থাপনের, প্রেরণা ও

পন্নিকল্পনাও উদ্ভূত হইয়াছিল এই মহাত্মারই সিদ্ধজীবন হইতে। বৈরাগীর উত্তরীয়কে রাষ্ট্রের পতাকারূপে চিহ্নিত করিয়া দিয়া রামদাস ভারতের জনজীবনের পুরোভাগে স্থাপন করিয়াছিলেন ত্যাগ-বৈরাগ্য ও অধ্যাত্মশক্তির কালজয়ী মহাত্ম্য।

হায়দ্রাবাদ নগরীর পনের মাইল দূরে জাম্বু নামক একটি ক্ষুদ্র গ্রাম। মহারাষ্ট্রের অগ্রাণ্ড অঞ্চলের মতো এ স্থানটি রুক্ষ ও পিঙ্গল নয়, চারদিক রহিয়াছে শস্যশ্যামল ক্ষেত্র দিয়া ঘেরা। এই গ্রামে বাস করিতেন সূর্যজী পন্ড নামে এক সদাচারী ব্রাহ্মণ। তাঁহার পত্নী রাণুবাসী-ও পরিচিতা ছিলেন ধর্মপ্রাণা মহিলারূপে।

পন্ডজীর বয়স যৌবনের কোঠা পার হইতে চলিয়াছে, কিন্তু এ যাবৎ কোনো সন্তানাদি হয় নাই। স্বামী-স্ত্রী উভয়েই মনে বড় অশান্তি। তাই ভগবৎ অনুগ্রহ লাভের জন্ত নানা ধর্মামুষ্ঠান ও ব্রত উদ্‌যাপনে তাঁহারা ব্রতী হন, দেবদ্বিজের সেবায় করেন আত্মনিয়োগ। অতঃপর কয়েক বৎসরের ব্যবধানে ইহাদের দুইটি পুত্র ভূমিষ্ঠ হয়। প্রথমটির নাম গঙ্গাধর, দ্বিতীয়টি নারায়ণ। এই নারায়ণই ভারত-বিশ্রুত মহাসাধক—সমর্থ রামদাস।

দ্বিতীয় পুত্রের জন্মের অব্যবহিত পূর্বে রাণুবাসীর অন্তর্জীবনে নানা ভাবান্তর দেখা যায়। রামদাসের অগ্রতম জীবনীকার গিরিধর লিখিয়াছেন, এই সময়ে প্রায়ই রাণুবাসীর দেহে-দেখা দিত দিব্য ভাবের আবেশ। লোকের সঙ্গ এড়াইয়া তিনি নির্জনে আপন মনে ঘুরিয়া বেড়াইতেন।

একদিন রাণুবাসী স্বামীকে কহিলেন, “ত্যাখো, আজকাল প্রায়ই আমি বড় অন্তত রকমের স্বপ্ন দেখে থাকি। আর সেই সব স্বপ্নদৃশ্যে আবির্ভূত হন প্রভু রামচন্দ্র, মা-জানকী, লক্ষণ প্রভৃতি। কখনো বা সামনে দাঁড়িয়ে অর্পূর্ব কণ্ঠে স্তবগান করছেন রামদাস মাক্‌তি। একই ধরনের এই দৃশ্য কেন বার বার দেখছি, বলতো?”

“ভালোই তো। এতে বোঝা যাচ্ছে, প্রভু শ্রীরামচন্দ্রের কৃপা

হয়েছে আমাদের ওপর। তোমার কোলে হয়তো আসছে রামজীন্ট কোনো চিহ্নিত সেবক। যাক, এসব কথা যেন কাকর কাছে প্রকাশ ক'রো না, আর খুব সাবধানে ধেকো।”

অল্পকাল মধ্যেই ভূমিষ্ঠ হয় সূর্যজী পন্থের বহু প্রত্যাশিত এই দ্বিতীয় তনয়—রামদাস। ১৬০৮ খ্রীষ্টাব্দের এই শুভ জন্মদিনটি, ১৫৩০ শকাব্দের চৈত্র মাসের শুক্লা নবমীর এই পবিত্র তিথিটি, মহারাষ্ট্রের ধর্ম-সংস্কৃতির ইতিহাসে সংযোজন করিয়াছে এক উজ্জ্বল অধ্যায়।

পিতা সূর্যজী পন্থ ছিলেন একজন আচারনিষ্ঠ রক্ষণশীল ব্রাহ্মণ। রামদাসের যখন পাঁচ বৎসর বয়স, তখন তিনি তাঁহার উপনয়ন সংস্কার করান। তারপর পুত্রকে প্রেরণ করেন গুরুগৃহে। বিদ্যায়কর মেধা ও প্রতিভা বালকের। অল্প সময়ের মধ্যেই পাঠশালার বিদ্যা সে আয়ত্ত করিয়া ফেলে।

স্বল্পবিস্ত্র হইলেও রামদাসের পরিবারে এতদিন সুখ শান্তির অভাব ছিল না। কিন্তু এবার একদিন তাহাদের উপর পতিত হয় দৈবের নিষ্করণ আঘাত। মারাত্মক রোগে ভুগিয়া সূর্যজী পন্থ হঠাৎ পরলোকে গমন করেন। দ্বিতীয় পুত্র রামদাসের বয়স তখন মাত্র সাত বৎসর।

এই দারুণ বিপদে রাণুবাসী একেবারে ধৈর্যহার্য হন নাই। কিছুদিনের জ্ঞান শক্তি হাতে সংসারের দায়িত্ব ভার তিনি গ্রহণ করেন। তারপর বড় ছেলে গঙ্গাধর বয়ঃপ্রাপ্ত হইয়া রোজগার শুরু করিলে তাঁহাকে বিবাহ করান। ইহার কয়েক বৎসর পরে জননী রামদাসকে গৃহস্থীতে প্রবেশ করাইয়া নিশ্চিন্ত হইতে চাহেন। কিন্তু ভবিষ্যৎ ছিল অন্তরূপ। পুত্রের সেদিনকার পলায়নের সংবাদ জননীর হৃদয়ে বিদ্ধ হয় শেলের মতো, দুঃসহ শোকের ভায়ে একেবারে তিনি মুহূর্তমান হইয়া পড়েন।

বিবাহ সভা হইতে নাটকীয় অন্তর্ধানের পর প্রায় একপক্ষকাল কাটিয়া গিয়াছে। পদব্রজে দীর্ঘপথ অতিক্রম করিয়া রামদাস এবার

উপনীত হইয়াছেন গোদাবরী তীরে, নাসিকের নিকটে, পঞ্চবটর মহাতীর্থে।

এখানে পৌঁছানোর পর দীর্ঘ পথের শ্রম যেন মুহূর্তে দূর হইয়া গেল। স্বর্গীয় আনন্দের শিহরণ তখন রামদাসের সারা দেহে-মনে। পুণ্যতোয়া নদীতে স্নান সমাপন করিয়া তাড়াতাড়ি ছুটিয়া গেলেন রামচন্দ্রজীর মন্দিরে। ত্রীবিগ্রহের দর্শন পাওয়া মাত্র নিমজ্জিত হইলেন দিব্য আনন্দের সাগরে।

পঞ্চবটর আশেপাশে রামচন্দ্রজীর স্মৃতিপূত বহু স্থান রহিয়াছে। কয়েকমাস রামদাস মনের আনন্দে এই সব লীলাঙ্কল দেখিয়া বেড়ান। পরিব্রাজক সাধু-সন্ন্যাসীদের জমায়েত এখানে লাগিয়াই আছে। তরুণ রামদাস সোৎসাহে ইহাদের সঙ্গ করেন, সাধ্যমতো রত হন সাধুদের সেবায়। কোনো কোনো মহাত্মার কাছে ভজনের উপদেশ তিনি প্রাপ্ত হন, নির্ভাভরে তাহাষ্ট অনুসরণ করিয়া চলেন।

ষত দিন যায় রামদাসের মনের ব্যাকুলতা বাড়িতে থাকে। ভাবিতে থাকেন—পরমার্থের জ্ঞান, রামচন্দ্রজীর জ্ঞান, ধর্ম-সংসার তিন ছাড়িয়াছেন, জননীর স্নেহ-মমতার বন্ধন করিয়াছেন ছিন্ন, কিন্তু সেই পরমবস্ত্র মিলিবার উপায় কই?

বালক বয়স হইতেই সাধু-সন্তদের কাছে শুনিয়া আসিয়াছেন, ইষ্টলাভের জ্ঞান চাই সৎগুরু, চাই অমোঘ দীক্ষামন্ত্র, চাই কঠোর সাধনা। তাই তাঁহার জীবনে সর্বাত্মে প্রয়োজন সৎগুরুর আবির্ভাব। কিন্তু তাহা তো এ যাবৎ সম্ভব হইল না। এ সঙ্কটে কি করিবেন, কোথায় যাইবেন ভাবিয়া কোনো কুল-কিনারা পান না।

কিন্তু নিজের যাহা সাধ্য তাহা তো রামদাস করিতে পারেন। প্রতিদিন অতি প্রত্যুষে উঠিয়া গোদাবরীর পবিত্র সলিলে তিনি স্নান করেন, তারপর অনন্তনিষ্ঠায় গুরু হয় ইষ্ট ত্রীরামচন্দ্রের নামজপ ও কীর্তন। জপে নিবিষ্ট হইয়া কোনো কোনো দিন একেবারে বেহাশ হইয়া পড়েন, সেদিন আর মাধুকরীতে যাওয়া হয় না। উপবাসেই দিনরাত কাটিয়া যায়।

এই ব্যাকুলতা, কৃষ্ণ ও নামসাধনের কল অচিরে কলিল।  
সদগুরুর আবির্ভাব ঘটিল তাঁহার জীবনে।

পঞ্চবটির নির্জন অরণ্যের একপ্রান্তে, বৃক্ষমূলে বসিয়া তরুণ সাধক সেদিন সারা রাত নিবিষ্ট মনে জপ করিয়া চলিয়াছেন। ক্রমে রাত্রির অন্ধকার তরল হইয়া আসে। বনানীর শিরে দেখা দেয় উষার অরুণ রাগ, প্রভাত পাখির কাকলী ছড়াইয়া পড়ে আকাশে বাতাসে। দেব-দেউলের কঁাসর ঘণ্টা আর সাধু-সন্তজনের ভজনের দূরগত ঝঙ্কার অন্তরলোকে উৎসারিত করে দিব্য আনন্দের ধারা। এমনি সময়ে বৃক্ষমূলে আসিয়া দাঁড়ান এক বৈরাগী মহাপুরুষ। গম্ভীর কণ্ঠের আশ্রয়াজ ধ্বনিত হয়, “বৎস, চোখ মেলে চাও, তোমার আর্তি আর ভজন-নিষ্ঠায় রামজী প্রসন্ন হয়েছেন। সেই আনন্দ সংবাদ দিতেই আজ এখানে আমার আগমন।”

চোখ মেলিতেই রামদাস দেখেন—সমুন্নত দেহ, জটাজুটসম্বিত এক মহাত্মা তাঁহার সম্মুখে দণ্ডায়মান। গলে বিলম্বিত একছড়া তুলসীর মালা। কোমরে এককালি কোঁপীন ছাড়া আর কোনো আচ্ছাদন নাই। বয়সে প্রাচীন হইলেও দেহের গৌরবাস্তি এখনো অপরিমল। আয়ত নয়ন দুইটি দিব্য আনন্দের দ্ব্যতিতে ঝক্‌ঝক্‌ করিতেছে।

দর্শন মাত্রেই রামদাসের সর্বসত্তায় উঠে প্রবল আলোড়ন। অন্তরাত্মা হইতে উখিত হয় আশ্বাস বাণী—‘ওরে ভয় নেই, রামজীর কৃপাপ্রসাদ পেতে আর দেয় নেই, এই যে সম্মুখে এসে দাঁড়িয়েছেন সদগুরু, ইষ্টদেবের চরণে ইনিই যে তোকে দেবেন পৌঁছে।’

মোহাবিষ্টের মতো এগিয়ে যান তরুণ সাধক রামদাস। মহাত্মার চরণে লুটিয়ে পড়েন, সাক্ষনয়নে আবেদন জানান, “কৃপা কর্ণে যদি এসেছেনই, প্রভু, দিন আপনার পরমাশ্রয়। জীবন আমার কৃতার্থ হয়ে উঠুক।”

“হ্যাঁ, বৎস, তোমায় আমি মন্ত্র দেবো, সন্ন্যাস দেবো। আর

দেরি ক'রো না। তাড়াতাড়ি গোদাবরীর পবিত্র নীরে তুমি স্নান সমাপন ক'রে এসো।”

দীক্ষা ও সন্ন্যাস সমাপ্ত হইয়া গেল।<sup>১</sup> গুরু তাঁর শিষ্যের নাম দিলেন রামদাস। কহিলেন, “বৎস, এখন থেকে শুধু নামেই রামদাস নও, কর্মেও সত্যত করবে শ্রীরামচন্দ্রজীর দাসত্ব। নিজের আদর্শরূপে রাখবে মহাবীর হনুমানজীকে, মাকতি মহারাজকে। মহাশক্তিধর ছিলেন মারুতি, আর নিজের সর্বশক্তি তিনি নিয়োজিত করেছিলেন অবতার পুরুষ রামজীর ধর্মসংস্থাপনের মহান্ কর্মে। কত হৃৎকণ্ঠে বিনাশ করেছিলেন এই রামভক্ত, আর কত সাধুদের করেছিলেন রক্ষণ। বহিরঙ্গ জীবনে মাকতিজীর এই কর্মসাধনা তুমি অনুসরণ ক'রে চলবে। এই ভক্তবীরের অন্তর্লোকে সাধনতত্ত্বও তোমার অনুধাবন করা দরকার।”

“কৃপা ক'রে, এ তত্ত্বটি বিশদ ক'রে বলুন, মহারাজ।”

“মহাযোগী মারুতির অন্তর্লোকে রামজী দীপ্যমান ছিলেন সচ্চিদানন্দ বিগ্রহরূপে। শ্রীরামচন্দ্রের এই অবতাররূপ আর সচ্চিদানন্দরূপ দুই-ই বিভাসিত ছিল রামভক্ত মহাসমর্থ মারুতিজীর সাধনজীবনে। এ কথাটি সব সময়ে স্মরণ রেখো, বৎস।”

গুরু মহারাজ সেদিন বিদায় গ্রহণ করিবেন। চরণতলে পতিত

১ এই গুরুর নামধাম আজো অজ্ঞাত। রামদাসের চিঠিপত্র, রচনা ও সংলাপ অল্প প্রকাশিত হইয়াছে। কিন্তু দেখা যায়, সর্বত্রই তিনি গুরুর গবিচয় গোপন রাখিয়াছেন। হয়তো গুরুর নির্দেশেই তাঁহাকে এই গোপনীয়তা অবলম্বন করিতে হইয়াছিল। এ স্থলে উল্লেখযোগ্য যে, গুরুকরণ, গুরুদত্ত মন্ত্র ও গুরুশক্তিকে রামদাস অপরিহার্য মনে করিতেন।

গবেষকেরা মনে করেন, রামদাসের গুরু ছিলেন একজন বিশিষ্ট রামাইং সাধু, তিনি রামানুজী বা রামানন্দী সাধক ছিলেন না। সাধ্য সাধন সম্পর্কে তাঁহার নিজস্ব মত ও আদর্শ ছিল। অবতার রামচন্দ্রের তত্ত্ব এবং অষ্টৈক্য বোদ্ধা, এই দুইয়ের সমন্বয় বাণী তিনি প্রচার করিতেন।



হইয়া রামদাস ডুকরিয়া কাঁদিয়া উঠিলেন। স্নেহে গুরু কহিলেন, “বৎস, অধীর হ'য়ো না, ধৈর্য ধরো। পরমার্থ লাভ করতে হলে চারটি কৃপা চাই। এ চারটি হলো—গুরু কৃপা, আত্ম কৃপা, শাস্ত্র কৃপা ও ঈশ কৃপা। গুরু কৃপার দ্বার তোমার সাধনজীবনের সম্মুখে উন্মুক্ত হয়েছে। এবার তোমার চাই আত্মকৃপা, অর্থাৎ নিজের অসুষ্ঠিত কঠোর তপস্যা, যার ভেতর দিয়ে সর্ব অহমিকা ও দেহবোধ যাবে লুপ্ত হয়ে।”

একটু ধামিয়া আবার কহিলেন, “আর চাই শাস্ত্র কৃপা। শাস্ত্রের নিগূঢ় তত্ত্বসমূহ ভেতর থেকে উদ্ভাসিত হবে তোমার অন্তর সত্তায়। তারপর ঈশ কৃপার অবতরণ হতে দেরি হবে না, বৎস। তোমায় প্রাণভরে আমি আশীর্বাদ করছি—অচিরে তুমি সিদ্ধকাম হও। আমার আদর্শনে গেদ ক'রো না। প্রয়োজনমতো আবার এই পুণ্যধামেই তুমি আমার সাক্ষাৎ পাবে।”

গুরু পরদিনই পঞ্চবটি ত্যাগ করেন; সাধক রামদাসও গুরু করেন তাঁহার মরণ-পণ তপস্যা। দৈন্ত্য ও কুচ্ছসাধন হয় তাঁহার এই তপস্যার বড় অবলম্বন। ক্ষুধা তৃষ্ণার বালাই নাই, আকাশবৃষ্টি নিয়া দিনাতিপাত করেন। ঈশ্বরের বিধানে যেদিন যেটুকু আহার্য উপস্থিত হয় তাহা দিয়াই করেন ক্ষুৎপিপাসার নিবৃত্তি।

মাথা গুঁজবার একটি বুপড়ি বা পর্ণকুটিরও তাঁহার নাই। একমাত্র আশ্রয় বৃক্ষতল। গুরুর মতো এককালি কোপীন সম্বল কারয়া সেখানেই দিনরাত থাকেন, মাথার উপর দিয়া ঋতুর পর ঋতু গড়াইয়া যায়। শীত-গ্রীষ্ম সম্বন্ধে যেমন রামদাসের হুঁশ নাই, তেমনি নাই বর্ষার ঝড় জলের নির্ধাতনে বিন্দুমাত্র অসুবিধার বোধ। নবীন সন্ন্যাসীর এই ত্যাগ তিতিতিকা, একনিষ্ঠা ও হৃদয়ের সাধনা দেখিয়া পঞ্চবটির ভজনশীল প্রবীণ সাধকেরাও বার বার সাধুবাদ করিতে থাকেন।

অবশেষে রামদাসের সাধনা সফল হইয়া উঠে, ইষ্টদেব প্রভু

শ্রীরামচন্দ্রের জ্যোতির্ময় মূর্তি উদ্ভাসিত হইয়া উঠে তাঁহার নয়ন সমক্ষে । দিব্য আনন্দের রসতরঙ্গে সর্বাসত্তা তাঁহার প্রাবিত হয়, বাহ্যজ্ঞান হারাইয়া দেহখানি ভূমিতলে লুটাইয়া পড়ে ।

সংবিৎ ফিরিয়া আসিলে দেখিলেন, গুরু মহারাজ তাঁহার শিয়রে ঝপবিষ্ট । চোখে মুখে তাঁহার আনন্দের আভা । স্নিগ্ধকণ্ঠে রামদাসকে তিনি কহিলেন, “বৎস, তুমি ভাগ্যবান, ইষ্টদর্শন তোমার হয়েছে, তপস্যার এক প্রধান ধাপ তুমি অতিক্রম করেছো ।”

তাড়াতাড়ি ভূমিশয্যা ছাড়িয়া সাধক রামদাস উঠিয়া বসিলেন । আনন্দাশ্রুধারায় স্নাত হইয়া সাষ্টাঙ্গে প্রণত হইলেন গুরু মহারাজের চরণতলে ।

পরের দিন গুরুজী ভক্ত রামদাসকে নিকটে ডাকিয়া কহিলেন, “বৎস, তোমার ইষ্টদর্শনের প্রাকালেই আমি উপস্থিত হয়েছিলাম । তোমার সাক্ষ্য দেখে আমি প্রসন্ন হয়েছি ।”

“প্রভু, এসবই আপনার কৃপা । আপনার প্রদত্ত মন্ত্র সাধনাই হচ্ছে আমার বড় সম্বল ।” নিবেদন করে রামদাস ।

“না বৎস, তোমার সাধনার ঐকান্তিকতা আর কৃচ্ছ্র, তোমার দৈন্ত্য আর আত্মাভিমানের বিলুপ্তি আমায় আনন্দ দিয়েছে । সাধনা ও আত্মশুদ্ধির বলে আত্মকৃপা তুমি পেয়েছো, শাস্ত্রের গূঢ় তত্ত্বসমূহ স্মৃতিত হয়েছে তোমার সাধনসভায় । এবার সেই অমুভূত তত্ত্বকে শাস্ত্র অধ্যয়নের মধ্য দিয়ে বাচাই করে নাও । আরো একটা কারণ আছে যে জন্ম তোমায় শাস্ত্রপারঙ্গম হতে হবে ।”

“বুঝিয়ে বলুন, মহারাজ ।”

“রামদাস, তুমি রামজীর দাস সর্বতোভাবে, অন্তরঙ্গ ও বহিঃরঙ্গ এই দুইদিক দিয়ে । আত্মীবাদ করি, অচিরে তোমার অন্তর্গোকে স্মৃতিত হোক প্রভু রামচন্দ্রের অদ্বৈত ব্রহ্মস্বরূপ । আর বাইরে তুমি অবতার শ্রীরামের ধর্মরাজ্য সংস্থাপনে তৎপর হও ।”

“রামরাজ্য তো ত্রেতাযুগের প্রভু। এ যুগে তো তাঁর আসবার কথা নয়।” প্রশ্ন করেন রামদাস।

“বৎস, শ্রীরামচন্দ্র হচ্ছেন পরম ঈশ্বর, পরব্রহ্ম। প্রতি যুগেই রয়েছে তাঁর আধিকার, রয়েছে তাঁর রাজ্যস্থাপনের কর্মসূচী। নামে কি আসে যায়, রামদাস। রামরাজ্য, ধর্মরাজ্য, এ যুগেও প্রতিষ্ঠিত হতে যাচ্ছে।”

“এ বৃহৎ ঐশ কর্মে আমার মতো ক্ষুদ্র মানুষকীটের কি করবার আছে, প্রভু?”

“ভুল করলে, রামদাস। তিনি মহাযোগী হনুমানজীকে যেমন নিয়োজিত করেছিলেন, তেমনি কি কাঠবেড়ালীর সাহায্যও নেন নি? তিনি আসছেন—তোমার আমার কাজ হচ্ছে, যে পথ দিয়ে তাঁর রথ আসবে সে পথকে কণ্টকমুক্ত করা।”

“এক্ষেত্রে আমার কি করবার আছে?”

“শোনো রামদাস, বিধর্মীর অত্যাচারে জাতি পঙ্গু হয়ে গিয়েছে। ধর্মবুদ্ধি আজ বিলুপ্ত, নোংরা জঞ্জালে ভরা সর্বস্থান। পরম প্রভুর আসন পাত্‌বার মতো ঠাই কোথাও নেই। এ সম্বন্ধে তুমি তোমার কাজ শুরু করো। মহারাষ্ট্র হোক তোমার কর্মক্ষেত্র। ধর্মবোধ ও অধ্যাত্মশক্তিকে ভিত্তি ক’রে জাগিয়ে তোল এ দেশটাকে।

“প্রভু, ভাবছি, আমার মতো কাঙাল অসহায় ব্যক্তি, কি ক’রে এ কাজে এগোবে।” দৈন্তের সুরে বলেন রামদাস।

“বৎস, ভেবো না। আমি তোমায় বর দিচ্ছি, অচিরে ঋদ্ধি-সিদ্ধি হবে তোমার করতলগত। দেশের শক্তিশ্বর রাজা থেকে শুরু ক’রে সাধারণ মানুষ সবাই দেবে তোমায় এ মহান্ কর্মে সহায়তা।”

“নির্দেশ দিন, প্রভু, কিভাবে এ কাজে আমি অগ্রসর হবো।”

“এ ঐশ কর্মের দায়িত্ব ও গুরুত্ব অনেক, রামদাস। তাই এতদূর প্রস্তুতি দরকার। এই প্রস্তুতি ঐশ কর্মেরই অঙ্গ ব্যতীত আর কিছু নয়। এখানে পঞ্চবটির ভিড়ে এ কাজ হয়ে উঠবে না। গোদাবরীর অপর তীরে তাকরুলীতে তুমি চলে যাও। সেখানে নির্জনে বাস

করো দশ বৎসর কাল। সমাপ্ত করো তোমার অবশিষ্ট সাধনা ও শাস্ত্র অমুশীলন। জনগণের ভেতর তোমায় কাজ করতে হবে, সেখানে শুধু ভক্ত ও প্রেমিক সাধক হলেই চলবে না, আচার্য হয়েই তোমায় সুনতে হবে। এজন্ম চাই অসামান্য শাস্ত্র ব্যুৎপত্তি। রামজীর কৃপায় ভক্তিশাস্ত্র ও অদ্বৈত ব্রহ্মবাদ দুইয়েতেই থাকবে তোমার অনায়াস অধিকার। ষাও বৎস, রামজীর উপর সকল ফলের আশা ছেড়ে দিয়ে, অনাসক্ত যোগীরূপে তুমি এখন থেকে বিরাজ করো।”

বার বার রামদাসকে উৎসাহিত করিয়া অন্তরের গভীর আশীর্বাদ জানাইয়া, গুরু মহারাজ বিদায় গ্রহণ করিলেন।

তাকেরুলীতে রামদাস একাদিক্রমে অবস্থান করেন প্রায় বারো বৎসর। এই দীর্ঘ সময় ব্যাপিয়া একদিকে অগ্রসর হন গুরু প্রদর্শিত নিগূঢ় যোগ সাধনার মার্গে—অপর দিকে আয়ত্তে আনিতে থাকেন জটিলতর শাস্ত্রতত্ত্ব।

পঞ্চবটির দুই মাইল দূরেই তাকেরুলী। তথী শ্রোতস্বিনী নন্দিনী এই স্থানটি বিবর্তিত করিয়া প্রবাহিত হইয়াছে, অদূরে গিয়া পতিত হইয়াছে পুণ্যতোয়া গোদাবরীতে। পিছনে রহিয়াছে একটি অম্লচ্ছ নির্জন পাহাড়। এখানকার নৈসর্গিক সুসমা আর শাস্ত্র পবিত্র আবহাওয়া হইতে আধ্যাত্মিক প্রেরণা সহজে লাভ করা যায়। তাকেরুলী পাহাড়ের এক প্রান্তে একটি পর্ণকুটিরে রামদাস অতিবাহিত করেন তাঁহার সাধনজীবনের দ্বিতীয় পর্যায়।

এই শাস্ত্রবিদ ভজনশীল সাধকের খ্যাতি চারিদিকে ছড়িয়া পড়ে। নবাগত ভক্ত ও গুণমুগ্ধদের সহায়তায় বহু ছাত্রাপ্য গ্রন্থ রামদাস সংগ্রহ করিতে সমর্থ হন। এই সব গ্রন্থের অমুশীলন ও বিচার বিশ্লেষণের পর তিনি ব্রতী হন তাঁহার নিজস্ব ভক্তিবাদের ভিত্তি গঠনে।

বারো বৎসরের শাস্ত্রচর্চা ও ভক্তি সাধনা রামদাসের জীবনে আনিয়া দেয় বিপুল আত্মবিশ্বাস ও প্রশান্তি। এবার গুরু নির্দেশিত ঐশ কর্মের উদ্ভাপনের কথাও বার বার মনে পড়িতে থাকে। এই

সময়ে একদিন ধ্যান সমাহিত থাকাকালে রামদাস আবার ইষ্টদেব শ্রীরামচন্দ্রের দর্শন লাভ করেন। দিব্য করুণাধারায় হৃদয়কুণ্ডলি কানায় কানায় পূর্ণ হইয়া উঠে।

ইহার অব্যবহিত পরেই আবার ঘটে গুরু মহারাজের আবির্ভাব। স্নেহপূর্ণ স্বরে প্রিয় শিষ্যকে তিনি কহেন, “রামদাস, তোমার প্রস্তুতি-পর্ব সমাপ্তপ্রায়। আর যেটুকু বাকী আছে তাও এবার শেষ ক’রে ফেল। ঐশ কাঙ্গ শুরু করার আগে সারা দেশটাকে একবার ঘনিষ্ঠভাবে দেখে নাও। পদব্রজে বেরিয়ে পড়ো, প্রধান তীর্থগুলো দর্শন ক’রে এসো। এই সঙ্গে হৃদয়ে তোমার গ্রথিত হোক সারা ভারতের গর্মভূদ বাস্তব চিত্র।”

অতঃপর একদল সন্ন্যাসী সঙ্গীর সহিত রামদাস পরিব্রাজনে বাহির হন। উত্তরে হিমালয়-তীর্থ কেদারবদরী হইতে শুরু করিয়া দক্ষিণে রামেশ্বর ও সিংহল এবং পশ্চিমে দ্বারকা বৃন্দাবন হইতে শুরু করিয়া বারাণসী গয়া জগন্নাথধাম প্রভৃতি দর্শন করিয়া আবার পঞ্চবটিতে তিনি ফিরিয়া আসেন।

এবার শুরু হয় তাঁহার অধ্যাত্মজীবনের সর্বাপেক্ষা গুরুত্বপূর্ণ অধ্যায়। আচার্যের ভূমিকা গ্রহণ করিয়া রামাইং বৈষ্ণবধর্মের একটি নব সম্প্রদায় তিনি গাড়িয়া তোলেন। রামদাসী সম্প্রদায় নামে তাহা খ্যাত হইয়া উঠে।

রামদাস ও তাঁহার ধর্মান্দোলনের প্রকৃত মূল্যায়ন করিতে হইলে তখনকার মহারাষ্ট্রের রাজনৈতিক ও সামাজিক পশ্চাদ্গত জানিয়া নেওয়া দরকার। ইতিপূর্বে প্রায় তিনশত বৎসর কাল দাক্ষিণাত্য মুসলমান অধিকারে ছিল। চৌদ্দ শতক হইতে সতের শতক কাল অবধি দেখা যায়, আমেদনগর ও বিজাপুর এই দুইটি রাজ্য উত্তরাগত মুঘল শক্তির প্রতিরোধে ব্যস্ত। রামদাসের সময়ে দক্ষিণাঞ্চলে মুঘল শক্তির প্রধান কেন্দ্র ছিল আমেদনগর; সম্রাট ষষ্ঠ শেরশাহ ইতিমধ্যে এই গুরুত্বপূর্ণ নগরটি দখল করিয়া নিয়াছিলেন।

মুসলমান রাজাদের যুদ্ধ বিগ্রহ ও অত্যাচার মারাঠার জন-জীবনে আনয়ন করে ঘোরতর অশান্তি ও উপদ্রব। হিন্দুদের দেব-দেউলের উপর বিধর্মীদের কোনো শ্রদ্ধা ছিল না, সুযোগ পাইলেই দেববিগ্রহ তাহারা কলুষিত করিত, মঠ ও মন্দির করিত বিনষ্ট। ফলে হিন্দুদের মধ্যে দেখা দেয় হীনমস্ত ও অসহায়ের মনোভাব। সামরিক সংঘর্ষ প্রায়ই ঘটতে থাকে, ফলে বিস্তীর্ণ অঞ্চল পড়িয়া থাকে অনাবাদী অবস্থায়। দরিদ্র জনগণ ও চাষীরা পতিত হয় ঘোর সঙ্কটে। সরকারী ও বেসরকারী স্তরে উৎকোচ ও অশাস্তি ছনীতি চলিতে থাকে অবাধে। সমাজ-জীবন তাই ধীরে ধীরে হইয়া উঠে পঙ্গু ও নৈরাশ্রবাদী।

সব ক্রিয়ারই প্রতিক্রিয়া থাকে, মহারাষ্ট্রেও তাহার ব্যত্যয় দেখা যায় নাই। মারাঠার দূর দুর্গম স্থানগুলিতে মুঘলশক্তি তেমন দৃঢ় হইয়া বসিতে পারে নাই, এই সব স্থানে হিন্দু জাগৃতির চিহ্ন এবার দেখা যাইতে থাকে। এই নব জাগৃতির মুখপাত্র শিবাজী ভৌসলে। অসাধারণ নেতৃত্ব শক্তি, সংগঠন প্রতিভা ও রণচাতুর্য ছিল এই তরুণ নেতার। এই সঙ্গে ছিল ধর্ম-ভিত্তিক হিন্দুরাজ্য গঠনের মহান্ পরিকল্পনা।<sup>১</sup> সিদ্ধপুরুষ রামদাসের অধ্যাত্ম-প্রেরণা শিবাজীকে যোগাইয়াছিল নূতনতর সম্মীবনী-শক্তি ও উদ্দীপনা।

স্বামী রামদাসের সমকালীন মহারাষ্ট্রে পদ্ধারপুর অঞ্চলের বৈষ্ণব আন্দোলনের প্রভাবও বড় কম ছিল না। এই বৈষ্ণবেরা ছিলেন কৃষ্ণবিগ্রহ বিষ্ঠালজীর ভক্ত। অভ্যুপদ কীর্তন ও নাম প্রচারের মধ্য দিয়া মারাঠার জনজীবনকে অনেকাংশে ইহার আশ্রয় করেন, নূতনতর আত্মশক্তিতে উদ্বুদ্ধ করিয়া তোলেন।<sup>২</sup>

১ রানাডে : রাইজ অব্‌ দ্য মারাঠা পাওয়ার—পৃ: ২৭-৩৪

২ অনেকের ধারণা, মারাঠা বৈষ্ণব ও সাধক কবিরা মারাঠার জাতীয় অভ্যুদয়ে কোনো সাহায্য করেন নাই, তাঁহাদের দৈন্ত ও ত্যাগ ভিত্তিকা বরং দেশবাসীকে হীনমস্ত ও হীনবল করিয়াছে। কিন্তু রানাডে তাঁহার ‘রাইজ অব্‌ দ্য মারাঠা পাওয়ার’ গ্রন্থে প্রমাণ করিয়াছেন—এ ধারণা ভিত্তিহীন, এই সব বৈষ্ণব কবিরাই বরং মারাঠা জাগৃতির ভিত্তি গড়িয়া তোলেন। শ্রয় যত্ননাথ, কিনকেড, রেভারেন্ড এডওয়ার্ডস প্রভৃতি এক্ষেত্রে রানাডের মতবাদের লম্বর্ধক।

পঙ্কজপুরের বৈষ্ণবদের প্রধান ছিলেন জ্ঞানেশ্বর। ত্রয়োদশ খ্রীষ্টাব্দ তাঁহার অভ্যুদয় কাল। এই মহাপুরুষের লিখিত জ্ঞানেশ্বরী-গীতায় যোগ ও ভক্তিবাদের সমন্বয় দেখা যায়। নামদেব, তুকারাম প্রভৃতির উপর সাধক জ্ঞানেশ্বরের প্রভাব প্রচুর। জ্ঞানেশ্বরের পরে চতুর্দশ শতকে আবির্ভূত হন নামদেব। তাঁহার ভক্তিবাদের ধারা মারাঠা হইতে শুরু করিয়া পাঞ্জাব অবধি বিস্তারিত হয়।

সমর্থ রামদাস এবং ভক্ত তুকারাম প্রায় সমসাময়িক। ঐতিহাসিক তথ্যাদি হইতে দেখা যায়, কর্মক্ষেত্র ও বৈষ্ণবীয়তায় পাণ্ড্য থাকিলেও এই দুই মহাত্মা পরোক্ষভাবে উভয়ে উভয়কে সাহায্য করিয়াছিলেন। মারাঠার উজ্জীবনকে করিয়াছিলেন স্বরাসিত।

বারো বৎসর ব্যাপিয়া সমগ্র ভারত পরিত্রাজনের পরে স্বামী রামদাস ১৬৪৪ খ্রীষ্টাব্দে মহারাষ্ট্রে ফিরিয়া আসেন। দেশের যে চিত্র এই পরিত্রাজনের মধ্য দিয়া তাঁহার নয়ন সমক্ষে উদ্ঘাটিত হয় তাহা মর্মান্তিক। এই ধর্মধূত মহান্ দেশে ধর্মবোধ সেদিন অনেকাংশে স্তিমিত। বিধর্মীর প্রতাপের সন্মুখে দেশবাসী হারাইয়া বসিয়াছে তাহাদের আত্মবোধ, তাহাদের জাতীয় গৌরব। দেব-দেবীর মূর্তি নানা স্থানে হইতেছে কলুষিত। সমাজ হইতে নীতিবোধ প্রায় লোপ পাইয়াছে। দারিদ্র্যের নির্বাতনও মানুষের মনুষ্যত্বকে কম অবনমিত করে নাই। এই পরিস্থিতিতে সৎগুরুর নির্দেশ রামদাসের মানসপটে জাগিয়া উঠিল। নিজ দেশকে, লাক্ষিত পদদলিত মহারাষ্ট্রকে তিনি নির্বাচিত করিলেন তাঁহার কর্মক্ষেত্ৰরূপে। নূতনতর উজ্জীবন ও ধর্মরাজ্য সংস্থাপনের জন্ত হইলেন কৃতসঙ্কল্প।

নানা স্থান পরিভ্রমণের পর সাতারা অঞ্চলকে রামদাস বাছিয়া নিলেন তাঁহার কাজের প্রধান ক্ষেত্ররূপে। পশ্চিমঘাট পর্বতমালার কাছে—শস্ত্র-শ্রামল নদী-উপত্যকায় এক নয়নলোভন স্থান এই সাতারা। প্রাকৃতিক শোভায় ভরপুর—নদী, পাহাড় ও অরণ্যে ঘেরা এই অঞ্চলটিতে আসিয়া ভক্ত রামদাসের হৃদয় আনন্দে নাচিয়া উঠে। পাহাড়ের বকে বসানো, নিভৃতি ও শান্তির নীচে চাকল

গ্রাম। পাদদেশ দিয়া কীণকার্য্য এক তটিনী কুলকুল্লুরবে বহিয়া চলিয়াছে। এই গ্রামটির একপ্রান্তে কিছুকালের জন্য স্থাপিত হইল স্বামী রামদাসের সাধন-আশ্রম।

আশ্রমতো করা গেল কিন্তু আশ্রমের বিগ্রহ কই? ইষ্টদেবের বিগ্রহ স্থাপন না করা অবধি রামদাসের মনে শাস্তি নাই।

অল্পকাল মধ্যেই এ সমস্তার সমাধান হইয়া গেল। সেদিন গভীর রাতে ধ্যানাসনে বসিয়া স্বামী রামদাস এক অপূর্ব নির্দেশ পাইলেন। ইষ্টদেব রামচন্দ্র তাঁহাকে বলিতেছেন, “বৎস রামদাস, তোমার আশ্রম-মন্দিরে প্রবেশের জন্য যে আমি বহুকাল ধরে উৎসুক হয়ে আছি। তোমার স্নানের ঘাটের একপাশে নদীগর্ভে প্রোথিত রয়েছে আমার বিগ্রহ। কাল প্রভাতে এটিকে নদী থেকে উদ্ধার করো, স্থাপন করো তোমার আশ্রমে।”

শ্রীরামজী এই প্রস্তাববিগ্রহ পরদিনই নদী হইতে উঠাইয়া আনা হইল, স্বামী রামদাস পরম আনন্দে ইহার সেবা-পূজা শুরু করিলেন। কিছুদিন পর জাঁকজমক সহকারে মারুতিজীর একটি মূর্তিও এখানে স্থাপন করা হয়।

ছাকলের আশ্রমে রামদাস একাদিক্রমে বেশী দিন বাস করেন নাই। ইহার পর শিবধর নামক একটি অতি-নিভৃত স্থানে তিনি উপনীত হন। লোকালয় বর্জিত এই নির্জন অঞ্চলে প্রায় দশ বৎসর কাল অবস্থান করেন। বিশিষ্ট জীবনীকার ও শিষ্যদের মতে, এই স্থানটিতেই সমাপ্ত হয় রামদাসের অধিকাংশ জনপ্রিয় ধর্মসংগীত ও তত্ত্বগ্রন্থের রচনা।

অতঃপর রামদাস আর নিভৃতি বা অবকাশ খুঁজিয়া বেড়ান নাই। বিপুল উত্তম, কর্মশক্তি ও সৃজনী প্রতিভা নিয়া বাঁপাইয়া পড়েন ধর্ম সংগঠনের কাজে, মারাঠার জনজীবনে তোলেন অভূতপূর্ব আলোড়ন।

রামদাসের ব্যক্তিত্ব, আচার আচরণ ও ধর্মপ্রচার ছিল বড়ই আকর্ষণীয়। তত্ত্ব-শিষ্যগণসহ কোপীনধারী এই সর্বভ্যাসী সন্ন্যাসী



গ্রামে গ্রামে ঘুরিয়া বেড়াতেন। শাস্ত্রের ব্যাখ্যা বিশ্লেষণ আর ভজন কীর্তনে তাঁহার ধর্মসভা জমজমাট হইয়া উঠিত। রামদাস একাধারে যেমন ছিলেন ভাবুক ভক্ত, কবি ও কীর্তন গায়ক, তেমনি বেদ-বেদান্ত, পুরাণশাস্ত্র ও যোগ মার্গে ছিল তাঁর অনায়াস অধিকার। বিশেষ-করিয়া তাঁহার ভজন, কীর্তন ও ধর্মরাজ্য স্থাপনের আশ্বাস-বাণী শত-শত ভক্ত নরনারীকে উদ্বুদ্ধ করিত নব প্রেরণায়।

গ্রামের উচ্চ নীচ, শিক্ষিত অশিক্ষিত, ধনী নির্ধন সকলেই পরম উৎসাহে ভিড় করিত রামদাসের ধর্মসভায়। তাঁহার উজ্জ্বল ব্যক্তিত্বকে ঘিরিয়া নানা স্থানে গড়িয়া উঠিত সুসমৃদ্ধ ভক্তগোষ্ঠী। শুধু ভাবা-বেগের বহা উৎসারিত করিয়া, ভক্তদের হাসাইয়া কাঁদাইয়াই স্তম্ভ রামদাসের কর্তব্য শেষ হইত না, অসামান্য গঠন-প্রতিভা বলে অল্পকাল মধ্যে ভক্তদের নিয়া তিনি স্থাপন করিতেন এক একটি মঠ বা সাধন কেন্দ্র। ইষ্টদেব রামচন্দ্র আর মহাযোগী মারুতিজীর মূর্তির পূজা হইত সেখানে সাড়ম্বরে। এইভাবে এই মঠগুলিকে কেন্দ্র করিয়া বহিয়া চলিত নব ভক্তধর্মের স্রোতধারা।

গুরুজী রামদাসকে বর দিয়াছিলেন, ঋদ্ধি-সিদ্ধি দুই-ই তাঁহার করায়ত্ত হইবে। এবার সে বর কলিয়া উঠিতে থাকে। কয়েক বৎসরের মধ্যেই রামদাসী রামাইং সম্প্রদায়কে মহারাষ্ট্রের নানা অঞ্চলে ছড়াইয়া পড়িতে দেখা যায়। মঠ-মন্দিরও নির্মিত হয় অজস্র সংখ্যায়। সহস্র সহস্র মারাঠীর দৃষ্টিতে রামদাস গণ্য হন রামজীর শ্রেষ্ঠ ভক্তরূপে, মহাবীর মারুতিজীর অবতাররূপে।

রামদাসের জীবনসাধনায় ভক্তি, জ্ঞান ও কর্ম এই তিনটির সমন্বয় লক্ষ্য করা যায়। অবতার পুরুষ শ্রীরামচন্দ্রের উপাসনা ও অর্চনার কথা তিনি সারা জীবন ভরিয়া বলিয়া গিয়াছেন। আজো ষোড়শোপচারে এই ইষ্টদেবের পূজা তাঁহার সম্প্রদায়ে প্রচলিত। আবার প্রভু রামজীকেই তিনি স্থাপন করিয়াছেন পরম ব্রহ্মরূপে। সে স্থলে দেখা যায়, অদ্বৈতবাদের তত্ত্বও তিনি নিষ্ঠাভরে বিশ্লেষণ করিতেছেন। রামরাজ্য অথবা ধর্মরাজ্য স্থাপনার যে মহান ব্রত

তিনি গ্রহণ করেন তাহার মধ্য দিয়া ফুটিয়া উঠে ঐশ্বর্য কৰ্ম উদ্‌যাপনের আন্তরিক প্রয়াস। তাঁহার রচিত ভক্তিসংগীত ও ধর্মগ্রন্থগুলিও সেদিনকার জনজীবনে প্রবল উদ্‌দীপনার সৃষ্টি করে।

এই সময়ে মহারাষ্ট্রের পন্ধারপুরকে কেন্দ্র করিয়াও ভক্তিসাধনার স্রোত প্রবাহিত হইতেছিল। জ্ঞানেশ্বর, একনাথ, নামদেব, প্রভৃতি মহাত্মাগণ ছিলেন এই ভক্তিদ্বারার উৎস। মহারাষ্ট্রের প্রতি জনপদে ইহাদের প্রভাব বর্তমান ছিল, তাই রামদাসও এই প্রভাব হইতে মুক্ত থাকিতে পারেন নাই। তবে তাঁহার ভক্তির আন্দোলন ছিল পন্ধারপুর হইতে অনেকটা পৃথক। বিষ্ঠালজী বা কৃষ্ণবিগ্রহ তাঁহার ইষ্ট নয়, তাঁহার ইষ্ট হইতেছেন রামচন্দ্র। অবতাররূপী এই রামজীর পূজা ও তাঁহার ধর্মরাজ্য প্রতিষ্ঠার প্রয়াসই নিরন্তর তিনি করিয়া গিয়াছেন, আর রামজীর মধ্য দিয়াই সাধন জীবনের শেষে পৌঁছিতে চাহিয়াছেন সত্যম-শিবম-অদ্বৈতম—এ—অদ্বৈতব্রহ্মাণ্ডজ্ঞানে।

রামদাসের গ্রন্থাদি হইতে দেখা যায়, বেদান্তের অদ্বৈততত্ত্বের উপর তাঁহার একটা স্বাভাবিক প্রবণতা ছিল। মনে হয়, তাঁহার রামাইংগুরু ভক্তিবাদী হইয়াও অদ্বৈতবেদান্তে পারঙ্গম ছিলেন এবং তাঁহার প্রভাব শিষ্য রামদাসের উপর পতিত হয়। তখনকার দিনে শৃঙ্গেরী মঠে বহু সাধক অদ্বৈতবেদান্তী হইয়াও রামচন্দ্রের উপাসক ছিলেন। এমনও হইতে পারে, ইহাদের কাহারো সহিত বিশেষ ঘনিষ্ঠতা হইবার পর রামদাসের মধ্যে রামভক্তি ও অদ্বৈতবাদের এই সমন্বয় গড়িয়া উঠিয়াছিল। তাকেরুলী ও ছাকলের নির্জন আবাসে থাকার কালে রামদাস দীর্ঘকাল গভীরভাবে বেদান্ত, জ্ঞানেশ্বরী-গীতা ও যোগ-বাশিষ্ঠ রামায়ণ অধ্যয়ন করেন। স্বভাবতই এই সব ধর্মগ্রন্থের জ্ঞানমার্গীয় তত্ত্ব তাঁহার অধ্যাত্মজীবনে দৃঢ়রূপে প্রবিষ্ট হয় এবং উক্তর জীবনে তাঁহার ভক্তিবাদ অদ্বৈতবোধের দিকে ঝুঁকিয়া পড়ে।

অধ্যাত্ম-জীবনের উপাদান রামদাস যেখান হইতেই আহরণ করুন, নিজ মতবাদ ও তত্ত্বাদর্শকে তিনি যে একটি বিশিষ্ট রূপ দিতে

সক্ষম হন। প্রধানতঃ তাঁহাকে কেন্দ্র করিয়াই যে এই রামভক্তি বাদের পরমতত্ত্ব বিকশিত হইয়া উঠে, তাহাতে সন্দেহের অবকাশ নাই।

দার্শনিক ব্যাখ্যা অথবা তত্ত্ববাদ সম্পর্কে রামদাস বাহাই বলুন ব্যবহারিক জীবনে জনসাধারণের আচার্য ও উপদেষ্টারূপে তিনি রামভক্তি ও রাম উপাসনার উপরই বেশী জোর দিয়া গিয়াছেন তাঁহার সম্প্রদায়ের মঠ মন্দিরে ভক্তি সাধনা, পূজা অর্চনা ও নাম কীর্তনের প্রাধান্যই বেশী চোখে পড়ে। তাঁহার অজস্র ভক্তিগাথা রহিয়াছে ইষ্টের কৃপাভিক্ষা, শরণাগতি ও অনুশোচনার আকৃতি করুণাষ্টকের একটি পদে সাধক কবি রামদাস প্রভুর চরণে সখেণে নিবেদন করিতেছেন :

হে রাম, নিতি নিতিই যে হৃদয় আমার  
 যাচ্ছে জলে অমৃতাপের দহনে।  
 ঘোর চঞ্চল আমার এই মন,  
 আমি পারছিনে তাকে বশে রাখতে।  
 হে প্রভু, হে করুণাময়,  
 ছিঁড়ে ফেলো আমার এই মায়ার বন্ধন,—  
 যা সৃজন করে মরীচিকার মোহ।  
 এসো, এসো, আমার হৃদয় কুটিরে,  
 তোমা-হারা জীবনে এসেছে অবসাদের শূন্যতা,  
 তোমার আরাধনা বিনা কেটেছে মোর দিন,  
 বন্ধুজন আর বিত্তবিভবের মাঝে  
 নিজেকে হারিয়েছি ঈর্ষা আর স্বার্থান্ধতায়।  
 হে রঘুপতি, হে করুণাময়,  
 দাও আমার তোমার মনের উদারতা,  
 যেন অক্লেশে বিলিয়ে দিতে পারি আমার সর্বস্ব—  
 একান্ত বিশ্বাসে নিতে পারি তোমার চরণে ঠাই।  
 ইঞ্জিরের সেবার কি ক'রে পাবো পরমানন্দ ?

হে ৰঘুনাথ, তোমা বিনা  
আমি যে হয়েছি স্নিক্ত, হতভাগ্য ।  
হে প্রভু তাই আশিস্ মাগি চরণে—  
জীবন যেন মোর হয় ব্রহ্মময় ।<sup>১</sup>

অপর একটি সংবেদনময় প্রার্থনায় ৰামদাস তাঁহার শরণাগতি  
জানাইতেছেন :

হে প্রভু, কোটি কোটি জনম ধরে  
হৃদয় আমার যাচ্ছে জলে-পুড়ে ছাই হয়ে  
তাইতো হে কৃপালু ৰাম চাইছি তোমায়,  
বস্ত্রার বিপুল প্লাবনে ছড়িয়ে পড়ো আমার বুকে ।  
ছয়টা শত্রু ভেতর থেকে করছে প্রতিরোধ—  
ভেঙে চূরে দাও, ভাসিয়ে দাও তাদের ।  
হে ৰাম, তুমি বিনা কেই বা আছে আমার ?  
কেই বা জানে আমার মর্মভেদী হৃদশার কথা ?  
হে ৰাঘব, শ্রাস্ত ক্লান্ত আমি সাধনে সময়ে  
এসো, এসো প্রভু করো আমার পরিত্রাণ ।

আবার প্রাপ্তির পরমানন্দে উচ্ছল হইয়া দাস ৰামদাসকে আর  
একটি অভঙ্গপদে বলিতে শুনি :

হে দয়াল ৰঘুনাথ, হে আমার প্রভু,  
কত পাপই যে করেছি এ জীবনে—  
তার কোনটিই বা পায়নি তোমার ক্ষমা ?  
গুণরাশি তোমার খচিত রয়েছে  
‘অসীম আকাশের লক্ষ কোটি নক্ষত্রের মত—  
তার কোনটি রাখা যায় স্মৃতিপটে ?  
কি ক’রেই বা গুণবো তোমার অপার গুণ ?  
দীনের শরণ তুমি প্রভু, তুমি পরমাগতি—  
আর এই পরিচয়ই যে তোমার আসল পরিচয় ।

সুখ দিয়েছে তুমি, পরম সুখও চাই তোমার কাছে,  
এই কাঙালের বা কিছু আছে চাওয়া আর পাওয়া  
সবই যে তোমার জানা ।

অন্তর যে আমার দিয়েছে দানে ভরে  
হে প্রভু, হে রঘুনাথ, বলতো এ অভাগা—  
কি দিয়ে শুধবে তোমার ঋণভার ?

রামদাসের প্রধান গ্রন্থ ‘দাসবোধ’ তাঁহার অনুগামীদের কাছে গীতার মতো নিত্য পাঠ্য। এই গ্রন্থে ও অন্যান্য রচনায়<sup>১</sup> রামদাস ভক্তিমার্গের সাধককে শ্রবণ, স্মরণ, অর্চনা প্রভৃতি নয় প্রকার অনুষ্ঠানের উপদেশ দিয়াছেন। গুরুসেবা নামজপ ও নামকীর্তনের উপর রামদাসকে সর্বাধিক গুরুত্ব আরোপ করিতে দেখা যায়। তাঁহার মতে, ভক্তি মুক্তির মূলে রহিয়াছে সদগুরুর কৃপা। সদগুরুই আপন শক্তিবলে শিষ্যের অধিকারকে পরিশুদ্ধ করেন, প্রস্তুত করেন তাঁহাকে ঈশ্বরপ্রাপ্তির জ্ঞান। তিনি বলেন, গুরু সেবার মধ্য দিয়া শিষ্যের অহমিকা যেমন ক্ষীণ হইয়া আসে তেমনি নামিয়া আসে গুরুকৃপার অমিয়ধারা।

নামজপ ও কীর্তন সম্বন্ধে তাঁহার প্রসিদ্ধ রচনা ত্রীশ্লোক মনাচে-তে তিনি বলিয়াছেন :

হে মন, ভ্রান্ত বুদ্ধিবশে এই নামকে ক’রো না ত্যাগ,  
শ্রদ্ধাভরে নিরন্তর করো এর অনুধ্যান ।

১ সমর্থ রামদাস স্বামীর প্রধান রচনাগুলির নাম নিয়ে দেওয়া হইতেছে :

(১) দাসবোধ—৭৭৫২ কবিতা সংবলিত এই গ্রন্থটিকে রামদাসী সম্প্রদায়ের ভক্তজনরা সম্মান করিয়া বলেন ‘গ্রন্থরাজ’। (২) ত্রীশ্লোক মনাচে—মনকে বশে রাখার উপদেশ এই পদগুলিতে নিহিত। সাধুরা ভিক্ষা করার সময় এগুলি গাহিয়া থাকেন। (৩) করণাষ্টকে—অনুশোচনা ও প্রার্থনার ভরা এই সমস্ত শ্লোক সাধ্য ভক্তের সময় গীত হয়। (৪) রামদাসের রামায়ণ (সুন্দরকাণ্ড, বুদ্ধকাণ্ড ও কিষ্কিন্ধ্যা কাণ্ড)। (৫) শতক পঞ্চক ও ভূপালী নামক প্রার্থনামূলক অভঙ্গপদ।

যা কিছু দেখেছে এই প্রপঞ্চে,  
সবই রয়েছে বিধৃত, প্রভুর নামের বলে ।  
কোন কিছুই হয় না তুলনা এর সাথে ।

আপন ইষ্টনাম, রামনামের মাহাত্ম্য বর্ণনা করিতে গিয়া ভক্ত  
সাধক রামদাস প্রেমভরে কহিতেছেন :

ভজন ও জপের নাম তো রয়েছে অনেক,  
কিন্তু তাই, রামনামের তুল্য কোন্ নাম ?  
হীন আর দুর্ভাগা যারা  
কি ক'রে জানবে তারা এই পরম বস্তুর মহিমা !  
বাসুকীর হলাহল পান ক'রে  
পার্বতীনাথ শঙ্কর জপেছিলেন এই মহানাম,  
হয়েছিলেন তিনি মৃত্যুঞ্জয়—  
তবে ছার মনুষ্য কেন করবেনা জপ  
আমার প্রভুর এই অমৃতময় নাম ?

ভক্তি-মার্গীয় সাধনার প্রচারের সঙ্গে সঙ্গে বহুতর মঠ-মন্দিরের  
প্রতিষ্ঠা করেন রামদাস স্বামী । এইসব মঠকে তিনি পরিণত করেন  
তঁাহার ধর্মরাজের এক একটি সুদৃঢ় ঘাটিকূপে । ভক্তিদর্ম প্রচার  
করিলেও রামদাস কিন্তু অতিরিক্ত ভাবোচ্ছ্বাসের প্রশ্রয় কখনো দেন  
নাই । রামচরিত্রের সংযম, সত্যনিষ্ঠা ও শ্রায়পরতাকে সতত তিনি  
ভক্তদের নয়ন সমক্ষে তুলিয়া ধরিতেন । মঠ ও মন্দিরের মোহাস্ত  
বা পরিচালকদের করিতেন কঠোরভাবে নিয়ন্ত্রণ । একবার তঁাহার  
এক মঠের মোহাস্ত নীতিবিগর্হিত কোনো কাজ করেন । রামদাস  
এজ্ঞা তঁাহার শাস্তিবিধান করেন—ব্রোঘাত । অপর একজন  
মঠাধীশ উপযুক্ত প্রস্তুতির আগেই তঁাহার এক অমুগত ভক্তকে মন্ত্র  
প্রদান করেন । দীক্ষার আগে কেন সতর্কতা অবলম্বন করা হয়  
নাই, এই দোষে রামদাস মঠাধীশকে কঠোরভাবে প্রহার করেন ।  
কয়েকটি বিশিষ্ট কীর্তনিনী শিষ্যকে একবার তিনি হুশ্চরিত্রা স্ত্রীলোকের  
সঙ্গ করিতে দেখিতে পান । কীর্তনসভা হইতে ইহাদের তিনি তিন

বৎসরের জন্ত বহিষ্কৃত করিয়া দেন। রামদাসের মঠ-মন্দিরের এই নীতিগত আদর্শবাদ ও নিয়মশৃঙ্খলা মারাঠার পুনর্গঠনে ও আত্মিক শক্তির উজ্জীবনে কম সাহায্য করে নাই।

আচার্য জীবনের শুরু হইতেই রামদাসের কাছে আশ্রয় গ্রহণ করেন একদল সৎ ও ধর্মনিষ্ঠ গুরুগতপ্রাণ শিষ্য। ইহাদের মধ্যে প্রথম সারিতে রহিয়াছেন—কল্যাণ, শ্রেষ্ঠ (রামদাসের ভ্রাতা), উদ্ধব গোসাবি, দিবাকর, বেনাবাস্ট, আকাবাস্ট প্রভৃতি।

শিষ্য কল্যাণ শুধু ভাগ্য তিতিক্ষা ও সাধনার দ্বারাই গুরুর অনুগ্রহ লাভ করেন নাই, ডোমগাঁও মঠে রামদাসী সম্প্রদায়ের অন্যতম প্রধান মঠ স্থাপন করিয়া গুরুর আরক্ত মহান্ কার্যকে তিনি অনেকাংশে সফল করিয়া তোলেন।

কল্যাণ ছিলেন রামদাসের সর্বাপেক্ষা বিশ্বস্ত পরিকর। তাঁহার গুরুভক্তির একটি আখ্যায়িকা মহারাষ্ট্রে প্রচলিত আছে। রামদাস মাঝে মাঝে নানা অভিনব উপায়ে তাঁহার শিষ্য ও ভক্তদের ভক্তির দৃঢ়তা ও আনুগত্যের পরীক্ষা নিতেন।

একদিন শিষ্যদের তিনি নিকটে ডাকিলেন। হাতে একটি তরবারি নিয়া গভীর স্বরে কহিলেন, “ভ্রাতৃ, আজ থেকে কেউ আর আমার ভোরবেলার ধ্যানজপের পর যেন প্রণাম ক’রো না। যে করবে, আমি তার মস্তক ছেদন করবো। রামদাস কোনো মানুষের সঙ্গেই যেন সহ্য করিতে পারিতেছেন না। সকলেই মহা শঙ্কিত। স্বামীজী মহারাজকে তাঁহারা ষতটা পারেন এড়াইয়া চলিতেছেন।

কয়েকদিন পরে রামদাস আশ্রম ত্যাগ করিলেন। পরনে মাত্র একখানি কোপীন, হাতে একটি তীক্ষ্ণ তরবারি। এই বেশে তিনি প্রবেশ করিলেন নিকটস্থ গহন অরণ্যে। ইতিপূর্বে শিষ্যদের শাসাইয়া গিয়াছেন, “সাবধান, কেউ যেন এই নির্জনবাসের সময় আমার সামনে না যায়, আর আমার চরণ স্পর্শ না করে।”

আশ্রমিকরা তো ভয়ে জড়োসড়ো। কেহই তাঁহার সঙ্গে নিতে সাহসী হইলেন না। চারিদিকে সংবাদ রটিয়া গেল, স্বামী রামদাস

পাগল হইয়া গিয়াছেন। একথা অচিরে স্বামীজীর শিষ্য ভোমগাঁও-এর মোহান্ত কল্যাণের কানে গেল। তৎক্ষণাৎ ব্যস্ত-সমস্ত হইয়া তিনি ছুটিয়া আসিলেন আশ্রমে। কহিলেন, “এ কেমনতরো কথা? স্বামীজী মহারাজ একলা অরণ্যে বাস করছেন, আর তোমরা কেউ তাঁর সঙ্গে গেলে না? আমরা থাকতে তাঁর সেবার ব্যবস্থা হবে না? বেশ, তোমরা না যাও আমি যাবো সেখানে।”

“কিন্তু ভাই, খোলা তলোয়ার নিয়ে স্বামীজী বনে বনে ঘুরে বেড়াচ্ছেন, কেউ প্রণাম করতে গেলেই নিশ্চয় হবে তার শিরচ্ছেদ।” আশ্রমের একজন সতর্ক করিয়া দেয়।

কল্যাণ উত্তরে বলেন, “বেশ তো, গুরু মহারাজের সেবার এগিয়ে যাবার কলে যদি তাঁর হাতে আমার প্রাণ যায়, তবে তা হবে আমার পরম সৌভাগ্য।”

আত্ম বলিদানের জন্ত প্রস্তুত হইলেন কল্যাণ। রক্ত-চন্দন ললাটে লেপন করিলেন, মুখে গুঁজিয়া দিলেন পর্ণপত্র, তারপর গুরুর নিকট উপস্থিত হইলেন করজোড়ে।

রামদাস স্বামী প্রথমে স্নোহ-কষায়িত নেত্রে, ক্রুদ্ধস্বরে বেশ খানিকটা তর্জন-গর্জন করিলেন, বার বার আন্দোলিত করিলেন তাঁহার তরবারি। কল্যাণ কিন্তু নির্বিকার। গুরু উদ্গাদই হোন আর যা-ই হোন, তিনি তাঁহার চরণে প্রণাম নিবেদন করিবেনই, তাঁহার সেবার হইবেন তৎপর।

মুহূর্তমধ্যে রামদাস মহারাজের ক্রোধের অভিনয় বন্ধ হয়। হাতের তলোয়ার দূরে নিক্ষেপ করিয়া পরম স্নেহে কল্যাণকে করেন আলিঙ্গন। ভাব-বিস্মল কণ্ঠে কহেন, “বৎস, তোমার মতো বীর আত্মোৎসর্গে সদা প্রস্তুত শিষ্যই যে আমার চাই। তাহাড়া, কি ক’রে হবে প্রভু রামজীর ধর্মরাজ্য স্থাপন?”

নীলোপন্থ নামে রামদাসজীর এক গৃহী শিষ্য ছিলেন। একবার পন্ডিতাজনের পথে ভক্ত সঙ্গে স্বামীজী তাঁহার গৃহে উপস্থিত হন। নীলোপন্থ তখন গ্রামের বাহিরে কি কাজে গিয়াছেন। - তাঁহার পরী



নিরুবাঈ ব্যস্ত-সমস্ত হইয়া উঠিলেন। স্বামীজী ও তাঁহার সঙ্গীদের জন্ত তাড়াতাড়ি কিছু ভোজনের ব্যবস্থা করা চাই। এ অঞ্চলে উপযুগুপরি কয়েকদিন ঝড়-জল হইয়া গিয়াছে, ঘরে জ্বালানী কাঠ এক টুকরাও অবশিষ্ট নাই। অথচ স্বামীজী মহারাজকে বেশীক্ষণ ধরিয়া রাখা যাইবে না, এখনি গ্রামান্তরে যাটবার জন্তে তিনি তাড়া লাগাইতেছেন।

নিরুবাঈর মাথায় জ্বালানির এক বিকল্প বাহির হইল। তৎক্ষণাৎ নিজের তোরঙ্গ খুলিয়া জামা কাপড় শাড়ী ও মূল্যবান শাল প্রভৃতি স্তূপীকৃত করিলেন, চুকাইয়া দিলেন উম্মুনে। জ্বালানিরূপে এগুলি ব্যবহার করিয়া পরমানন্দে প্রস্তুত করিলেন স্বামীজীর আহাৰ্শ।

কিছুকাল পরেই নীলোপস্থ ঘরে কিরিয়া আসেন। স্বামীজী মহারাজকে গৃহে পাইয়া তাঁহার আনন্দের আর সীমা নাই। বিদায় কালে স্বামী-জী উভয়ে ভক্তিভরে গুরুর চরণে প্রণাম করিতেছেন, এমন সময় রামদাসজী প্রসন্ন কণ্ঠে কহিলেন, “নীলোপস্থ, তুমি ভাগ্যবান, এমন সাধ্বী জী তোমার ঘরে রয়েছে। খোঁজ লিয়ে ছাখো, আমার আহাৰ্শ তৈরি করতে গিয়ে মাতাজী নিরুবাঈ তোমাদের মূল্যবান পরিচ্ছদ সব জালিয়ে দিয়েছে। ভালোই করেছে, প্রপঞ্চের মায়া কিছু কেটেছে।”

নীলোপস্থ তো মহাখুশী। যুক্তকরে কহিলেন, “প্রভু, শত শত ভক্ত শিষ্য আপনার সেবার জন্ত প্রাণপাত করছে। নিরুবাঈ সে তুলনায় তেমন কি আর করেছে? যাক, যাবার আগে আপনি আমাদের আশীর্বাদ করুন। আপনার আশীর্বাদই যে হবে আমাদের পরম পাথের।”

বুলি হইতে রামদাসজী একটি ভাব তুলিয়া নিলেন, নীলোপস্থের হাতে এইটি দিয়া কহিলেন, “বৎস, নাও, এই রইলো আমার আশীর্বাদ। আমি জানি, দীর্ঘদিন তোমরা অপূত্রক রয়েছে। আমার বরে মাতাজী নিরুবাঈর কোল জুড়ে আসবে একটি শিশুপুত্র। প্রভু রামজীর প্রতি থাকবে তার অচলা ভক্তি।”

অতঃপর সঙ্গীগণসহ স্বামীজী মহারাজ ধীরে ধীরে সেখান হইতে নিজ্জাক্স হইলেন। যথাকালে নিরুবাঙ্গি একটি পুত্র সন্তান লাভ করেন। উত্তরকালে এই পুত্র রামদাস মহারাজের কাছে দীক্ষা লাভ করিয়া ধন্য হয়।

ভক্তবীর কল্যাণের গুরুভক্তির আরো একটি কাহিনী রহিয়াছে। সেবার রামদাস মহারাজ স্থির করিলেন, কিছুদিনের জন্ত নির্জনবাসে যাইবেন এবং একটি নিগূঢ় সাধনা সেখানে সমাপ্ত করিবেন। নদীর ওপারে রহিয়াছে এক দূর বিস্তারী অরণ্য, ইহারই এক কোণে পর্ণকুটির বাঁধিয়া স্বামীজী ধ্যানস্থ হইলেন।

কয়েকদিন পরেই ডোমগাঁও হইতে কল্যাণ সেখানে আসিয়া উপস্থিত। গুরুদেবের সঙ্কল্পের কথা শুনিয়া তিনি তো মহা চিন্তিত। বুঝিলেন, একান্তে সাধনভঞ্জন তাঁহার হয়তো ঠিকই চলিয়াছে, কিন্তু তাঁহার নিত্যকার আহাৰ্যের ব্যবস্থা কি? এজন্ত নিশ্চয় তাঁহাকে কষ্ট পাইতে হইতেছে।

কল্যাণ স্থির করিলেন, এখন হইতে কিছুদিন একবার করিয়া তিনি নদীর ওপারে স্বামীজীর ধ্যানকুটিরে যাইবেন, নিত্যকার খাবার দিয়া আসিবেন।

আগের দিন রাত্রে এ অঞ্চলে বর্ষার ঢল নামিয়াছিল। আশ্রমের সম্মুখস্থ ময়না নদী তাই ফীতকায়া হইয়া উঠিয়াছে, স্রোত বহিয়া চলিয়াছে খরবেগে। গুরুগতপ্রাণ কল্যাণ মোটেই দমিবার পাত্র নন, আহাৰ্যের পাত্র মাধায় বাঁধিয়া নিলেন, তারপর, 'জয় জয় রঘুবীর, জয় সমর্থ রামদাস স্বামী, বলিয়া বর্ষা-প্রাবিত নদীগর্ভে দিলেন ঝাঁপ। ওপারে গিয়ে অনেক খোঁজাখুঁজির পর গুরুজীর সন্ধান তিনি পান, সম্মুখে দাঁড়াইয়া সমাপ্ত করান তাঁহার ভোজন। রামদাসজীর অরণ্য-বাসের প্রতিটি দিন কল্যাণকে এই খরস্রোতা বিপজ্জনক নদী সাঁতারাইয়া পার হইতে হইত। হুমুমন্ত স্বামীর রামদাস-চরিতে সমর্থ রামদাস স্বামীর বহুতর যোগবিভূতির বর্ণনা রহিয়াছে। ইহাদের একটি শিষ্ট-প্রধান কল্যাণ সম্পর্কিত।

সেদিন গভীর রাত্রি অবধি স্বামীজী মহারাজ কতকগুলি অতঃ-পদ রচনা করিয়াছেন। শিষ্য-সেবকদের অনেকেই তখন নিদ্রায় অভিভূত। পান-সুপারী চৰ্ণনের অভ্যাস স্বামীজীর বরাবরই ছিল। সেবকদের ডাকিয়া তুলিয়া কহিলেন, “জ্যাথো তো, কোঁটার ভেতরে পান-সুপারী আছে কিনা। খানিকটা না চিবুতে পারলে আর ভালো লাগছে না।”

খুঁজিয়া দেখা গেল, কোঁটার সুপারী যথেষ্টই আছে কিন্তু পান একটিও নাই। “পান ছাড়া শুধু সুপারী কি ক’রে খাওয়া যায়—” এই বলিয়া রামদাস মহা হৈ-চৈ তুলিয়া দিলেন।

এত রাত্রে পাহাড়ে পান কোথায় পাওয়া যাইবে? যদি সংগ্রহ করিতেই হয়, নিচে নামিয়া গ্রামের অভ্যন্তরে যাইতে হইবে, যদি কোনো গৃহস্থ বাড়িতে সন্ধান মিলে। সেবকেরা সবাই এ উহার মুখ চাহিতেছেন, কিন্তু কল্যাণ তখনি উঠিয়া দাঁড়াইলেন। করজোড়ে কহিলেন, “প্রভু আপনি কিছুকাল অপেক্ষা করুন। আমি নিচের গ্রাম থেকে এখনি কয়েকটি পান সংগ্রহ ক’রে আনছি।”

একথা বলার সঙ্গে সঙ্গে অন্ধকার পাহাড়ী পথ দিয়া তিনি ক্ষুণ্ণ-পদে নিচে নামিতে লাগিলেন।

কয়েক মিনিট পরেই শোনা গেল কল্যাণের আর্ত চীৎকার। একটি মিশ কালো কেউটে সাপের গায়ে পা দিতেই তৎক্ষণাৎ উহা তাহাকে ছোবল মারিয়াছে। রামদাস ও শিষ্য সেবকেরা মশাল নিয়া তখনি সেখানে ছুটিয়া গেলেন। সর্পদষ্ট কল্যাণ তখন ভূমিতে লুটাইয়া পড়িয়াছে। চোখে মুখে অসহ যন্ত্রণার ছাপ। মুখ দিয়া অবিরাম কেনা নির্গত হইতেছে।

রামদাস হাঁটু গাড়িয়া শিষ্যের সন্মুখে বলিয়া পড়েন। অক্ষুট স্বরে মন্ত্র উচ্চারণ করিয়া বার বার কল্যাণের দেহে করেন কর-সঞ্চালন, তারপর স্নেহপূর্ণ স্বরে বলিতে থাকেন, “বৎস কল্যাণ, এবার ওঠো—ওঠো।”

অল্পকাল মধ্যেই কল্যাণ চোখ মেলিয়া তাকাল এবং বীরে বীরে

বসেন। বাহুজ্ঞান কিরিয়া পাইয়া আবার উজ্জত হন গুরু মহারাজের পান সংগ্রহের জন্ত।

সপ্রশংস দৃষ্টিতে শিষ্যের দিকে চাহিয়া গুরুজী বলেন, “বৎস, আর তোমায় কোথাও যেতে হবে না। এবার আশ্রমে কিরে চল।”

পথ চলিতে চলিতে একটি তরুণ শিষ্য মুহূষ্মরে মস্তব্য করেন, “এত গভীর রাতে এভাবে একলা এমন ক’রে চলে আসাটা কল্যাণের উচিত হয় নি।”

রামদাস স্বামী সহাস্ত্রে উত্তর দেন, “জাখো, যা ঘটেছে রামজীর কৃপাতেই ঘটেছে। আমরা নিমিত্ত মাত্র। রামজী আমায় ইঙ্গিত দিয়েছিলেন, কল্যাণের আয়ু আর নেই।”

“সেকি প্রভু, তা জেনেও আপনি এই অন্ধকারের ভেতর বনপথে ওকে যেতে দিলেন?” সৰিস্বয়ে প্রশ্ন করেন এক সেবক।

“সর্পাঘাতে ওর জীবনাস্ত হবার কথা। অথচ ঈশ্বরের কাজে ওকে অনেক কিছু করতে হবে। তাইতো পান-সুপারীর জন্ত চৌচা-মেচি ক’রে ওকে পথে নামালাম। কালসাপ ওকে দংশন করবে তা আমি জানতাম। আমার কাছাকাছি থাকে কালে এই দুর্ঘটনা হয়ে ভালোই হলো। রামজীর কৃপায় ওকে বাঁচাতে পারলাম।”

রামদাস স্বামীর অশ্রুতম জীবনীকার ভীমস্বামী শিরগাত্কার একটি মনোরম আখ্যায়িকা বর্ণনা করিয়াছেন—

সেবার বারাগনীর এক প্রখ্যাত পণ্ডিত ঘুরিতে ঘুরিতে মহারাজে আসিয়া উপনীত হন। ইনি একজন প্রসিদ্ধ বিচার-মন্ত্ৰ, যেখানেই যান সোৎসাহে সাধুদের তর্কযুদ্ধে আহ্বান করেন। আত্মবিশ্বাস ইহার অত্যন্ত বেশী। সদাই গলদেশে উপবীতের সঙ্গে প্রকাশে ঝুলানো থাকে একটি তীক্ষ্ণ ছুরিকা, দস্তভরে এটি সবাইকে দেখাইয়া বলেন, “শাস্ত্র বিচারে যখনি কেউ আমার পরাস্ত করবে, তখনি তার সম্মুখে এই ছুরিকা দিয়ে নিজের হাত দিয়ে আমি কেটে কেলেবো আমার জিহ্বা।”

মহারাত্রে লোকের ঘরে ঘরে তখন রামদাস স্বামীর ‘দাসবোধ’ পঠিত হয়, স্বামীজীর বিজ্ঞাবজ্ঞা ও সাধন-বিভূতির প্রসিদ্ধিও নবাগত পণ্ডিতটি শুনিয়েছেন। একদিন তিনি সদলবলে, ছাকলে আসিয়া উপস্থিত। সংবাদ দিলেন, স্বামীজীর সহিত অবিলম্বে তিনি তর্কদ্বন্দ্বে অবতীর্ণ হইতে চান।

রামদাস ব্যস্ত-সমস্ত হইয়া ভক্ত শিষ্যদের কহিলেন, “যাও, যাও, এখনি তোমরা ঐ মহাত্মাকে সসম্মানে আশ্রমে নিয়ে এসো। মশাল আর বাতলাও সঙ্গে নিতে ভুলো না। বারাণসীর এমন একজন কৃতী পণ্ডিত! দেখো, কোনো দিক দিয়ে যেন তাঁর অমর্যাদা না হয়।”

সাড়ুঘরে শোভাযাত্রা করিয়া বারাণসীর তর্কশূরকে আশ্রমে আনয়ন করা হয়। রামদাস স্বামীজী স্বয়ং অগ্রসর হইয়া তাঁহাকে অভ্যর্থনা ও অভিবাদন জ্ঞাপন করেন। কিন্তু স্বামীজীর অভিবাদনের দিকে পণ্ডিতের কোনো লক্ষ্যই নাই। দর্পভরে কহেন, “আমার সময় অতি মূল্যবান। আর বিলম্ব না ক’রে, আপনি আমার প্রশ্ন-গুলোর উত্তর দিন, অবশ্য যদি সমর্থ হন।”

রামদাস সহাস্ত্রে কহিলেন, “বিজ্ঞা মানেই সেই পরমবস্ত্ত বা হৃদয় কন্দরকে আলোকিত করে। তবে শাস্ত্রপারঙ্গম হয়েও আপনি এমন অন্ধকারে ডুবে রয়েছেন কেন, বলুন তো?”

রোষে পণ্ডিতের চুই চোখ জলিয়া উঠে, হুক্কার দিয়া বলেন, “বটে, এতো ঔদ্ধত্য তোমার? এখানে কার সম্মুখে দাঁড়িয়ে তুমি কথা বলছো, জানো?”

“খুব জানা আছে, পণ্ডিতবর। এবার একটু অনুগ্রহ ক’রে আপনি আপনার শাস্ত্রভক্তের প্রশ্ন উত্থাপন করুন, বশ্যবশ্ত সব উত্তর এখনি পাবেন।” সবিনয়ে নিবেদন করেন রামদাস।

ক্রুদ্ধ উত্তেজিত পণ্ডিত তাঁহার প্রশ্নবাণ নিক্ষেপ করিলেন। সঙ্গে সঙ্গে স্বামী রামদাস প্রদর্শন করিলেন তাঁহার এক বোগবিভূতি। বহুলোক তাঁহাদের সম্মুখে ভিড় করিয়া আছে। এই ভিড়ের ভিতর হইতে একটি নিম্নশ্রেণীর অর্ধশিক্ষিত মানুষকে রামদাস কাছে ডাকিয়া

নিলেন। কিছুক্ষণ একদৃষ্টে তাহার দিকে দৃষ্টি নিবদ্ধ রাখিয়া তাহার মধ্যে করিলেন শক্তি সঞ্চালন। এবার দৃঢ় কণ্ঠে দিলেন নির্দেশ, “বৎস, পণ্ডিতজীর সব ক’টা শাস্ত্রীয় প্রশ্নের যথাযথ উত্তর তুমি দিয়ে দাও।”

সর্বসমক্ষে ঘটিতে দেখা যায় এক অবিখ্যাত কাণ্ড। অর্ধশিক্ষিত লোকটির মুখ দিয়া অবিরলধারে নিঃসৃত হইতে থাকে শাস্ত্রের নানা ছুরহ তর্কের ব্যাখ্যা-বিশ্লেষণ। বারাণসীর পণ্ডিত মহারাজ তো বিস্ময়ে হতবাক। ইতিমধ্যে তিনি বুঝিয়া নিয়াছেন, রামদাস একজন সিদ্ধ মহাত্মা। অলৌকিক প্রজ্ঞা এবং অলৌকিক শক্তির তিনি অধিকারী। এ হেন ব্যক্তির সমক্ষে বিচার্য দম্ভ প্রকাশ করিয়া পণ্ডিতজী মারাত্মক ভুল করিয়াছেন।

এবার রামদাসের চরণে পতিত হইয়া বার বার তিনি ক্ষমা ভিক্ষা মাগিতে থাকেন। নিজের জিহ্বা কর্তনের জ্ঞাণ্ড উগ্ৰত হন।

উপবীতে ঝুলানো তীক্ষ্ণ ছুরিকাটি তৎক্ষণাৎ দূরে নিক্ষেপ করিয়া রামদাসজী পণ্ডিতকে কহিলেন, “আপনাকে অনেক আগেই আমি ক্ষমা করেছি পণ্ডিতবর। মনে রাখবেন, আপনার জিহ্বা, আপনার দেহ, সবই রামজীর। ছেদন করতে হয় তিনি করবেন। আপনার দেহ-মন-আত্মা কোনো কিছুই ওপরই তো আপনার অধিকার নেই। ভালোই হলো, আপনার দর্প এবার ভূমিসাৎ হলো, এবার সত্যকার বিজ্ঞা এলো আপনার আধারে।”

এই পণ্ডিত অতঃপর দীনভাবে রামদাসের শিষ্যত্ব গ্রহণ করেন। বারাণসীতে কিরিবার সময় সাগ্রহে রামদাসের রচনা দাসবোধের একটি প্রতিলিপি তিনি সঙ্গে নিয়া যান।

সিদ্ধপুরুষ বলিয়া রামদাসের তখন খ্যাতি রটিয়াছে; একটি সুসমৃদ্ধ ভক্তিবাদী সম্প্রদায়ের নেতা রূপেও মহারাষ্ট্রে তাঁহার বিরাট মর্যাদা। এই সময়ে এক শুভলগ্নে রামদাসের সহিত মিলন ঘটে রাজা শিবাজী ভোঁসলের। এই মিলন যেন মণিকাঞ্চনের সংযোগ। রামরাজ্য, ধর্মরাজ্য, স্থাপনের যে স্বপ্ন রামদাস এতদিন দেখিয়া

আসিতেছেন, যে স্বপ্নকে রূপায়িত করার জ্ঞান জীবন উৎসর্গ করিয়াছেন, রাজা শিবাজী হন সেই মহান্ ঐশ কর্মের ধারক ও বাহক। এই দুই ব্যক্তিত্বের মিলনে সারা মারাঠার প্রবাহিত হয় আত্মিক শক্তি ও ক্ষাত্রশক্তির যুগ্মধারা। সারা ভারতেও ইহার ফল হয় সুদূরপ্রসারী। এক ও অখণ্ড ধর্মরাজ্যের বিপুল সম্ভাবনার আশা ছড়াইয়া পড়ে দেশের দিকে দিকে।

শিবাজীর অভ্যুদয়ের দিকে স্বামী রামদাস নিয়ত তাঁহার দৃষ্টি নিবদ্ধ রাখিয়াছেন। লক্ষ্য করিয়াছেন ঔরংজেবের নগণ্য ‘পার্বত্য মুষিক’ শিবাজী ভৌসলে ধীরে ধীরে গড়িয়া তুলিয়াছেন একটা সুদৃঢ় স্বাধীন রাজ্যের বনিয়াদ। শুধু তাই নয় এই রাজ্য বাহাতে ধর্মধৃত হয়, উচ্চাদর্শে অমুপ্রাণিত হয়, সেজ্ঞা তাঁহার ব্যাকুলতার সীমা নাই। অন্তরে অন্তরে রামদাস বুঝিয়া নিয়াছেন, শিবাজীকে তাঁহার সাহায্য নিতেই হইবে, তাঁহার কাছে আসিতেই হইবে। কিন্তু এখনই নয়, আরো কিছুকাল রামদাসকে অপেক্ষা করিতে হইবে, লগ্ন সমাগত হইলেই শিবাজী আকুল আগ্রহ নিয়া ছুটিয়া আসিবেন, গ্রহণ করিবেন তাঁহার পরমাশ্রয়।

সৈন্যবল ও রাজ্যপরিধির বিস্তারের সঙ্গে সঙ্গে শিবাজী ভৌসলের অন্তরেও জাগিয়াছে পরম কল্যাণের ভাবনা। আত্মিক উজ্জীবনের জ্ঞান তিনি ব্যগ্র হইয়া উঠিয়াছেন। যখন যে সাধু মহাত্মার সন্ধান পান, সাগ্রহে তাঁহাকে দর্শন করেন, সাধ্যমতো করেন সেবা পরিচর্যা। পরিব্রাজনরত সাধু-সন্ন্যাসী হইতে শুরু করিয়া পঙ্কজপুরের সিদ্ধ তুকারামজীর সঙ্গ, কোনো কিছুই শিবাজী বাদ দেন নাই। কিন্তু মনের মানুষের সন্ধান, চিহ্নিত সঙ্গুরুর সন্ধান, এখনও তিনি প্রাপ্ত হন নাই।

রামদাস স্বামীর আদর্শ ও সংগঠনের নানা সংবাদ শিবাজী রাখেন, তাঁহার মাহাত্ম্য ও ষোণৈশ্বর্ষের খ্যাতিও তাঁহার অজানা নয়। এবার এ মহাপুরুষের আশ্রয় গ্রহণের জ্ঞান অন্তর তাঁহার বড় ব্যাকুল হইয়া পড়িয়াছে। রামদাস তখন কোনো মঠেই স্থায়ীভাবে

বাস করিতেন না, স্বেচ্ছামতো ঘুরিয়া বেড়াইতেন। তাই কিভাবে কোথায় মহাত্মার দর্শন করা যায় শিবাজী প্রায়ই ভাবিতেছিলেন।

নরসোমল্ নাথ নামে শিবাজীর এক কর্মচারী সেবার খবর দেন, —স্বামীজী এখন ছাকলের মঠে অবস্থান করিতেছেন। কয়েকজন পার্শ্বরক্ষী নিয়া শিবাজী তথনি সেখানে ছুটিয়া যান। কিন্তু সাক্ষাৎ হইল না। শুনিলেন, রামদাস স্বামী ইতিমধ্যে সে স্থান ত্যাগ করিয়া অন্ত্র চলিয়া গিয়াছেন।

ছাকলের মঠটি ছোট হইলেও বড় মনোরম। শিবাজী সাধুদের জিজ্ঞাসা করিলেন, কিভাবে কাহার আশ্রুকূল্যে, এই সুন্দর মঠটি নির্মিত হইয়াছে?

সাধুরা সবিস্ময়ে কহেন, “সে কি মহারাজ, আপনি কি জানেন না, এটি যে আপনার প্রদত্ত অর্থেরই তৈরি হয়েছে। কয়েক বৎসর আগে পুনাতো, আপনার পুরোহিতের ভবনে গিরি গোসাবি নাসিথর নামে এক কীর্তিনিয়া রামলীলা কীর্তন করছিলেন। কীর্তন শুনে খুশী হয়ে আপনি তাঁকে কিছু অর্থ দান করতে চান। ঐ কীর্তিনিয়া রামদাস মহারাজের একজন পরম ভক্ত। তিনি অমুরোধ জানান—মহারাজের প্রতিশ্রুত অর্থ যেন রামদাস স্বামীজীকেই দেওয়া হয় ছাকলের প্রস্তাবিত রামমন্দির নির্মাণের জন্ত। এটিই তো সেই মন্দির। আপনার সরকার থেকে তিন শত স্বর্ণমুদ্রা দেওয়া হয়েছিল এই পবিত্র কাজের জন্ত।”

এ সংবাদে শিবাজী হুগু হইলেন। মন্দিরের চারপাশে ঘুরিয়া দেখিলেন, নদীর খরস্রোত উহার ভিত্তির দিকে অগ্রসর হইতে চাহিতেছে। সরকারী পূর্ত অধিকর্তাকে ডাকিয়া তথনি তিনি হুকুম দিলেন, “যে কোনো উপায়ে এই নদীর স্রোতধারাকে ঘুরিয়ে দাও, স্বামীজীর এই মন্দিরকে রক্ষা করো। এ জন্ত যে কোনো অর্থব্যয়ে কার্পণ্য করো না।”



নির্দেশমতো কার্য সম্পন্ন হইতে বিলম্ব হয় নাই। কলে ছাকলের ঐ মন্দির ধ্বংসের হাত হইতে রেহাই পায়।

রামদাস স্বামীর কাছে মহারাজ শিবাজীর সব সংবাদই বখাসময়ে পৌঁছিল। ইহার কিছুদিন পরে শিবাজী মাহুলীতে একটি ধর্মাহুষ্ঠানে বোগ দিতে গিয়াছেন, সেখানে এক শুভ মুহূর্তে তাঁহার হাতে আসিল রামদাস স্বামীর এক ক্ষুদ্র লিপি। এ লিপি পাইয়া রাজা মহা উৎফুল্ল। সঙ্গে সঙ্গে মহাত্মাকে উত্তর দিলেন :

“হে মহাতাপস, আমি আপনার চরণে অপরাধী। আপনার হৃদয়ে রয়েছে অসীম করুণা—আপনার আশিস্পূত লিপি আমার ভরপুর ক’রে দিয়েছে পরম আনন্দে। কি ভাষায় আমি তার বর্ণনা দেব? আপনি কৃপা ক’রে আমার গুণগান করেছেন, কিন্তু আমি জানি, আমি মোটেই তার উপযুক্ত নই। বহুদিন বাবৎ আপনার দর্শনের অভিলাষী রয়েছি, এবং সুযোগ পোলে এখনই আমি উপস্থিত হতে পারি আপনার সকাশে। হে প্রভু, আপনি কি আমায় গ্রহণ করবেন? আমার তৃষ্ণা কি করবেন দূর?”

এই পত্র পাঠাইয়া দিয়া পরদিনই শিবাজী তাঁহার রক্ষীদল নিয়া উপনীত হন ছাকলে। সেখানে গিয়া শুনিতে পান, রামদাস মহারাজ তখন সিংগন-বাড়িতে অবস্থান করিতেছেন। মঠের সাধুরা তাঁহাকে বলেন, “মহারাজ, এই সময়ে স্বামীজীর কাছে আপনার যাওয়া ঠিক হবে না। কারণ, এখন তিনি হনুমানজীর মন্দিরে একটি বিশেষ পূজা অহুষ্ঠানে ব্যস্ত। পূজা অর্চনা সমাধা ক’রে স্বামীজী মহারাজ নিজের হাতে বহুতর ভোগরাগ প্রস্তুত করবেন। তারপর মারুতিজীকে তা নিবেদন ক’রে দিনশেষে বসবেন প্রসাদ গ্রহণের জন্ত। আপনি বরং পরে আর কোনোদিন তাঁর সঙ্গে সাক্ষাৎ করুন।”

শিবাজী একথা মানিলেন না। কহিলেন, “হৃদয় বড় ব্যাকুল হয়ে পড়েছে, আর ধৈর্য ধারণ করা আমার পক্ষে সম্ভব নয়। তা-ছাড়া, আজ তো বৃহস্পতিবার—গুরুবার, এই শুভদিনেই স্বামীজীকে আমি দর্শন করবো।”

রক্ষীদল পশ্চাতে রাখিয়া তাড়াতাড়ি তিনি অগ্রসর হন। দুইজন পার্শ্বচর নিয়া সিংগন-বাড়ির মঠে উপস্থিত হন, লুটাইয়া পড়েন স্বামী রামদাসজীর চরণতলে।

রামদাস স্বামীর হস্তে তখনো ধৃত রহিয়াছে শিবাজীর সত্তাপ্রাপ্ত লিপি। প্রসন্ন মধুর কণ্ঠে কহিলেন, “রাজা, আপনি যে আসবেন তা আমি জানতাম। কিন্তু জিজ্ঞেস করি, সাক্ষাভেদে জ্ঞাত আপনি এত ব্যগ্র, কিন্তু আরো আগে কেন আপনার সঙ্গে দেখা হয় নি?”

“হুঁভাগা আমি, তাই অভিলাষ থাকলেও এতদিন বঞ্চিত ছিলাম আপনার দর্শনে। প্রভু, এ অনিচ্ছাকৃত ক্রটিতে জ্ঞাত আমায় আপনি মার্জনা করুন। এখন দর্শন যখন মিলেছে, আর আমায় দূরে সরিয়ে রাখবেন না। অবিলম্বে দীক্ষা দিয়ে আমায় উদ্ধার করুন।”

শাজীয়া বিধান মতো দীক্ষা অনুষ্ঠান সম্পন্ন হইয়া গেল। চৈতন্যময় মন্ত্র গ্রহণের পর গুরু মহারাজের কাছে শিবাজী চিরতরে আত্মসমর্পণ করিলেন। ১৬৪৯ খ্রীষ্টাব্দের এই শুভদিন, রামদাস ও শিবাজীর মিলনের দিন, মহারাজের ধর্ম-সংস্কৃতির ইতিহাসে অমরীয় হইয়া আছে।

গুরুর ধর্মরাজ্য স্থাপনের পরিকল্পনায় শিবাজীর অবদান যথেষ্ট। এই পরিকল্পনার পিছনে স্বামী রামদাস যোগাইয়াছেন অধ্যাত্মশক্তি, আর শিবাজী উৎসর্গ করিয়াছেন তাঁহার অমিত ক্ষাত্রভেজ ও অর্ঘবল। শিষ্য গ্রহণের পর হইতে মহারাজ শিবাজী তাঁহার কোষাগার উন্মুক্ত করেন নব নব মঠ-মন্দিরের প্রাতিষ্ঠায়। বড় বড় জায়গীর দিয়া এই ধর্মকেন্দ্রগুলিকে দৃঢ় ভিত্তিতে স্থাপন করিতে তিনি সাহায্য করেন। গুরু ও শিষ্যের এই মহান যৌথ প্রয়াস সারা ভারতের রাষ্ট্রচিন্তা ও ধর্মদর্শনের সম্মুখে উন্মোচন করে এক নূতন দিগন্ত, লক্ষ লক্ষ ধর্মপ্রাণ আদর্শবাদী মানুষের বুকে জাগাইয়া তোলে বিরাট প্রত্যাশার আলো।

রামদাস স্বামী একদিন শিবাজীকে নিভূতে ডাকিয়া কহেন, “শিবাজী, গুরুত্বপূর্ণ একটা কাজ তুমি অসম্পূর্ণ রেখেছো, এবার সেটা শেষ করতে হবে।”

“কি সে কাজ, প্রভু, আদেশ করুন, সর্বশক্তি দিয়ে আমি তা পালন করবো।”—যুক্তকরে নিবেদন করেন শিবাজী।

“তোমার রাজ্যাভিষেক তো এখনো হয় নি। শাস্ত্রীয় বিধান অনুযায়ী এ অনুষ্ঠান সম্পন্ন করতে হবে। ধর্মরাজ্যের অধীশ্বর তুমি। শুধু মারাঠাই নয়, সারা ভারতভূমি আজ তোমার মুখের দিকে তাকিয়ে আছে। তোমার এই শাসনকে শাস্ত্রীয় সমর্থনের ভিত্তিতে আমি দাঁড় করাতে চাই। তোমার শক্তি সত্যকার ক্ষাত্রশক্তি বলে গণ্য হোক, তাও আমি চাই। ভারতের শ্রেষ্ঠ শাস্ত্রবিদ ব্রাহ্মণ, সাধু-মহাত্মা, সমাজনেতা ও জনগণের সমক্ষে—প্রাচীন ভারতীয় প্রথায়—তোমার অভিষেক হোক। পবিত্র যজ্ঞ হোম সম্পন্ন হোক। তুমি অবিলম্বে এর উদ্যোগ আয়োজন করো।”

গুরুর আদেশ শিরোধার্য করিয়া শিবাজী ভৌসলে অচিরে এ কাজে ব্রতী হন। কালীধামে তখন অশেষ-শাস্ত্রবিদ গাঙ্গা ভট্টের প্রবল প্রভাপ। বেদের কর্মকাণ্ড ও জ্ঞানকাণ্ড দুইয়েতেই তিনি মহা পারঙ্গম। তাঁহাকেই শিবাজীর অভিষেক ক্রিয়ার প্রধান আচার্য রূপে মনোনীত করা হইল। ভারতের সর্ব অঞ্চলের ধর্মসংস্কৃতি ও সমাজের নেতাদের কাছে প্রেরিত হইল আমন্ত্রণ পত্র। শুভ লগ্নে সাড়ম্বরে ও শাস্ত্রোক্ত বিধান অনুযায়ী শিবাজী মহারাজের অভিষেক উৎসব সুসম্পন্ন হইল। কাজকর্ম শেষ হইয়া গিয়াছে, পণ্ডিতবর গাঙ্গা ভট্ট আগামী এক সপ্তাহের ভিতর বারাণসীর দিকে রওনা হইবেন। হঠাৎ একদিন ভট্টজী দেখেন, প্রত্যুষে উঠিয়া শিবাজী ভক্তিভরে সর্বপ্রথমে মারাঠা ভাষার লিখিত এক ধর্মগ্রন্থ পাঠ করিতেছেন।

“মহারাজ, এই মারাঠা পুঁথি কি রোজই আপনি এ সময়ে পাঠ করেন?”—প্রশ্ন করেন ভট্টজী।

“হ্যাঁ, পণ্ডিতবর, এটি যে আমার প্রাত্যহিক কাজ এবং প্রধান কৃত্য।”

“কি নাম এ গ্রন্থের? কার রচিত? কোন্ তত্ত্ব আছে এতে, খুলে বলুন তো?”

“এ গ্রন্থ মারাঠীতে লেখা, নাম—দাসবোধ । মহাত্মা রামদাস স্বামী, আমার গুরু মহারাজ, এর রচয়িতা ।”

“এ বড় অদ্ভুত কথা মহারাজ । আপনার মতো বিচক্ষণ, শাস্ত্র-প্রেমিক ব্যক্তির একি রুচিহীনতা ? আপনার পক্ষে এ গ্রন্থপাঠ তো মোটেই শোভন নয় । বৈদিক ভাষা, সংস্কৃত ভাষা, তাই তো হবে আপনার আমার উপজীব্য। বেদ-বেদান্ত উপনিষদ সব কিছু ছেড়ে, শেষটায় আপনি মারাঠী দাসবোধ নিয়ে মেতে উঠলেন ? হিঃ ।”

মহারাজ শিবাজী সবিনয়ে উত্তর দেন, “পণ্ডিতবর, এ পুঁথি মারাঠীতে লেখা হলেও, আমাদের প্রাচীন শাস্ত্র থেকেই এর তত্ত্ব সঞ্চলিত হয়েছে । তাছাড়া, আমি মনে করি—প্রজ্ঞাবান্, যোগসিদ্ধ মহাপুরুষের রচিত এ গ্রন্থ সব মানুষেরই কল্যাণ-সাধনে সক্ষম । তাই এটি আমার নিত্য পাঠ্য ।”

গাগা ভট্ট শিবাজীর কথা শুনিয়া শ্লেষাত্মক হাসি হাসিলেন । এ প্রসঙ্গ নিয়া আর ঘাঁটাঘাঁটি করিলেন না ।

শিবাজী কিন্তু ভট্টজীর কথাগুলি বিস্মৃত হইলেন না । মনে মনে স্থির করিলেন, পণ্ডিতবরকে অচিরে সমুচিত শিক্ষা দিয়া তবে মহারাজ্ঞি হইতে ছাড়া হইবে ।

ছুই দিন পরেই রাজপ্রাসাদের চত্বরে স্বামী রামদাসের এক ধর্মসভার অনুষ্ঠান বসিল । এই সভার প্রধান অঙ্গ—দাসবোধের ব্যাখ্যা ও রামলীলা কীর্তন । গাগা ভট্ট এবং অন্যান্য বড় পণ্ডিতদেরও এই সভায় নিমন্ত্রণ করা হইল ।

সভা শুরু হইয়াছে । ইষ্টনাম ও ইষ্টলীলা গাহিতে গাহিতে স্বামী রামদাস দিব্যভাবে উদ্দীপিত হইয়া উঠিলেন । কখনো তিনি হাসিতেছেন, কখনো বা কাঁদিতেছেন—এ যেন মহাভাবের উৎসারক এক অনির্বচনীয় অবস্থা । অগণিত শ্রোতা ও দর্শনার্থী এই কোপীনবস্ত্র সর্বভ্যাগী মহাপুরুষের দিকে নির্নিমেষে চাহিয়া আছে । তাঁহার ভাব-রসের উস্তাল ভরঙ্গ হুলিতেছে, উঠিতেছে, নামিতেছে । রামদাসের এই লীলা বর্ণনা যেন জীবন্ত । ভাববিহ্বল শ্রোতাদের নয়ন সম্মুখে

রাম, সীতা, লক্ষ্মণ, ভরত আর মারুতি এক একটি মূর্তি যেন ভাস্বর হইয়া ফুটিয়া উঠিতেছে। ভাব ও তত্ত্বের মিশ্রণে রচিত হইয়াছে দিব্যালোকের অপরূপ পরিমণ্ডল।

গাগা ভট্ট অনিমেঘ নয়নে এই ভাবময় ইন্দ্রজালের দিকে তাকাইয়া আছেন, আর হৃদয়ের অন্তস্তল হইতে উদ্গত হইতেছে এক ছুনিবার আকুতি। কোনোমতে পণ্ডিত খৈর খরিয়া রহিলেন। তারপর সভার অস্ত্রে আবেগভরে ছই হাতে জড়াইয়া ধরিলেন স্বামী রামদাসকে। গদগদ কণ্ঠে কহিলেন, “স্বামীজী, আমি আপনার কাছে মার্জনা ভিক্ষা চাই।”

“পণ্ডিতবর, না-না, এসব কথা বলে আমার পাপের পক্ষে ডোবাবেন না।” বিনয়নম্র বচনে বলেন স্বামী রামদাস।

“না স্বামীজী, আমি সত্যই অপরাধী। আপনি যে কত বড় জ্ঞানী, কত বড় প্রেমিক পুরুষ, তা আমি বুঝতে পারি নি। আপনার মূল্য বুঝতে আমি ভুল করেছিলাম, আজ এই সভার আপনার সত্যকার রূপ আমি চিন্তে পেরেছি।”

বারাণসীতে ফিরিয়া গিয়াও স্বামী রামদাসের দিব্যোজ্জ্বল স্মৃতি গাগা ভট্ট দীর্ঘদিন ভুলিতে পারেন নাই। এই মারাঠী সাধকের প্রতি তাঁহার আদ্যা আত্মা আজীবন অটুট ছিল।

রামদাস স্বামীর অশ্রুতম জীবনীকার ভীমস্বামী শিরগাভ্কার স্বামীজীর যোগবিন্দুতির এক অত্যাশ্চর্য কাহিনী বর্ণনা করিয়াছেন। কয়েকটি শিষ্যসহ স্বামীজী তখন গ্রাম হইতে গ্রামান্তরে পরিব্রাজন করিতেছিলেন। সেদিন একটি গ্রামের উপাস্থে তাঁহারা বিশ্রাম করিতেছেন। পাশেই রহিয়াছে একটি শ্মশান। হঠাৎ এক সস্ত্র বিধবার আর্ত কান্না ও চিৎকার স্বামীজীর কানে গেল। বড় মর্মভেদী এই কান্না। তাড়াতাড়ি শিষ্যদের নিয়া তিনি শ্মশানে ছুটিয়া বান, গিয়া দেখেন স্থানটি লোকে লোকারণ্য—গ্রামের পাটেলমারা গিয়াছে। এইমাত্র যতদেহ সেখানে আনা হইয়াছে। পাটেলের জ্বর ললাট

সিন্দুরালিঙ্গ, পরিধানে লালপেড়ে একটি নূতন শাড়ী, সতীরূপে স্বামীর সহমরণে যাইতে তিনি প্রস্তুত। শাস্ত্রীয় অমুষ্ঠান শেষে চিতায় আরোহণ করিতে যাইবেন, এমন সময় সত্তা বিধবা কান্নায় ভাঙিয়া পড়েন, স্বামীর মৃতদেহটি জড়াইয়া ধরিয়া বিলাপ করিতে থাকেন।

বড় মর্মস্তুদ এই দৃশ্য। অসহায়্য বিধবার ক্রন্দনে রামদাস স্বামীর হৃদয় বিগলিত হইল, মুহূর্তে প্রকাশিত হইল করুণাঘন রূপ। অগ্রসর হইয়া কহিলেন, “মায়ী, তুমি শাস্ত হও। ভয় নেই, রামজীর কৃপায় তোমার স্বামী আবার তাঁর প্রাণ ফিরে পাবেন।”

শবের পাশে কিছুক্ষণ ধ্যান-নিমীলিত নেত্রে রামদাস উপবিষ্ট থাকিলেন, তারপর কমণ্ডলু হইতে ছিটাইয়া দিলেন এক অঞ্জলি পবিত্র বারি। সঙ্গে সঙ্গেই দেখা গেল এক রোমাঞ্চকর দৃশ্য। মৃত পাটেল ধীরে ধীরে চোখ মেলিয়াছেন।

জনতা তখন আনন্দে উৎফুল্ল হইয়া স্বামী রামদাসকে ঘিরিয়া ধরিয়াছে। আর স্বামীজীর শিষ্ণাগণ বার বার উচ্চারণ করিতেছে জয়ধ্বনি—জয় জয় কৃপালু রঘুবীর—জয় জয় সমর্থ রামদাস।

পাটেলের স্ত্রী এবার স্বামীজীর পা'ছুটি জড়াইয়া ধরেন। সজল চক্ষে মিনতি করেন, “প্রভু, দয়া যদি একবার করেছেনই, তবে এই দাসীর উদ্ধারও আপনাকেই করতে হবে। আমার স্বামী আর আমাকে আপনি দীক্ষা দিন। আপনার পরমাশ্রয়ে থেকে রামজীর নামজপ ক'রে বাকী দিন ক'টা কাটিয়ে দিই।”

রামদাস প্রশান্ত স্বরে কহেন, “কিন্তু মা, আমি তো প্রস্তুতি ছাড়া কাউকে দীক্ষা দিইনে। আমার পা ছাড়ো, শাস্ত হয়ে উঠে বসো। জরুরী কাজ আছে আমার, এখনি আমার যেতে হবে।”

“প্রভু, প্রস্তুতি কাকে বলে আমি জানিনে। কিন্তু আমার অন্তরাখ্যা কেবলি ডেকে বলছে, আপনিই আমার উদ্ধারকর্তা। বেশ, আপনি চলে যাচ্ছেন—যান। আমি বাধা দেবো না। কিন্তু জানিয়ে রাখছি, আজ থেকে আমি আমরণ উপবাসের ব্রত গ্রহণ করলাম। যে ক'টা দিন বাঁচি, কাটাবো প্রভু রামজীর ধ্যানে। আমি যদি

সত্যকার সতী হই, আপনাকে আমার উদ্ধার করতে আবার আসতেই হবে।”

রামদাস স্বামী অভঃপর কার্ণাস্তরে চলিয়া যান। কিন্তু ভক্তি-মতী পাটেলের জ্বর সঙ্কল আবার তাঁহাকে এ গ্রামে টানিয়া আনে। একমাস পরে এখানে আসিয়া পাটেল ও তাহার জীকে তিনি দীক্ষা দান করেন।

নিজের এক জন্মদিনে শিবাজী মহারাজ ছাকল মঠে রামদাসজীর আশীর্বাদ নিতে আসিয়াছেন। সঙ্গে আনিয়াছেন গুরুর জন্ত কয়েকটি মূল্যবান আঙুরাখা ও শাল।

প্রণাম ও কুশল প্রশ্নের পর উভয়ে নানা কথাবার্তা বলিতেছেন। বিশিষ্ট ভক্ত ও শিষ্যেরা আশেপাশে দণ্ডায়মান। হঠাৎ শিবাজী লক্ষ্য করিলেন, গুরুদেবের গায়ের উত্তরীয় কোঁপীন সব একেবারে ভেজা। মনে হয়, এই মাত্র তিনি যেন নদীতে স্নান সমাপন করিয়া আসিয়াছেন। সেবকেরা সবাই বিস্ময়ে হতবাক। স্বামীজী তো স্নান তর্পণ সূৰ্বোদয়ের অনেক পূর্বেই সারিয়াছেন, তারপর পরিধান করিয়াছেন তাহাদের দেওয়া শুষ্ক আঙুরাখা ও কোঁপীন। এমনভাবে কি করিয়া হঠাৎ তাহা জলসিক্ত হইল ?

কোঁতূহলী হইয়া শিবাজী প্রশ্ন করিলেন, “প্রভু, বলুন তো কি এর রহস্য ? নদীর জল এলো কোথা থেকে, কি ক’রেই বা আপনার শুষ্কবস্ত্র ভিজিয়ে দিল ?”

“না, মহারাজ, নদীর জল নয়। এ সব ভিজিয়েছে সমুদ্রের জলে। এই ঢাথো।” মুচকি হাসি হাসিয়া রামদাসজী মহারাজের অঞ্জলিতে ঢালিয়া দিলেন উত্তরীয় নিংড়ানো কিছুটা জল।

এ জল মুখে দিতেই শিবাজী চমকিয়া উঠিলেন। তাই তো, এ যে ঘোর লবণাক্ত, নদীর জল তো নয়—সমুদ্রের জলই বটে।

সপ্রশ্ন দৃষ্টিতে গুরুর দিকে তাকাইতেই তিনি কহিলেন, “মহারাজ, আজকের তারিখটা তুমি বিশেষভাবে মনে ক’রে রেখো। ঠিক

পনের দিন পরে এই সাগরজলের রহস্য উন্মোচিত হবে। তখন আশ্রমে এলে সব টের পাবে।”

নির্ধারিত দিনে শিবাজী আবার ছাকলে আসিয়া উপস্থিত। দেখিলেন, একটি ধনী বণিক স্বামীজীর সহিত নিভূতে বসিয়া কথাবার্তা বলিতেছেন। শিবাজীকে দেখাইয়া গুরু স্নেহভরে তাঁহাকে কান্না ডাকিলেন। সহাস্তে কহিলেন, “মহারাজ, সেদিনকার সাগরজলের রহস্য, আজ বুঝা গেল। ইনি হচ্ছেন রাজাপুরের মুঞ্জাজী, আমার একজন আশ্রিত শিষ্য। এঁর মুখেই শোন সব কথা।”

মুঞ্জা এতক্ষণ স্বামীজীকে যে কাহিনী বলিতেছিলেন, শিবাজীর কাছে করিলেন তাহারই পুনরাবৃত্তি। মারাঠার উপকূল বাণিজ্যের অমূল্য প্রধান বণিক এই মুঞ্জা। পনের দিন আগে জাহাজভাতি মালপত্র নিয়া তিনি সমুদ্রপথে চলিতেছিলেন, হঠাৎ ঝড়ের কবলে পড়িয়া জাহাজটি জলমগ্ন হইতে থাকে। মুঞ্জা এই সময়ে গুরুদেব রামদাসজীর কথা স্মরণ করিয়া প্রাণপণ চীৎকারে তাঁহাকে ডাকিতে থাকেন, ধনপ্রাণ রক্ষার প্রার্থনা জানান। এই সময় জাহাজের খেলের উপরে জ্যোতির্ময় মূর্তিতে আবির্ভূত হন সমর্থ রামদাস স্বামী। বরাভয় দানে আশ্বস্ত করেন আশ্রিত শিষ্যকে। ক্ষণকাল পরেই ঝড়ের তাণ্ডব হ্রাস পায়, সমুদ্র শান্ত হইয়া আসে। মুঞ্জার দৃঢ় বিশ্বাস, গুরুমহারাজের করুণাবলেই এ যাত্রা বাঁচিয়া গিয়াছেন, জাহাজটিও রক্ষা পাইয়াছে ভরাডুবি হইতে। বন্দরে বন্দরে মাল পৌঁছাইয়া দিয়া মাত্র গতকালই মুঞ্জা দেশে ফিরিয়াছেন। আজ আসিয়াছে স্বামীর চরণ দর্শনে।

শিবাজী প্রশ্ন করিয়া জানিলেন, পক্ষকাল আগে যে তারিখে ও যে সময়ে স্বামী রামদাসজীর বসন তিনি সিক্ত দেখিয়াছেন, ঠিক সেই সময়েই বণিকের জাহাজটি ঝটিকা-ক্ষুর সাগরে বিপন্ন হইয়া পড়ে।

শিবাজীর জীবনে এখন একটানা সাকল্যের কাল। দুর্গের পর দুর্গ মুঘলের হাত হইতে তিনি ছিনাইয়া নিভেছেন, রাজ্যের পরিধি



হইতেছে বিস্তৃততর। সেনাবল ও অর্থবলও বিপুল। কিন্তু প্রবীণ নৃপতি শিবাজীকে কিন্তু এই জাগতিক সমৃদ্ধি বিভ্রান্ত করিতে পারে নাই। বরং ধর্মরাজ্যের ভিত্তি গড়িয়া তুলিতে তিনি আরো তৎপর হইয়াছেন, গুরু রামদাস স্বামী পরমাশ্রয় আঁকড়াইয়া ধরিতেছেন আরো দৃঢ় হস্তে। স্বামীজীও বিশ্বাস করেন, যে ঐশ কার্যের ভার তিনি নিয়াছেন তাহার প্রধান সহায় হইতেছেন শিবাজী। তাই শিবাজীর জীবনকে অধ্যাত্মরসে উজ্জীবিত করিয়া তুলিতে তাঁহার প্রয়াসের অন্ত নাই। বিপুল আশা নিয়া, সদা সতর্ক দৃষ্টিতে এই রাজ-শিশুর দিকে দিনের পর দিন তিনি চাহিয়া আছেন।

সে-বার পদব্রজে ঘুরিতে ঘুরিতে রামদাস স্বামী সাতারায় আসিয়াছেন। শিবাজী রাজধানীর দুর্গেই অবস্থান করিতেছেন, কিন্তু গুরুজীর আগমন সংবাদ তখনো পান নাই। রামদাসজী স্থির করিয়াছেন, অপর শিশুদের সহিত কয়েকদিন অতিবাহিত করিয়া তারপর দর্শন দিবেন শিবাজী মহারাজকে।

পদব্রজে পরিব্রাজন আর মাধুকরী, দুইটিই স্বামী রামদাসের পরম প্রিয়। সাতারায় আসিয়া প্রতিদিনই তিনি দ্বারে দ্বারে ভিক্ষার তণ্ডুল সংগ্রহ করিতেন।

শিবাজী সেদিন দুর্গের বারহুয়ারীতে বসিয়া অহুচরদের সহিত আলাপ-আলোচনা করিতেছেন, হঠাৎ দৃষ্টি পড়িল সন্নিহিত মহল্লার এক কুটির দ্বারে। দেখিলেন, গুরুজী রামদাস স্বামী ভিক্ষাপাত্র হাতে সেখানে দণ্ডায়মান।

মুহূর্তে চিন্তার বলক খেলিয়া যায় তাঁহার মনে। একি অদ্ভুত কাণ্ড! রাজ্যের অধীশ্বর যাঁর পদানত—যাঁর বিশ্বস্ত সেবক, সেই রাজগুরু মহাসমর্থ রামদাস স্বামী রাজ্যের দ্বারে দ্বারে ঘুরিবেন দীন কাঙালের বেশে, ভিক্ষায়ে করিবেন জীবনধারণ? না-না, শিবাজী কিছুতেই তা আর চলিতে দিবেন না।<sup>১</sup>

১ তার ঘটনাখ: শিবাজী অ্যাণ্ড হিজ টাইম্‌স্; অ্যাকওয়ার্থ: বার্নাটী ব্যালাড্‌স্: কৃত্তিকা; রবীন্দ্রকাব্যেও ঘটনাটি অমর হইয়া আছে।

বিশ্বস্ত অমুচর বালাজীকে ডাকিয়া তখনি তাঁহার হাতে এক পত্র দিলেন। কহিলেন, “গুরুজী ভিক্ষার ঝুলি নিয়ে পথে বেরিয়েছেন, কিছুক্ষণের মধ্যেই এসে পড়বেন ছুর্গদ্বারে। তুমি আমার এই পত্র তাঁর চরণতলে রেখে দিও।”

ছুর্গ তোরণে দাঁড়ানো মাত্র শিবাজীর পত্র রামদাসজীকে দেখিয়া হইল। কোতূহলভরে তিনি এটি পাঠ করিলেন। মহারাজ শিবাজী লিখিয়াছেন,—“প্রভু, আপনার এই ভিক্ষাবস্ত্রের দৃশ্য আমি আর সহ করতে পারছিলাম না। এই সমগ্র রাজ্য, আর আমার যা কিছু ব্যক্তিগত বিস্তৃতি আছে সবই আমি আপনার চরণে উৎসর্গ করলাম। আপনি কৃপা ক’রে এসব গ্রহণ করুন, ক্ষান্ত হোন ভিক্ষাবস্ত্রিতে।”

মুহূর্ত্ত হাশ্বে পত্রটি হাতে নিয়া রামদাস সেদিন সেখান হইতে চলিয়া যান। পরের দিনই সাক্ষাৎ করেন শিবাজীর সঙ্গে। বলেন, “মহারাজ, তোমার সবই তো দান করেছে। আমায়, তোমার নিজের বলতে আর তো কিছু অবশিষ্ট নেই। এবার তবে আমার সঙ্গে দুর্গের বাইরে এসে দাঁড়াও। আমার প্রকৃত চেলা হয়ে আমার সঙ্গে গুরু করো মাধুকরী।”

সানন্দে ভিক্ষাঝুলি কাঁধে নিয়া শিবাজী গুরুর অমুসরণ করেন, দ্বারে দ্বারে মাগিয়া ফিরেন। ভিক্ষুকের বেশে শিবাজী মহারাজ উপস্থিত! ঘরে ঘরে মহা সোরগোল পড়িয়া যায়, সসঙ্কোচে, কম্পিত হস্তে রাজভিখারীকে মুষ্টিভিক্ষা দিয়া গৃহস্থেরা সরিয়া দাঁড়ায়।

দিন শেষে রাজধানীর উপাস্তে এক অরণ্যে বসিয়া গুরু শিষ্য উভয়ে ভিক্ষায় ভোজন করিলেন। প্রসন্ন হাসি হাসিয়া রামদাস এবার কহিলেন, “বৎস শিবাজী, পরীক্ষায় তুমি উত্তীর্ণ হয়েছো। তোমার রাজ্য ও রাজৈশ্বর্য আমায় দান ক’রে তুমি ভিক্ষুক হয়েছিলে। আজ সব কিছু আবার আমি তোমাকেই ফিরিয়ে দিলাম। তুমি আবার রাজসিংহাসনে বসবে বটে, কিন্তু চিরদিনই যবে আমারই প্রতিনিধি রূপে। আমার গুরুদেব গাত্রবাস তোমায় দান করছি, বৈরাগীর এই উত্তরীয়ই হবে তোমার রাষ্ট্র-পতাকা।”

এই গেরুয়া পতাকা বা ভগোয়া কাণ্ডা মহারাজা শিবাজীর রাজ্যে যতদিন উড্ডীয়মান ছিল, ভারতবাসীর হৃদয়পটে ততদিন ত্যাগ-বৈরাগোর পরম আদর্শ ছিল দীপ্যমান। আজো সে আদর্শের কথা এদেশে বিস্মৃত হয় নাই।

একদল ভক্ত ও শিষ্য নিয়া রামদাসজী একদিন দূর গ্রামের এক মঠে যাইতেছেন। দীর্ঘ দুর্গম পথ। চলিতে চলিতে সঙ্গীরা ক্ষুৎপিপাসায় কাতর হইয়া পড়িয়াছে। সম্মুখেই একটি ভূট্টার ক্ষেত। ভক্তেরা নিবেদন করে, “প্রভু, এখানে তো কাছাকাছি কোনো লোকালয় দেখিছিনে। আমরা সবাই শ্রান্ত অবসন্ন। ক্ষুধার জ্বালায় পথ চলা সম্ভব হচ্ছে না। আমরা বলছি কি, ক্ষেত থেকে কিছু ভূট্টা তুলে আমরা প্রাণ বাঁচাই, তারপর অন্য সময়ে ক্ষেতের মালিককে এর দাম দিয়ে দিলেই হবে।”

শিষ্যদের হৃদশা দেখিয়া স্বামীজী এ প্রস্তাবে সায় দিলেন। প্রয়োজনীয় ভূট্টা সংগৃহীত হইল, সামনের এক বটগাছের নিচে আগুন জ্বালাইয়া, দগ্ধ ভূট্টা ভোজনের পর সকলে সুস্থ হইলেন।

এমন সময়ে ষমদূতের মতো গ্রামের পাটেল সেখানে আসিয়া উপস্থিত। ভূট্টার ক্ষেতটি তাহারই। সাধুদের কাণ্ড দেখিয়া সে ক্ষিপ্ত হইয়া উঠে। অকথ্য ভাষায় দলের নেতা রামদাসজীকে গালি-গালাজ করিতে থাকে। ভূট্টার কয়েকটি অবশিষ্ট আঁটি সম্মুখে পড়িয়াছিল, সেগুলি উঠাইয়া নিয়া পাটেল সজোরে রামদাসজীকে আঘাত করিতে থাকে। স্বামীজীর দেহের নানা স্থানে কাটিয়া যায়, রক্ত ঝরিতে থাকে। আঘাতকারীকে কোনো প্রকার বাধা না দিয়া স্বামী রামদাস প্রশান্ত বদনে রহেন দণ্ডায়মান।

স্বামীজীর এই সমদর্শিতা ও নির্বিকার ভাব ভক্ত-শিষ্যদের থাকিবে কেন? তাহারা ক্রোধে জলিয়া উঠে, সবাই মিলিয়া পাটেলকে জাপটাইয়া ধরে, মুঠ্যাঘাতে করে তাহাকে ধরাশায়ী।

রামদাসজীকে এবার উত্তেজিত হইতে দেখা যায়। শিষ্যদের

হটাইয়া দিয়া পাটেলকে তিনি মুক্ত করেন, তিরস্কারের স্বরে কহেন, “এ তোমাদের অজ্ঞায়। ভুট্টার ক্ষেতের মালিক এই পাটেল। তার ভুট্টা খেয়ে, আবার তাকেই ধরে মারবে এ কেমন কথা? না—একে তোমরা কিছু ব’লো না, অপরাধ তো বরং আমাদেরই। পরজন্ম না বলে আমরা নিয়েছি।”

এই ঘটনার কয়েকদিন পরে শিবাজী মহারাজ একদিন গুরুর সঙ্গে দেখা করিতে আসেন। কোপীনবস্ত্র রামদাসজী খালি গায়ে নিজ আসনে বসিয়া বিশ্রান্তালাপে রত, হঠাৎ তাঁহার দেহের কাঁচা ঘায়ের দিকে শিবাজীর দৃষ্টি পড়িল। ব্যস্ত-সমস্ত হইয়া এ বিষয়ে তিনি প্রশ্ন করিলেন। কিন্তু স্বামীজী একেবারে নিরুত্তর।

পার্শ্বে দণ্ডায়মান এক সেবক কিন্তু মূল কথাটা ফাঁস করিয়া দেয়। ভুট্টা ক্ষেতের মালিক পাটেলের মারধোরের কাহিনী সবিস্তারে বর্ণনা করে।

আত্মপূর্বিক সব গুণিয়া শিবাজী ভো মহারুষ্ট। উত্তেজিত কণ্ঠে কহিলেন, “রাজগুরুর প্রতি এই অত্যাচার! আচ্ছা, এখনি এই পাটেলের সমুচিত দণ্ডবিধান আমি করাই।”

স্বামী রামদাস সহাস্ত্রে বলেন, “বৎস, মনে রেখো, তুমি রাজ-সিংহাসনে বসলেও আসলে তুমি হচ্ছো ধর্মের প্রতিনিধি, ভিক্ষুক সন্ন্যাসীর প্রতিনিধি। এ স্থলে অপরাধ হয়েছে আমাদেরই, পাটেলের নয়। ভক্তেরা ভুট্টা খাবার প্রস্তাব করার সময় আমি ভেবেছিলাম, পরে এসে ক্ষেতের মালিককে এর মূল্য দিয়ে যাবো। তুমি বরং আমার হয়ে তাই দাও এই পাটেলকে। তাকে কয়েক বিঘা জমি তুমি পুরস্কারস্বরূপ দান করো, তবেই আমি লাভ করবো অপার সন্তোষ!”

বলা বাহুল্য, গুরুর এই নির্দেশ প্রতিপালিত হইতে সেদিন বিলম্ব হয় নাই।

গুরুর প্রতি শিবাজীর আত্মসমর্পণ ও ভক্তিপ্রেমের তথ্য গবেষকেরা কতকগুলি চিঠিপত্র হইতে আবিষ্কার করিয়াছেন। রাজা শিবাজীর একটি পত্রের অলুবাদ নিম্নরূপ :

শ্রীস্বামীজী মহারাজ ! মহন্তম গুরো !

আমি শিবাজী হচ্ছি আপনার শ্রীচরণের ধূলি। শ্রীচরণে প্রণাম নিবেদন ক'রে জানাচ্ছি আমার এই আবেদন। হে পরমপূজ্য, আপনি আমায় দীক্ষা দান ক'রে ঢেলে দিয়েছেন কল্যাণবহ আশীর্বাদ। একটি স্বাধীন রাজ্যগঠন, ধর্মসংস্থাপন, দেবদ্বিজের আরাধনা, জনগণের রক্ষণ ও দুঃখ দূরীকরণ—এইসব মহৎ কার্য সাধনের নির্দেশ আপনি আমায় দিয়েছিলেন। তাছাড়া পরম বস্তুর অন্বেষণেও আপনি আমায় উদ্বুদ্ধ করেছিলেন, আর আশ্বাস দিয়েছিলেন—আমার সকল কিছু প্রচেষ্টা সফল হয়ে উঠবে প্রভু শ্রীরামজীর কৃপায়। তদনুসারে আমিও এগিয়ে চলেছি আমার কর্মসূচী নিয়ে। সফল হয়েছি দুই মুসলমান শক্তির দমনে, বিপুল ধনরত্ন এসেছে আমার অধিকারে, নির্মাণ করেছি দুর্জয় দুর্গসমূহ। এ সবই, প্রভু, সম্ভব হয়েছে আপনার আশীর্বাদের বলে।

—বোধহয় আপনার মনে আছে, একদিন আমি আপনার চরণে সঁপে দিয়েছিলাম আমার সমগ্র রাজ্য ও বৈভব। বলেছিলাম—আমি আপনার সেবায় নিজেকে করবো উৎসর্গ। আপনি তখন উদ্ভরে বলেছিলেন, আমি যদি আমার রাজকর্তব্য নিষ্ঠাভরে পালন ক'রে যাই, তবে তাই গণ্য হবে আপনার শ্রেষ্ঠ সেবাকার্যরূপে।

—আর এক প্রার্থনা ছিল, শ্রীরামজীর মন্দির যেন আমার কাছাকাছি কোথাও নির্মিত হয়, তাহলে আমরা পরস্পরের সঙ্গে দেখা সাক্ষাৎ করতে পারবো, আর রামদাসী সম্প্রদায়ও ছাড়িয়ে পড়তে পারবে দিকে দিকে। হে আমার পরমপূজ্য, আপনি আমার সে প্রার্থনা শুনেছিলেন। আমার নিকটবর্তী পর্বতগুহায় এসে আপনি বাস করতে থাকেন, ছাফল-এ প্রভু রামজীর মন্দিরও নির্মিত হয়, এরপর সম্প্রদায়ের ভক্ত শিষ্যদের প্রভাবও বেড়ে চলে দিনের পর দিন। তাছাড়া, আরো একটা আশ্চর্য্যিক অনুবোধ আমার ছিল। আমার আরো আবেদন ছিল, শ্রীরামজীর পূজায়, উৎসব-অনুষ্ঠানের ব্যয় নির্বাহে, ছাফল মন্দিরের নির্মাণকাজে এবং অন্যান্য স্থানের

মূর্তির সেবায় আমি যেন কিছু পরিমাণ জমি দান করতে পারি। তার উত্তরে আপনি আমাকে জানিয়েছিলেন,—এজ্ঞ আমি যেন চিন্তিত না হই, যেসব জমি আমি এ উদ্দেশ্যে দান করা প্রয়োজন মনে করি তা যেন দিই, এবং সম্প্রদায়, রাজ্য এবং জাতির কল্যাণে যেন আত্মনিয়োগ করি। তারপর আমি আমার রাজকীয় নির্দেশ-নামা প্রদান করি এবং বিভিন্ন অঞ্চলে সরকার হইতে জমি অর্পণের ব্যবস্থা করা হয়। ছাকলের চারপাশে যে ১২১টি গ্রাম রয়েছে, তাদের প্রত্যেকটি থেকে ১১ বিঘা জমি দান করার নির্দেশ ইতিমধ্যে দেওয়া হয়ে গিয়েছে।<sup>১</sup>

অভিষেকের পর হইতেই শিবাজীর জীবনে অধ্যাত্ম-ভ্রমণ বাড়িয়া উঠিতে থাকে; স্বামী রামদাসের উপরও আসে পূর্বাপেক্ষা অনেক বেশী নির্ভরতা। যে কোনো প্রশ্ন, তাহা সাধনতত্ত্ব সম্পর্কেই হোক, সামাজিক বা রাজনীতি সম্পর্কেই হোক, গুরুকে দিয়া তাহার মীমাংসা করিয়া না নিলে শিবাজীর চলে না। তাছাড়া, এখন হইতে গুরুর সঙ্গ ও ঘনিষ্ঠ সাহচর্যের জ্ঞানও তাঁহার মন বড় বেশী ব্যাকুল হইয়া উঠে।

কিন্তু রামদাসকে কোনো একটি বিশেষ স্থানে ধরিয়া রাখিবার যো নাই। তীর্থে-তীর্থে মঠে-মঠে স্বেচ্ছামতো তিনি ঘুরিয়া বেড়ান।

পরলী ভূগটি শিবাজীর অধিকারে আসার পর তিনি স্থির করেন, গুরুর জ্ঞান এখানে একটি স্থায়ী সুন্দর আবাস নির্মাণ করিয়া দিবেন। অনেক অনুন্নয় করিয়া রামদাসজীকে রাজী করানো হয়। শিবাজীর নির্দেশমতো ভূগ-শীর্ষে রামদাসজীর এই নূতন ভবনকে কেন্দ্র করিয়া গড়িয়া উঠে সাধু-সন্ন্যাসীদের একটি মঠ এবং উপনিবেশ। সাধু-সজ্জনের আবাসভূমি তাই ইহার নাম দেওয়া হয় সজ্জনগড়। ভূগের চারিদিকের গ্রামগুলির আয় শিবাজী দান করেন এই সাধু-উপনিবেশের জ্ঞান। রামদাসজীর প্রবর্তিত বড় বড় ধর্ম-উৎসবগুলি

সাড়ম্বরে এখানে পালন করা হইত এবং সে ব্যয়ও নির্বাহ হইত সরকারের প্রদত্ত নজরানা হইতে ।

সজ্জনগড় সাতারা হইতে বেশী দূর নয় । শিবাজীর প্রিয় দুর্গ রায়গড়ও খুব কাছাকাছি । শিবাজী প্রায়ই রায়গড়ে যাইতেন এবং নিকটবর্তী গুরুস্থান সজ্জনগড় ছিল তাঁহার এক বড় আকর্ষণ । অবসর পাইলে সেখানে গুরুজীর সমীপে গিয়া উপস্থিত হইতেন, গ্রহণ করিতেন সাধনভজন ও রাজকার্যের নানা গুরুত্বপূর্ণ নির্দেশ ।

অনেকের ধারণা, রামদাস স্বামী তাঁহার শিষ্য শিবাজীর রাজ-নৈতিক জীবন ও রাষ্ট্রচিন্তার নিয়ামক ছিলেন, এবং ইহাই স্বামীজীর বড় পরিচয় । কিন্তু এ ধারণা একেবারেই যুক্তিসহ নয় । শিবাজী রামদাসজীর আশ্রয়ে আসেন জীবনের শেষপাদে । ধর্মধৃত রাজ্যের যে সঙ্কল্প তাঁহার মনে ছিল, রামদাসজীর শিষ্যত্ব গ্রহণের পর সে সঙ্কল্প আরো দৃঢ় হইয়া উঠে । প্রকৃতপক্ষে সিদ্ধপুরুষ রামদাসজী ছিলেন রাজা শিবাজীর অধ্যাত্মজীবনের আলোকদিশারী এবং তাঁহার সাধন জীবনেরই নিয়ন্তা । উত্তর জীবনে শিবাজীর মুমুক্ষা তীব্রতর হইয়া উঠে এবং গুরুর চরণে পূর্ণরূপে করেন তিনি আত্মসমর্পণ ।

এ সম্পর্কে রামদাস স্বামীর জীবনীকার ডেমিং যাহা বলিতেছেন তাহা প্রণিধানযোগ্য । তাঁহার মতে, “শিবাজীর উপর রামদাসের আধ্যাত্মিক প্রভাবই ছিল মুখ্য, রাজনৈতিক প্রভাব গৌণ । তথ্য প্রমাণ হইতে পরিষ্কারভাবে দেখা যায়, শিবাজীর রাজনৈতিক ও সামরিক জীবনে রামদাস খুব একটা গুরুত্বপূর্ণ ভূমিকা গ্রহণ করেন নাই । কাজেই রামদাসের রাজনৈতিক প্রভাবকে বড় করিয়া তোলাটা শুধু যে ঐতিহাসিক তথ্য দ্বারা অসমর্থিত তা-ই নয়, ইহা দ্বারা মহারাজা শিবাজী এবং স্বামী রামদাস উভয়কেই খাটো করা হয় । ধর্ম ও অধ্যাত্মসাধনার ক্ষেত্রে স্বামীজী ছিলেন সর্বময় প্রভু, এবং ইতিহাস নিশ্চয়ই তাঁহার এই প্রভুত্বকে স্বীকৃতি দিতে বাধ্য থাকিবে । কারণ, ধর্ম ও অধ্যাত্মসাধনা সম্পর্কে তাঁহার জ্ঞান ছিল সুগভীর এবং সেখানকার সমস্তার সমাধানে তিনি ছিলেন অতি-

মাত্রায় দক্ষ। প্রধানত ধর্মগুরুরূপে স্বীকৃতি না দিয়া তাঁহাকে যদি রাজনৈতিক গুরু বলিয়া আমরা প্রচার করি তবে তাঁহার প্রকৃত স্বরূপ নির্ণয়ে ভুল করিব। একথা সত্য যে জীবনের শেষ ভাগে প্রিয় শিষ্য ও আদর্শবাদী রাজা শিবাজীর কাজকর্মের ধারা দেখিয়া তিনি পরিতুষ্ট হন এবং রাষ্ট্রীয় ব্যাপারে প্রয়োজন মতো মাঝে মাঝে নির্দেশও তিনি দিতেন। তাঁহার ধর্মগ্রন্থ দাসবোধের শেষ অংশে সামাজিক ও রাজনৈতিক উপদেশ কিছুটা রহিয়াছে। শিবাজী মহারাজ শেষজীবনে গুরুজীর কাছে আসিয়া রাষ্ট্রীয় চিন্তা ও কাজকর্ম সম্বন্ধেও তাঁহার মতামত জানিয়া নিতেন, কারণ স্বামীজীর জ্ঞান ও বুদ্ধিমত্তার উপর তাঁহার গভীর শ্রদ্ধা ছিল। এই দিক দিয়া দেখিতে গেলে স্বামী রামদাস ভক্ত-তুকারাম বা অন্যান্য বৈষ্ণব সাধক হইতে ভিন্ন ধরনের ছিলেন। কিন্তু এই সঙ্গে এ কথাও স্বীকার করিতে হইবে যে রাষ্ট্রীয় কর্ম, সম্প্রদায়ের সংগঠন-কর্ম প্রভৃতি ব্যবহারিক ক্ষেত্রের গুরুত্ব স্বীকার করিলেও স্বামী রামদাস মুখ্যত ছিলেন একজন সিদ্ধসাধক ও জনকল্যাণকর অধ্যাত্ম-আন্দোলনের নেতা।”<sup>১</sup>

সজ্জনগড়ের পরিবেশ ছিল বড় পবিত্র, বড় রমণীয়। চারিদিকে শস্ত্রশ্যামল উপত্যকা বিস্তারিত। নদী নালায় বক্সিম রেখায় রেখায় প্রকৃতি যেন ক্ষীণ-শুভ্র আলপনা আঁকিয়া রাখিয়াছে পরম প্রভুর আগমন প্রতীক্ষায়। উষ্মাকাশের মহাবিস্তারে তাকাইলেই প্রাণমন মুহূর্তে কোথায় যেন উধাও হইয়া যায়। এই অল্পকূল পরিবেশে আসিয়া রামদাস ধ্যান-ভজনে বিভোর হইয়া পড়েন, পাহাড়ের চূড়ায় ঘনিষ্ঠ ভক্তশিষ্যদের নিয়া বাস করিতে থাকেন।

মঠ এবং মণ্ডলীর সংখ্যা ও পরিধি বাড়িয়াছে, কাজও অনেক বাড়িয়াছে। কিন্তু স্বামী রামদাসের জীবনেও আসিয়াছে প্রচুর অবসর। বিশ্বস্ত, কর্মকুশল ও ত্যাগব্রতী শিষ্যেরা মঠ-মন্দিরগুলি সুষ্ঠুভাবে পরিচালনা করিতেছেন, তত্বপূর্ণি রাজশিষ্য শিবাজীর জনবল ও কোষাগার সতত রহিয়াছে গুরুর সেবায় নিয়োজিত। প্রয়োজন বোধে



মঠের মোহস্তেরা, শিবাজী ও তাঁহার উচ্চকর্মচারীরা, সজ্জনগড়ের শীর্ষে ছুটিয়া আসেন, স্বামী রামদাসের নির্দেশে ও আদেশে হয় তাঁহাদের নানা সমস্তার সমাধান।

স্বামীজীর সজ্জনগড়ের এই পরিবেশটি কিন্তু দীর্ঘস্থায়ী হয় নাই। অল্পদিনের মধ্যেই নেপথ্যের মহানাট্যকার তাঁহার জীবনলীলাকে ঠেলিয়া দেন শেষ অঙ্কের দিকে।

১৬৭৯ খ্রীষ্টাব্দের শেষের দিকে শিবাজী একবার গুরুর সঙ্গে দেখা করিতে আসেন। নানা প্রশঙ্গের পর গুরু রহস্যময় হাসি হাসিয়া কহেন, “মহারাজ, মাটির মানুষ আমি, রঘুনাথজীর এক দীন সেবক। তাকে তুমি পাহাড়ের শীর্ষে আকাশে তুলে এনে রেখেছো। আকাশ হাতছানি দিচ্ছে বার বার। মহারাজ, স্পষ্টই বুঝতে পারছি, মরজীবনে ছেদ পড়তে বেশী বাকী নেই।”

“তা কি ক’রে হয় গুরুদেব? লক্ষ লক্ষ লোক যে আপনার মুখ চেয়ে আছে, আপনার অভয় বাণী শোনার জন্য উৎকর্ষ হয়ে আছে। এত তাড়াতাড়ি আপনার চলে যাওয়া কি ক’রে হয়? তাছাড়া, ধর্মরাজ্য স্থাপনের অনেক কিছুই যে এখনো বাকী।”—যুক্তকরে নিবেদন করেন শিবাজী।

“মহাকালের বুকে আমরা বুদ্ধ মাত্র, আমরা শুধু একটা ক্ষীণতম ক্ষীণ স্পন্দন তুলতে পারি। যা করবার সচ্চিদানন্দ ব্রহ্ম শ্রীরামচন্দ্রই করবেন। তবে তাঁর ভক্ত ও অমুচর হিসেবে আমরা তোমায় তাঁর পুনরাবির্ভাবের পটভূমি কিছুটা রচনা করতে হবে। তাঁর আসন পাততে হবে। ধর্মরাজ্যের আদর্শ আমরা তুলে ধরলাম, বীজ ছড়িয়ে গেলাম—এই তো ছিল আমাদের কর্তব্য।”

নতশিরে মহারাজ শিবাজী গুরুর চরণসমীপে বসিয়া আছেন। মুখে মুখে একটি শব্দ নাই।

গুরু আবার কহিলেন, “বৎস, অতিরিক্ত পরিশ্রমে তোমার শরীর দুর্বল হয়েছে, অপটু হয়েও পড়েছে। খুব সাবধানে থেকো। রায়গড়ে গিয়ে তুমি পূর্ণ বিশ্রাম করো।”

শিবাজী রায়গড়ে ফিরিয়া গেলেন, কিন্তু উপযুপরি কয়েকটি সাময়িক অভিবান চালানোর কলে স্বাস্থ্য তাঁহার একেবারে ভাঙিয়া পড়িয়াছে, আর তাহা জোড়া লাগে নাই।

১৬৮০ খ্রীষ্টাব্দের ৫ই এপ্রিল শিবাজী মহারাজ চিরবিদায় গ্রহণ করিলেন। স্বামী রামদাসের দক্ষিণবাহুটি এবার যেন ভাঙিয়া পড়িল, ধর্মরাজ্যের স্থাপনা ছিল রামদাসজীর কাছে এক মহান্ ঐশ ব্রত। আদর্শবাদী পরম ধার্মিক মহারাজা শিবাজীর আনুগত্য ও সেবা ছিল তাঁহার এই কর্মের বড় সহায়। বিধির বিধানে আজ তাহা অন্তর্হিত হইল।

রামদাস-শিষ্য শিবাজীর প্রকৃত মূল্যায়ন বিদেশী ঐতিহাসিকেরা করিতে পারেন নাই। পরবর্তীকালে এ দেশের মনীষী গবেষকেরা তাঁহার আত্মিক জীবন ও ধর্মীয় জীবনের স্বরূপ নির্ণয় করিয়াছেন। এ যুগের শ্রেষ্ঠ কবি রবীন্দ্রনাথের অননুকরণীয় ভাষায়ও মূর্ত হইয়া উঠিয়াছে শিবাজীর ধর্মধৃত জীবনের পরম বৈশিষ্ট্য। একাধারে বিপুল আশা, আশ্বাস ও প্রতিশ্রুতি বিশ্বকবির অমর কণ্ঠে ধ্বনিত হইয়াছে :

সেদিন শুনিনি কথা—আজ মোরা তোমার আদেশ

শির পাতি লব।

কণ্ঠে কণ্ঠে বক্ষে বক্ষে ভারতে মিলিবে সর্বদেশ

ধ্যানমন্ত্রে তব।

ধ্বজা করি উড়াইব বৈরাগীর উত্তরীবসন

দারিজ্যের বল।

‘এক ধর্মরাজ্য হবে এ ভারতে’ এ মহাবচন

করিব সম্বল।

এবার পরপারের ডাক আসিয়া গিয়াছে সমর্থ রামদাসস্বামীর অন্তরসত্যায়। প্রাণপ্রভু রামজীর চরণকমলে নিজেকে এবার তিনি বিলীন করিতে চান। দিনরাতের অধিকাংশ সময় তাঁহার অতিবাহিত

হয় ইষ্টধ্যানে। ধ্যানভঙ্গ্যত। ভাঙাইয়া সেবকেরা মাঝে মাঝে চেষ্টা করেন খাওয়ানোর জন্ত, কিন্তু প্রায়ই তাহা সম্ভব হইয়া উঠে না। উপবাসে তনু দিন দিন ক্ষীণ হইতে থাকে।

বিশিষ্ট শিষ্য কল্যাণ ব্যাকুল হইয়া ছুটিয়া আসিলেন। কয়েকটি নিগূঢ় নির্দেশ নিয়া গুরু মহারাজের আদেশে ফিরিয়া গেলেন আপন কর্মক্ষেত্রে। অন্যান্য মঠ-মন্দিরের পরিচালক ও ভক্ত-শিষ্যেরা শেষ-বারের মতো স্বামীজীকে দর্শন করিয়া গেলেন।

প্রধান শিষ্য উদ্ধব ও ভক্তিমতী আকাবাস্ট গুরুজীর শয্যাপার্শ্বে সদা উপস্থিত। প্রাণপণে তাঁহার সেবা করিয়া চলিয়াছেন, শঙ্কাকুল চিন্তে অপেক্ষা করিয়া আছেন বিচ্ছেদের মর্মসুদ মুহূর্তটির জন্ত।

কয়েকদিন আগে স্বামীজী তাঁহার অন্তরের অভিলাষ অনুযায়ী রাম, সীতা, লক্ষ্মণ ও মারুতিজীর নূতন নূতন নয়নলোভন বিগ্রহ গড়াইয়া আনিয়াছেন। এই বিগ্রহগুলি এবার তাঁহার শয়নঘরে স্থাপন করিতে বলিলেন। বহুক্ষণ ইহাদের সম্মুখে রহিলেন ধ্যানাবিষ্ট।

শয়নগৃহে তখন উপস্থিত একনিষ্ঠ সেবিকা আকাবাস্ট আর প্রিয় শিষ্য উদ্ধব। ধ্যান হইতে ব্যুথিত হইয়া আকাবাস্ট-এর হাত হইতে গুরু গ্রহণ করিলেন একপাত্র চিনির সরবৎ। তারপর প্রসন্ন মধুর হাস্তে কহিলেন, “বৎসে, এবার তবে তোমরা আমার বিদায় দাও।”

কান্নায় ভাঙিয়া পড়িলেন আকাবাস্ট। সাস্তুনা দিয়া গুরুজী কহিলেন, “চির আনন্দধামে যাচ্ছি, সচ্চিদানন্দ বিগ্রহ শ্রীরামজীর লীলা নিকেতনে আমি রওনা হচ্ছি। পরম মধুর মিলন-ক্ষেত্রে এই কান্না কেন?”

“প্রভু, মরদেহ ছেড়ে যাচ্ছেন, আর তো শুনতে পাবো না আপনার অমৃতবাণী, আর পাবো না আপনার পরম আশ্রয়।”

“এতদিন কি আমার কাছে থেকে তোমরা শুধু এই শিখলে? প্রপঞ্চস্বরূপ এ দেহ একদিন তো ত্যাগ করতেই হবে। প্রাণপ্রভুর নির্দেশ এসেছে, সানন্দে তাই আমি চলে যাচ্ছি। ভয় কেন গো, তোমাদের? এ মুখের কথা নাই বা শুনলে, কিন্তু ‘দাসবোধ’ তো

আছে। তাই রইল আমার মর্মকথা রূপে। ‘দাসবোধ’ তোমরা সবাই নিত্যপাঠ করবে, থাকবে রামজীর নিত্যদাস হয়ে।”

ইষ্টবিগ্রহের দিকে প্রেমাপ্লুত নয়নে তাকাইয়া রামদাস স্বামী মৃদুকণ্ঠে উচ্চারণ করিলেন, “হর হর—রাম রাম, জয় সমর্থ রঘুবীর।” তারপর সিদ্ধাসনে উপবেশন করিলেন। কিছুক্ষণের মধ্যে মহাপুরুষের প্রাণবায়ু ব্রহ্মরন্ধ্র পথদিয়া করিল উৎক্রমণ।

১৬৮১ খ্রীষ্টাব্দের এই মহাপ্রয়াণের দিনে সারা মারাঠার ভক্ত-সমাজে পতিত হয় গভীর শোকের ছায়া। রামদাসী সম্প্রদায়ের শত শত লোক সাক্ষাৎনয়নে আসিয়া উপস্থিত হয়। উদ্ধব গোসাবী ও অজ্ঞাত প্রধান শিষ্য ও মহান্তেরা ভারাক্রান্ত হৃদয়ে গুরুর শেষ-কৃত্যের আয়োজন সম্পূর্ণ করেন। পবিত্র তুলসীতরু জ্বালাইয়া রামদাস স্বামীর মরদেহ করা হয় ভস্মীভূত।

প্রভু রঘুবীরজীর নিত্যদাস—সমর্থ রামদাস ইহলোক ছাড়িয়া চলিয়া গেলেন। কিন্তু তাঁহার ধর্মরাজ্যের, রামরাজ্যের, ধ্যানকল্পনার বীজ ছড়াইয়া দিয়া গেলেন সারা ভারতের আকাশে বাতাসে।

# একনাথ স্বামী

মারাঠার ভক্তি আন্দোলনের আদি ও প্রধান উৎস পঙ্করপুর। এখানকার জাগ্রত বিগ্রহ বিঠ্ঠলজীকে কেন্দ্র করিয়া ত্রয়োদশ ও চতুর্দশ শতকে প্রেমভক্তির যে প্লাবন উৎসারিত হয় তাহার নায়ক ছিলেন জ্ঞানদেব ও নামদেব। এই দুই মহাত্মার প্রয়াণের পর ভক্তি আন্দোলন কিছুটা স্তিমিত হইয়া আসে, সমাজজীবনে দেখা দেয় অনাচার, বিশৃঙ্খলা ও ধর্মবিমুখতা। এই অবনতি ও অবক্ষয়ের দিনে, জ্ঞানদেব ও নামদেবের প্রায় দুইশত বৎসর ব্যবধানে, আবির্ভূত হন একনাথ স্বামী। মারাঠার বৈষ্ণব আন্দোলনে তিনি সঞ্চারিত করেন নূতন প্রাণপ্রবাহ, ভক্তি ও প্রপত্তির পরম পাথেয় পৌঁছাইয়া দেন সমাজের উচ্চনীচ ধনী নির্ধন সকল মানুষের অঙ্গনে।

পঞ্চদশ শতকের তৃতীয় পাদের কথা। এসময়ে পৈঠান বা প্রাতিষ্ঠানপুরে অভ্যুদয় ঘটে সাধকপ্রবর ভানুদাসের। একজন সিদ্ধ বৈষ্ণব বলিয়া এ অঞ্চলের সর্বত্র তিনি পরিচিত ছিলেন। পঙ্করপুরের বিঠ্ঠলজী বিগ্রহের পুনঃপ্রতিষ্ঠা ও তাঁহার সেবা পূজার প্রবর্তন করিয়াও ভানুদাস প্রসিদ্ধ হন। মুসলমান রাজাদের অত্যাচারে পঙ্করপুরের মন্দির দুইবার বিধ্বস্ত হয়। বিজয়নগরের রাজা কৃষ্ণরায় তাই বিঠ্ঠলজী বিগ্রহের নিরাপত্তা বিধানের জন্ত তৎপর হইয়া উঠেন এবং নিজের রাজধানী হাম্পি নগরে এক নূতন মন্দিরে করেন ইহাকে সংস্থাপিত। রাজনৈতিক অশান্তি ও উপদ্রব অতঃপর কমিয়া যায় এবং পঙ্করপুরের ভক্তসাধক ভানুদাসের নেতৃত্বে বিঠ্ঠলজীকে দেশে ফিরাইয়া আনার ব্যবস্থা হয়। কথিত আছে, সাধক ভানুদাসই বিজয়নগর হইতে এই ত্রীমূর্তি বহন করিয়া আনেন এবং প্রবর্তন করেন সেবা পূজার নবপর্যায়ের ব্যবস্থা।

এই ভানুদাসেরই বংশে তাঁহার প্রপৌত্ররূপে ১৫৩৩ খ্রীষ্টাব্দে জন্মগ্রহণ করেন সার্বকনামা ভক্তসাধক একনাথ।

একনাথের পিতার নাম সূর্যনারায়ণ, মাতা রুক্মিণী বাদী। একনাথ যখন ছোট শিশু, তখন তাঁহার পিতা মাতা উভয়েরই প্রাণ-বিয়োগ ঘটে। অতঃপর পিতামহ ও পিতামহীর সঙ্গে সে পালিত হইতে থাকে।

অত্যন্ত শুভ সংস্কার নিয়া জন্মিয়াছে, তাই বালককাল হইতেই একনাথের জীবনে প্রকাশ পায় ভগবদ্-ভক্তি। খেলাধুলায় কোনো উৎসাহ নাই, স্বভাবে চাপলা নাই—সৌম্য শান্ত বালক অবসর পাইলেই গ্রামের উপাস্তে শিব-মন্দিরটিতে গিয়া উপস্থিত হয়, সারা দিন সেখানে কাটাইয়া ঘরে ফিরিয়া আসে।

অপূর্ব মেধা একনাথের। মন্দিরে পুরাণ পাঠ ও শাস্ত্রের ব্যাখ্যা-বিশ্লেষণ যাহা হয়, সবই তাঁহার কণ্ঠস্থ। ধর্মজীবনের কাহিনী শুনিতে বসিলেই সে মাতিয়া উঠে, ধ্রুব প্রহ্লাদের পুণ্য কথা ভাবিতে ভাবিতে মন কোথায় উড়াও হইয়া যায়।

একনাথের বয়স তখন বারো বৎসরের বেশী নয়। একদিন জনবিরলপথে শিবমন্দির হইতে সে বাড়িতে ফিরিয়া আসিতেছে, হঠাৎ কানে আসে এক দৈবী প্রত্যাদেশ, “ওরে, বুধা কেন আর কাল ক্ষেপণ করছিস, চলে যা দেবগড়ে জনার্দন স্বামীর কাছে। তিনিই যে তোর চিহ্নিত সদগুরু, তোর জীবনের চাবিকাঠি রয়েছে তাঁরই হাতে।”

বালকের মর্মমূলে কে যেন এক প্রচণ্ড ঝাঁকুনি দিয়া যায়। অজানা লোকের অদৃশ্য ইঙ্গিত মনকে বার বার উচ্চকিত, উদ্ভ্রান্ত করিয়া তোলে। সেইদিনই পিতামহীর স্নেহনীড় ছাড়িয়া, কাহাকেও কিছু না জানাইয়া পদব্রজে সে বাহির হইয়া পড়ে দেবগড়ের উদ্দেশে।

কে এই জনার্দন স্বামী, কি তাঁহার পরিচয়, কিছুই একনাথের জানা নাই। পথ চলিতে চলিতে লোকের মুখে শোনে, তিনি দেবগড়ের কেল্লাদার, মুসলমান রাজার এক অতি বিশ্বাসভাজন ব্যক্তি। যুদ্ধকুশল ও রাজনীতিবিদ বলিয়া যেমন তাঁহার খ্যাতি

আছে, তেমনি খ্যাতি আছে সিদ্ধ সাধকরূপে। সুপ্রসিদ্ধ মহাপুরুষ নৃসিংহ সরস্বতী তাঁহার গুরু। সমর্থগুরুর কৃপা ও আপন সাধনবলে জনার্দনের সাংসারিক জীবন আর অধ্যাত্মজীবনের ঘটনায়ে এক বিশ্বয়কর সমাহার। হিন্দু মুসলমান উভয় সম্প্রদায়ের লোকেই তাঁহাকে শ্রদ্ধা করে, ভালবাসে আন্তরিকভাবে।

কেল্লার ভিতরে জনার্দন স্বামীর দর্শন ঘটিল। সাষ্টাঙ্গ প্রণত হইয়া একনাথ কহেন, “প্রভু, আমি পৈঠানের লোক, ভানুদাসজীর প্রপৌত্র—একনাথ। ঈশ্বর কি বস্তু, কি ক’রে তা লাভ করা যায়, কিছুই আমি জানিনে। কিন্তু কি জানি কেন, এক প্রচণ্ড ব্যাকুলতার বেগ আমায় কেবলি ঠেলে নিয়ে যাচ্ছে।”

“ভানুদাসের প্রপৌত্র তুমি? অতি আনন্দের কথা। তিনি ছিলেন পরম বৈষ্ণব, আমাদের সকলের নমস্। তা বৎস, এত সাধু সন্ত থাকতে আমার মতো কেল্লাদারের কাছে তুমি এলে কেন বলতো?” প্রশ্ন করেন জনার্দন স্বামী।

“প্রত্যাদেশ শুনেছি, আপনিই আমার গুরু, আমার ইহকাল পরকালের চাবিকাঠি আপনারই হাতে।”

“কি ক’রে বুঝলে, বালক, এ প্রত্যাদেশ সত্য?”

“আমার অন্তরাত্মা কেবলই ডেকে বলছে, এ দৈবী আদেশ এসেছে আমারই পরম কল্যাণের জন্ত।” কিছুক্ষণ নীরব থাকিয়া অশ্রুসজল চক্রে একনাথ বলেন, “প্রভু, শৈশবে পিতামাতা হারিয়ে অসহায় হয়ে পড়ি, ঈশ্বরের কৃপায় পিতামহীর আশ্রয় পাই। আজো আবার তেমনি অসহায় হয়ে এই বালক আপনার আশ্রয় চাচ্ছে, আপনি কি কৃপা করবেন না?”

“বৎস, শাস্ত হও। আমি তোমায় আশ্রয় দেবো। সত্য বলতে কি, তোমার আগমন আমার অপ্ৰত্যাশিত নয়। তোমার ছবি আগে থেকেই আমার মানসপটে ফুটে উঠেছে। জন্মান্তরের ভালো সংস্কার আছে তোমার ভেতর। তাইতো এ অল্প বয়সে ঈশ্বরের জন্তে এমন ব্যাকুল হয়েছো।”

পরম যত্নে জনার্দন স্বামী একনাথকে দীক্ষা দেন, সেই সঙ্গে দেন নিগূঢ় ভক্তিসাধনার উপদেশ। বালক শিষ্যের শাস্ত্র পুরাণ অধ্যয়নের উপরও গুরুত্ব দেওয়া হয়। জ্ঞানেশ্বরী গীতা ও ভাগবতের তত্ত্বসমূহে অচিরে একনাথের আয়ত্তে আসিয়া যায়। তাছাড়া, একনিষ্ঠ সাধনার ফলে ভক্তির নবধা লক্ষণও তাহার সাধন-সত্তায় প্রকট হইয়া উঠিতে থাকে।

গুরুগৃহে একাদিক্রমে ছয় বৎসর অতিবাহিত হয়। বালকশিষ্য ক্রমে পদার্পণ করে যৌবনে। শাস্ত্রজ্ঞান, প্রেমাবেগ ও কাব্য প্রতিভার অপরূপ সুরণ দেখা যায় তাঁহার মধ্যে। অপার স্নেহ মমতা দিয়া গুরুজী একনাথকে গড়িয়া তুলিয়াছেন, তাঁহার এই রূপান্তর দেখিয়া সেদিন তাঁহাকে নিভূতে ডাকিয়া কহেন, “বৎস, একনাথ, তোমার সাধনা ও শিক্ষা অনেক দূর এগিয়ে এসেছে। এবার তোমায় গুরু করতে হবে জীবনের একটা দুঃস্বপ্ন পর্যায়। সাধনজীবন ও অধ্যাত্ম-জীবনকে নিয়ে দূরে নিভূতে সরে থাকলে চলবে না। এ সাধন দৃঢ়মূল হয়েছে কিনা, তা বাচাই হবে নিত্যকার ব্যবহারিক জীবনে। উপলব্ধিতে আনতে হবে শ্রীমদ্ভাগবতের পরমতত্ত্ব। সচ্চিদানন্দ বিগ্রহ শ্রীকৃষ্ণই রূপায়িত হয়ে আছেন সৃষ্টির প্রত্যেকটি বস্তুতে। সর্বঘণ্টে ব্যাপ্ত রয়েছে মহাকাশ, তেমনি সর্ব বস্তুতে সর্ব ঘণ্টে—কৃষ্ণ বিরাজিত। তাই তোমার কৃষ্ণসেবা হবে সর্বত্র পরিব্যাপ্ত। এই তত্ত্ব ও সাধনকে জীবনে রূপায়িত করতে হলে ব্যবহারিক জীবন বা সাংসারিক জীবনের প্রত্যেকটি কর্ম করতে হবে কৃষ্ণের কর্ম বলে। আমি ভাবছি, তোমার অধ্যাত্মসাধনার সঙ্গে ব্যবহারিক জীবনের শিক্ষাও তোমাকে দেবো। ছোটোকে মিলিয়ে যদি চলতে পারো, তবেই সার্থক হয়ে উঠবে তোমার এই ভাগবত-ভিত্তিক ধর্মসাধনা।”

অতঃপর একনাথকে গুরু সরকারী কাজকর্মের নানাবিধ শিক্ষা দান করেন। দুর্গের কিছু কিছু দায়িত্বপূর্ণ কাজও ধীরে ধীরে তাঁহার উপর হস্ত হয়।



জনশ্রুতি আছে, এই সময়কার একটি ঘটনায় তরুণ একনাথ যে সাহস, বুদ্ধিমত্তা ও প্রত্যাশমতির পরিচয় দেন, তাহার ফলে দেবগড় কেলা রক্ষা পায় এবং কেলাদার জনার্দন স্বামীও এক ভয়ঙ্কর বিপদ এড়াইতে সক্ষম হন।

সেদিন গভীর রাত্রির অন্ধকারে নিতান্ত আকস্মিকভাবে শত্রুর এক সেনাবাহিনী দেবগড় আক্রমণ করিয়া বসে। জনার্দন স্বামী তখন কেলায় অভ্যস্তরে একটি নির্জন কক্ষে রহিয়াছেন ধ্যানাবিষ্ট। শত্রুসেনা রণলঙ্কার দিয়া প্রাণপণে গুলীবর্ষণ করিতেছে, দুই একটি দল পাহাড়ের গা বাহিয়া উপরে উঠার চেষ্টাও করিতেছে। এই সঙ্কট সময়ে কেলায় নায়কের দেখা নাই, কেলায় রক্ষীদল কিংকর্তব্য-বিমূঢ় হইয়া ইতস্তত ছুটাছুটি করিতেছে।

তরুণ একনাথ চকিতে এ বিপদের গুরুত্ব বুঝিয়া নিয়াছেন। গুরুদেবকে ধ্যানাসন হইতে উঠানোর উপায় নাই, অথচ শত্রুর প্রতিরোধ এখনই করিতে হইবে। তড়িৎবেগে তিনি জনার্দন স্বামীর কক্ষে ঢুকিয়া পড়েন, নিজেকে সজ্জিত করেন তাঁহার বর্ম, শিরস্ত্রাণ ও অস্ত্রশস্ত্রে। তারপর হুর্গপ্রাকারে দাঁড়াইয়া দক্ষ নায়কের মতো দেন প্রতি-আক্রমণের নির্দেশ। রাত্রির অন্ধকারে যুদ্ধের হাঁকডাক ও উত্তেজনায় একনাথকে কেহই চিনতে পারে নাই, ভাবিয়াছে হুর্গের নায়ক জনার্দন স্বামীই তাঁহার হুর্ভেদ্য বর্ম শিরস্ত্রাণ পরিধান করিয়া দিতেছেন কৌশলপূর্ণ সামরিক নির্দেশ।

তীব্র প্রতিরোধের ফলে শত্রুসেনার মনোবল সেদিন ভাঙিয়া পড়ে, পরাস্ত হইয়া তাহারা পলায়নপর হয়।

ইতিমধ্যে জনার্দন স্বামী ধ্যানাসন হইতে বাখিত হইয়াছেন। বাহজ্ঞান পাইবার সঙ্গে সঙ্গে ঘটনায় গুরুত্ব বুঝিয়া নিতে তাঁহার দেহি হইল না। এ ঘোর বিপদে একনাথের উপস্থিত বুদ্ধি, বীর্য ও নেতৃত্বই আজ অসাধ্য সাধন করিয়াছে। শত্রু সেনা যেমন বিধ্বস্ত হইয়াছে তেমনি হুর্গবাসীদেরও হইয়াছে প্রাণরক্ষা।

একবার জনার্দন স্বামী সরকারের একটি জটিল হিসাব নিয়া

বড় বিপদে পড়েন। হিসাবে একটা মারাত্মক ভুল রহিয়াছে কিন্তু সে ভুলের সূত্রটি খুঁজিয়া পাওয়া যাইতেছে না। কয়েকদিন ধরিয়া অবিরত চেষ্টা চলিল, কিন্তু সমস্তার সমাধান হইল না। একনাথের একটা বিশেষ গুণ, যখনি যে কাজে তিনি হাত দেন, নিষ্ঠা ও দায়িত্ব নিয়া তাহা সম্পন্ন করেন। জনার্দন স্বামী তাঁহার এই হিসাবের গরমিল সংশোধনের ভার শিষ্যের উপরই দিলেন।

একনাথ একাগ্র হইয়া এই হিসাবের খাতা নিয়া পড়িলেন এবং বহু পরিশ্রমের পর ভুলের সূত্র খুঁজিয়া পাওয়া গেল। জনার্দন স্বামী তো মহা আনন্দিত। কহিলেন, “বৎস, একনাথ, তোমার নিষ্ঠা ও মনঃ-সংযম প্রশংসনীয়। মনে রেখো এমনিভাবে অধ্যাত্ম-সাধনের উপরেও মনকে করতে হবে কেন্দ্রীভূত। তোমায় আমি একটি নিগূঢ় সাধন এবার দেবো। কেল্লার বাইরে যে গহন অরণ্য রয়েছে, সেখানে বসে এই প্রক্রিয়াটি তুমি দীর্ঘকাল ধরে অনুষ্ঠান করো। আশীর্বাদ করি, তোমার সাধনা অচিরে জয়যুক্ত হয়ে উঠুক।”

গুরুর এই আশীর্বাদ সফল হইয়া উঠে, ভক্তিপ্রেম-সিদ্ধ একনাথ গ্রীহরির দর্শনলাভে হন কৃতকৃতার্থ।

শিষ্যের এ সাকল্যে জনার্দন স্বামীর আনন্দের অবধি নাই। স্নেহপূর্ণ স্বরে কহিলেন, “বৎস, একনাথ, আমার এখানে আর তোমার অবস্থান করার প্রয়োজন নেই। ইষ্টদেবের নাম স্মরণ করে, বেরিয়ে পড়ো, দর্শন করো দেশের প্রধান প্রধান দেবমন্দির ও তীর্থগুলি।”

পিতৃসম মমতায় গুরুদেব এ কয়টি বৎসর একনাথকে সঞ্জীবিত রাখিয়াছেন, গুরুরূপে তাঁহার সাধনজীবনকে করিয়াছেন উদ্দীপিত। এবার আসিয়াছে বিচ্ছেদের পালা।

সজলচক্ষে করজোড়ে একনাথ কহেন, “প্রভু, এ ক’টি বৎসর এমন নিবিড় ক’রে আপনাকে পেয়েছিলাম, কোনোদিন ভাবতেও পারি নি, এভাবে আপনি আমায় দূরে সরিয়ে দেবেন।”

“না, বৎস, দূরে আমি কোনোদিনই থাকবো না, দীক্ষামস্তুর মধ্যেই যে থাকে গুরুর নিবাস, ইষ্টদেবের জড়িয়ে থাকেন তিনি

ওতপ্রোত হয়ে। তোমায় আমার বিচ্ছেদ কোনোদিনই হবে না, আর শোন—তীর্থ পরিক্রমায় একটা বড় লাভ আছে।”

“বুঝিয়ে বলুন আমায়, প্রভু।”

হ্যাঁ, এই পরিক্রমা উপলক্ষে পথে প্রাস্তরে, বনে জঙ্গলে কত ঘুরে বেড়াতে হবে, সাধু তপস্বী, যোগী ভোগী সবাইই মুখোমুখি তোমায় হতে হবে। পর্যটনের জীবনে আসবে কত সুখ-দুঃখ, কত উত্থান পতন, কত বিচিত্র অভিজ্ঞতা। এই উত্থান-পতনের মধ্যে নামজপ আর ইষ্টধ্যান ঠিক থাকে কিনা, ইষ্টের উপলব্ধি আরো দৃঢ় হয় কিনা, সঠিকভাবে তা যাচাই করা হয়ে যাবে।”

পারিব্রাজন ও তীর্থদর্শনে কয়েক বৎসর অতিবাহিত হয়, তারপর একনাথ দেবগড়ে গুরুর সকাশে আসিয়া উপনীত হন। গুরু ও শিষ্যের পুনর্মিলনে দিব্য আনন্দ উৎসারিত হইয়া উঠে।

স্নেহপূর্ণ স্বরে জনার্দন কহেন, “বৎস, তোমার উপর আমি অত্যন্ত প্রসন্ন হইয়াছি। ঈশ্বর উপলব্ধি তোমার দৃঢ়তর হয়েছে, সাধনায় হয়েছে। তুমি সফলকাম। এবার নিজের ঘরে ফিরে যাও। বিবাহ ক’রে সংসারী হও।”

একথা শোনা মাত্র আতকিয়া উঠেন একনাথ। তিনি কিছু বলার আগেই জনার্দন স্বামী হাঙ্গামা কহেন, “এতে বিস্মিত বা ক্ষুব্ধ হবার কিছু নেই, একনাথ। সাধনাজীবনে জ্ঞান ভক্তি কর্মের সমন্বয় ফুটিয়ে তোলার উপদেশ দিয়েছিলেন আমার গুরুদেব শ্রীনৃসিংহ সরস্বতী। তার কিছুটা নিদর্শন তুমি দেবগড়ে অবস্থান ক’রে প্রত্যক্ষ করেছো। তোমাকেও তেমনি জীবন যাপন করতে হবে। হ্যাঁ, তুমি বিবাহ করো,—যাপন করো অনাসক্ত কৃষ্ণভক্তের জীবন। কৃষ্ণ আর কৃষ্ণের রচিত এই বিশ্বসংসার এই উভয়কেই অবলম্বন ক’রে থাকো। কৃষ্ণময় হও তুমি, আর প্রতি ভক্ত-মানুষের হৃদয়ে গড়ে তোল এক একটি কৃষ্ণমন্দির। আমার আর একটা নির্দেশ, সাধারণ ভক্তমানুষের উপযোগী সুখবোধ্য ভক্তি-গ্রন্থাদি তুমি রচনা করো,

পুরাণ শাস্ত্রের তত্ত্ব ও কাহিনীকে জনমানসের গ্রহণীয় ক'রে দিকে দিকে ছড়িয়ে দাও।”

গুরুর নির্দেশ একনাথ শিরোধার্য করিয়া নেন। পৈঠানে কিরিয়া গিয়া মিলিত হন বুদ্ধ পিতামহ ও পিতামহীর সঙ্গে। অতঃপর বিজ্ঞাপুরের এক সং ব্রাহ্মণের কন্যাকে তিনি বিবাহ করেন। নাম তাঁহার গিরিজাবাসী। একনাথের সাধনা ও ধর্মাচরণে পতিব্রতা গিরিজাবাসী চিরকাল অকুষ্ঠ চিন্তে সহযোগিতা করিয়া গিয়াছেন।

এবার পৈঠানে বসিয়া একনাথ রচনা করেন বহুতর ভক্তিমূলক গ্রন্থ। ইহাদের মধ্যে সাহিত্য, দর্শন ও ভাবসম্পদের দিক দিয়া সর্বাপেক্ষা গরীয়ান্ তাঁহার ভাগবতের ব্যাখ্যা। একাদশ স্বন্ধকে ভিত্তি করিয়া এটি রচিত। মারাঠী জনসাধারণ এ গ্রন্থকে বলে একনাথী ভাগবত। বিশহাজার পদ-সমন্বিত এই মহান্ গ্রন্থ মারাঠী সাহিত্যের এক অক্ষয় কীর্তি।

‘ভাবার্থ রামায়ণ’ একনাথের অগ্রতম সার্থক আধ্যাত্মিক সাহিত্য-কীর্তি। একনাথ নিজে বলিয়া গিয়াছেন—রামভক্তির এক দৈবী প্রেরণায় উদ্বুদ্ধ হইয়া এই গ্রন্থ রচনা তিনি শুরু করেন। কিন্তু যুদ্ধ-কাণ্ডের চতুর্দশ অধ্যায় অবধি গিয়া আর এটি তিনি শেষ করিয়া যাইতে পারেন নাই। তাঁহার অগ্রতম প্রিয় শিষ্য গাবোয়া এটি সমাপ্ত করেন। রুক্মিণী স্বয়ম্বর একনাথের আর এক উল্লেখযোগ্য সৃষ্টি। কৃষ্ণ-রুক্মিণীর সুমধুর প্রেমরসের ভিষান চড়ানো হইয়াছে ইহাতে। ইহা ছাড়া, তাঁহার অগ্ৰাণ্ণ রচনার মধ্যে রহিয়াছে চতুঃশ্লোকী ভাগবত, স্বাত্মসুখ ও কয়েক শত মনোজ্ঞ অভঙ্গপদ। এই সব রচনায় একনাথের অধ্যাত্ম-অনুভূতি ও জীবনদর্শনই শুধু প্রকাশিত হয় নাই, তাঁহার কবিত্বশক্তির মহিমাও চমৎকার রূপে ফুটিয়া উঠিয়াছে।

উত্তরসূরী জ্ঞানদেব ও নামদেবের প্রভাব একনাথের মধ্যে যথেষ্টই আছে, কারণ; জ্ঞানদেবের জ্ঞানেশ্বরী গীতা, অমৃতানুভব এবং নামদেবের প্রেম-ভক্তি-আপ্নুত অভঙ্গের দ্বারা তিনি অনেকাংশে অনুপ্রাণিত। কিন্তু তৎসঙ্গেও নিজ সাহিত্য-কৃতিতে একনাথের

স্বকীয়তা ফুটিয়া উঠিয়াছে। ভক্তিরসাত্মক সাহিত্য সৃষ্টি করিলেও জ্ঞানদেব ও নামদেব তাঁহাদের গুরু নাথযোগীদের দার্শনিক মতবাদ এড়াইতে পারেন নাই। কিন্তু একনাথের সময়ে মারাঠার ভক্তি-আন্দোলনে রামায়ণ, মহাভারত, ভাগবত প্রভৃতি পুরাণ শাস্ত্রের প্রচার বাড়িয়াছে, ভক্তিদর্ম তাহার উৎস খুঁজিয়া পাইয়াছে সনাতন ধর্ম ও অবতার পুরুষদের লীলা কাহিনীতে। এই উৎস হইতেই, বিশেষ করিয়া ভাগবত পুরাণ হইতে একনাথ সংগ্রহ করিলেন তাঁহার অধ্যাত্ম-সাহিত্যের মূল রস। তারপর গুরুর নির্দেশ অনুযায়ী সহজ ভাষায়, সর্বজনীন সংবেদনে, তাহা পরিবেশন করিলেন ভক্ত সাধারণের কাছে। ফলে অল্পকালের মধ্যে একনাথ চিহ্নিত হইয়া উঠিলেন এক ভক্তিসিদ্ধ আচার্য্যরূপে। তাঁহাকে কেন্দ্র করিয়া এক নবতর খাতে হরিকথা ও হরিভক্তির রসপ্রবাহ সারা দেশে বিস্তারিত হইয়া পড়িল। পৌরাণিক ভক্তিদর্ম মারাঠায় পুনরুজ্জীবিত হইয়া উঠিল তাঁহারই জীবন সাধনা ও সাহিত্যকৃতির মধ্য দিয়া।

অধ্যাপক পটবর্ধন একনাথের সাধনজীবন ও কবিত্ব শক্তির ব্যাখ্যা-বিশ্লেষণ করিতে গিয়া একস্থানে বলিয়াছেন—একনাথের রচনায় অন্তরের আবেগধর্মিতা ও ভাবরসের সহিত মিলিত হইয়াছে ভক্তি-সাধনার পরমতত্ত্ব। তাই দেখা যায়, একনাথ শুধু একজন ভক্তি-সিদ্ধ মহাপুরুষ মাত্র ছিলেন না, এই সঙ্গে তিনি ছিলেন অতি উচ্চ শ্রেণীর একজন ভাবুক কবি। প্রধানত এই কারণেই একনাথ কীর্তিত হন একজন অতিশয় জনপ্রিয় ধর্মগুরু রূপে।<sup>১</sup>

ভক্ত কবি, সিদ্ধপুরুষ, একনাথের খ্যাতি পৈঠান ও পদ্ধারপুর অঞ্চলে পরিব্যাপ্ত হইয়া পড়ে। শত শত লোক আসিয়া ভিড় জমায় তাঁহার কীর্তনের অঙ্গনে। মহারাষ্ট্রের সর্বত্র তিনি পরিচিত হইয়া উঠেন একনাথ স্বামী নামে।

একনাথের রচিত অভঙ্গপদে “গুরুভক্তি ও গুরুর পদে আত্ম-

১ অধ্যাপক পটবর্ধন : উইলসন কিলগলিক্যাল লেকচার্স।

সমর্পণের তত্ব বার বার প্রচারিত হইয়াছে। একটি অভঙ্গে কৃতজ্ঞতা জানাইয়া তিনি বলিতেছেন—

গুরুর দেওয়া বিপুল ঋণ—

কি করে একনাথ শুধবে তার এই জীবনে ?

গুরু দেখিয়েছেন এক চমকপ্রদ ইন্দ্রজাল—

শিষ্য একনাথের অহমিকার তীব্র বিষ

নিঃশেষে করেছেন তিনি পান,

দৃষ্টি টেনে নিয়েছেন অন্তরের গভীরে,

যেখানে রয়েছে সেই দিব্য আলোকের উদ্ভাসন—

নেই কখনো যার উদয় আর অস্ত। ( অভঙ্গ ৪)

গুরুদেবের কৃপা হইতেছে পরশ-পাথর, যাহার স্পর্শগুণে শিষ্য ধন্য হয়, তাহার সর্বসত্তায় ঘটে রূপান্তর। একনাথ আর একটি পদে তাঁহার গুরু জনার্দন স্বামীর মহিমা জ্ঞাপন করিতেছেন :

এ কি পরম বিস্ময় ঘটালেন গুরু আমায় দিয়ে,

হৃদয় কন্দরে করালেন ক্রীভগবানের দর্শন।

আর এমনি কৃপালু তিনি

ত্যাগ ছুঁথের চরম মূল্য থেকে

দিলেন আমায় অব্যাহতি।

শোন তবে গুরু-কৃপার গোপন রহস্য।

এই কৃপার আলোয় সর্ব বস্তু সর্ব চরাচর

হয়ে ওঠে ঈশ্বরময়।

চোখে যা দেখি, কানে যা শুনি,

যে আশ্বাদ গ্রহণ করি জিহ্বায়,

সব কিছুতেই পাই ঈশ্বরের পরিচয়। ( অভঙ্গ ৮)

ভক্তি আর নাম-সাধনা সম্পর্কে একনাথের বাণী মর্মস্পর্শী। তাঁহার মতে জীবন-প্রভু ঈশ্বরের নিরন্তর স্মরণই জীবন, আর ঈশ্বরের বিমুখতা ও বিস্মরণ হইতেছে মায়া-বিভ্রম।

স্মরণ মনন ও জপ কীর্তনের যে কোনো সাধনই শ্রীভগবান্কে অমোঘ শক্তিতে আকর্ষণ করে, তিনি ছুটিয়া আসেন এই ধূলার ধরণীতে। একটি পদে একনাথ গাহিতেছেন—‘সদা অনুধ্যানের কলেই তো তিনি ত্রাণ করলেন যখন কোপন স্বভাব ঋষি ও তাঁর ব্রাহ্মণ শিষ্যেরা এসে চাইলেন ক্ষুধার অন্ন ; অর্জুনের ভাবনায় সদা জাগ্রত ছিলেন কৃষ্ণ, তাই তো প্রভু বাঁচিয়েছিলেন তাঁকে বার বার। ভক্তিতে শুধু শ্রীভগবান্ দর্শনই দান করেন না, ভক্তের বশুতাও তিনি স্বীকার করেন। এমনি তাঁর মহত্ব, আর এমনি চিরায়ত ভক্তি-সাধনার মাহাত্ম্য’ :

সদা ভক্ত-বশ আমার পরম প্রভু—

দ্রৌপদীকে করেন উদ্ধার তার চরম বিপদে,

সুদামার দারিদ্র্য-দুঃখ মুহূর্তে করেন দূর।

পরীক্ষিতকে মাতৃজঠরে বাঁচাতো কে

যদি না হতো তাঁর কৃপাঘন দৃষ্টিপাত ?

গোবর্ধন ধারণ ক’রে, তার নিচে গিরিধর

রক্ষা করেন গাভী আর গোপগোপীদের।

গোরা কুমোরের সাথে বসে প্রভু আমার

শুকিয়ে তোলেন ভেজা মাটির ভাণ্ড।

চোখা মেলার সাথে চড়ান পশুর দল,

সাওতা মালীর পাশে বসে কাটেন বুনো ঘাস।

কবীরের সাথে টানা-পোড়েনে বুনেন কাপড়,

রুইদাসের সঙ্গী হয়ে চামড়ার রং লাগান,

সজন কসাইর মাংস বিক্রয়

আর স্বর্ণকার নরহরির সোনা গালানোর কাজে

হাত এগিয়ে দেন কৃপালু প্রভু।

জনাবাসীর গোবর সানন্দে বহন করেন তিনি,

আবার ভূমিকা নেন দামাজীর পারিয়া দূতের।

মহারাত্তের জনগণ পৌরাণিক সংস্কৃত সাহিত্যের সহিত বিশেষ

পরিচিত ছিল না। একনাথ স্বামী এই পরিচয় সাধিত করিলেন প্রধানত তাঁহার একনাথী ভাগবত ও রামায়ণ ভাষ্যের মধ্য দিয়া।

জ্ঞানদেবের জ্ঞানেশ্বরী গীতার প্রভাব একনাথের সাধনজীবন ও সাহিত্যকর্মের উপর যথেষ্ট ছিল। একনাথ নিজে তাহা অকুণ্ঠ চিন্তে স্বীকার করিয়াও গিয়াছেন। কিন্তু তথ্য প্রমাণ হইতে দেখা যায়, গুরুর আদেশে ভাগবত-অনুকূল ভক্তিপ্রেমের যে সাধনা তিনি গ্রহণ করিয়াছিলেন, গুরুকৃপায় যে সাধনায় সিদ্ধ হইয়াছিলেন, উত্তর কালে তাঁহার ব্যক্তিহ ও জীবনদর্শনে তাহাই প্রতিকলিত হইয়া উঠে অধিক পরিমাণে।

নিজের প্রেমভক্তি সাধনার অন্ত্যতম উৎস ভাগবত সম্পর্কে একনাথের উক্তিটি বড় মনোরম। তিনি বলিতেছেন : ত্রীভাগবত হচ্ছে একটি বড় ক্ষেত্র। ব্রহ্মা প্রথমে এর জন্ত প্রদান করেন শস্ত্র-বীজ। নারদ এই ক্ষেত্রের অধিকারী, ঐ শস্ত্র-বীজ তিনিই বপন করেন তাঁর নিপুণ হস্তে। ব্যাসদেব করেন ঐ ক্ষেত্রের নিরাপত্তার ব্যবস্থা—দশটি বাঁধ দিয়ে বেঁধে দেন এর চারিদিকে। ফলে সে স্থান ভরে ওঠে দিব্য আনন্দ আর শান্তির কসলে। শুক এই কসল পাহারা দেবার ভার গ্রহণ করেন। হরিনাম অবিরত নিক্ষেপ করেন তিনি, আর পাপরূপ পাখিরা যায় দূরে পালিয়ে। ভক্ত উদ্ধব করেছিলেন কেটে-আনা শস্ত্রের ঝাড়-বাছাই। কৃষ্ণজীর পরম বাণীর মূল্যবান শস্ত্রকণা বার ক’রে রেখেছিলেন তা’ থেকে। এ থেকে তৈরি হয়েছে দিব্যালোকের সৌরভ মাখানো কত আহাৰ্য। পরীক্ষিৎ এলেন তারপর। সংসার থেকে বিচ্ছিন্ন হয়ে বসে, শুক-দেবের মুখে পবিত্র ভাগবত কথা শুনে পান করেন তিনি ভাগবতী আনন্দের সুখ। তাঁর পদাঙ্ক অনুসরণ ক’রে ত্রীধর ভাগবতের নিগূঢ় মর্মকথার ওপর করেন আলোকপাত, দিব্য আনন্দ লাভ ক’রে নিজে হন কৃতকৃতার্থ। জনার্দন স্বামীর প্রিয় মক্ষিকা, একনাথ, তাঁর মায়াঠী ভাবার ছুটি পাখনা মেলে উড়ে গিয়ে বসেছে সেই লোভনীয় সুধার ওপর, প্রাণভরে ভোজন ক’রে হয়েছে ধন্ত।”



ভক্তি-সাধনকে একনাথ স্বামী বলিয়াছেন : পরম ধামে গমনের প্রশস্ত রাজকীয় পথ । শ্রীহরি স্বয়ং এ পথের রক্ষণাবেক্ষণকারী, পথে তিনি চক্র হস্তে দাঁড়ানো থাকেন । আক্রমণকারী দস্যু বা বৈরীদের করেন হনন । নিজস্ব অস্ত্র দিয়ে প্রভু আরো একটি বড় কৃপার কাজ করেন । সাধনপথের বড় শত্রু—সাধকের অহংবোধ । এই অহং-বোধকে কৃপালু প্রভু চূর্ণ করেন তাঁর গদার আঘাতে । তাঁর মঙ্গল শব্দের ধ্বনিতে শুচিশূত্র হয়ে ওঠে ভক্তের অন্তর, জ্ঞানালোক প্রবেশ করে তাতে । আর শ্রীহস্তের প্রসুতিত কমল দিয়ে আপ্তকাম ভক্তের করেন তিনি সংবর্ধনা ।

আদর্শ ভক্ত ও তাঁহার ভক্তিসিদ্ধির যে বর্ণনা একনাথ দিয়াছেন তাহা ভাগবত হইতেই নেওয়া :

—এই চরম অবস্থায় পথ ও লক্ষ্যবস্তু এক হয়ে ওঠে—ঈশ্বরের বরণীয়, কৃপাপ্রাপ্ত ছই-চারটি সাধকের ভাগ্যেই এটা ঘটতে দেখা যায় । একৈকনিষ্ঠা আর শরণাগতির ফলে, সাধক গুরুর কৃপা লাভে ধ্যাত্ত্ব হন, উপলব্ধি করেন আত্মার স্বরূপ । তিনি দেখতে পান, সব মানুষের হৃদয়েই বিরাজিত রয়েছে শ্রীহরির মন্দির । শ্রীহরিকে দেখেন তিনি ভিতরে ও বাইরে, সর্বত্র সর্ববস্তুতে । তারপর ধ্যান আর ধ্যেয়ের ভেতর থাকে না কোনো পার্থক্য । ভক্ত নিজেই হয়ে যান ভগবান্—যিনি সারা বিশ্ব ব্রহ্মাণ্ডে রয়েছেন ওতপ্রোত । এখন থেকে অবস্থান, চলাফেরা সব কিছু ভগবানের মধ্যে, ভগবানের সারূপ্য লাভ করেন তিনি । নাম রূপ, কার্য কারণের বিভেদ ঘুচে যায়, এ অবস্থায় সর্ববস্তুর মধ্যে প্রকৃত ভগবৎ-সত্তাকে তিনি দেখতে পান । সৃষ্টির এত কিছু বৈচিত্র্য, বৈষম্য ও ভেদের মধ্যে—এক ও অদ্বিতীয় পরমবস্তু শ্রীভগবান্কে নিরন্তর করেন তিনি প্রত্যক্ষ । একনাথ বলেন, সর্বভূতে ভগবৎ-দর্শন—এই হচ্ছে ভক্তি সাধনার চরম কথা । কিন্তু এ অবস্থা ভক্ত লাভ করতে পারে না—যদি না প্রভুর কৃপার আলোয় তাঁর হৃদয় হয় উদ্ভাসিত ।

গুরু জনার্দন স্বামীর কুপায় ও নিজের সাধন বলে একনাথ-স্বামী পরিণত হন এক ভক্তিসিদ্ধ মহাপুরুষরূপে। নিজ জীবনে এই সিদ্ধি কি ভাবে আসিল, কি ছিল তখনকার অতীন্দ্রিয় অভিজ্ঞতা, এ তথ্য তাঁহার কতকগুলি অভঙ্গপদে নিহিত রহিয়াছে।

একটি পদে তিনি গাহিতেছেন :

অন্তরাঙ্গায় অধ্যাত্ম-সূর্যের ঘটলো দীপ্তিময় প্রকাশ—  
দেখলাম আমি, এ প্রকাশের নেই উষা,  
নেই মধ্যাহ্ন বা অস্তাচল।  
নেই এর কোনো আদি বা অন্ত।  
সম্মুখে আমার আত্মিক সূর্যের চির উদ্ভাসন,  
পূর্ব-পশ্চিমের পার্থক্য চিরকালের মতো গেছে ঘুচে।  
কর্ম আর নৈকর্ম দুই-ই হয়ে গেছে অর্থহীন  
দিনের আকাশে চাঁদের ছায়ার মতো।

একনাথ স্বামী ভক্তিসিদ্ধ মহাপুরুষ। বহুজনের বন্দিত, বহুজনের সাধনপথের আলোক দিশারী তিনি। কিন্তু শ্রদ্ধেয় গুরুদেব জনার্দন স্বামীর নির্দেশে, চিরদিন তিনি লোকালয়েই বাস করিয়াছেন, যাপন করিয়াছেন সাধারণ ভক্ত বৈষ্ণবের গৃহস্থ জীবন। ঘৃতের প্রদীপের মতো এই জীবন পবিত্রতা আর স্নিগ্ধতায় ভরা। এই প্রদীপের আলো বিকীর্ণ হয় প্রায় চল্লিশ বৎসর ব্যাপিয়া। মহারাষ্ট্রের সহস্র সহস্র ভক্তের সাধনজীবন এই কল্যাণময় আলোকের দীপ্তিতে উজ্জ্বল হইয়া উঠে।

পৈঠানে একনাথের দিনচর্চা ছিল এইরূপ : প্রত্যুষে উঠিয়া তিনি কিছুটা সময় ধ্যান-ভজনে অতিবাহিত করিতেন। তারপর নদীতে গিয়া সমাপন করিতেন স্নান তর্পণ। এবার শাস্ত্রপাঠের পর্ব। ভাগবত ও গীতার পাঠ ব্যাখ্যায় আসরে সমবেত হইত অন্তরঙ্গ ভক্তমণ্ডলী। দিব্যভাবে আবিষ্ট পরম বৈষ্ণবের মুখনিঃসৃত বাণী ও উপদেশ সকলে উৎকর্ষ হইয়া শুনিতেন। মধ্যাহ্ন-ভোজনের একটা বিশেষ অঙ্গ ছিল অতিথি সংকার। অতিথিদের সঙ্গে নিয়া

মিতাহারী একনাথ আহার ক্রিয়া সম্পন্ন করিতেন। বিশ্রামের পর অপরাহ্নে আবার ভক্তিগ্রন্থ পাঠ। জ্ঞানেশ্বরী গীতা বা ভাগবত এই দুইটি প্রিয় গ্রন্থ প্রধানত তিনি আলোচনা করিতেন। শ্রোতাদের মধ্যে তখন বহিয়া বাইত প্রেম-ভক্তি রসের অমৃত প্রবাহ। সর্বাপেক্ষা আকর্ষণীয় ছিল একনাথের সাক্ষ্য সংকীর্তন। নিজের রচিত অভঙ্গ পদ গাহিয়া গাহিয়া একনাথ স্বামী ভাবরসে উদ্বেল হইয়া উঠিতেন। ভক্তদের মধ্যে জাগিয়া উঠিত ভক্তিপ্রেমের প্রবল উদ্দীপনা। দূর-দূরান্ত হইতে বহু দর্শনার্থীদের আগমন ঘটিত পৈঠানের এই বৈষ্ণব মহাত্মার দর্শনের জন্ম।

একনাথ ছিলেন প্রকৃত বৈষ্ণব, ভক্তেরা শ্রীভগবানের আপনজন, প্রিয়জন, তাঁহাদের মধ্যে বর্ণবৈষম্য থাকিবে, তাঁহার কাছে এই চিন্তা ছিল অসহনীয়। কীর্তনের আসরে উচ্চ নীচ, ব্রাহ্মণ অন্ত্যজ, সকলের সঙ্গে তিনি একসঙ্গে উপবেশন করেন, নির্বিচারে যে কোনো জাতির ভক্ত অতিথিদের নিয়া ভোজনে বসেন, গ্রামের ব্রাহ্মণেরা ইহা সূচক্ষে দেখেন নাই। কঠোর ভাষায় তাঁহার একনাথের এই আচরণের বিরুদ্ধে বলাবলি করিতে থাকেন।

একনাথ কিন্তু এবিষয়ে একেবারে নির্বিকার। স্বরচিত অভঙ্গ-পদে তিনি গাহিলেন—

হো কাঁ বর্ণমাজী অগ্রণী।

ষো বিমুখ হরিচরণী।

ত্যাহুনি ষপচ শ্রেষ্ঠ মানী—

জো ভগবদ্ ভজনী প্রেমল।

—শ্রীহরির চরণকমল থেকে যে বিমুখ, বর্ণের দিক দিয়ে অগ্রণী হয়েও সে যে নিষ্ফল, ব্যর্থ। তার থেকে সেই চণ্ডালও শ্রেষ্ঠ যদি সে প্রেমভরে করে ভগবদ্ ভজন।

পৈঠান ও তাহার কাছাকাছি গ্রামের উচ্চবর্ণের লোকেরা ছিলেন

স্বভাবত রক্ষণশীল। একনাথ স্বামীর নৃত্য কীর্তন ও ধর্ম উপদেশ সমাজে বিশৃঙ্খলা আনিতেছে, সমাজকে ধ্বংসের পথে টানিয়া নিতেছে বলিয়া তাহার সোরগোল তুলিলেন। জনগণের মধ্যে একনাথের প্রভাব দিন দিনই বৃদ্ধির পথে, ইহাতেও অনেকের ঈর্ষার অবধি নাই। গুরু হইল নানা নিন্দাবাদ। বিরোধীরা রুটাইলেন, একনাথের। গুরুকরণ হয় নাই। সত্যকার কোনো সাধনা ও সিদ্ধিও তাঁহার নাই। যশ ও অর্থের লোভে তিনি ভূয়া আচার্যগিরি করিতেছেন, লোক ঠকাইয়া বেড়াইতেছেন।

এই সব ছর্নাম একনাথ স্বামী শুনিলেন, কিন্তু তাঁহাকে কিছুমাত্র বিচলিত হইতে দেখা গেল না। উদার ক্ষমাসুন্দর সাধক ইহার উত্তরে যাহা লিখিলেন যে কোনো সাধক বা সমাজ-সংস্কারকের কাছে তাহা চিরকাল স্মরণ রাখার মতো।

নিন্দক কামাচা কামাচা।

গড়ী আত্মারামাচা।

নিন্দক আমুচী গঙ্গা।

আমুচী পাতকেঁ নেতে ভঙ্গ।

নিন্দক আমুচা সখা।

আমুচী বস্ত্রে ধুনো ফুকা।

নিন্দক আমুচী কাশী।

আমুচী পাতকেঁ অবধী নাশী-

নিন্দক আমুচা গুরু

এক জনার্দন ধোঁক।<sup>১</sup>

—নিন্দকেরা আমার অতি প্রিয়, কারণ তারা যে সৃষ্ট একই আত্মারামের দ্বারা। নিন্দকেরা যেন গঙ্গার পবিত্র ধারা, আমাদের যত কিছু পাপরাশি করছে তারা বহন। নিন্দকেরা আমাদের সখা, আমাদের কলুষিত বস্ত্র বিনামূল্যে দিচ্ছে ধুয়ে। নিন্দকেরা আমার

কাশী, সব কিছু পাপ করছে বিনষ্ট। নিন্দুকেরা আমার গুরু, কারণ, তারাই যে আমায় গড়ে তুলেছে জনার্দন স্বামীর শিষ্যরূপে।

সাধক-কবি হিসাবে একনাথ স্বামীর দুইটি অবদান ধর্মসংস্কৃতির ইতিহাসে অমর হইয়া থাকিবে। প্রথমত, আপন রচনার মাধ্যমে বেদান্তের তত্ত্বকে তিনি সাধারণ মানুষের কাছে সহজবোধ্য করিয়া তুলিয়াছেন। দ্বিতীয়ত, তাঁহার ভক্তি সাহিত্য মারাঠী ভাষায় রচিত হওয়ার কলে মারাঠী জনগণের অশেষ কল্যাণ সাধিত হইয়াছে।

বেদান্তের উচ্চতর তত্ত্বের আলোচনা আগে শুধু সংস্কৃতে শিক্ষিত মুষ্টিমেয় মানুষের মধ্যেই সীমাবদ্ধ ছিল। এবার তাহার জনপ্রিয়তা বৃদ্ধি পায়, সমাজের স্তরে স্তরে ছড়াইয়া পড়িতে থাকে। একনাথের অভঙ্গপদ গ্রামে গ্রামে নগরে নগরে গীত হইত, একনাথী ভাগবত ও রামায়ণ পঠিত হইত বহুতর ধর্মসভায়। কাজেই তাঁহার তত্ত্ব ও আদর্শের প্রচার দ্রুতবেগে বাড়িয়া চলে।

পূর্বসূরী জ্ঞানদেব তাঁহার গীতাভাষ্যে বেদান্তের তত্ত্ব আলোচনা যথেষ্টই করিয়াছেন, কিন্তু জ্ঞানদেবের দার্শনিক তত্ত্ব ও তাঁহার ভাষা ছিল জটিল ও দুর্বোধ্য। তাঁহার দর্শন-ব্যাখ্যা ছিল মেঘলোকের মতো ধোঁয়াটে, সাধারণ মানুষের ধরা ছোঁয়ার অনেক উর্ধ্বে। কিন্তু একনাথের ব্যাখ্যা ছিল অতি প্রাঞ্জল, গ্রাম্য মানুষের পক্ষেও তাহার রসস্বাদ গ্রহণ করা কঠিন হইত না। মর্তের মানুষের কাছে স্বর্গীয় সুখা তিনি যেন নির্বিচারে অকুপণ করে বিলাইয়া গেলেন।<sup>১</sup>

মারাঠীতে রচিত একনাথের ধর্মসাহিত্যের প্রশংসায় মুখর হইয়া অধ্যাপক পটবর্ধন লিখিয়াছেন : “পণ্ডিতদের জন্ত লিখে নাম-যশের অধিকারী হবার ইচ্ছে একনাথের ছিল না। তিনি লিখেছিলেন সমাজের সর্ব স্তরে সত্যবোধ ও জ্ঞানের আলোক বিস্তারের জন্ত। জীলোক, শূদ্র ও অশিক্ষিত জনসাধারণের কল্যাণেই লেখনী ধারণ

করেছিলেন তিনি। পণ্ডিতের ঘৃণাকে তিনি করতেন ঘৃণা, আর লক্ষ লক্ষ নিরক্ষর দেশবাসীর দাবিকে অগ্রাধিকার দিয়ে সদাই লিখে চলতেন দেশজ ভাষায়।

“দেশজ ভাষার জ্ঞান তাঁকে অসম সাহসে যুঝতে হয়েছিল—এবং এতকালের ব্যবধানেও, আজকের দিনেও, দেশজ ভাষার লড়াই আমাদেরও কম চালিয়ে যেতে হচ্ছে না। তখনকার দিনে সংস্কৃত-জানা পণ্ডিতেরা ছিলেন গর্বস্থীত—মারাঠী ভাষা হচ্ছে অশিক্ষিত, নিম্নস্তরের গ্রাম্য লোকের ভাষা, এ ভাষায় লিখে নিজেদের হেয় করবো কেন—এই ছিল তাঁদের মনোভাব। একনাথ তাঁর মহান পূর্বসূরী জ্ঞানদেবেরই অনুসরণ করে চললেন। অন্ধ মুক জনগণের জ্ঞান তাঁর হৃদয় কেঁদে উঠেছিল। তিনি উপলব্ধি করেছিলেন—ঐ হতভাগ্য জনগণের হৃদয়ে প্রবেশের পথ হচ্ছে তাদের মাতৃভাষা। তাই সেই ভাষাতেই নিজের ভক্তিসাহিত্য তিনি রচনা করলেন।”

দেশজ ভাষায় ধর্মগ্রন্থ রচনার জ্ঞান কাশীর শাস্ত্রবিদ পণ্ডিতেরা একনাথকে তীব্র ভাষায় শিক্ষার দিয়াছিলেন। মহারাষ্ট্রের রক্ষণশীল বিরোধিতাও বার বার তাঁহার বিরুদ্ধে উদগ্র হইয়া উঠে। এমনকি ঘরের মধ্যে নিজের পুত্রের গঞ্জনাতাঁহাকে কম সহ্য করিতে হয় নাই। এই প্রতিকূল পরিবেশে যে দৃঢ়তা ও আত্মপ্রত্যয় নিয়া তিনি নিজের আরও ব্রত উদ্‌ঘাপন করিয়াছেন তাহা বিস্ময়কর।

পুত্র হরি শাস্ত্রী সংস্কৃতশাস্ত্র অধ্যয়ন করিয়াছেন, ব্রাহ্মণ-সমাজে তাঁহার যথেষ্ট প্রতিষ্ঠা। একদিন পিতাকে তিনি খুব চাপিয়া ধরিলেন, কহিলেন, “পিতা, শাস্ত্রজ্ঞ ব্রাহ্মণের বংশে আমাদের জন্ম। সারা দেশের এক শ্রেষ্ঠ সাধকরূপে,—সুপণ্ডিত ও আদর্শবাদী আচার্যরূপে, আপনার কত সন্মান। আপনার মতো লোক মারাঠী ভাষায় ধর্মগ্রন্থ লিখবেন, ভাষণ দেবেন? উত্তর ও দক্ষিণ ভারতের বিশিষ্ট পণ্ডিতেরা এ নিয়ে আপনার কত নিন্দাবাদ করছেন।”

“এসব তো আমার অজানা নয়, বৎস, তা এখন তোমার মূল বক্তব্যটা কি বল দেখি?” প্রশান্ত কণ্ঠে বলেন একনাথ স্বামী।

“আমার নিজের বক্তব্য আর সারা দেশের পণ্ডিতসমাজের বক্তব্য একই। এখন থেকে আপনি সংস্কৃত ভাষাতেই রচনা করুন আপনার ধর্মগ্রন্থ। প্রয়োজনমতো মারাঠী সাহিত্যিকেরাই তা থেকে অনুবাদ করে নেবেন। হ্যাঁ, আমাদের বিশেষ অনুরোধ, মারাঠী ভাষায় আপনি আর লিখবেন না, ভাষণও দেবেন না।”

“এ অনুরোধ অগ্রায়, জাতির পক্ষে দেশের পক্ষে অকল্যাণকর, বৎস।”

অতঃপর স্বরচিত একটি অভঙ্গপদে একনাথ দেশবাসীকে উপরোক্ত প্রশ্নের উত্তর দিলেন :

সংস্কৃত বাণী দেবের কেলী—

প্রাকৃত ওরী চোরাপাসুণী ঝালী

অসোত যা অভিমান ভুলী।

বৃথা বোলী কায় কাজ—

আর্তা সংস্কৃত অথবা প্রাকৃত।

ভায়ী ঝালী জে হরি কথ।

তে পাবনাচে তত্ত্বর্তা

সত্য সর্বথা মানলী—

দেবাসি নাই বাচাভিমান

সংস্কৃত প্রাকৃত তায় সমান।

জ্যা বাণী জাহলৈ ব্রহ্মকথন

ত্যা ভাষা ত্রীকৃষ্ণ সন্তোষে ॥

—সংস্কৃত ভাষা কি দেবতার সৃষ্টি ?

আর প্রাকৃত সৃষ্টি করেছে চোরেরা ?

আসলে অহমিকার জালে

ভুল করে বলা হয় এমনতরো কথা।

আসলে সংস্কৃত বা প্রাকৃত যা-ই হোক,

যে ভাষা বর্ণনা করে হরিকথা—

পবিত্র আর সত্য বাণীরূপে  
সবাই মোরা দিই তার সম্মান ।  
ভাষা নিয়ে দেবতার নেই পক্ষপাত,  
সংস্কৃত আর প্রাকৃত ছই-ই তুল্য তাঁর কাছে ।  
ব্রহ্মবাণী, ব্রহ্মজ্ঞান যে ভাষাতে বর্ণন  
তাতেই যে হয় প্রভু শ্রীকৃষ্ণের সন্তোষ ।

পৈঠান এবং পদ্ধারপুরকে কেন্দ্র করিয়া একনাথ স্বামী অতিবাহিত করেন প্রায় চল্লিশ বৎসর । কর্মময় ও সাধনময় এই দীর্ঘ জীবনে তাঁহাকে ঘিরিয়া গঠিত হয় একটি বিরাট ভক্ত দল । শত শত ভক্ত সাধককে অন্তরঙ্গ ভক্তিসাধন দিয়া তিনি কৃতার্থ করেন, আর সহস্র সহস্র সাধারণ মানুষ তাঁহার ভাবসমৃদ্ধ কীর্তন, ভাষণ ও ধর্মসাহিত্য হইতে লাভ করে প্রেমভক্তির উদ্দীপনা ।

১৫৯৯ খ্রীষ্টাব্দে ৬৬ বৎসর বয়সে পৈঠানে নিজ গৃহের অঙ্গনে হরিকথা বলিতে বলিতে এই হরিময় ভক্তিসিদ্ধ মহাপুরুষ সজ্জানে অমরলোকে প্রয়াণ করেন ।



# বিশুদ্ধানন্দ সরস্বতী

উত্তর ভারতের সাধক ও সারস্বত সমাজের এক অত্যাঞ্জল ব্যক্তি ছিলেন স্বামী বিশুদ্ধানন্দ সরস্বতী। উনিশ শতকের দ্বিতীয়পাদ হইতে শুরু করিয়া অর্ধশত বৎসরেরও অধিককাল অধ্যাত্ম-ভারতের প্রাণকেন্দ্র বারাণসীতে এই মহাত্মা বিরাজিত থাকেন, বিস্তারিত করেন তাঁহার তপস্তার আলোক। সন্ন্যাসী ও গৃহস্থ দুই-ই দলে দলে শরণ নিত তাঁহার চরণতলে। ত্যাগ বৈরাগ্য ও জ্ঞানের হরিহর-মূর্তি এই মহাসাধকের জীবন হইতে সংগ্রহ করিত মুক্তিপথের পাথর।

বিশুদ্ধানন্দের পূর্বাশ্রমের পিতার নাম সংগমলাল, মাতা যমুনা দেবী। উত্তর প্রদেশের বৌড়ী গ্রামে এক সদাচারী ব্রাহ্মণ বংশে সংগমলালজীর জন্ম। সংসারে আর্থিক সচ্ছলতা তেমন ছিল না। ভাগ্য অশেষে দেশের নানাস্থানে ঘোরাফেরা করিয়া অবশেষে তিনি হায়দ্রাবাদ অঞ্চলের কল্যাণী নামক স্থানে আসিয়া উপস্থিত হন। সবসুখরাম এখানকার নবাব সরকারের এক উচ্চপদস্থ ব্যক্তি, ইহারই আশ্রয়ে থাকিয়া সংগমলাল সরকারী কাজে নিযুক্ত হন। কিছুদিন পরে সবসুখরামের ভগিনী যমুনাদেবীকে তিনি বিবাহ করেন।

১৮০৯ খ্রীষ্টাব্দে, ভাদ্রমাসের জন্মাষ্টমীর পূণ্যদিনে মাতুলগৃহে বিশুদ্ধানন্দের জন্ম হয়। গৌরকান্তি, অনিন্দ্যসুন্দর এই নবজাত শিশুটিকে পাইয়া সকলের সেদিন আনন্দের অবধি নাই।

জন্মাষ্টমীর পবিত্র দিনে জন্ম, তাই ভাবিয়া চিন্তিয়া শিশুর নাম রাখা হইল—বংশীধর। পিতা সংগমলালজী তাড়াতাড়ি ছুটিয়া গিয়া শহরের এক জ্যোতিষীকে ডাকাইয়া আনিলেন। ইতিপূর্বে পর পর দুইটি সন্তান ভূমিষ্ঠ হওয়ার অল্পকাল মধ্যে মারা গিয়াছে। তাই নবজাত শিশুটিকে নিয়া তাঁহার মহা হুশিস্তা। কিন্তু জন্মলগ্ন বিচার করিয়া জ্যোতিষী কহিলেন, “আপনারা ঘাবড়াবেন না। আমি

দেখতে পাচ্ছি, এ শিশু দীর্ঘজীবী হবে, শুধু তাই নয় সহস্র সহস্র মানুষকে সে দেবে আশ্রয়।”

বৎসর খানেক পরে ধূমধাম করিয়া বংশীধরের অন্নারম্ভ উৎসব সম্পন্ন হয়। শিশুর কল্যাণের জন্য পূজা হোম যাগযজ্ঞের অনুষ্ঠানও কম করা হয় নাই। কিন্তু দুর্ভাগ্যক্রমে অল্পকালের মধ্যে বংশীধর আক্রান্ত হয় তুশিকিংশু রোগে। তাহার দেহে দেখা দেয় মুছাঁ বা অপস্মার রোগ। এ রোগের আক্রমণের শেষে দেহটি প্রায়ই দুর্বল ও অসাড় হইয়া পড়িত।

দিন দিন শিশুর দেহ ক্ষীণ হইয়া আসিতে থাকে। সকলেরই ধারণা হয়, এ মৃগী রোগ আর সারিবার নয়। সারা গৃহে নামিয়া আসে বিষাদ ও হতাশার অন্ধকার।

মাতুল সবসুখরাম বড় ভালবাসেন বংশীধরকে। অবসর পাইলেই মাঝে মাঝে তাকে নিয়া বেড়াইতে বাহির হন, নানা গল্পকথায় তাকে উৎফুল্ল রাখিতে চেষ্টা করেন।

বংশীধরের বয়স তখন চার বৎসর। মাতুলের সঙ্গে একদিন সে ভ্রমণে বাহির হইয়াছে। পথ চলিতে চলিতে হঠাৎ দেখা যায় বালকের অদ্ভুত ভাবান্তর। চোখদুটি বিস্ফারিত, ভাবাবেশে সারা দেহ থরথর করিয়া কাঁপিতেছে। মাতুলের হাতটি সজোরে আঁকড়াইয়া ধরিয়া হঠাৎ সে ধামিয়া পড়ে। ব্যগ্র দৃষ্টিতে তাকাইয়া সবসুখরাম প্রশ্ন করেন, “কিরে বংশীধর কি হয়েছে তোর? অমন করছিস কেন? আমায় কিছু বলবি?”

“মামাজী, মামাজী! আমার কেতাব কোথায়?” উত্তেজিত স্বরে বলিতে থাকে বালক বংশীধর।

“কোন্ কেতাব, কিসের কেতাব, ভাল ক’রে বুঝিয়ে বল, এখনই তোকে আমি তা কিনে দিচ্ছি।”

“আমার নিজের সেই কেতাবটি এনে দাও। তা পেলেই আমার ব্যারাম সেয়ে যাবে। আমি ভালো হয়ে উঠবো।” মোহগ্রস্তের মতো কথাটি সে বার বার আঙড়ায়।

সবসুখরাম ভাবেন, রোগে ভুগিতে ভুগিতে বালকের মস্তিষ্কের ধারণশক্তি কমিয়া গিয়াছে। মাথায় হঠাৎ খেয়াল চাপিয়াছে, একটা বই চাই। তাই নিয়াই আজ সে এমন উত্তেজিত। বাড়িতে কিরিয়া রংবেরং-এর বই দুই চারটি আনিয়া দিলেন, কিন্তু বংশীধরের সেদিকে কোনো ক্রক্ষেপই নাই। এগুলি দূরে ছুঁড়িয়া ফেলিয়া সে কাঁদিতে বসে তাহার কোন্ এক কাল্পনিক বই-এর জন্ত।

মাতুল সাস্তনা দেন, “বেশ তো, বংশী, এনে দেবো তোর বই। কিন্তু কোথায় রয়েছে, তা তো বলবি।”

সজলচক্ষে বালক উত্তর দেয়, “তা রয়েছে আমার কুঠিয়ায়। শিগুীর তোমরা খুঁজে নিয়ে এসো। নইলে আমি বাঁচবো না।” এ অদ্ভুত কথার কি রহস্য তা কে জানে? বাড়ির লোকেরা আর ইহা নিয়া মাথা ঘামান নাই।

অসুখ কি করিয়া ভালো হইবে, এই চিন্তায় জননীর মনে কিন্তু একটুও শান্তি নাই। সাধুসন্তের সন্ধান পাইলেই তাড়াতাড়ি সেখানে ছুটিয়া যান। শাস্ত্রজ্ঞ ব্রাহ্মণ দেখিলেই তাঁহাকে ঘরে আনাইয়া শাস্তি-স্বস্ত্যয়ন করান, কিন্তু কোনো কিছুতেই কাজ হইতেছে না। যমুনাদেবী ক্রমে একেবারে হতাশ হইয়া পড়েন।

কল্যাণীতে সে-বার এক সতীদাহ অনুষ্ঠিত হইবে। একটি ক্ষত্রিয়া নারী পতির অলস্ত চিতায় আরোহণ করার সঙ্কল্প নিয়াছেন; সংবাদ পাইয়া দলে দলে লোক ছুটিয়া চলিয়াছে শ্মশানের দিকে।

সাধারণ মানুষের ধারণা, চিতাশয্যায় উপবিষ্টা সতী নারীর আশীর্বাদ একেবারে অমোঘ, তাহা কখনো ব্যর্থ হয় না। যমুনাদেবী স্থির করিলেন, বালক বংশীধরকে নিয়া সতীর কাছে বাইবেন, রোগমুক্তির জন্ত মাগিবেন তাঁহার আশীর্বাদ।

চিতাশয্যায় কাছে গিয়া সাশ্রনয়নে পুত্রের জটিল রোগের কথা নিবেদন করা মাত্র সতী বলিয়া উঠেন, “বহিন, তুমি তোমার এ ছেলের জন্ত মোটেই ভেবো না। সিদ্ধযোগীর চিহ্ন রয়েছে এর দেহে।

অকালমৃত্যু কখনো এর ঘটবে না। তবে একে হয়তো তোমরা ধরে রাখতে পারবে না, ঘর ছেড়ে এ ছেলে সন্ন্যাসী হবে।”

পুত্রকে নিয়া যমুনাদেবী গৃহে কিরিয়া আসেন। যে কারণেই হোক, বেশ কিছুদিন বংশীধর মূর্ছা-রোগে আক্রান্ত হয় নাই। কিন্তু বৎসরখানেক বাদে আবার ইহার পুনরাবুত্তি ঘটিতে শুরু করে। আত্মীয়স্বজনদের উদ্বেগ আরো বাড়িয়া যায়।

কল্যাণীর কাছেই কীর্ণা ও মঞ্জিরা নদীর পবিত্র সঙ্গমস্থল। প্রতি বৎসর হাজার হাজার নরনারী এখানে স্নান করিতে আসে। একটি বৃহৎ মেলা উৎসবও এই উপলক্ষে অনুষ্ঠিত হয়।

সবস্বথরাম আত্মপরিজন ও বন্ধুদের নিয়া সে-বার এই মেলায় আসিয়াছেন। স্নান-তর্পণের শেষে একজন সঙ্গী কহেন, “এখানে ঘাটের খুব কাছেই একটা পর্ণ কুটিরে একান্তে বাস করেন এক বড় মহাত্মা। যাবে তাঁকে দর্শন করতে?”

সাধুদর্শনের কথায় সবাই মহা উৎসাহী হইয়া উঠে। সবস্বথরাম বিচক্ষণ ব্যক্তি। তিনি বলেন, “না, এত লোক নিয়ে গিয়ে মহাত্মার শাস্তিভঙ্গ করা কখনো ঠিক নয়। ছোট ছেলেমেয়েরা এই ঘাটে বসে থাকুক। চল, আমরা আর সবাই সেখানে যাই।

সঙ্গীরা সবাই এ কথায় সায় দেয়—কিন্তু গোল বাধাইয়া বসে পাঁচ বৎসরের বালক বংশীধর। সে বায়না ধরে, “না—আমি যাবোই সাধুজীকে দেখতে। আমায় নিয়ে চল। আমি এখানে থাকবো না।”

বালককে বুঝাইয়া নিরস্ত করা যায় না, তখন সে শুরু করে তুমুল চীৎকার আর কান্না। মাতুলকে হার মানিতে হয়, বংশীধরসহ সবাইকে নিয়া উপস্থিত হন সাধুর আশ্রমে।

প্রণাম নিবেদনের পর সাধু একে একে সবাইকে আশীর্বাদ জ্ঞাপন করেন। এবার বালকের দিকে সহাস্তে তাকাইয়া মাতুল সবস্বথরাম কহেন, “বংশী, এখানে আসবার জন্ত তো এতো কাঁদাকাটি করলি। কিন্তু এসে কি তোয় লাভ হলো, বলতো?”

বালক কিন্তু ইতিমধ্যে ভাবাবিষ্ট হইয়া পড়িয়াছে। এই পর্ণ-  
ভা. সা. (৮)-১১

কুটিরের এদিক ওদিক তীক্ষ্ণ দৃষ্টিতে কি যেন সে খুঁজিয়া বেড়ায়। হঠাৎ দৃঢ়স্বরে সে বলিয়া বসে, “মামাজী, এই তো, এই কুঠিয়ার ভেতরেই আছে আমার সেই কেতাব। আমার নিজের হাতে লেখা সেই কেতাব। হ্যাঁ, এখানেই রয়েছে।”

মহাত্মার দিকে কিরিয়া সবসুখরাম যুক্তকরে বলেন, “প্রভু, দেখুন এ বালক কি বলছে। তার নিজের হাতে লেখা একটা বই নাকি এখানে রয়েছে। এ বইয়ের কথা আগেও ওর মুখে আমরা শুনেছি। কিন্তু ব্যাপারটা কি, এর ভেতরে কোনো রহস্য আছে কিনা, তা আমরা কি ক’রে বুঝবো?”

মহাত্মা শান্ত স্বরে কহেন, “আর কি বলে এই বালক, আমরা খুলে বল তো?”

“প্রভু, আমার এই ভাগ্যেটি মৃগীরোগে ভুগছে অনেকদিন। শরীর বড় দুর্বল, আর বেশী দিন বাঁচবে বলে তো মনে হয় না। এই বই প্রসঙ্গে বালক কিন্তু একটা অদ্ভুত কথা বলে। এ বই ওর নিজস্ব বই, আর এটা খুঁজে পেলে ওর রোগ নাকি সেরে যাবে। এখন আপনার আশ্রমে এসে তো দৃঢ়স্বরে বলছে বইটি এখানেই রয়েছে।”

ক্ষণকাল চুপ করিয়া থাকিয়া সাধু মহারাজ কহেন, “ছাথো, এ বালক কিন্তু ঠিক বালকভাব থেকে কথাগুলো বলছে না, একটা দিবাভাবে আবিষ্ট হয়ে রয়েছে। তোমরা তন্ন তন্ন ক’রে আমার কুটিরে অনুসন্ধান করো। কোনো পুরানো হাতে-লেখা পুঁথি আছে কিনা, ছাথো।”

ছোট খড়ো ঘর। গ্রন্থপেটিকা ছাড়া অন্য আসবাবপত্র তেমন বেশী কিছু নাই। অনুসন্ধানের কাজ শেষ হইল, কিন্তু বালকের কথিত বই-এর পাণ্ডুলিপি কোথাও পাওয়া গেল না।

এবার ভাবাবিষ্ট বংশীধরের দেখা গেল নূতন রূপ। কি এক অজ্ঞাত আনন্দে সে ভরপুর। সারা দেহ রোমাঞ্চিত, কম্পমান। দুই চোখ বাহিয়া ঝরিতেছে পুলকাজ্জ্বল্য, নাসিকায় ঘন ঘন বহিতেছে দীর্ঘশ্বাস। আত্মপ্রত্যয়ের সুরে সে বলিয়া ওঠে, “কুটিরের চালের বাতা ভালো

ক'রে খুঁজে ত্যাগে। ওখানেই পাবে আমার বই। হ্যাঁ, আর ভয় নেই, এবারে আমার রোগ যাবে পালিয়ে, তোমাদেরও আর থাকবে না কোনো কষ্ট।”

বালকের নির্দেশিত সেই স্থানটিতেই পাওয়া গেল একখানি পুরাতন হস্তলিখিত জীর্ণ পুঁথি! এক খণ্ড কাপড় দিয়া সবুজে জড়ানো।

বংশীধরের হাতে বইয়ের মোড়কটি দেওয়া মাত্র চোখ-মুখ উজ্জল হইয়া উঠে, ভাবাবেশ অন্তর্হিত হয়। স্বাভাবিক বালক-ভাব আবার ফুটিয়া উঠে তাহার দেহ-মনে।

শাধুজী গ্রন্থটি সতর্কভাবে পরীক্ষা করেন, বিস্ময়ে তাহার চোখ দুইটি বিস্ফারিত হইয়া উঠে। সজল চক্ষু আবেগভরা কণ্ঠে কহেন, “এ যে আমার গুরুদেবের স্বহস্ত লিখিত গ্রন্থ। গীতার নির্যাস এতে তিনি লিখেছেন, এ গ্রন্থ তাঁর বড়ই প্রিয় ছিল। পাঁচ বৎসর আগে, তাঁর দেহান্তের প্রাক্কালে বার বার এটি তিনি চেয়েছিলেন। তখন খুঁজে পাওয়া যায় নি এবং এ জন্ম মর্যাহত হয়ে শেষ নিঃশ্বাস ত্যাগ করেন।”

উপস্থিত সকলে তো এ কাহিনী শুনিয়া মহা বিস্মিত। সবস্বথ্যরাম কৌতূহলভরে প্রশ্ন করেন, “মহারাজ, সেই গ্রন্থের সঙ্গে এ বালকের কি সম্পর্ক তাতো বুঝতে পারাছিলে। একটু বিশদ ক'রে বলুন।”

“ভগবান্ গীতাতে বলেছেন, মৃত্যুর সময়ে মানুষ যে ভাবে ভাবিত হয়, পরবর্তী জীবনে সেই ভাব ও সেই সংস্কার উদ্গত হতে দেখা যায় তার ভেতর। তোমাদের বংশের এই জাতিস্মর বালক পূর্বজন্মে ছিলেন আমাদের গুরুদেব। এ আশ্রমেরই অধ্যক্ষ তিনি ছিলেন। এখন থেকে এর দেহ রোগমুক্ত হলো। তোমরা লক্ষ্য রেখো, অদূর ভবিষ্যতে এঁর শাস্ত্রিক সংস্কার জেগে উঠবে। আর পূর্বজন্মের মতো ইনি এ জন্মেও গ্রহণ করবেন সন্ন্যাস-জীবন।”

অতঃপর বাড়ির সবায় সঙ্গে বালক বংশীধর কল্যাণীতে কিরিয়া আসে। এই ঘটনার পর হইতে আর কোনোদিন কিন্তু মূর্ছা-রোগে

সে আক্রান্ত হয় নাই। ধীরে ধীরে সে একটি সুস্থ সবল কিশোরে পরিণত হয়।

কিশোর বংশীধরের জীবনে এবার আসে আর এক বড় দুর্দৈব। অল্পদিনের ব্যবধানে পিতামাতা উভয়েই ইহলোক ত্যাগ করিয়া চলিয়া যান। মাতুল সবসুখরাম এই কিশোর ভাগ্যনেটিকে বড় ভালোবাসেন। এখন হইতে তিনিই গ্রহণ করেন বংশীধরের সকল কিছু দায়িত্ব। শিক্ষার সর্বপ্রকার সুযোগ দিয়া প্রকৃত মানুষরূপে তাহাকে গড়িয়া তোলার জন্য তিনি সচেষ্ট হন।

ভট্টজী নামে এক বিখ্যাত পণ্ডিত নিকটেই থাকেন, তাঁহার টোলে বংশীধরকে পড়িতে দেওয়া হয়। বালক অতি অল্প সময়ে সংস্কৃত ব্যাকরণ, কাব্য, অলঙ্কার প্রভৃতির পাঠ শেষ করিয়া ফেলে। স্মৃতিশক্তি তাহার অতিশয় প্রখর, একবার যাহা অধ্যয়ন করে, আর কখনো বিস্মৃত হয় না। শিক্ষাগুরু ভট্টজী এজন্য তাহাকে বড়ই স্নেহ করিতেন, ডাকিতেন শ্রুতিধর বলিয়া।

কয়েক বৎসর সংস্কৃত সাহিত্য ও বেদ বেদান্ত পাঠে অতিবাহিত হয়। অতঃপর সবসুখরাম বংশীধরের কার্সী ও মারাঠী ভাষা শিক্ষার ব্যবস্থা করেন। এই দুইটি ভাষার উপর দখল না থাকিলে তখনকার দিনে দাক্ষিণাত্যে কেহ সরকারী দপ্তরে উন্নতি করিতে পারিত না। তাই সবসুখরাম তাড়াতাড়ি ভাগ্যনেকে এই ভাষা দুইটি শিখাইয়া নিতে চেষ্টা করিতেন। প্রতিভাধর বংশীধরও অনতিবিলম্বে ইহাতে ব্যুৎপন্ন হইয়া উঠেন।

বংশীধর তখন সবেমাত্র যৌবনে পদার্পণ করিয়াছেন। সুন্দর স্মৃতিশক্তি দেহ ও পরিপূর্ণ স্বাস্থ্য সহজেই আকর্ষণ করে। খেলার মাঠে দৈহিক শক্তি ও মনোবলের দিক দিয়া কেহই তাঁহার সঙ্গে আঁটিয়া উঠিতে পারে না।

মাতুল সবসুখরাম নবাব সরকারের সেনাবিভাগের একজন উচ্চ-পদস্থ কর্মচারী। তাছাড়া, তাঁর দক্ষতায় নবাব যমতাজ্জল ওমরাহ তাঁহার প্রতি স্তুপ্রসন্ন। তাই সবসুখরাম ভাবিলেন, ভাগ্যনেকে সেনা

বিভাগে ভর্তি করাইয়া দিবেন। দৈহিক বল, সাহস ও দক্ষতা বংশীধরের যথেষ্ট। কাজেই এ বিভাগের কাজে তাড়াতাড়ি সে উন্নতি করিতে পারিবে। এসব ভাবিয়া বংশীধরকে অশ্চালনা ও যুদ্ধবিজ্ঞান নিপুণ করিয়া তুলিতে তিনি উদ্যোগী হন। অল্প কিছুদিনের মধ্যেই দেখা যায়, বংশীধর একজন সুদক্ষ ঘোড়সওয়ার হইয়া উঠিয়াছে। অতঃপর সুযোগমতো মাতুল তাঁহাকে সেনাদলের শিক্ষানবীশের কাজে ভর্তি করিয়া দিলেন।

নবাবের সেনা শিবিরে সেদিন একটি তেজী আরবী ঘোড়া কেনা হইয়াছে। বড় ছরস্ত ও চঞ্চল এই ঘোড়াটি, সহজে বশে আসিতে চায় না। সওয়ার তেমন দক্ষ নয় বুলিলেই ঝাঁকুনি দিয়া তাঁহাকে ফেলিয়া দেয়। তাই এ ঘোড়াটি নিয়া কর্তৃপক্ষ বড় সমস্যায় পড়িয়া গিয়াছেন। বংশীধর কহিল, “আপনারা যদি অনুমতি দেন, আমি এই ছট্টি ঘোড়াটাকে সাময়িক করিতে পারি।”

দুর্ধ্ব ঘোড়াটি নিয়া শিবিরের অধ্যক্ষের হস্তিান্তর অবধি নাই। কহিলেন, “এতো খুব ভালো কথা। বংশীধর, তুমি এখনই ঘোড়াটাকে কিছুক্ষণ ছুটিয়ে নিয়ে এসো।”

বংশীধরের অপর দুই শিক্ষানবীশ বন্ধু সেখানে দণ্ডায়মান। ইহাদের একজন নবাবের পুত্র মেহেদি হুসেন, অপরজন বকর হুসেন—নবাবের অত্যন্ত ভ্রাতৃপুত্র। সেনাবিভাগের নূতন শিক্ষার্থীদের মধ্যে বংশীধর সাহস, কৌশল ও দক্ষতায় শীর্ষস্থানীয়। তাই উপরোক্ত দুই বন্ধুর কিছুটা ঈর্ষা আছে তাহার প্রতি। বংশীধরকে কোনো কৃতিত্বের সুযোগ দিতে তাহারা ইচ্ছুক নয়। ভয় দেখাইয়া তাহারা বলে, “এই পাগ্‌লা ঘোড়াটার সওয়ার হয়ে, কেন তাই শুধু শুধু প্রাণটা খোয়াবি?”

বংশীধর নিরস্ত হওয়ার পাত্র নয়। হাসিয়া বলে, “দেখি একবার কে ভেঁতে, ঘোড়ী না তার সওয়ার।”

এই আরবী ঘোড়ার উপর অবলীলায় সে চড়িয়া বসে। অল্প কৌশলে তাকে আয়ত্তে আনে, তারপরে সপাসপ্ চাবুক চালাইয়া



বহুদূরে এটিকে নিয়া উধাও হইয়া যায়। উর্ধ্ব্বাসে কয়েক ঘণ্টা অবিরাম দৌড়ানোর পর ঘোড়াটি ক্লান্ত হইয়া পড়ে। শিবিরে ফিরিলে দেখা যায়—পূর্বের সে অবাধ্যতা আর নাই, হুর্ধ্ব্ব আরবী ঘোড়া সম্পূর্ণরূপে তাহার সওয়ারের বশে আসিয়া গিয়াছে। উপস্থিত অনেকেই বংশীধরকে সাধুবাদ করিতে থাকে।

ঘোড়াটিকে দানাপানি দিয়া আদর জানাইয়া বংশীধর ঘরে ফিরিয়া যায়। পরের দিন ভোরে উঠিয়াই কিন্তু শুনে এক হুঃসংবাদ। এত পরিশ্রম করিয়া যে ঘোড়াটাকে সে আয়ত্তে আনিয়াছে, গত রাত্রে সেটি হঠাৎ মারা গিয়াছে।

শিবিরের অধ্যক্ষ বড় ভীত সন্ত্রস্ত হইয়া পড়েন। নবাব বাহাদুর নিজে সখ করিয়া, বহু অর্থব্যয়ে এই তেজী আরবী ঘোড়াটি বিদেশী বণিকদের কাছ হইতে কিনিয়াছেন। এটির মৃত্যু হইয়াছে শুনিলে তাঁহার ক্রোধের সীমা থাকিবে না।

এদিকে বংশীধরের সাফল্যে নবাবের পুত্র ও ভ্রাতৃপুত্রেরও গুরু হইয়াছে গাজদাহ। তাড়াতাড়ি নবাবকে তাহার ঘোড়াটির মৃত্যু-সংবাদ দেয়। আরো জানায়, “এজন্ত দায়ী বংশীধর। অবিরাম চাবুক মেয়ে ঘোড়াটাকে অনর্থক সে দূর দূরান্তে ছুটিয়েছে। অতিরিক্ত শ্রান্ত হবার কলেই ঘটেছে এর মৃত্যু।”

নবাব বাহাদুর ক্রোধে অধীর হইয়া উঠেন। বংশীধরকে তখনই সেখানে ডাকাইয়া আনা হয়। অভিযোগ শুনিয়া শাস্ত্রস্বরে সে বলে, “হুজুর, কাল সন্ধ্যার পর আস্তাবলে ফিরে এসে ঐ ঘোড়া আমার হাত থেকে সাগ্রহে দানাপানি খেয়েছে। অসুস্থ অবস্থায় পশুরা সহজে কোনো কিছু খেতে চায় না। কিন্তু এ ঘোড়াটি খেতে তখন কোনো অনিচ্ছা প্রকাশ করে নি। কাজেই বহুক্ষণ ছুটছুটি পরেও সে বেশ সুস্থই ছিল। মৃত্যু ঘটেছে গভীর রাতে। হয় কোনো সংক্রামক রোগে, নয় তো সহিসদের দোষে এ হুর্ধ্বটনা ঘটেছে। এজন্ত আমাকে দায়ী করা কি সম্ভব?”

নবাব রুষ্ট হইয়াই আছেন, এ কথায় কোনো কান দিলেন না।

বংশীধরের জন্ম ব্যবস্থা হইল হাজতবাসের। মাতুল সবসুখরাম দরবারের প্রভাবশালী ব্যক্তি, তিনি কাছে থাকিলে নবাবকে বুঝাইয়া নরম করিতে পারিতেন। হুঁভাগ্যক্রমে সরকারী কাজে কয়েকদিনের জন্ম তিনি হায়দ্রাবাদে গিয়াছেন। কাজেই ইতিমধ্যে বংশীধরকে হাজতে প্রবেশ করিতেই হইল।

কয়েকদিনের মধ্যেই সবসুখরাম কল্যাণীতে ফিরিয়া আসিলেন। আনুপূর্বিক সব ঘটনা শুনিয়া তিনি তো স্তম্ভিত। অতঃপর নবাব বাহাদুরকে অনেক বুঝাইয়া সুঝাইয়া তিনি শাস্ত করেন, ভাগিনেয়কে মুক্ত করেন হাজতবাস হইতে।

এদিকে এ কয়দিন কারাকক্ষে বাস করার ফলে বংশীধরের অন্তরে জাগিয়াছে নির্বেদ, সংসারের সব কিছুতে আসিয়াছে চরম বিরক্তি। বসিয়া বসিয়া কেবলই ভাবেন, যেখানে প্রতি পদে ঈর্ষা, স্বার্থবুদ্ধি আর বিশ্বাসঘাতকতার সঙ্গীন উচানো, সেখানে কোথায় আনন্দ, কোথায় শান্তি? নাঃ, এমন স্থানে বাস করার কোনো মার্থকতা নাই। এর চাইতে সন্ন্যাসী হইয়া গাহাড়ে জঙ্গলে ঘুরিয়া বেড়ানো অনেক ভালো।

কল্যাণীর একপ্রান্তে লোকালয় হইতে দূরে একটি প্রাচীন শিব মন্দির আছে। মনে শান্তি নাই, নানা দুশ্চিন্তায় ভরাক্রান্ত বংশীধর আজকাল প্রায়ই সেখানে ছুটিয়া যান, নির্জনে আপন মনে চুপচাপ বসিয়া থাকেন। সেদিন সেখানে আসিয়া উপস্থিত হন জটাজুটমণ্ডিত সৌম্যদর্শন এক প্রবীণ সন্ন্যাসী। পরমহংসজী নামে এ অঞ্চলে তিনি খ্যাত। পূর্বাশ্রমে ছিলেন পেশোয়া বংশের সন্তান। মোক্ষলাভের আশায় বহুদিন আগে ঘর ছাড়িয়া বাহির হন, কঠোর তপস্যায় হন আপ্তকাম।

পরমহংসজীকে দেখা মাত্র বংশীধর উচ্চকিত হইয়া উঠেন, নিকটে গিয়া নিবেদন করেন সাষ্টাঙ্গ প্রণাম।

আশিস্ জানাইয়া পরমহংসজী কহেন, “বৎস, দেখছি, অন্তরে

তোমার শাস্তি নেই। এক হুঃসহ জ্বালা বয়ে নিয়ে বেড়াচ্ছে। কি তোমার সঙ্কট, আমার খুলে বল।”

“প্রভু, আপনি সর্বজ্ঞ, ঠিকই ধরেছেন। অন্তরের জ্বালা আমার অসহনীয় হয়ে উঠেছে। সংসারের সব কিছুই হয়ে গিয়েছে ভিক্ত, বিশ্বাদ অর্থশূন্য। স্থির করেছি, মনের হুঃখ-জ্বালা এড়াবার জন্তু গ্রহণ করবো সন্ন্যাসীর জীবন।”—কাতর স্বরে নিবেদন করেন বংশীধর।

“এই তরুণ বয়সে, কেন সংসারের প্রতি তোমার এই বিরক্তি, বৎস ?”

“সাত বৎসর বয়সে পিতামাতা দুই-ই হারিয়েছি। বালক-জীবনের ওপর পড়েছে বিধাতার নির্মম আঘাত। তারপর মাতুলের আশ্রয়ে দিন মোটামুটি ভালোই কাটছিল। কিন্তু এবার যেন জীবনের বাস্তব রূপ, নির্ভুর রূপটাই, আমার অভিজ্ঞতায় বেশী ধরা পড়েছে।”

“বিশদ ক’রে সকল কথা আমায় বলো, বৎস।”

“খাদের আমি অকৃত্রিম বন্ধু বলে জানতাম, তাদের চক্রান্তে আমায় যেতে হয়েছে কারাগারে। দেশের শাসক ও প্রতিপালক মতিচ্ছন্ন হয়েছেন, ঘোরতর অবিচার করেছেন আমার প্রতি। কয়েকদিনের কারাবাসই আমার জ্ঞানচক্ষু খুলে দিয়েছে। বুঝেছি, গোটা গৃহস্থ-জীবনই আসলে একটা বন্দী জীবন। শাস্তি নেই, আনন্দ নেই, এখানে পড়ে পড়ে অদৃষ্টের মার খাওয়া ছাড়া আর কোনো উপায়ও নেই। তাই তো সন্ন্যাস নেবো বলে সঙ্কল্প করেছি। কৃপা করে আপনি আমায় এ বিষয়ে সাহায্য করুন।”

“বৎস, যিনি তোমার আমার প্রভু, সবার প্রভু, তিনি আগে থেকেই তোমার অবস্থার কথা আমায় জানিয়ে দিয়েছেন। এজন্তুই ঠিক এই সময়ে তোমার সমক্ষে আমার আগমন।”

“আশা হচ্ছে, আনন্দ হচ্ছে, আপনার কথা শুনে। এবার কৃপা ক’রে বলুন, কি আমায় করতে হবে।”

“বৎস, সন্ন্যাস বড় কঠিন ব্রত। এ ব্রত নেবার আগে যথেষ্ট প্রস্তুতি চাই। শুধু গৃহত্যাগ করলেই হবে না। সন্ন্যাসীকে এ জন্মেই

ব্রহ্মলাভ করতে হবে এবং এজ্ঞা সর্বাঙ্গে চাই ত্যাগ বৈরাগ্য, ব্রহ্মচর্য—চাই শাস্ত্রাভ্যাস ও কঠোর সাধনা। প্রস্তুতির এই ধাপগুলি পেরিয়ে যেতে পারলে তবেই আসবে পরাশাস্তি ও পরাজ্ঞান—যেজ্ঞা অজানিতে তোমার মন ব্যাকুল হয়ে উঠেছে।”

“বেশ প্রভু, আপনার কথিত মতো দীর্ঘ-প্রস্তুতির পথই আমি বেছে নেবো। কিন্তু একটা প্রার্থনা। কৃপা ক’রে যখন এসেছেনই, আপনি আমায় দীক্ষা দিন, সন্ন্যাস দিন, এ জীবন কৃতার্থ হোক।”

“না—বৎস, আমি তোমার গুরু নই। তোমার চিহ্নিত গুরু রয়েছে উত্তর ভারতে। যথা সময়ে তাঁর দর্শন পাবে। হ্যাঁ, এবার শোনো আমার কথা। প্রথমে তুমি পুণ্যতীর্থ নাসিকে যাও। সেখানে বৈরাগ্য ও ব্রহ্মচর্য অবলম্বন ক’রে বেদ বেদান্তের অধ্যয়ন শুরু করো।”

“আপনার দর্শন ও উপদেশ আবার কবে পাবো, প্রভু?” সজল চক্ষে প্রশ্ন করেন বংশীধর।

“প্রয়োজনমতো আমি নিজেই আবির্ভূত হবো তোমার সকাশে।” একথা বলার পর পরমহংসজী মন্দির চত্বর ছাড়িয়া প্রবেশ করেন সন্নিহিত অরণ্যে। তারপর ধীরে ধীরে অদৃশ্য হইয়া যান।

ঘরে ফিরিয়া আসিয়া বংশীধর মাতুল সবস্তুখরামের উদ্দেশে এক চিঠি লিখিলেন। সতের বৎসরের বালকের সেই চিঠির মর্ম :

“জীবনে যেটুকু অভিজ্ঞতা এই অল্প বয়সে আমার হয়েছে, তাতে দেখেছি—এ সংসার নিতান্ত দুঃখময়। এর জটিল জালে জড়িয়ে অসহায়ের মতো কেবলি নির্ধাতন সহ্য করতে হয়। আর এটাও আমি বুঝেছি—সংসারের সব কিছুই নশ্বর, ক্ষণস্থায়ী। একমাত্র ঈশ্বরই অবিনশ্বর, তাঁর ধামেই রয়েছে পরম শাস্তি, পরম আনন্দ। আমি ঈশ্বরলাভের আকাঙ্ক্ষা নিয়েই চিরতরে গৃহত্যাগ ক’রে যাচ্ছি। আমায় অনুসন্ধান করায় চেষ্টা করবেন না, কারণ ঘরে ফেরা আমার কোনো মতেই সম্ভব নয়। পূর্জনবিশেষে আপনি আমায় পালন করেছেন, মাতা পিতার অভাব বুঝতে দেন নি কোনোদিন, আপনার

স্নেহ মমতা ও কল্যাণেচ্ছার ঋণ কখনো শোধ করার নয়। আমার আপনি মার্জনা করবেন, গ্রহণ করবেন আমার শ্রদ্ধাপূর্ণ প্রণাম।”

সেই রাত্রেই গোপনে বংশীধর কল্যাণী ত্যাগ করিলেন। পদব্রজে চলিলেন নাসিকের উদ্দেশে। পরের দিন তাঁহার চিঠি পড়িয়া মাতুল মাধায় হাত দিয়া বসিয়া পড়েন। সারা গৃহে নামিয়া আসে নৈরাশুর অন্ধকার।

নাসিকের এক নিষ্ঠাবান সুপণ্ডিত ব্রাহ্মণের আশ্রয়ে থাকিয়া বংশীধর বেদ বেদাঙ্গ অধ্যয়ন করেন। অসাধারণ প্রতিভা ও ধীশক্তি তাঁহার। তিন বৎসরের মধ্যে শিক্ষাগুরুর গ্রন্থাদি তিনি আয়ত্ত করিয়া ফেলেন। শাস্ত্রপাঠের সঙ্গে সঙ্গে তপস্তার জ্ঞা, প্রত্যক্ষ অনুভূতি লাভের জ্ঞাও তিনি ব্যাকুল হইয়া পড়েন। কোথায় তাঁহার চিহ্নিত সঙ্গুরু, কবে তাঁহার কৃপা পাইবেন, কোন্ সাধন নিয়া অগ্রসর হইবেন, ভাবিয়া কুল-কিনারা পান না।

বিষাদ-খিন্ন হৃদয়ে গোদাবরীর তটে সেদিন বসিয়া আছেন, এমন সময়ে দ্বিতীয়বার দর্শন দিলেন কল্যাণকামী সন্ন্যাসী পরমহংসজী। স্নেহমাথা স্বরে কহিলেন, “বৎসর বংশীধর, তুমি এবার পদব্রজে বেরিয়ে পড়ো উত্তর ভারতের দিকে। পথে ওঙ্কারনাথের জ্যোতির্লিঙ্গ আর উজ্জয়িনীর মহাকাল দর্শন ক’রে যেও। ব্রহ্মচারীদের পক্ষে মহাকাল মন্দিরে ব’সে শিবপঞ্চাক্ষর মন্ত্রের জপ অত্যন্ত কল্যাণকর। তুমি এই জপ-সাধন সেখানে সম্পন্ন ক’রো।”

ওঙ্কারনাথ তীর্থ লক্ষ্য করিয়া বংশীধর চলিতে থাকেন। তখনকার দিনের পঞ্চাট মোটেই নিরাপদ ছিল না। মারাঠা শক্তির সবে মাত্র পতন ঘটিয়াছে, তাই চারিদিকেই রাজনৈতিক অশান্তি আর সামাজিক বিশৃঙ্খলা। পথে ঠগী ও ডাকাতদের উপদ্রবও বৃদ্ধির পথে। এ অবস্থায় একাকী কোথাও যাওয়া অত্যন্ত বিপজ্জনক। একদল বণিকের সঙ্গে মিলিত হইয়া বংশীধর পথ চলিতেছেন।

এই দলে কখন যে কয়েকজন ডাকাত কারাবারীর বেশে চুকিয়া

পড়িয়াছে তাহা কেহ বুঝিতে পারে নাই। বংশীধরের কান্তি সুগৌর, সুন্দর সূঠাম দেহ, চোখে মুখে আভিজাত্যের ছাপ। ডাকাতরা ভাবিল, নিশ্চয়ই এ যুবক কোনো সম্ভ্রান্ত জমিদারের পুত্র, কোনো জরুরী কাজে দূরদেশে যাইতেছে। কোমরের পেটিতে প্রচুর অর্থ যে লুকানো আছে তাহাতেও কোনো সন্দেহ নাই। স্থির করিল, পথের মধ্যে কোথাও তাহাকে হত্যা করিয়া টাকাকড়ি ও সোনাধানা লুটিয়া নিবে।

ষাত্রীদল সেদিন দৌলতাবাদের কাছে আসিয়া পৌঁছিয়াছে। এ সময়ে এক চটিতে অবস্থান করার সময় দ্রুবত্তেরা বংশীধরের খাতে বিষ মিশাইয়া দেয়। অল্পক্ষণের মধ্যেই সে ভূমিতে লুটাইয়া পড়ে, দেহটি হয় নীলবর্ণ, অসাড়—মুখ দিয়া ঘন ঘন ফেনা নির্গত হইতে থাকে। সঙ্গীরা প্রমাদ গণিতে থাকে। এই মুহূর্ত্ত যুবক সম্বন্ধে আর মাথা না ঘামাইয়া তাড়াতাড়ি সেখান হইতে তাহারা প্রস্থান করে। ডাকাতেরা দেহ তল্লাস করিয়া দেখে টাকাকড়ি বংশীধরের কাছে কিছুই নাই। অগত্যা তাহারাও সেখান হইতে চম্পট দেয়।

স্থানীয় এক বিত্তবান্ পাটেল এই সময়ে দৌলতাবাদের দিকে যাইতেছিলেন। চটির সম্মুখে আসিয়া দেখেন, এক সুদর্শন যুবক মৃতপ্রায় হইয়া পড়িয়া আছে। ব্যাকুল হইয়া তখন তিনি গ্রাম হইতে এক চিকিৎসক ডাকাইয়া আনেন; চিকিৎসা ও পরিচর্যার ফলে বংশীধর অনেকটা সুস্থ হইয়া উঠেন। যুবকটির উপর পাটেলের ইতিমধ্যে বড় মমতা পড়িয়া গিয়াছে। পরম যত্নে তাঁহাকে তিনি এবার দৌলতাবাদে নিজ গৃহে নিয়া যান, সেবা ও শুশ্রূষার যথোচিত ব্যবস্থা করেন। অতঃপর কয়েকদিনের মধ্যেই বংশীধরকে অনেকটা ভালো হইয়া উঠিতে দেখা যায়।

পাটেলের স্ত্রী সানন্দে গ্রহণ করিয়াছেন বংশীধরকে। মায়ের মমত্ব ও স্নেহ দিয়া সদাই তাঁহাকে ঘিরিয়া রাখিতে তিনি ব্যস্ত। বংশীধরকে তিনি জামাইয়া দেন, “ভাথো বাবা, ভগবানের দয়াম

মৃত্যুর মুখ থেকে তুমি উঠে এসেছো। স্বাস্থ্য তো একেবারেই ভেঙে পড়েছে। সাক্ষর কথ্য বলে দিচ্ছি—তোমার শরীর না সারলে আমরা তোমায় কোথাও যেতে দেবো না। মনের আনন্দে আমাদের কাছে কয়েকমাস থাকো, ভালো ক’রে খাওয়া-দাওয়া করো, তারপর যাবার কথা ভাববে।”

শুধু স্নেহময়ী গৃহকর্ত্রীই নয়, বাড়ির আর সকলেও বড় ভালো-বাসিয়া ফেলিয়াছে বংশীধরকে, কেহই তাঁহাকে ছাড়িয়া দিতে রাজী নয়। অগত্যা কিছুদিনের জন্য তাঁহাকে স্থান ত্যাগের সঙ্কল্প ত্যাগ করিতে হয়।

পরম আনন্দে ও আরামে দিনগুলি কাটিয়া যাইতেছে। এভাবে প্রায় তিন মাস অতিক্রান্ত হইল। পাটেলের বৃদ্ধা জননী বংশীধরকে নিজের নাতির মতোই স্নেহ করেন, বংশীধরও তাঁহার প্রতি কম শ্রদ্ধাবান্ নয়। প্রতিদিন সন্ধ্যায় বৃদ্ধাকে তিনি ভাগবত পাঠ করিয়া শুনান। সেদিনও পাঠ চলিতেছে। প্রসঙ্গক্রমে জড়ভরতের উপাখ্যান শুরু হয়। রাজ্য, বিত্তবিভব ও আত্মপরিজন সব কিছু ত্যাগ করিয়া আসিয়া বনবাসী রাজা শেষটায় আবদ্ধ হন এক হরিণশিশুর মায়ায়। অদৃষ্টের এক নিদারুণ পরিহাস! এই করুণ কাহিনীটি বর্ণনা করিতে গিয়া বংশীধর ক্রন্দন করিতে থাকেন, গণ্ড বাহিয়া ঝরিতে থাকে অশ্রুধারা।

বৃদ্ধা চমকিয়া উঠেন, ব্যাকুল হইয়া প্রশ্ন করেন, “বংশী, কি হয়েছে তোমার? এমন ক’রে তুমি কাঁদছো কেন? কেউ কি তোমায় গালমন্দ দিয়েছে, দুঃখ দিয়েছে?”

“না—দাদী, দুঃখ আমিই দিয়েছি আমার নিজেকে। দুঃখের সাগরে পড়ে এখন হাবুডুবু খাচ্ছি। আমার অবস্থা ভরত রাজারই মতো—অথবা তাঁর চাইতে আরো শোচনীয়। সন্ন্যাস নেবো বলে আত্মীয়স্বজনের স্নেহ প্রেম ঠেলে ফেলে চলে এসেছিলাম। কিন্তু কি চরম হুঁত্যা আমার—এখানে দৌলতাবাদে এসে এ গৃহপরিজনদের

মায়ায় আবদ্ধ হয়ে পড়েছি। নাঃ—আর নয়। আজই আমি এ স্থান ত্যাগ করবো, সিদ্ধ করবো নিজের পবিত্র সঙ্কল্প।”

বুদ্ধা দাদী অনেক করিয়া বুঝাইলেন। পাটেলের স্ত্রী আসিয়া শুরু করিলেন করুণ ক্রন্দন। কিন্তু বংশীধর নিজ সিদ্ধান্তে রহিলেন অচল অটল।

আঁচলে চোখ মুছিয়া পাটেলের স্ত্রী কহিলেন, “বেশ বেটা, সন্ন্যাসের পথে তুমি যখন যাবেই, যাও। আর তোমায় আমরা বাধা দেবো না। কিন্তু তোমায় আমি নিজ সন্তানের মতো দেখি, এভাবে কপর্দকহীন অবস্থায় তুমি যেতে পারবে না। আমার নিজের কাছে জমানো রয়েছে পঞ্চাশটি সোনার মোহর। এগুলো তোমায় সঙ্গে নিতে হবে। খাওয়া-পরা আর আরামের জন্ত এগুলো তুমি খরচ করবে। হ্যাঁ, এতে তুমি আপত্তি ক’রো না, বেটা।”

“ঘোর আপত্তি আছে আমার। ঘর-সংসার ছেড়ে কাঙাল সন্ন্যাসীর জীবন যে গ্রহণ করতে চলেছে, একগাদা মোহর সে কি ক’রে কোমরে বেঁধে রাখবে? কেনই বা রাখবে? ছি-ছি এ প্রলোভন আমায় আপনাত্মা যেন দেখাবেন না। তাছাড়া, এই তো সেদিন নিজের অভিজ্ঞতা থেকে দেখলাম। সঙ্গে একটি কানাকড়িও নেই, অথচ ডাকাতেরা আমায় বিষ খাওয়ালো। সোনার মোহর সঙ্গে থাকলে কি আর রক্ষে আছে? না—এসব দেবেন না?”

সাক্ষাৎসাক্ষ্যে বাড়ির সবাই বংশীধরকে বিদায় দেন। স্নেহাঙ্ক পাটেল-গৃহিণী কিন্তু এক সময়ে এক কাণ্ড করিয়া বসেন। সামনেই আসিতেছে প্রচণ্ড শীত ঋতু। তাই ঝুলিতে ভরিয়া বংশীধরের জন্ত একটি জীর্ণ কাঁধা দেওয়া হয়। পাটেল গৃহিণী গোপনে এই কাঁধাটির ভাঁজে পঞ্চাশটি মোহর তাড়াতাড়ি সেলাই করিয়া দেন। মনের একান্ত ইচ্ছা, পথে অর্থের প্রয়োজন হইলে বংশীধর ইহার সদ্ব্যবহার করিবেন।

অনেকটা দূর পথ চলিয়া আসিয়াছেন। হঠাৎ একসময়ে বংশীধরের হাতে ঠেকিল ঐ জীর্ণ কন্বার একপ্রান্ত। স্থানটি যেন বড় ভারী ঠেকিতেছে। তাঁজ খুলিয়া তো তাঁহার চক্ষু স্থির। দেখেন,



পঞ্চাশটি মোহর গাদাগাদি করিয়া সেখানে সেলাই করিয়া রাখা হইয়াছে।

মাতৃরূপিণী মহিলার এই স্নেহ নিদর্শন দেখিয়া চোখ ছুটি তাঁহার শ্রদ্ধায় কৃতজ্ঞতার অশ্রুসঞ্ছল হইয়া আসে। কিন্তু কোনোমতেই যে তাঁহার পক্ষে এগুলি গ্রহণ করা সম্ভব নয়। পথ চলিতে চলিতে স্থির করিলেন, অচিরে কোনো দরিদ্র এবং যোগ্যপাত্রকে মোহরগুলি দান করিবেন।

কয়েকদিন পথ চলার পর বংশীধর ওস্কারনাথে আসিয়া পৌঁছেন। পুরাণে বর্ণিত সুপ্রসিদ্ধ জ্যোতির্লিঙ্গ এখানে বিরাজিত। দর্শন করিয়া বংশীধরের আনন্দের সীমা নাই। দীর্ঘ সময় মন্দিরে ধ্যানজপ করিয়া কাটাইয়া দিলেন, নিবেদন করিলেন প্রাণের আকুতি। করজোড়ে কহিলেন, “প্রভু, অদৃশ্যলোক থেকে তোমার হাতছানিই আমায় ঘর-সংসার ত্যাগ করিয়েছে। দেখো, ত্যাগ-বৈরাগ্য থেকে, তোমার আরাধনার পথ থেকে, কোনোদিন যেন বিচ্যুত না হই।”

সঙ্গে সঙ্গে মনে পড়িয়া যায়, কাঁধায় সেলাই করা স্বর্ণমুদ্রাগুলির কথা। সান্নুনেয়ে মহেশ্বরের চরণে প্রার্থনা জানান, “প্রভু, এ সোনার শৃঙ্খল আর যে সহ্য করতে পারছি নে। তোমার সত্যকার কোনো দরিদ্র ভক্তকে এগুলো দিয়ে দাও।”

মন্দির হইতে বংশীধর নামিয়া আসিয়াছেন, হঠাৎ প্রাজ্ঞের একপাশে তাঁহার দৃষ্টি পড়িল। এক দরিদ্র বৃদ্ধ ব্রাহ্মণ ভাবাবেগ জড়িত কণ্ঠে শিবস্তোত্র পাঠ করিয়া চলিয়াছেন—জ্যোতির্ময়্যায় পুনরুদ্ভববারণায়, দারিদ্র্য-তুঃখ দহনায় নমঃ শিবায়।

বংশীধরের অন্তর হইতে কে যেন ডাকিয়া বলে,—ওরে এই তো তোর স্বর্ণমুদ্রার ভার লাঘব করার সুযোগ উপস্থিত, যোগ্যপাত্র যে সামনেই রয়েছে।

নীরবে ঐ বৃদ্ধ ব্রাহ্মণের পাশে কিছুক্ষণ তিনি বসিয়া থাকেন। তারপর স্তোত্রপাঠ সাজ হইলে সবিনয়ে নিবেদন করেন—

“জিজবর, দেবাদিদেব আপনার প্রার্থনা শুনেছেন। দারিদ্র্য-

দুঃখ থেকে আপনাকে ত্রাণ করার জন্ত আমার হাত দিয়ে পাঠিয়েছেন কিছু অর্থ। আপনি তা গ্রহণ করুন।”

উত্তরে ব্রাহ্মণ কহেন, “দেখুন, নিজে আমি পরম আনন্দে আছি। শিবধামে বাস করি, আকাশবৃষ্টিই আমার সম্বল। প্রভু নিজেই তাই নিত্যকার আহার জুটিয়ে দেন। আমার স্তোত্রপাঠ ও ধন-প্রার্থনা সেজন্ত নয়।”

“তবে কিসের জন্ত।”

“আমার একটি কন্যা অনেক দিন বিবাহযোগ্য হয়েচে। সম্প্রতি একটি পাত্রের সন্ধানও মিলেছে। কিন্তু আমার মতো ভিক্ষুকের পক্ষে বিবাহের ব্যয় নির্বাহ করার মতো টাকাকড়ি কই? তাই তো রোজ এখানে এসে মহেশ্বরের চরণে প্রার্থনা জানাচ্ছি।”

“আপনার প্রার্থনা সফল হয়েছে, দ্বিজবর।” বলিয়াই বংশীধর জীর্ণ কাঁধার সেলাই খুলিয়া ঝকঝকে একরাশ স্বর্ণমুদ্রা ব্রাহ্মণের কোঁচড়ে ঢালিয়া দেন।

বিস্ময় বিক্ষারিত নয়নে ব্রাহ্মণ তাঁহার কোঁচড়ের দিকে তাকাইয়া আছেন। মুখে কোনো কথা সরিতেছে না।

বংশীধরের চোখে মুখে তৃপ্তির হাসি। কহিলেন, “দ্বিজবর, নিশ্চিন্ত মনে এগুলো গ্রহণ করুন। এ অর্থ অতি শুদ্ধ, কোনো অসৎ উপায়ে অর্জিত হয় নি। কোনো সম্পন্ন সংগৃহস্থ এই মোহরগুলো জমিয়ে-ছিলেন। পুত্রাধিক স্নেহে তা আমায় দান করেছেন। আমি কাঙাল, ত্যাগ-বৈরাগ্য ও সন্ন্যাসের পথে বেরিয়েছি। এসব দিয়ে আমি কি করবো? বরং এ অর্থ আপনার মতো ভক্ত দরিদ্র ব্রাহ্মণের কাজে লাগুক। প্রভু জ্যোতির্লিঙ্গের কৃপাতেই আমাদের এ যোগাযোগ সাধিত হয়েছে, তাতে সন্দেহ নেই।”

অপার ঐশ কুপার এই স্পর্শ পাইয়া, দারিদ্র্য-দুঃখ দহনের এই চমৎকারিতা দেখিয়া ব্রাহ্মণ একেবারে স্তব্ধ, আবেগ বিহ্বল। দুই নয়নে তাঁহার কেবলি ঝরিতেছে পুলকাক্রাণ্ড।

অতঃপর কয়েকদিন পদব্রজে পথ চলার পর বংশীধর উজ্জয়িনী তীর্থে আসিয়া উপস্থিত হন। প্রাচীনকাল হইতেই এখানকার মহাকাল মন্দিরের প্রসিদ্ধি রহিয়াছে। তাছাড়া, সাধু সন্ন্যাসী ও ভক্ত গৃহস্থেরা মহাকাল বিগ্রহকে পরম জাগ্রত বলিয়াও মনে করেন। পরমহংসজী বংশীধরকে এখানকার মন্দিরে শিবপঞ্চাক্ষর মন্ত্র জপের নির্দেশ দিয়াছিলেন। বংশীধর পরমনিষ্ঠায় সে নির্দেশ প্রতিপালন করেন। জপসিদ্ধির ফলে অন্তর তাঁহার পরম শান্তিতে ভরিয়া উঠে, নূতনতর অধ্যাত্ম-চেতনায় উদ্দীপিত হয়।

প্রায় একমাস কাল তিনি মহাকাল মন্দির চত্বরে অবস্থান করেন। কৃষ্ণ সাধন ও কঠোর তপস্তার জন্ত মন তাঁহার আকুল। একাদি-ক্রমে পাঁচদিন কাটে নিরন্তর উপবাসের মধ্য দিয়া। অবশিষ্ট দিনগুলি আকাশবৃষ্টি করিয়াই অতিবাহিত করেন। এই সময়ে এক বৃদ্ধা চানাওয়ালী দিনান্তে বংশীধরকে একমুঠা ভিজা ছোলা দিয়া যাইত, তাহা দিয়াই বৈরাগ্যবান্ তরুণ সাধক করিতেন ক্ষুধার নিবৃত্তি। দেবাদিদেব মহেশ্বরের ধ্যানজপে এসময়ে এমন গভীরভাবে তিনি নিমগ্ন থাকিতেন যে দিনরাত কোথা দিয়া চালিয়া যাইত, হুঁশ থাকিত না।

এই সময়ে আর একবার ঘটে তাঁহার জীবনের অশ্রুতম পথ-প্রদর্শক পরমহংসজীর আবির্ভাব। পরমহংসজী কহেন, “বৎস, এখানে আর তোমার থাকার প্রয়োজন নেই। তাড়াতাড়ি উত্তর ভারতের গঙ্গাতীরের দিকে অগ্রসর হও। বিঠৌরে বাল্মীকি তপোবনে রয়েছেন অশেষ শাস্ত্রবেত্তা, প্রবীণ সাধক, রাঘবেন্দ্র স্বামী। তাঁর আশ্রয়ে কিছুকাল বাস ক’রে শাস্ত্রের উচ্চতর পাঠ তুমি আয়ত্ত্ব ক’রে নাও। তোমার সাধন প্রস্তুতির এ হবে একটা বড় অঙ্গ। আরও একটা কথা। পথে আজকাল নানা গোলযোগ হচ্ছে, হঠাৎ কোনো বিপদে পড়লে ঘাবড়ে যেরো না। প্রভু মহেশ্বর তোমায় রক্ষা করবেন।”

কয়েকজন পথচারীর সহিত মিলিত হইয়া বংশীধর সিদ্ধিয়া রাজ্যের মধ্য দিয়া চলিয়াছেন। এখানকার শাসনব্যবস্থায় তখন

চরম বিশৃঙ্খলা ও গোলযোগ। উত্তরাধিকারীরা সিংহাসনের দাবি নিয়া উদগ্র হইয়া উঠিয়াছে। চারিদিকে চলিয়াছে চক্রীদের ষড়যন্ত্র, গ্রেপ্তার ও নির্ধাতন। সন্দেহবশে পথচারী বংশীধরও কয়েকজন সঙ্গীসহ ধৃত হন। নিষ্কিণ্ত হন কারাগারে। কয়েকদিনের মধ্যে কর্তৃপক্ষ নিজেদের ভুল বুঝিতে পারিয়া তাঁহাদের মুক্ত করিয়া দেন। ইহার কয়েকদিন পরেই বিদ্যাচলের তীর্থাদি পরিক্রমা করিয়া বংশীধর কানপুরের কাছে বিঠৌরে উপনীত হন।

সুপ্রাচীন যুগে মহর্ষি বাল্মীকির আশ্রম বিরাজিত ছিল আধুনিক বিঠৌরের সংলগ্ন পবিত্র ভূমিতে। আদিকবির পুণ্যময় স্মৃতিকে জনমানসে চির উজ্জ্বল রাখার জন্ত পণ্ডিতবর রাঘবেন্দ্রজী এখানে একটি উচ্চতর শাস্ত্র অধ্যয়নের চতুষ্পাঠী খুলিয়াছেন, নাম বাল্মীকি তপোবন।

এখানে পৌঁছিয়াই বংশীধর রাঘবেন্দ্রজীর চরণে প্রণত হইলেন, নিবেদন করলেন অন্তরের আকাজক্ষা। দিব্যকাস্তি, বৈরাগ্যবান্ এই ব্রহ্মচারীকে দেখিয়া আচার্য প্রীত হইলেন। ছুই একটি প্রশ্ন জিজ্ঞাসা করার পর প্রসন্ন কণ্ঠে কহিলেন, “বৎস, এ আশ্রমে তোমায় আমি আশ্রয় দিচ্ছি। সঙ্গে সঙ্গে এ আশাও পোষণ করছি, শ্রদ্ধা ও নির্ভার সঙ্গে অধ্যয়ন সমাপ্ত ক’রে তুমি তৈরি করবে তোমার অধ্যাত্মজীবনের শাস্ত্র-ভিত্তি।”

বিঠৌরের এই আশ্রমে বংশীধর তিন বৎসরকাল অধ্যয়ন করেন। তাঁহার অমানুষী মেধা, প্রতিভা ও শ্রমনিষ্ঠা দেখিয়া আচার্যের বিশ্বাসের অবধি নাই। পরম যত্নে নিজের অধীত বিজ্ঞা তাঁহাকে তিনি শিখাইতে থাকেন।

এই সময়ে ঘটনাচক্রে একদিন বংশীধর তাঁহার অসাধারণ গুরু-ভক্তির পরিচয় দেন। আচার্য রাঘবেন্দ্রজী সন্ধ্যাবেলায় প্রায়ই শিষ্যদের নিয়া গঙ্গাতীরে বেড়াইতে যাইতেন। সেদিনও গিয়াছেন। বর্ষার প্রাবল্য দেখা দিয়েছে কিছুদিন বাবৎ। ক্ষীতকারী গঙ্গা ধরবেগে ভা. সা. (৮)-১৭

বহিয়া চলিয়াছে। আশ্রমের কয়েকটি ছাত্র আনন্দ কলরব করিতে করিতে স্নান শুরু করিয়া দিল। একটু পরেই দেখা গেল, ইহাদের একজন প্রবল স্রোতের টানে ভাসিয়া চলিয়াছে। রক্ষার কোনোই উপায় নাই। কিংকর্তব্যবিমূঢ় হইয়া সবাই শঙ্কিত হৃদয়ে ঐ অসহায় ছাত্রটির দিকে তাকাইয়া আছে।

চরম বিপদের আর দেরি নাই। ক্ষণকাল পরেই অবসন্নদেহ ছাত্রটি গঙ্গাগর্ভে ডুবিয়া বাইবে। রাঘবেন্দ্র আচার্য উদ্বেজিত স্বরে ছাত্রদের কহিলেন, “পুরাণে তোমরা তো গুরুভক্তির কত কথাই পড়েছো। তোমাদের ভেতর এমন একজনও কি নেই যে গুরুর আশ্রিত এ যুবকটিকে উদ্ধার ক’রে আনতে পারে?”

বংশীধর নীরবে উঠিয়া দাঁড়ান, মুহূর্ত মধ্যে বাঁপাইয়া পড়েন বর্ষা-বিক্ষুব্ধ উত্তাল গঙ্গায়। সন্তরণে চিরদিনই তিনি পটু, দেহের শক্তি ও সাহসও যথেষ্ট। স্রোতের অলুকূলে প্রায় এক ক্রোশ সাঁতরাইয়া গিয়া শেষটায় বিপন্ন ছাত্রটিকে ধরিয়া কেলিলেন, টানিয়া আনিলেন তীরের দিকে।

ইতিমধ্যে স্রাব্ধির অন্ধকার গঙ্গার ছইকূল ছাইয়া কেলিয়াছে। আচার্য রাঘবেন্দ্রজী মশাল হাতে, অগ্ন্যস্ত্র ছাত্রদের সঙ্গে নিয়া, বংশীধর ও তাঁহার সহপাঠীকে খুঁজিতে বাহির হইয়াছেন। অবশেষে তাহাদের দেখা মিলিল। সকলে হাঁক ছাড়িয়া বাঁচিলেন।

বার বার আশীর্বাদ জানাইয়া গুরু কহিলেন, “বংশীধর, তুমি ধন্য। তোমার মতো অন্তঃবাসী পেয়ে আচার্য হিসেবে আমি গর্ব বোধ করছি। তোমার এই গুরুভক্তি, পরহিতে প্রাণ বিপন্ন করবার এই মহৎ প্রয়াস সবাইকে উদ্ধৃক করুক, এই আমার কামনা।”

শাস্ত্রচর্চায় অনেকদিন অতিবাহিত হইয়াছে, এবারে বংশীধরের হৃদয়ে জাগিয়া উঠে যোগসাধনার আকাঙ্ক্ষা। জ্ঞান সাধনার উপর বেশী বোঁক থাকিলেও ঈশ্বরলাভের অগ্ন্যস্ত্র শাস্ত্রসম্মত পথের অন্তিমতাও তিনি পাইতে চান। এবার তাই বিঠোর ত্যাগ করিয়া

তিনি উপনীত হন হিমালয়ে, উচ্চকোটির যোগীমাহাত্মাদের অমুসন্ধান শুরু করেন। কয়েকদিন হরিদ্বার কন্থল ও হ্রষিকেশে কাটাইয়া অবশেষে আসিয়া পৌঁছান কেদার বদরীর মহাতীর্থে।

এখানে থাকাকালে সংবাদ পান, নিচে বিষ্ণুপ্রয়াগের পর্বতগুহার হঠাৎ যোগে সিদ্ধ এক মহাপুরুষ বাস করেন। বড় তুর্গম ও জনহীন সেই অঞ্চল। বহু হুঃখ কষ্ট ও পথশ্রম স্বীকার করিয়া সাধক বংশীধর যোগীবরের গুহায় গিয়া উপস্থিত হন। ভক্তিভরে প্রণাম নিবেদনের পর ব্যক্ত করেন মনের অভিলাষ। এই যোগীর কৃপায় ও নিজের অনন্ত নিষ্ঠায় কয়েক বৎসরের মধ্যে হঠাৎ যোগে তিনি পারদ্রুম হইয়া উঠেন।

হঠাৎ যোগের ফলে বংশীধরের দেহকাস্তি উজ্জল হইয়া উঠে, দেহে মনে উদ্ভূত হয় এক অভূতপূর্ব শক্তি। সিদ্ধাই ও যোগসামর্থ্যে ধীরে ধীরে দেখা দেয়। কিন্তু এসব কোনো কিছুতেই বংশীধরের শাস্তি নাই, আনন্দ নাই। এতকালের পরিত্রাণ, তপস্যা ও শাস্ত্রচর্চার মধ্য দিয়া ঈশ্বরলাভের জ্ঞান, ব্রহ্মসাক্ষ্যকারের জ্ঞান, মহাত্মার উদগ্র অধীর হইয়া উঠিয়াছে—পরম প্রাপ্তির সঙ্কল্প হইয়াছে দৃঢ়তর। কিন্তু হঠাৎ যোগের সাধনক্রমের মধ্য দিয়া জীবনের সেই লক্ষ্যে তো পৌঁছিতে পারিতেছেন না।

নিরপেক্ষ মন নিয়া দিনের পর দিন ভরিয়া দেখিলেন, নিজের সম্পর্কে বিচার-বিশ্লেষণও কম করিলেন না। চিন্তের যে শুদ্ধতা প্রশান্তি ও স্নৈহ্য সাধিত হইলে পরা চৈতন্যের উদয় হয়, হঠাৎ যোগে সাধনায় তাহা লাভ করা দুষ্কর। বরং এই যোগ সাধনায় ফলে যে সিদ্ধাই ও বিভূতির ক্ষুরণ হয়, তাহার ফলে নবীন সাধকের আত্মা ভিমান বাড়িবারই আশঙ্কা থাকে। হৃদয়ে তাঁহার এবার দৃঢ় প্রতীতি জন্মিল, রাজযোগের পথ ছাড়া পরমপ্রাপ্তির অন্য পথ নাই। এবার সেই রাজযোগের রাজপথই তিনি অমুসরণ করিবেন একান্ত নিষ্ঠায়।

অতঃপর শিক্ষাদাতা হঠাৎ যোগী মহাত্মাকে অন্তরের গভীর কৃতজ্ঞতা জানাইয়া বংশীধর বিষ্ণুপ্রয়াগ হইতে বাহির হইয়া পড়েন। উপস্থিত হন হ্রষিকেশে।

হৃষিকেশে তখন গোবিন্দ-গুরুজী আশ্রমের খুব প্রসিদ্ধি। এই আশ্রমে স্বামী পূর্ণাশ্রম ও সতুয়া স্বামী নামে দুই মহাত্মা অবস্থান করিতেছেন। বেদান্তের ব্রহ্মাত্মজ্ঞান ও রাজযোগের ব্যাখ্যা বিশ্লেষণে ইহারা পারদর্শী। ইহাদের সান্নিধ্য ও সাহায্য পাইবার জন্য বংশীধর গোবিন্দ-গুরুজী আশ্রমে আশ্রয় নিলেন।

সুদর্শন, শাস্ত্রবিদ, বংশীধর অন্নদিনের মধ্যেই প্রবীণ স্বামীজীদ্বয়ের অত্যন্ত স্নেহভাজন হইয়া উঠেন। নবীন সাধক হঠযোগে পারদর্শী হইয়া আসিয়াছেন, এজন্য স্বামীজীরা আদর করিয়া তাঁহার নাম দেন—বীরভদ্র। এখানকার শাস্ত্রচর্চা ও সাধন-অনুকূল পরিবেশে পরমানন্দে বংশীধর প্রায় তিন বৎসর কাটাইয়া দেন।

এই সময়ে আবার একদিন তাঁহার সম্মুখে আবির্ভূত হন তাঁহার চিত্রকল্যাণকামী পরমহংস মহারাজ, প্রদান করেন তাঁহাকে প্রয়োজনীয় নির্দেশ।

প্রসন্ন মধুর কণ্ঠে পরমহংসজী বলেন, “বৎস বংশীধর, তোমার ব্রহ্মলাভের আকুতি দেখে, শাস্ত্রবৃৎপত্তি দেখে, আমি আনন্দিত হয়েছি। ইতিমধ্যে হঠযোগ-সাধন তুমি নিয়েছো ভালোই করেছে। হঠযোগে ব্রহ্মলাভ হয় না, কিন্তু ব্রহ্মলাভের জন্য হৃদয় তপস্যা করতে হয়—তাতে অবশ্যই সাহায্য হয়। দেহ হঠযোগ-কুশল ও দৃঢ় থাকলে কলুষ ও ত্যাগ বৈরাগ্যের প্রস্তুতি ভালোভাবে গড়ে ওঠার অবকাশ পায়। কিন্তু বৎস, সদাই দৃষ্টি নিবদ্ধ করতে হবে মূল লক্ষ্যের ওপর। আর সে দৃষ্টি যে তোমার আছে, তা আমি জানি। রাজযোগই তোমার আসল পথ, এ পথ নিজেই তুমি খুঁজে নিতে বেরিয়েছো এটা বড় আনন্দের কথা। হ্যাঁ বৎস, এবার তোমার আমি একটা নূতন নির্দেশ দেবো।”

“মহারাজ, আপনার আশীর্বাদই আমার এগিয়ে দিচ্ছে ধাপে ধাপে। আপনার কল্যাণ কামনা আমার সতত রক্ষা করছে বর্মের মতো। আপনার যে কোনো নির্দেশ আমার শিরোধার্য।” যুক্তকরে নিবেদন করেন বংশীধর।

“বৎস, সময় হয়ে এসেছে। তোমার চিহ্নিত সদৃশুরু তোমার প্রতীক্ষায় বসে আছেন। অবিলম্বে তুমি কাশীধামে যাও। সেখানে গুরুর কাছে ভক্তজ্ঞান লাভ করো। ব্রহ্মসাক্ষাৎকার ক’রে জীবন তোমার সফল হয়ে উঠুক।”

পরমহংসজীর নির্দেশপালনে বংশীধর আর বিলম্ব করেন নাই। দীর্ঘ দিনের তিতিক্ষা, তপস্তা ও প্রত্যাশা সফল করার জন্ত তিনি উপনীত হন কাশীধামে।

আনন্দদায়িনী কাশী বিজ্ঞাদায়িনী কাশী—মোক্ষদায়িনী কাশী। যুগ যুগ ধরিয়৷ শাস্ত্রভ ভারতের ললাটে শুচিশুভ্র তিলকরূপে জলজল করিতেছে এই পুণ্যময়ী তীর্থনগরী। বিশ্বনাথ আর অন্নপূর্ণার লীলা-নিকেতন এই কাশীকে বেটন করিয়া রহিয়াছে গঙ্গার পবিত্র ধারা, আর রহিয়াছে অগণিত ব্রহ্মবিদ পুরুষদের তপস্তার অনন্ত প্রবাহ। তেজঃপুঞ্জকলেবর ব্রহ্মবিদ মহাত্মা, ব্রহ্মচারী সাধকদল ও মুমুক্শুদের দর্শন যেমন এখানে পাওয়া যায়, তেমনি পাওয়া যায় শাস্ত্রবিদ আচার্য আর সনাতন ধর্ম ও সমাজের বিশিষ্ট ধারক বাহকদের। এখানকার কত মঠে মন্দিরে সোৎসাহে চলিতেছে বেদান্ত ও ব্রহ্মবিজ্ঞার অমূল্যলন, আবার কত বড় বড় ধর্মসভায় অনুষ্ঠিত হইতেছে নানা দেশ হইতে আগত তর্ক-শূরদের বিচার দ্বন্দ্ব। অধ্যাত্ম-জীবন আর সারস্বত জীবনের মিলিত আলোকচ্ছটায় এই পুণ্যময় নগরীর দিক্-দিগন্ত উদ্ভাসিত। তাই এই কাশীধামে উপনীত হইয়া বংশীধরের আনন্দের অবধি নাই।

কয়েকদিন ঘুরিয়া ঘুরিয়া তিনি নগরীর শ্রেষ্ঠ মঠ মন্দির পীঠস্থান ও বিজ্ঞাকেন্দ্রগুলি দর্শন করিয়া বেড়ান। আশ্রয়ের স্থান কোথাও মিলে নাই, ব্রহ্মচারী বেশে যত্রতত্র ঘুরিয়া বেড়ান, সত্রে একবেলা আহার জুটিয়া যায়, তারপর নিশাযোগে দশাধমেধ ঘাটের সিঁড়িতে ঘাটিয়ালাদের ছাতার নিচে শয়ন করিয়া গভীর নিদ্রায় ঢলিয়া পড়েন।

কাশীতে তখন শক্তিধর মহাত্মাছয় তৈলঙ্গ স্বামী ও ভাস্করানন্দের



খুব প্রসিদ্ধি। বংশীধর সাগ্রহে ইহাদের দর্শন করিলেন, ভক্তিভরে প্রণাম নিবেদন করিয়া কিরিয়া আসিলেন।

অন্তরে তাঁহার বড় প্রশ্ন—কোথায় তাঁহার চিহ্নিত মদগুরু যাহার নিকট হইতে নিবেন সম্যাস দীক্ষা, যাহার চরণে চিরতরে করিবেন আত্মসমর্পণ। মনপ্রাণ তাঁহার রাজযোগের সাধন গ্রহণে উন্মুখ হইয়া উঠিয়াছে। এ সাধন যিনি দিবেন তাঁহাকে এঁকাধারে হইতে হইবে বৈরাগ্যবান, তপস্তাপরায়ণ, বেদান্তের অদ্বৈত বিচারে পারঙ্গম এবং রাজযোগের নিগূঢ় সাধনায় সিদ্ধিকাম। যে সাধন-প্রস্তুতি এ যাবৎ বংশীধরের জীবনে গড়িয়া উঠিয়াছে তাহাকে সার্থক করিয়া তুলিতে হইলে এমন এক মহাত্মাকে খুঁজিয়া বাহির করিতে হইবে।

পরমহংসজী আশ্বাস দিয়াছেন, এই কানীধামেই গুরু তাঁহার জন্ম অপেক্ষমাণ। ব্রহ্মবিদ পুরুষের এ আশ্বাসবাণী তো কখনো মিথ্যা হইবার নয়। আশায় আশায় দিন গুণিতে থাকেন বংশীধর।

ইতিমধ্যে সংবাদ পাইলেন, গঙ্গাতীরে মহারানী অহল্যাবাঈর প্রতিষ্ঠিত মঠে এক পরমজ্ঞানী অশেষ শাস্ত্রবেত্তা মহাপুরুষ অবস্থান করেন। বিশেষ করিয়া বেদান্ত বিচারে ও রাজযোগের সাধনায় তাঁহার তুল্য ব্যক্তি সমকালীন উত্তর ভারতে কেহ নাই।

প্রত্যাষে গঙ্গাস্নান সারিয়া ভস্ম-ভূষিত ললাটে, প্রদীপ্ত তাস্করের মতো সম্যাসীঘর গোড়স্বামী অহল্যাঘাটে শিশুগণ সহ বসিয়া আছেন। দ্রুত শাস্ত্রতত্ত্ব ও সাধনতত্ত্বের ব্যাখ্যা ও আলোচনা চলিয়াছে। আর প্রবীণ অন্তরঙ্গ শিষ্যেরা তৃষার্ত চাতকের মতো স্বামীজীর অমৃতবাণী শ্রবণ করিতেছেন।

অনেকক্ষণ যাবৎ এই তত্বালোচনা শুরু হইয়াছে। মণ্ডলীর এক কোণে বংশীধর নীরবে নির্নিমেষে প্রজ্ঞানঘন দিব্যোজ্জ্বল মূর্তির দিকে চাহিয়া আছেন। সর্ব অন্তর দিয়া উপলব্ধি করিতেছেন,—যে পরম বস্তুলাভের জন্ম তিনি সংসার ছাড়িয়াছেন, ভিখারীর মতো দেশ দেশান্তরে ঘুরিয়া মরিতেছেন, তাহা এই মহান পুরুষেরই করায়ত্ত। আত্মসমর্পণ করিতে হয় তো এমন মহাত্মার চরণেই করিতে হয়

শাস্ত্র ব্যাখ্যা ও আলোচনার শেষে বংশীধর উঠিয়া দাঁড়ান, আচার্য গোড়স্বামী পদপ্রান্তে ভক্তিভরে লুটাইয়া পড়েন। তারপর নিজের পরিচয় দিয়া কয়েকোড়ে নিবেদন করেন তাঁহার অন্তরের আকাজক্ষা—“প্রভু, সারা দক্ষিণ ও উত্তর ভারত পরিক্রমা ক’রে এই অভাগার জীবনভরী আজ আপনার চরণপ্রান্তে এসে ঠেকেছে। আপনি এর ভার নিন। কৃপা ক’রে আমার সন্ন্যাস দান ক’রে, খুলে দিন মোক্ষপথের দ্বার।”

অনিন্দ্যাসুন্দর যুবক, চোখে-মুখে প্রতিভা ও সাধন-নিষ্ঠার ছাপ। আচার্য গোড়স্বামী মুগ্ধনয়নে কিছুক্ষণ বংশীধরের দিকে চাহিয়া আছেন। তারপর প্রশান্ত স্বরে প্রশ্ন করা শুরু করেন। কি তাহার নাম, বংশপরিচয়, কোথায় কোন্ আচার্যের কাছে কোন্ কোন্ শাস্ত্র অধ্যয়ন করিয়াছেন। কোন্ সাধন নিয়া কতটা অগ্রসর হইয়াছেন, খুঁটিনাটি সকল তথ্যই স্বামীজী মহারাজ জানিয়া নিলেন।

শাস্ত্রালাপ শুরু করিতেই দেখা গেল, বয়সে তরুণ হইলেও বংশীধর একজন অসামান্য শাস্ত্রবেত্তা। দীর্ঘদিনের ত্যাগ বৈরাগ্যের সহিত জ্ঞানানুশীলন তাঁহার জীবনে যুক্ত হওয়ায় ব্রহ্মকারাবৃত্তির এক বিরাট আধার রূপে সে পরিণত হইয়াছে। বহুদিন যাবৎ অন্তরে অন্তরে ব্রহ্ম-সাধনার এমনি এক উপযুক্ত অধিকারী পুরুষের, এমনি এক উত্তরসূরীর, প্রতীক্ষায় ছিলেন গোড়স্বামী।

তৃপ্তি ও প্রসন্নতার আচার্যের সুগৌরব আননখানি প্রদীপ্ত হইয়া উঠিয়াছে। কিন্তু বংশীধরকে তাঁহার এ ভাবান্তর বুঝিতে দিলেন না। কণ্ঠস্বরে গাভীর্ষ টানিয়া আনিয়া কহিলেন, “বৎস, উত্তম কথা। আমি তোমায় আমার কাছ থেকে সন্ন্যাস নেবার সুযোগ দেবো। কিন্তু তার আগে কয়েকটা মাস আমার কাছে নূতন ক’রে তোমায় বেদান্তের পাঠ নিতে হবে। তোমার গ্রহণ ক্ষমতা যদি সন্তোষজনক হয়, তবেই তোমায় দীক্ষা দেবো, নতুবা আর কোথাও তোমায় যেতে হবে।”

বংশীধর তো আকাশের চাঁদ হাতে পাইলেন। বুঝিলেন, আচার্য

তাঁহাকে কঠোরভাবে পরীক্ষা করিয়া নিতে চান। বেশ, তাহাতেই তিনি সম্মত।

আচার্য গোড়স্বামী আবার কহেন, “হ্যাঁ বৎস, আর একটা কথা। আমার এ আশ্রমে এখন কিন্তু তোমার স্থান হবে না। তুমি যেমনভাবে দিনাতিপাত করছো, তাই ক’রে যাবে। আর প্রতিদিন দুই বেলা আশ্রমে এসে গ্রহণ করবে তোমার পাঠ।”

“যে আশ্রমে মহারাজ। আপনার নির্দেশ আমার শিরোধার্য।” আচার্যকে প্রণাম জানাইয়া নির্বিকার চিত্তে বংশীধর স্থান ত্যাগ করেন।

এবার গোড়স্বামীর ভক্ত শিষ্যদের মধ্যে শুরু হয় মুহূ গুঞ্জন। আচার্য কৌতূহলী হইয়া প্রশ্ন করেন, “তোমরা কি আমার কিছু বলতে চাও?”

“হ্যাঁ, প্রভু, আমাদের একটা নিবেদন আছে।” সবিনয়ে বলেন এক প্রধান শিষ্য। “আপনার এই বৃহৎ আশ্রমে স্থানের অভাব বিন্দুমাত্র নেই, রাজকীয় ভাণ্ডারা তো প্রায়ই লেগে আছে। তবে নবাগত ব্রহ্মচারীটিকে এখানে স্থান দিলেন না কেন, বুঝতে পারছি। ওকে তো বৈরাগ্যবান ও তপস্বী-পরায়ণ বলেই মনে হলো।”

“ঠিকই বলেছো। এ যুবকটির ভেতর বিরাট সম্ভাবনা লুকিয়ে রয়েছে। আধার বড় ও শুদ্ধ বলেই তো পরীক্ষা হবে কঠোরতর। সত্রেয় শুকনো রুটি খেয়ে আর ঘাটিয়ালের ছাতার নিচে রাত্রিবাস ক’রে আরো কিছুদিন কাটিয়ে দিক। ত্যাগ বৈরাগ্যের শোধন ওকে পাকা সোনার পরিণত করুক। এটাই আমি চাই।”

কিছুক্ষণ নীরব থাকিয়া গোড়স্বামী আপন মনে কহিতে থাকেন, “ভালো মন্দের কথা নয়—তবে একটা পরিবর্তনের সূচনা কিন্তু দেখা যাচ্ছে। কালীর মঠ-মন্দির ও বিজ্ঞানক্ষেত্রে এতদিন দক্ষিণী দণ্ডী সন্ন্যাসীদেরই ছিল একচেটিয়া নেতৃত্ব। উত্তর ভারতের এই প্রতিভাধর যুবকটি সেই ধারা একবার পাল্টে দেবে বলে মনে হচ্ছে।”

পরের দিন হইতেই বংশীধর গোড়স্বামীর কাছে পাঠ নেওয়া শুরু করেন। ত্যাগ-বৈরাগ্যময় পথে জীবনযাত্রা তাঁহার আগেকার মতোই চলিতে থাকে।

গৌরকান্তি, সমুদ্রত দেহ, প্রতিভা-সমুজ্জ্বল বংশীধরের প্রতি এ সময়ে অনেক মঠ-মণ্ডলীর মোহান্তের দৃষ্টি আকৃষ্ট হয়। নানা প্রলোভন দেখাইয়া এই শাস্ত্রবিদ তরুণকে তাঁহারা দলে ভিড়ানোর চেষ্টা করিতে থাকেন। কিন্তু তাঁহাদের সকল চেষ্টাই হয় ব্যর্থ। গোড়স্বামী এখন বংশীধরের জীবন-আকাশের ঋবতারা, অনন্ত-নিষ্ঠায় এই কুপালু আচাষের দিকে লক্ষ্য রাখিয়া অধ্যাত্মপথের অভি-অভিযাত্রায় তিনি অগ্রসর হইতে থাকেন।

উত্তর ভারতে তখন সিপাহী যুদ্ধের ঘোর তাণ্ডব চলিয়াছে। বার্মাণসীতেও এই সময়ে বিক্ষোভ ও সংঘর্ষ দেখা দিতে থাকে। শাস্ত্রিয়ক্ষার জ্ঞাত কর্তৃপক্ষ এ অঞ্চলে একদল গোরা সৈন্য মোতায়েন রাখেন। কিছু সংখ্যক সেনা মাঝে মাঝে গঙ্গাবক্ষে টহল দিয়া বেড়ায়। সেদিনও তাঁহারা নদীতে ঘুরিয়া বেড়াইতেছে। ইংরেজ সেনার আবির্ভাব দেখিয়া ঘাটের লোকজন ভয়ে দূরে সরিয়া পড়িয়াছে। এমন সময়ে বংশীধর ঘুরিতে ঘুরিতে নদীতীরে আসিয়া উপস্থিত।

নির্জন ঘাটে কে এই লোকটি, কি তাহার অভিসন্ধি? বজ্রার ইংরেজ সৈনিকরা সন্দিহান হয়, ভাড়াভাড়ি তীরে নামিয়া আসে। বাহিবাস-পর্য্য অধনগ্ন বংশীধরের সন্মুখে তাঁহারা সঙ্গীন উচাইয়া ধরে, ভাঙা-ভাঙা হিন্দিতে নানা প্রশ্নবাণ বর্ষণ করিতে থাকে। বংশীধরও যথাযথ উত্তর দেন এই প্রশ্নোত্তরের মর্মার্থ—

“ওহে, একলাটি এখানে তুমি ঘুরে বেড়াচ্ছে কেন, বলতো?” গোরা সৈনিকেরা জিজ্ঞাসা করে।

“কেন, আমায় দেখে কি বিজ্ঞোহী বলে মনে হচ্ছে? পরিচ্ছদ দেখে বুঝতে পারছো না যে আমি একজন ভিক্ষাজীবী সাধু?”  
—বংশীধর মুচকি হাসিয়া উত্তর দেন।

বংশীধরকে আপাদমস্তক নিরীক্ষণ করিয়া, তাহার সপ্রতিভ হাসি দেখিয়া, গোরারা একটু আশ্বস্ত হয়, বলে—“না, তোমায় দেখে মনে হচ্ছে তুমি বদমায়েস নও। তুমি সাধু—জ্যোতিষী। আচ্ছা, তুমি জ্যোতিষী গণনা করতে পারো?”

“কি তোমাদের প্রশ্ন, বলই না সাহেব, একবার চেষ্টা ক’রে দেখি পারি কিনা।” সর্কৌতুকে বলেন বংশীধর।

“ভাখো, সাধু, এলাহাবাদে এখন জোর লড়াই চলছে। বিজোহাঁ সিপাইরা ইংরেজ সরকারের কেল্লা ঘিরে কিলেছে। আমরা বড় দুশ্চিন্তায় আছি। বলতে পারো ঐ কেল্লার পতন ঘটেছে কিনা?”

“খুব পারি। আচ্ছা তোমরা আমার পায়ের কাছে মাটির দিকে তাকিয়ে দেখতো। কি দেখছো? পিঁপড়ের সারি মাটির একটা উঁচু চক্রের চারপাশ ঘিরে রয়েছে, ভেতরে ঢুকছে না,—তাই না? এলাহাবাদ দুর্গের অবস্থাও এমনি। সিপাইরা দুর্গ অবরোধ করেছে, কিন্তু ঢুকে পড়ার মতো শক্তি সঞ্চয় এখনো করে নি।”

গোরা সৈন্যকেরা এ সংবাদে উৎফুল্ল হইয়া উঠে। বলে, “সাধু, তুমি বড় ভালো লোক। আচ্ছা যাও, তুমি তোমার খুশী মতো নদীর ঘাটে চলাফেরা করতে পারো।”

নির্বিকার চিন্তে বংশীধর ঘাটের এক কোণে বসিয়া পড়েন, তারপর ধ্যান-ভজনে রত হন।

কয়েকমাস গত হইয়াছে। সাধনা, স্বাধ্যায় ও গুরুসেবার মধ্যে দিয়া বংশীধর আচার্য গোড়স্বামীর আরো ঘনিষ্ঠ আরো প্রিয় হইয়া উঠিয়াছেন। পরীক্ষার কয়েকটি পর্যায় সমাপ্ত হইয়াছে। গুরু এবার নবীন তপস্বীকে সন্ন্যাস দীক্ষাদানের সিদ্ধান্ত করিলেন। উত্তরায়ণের পূর্ণিমায়, শুভ নক্ষত্রে, এই অনুষ্ঠান সম্পন্ন হইয়া গেল। বংশীধরের সন্ন্যাস নাম হইল—বিশুদ্ধানন্দ সরস্বতী।

অলৌকিক মেধা প্রতিভার অধিকারী. সংব্রাহ্মণকুলে জাত এই নবীন শিষ্য। গুরু মনে মনে স্থির করিয়াছেন তাঁহাকেই করিষেন

গদির উত্তরাধিকারী, তাঁহার সন্ন্যাসী মণ্ডলীর ভবিষ্যৎ-নেতা। কাশী-ধামের সারস্বত সমাজে ও শাস্ত্রবিদ্ সন্ন্যাসী সমাজে যাহাতে সে লীৰ্ঘস্থানীয় হইয়া উঠে, সে প্রস্তুতি সাধনেও গোড়স্বামী কোনো ক্রটি রাখিলেন না। প্রাচীন শাস্ত্র ও অধিবিদ্যায় তাঁহাকে পারদ্রুম করিয়া তুলিতে লাগিলেন।

মীমাংসা দর্শন, বেদান্ত, প্রাচীন ও নব্যজ্ঞান, কপিল দর্শন, শৈবতন্ত্র, প্রভৃতির মূল, প্রকরণ, টীকা ভাষ্য বিগ্ৰহানন্দ সরস্বতী একে একে আয়ত্ত করিয়া ফেলেন। কয়েক বৎসরের মধ্যে গুরু তাঁহাকে নিজস্ব সন্ন্যাসী সম্প্রদায়ের অধ্যাপনা কার্যেরও দায়িত্ব অর্পণ করেন।

কাশী ও উত্তর ভারতের শাস্ত্রার্থ বিচারসভাগুলিতে অশেষ শাস্ত্র-বিদ্ বিগ্ৰহানন্দ মহারাজ আবির্ভূত হইতেন জলন্ত পাবকের মতো। শাস্ত্রের নিহিতার্থ উদ্ঘাটনে, সনাতন ধর্মের বিজয়কেতন সংস্থাপনে তিনি ছিলেন এক অপ্রতিদ্বন্দ্বী নেতা। কাশীর মঠ মণ্ডলী আখড়া ও গৃহীমণ্ডল যেখানেই বিগ্ৰহানন্দ যাইতেন, লাভ করিতেন সকলের স্বতঃস্ফূর্ত শ্রদ্ধা ও সম্মম। শিষ্যের এই সাকল্যে আচার্য গোড়স্বামীর আনন্দের সীমা নাই।

এ সময়ে মণ্ডলীর সকল সন্ন্যাসীকে একদিন তিনি সমবেত করিলেন, ঘোষণা করিলেন,—তাঁহার দেহান্তের পর বিগ্ৰহানন্দ সরস্বতীই হইবেন মঠ-মণ্ডলীর মোহান্ত এবং পরিচালক। তাই ষতদিন এই মহাত্মা জীবিত ছিলেন, মঠের ভাবী উত্তরাধিকারী বিগ্ৰহানন্দের আচার-আচরণ ও আদর্শের বিগ্ৰহতা রক্ষার দিকে ছিল তাঁহার স্মৃতিস্মৃতি দৃষ্টি। প্রিয় শিষ্যের অন্তরে আত্মাভিমান যেন কখনো না আসে—এ জ্ঞাত তাঁহার সতর্কতার অবধি ছিল না। মঠের একদিনকার একটি ক্ষুদ্র ঘটনায় ইহার প্রমাণ মিলে।—

বিগ্ৰহানন্দের আগমনের কয়েকবৎসর পূর্বে আচার্য গোড়স্বামী তিনজন ব্রহ্মচারীকে সন্ন্যাস দেন। ইহাদের মধ্যে স্বামী বিশ্বরূপ

ছিলেন প্রবীণতম এবং গুরুদেবের সর্বাপেক্ষা স্নেহভাজন। সেদিন একটি তত্ত্বের মীমাংসা নিয়ে বিগুদ্বানন্দেব সহিত স্বামী বিশ্বরূপের বিতর্ক উপস্থিত হয়। উভয়েই দক্ষতার সহিত শাস্ত্র প্রমাণ উপস্থাপিত করিতে থাকেন এবং অবশেষে বিগুদ্বানন্দই জয়ী হন। কিন্তু বিতর্কের কালে হঠাৎ এক সময়ে বিগুদ্বানন্দ শাস্ত্রভাব হারাইয়া ফেলেন, ত্রুষ্কণ্ঠে প্রধান গুরুভ্রাতাকে কিছু কড়া কথাও তাঁহাকে বলিতে শুনা যায়।

এভাবে বিগুদ্বানন্দ তাঁহার চিন্তের প্রশান্তি হারাইবেন, গুরু তাহা ভাবিতে পারেন নাই। তাই দুঃখিত অন্তরে তাঁহার দিকে একবার দৃষ্টিপাত করিয়াই তিনি তুষ্ণীভাব অবলম্বন করিলেন, দীর্ঘ সময় কাহারো সহিত কোনো বাক্যালাপ করিলেন না।

বিগুদ্বানন্দ বুঝিলেন, সাময়িক উত্তেজনা বশে গুরু-মহারাজের অন্তরে আজ তিনি আঘাত দিয়াছেন। তখন ছুটিয়া গিয়া আচার্য গোড়স্বামীর পদতলে পতিত হইলেন, ক্ষমা ভিক্ষা করিলেন অকুণ্ঠ চিত্তে। দৃঢ়স্বরে কহিলেন, “প্রভু, আপনি প্রসন্ন হোন। আপনাকে আমি কখনো দিচ্ছি, স্বামী বিশ্বরূপজীকে এখন থেকে আমি পরমগুণ্য জ্যেষ্ঠ ভ্রাতার মতোই দেখবো, আজীবন গুরুজ্ঞানে তাঁর সেবা ক’রে যাবো। এতে কোনোদিনই অন্তথা হবে না।”

এ অঙ্গীকার বিগুদ্বানন্দ কোনোদিন বিশ্বৃত হন নাই, উত্তরকালে অক্ষরে অক্ষরে ইহা পালন করিয়া গিয়াছেন।

১৮৫৯ খ্রীষ্টাব্দে আচার্য গোড়স্বামী ইহলোক ত্যাগ করিয়া যান। সন্ন্যাসী মণ্ডলীর সবাই সর্বসম্মতিক্রমে বিগুদ্বানন্দকে তাঁহার উত্তরাধিকারীরূপে বরণ করেন, কিন্তু আপত্তি উঠে বিগুদ্বানন্দজীর দিক হইতে। প্রবীণ গুরু-ভ্রাতা বিশ্বরূপজীর চরণে প্রণাম করিয়া তিনি বলেন, “মণ্ডলীর সবাকার স্নেহ ও সমর্থন আমার ওপর আছে জেনে আমি আনন্দিত, গৌরবান্বিত। কিন্তু আপনি বর্তমান থাকতে আমি এ পদাধিকার গ্রহণ করতে পারি নে। আপনি বয়োজ্যেষ্ঠ, আপনিই এ পদের উপযুক্ত। তা, ছাড়া, আপনি নিজেই অবগত

আছেন, আপনাকে গুরুজ্ঞানে এত বৎসর যাবৎ আমি সেবা ক'রে আসছি। আপনাকে মঠের মোহাস্ত গুরুরূপে রেখে সেই সেবাকর্মই অব্যাহত রাখতে চাই।”

বিশ্বরূপ স্বামী চমকিয়া উঠেন। বললেন, “এ তুমি কি অস্তুত প্রস্তাব করছো বিশ্বজ্ঞানন্দ। গুরু মহারাজ স্বয়ং তোমায় ঘোষণা ক'রে গেছেন তাঁর উত্তরাধিকারী বলে। আমরা সবাই সাগ্রহে আজ সে মনোনয়ন সমর্থনও করছি। আর তুমি বলতে চাচ্ছো—আমি বয়োবৃদ্ধ। তা হলে কি হয়, আমি তো জানি আমার চাইতে বয়সে ছোট হলেও তুমি—জ্ঞানবৃদ্ধ। তাছাড়া, গুরুজীর অবর্তমানে তুমি যদি আমাকেই গুরু বলে মানতে চাও, তবে তোমায় আমি আদেশ দিচ্ছি, অবিলম্বে তুমি মোহাস্তের গদিতে অধিষ্ঠিত হও, সবার অভিলাষ পূর্ণ করো।”

বিশ্বজ্ঞানন্দজী গুরু গোড়স্বামীর গদীতে আরোহণ করিলেন। কিন্তু যতকাল তিনি বাঁচিয়া ছিলেন, জ্যেষ্ঠ গুরুভ্রাতা ও গুরুপ্রতিম বিশ্বরূপ স্বামীর পরামর্শ না নিয়া কোনো কর্মে ব্রতী হন নাই, কোনো গুরুতর সিদ্ধান্তও গ্রহণ করেন নাই।

একাদিক্রমে দীর্ঘ ঊনচল্লিশ বৎসরকাল কাশীর অধ্যাত্ম-সমাজে ও সারস্বত-সমাজে বিশ্বজ্ঞানন্দ সরস্বতী একাধিপত্য করেন। প্রতিদিন গঙ্গান্নান ও ধ্যান-জপের পর ভস্ম-তিলকাস্থিত ললাটে এই সন্ন্যাসী-ভাস্কর শিষ্য ও ভক্ত দর্শনার্থীদের সম্মুখে পরমভক্তের উপদেশ দিতেন। তাঁহার শ্রীমুখ নিঃসৃত বেদান্তের অদ্বৈত বিচার ও রাজযোগের নিগূঢ় সাধন তত্ত্ব শুনিয়া শত শত শ্রোতা হইত কৃতকৃতার্ব।

সনাতন ধর্মের হ্রগশিখরের শীর্ষপতাকা ছিলেন, স্বামী বিশ্বজ্ঞানন্দ সরস্বতী। উত্তর ভারতের সন্ন্যাসী সম্প্রদায়ের তিনি ছিলেন অন্ততম অগ্রণী সাধক ও শক্তিদয় নেতা। ধর্ম ও সমাজের বহুতর সমস্যা, বহুতর বিচার বিতর্ক উপস্থাপিত করা হইত এই মহাপুরুষের সম্মুখে।



বেদোজ্জ্বলা বুদ্ধির সাহায্যে সব কিছু সমস্তা, সংশয় ও বিতর্কের সমাধান অনায়াসে তিনি করিয়া দিতেন।

শাস্ত্রার্থ বিচারসভায় অনুগামী সন্ন্যাসীদের নিয়া বিশুদ্ধানন্দ বিরাজিত থাকিতেন শাস্ত্রমূর্তিরূপে, ব্রহ্মসাধনার নিকল দীপশিখারূপে। সাধু সন্ন্যাসী, শাস্ত্রজ্ঞ ব্রাহ্মণ ও নিরঙ্কর জনগণ সকলেরই সহজ শ্রদ্ধা, প্রেম ও আনুগত্য কি করিয়া তিনি অনায়াসে লাভ করিতেন তাহা ছিল এক পরম বিস্ময়।

পুরীধামের সর্বজনশ্রদ্ধেয় আত্মজ্ঞানী সন্ন্যাসী নাক্সাবাবার সহিত বিশুদ্ধানন্দজী দীর্ঘদিনের সখ্যতামূত্রে আবদ্ধ ছিলেন। কাশীতে আসিলেই নাক্সাবাবা মহারাজ প্রায়শ তাঁহার মঠে আসিয়া দর্শন দিতেন। ছই ব্রহ্মবিদ মহাত্মার মিলনে আনন্দের তরঙ্গ উচ্ছলিত হইয়া উঠিত। অসিঘাটের হরিহরবাবা ও বনপুরোয়ার বীতরাগানন্দজী তখন নবীন সাধক। এ সময়ে প্রায়ই তাঁহারা বিশুদ্ধানন্দজীর চরণতলে গিয়া উপবেশন করিতেন, লাভ করিতেন শাস্ত্র ও সাধনার নিগূঢ় উপদেশ।<sup>১</sup> মণ্ডলী ও সম্প্রদায় নির্বিশেষে জিজ্ঞাসু ও মুমুকু সন্ন্যাসীরা বিশুদ্ধানন্দজীকে সর্বদা দর্শন করিতে আসিতেন, জানিয়া নিতেন পরম তত্ত্বের রহস্য।

সন্ন্যাসী শিরোমণি বিশুদ্ধানন্দজীর সারস্বত প্রতিভা দেশে-বিদেশে হইতে বহু বিত্তার্থীকে আকর্ষণ করিয়া আনিয়াছে। উত্তরকালে ইহাদের এক একজন চিহ্নিত হইয়াছেন দিকৃপাল পণ্ডিতরূপে।<sup>২</sup>

১ নাক্সাবাবা, হরিহরবাবা ও বীতরাগবাবার সহিত বিশুদ্ধানন্দজীর যোগাযোগের কাহিনী লেখক বীতরাগবাবার নিকট হইতে জানিয়াছেন। কাশী বিশ্ববিদ্যালয়ের দক্ষিণ-পশ্চিম অঞ্চলে বনপুরোয়ার এই ব্রহ্মজ্ঞ মহাত্মা বাস করিতেন। ১৯৬০ সালে দেড়শত বৎসর বয়সে তাঁহার দেহান্ত ঘটিয়াছে।

২ ইহাদের মধ্যে আছেন—বারভাকায় বাচ্চা বা, ভাটপাড়ার তারাচরণ ভট্টরায় (কাশীরাজের সভাপণ্ডিত) ও তাঁহার স্বনামধন্য পুত্র প্রমথনাথ ভট্টরায়, মহারাষ্ট্রের সখারাম ও কাকারাম ভট্ট, বোম্বাইয়ের নানুরাম, রাজস্থানের চেতরামজী, অধিকাগড় ব্যাসজী, লাহোরের গুরুপ্রসাদ, মীরাতের সেবকরাম, স্বামীরাম মিশ্র, সত্যচরণ প্রভৃতি। ঙ্গ: শিবম্, আশ্বিন ১৩৭২, বিশুদ্ধানন্দ (অধ্যাপক বট্টনাথ ভট্টাচার্য)

উত্তর ভারতের রাজরাজড়াদের মধ্যে স্বামীজীর প্রতিষ্ঠা ছিল অসামান্য। ইহাদের কেহ কেহ ছিলেন তাঁহার গুণমুগ্ধ, কেহ বা ভক্ত শিষ্য। কিস্করের মতো তাঁহার আদেশ পালনে ইহাদের অনেকে যত্ববান ছিলেন। স্বামীজীর আদেশে বহু সত্র, সন্ন্যাসী-মঠ ও আখড়ায় এই রাজারা অন্নবস্ত্রের যোগান দিতেন।

আর্থ সমাজের প্রবর্তক, সংস্কারপন্থী নেতা, দয়ানন্দ স্বামী তখন সনাতন ধর্মের উপর প্রবল আঘাত হানিতেছেন। উত্তর ভারতের সর্বত্র সফর করিয়া পণ্ডিত ও সাধু মণ্ডলীকে স্বমতে আনয়নের জন্ত তাঁহার প্রয়াসের অন্ত নাই। সেবার কাশীতে আসিয়াও তিনি বহু ভাষণ দিতে থাকেন। কাশীর মহারাজা ঈশ্বরীপ্রসাদ শাস্ত্রার্থ নির্ণয়ের জন্ত এক বিচারসভার অনুষ্ঠান করেন। এই সভায় দয়ানন্দের প্রতিপক্ষ রূপে উপস্থিত থাকেন স্বামী বিশুদ্ধানন্দ ও তাঁহার ছাত্র কাশীরাজের সভাপণ্ডিত তারাচরণ তর্করত্ন। বিচারে দয়ানন্দের পরাজয় ঘটে, এবং ইহার পর উত্তর-পূর্ব ভারতে তাঁহার নূতন মতবাদ আর বেশী বিস্তারিত হওয়ার সুযোগ পায় নাই।

১৮৯০ সালের কুম্ভমেলায় যোগদান স্বামীজীর জীবনের এক উল্লেখযোগ্য ঘটনা। ধর্মমেলায় যোগদান তো নয়, এ যেন এক বিজয় অভিযাত্রা। সন্ন্যাসী, ভক্ত ও শাস্ত্রবিদ পণ্ডিতদের এক বিরাট বাহিনী মন্থরগতিতে অগ্রসর হয় বিশুদ্ধানন্দজীর সঙ্গে। চলার পথে যেখানেই যান, কাশীধামের এই বহুলখ্যাত মহাআর শিবিরের চারি-পাশে দেখা যায় ভক্ত জনতার ভিড়। রাজরাজড়া ও শেঠের দল থাকেন স্বামীজী মহারাজের সেবায় সদা তৎপর।

মেলাক্ষেত্রে শাস্ত্রগূর্তি, ব্রহ্মবিদ এই মহাপুরুষ প্রতিভাত হন এক দর্শনীয় পুরুষ রূপে। সহস্র সহস্র মুমুকু নরনারী সদা তাঁহাকে বেঁটন করিয়া থাকে। আর্ত ভক্তেরা সমাগত হয় দলে দলে। স্বামীজীর রূপাপ্রসাদ লাভ করিয়া তাহারা আনন্দ সাগরে নিমজ্জিত হয়।

১ কাশ্মীর, সিদ্ধিয়া, জয়পুর, ইন্দোর, বৃন্দী, দ্বারাভাঙ্গা, শিশোড়ী প্রভৃতির রাজারা স্বামীজীর পরম অহুগত ছিলেন। জঃ শিবম্, আখির ১৩৭২

মেলা হইতে কিরিবার পথে কাশ্মীরের মহারাজা রণবীরসিংহীর অনুরোধে স্বামীজী ত্রীনগরে পদার্পণ করেন। এই কাশ্মীর বাজাকে উপলক্ষ করিয়া স্বামীজী সে-বার উত্তর-পশ্চিম ভারতের সহস্র সহস্র নরনারীকে দর্শন দেন, সর্বত্র সঞ্চারিত করেন নূতনতর আধ্যাত্মিক উদ্দীপনা।

অতঃপর আটবৎসর স্বামীজী মরদেহে অবস্থান করেন এবং এই সময়ে কাশীধাম ত্যাগ করিয়া আর কোথাও তিনি গমন করেন নাই। ভারতের শ্রেষ্ঠ অধ্যাত্মপীঠ ও বিদ্যাকেন্দ্রে সন্ন্যাসী সমাজের এই মহাপুরুষ বিরাজিত থাকেন এক অত্যাঞ্জল আলোক স্তম্বরূপে।

বিধি নির্দিষ্ট কর্ম প্রায় উদ্ঘাপিত হইয়াছে। এখন শেষ লগ্নটির জন্ম স্বামীজী প্রতীক্ষমাণ। শরীর প্রাচীন হইয়া পড়িয়াছে, আজকাল মঠের বাহিরে কোথাও তাঁহার যাওয়া হয় না, চিন্তবৃত্তি সদাই থাকে ব্রহ্মধ্যানে নিমগ্ন। মাঝে মাঝে স্বেচ্ছামতো সন্ন্যাসী শিষ্যদের স্বাধ্যায়ে তিনি সহায়তা করেন।

গঙ্গাতীরে অহল্যাবাসী ঘাটের উপরেই স্বামীজীর মঠ। মঠের দ্বিতলকক্ষে বসিয়া উদাস নেত্রে সেদিন গঙ্গার স্রোতধারায় দিকে তাকাইয়া আছেন। এক নবীন সন্ন্যাসী শিষ্য একথণ্ড কঠোপনিবৎ নিয়া চরণতলে উপবেশন করেন। প্রসন্ন মধুর হাস্তে গ্রন্থটি হাতে তুলিয়া নিয়া স্বামীজী ধীরে ধীরে শুরু করেন তাঁহার পাঠ ও ব্যাখ্যান। ক্রমে আসিয়া পড়ে সেই প্রসিদ্ধ কান্নিকাটি যাহাতে বলা আছে—সুঘুনা নাড়ীর কথা। দেহের শত শত নাড়ীর মধ্যে এই নাড়ীটি মূর্ধস্থলে গিয়া সংলগ্ন হয় এবং এই পথেই আগুকাশি বোগীর প্রাণ উৎক্রমণ করে।

কান্নিকাটি ব্যাখ্যা করার সময় নবীন সন্ন্যাসী ছাত্রটি হঠাৎ একটু উনমনস্ক হইয়া পড়ে। বড় বিরক্তি বোধ করেন স্বামীজী মহারাজ। দৃঢ়স্বরে বলিয়া উঠেন, “এখন তো এ নাড়ীর কথায় কান দিচ্ছে না, দেখো অতি শীঘ্রই এই নাড়ী-পথে হবে আমার দেহান্ত।

তারপর এই নাড়ীর কথা আর হয়তো তোমার স্মৃতি থেকে মুছে যাবে না ।”

নবীন সন্ন্যাসী বড় লজ্জিত হন, বার বার করজোড়ে গুরু মহারাজের ক্ষমা ভিক্ষা করিতে থাকেন ।

কয়েকদিন পরেই বিশ্বকানন্দ মহারাজের প্রতীক্ষিত শেষ লগ্নিটি আসিয়া পড়ে ।

১৮৯৮ খ্রীষ্টাব্দের চন্দন একাদশীর পূণ্যাতিথি । সময় আসন্ন জানিয়া স্বামীজী শিষ্যদের আদেশ দেন, “আর কালবিলম্ব না ক’রে আমার দেহটি স্থাপন করো গঙ্গা বিধৌত ঐ বুরুজের ওপর । তোমরা সবাই তাড়াতাড়ি তৈরি হয়ে নাও ।”

শিষ্যেরা শোকবিহ্বল হইয়া পড়েন । মুহূর্ত্তে স্বামীজী তাঁদের আশ্বাস দেন, “শোক কেন বলতো ? আত্মজ্ঞানীর জন্মই বা কই, মৃত্যুই বা কই ? তোমরা চিন্তের স্বেদ অটুট রাখো ।”

বুরুজের উপর নিয়া যাওয়া হইলে জরাজীর্ণ দেহটি নিয়া স্বামীজী হু হইয়া উপবেশন করেন । তারপর সজ্জানে প্রাণবায়ুকে চালিত করেন সুষুম্নার মধ্য দিয়া ব্রহ্মরন্ধ্রের পথে ।

তৎক্ষণাৎ চারিদিকে এ সংবাদ রটিয়া যায় । দশাশ্বমেধ ঘাটে সমবেত হয় সহস্র সহস্র ভক্ত ও দর্শনার্থী নরনারী । ব্রহ্মলীন মহাত্মার মরদেহটি পুষ্পচন্দনে সুসজ্জিত করিয়া বিসর্জন দেওয়া হয় পুতসলিলা ভাগীরথীর গর্ভে ।

# স্বামী বিবেকানন্দ

ভাগীরথীর ছই তীরে নামিয়া আসিয়াছে সন্ধ্যার অন্ধকার ।  
আকাশের বৃকে ছই চারটি তারা মিটমিট করিয়া জ্বলিতেছে । নদীবক্ষ  
স্তম্ভ, নিস্তরঙ্গ, নোঙর-করা বজরাখানিতেও তেমনই অথগু নীরবতা ।  
একটি সুদর্শন যুবক ত্রস্তপদে সিঁড়ি বাহিয়া উপরে উঠিয়া আসেন,  
নিভৃত কক্ষের দ্বারে বার বার করেন করাঘাত ।

সোম্য, প্রশান্ত মূর্তি এক বৃদ্ধ ধ্যান-কক্ষ হইতে বাহির হইয়া  
আসেন । স্নেহপূর্ণ স্বরে প্রশ্ন করেন, “কি বাবা, কি চাই তোমার ?”

যুবকের চোখে-মুখে উত্তেজনার ছাপ । ব্যাকুল কণ্ঠে বলিয়া  
উঠেন, “মশাই, আপনি কি ঈশ্বর দর্শন করেছেন ? আমারও কি  
দর্শন করাতে পারেন ?”

ধ্যানোখিত বৃদ্ধ তাপস সর্বজনশ্রদ্ধেয় ব্রাহ্ম নেতা—দেবেন্দ্রনাথ  
ঠাকুর । গঙ্গার উপরে এই হাউস বোটে নিভৃত তপস্থায় কিছুদিন  
স্বাবৎ দিন কাটাইতেছেন । তাঁহার সম্মুখে দণ্ডায়মান মুমুকু তরুণ—  
নরেন্দ্রনাথ দত্ত ।

যুবকের হৃদয়োচ্ছ্বাস ও ব্যাকুলতার মর্ম বৃক্ষিতে দেবেন্দ্রনাথের  
বিলম্ব হইল না । স্নেহে নিকটে বসাইয়া তাহাকে শাস্ত করিলেন,  
দিলেন নানা আশ্বাস ও উপদেশ । তারপর নিষ্পলক নেত্রে কিছুক্ষণ  
চাহিয়া থাকিয়া বলিলেন, “বাবা, তোমার চোখ ছুটি ঠিক যোগীদের  
মতো । একনিষ্ঠ হয়ে সাধন করো । তুমি সকলকাম হবে ।”

নরেন্দ্রনাথ বজরা হইতে নিজ্জাস্ত হইলেন । দেবেন্দ্রনাথের  
ব্যক্তিগত ও প্রবোধবাক্য তাঁহার উত্তেজনা হ্রাস করিয়াছে সত্য, কিন্তু  
প্রাণের অদম্য পিপাসা মিটিল কই ? মূল প্রশ্নের উত্তর তো তিনি  
সাধক দেবেন্দ্রনাথের কাছে পাইলেন না ।

নরেন্দ্রনাথের জীবন-জিজ্ঞাসার আর এক চিত্র । দক্ষিণেশ্বরের  
পদ্মা তীরে দেবী শবতারিণীর মন্দিরে সন্ধ্যারতির কঁাসর-ঘণ্টা বাজিয়া

সবেমাত্র শেষ হইয়াছে। ঠাকুর শ্রীরামকৃষ্ণ ভক্ত পরিবৃত্ত হইয়া বসিয়া আছেন। নরেন্দ্রনাথ ধীরে ধীরে সম্মুখে আসিয়া দাঁড়ান। ঝড়ের আলোড়ন তাঁহার অন্তরে। ব্যাকুল কণ্ঠে প্রশ্ন করেন, “মশাই আপনায় কি ঈশ্বর সাক্ষাৎকার হয়েছে?”

বহু সাধু-পুরুষকে একথা বার বার তিনি জিজ্ঞাসা করিয়াছেন। কেহই তো এ পর্যন্ত ‘হাঁ’ বলেন নাই। ইনিও যদি আজ তাঁহাকে নিরাশ করেন?

সহজ কণ্ঠে, প্রত্যয়ের সুরে, অবিলম্বে রামকৃষ্ণ উত্তর দিলেন, “সে কি গো! দেখেছি বই কি? এই যেমন তোমাদের দেখছি—এমনি ক’রেই তো রোজ দেখছি। শুধু তাই নয়, তোমাকেও দেখাতে পারি। কিন্তু আমার কথামতো চলতে হবে।” সঙ্গে সঙ্গে স্মিতহাস্তে বটুয়া হইতে কিছুটা সুপারী তুলিয়া লইয়া ঠাকুর চিবাইতেছেন। নরেন্দ্রনাথ অপার বিস্ময়ে এই দেব-মানবের দিকে নিনিমেষে তাকাইয়া আছেন। বাক্য মনের অতীত ঈশ্বরকে এমন করিয়া পাওয়া যায়, এই ছঃসাহসের কথা এমন সহজ প্রত্যয়ভরা কণ্ঠে কেহ তো আজ অবধি বলে নাই।

যে প্রশ্ন তিনি আজ দক্ষিণেশ্বরের পূজারী ব্রাহ্মণের পদতলে বসিয়া করিলেন, তাহা শুধু তাঁহার নিজ জীবনেরই প্রশ্ন নয়, তাহা যে ঊনবিংশ শতাব্দীর সকল বুদ্ধিজীবীদেরই সংশয়-পীড়িত প্রশ্ন! যুক্তি, বিজ্ঞান ও অধিবিজ্ঞান জটিল গ্রন্থি ভেদ করিয়া প্রত্যক্ষ অনুভূতি ও দর্শনের কামনা ইহাতে নিহিত।

দীর্ঘদিনের সেই প্রশ্নের উত্তর আজ মিলিয়াছে। সে উত্তর বাস্তব অনুভূতিতে প্রোজ্জ্বল, সহজ প্রত্যয়ে পূর্ণ। ঠাকুর অকুণ্ঠ কণ্ঠে দাবি করিতেছেন, তিনি তাঁহাকে ভগবৎ দর্শন করাইয়া দিবেন, যেমনটি নিজে দর্শন করিয়াছেন তেমন করিয়াই দিবেন।

এবার বলিবার পালা নরেনের। আত্মসমর্পণের প্রয়োজন সর্বাধিক, সে প্রস্তুতি আজ তাঁহার কোথায়? রামকৃষ্ণের তত্ত্ব তাঁহার হৃদয়ে ফুটিয়া উঠিতে পারিতেছে কই? এই অর্ধোন্মাদ অর্ধশিক্ষিত

সাধকের পদে তাঁহার সমস্ত কিছু ব্যক্তিত্ব, শিক্ষা-দীক্ষা উৎসর্গ করিতে পারিতেছেন কই ?

কিন্তু নরেনকে পারিতে হইয়াছিল। দীর্ঘ পাঁচ বৎসরের পদীক্ষা-নিরীক্ষার কলে এই আত্মসমর্পণকে আমরা সম্ভব হইতে দেখি। এই পাঁচ বৎসরের ইতিহাস ঠাকুরেরই করুণালীলার এক নিরবচ্ছিন্ন ইতিহাস। দিনে দিনে পলে পলে সহজ স্বচ্ছন্দ ভালবাসার মধ্য দিয়া রামকৃষ্ণ তাঁহার স্বরূপটিকে, তাঁহার পরমতত্ত্বকে নরেন্দ্রনাথের জীবনে প্রতিকলিত করিয়া তুলিয়াছেন। ঠাকুরের এই আত্মসাৎ-ক্রিয়াই নরেনের আত্মসমর্পণকে সহজতর করিয়া তোলে, অধ্যাত্মশিল্পী রামকৃষ্ণের মহান্ সৃষ্টি তাঁহারই মধ্যে ধীরে ধীরে রূপায়িত হইয়া উঠে। আচার্য বিবেকানন্দের ঘটে চমকপ্রদ অভ্যুদয়। ভারতবর্ষের অধ্যাত্ম-জীবনে এ অভ্যুদয় ঘটায় কল্যাণকর উজ্জীবন, স্বরাস্বিত করে প্রাচ্য ও পাশ্চাত্যের আত্মিক সেতুবন্ধন।

এক ছুজ্জের ঐশশক্তির আকর্ষণে যুবক নরেন্দ্রনাথ দক্ষিণেশ্বরে ঠাকুরের পদপ্রান্তে উপনীত হইয়াছিলেন। এই একই ঐশশক্তির লীলা তাঁহার বাল্য ও কৈশোর জীবনকে নিয়ন্ত্রিত করিয়াছে, শ্রোত-ধারার গতিপথের মোড় ঘুরাইয়াছে বার বার—উত্তরণ ঘটাইয়াছে মুক্তির মহাসাগরে।

শিমুলিয়ার অভিজাত দত্ত-পরিবারে নরেন্দ্রনাথ জন্মগ্রহণ করেন। এই বংশের রামমোহন দত্ত ছিলেন স্মৃশ্রীম কোর্টের প্রতিষ্ঠাবান্ উকিল। বিপুল বিস্তারিত তিনি রাখিয়া যান, কিন্তু পুত্র দুর্গাচরণ ইহাতে আকৃষ্ট হন নাই, পঁচিশ বৎসর বয়সে পত্নী ও একমাত্র শিশু-পুত্র বিধ্বনাথের মায়া কাটাইয়া তিনি সন্ন্যাস গ্রহণ করেন। এই বিধ্বনাথ দত্তই স্বামী বিবেকানন্দের জনক।

বিধ্বনাথ কলিকাতার প্রসিদ্ধ এটর্নী রূপে পরিচিত হইয়া উঠেন। ধনজনপূর্ণ বিশাল ভবনে রাজসিকতার সহিত বাস করিতে তিনি অভ্যস্ত হন। উদার ও আশ্রিত জনের পালক বলিয়া তাঁহার খ্যাতি ছিল। আর পত্নী ভুবনেশ্বরী ছিলেন এক ধর্মপ্রাণা প্রাচীনপন্থী

মহিলা। প্রতিদিন স্বহস্তে শিবপূজা না করিয়া তিনি জল গ্রহণ করিতেন না। ইষ্টনিষ্ঠা, তেজস্বিতা ও কর্মকুশলতায় তিনি ছিলেন অনন্ত-সাধারণ।

একদিন ভুবনেশ্বরী শিবার্চনায় বসিয়াছেন। সেদিন কি জানি কেন এক গভীর ধ্যানতন্ময়তা তাঁহাকে পাইয়া বসে। প্রায় সমস্ত দিনই ধ্যানাবেশে কাটিয়া যায়, তারপর রাত্রিতে ক্লান্ত দেহে পূজা-কক্ষেই নিজায় অভিভূত হইয়া পড়েন।

এই সময়ে তিনি এক বিচিত্র স্বপ্ন দেখেন। অটাজুটমণ্ডিত রজতগিরিসন্নিভ মহেশ্বর তাঁহার সম্মুখে আবির্ভূত হইয়া সন্তানরূপে ক্রোড়ে আসিতে চাহিতেছেন। ‘শিব—শিব’ উচ্চারণ করিতে করিতে ভুবনেশ্বরী নিজা হইতে উথিত হইলেন।

ইহার পরের বৎসর, ১৮৬৩ সালের ১২ই জানুয়ারী ভুবনেশ্বরী দেবীর অঙ্ক আলো করিয়া আসে এক সুদর্শন শিশু। সেদিন ছিল পৌষ-সংক্রান্তি মকর-বাহিনী পূজার দিন। এই নবাগত শিশুপুত্রই নরেন্দ্রনাথ, উত্তরকালের শক্তিধর সন্ন্যাসী,—স্বামী বিবেকানন্দ।

বাল্যকাল হইতেই নরেন্দ্র ছরস্তু, প্রাণচঞ্চল। কি যেন এক অব্যক্ত অধীরতা নিয়া সে ছুটাছুটি করিয়া বেড়ায়। আবার এই অশান্ত বালকের আধারে কখনো কখনো এক ছত্তের্গ ধ্যানের ধারা নামিয়া আসে, অকস্মাৎ কি করিয়া সে রূপান্তরিত হইয়া যায়।

বালক তাহার সাধীদেয় সহিত একদিন পূজা-অর্চনার খেলায় রত। চক্ষু মুদিয়া ধ্যানজপের অভিনয়ও বেশ শুরু হইয়াছে। হঠাৎ কোথা হইতে এক গোথরা সাপ কণা নাচাইয়া আসিয়া উপস্থিত। খেলার সঙ্গীরা তো ভীত ত্রস্ত হইয়া সেখান হইতে ছুটিয়া পলাইল। নরেন্দ্রের কিন্তু কোনোই হুঁশ নাই। হুই চক্ষু মুদিয়া অচঞ্চলভাবে উপবিষ্ট, সম্মুখে সাপটিও কণা মেলিয়া স্থির হইয়া আছে। বালকের খেলার অভিনয় কোন্ অজানা মুহূর্তে ধ্যানের গভীরে ডলাইয়া গিয়াছে কে জানে? বাড়ির লোকে মহা স্তম্ভত, পাছে বালকের অনিষ্ট হয় এই ভয়ে সবাই চুপ করিয়া আছে। কিছুকাল পরে



সাপটি ধীরে ধীরে সেখান হইতে চলিয়া গেল, আর আত্মীয়-স্বজনেরা স্বস্তির নিঃশ্বাস ফেলিয়া বাঁচিলেন।

নরেন পরে বলিয়াছেন, “বালক বয়সে একদিন ধ্যান করিতে ছিলাম। ধ্যান শেষে চুপ করিয়া বসিয়া কাছি, হঠাৎ দেখিলাম—ঘরের দক্ষিণ দেয়াল ভেদ করিয়া এক জ্যোতির্ময় দিব্য মূর্তি সম্মুখে দণ্ডায়মান। মূণ্ডিত মস্তক, হাতে দণ্ড ও কমণ্ডলু, নয়নে অপরূপ স্নিগ্ধতা। জ্যোতির্ময় পুরুষ কি যেন বলিতে বাইতেছিলেন। অবাক্ হইয়া তাঁহার দিকে এতক্ষণ চাহিয়াছিলাম। হঠাৎ যেন ভয় হইল—দরজা খুলিয়া বাহিরে আসিয়া পড়িলাম।” কোন্ এক দিব্য পুরুষ যেন তাঁহার উপর লক্ষ্য রাখিতেছেন।

বালক নরেনের নিজার ভক্তিও বড় অদ্ভুত। উপুড় হইয়া তাঁহার শয়নের অভ্যাস। নিজা আকর্ষণের সময়ে, বহির্জগতের চেতনা ধীরে ধীরে কমিয়া আসে, আর সঙ্গে সঙ্গে দেখা দেয় এক অলৌকিক অমুভূতি। দেখেন, আলোকোজ্জ্বল পথ বাহিয়া একটি দিব্য বালক একটি গোলাকার জ্যোতির্ময় পিণ্ড তৈলিয়া নিয়া তাঁহার দিকে অগ্রসর হইতেছে। এই জ্যোতি-গোলক ক্রমে তাঁহার ভ্রমধ্যে আসিয়া স্থির হয়, তারপর জ্যোতির রাশি অজস্র ধারায় উহা হইতে ঝরিয়া ঝরিয়া পড়ে। এই দিব্য আলোক ধারায় তলাইয়া গিয়া অন্তঃপর ধীরে ধীরে সে নিজায় অভিভূত হয়।

নরেনের নিজের কিন্তু ইহা বিস্ময়কর মনে হইত না। ভাবিতেন, এ তো সকলেরই নিজার অভিজ্ঞতা। শ্রীরামকৃষ্ণ উত্তরকালে এই অমুভূতির কথা শুনিয়া বলিয়াছিলেন, “এটা যে ধ্যান-সিদ্ধের লক্ষণ গো!”<sup>১</sup>

নরেনের তখন চৌদ্দ বৎসর বয়স, রায়পুরে পিতার সঙ্গে বায়ু পরিবর্তনে আসিয়াছেন। একদিন একাকী গো-শকটে বিছা পাহাড়

দিয়া যাইতেছেন। এখানে হঠাৎ তাঁহার এক অলৌকিক অভিজ্ঞতা হয়। পাহাড়ের গায়ে তৈরি হইয়াছে একটি মৌমাছির চাক। সে দিকে হঠাৎ দৃষ্টি পড়িতেই অন্তরে জাগিয়া উঠে এক অভূতপূর্ব আনন্দের শিহরণ। উত্তরকালে তিনি নিজের এ সম্বন্ধে বলিয়াছেন, “বিশ্বয়ে মগ্ন হইয়া সেই মক্ষিকা রাজ্যের আদি অন্তের কথা ভাবিতে ভাবিতে মন জগৎ-নিয়ন্তা ঈশ্বরের অনন্ত উপলব্ধিতে এমনভাবে তলাইয়া গেল যে, কিছুকালের জগৎ বাহ্য-সংজ্ঞার লোপ হইল। কতক্ষণ যে ঐভাবে গো-যানে পড়িয়াছিলাম, স্মরণ হয় না। যখন পুনরায় চেতনা হইল তখন দেখিলাম উক্ত স্থান অতিক্রম করিয়া অনেক দূরে আসিয়া পৌঁছিয়াছি।” প্রথম জীবনে নরেনের ধ্যানাবেশের ইহা এক অপূর্ব নিদর্শন।

১৮৭৯ সালে নরেন্দ্রনাথ এনট্রাল পাস করিয়া কলেজে ঢুকিলেন। ব্যক্তিত্ব, মেধা ও প্রাণশক্তি তাঁহার প্রচুর, তাই ক্লাসের ছেলেদের নেতা হইয়া উঠিতে দেরি হইল না। অধ্যাপকেরাও তাঁহাকে চিনিয়া নিলেন এক অসাধারণ ছাত্র রূপে। জেনারেল এসেম্বলীতে তখন প্রতিভাবান ছাত্রের অভাব ছিল না। ব্রজেন্দ্রনাথ শীলও তখন এখানেই পড়িতেন, নরেন্দ্রনাথের এক ক্লাস উপরে। একবার এক বিতর্কসভায় নরেনের উপর খুশী হইয়া দর্শনবেত্তা অধ্যক্ষ হেষ্টি সাহেব বলেন, “এই তরুণ দর্শনশাস্ত্রের এক প্রতিভাধর ছাত্র। আমার মনে হয়, জার্মানী ও ইংলণ্ডের বিশ্ববিদ্যালয়েও এর মতো একটি ছাত্র খুঁজে পাওয়া যাবে না।”

নরেন তখনও এক-এ পরীক্ষা দেন নাই। কিন্তু ডেকার্ট, হিউম ও বেন-এর সূক্ষ্ম দার্শনিক তত্ত্ব তিনি পড়িয়া কেলিয়াছেন। ডারুইন ও স্পেন্সারের চিন্তাধারার সহিতও তাঁহার পরিচয় নিবিড়। পাশ্চাত্য দার্শনিকদের যুক্তিবাদ ও বিচার বিতর্কের মধ্যে সত্যের প্রকৃত পথটি তিনি খুঁজিয়া পাইতেছেন না। দিক্‌ভ্রান্ত পথিকের মতো অবস্থা তাঁহার।

বাংলায় সংস্কার আন্দোলন চলিতেছে প্রায় সাত বৎসর যাবৎ।

রামমোহনের ধর্ম দেবেন্দ্রনাথ ও কেশবের দ্বারা কিছুটা রূপান্তরিত। নৈতিক জীবনের দৃঢ় আদর্শও সমাজজীবনে আত্মপ্রকাশ করিতেছে। কিন্তু তাহাতে নরেনের প্রাণের পিপাসা মিটিতেছে কই? অধ্যাত্ম-সাধনার রসে জীবনের শুষ্ক তরু মুঞ্জরিত হইয়া উঠে, প্রত্যক্ষ অনুভূতির মধ্য দিয়া সাধকের প্রাণে আসে পরম শান্তি। কই সে শান্তি তো পাওয়া যাইতেছে না?

পাশ্চাত্য দর্শনের বিচার-বিশ্লেষণে নব্য শিক্ষিত নরেন দিশেহারা। ব্রাহ্মসমাজের ছায়াতলে আসিয়া দাঁড়াইলেন, ভাবিলেন, শাখত সত্যের সন্ধান এবার হয়তো মিলিবে, কিন্তু কোথায় তাহা? সংশয় জাগে মনে, ঈশ্বর কি সত্যই আছেন? জীবন পথের শেষে অমৃত কুন্তলি হাতে নিয়া যে জীবনপ্রভু প্রসন্ন মধুর হাসি হাসেন, তিনি কি শুধু কবির কল্পনা?

সন্দেহ সংশয় বাহা কিছু আত্মক না কেন নরেন্দ্র কিন্তু ব্যবহারিক জীবনের পবিত্রতা, বিশুদ্ধতা একই ভাবে রক্ষা করিয়া যাইতেছেন। শুভ সংস্কার নিয়া তিনি জন্মিয়াছেন। বড় হইয়াও উচ্চতর প্রেরণায় তিনি উদ্ভূক্ত—ত্যাগী সাধকের জীবনই যাপন করিতেছেন।

সংশয় ও বিচার বৃদ্ধির গহন অরণ্যে কিন্তু একটা দিব্য অনুভূতি মাঝে মাঝে স্মুরিত হইয়া উঠে। ধ্যান করিতে যখন বসেন, তখন তো কোনো অবিশ্বাস অসন্তোষের ছায়াপাত অন্তরে হয় না? স্বচ্ছন্দ ধ্যানাবেশে তিনি অন্তর্লীন হইয়া যান।

প্রায়ই একটা জ্যোতিঃপুঞ্জ আবির্ভূত হয়, আর তাঁহার নয়ন সমক্ষে এক ত্রিভুজ যন্ত্রের অপরূপ ছবি রচনা করে। অজানা আনন্দে নরেন্দ্রনাথের হৃদয় রসায়িত হইয়া উঠে। ভাবেন, এ কোথাকার ইঙ্গিত? অতীন্দ্রিয়লোকের অন্তরালে তবে তো তাঁহার জীবনপ্রভু বিরাজ করিতেছেন। কিন্তু কে তাঁহাকে এই পরমধন মিলাইয়া দিবে? অন্তর মথিত করিয়া প্রশ্ন উঠিতে থাকে, কোথায় সেই সত্যজ্ঞেয় মহাপুরুষ যিনি ভগবৎ সাক্ষাৎকার করিয়াছেন, এবং অতীন্দ্রিয় পথে তাঁহাকে যিনি চালনা করিবেন?

১৮৮০ খ্রীষ্টাব্দের নবেম্বর মাস। শিমুলিয়া পল্লীতে একটি ক্ষুদ্র আনন্দোৎসবের ব্যবস্থা হইয়াছে। নরেনের প্রতিবেশী সুরেন্দ্রনাথ মিত্র পরম ভক্তিভরে দক্ষিণেশ্বরের শ্রীরামকৃষ্ণকে নিয়া আসিয়াছেন। ভক্তি সংগীত গাওয়া হইবে, তাই নরেনের ডাক পড়িল। নরেন যেমন নানা বৈঠকে ঘুরিয়া বেড়ান—তেমনই আসিয়া উপস্থিত। তাঁহার কণ্ঠে গান শুনিয়া পরমহংসদেবের আনন্দের অবধি নাই। সন্মুখে নিকটে ডাকিয়া এই প্রিয়দর্শন যুবকের দেহলক্ষণ মিলাইয়া দেখেন। পরিচয় গ্রহণের পর আমন্ত্রণ জানান, “দক্ষিণেশ্বরে একবার যো, কেমন?”

এক, এ পরীক্ষার ব্যস্ততায় কয়েক মাস নরেন দক্ষিণেশ্বরের কথা ভুলিয়াই ছিলেন। আত্মীয় রাম দত্ত ও প্রতিবেশী সুরেন্দ্রনাথ ঠাকুরের ভক্ত। তাঁহাদের কথায় সেদিন ঠাকুরের কথা মনে পড়িল, কয়েকজন বন্ধুসহ দক্ষিণেশ্বরে উপস্থিত হইলেন।

উত্তরকালে রামকৃষ্ণ এই ঐতিহাসিক সাক্ষাতের বিবরণ দিয়াছেন—“দেখলাম, নরেনের নিজের দেহের দিকে কোনোই লক্ষ্য নেই। মাথার চুল ও বেশভূষার বাহার নেই। বাইরের কোনো জিনিসেই ইতর সাধারণের মতো আঁট নেই। সবই যেন আলগা। চোখ ছটো দেখে মনে হয়, ওর মনের অনেকটা কে যেন ভেতর থেকে টেনে রেখেছে। মনে হল, বিষয়ী লোকের জায়গা কলকাতায় এতবড় সঙ্গুণী আধার থাকাও সম্ভব।”

ঠাকুর রামকৃষ্ণের সম্মুখে নরেন উদাস সুরে গান ধরিলেন—

মন চল নিজ নিকেতনে,  
সংসার বিদেশে বিদেশীর বেশে  
ভ্রম কেন অকারণে ?  
বিষয় পঞ্চক আর ভূতগণ  
সব তোম পর কেহ নয় আপন,  
পর প্রেমে কেন হয়ে অচেতন  
ভুলেছ আপন জনে ?

নিজের অজ্ঞাতসারে এ কি গান নরেন গাহিলেন? যাহার কাছ হইতে আসিয়াছেন, যাহার কাছেই আবার ফিরিতে হইবে, এ যে সেই পরমাত্মীয় পরমাত্মার কথা।

সেই পরমাত্মারই আনন্দধন ঠাকুর শ্রীরামকৃষ্ণ এখানে বসিয়া আছেন। ঠাকুরকে নরেন চিনেন নাই, কিন্তু ঠাকুর নরেনকে তখন চিনিয়াছেন। মন প্রাণ চালিয়া নরেন গাহিলেন—আর ঠাকুর ততক্ষণে হইয়াছেন ভাবাবিষ্ট। ক্রমে বাহ্যজ্ঞান তাঁহার তিরোহিত হইল।

নবপরিচিত রামকৃষ্ণ সেদিন ‘আপনজনের’ মতোই তাঁহার সহিত ব্যবহার করিলেন। লৌকিক জীবনের চেনা-পরিচয়ের উদ্দেশ্যে, জন্ম-জন্মান্তরের যোগসূত্রে গাঁথা রহিয়াছে এই আত্মীয়তার বোধ।

নরেনকে হাতছানি দিয়া ঠাকুর উত্তরের বারান্দায় নিভৃত স্থানে নিয়া যান। ছুই নয়নে তাঁহার দরবিগলিত প্রেমাত্মক ধারা। ঘনিষ্ঠ মুহূর্ত্তের মতো বলিতে থাকেন “এত দিন পরে আসতে হয়? আমি যে এতকাল অপেক্ষা ক’রে আছি তা ভাবতে নেই? বিষয়ী লোকের বাজে কথা শুনে শুনে আমার কান ঝলসে যাচ্ছে। প্রাণের কথা বলতে না পেরে পেট ফুলে গেল।”

তারপর ঠাকুরের অবিশ্রান্ত কামা। নরেন তো বিশ্বাসে হতবাক। আবার এই উদ্গাদ ব্রাহ্মণ হাত জোড় করিয়া তাঁহাকে, সাক্ষাৎ নরেন বলিতেছেন, “জানি, জানি প্রভু, তুমি সেই ঋষি, জীবের দুর্গতি দূর করতে তুমি এসেছ।”

বিশ্বনাথ দত্তের পুত্র, ব্রাহ্মসমাজের সভ্য, আধুনিক শিক্ষা-দীক্ষায় উদ্বুদ্ধ তরুণকে এই ব্রাহ্মণ কি বলিতে চাহিতেছেন? যেন কোন্ এক প্রচ্ছন্ন দেবতার উদ্বোধনের জন্ত তাঁহার এই আকৃতি। অথবা এটা কল্পনাবিলাস? নরেনের চিন্তাধারা বিপর্যস্ত হইয়া যায়।

ঠাকুর ক্ষণকাল পরেই নিজের ঘরে ছুটিয়া যান। কিছু মাখন মিছরি ও সন্দেশ আনিয়া নরেনকে স্বহস্তে খাওয়াইয়া দিতে থাকেন। নরেন তাঁহার সঙ্গীদের সহিত এসব ভাগ করিয়া খাইতে উৎসুক—কিন্তু তাহা শুনে কে?

রামকৃষ্ণ স্নেহমাখা স্বরে বলেন, “ওরা খাবে এখন। তুমি আগে খেয়ে নাও।”

সবটা ভোজন করাইয়া ঠাকুর হাত ধরিয়া অমুনয় করিতে থাকেন, “বল শিগ্গীর আর একদিন এখানে আসবে, একলাটি আমার কাছে আসবে।” নরেনকে কথা দিতেই হয়। তারপর সঙ্গীদের কাছে ফিরিয়া গিয়া তিনি হাঁক ছাড়েন।

নরেনের অন্তরে তখন চিন্তার ঝড় বহিতেছে। এই ব্রাহ্মণ কি উন্মাদ? আর তাই বা কি করিয়া হয়? ঈশ্বরের জ্ঞানই তো সর্বস্ব ছাড়িয়াছেন। উত্তরকালে তিনি বলিয়াছেন, “নির্বাক হইয়া ভাবিতে লাগিলাম, উন্মাদ হইলেও ঈশ্বরের জ্ঞান ঐরূপ ত্যাগ জগতে খুব কম লোকই করিতে সক্ষম। উন্মাদ হইলেও এ ব্যক্তি মহাপবিত্র, মহাত্যাগী এবং ঐজ্ঞান মানব হৃদয়ের শ্রদ্ধা, পূজা ও সম্মান পাইবার স্বার্থ অধিকারী। ঐরূপ ভাবিতে ভাবিতে সেদিন তাঁহার চরণ বন্দনার পর তাঁহার নিকটে বিদায় গ্রহণপূর্বক কলিকাতায় ফিরিয়া আসিলাম।”

নরেন চলিয়া গেলে ঠাকুরের কি অবস্থা? তাঁহার নিজের বর্ণনায় : “নরেন চলে গেলে, তাকে দেখবার জন্তে প্রাণের ভেতরটা চব্বিশ ঘণ্টা এমন ব্যাকুল হয়ে রইল যে বলবার নয়। সময় সময় এমন যন্ত্রণা হত যে মনে হত বুকের ভেতরটা যেন কে গামছা নিংড়ানোর মতো জোর ক’রে নিংড়াচ্ছে। নিজেকে তখন সামলাতে পারতুম না। ঝাউতলায় নির্জনে গিয়ে ডাক ছেড়ে কাঁদতুম,—ওরে তুই আয়রে, তোকে না দেখে আর থাকতে পারছি না।”

এ আহ্বান আত্মার আত্মীয়ের। এ আহ্বান ঈশ্বরীয় কর্মক্ষেত্র। এ অমোঘ আহ্বান নরেনকে চুপকের মতো ঠাকুরের কাছে আকর্ষণ করিয়া নিয়াছিল।

মাসখানেক পর নরেন আবার দক্ষিণেশ্বরে আসিলেন। রামকৃষ্ণ একাকী তক্তপোশের উপর বসিয়া আছেন। নরেনকে দেখামাত্র তিনি আনন্দে অধীর। পরম স্নেহে শব্দ্যার এক পাশে তাঁহাকে

বসাইলেন। ইহার পরই একেবারে ভাবাবিষ্ট। কিছুক্ষণ অশ্রুটপ্তরে কি বলিতে বলিতে নরেনের কাছে আসিয়া দক্ষিণ পদ দিয়া তাঁহাকে স্পর্শ করিলেন। সঙ্গে সঙ্গে ঘটিল নরেনের দিব্য ভাবান্তর।

তিনি নিজেই ইহা বিবৃত করিয়াছেন, “আমার এক অপূর্ব উপলব্ধি উপস্থিত হইল। চাহিয়া দেখিতে লাগিলাম, দেয়ালগুলির সহিত গৃহের সমস্ত বস্তু বেগে ঘুরিতে ঘুরিতে কোথায় লীন হইয়া যাইতেছে এবং সমগ্র বিশ্বের সহিত আমার আমিষ ‘যেন এক সর্ব-গ্রাসী মহাশূন্যে একাকার হইতে ছুটিয়া চলিয়াছে! তখন দারুণ আতঙ্কে অভিভূত হইয়া পড়িলাম, মনে হইল—আমিষের নাশেই মরণ, সেই মরণ সম্মুখে, অতি নিকটে। সামলাইতে না পারিয়া চীৎকার করিয়া বলিয়া উঠিলাম, ‘ওগো তুমি আমায় একি করলে, আমার যে বাপ মা আছেন! অদ্ভুত পাগল আমার ঐকথা শুনিয়া খল্খল করিয়া হাসিয়া উঠিলেন, এবং হস্তদ্বারা আমার বক্ষ স্পর্শ করিতে করিতে বলিতে লাগিলেন, “তবে এখন থাক। একবারে কাজ নেই, কালে হবে!”

ইহার পরই নরেন্দ্র আত্মসংবিৎ ফিরিয়া পান। স্থির হইয়া তিনি ভাবিতে থাকেন, এই উগ্ৰাদ ব্রাহ্মণের মধ্যে কোন্ বিরাট শক্তি বিরাজিত? নরেনের মতো স্বাভাববাদী, দৃঢ়চেতা, বিচারশীল যুবকের ইচ্ছাশক্তিকে অবলীলায় ইনি চূর্ণ করিতে পারেন। শুধু তাহাই নয়, একতাল কাদার মতো তাহাকে ছানিয়া স্বেচ্ছামতো রূপ দান করিতেও তিনি সক্ষম। দিব্যশক্তিসম্পন্ন এমন মানুষকে পাগল বলিয়া উড়াইয়া দেওয়াই বা যায় কি করিয়া?

আর এক দিনের অলৌকিক অভিজ্ঞতাও অনুরূপ। দক্ষিণেশ্বরের নিকটে বহু মল্লিকের বাগানে ঠাকুর ও নরেন সেদিন বেড়াইতেছেন। কিছুক্ষণ পর ঠাকুর ধ্যানাবিষ্ট হইয়া পড়েন। তারপর অকস্মাৎ নরেন্দ্রকে স্পর্শ করামাত্র তাঁহার সংজ্ঞা লোপ পায়।

বাহ্যজ্ঞান কিরিয়া আসিলে নরেন দেখেন, রামকৃষ্ণ তাঁহার বক্ষে মৃদুভাবে হাত বুলাইতেছেন, আননখানি তাঁহার দিবা আনন্দের আভায় সমুজ্জ্বল ! এই দিনকার বাহ্যজ্ঞান লোপের অবস্থায় নরেনের সহিত ঠাকুর রামকৃষ্ণের এক অলৌকিক প্রশ্নোত্তর চলিয়াছিল। অতীন্দ্রিয় রাজ্যের এ কথোপকথনের সারমর্ম ঠাকুর উত্তরকালে ভক্তদের কাছে নিজেই বর্ণনা করিয়াছিলেন।

বিলুপ্ত-সংজ্ঞা নরেনকে সেদিন তিনি তাঁহার স্বরূপ ও পরিচয় জিজ্ঞাসা করেন। কোথা হইতে, কেন সে আসিয়াছে এবং কোন্ কর্মসাধনের দায়িত্ব তাঁহার, এই প্রশ্নও তাঁহাকে করা হয়। নরেন ঠাকুরকে যথায়থ উত্তর প্রদান করেন। ঠাকুর বলিতেন, “এ থেকেই জেনেছিলাম, নরেন সেদিন জানতে পারবে সে কে, সেদিন আর ইহলোকে থাকবে না। দৃঢ়সঙ্কল্প সহায়ে যোগমার্গে সে তার দেহ ত্যাগ ক’রে চলে যাবে। নরেন যে ধ্যানসিদ্ধ মহাপুরুষ !”

ঠাকুরের দিব্য দেহের এতটুকু স্পর্শ, তার কলেই একি বিচিত্র অধ্যাত্ম-অনুভূতি ! নরেন ভাবিতে থাকেন, তবে কি এই মহা-সাধকের করুণা সম্পাতে অসম্ভবও সম্ভব হয় ? মানুষের জন্ম-জন্মান্তরের সংস্কাররাশি হয় অপমৃত ? তাঁহার নিজ দেহের গবেষণা-গারেই যে ইহার কিছুটা সত্যতা প্রমাণিত হইয়াছে।

এই সঙ্গে যুক্তিবাদী মনের নানা সন্দেহও দেখা দেয়। এই দিব্যকাস্তি ব্রাহ্মণ কোনো সম্মোহন বিজ্ঞা আয়ত্ত করে নাই তো ? নরেনের আত্মবিশ্বাসের মূলে এক প্রচণ্ড আঘাত লাগে। স্থির করেন,—বেশ কিছুদিন খুঁটিয়া খুঁটিয়া না দেখিয়া, পরীক্ষা-নিরীক্ষা না চালাইয়া, রামকৃষ্ণকে তিনি গ্রহণ করিবেন না।

ঠাকুর কিন্তু দিব্যদৃষ্টি বলে জানিয়া বসিয়া আছেন, নরেন তাঁহারই বাণীবাহক, তাঁহার ঐশ-নির্দিষ্ট লীলার সে প্রধান পরিচয়। নরেন যে তাঁহার চোখে এক সহস্রদল কমল—কবে এটি ফুটিয়া উঠিবে রঙে রঙে সৌগন্ধে, এ জ্ঞানই যে তিনি প্রতীক্ষমাণ। একথাটি মাঝে মাঝে লোকের কাছে প্রকাশ করিয়াও বসেন।



একদিন দক্ষিণেশ্বরে কেশব সেন ও বিজয়কৃষ্ণ প্রভৃতি পরিবৃত হইয়া রামকৃষ্ণ ধর্মকথা কহিতেছেন। সহসা ভাবাবিষ্ট হইয়া কেশব, বিজয় ও নরেনের দিকে তাকাইতে লাগিলেন। কি যেন তিনি ইহাদের মধ্যে খুঁজিতেছেন।

এই সভা ভাঙিয়া গেলে কহিলেন, “দেখলাম, কেশবের ভেতরে একটা শক্তি, যার ফলে সে জগৎ বিখ্যাত হয়েছে। আর নরেনের ভেতর সেরকম আঠারোটা শক্তি বর্তমান। আবার দেখলাম, কেশব ও বিজয়ের হৃদয়ে প্রদীপের মতো জ্ঞানালোক জ্বলছে, কিন্তু নরেনের দিকে চেয়ে দেখি—তার ভেতরে জ্ঞান-সূর্য উদ্ভিত হয়ে রয়েছে। মায়া মোহের লেশ পর্যন্ত নেই।”

নরেন চমকিয়া উঠেন। প্রতিবাদ করিয়া বলেন, “মশাই কি সব বলছেন? লোকে যে আপনাকে উদ্ভাদ বলবে। কোথায় জগদ্বিখ্যাত কেশব ও মহামনা বিজয়কৃষ্ণ, আর কোথায় আমার মতো এক নগণ্য ছোঁড়া।”

ঠাকুর অসহায়ের মতো উত্তর দেন, “কি করবো রে, তুই কি ভাবিস যে আমি এসব বলেছি। মা যে আমাকে সমস্ত দেখালেন, তাই তো বল্লুম। মা তো আমাকে সত্যি বই মিথ্যা কখনো দেখান নি, তাই তো আমি একথা বলেছি।”

তেজস্বী, তর্কবিশারদ নরেন সহজে ছাড়িবার পাত্র নহেন। বলিয়া বসেন, “ওসব অতীন্দ্রিয় রূপ-টুপ, মা কালীর দর্শন, নির্দেশ, আপনার নিজের মাথার খেয়াল। দেহ-বিজ্ঞান বলছে, আমাদের ইন্দ্রিয়ের বিকার অনেক সময় আমাদের প্রভাবিত করে।”

ঠাকুর যেন ছোট বালকটি, ভীত হইয়া ভাবেন—তাই তো! সত্যনিষ্ঠ নরেন তাঁহাকে ভুল বুঝাইতে যাইবে কেন?

মা জগদম্বার নিকট সব কিছু জিজ্ঞাসা করিয়া তবে তিনি আশ্বস্ত হন। বলিতে থাকেন, “মা আমাকে বলে দিলেন, ওর (নরেনের) কথা শুনিস কেন? কিছুদিন পরে ও সব কথাই সত্য বলে মানবে।”

তরুণ ভক্তদের কথা উঠিলেই রামকৃষ্ণ নরেনের প্রশংসায় পঞ্চ-

মুখ। বলেন, “নরেনের মতো একটি ছেলেও দেখতে পেলুম না। যেমন গাইতে বাজাতে, তেমনি লেখাপড়ায়, তেমনি বলতে-কইতে, আবার তেমনি ধর্ম বিষয়ে। সে রাতভোর ধ্যান করে, ধ্যান করতে করতে সকাল হয়ে যায়, হুঁশ থাকে না!—আমার নরেনের ভেতর এতটুকু মেকি নেই। বাজিয়ে দেখ, টং টং করছে। আর সব ছেলেদের দেখি, যেন চোখ-কান টিপে কোনো রকমে দু-তিনটে পাস করছে, বাস্, এই পর্যন্ত। ঐ করতেই যেন তাদের সব শক্তি বেরিয়ে গেছে। নরেনের কিন্তু তা নয়—হেসে খেলে সব কাজ করে, পাস করাটা যেন তার কাছে কিছুই নয়। সে ব্রাহ্মসমাজেও যায়, সেখানে ভজন গায়, কিন্তু অল্প সকল ব্রাহ্মের মতন নয়—সে যথার্থ ব্রহ্মজ্ঞানী। ধ্যান করতে বসে তার জ্যোতি দর্শন হয়। সাথে কি তাকে ভালবাসি!”

নরেনের সম্বন্ধে ঠাকুরের বড় সহজ প্রত্যয়। প্রায়ই বলেন,—  
“ও খাপ খোলা তলোয়ার, ও অখণ্ডের ঘর, ধ্যানসিদ্ধ স্বামি।”

নিজের আচার-ব্যবহারেও এই তরুণ ভক্তের অসামান্যতাকে সকলের সামনে ফুটাইয়া তুলেন। দক্ষিণেশ্বরে বণিক সম্প্রদায়ভুক্ত অনেক ভক্ত যাওয়া-আসা করিত, ঠাকুরের জন্তু নিয়া বাইত কলমূল মিষ্টি। এই সব সকাম নিবেদনের বস্তু ঠাকুর নরেনকেই খাইতে দিতেন। বলিতেন, “ওর কোনো হানি হবে না।”

নরেন ব্যক্তিস্বাভাববাদী, বাহ্যাস্ফোট তাঁহার বড় কম ছিল না। একদিন ভক্তমণ্ডলী পরিবৃত ঠাকুরের সম্মুখে আসিয়া দর্পভরে বলেন, “দশায়, আজ হোটেলে, সাধারণে বাকে অখাচ্ছ বলে তাই খেয়ে এসেছি।” ঠাকুর এ কথায় গুরুত্ব না দিয়া উত্তর দেন, “ওরে ভোর ওতে দোষ লাগবে না। শোর গরু খেয়ে যদি কেউ ভগবানে মন রাখে, তা হবিষ্যের তুল্য, আর শাকপাতা খেয়ে যদি কেউ বিষয় বাসনায় ডুবে থাকে তবে তা শোর গরু খাওয়ারই সমান।”

সমাগত ভক্তদের দিকে চাহিয়া বলিতেন, “নরেনের ব্যতিক্রমে দোষ নেই। ওর ভেতরে জ্ঞানগ্নি সব সময়ে জ্বলছে, আহারের

সব রকম দোষকে ভস্ম ক'রে দিচ্ছে। এসব অনাচারে ওর মন কলুষিত হবে না।”

তার পর সকলের বিস্ময় উৎপাদন করিয়া ঠাকুর এই চিহ্নিত ভক্ত সম্বন্ধে বলেন, “ও জ্ঞান-খড়াগ সহায়ে মায়াময় সব বন্ধনকে খণ্ড বিখণ্ড ক'রে ফেলেছে। মহামায়া তাই তো ওকে নিজের আয়ত্তে আনতে পারছে না!”

নরেন কিন্তু মনের দ্বিধাদ্বন্দ্ব, মতবিরোধ সবকিছু সকলের সাক্ষাতে সম্পূর্ণভাবে ব্যক্ত করেন। শুধু তাহাই নয়, তাঁহার তীব্র শ্লেষে, যুক্তি আর বাক্যবাণে সকলে জর্জরিত হন।

নরেন সাধারণ ব্রাহ্মসমাজের সদস্য, নিয়মিত প্রার্থনায় সেখানে যোগ দেন। ঠাকুরের সাকার আরাধনা, তাঁহার অদ্বৈত উপলব্ধির কথা, স্বেচ্ছামতো হাসিয়া উড়াইয়া দেন। রামকৃষ্ণের কিন্তু তাঁহার এই ভাবী উত্তরসাধকের উপর স্থির বিশ্বাস। এই রাজকীয় শিকারকে, লক্ষ্যবস্তু এই সিংহকে, আয়ত্তে আনার সুযোগের প্রতীক্ষা তিনি করিতেছেন।

শীঘ্রই এক আকস্মিক ঘটনায় তাঁহার ও নরেনের সম্পর্ক নিকটতর হইল। নরেন ব্রাহ্মসমাজ হইতে বিচ্ছিন্ন হইয়া পড়িলেন।

নরেন কিছুদিন দক্ষিণেশ্বরে আসিতেছেন না। ঠাকুর তাঁহার অদর্শনে অধীর। তাই এক রবিবার তাঁহার সহিত সাক্ষাতের জন্ত সোজা সাধারণ ব্রাহ্মসমাজে গিয়া তিনি উপস্থিত। শ্রীরামকৃষ্ণের সংস্পর্শে আসিয়া কেশব, বিজয়, চিরঞ্জীব, প্রভৃতি ব্রাহ্ম-নেতাদের পরিবর্তন ঘটয়াছে।<sup>১</sup> শিবনাথ প্রভৃতি একদল ব্রাহ্ম আচার্য তাই তাঁহার সংস্রব ভেমন পছন্দ করিতেছেন না। তাঁহার সংস্পর্শ যথাসম্ভব এড়াইয়া চলিতেই তাঁহারা চান। কিন্তু আগ্রহাকুল রামকৃষ্ণের এতকিছু ভাবিবার অবসর কোথায়? নরেনের খোঁজে, বৎসহারা গাভীর মতো সেদিন তিনি সমাজগৃহে আসিয়া উপস্থিত।

<sup>১</sup> মাক্স মুলার : রামকৃষ্ণ—হিজ্, লাইক্, এণ্ড সেইন্স

সমাজ মন্দিরে ঢুকিয়াই ঠাকুর ভাবাবিষ্ট। দেহ রোমাঞ্চিত, পা ছুটি টলিতেছে। এই অবস্থায় বেদীর দিকে অগ্রসর হইলেন। নরেন্দ্র প্রতি রবিবারে সমাজ-গৃহে আসেন। সেদিনও উপস্থিত। ঠাকুর কেন আসিয়াছেন, বুঝিতে তাঁহার বিলম্ব হইল না।

বেদীর আচার্য বা আর কোনো ব্রাহ্ম নেতাই কিন্তু ঠাকুরকে অভ্যর্থনা জানাইলেন না। শিষ্টাচার বর্জিত এক বিরূপ পরিবেশ। ঠাকুরের কিন্তু কোনো হুঁশই নাই, অচিরে সমাধিস্থ হইয়া পড়িলেন। কোঁতুহলী জনতার ভিড় এড়ানোর জন্ত মন্দিরের গ্যাসের আলোক নিভাইয়া দেওয়া হইল। অতিকষ্টে ঠাকুরকে নিয়া নরেন্দ্র মন্দির হইতে নিষ্কাশিত হইলেন, উপনীত হইলেন দক্ষিণেশ্বরে।

তাঁহার সহিত সাক্ষাতের জন্তই ঠাকুরের এই অপমান বরণ। নরেন্দ্রের মর্মে এ ঘটনাটি তীক্ষ্ণভাবে বিদ্ধ হইল। ভালোবাসা উপলব্ধির সঙ্গে সঙ্গে ক্রোধও কম হয় নাই। রামকৃষ্ণের এই দুর্বলতার জন্ত তাঁহাকে তীব্র ভাষায় তিরস্কার করিলেন। তারপর ভয় দেখাইয়া বলিলেন, “মশাই, শেষটায় এই মায়ার জন্ত আপনাকে বিপদে পড়তে হবে। পুরাণে আছে, ভরত রাজা হরিণের কথা ভাবতে ভাবতে—হরিণ হয়ে যান, আপনারও ভাগ্যে আছে ভেমনি পরিণাম।

রামকৃষ্ণ যেন জগদম্ভার বালক পুত্রটি। বিষন্ন মনে তখনই মায়ের নিকট ছুটিয়া যান। আবার তাঁহার বাক্যে আশ্বাসিত হইয়া যখন কিরিয়া আসেন, আননখানি আনন্দের আভাস উজ্জ্বল। স্মিত হাস্তে নরেন্দ্রকে বলিতে থাকেন, “হা শালা। আমি তোমার কথা শুনবো না। মা বলে দিলেন,—তুই যে ওকে সাক্ষাৎ নারায়ণ বলে জানিস। তাই এত ভালোবাসিস। যেদিন ওর ভেতর সেই নারায়ণকে না দেখতে পারি, সেদিন ওর মুখ দেখতেও পারবি নে।”

এই দেব-শিশুর কাছে, জগদ্ব্যত্যার চরণে সমর্পিত-প্রাণ সন্তানের কাছে, নরেন্দ্রনাথকে সেদিন হার মানিতে হইয়াছিল।

নরেন্দ্র দক্ষিণেশ্বরে আসিলেই ঠাকুরের আনন্দ উধালিয়া উঠে।

মাঝে মাঝে তাঁহাকে দেখিয়া এমন উদ্দীপনা হয় যে তিনি সম্মানিত হইয়া পড়েন ।

সামনেই বি-এ পরীক্ষা । পড়া তৈরি করার জন্ত নরেন কিছুদিন যাবৎ ব্যস্ত, দক্ষিণেশ্বরে আসিতে পারিতেছেন না । ঠাকুর তাঁহার জন্ত অস্থির হইয়া পড়িলেন । একদিন নরেনের সহিত সাক্ষাতের জন্ত নিজেই কলিকাতায় আসিয়া উপস্থিত । পড়াশুনা ও ধ্যান-ধারণার সুবিধার জন্ত নরেন্স তখন তাঁহার মাতামহীর বাসাবাড়ির এক নিভৃত কক্ষে বাস করিতেছেন । দোতলার এই ক্ষুদ্র ঘরটির নামকরণ করিয়াছেন “টং” । একটি ক্ষুদ্র তক্তপোশের উপর মাহুর পাতা, চারিদিকে ছড়ানো রহিয়াছে বইখাতা । মেজের একদিকে তুপ করা তামাকুর গুল ও ছাই । অপর দিকে তানপুরা ও বাঁয়া-তবলা । এ পরিবেশ ঘরের মালিকের অশাস্ত মনেরই যেন এক ছবছ প্রতিচ্ছবি ।

ঠাকুর নিচ হইতে ‘নরেন, নরেন’ বলিয়া চীৎকার করিতে থাকেন । নরেন ছুটিয়া আসিয়া, ঠাকুরকে অত্যাধনা করিয়া উপরে নিয়া বান । সাত্ত্বনয়নে, গদগদ স্বরে ঠাকুর বলিতেছেন, “তুই এতদিন বাস নি কেন রে ? তুই এতদিন বাস নি কেন ?”

প্রেমলীলার শেষ এখানেই নয় । দক্ষিণেশ্বর হইতে গামছায় বাঁধিয়া নরেনের জন্ত সন্দেশ আনিয়াছেন । ব্যগ্রভাবে তাহা খুলিয়া বলিলেন, “ধর খা, খা ।”

স্নেহপূর্ণ স্বরে কহেন, “একটা গান শোনা দেখি, অনেকদিন তোমার কণ্ঠ শুনি নি ।”

বড় অযাচিত এ আগমন আর বড় অহেতুক এ কৃপা । নরেন অভিভূত হইয়া গিয়াছেন । তানপুরা লইয়া বীর কণ্ঠে সংগীত শুরু করিলেন—

আগ মা কুলকুণ্ডলিনী,  
( তুমি ) অম্মানন্দ স্বরূপিনী ।

( তুমি ) নিত্যানন্দ স্বরূপিণী,

প্রসুপ্ত ভূজগাকারী

আধার-পদ্ম-বাসিনী ।

ঠাকুরের মন তখন উর্ধ্বতর চেতনায় উঠিয়া বাইতেছে । ক্রমে সমাধিমগ্ন হইয়া পড়িলেন ।

নরেন ঠাকুরের ধরণ-ধারণ আজকাল কিছুটা বুঝিয়া নিয়াছেন । ভজন গানের মাধ্যমেই ঠাকুরকে বাহ্য-জ্ঞানের ভূমিতে অবতরণ করাইতে হইবে । তাই গাহিতে লাগিলেন, ‘একবার তেমনি তেমনি তেমনি ক’রে নাচ মা শ্যামা ।’

ধীরে ধীরে ঠাকুর সহজ অবস্থায় আসেন । তারপর আদরের ধন নরেনকে দক্ষিণেশ্বরে নিয়া গিয়া তবে শান্ত হন ।

স্বার্থগন্ধহীন এই অপার্থিব প্রেমের বশ্য দিনের পর দিন যেন নরেনের জীবনের ভিত্তিমূল শিথিল করিয়া দিতেছে । ইহারই উল্লেখ করিয়া স্বামী বিবেকানন্দ উত্তরকালে বলিতেন, “ঠাকুরের এই ভালোবাসাই আমাকে চিরকালের মতো বাঁধিয়া কেলিয়াছে । একা তিনিই ভালোবাসিতে জানিতেন ও পারিতেন—সংসারের অশ্রু সকলে স্বার্থসিদ্ধির জন্য ভালোবাসার ভানমাত্র করিয়া থাকে ।”

দিব্য প্রেমের চুম্বকাকর্ষণে নরেন ধীরে ধীরে ঠাকুরের অস্তিত্বের সহিত মিশিয়া বাইতেছেন । কিন্তু ইহার পরই আসে ঠাকুরের আর এক রকম পরীক্ষা । কিছুদিন পর্যন্ত তিনি নরেনের দিকে মোটেই দৃষ্টি দেন না । অহেতুক কুপার ধারাটি হঠাৎ যেন প্রত্যাহার করিয়া নিয়াছেন । নরেনকে দেখা মাত্র আগে উল্লসিত হইয়া উঠিতেন । এখন আর সেরূপটি দেখা যায় না । ডাকিয়া একবার একটি কথাও জিজ্ঞাসা করিতেছেন না । নরেনের নাথেরও যেন এই তাক্কিল্যে আজকাল তেমন আর কিছু যায় আসে না । পূর্ববৎ নিয়মিতভাবে ঠাকুরকে গিয়া তিনি দর্শন করেন । তারপর তত্ত্বদের সহিত বাক্যালাপ করিয়াই কিরিয়া আসেন নিজগৃহে ।

এই অবস্থেলা ও ঔদাসীন্যের পালা প্রায় একমাস চলিল ।

ঠাকুর একদিন জিজ্ঞাসা করিলেন, “আচ্ছা, আমি তো তোকে ডেকে আজকাল একটা কথাও বলি না। তবে তুই এখানে কি করতে আসিস্ বল্ দেখি?”

নরেন্দ্র অবলীলায় উত্তর দিলেন, “আপনার কথা শুনে তো আসি না। আপনাকে ভালোবাসি, সব সময়ে দেখতে ইচ্ছে করে—তাই আসি।”

দুর্ধ্ব সিংহ এইবার ধরা পড়িয়াছে শিকারীর জাল বেটনীতে। নরেন্দ্রের এই অকপট স্বীকারোক্তিতে ঠাকুরের তাই আনন্দের অবধি নাই। স্মিত হাস্তে বলিলেন, “আমি তোকে বিড়ে (পরীক্ষা করে) দেখছিলাম—আদর-যত্ন না পেলে তুই পালিয়ে যাস্ কিনা; তোর মতো আধারই এতটা তাচ্ছিল্য সহ্য করতে পারে।”

রামকৃষ্ণ একদিন দক্ষিণেশ্বরে বসিয়া নরেনকে অদ্বৈত তত্ত্বের মর্ম-কথা বুঝাইতেন। বলিতেছেন, জীব ও ব্রহ্ম অভেদ। নরেন ব্রাহ্মসমাজের দ্বারা প্রভাবিত, এমন কটুর অদ্বৈতবাদের কথায় তাঁহার মন সায় দেয় না। মন্দির চত্বরের এক পাশে প্রতাপ হাজরা থাকেন। নরেন সেখানে বসিয়া মাঝে মাঝে গল্পগুজ্ব করেন, তামাক খান। কথা প্রসঙ্গে নরেন হাজরার সম্মুখে বসিয়া সেদিন বলিতেছেন, “আচ্ছা মশাই, একি কখনো হতে পারে? ঘটিটা ঈশ্বর, বাটিটা ঈশ্বর, যা কিছু ছ’চোখে দেখছি সকলই ঈশ্বর!”

হাজরাও এ কথায় উপর ব্যঙ্গ করিয়া এক মন্তব্য করেন। উভয়ের মধ্যে হাসির রোল উঠে। ঠাকুর তাঁহার কক্ষে ভাবাবিষ্ট। নরেনের হাস্তরব কানে বাইতেই বাহিরে চলিয়া আসেন। নয়ন আধ-নিম্নলিভ, পরনের কাপড়খানি বালকের মতো বগলে ধরা। নিকটে আসিয়া স্মিত হাস্তে অশ্রুট স্বরে প্রশ্ন করিলেন, “তোরা কি বলছিস রে?” তারপর একটু কাছে ঘেঁষিয়া নরেনকে স্পর্শ করিতেই ঘটে এক অদ্ভুত কাণ্ড। নরেন সমাধিমগ্ন হইয়া যান।

এ যেন ঐশ্বর্যালিকের স্পর্শ! হাস্ত-পরিহাসরত নরেনের সন্তায় বিপ্লব ঘটয়া গেল। মুহূর্ত মধ্যে সমস্ত চেতনার, সমস্ত অস্তিত্বের যেন এক বিরাট রূপান্তর সাধিত হইয়া গিয়াছে। সঙ্গে সঙ্গে নরেনের উপলব্ধি হইল, ঈশ্বর ভিন্ন বিশ্বব্রহ্মাণ্ডে আর কিছুই কোনো অস্তিত্ব নাই। এই অপূর্ব দিব্য অনুভূতি জাগ্রত রহিল সারাদিন ব্যাপিয়া।

তারপর বাড়িতে ফিরিয়া আসিলেও দেখা গেল এই চৈতন্যময় অবস্থা অক্ষুণ্ণ রহিয়াছে। আহায়ে বসিয়া তিনি প্রত্যক্ষ করিতেছেন, অন্ন, খালা, পরিবেশনকারী, সব কিছুই সেই এক পরম ব্রহ্মেরই রূপায়ণ। রাস্তা-ঘাটে, কলেজে সেই একই অভিজ্ঞতা। শুধু দুই একদিন নয়, কয়েকদিন এই চিন্ময় অনুভূতি সর্বসত্তায় ওতপ্রোত রহিল।

স্বামীজী বলিয়াছেন, “যখন আচ্ছন্ন ভাবটা একটু কমে যেত তখন জগৎটাকে মনে হত স্বপ্ন। হেতুয়া পুকুরে বেড়াতে গিয়ে তার চারদিকের লোহার রেলিঙে মাথা ঠুকে দেখতাম, যা সব দেখছি তা স্বপ্নময় না বাস্তব। হাত পা’র অসাড়তার জন্ত মনে হত, পক্ষাঘাত হবে না তো? বেশ কিছুকাল এই ভাবের ঘোর ও আচ্ছন্নতার হাত থেকে পরিদ্রাণ পাই নি। যখন প্রকৃতিস্থ হলাম তখন ভাবলাম—এই হচ্ছে অদ্বৈত বিজ্ঞানের আভাস। তবে তো শাস্ত্রে যা লেখা আছে, তা মিথ্যে নয়। সেই অবধি অদ্বৈততত্ত্বের ওপর আর সন্দেহ জাগে নি।”

শুদ্ধতম প্রেমের দুর্ভেদ্য বেড়াজালে ঠাকুর নরেনকে জড়াইয়া ফেলিয়াছেন। এইবার বাস্তব অনুভূতি ও প্রত্যক্ষ দর্শনের মধ্য দিয়া ধীরে ধীরে তাঁহাকে চৈতন্যের তোরণ-দ্বারে উপস্থিত করিয়া দিলেন। পরিহাস ও অস্বীকৃতির মধ্য দিয়া স্বাধীনচেতা যুক্তিবাদী নরেন পরম সত্যের অনুসন্ধান শুরু করিয়াছিলেন। পূর্ণ প্রত্যয়ের মধ্যদিয়া ধীরে ধীরে আজ তাহারই ঘটিল আত্মপ্রকাশ।

সিংহ এবার এক লক্ষ্যে লক্ষ্যবস্তুর উপরে ঝাঁপাইয়া পড়িয়াছে—  
রামকৃষ্ণের তত্ত্বজ্ঞান প্রবিষ্ট হইয়াছে নরেনের সর্বসত্তায়।



নরেনের স্বীকৃতি ও শরণাগতির এক অপূর্ব চিত্র শরৎ মহারাজ অঙ্কিত করিয়া গিয়াছেন। ১৮৮৪ সালের শীতকাল। শরৎ ও শশীর সহিত হেডমায় বেড়াইতে বেড়াইতে নরেন তাঁহার প্রত্যয়ভরা মর্ম-কথা উদ্ঘাটন করিলেন। শ্রীরামকৃষ্ণের ঐশ নির্দিষ্ট কর্মলীলার আভাস তখন তিনি পাইয়াছেন। তাঁহার কৃপাবলে কত শরণাগত ভক্তের কত সংস্কার বন্ধন কাটিতেছে, দিব্য আনন্দের অধিকারী তাঁহারা হইতেছেন, ইহার অপূর্ব বর্ণনা দিলেন। প্রত্যক্ষ অনুভূতি-লাভে তিনি নিজেও যে আজ ধন্য। তারপর সজল নয়নে প্রেম গদগদ স্বরে নরেন গান ধরিলেন—

প্রেমধন বিলায় গোরা যায়,  
চাঁদ নিতাই ডাকে আয় আয়,  
( তোরা কে নিবিরে আয় ! )  
প্রেম কলসে কলসে ঢালে  
তবু না ফুরায় !

তরুণ সাধকের হৃদয়ের কপাটখানি সেদিন উন্মুক্ত। আপন মনে অক্ষুট স্বরে তিনি বলিয়া বাইতে লাগিলেন, “হ্যাঁ, সত্য সত্যই তিনি বিলাচ্ছেন। যা কিছু শ্রেয়, প্রেম বল, ভক্তি বল, জ্ঞান বল, মুক্তি বল, গোরা রায় থাকে যা ইচ্ছে তাকে যেন তাই বিলাচ্ছেন। কি অদ্ভুত শক্তি!—রাত্রে বিহানায় শুয়ে আছি, সহসা আকর্ষণ করে দক্ষিণেশ্বরে হাজির করালেন—শরীরের ভেতরে যেটা আছে সেইটাকে। তারপর কত কথা কত উপদেশের পর আবার কিয়তে দিলেন। সব করতে পারেন—দক্ষিণেশ্বরের গোরা রায় সত্যিই সব করতে পারেন।”

অতীন্দ্রিয়লোকের অভ্যন্তরে, পরম চেতনা ও শক্তির মর্মকেন্দ্রে মহাসাধক রামকৃষ্ণ সমাসীন। তাঁহার সহিত নরেন্দ্রনাথের পরিচয় এইবার সাধিত হইতেছে। সেই নিগূঢ় অধ্যাত্মলোকের চমকপ্রদ বার্তারই আভাস তাঁহার সেদিনকার কথায় ফুটিয়া উঠে।

সাধনপথের দিগ্‌নির্ণয় হইয়াছে—নরেন্দ্র শ্রীরামকৃষ্ণকে তাঁহার জীবনপ্রভুরূপে স্বীকার করিয়াছেন। তাই বুঝি এবার ঠাকুর শুরু করিলেন নরেন্দ্রের পরীক্ষা ও জীবনমন্ডন। দারিদ্র্যের পীড়ন আসে বার বার। তারপর ঘটে পিতার আকস্মিক মৃত্যু। এই দুর্দৈবময় অধ্যায়ের সূত্রপাত হয় ১৮৪৪ খ্রীষ্টাব্দের প্রথমভাগে। ইহার কিছুকাল আগে নরেন বি, এ, পরীক্ষা দিয়া উঠিয়াছেন।

পিতা বিশিষ্ট এটর্নী হইলেও তিনি ছিলেন অমিতব্যয়ী। সঞ্চয় দূরের কথা ঋণের বোঝা-ই কিছুটা রাখিয়া গিয়াছেন। আর সেই সঙ্গে রহিয়াছে মা ও কয়েকটি ভাইবোনের খাওয়া পরার দায়িত্ব। মাতা ও পুত্র সাহসের সহিত এই সংগ্রামে রত হইয়াছেন। যে সংসারের মাসিক ব্যয় হাজার টাকা, আজ তাহা ত্রিশ টাকায় চালাইতে হইতেছে। কিন্তু এই টাকারই বা সংস্থান কোথায় ?

এই সময়কার সঙ্কটের বাস্তব চিত্রটি উত্তরকালে বিবেকানন্দের নিজের ভাষায়ই ফুটিয়া উঠিয়াছে, “মৃত্যুশৌচের অবসান হইবার পূর্ব হইতেই কর্মের চেষ্টায় কিরিতে হইয়াছিল। অনাহারে নগ্নপদে চাকুরির আবেদন হস্তে লইয়া মধ্যাহ্নের প্রথর যোজে অকিস হইতে অকিসান্তরে ঘুরিয়া বেড়াইতাম—অস্তরঙ্গ বন্ধুগণের কেহ কেহ হুঃখের হুঃখী হইয়া সঙ্গে থাকিত, কোনোদিন থাকিতে পারিত না, কিন্তু সর্বত্রই বিফল হইয়া কিরিতে হইয়াছিল। সংসারের সহিত এই প্রথম পরিচয়েই বিশেষভাবে আমার হৃদয়ঙ্গম হইতেছিল, স্বার্থশূন্য সহানুভূতি এখানে অতীব বিরল—হর্বলের, দরিদ্রের এখানে স্থান নাই। দুইদিন পূর্বেও যাহারা আমাকে সাহায্য করিতে পারিলে ধন্য হইত, সময় বুঝিয়া তাহারাই এখন আমাকে দেখিয়া মুখ বাঁকাইতেছেন।...যেদিন বুঝিতাম গৃহে সকলের প্রচুর আহাৰ্য নাই এবং হাতে পরস্যা নাই সেদিন মাতাকে ‘আমার নিমন্ত্রণ আছে’ বলিয়া বাহির হইতাম এবং সামান্য কিছু খাইয়া, কোনোদিন বা অনশনে, কাটাইয়া দিতাম।”

এত কিছু হুঃখ-কষ্ট ও অভাব-অনটনের উপর ছিল জ্ঞাতীদের

শত্রুতা। বাড়ি হইতে উচ্ছেদ করার জন্য তাহার জোর মামলা শুরু করিয়া দিয়াছে।

এই সব উৎপীড়নের সঙ্গে আছে আর এক ধরনের উৎপাত। এক ধনী মহিলার দৃষ্টি আগে হইতেই সুদর্শন তরুণ নরেনের উপর পড়ে। সুযোগ বুঝিয়া এবার তিনি লোভ দেখাইতে থাকেন, তাঁহাকে গ্রহণ করিলে নরেন অচিরে এই অর্থকষ্ট হইতে নিষ্কৃতি লাভ করিতে পারেন। নরেন কিন্তু ঘৃণাতরে এ প্রস্তাব প্রত্যাখ্যান করেন।

এক ধনী বন্ধু আমোদ-প্রমোদের জন্য এই সময়ে নরেনকে তাঁহার বাগানবাড়িতে নিয়া যায়। নরেন গিয়া দেখেন, সুরা এবং বারান্দারও ব্যবস্থা সেখানে রহিয়াছে। সকলে যুক্তি করিয়া জীলোকটিকে হঠাৎ নরেনের বিশ্বাস-কক্ষে প্রেরণ করে। যুবতীর দিকে স্থির দৃষ্টিতে তাকাইয়া তেজস্বী নরেন প্রশ্নের পর প্রশ্ন করিতে থাকেন,—কেন সে এই পাপের পথে নামিয়াছে? সত্যকারের সুখ তাঁহার জীবনে কখনো মিলিয়াছে কি?

তারপর তীক্ষ্ণ পৌরুষদৃশ্য কণ্ঠে তিনি বলিয়া উঠেন, “বাহা, এই ছাইভস্ম দেহটার তৃপ্তির জন্য তো কত কিছু করলে। কিন্তু মৃত্যু কি তোমায় ছাড়বে? সে তো ক্রমেই এগিয়ে আসছে। পারের সম্বল কিছু করেছ কি? এসব ছেড়ে, ভগবানকে ডাকো।”

রমণী লজ্জিতা ও অনুতপ্তা হয়, ফিরিয়া আসিয়া অনুযোগের সুরে বলে, “হিঃ এমন লোকের কাছেও কি আমার পাঠাতে হয়।”

সাহস ও অকপটতা নরেনের আজন্ম বৈশিষ্ট্য। বাগানবাড়ি হইতে ফিরিয়া আসিয়াই সবাইকে বলিতে থাকেন, “জানো, আজ বাগানে গিয়ে কত আমোদ-প্রমোদ করে এসেছি। তাছাড়া, মদ, মেয়েমানুষ সবই সেখানে ছিল।”

এ সব কথা পল্লবিত হইয়া পরমহংসদেবের কানে পৌছিল। নরেন অধঃপাতে গিয়াছে। রামকৃষ্ণ গর্জিয়া উঠিলেন, “চুষ কর, শালাদা! মা বলেছেন, সে কখনো এমন হতে পারে না। বোঝি-

সংসর্গ ওয় হবে না। আর কখনো আমাকে ওসব কথা বললে আমি তোদের মুখ দেখবো না।”

নরেনের জীবনপ্রভু তাঁহার জ্যোতিঃনিশ্চন্দ্রী তৃতীয় নয়নটি যে সতত তাঁহার দিকেই নিবদ্ধ রাখিয়াছেন। সে নয়নের দৃষ্টি-সীমা এড়াইয়া চলার উপায় তাঁহার কই ?

কখনো অভিमानে, কখনো বা দারিদ্র্যের পেষণে নরেন তাঁহার উগ্ৰা প্রকাশ করেন, ঈশ্বরের অস্তিত্বে সন্দেহ জানান। কিন্তু ঠাকুরের সহিত সাক্ষাতের পর হইতে যে প্রত্যক্ষ অনুভূতি তিনি লাভ করিয়াছেন, যে অপ্রাকৃত দর্শন তাঁহার হইয়াছে, তাহা তো বিস্মৃত হইবার নয় ? অন্তঃসঞ্চারী আলোকশ্রোত ধীরে ধীরে তাঁহার জীবনের গভীরে প্রবাহিত হইতে আরম্ভ করিয়াছে। আর ঠাকুর রামকৃষ্ণের কৃপার উৎস হইতেই যে সে প্রবাহ নামিয়া আসিতেছে তাহা অস্বীকার করিবার উপায় কই ?

নরেন্দ্রনাথ তখন বেকার। সেদিন ভগ্ন হৃদয়ে অবসন্ন দেহে গৃহে কিরিতেছেন। শেষটায় রাস্তার পাশে এক বাগান্দার গুইয়া পড়িতে তিনি বাধ্য হন। চেতনা তখন বিলুপ্ত প্রায়। এই সময়ে আগিয়া উঠে এক বিস্ময়কর অতীন্দ্রিয় অনুভূতি। উত্তরকালে নিজেই তিনি ইহা বিবৃত করিয়াছেন,—“সহসা উপলব্ধি করিলাম, কোন্ এক দৈবশক্তি প্রভাবে একের পর এক—এইরূপে ভিতরের অনেকগুলি পর্দা যেন উত্তোলিত হইল। তখন শিবের সংসারে অশিব কেন, ঈশ্বরের কঠোর জায়গরতা ও অপার করুণার সামঞ্জস্য কোথায়—এই শ্রেণীর যে সকল বিষয় নির্ণয় করিতে না পারিয়া মন এতদিন নানা সন্দেহে আকুল হইয়াছিল, সেই সকল বিষয়ের স্থির মীমাংসা অন্তরের নিবিড়তম প্রদেশে দেখিতে পাইলাম। আনন্দে উৎফুল্ল হইয়া উঠিলাম। অনন্তর বাটী কিরিবার কালে দেখিলাম, শরীরে বিন্দুমাত্র ক্লান্তি নাই, মন অমিত বল ও শান্তিতে পূর্ণ; এবং রজনী অবসান হইবার অল্পই বিলম্ব আছে।”

ইহার পর অন্তরে শুরু হয় এক নূতনতর আলোড়ন। তাঁর বৈরাগ্যের ঝড় বহিতে থাকে। জীবনের ক্ষয়-ক্ষতি, নিন্দা-প্রশংসায় তাঁহার কি আসে যায়? জাগিয়া উঠে দৃঢ় প্রত্যয়,—সংসারের গণ্ডীতে আবদ্ধ হইয়া থাকার জন্য তো তাঁহার জন্ম হয় নাই! মুক্তির আশ্বাদ তাঁহাকে গ্রহণ করিতেই হইবে। স্থির করিলেন, সংসার ত্যাগ করিয়া নিবেন সন্ন্যাস জীবন।

কয়েকদিন পরে রামকৃষ্ণ কলিকাতায় এক ভক্তগৃহে আশ্রয়লাভ করেন। নরেনকে সেদিন এক রকম জোর করিয়াই তিনি দক্ষিণেশ্বরে নিয়া গেলেন। ঘরের মধ্যে বহু ভক্তজনের সমাগম। ঠাকুর ভাবাবিষ্ট হইয়া বসিয়া আছেন। হঠাৎ নরেনের নিকটে আসিয়া একদৃষ্টিতে তাঁহার দিকে তাকাইয়া থাকেন। তারপর সজল চক্ষে গুণ্গুন স্বরে গান ধরেন,—

কথা কহিতে ডরাই

না কহিতেও ডরাই,

( আমার ) মনে সন্দ হয়

বুঝি তোমায় হারাই, হা—রাই !

এ প্রচ্ছন্ন ইঞ্জিতের মর্ম বুঝিতে নরেনের দোহাই হইল না। সর্বজ্ঞ ঠাকুর তাঁহার সন্ন্যাস গ্রহণের সঙ্কল্পটি ধারণা কেলিয়াছেন। আসন্ন বিচ্ছেদের ব্যথা তাঁহার এই গানের পদে লুকানো।

নরেনের মনের রুদ্ধ ভাবপ্রবাহ যেন মুহূর্তে অর্গলমুক্ত হইয়া গেল। ঠাকুরের মতো তাঁহার চোখ দুটিও অশ্রু-ছলছল।

উভয়ের এই রহস্যময় আচরণে বিস্মিত হইয়া সবাই নীরবে বসিয়া আছেন। ঠাকুর সহাস্তে তাঁহাদের দিকে তাকাইয়া বলিলেন, “আমাদের ভেতর একটা ব্যাপার হয়ে গেল।”

সেই রাতে দক্ষিণেশ্বরে নরেনকে ডাকিয়া রামকৃষ্ণ গোপনে বলিলেন, “ওরে আমি জানি, তুই আমার কাজের জন্যই এসেছিস। সংসারে থাকা তোমার হবে না। কিন্তু আমি যতদিন আছি, আমার জন্ম থাক।” কথা কয়টি নরেনের জীবনে যেন আলোক-সংস্পর্ক।

সরাসরি মর্মমূলে গিয়া এগুলি বিদ্ধ হইল। আর ইহার সঙ্গে সঙ্গে মনে পড়িল ঠাকুরের ছলছল দুটি আয়ত নয়ন আর অন্তরের প্রেম-প্রবাহ। এ প্রবাহ নরেন্দ্রনাথের মতো ঐরাবতকেও ভাসাইয়া নিবার পক্ষে যথেষ্ট।

বাড়ির মামলা ক্রমে আরো জটিল হয়। জ্ঞাতিরা উৎখাতের মামলায় তাঁহাকে কাবু করিতে চাহিতেছে। পুস্তক প্রকাশক ও এটর্নীর অকসি চূড়ান্ত পরিশ্রম করিয়া এই সময়ে কিছু কিছু উপার্জন করেন বটে, কিন্তু তাহাতে মা ও ভাই-বোনদের অন্ন-সংস্থানই হয় না। তত্পরি মোকদ্দমার ব্যয়। অর্থাভাব ক্রমে চরমে উঠিল।

আত্ম-পরিজনের অন্নকষ্ট আর তো সহ হয় না। নরেন একদিন ঘর হইতে ছুটিয়া বাহির হইলেন। স্থির করিলেন, যে ঠাকুরের উপর জীবনের সমস্ত ভাব চাপাইয়া তিনি বসিয়া আছেন, আজ মা ও ভাই-বোনের অন্নসংস্থানের জন্ত তাঁহারই কৃপা ভিক্ষা মাগিয়া নিবেন। সর্ব অন্তর খুঁজিয়া দেখিলেন, ত্রীরামকৃষ্ণই যে তাঁহার জীবনের একমাত্র সম্বল। ঐহিক পারত্রিক যাহা কিছু চাহিবার, তাঁহার নিকট ছাড়া আর কাহার কাছে চাহিবেন? আধ্যাত্মিক ও সাংসারিক দুই জীবনেরই বোঝা আজ তিনি ঠাকুরের পদে সমর্পণ করিতে পারিলে বাঁচিয়া যান। আত্মবিশ্বাস তাঁহার চিরতরে ধূলিসাৎ হইয়া গিয়াছে।

তখন দক্ষিণেশ্বরে গিয়া ঠাকুরকে চাপিয়া ধরিলেন। কহিলেন, “মশায়, সংসারের ভাবনা আর আমি ভাববো না। আপনি মাকে বলে যা হয় একটা ব্যবস্থা করুন।”

“ওরে, আমি যে ওসব কথা বলতে পারি না। তুই নিজে মাকে জানাস্ না কেন? মাকে যে মানিস না, তাই এত বিপদ হচ্ছে। কালীঘরে গিয়ে মায়ের কাছে আজ তুই যা চাইবি, মা তোকে তাই দেবেন। মা যে আমার চিদ্রয়ী, ব্রহ্মশক্তি। ইচ্ছেমাত্র সবকিছু করতে পারেন। তুই যা না তাঁর কাছে।”

গভীর রাত। নরেন ধীর পদে দেবী ভবভারিণীর মন্দিরে গিয়া বসেন। নিবিড় ভাবের ঘোরে তিনি আবিষ্ট। সেদিনকার অমুভূতি সম্বন্ধে বিবেকানন্দ পরে বলিয়াছেন, “যাইতে যাইতে একটা গাঢ় নেশায় সমাচ্ছন্ন হইয়া পড়িলাম, পা টলিতে লাগিল। মাকে সত্য সত্য দেখিতে ও তাঁহার শ্রীমুখের বাণী শুনিতে পাইব—এইরূপ স্থির বিশ্বাসে মন অগ্ৰ সকল বিষয় ভুলিয়া অত্যন্ত একাগ্র ও তন্ময় হইয়া ঐ কথাই ভাবিতে লাগিল। মন্দিরে উপস্থিত হইয়া দেখিলাম, সত্য সত্যই মা চিন্ময়ী, সত্য সত্যই তিনি জীবিতা এবং অসীম প্রেম ও সৌন্দর্যের প্রসবনরূপিণী। ভক্তি ও প্রেমে হৃদয় উচ্ছ্বসিত হইল, বিহ্বল হইয়া বারংবার প্রণাম করিতে করিতে বলিতে লাগিলাম, ‘মা বিবেক দাও, বৈরাগ্য দাও, জ্ঞান দাও, ভক্তি দাও, যাতে তোমার অবাধ দর্শন নিত্য লাভ করি, এইরূপ ক’রে দাও।’ শান্তিতে প্রাণ আপ্লুত হইল, জগৎ সংসার নিঃশেষে অন্তর্হিত হইয়া একমাত্র মা-ই হৃদয় পূর্ণ করিয়া রহিলেন।”

পাষণ প্রতিমার ঘটয়াছে চিন্ময়ী জগজ্জননীর দিব্য আবির্ভাব। নরেনের সমগ্র সত্তার মূলে জাগিয়াছে প্রচণ্ড আলোড়ন। অন্নবস্ত্রের নগণ্য সমস্তা তিনি একেবারে বিস্মৃত হইয়াছেন, তাই মায়ের কাছে তাহা জানাইতে পারেন নাই। ঠাকুরের নির্দেশে তিন তিন বার মন্দিরে গিয়া বসিলেন। কিন্তু সে প্রশ্নটি আর উঠাইতে পারিলেন কই ?

বার বারই ভাবেন, কোন্ লজ্জায় এই তুচ্ছ কথা জগজ্জননীর আত্মশক্তিকে তিনি জানাইতে যাইবেন ? ঠাকুরের মূল্যবান কথাটি অমনি তাঁহার মনে পড়িয়া যায়। ভক্তদের প্রায়ই তিনি বলিতেন, “রাজার প্রসন্নতা লাভ ক’রে তাঁর কাছে তুচ্ছ লাউ-কুমড়া চাওয়া—সে যে নির্বোধের কাজ রে।”

মায়ের কাছে সেদিন শুধু জ্ঞানভক্তি প্রার্থনা করিয়াই নরেন্দ্রনাথ ফিরিয়া আসিলেন।

সহসা এই ঘটনার অর্থ তাঁহার নিকট পরিষ্কার হইয়া উঠিল।

বুঝিলেন, ইহা ঠাকুরেরই এক রহস্যময় লীলা। নতুবা যে সমস্তার কথা বলিতে তিনি ব্যাকুল হইয়া দক্ষিণেশ্বরে আসিয়াছেন, মুখ ফুটিয়া তাহা বলিতে এমন ভুল বার বার হইবে কেন?

বাড়ির অন্নকষ্ট নিবারণের জন্ত এবার তাই ঠাকুরকেই ধরিয়া বসিলেন। উপায়ান্তর অভাবে রামকৃষ্ণকেই সেদিন বলিতে হয়, “আচ্ছা, যা মোটা ভাত-কাপড়ের কষ্ট কখনো হবে না।”

সব কিছু ভালমন্দ ঠাকুরের পায়ে নরেন ইতিপূর্বে বিলাইয়া দিয়াছেন। কিন্তু মা তাই-বোনের কর্তব্যের বোঝাকেও সেখানে নামানোর কথা তো কখনো ভাবেন নাই? রামকৃষ্ণ আজ যেন নিজেই কৃপা করিয়া এ বোঝা কাড়িয়া নিলেন। দায়িত্ববোধ ও আত্ম-প্রত্যয়ের সঙ্গে জড়িত থাকে একটা সুস্পষ্ট অহংবোধ। তাও ঠাকুর নরেনের জীবন হইতে বুঝি মুছিয়া ফেলিতে চাহিলেন।

চিন্ময়ী জননীর অপরূপ দর্শন! এ দর্শন নরেনের অন্তরে সেদিন অবিরাম আনন্দের প্রশ্রবণ বহাইয়া দেয়। ঠাকুরকে ধরিয়া তখনই জগজ্জননীর এক স্তুতি-গান শিখিয়া নেন। আনন্দাবেশে সারা রাত তাঁহার ঘুম হয় না, গানের কলি কেবলই কণ্ঠে গুঞ্জরণ করিয়া ফিরিতে থাকে—

তোরে জানি মা ও দীনদয়াময়ী,

( আমার ) মা ঙ্গহি তারা।

তুমি ত্রিগুণধরা পরাৎপরা।

তোরে জানি মা ও দীনদয়াময়ী

তুমি হুর্গমেতে হুঃখহরা।”

নরেন ব্রহ্মময়ীকে দেখিয়াছেন, ব্রহ্মের সাকার রূপ মানিয়া নিয়াছেন, তাই রামকৃষ্ণের আজ আনন্দের অবধি নাই। বালকের মতো তিনি হাস্যমুখর। সবাইকে ডাকিয়া বার বার বলিতেছেন, জানো, “নরেন মাকে মেনেছে! বেশ হয়েছে—না?”



পরদিন নরেন কলিকাতায় কিরিবেন। প্রণাম করিতেই ঠাকুর ভাবাবিষ্ট। ছোট ছেলেটির মতো নরেনের কোলে উঠিয়া বসেন। ভাবজড়িত কণ্ঠে কহেন, “দেখছি কি—এটা ( নিজের দেহ ) আমি। আমার ওটাও ( নরেনের দেহ ) আমি। সত্য বলছি, কিছুই তফাৎ বুঝতে পারছি না। যেমন গঙ্গার জলে একটা লাঠি ফেলায় দুটে ভাগ দেখাচ্ছে—সত্য সত্য কিছু ভাগাভাগি নেই, একটাই রয়েছে—তা, মা ছাড়া আর কি আছে বল, কেমন?”

অর্ধবাহ্য অবস্থায় ঠাকুর এবার তামাক খাইতে শুরু করিলেন। তারপর কল্কেটি নরেনের মুখের সামনে নিয়া কহিতে লাগিলেন “খা, আমার হাতেই খা।” নরেন সসঙ্কোচে মুখ ফিরাইয়া নেন কিন্তু ছাড়া পাইবার উপায় নাই। ঠাকুরের হস্তে তাঁহাকে এই তামাক খাইতেই হইল। কিন্তু কল্কেটি ঠাকুর যেই নিজ মুখে লাগাইতে যাইবেন নরেন শিহরিয়া উঠিলেন, হাত চাপিয়া ধরিলেন। খাবারের অগ্রভাগ কাহাকেও দেওয়া হইলে ঠাকুর উচ্ছিষ্ট জ্ঞানে তাহা গ্রহণ করিতেন না। এখন যেন সবই বিপরীত।

ঠাকুর ত্রুঙ্ক হইয়া কহিলেন, “দূর শালা! তোর বড় ভেদ বুদ্ধি তুই আর আমি কি আলাদা?”

ঠাকুরের এই আচরণ শুরু ও শিব্বের একাত্মকতা ও অভেদ্য যেমন বুঝাইতে চাহিতেছে, তেমনি সামনে তুলিয়া ধরিতেছে অদ্বৈত অনুভূতির আদর্শ।

আর একদিনের কথা। রামকৃষ্ণ সেদিন নিভূতে নরেনকে দক্ষিণেশ্বরের পঞ্চবটীতে ডাকিয়া নিয়া যান, তারপর স্নেহ-পূর্ণ স্বরে কহেন, “তাপ্, তপস্যার ফলে আমার ভেতর অনেক কাল হই অগ্নিমাди বিভূতি সব এসে গেছে। কিন্তু আমি তা দিয়ে আর কি করবো? যার পরনের কাপড় ঠিক থাকে না, এসব সে কি করে কাজে লাগাবে? কিন্তু মা তো বলেছেন, তাকে তাঁর অনেক কাজ করতে হবে। তোর ভেতরে শক্তি সঞ্চার করে ওগুলো এবাং দিয়ে দি, তুই কাজে লাগাতে পারবি। কি বলিস?”

ঈশ্বর লাভের দৃঢ় সঙ্কল্প তখন নরেনের হৃদয়ে জাগিয়া উঠিয়াছে। যোগ বিভূতির ঐশ্বর্য প্রলোভন তাঁহাকে টলাইতে পারিবে কেন? উত্তর দিলেন, “কিন্তু মশায়, এসব তো আমার ঈশ্বর দর্শনে সাহায্য করবে না! তবে এতে আমার কি লাভ? আগে ভগবৎ-দর্শনরূপ আসল কাজটি হয়ে যাক, তারপর এর কথা ভাবা যাবে।”

প্রিয় ভক্তের এই নিস্পৃহতায় ঠাকুরের চোখে-মুখে সেদিন ফুটিয়া উঠে অপার প্রসন্নতার দীপ্তি।

ভক্তজন পরিবৃত্ত ত্রীমাক্ষণ একদিন স্বীয় কক্ষে বসিয়া ধর্মকথা কহিতেছেন। ‘সর্বজীবে দয়া’ এই কথাটি বলিতে বলিতেই তিনি সমাধিস্থ হইয়া পড়িলেন। তারপর বাহুজ্ঞান কিরিয়া আসিলে আবেশজড়িত কণ্ঠে বলিতে লাগিলেন, “জীবে দয়া—জীবে দয়া? দূর শালা! কীটাপুঁকীট তুই—জীবে দয়া কি করবি? দয়া করবার তুই কে? না, না, জীবে দয়া নয়—শিবজ্ঞানে সেবা!”

নরেন সকলের সঙ্গে বসিয়া ঠাকুরের অমৃতবাণী শ্রবণ করিতে-ছিলেন। এক মুহূর্তে তাঁহার অন্তর্লোক হইতে একটা পদা যেন উঠিয়া গেল। ঠাকুরের প্রজ্ঞানঘন বাণীতে আত্মপ্রকাশ করিল সেবা-ধর্মের মহিমা।

বিবেকানন্দ উত্তরকালে মুমুকু গুরুভ্রাতাদের কহিয়াছিলেন, “কি অদ্ভুত আলোকই সেদিন ঠাকুরের কথায় দেখিতে পাইলাম! শুদ্ধ, কঠোর ও নির্মম বলিয়া প্রসিদ্ধ বেদান্ত জ্ঞানকে ভক্তির সহিত সম্মিলিত করিয়া কি সহজ, সরস ও মধুর আলোকই তিনি প্রদর্শন করিলেন। অদ্বৈত জ্ঞান লাভ করিতে হইলে, সংসার ও লোকসঙ্গ সর্বতোভাবে বর্জন করিয়া বনে যাইতে হইবে এবং ভক্তি ও ভালবাসা প্রভৃতি কোমল আবসমূহকে হৃদয় হইতে সবলে উৎপাটিত করিয়া চিরকালের মতো দূরে নিক্ষেপ করিতে হইবে—এই কথাই এতকাল শুনিয়া আসিয়াছি। কিন্তু ঠাকুর আজ বাহা ভাবাবেশে বলিলেন, তাহাতে বুঝা গেল—বনের বেদান্তকে ঘরে আনা যায়, সংসারের

সকল কাজে উহাকে অবলম্বন করিতে পারা যায়। মানব যাহা করিতেছে, সে সকলই করুক তাহাতে ক্ষতি নাই, কেবল প্রাণে সহিত এই কথা সর্বাগ্রে বিশ্বাস ও ধারণা করিলেই হইল—ঈশ্বর জীব ও জগৎরূপে তাহার সম্মুখে প্রকাশিত রহিয়াছেন। জীবনে প্রতি মুহূর্তে সে যাহাদিগের সম্পর্কে আসিতেছে, যাহাদিগের ভালবাসিতেছে, যাহাদিগকে শ্রদ্ধা, সম্মান অথবা দয়া করিতেছে তাহার সাক্ষাৎই তাহার অংশ—তিনি। সংসারের সকল ব্যক্তিকে যদি সে ঐরূপে শিবজ্ঞান করিতে পারে, তাহা হইলে আপনাকে বা তাবিত্তা তাহাদিগের প্রতি রাগ, ঘৃণা, দম্ব অথবা দয়া করিবার তাহার অবসর কোথায়? ঐরূপে ‘শিবজ্ঞানে জীবের সেবা’ করিতে করিতে চিত্তশুদ্ধ হইয়া সে স্বল্পকালের মধ্যে আপনাকেও চিদানন্দময় ঈশ্বরের অংশ, শুদ্ধবুদ্ধ মুক্ত স্বভাব বলিয়া ধারণা করিতে পারিবে।

“ঠাকুরের ঐ কথায় ভক্তিপথেরও বিশেষ আলোক দেখিতে পাওয়া যায়। সর্বভূতে ঈশ্বরকে যতদিন না দেখিতে পাওয়া যায় ততদিন ষথার্থ ভক্তি বা পরাভক্তি লাভ সাধকের পক্ষে সুদূরপরাহত থাকে। শিব বা নারায়ণ-জ্ঞানে জীবের সেবা করিলে ঈশ্বরকে সকলের ভিতর দর্শনপূর্বক ষথার্থ ভক্তিতে ভক্তসাধক স্বল্পকালেই কৃতকার্য হইবে, একথা বলা বাহুল্য। কর্ম বা রাজযোগ অবলম্বনে যে সকল সাধক অগ্রসর হইতেছে তাহারও ঐ কথায় বিশেষ আলোক পাইবে। কারণ, কর্ম না করিয়া দেহী যখন একদণ্ড থাকিতে পারে না, তখন ‘শিবজ্ঞানে জীবসেবা’-রূপ কর্মমুঠানই যে কর্তব্য এবং উহা করিলেই তাহার আশু লক্ষ্যে পৌঁছাইবে, একথা আর বলিতে হইবে না। যাহা হউক ভগবান্ যদি কখনো দিন দেন তো আজ যাহা গুনিলাম, এই অদ্ভুত সত্য সংসারে সর্বত্র প্রচার করিব,—পণ্ডিত মূর্খ, ধনী দরিদ্র, ব্রাহ্মণ, চণ্ডাল সকলকে গুনাইয়া মোহিত করিব।”<sup>২</sup>

ঠাকুরের কথাগুলি নরেনের জীবনে সেদিন উপস্থিত হয় নূতন দিগ্‌দর্শনরূপে। উত্তরকালে প্রধানত এই দিগ্‌দর্শনকেই তিনি কাজে লাগাইয়া ছিলেন।

ভক্ত শিষ্যদের ঠাকুর সাধারণত ভক্তি-শাস্ত্র পড়িতে বলিতেন। কিন্তু নরেনের জ্ঞান অজ্ঞ ব্যবস্থা। জানিতেন, নরেন উত্তরকালে চিহ্নিত হইবেন এক বিশ্বখ্যাত আচার্যরূপে, বিশ্বজনীন অদ্বৈতবাদের ব্যাখ্যাতা রূপে। তাই অদ্বৈতভাবের উদ্দীপক শাস্ত্রাদি যখন নরেন পড়িতে বসিতেন, ঠাকুর বরং আনন্দিতই হইতেন। নরেনকে এ সময়ে প্রায়ই উপনিষদ, ব্রহ্মসূত্র, যোগবাশিষ্ঠ প্রভৃতি গভীরভাবে অধ্যয়ন করিতে দেখা যাইত।

সহজাত জ্ঞান-বৈরাগ্যের অধিকারী ছিলেন নরেন, কিন্তু তাঁহার সত্তার গভীরে লুকানো ছিল প্রেমভক্তির এক বিপুল উৎস। ঠাকুর তাই বলিতেন, “এ রকম চোখ কি শুদ্ধ জ্ঞানীর কখনো থাকে রে ? জ্ঞানের সঙ্গে ভক্তির ভাবও যে তোর ভেতরে বয়ে যাচ্ছে।” বাহিরে জ্ঞানমার্গী হইলে কি হয়, ঠাকুর যখন কীর্তনানন্দে মাতিতেন, দেখা যাইত—নরেনও সকলের সঙ্গে হাত ধরাগরি করিয়া ভাবাবেগে নৃত্য শুরু করিয়া দিয়াছেন।

রামকৃষ্ণ জানিতেন, নরেন নিত্যসিদ্ধ, মুক্তপুরুষ, সর্ব মায়ামোহের উর্ধ্বে সে অবস্থিত। তাই কেবলি তাঁহার ভয় হইত—মায়ার প্রভাব নরেনের উপর কিছুটা না থাকিলে ঐশ নিদিষ্ট কর্ম তো সে সম্পন্ন করিতে পারিবে না। নিজের স্বরূপ চিনিতে পারিয়া যে কোনো মুহূর্তে দেহটি ছাড়িয়া দিবে, চলিয়া যাইবে স্বস্থানে। সজল নয়নে ঠাকুর তাই জগজ্জননীর কাছে প্রার্থনা জানান, “মাগো, ওর ভেতর তুই একটুখানি মায়ী প্রবেশ করিয়ে দে, নতুবা কোনো কাজই তো করতে পারবে না।”

১৮৮৪ খ্রীষ্টাব্দে নরেন ও অজ্ঞাত ভক্তদের জীবনে আসে চরম হর্দৈব। ঠাকুর ঈশ্বরামকৃষ্ণের গলায় হরায়োগ্য ক্যান্সার রোগের জা. সা. (৮)-১৫

আক্রমণ ঘটে। চিকিৎসার জন্য তাঁহাকে কিছুদিন কলিকাতায় রাখা হয়, তারপর নিয়া বাওয়া হয় কাশীপুরের বাগানে।

ঠাকুরের সেবা শুদ্ধা ও সান্নিধ্যকে কেন্দ্র করিয়াই এই সময়ে ভক্তমণ্ডলীর পরম প্রস্তুতিটি গড়িয়া উঠিতে থাকে। তরুণ সাধকদল নরেনের নেতৃত্বে ঠাকুরের সেবায় একান্তভাবে আত্মনিয়োগ করেন। আর গুরুর অধ্যাত্ম-শক্তি ধীরে ধীরে তাঁহাদের ভিতরে প্রবিষ্ট হইতে থাকে। বীজাকারে রামকৃষ্ণমণ্ডলীর সূচনা এইখানে।

ঘুবক ভক্তেরা পালাক্রমে ঠাকুরের সেবা করেন আর অবসর পাইলেই জপ, ধ্যান ও কীর্তনে নিবিষ্ট হইয়া থাকেন। নরেন্দ্রনাথ এই সময়ে ঈশ্বর লাভের জন্য একান্ত ব্যাকুল। পরমহংসদেবের অনুমতি নিয়া এ সময়ে পঞ্চবটীতলে প্রায়ই তিনি সাধন করিতেন। বিশ্বব্রহ্মতলে রাতের পর রাত ধুনি জ্বালানো থাকিত, আর তিনি উহার সম্মুখে নয়ন নিমীলিত করিয়া থাকিতেন গভীর ধ্যানে নিমগ্ন। এ সময়ে ধ্যান করিতে করিতে প্রায়ই দর্শন করিতেন একটা ত্রিকোণাকৃতি জ্যোতি। ঠাকুরকে এই দর্শন সম্পর্কে প্রশ্ন করিলে সংক্ষেপে উত্তর দেন, “ওরে, ওটা ব্রহ্মধোনি।”

এক একদিন নরেনের ধূনির ধারে অতীন্দ্রিয় রাজ্যের অগূর্ঘ দর্শন সব ঘটিতে থাকে। চিন্ময়লোকের দেবদেবীরা অনেকে সেখানে আবির্ভূত হন। এই সময়কার সাধনকালে সাধক নরেনের প্রাণে বিরাজিত ছিল অগূর্ঘ শাস্তি ও স্থৈর্য। শক্তির প্রকাশও মাঝে মাঝে দেখা যাইত।

একদিন কালী তপস্বী ( স্বামী অভেদানন্দ ) ও তিনি পাশাপাশি বসিয়া ধ্যান করিতেছেন। হঠাৎ নরেনের ইচ্ছা হইল, কালীকে তিনি স্পর্শ করিবেন। এ ইচ্ছা কার্বে পরিণত করার সঙ্গে সঙ্গে ঘটিল এক চাঞ্চল্যকর কাণ্ড। স্পর্শ করা মাত্রই গুরুভ্রাতার দেহে বৈদ্যাতিক ভেজের মতো এক শক্তি সঞ্চারিত হইয়া গেল, বাহ্যজ্ঞান হারাইয়া দিব্য চেতনায় তিনি আচ্ছন্ন হইয়া পড়িলেন।

সদা সজাগদৃষ্টি জীয়ায়কৃষ্ণ তৎক্ষণাৎ নরেন্দ্রনাথকে ডাকাইলেন।

তাঁহাকে সতর্ক করার জন্ত সহাস্ত্রে কহিলেন,—“কি কচ্ছিস্ রে !  
এ যে দেখছি, না জমাতেই থরচ ?

কাশীপুরে ও দক্ষিণেশ্বরের পঞ্চবটীতে নরেনের সাধন চলিয়াছে ।  
ধীরে ধীরে তিনি ধ্যানলোকের গভীর স্তরে ডুবিয়া যাইতেছেন ।  
এক এক দিন বিচিত্র অনুভূতি ও অপ্রাকৃত দর্শনাদিও হইতেছে ।  
ধ্যানাবস্থার পর একদিন দেখিলেন, তাঁহারই এক অবিকল প্রতিমূর্তি  
চিন্ময় দেহে সন্মুখে আবির্ভূত । এই অপ্রাকৃত মূর্তি প্রায়ই বহুক্ষণ  
ধরিয়া তাঁহার সন্মুখে অবস্থান করিত । তাঁহারই হাবভাব ও কথা-  
বার্তা অনুকরণ করিয়া যাইত । শ্রীরামকৃষ্ণ ইহা শুনিলেন । নরেনকে  
আশ্বস্ত করিয়া বলিলেন, “এতো ধ্যানের উচ্চাবস্থার লক্ষণ রে !”

এই সময়ে একদিন নরেনের মন গোঁতম বুদ্ধের তপশ্চাক্ষেত্র,  
বুদ্ধগয়া দর্শনের জন্ত ব্যাকুল হইয়া উঠে । স্থির করেন, সেখানে গিয়া  
কয়েকদিন সাধনা করিবেন । গুরুভাই তারক ও কালী সহ তিনি  
হঠাৎ একদিন দক্ষিণেশ্বর ত্যাগ করিলেন, কাহাকেও কিছু বলিয়াও  
গেলেন না । ব্যস্ত হইয়া সকলে ঠাকুরকে এ সংবাদ জানাইলেন ।  
স্মিতহাস্তে তিনি উত্তর দিলেন, “তোরা ভাবিস নি, নরেন কোথাও  
যাবে না, তাকে এখানে আসতেই হবে ।—এদিক ওদিক এখন  
যাচ্ছে বটে, কিন্তু এখানে যে রস পেয়েছে সে রস ছেড়ে যাবে  
কোথায় ?”

বুদ্ধগয়ার পবিত্র পরিবেশে ধ্যান করার সময় নরেন এক দিব্য  
অনুভূতি লাভ করেন । কিন্তু তৎসঙ্গেও মন সেখানে টিকে নাই ।  
অল্প কিছুদিন পরেই পরমহংসদেবের জন্ত ব্যাকুল হইয়া নবীন  
সাধকেরা দক্ষিণেশ্বরে ফিরিয়া আসেন ।

ঠাকুরের ভক্ত বুড়োগোপাল নানা তীর্থ দর্শন করিয়া কাশীপুরে  
প্রত্যাবর্তন করিয়াছেন । তাঁহার অভিলাষ এই উপলক্ষে সাধুদিগকে  
ভোজন করান ও কিছু দান করেন । শ্রীরামকৃষ্ণের কাছে এ ইচ্ছা  
ব্যক্ত করিলে বলিয়া উঠিলেন, “কোথায় আর সাধু খুঁজে খুঁজে

বেড়াবি, বলতো ? এই সব ছেলেদের খাইয়ে দে । তাতেই তোর কাজ হবে ।”

নির্দেশ মতো ব্যবস্থাদি করা হইল । প্রত্যেক তরুণ ভক্তকে এই উপলক্ষে ঠাকুর নিজ হাতে একটি করিয়া গৈরিক বস্ত্র, বহির্বাস, মালা ও কমণ্ডলু দান করিলেন । আনুষ্ঠানিক কৃত্যে ঠাকুর সেদিন যান নাই, কিন্তু এই গৈরিক দানের মধ্য দিয়া প্রচ্ছন্নভাবে সূচনা করিলেন তাঁহার গৈরিকধারী সাধক-বাহিনীর ।

সমাধির গভীরে ডুব দিবার জন্ত নরেন এবার ব্যাকুল হইয়া উঠিয়াছেন । নির্বিকল্প সমাধির জন্ত বার বার ঠাকুরকে এসময়ে তিনি ধরিয়া বসেন, উন্মত্ত করিতে থাকেন ।

পরমহংসদেব একদিন আশ্বাস দিলেন, “ওরে আমি ভাল হয়ে উঠলে, তুই যা চাইবি তাই দেব ।”

নরেন্দ্রনাথ তখন পরম প্রাপ্তির আগ্রহে অধীর চঞ্চল । অবুঝ বালকের মতো বলিয়া বসেন, “কিন্তু, আপনি যদি আর ভাল না হন, তবে আমার দশা কি হবে ?”

অক্ষুটস্বরে ঠাকুর মন্তব্য করেন, “শালা বলে কি ?”

দেহী বা বিদেহী যে কোনো অবস্থায়ই থাকুন, ঠাকুর তাঁহার আশ্বাসবাণীকে রূপায়িত করিবেন, এই সহজ প্রত্যয় থাকাই তো নরেনের পক্ষে স্বাভাবিক । নরেনের কথায় ইহার ব্যতিক্রম দেখা গেল । ঠাকুর বুঝিলেন, শিষ্যের ব্যগ্রতা সীমা ছাড়াইয়া যাইতে বসিয়াছে । ধীর প্রশান্তকণ্ঠে জিজ্ঞাসা করিলেন, “আচ্ছা, ঠিক ক’রে বল দেখি তুই কি চাস ?”

নরেন্দ্রনাথ এবার সোৎসাহে বলিয়া উঠিলেন, “আমার ইচ্ছা হয়, শুকদেবের মতো একেবারে পাঁচ ছয় দিন সমাধিতে ডুবে থাকি । তারপর শুধু শরীর রক্ষার জন্ত খানিকটা নিচে নেমে এসে আবার সমাধিতে চলে যাই ।”

স্নানকক্ষ এইবার উত্তেজিত হইয়া উঠিয়া বসেন । তিরস্কারের সুরে নরেনকে বলেন, “ছি ! ছি ! তুই এত বড় আধার তোর

মুখে এই কথা ? আমি ভেবেছিলুম, বটগাছের মতো হবি, তোর ছায়ায় হাজার হাজার লোক আশ্রয় পাবে, তা না হয়ে তুই কিনা নিজের মুক্তি চাস ! এতো তুচ্ছ কথা, অতি হীন কথা রে ! না না অত ছোট নজর করিস্ নি । আমি বাপু সব ভালবাসি—মাছ খাবো তো ভাজাও খাবো, সিদ্ধও খাবো, ঝোল অম্বলও খাবো । তাঁকে সমাধি অবস্থায় নিগূর্ণভাবে উপলব্ধি করি, আবার নানা মূর্তির ভেতর ঐহিক সম্বন্ধের বোধেও ভোগ করি । একঘেয়ে ভাল লাগে না—তুইও তাই কর । একাধারে জ্ঞানী আর ভক্ত দুই-ই হ ।”

কিন্তু এই তিরস্কারের কয়েক দিন পরে পুরস্কারের ব্যবস্থাও ঠাকুর করিয়াছিলেন । নরেন এক রাত্রিতে কালীপুরের নিভৃত কক্ষে বসিয়া ধ্যানমগ্ন । সঙ্গে অপর এক বয়স্ক ভক্তও সাধন নিরত—ইহাকে নরেন গোপালদা বলিয়া ডাকেন । নিবিড় ধ্যানে আবিষ্ট নরেন হঠাৎ এক সময় চীৎকার করিয়া বলিতে থাকেন, “গোপালদা, ও গোপালদা ! আমার শরীর কোথায় গেল ?”

গোপালদা বার বার তাঁহার অঙ্গে করাঘাত করিতেছেন, কিন্তু দেহে চেতনার কোনো লক্ষণই নাই । ক্রমে অগ্নি গুরুভ্রাতারও সেখানে উপস্থিত হইলেন ।

এই সংবাদটি শুনার পর পরমহংসদেবের সংক্ষিপ্ত মন্তব্য হইল, “বেশ হয়েছে, থাক্ খানিকক্ষণ ঐরকম হয়ে । ওরই জন্ত যে আমার আলাতন ক’রে তুলেছিল ।”

গভীর রাত্রে বাহুজ্ঞান ফিরিয়া আসে, নরেন ধীরপদে ঠাকুরের শয্যাপাশে গিয়া উপস্থিত হন । ঠাকুর বলেন, “কেমন, মা তো আজ তোকে সব দেখিয়ে দিলেন । চাবি কিন্তু আমার হাতে রইল । এখন তোকে কাজ করতে হবে—যখন আমার এই কাজ শেষ হয়ে যাবে তখন আবার চাবি খুলবো ।”

নরেন নির্নিমেষে দিব্যালোকের এই ঐশ্বর্যালিকের দিকে চাহিয়া রহিলেন । তারপর অসীম শ্রদ্ধায় শক্তির গুরু চরণে নিবেদন করিলেন তাঁহার প্রণতি, চিরতরে করিলেন আত্মসমর্পণ ।



উত্তরকালে বিবেকানন্দ বলিয়াছিলেন, “সেদিন দেহাদির বুদ্ধি একেবারে তিরোহিত হয়েছিল। প্রায় লয় হয়ে গিয়েছিলুম আর কি। একটু ‘অহং’ ছিল, তাই সেই সমাধি থেকে ফিরেছিলুম। ঐরূপ সমাধিকালেই ‘আমি’ আর ব্রহ্মের ভেদ চলে যায়—সব এক হয়ে যায়। যেন মহাসমুদ্রে জল, জল ছাড়া আর কিছুই নেই। ভাব আর ভাষা সব ফুরিয়ে যায়।”

সমাধি হইতে ব্যুত্থানের পর সেদিন নরেনের মনে হইতেছিল—যেন মস্তক ব্যতীত তাঁহার দেহের আর সমস্ত কিছুই অস্তিত্ব অবলুপ্ত হইয়া গিয়াছে।

ভারতপুত্রই অর্ধবাহ্য অবস্থা আসার সঙ্গে সঙ্গে পার্শ্বে উপবিষ্ট গোপালদাকে ব্যাকুল কণ্ঠে ডাকিয়া উঠিয়াছিলেন।

আর একদিনের কথা। গিরিশ ঘোষের সহিত নরেন এক বৃক্ষতলে ধ্যানে বসিয়াছেন। মশার দংশনে গিরিশচন্দ্র তো অতিষ্ঠ। খানিক বাদেই তিনি আসন ত্যাগ করিলেন। ততক্ষণে নরেন্দ্রনাথ ধ্যানের গভীরে ডুবিয়া গিয়াছেন। শরীরে এত মশা বসিয়াছে যে মনে হয়, দেহখানি কালো কবলে আবৃত। গিরিশ উচ্চ স্বরে নরেনকে ডাকিতে থাকেন, কিন্তু তাঁহার দেহে চেতনার কোনোই লক্ষণ নাই। অবশেষে আসন ধরিয়া তাঁহাকে টানিয়া ফেলা হইল। দেখা গেল, দেহ একেবারে বাহ্যজ্ঞানহীন—মৃতবৎ কঠিন। বহুক্ষণ পরে সেদিন নরেনের জ্ঞান সঞ্চার হয়।

সাধন ভজন ও ধ্যানের মধ্য দিয়া নরেন গুরুকৃপার বহুতর নিদর্শন পাইতেছেন। দিব্য আনন্দে হইতেছেন ভরপুর। এই সঙ্গে মনে তাঁহার জাগিতেছে প্রবল আশঙ্কা। পরম কারুণিক শ্রীরামকৃষ্ণ যে আর বেশীদিন এই মরদেহে থাকিবেন না, এই ছশ্চিন্তা এবার তাঁহাকে পাইয়া বসে।

একদিন মনে এক দৃঢ় সঙ্কল্প করিলেন। কালযোগের কবল হইতে শ্রীরামকৃষ্ণকে উদ্ধার করিতে পারে এমন এক ঐশী শক্তির আশ্রয় তিনি ভিক্ষিত চান। সেদিন সন্ধ্যার পর হইতে সমস্ত

রাত্রি তিনি উন্মাদের মতো ‘রাম’ নাম উচ্চারণ করিতে করিতে বাগানের চারিদিক প্রদক্ষিণ করিতে থাকেন। তাঁহার বাহুজ্ঞান তখন তিরোহিতপ্রায়।

উন্মত্ত অধীর নরেনের ‘রাম রাম’ শব্দ ক্রমশ উচ্চতর হইতেছে। গভীর রাতে ঠাকুরের কানে পশিল এই নামের ধ্বনি। তাঁহার আদেশে অর্ধবাহু অবস্থায় নরেনকে ধরিয়া আনা হইল। স্নেহমধুর কণ্ঠে পরমহংসদেব কহিলেন, “ওরে, কেন তুই এসব ক’রে এত কষ্ট পাচ্ছিস? তোর মতো এমন উন্মত্ত যে আমি বারো বছর ছিলাম! এক রাত্তিরে তুই আর কতটা করবি, বাপু?”

ঠাকুরের দিব্য সান্নিধ্য ও প্রশান্ত মুখচ্ছবি নরেনের হৃদয়ে সান্নিধ্য স্নেহ-প্রলেপ বুলাইয়া দেয়, তিনি শান্ত হন।

দেহত্যাগের কিছুদিন পূর্ব হইতে প্রতি সন্ধ্যায় শ্রীরামকৃষ্ণ নরেনের সহিত নিভৃতে সাক্ষাৎ করিতেন। গুরু-শিষ্যের এই মিলন ছিল বড় রহস্যময়। অপর ভক্তগণ তখন ঠাকুরের নির্দেশে কক্ষ হইতে বাহির হইয়া যাইতেন, আর রুদ্ধদ্বার কক্ষে ঠাকুর ও নরেন্দ্রনাথ দুই তিন ঘণ্টা কাল নিমজ্জিত থাকিতেন অধ্যাত্ম-চেতনার গভীরে।

শেষের দিনটি আসন্ন। ঠাকুর সেদিন নরেনকে আহ্বান করিয়া সম্মুখে বসাইয়াছেন। নিম্পলক দৃষ্টিটি নরেনের দিকে স্থির নিবদ্ধ। ধীরে ধীরে ঠাকুর সমাধিস্থ হইয়া পড়িলেন। নরেনের সত্তার গভীরে তখন চলিয়াছে অবিরাম মন্থন। উপলব্ধি করিতেছেন—শ্রীরামকৃষ্ণের শরীর হইতে তড়িৎ কম্পনের মতো একটা সূক্ষ্ম তেজ-রশ্মি তাহার দেহের ভিতরে সঞ্চালিত হইতেছে।

নরেন ক্রমে বাহুজ্ঞানশূন্য হইয়া পড়েন। চৈতন্য লাভের পর তিনি দেখেন, নীরবে উপবিষ্ট ঠাকুরের চোখে অশ্রুধারা।

“একি রহস্য, কিছুই যে আমি বুঝতে পারছিনে।” প্রশ্ন করেন নরেন্দ্রনাথ।

ঠাকুর ধীর কণ্ঠে কহেন, “ওরে, আজ বশ্যসর্বশ্ব তোকে দিয়ে

ককির হলুম। তুই এই শক্তিতে জগতের অনেক কাজ করবি। কাজ শেষ হলে তারপর কিরে যাবি।”

নরেনের দুই চোখও অশ্রু ছলছল হইয়া উঠিয়াছে। জীবনপ্রভুর দিকে তাকাইয়া অসহায় বালকের মতো তিনি কাঁদিতে লাগিলেন।

ঠাকুরের ময়লীলা সংবরণের দুইদিন পূর্বকায় কথা। ঠাকুর সেদিন ব্যগ্রভাবে নরেনকে নিজের কক্ষে আহ্বান করিলেন। কহিলেন, “তুখ্ নরেন, তোর হাতে আমি এদের সবাইকে দিয়ে যাচ্ছি। তুই সবার চাইতে বুদ্ধিমান, শক্তিশ্বর। এদের ভালবাসা দিয়ে বেঁধে রাখবি। যাতে এরা ঘরে কিরে না গিয়ে সাধনভজন নিয়ে পড়ে থাকে, তার ব্যবস্থা কিন্তু তোকেই করতে হবে।”

নরেন্দ্রনাথ নত মস্তকে স্তব্ধ হইয়া ঠাকুরের নিকটে বসিয়া আছেন। বুঝিলেন, ঠাকুরের দেহত্যাগের দিনটি প্রায় সমাগত। যে ঐশ্বর্যের আভাস ঠাকুর মাঝে মাঝে তাঁহাকে দিতেন, আজ কি তাহাই করিলেন স্পষ্টতর? অনেক কিছুই দায়িত্বভার কি তাঁহাকে দিয়া গেলেন? নরেনের মনে পড়ে, কিছুদিন আগেকার কথা। ঠাকুরের সামনে বসিয়া ডাঃ মহেন্দ্রলাল সরকার নরেনের প্রশংসা করিতেছিলেন। ইহার উত্তরে শ্রীরামকৃষ্ণ সোৎসাহে বলিয়া উঠেন, “ওগো, কথায় বলে অধৈতের হৃদ্যারেই গৌর নদীয়ায় এসেছিলেন—সেই রকম নরেনের জন্তাই তো সব গো। ওর জন্তাই যে এবার আমার আসা।”

ঠাকুর শুইয়া আছেন। দর্শনার্থী ও ভক্তেরা মাঝে মাঝে তাঁহার কক্ষে আসা-যাওয়া করিতেছে। হঠাৎ ঠাকুরের কি খেয়াল হইল, এক টুকরা কাগজ চাহিয়া নিয়া ধীরে ধীরে লিখিলেন—“নরেন লোকশিক্ষা দিবে।”

আধ্যাত্মিক মণ্ডলীর নায়করূপে প্রিয়তম শিষ্যকে তিনি নির্বাচন করিয়া রাখিয়া গেলেন, ভক্তদের মধ্যে এ তথ্যটিই কি তিনি সেদিন জানাইয়া দিলেন? কিন্তু নরেনের অন্তরের সম্মতি ইহাতে মিলিতেছে কই? তিনি বলিয়া উঠেন, “আমি কিন্তু ওসব পারবো না।”

দৃঢ়কণ্ঠে রামকৃষ্ণের আদেশ উচ্চারিত হইল, “তোকে কণ্ঠেই হবে, তোয় ঘাড় করবে।”

১৮৮৬: খ্রীষ্টাব্দের ১৬ই আগস্ট। ঠাকুরের মহাপ্রয়াণের দিন। ভক্তদল চরম মুহূর্তটির কথা চিন্তা করিয়া মুহমান। এই সঙ্কটে নরেন বিষাদখিন্ন হৃদয়ে চুপচাপ বসিয়া আছেন। হঠাৎ মাথায় বিদ্যুৎ-ঝলকের মতো খেলিয়া গেল একটা বড় প্রশ্ন। ঠাকুর তাঁহার ভগবৎ-সত্তা সম্বন্ধে নানা ধরনের ইঙ্গিত এষাবৎ জানাইয়াছেন। কিন্তু মরলীলা অবসানের পূর্ব মুহূর্তে তাঁহার প্রকৃত স্বরূপটি কি স্পষ্টরূপে জানাইয়া যাইবেন না? এই ভক্তদল তাঁহার সহিত নিবিড় যোগসূত্রে আবদ্ধ, শেষের দিনে সেই দেবমানবের পরিচয় তাঁহারই ত্রীমুখে ধ্বনিত হইয়া উঠুক, ইহাই নরেনের অন্তরের আকুল প্রার্থনা।

সর্বজ্ঞ সৎগুরু সমস্তই বুঝিয়াছেন। রোগযন্ত্রণা বিস্মৃত হইয়া তিনি নরেনের দিকে মুখ ফিরাইলেন। অমুচ্চ, তীক্ষ্ণ কণ্ঠে কহিলেন, “ওরে এখনও তোয় জ্ঞান হলো না? সত্যি সত্যি বলছি, যে রাম যে কৃষ্ণ, সে-ই ইদানীং এ শরীরে রামকৃষ্ণ—তবে তোয় বেদান্তের দিক দিয়ে নয়।”

নরেন তো বিস্ময়ে একেবারে হতবাক। ভাবাবেগে তাঁহার নয়ন দুটি অশ্রুসজ্জল হইয়া আসিল।

ঠাকুর রামকৃষ্ণের মুখোচ্চারিত এই কথা কয়টিই উত্তরকালের মহান্ আচার্য, স্বামী বিবেকানন্দকে যোগায় দিব্য প্রেরণা, উজ্জ্বল করে তাঁহাকে বিশ্বব্যাপী কর্মসাধনায়।

ঠাকুর চলিয়া গিয়াছেন। শিষ্যদের তাপিত হৃদয় তখন শুধু মরু প্রান্তরের মতো খাঁ খাঁ করিতেছে। জীবনের পরমাত্মন দূরে সরিয়া গিয়াছে। আশা, আনন্দ ও উৎসাহের লেশমাত্র কাহারো জীবনে অবশিষ্ট নাই।

নরেন ও তাঁহার এক গুরুতাই সেদিন শোকাকুল হৃদয়ে কাশীপুরের বাগানে ঘুরিয়া বেড়াইতেছেন। হৃদয়ে তাঁহাদের প্রচণ্ড

শুভ্রতা। ভাবিতেছেন, ঠাকুর মরদেহ ভ্যাগ করিয়া তাঁহাদের এ কোন নিরালস্য অবস্থায় রাখিয়া গেলেন? এমন সময় অদূরে ভাসিয়া উঠে এক অস্বাভাবিক দৃশ্য? নরেন দেখেন, গুরুদেবের দিব্যদেহ অদূরে দণ্ডায়মান। সর্বশরীর তাঁহার অব্যক্ত আনন্দে শিহরিয়া উঠে। তবে কি মহাপ্রয়াণের পরেও ঠাকুর তাঁহার ভক্তদের উপর পূর্ববৎ কৃপাদৃষ্টি রাখিতেছেন! চিন্ময় দেহে আবির্ভূত হইয়া দিতেছেন পরম আশ্বাস।

হৃদয়ের চাঞ্চল্য দমন করিয়া নরেন মৌন হইয়া আছেন। মনে আশঙ্কাও কম নাই। ওই অলৌকিক দর্শন তাঁহার নিজের দুর্বল মনের ভ্রাস্তি নয় তো?

সর্ব সন্দেহের নিরসন করিয়া সঙ্গীয় গুরুতাই এবার চীৎকার করিয়া উঠেন, “নরেন, ঐ জ্বাখো, ঐ জ্বাখো!”

জ্যোতির্ময় দেহে ঠাকুরের এই আবির্ভাব! অধ্যাত্ম-সন্তানদের এ আবির্ভাবের মধ্য দিয়া বুঝাইয়া দিলেন—শিষ্যেরা যেমন আছেন, তেমনি আছেন তাঁহাদের সদগুরু। আনন্দে অধীর হইয়া উচ্চকণ্ঠে তাঁহারা অপর গুরুতাইদের ডাকিতে লাগিলেন। ঠাকুরের অলৌকিক মূর্তি ততক্ষণে অন্তর্হিত হইয়া গিয়াছে।

শ্রীরামকৃষ্ণের তিরোধানের পর কাশীপুরের বাগান ছাড়িয়া দেওয়া হইয়াছে। কিন্তু এবার তরুণ সন্ন্যাসীদের মাথা গুঁজিবার ঠাই হইবে কোথায়?

ঠাকুরের পরমভক্ত সুরেন মিত্র এ দ্বঃসময়ে আগাইয়া আসেন। কহেন, “একটা বাড়ি ভাড়া ক’রে একত্রে থাকো, ঠাকুরের স্মৃতি বৃকে নিয়ে সাধনভজন করো। এর মাসিক ভাড়া আমি চালিয়ে যাবো।” নরেন প্রভৃতি যুবক-ভক্তেরা হাঁক ছাড়িয়া বাঁচেন।

বরাহনগরে গঙ্গার ধারে বৎসামাগু ভাড়ায় একটি বাড়ি নেওয়া হয়। অঙ্গলাকীর্ণ বাড়িটি পুরাতন এবং দীর্ঘদিন মনুষ্য পরিভ্রাজ্য। ইহাই বরাহনগরের মঠ।

এইবার নরেন্দ্রনাথের নেতৃত্বের পালা। ভক্তদের কেহ কেহ তখন পরীক্ষার পড়া তৈরির জন্ত স্বগৃহে বাস করিতেছিলেন। নরেন এক একদিন ঝড়ের মতো তাঁহাদের উপর নিপতিত হন, তেজোদৃশ্য কণ্ঠে বলেন, “তোরা এই অমূল্য জীবনটা কি একজামিন দিয়েই কাটাবি, ঠিক করেছিস? এই কি ঠাকুরের উপদেশ পালন করা? এ জন্তই তিনি জগতে এসে এত কষ্ট ক’রে গেলেন? তোরা সন্ন্যাসী, ত্যাগমস্ত্রে দীক্ষিত—তবু একজামিন পাস ক’রে সংসারের উন্নতি কামনা করিস? ত্যাগ আর ভোগ-বাসনা কি এক সঙ্গে থাকতে পারে? ধিক্ ধিক্ তোদের! শিগগীর ও সব ছেড়ে-ছুড়ে দিয়ে মঠে চল।”

নরেনের সাহস, প্রেরণা ও বৈরাগ্যের আহ্বান তরুণদলকে প্রভাবিত করে। একে একে তাঁহারা মঠে যোগ দিতে থাকেন। ইতস্তত বিক্ষিপ্ত এই ভক্তদল নিয়া যে নবগঠিত সম্মত আত্মপ্রকাশ করে, নরেন হন তাহার অধিনায়ক।

এই গুরুভ্রাতাগণ অতি সহজেই নরেনের হাতে আত্মসম্মর্পণ করিতে পারিয়াছিল। কারণ, তাঁহারা মনেপ্রাণে বিশ্বাস করিত—নরেন ঠাকুরেরই প্রতিনিধি, তাঁহার নেতৃত্ব মানিয়া চলা, তাঁহাকে আনুগত্য দেওয়া মানেই ঠাকুরের সম্ভ্রান্তি বিধান করা।

ঈশ্বর দর্শনের জন্ত ব্যাকুল ভক্তদল এবার ঘর ছাড়িয়া বাহির হইয়াছেন। একান্ত নিষ্ঠায়, দুশ্চর সাধন-পথ অতিক্রম করিতে তাঁহারা কৃতসঙ্কল্প। এই পথের কোনো বাধা কোনো দুঃখদহনই তাঁহারা আমল দিতে চায় না।

বিবেকানন্দ উত্তরকালে বলিতেন, “বরাহনগরে এমন কত দিন গিয়েছে যে খাবার কিছুই নেই, ভাত জোটে তো হুন জোটে না। দিন কয়েক হয়তো হুন-ভাত চললো, কিন্তু কারুরই গ্রাহ্য নাই। জপ-ধ্যানের প্রবল ভোড়ে তখন আমরা ভাসছি। কখন কখন শুধু ভেলাকুচো পাতাসিদ্ধ ও হুন-ভাত—এই মাসাবধি চলছে। আহা, সেসব কি দিনই গেছে! সে দিনের কঠোরতা দেখলে ভূত পালিয়ে যেত।”

কোপীন-সম্বল এই ভক্তদের একযোগে ঘরের বাহিরে যাইবারও উপায় ছিল না। দেওয়ালে একথানা মাত্র কাপড় টাঙানো থাকিত, যে যখন মঠবাড়ির বাহিরে যাইত, এই কাপড়খানিই থাকিত তাহার কোমরে জড়ানো।

এই চরম ছরবস্ত্রার মধ্যেই কিন্তু তাঁহাদের ধর্মালোচনার বা দর্শনের কুটতর্কের বিরাম ছিল না। কঠোর সাধনার রাত্রির পর রাত্রি অতিবাহিত হইয়া যাইত। তপস্তার অগ্নিতে প্রদীপ্ত এক এক জনের চক্ষু হইতে যেন অগ্নি বর্ষিত হইত। মঠে দেখা করিতে গিয়া ঈশ্বরোন্মাদ এই তরুণদল ও তাঁহাদের দলপতিকে দেখিয়া সকলের বিশ্বয়ের সীমা থাকিত না।

এই সময়ে এক একদিন রামকৃষ্ণের স্মৃতিতে উদ্দীপিত হইয়া নরেন কহিতেন, “সত্যের প্রচার কার্যে অনেকেই ব্যস্ত হয় কিন্তু তারা না জেনেই তা করে। আমি সেটা জেনে—তারপর করবো।”

৪.

ইহার অব্যবহিত পরেই নরেনের জীবনে দেখা যায় এক নূতন অধ্যায়ের সূত্রপাত। সারা ভারত পর্যটন ও তীর্থ পরিক্রমার তীব্র আকাজক্ষা তাঁহাকে পাইয়া বসে। পরিধানে গৈরিকবাস, হস্তে দণ্ড কমণ্ডলু, দিব্যকাস্তি সন্ন্যাসী সেদিন মঠের বাহির হইয়া পড়েন। কখনো ‘নারায়ণ হরি’ বলিয়া গৃহস্থদের দ্বারে ভিক্ষার জন্ত দাঁড়ান, কখনো বা করেন আকাশবৃষ্টি। অভিজ্ঞতা ও অনুভূতির বৈচিত্র্যে এই পরিব্রাজন ভরপুর হইয়া উঠে।

সে-বার নরেন্দ্রনাথ বৃন্দাবনের পথে চলিয়াছেন। ক্ষুৎপিপাসা ও পরিশ্রমে দেহ অবসন্ন। পথপার্শ্বে বসিয়া এক দরিদ্র, নীচ জাতীয় ব্যক্তি ধূমপান করিতেছে। নরেন তাহার নিকট কলিকাটি চাহিলে সে ব্যস্তসমস্ত হইয়া বলিল, “মহারাজ, ম্যায় ভাজী হঁ।”

উত্তর শুনিয়া সন্ন্যাসীবর নিরস্ত হন, কিন্তু কিছুদূর গিয়াই তাবিতে থাকেন, ‘নাঃ এতো ঠিক নয়। ঠাকুরের এত আশীর্বাদ, অষ্টভ-বাদে এর এত বিচার-বিবেচনা—তার পরও দেখছি আমার ভেদজ্ঞান

তিরোহিত হয় নি? জাতিভেদের সংস্কার যে মনের অন্তস্তলে আজও তেমনি উদগ্র হয়ে আছে।' তৎক্ষণাৎ তিনি কিরিয়া আসেন। সেই মেথরের হাত হইতে কলিকাটি টানিয়া নিয়া ধূমপান করেন। তারপর তাঁহার হৃদয় শান্ত হয়।

স্বামীজী বৃন্দাবনে আসিয়াছেন। রাধাকৃষ্ণের তীরে কোঁপীনটি রাখিয়া উলঙ্গ হইয়া তিনি স্নানে নামিলেন। জল হইতে উঠিয়া দেখেন, একটি বানর এটি টানিয়া নিয়া দূরে পলাইয়া গেল। বহু চেষ্টার পর ইহা পুনরুদ্ধার করা গেল বটে, কিন্তু তখন কোঁপীনটি একেবারে ছিন্নভিন্ন। লজ্জা নিবারণের কোনোই উপায় নাই। বড় অভিমান জাগে এবার স্বামীজীর মনে। কুণ্ডেশ্বরী রাধা-রাগীর নিকট সঙ্কল্প জানান, লোকালয়ে আর না আসিয়া বনাঞ্চলেই তিনি বাস করিবেন। দেখা যাক তাঁহার জ্ঞান কোনো সুব্যবস্থা হয় কিনা।

অরণ্যে প্রবেশ করা মাত্র ঘটে এক অদ্ভুত কাণ্ড। স্বামীজী দেখেন—এক ব্যক্তি তাঁহাকে পিছন দিক হইতে ডাকিতেছে, ছুটিয়া আসিতেছে দ্রুতবেগে। উলঙ্গ স্বামীজীও ধাবিত হইয়াছেন সম্মুখের দিকে। কিছুক্ষণ পরে কোনোক্রমে নিকটস্থ হইয়া হাঁপাইতে হাঁপাইতে লোকটি নিবেদন করিল, “মহারাজ, এই বনের পাশেই আমার ঘর। কৃপা ক’রে আপনি সেখানে পদার্পণ করুন, আপনাকে নববস্ত্র ও ভোজ্য নিবেদন ক’রে আমরা কৃতার্থ হই।”

বলা বাহুল্য স্বামীজী সানন্দে স্বীকৃত হইলেন, ভোজন ও নববস্ত্র পরিধানের পর বাহির হইলেন লোকালয়ে।

আর একবার গাজীপুরের অপর পারে তিনি এক স্টেশনে বসিয়া আছেন। পঞ্চাশ্রমে ও ক্ষুধাতৃষ্ণায় বড় কাতর, দেহভার আর যেন বহিতে পারিতেছেন না। নিকটস্থ বৃক্ষছায়ায় বসিয়া এক শেঠজী সোৎসাহে প্রচুর পুরী-কচুরী-হালুয়া উদয়স্থ করিতেছে। ভোজন শেষে লোকটি বিক্রপ গুরু করে, সংসার-ত্যাগী মহারাজ কপর্দকহীন, আর তাহার মতো সংসারীরা খাইয়া-দাইয়া কেমন পরম সুখে দিনযাপন করিতেছে।



হঠাৎ কিন্তু এক বিস্ময়কর কাণ্ড ঘটিল। এক ব্যক্তি দ্রুতব্যস্তে পুঁটলীতে বাঁধিয়া কিছু মিষ্টজব্য ও এক কুঁজো জল নিয়া স্বামীজীর সম্মুখে উপস্থিত। সম্ভ্রান্তভাবে খাতাদি নিবেদন করিয়া সে তৎক্ষণাৎ তামাক সাজিতে বসিয়া যায়। স্বামীজীর প্রশ্নের উত্তরে জানায়, নিকটেই তাহার একটি খাবারের দোকান রহিয়াছে—জাতিতে সে হালুইকর। আজই প্রত্যুষে সে দেখে এক বিচিত্র স্বপ্ন। এক সন্ন্যাসীবাবা তাঁহাকে কহিতেছেন—স্টেশনের একপ্রান্তে এক সাধু অনাহারে রহিয়াছেন অবিলম্বে সে যেন তাঁহার সেবা নির্বাহ করে। প্রথমবারের স্বপ্ন-দর্শনকে হালুইকর তেমন গুরুত্ব দেয় নাই। তারপর শয্যায় শুইয়া আরও দুইবার সে একই রকমের স্বপ্নাদেশ পায়। তাই এমন ব্যস্তসমস্ত হইয়া ছুটিয়া আসিয়াছে।

স্বামীজীর দুই চোখ অশ্রুসজল হইয়া উঠে। পরমাশ্রয়দাতা ঠাকুরের কৃপার ধারা মরজগতের পরপার হইতেও তাঁহার জন্ত এমনভাবে বহিয়া আসিতেছে।

গাজীপুরে উপনীত হইয়া স্বামীজী পওহারীবাবার সান্নিধ্যে আসেন। সিদ্ধপুরুষ বলিয়া এ অঞ্চলে তাঁহার খুব প্রসিদ্ধি। তা ছাড়া, পওহারীবাবার গুহায় শ্রীরামকৃষ্ণের একখানি ছবি টাঙানো রহিয়াছে দেখিয়া তিনি এই সাধুর প্রতি আকৃষ্ট হইলেন।

স্বামীজী এই সময়ে অজীর্ণ ও কোমরের বাতরোগে ভুগিতে ছিলেন। ভাবিলেন, পওহারীবাবার নিকট হঠাৎ যোগ ও রাজযোগের শিক্ষা কিছুটা গ্রহণ করিলে ক্ষতি কি ?

তাছাড়া এই মহাত্মার কাছে দীক্ষা নিবেন বলিয়াও তিনি স্থির করিলেন। পওহারীবাবা সানন্দে তাঁহার সম্মতি জ্ঞাপন করিলেন এবং অনুষ্ঠানের দিনক্ষণও স্থির হইয়া গেল।

দীক্ষার পূর্বদিন রাত্রে কিন্তু এক বিচিত্র ব্যাপার ঘটে। স্বামী বিবেকানন্দের অধ্যাত্মজীবনে এ ঘটনাটির গুরুত্ব অপরিণীত।

স্বামীজী শয্যায় শয়ন করিয়া আছেন। অকস্মাৎ লক্ষ্য করিলেন, তাঁহার কক্ষটি দিব্যালোকের শুভ্র জ্যোতিতে উদ্ভাসিত হইয়া উঠিয়াছে,

আর উহার মধ্যে কুটিয়া উঠিয়াছে শ্রীরামকৃষ্ণের মূর্তি। ঠাকুরের কারুণ্যভরা নয়ন দুইটি স্বামীজীর দিকে নিবন্ধ, অপরিমেয় স্নেহ মমতা উহা হইতে ঝরিয়া পড়িতেছে।

গুরুদেবের এই অলৌকিক আবির্ভাব সেদিন তাঁহার সমগ্র সন্তায় জাগাইয়া তোলে প্রচণ্ড আলোড়ন। তাছাড়া, আত্মগ্লানির আগুনেও হৃদয় জ্বলিতে থাকে। এ তিনি কি করিতে যাইতেছেন? ঠাকুরের প্রতি যে অচলা ভক্তি, যে আত্মসমর্পণ এতকাল ছিল তাহা কি লোপ পাইয়াছে? তিনি কি গুরুদেবের অবিশ্বাসী শিষ্য? উদ্বেজনার তাঁহার শরীর কম্পিত ও ঘর্মাক্ত হইয়া উঠে। তারপর স্বামীজী উচ্চ স্বরে স্বগতোক্তি করিয়া উঠেন, “না, না, কখনোই তা হবে না। শ্রীরামকৃষ্ণ ব্যতীত আর কেউ এ হৃদয়ে ঠাঁই পাবে না। প্রভু, এ দাস যে চিরদিন তোমারই চরণে বিক্রীত। জয় রামকৃষ্ণ!”

ইহার পরেও কয়েকদিন ধরিয়া ঠাকুরের দর্শন তিনি প্রাপ্ত হন। সবিশ্রমে ভাবিতে থাকেন, সত্যিই তো, বিদেহী রামকৃষ্ণের সদাজাগ্রত চক্ষু দুইটি আজিও তাঁহার প্রিয় শিষ্যের সতর্ক প্রহরায় নিযুক্ত! স্বামীজী শিহরিয়া উঠেন, ঠাকুরের করুণার স্বরূপ উপলব্ধি করিয়া দুই নয়নে ঝরিতে থাকে পুলকাক্ষ।

ইহার পর নৈনিতালের নিকটে, হিমালয় ক্রোড়ে স্বামীজীর এক দুর্লভ অধ্যাত্ম-অনুভূতি লাভ হয়। সঙ্গী গঙ্গাধর মহারাজকে ডাকিয়া সেদিন তিনি আনন্দোচ্ছল হৃদয়ে বলিয়াছিলেন, “গঙ্গাধর, আজ এই অশ্বখবৃক্ষের তলে আমার জীবনের এক অমূল্য রূপ উপস্থিত হয়েছিল। এর ফলে আমার জীবনের একটা প্রধান সমস্যার সমাধান হয়ে গিয়েছে।”

তখনকার দিনলিপিতে স্বামীজী তাঁহার নিগূঢ় সাধন-অনুভূতির কথা লিখিয়াছিলেন—“আমি আজ ক্ষুদ্র দেহপিণ্ড আর বিরাট মহা-সৃষ্টির একাত্মকতা অনুভব করেছি। বিশ্বের যা কিছু সব এই ক্ষুদ্র দেহমধ্যেই রয়েছে। উপলব্ধি করলাম, প্রতি পরমাণুর মধ্যেই বিশ্ব-সংসার রয়েছে বিরাজমান।”

হৃষিকেশের বিখ্যাত বেদান্তী সাধু ধনরাজগিরির আশ্রমে স্বামীজী কিছুদিন ছিলেন। কয়েকজন গুরুভ্রাতাও এই সময় তাঁহার সঙ্গে থাকিতেন। হিমালয়ে বসিয়া কঠোর তপস্যায় কিছুদিন কাটাইবেন বলিয়া স্বামীজী মনে মনে স্থির করিয়াছেন। কিন্তু কোথা হইতে এক আকস্মিক ছুঁদৈব আসিয়া উপস্থিত হয়, তিনি এক দৃষ্টিকিংশত ধরনের জ্বরে আক্রান্ত হন। একদিন অবস্থা নিতান্ত সঙ্কটাপন্ন হইয়া পড়ে। দেখা যায়, সর্বশরীর হিম হইয়াছে, নাড়ীর গতি স্তব্ধপ্রায়। অন্তিমকাল উপস্থিত জানিয়া গুরুভ্রাতারা শোকে মুহমান, কেহ কেহ ইষ্টনামও স্মরণ করিতেছেন।

হঠাৎ তাঁহার কুটিরদ্বারে আসিয়া দাঁড়ান জটা-জুটমণ্ডিত এক বৃদ্ধ সাধু। তরুণ সন্ন্যাসীদের এই সঙ্কটের কথা শুনিয়া তাঁহার হৃদয় বিগলিত হয়। গৃহমধ্যে ঢুকিয়া মৃতকল্প স্বামীজীকে তিনি কিছুটা মধু ও পিপুল চূর্ণ খাওয়াইয়া দিলেন। অতি সাধারণ একটি ওষুধ কিন্তু তাঁহার ক্রিয়া যেন অমোঘ মন্ত্রৌষধির মতো। রোগী ধীরে ধীরে চক্ষু মেলিয়া চাহিলেন। ইতিমধ্যে বৃদ্ধ সাধুটি পাহাড়িয়া পথে নামিয়া কোথায় অদৃশ্য হইয়া গিয়াছেন। সুস্থ হইয়া উঠিয়া স্বামীজী গুরুভাইদের কাছে ডাকিলেন, কহিলেন, “বাহুজ্ঞানহীন অবস্থায় পড়ে থাকবার সময় কি দেখেছিলাম জানিস? দেখলাম, আমি যেন জগতে বিধাতার এক বৃহৎ কাজের ভার নিয়ে এসেছি। সে ঐশ কাজ যতদিন শেষ না হবে, আমার যেন বিশ্রাম নেই—শাস্তি নাই।”

এখন হইতে গুরুভাইরা স্বামীজীর জীবনে এক উল্লেখযোগ্য পরিবর্তন লক্ষ্য করেন। তাঁহার কর্মজীবনে আসে নূতনতর উৎসাহ, প্রাণচাঞ্চল্য ও উদ্দীপনা, আর অধ্যাত্মজীবন হইয়া উঠে আত্মবিশ্বাসে ভরপুর। স্বামীজী ও তাঁর গুরুভাইরা স্পষ্টতই বুঝিতে পারিলেন, মৃত্যুর দ্বারে গিয়াও নয়েন এক অদৃশ্য কল্যাণময় শক্তির ইঙ্গিতে কিরিয়া আসিলেন। ঐ বৃদ্ধ সন্ন্যাসী ছিলেন সেই অদৃশ্য নিরস্তা-শক্তিরই দূত। স্বামীজীর জীবনে ঐ ঘটনাটির মধ্য দিয়া এক নূতন পরিবর্তন ঘটিয়া গেল।

ইহার পর হইতে স্বামীজী একাকী সমগ্র ভারত পরিভ্রাজন করিতে থাকেন। ১৮৯১ খ্রীষ্টাব্দ হইতে শুরু করিয়া কয়েক বৎসর তিনি গুরুভ্রাতাদের হইতে নিজেকে বিচ্ছিন্ন করিয়া নেন, নিঃসঙ্গ জীবন যাপন করিতে থাকেন। এই সময়ে তাঁহাকে বলিতে শুনা যাইত, “গুরুভাইদের মায়াও মায়া বরং তা আরও প্রবল। এ মায়ার পাকে পড়িলে সাধনার পথে বিঘ্ন ঘটে। আমি আর কোনো মায়ার বেড়া-ই রাখতে চাইনে।”

ত্যাগী দণ্ডী সন্ন্যাসীর বেশে স্বামীজী ভারতবর্ষের দিক্‌দিগন্তে ঘুরিয়া বেড়ান। এ দেশের অগণিত পল্লী ও জনপদে—ভাঙ্গী, দোসাদ ও দিনমজুরের গৃহে হইতে নৃপতির রাজপ্রাসাদে, ভারত-আত্মার সন্ধানে তাঁহার এই অভিযান! ভারতের মুক্তিকার বৃকে কান পাতিয়া শুনিলেন তাঁর হৃদস্পন্দন, ভারতের লক্ষ লক্ষ মানুষের চোখে মুখে রূপায়িত দেখিলেন পরমাত্মার ছায়া। অদ্বৈতবাদী সন্ন্যাসীর মুক্তির সংগীতে আসিল নূতন স্পন্দন, নূতন গতিবেগ।

এই ভারত পরিক্রমা স্বামীজীর অধ্যাত্মজীবনের এক বড় প্রস্তুতি। বেদান্তবাদের নব প্রচারক, সন্ন্যাসী-সৈনিক বিবেকানন্দের যোদ্ধা-জীবনের পাথেয় এই সময়েই সঞ্চিত হইয়া উঠে।

আলোয়ার, খেতড়ি, পোরবন্দর, রামনাদ প্রভৃতি রাজাদের শ্রদ্ধা ও আনুগত্য তিনি এই সময়ে প্রাপ্ত হন। এই নিস্পৃহ, তেজস্বী সন্ন্যাসীর পদপ্রান্তে এই রাজগৃহের শির সেদিন লুটাইয়া পড়ে।

স্বামীজী সে সময়ে খেতড়ির মহারাজের সন্মানীয় অতিথি। একদিন মহারাজার জয়পুরস্থিত রাজ-উদ্যানে বসিয়া নানা ধর্মকথা হইতেছে। এমন সময় এক স্নকণ্ঠী বার্তাজীকে আহ্বান করিয়া আনা হইল, রাজ-অতিথির সম্মুখে সে ভজন সংগীত গাহিবে।

স্বামীজী কিন্তু এই রমণীকে দেখিয়াই স্থান ত্যাগের জন্ত উঠিয়া দাঁড়ান। তরুণী সংগীত-ব্যবসায়িনীর সম্মুখে বসিয়া গান শুনিতে তাঁহার সংস্কারে বাধিল। খেতড়ির নৃপতি সাহসনয়ে বলেন, “স্বামীজী, ভা. সা. (৮)-১০

এ কিন্তু চমৎকার ভজন গায়, এর গান শুনে অনেকেই মুগ্ধ হয়েছেন ।  
আপনি দয়া ক'রে একটু শুনুন ।”

ঐ নারীর কণ্ঠে বৈষ্ণব-সাধক সুরদাসের প্রার্থনা ঝঙ্কত হইয়া উঠে—

প্রভু মেরা অণুগুণ চিত না ধরো,  
সমদরশী ছায় নাম তুমহারো ।  
এক লোহা পূজামে রহত ছায় ।  
এক রহে ব্যাধ ঘর পর  
পরশকে মন দিখা নাহি হোয়  
ছ'ছ এক কাঞ্চন করো ।

সুর-মুছ'না বার বার ঘুরিয়া ফিরিয়া একই তত্ত্বকে উদ্ঘাটিত করিতে চাহিতেছে আর বলিতেছে—“অজ্ঞানোসে ভেদ ছায়, জ্ঞানী কাহে ভেদ করো !”

স্বামীজী উচ্চকিত হইয়া উঠেন ! মুহূর্তে চক্ষুর সম্মুখ হইতে একটি পর্দা সরিয়া যায় । সংস্কার হয় বিদূরিত । সত্যিই তো ! সমদর্শী তিনি কায়মনোবাক্যে হইতে পারেন নাই । ভেদবুদ্ধি ও সংস্কারের মূল অন্তস্তল হইতে উৎপাটিত আজিও হয় নাই । সর্বভূতে ব্রহ্মানুভূতির জন্ম, পরম উপলব্ধির জন্ম, তপস্যা শুরু করিয়াছেন । কিন্তু সে তপস্যার মূলেই যে আপন ভেদবুদ্ধি দিয়া কুঠারাঘাত হানিয়া বসিয়াছেন । এই বাগ্জীর ভজন গানের মধ্য দিয়া তাই কি ঠাকুর তাঁহার জীবনে অভেদজ্ঞানের সাড়া নূতন করিয়া আজ জাগাইয়া তুলিলেন ?

তখন গায়িকা নারীর কাছে অগ্রসর হইয়া কহিলেন, “মা, আমি তোমার নিকট ঘোর অপরাধ করেছি । তোমাকে ঘৃণা ক'রে আমি এস্থান ত্যাগ করতে চেয়েছিলাম । কিন্তু তোমার এই গানের মধ্য দিয়ে তুমি আমার চৈতন্যকে জাগ্রত করেছো ।”

দেশীয় রাজ-রাজড়া ও অমাত্য যখনই যিনি স্বামীজীর দর্শনে

আসিতেন, তিনি তাঁহার সম্মুখে নিজের নবাবিষ্কৃত ভারতকেই তুলিয়া ধরিতেন। স্বদেশের পরিচয় তাঁহার নিকট দুইরূপে পরিষ্কৃত হয়। একটি তাহার শাস্ত্ররূপ—প্রাচীন ঐতিহ্য ও আধ্যাত্মিক সম্পদের গরিমায় ভাস্বর। আর একটি তাহার বর্তমানের রূপ—যাহা দারিদ্র্য, কুসংস্কার ও নিপীড়িত আত্মার হাহাকারে ভরা।

ভারতের আত্মিক পরিচয়ের মধ্য দিয়াই দেশাত্মবোধ ও আত্ম-মর্যাদাকে জাগাইয়া তুলিতে হইবে, ঋষিদের শিক্ষাদীক্ষার পুনঃপ্রবর্তন করিতে হইবে, দেশীয় রাজসভাগুলির নিকট ইহাই ছিল তাঁহার বক্তব্যের নির্ধার। আরো কহিতেন, “ধর্ম ভারতের বর্তমান হৃদশার কারণ নয়, ধর্মের অভাবই দায়ী এই এই হৃদশার জন্ত। ধর্মের শক্তি তখনই বাড়ে যখন তা মানুষের কর্মজীবনে হয় রূপায়িত।”

দেশীয় রাজাদের অনেকে তাঁহাকে শ্রদ্ধাভক্তি দেখাইয়াছেন কেহ কেহ গুরুজ্ঞানে পদসেবাও করিয়াছেন। কিন্তু কখনো এই রাজসেবার আকর্ষণ বা মোহে তিনি পড়েন নাই। এই তেজস্বী অপ্রতিগ্রাহী রাজ-সম্মানসীর পদে রাজাদের শির বার বার লুপ্তিত হইয়াছে, তাঁহার অকুতোভয়তা ও বৈরাগ্য দর্শনে তাঁহারা বিস্মিত হইয়াছেন।

একবার মহীশূররাজ স্বামীজীকে একটি উপহার গ্রহণের জন্ত পীড়াপীড়ি করিতে থাকেন। সম্মানসীকে মূল্যবান দ্রব্য গ্রহণ করিতে নাই বলিয়া স্বামীজী এড়াইতে চান, কিন্তু মহারাজও ছাড়িবেন না। অগত্যা স্বামীজী সকলকে বিস্মিত করিয়া সামান্য একটি হুঁকা চাহিয়া বসিলেন। শর্ত থাকিল—উহাতে কোনো ধাতুর সংশ্রব থাকিবে না। মহারাজ অবিলম্বে দেশীয় শিল্পীদের কারুকার্যে খচিত একটি সুদৃশ্য হুঁকা তাঁহাকে উপহার দিলেন। মাত্রাজে পৌঁছিবার পরই কিন্তু এই হুঁকায় সদগতি হইয়া গেল। এক ভদ্রলোকের বাড়িতে স্বামীজী আশ্রয় নিয়াছেন। লক্ষ্য করিলেন, তাঁহার পাচক ব্রাহ্মণ এই হুঁকাটির দিকে বার বার লুপ্ত দৃষ্টিতে তাকাইতেছে। স্বামীজী এই হুঁকাটি উৎকণ্ঠাং তাহাকে দিয়া দিলেন। মহারাজের উপহারের মূল্য তাঁহার নিকট যেন এক কানাকড়িও নয়।

গুজরাটের পোরবন্দর রাজসভায় স্বামীজী উপস্থিত হইয়াছেন। শঙ্কর পাণ্ডুরাং সেখানকার এক প্রখ্যাত পণ্ডিত। তিনি তখন বেদের অনুবাদ করিতেছিলেন। স্বামীজী নয় মাস কাল সেখানে থাকিয়া তাঁহার কাজের সহায়তা করেন এবং বেদ এবং পতঞ্জলির মহাভাষ্য এই সময়েই পাণ্ডুরাং-এর সাহায্যে তিনি আয়ত্ত করিয়া নেন।

নবীন সন্ন্যাসীর অপূর্ব শক্তির পরিচয় পাইয়া পণ্ডিতশিরোমণি পাণ্ডুরাং বলিয়াছিলেন, “স্বামীজী, আমার মতে আপনার মনীষা ও প্রতিভার উপযুক্ত মর্যাদা শুধু পাশ্চাত্য দেশেই হতে পারে। আপনি সেখানে আমাদের সনাতন সভ্যতার তত্ত্ব ব্যাখ্যা করুন। পাশ্চাত্য ও প্রাচ্য উভয় দেশেরই কল্যাণ হবে।”

পাশ্চাত্য দেশ পর্বটনের চিন্তা বীজাকারে স্বামীজীর অন্তরে এই সময় হইতেই প্রবেশ করে।

ঠাকুর রামকৃষ্ণের বাণী—জীবরূপী শিবের সেবা—বার বার তাঁহার মনে পড়ে। ভাবেন, মাতৃভূমি ভারতের কোটি কোটি নিরন্ন শিক্ষা-দীক্ষাহীন মানুষকে অন্ন যোগাইতে হইবে—আধ্যাত্মিক চেতনায় তাহাদিগকে স্বপ্রতিষ্ঠ করিতে হইবে। কিন্তু তার আগে প্রয়োজন জনগণের দারিদ্র্য ও তামসিকতা দূর করা।

কিন্তু সে উদ্দেশ্য সফল করিবার উপকরণ কই? মনে তার দৃঢ় প্রতীতি জন্মিল—পাশ্চাত্যদেশে যাওয়া ছাড়া আর উপায় নাই। ভোগসর্বস্ব, উদ্ভ্রান্ত জড়বাদের কেন্দ্রে তিনি ভারতের অধ্যাত্মবাণী প্রচার করিবেন আর ইহার পরিবর্তে আনিবেন সে দেশের সাহায্য, বাহা দ্বারা এ দেশ হইবে সমৃদ্ধতর।

ঐশ নির্দিষ্ট ব্রতের জন্ম ত্রীরামকৃষ্ণ তাঁহাকে চিহ্নিত করিয়া গিয়াছিলেন। তাহারই উজোগপর্ব যেন এই সময়ে অনুষ্ঠিত হইতে দেখিতেছি। এই সময়ে গুরুভাই অভেদানন্দজীর সহিত বোম্বাইতে স্বামীজীর সাক্ষাৎ হয়। স্বামীজীর অন্তরলোকের প্রস্তুতির কথাটি স্বামী অভেদানন্দ বর্ণনা করিয়াছেন—“এই সময়ে স্বামীজীর হৃদয়টি যেন অগ্নিকুণ্ডের মতো হইয়াছিল। আর কোনো চিন্তা নাই। কেবল

কি করিয়া ভারতের প্রাচীন আধ্যাত্মিকতার পুনঃপ্রতিষ্ঠা করা যায়—  
অহর্নিশ তাহাই ভাবিতেন।...স্বামীজীকে তখন দেখিলে মনে হইত  
যেন একটা প্রচণ্ড ঝঞ্ঝাবাত। আমাকে তিনি একদিন বলিয়াছিলেন—  
ছাখ্ কালী, আমার ভেতর এমন একটা শক্তি জমেছে যে, ভয় হয়  
পাছে ফেটে বাই।”

এই সময়ে মাদ্রাজে স্বামীজীর প্রকাণ্ড এক ভক্তদল জুটিয়া গেল।  
ইহাদের উৎসাহে ও নিজ অন্তরের প্রেরণায় তিনি পাশ্চাত্য দেশে  
ধর্মপ্রচারে যাওয়ার সিদ্ধান্ত স্থির করিলেন। সিকাগোতে বিশ্বধর্ম-  
সম্মেলন অনুষ্ঠিত হইবে। সেখানে তাঁহাকে প্রেরণের জন্ত সকলেই  
অত্যন্ত ব্যগ্র।

স্বামীজীর ভক্ত আলাসিঙ্গা পেরুমল প্রভৃতির চেষ্টায় জনসাধারণ  
হইতে চাঁদাও কিছু উঠিল। মাদ্রাজী শিষ্যদের কাছে স্বামীজী  
নিজের অভিপ্রায় স্পষ্টভাবেই ব্যক্ত করিলেন,—“এখন হিন্দুধর্মকে  
জগৎবাসীর কাছে প্রচার করার সময় এসে গিয়েছে। ঋষিদের  
এই মহান্ ধর্মকে আর সঙ্কীর্ণ বেঠনীর মধ্যে আবদ্ধ ক’রে রাখলে  
চলবে না, জগৎময় একে ছড়িয়ে দিতে হবে। সনাতন ধর্মের প্রাচীন  
দুর্গ জীর্ণ হয়েছে, শুধু বৈদেশিক আক্রমণ থেকে তাকে কোনোরকমে  
রক্ষা ক’রে জড়ের মতো বসে থাকলে চলবে না। এর পুনঃসংস্কার  
ক’রে জগতের সমক্ষে বার হতে হবে, পূর্ণ উত্তমের সঙ্গে চারদিকে  
প্রচার করতে হবে এর মহিমা।”

আমেরিকায় যাওয়ার জন্য চাঁদা তোলা হয়। কিন্তু স্বামীজী  
পতিত হন মহা সমস্যায়। অন্তরে প্রশ্ন জাগে, কেন তিনি বিদেশে  
বাইতে উত্তর হইয়াছেন? দেশের কাজে? ধর্মের কাজে? না নিজের  
প্রচ্ছন্ন অহংবোধ তাঁহাকে এদিকে ঠেলিয়া নিতেছে?

ভগবানের নিগূঢ় উদ্দেশ্য যদি কিছু থাকিয়া থাকে, তাহা জানিবার  
উপায় কই? এযাবৎ কোনো স্পষ্ট নির্দেশ তো তিনি পান নাই।  
এক্ষেত্রে বিদেশ গমনের পরিকল্পনা স্থগিত রাখাই সমীচীন। ভক্ত ও  
বহুবান্ধবদের এ সিদ্ধান্ত তখন জানাইয়া দিলেন। সংগৃহীত চাঁদার



অর্থ দ্রবিরের মধ্যে বিতরণ করিয়া দেওয়া হইল। কিন্তু মাদ্রাজের ভক্ত শিষ্টেরা দমিবার পাত্র নন। কিছুদিন পরেই তাঁহাদের উত্তম ও হৈ-চৈ আবার শুরু হয়। তাঁহাদের উৎসাহের শ্রোতে পড়িয়া স্বামীজীও আবার ভাবিতে বসেন। ঠাকুর সশরীরে নাই, তাঁহার নির্দেশ পাইবার আশা আর কোথায়? কিন্তু শ্রীমা তো রহিয়াছেন। তিনি তো তাঁহারই অংশস্বরূপিণী। মায়ের অনুমতি চাহিয়া পাঠাইলেই তো সব সমস্যার সমাধান হয়? স্থির করিলেন, তাঁহার নির্দেশ চাহিয়া এখনি পত্র দিবেন। ইতিমধ্যে সেদিন এক অলৌকিক কাণ্ড ঘটিয়া গেল।

স্বামীজী রাত্রে শয়ন করিয়া আছেন, ঘুম আসিতেছে না। এমন সময়ে হঠাৎ এক অতীন্দ্রিয় দৃশ্য উদ্ঘাটিত হয় তাঁহার নয়ন সমক্ষে। দেখেন, শ্রীরামকৃষ্ণের জ্যোতির্ঘন দিব্যমূর্তি ভারত সাগরের তীর হইতে দেশান্তর অভিমুখে যাত্রা করিয়াছে। সোজানুজি সমুদ্রের উপর দিয়া ঠাকুর অপর পারে চলিয়াছেন, সঙ্গে সঙ্গে স্বামীজীকেও আদেশ দিতেছেন তাঁহাকে অনুসরণ করার জন্ত। বিস্মিত স্বামীজী শষ্যায় উঠিয়া বসিলেন। তবে কি এটাই ঠাকুরের অভিপ্রেত? ঠাকুরের অক্ষুট ধ্বনি তখনও তাঁহার কানে বাজিয়া চলিয়াছে—“আয়, আয়।” তবে দ্বিধা-দ্বন্দ্বের অবকাশ আর কোথায়?

অবিলম্বে স্বামীজী সারদা দেবীকেও একখানা পত্র লিখিলেন। তখন আর মতামত চাওয়া নয়, ঠাকুরের নির্দেশে সঙ্কল্প তিনি স্থিরই করিয়াছেন। এবার মাতা ঠাকুরাণীর আশীর্বাদটি তাঁহার চাই।

লিখিলেন, “মাগো, মহাবীর যেমন রামনাম স্মরণ করিয়া সমুদ্রের উপর দিয়া লক্ষ প্রদান করিয়াছিলেন, আমিও তেমনি শ্রীশ্রীঠাকুরের নাম লইয়া সমুদ্রের পরপারে চলিলাম।”

নয়ন অনেকদিন হয় একলা নানা স্থান ঘুরিতেছেন, সারদামণি বেশ কিছুদিন তাঁহার সংবাদ পান নাই। পত্র পাইয়া তাঁহার আনন্দের আর সীমা রহিল না। নয়ন তাঁহার দৃষ্টিতে শুধু ঠাকুরের প্রধান শিষ্টই নয়—এই শিষ্টের মাধ্যমে ঠাকুর একটা বড় ঐশ্বর্য় সম্পন্ন

করিবেন ইহাও সারদা দেবী মনেপ্রাণে জানেন। ঠাকুরের মরদেহ ত্যাগ করার পর অলৌকিক অনুভূতির মধ্য দিয়া এ তত্ত্বটি তাঁহার কাছে পরিস্ফুট হইয়া উঠিয়াছিল। একদিন স্বচক্ষে দেখিয়াছিলেন— ঠাকুরের জ্যোতির্ময় সূক্ষ্ম দেহ ধীরে ধীরে নরেনের দেহে প্রবেশ করিতেছে। ঠাকুর একদিন নরেনের দেহের মাধ্যমেই তাঁহার মহা-লীলার বিস্তার সাধন করিবেন, এ বিশ্বাস এখনো তাঁহার আছে।

আজ সেই নরেন ঠাকুরের কর্মযজ্ঞের ঋত্বিক রূপে পাশ্চাত্যদেশে যাইতে অনুমতি চাহিতেছে। আর এই সম্বন্ধে প্রত্যাদেশও যে ইতিমধ্যে ক্রীমা প্রাপ্ত হইয়াছেন। তিনিও ধ্যানাবেশে দেখিয়াছেন,— সমুদ্র তরঙ্গের উপর দিয়া ঠাকুর অগ্রসরমান, আর নরেন তাঁহার অনুগামী। নরেনকে তাঁহার নিজের এই অলৌকিক দর্শনের কথা জানাইয়া তিনিও তখনই পত্র দিলেন। জানাইলেন অন্তরের পরিপূর্ণ আশীর্বাদ।

স্বামীজী তাঁহার ভক্ত শিষ্যদের আহ্বান করিলেন, সানন্দে কহিলেন, “আমেরিকায় যেতে এবার আমি সম্পূর্ণরূপে প্রস্তুত। মার আশীর্বাদ আমি পেয়ে গেছি।”

মাত্রাজের ভক্তদের উৎসাহ এবং স্বামীজীর শিষ্য খেতড়ি-রাজের অর্থানুকূলে স্বামীজীর যাত্রার বন্দোবস্ত সম্পূর্ণ হইল।<sup>১</sup>

১৮৯৩ সালের ৩০শে মে তারিখ। বোম্বাই হইতে জাহাজে তিনি জন্মভূমি ত্যাগ করিলেন। পরিধানে রঙীন রেশমী আংরাখা ও উষ্ণীয়। পরিচয়ের জন্তু থাকিল নূতন একটি নাম—স্বামী বিবেকানন্দ।

কীরামকৃষ্ণের দেহান্তের পর শিষ্যেরা আঁটপুরে বিরজা হোম করিয়া সন্ন্যাস নেন। এই সময়ে নরেন্দ্রনাথের নাম হয়—বিবিদিষানন্দ। হিমালয়ে ও ভারতের অন্ত্রাণ্ড অঞ্চলে পরিব্রাজন কালে স্বামীজী মহারাজ নানা সময়ে নানা নাম গ্রহণ করিতেন। এবার বিদেশে যাওয়ার প্রাকালে কি নাম নিবেন ভাবিতেছিলেন। প্রিয় শিষ্য

১ বেগীশঙ্কর শর্মা : স্বামী বিবেকানন্দ—জীবনের বিস্তৃত অধ্যায় (ইং)

থেড্ডিরাজ বলিলেন, “স্বামীজী, আপনি জগতের বিবেক উন্মেষ করার জন্ত তৈরি হচ্ছেন—আপনার এবারকার নাম হোক, বিবেকানন্দ।”

সিকাগোতে তখন বিশ্ব-মেলায় অধিবেশন বসিয়াছে। এইখানেই বিশ্ব-ধর্মসভা বসিবার কথা। সেখানে পৌঁছিয়া খবরাখবর করার পর তো স্বামীজীর চক্ষুস্থির। প্রতিনিধি নির্বাচনের শেষ তারিখ গত হইয়াছে। তাছাড়া, তখন জুলাই মাস—সেপ্টেম্বরের আগে ধর্মসভার অধিবেশনও বসিবে না। তিনি নিজে বা তাঁহার উৎসাহী ভক্তেরা কেহই আগে হইতে এ বিষয়ে সংবাদ সংগ্রহ করার প্রয়োজন বোধ করেন নাই। আগামী কয়েক মাসের ব্যয় নির্বাহ কি করিয়া হইবে তাহাই এক বড় সমস্যা।

আমেরিকায় পদার্পণ করিবার সময় তাঁহার নিকট মাত্র ১৭৯ পাউণ্ড অবশিষ্ট ছিল। সামান্য পুঁজি, আর দেশটিও ব্যয়বহুল। অর্থ বা কিছু ছিল তাড়াতাড়ি ফুরাইয়া আসিতেছে। সম্মুখে মার্কিন দেশের নিদারুণ শীত। পৰ্বাপ্ত শীতবস্ত্রও তিনি সঙ্গে আনেন নাই। এই দেশ ভারত নয়, জড়বাদী ডলার পূজারীদের দেশ। এখানে সন্ন্যাসীর ভিক্ষা মিলে না—স্বামীজী বিষম বিপদে পড়িলেন।

কিন্তু এ অবস্থায় হাল ছাড়িবার পাত্রও তিনি নহেন। খরচ কমানোর জন্ত কিছুদিন সিকাগো ছাড়িয়া বোস্টন শহরে গিয়া বাস করিতে থাকেন। এই সময়েই আকস্মিকভাবে হার্ভার্ড বিশ্ব-বিদ্যালয়ের গ্রীক ভাষার অধ্যাপক মিঃ রাইটের সহিত তাঁহার পরিচয় হয়। স্বামীজীর লোকান্তর প্রতিভা ও বিদ্যাবত্তা দর্শনে অধ্যাপক তো বিমুগ্ধ। সোৎসাহে তখনি তাঁহাকে ধর্মসভায় গ্রহণ করিতে তিনি উদ্যোগী হইলেন।

হিন্দুধর্মের প্রতিনিধিত্ব করার কোনো নিদর্শনপত্র স্বামীজীর কাছে

নাই, একথা রাইট সাহেবকে তিনি জানাইলেন। সুবিজ্ঞ অধ্যাপক তৎক্ষণাৎ উত্তর দিলেন, “স্বামীজী, আপনার কাছে এই নিদর্শন চাওয়া, আর সূর্যকে তার কিরণ দেবার অধিকার সম্বন্ধে প্রশ্ন করা—একই কথা।”

যে সংস্থা ধর্মসভার প্রতিনিধি নির্বাচন করেন তার সভাপতি ছিলেন মিঃ রাইটের বন্ধু। স্বামীজীর পরিচয়পত্রে তিনি সেই বন্ধুকে লিখিলেন, “ইনি এমনি একজন মনীষী যে, আমাদের বিশ্ববিদ্যালয়-গুলির সব ক’টি বিজ্ঞ অধ্যাপকের বিদ্যা একত্র করলেও তা ঐরূপ পার্শ্বোত্তর সমতুল হয় না।”

স্বামীজীর অর্থাভাব রহিয়াছে বুঝিতে পারিয়া সহৃদয় অধ্যাপক তাঁহাকে সিকাগো স্টেশনের একখানি টিকেট আর মেলা অভ্যর্থনা কমিটির নামে একটি পরিচয়পত্র দিয়া রওনা করিয়া দেন।

কিন্তু স্বামীজীর পরীক্ষার যেন আর শেষ নাই। সিকাগো শহরে পৌঁছিয়া দেখেন, মেলা স্থানের ঠিকানাটি তিনি হারাইয়া কেলিয়াছেন। শীতের রাত্রি ঘনাইয়া আসিয়াছে, এ অপরিচিত স্থানে আশ্রয় পাইবারও কোনো সম্ভাবনা নাই।

ধনী লোকেরা দরজায় গেলেই পরিচারকেরা তাঁহাকে নিগ্রো ভাবিয়া দ্বার রুদ্ধ করিতেছে। রাত্রির জন্ত মাথা গুঁজিবার একটা স্থানও মিলিতেছে না। অনশ্রোপায় হইয়া সে রাত্রির মতো স্টেশনের এক খালি প্যাকিং বাগ্জের ভিতরে আশ্রয় নিতে হয়। পরদিন প্রভাতে ক্ষুধার্ত হইয়া দুই এক স্থানে ভিক্ষার চেষ্টা করেন। কিন্তু সে দেশে ভিক্ষা দিবার রীতি নাই। শ্রান্ত ক্লান্ত মলিন বেশধারী এই বিদেশীকে বহু ধনী গৃহস্থই তাড়াইয়া দেন। এক বর্ষায়সী মহিলা ঘরের জানালা দিয়া দেখিতে পান নিরাশ্রয় বিদেশী তরুণ অর্থের জন্ত ঘোরাঘুরি করিতেছেন, কিন্তু কোথাও কিছু মিলিতেছে না। মনে তাঁহার জাগিয়া উঠিল সহানুভূতি। তখন নিচে নামিয়া আসিয়া স্বামীজীকে দোর খুলিয়া দিলেন—দিলেন আশ্রয় ও আশ্রয়। এই মহিলার নাম মিসেস হেইল।

স্বামীজী সুস্থ হইলে এই সহৃদয় মহিলা তাঁহাকে ধর্মমেলায় পৌঁছাইয়া দিলেন। পরম কারুণিক ঠাকুরের কৃপাদৃষ্টি তাঁহার উপর সতত নিবদ্ধ রহিয়াছে, অনেকবারের মতো এবারও স্বামীজী এই ঘটনায় তাহা উপলব্ধি করিলেন।

১৮৯৩ সালের ১১ই সেপ্টেম্বর। সিকাগোর আর্ট ইনস্টিটিউটের প্রাসাদোপম ভবনে সাড়ম্বরে বিশ্বধর্ম মহাসম্মেলন আরম্ভ হইয়াছে। কার্ডিন্যাল গিবন্সকে কেন্দ্র করিয়া সারা পৃথিবীর ধর্মপ্রতিনিধিরা উপস্থিত। শ্রোতাদের মধ্যে রহিয়াছেন ইউরোপ আমেরিকার বহু মনীষী, অধ্যাপক ও শ্রেষ্ঠ নাগরিক।

তরুণ সন্ন্যাসী স্বামী বিবেকানন্দ মঞ্চোপরি উপবিষ্ট। গৈরিক রঙে রঞ্জিত রেশমী আংরাখা ও উজ্জীবে ভূষিত এই হিন্দু প্রতিনিধির আকর্ষণ যেন সবাইকে ছাড়াইয়া গিয়াছে। সুন্দর সুঠাম তাঁর দেহ, চোখে মুখে প্রতিভার দীপ্তি। আভিজাত্য ও আত্মপ্রত্যয়ে ভরা এই সন্ন্যাসী যেন এক স্বতন্ত্র পুরুষ। দৃশ্যভঙ্গী ও তেজ দেখিয়া মনে হয়, আদর্শবাদ ও ধর্মের ক্ষেত্রে ইনি যেন এক তুর্ধ্ব ক্রান্তিহীন যোদ্ধা—চিহ্নিত অধিনায়ক।

স্বামীজীকে তাঁহার জীবনে এমন গুরুগম্ভীর, এমন গুরুত্বপূর্ণ বক্তৃতা মঞ্চে কখনও দাঁড়াইতে হয় নাই। পাশ্চাত্য সমাজের শ্রেষ্ঠ দার্শনিক ও ধর্ম-নেতাগণ ইহাতে ভাষণ দিতেছেন। নিজ নিজ সম্প্রদায়ের মতবাদ তাঁহারা অপূর্ব পাণ্ডিত্য ও বাগ্মিতার সহিত বিশ্লেষণ করিতেছেন। স্বামী বিবেকানন্দকেও তাঁহার ধর্মের তত্ত্ব, পৃথিবীর প্রাচীনতম ও বৃহত্তম ধর্মের তত্ত্ব জানাইতে হইবে—এবং এখনই তাহা জানাইতে হইবে। অস্ফুট প্রতিনিধিদের মতো পূর্ব হইতে কোনো কিছু লিখিয়া বা তৈরি হইয়াও তিনি আসেন নাই। পৃথিবীর শ্রেষ্ঠ ধর্মাবিবেশনের সম্ভামঞ্চে বসিয়া এই ত্রিশ বৎসর বয়স্ক ছঃসাহসী যুবকের হৃদয় আজ যেন হঠাৎ কাঁপিয়া উঠিল।

এবার স্বামী বিবেকানন্দের ভাষণের পালা। সভাপতি আহ্বান

জানাইলেন তাঁহাকে। স্বামীজী কিন্তু এড়াইয়া গেলেন, कहिलেন, ইহার পরে তিনি বক্তৃতা করিবেন। কিছুক্ষণ পরে আবার তাঁহার ডাক পড়ে, ঘণ্টা বাজাইয়া তাঁহাকে ডাকা হয়। কিন্তু এবারও বিবেকানন্দ উত্তর দিলেন—এখন নয়। সভাপতি আর তাঁহাকে এড়াইতে দিতে রাজী নন। দৃঢ়স্বরে বলিয়া বসিলেন, ইহাই এই প্রতিনিধির বক্তৃতা প্রদানের শেষ সুযোগ। কি আর করা যায়, স্বামীজীকে এইবার উঠিয়া দাঁড়াইতে হয়।

ইষ্টনাম গ্রহণ করিয়া সমবেত নরনারীকে তিনি আহ্বান জানান, “আমেরিকাবাসী ভগ্নি ও ভ্রাতৃবৃন্দ!” মুহূর্ত মধ্যে যেন এক ইন্দ্রজাল ঘটিয়া যায়। এই আহ্বানের আন্তরিকতা অভিভূত করিয়া কেলে সভার প্রতিনিধি ও দর্শকদের। যুবক সন্ন্যাসীর অভিনন্দন আর শ্রোতাদের করতালি ধ্বনি যেন ধামিতে চাহে না। শত শত লোক উঠিয়া দাঁড়াইয়া জানায় বিপুল সংবর্ধন।

ক্ষণকাল মধ্যেই স্বামীজীর আত্মবিস্মৃতি কাটিয়া গেল। বুঝিলেন এই অভিনন্দন ও এই স্বীকৃতি শ্রীরামকৃষ্ণেরই ইচ্ছায়। জগজ্জননী আত্মাশক্তির এ এক নিগূঢ় লীলা। এ লীলারই ক্রীড়নক হিসাবে আজ তিনি এখানে দণ্ডায়মান। স্বভাবসিদ্ধ সাহস ও নেতৃত্ব করিয়া পাইতে স্বামীজীর বিলম্ব হইল না। অতঃপর হৃদয়ের অনর্গল উৎস হইতে বহিতে থাকে তাঁহার চাঞ্চল্যকর ভাষণ।

অমোঘ শক্তিমত্তায় মগ্নিত হইয়া স্বামীজী সেদিন ধর্মসভার চিন্তা জয় করিলেন। সমগ্র পৃথিবীর ধর্মপ্রচারক ও দার্শনিকদের সমক্ষে ইহা যেন এক চাঞ্চল্যকর বিস্ফোরণ! শ্রোতাদের মধ্যে মার্কিন সমাজের বুদ্ধিজীবীর সংখ্যাই অধিক। ইহাদেরই স্বীকৃতির মধ্য দিয়া মার্কিন দেশের সম্মুখে সেদিন ফুটিয়া উঠিল বিবেকানন্দের ভাস্বর মূর্তি। বেদান্তধৃত সনাতন হিন্দুধর্মের সংবাহকরূপে পাশ্চাত্য দেশের প্রাণ-কেন্দ্রে ঘটিল তাঁহার অভ্যুদয়। এক বিরাট সম্ভাবনা সূচিত হইল ইহার মাধ্যমে।

রামকৃষ্ণ-বিবেকানন্দের লীলা-জীবনে সেদিনকার এই ঘটনটি

ছিল বড়ই তাৎপৰ্যপূর্ণ। শ্রীরামকৃষ্ণ ছিলেন সচ্চিদানন্দ সাগরবিহারী এক রাজহংস। ধ্যানময় প্রশান্ত মহাকাশে তাঁহার সত্তা সদা ভাসমান। আর বিবেকানন্দ সেই রাজহংসেরই পক্ষ-বিধূনন। ধর্ম-মহাসভার সেদিনকার এই আলোড়ন—গতি-চঞ্চলতা কি এই পক্ষ-বিধূনেরই প্রথম প্রতিক্রিয়া ?

বিবেকানন্দ তাঁহার আনন্দচঞ্চল শ্রোতাদের নিকট ঘোষণা করিলেন, “পৃথিবীর প্রাচীনতম সন্ন্যাসীসংঘের পক্ষ থেকে আমি আজ আপনাদের সাধুবাদ জানাচ্ছি। সর্বধর্মের জননী-স্বরূপা সনাতন ধর্মের প্রতিনিধিরূপে, সকল শ্রেণীর সকল মতের কোটি কোটি হিন্দুর পক্ষ থেকে আপনারা গ্রহণ করুন আমার আন্তরিক ধন্যবাদ।”

সনাতন ধর্মের সমন্বয়কারী রূপটি উদ্ঘাটন করিয়া তিনি আরও বলেন, “যে ধর্ম সমগ্র জগৎকে পরমতসহিষ্ণুতা এবং সকল মতের সর্বজনীন স্বীকৃতি শিক্ষা দিয়েছে, আমি সেই ধর্মভূক্ত বলে গৌরব করে থাকি। আমরা কেবল সর্বজনীন পরমতসহিষ্ণুতায়ই বিশ্বাসী নই, আমরা সকল ধর্মকেই সত্য বলে বিশ্বাস করি। যে জাতি পৃথিবীর সর্বদেশের উৎপীড়িত ও আশ্রয়প্রার্থীদের জাতিবর্ণ নির্বিশেষে আশ্রয় দিয়েছে, আমি সেই জাতির অগ্রতম মানুষ বলে মনে মনে গর্বিত। আমি আপনাদের গর্বের সঙ্গে বলবো, যে বৎসর রোমানরা ইহুদীদের পবিত্র দেবালয়গুলো ধ্বংস করে কেলে, সেই বৎসর হতাবশিষ্ট ইসরাইল বংশীয়দের আমরাই দক্ষিণ ভারতবর্ষে স্থান দিয়েছিলাম। যে ধর্ম জরথুষ্ট্রপন্থী মহান্ পারসীক জাতির অবশিষ্টাংশকে আশ্রয় দিয়েছে, অছাবধি লালন-পালন করছে, আমি সেই ধর্মভূক্ত বলে গৌরব বোধ করছি।”

ধর্ম-মহাসভার বিরাট কক্ষ প্রতিধ্বনিত করিয়া স্বামীজীর উদাত্ত-কণ্ঠে নির্গত হইল সেই পবিত্র শ্লোক। অগণিত ভারতবাসী শৈশব-কাল হইতে যাহা আবৃত্তি করে—

কচীনাং বৈচিত্র্যাদ্ভুতকুটিল

নানাপথ জুয়াং ।

নৃণামেকো গম্যস্তমসি

পর্যসামর্গ্য ইব ॥

—নদ-নদী সকল যেমন নানা ধারায় নানা পথে সাগর অভিমুখে বহিয়া যায়, তেমনি রুচির বৈচিত্র্যাহেতু, সরল ও কুটিল নানা পথগামী মানব-ধারায়, হে প্রভো, তুমিই একমাত্র গন্তব্যস্থল ।

গীতার প্রচারিত মহান্ সত্যের কথাও তিনি শুনাইলেন । পুরুষোত্তম বলিয়া গিয়াছেন,—যে আমাকে যেভাবে উপাসনা করে, আমি তাহার নিকট সেই ভাবেই প্রকাশিত হই—হে পার্থ, মনুষ্যগণ সর্বতোভাবে আমার নির্দিষ্ট পথেই চলিয়া থাকে ।

ভারতধর্মের মূল স্মৃতি ব্যাখ্যা করার পর ধর্মসভার সম্মুখে অপর আশার বাণীও তিনি শ্বনিত করিলেন—“সাম্প্রদায়িকতা, গোড়ামী ও ধর্মজ্ঞতার যুত্য়াকাল আসন্ন । আমি সর্বান্তঃকরণে ভরসা করি, এই মহাসমিতির উদ্বোধনে আজ প্রভাতে যে ষট্টাশ্বনি বেজে উঠিলো তা ধর্মোন্মত্ততার যুত্য়বর্তা জগতে ঘোষণা করুক । একই রকম লক্ষ্যে মানব জাতি আজ এগিয়ে চলেছে, এবার তার ভেতরকার পারস্পরিক সন্দেহ ও অবিশ্বাস দূর হোক, তরবারি বা লেখনীর দ্বারা পরগীড়নের হর্মতির ঘটুক অবসান !”

মনীষী রম্যা রঞ্জার ভাষায়,—সম্মেলনের অপর বক্তারাও প্রত্যেকেই ভগবানের কথাই বলিয়াছিলেন—কিন্তু সে ভগবান ছিলেন তাঁহাদের স্ব-সম্প্রদায়ের ভগবান । কিন্তু বিবেকানন্দ—এক! বিবেকানন্দ, সকলের ভগবানের কথা বলিলেন, সকলের ভগবানকে বিশ্বসত্তায় মিলাইয়া দিলেন । ইহা ছিল রামকৃষ্ণেরই উক্ত নিশ্বাস, বাহ্য সমস্ত বাধা-বিল্ল অতিক্রম করিয়া আজ তাঁহার শ্রেষ্ঠ শিষ্যের মাধ্যমে উদ্গত হইল । আর বিশ্বধর্ম সম্মেলন এই উত্তরণ সন্ন্যাসীকে জ্ঞাপন করিল তাহার স্বতোৎসারিত অভিনন্দন ।

ইহার পর স্বামীজীকে প্রায় দশ বারটি বক্তৃতা এই সম্মেলনে



দিতে হয়। মুক্তি, প্রেরণা এবং আদর্শবাদিতার শক্তিতে তাহা অমোঘরূপে আত্মপ্রকাশ করে। সম্মেলনের সদস্যদের ডিঙাইয়া তাঁহার প্রচারিত এই শাস্ত্রত সত্যের মহাবার্তা অবিলম্বে জনচিন্ত আলোড়িত করিয়া তুলে। বিশ্বধর্ম মহাসভার প্রখ্যাত মনীষী ও জনসাধারণ, একযোগে উভয়ের চিন্ত স্বামী বিবেকানন্দ অবলীলায় অধিকার করিয়া বসেন। এই বিবেকানন্দ কিন্তু তাঁহারই শিষ্য যিনি ব্যবহারিক শিক্ষার কোনো ধারাই ধারিতেন না, নিজ নাম দস্তখত করিতে গিয়া লিখিতেন ‘রামকেষ্ট।’ স্বামীজীর সর্বকর্মের প্রচ্ছন্ন নিয়ামক সেই শ্রীরামকৃষ্ণ। শ্রীরামকৃষ্ণেরই তিনি যেন একটি ক্ষুদ্র জাহ্নবী। জাহ্নবীধারী ঠাকুর সেদিন বুঝিবা সবার অলক্ষ্যে মিটিমিটি হাসিতেছিলেন।

মার্কিন সংবাদপত্রগুলি স্বীকার করিয়া নেয়, স্বামী বিবেকানন্দ নিঃসন্দেহে ধর্মমেলার শ্রেষ্ঠ ব্যক্তিত্ব। নিউইয়র্ক হেরাল্ড এই সময়ে লিখে, “ইহার বক্তৃতা শুনিবার পর মনে হইবে, ভারতবর্ষের মত জ্ঞানৈশ্বর্যমণ্ডিত দেশে আমাদের দেশের ধর্মপ্রচারক প্রেরণ করা নিবুদ্ধিতার কাজ।”

মার্কিন দেশের মনীষী, সমাজনেতা ও ধনকুবেরগণ স্বামীজীর প্রজ্ঞা পাণ্ডিত্য ও ব্যক্তিত্বে একেবারে মুগ্ধ হইয়া গেলেন। তাঁহার এই জনপ্রিয়তাকে ধর্মসম্মেলনের সভাপতিও তাঁহার কাজে লাগাইতে ছাড়িতেন না। নীরস তত্ত্বালোচনার আসরে যখন শ্রোতাদের ধৈর্যচ্যুতি ঘটিতে থাকিত তিনি তখন ঘোষণা করিতেন, অধিবেশনের শ্রোতাদের দিকে স্বামী বিবেকানন্দ তাঁহার ভাষণ দিবেন। জনমণ্ডলী অমনি আগ্রহী হইয়া উঠিত, স্বামীজীর বক্তৃতা শোনার আকর্ষণে ধৈর্য ধরিয়া ঘণ্টার পর ঘণ্টা অপেক্ষা করিত।

স্বামীজীর ভক্ত ও অমুরাগী পাশ্চাত্য দেশীয় চরিতকারেরা লিখিয়া গিয়াছেন, “সিকাগোর বিরাট ধর্ম-মহাসভায় স্বামীজী যে মহাসভ্য

প্রচার করেন, যে বিশ্বয়কর আশার বাণী শ্রবণ করান, খ্রীষ্টের পর আর কোনো প্রাচ্যবাসীর মুখ থেকে পাশ্চাত্য দেশ তেমন কথা শ্রবণ করে নাই। তাঁর ভাবরাশি চিরদিন পাশ্চাত্যের ধর্মোন্নতি ও ধর্ম বিস্তারের সহায়করূপে গণ্য হবে, গৃহীত হবে জগতের ভবিষ্যৎ অধ্যাত্মজ্ঞানের প্রধান অবলম্বনরূপে।”<sup>১</sup>

শুধু মাত্র কয়েকটি প্রাণস্পর্শী বক্তৃতা এবং ব্যক্তিত্বের বলে জন-মানসের এমন দিগ্বিজয় পৃথিবীতে খুব কমই দেখা গিয়াছে।

এই অপ্রত্যাশিত সম্মান ও খ্যাতির প্লাবন স্বামীজীর অন্তরে সেদিন কিরূপ প্রতিক্রিয়ার সৃষ্টি করে? প্রসিদ্ধ সংবাদপত্রগুলির স্তম্ভে স্তম্ভে তখন তরুণ হিন্দু সন্ন্যাসীর বিজয়গাথা। এই জয়গৌরব কিন্তু স্বামীজীর হৃদয়কে ভিতরে ভিতরে ভারাক্রান্ত করিয়া তোলে। ভাবিতে থাকেন, খ্যাতির একি বিড়ম্বনা আজ শুরু হইয়াছে তাঁহার জীবনে? ভাগ্যী এবং একান্তচারী সন্ন্যাসী জীবনে মুক্ত বিহঙ্গের মতো তিনি ছিলেন স্বাধীন, স্বতন্ত্র। সে জীবন কি আর ফিরিয়া পাইবেন না? তপস্তাময় জীবন, ঈশ্বরধৃতজীবন—তাঁহারও ঘটিতেছে অবসান। আশঙ্কা আসে অন্তরে। আমেরিকায় আসিয়া এ যাবৎ পদে পদে দারিদ্র্য ও প্রত্যাখ্যানের সহিত তাঁহাকে যুদ্ধিতে হইয়াছে—এইবার বুঝি ঐশ্বর্যের প্রাচুর্য তাঁহাকে গ্রাস করিতে চায়।

স্বামীজী রাতারাতি সমগ্র মার্কিন দেশে প্রসিদ্ধ হইয়া উঠিয়াছেন। কোটিপতি গুণগ্রাহিগণ তাঁহার যে কোনো আজ্ঞা নিমেষে পালন করিতে সমুৎসুক। এক রাত্রে এক ধনীর প্রাসাদে তিনি আতিথ্য গ্রহণ করিয়াছেন। চারিদিকে বিলাসের প্রাচুর্য। রসনাতৃপ্তিকর ভোজ্যদ্রব্যের অবধি নাই। ভোজন ও আপ্যায়ন শেষে সুকোমল শয্যায় শয়ন করিলেন। কিন্তু ঘুম আসিল না। এই বিলাস বৈভবের পরিবেশে তাঁহার হৃৎখিনী জন্মভূমির স্মৃতি বৃশ্চিকের মতো দংশন করিয়া উঠিল। নিরন্ন শিক্ষা-দীক্ষাহীন কোটি কোটি দেশবাসীর হৃৎখে

তিনি মুহুম্মান হইলেন। সমস্ত রাত্রি ভূতলে শয়ন করিয়া রহিলেন, নিজা আসিল না।

স্বামী বিবেকানন্দের ব্যক্তিত্ব ও বাগ্মিতা তখন সম্মোহনের কাজ করিতেছে। এই সময়ে এক গুণগ্রাহিণী ধনাঢ্য তরুণী স্বামীজীকে নিবেদন করিতে চায় তাঁহার বিস্ত-বিষয় ও রূপর্যোবন। প্রশান্ত কণ্ঠে তিনি উত্তর দেন, “আমার কাছে এমনতর প্রশ্নাব করতে নেই। আমি যে সন্ন্যাসী! নিখিল বিশ্বের সমস্ত নারীই যে আমার—মা।”

আমেরিকার বহুতা প্রতিষ্ঠানগুলির মধ্য দিয়া স্বামীজী যেন ঝটিকাবেগে বিভিন্ন অঞ্চলে নিপতিত হইতে থাকেন। বেদান্ত ও মানবধর্মের শাস্ত্ররূপ ফুটিয়া উঠে তাঁহার শক্তিদৃশ্য ভাষণে। সংবাদ-পত্রে তাঁহাকে অভিহিত করা হয় ‘সাইক্লোনিক হিন্দু’ নামে।

গৌতম বুদ্ধের আড়াই হাজার বৎসর পরে ভারত বহির্দেশে এই তাহার প্রথম প্রচারক ও বাণীবাহককে প্রেরণ করিয়াছে। প্রতীচ্য সভ্যতার অগ্রদূত মার্কিনদেশ তাঁহার সেই বাণী এবার কান পাতিয়া শুনিল।

পৃথিবীর প্রাচীনতম সভ্যতা স্বামী বিবেকানন্দের মাধ্যমে তাহার সত্যাবিস্কারের অপূর্ব উপহার লইয়া আজ পশ্চিমের দ্বারে উপস্থিত! আর সেই বিবেকানন্দ হইতেছেন শ্রীরামকৃষ্ণের সন্তান—শ্রীরামকৃষ্ণেরই অধ্যাত্মসন্তান তিনি প্রাণময় প্রকাশ। এই শক্তিধর দূতকে সহসা কিরাইয়া দিবার উপায় কই?

প্রতীচ্য সভ্যতার ধর্মকেন্দ্র, আমেরিকা তাই বিবেকানন্দকে গ্রহণ করিল। শুধু তাঁহার বাগ্মিতার মধ্য দিয়া নয়—ব্যক্তিত্ব, সত্যনিষ্ঠা ও ত্যাগধৃত জীবনের প্রতি শ্রদ্ধাষিত হইয়াই তাঁহাকে গ্রহণ করিল।

ইহার জন্ত কিছুটা প্রাথমিক প্রস্তুতিও মার্কিন দেশের ছিল, একথা অস্বীকার করিবার যো নাই। বিবেকানন্দ ঊনবিংশ শতকের শেষ দশকে আমেরিকায় উপস্থিত হন। মার্কিন বুদ্ধিজীবীদের মধ্যে তখন যে মানসিকতা বর্তমান, তাহা তাঁহার ধর্ম-প্রচারের পক্ষে কিছুটা

অনুকূলই ছিল। মনীষী এমার্সন এবং খোরো ইতিপূর্বে তাঁহাদের রচনায় ভারতীয় ব্রহ্মবাদ ও অতীন্দ্রিয় অনুভূতির সমর্থন জানাইয়া গিয়াছেন। খ্রিস্টিয়ান সায়েন্স-এর সমর্থকেরা ও কবি হুইটম্যানের আধ্যাত্মিকতাও যেন এজ্ঞা কিছুটা ভূমি প্রস্তুত করিয়া রাখিয়াছিল।

কবি হুইটম্যানের কবিতায় বুঝি ভারতদূত বিবেকানন্দেরই আসন্ন পদধ্বনির ইঙ্গিত ফুটিয়া উঠিয়াছিল :

“হে মোর নগরী.....

ঐ জাখো, আমাদেরই দ্বারে

আসছে ঐ আদি-মাতা।

ভাষার প্রথম কাকলী

শোনা গিয়েছিলো তাঁর নীড়ে,

আর, সমস্ত কাব্যের ছিল সে উৎস-মুখ

সুপ্রাচীন তাঁর বংশধারা.....

ঐ শোন, আসছে সে,

—ব্রহ্মের সন্ততি।”

আবার অপর দিকে দেখি, মার্কিন সমাজে সাধারণ মানুষ ভোগ-সর্বস্ব জীবনের পিছনে ছুটিয়া হইতেছে দিশাহারা, মানসিক ভারসাম্য সে হারাইয়া বসিয়াছে। এই উদ্ভ্রান্ত, শ্রান্ত ক্লান্ত মানুষদের সামনে স্বামীজী তুলিয়া ধরিলেন আত্মিক জীবনের আদর্শ, প্রচার করিলেন ভারত-আত্মার শাস্ত্রত বাণী। রামকৃষ্ণের প্রত্যক্ষ অধ্যাত্ম-শক্তির স্পন্দনে তাহা প্রাণবন্ত, বিবেকানন্দের নিজের প্রত্যক্ষ দর্শন ও অনুভূতির প্রত্যয়ে তাহা প্রোজ্জ্বল—মন্ত্রচৈতন্যময়!

স্বামীজী তখন প্রচারের উৎসাহে মত্ত। প্রতি সপ্তাহে বার চৌদ্দটি করিয়া বক্তৃতা তাঁহাকে দিতে হয়। এক এক দিন শরীর ও মন ক্লান্তিতে নিস্তেজ হইয়া পড়ে। নূতন বক্তব্যও অনেক সময় যেন খুঁজিয়া পান না। ভয় হয়, তবে কি তাহার জ্ঞানের পূঁজি নিঃশেষিত? আবার এই সংশয় ও নৈরাশ্যের মুহূর্তে হঠাৎ হৃদয়ে আগিয়া উঠে অলৌকিক অনুভূতি, প্রত্যয় ও প্রাণের আবেগে উজ্জ্বল

হইয়া উঠেন। এক এক দিন রাত্রে তন্দ্রাবেশে শুনিতে পান পরবর্তী দিনের ভাষণটি কে যেন তাঁহার কানের কাছে পরিষ্কাররূপে বলিয়া যাইতেছে। পরের দিনের বক্তৃতায় এই অলৌকিক ভাষণের স্মৃতিই তাঁহাকে সাহায্য করিত।

বিবেকানন্দের চতুর্দিকে এবার আরো ভিড় জমিয়া উঠে। এ ভিড় মুমুক্শু, অধ্যাত্মপন্থী, সংশয়বাদী, আর অজস্র ছজ্জুগ-প্রিয় নরনারী। সত্যানুরাগী তেজদগ্ধ সন্ন্যাসীর যেন রবাহত জন-সংঘট্ট ভাল লাগে না! জনসভায় দাঁড়াইয়া প্রশ্ন করেন, “খ্রীষ্টান বলে তোমরা পরিচয় দাও, কিন্তু খ্রীষ্টের আত্মার কি সম্মান তোমরা দিয়েছো? যীশু আবার যদি আসেন তাঁর শয়নের জন্ত একখণ্ড প্রস্তরও কি আজ তাঁর জুটবে?”

ভীত কষাঘাতে পাজীদল ফেপিয়া যায়। শ্রোতাদের কাহারো কাহারো চৈতন্য সত্য সত্যই জাগিয়া উঠে, স্বামীজীর কাছে তাহারা করে আত্মসমর্পণ।

স্বাধীনচেতা স্বামীজী কিছুদিনের ভিতর বক্তৃতা-প্রতিষ্ঠানদের কবল হইতে নিজেকে মুক্ত করিয়া নিলেন। ইহার ফলে প্রচুর আর্থিক ক্ষতি হইল, কিন্তু তিনি তাহাতে দৃকপাত করিলেন না। ধনী বন্ধুরা তাঁহার কাজের জন্ত এই সময়ে অজস্র অর্থ দিতে চান, কিন্তু শর্ত—তাঁহাদের অনুমোদিত সমাজ চাড়া স্বামীজী অপর কোথাও মিশিতে পারিবেন না। ত্রুঙ্ক হইয়া তিনি বলিলেন, “শিব! শিব! কখনো দেখেছো কি, পৃথিবীর কোনো বিরাট কাজ ধনীরা করতে সক্ষম হয়েছে? হৃদয় আর মস্তিষ্কই সৃষ্টি করে—টাকার ধলির সে ক্ষমতা নেই।”

গঠনমূলক কাজ এখন হইতে শুরু হয়। স্থির করেন, সত্যিকার মুক্তিকামী নরনারী ঋাহারা, ঘনিষ্ঠ সান্নিধ্যে থাকিয়া, তাঁহাদের মাধ্যমে বিতরণ করিবেন তত্ত্ব উপদেশ। কয়েকজন দরিদ্র ভক্তের আর্থিক সহায়তা নিয়া কাজ শুরু করেন। নিউইয়র্কের এক সাধারণ অঞ্চলে

১১ মেয়ী লুই বার্ক : স্বামী বিবেকানন্দ ইন্ আমেরিকা

গুটিকয়েক ঘর ভাড়া নেওয়া হয়। আসবাবপত্র-হীন কক্ষে পাশ্চাত্য ভক্তগণ পা মুড়িয়া ঘণ্টার পর ঘণ্টা বসিয়া থাকেন। স্থান সঙ্কুলান না হওয়ায় বহু লোক সিঁড়িতে বসিয়াও শোনে। তাঁহার ভাষণ ও বাখ্যা। কিছুদিন পরে, বেদান্ত শিক্ষার এই প্রতিষ্ঠানটি প্রশস্ততর ভবনে স্থানান্তরিত হয়।

এই সময়ে ধীরে ধীরে স্বামীজীর চারিদিকে আসিয়া জুটেন একদল বিশ্বস্ত ভক্ত ও কর্মী। ইহাদের মধ্যে উল্লেখযোগ্য—ম্যাডাম মেয়ী লুইস ( স্বামী অভয়ানন্দ ), ডাঃ স্মাগুসবার্গ ( স্বামী কৃপানন্দ ), মিসেস ওলি বুল, মিস ওয়াল্ডো, গুডউইন, মিঃ লিগেট, মিস মেয়ী কিলিপ, মিসেস আর্থার স্মিথ, মিসেস গুডইয়ার, প্রভৃতি।

ইহাদের উপলক্ষ করিয়া স্বামীজী যে ভাষণ দেন তাহা হইতে সংকলিত হয় তাঁহার রাজযোগ, জ্ঞানযোগ ও ভক্তিযোগ। এই গ্রন্থ দুইটি প্রকাশের পর পাশ্চাত্য সমাজে আলোড়ন পড়িয়া যায়।

শিষ্য ও শিষ্যাদের শুধু প্রেরণা দিয়াই তিনি ক্ষান্ত হইতেন না। আধ্যাত্মিক সাধনের পথে ইহাদের তিনি সতর্কভাবে পরিচালিত করিতেন। এই সময়ে বিবেকানন্দের জীবনে ঐশী শক্তির নানা প্রকাশ ঘটিতে দেখা যায়। সিন্টার ক্রিস্টিনের স্মৃতিকথায় ইহার কিছু কিছু উল্লেখ রহিয়াছে। স্বামীজীর বিশ্বস্ত শিষ্য ও লিপিকার গুডউইন সম্পর্কিত এক ঘটনাতে ইহার প্রমাণ মিলে। একদিন গুডউইন জড়বাদের সমর্থন করিয়া স্বামীজীর সহিত তুমুল তর্ক জুড়িয়া দিয়াছেন। কিছুতেই বিতণ্ডার অবসান হইতেছে না। হঠাৎ স্বামীজীর মনশ্চক্ষে গুডউইনের অতীত জীবনের চিত্রগুলি একের পর এক ভাসিয়া উঠিতে থাকে। স্বামীজী সেই ঘটনাবলীর উল্লেখ করিয়া দৃঢ়স্বরে গুডউইনকে বলেন, “তুমি তো এই ধরনের জীবনই বাপন করে এসেছো? তোমার বুদ্ধিতে আর কত ধরবে, বল?”

অতীন্দ্রিয় শক্তির সাক্ষাৎ পরিচয়ে প্রচণ্ড ধাক্কা খাইলেন গুডউইন।

জড়বাদ সমর্থন করিয়া যে গলাবাজী করিতেছিলেন, তখন তাহা নীরব হইয়া পড়িল।

নিউইয়র্কে স্বামীজী তাঁহার স্থায়ী সংগঠন ‘বেদান্ত সমিতি’ স্থাপন করিলেন। বিশ্বস্ত কয়েকটি শিষ্য-শিষ্যার উপর কর্মভার গ্রস্ত করিয়া অতঃপর তিনি প্রচার কার্যের জন্য উপনীত হন ইংল্যাণ্ডে। ইংল্যাণ্ড সতর্ক ও রক্ষণশীল দেশ। কিন্তু এখানেও স্বামীজীর ব্যক্তিত্ব যথেষ্ট আলোড়নের সৃষ্টি করে। বহু ইংরেজ সাধক স্বামীজীর উপদেশ নিয়া অধ্যাত্মপথে অগ্রসর হন।

স্বনামখ্যাত রাজনীতিক নেতা ও মনীষী বিপিনচন্দ্র পাল ১৮৯৬ সালের ফেব্রুয়ারী মাসে ইংল্যাণ্ডে অবস্থান করিতেছিলেন। তাঁহার এক চিঠিতে সেখানকার সমাজে বিবেকানন্দের কর্মসাকল্যের পরিচয় রহিয়াছে। তিনি লিখিয়াছেন, “আমি ইতিপূর্বে ‘দি ডেড পুলপিট’ নামক প্রবন্ধ থেকে ‘বিবেকানন্দ-ইজম’ সম্বন্ধে যে অংশটি উদ্ধৃত করেছি, তা থেকেই আপনি অবগত হয়েছেন যে, বিবেকানন্দের প্রচারিত মতবাদের প্রসারহেতু বহুশত ব্যক্তি প্রকাশ্যভাবে খ্রীষ্টান চার্চের বন্ধন ছিন্ন করেছেন।...এছাড়া, আমি বহু শিক্ষিত ইংরেজ ভক্তলোককে দেখেছি যারা ভারতকে শ্রদ্ধা করতে শিখেছেন এবং ভারতীয় ধর্মমত ও আধ্যাত্মিক তত্ত্ব শ্রবণ করবার জন্য সততই আগ্রহ প্রকাশ করে থাকেন।”

ইংল্যাণ্ডে অধ্যাপক ম্যাক্সমুলার এবং জার্মানীতে দার্শনিক পল ওয়সনের সহিত স্বামীজীর গভীর সৌহার্দ্য স্থাপিত হয়। কিন্তু স্বামীজীর ইউরোপ ভ্রমণের শ্রেষ্ঠ ফল হইতেছে তাঁহার একদল একনিষ্ঠ ভক্তের আত্ম-নিবেদন। মিস মুলার, মিস নোবল ( ভগ্নি নিবেদিতা ) মিঃ স্টার্ডি ও সেভিয়ার দম্পতি ইহাদের অগ্রভূম। এই শিষ্য-শিষ্যাগণ স্বামীজী ও ভারতবর্ষের জন্য নিজ নিজ জীবন উৎসর্গ করিয়া গন্ত হন।

আমেরিকার রামকৃষ্ণ মিশন ও শিক্ষাকেন্দ্রের কাজ তখন দিন দিন বাড়িতেছে। প্রধান ভক্তেরা গুরুর পতাকা একান্ত নির্ভর বহন করিয়া চলিয়াছেন। কিন্তু বিবেকানন্দের সম্মুখে যেন নূতনভর

জীবনের দৃশ্যপট খুলিয়া বাইতেছে। ভারতবর্ষের দুঃখ-দারিদ্র্য মোচনের জন্ত, বিদেশ হইতে সাহায্য সংগ্রহের জন্ত আমেরিকায় তাঁহার আগমন। কিন্তু উদ্দেশ্য তাঁহার তো সফল হয় নাই। তাই এবার দেশে ফিরিতে তিনি ইচ্ছুক। ভারতে বসিয়াই যে ভারতকে আজ বাঁচাইতে হইবে! রোগীর সঞ্জীবনী শক্তি রহিয়াছে তাহার অন্তঃ-সঞ্চারী প্রাণধারায়, সেই শক্তি দিয়াই তাহাকে উজ্জীবিত করিতে হইবে। বিবেকানন্দ এবার ভারত-ভূমির দিকেই দৃষ্টি ফিরাইলেন। কিন্তু সেই স্বভাব-যোদ্ধার অন্তর্লোকে আজ যেন নূতনতর, নিগূঢ়তর জীবনের আশ্বাদ!

১৮৯৬ সালের ৬ই জুলাই তারিখে স্বামীজী তাঁহার ভক্ত মিঃ ফ্রান্সিস লেগেটকে এক পত্র লিখেন। তাঁহার জীবনখারার গুরুত্বপূর্ণ পরিবর্তনের ইঙ্গিত ইহাতে ফুটিয়া উঠিতে দেখি,—“প্রেমময় ভগবান্ লীলাময়, আমি তাঁহার লীলার সঙ্গী। তাঁহার এই জগতের না আছে যুক্তি, না আছে ছন্দ। আর কোন্ যুক্তিই বা তাঁহাকে বাঁধিতে পারে? তিনি লীলাময়, তাঁহার খেলার আগাগোড়াই হাসি-কান্নার খেলা। কি মজা, কি আনন্দ!...এই পৃথিবীর খেলার মাঠে স্কুলের ছেলেমেয়েদের যেন তিনি ছাড়িয়া দিয়াছেন। কাহাকে প্রশংসা করিবে, কাহাকে ভিন্নস্বাক্ষর করিবে? তাঁহাদের না আছে মাথা, না আছে বুদ্ধি। তিনি আমাদের মাথায় একটু বুদ্ধি ঢুকাইয়া দিয়া আমাদের লইয়া তামাশা করিতেছেন। এবার কিন্তু আর তামাশা চলিবে না।...তুই একটা জিনিস আমি এবার শিখিয়াছি। জ্ঞান ও যুক্তি তর্কের উপরে আছে, ‘অনুভূতি’, ‘প্রেম’, আর ‘প্রেমময়’। সেই প্রেমে রসে পাত্র পূর্ণ করিতে পারিলে আমরা আনন্দে ভরপুর হইব, পাগল হইব।”

বিবেকানন্দ নিজ দেশে ফিরিয়া আসিলেন। 'এবার কেন্দ্র ভারতবর্ষ।' পাশ্চাত্যের শিক্ষিতমহলে চাঞ্চল্য সৃষ্টি করার পর বীর নম্রাসী ভারতের নিম্নরূপ জীবনে তুলিলেন এক প্রচণ্ড আলোড়ন।



সুশ্রীময় জাতির উপর পড়িল ঝটিকার আঘাত। আত্মবিস্মৃত, পর-নির্ভর ভারতবর্ষের সম্মুখে সেদিনকার স্বামী বিবেকানন্দ যেন এক পরম বিস্ময়! এই দেশেরই মধ্যে সেদিন এমন এক বিরাট পুরুষ অভ্যুত্থিত হইয়াছেন, যাহার কণ্ঠ-নির্ঘোষ সারা পাশ্চাত্য দেশকে কাঁপাইয়া তুলিয়াছে, যাহার চরণ-ধূলি নিবার জ্ঞাত আধুনিক সভ্যতা-গর্বী মানুষের দল ভিড় করিয়া দাঁড়াইতেছে। জয়গৌরবদীপ্ত এই সন্ন্যাসীর ললাটে রহিয়াছে ভারতেরই আত্মপরিচয়ের তিলকচিহ্ন। ভারতেরই অধ্যাত্মচেতনার মহিমায় তাহা সমুজ্জ্বল। ত্যাগী সন্ন্যাসী, বীর সন্ন্যাসী, বিবেকানন্দের জীবনে জীবন লাভ করিয়া সমগ্র দেশ সেদিন জাগিয়া উঠিল।

ঐশ্বর্যজালক রামকৃষ্ণের জাহ্নদণ্ড দেশে ও বিদেশে নূতন নূতন দৃশ্যপট উন্মোচন করিয়া চলিয়াছে।

অগণিত দেশবাসী বিবেকানন্দের সংবর্ধনায় সেদিন উন্মত্ত। স্কুল কলেজের ছাত্র আর দেশীয় রাজ-রাজড়া সবাই হাত মিলাইয়াছে, একযোগে টানিতেছে তাঁহার শোভাযাত্রার গাড়ি। সে এক অপূর্ব দৃশ্য। ধনী-নির্ধন রাজা প্রজা সকলেরই মধ্যে দেখা দিয়াছে স্বতন্ত্র আনন্দ উচ্ছ্বাস। এই সন্ন্যাসী প্রতিনিধির জয়-গৌরবের পটভূমিকায় ভারতবাসী তাহার নিজের রূপ, নিজের পরিচয়, যেন নূতন করিয়া দেখিয়া নিতে চাহিতেছে। জাতীয় উল্লাস ও গর্বে যে বিস্তারণ সেদিন ঘটিয়া গেল, তাহার মধ্য দিয়া আমাদের নব-জাগৃতির ইতিহাসে দেখা দিল এক নূতন পদক্ষেপ।

এই রাজোচিত সম্মান ও সংবর্ধনার উত্তরে বিবেকানন্দ কহিলেন, “এ সংবর্ধনা আমার নয়, আমার মধ্য দিয়া দেশবাসী আজ সংবর্ধনা জানাইয়াছে ভারতের সন্ন্যাস ধর্মকে, ত্যাগপূত জীবনকে, আর নিজের অধ্যাত্মশক্তিকে।

রুম-ক্লাস্ত দেহে তিনি স্বদেশে ফিরিয়াছেন—দীর্ঘ অবকাশ ও বিশ্রাম এবার তাঁহার প্রয়োজন। কিন্তু যোদ্ধা সন্ন্যাসীর সত্যকার অবসর কোথায়? জীর্ণ অপটু দেহ নিয়াই কর্মশ্রোতে তাঁহাকে

আবার ঝাঁপাইয়া পড়িতে হইল। তাঁহার দেশই যে তাঁহার ঐশ্বর্যত উদ্‌ঘাপনের প্রধান ক্ষেত্র।

স্বামীজী চাহিয়াছিলেন, আমেরিকায় গিয়া ভারতের অধ্যাত্ম-সম্পদ সেখানে বিলাইবেন, পাশ্চাত্যের ভোগসর্বস্ব জীবনের সম্মুখে তুলিয়া ধরিবেন আত্মিক জীবনের বার্তা। আর ইহার পরিবর্তে ব্যবহারিক জীবনে দক্ষ, বিস্তারিত, মার্কিন সমাজ হইতে এদেশের জ্ঞান আনিবেন আর্থিক উন্নয়নের চাবিকাঠি। নিরন্তর মৃতকল্প জনগণকে ঝাঁচাইয়া তুলিবেন অল্পবস্ত্র ও প্রাণ-প্রাচুর্য দিয়া। সে উদ্দেশ্যে তাঁহার ব্যর্থ হইয়াছে বটে, কিন্তু প্রকাণ্ড জয়-গৌরব নিয়া তিনি দেশে ফিরিয়াছেন। পাশ্চাত্যদেশে অধ্যাত্ম-ভারতের জয়পতাকা তিনি প্রোথিত করিয়া আসিয়াছেন। কলে জাতির লাভ হইয়াছে—হুইটি বিরাট বস্তু। একটি, নিদ্রিত ভারতের জাগরণ—অপরটি, ধর্ম-মহাসভার বিজয় ও পাশ্চাত্য ভ্রমণের মধ্য দিয়া আধুনিক ভারতের জনসমাজে বিবেকানন্দের নেতৃত্ব প্রতিষ্ঠা। পাশ্চাত্যের জয়মালা লাভের কলে দেশের জনমানসের অধিকার অবলীলায় তাঁহার করায়ত্ত হইয়াছে। জাতির আশা ও আকাঙ্ক্ষা আজ তাঁহাতেই কেন্দ্রীভূত হইতে চাহিতেছে। আর এই কেন্দ্রস্থল হইতেই স্বামীজী তাঁহার অধ্যাত্মশক্তির উষ্ণ ধারাস্রোত সমগ্র সমাজ দেহে সঞ্চালিত করিলেন।

দেশকে জাগাইয়া তুলিতে, তাহার প্রাণশক্তির উদ্বোধন করিতে, যে প্রয়াস এতদিন করিয়া আসিয়াছেন, তাহা কি এবার সার্থক হইবে? মহান্ হিমগিরির তুষার স্তূপ এবার তবে কি গলিয়া ঝরিয়া পড়িবে?

দেশবাসী উৎকর্ষ হইয়া বিবেকানন্দের বাণী শুনিল। এ বাণী ভারতাত্মার বাণী, রামকৃষ্ণের অধ্যাত্ম-সন্তানের বাণী—পাশ্চাত্যের ধর্মযুদ্ধের অভিজ্ঞতায় ইহা সমৃদ্ধ। ভারতবর্ষের প্রতি ধূলি-কণার প্রতি শ্রদ্ধায় ইহা ভরপুর, আধ্যাত্মিক ভারতের চেতনায় ইহা মহিমময়। আধুনিক ভারত এমন শক্তি-দৃষ্ট এমন উদ্দীপনাময় ভাষণ আর কখনও শুনে নাই।

স্বামীজী আহ্বান জানাইলেন, “হে আমার ভারত ! জাগ্রত হও ! কোথায় তোমার জীবনী শক্তি ? সে শক্তি যে তোমারই আত্মায় ।”...প্রত্যেক ব্যক্তির মতোই প্রত্যেক জাতির জীবনেও একটি করিয়া মূল সুর বর্তমান থাকে । ইহাই তাহার প্রধান ও কেন্দ্রীয় সুর, ইহাকে কেন্দ্র করিয়াই গড়িয়া উঠে তাহার মহান জীবনের একতান । ভারতবর্ষের এই মূল সুর রহিয়াছে তাঁহার অধ্যাত্ম-সত্যায় । ইহাকেই ধারণ করিয়া জাতীয় পুনরুজ্জীবন সাধনের নির্দেশ তিনি দিলেন । কহিলেন, “তোমার ধর্মের প্রাণশক্তির মধ্য দিয়েই সমাজ সংস্কার আর রাজনীতির কথা প্রচার করতে হবে । প্রত্যেক মানুষকে তার নিজের পথটি বেছে নিতে হয়, তেমনি প্রত্যেক জাতিও তার নিজের পথ গ্রহণ করে । আমরা ভারতবাসী, আমাদের পথ অনেক আগেই বেছে নিয়েছি । সে পথ হলো—অবিনশ্বর আত্মার প্রতি বিশ্বাস ।”

ভাষণ শুনিয়া মনে হয়, জাতির চৈতন্য উদ্বোধনের জন্ত স্বামী বিবেকানন্দ ডুব দিয়াছেন প্রাচীন ভারতের আত্মার গভীরে । সেখান হইতে প্রাণরস আকর্ষণ করিয়া আনিয়া নব জাগ্রত ভারতবাসীর মানসক্ষেত্রে ভারতধর্মের বীজ বপন করিয়া চলিয়াছেন ।

ভারতের এই আধ্যাত্মিক চেতনার বিকাশ শুধু তাহার নিজের জাগরণের জন্ত, নিজের স্বাক্ষর সিদ্ধির জন্ত নয় । সারা পাশ্চাত্য জগৎও রহিয়াছে ইহারই প্রতীক্ষায় । এই চেতনাকে উদ্ধুদ্ধ করিয়া স্বামীজী ডাক দিলেন, “তোমার হাতে যে শক্তি আছে তা ব্যবহার করো । সে শক্তি এত বিরাট যে, যদি তুমি শুধু তাহা মনেপ্রাণে উপলব্ধি করো ও নিজেকে তার যোগ্য ক’রে তোলা, তবে তুমি বিশ্বের আমূল পরিবর্তন সাধন করতে পারবে । কারণ, ভারতবর্ষ হচ্ছে—বিশ্বজগতের মানস-গঙ্গা ।”

এদেশের সমাজজীবনে তখন সংস্কার আন্দোলন প্রবল বেগে চলিতেছে । কিন্তু এ আন্দোলন ছিল পাশ্চাত্য শিক্ষা-দীক্ষা হইতে স্বামীজী মনেপ্রাণে বুঝিয়াছিলেন, এ সংস্কার আন্দোলন

জাতির মর্মমূলে প্রবেশ করিতে পারে নাই। ভারতের ঐতিহাসিক ধারা এবং সনাতন ধর্মের বিশেষত্ব ও স্বাতন্ত্র্য সংস্কারকা্মীরা বুঝিতে পারেন নাই। তাই ইহাদের সহিত পার্থক্য জানাইয়া নিজ আদর্শ তিনি ঘোষণা করিলেন—“সমাজকে ভেঙে-চুরে সংস্কারকেরা উন্নয়নের যে পথ দেখালেন তা সাকল্যের পথ নয়। এই সংস্কারকদের আমি বলতে চাই, তাদের চাইতে আমি আরও বড় সংস্কারক। তাঁরা এক-আধটুকু সংস্কার চান—আমি সেস্থলে আমি চাই আমূল সংস্কার। আমাদের পার্থক্য সংস্কারের কর্ম-পদ্ধতিতে। তাঁদের প্রণালী ভেঙে-চুরে ফেলা—আমার প্রণালী সংগঠন। আমি সংস্কারে বিশ্বাসী নই, আমি স্বাভাবিক এবং মূলগত উন্নতিতে বিশ্বাসী।”

ঋণসমূলক সংস্কার আর যুক্তিহীন রক্ষণশীলতা—এই দুইটি হইতেই বিবেকানন্দ নিজেকে পৃথক করিয়া নিলেন। বেদান্তের তত্ত্বকে সমাজের সর্বস্তরে ছড়াইয়া দিয়া এক অখণ্ড অধ্যাত্মসমাজ তিনি গড়িয়া তুলিতে চান। তামসিক জড়বুদ্ধি ও সামাজিক ভেদ-বৈষম্য এই দেশে এক চরম বিপর্যয় আনিয়াছে। ইহার বিরুদ্ধে স্বামীজী ঘোষণা করিলেন বৈদান্তিক অভেদ-তত্ত্ব। সর্বজীবের অভ্যন্তরে অমুখ্যাত রহিয়াছেন শিব। এই শিবের পূজায় জানাইলেন আহ্বান—“যিনি তোমার অন্তরে বাহিরে, তুমি ঐহার স্কুলদেহ ও যিনি ‘সর্বত পাণিপাদো’, শুধু সেই বিরাট আত্মার পূজা করো।” জাতি সংগঠনের জন্তু চাই বৈরাগ্যবান্ তেজস্বী কর্মীদল। এ জন্তুও তিনি সেদিন জানান তাঁহার উদাত্ত আহ্বান।

শ্রীরামকৃষ্ণের সাধন-তত্ত্বে শক্তি, ভক্তি ও জ্ঞান এই তিনেরই সমন্বয় রহিয়াছে। সর্ব মত ও পথকেও ঠাকুর মিলাইয়া নিয়াছেন। কিন্তু স্বামীজীর মধ্যে যেন তাহার কিছুটা ব্যতিক্রম দেখা বাইতেছে। বিবেকানন্দ তাঁহার পরম প্রিয় অধ্যাত্ম-সন্তান। অদ্বৈতবাদের প্রাতি তাঁহার আত্যন্তিক নিষ্ঠা যেন একদেশদর্শিতার পরিচয় দিতেছে। ঠাকুরের সমন্বয়ের বাণীর মূলকথা কি তাঁহার শ্রেষ্ঠতম শিষ্য তুলিয়া বলিয়াছেন

স্বামীজীর ‘বেদান্তের আদর্শ’ নামক বক্তৃতায় এ প্রশ্নেরই উত্তর সেদিন পাওয়া গেল : “আমি অভিযোগ শুনেছি যে, আমি অদ্বৈত-বাদের কথা খুব বেশী ক’রে বলি আর দ্বৈতবাদের কথা খুব কম বলি। হ্যাঁ, আমি খুব ভাল ক’রেই জানি, দ্বৈতবাদের মধ্যে কি অপরিমেয় ভাব রসের উন্মাদনা, কি অসীম আনন্দোচ্ছ্বাস রয়েছে। সমস্তই আমি জানি। কিন্তু এখন আমাদের কাঁদবার সময় নয়—এখন কোমল হবার সময়ও নয়। এই কোমলতা এদেশে যুগ যুগ যাবৎ বর্তমান—আর আমরা যেন তুলার মতোই নরম হয়ে গিয়েছি। আজ আমাদের দেশ যা চায়, তা হলো লোহের পেশী, ইস্পাতের স্নায়ু, বিপুল ইচ্ছাশক্তি, যা অপ্রতিরোধ্য, যা অমোঘ। এতে যদি সন্মুখের অতল গভীরে নামতে হয়, যত্নের মুখোমুখি দাঁড়াতে হয়, তাতেও ক্ষতি নেই। তাই আজ আমাদের একান্ত প্রয়োজন দৃঢ়তা। এ দেশকে গড়ে তুলবার জ্ঞান, শক্তিশালী ও সুপ্রতিষ্ঠিত করবার জ্ঞান, আবশ্যক অদ্বৈতবাদের আদর্শকে উপলব্ধি করা—ঐক্যের আদর্শকে উপলব্ধি করা, আয়ত্ত করা। আমাদের চাই বিশ্বাস, বিশ্বাস—প্রবল আত্মবিশ্বাস।”

১৯২৭ সালের ১লা মে স্বামীজী বলরামবাবুর ভবনে শ্রীরামকৃষ্ণের গৃহী ও সাধু ভক্তদের এক সভা আহ্বান করিলেন। সকলের অনুমোদনক্রমে স্থাপন করা হইল ‘রামকৃষ্ণ মিশন’। বিবেকানন্দ হইলেন ইহার মূল সভাপতি আর স্বামী ব্রহ্মানন্দ কলিকাতা কেন্দ্রের সভাপতি।

মিশন প্রতিষ্ঠিত হইল বটে, কিন্তু গুরুভাইদের অনেকে প্রথমটায় স্বামীজীর আদর্শ ও কর্মশূচী সোৎসাহে গ্রহণ করিতে পারিতেছেন না। কাহারও কাহারও মনে নানা দ্বিধা দ্বন্দ্ব আসে, প্রশ্ন জাগে—‘জীব-সেবা, লোকশিক্ষা, সভা-সমিতি এসব কি শ্রীরামকৃষ্ণের অভিপ্রেত ছিল। নিজের কথা-বার্তায়, উপদেশে, আচরণে ঠাকুর কি ঈশ্বর উপলব্ধির উপরই সর্বদা জোর দিতেন না? স্বামীজীর পথে চলতে গিয়ে ঠাকুরের পথ থেকে কি তারা দূরে সরে যাচ্ছেন না?

শ্রীরামকৃষ্ণের উপদেশের নূতন ভাষ্য করিতেছেন বিবেকানন্দ । কেউ কেউ এ ভাষ্যের বিরুদ্ধে মত প্রকাশ করিলেন ।

স্বামীজী উত্তেজনায় কাটিয়া পড়িলেন । কহিলেন, “অনন্তভাবনায় ঠাকুরকে তোরা বুঝি গোদের বুদ্ধির গাণ্ডে বদ্ধ ক’রে রাখতে চাস্ ? তা হবে না । আমি এ গাণ্ড ভেঙে তাঁর ভাব সারা পৃথিবীময় ছ’ড়িয়ে দিয়ে যাব । আমাকে তিনি কখনও তাঁর পূজা প্রচার করতে বলেন নি । ধ্যান ধারণা আর ধর্মের যে সব উচ্চ তত্ত্ব আমাদের শিখিয়ে গেছেন, সেগুলি উপলব্ধি ক’রে জগৎকে শিক্ষা দিতে হবে । মনে করিস নি, আমি আর একটা নূতন দল স্থাপন করতে বসেছি । প্রভুর পদতলে আশ্রয় পেয়ে আমরা সবাই ধন্য হয়েছি এবার ত্রিজগতের লোকের কাছে তাঁর ভাব বিতরণ করতে হবে । একাজের জন্যই যে আমাদের জন্ম !”

ইহার পর স্বামীজী দৃঢ় কণ্ঠে যাহা বলিলেন, তাহা শ্রদ্ধাপ্রভায়ের শক্তিতে উদ্ভব, আর ঠাকুরের সাক্ষাৎ প্ররণায় সমুজ্জল । বলিলেন, “ত্মাৎ, প্রভুর দয়ার বহু নিদর্শন আমি এ জীবনে পেয়েছি । বেশ অনুভব করেছি, তিনি আমার পেছনে দাঁড়িয়ে এসব কাজ করিয়ে নিচ্ছেন । যখন খেতে না পেয়ে আমি গাছতলায় পড়ে থাকতুম, যখন কোপীন বাঁধবার কাপড় পর্যন্ত ছিল না, যখন এক পরমাণু সম্বল নেই অথচ পৃথিবীটা ঘুরবো মনে করেছি, তখনও দেখেছি তাঁর দয়ার যেখানে আমি গিয়েছি, সেখানেই সাহায্য পেয়েছি । এবার যখন বিবেকানন্দকে দেখবার জন্য সিকাগোর রাস্তায় মেয়ে মদ্রর গাঁদি লেগে যেত তখনও তাঁরই দয়ার তত মানসম্মত—যার শতাংশের একাংশ পেলেও সাধারণ লোক একেবারে ফেপে যায়—অন্যায়সে হজম করেছি । প্রভুর ইচ্ছায় যেখানে গেছি, বিজয় লাভ করেছি । এখন চাই এই দেশের জন্য কিছু করতে । তোরা সন্দেহ ছেড়ে আমার কাজে সাহায্য কর, দেখবি তাঁর ইচ্ছায় সকলেরই কল্যাণ হবে ।”

আর একদিনের বাদামুবাদেও স্বামীজী গজিয়া উঠিয়া ধ্যানভক্তন-পরায়ণ, ঈশ্বর দর্শনের জন্য ব্যাকুল গুরুভাইদের বলেন, “মনে করেছি

এতেই তোদের মুক্তি আসছে হাতের মুঠোয় ? আর শেষের দিনে রামকৃষ্ণঠাকুর এসে তোদের হাতে ধরে একেবারে গোলোকে টেনে নিয়ে যাবেন ! আর জ্ঞানের চর্চা, লোকশিক্ষা এবং আর্ত অনাথের সেবা, এ সব মায়া—কেননা পরমহংসদেব ওসব করেন নি । আর কাকে কাকে নাকি বলেছিলেন, ‘আগে ভগবান্ লাভ কর—তারপর আর সব ।’ পরের উপকার করতে যাওয়া অনধিকার চর্চা,—যেন ভগবান্ লাভ করা মুখের কথা । ভগবান্ একটা খেলনা কিনা যে, খুঁজলেই মুঠোর মধ্যে এসে পড়বে ।”

বিবেকানন্দ মনেপ্রাণে বিশ্বাস করেন, ঠাকুর শ্রীরামকৃষ্ণ ঐশ্বর্য কর্মের মহানায়ক । ঠাকুরের করুণাঘন কপটিই তাঁহার অন্তরে চির-ভাস্বর হইয়া রহিয়াছে । তাই তাঁহার শ্রীমুখের বাণী—শিবজ্ঞানে জীবের সেবা—স্বরূপ রাখিয়াই ব্যাকুল হইয়াছেন সেবাধর্ম অনুসরণের জন্ত, কর্মযোগের একটা ভিত্তিভূমির জন্ত । করুণাঘন ঠাকুরের জ্ঞান-প্রেমের ভিত্তিতে স্বামীজী তাঁহার সেবাধর্মের নব ব্যাখ্যা—কর্মযোগ অনুষ্ঠানের নব পরিকল্পনা স্থির করিলেন ।

শুকপ্রাতারা বিশ্বাস করিতেন, ঠাকুর তাঁহার প্রিয়তম সন্তান স্বামীজীর মধ্য দিয়াই তাহার লীলা প্রকটিত করিতেছেন । অপার স্নেহ ভালবাসায় ও নেতৃত্ব শক্তিতে স্বামীজীও তাঁহাদের বাঁধিয়া রাখিয়াছেন । কিন্তু ভবুও সন্দেহের যে ছায়াপাত মাঝে মাঝে হয়, এবার তাহা দূরীভূত হইল ।

ইহার পর দেখা যায়—দৃশ্যপট একেবারে বদলাইয়া গিয়াছে । যে রামকৃষ্ণানন্দ ঠাকুরের পূজা ও ভোগরাগ ছাড়িয়া বার বৎসরের মধ্যে একদিনও মঠের বাহিরে যান নাই, তিনি মাজাজে প্রচার-কার্যে বাহির হইলেন । অথগুনন্দ মূর্শিদাবাদের হুভিক্ষ ত্রাণকার্যে আত্মনিয়োগ করিলেন । সারদানন্দ এবং অভেদানন্দ ইতিপূর্বে প্রচারের উদ্দেশে ভারতের বাহিরে চলিয়া গিয়াছেন । লোকহিতে ব্রতী ‘মিশনের’ প্রকৃত ভিত্তি এইবার ধীরে ধীরে গড়িয়া উঠিল ।

আমেরিকা হইতে স্বামীজী যে অর্থ সংগ্রহ করিয়া আনেন, মঠ

নির্মাণের উদ্দেশ্যে তাহা দ্বারা পয়তাল্লিশ বিঘা জমি ক্রয় করা হয়। অথচ এই মঠ ও সেবা-সংস্থার এই ভিতটিকে গোড়াতেই তিনি কিন্তু প্রয়োজনবোধে উড়াইয়া দিতে চাহিয়াছিলেন। কলিকাতায় তখন প্লেগের মহামারী শুরু হইয়াছে। জনগণ আতঙ্কে আস্থর। মঠের কর্মীদের স্বামীজী সেবাকার্ষে উদ্বুদ্ধ করিতেছেন, এমন সময়ে একজন প্রশ্ন তোলেন, প্রচুর অর্থ ছাড়া এ কাজ সম্ভব নয়। কিন্তু সে অর্থ কোথা হইতে পাওয়া যাইবে?

মহাবৈরাগী বিবেকানন্দ তৎক্ষণাৎ উত্তর দিলেন, “প্রয়োজন হলে এখনি মঠের সবটা জমি বিক্রি করে দেবো, কাজ চালিয়ে যাবো। আমরা ফকির, মুষ্টিভিক্ষা করে আর গাছতলায় শুয়ে দিন কাটাতে পারি। যদি জায়গা জমি বিক্রয় করলে হাজার হাজার লোকের প্রাণ বাঁচাতে পারি, তবেই তো এসব সার্থক। নইলে কিসের এই জায়গা, কিসের জমি?” সারা জীবনের আদর্শকে নিঃশেষে অবতরণ করার এমন সাহস ও মনোবৃত্তি কয়জনের আছে? ভাগ্যক্রমে সেবাব্রতীদের কর্ম উদ্যাপনে এই চরম ব্যবস্থার প্রয়োজন নেই সঙ্কটে দেখা দেয় নাই।

সেদিন বিবেকানন্দ এক ভক্তকে বেদান্ত পড়াইতেছেন। এমন সময় গিরিশ ঘোষ সেখানে আসিয়া উপস্থিত। স্বামীজী তাঁহাকে উদ্দেশ্য করিয়া রহস্যচ্ছলে কহিলেন, “সি, তুমি তো এসব কিছুই পড়লে না, শুধু কেঁটো বিটু নিয়েই দিন কাটালে!”

গিরিশচন্দ্র উত্তর দিলেন—“স্বামীজী, ওসবে তোমারই বেশী প্রয়োজন। কারণ, তোমাকে দিয়েই যে ঠাকুর লোকশিক্ষা দিতে চেয়েছিলেন।”

তারপর গিরিশচন্দ্রের কৌশলে এক বিচিত্র দৃশ্যের অবতারণা হইল। গিরিশ মুচকি হাসিয়া ধীরে ধীরে বলিতে আরম্ভ করিলেন, “আচ্ছা নরেন, তুমি তো বেদবেদান্ত চের পড়েছ, কিন্তু তাতে অগণিত হৃদয়ের হৃৎক, বৃদ্ধকুর আর্তনাদ, আর পাপাচারগুলো নিবারণিত হয় কি?” সঙ্গে সঙ্গে প্রতিভাবান্ নাট্যকার তাঁর অনবদ্য ভাষায় হৃৎক



দারিদ্র্যাক্রিষ্ট বাস্তব জগতের এক হৃঃসহ, বীভৎস চিত্র আঁকা শুরু করিলেন। স্বামীজীর হৃদয় ততক্ষণে বেদনায় বিকোভে অধীর হইয়া উঠিয়াছে। নয়নের উদ্গত অশ্রু গোপনের জন্ত তিনি দ্রুতপদে কক্ষ হইতে বাহির হইয়া যান। গিরিশ তখন উপস্থিত ভক্তটিকে যে কথাটি বলিলেন, বিবেকানন্দের অধ্যাত্ম-জীবনের তাহা এক চমৎকার ভাষ্যস্বরূপ। বলিলেন, “দেখলি তো তোর গুরুর হৃদয়টা! এই যে পরের হৃঃথে এমন অশ্রুমোচন, এই যে মহাপ্রাণতা—এই জন্তই আমি তাঁকে বড় বলে মানি, তাঁর বিচ্ছেবুদ্ধির জন্ত নয়! হৃঃখ-হৃদশার কথা যেই শোনা, অমনি বেদ-বেদান্ত কেলে উঠে যাওয়া। সমস্ত বিচ্ছে-বুদ্ধি যেন পরপ্রমে গলে গেল। তোদের স্বামীজী যেমন জ্ঞানী ও পণ্ডিত, তেমনি ঈশ্বরভক্ত ও লোকসেবক।”

১৮৯৮ সালের জুলাই মাস। উত্তর ভারতের বিভিন্ন স্থানে ভ্রমণ করার পর স্বামীজী অমরনাথ দর্শনে রওনা হইলেন। সঙ্গে রহিয়াছেন স্নেহধন্য শিষ্যা নিবেদিতা। বুটেন-কন্ঠা মিস্ মার্গারেট নোবল একদিন স্বামীজীর আত্মিক প্রেরণায় উদ্ভুদ্ধ হন এবং তাঁহাকে গুরুরূপে বরণ করেন। তারপর গুরুর মাতৃভূমি ভারতের সেবায় নিজেই করেন নিবেদন। নাম হয় তাঁর নিবেদিতা। এ সময়ে স্বামীজীর শিক্ষা ও প্রেরণায় সাধিকা নিবেদিতার আত্ম-নিবেদনের সার্থকতম রূপটি যেন মূর্ত হইয়া উঠিতেছে। স্বামী বিবেকানন্দের মানস-কণ্ঠ্যরূপে ঘটিতেছে তাঁহার আত্মপ্রকাশ।

নিবেদিতার আগে কোনো পাশ্চাত্য রমণী হিন্দুধর্মের সম্মাসাশ্রম গ্রহণ করে নাই। এদিক দিয়া তিনি অনন্থা। এই পাশ্চাত্য-শিষ্যার জীবনে যেটুকুও বা ভাবালুতার স্পর্শ বর্তমান ছিল স্বামীজীর কঠোর নিয়ন্ত্রণ ও সাধন-নির্দেশ তাহা নিকরুণভাবে মুছিয়া দিয়াছিল।

স্বামীজী চাহিয়াছিলেন, নিবেদিতা হিন্দু নারীদের শিক্ষায় ব্রতী হোক, কায়মনোবাক্য গুহ্যচারিণী হিন্দু নারীরূপে গড়িয়া উঠুক। এ বিষয়ে স্পষ্ট নির্দেশও দিয়াছিলেন—“তোমায় এখন চিন্তায়, ভাবে, অভ্যাসে ও প্রয়োজনে সম্পূর্ণ হিন্দু হইতে হইবে। তোমার জীবনকে

এখন ভিতরে বাইরে নৈষ্ঠিক ব্রাহ্মণ-ব্রহ্মচারিণীর আদর্শে গঠিত করিতে হইবে। যদি তোমার খুব প্রবল আগ্রহ থাকে তবে উপায় ঠিক জুটিয়া যাইবেই। কিন্তু তোমার অতীত জীবনটাকে ভুলিতে হইবে—এমন কি তার স্মৃতিটুকু পর্যন্ত তুমি রাখিতে পারিবে না।”

নিবেদিতা ছিলেন স্বামীজীর চরণে উৎসর্গাত পাশ্চাত্যের শ্রেষ্ঠ অর্থ্য। গুরু তাঁহার এই শিষ্যকে ভারতীয় ধর্ম ও সমাজের সেবার এক যোগিনীরূপে গাড়িয়া তুলিয়াছিলেন।

অমরনাথে যাওয়ার কালে দেখা যায় স্বামীজীর এক অদ্ভুত রূপান্তর। অদ্বৈতবাদের পতাকাবাহী সেই যোদ্ধা সন্ন্যাসী আর নাই। এখন তিনি এক তীর্থচারী ভরু সাধক, প্রভু অমরনাথের নিষ্ঠাবান উপাসক। শ্রীরামকৃষ্ণের ভক্তি-মার্গে সন্তোষান যেন তাঁহাতে এবার সঞ্চারিত হইয়াছে। গুরুদেবের এই নতুন মূর্তি ও দিব্য কমলীয়তা দর্শনে সোদন শিষ্যা নিবোধতার বিশ্বাসের অন্ত ছিল না।

স্নানান্তে অমরনাথের তুষার-লিঙ্গের সম্মুখে স্বামীজী সাষ্টাঙ্গ প্রণত হইলেন। গুহামধ্যে শত শত ভক্তের কণ্ঠে উদ্গীত হইতেছে স্তবগান। এই স্তবগানের অধ্বনি চালাইয়াছে আগ্রহাকুল দর্শনাধীদের দল। শিব বিগ্রহের দর্শনে ভাগ্যবান সাধকেরা লাভ করিতেছেন অসুখ-অমৃত।

প্রভু অমরনাথের দিব্য দর্শন পাইলেন স্বামীজী, ধ্যানাবিষ্ট দেহ ঝাড়াইয়া ফেলল বাহুজ্ঞান। বহুক্ষণ পরে চেতনা ফিরিয়া আসিলে দেখা গেল, চোখ মুখ স্বর্গীয় আনন্দের ছটায় উদ্ভাসিত।

সঙ্গীরা বার বার প্রশ্ন করেন, অতীন্দ্রিয় লোকের কোন্ দর্শন দান অভিজ্ঞতা স্বামীজীর হইয়াছে। কিন্তু উত্তরে তিনি কোনো কিছুই সেখানে প্রকাশ করিলেন না।

উত্তরকালে ঘনিষ্ঠ মহলে স্বামীজী এই প্রসঙ্গে বলিতেন—স্বয়ং অমরনাথ তাঁহাকে কৃপা করিয়া এই সময়ে দর্শন দেন এবং প্রভু তাঁহাকে ইচ্ছামত্বের বরও প্রদান করেন। সমাধিময় মহাযোগী গুরুর চিত্রাদনই বিবেকানন্দের উপাস্ত। তাঁহার দিব্য দর্শন সেদিন

স্বামীজীর সর্বসত্তার আনন্দময় অনুভূতির তরঙ্গ তুলিয়া দেয়। অন্তর্লোকে ‘শিব শিব’ ধ্বনি নিরন্তর ধারায় স্পন্দিত হইতে থাকে।

অমরনাথ হইতে নামিয়া আসিয়া বিবেকানন্দ আবার এক নূতন ভাবময় রাজ্যে প্রবেশ করিলেন। আত্মশক্তির ধ্যানে দেহ-মন, প্রাণ তখন তন্ময় হইয়া উঠিয়াছে। তিনি দেখিতেছেন, চারিদিকে জগজ্জননী মহামায়ার লীলা প্রকটিত, আর তিনি যেন তাঁহারই অঙ্কে ক্ষুদ্র শিশুটি হইয়া রহিয়াছেন। মুখে নিরন্তর রামপ্রসাদী সুরের গুণ্‌গুনানি, আর অন্তরে স্বর্গীয় আনন্দের উচ্ছ্বাস।

শিষ্যদের একদিন কহিলেন, “যে দিকে ফিরছি, কেবলই মায়ের বরাহ মূর্তি দেখছি। তিনি যেন আমায় ছোট ছেলের মতো করে, নিজের হাতে ধরে নিয়ে, বেড়িয়ে বেড়াচ্ছেন।”

মাতৃসাধকের অন্তরে তখন ভক্তির প্রবল প্রস্রবণ বহিতেছে। কাশ্মীরের ডাল-হুদের উপর হাউসবোটে তখন বাস করিতেছেন। মুসলমান মাঝির কণ্ঠাটিও তাঁহার চোখে যেন আত্মশক্তির এক কল্যাণময়ী প্রকাশ। জননী উমা জ্ঞানে যখন এই বালিকা মুসলমান কুমারীটিকে তিনি অর্চনা করিতে বসিতেন, ভক্ত ও দর্শনার্থীদের নয়ন অশ্রুসজল হইয়া উঠিত।

ধ্যান-তন্ময়তার মধ্য দিয়া ক্রমে বিবেকানন্দের হৃদয়ে জাগিয়া উঠে ব্রহ্মময়ী মহাকালীর উপলব্ধি। ‘জননী মহাকালী’ নামক কাব্য-বন্দনাটি এই সময়ে তাঁহার লেখনী হইতে নিঃসৃত হয়। ভাবাবিষ্ট অবস্থায় এটি রচনা করিবার পরই স্বামীজীর বাহ্য চেতনা দীর্ঘ সময়ের জন্য বিলুপ্ত হইয়া যায়।

অদ্বৈতবাদী, বেদান্তকেশরী স্বামীজীর অন্তর এখন মাতৃধ্যানে ভরপুর। আত্মশক্তির প্রলয়ঙ্করী মূর্তির উপাসনা যেন তাঁহাকে পাইয়া বসিয়াছে। এই সময়ে প্রায়ই বলিতেন, “ভীমার উপাসনা দ্বারাই যে ভয় থেকে পরিত্রাণ পাওয়া যায়, অনন্ত জীবন লাভ করা যায়। সুত্বকে চিন্তা কর—লোলরসনা কালীকে ধ্যান কর। মা-ই

১ সিন্টার নিবেদিতা : ড মাস্টার অ্যাং আই স’ হিম্।

স্বয়ং ব্রহ্ম । তাঁর আঘাত, অভিশাপও যে আশীর্বাদ ! হৃদয়টিকে প্রশ্রয় ক'রে ফেল । তবেই না মায় দেখা পাবে !”

“নাচুক তাহাতে শ্রামা” কবিতায় স্বামীজীর অন্তরলোকে উদ্ভাসিত এই সংহাররূপিণী তত্ত্বটি ফুটিয়া উঠিয়াছে :—

সত্য তুমি মৃত্যুরূপা কালী,  
সুখ বনমালী—তোমার ছায়া ।  
করালিনী কর কঠচ্ছেদ,  
হোক মায়া ভেদ—  
সুখ স্বপ্নে দেহ দয়া ॥

স্বামীজী সেদিন কাশ্মীরের ক্ষীরভবানী দেবী-বিগ্রহ দর্শন করিতে আসিয়াছেন । কি এক দৈবী আকর্ষণে এই প্রাচীন বিগ্রহের প্রতি তিনি খুব আকৃষ্ট হইয়া পড়েন । কয়েকদিন মায়ের মন্দিরে বসিয়া নিবিষ্ট হন পূজা ও ধ্যান-জপে ।

একমনে সেদিন মন্দিরে বসিয়া জপ করিতেছেন । এক সময়ে দৃষ্টি নিবদ্ধ হইল ভগ্ন দেউলের উপর । বিধর্মীর আক্রমণ ও অত্যাচারে স্থানে স্থানে ইহা বিধ্বস্ত হইয়াছে । এক অব্যক্ত ব্যথায় নাথকের অন্তর বার বার গুমরিয়া ওঠে । মনে খেলিয়া যায় চিন্তার বলক, “মায়ের ভক্তেরা মন্দির ও বিগ্রহের এই অত্যাচার অবমাননা কি ক'রে সহ্য করেছে ? আমি নিজে সে সময়ে উপস্থিত থাকলে কিছুতেই এটা ঘটতে দিতুম না, নিজের প্রাণ আহুতি দিয়ে করতুম মায়ের মন্দির রক্ষা ।”

সহসা শোনা যায় এক অলৌকিক কঠম্বর !—“ওরে, আমার মন্দির ভেঙেছে, তোর তাতে কি ? তুই কি আমার সর্বত্র রক্ষা করিস,—না আমিই তোকে রক্ষা করি ? আমার ইচ্ছায় কি এখানে পাত-তলা স্বর্ণখচিত মন্দির এখনি গড়ে উঠতে পারে না ?”

বিবেকানন্দ চমকিয়া উঠিলেন । এই দৈববাণীর আঘাত তাঁহার হৃদয়-সজ্জার তুলিল প্রচণ্ড আলোড়ন । সত্যই তো । আত্মশক্তি.

জগজ্জননী যিনি, সর্বশক্তির উৎস যিনি, তাঁহার শক্তিকে এমন সীমিত বলিয়া তিনি ভাবিবেন কেন? কেন তাঁহার এই ধৃষ্টতা? মায়ের নিরাপত্তা বিধান তিনিই করিবেন, কেনই বা তাঁহার এই অহংবোধ? মায়ের সংসার মা-ই তো চালাইয়া থাকেন। পরাশক্তি তিনি—তাঁহার শক্তিতে বিশ্বব্রহ্মাণ্ড বিধৃত। গ্রহ-তারা দল তাঁহারই প্রেমের সূত্রে গাঁথা। তাঁহারই জ্ঞানে সর্বসৃষ্টি চৈতন্যময়, স্পন্দিত বিশ্বব্রহ্মাণ্ডের এক কোণে, ক্ষুদ্র অঙ্গনে ক্রীড়ারত শিশু এই বিবেকানন্দের শক্তি সত্যই কতটুকু?

কীর্ত্তবানী মন্দিরের অলৌকিক অভিজ্ঞতা স্বামীজীর জীবনে এক নূতন অধ্যায়ের সূচনা করে। তাই শ্রীনগরে যখন ফিরিলেন সঙ্গীরা তাঁহার চোখে মুখে দিব্য জ্যোতির আভা দেখিয়া চমকিয় উঠিলেন।

দেবী ভবানীর প্রসাদী ফুল সকলের মাথায় ঠেকাইয়া, ভাব গদগদ স্বরে, বিবেকানন্দ বলিলেন, “ওরে, এখন আর ‘হরি ওঁ’ নয়। এখন আমার শুধু—‘মা’ আর ‘মা’। মা যে নিজে আমার বৃহত্তম সত্যটি বুঝিয়ে দিলেন, তাঁর সংসার তিনি নিজেই দেখছেন, আমার কেন একে রক্ষা করবার এমন স্পর্ধা? তবে স্বদেশের ভাবনা ভাববারই বা আমার কি দরকার? ব্রহ্মময়ী মায়ের কোলে আমি যে একটা ক্ষুদ্র শিশু মাত্র।”

তারপর বিশ্বয়াবিষ্ট শিষ্যদের লক্ষ্য করিয়া কহিলেন, “আর য কিছু বলবার ব্যাপার আছে তা প্রকাশ করতে পারছি। বলার আদেশ নেই।”

সকল মায়িক আবরণের উচ্ছেদ নিজের অধ্যাত্ম-সত্তাকে প্রসারিত করিয়া দিতে বিবেকানন্দ এবার প্রয়াসী হইয়াছেন। ব্যবহারিক জীবনের চারিদিকে বহুতর কর্মের তন্তু জড়ানো। কীর্ত্তবানীর দৈবী কল্যাণবাণী আজ সেগুলি শিথিল করিয়া দিল।

অন্তরের অন্তস্তলে স্বামীজী উপলব্ধি করিতে চাহিতেছেন, তিনি কোনো ধর্মোপলব্ধির স্রষ্টা নহেন, জননেতা নহেন,

এখন সর্ব মায়ামোহ-ছিন্ন সন্ন্যাসী—জগজ্জননীর কোলে উপবিষ্ট এক বৈরাগী সান্তান !

ধ্যানতন্ময় স্বামীজী এই সময়ে প্রায়ই একলা থাকিতে পছন্দ করিতেন । আবার ভাবাবেশে মাঝে মাঝে কোথায় কোন্ স্মৃদ্যে যেন অদৃশ্য হইয়া যাইতেন ।

একদিন সঙ্গীরা বিস্মিত হইয়া দেখেন, কোথা হইতে মস্তক মুগুন করিয়া এক দীন সন্ন্যাসীর বেশে তিনি আসিয়া উপস্থিত । মুখে স্বরচিত—‘জননী মহাকালীর’ শ্লোকগাথা । মায়ের প্রলয়ঙ্করী শক্তির বর্ণনা দিতে গিয়া বলিয়া উঠিলেন, “জ্বাখো, এর প্রতিটি কথা সত্য । আর আমি তা কাজেও প্রমাণ করেছি । জ্বাখো, আমি মৃত্যুকে বরণ করেছি ।”

মহামায়ার সূক্ষ্মতম আবরণ তিনি দূর করিয়াছেন, সর্ব বন্ধনের জাল করিয়াছেন ছিন্ন,—এই কি তাঁর মৃত্যুবরণ ?

বেলুড়ে সেদিন মঠ স্থাপনের উৎসব দিবস । গঙ্গাস্নান করার পর স্বামীজী ঠাকুরের ভাস্মাস্থিপূর্ণ তাত্র আধারটি শিরে বহন করিয়া চলিলেন । নূতন মঠে করা হইল ইহার প্রতিষ্ঠা ।

এই সময়ে তিনি এক সন্ন্যাসীকে বলিয়াছিলেন, “ঠাকুর আমার বলেছিলেন, ‘তুই কাঁধে ক’রে আমার যেখানে নিয়ে যাবি, আমি সেখানেই যাবো, সেখানেই থাকবো—সে গাছতলাই কি আর কুঁড়ে ঘরই কি ?’ সেজগেই আজ আমি নিজেই এই আশ্রামের কোটা আধার বয়ে নিয়ে এলাম ।

মঠের ব্রহ্মচারী শিষ্যদের কাছে সন্ন্যাস জীবনের ত্যাগপুত মহিমা স্বামীজী সর্বদা কীর্তন করিতেন । এই সঙ্গে জীবসেবার মূল তত্ত্বটিও তাহাদের অন্তরে প্রবেশ করাইয়া দিতেন । তাহার ভেজোগর্ভ ধারীতে তরুণ শিষ্যদের মধ্যে জলিয়া উঠিত ত্যাগ ও আত্মবিশ্বাসের গ্নিশিখা ।

উৎকর্ষ হইয়া তাহার। শুনিত স্বামী বিবেকানন্দের অন্তর বাণী,

“ওরে, ভয় পাসনে। জগতের ইতিহাস হচ্ছে কতকগুলো আত্ম-শক্তিতে বিশ্বাসবান্ লোকের ইতিহাস। প্রকৃত বিশ্বাসই ভেতরকার দৈবীশক্তিকে আগ্রত ক’রে তোলে।...মনে রাখিস, গুটিকয়েক শক্তিমান লোক জগৎ টলমল ক’রে কেলতে পারে।”

স্বামীজীর দৃষ্টিতে তাঁহার গুরুর নামাক্তিত মঠ ও মিশন ছিল জীবসেবা ও ঈশ্বরোপলব্ধির পবিত্রভূমি। ইহাদের স্বাতন্ত্র্য, বৈশিষ্ট্য ও গৌরবকে কোনো মতেই ক্ষুণ্ণ হইতে দিতেন না। এ বিষয়ে একদিন দৃষ্টান্তরূপে তিনি তাঁহার মতবাদ ঘোষণা করিয়াছিলেন—“ত্যাখো, মঠের ব্যাপারে কিন্তু গৃহস্থদের কোনো কর্তৃত্ব চলবে না। সন্ন্যাসীরাও টাকাওয়ালা লোকের সঙ্গে ব্যক্তিগত সম্পর্ক রাখবে না। গরীবদের সাথেই তাদের কারবার। গরীবদেরই যত্ন করবে, ভালবাসবে ও যথাসাধ্য সেবা করবে। এ দেশের অধিকাংশ মঠ ও সন্ন্যাসী সম্প্রদায় বড় মানুষের দাসত্ব করেছে—তাদের দয়ার উপর নির্ভর করেছে, তাই তো তারা উচ্ছন্ন গেছে। প্রকৃত সন্ন্যাসী তাদের ত্রিসীমায় যাবে না। কাম-কাঙ্ক্ষনের দাস যারা, তারা কি ক’রে কাম-কাঙ্ক্ষনত্যাগীর প্রকৃত শিষ্য, প্রকৃত বান্ধব, হতে পারে?”

তরুণ ব্রহ্মচারীদের সন্ন্যাসনিষ্ঠায় প্রতি বিবেকানন্দের দৃষ্টি ছিল সদা আগ্রত, শাসন ছিল অতি কঠোর। তিনি বলিতেন, “একথাটা যেন ভুলো না। যখন দেখবে সন্ন্যাস-আদর্শ থেকে পিছিয়ে পড়ছো, এ কঠোর জীবনের পক্ষে তুমি অনুপযুক্ত, তখন গার্হস্থ্য আশ্রমে প্রবেশ করা বরং ভাল, কিন্তু সন্ন্যাসাশ্রম কলুষিত করা অমুচিত। সকালে উঠবে, ধ্যানজপ করবে, আর খুব তপস্বী লাগাবে। স্বাস্থ্য আর সময়মতো খাওয়া-দাওয়ার উপর নজর রাখবে। আর কথাবার্তা কইবে শুধু ধর্ম সম্বন্ধে। সাধনাবস্থায় এমন কি খবরের কাগজ পড়া বা গৃহস্থদের সঙ্গে মেশাও সমীচীন নয়।”

সাধনার্থী তরুণ ব্রহ্মচারীদের জন্য এমন কঠোর বিধিনিয়মই। এ সময়ে তিনি প্রবর্তন করিয়া যান।

সে-বার কাশ্মীরের তীর্থদর্শন হইতে ফিরিয়া আসিয়া

দেখিতে পান একটি তরুণ ব্রহ্মচারী মা-সারদামণির আশ্রমে কাজকর্ম দেখাশুনা করিতেছে। ব্রহ্মচারীটি সৎ এবং শুদ্ধসত্ত্ব, কিন্তু স্বামীজী কাহারো কথায় নিবৃত্ত হইবার পাত্র নন। তৎক্ষণাৎ গজিয়া উঠিয়া তিরস্কার করিতে লাগিলেন। শ্রীমায়ের আশ্রমে নারী ভক্তগণ বাস করিতেন, শ্রীমাকে দর্শনের জন্যও মহিলাদের সমাগম ছিল। ব্রহ্মচারী ভক্তদের পক্ষে এই নারী সান্নিধ্যকে স্বামীজী ক্ষতিকারক মনে করিতেন। এমনই ছিল তরুণ সাধকদের সম্পর্কে তাঁহার ব্রহ্মচর্যের নৈষ্ঠিক বিধান। এই ভৎসনার পর অবিলম্বে মায়ের আশ্রমের কাজে একজন প্রবীণ সন্ন্যাসীকেই নিযুক্ত করা হয়।

‘শিববোধে জীবের সেবায়’ মঠের কর্মীদের বিবেকানন্দ সদাই অমুপ্রাণিত করিতেন। ভাবময় উদাত্ত কণ্ঠে কহিতেন,—“ওরে, সর্ব-জীবের সমষ্টি যে ভগবান্, একমাত্র সেই ভগবানেই আমি বিশ্বাস করি। সকল জাতির যারা দুর্বৃত্ত, দরিদ্র ও নিপীড়িত তারাই যে আমার ভগবান্। এই ভগবানের জন্য আমি বায়ে বায়ে জন্মাতে চাই; এজন্য জন্ম জন্ম দুঃখ পেলেও আমার খেদ নেই।”

যুগ যুগ ধরিয়া এদেশের নরম যুক্তিকার ভাবালু ও কোমল মানুষের জন্ম হইয়াছে। কঠোর সংযম, নিষ্ঠা ও শক্তির অভাবে অনেক কিছু মহতী প্রচেষ্টা বিফল হইয়া গিয়াছে। তাই নবীন সন্ন্যাসীদের উদ্দেশ্য করিয়া স্বামীজী তাঁহার সতর্ক বাণী বার বার উচ্চারণ করিয়া গিয়াছেন।

আজীবন বিবেকানন্দ স্বপ্ন দেখিয়াছেন; সে স্বপ্ন সকল করার জন্য করিয়াছেন জীবনপণ। তিনি চাহিয়াছেন, আত্মত্যাগী সর্বস্ব-পণকারী শত শত তরুণ সন্ন্যাসী তাঁহাকে করিবে অনুসরণ। ভারতের আত্মিক উজ্জীবনে, তাঁহার ধ্যানের ভারত গঠনে তাহারা করিবে জীবনপাত। সে স্বপ্ন তাঁহার সকল হয় নাই, ধ্যানকল্পনা রূপায়িত হয় নাই। কিন্তু বিবেকানন্দের অভ্যুদয় কি ব্যর্থ হইয়াছে? তাহা তো হয় নাই। তাঁহার বিপুল অধ্যাত্মশক্তি ও কর্মব্রতের মধ্য দিয়া ভারতাত্মা সেদিন জাগিয়া উঠে—ধর্ম ও সমাজে উঠে নূতনতর প্রাণ-স্পন্দন। আর



সমাজের সংস্কার ও ধ্বংসের পরিবর্তে জাগিয়া উঠে সৃষ্টিধর্মী দৃষ্টিভঙ্গী। সনাতন অধ্যাত্ম-জীবনের উৎস হইতে প্রাণশক্তি আহরণে জাতি প্রবৃত্ত হয়। এই জাগরণের পরোক্ষ ফলশ্রুতি বাংলার অগ্নিযুগের মুক্তিপ্রয়াস, তিলক ও গান্ধীজীর মুক্তি-সংগ্রাম। স্বামী বিবেকানন্দের আন্দোলনের ফলে ভারতের অন্তর্নিহিত ঐক্যের বোধও সবার অলক্ষ্যে জাতীয় জীবনে আত্মপ্রকাশ করিতে থাকে।

শ্রীরামকৃষ্ণের অন্ততম শ্রেষ্ঠ শিষ্য নাগমশাই একদিন বেলুড় মঠে বিবেকানন্দকে দর্শন করিতে আসিয়াছেন। নাগমশাই ছিলেন ভক্তি ও দৈন্তের মূর্তি বিগ্রহ। এই সাধক সম্বন্ধে স্বামীজী বলিতেন, “ছাথো, সারা পৃথিবীটা ঘুরে এলাম কিন্তু নাগমশাইর মতো মহাপুরুষ চোখে পড়লো না।”

বিবেকানন্দ ও নাগমহাশয়ের এই সাক্ষাতের পটভূমিকায় স্বামীজীর অধ্যাত্ম-পরিচয়টি ভক্ত ও দর্শনার্থীদের কাছে সেদিন স্পষ্টতর হইয়া উঠে।

নাগমশাই স্বামীজীর চরণ বন্দনার উদ্দেশ্যে সাষ্টাঙ্গে ভুলুষ্ঠিত হইলেন। “ও কি করছেন, ও কি করছেন,”—বলিয়া স্বামীজী তখন উঠিয়া দাঁড়াইয়াছেন। নাগমহাশয় করজোড়ে বলিয়া উঠেন, “আমি যে দিব্যচক্ষে দেখছি—আজ সাক্ষাৎ শিবের দর্শন পেলাম। আপনার দর্শনে আমার ভবক্ষুধা একেবারে দূর হয়ে গেল। জয় জয় ঠাকুর রামকৃষ্ণ। জয় ঠাকুর রামকৃষ্ণ।”

বেদান্ত পাঠ নিরত ব্রহ্মচারী ও সন্ন্যাসীদের স্বামীজী আহ্বান করিলেন। মুক্তপুরুষ নাগমশাই ঠাকুরের কথা আজ ইহাদের কিছু শুনাইবেন, ইহাই তাঁহার অভিলাষ। কিন্তু অহং-বোধ বিরহিত সাধু নাগমশাইকে দিয়া এসব বলানো সুকঠিন। তিনি বলিয়া উঠিলেন, “আমি আর কি বোলবো, আমি আর কি বোলবো? আমি এখানে শুধু দেখতে এসেছি, ঠাকুরের লীলার সহায়ক মহাবীরজীকে দেখতে এসেছি। জয় রামকৃষ্ণ।”

কিছুক্ষণ ভাবাবিষ্ট থাকায় পর নাগমহাশয় আবার কহিলেন!

“আপনাকে কে বুঝবে ? দিব্যদৃষ্টি না খুললে তো চেনবার যো নেই । একমাত্র ঠাকুরই চিনেছিলেন ; আর সকলে, তাঁর কথায় বিশ্বাস করে মাত্র, কিছুই বুঝে না ।”

সিংহবিজয়, ভুবনবিজয়ী যোদ্ধা-সন্ন্যাসী মুহূর্ত মধ্যে তাঁহার মহিমার উন্নত শিখর হইতে নামিয়া আসেন । বালকের সরলতা ফুটিয়া উঠে চোখে মুখে । বিনয় নম্র বচনে প্রবীণ গুরুভাইকে বলেন, “নাগমশাই, কি যে করছি, কি না করছি—কিছুই বুঝতে পারছি নে । এক এক সময়ে এক এক দিকে মহা ঝাঁক আসে, আর সেই মতো কাজ ক’রে যাই । এতে ভাল কি মন্দ হচ্ছে—কিছুই বুঝতে পারছি নে ।”

নাগমশাই উত্তরে कहিলেন, “মনে নেই ? ঠাকুর যে বলেছিলেন, চাবি দেওয়া রইলো । তাই এখন বুঝতে দিচ্ছেন না । বুঝা মাত্রই যে লীলা ফুরিয়ে যাবে ।”

গুরুর চরণে নিবেদিত-প্রাণ নাগমশাই ছিলেন এক সিদ্ধপুরুষ । দৈশ্য ও আত্মগোপনতার আড়ালে অবস্থিত এই মহাপুরুষকে বিবেকানন্দ ভালরূপেই চিনিতেন । তাই স্বীয় আরক্ত কার্কে তাঁহার আশীর্বাদ সেদিন তিনি চাহিয়া নিলেন ।

১৮৯৯ সালের মধ্যভাগে স্বামীজীকে আর একবার আমেরিকা ও ইউরোপে যাইতে হয় । পাশ্চাত্য-বিজয়ের সে পূর্বতন উৎসাহ উন্মাদনা এবার নাই । এবার শুধু কর্মক্ষেত্রসমূহের তত্ত্বাবধান ও সংগঠনের পালা । পাশ্চাত্যের দ্বারে আগের বার যে আশা পোষণ করিয়া তিনি আসিয়াছিলেন, অনেক দিন হয় সে আশাকে বিসর্জন দিয়াছেন । প্রাচ্য ও পাশ্চাত্যের প্রকৃত স্বরূপ আজ তাঁহার নিকট উদ্ঘাটিত । ইহারই উল্লেখ করিয়া স্বামীজী একদিন বলিলেন,—

“পাশ্চাত্যের জীবনযাত্রা যেন এক অট্টহাস্তের মতো—কিন্তু তাহার ভলায় রয়েছে মর্মভেদী কান্না । এর পরিণতিও কান্নাতেই । হাসি চাট্টা ভাষাশা যা কিছু সব রয়েছে উপরিভাগে, কিন্তু তিতরটা এর

বড়ই করুণ। আর ভারতে উপরেই যত বিবাদ, যত কান্না—ভিতরে আছে নির্বিকার এক পরম চেতনা, আর নিরবচ্ছিন্ন আনন্দ!”

মহান্ কর্মযোগী বিবেকানন্দের ত্রত উদ্‌ঘাপনের সময় যেন নিকটতর হইয়া আসিয়াছে। রামকৃষ্ণের জ্যা-মুক্ত তীর কি এবার তাহার গতিবেগের শেষ প্রান্তে আসিয়া পৌঁছিতেছে? স্বামীশ্রীর ভক্ত শিষ্য! মিস্ ম্যাকলিন্ডের নিকট লিখিত পত্রে তাঁহার তৎকালীন মানসিকতা কিছুটা বুঝা যায়। তিনি লিখিতেছেন—“আমি ভালই আছি। লড়াই-এ হার জিত দুই-ই হলো, পুটলী-পৌটলা বেঁধে সেই মহান্ ‘মুক্তিদাতার’ প্রতীক্ষায় বসে আছি। অব্ শিব পার কর মেরে নাইয়া—হে শিব, আমার তরী এবার পারে নিয়ে যাও, প্রভু!...যতই যা হোক, আমি যে এখনও পূর্বের সেই বালক বই আর কেউ নই—যে বালক দক্ষিণেশ্বরের পঞ্চবটি তলায় শ্রীরামকৃষ্ণের অমৃতবাণী অবাক্ হয়ে শুনতো, আর বিভোর হয়ে যেতো। সেই তো আমার সত্যিকারের স্বভাব! কর্ম আর অপরের কল্যাণ, সেগুলো আমার বহিরাবরণ মাত্র। এবার আমার তাঁর ডাক শুনে পাজি, সেই পরিচিত মধুর কণ্ঠস্বর—যা স্মরণ হলেই মন আনন্দে নেচে ওঠে।—বন্ধন সব খসে যাচ্ছে, মামুষের মমতা উড়ে যাচ্ছে, কর্ম আজ বিশ্বাদে ভরা। জীবনের মোহ কেটেছে—রয়েছে তার স্থলে, কেবল আমার প্রভুর আহ্বান ধ্বনি। যাই প্রভু, যাই। ঐ তিনি বলেছেন, ‘মৃতের সৎকার মৃতের দলই করুকগে, তুই ও সব ছুঁয়ে কেলে দিবে আমার পিছু পিছু চলে আর।’ যাই প্রভু যাই।”

“হ্যাঁ, এইবার আমি ঠিক চলেছি। সন্মুখে অনন্ত শান্তিময় নির্বাণ সমুদ্র। মায়ায় এতটুকু তরঙ্গভঙ্গ তার শান্তি বিঘ্নিত করছে না!...সেই শিক্ষাদাতা, গুরু, নেতা, আচার্য বিবেকানন্দ কিন্তু আজ আর নেই। পড়ে আছে শুধু পূর্বের সেই বালক, প্রভুর চিরশিষ্য গুরুর চরণাশ্রিত চির-ভৃত্য। একদিন আমার কর্মের মধ্যে মান-বশেষ ভাব উদ্‌গত হত, ভালবাসার মধ্যে পাত্রাপাত্র বিচার আসতো, পরিত্রাণের পঙ্খাতে থাকতো কলঙ্কোপের গুহ্ম আকাঙ্ক্ষা। আমার





# আচার্য মধ্ব

ভারতের আত্মিক সাধনা ও ধর্ম-সংস্কৃতির ইতিহাসে দাক্ষিণাত্যের অবদান যেমনি বিপুল তেমনি বৈচিত্র্যময়। জ্ঞান, কর্ম ও প্রেমভক্তির মানা সাধনা ও দার্শনিকতার ধারা এই প্রাচীন ভূখণ্ডে হইতে উৎসারিত হইয়াছে, ছড়াইয়া পড়িয়াছে দেশের দিক্‌বিদিকে।

দক্ষিণভারত আমাদের উপটোকন দিয়াছে তাহার যোগৈশ্বর্য্য-সম্পন্ন শৈবসাধক আর প্রেমভক্তি-সিদ্ধ আড়বার গোষ্ঠী, দিয়াছে শঙ্করের মত অদ্বৈতবাদের শ্রেষ্ঠ আচার্য্য। রামানুজ, মধ্ব, বিষ্ণুস্বামী, নিম্বার্ক, বিভাষণ্য, জ্ঞানদেব, তুকারাম প্রভৃতি সিদ্ধ সাধক ও ধর্ম্মনেতার একের পর এক এখানে ঘটিয়াছে অভ্যুদয়।

ত্রয়োদশ শতকে আচার্য্য মধ্বের আবির্ভাব শুধু দক্ষিণ ভারতেরই নয়, সমগ্র ভারতেরই এক স্মরণীয় ঘটনা। ব্রহ্মসূত্রের ভক্তিবাদী ব্যাখ্যার মধ্য দিয়া তিনি এক নবতর দ্বৈতবাদী দর্শনের প্রচার করেন। তাঁহার নৈষ্ঠিক বৈষ্ণবীয় সাধনা, ভাবময় প্রেরণা ও সংগঠনশক্তি ভক্তি-আন্দোলনকে নূতন প্রাণ-প্রাচুর্য্যে ভরিয়া তোলে। ভারতীয় জন-জীবনে আচার্য্য মধ্ব পরিচিত হইয়া উঠেন ভক্তিবাদী চতুঃসম্প্রদায়ের অগ্রতম ব্রহ্মসম্প্রদায়ের প্রবর্তকরূপে। তাঁহার প্রচারিত তত্ত্ব ও ধর্ম্মাদর্শ যে গোড়ীয় বৈষ্ণব ও বল্লাভাচারীদের মতবাদকে অনেকাংশে প্রভাবিত করিয়াছে একথাও অস্বীকার করার উপায় নাই।

মধ্ব আবির্ভূত হন ১১৯৯ খৃষ্টাব্দে।<sup>১</sup> ভারতের দক্ষিণ-পশ্চিম

১ মতান্তরে ১২৩৮ খৃষ্টাব্দে। অ: Subba Rao : Bhagabat Gita. R. G. Bhandarkar : Vaishnavism, Saivism and Minor Religious Systems pp. 59—। স্বরচিত গ্রন্থ ‘ভারত তাৎপর্য্য নির্ণয়’-এ মধ্ব আপন জন্ম সন্থকে বে শকাব্দের উল্লেখ করিয়াছেন তাহা ১১৯৯ খৃষ্টাব্দেরই নির্দেশনা দেয়। শ্রীকৃষ্ণ-এ মধ্বের প্রশিষ্ট স্বামী নরহরি ভীর্ষের এক অঙ্কশাশন আবিষ্কৃত হইয়াছে। এই অঙ্কশাশন মধ্বের জীবনকাল নির্ণয়ের সহায়ক।

উপকূলের কাছাকাছি বেলে-গ্রামের পাজকা ক্ষেত্র তাঁহার জন্মভূমি। তখনকার দিনে এ অঞ্চল ছিল তুলুব দেশের অন্তর্গত। আজিকার দিনের ধারোয়ার জেলা, উত্তর ও দক্ষিণ কানাড়া এবং মহীশূর রাজ্যের পশ্চিম অংশ নিয়া গঠিত ছিল ত্রয়োদশ শতকের তুলুব। আজও ইহার একাংশ তুলুব নামে পরিচিত। শঙ্করের জন্মস্থান শৃঙ্গেরী ও ম্যাঙ্গোলোরের দূরত্ব মধ্বের জন্মস্থান হইতে চল্লিশ মাইলের বেশী হইবে না।

পাজকার তিন ক্রোশ দূরেই সাগর বিধৌত পবিত্র তীর্থ উড়ুপী।<sup>১</sup> শেষশায়ী অনন্তেশ্বর বিষ্ণু ও চন্দ্রমৌলীশ্বর শিব, এই দুই জাগ্রত বিগ্রহের মন্দির এখানে অবস্থিত। দেশের দূর দূরান্ত হইতে ভক্ত নরনারী এখানে সমবেত হয়, স্নান তর্পণ ও পূজা শেষে যে যাহার ঘরে ফিরিয়া যায়। বিষ্ণুভক্ত ও শিবভক্তদের এই মিলনভূমিই উত্তরকালে পরিচিত হইয়া উঠে আচার্য্য মধ্বের সাধনপীঠ ও লীলাকেন্দ্ররূপে। ভক্তি-সাধনার এক নূতন ধারা তাঁহার মাধ্যমে এখান হইতে উৎসারিত হয়। তাঁহার উত্তরসূরী ও ভক্ত শিষ্যদের স্মৃতিও এই পবিত্র তীর্থের সহিত নানাভাবে বিজড়িত রহিয়াছে।

মধ্বের পিতার নাম মধ্যগেহ নারায়ণ তট্ট। প্রতিভাধর আচার্য্য হিসাবে তট্ট এ অঞ্চলে সুপরিচিত। বেদ-বেদান্তে তিনি পারদ্বন্দ্ব, আবার সাধন-জীবনে নির্ভাবান বিষ্ণুভক্ত। স্ত্রী বেদবতী যেমনি রূপসী তেমনি মহাভক্তিমতী। গৃহে নারায়ণ-শিলা প্রতিষ্ঠিত। এই শিলাময় দেববিগ্রহের সেবা, ভোগরাগ, ধ্যানজপে অধিকাংশ সময় তাঁহাদের অতিবাহিত হয়। বিশেষ বিশেষ পার্বণের দিনে

১ উড়ু অর্থে নক্ষত্র, 'প' হইতেছে পতি। নক্ষত্রপতি অর্থাৎ চন্দ্রের নাম উড়ুপ। চন্দ্রের তপস্তায় প্রসন্ন যে শিব তিনিই এ স্থানে অধিষ্ঠিত। তাই চন্দ্রমৌলীশ্বর শিবের নাম অল্পসারে এ তীর্থের নাম হইয়াছে উড়ুপী। প্রাচীন কালে উড়ুপী রক্তপীঠপুর নামেও আখ্যাত হইত।

উভয়ে ভক্তিভরে গিয়া উপস্থিত হন উড়ুপীতে । কুলদেবতা অনন্তেশ্বর নারায়ণের অর্চনায় প্রাণমন ঢালিয়া দেন ।

মধ্যগেহ ভট্ট মোটেই বিত্তবান নন । সম্বলের মধ্যে রহিয়াছে পৈতৃক একটি বাসগৃহ আর একটি বাগিচা । এই বাগিচার ফসল আর অধ্যাপনার সামান্য কিছু আয় দিয়াই কোন মতে তাঁহার সংসারের ব্যয় নির্বাহ হয় ।

ভট্টবংশ খুবই প্রাচীন । কর্ম্মকাণ্ডের বিখ্যাত আচার্য্য কুমারিল ভট্টের অনুগামী ব্রাহ্মণ ইহারা । পঞ্চ বা ষষ্ঠ শতকের কাছাকাছি সময়ে বনবাসী কদম্ব রাজ ময়ুর বর্ষণ এই নৈষ্ঠিক ব্রাহ্মণদের কয়েকটি দলকে আমন্ত্রণ জানান । সেই সময় হইতে এই ভট্ট ব্রাহ্মণেরা তুলুব অঞ্চলে আসিয়া বসতি স্থাপন করেন । যজ্ঞক্রিয়া, শাস্ত্রনিষ্ঠা ও শুদ্ধতর জীবনচর্য্যার মধ্য দিয়া ধীরে ধীরে এই আগন্তুক ব্রাহ্মণেরা সমাজনেতাক্রমে নিজেদের করেন সুপ্রতিষ্ঠিত ।

এই ঔপনিবেশিক ব্রাহ্মণদের অনেকে ছই এক পুরুষের মধ্যেই শাক্তর অদ্বৈতবাদের অনুগামী হইয়া পড়েন । সাধারণভাবে তাঁহাদের মধ্যে শিবভক্তির প্রাবল্য দেখা যায় ।

কালক্রমে এই ব্রাহ্মণদের মধ্যে কিছু সংখ্যক লোক বিষ্ণু-উপাসনার দিকে ঝুঁকিয়া পড়েন । আচার্য্য মধ্বের পিতা মধ্যগেহ ভট্ট ছিলেন এমনি এক ভক্তিপরায়ণ বৈষ্ণব ব্রাহ্মণ ।

মধ্যগেহ ভট্টের ছই পুত্র ও এক কন্যা । কিন্তু ভাগ্যের কি নিদারুণ পরিহাস, নিতান্ত তরুণ বয়সে ছইটি পুত্রই একে একে ইহলোক ত্যাগ করিয়া চলিয়া গেল । শোকের আঘাতে ভট্টদম্পতি একেবারে মুষড়িয়া পড়িলেন ।

কয়েক বৎসর ইতিমধ্যে অতিক্রান্ত হইয়াছে । কিন্তু পুত্রশোকের দহনজ্বালা মধ্যগেহ তখনো ভুলিতে পারেন নাই । তাছাড়া, মনে এক নূতন হুশ্চিন্তাও প্রবল হইয়া উঠিয়াছে । নৈষ্ঠিক ব্রাহ্মণ তিনি । বার বারই ভাবিতে থাকেন, অপুত্রক অবস্থায় এদেহ ত্যাগ করিলে



পিণ্ডদান করার তো কেহ থাকিবে না। মাঝে মাঝে তাই উড়ুপীতে অনন্তেশ্বর মন্দিরে গিয়া উপস্থিত হন, ইষ্টের চরণে নিবেদন করেন অন্তরের আকুতি।

সেদিন ছিল দশহরার শেষ দিন—নবমী। মধ্যগেহ ভট্ট উড়ুপীর নারায়ণ মন্দিরে বসিয়া একমনে জপ ধ্যান করিতেছেন। ভাবতন্ময় অবস্থায় প্রহরের পর প্রহর কি করিয়া কাটিয়া যায় হুঁস নাই। রাত্রি ক্রমে গভীর হইয়া উঠে। ভক্ত দর্শনার্থীরা একে একে যে যাহার ঘরে ফিরিয়া গিয়াছে। ঠাকুরের শয়ান শেষে দীপ নিভাইয়া পূজারীরা নিজ নিজ কক্ষে বিশ্রামরত। শুধু ভক্তপ্রবর মধ্যগেহ ভট্ট শ্রীমুক্তির সম্মুখে রহিয়াছেন ধ্যানস্থ।

ইঠাৎ গর্ভ-মন্দিরটি এক ঝলক শুভ্র স্নিগ্ধ স্বর্ণীয় জ্যোতিতে উদ্ভাসিত হইয়া উঠে। ভট্টের ধ্যান ভাঙ্গিয়া যায়। বিস্ময়ে আনন্দে তিনি অভিভূত। এসময়ে কানে আসে এক দৈবী কণ্ঠস্বর। করুণা বিগলিত কণ্ঠে ঠাকুর কহেন, “আমার প্রিয় ভট্ট, তুমি প্রচণ্ড শোক পেয়েছ তরুণ বয়সের পুত্র ছুটি হারিয়ে। কিন্তু কি করবে বল? প্রাক্তন খণ্ডিত হয়েছে, তাই তো আর তাদের থাকা সম্ভব হয় নি, মর্ত্য থেকে বিদায় নিয়ে চলে গেছে। দুঃখ ক’রো না ভট্ট,—শোক যেমন আঘাত হানে তেমনি আনে পরম কল্যাণ। শোক মানুষকে করে আত্মস্থ, করে পবিত্রতর।”

মধুর মোহময় বঙ্কার প্রভুর দিব্যকণ্ঠে। কিন্তু ভট্টের বৃকে তাহা অনুরণন তোলে কই? উপযু্যপরি দুইটি পুত্রশোকে হৃদয় তাঁহার আজ মরুভূমি। তাহা শীতল হয় কই, শান্ত হয় কই?

প্রভু আবার স্নেহার্জস্বরে বলিতে থাকেন, “ভট্ট, জেনে রাখো, মানুষ শূন্য হয় পূর্ণ হবে বলে, রিক্ত হয় সিক্ত হবে বলে। শোক-বিষাদের কালিমা ঝেড়ে ফেল। আর খেদ করো না। ঈশ্বরীয় বিধানে এক শুদ্ধাত্মা কুলপবিত্রকারী পুত্র আসবে তোমার গৃহে। নবতর ভক্তি আন্দোলনের পথিকৃৎ হবে সে। আজকে দশহরার

শেষ দিন—নবমী। তোমার একটি শিশুপুত্র ভূমিষ্ঠ হবে ঠিক একবৎসর পরে, এমনি পবিত্র তিথিতে।”

দৈবী বাণীর রেশ ধীরে ধীরে মিলাইয়া যায়, কিন্তু মধ্যগেহ ভট্টের হৃদয়ে এই বাণী তুলিয়া দেয় ভাবোচ্ছ্বাসের এক উত্তাল তরঙ্গ। অপার আনন্দে ও তৃপ্তিতে ভরপুর ভট্ট তখনই ছুটিয়া যান পাজকায় নিজগৃহে। পুলকভরা কণ্ঠে গৃহিণী বেদবতীর কাছে বর্ণনা করেন মন্দিরের অত্যাশ্চর্য্য অভিজ্ঞতার কাহিনী। আনন্দাশ্রু ঝরিতে থাকে ছই নয়নে।

উড়ুপীর অনন্তেশ্বর মন্দিরের দৈববাণী ফলিয়া যায়। ঠিক এক বৎসরের ব্যবধানে, ১১৯৯ খৃষ্টাব্দের নবমী তিথিতে এক শুভলগ্নে ভট্টগৃহিণীর কোল আলো করিয়া আবির্ভূত হয় এক শিশুপুত্র—উদ্ভরকালে যে কীর্ত্তিত হইয়া উঠে মহাসাধক মঞ্চাচার্য্য নামে।

যেমনি অনিন্দ্যসুন্দর, তেমনি সর্ব্বমূলক্ষণযুক্ত এই শিশু। তন্তু ভট্টদম্পতির আনন্দের আর অবধি নাই। ঠাকুরের কৃপাপ্রসাদ-রূপে পাইয়াছেন এই পুত্রটিকে কৃতজ্ঞ হৃদয়ে তাই তাহার নাম রাখিলেন বাসুদেব।

বাসুদেবের বাল্য জীবনের নানা অত্যাশ্চর্য্য ও অলৌকিক কাহিনী প্রচলিত আছে।<sup>১</sup> একদিন সাথীদের নিয়া সে খেলায়

১ মঞ্চ-শিশু পণ্ডিত জীবিক্রম আচার্য্যের পুত্র নারায়ণ আচার্য্য মঞ্চবিজয় ও মণিমঞ্জরী নামে নানা কাহিনী সম্বলিত সংস্কৃত কাব্যগ্রন্থ রচনা করেন। পৌরাণিক ভঙ্গীতে রচিত এই দুইটি গ্রন্থে মঞ্চ সম্বন্ধে কতকগুলি অলৌকিক ঘটনার উল্লেখ আছে। মঞ্চ জীবনের রূপরেখা অঙ্কনে নারায়ণ আচার্য্যের রচনা আমাদের সাহায্য করিলেও উগ্র সাম্প্রদায়িকতা ও অধৌক্তিক শব্দর বিরোধিতার ফলে গ্রন্থ দুইটির মূল্যহানি ঘটিয়াছে। আচার্য্য জীবিক্রম, নারায়ণ প্রস্তুতি শিষ্টেরা মঞ্চকে বায়ুর অবতার বলিয়া মনে করিতেন। মঞ্চ বৈষ্ণবদের মতে, পৃথিবীতে যখনই নারায়ণ অবতার-রূপে আসিয়াছেন, তখনই তাহার সহায়ক হইয়া আসিয়াছেন বায়ু। রাম ও কৃষ্ণ অবতারের সহায়ক হনুমান ও ভীম উভয়েই বায়ুপুত্র। শেষ অবতার মঞ্চাচার্য্য, —প্রজ্ঞানানন্দঃ বেদান্তদর্শন, পৃষ্ঠা ৫১৮

মাতিয়া আছে। হঠাৎ দেখা গেল, একটি ছুঁদাস্ত ঝাঁড় নিকটস্থ রাস্তা দিয়া হেলিয়া ছলিয়া চলিতেছে। বালক বাসুদেবের কি এক অদ্ভুত ঝাঁক চাপিয়া যায়—তড়িৎবেগে ঝাঁড়ের পুচ্ছ ধরিয়া সে ঝুলিয়া পড়ে। ঝাঁড়টিও সঙ্গে সঙ্গে উত্তেজিত ও চঞ্চল হইয়া উঠে, দ্রুতবেগে ধাবিত হয় সম্মুখের এক নিবিড় অরণ্যে। সঙ্গী সাথীরা ভয়ে সন্ত্রস্ত, আর্তস্বরে সবাই চীৎকার করিতে থাকে, ভট্টগৃহের আশেপাশে মহা সোরগোল পড়িয়া যায়। ধর্-ধর্ শব্দে সবাই পশ্চাদ্ধাবনে রত হয়।

বাসুদেব সেদিন যেন এক উদ্দাম খেলায় মাতয়া উঠিয়াছে। পুচ্ছ হইতে সে যেমন তাহার বজ্রমুষ্টি শিখিল করিবে না, যশপ্রবরও কোনমতে হার মানিতে রাজী নয়। বন-বাদাড়, কটকময় পথে কয়েক প্রহর ছুটাছুটির পর ক্লাস্তদেহ ঝাঁড়টি অবশেষে মধ্যগেহের বাড়ীর কাছে আসিয়া ভূমিতে লুটাইয়া পড়ে। বালক বাসুদেবের চোখে মুখে তখন তৃপ্তির হাসি ফুটিয়া উঠিয়াছে। সকলের উদ্বেগ-ভরা প্রশ্নের উত্তরে সগর্বে সে তাহার অদ্ভুত বন-ভ্রমণের কাহিনী বর্ণনা করিতে লাগিল।

আর এক দিনের কথা। একটি বিশেষ পার্বণ উপলক্ষে সন্ধ্যার পর ভট্টদম্পতি বাসুদেবকে নিয়া উড়ুপীর অনন্তেশ্বর মন্দিরে গিয়াছেন। স্নান তর্পণ পূজা সমাপন করিতে বেলা গড়াইয়া যায়। তারপর সন্ধ্যার সময় বনপথ দিয়া সবাই গ্রামে ফিরিয়া চলিয়াছেন। এমন সময়ে হঠাৎ তাহাদের পথ রোধ করিয়া দাঁড়ায় এক ছুঁট অশরীরী প্রেত। মধ্যগেহ ও বেদবতী ভয়ে জড়সড়ো হইয়া পড়েন, কিন্তু বালক বাসুদেবের মধ্যে দেখা যায় এক অদ্ভুত প্রতিক্রিয়া। মুহূর্তমধ্যে তাহার চোখ মুখের ভাব একেবারে পরিবর্তিত হইয়া যায়। গ্রীবা সম্মত, চোখছটি ক্রোধে আরক্ত হইয়া উঠিয়াছে। একটি পূর্ণবয়স্ক ব্যক্তির মত দৃঢ়ত্বের ঐ প্রেতের উদ্দেশে বিড়্-বিড়্ করিয়া কি এক মারণ-মন্ত্র সে উচ্চারণ করিতেছে।

প্রতিটি তৎক্ষণাৎ ভীতভাবে তাঁহাদের সম্মুখ হইতে অন্তর্হিত হইয়া গেল। সঙ্গে সঙ্গে বাসুদেবও ফিরিয়া আসিল তাহার বালক স্বভাবে। ইষ্টনাম জপিতে জপিতে অতি সন্তর্পণে বালককে বৃকে করিয়া তটদম্পতি ঘরে ফিরিয়া আসিলেন।

কৈশোরে বাসুদেবের উপনয়ন অনুষ্ঠান সম্পন্ন হইয়া গেল। এবার শাস্ত্র অধ্যয়নের জন্য তাঁহাকে পাঠানো হয় গ্রামের টোলে। অসাধারণ মেধা ও প্রতিভা বাসুদেবের। অধ্যাপকেরা বিস্মিত হইয়া যান। দেখা যায় কয়েক বৎসরের মধ্যেই বিভিন্ন শাস্ত্র তিনি আয়ত্ত করিয়া ফেলিয়াছেন। তত্ত্বের নির্ণয় ও বিচার বিশ্লেষণে জগন্নিরাছে তাঁহার অসামান্য অধিকার।

ক্রীড়া অঙ্গনেও বাসুদেবের সুখ্যাতি কম নয়। অমিত সাহস, বজ্রকঠিন দেহ আর দুর্জয় সঙ্গ নিয়া যে কোন প্রতিযোগিতায় অনায়াসে তিনি শীর্ষস্থান অধিকার করিয়া নেন। দক্ষিণ কানাড়ার ব্রাহ্মণদের মধ্যে কুস্তী খেলার প্রচলন খুব বেশী। এই খেলায় বাসুদেব অদ্বিতীয়। তাই সঙ্গীরা রহস্য করিয়া তাঁহার নামকরণ করে ভীম।<sup>১</sup>

যৌবনে পদার্পণের সঙ্গে সঙ্গে দেখা গেল বাসুদেব পরিণত হইয়াছেন এক পূর্ণাঙ্গ মানবে। ব্যবহারিক ও আধ্যাত্মিক দুইয়েরই অপূর্ব সমাহার ঘটিয়াছে তাঁহার জীবনে। অসামান্য দৈহিক ও মানসিক উৎকর্ষের অধিকারী যেমন তিনি হইয়াছেন, তেমনি অর্জন করিয়াছেন শাস্ত্র-জ্ঞান ও ধ্যান মননের শক্তি। বিচারের শক্তিতেও কম দুর্ব্ব তিনি হন নাই।

১ অনেকের ধারণা, প্রথম জীবনের এইসব দৈহিক পরাক্রমের কথা স্মরণ রাখিয়াই উত্তরকালে মধুর অল্পগামীরা তাঁহাকে বায়ুপুত্র বা বায়ুর অবতার বলিয়া প্রচার করিতে শুরু করেন। নারায়ণ ভট্ট রচিত মধুবিজয় ও মণিমঞ্জরীতে এই বায়ু-তত্ত্বটি বার বার উল্লেখিত হইয়াছে।

কয়েকশত বৎসর আগে বাসুদেবের পূর্বপুরুষ ছিলেন কৰ্ম্মকাণ্ডের অনুগামী, যাগযজ্ঞে বিশ্বাসী। একাদশ শতকের কাছাকাছি ইহাদের মধ্যে এক দূরপ্রসারী পরিবর্তনের সূচনা দেখা যায়। এ সময়ে আচার্য্য রামানুজের অভ্যুদয় ঘটে এবং তাঁহার অভ্যুদয়ের মধ্য দিয়েই পরিণতি লাভ করে প্রেম-ভক্তি-সিদ্ধ আড়বারদের সাধনা ও মতবাদ। রামানুজীয় ভক্তিবাদ সারা দাক্ষিণাত্যে প্রবল ভাববল্লা প্রবাহিত করে, শঙ্কর বিরোধী দ্বৈতবাদের প্রভাব নানা স্থানে অমুভূত হইতে থাকে। অনন্তশায়ী বিষ্ণু ও মুরলীধর কৃষ্ণের মহিমা কতকগুলি মঠ মন্দির ও সম্প্রদায়কে কেন্দ্র করিয়া ধীরে ধীরে ছড়াইয়া পড়ে। বাসুদেবের পিতা মধ্যগেহ ভট্ট ছিলেন ভক্তি রসাম্বিত সাধনধারার একজন ধারক ও বাহক। তাঁহার ইষ্ট অনন্তেশ্বর নারায়ণ, আর গৃহে পূজিত হইতেন শালগ্রাম শিলা। পুত্রের বাসুদেব নামকরণ হইতেও অনুমান করা যায়, মধ্যগেহ ভট্ট বেদান্তী বা কৰ্ম্মকাণ্ডী সাধক ছিলেন না, সাধন-জীবনে ভক্তিমার্গই তিনি অনুসরণ করিয়া চলিতেন।

বলা বাহুল্য পিতার ঐতিহ্য ও ব্যক্তিত্বের প্রভাব আর গৃহের ভজন-পূজনময় পরিবেশ বাসুদেবের ধর্ম্মীয় আদর্শ ও সাধন-জীবনকে অনেকাংশে প্রভাবিত করিয়া তোলে। অতি তরুণ বয়সেই এই প্রতিভাধর পণ্ডিত পরিণত হন এক শুদ্ধাচারী ভক্তিপরায়ণ সাধকে।

উড়ুপীতে শাস্ত্রবিদ আচার্য্য ও সাধু-সন্ন্যাসীর সংখ্যা কম নয়। ইহাদের মধ্যে বিভাবত্তা ও সাধনার দিক দিয়া বিশিষ্টতম হইতেছেন আচার্য্য অচ্যুতপ্রকাশ। বাসুদেব মনে মনে স্থির করিলেন, এবার এই মহাত্মার কাছেই বেদ-বেদান্ত ও ষড়্‌দর্শনের উচ্চতম পাঠ গ্রহণ করিবেন।

সেদিন অতি প্রত্যুষেই উড়ুপীতে অচ্যুতপ্রকাশের মঠে গিয়া তিনি উপস্থিত। প্রকৃতভাৱে প্রণাম নিবেদন করিয়া নিজের পরিচয়

দিলেন, কহিলেন, “আচার্য্যবর, অনেক আশা নিয়ে আপনার চরণে শরণ নিতে এসেছি। আপনি আমায় কৃপা করুন, শাস্ত্রতত্ত্বের উপদেশ দিয়ে করুন কৃতকৃতার্থ।”

“বৎস, তোমার পিতা মধ্যগেহ নারায়ণ ভট্টকে আমি জানি। তিনি সুপণ্ডিত এবং বিষ্ণুর উপাসক। তাঁর ছেলে হয়ে আমার মত অদ্বৈত বেদান্তীর কাছ কেন তুমি শাস্ত্রের পাঠ নিতে এলে? এর রহস্য কি আমায় খুলে বলতো?” জিজ্ঞাসু নেত্রে চেয়ে থাকেন অচ্যুতপ্রকাশ।

“প্রভু, আমি আমার পিতার কাছে শুনেছি, অদ্বৈত বেদান্তী হয়েও আপনি ভক্তিমার্গের উপর খড়াহস্ত নন। চন্দ্রমৌলীশ্বর শিবের মন্দির আর শেষশায়ী-বিষ্ণু অনন্তেশ্বরের মন্দির, এই দুই পবিত্র পীঠেই রয়েছে আপনার স্বচ্ছন্দ গতায়াত। আর এ কথাও আমি শুনেছি, আপনার গুরু প্রাজ্ঞতীর্থ মহারাজ দশনামী সন্ন্যাসী হয়েও ভক্তিমার্গের প্রতি গভীরভাবে আকৃষ্ট ছিলেন। তাই অনেক ভেবে-চিন্তে আপনারই আশ্রমে আমি এসেছি।”

সুন্দর-সুঠাম দেহ এই তরুণ শিক্ষার্থীর দিকে সপ্রশংস দৃষ্টিতে তাকাইয়া থাকেন অচ্যুতপ্রকাশ। বাসুদেবের ছই নয়ন প্রতিভার দীপ্তিতে প্রোজ্জ্বল। আননে রহিয়াছে নিষ্ঠা ও সঙ্কল্পের হৃদতা। অচ্যুতপ্রকাশ অন্তরে মহা উৎফুল্ল হইয়া উঠিয়াছেন। বাসুদেবের সঙ্গে কিছুক্ষণ শাস্ত্রালাপের পর স্নেহপূর্ণস্বরে কহিলেন, “বৎস, আমি বুঝতে পারছি, পরমাত্মার কৃপায় তুমি দিব্য প্রতিভা নিয়েই জন্মেছো। একদিন দেশ ও ধর্মের মহা উপকার সাধিত হবে তোমার মনীষায় ও সাধনায়। আমি সানন্দে অনুমতি দিচ্ছি, আমার এ আশ্রমে থেকে উচ্চতর শাস্ত্রপাঠ তুমি গ্রহণ করতে পারো।”

সেদিন উড়ুপীর মঠে আচার্য্য অচ্যুতপ্রকাশের কাছে আশ্রয় লাভের পর হইতে বাসুদেবের জীবনে শুরু হইয়া গেল এক নতুনতর অধ্যায়।

শ্রায়, সাংখ্য বেদ-বেদান্তের অধ্যয়ন অগ্রসর হয়, অপূর্ব নিষ্ঠায় বাসুদেব এগুলি একের পর এক আয়ত্ত করিতে থাকেন। কিন্তু সব সময়েই দেখা যায়, গুরু অদ্বৈত-বেদান্তের পাঠ শুরু করিলেই বাসুদেব তাঁহার বিকঙ্কে তুলিয়া ধরেন ভক্তিবাদী ব্যাখ্যা, আপন ক্ষুরধার বুদ্ধি ও অমানুষ্য মনোবাব সাহায্যে প্রয়োগ করেন বিনয়কর শাস্ত্র প্রমাণ ও যুক্তিতর্ক। ক্রমে উড়ুপীর বিভিন্ন মঠ-মন্দিরে ও সন্নিহিত অঞ্চলে আচার্য্য অচ্যুতপ্রকাশের এই প্রতিভাধর ছাত্রের খ্যাতি ছড়াইয়া পড়িতে থাকে।

পুত্র বাসুদেব এখন শাস্ত্র পারঙ্গম। বিছাবত্তা ও চরিত্রনিষ্ঠায় বহু লোকের দৃষ্টি তিনি আকর্ষণ করিতেছেন। ভট্টদম্পতির অন্তর তাই গর্বে ও তৃপ্তিতে ভরিয়া উঠিয়াছে।

একদিন অবসরমত মধ্যগেহ ভট্ট পুত্রকে নিকটে ডাকিলেন। প্রসন্ন কণ্ঠে কহিলেন, “বাসুদেব, তোমার মত কৃতী পুত্রকে পেয়ে আমি ও তোমার জননী পরম সুখী। কিন্তু বাবা, এখন তোমায় আমাদের একটা অহুরোধ রাখতে হবে। এবার তুমি গার্হস্থ্য আশ্রমে প্রবেশ করো। সুলক্ষণা একটি পাত্রী আমরা দেখে রেখেছি। তাকে তুমি বিবাহ করো, আর ঘরেই একটি অধ্যাপনার টোল খুলে ব’সো। সংসার জীবনে তুমি স্থির হয়ে বসলে আমরা একেবারে নিশ্চিন্ত হতে পারি।”

নতশিরে কিছুক্ষণ চুপ করিয়া থাকিয়া বাসুদেব উত্তর দেন, “পিতা, আপনি আমায় মার্জনা করুন। গার্হস্থ্য আশ্রম আমার জ্ঞান নয়। আমি সঙ্কল্প করেছি—অচিরেই একটি শুভদিন দেখে সন্ন্যাস গ্রহণ করবো, এবং আচার্য্য অচ্যুতপ্রকাশের কাছ থেকেই নেবো দীক্ষা ও সন্ন্যাস।”

ভট্ট চমকিয়া উঠেন। এ কি অদ্ভুত অপ্রত্যাশিত সঙ্কল্প তাঁহার পুত্রের? এ যে বিনা মেখে বজ্রপাত! আশ্র কণ্ঠে কহেন, “বৎস,

কেন এমন মৰ্ম্মভেদী কথা বলছো ? ভেবেছিলাম, তুমি সুপণ্ডিত ও ধৰ্ম্মনিষ্ঠ আচার্য্য হবে, যশ-অর্থ মানের হবে অধিকারী, আর তোমার হাতে ঘর-সংসারের ভার দিয়ে আমরা দিন কাটাবো ধ্যান ভজন নিয়ে—পরম নিশ্চিন্তে। তোমার তো সংসার ত্যাগ করা চলে না, বৎস।”

“সংসার অনিত্য বলে, মায়া-বিভ্রম বলে আমি সংসার ছাড়ছি, বাবা। সংসার ছাড়ছি, এ সংসারের প্রভু শ্রীনারায়ণের সেবায় লাগবো বলে। আপনাকে আর জননীকে যে তিনিই রক্ষা করবেন। আমার জীবনের লক্ষ্য চিরতরে স্থির হয়ে গেছে। সঙ্কল্প করেছি, ভক্তি-সাধনব্রত এই পৃথিবীতে ভক্তিবাদ নূতন করে প্রচার করতে হবে। আর সে প্রচার হবে শাস্ত্রভিত্তিক। আমি ভেতর থেকে শক্তি পেয়েছি, উপলব্ধি করেছি—এই হ্রস্ব ভগবৎ-কর্মে আমার একটা নির্দিষ্ট ভূমিকা রয়েছে।”

আত্মপ্রত্যয় ও সঙ্কল্পের দৃঢ়তা ফুটিয়া উঠে তরুণ বাসুদেবের চোখে মুখে।

ব্যাকুল কণ্ঠে পিতা কহেন, “বাবা, বাসুদেব, তোমায় যে আমরা লাভ করেছি অনন্তোৎকর্ষ নারায়ণের কৃপায়। দীর্ঘদিন ব্রত উপবাস করে প্রভুর চরণে অন্তরের আবেদন জানিয়েছি, প্রসন্ন হয়ে তিনি তোমায় পাঠিয়েছেন আমাদের ঘরে।”

“প্রভুর বরে আমার জন্ম। তাইতো আমার দৃঢ় বিশ্বাস, প্রভুর আদিষ্ট কর্মযজ্ঞেই হবে আমার এ জীবন উৎসর্গিত।”

“সবই তো স্তন্যলাভ। কিন্তু বাবা, তুমি যে আমাদের একমাত্র পুত্র। তুমি সন্ন্যাস নিলে, তোমার পিতৃদান থেকেও যে আমরা বঞ্চিত হবো। এমনতর অধর্ষের কাজ তুমি ক’রো না, বাবা।”

নীরবে দাঁড়াইয়া কিছুকাল আত্মাবগাহন করেন বাসুদেব। তারপর ধীর প্রশান্তকণ্ঠে কহেন, “পিতা, আমার দ্বারা আপনার পারলৌকিক কল্যাণের কোন ক্ষতি না হয় তা আমি দেখবো।



বেশ, আচার্য্য অচ্যুতপ্রকাশের আশ্রয়ে থাকলেও, আমার সন্ন্যাস গ্রহণ আমি আপাততঃ স্থগিত রাখবো। আমার অন্তরাঙ্গা বলছে, অদূর ভবিষ্যতে আমার একটি অমুজ্জ্বল জন্মগ্রহণ করবে। তখন আর আপনাদের পিণ্ডলোপের ভয় থাকবে না। সে ভূমিষ্ঠ হবার পরেই আমি প্রবেশ করবো সন্ন্যাস আশ্রমে।”

পিতৃভক্ত বাসুদেব তাহার এ প্রতিজ্ঞা ভঙ্গ করেন নাই। উত্তর-কালে কনিষ্ঠভ্রাতার জন্মের পরই তিনি সংসার ত্যাগ করিয়াছিলেন।

সন্ন্যাস না নিলেও অচ্যুতপ্রকাশের কাছে দীক্ষা নিতে বাসুদেব বিলম্ব করেন নাই। আচার্য্যের মঠে থাকিয়া তাঁহার নির্দেশিত পথে অনন্ত নিষ্ঠায় তিনি উদ্যাপন করিয়া চলেন তাঁহার সাধনা ও স্বাধ্যায়। অচিরে সমগ্র কানাড়া অঞ্চলে তিনি পরিচিত হইয়া উঠেন এক অসামান্য পণ্ডিত ও সাধকরূপে।

এভাবে বারো বৎসর অতিক্রান্ত হওয়ার পর মধ্যাহ্নে নারায়ণ ভট্টের গৃহে আবির্ভূত হয় আর একটি পুত্রসন্তান।<sup>১</sup>

এবার বাসুদেবের অভীষ্ট সিদ্ধির পথে আর কোন বাধা থাকে না, জনক ও জননীর সম্মতি নিয়া তিনি চিরতরে গৃহত্যাগ করেন। পঁচিশ বৎসরের সাধননিষ্ঠ প্রতিভাদীপ্ত জীবনে শুরু হয় সন্ন্যাস আশ্রমের সুকঠোর ব্রত।

গুরু এই নবীন শিষ্যের সন্ন্যাস নাম দেন পূর্ণপ্রজ্ঞ-তীর্থ। পূর্ণপ্রজ্ঞে বাসুদেব ছিলেন আচার্য্য মধ্যাহ্নেহের পুত্র, এজন্য আচার্য্য মধ্ব নামেও তিনি সে অঞ্চলে পরিচিত হইয়া উঠেন।

আচার্য্য অচ্যুতপ্রকাশের মঠে ছাত্র ও সন্ন্যাসী শিষ্যদের ভীড় লাগিয়াই আছে। নিত্যকার সাধনভজনের সঙ্গে সঙ্গে শিক্ষার্থী ও সাধুরা শাস্ত্রপাঠ ও বিচার বিতর্কে থাকেন সদা তৎপর। আর

১ উত্তরকালে এই শিষ্য পরিচিত হন বিষ্ণুতীর্থ নামে। পিতা ও মাতার দেহান্তের পর তিনিও জ্যেষ্ঠভ্রাতার অনুসরণে সন্ন্যাস গ্রহণ করেন।

নবীন আচার্য্য মধ্বই ইহাদের মধ্যমণি। বিশেষ করিয়া বেদান্তের ভক্তিবাদী আলোচনায়, ভাগবত ও মহাভারত পুরাণের ব্যাখ্যানে তাঁহার সমকক্ষ কেহ নাই। শ্রায়শাস্ত্রে মধ্বের দখল অসামান্য। সুযোগ পাইলেই বেদান্তের ভাষ্য নিয়া বর্ষীয়ান গুরুর সঙ্গে তিনি বিতর্ক বাধাইয়া বসেন, গভীর শাস্ত্রজ্ঞান ও তর্কশক্তির সাহায্যে আচার্য্য শঙ্করের অদ্বৈতবাদের ত্রুটি-বিচুতি উদ্ঘাটন করেন। এই মতবাদের উপর হানেন প্রচণ্ড আঘাত।

গুরু অচ্যুতপ্রকাশ কেবলাদ্বৈতী সন্ন্যাসী হইলেও অন্তরে অন্তরে ভক্তিরসের রসিক। ভক্তি আন্দোলনের একটা নূতন স্রোতধারা উড়ুপীর শেষশায়ী নারায়ণ বিগ্রহ অনন্তেশ্বরকে কেন্দ্র করিয়া বিস্তারিত হোক, এই আশা গোপনে এতকাল তিনি পোষণ করিতেছিলেন। এবার প্রতিভাধর নবীন শিষ্য মধ্বকে দেখিয়া, তাঁহার বিরাট প্রতিশ্রুতি লক্ষ্য করিয়া, তিনি মহা উল্লসিত। মনে প্রাণে সদাই উপলব্ধি করেন, উড়ুপীর মঠে যে উৎস তিনি রচনা করিতেছেন অদূর ভবিষ্যতে তাহার লোকপাবনী কল্যাণধারা ছড়াইয়া পড়িবে ভারতভূমির দিকে দিকে।

কয়েক বৎসরের মধ্যেই মঠের নেতৃত্ব ভার মধ্বের উপর আসিয়া পড়ে। গুরু তাঁহাকে একদিন ডাকিয়া বলেন, “বৎস, আমার এ দেহ প্রাচীন হয়েছে, ক্রমে আরও অপটু হয়ে পড়বে। তাই আমার ইচ্ছে, তুমি এখানকার সন্ন্যাসীদের নেতা হয়ে বসো, আর মঠ পরিচালনার দায়িত্ব নিজ হাতে তুলে নাও।”

এক শুভদিনে অচ্যুতপ্রকাশ স্থানীয় সাধু-সন্ন্যাসী ও সজ্জনদের আহ্বান করেন, সকলের সমক্ষে মধ্বের হাতে তাঁহার উড়ুপী মঠের সর্বসময় ক্ষমতা সঁপিয়া দেন। স্নেহপূর্ণ স্বরে কহেন, “বৎস, আজ হতে এই মঠের সমস্ত কর্তব্য সম্পাদনের ভার তোমার ওপর রইলো। এখানকার মঠাধীশরূপে তোমার নূতন নাম হলো—  
আনন্দ তীর্থ।”

উত্তরজীবনে মধ্বকে তাঁহার সমস্ত শাস্ত্রগ্রন্থ ও ভাষ্যে গুরুদত্ত এই মঠাধীশ-নামই ব্যবহার করিতে দেখা গিয়াছে।

মধ্বের সমকালীন ভারতে বিশেষতঃ দাক্ষিণাত্যে দার্শনিকতা ও ধর্মীয় মতবাদের দ্বন্দ্ব সংঘর্ষ নিতান্ত কম ছিল না। সারা দেশ তখন বহুতর খণ্ডরাজ্যে বিভক্ত। এই সব রাজসভায় তর্কদক্ষ পণ্ডিতদের সমাদর ছিল প্রচুর। ছোট বড় রাজারা যুদ্ধ বা বাদ-বিসম্বাদে লিপ্ত। পথ-প্রান্তরের অবস্থাও তেমন নিবাপদ নয়। কিন্তু এই অশান্তিময় পবিত্রেশেও তর্কশূব বা বিচার-মল্লেরা পরমানন্দে দেশের সর্বত্র ঘুরিয়া বেড়াইতেন। তাঁহাদের সম্বর্ধনায় ও বিচার সভার অনুষ্ঠানে রাজা-প্রজা ধনী-নিধন সকলেরই উৎসাহ ও উল্লাসের সীমা থাকিত না।

বিচারমল্লতার জন্ত ঐ সব শাস্ত্রবিদ পণ্ডিতদের নানা উপাধি দেওয়া হইত। ইহাদের কেউ ছিলেন তর্ক-পঞ্চানন, কেউ বাদীসিংহ, কেউ বা খ্যাত ছিলেন প্রতিবাদী-ভয়ঙ্কর নামে। রাজসভা, মঠ-মন্দির বা ধর্ম অধিবেশনে এই সব তর্কদক্ষ চর্চক পণ্ডিতদের মর্যাদা ছিল অসাধারণ।

উড়ুপী ব মঠে মাঝে মাঝে দেশ-বিদেশখ্যাত ভ্রাম্যমাণ পণ্ডিতদের আগমন ঘটিত। ইহাদের সহিত সংঘর্ষের জন্ত আচার্য্য মধ্ব দীর্ঘদিন যাবৎ নিজেকে প্রস্তুত করিয়া তুলিতেছেন। ইতিমধ্যেই সাধু-সন্ন্যাসী ও পণ্ডিতদের মধ্যে তাঁহার শাস্ত্রজ্ঞান ও বিচার নিপুণতার খ্যাতি কম ছড়াইয়া পড়ে নাই। বিদেশী পণ্ডিতেরা উড়ুপীতে আসিলেই আচার্য্য তাঁহাদের সহিত তর্কযুদ্ধে নামিতেন, ভক্তিবাদী ব্যাখ্যা ও বিচারের মধ্য দিয়া করিতেন তাঁহাদের পর্যূদস্ত।

তর্কযুদ্ধে জয়ী হইলে পণ্ডিতের খ্যাতি বাড়ে, বিপক্ষকে ধরাশায়ী করিয়া একটা আত্মতৃপ্তিও পাওয়া যায়, একথা ঠিক। কিন্তু মধ্ব এইসব দ্বন্দ্ব-সংঘর্ষে উৎসাহী হইতেন আরও একটা বড় কারণে। তাঁহার জীবন একটি গঠনমূলক ঐশ্বরীয় কর্মের জন্ত উৎসর্গীত। ভক্তি-আন্দোলনের একটি নূতন ধারা তিনি প্রবর্তন করিতে চান।

একাজ করিতে হইলে প্রথমত চাই শঙ্করের অদ্বৈতবাদের খণ্ডন, অপর দিকে চাই রামানুজের বিশিষ্টাদ্বৈত বাদ হইতে একটি পৃথক ও নূতনতর ভক্তিবাদের ধারা উৎসারিত করা। ইহা করিতে হইলে প্রথমে শাস্ত্র পাবঙ্গম ও বিচারদক্ষ পণ্ডিতদের পরাভূত করা ও স্বমতে আনয়ন করা দরকার। নতুবা জনসাধারণ তাহা গ্রহণ করিতে চাহিবে কেন? এ সময়ে উড়ুপীতে আসিয়া যাঁহারাই তর্কযুদ্ধে অবতীর্ণ হইয়াছেন তাঁহারাই মধ্বের তর্ক-শরজালে হইয়াছেন ভূতলশায়ী।

প্রিয় শিষ্যের কৃতিত্বে বুদ্ধ আচার্য্য অচ্যুতপ্রকাশ আনন্দ ও গর্বের ভরপুর। সেদিন তাঁহাকে নিকটে ডাকাইয়া কহেন, “বৎস মধ্ব, যে সঙ্কল্প তুমি গ্রহণ করেছো, তাতো শুধু উড়ুপীর মঠে বসেই সিদ্ধ হবে না। তুর্গপ্রাকারের আড়ালে বসে থেকে ক’টি প্রাতিপক্ষকে তুমি পরাস্ত করবে? এবার তুর্গের বাইরে যাও। আত্মরক্ষার মনোভাব ছেড়ে দিয়ে এগিয়ে পড়ো আক্রমণ করতে। আগে দাক্ষিণাত্যের রাজসভা ও মঠ-মন্দিরগুলিতে উপস্থিত হয়ে বিচার-যুদ্ধ আহ্বান করো। তারপর বেরিয়ে পড়ো উত্তর ভারতের ধর্মানেতাদের প্রতিদ্বন্দ্বী হয়ে।”<sup>১</sup>

গুরুর নির্দেশ মধ্ব সানন্দে মানিয়া নেন। শুরু হয় সদলবলে তাঁহার দক্ষিণ ভারত পর্যটন ও শাস্ত্রবিচারের অকুষ্ঠান। এ সময়ে বিভিন্ন অঞ্চলের সাধক ও দার্শনিকদের তিনি তর্কযুদ্ধে পরাস্ত করিতে

১ তখনকার দিনে ভারতের সকল দার্শনিক ক্ষেত্রেই তাক্ষিকতা বৃদ্ধি পাইয়াছিল। একাদশ শতাব্দী হইতে চতুর্দশ শতাব্দী পর্যন্ত জ্ঞান ও বোদ্ধান্তের ক্ষেত্রে বিচারমন্ডিতা বেশ চলিয়াছে। এই সময়েই তাক্ষিক শিরোমণি শ্রীহর্য মিশ্র, গঙ্গেশ উপাধ্যায়, চিৎস্বখাচার্য্য, আনন্দবোধ ভট্টারকাচার্য্য, লীলাবতীকার বজ্রতাচার্য্য, বোদ্ধান্ত দেশিকাচার্য্য ও বিদ্যারণ্য মুনীশ্বরের আবির্ভাব। ইহারাই সকলেই তাক্ষিক, এই কয়েক শতাব্দী তাক্ষিকতারই যুগ বলিলে অসঙ্গতি

সমর্থ হন। অবশেষে ঘুরিতে ঘুরিতে উপস্থিত হন বিষ্ণুমঙ্গলম তীর্থে গুরু অচ্যুতপ্রকাশও এস্থানে তাঁহার সহিত মিলিত হইয়াছিলেন।

মধ্ববিজয় ও মণিমঞ্জরীতে বলা হইয়াছে, ঋদ্ধি সিদ্ধি সম্পন্ন মধ্ব এই সময়ে তাঁহার সঙ্গীদের কাছে কিছু যোগৈশ্বর্য প্রকটিত করেন পথ চলিতে চলিতে সেবার সবাই এক নিবিড় অরণ্যের মধ্য দিয় অগ্রসর হইতেছেন। নিকটে কোন জনমানব নাই, আশ্রয় বা খাদ্য সংগ্রহের কোন সম্ভাবনাও দেখা যাইতেছে না। অথচ সঙ্গীরা ক্ষুধা-তৃষ্ণায় কাতর হইয়া উঠিয়াছে। এভাবে আর কিছুক্ষণ চলিতে থাকিলে ক্ষুৎপিপাসা ও পথশ্রমে কয়েকজনের জীবনান্ত ঘটিবে সন্দেহ নাই।

এ সম্বন্ধে কি করা যায়? ব্যগ্র ব্যাকুল মধ্ব সহযাত্রীদের নিয়ঃ এক বৃক্ষতলে আশ্রয় গ্রহণ করেন। ইঠাৎ তাঁহার দেহে দেখা দেহ দিব্য ভাবের আবেশ। এক সঙ্গীর বুলিতে ভুক্তাবশিষ্ট এক টুকরা শুকনা কটি পাওয়া যায়। ভাবাবিষ্ট মধ্ব অক্ষুটস্থরে বার বার কি যেন বলিতে থাকেন আর ঐ রুটিটি হাত দিয়া চাপিয়া ধরেন। ক্ষণপরেই সকলে সবিস্ময়ে দেখেন—সঙ্গীদের সবার উদরপুষ্টির উপযোগী একরাশ রুটি কোথা হইতে ঐ বুলির মধ্যে আসিয়া গিয়াছে।

ভক্ত পণ্ডিত নারায়ণাচার্যের লেখা গ্রন্থে যোগবিভূতি সম্পন্ন মধ্বের অমানুষী ভোজন সামর্থ্যের একটি চট্‌কদার কাহিনী রহিয়াছে। অনেকের ধারণা, মহাভারতে বায়ুপুত্র ভীমের সম্বন্ধে যাহা বলা হইয়াছে এ কাহিনী অনেকটা তাহারই অনুরূপে রচিত।

নানা অঞ্চলের বিচার সভায় জয়ী হইয়া শিষ্যগণ সহ মধ্ব এবার ত্রিবেঙ্গ্রামে আসিয়া পৌঁছিয়াছেন। ভক্তিমান ও বিদ্যোৎসাহী বলিয়া এখানকার রাজার খ্যাতি যথেষ্ট। মধ্ব তাঁহার সহিত সাক্ষাৎ করিলেন। আগন্তুক সন্ন্যাসীর নবীন বয়স, চোখে মুখে পাণ্ডিত্য ও প্রতিভার দীপ্তি ছড়ানো। প্রথম দর্শনেই রাজা তাঁহার প্রতি আকৃষ্ট

হইলেন। সাদর সম্বন্ধনার পর কহিলেন, “সন্ন্যাসীবর, আদেশ করুন, আপনার কোন্ সেবায় নিজেকে আমি নিয়োজিত করতে পারি।”

“মহারাজ, আমি সর্বত্যাগী সন্ন্যাসী, নিজের সেবার জন্ত আমি মোটেই আগ্রহী নই। এই ভক্তিহীন ভ্রষ্টাচার যুগে ভক্তিবাদ প্রচারের জন্ত আমি কৃতসঙ্কল্প। আপনি কালবিলম্ব না করে একটি বিচার-সভা আহ্বান করুন, সেখানে ভক্তিহীন অদ্বৈতবাদের উপর হানবো আমি চূড়ান্ত আঘাত।”—ধীর গম্ভীর স্বরে বলেন আচার্য্য মধ্ব।

“আপনি কি রামানুজের বিশিষ্টাদ্বৈতবাদের অনুগামী?”

“না, মহারাজ, আমার ভক্তিবাদ তা থেকে একেবারে পৃথক। আমার মতে, ব্রহ্ম ও জীব নিত্য পৃথক—অর্থাৎ দুটি পৃথক বস্তু। কারণ ব্রহ্ম স্বতন্ত্র, জীব অস্বতন্ত্র। তাই এই দ্বৈতবাদকে বলা হয় স্বতন্ত্র-অস্বতন্ত্রবাদ। এতে রয়েছে শঙ্কর ও রামানুজ দুই-এরই চরম বিরোধিতা।”

“আপনার তত্ত্বের পূর্বসূরী কারা? তাঁদের নাম তো শুনি নি।”

“মহারাজ, সনৎকুমারই এ তত্ত্বের আদি গুরু। ঈশ্বরের কৃপায় আমার মাধ্যমেই এর পুনঃপ্রচার হতে যাচ্ছে।”

“কিন্তু যতিবর, আপনি কি আপনার এই মতবাদের সমর্থনকল্পে ব্রহ্মসূত্রের কোন ভাষ্য রচনা করেছেন? নইলে দেশের সাধু-সন্ন্যাসী ও পণ্ডিতসমাজ এ মতবাদ গ্রহণ করবে কেন?”

“মহারাজ, আমার সূত্রভাষ্য বিরাজিত রয়েছে আমার কণ্ঠেই। আপনি সঙ্কর বিচার-সভার ব্যবস্থা করুন, আর প্রতিপক্ষরূপে আমন্ত্রণ জানান কোন অদ্বৈতবাদী তর্কযোদ্ধাকে।”

“যতিবর, নিকটেই শৃঙ্গেরীতে বিরাজ করছেন আমার গুরু বিজ্ঞানশঙ্কর মহারাজ। তিনি শুধু শৃঙ্গেরী মঠেরই অধীশ্বর নন, শঙ্কর অদ্বৈতবাদের এক শ্রেষ্ঠ স্তম্ভ সারা দাক্ষিণাত্যে। বেশ কথা, ঠেকেই আমি আমন্ত্রণ জানাচ্ছি আপনার প্রতিপক্ষ হিসাবে।”

ছই আচার্য্যের বিচার-সভা বিরাট চাঞ্চল্যের সৃষ্টি করে। প্রসিদ্ধ পণ্ডিত, সাধক ও অগণিত উৎসাহী জনগণের সম্মুখে শুরু হয় শাস্ত্রীয় যুক্তিতর্কের স্মৃতিস্তম্ভ সংঘাত। নবীন সন্ন্যাসী মধ্ব কিন্তু এই বিচার দ্বন্দ্বে তেমন সুবিধা করিতে পারেন নাই। অমালুখী প্রতিভার অধিকারী, বর্ষীয়ান পণ্ডিত ও সাধক শিরোমণি বিদ্যাসঙ্করের ঐতিহাসিক যুক্তিজাল তিনি ছিন্ন করিতে পারেন নাই। শেষটায় এই শক্তিশ্বর প্রতিপক্ষের কাছে তাঁহাকে পরাজয় স্বীকার করিতে হয়।

এই পরাজয়ের গ্লানি মধ্বের জীবনে আনে এক সুদূরপ্রসারী প্রতিক্রিয়া। এখন হইতে শুধু অদ্বৈতবাদের উপরই তিনি খড়াহস্ত হন নাই, আচার্য্য বিদ্যাসঙ্কর ও শৃঙ্গেরী মঠকেও জ্ঞান করিতে থাকেন তাঁহার প্রধান বৈরীরূপে।<sup>১</sup> বলা বাহুল্য, ত্রিবেঙ্গাম সভার সেদিনকার এ করুণ অভিজ্ঞতা মধ্বের বিরোধিতাকে তীব্রতর করিয়া তোলে, আর তাঁহার নিজস্ব দ্বৈতবাদ স্থাপনের সঙ্কল্পকে করে দৃঢ়তর।

তথ্য প্রমাণ হইতে দেখা যায়, ১২২৮ খৃষ্টাব্দের কাছাকাছি কোন সময়ে আচার্য্য তাঁহার দক্ষিণ-ভারত পর্য্যটন শেষ করেন এবং পর্য্যটনের শেষের দিকেই শৃঙ্গেরীর মঠাধীশ বিদ্যাসঙ্করের সহিত হয় তাঁহার বিচার বিতর্ক।<sup>২</sup> নবীন সন্ন্যাসী মধ্বের বয়স তখন প্রায় ত্রিশ বৎসর।

ত্রিবেঙ্গাম হইতে মধ্ব সরাসরি চলিয়া যান রামেশ্বরধামে এবং সেখানে চারমাস কাল অতিবাহিত করেন নিভৃত তপস্তায়। এখানেও

১ শৃঙ্গেরী মঠ ও উড়ুপীর মধ্বমঠের বন্দ, বাদানুবাদ ও শত্রুতা দীর্ঘকাল ধরিয়া চলে। ফলে মধ্ব ও তাঁহার অহুগামীরা নানাভাবে নিগৃহীত হইতে থাকেন। প্রায় এক শতাব্দীর পরে মধ্ব-মত ব্যাপক জনসমর্থন লাভ করিলে উভয় মঠাধীশের মধ্যে মৈত্রী ও সৌজন্যমূলক সম্পর্ক গড়িয়া উঠে।

২ শৃঙ্গেরী মঠের অধ্যক্ষ-পত্নী হইতে দেখা যায়, স্বামী বিদ্যাসঙ্কর পদীতে আরোহণ করেন ১২২৮ খৃষ্টাব্দে। অল্পমিত হয়, ইহার কিছু পরেই মধ্বের সহিত তাঁহার সাক্ষাৎ হয় ও সংঘর্ষ বাধে।

অদ্বৈতবাদী পণ্ডিত ও সন্ন্যাসীরা দলে দলে আসিয়া তাঁহাকে বিচার-বিতর্কে আহ্বান জানান। কিন্তু তপস্তাপরায়ণ মধ্বকে এসময়ে তর্কসভায় টানিয়া আনা সম্ভব হয় নাই। আপন মনে ইষ্টধ্যানের নিমগ্ন থাকিয়া তিনি সমাপ্ত করেন তাঁহার চাতুর্মাশ ব্রত।

অতঃপর সদলবলে তিনি শ্রীরঙ্গমে উপনীত হন। পরমপ্রভু নারায়ণের সেবা-অর্চনায় কিছুদিন কাটানোর পর পালর নদীর তীর ধরিয়া বিষ্ণুকাঞ্চীতে প্রবেশ করেন। সেখান হইতে ফিরিয়া আসেন উড়ুপীতে।

বিষ্ণুকাঞ্চীতে থাকাকালে একটি চাঞ্চল্যকর ঘটনা ঘটে। নারায়ণ আচার্য্য ইহার বিবরণ দিয়াছেন। এই ঘটনাটির মধ্য দিয়া মধ্বের অলৌকিক প্রতিভার প্রকাশ দেখা যায়। তাঁহার আগমনবার্তা শুনিয়া একদল অদ্বৈতী ও শৈব সন্ন্যাসী তাঁহাকে ঘিরিয়া ধরেন এবং তাঁহাকে নানাভাবে উত্তেজিত করিয়া টানিয়া আনেন শাস্ত্র বিচারের দ্বন্দ্বে। মধ্বের ভিতরে এ সময়ে দেখা যায় এক দিব্য ভাবের আবেশ। শাস্ত্রের এক একটি শব্দের বহুতর অর্থ ও ছোতনা তিনি প্রকাশ করিতে থাকেন তড়িৎবেগে ও অনর্গলভাবে। স্বয়ং সরস্বতী যেন এই নবীন সন্ন্যাসীর কণ্ঠে সেদিন আবিস্কৃত। বিচারকামী পণ্ডিতেরা তাঁহার এই অমামুষী প্রতিভা ও অলৌকিক প্রজ্ঞা দেখিয়া বিস্ময়ে হতবাক হইয়া যান। বিষ্ণুকাঞ্চী ও শিবকাঞ্চী উভয় স্থানেই মধ্বের জয়জয়কার ধ্বনিত হয়।

উড়ুপীর মঠে ফিরিয়া মধ্ব গুরুদেব অচ্যুতপ্রকাশের পদবন্দনা করিলেন। সবিস্তারে বর্ণনা করিলেন নানা তীর্থের নানা বিচার সভার বিচিত্র অভিজ্ঞতা।

মধ্বের মনোভাব বুঝিতে গুরুর ভুল হয় নাই। প্রশ্ন করিলেন, “বৎস, পর্য্যটন শেষে তোমার মন এমন ভারাক্রান্ত হয়ে আছে কেন, বলতো?”

মুহূর্ত্তে মধ্ব নিবেদন করেন, “প্রভু, চন্দ্রপথে বহু বিচার-সভার



সম্মুখীন হয়েছি। জয় পরাজয় দুই-এরই অতিজ্ঞতা হয়েছে এবং পরাজয় থেকে জয়মালাই লাভ করেছি বেশীর ভাগ স্থানে। আমার আত্মবিশ্বাস বেড়েছে, ভক্তি-সাম্রাজ্য স্থাপনের সঙ্কল্পও আরো দৃঢ় হয়েছে সন্দেহ নেই। কিন্তু প্রভু, ত্রিবেঙ্গামের সভায় শৃঙ্গেরীর অধ্যক্ষের কাছে যে ভাবে আমি পরাস্ত হয়েছি তার গ্লানি যে এখনো ভুলতে পারছি নে।”

“ভালোই হয়েছে বৎস। শক্তিমান প্রতিপক্ষের হাতে এ ধরনের আঘাতের তোমার প্রয়োজন ছিল। এ আঘাত থেকে নিশ্চয় বৃদ্ধি পেয়েছো, কোথায় কোন্ ক্রটি-বিচ্যুতি তোমার ভেতর লুকিয়ে রয়েছে। নিজের মতবাদের ভিত্তি আর তার দুর্গপ্রাকার আরো বেশী সতর্কতার সঙ্গে এবার গড়ে তোলো।”

“হ্যাঁ প্রভু, আমি উপলব্ধি করেছি—একটা নূতন ভক্তিপন্থী দ্বৈতবাদ ভারতে আমি স্থাপন করতে চাই অথচ আমার স্বপক্ষে নেই আমার এই মতবাদের সমর্থক ব্যাসদেবের বেদান্তসূত্রের কোন নূতন ভাষ্য।”

“ঠিকই বলেছো, সূত্রভাষ্য ছাড়া দেশের সাধক ও দার্শনিকের তোমার নূতন মতবাদ গ্রহণ করবে কেন? তাই আমি বলছি, তুমি অতি সত্বর তোমার মতবাদের সমর্থক একটি গীতাভাষ্য রচনা কর। তারপর কয়েক বৎসর উড়ুপীতে নিবিষ্ট হয়ে বসে সমাধি করো ব্যাসসূত্রের ভাষ্য।”

“তারপর?”

“তারপর তুমি হিমালয়ে যাও। মহর্ষি ব্যাসদেবের কুপালাস্ত্রের চেষ্টা করো। নূতনতর সূত্রভাষ্য হাতে নিয়ে—দৃষ্টকণ্ঠে ঘোষণা করে নূতন ভক্তিবাদ এবং তারপর শুরু হোক উত্তর ভারতে তোমার বিজয়-অভিযান। বৎস, স্মরণ রেখো, শৃঙ্গেরী মঠই ভারতবর্ষ নয় আর শুধু শাক্তর মতই তোমার প্রতিপক্ষ নয়। শাক্তর অদ্বৈতবাদ ছাড়াও তোমার যুদ্ধে হবে ভাস্কর, রামানুজ প্রভৃতির মতবাদের

বিরুদ্ধে। এখন থেকে তোমার প্রস্তুতিকে আরো তুর্ভেদ্য, আরো নিখুঁত ক'রে তোল।”

গুরুর এই নির্দেশ মানিয়া নিয়া মধব রত হইলেন নিজ মতের সমর্থক ভাষ্য রচনায়। কয়েক বৎসরের মধ্যে আরও কার্য্য সমাপ্ত হইয়া গেল। এবার তাঁহার দৃষ্টি পড়িল উত্তর ভারতের আধ্যাত্মিক প্রাণকেন্দ্র বারাণসী ও হরিদ্বারের দিকে।

মধব মনে মনে স্থির করিলেন, প্রথমে স্বরচিত সূত্রভাষ্য নিয়া বারাণসীতে যাইবেন। সেখানকার সন্ন্যাসী, দার্শনিক ও পণ্ডিত সমাজ তাঁহার যে সমালোচনা করিবেন, তদনুযায়ী করা হইবে ভাষ্যের পরিবর্তন। তারপর হিমালয়ে গিয়া মাগিবেন ব্যাসদেবের আশীর্ব্বাদ। এই আশীর্ব্বাদে বলীয়ান হইয়া হরিদ্বারে নামিয়া আসিবেন— ঘোষণা করিবেন তাঁহার নূতনতর ভক্তিবাদ।

মূল্যবান পুঁথিপত্র বুলিতে ভরিয়া মধব পদব্রজে উত্তর ভারতের দিকে রওনা হইলেন। সঙ্গে রহিল কয়েকটি অন্তরঙ্গ শিষ্য ও একদল তীর্থযাত্রী।

তখনকার দিনে তীর্থ পর্য্যটনে বিপদের অস্ত ছিল না। পথিমধ্যে প্রায়ই অতিক্রম করিতে হইত বড় বড় অরণ্য। এই সব অরণ্যে ছিল হিংস্র বাঘ ও সাপের ভয়, ইহা হইতেও বিপজ্জনক ছিল দম্ভা ভয়। পথচারীরা ধনী কি নির্ধন, গৃহস্থ কি সন্ন্যাসী, কোন কিছু বিচার করিত না। সুযোগ পাইলেই অতর্কিতে ঝাঁপাইয়া পড়িয়া পথিকের সর্ব্বস্ব লুটিয়া নিত।

চলার পথে সজ্জিগণসহ আচার্য্য মধবকেও বার বার কম বিপদে পড়িতে হয় নাই। কিন্তু কখনো ঈশ্বরের অমুগ্রহে, কখনো বা তাঁহার নিজের যোগশক্তির বলে আচার্য্য ও তাঁহার সঙ্গীরা চরম বিপদ ও লাঞ্ছনার হাত হইতে রেহাই পাইয়াছেন। নারায়ণ আচার্য্য

তাঁহার মধ্ববিজ্ঞয়ে এ ধরণের নানা অত্যাশ্চর্য্য কাহিনীর বিবর দিয়াছেন :

মহারাজের খণ্ডরাজ্য দেবগিরিতে সেবার এক কৌতুকাবহ ঘটনা ঘটে। এখানকার তরুণ রাজা মহাদেব কিছুদিন আগে সিংহাসনে আরোহণ করিয়াছেন। তরুণ বয়স, অন্তরে উৎসাহ উদ্দীপনা অবধি নাই। জনসাধারণের কল্যাণের জন্ত এক দীর্ঘ খাল খননে কাজে তিনি হাত দিয়াছেন। প্রকল্প অতি বৃহৎ এবং অল্প সময়ে মধ্যে তাহা সমাপ্ত করিতে হইবে। তাই রাজা মহাদেব অনেক সময় নিজে দাঁড়াইয়া থাকিয়াই খননের কাজ পরিদর্শন করেন।

ঢোল শোহরত করিয়া রাজার আদেশ জানানো হইয়াছে। কে কোন পথচারীই এই খালের নিকটবর্ত্তী অঞ্চল দিয়া যাতায়াত করিতে খননের কার্য্যে তাহাকে দিতে হইবে অন্তত একদিনের কায়িক পরিশ্রম। ফাঁকি দিয়া কেহ এই কাজ এড়াইয়া না যায় এ জ্ঞান রাজার ভারী কড়া ব্যবস্থা।

মধ্ব ও তাঁহার শিষ্যেরা একদল তীর্থযাত্রীর সঙ্গে সেদিন খালে পাশ দিয়া যাইতেছেন। গ্রহরীরা তাঁহাদের আটক করিল। রাজা আদেশ শুনাইয়া দিয়া কহিল, “এবার তোমাদের ঝোলাঝুলি রেখে কোদাল হাতে খাদের ভেতর নেমে পড়ো।”

মধ্বের শিষ্য ও সঙ্গীরা বুঝান, “ভাই, আমরা সাধু-সন্ন্যাসী গঙ্গাতীরের তীর্থদর্শনে যাচ্ছি। রাজা যে আইন করেছেন, তাঁ গৃহস্থ প্রজারা তা মেনে চলবে। ভিন্দেশী মানুষ, পরিত্রাজক সাধু সন্ন্যাসী, এদের ওপর তো এ আইনের প্রয়োগ চলতে পারে না।”

কিন্তু কে কাহার কথা শোনে? রাজরক্ষীরা জোর চৌকামেচি গালাগালি শুরু করিয়া দিল।

পাত্রমিত্র সঙ্গে নিয়া দেবগিরি-রাজ সেদিন খাল-খননের কাজ পরিদর্শন করিতে আসিয়াছেন। রক্ষী ও সাধুদের সোরগোল শুনিয়া সেদিকে তিনি আগাইয়া আসেন। গঙ্গার তীরে প্রস্থ করেন

“ব্যাপার কি ? কাজকর্ম না ক’রে এখানে এত হট্টগোল করা হচ্ছে কেন ?”

রক্ষীদের পক্ষ হইতে সব বলা হইবার পর মধ্ব রাজাকে উদ্দেশ্য করিয়া কহেন, “মহারাজ, প্রজাসাধারণের মঙ্গলের জন্ত আপনি এই খাল খননের কাজে হাত দিয়েছেন, খুবই ভালো কথা। কিন্তু এতে সাধু-সন্ন্যাসীদের ধরে টানাটানি কেন ?”

“রাজার বিধান সাধু ও অসাধু সবার ওপরই প্রযোজ্য।”

“কাজের দায়িত্ব প্রধানতঃ রাজার আর তাঁর গৃহস্থ প্রজাদের। সাধু-সন্ন্যাসীরা কেন এতে কায়িক পরিশ্রম দিতে যাবে ?”

“কেন, সাধু-সন্ন্যাসীরা কি সমাজ থেকে কিছু পান না ? তাঁদের খাওয়া-পরা চলে কোথা থেকে ? জনসাধারণ তাঁদের খাবার যোগায়, প্রতিদানে জনকল্যাণের কাজে কিছুটা ভাগ তাঁদের নিতে হবে বৈ কি ?”

“মহারাজ, আপনি ভ্রান্ত। সাধু-সন্ন্যাসীর কাজকে আপনি স্থূল দৃষ্টিতে দেখছেন কেন। আসলে তাঁদের কাজ সম্পন্ন হয় নৃশ্বর স্তরে। তাঁদের ত্যাগ তিতিক্ষা, প্রেরণা ও আশীর্ব্বাদ এনে দেয় প্রকৃত কল্যাণ।”

বিরক্তির সুরে রাজা মহাদেব বলে উঠেন, “আপনার এতো কিছু তত্ত্বকথা শোন্বার সময় আমার নেই। রাজ-সরকার থেকে যে আদেশ প্রচার করা হয়েছে, সবাইকে নির্বিচায়ে তা মেনে চলতে হবে। আর এক মুহূর্ত্ত দেরী না ক’রে খাল খননের কাজে আপনারা সবাই নেমে পড়ুন।”

“বেশ, মহারাজের আদেশমতই কাজ হবে, কিন্তু তার আগে একটা ক্ষুদ্র নিবেদন আছে।”—বিনীতভাবে বলেন আচার্য্য মধ্ব।

“কি আপনার সেই নিবেদন ?”

“মহারাজ, আপনি এ রাজ্যের অধীশ্বর, প্রজাদের পিতা, রক্ষা-কর্তা। প্রজার মঙ্গলের জন্ত পবিত্র অহুষ্ঠান আপনি শুরু করছেন,

ভাতে আপনার মঙ্গল হস্তের স্পর্শ থাকা উচিত। এতো বড় একটা কাজ হতে যাচ্ছে, কিন্তু তাতে আপনার স্পর্শ পড়েছে কি?”

“না, তা পড়ে নি বটে,”—নরম সুরে স্বীকার করেন দেবগিরির রাজা।

“সে ভুল আজই এখনি সংশোধন করুন মহারাজ। আনুষ্ঠানিক-ভাবে কিছুটা মাটি কেটে তা মাথায় নিয়ে আপনি দূরে ফেলে আসুন, এতে আপনার কর্তব্য যেমন করা হবে, তেমনি প্রজারাও পাবে উৎসাহ ও প্রেরণা।”

“আপনি ঠিকই বলেছেন, সম্মাসীবর। আমি সানন্দে এখনি খাল-খননের কাজে হাত লাগাচ্ছি।”—বলার সঙ্গে সঙ্গে কোদাল ও বুড়ি নিয়ে রাজা খালের ভিতর নামিয়া পড়েন।

খনন শুরু করার সঙ্গে সঙ্গে রাজা যেন ভূতাবিষ্ট হইয়া যান। দুই চক্ষু রক্তবর্ণ, নাসিকায় বহিতেছে ঘন ঘন দীর্ঘশ্বাস। যন্ত্রচালিত মানুষের মত কেবলই বুড়ি-বুড়ি মাটি কাটিয়া চলিয়াছেন, একাজে শ্রাস্তি নাই, ক্লান্তি নাই, নাই কোন বিরতি। প্রহরের পর প্রহর অতিবাহিত হইতেছে, কিন্তু বহু চেষ্টা করিয়াও রাজাকে কেহ ধামাইতে পারিতেছে না। তবে কি তিনি উন্মাদ হইয়া গেলেন? অথবা কোন অশরীরী প্রেত তাঁহার উপর ভর করিয়াছে? মন্ত্রী ও রাজপরিষদেরা কিংকর্তব্য-বিমূঢ় হইয়া ইতস্তত ছুটাছুটি করিয়া বেড়াইতেছেন। প্রাসাদে খবর দেওয়া হইল, রাণী ও পুরনারীরা ভীত সন্ত্রস্ত হইয়া কান্না জুড়িয়া দিলেন।

তবে ইতিমধ্যে সবাই বুঝিয়া নিয়াছেন, রাজার এই অস্বাভাবিক অবস্থার জন্ত দায়ী সম্মাসীবর মঞ্চ। মঞ্চের এক শিশু অতঃপর ব্যাপারটা কাঁস করিয়া দেন। মুচকি হাসিয়া কহেন, “রাজার হৃৎগা, আমাদের আচার্য্য যে কতবড় মহাপুরুষ তা তিনি বুঝতে পারেন নি। মঞ্চ হচ্ছেন বায়ুর অবতার, প্রভু নারায়ণের লীলার প্রধান সহায়ক। রাজার ওপর তিনি ক্রুদ্ধ হয়েছেন, তাই বায়ুর ভর হয়েছে রাজার

ওপর। আচার্য্যকে প্রসন্ন না করলে, এবার রাজার আর রক্ষা নেই, এভাবে দিনরাত বৎসরের পর বৎসর তাঁকে মৃত্তিকা খনন করে যেতে হবে।”

অতঃপর সবাই মিলিয়া মধ্বের চরণে বার বার ক্ষমা-প্রার্থনা করিতে থাকে। আচার্য্যের ক্রোধ প্রশমনের সঙ্গে সঙ্গে দেবগিরি-রাজের ভূতাবিষ্ট ভাব কাটিয়া যায়। সম্পূর্ণরূপে তিনি সুস্থ ও স্বাভাবিক হইয়া উঠেন।

এবার স্বজনগণসহ রাজা মধ্বের চরণে প্রণত হন, তাঁহার কৃপা ভিক্ষা করেন। প্রসন্ন মনে রাজাকে আশীর্ব্বাদ জানাইয়া মধ্ব বলেন, “মহারাজ, একটা কথা সদাই স্মরণ রাখবেন, সাধু-সন্ন্যাসীরা কৰ্ম্ম ও ধ্যান মননের ভেতর দিয়েই সমাজের প্রকৃত কল্যাণসাধন করে যাচ্ছেন। ভগবান শ্রীনারায়ণের দর্শন ক’জন পায়? কিন্তু নারায়ণের চিহ্নিত সেবক সাধু-সন্ন্যাসীদের দর্শন সবাই অনায়াসে পেতে পারে। এঁদের ভেতর দিয়েই পৃথিবী আর বৈকুণ্ঠের ভেতর রচিত হয় যোগ-মুদ্র। তাই লক্ষ্য রাখবেন, আপনার রাজ্যে সাধুদের অমর্য্যাদা যেন না হয়। আশীর্ব্বাদ জানাচ্ছি, আপনার এই খাল খননের কাজ অতি অল্প সময়ের মধ্যে সমাপ্ত হবে।”

অনুতপ্ত দেবগিরি-রাজ মধ্বের কাছে ক্ষমা ভিক্ষা করিয়া নিলেন। এই রাজ্যে কিছুদিন অবস্থানের জগু তাঁহাকে সান্ন্যয় অমুরোধও জানাইলেন, কিন্তু তাঁহাকে আর ধরিয়া রাখা গেল না।

আচার্য্য মধ্বের আশীর্ব্বাদ অচিরে ফলিয়া যায়। রাজা মহাদেব স্বহস্তে কোদাল নিয়া সারাদিন খাল কাটিয়াছেন এ সংবাদ বিদ্যা-বেগে ছড়াইয়া পড়ে। সহস্র সহস্র প্রজা উৎসাহে মাতিয়া উঠে; খাল খননের কাজে লাগিয়া যায়। রাজার মনস্কাম এভাবে পূর্ণ হয়।

পণ্ডিত নারায়ণ-আচার্য্য মণিমঞ্জরীতে পরমগুরু মধ্বের যোগ-বিভূতি প্রদর্শনের কয়েকটি ঘটনা উল্লেখ করিয়াছেন :

পরিব্রাজকের পথে মধ্ব ও তাঁহার শিষ্যগণ সেবার উত্তর-পশ্চিম ভারতের এক তুর্কী-মুসলমান রাজার সীমান্তে আসিয়া পৌঁছিয়াছেন। রাজ্যে প্রবেশ করিতে যাইবেন এমন সময় রক্ষী সেনারা তাঁহাদের বাধা দিল। কিন্তু আচার্য্য মধ্ব পিছু হটিবার পাত্র নন, সেনাদলের সম্মুখে দাঁড়াইয়া তিনি কতকগুলি বিশেষ মুদ্রা প্রদর্শন করিলেন, সঙ্গে সঙ্গে ঐ সেনাদলটি মন্ত্রমুগ্ধ সর্পের মত তাঁহার বশীভূত হইয়া পড়িল।

জনশ্রুতি আছে, মধ্ব অতঃপর সরাসরি ঐ মুসলমান রাজার সকাশে গিয়া উপস্থিত হন। আচার্য্য তুর্কী ভাষা কোনকালেই শিখেন নাই। কিন্তু সকলে সবিস্ময়ে দেখিলেন, বিদেশী ভিন্নধর্মী রাজার সহিত বিদেশী ভাষাতেই অবলীলায় তিনি কথাবার্তা চালাইয়া গেলেন।

মধ্বের সুগৌরব সুঠাম দেহ, দিব্যকাস্তি ও প্রখর ব্যক্তিত্বে মুসলমান রাজা একেবারে মুগ্ধ। বার বার তিনি অনুরোধ জানান, আচার্য্য আরো কিছুকাল তাঁহার রাজ্যে সশিষ্য বসবাস করুন; তাঁহাদের সেবা-পরিচর্য্যার জন্য যে কোন পরিমাণ অর্থব্যয়ে রাজা কুণ্ঠিত হইবেন না। কিন্তু মধ্বের পক্ষে আর সেখানে বিলম্ব করা সম্ভব নয়। তুর্কীরাজকে আন্তরিক শুভেচ্ছা জানাইয়া সেখান হইতে তিনি বিদায় গ্রহণ করিলেন।

মধ্বের প্রিয় শিষ্য ও একান্ত সেবক সত্যতীর্থ সে-বার এক মহা-সঙ্কটে পতিত হন। পথ চলিতে চলিতে সাধুরা সবাই এক বিস্তীর্ণ অরণ্যের সম্মুখে আসিয়া উপস্থিত। সন্ধ্যার আর বেশী দেরী নাই, খানিক বাদেই চারিদিকে নামিয়া আসিবে ঘন অন্ধকার। এ সময়ে এই দীর্ঘ বনের মধ্য দিয়া পথ চলা কঠিন। তাই ভাবিয়া-চিন্তিয়া সবাই স্থির করিলেন, আজিকার মত এখানেই বিশ্রাম করা যাক, কাল প্রত্যুষে ডেরা-ডাঙা উঠানো যাইবে।

সত্যতীর্থ তাঁহার ঝোলাঝুলি নামাইয়া তাড়াতাড়ি ঐ বনের

দিকে চলিয়া গেলেন। গুরু মহারাজের রাত্রের আহারের জন্ত কিছু ফলমূল এখনি তাঁহার সংগ্রহ করা চাই।

কিছুকাল পরেই বনমধ্যে গুনা গেল এক হিংস্র বাঘের গর্জন। সকলেই মহা উৎকণ্ঠিত। বেচারা সত্যতীর্থ এই বাঘের মুখে পড়ে নাই তো? দলবল নিয়া আচার্য্য মধ্ব তখনি সেইদিকে ছুটিয়া গেলেন।

বনের ভিতর প্রবেশ করিতেই যে দৃশ্য দেখা গেল, তাহাতে সকলেরই চক্ষুস্থির।

সত্যতীর্থ একটি বৃক্ষে আরোহণ করিয়াছে ফল-পাকড় সংগ্রহ করার জন্ত। আর তাহার অনতিদূরেই—থাবা গুটাইয়া বসিয়া আছে এক হিংস্র বাঘ। ভাঁটার মত দুই চোখ জ্বল্-জ্বল্ করিতেছে। বৃক্ষস্থিত শিকারের দিকে লুক্ক দৃষ্টিতে তাকাইয়া মাঝে মাঝে ছাড়িতেছে হুঙ্কার-ধ্বনি।

শমন-সদৃশ এই বাঘকে দেখিয়া সাধুরা সবাই ভীত সন্ত্রস্ত। এমন সময়ে আচার্য্য মধ্বের দেহে দেখা গেল এক দিব্য ভাবের আবেশ। ভাবকম্পিত দেহে, ধীরপদে ঐ বাঘের দিকে তিনি অগ্রসর হইয়া গেলেন। সন্মোহিতের মত বাঘটি কিন্তু স্থির হইয়া বসিয়া আছে, চোখ দুইটি নিম্পলক, তর্জন-গর্জন একেবারে স্তব্ধ। উহার সম্মুখে দাঁড়াইয়া মধ্ব নীরবে কয়েকবার হস্ত সঞ্চালন করিলেন। সঙ্গে সঙ্গে হিংস্র বাঘ মাথা নত করিল, সেস্থান ত্যাগ করিয়া ধীরে ধীরে প্রবেশ করিল গভীর বনাঞ্চলে।

সবাই এবার হাঁফ ছাড়িয়া বাঁচিলেন; সত্যতীর্থকে গাছ হইতে নামাইয়া আনা হইল।

সত্যতীর্থ যুক্ত করে নিবেদন করিলেন, “গুরুদেব, আপনার প্রতি কৃতজ্ঞতা প্রকাশের চেষ্টা আমি করবো না। কারণ, আপনার চরণেই নিজেকে আমি বিকিয়ে দিয়েছি। কিন্তু একটি প্রশ্ন আমি না ক’রে পারছি। আমার মত নগণ্য মানুষকে বাঁচানোর জন্ত আপনি কেন আপনার অমূল্য জীবন আজ বিপন্ন করতে গিয়েছিলেন?”



প্রশান্ত কণ্ঠে গুরু কহিলেন, “বৎস, তোমার জীবন যে বিয়ু-  
ভগবানের কৰ্মে উৎসর্গ করা। ঐশ্বরীয় কৰ্ম সম্পন্ন করার জন্য  
তোমার যে বেঁচে থাকা প্রয়োজন। তুমি আমার গীতাভাষ্য ও  
সূত্রভাষ্যের অমূল্য লিখেছো। সেবায় ও কৰ্মে নানাভাবে আমায়  
সাহায্য করেছে। ঈশ্বরের আদিষ্ট কাজে আরো অনেক সাহায্য  
তুমি করবে। এই কথাটাই তো হিংস্র বাঘটাকে আকারে ইঙ্গিতে  
আমি বুঝিয়ে বললাম। তাই তো সে আর দ্বিধাক্কা না করে  
তোমায় ছেড়ে চলে গেল।”

নিজের যোগবিভূতির কথা, ঐ অলৌকিক ঘটনার কথা, মঞ্চ কি  
সহজভাবেই না বর্ণনা করিলেন। শিষ্য ও সঙ্গীরা সবিস্ময়ে একে  
অশ্চর্য মুখের দিকে তাকাইতে লাগিলেন।

দীর্ঘ পরিব্রাজনের শেষে আচার্য্য মঞ্চ এবার বারাণসীতে আসিয়া  
উপস্থিত হন। এখানকার প্রধান প্রধান মঠ-মণ্ডলীর সহিত তাঁহার  
ঘনিষ্ঠতা হয়। গীতাভাষ্য ও ব্রহ্মসূত্র ভাষ্যে যে নূতন দ্বৈতবাদী ভক্তি-  
ধর্ম তিনি ব্যাখ্যা করিয়াছেন, সে সম্বন্ধে স্থানীয় সাধক ও পণ্ডিতদের  
সহিত তাঁহার মত বিনিময়ের সুযোগ ঘটে। অতঃপর নিজের  
মতবাদের শাস্ত্রভিত্তিকে আরো দৃঢ় করিয়া নিয়া মঞ্চ উপনীত হন  
পবিত্র সাধন-ধাম হরিদ্বারে।

মঞ্চের অনেক দিনের আশা, ব্যাসগুহায় বসিয়া প্রাণ ভরিয়া  
তপস্বী করিবেন, লাভ করিবেন জ্ঞানারামের অবতার ব্যাসদেবের  
পুণ্যময় দর্শন, তারপর তাঁহার চরণে সমর্পণ করিবেন স্বরচিত  
বেদান্ত-সূত্রের ভাষ্য। সে আশা এবার এতদিনে পূর্ণ হইল। দীর্ঘ  
ধ্যান-মননের ফলে মহামুনি ব্যাস জ্যোতির্গম্য মূর্তিতে আবির্ভূত  
হইলেন তাঁহার নয়ন সমক্ষে। মুহূর্মহুর হস্তে সূত্রের ভাষ্য স্বহস্তে  
তুলিয়া নিয়া তাঁহাকে করিলেন কৃতকৃতার্থ।

মহামুনি অতঃপর কহিলেন, “মধ্ব, তোমার প্রতি আমি প্রসন্ন। তোমার মতবাদ ভারতীয় দর্শনকে পুষ্ট করেছে, এযুগের ভক্তিশাস্ত্রেরও করেছে বিস্তার সাধন। ভক্তি প্রচারের দিকে দৃষ্টি রেখে এবার তুমি মহাভারতের তাৎপর্য্য নির্ণয়কারী একটি গ্রন্থ রচনা করো। এতে তোমার আরও পুণ্যকর্ম হয়ে উঠবে সহজতর।”

মধ্বের হাতে একটি সম্পূর্ণ তুলিয়া দিয়া স্নেহভরে আরো কহিলেন, “বৎস, এতে রয়েছে তিনটি পরমপবিত্র শালগ্রামশিলা। দেশে ফিরে গিয়ে এই শিলা যে-যে স্থানে তুমি স্থাপন করবে সেই সেই স্থান পরিচিত হয়ে উঠবে জাগ্রত পীঠ রূপে।”<sup>১</sup>

এই অযাচিত করুণায় মধ্ব একেবারে অভিভূত। হুই নয়নে বহিতেছে আনন্দের অশ্রুধারা। মহামুনির চরণে সাষ্টাঙ্গ প্রণিপাত জানাইয়া, গুহা হইতে তিনি বাহির হইয়া আসেন।

হিমালয় ক্রোড়স্থিত মহাতীর্থগুলি পরিব্রাজন করার পর মধ্ব সমতল ভূমিতে অবতরণ করেন। এবার হইতে অধ্যাপক-ভারতের বৃহত্তর রঙ্গক্ষেত্রে আসিয়া তিনি দাঁড়ান, শুরু হয় ভক্তিসিদ্ধ মহাসাধক, অদ্বৈতবাদী মহাদার্শনিক, মধ্বাচার্য্যের অবিস্মরণীয় ভূমিকা।

নানা সম্প্রদায়ের বৈষ্ণবদের ভিতর মধ্ব-অনুগামীরা হইতেছেন আপোষহীন কট্টর দ্বৈতবাদী।

সারা জীবন মধ্ব শঙ্করের কেবলাদ্বৈতবাদের বিরুদ্ধে সংগ্রাম করিয়াছেন, নিজের গ্রন্থসমূহে উপস্থাপিত করিয়াছেন প্রচুর শাস্ত্রীয় উদ্ধৃতি, যুক্তিতর্ক ও তথ্য-প্রমাণ। কিন্তু একথাও স্বীকার করিতে হইবে যে, শঙ্করের মতবাদ খণ্ডন করিতে গিয়া ঐতিহ্য অপেক্ষা স্মৃতির

১ এই পরম পবিত্র শিলাত্রয় মধ্বাচার্য্য সাক্ষর্যে প্রতিষ্ঠা করেন স্বরক্ষণ্য, উড়ুপী ও মধ্যতল এই তিনটি মঠে।

উপরই তিনি নির্ভর করিয়াছেন, বেদ-উপনিষদ অপেক্ষা পুরাণশাস্ত্রের সহায়তাই নিয়াছেন বেশী।

রামানুজের বিশিষ্টাদ্বৈতবাদ বৈষ্ণব আন্দোলনের এক বড় ভিত্তি। মধ্ব কিন্তু তাঁহার এই সর্বজনশ্রদ্ধেয় পূর্বসূরীর মতবাদের উপরও আঘাত হানিতে পশ্চাদপদ হন নাই।

মধ্ব মতের প্রধান ভিত্তি ভেদবাদ। ঈশ্বর ও জীব, সেব্যবস্তু ও সেবক নিত্য পৃথক, নিত্য ভেদযুক্ত। শুধু তাহাই নয়, ঈশ্বর স্বতন্ত্র, আর সবই অস্বতন্ত্র বা ঈশ্বর-নির্ভর। তাঁহার এই দ্বৈতবাদ দার্শনিক মহলে স্বতন্ত্র-অস্বতন্ত্রবাদ নামে পরিচিত। মধ্বপন্থীরা নিজেদের সম্প্রদায়কে বলেন—সদ্বৈষ্ণব।

মধ্বাচার্য্য ব্রহ্ম বা পরমাত্মার স্থলে স্থাপন করিয়াছেন বিষ্ণু বা নারায়ণকে। তিনি বলেন, সৃষ্টির আদিতে বিরাজিত ছিলেন এক ও অদ্বিতীয় আনন্দস্বরূপ ভগবান নারায়ণ, তখন ব্রহ্মা বা শিব কেহই ছিলেন না।<sup>১</sup>

সেই বিষ্ণুর দেহ হইতেই সৃষ্টি হইয়াছে এই বিশ্বচরাচর<sup>২</sup> এবং এই বিষ্ণু বা নারায়ণই একমাত্র সৎ বস্তু, অশেষ সদগুণের আধারও তিনি বটেন। তিনি নির্দোষ ও স্বতন্ত্র, তাঁহা ব্যতীত আর সমস্ত কিছুই অস্বতন্ত্র অর্থাৎ ঈশ্বরের অধীন।<sup>৩</sup>

জীব ও ঈশ্বরের এই কেবল-ভেদ ছাড়া আচার্য্য আরও পাঁচ প্রকার ভেদের অস্তিত্ব সমর্থন করিয়াছেন। জীব ও ঈশ্বরে ভেদ,

১ একো নারায়ণ আসীৎ ন ব্রহ্মা ন চ শঙ্করঃ,

আনন্দ এক এবাং আসীন্নানারায়ণঃ প্রভুঃ।

২ বিষ্ণোর্দেহাজ্জগৎ সর্বমাবিরাসীৎ। ৩ মহোপনিষদের—“যথা পক্ষী চ সূত্রক নানা বৃক্ষরসা যথা”—ইত্যাদি শ্লোকে আচার্য্য মধ্বের দ্বৈতবাদের কতকটা আভাস পাওয়া যায়।

জড় ও ঈশ্বরে তেদ, জড় ও জীবে ভেদ এবং জীবসমূহ ও জড় পদার্থ সমূহের আভ্যন্তরীণ ও পরস্পর তেদ—এই পঞ্চ ভেদকে তিনি বলিয়াছেন প্রপঞ্চ।<sup>১</sup>

আচার্য্যের মতে, জীবের মোক্ষ বা মুক্তি তখনই হয় যখন তাহার জন্ম-মৃত্যুর যাতায়াত বা পুনর্জন্মের অবসান ঘটে এবং সে যখন বৈকুণ্ঠে নারায়ণের কাছে স্থিতি লাভ করে।

তিনি আরও বলেন, মুখ্য প্রাণবায়ুর উপাসনাই শ্রেষ্ঠ—এবং নারায়ণের পুত্র বায়ুর কৃপা ছাড়া জীবের মোক্ষলাভের কোন সম্ভাবনা নাই। মধ্বের অনুগামী বৈষ্ণবদের বিশ্বাস, এ যুগে মধ্বই হইতেছেন বায়ুর অবতার; তাই তিনিই মানুষের ত্রাণকর্তা। পুণ্যকর্মের জন্ত মধ্ব ব্যবস্থা দিয়াছেন অক্ষয় স্বর্গবাস এবং মাধ্ব বৈষ্ণববাদের বিরোধী ব্যক্তিদের জন্ত ব্যবস্থা করিয়াছেন অনন্ত নরকবাস।<sup>২</sup>

মধ্বের মতবাদ অনুসারে জীবাত্মা স্বাভাবিকভাবেই অবিভা দ্বারা আবৃত। এই অবিভা দূর হয় এবং মোক্ষলাভ সম্ভব হয় ভগবানের স্বরূপ সম্বন্ধে জ্ঞান লাভের পর। উন্নতশ্রেণীর জীবাত্মারাই এই জ্ঞান লাভ করিতে পারে এবং এজন্য তিনি প্রচার করিয়াছেন আঠারোটি অনুশাসন। এগুলির মধ্যে প্রধান হইতেছে—বৈরাগ্য, শম, গুরু-

১ বিশ্বকোষ, পৃঃ ১০২।

২ মধ্ব ছাড়া অপর কোন প্রথম শ্রেণীর ভারতীয় দার্শনিক বা সাধক অনন্ত নরকবাসের কথা প্রচার করেন নাই। তাই অনেকের ধারণা, খৃষ্টধর্মের মতবাদ দ্বারা প্রভাবিত হইয়াই মধ্ব একথা বলিয়াছেন। দক্ষিণ ভারতের কল্যাণপুর খৃষ্টানদের প্রাচীন উপনিবেশরূপে খ্যাত। ষষ্ঠ শতকেও পর্যটক কস্মস্ ইন্ডিকো প্রয়টস্ কল্যাণপুরে এমন একজন ধর্মব্রাজককে দেখিতে পান যিনি পারশ্ব হইতে এদেশে আছেন। এই কল্যাণপুর ছিল মধ্বের জন্মস্থান পাজ্জকার কাছে, সমুদ্রের উপকূলে। কাছেই নিকটস্থ খৃষ্টানদেরাঙ্গের দুই একটি খৃষ্টীয় তম মধ্বের মতবাদের সহিত মিশিয়া গেলে বিশ্বাসের কিছু নাই—  
ডঃ হেষ্টিংস এনসাইক্লোপিডিয়া অব রিলিজিয়ন অ্যাণ্ড এথিক্স, ভল্যু : ৬।

সেবা, ভগবৎ-চরণে ভক্তি, উপাসনা, পূর্বব্রহ্মাণ্ডে অনুযায়ী শাস্ত্রীঃ  
অনুষ্ঠান, অসত্য মতবাদের বিরোধিতা প্রভৃতি ।

তাঁহার মতে, বিষ্ণু সেবার উপায় তিনটি : প্রথম—অঙ্কন ব  
সাধকের বিভিন্ন অঙ্গে বিষ্ণুর শঙ্খ-চক্র ইত্যাদির চিহ্ন ধারণ  
দ্বিতীয়—নামকরণ অর্থাৎ বিষ্ণুর বিভিন্ন নাম অনুসারে পুত্রাদির নাম  
রাখা । তৃতীয়—কায়িক, বাচিক ও মানসিক এই ত্রিবিধ ভজন ।

জীবনের শেষপাদে আচার্য্য মধ্ব উড়ুপী ও অগ্ন্যাত্ম স্থানে কৃষ্ণ-  
মন্দির স্থাপন করিয়াছিলেন । কিন্তু অখিলরসামৃত-মূর্তি শ্রীকৃষ্ণকে  
তিনি ইষ্টরূপে গ্রহণ করিয়াছেন বা মধুর ভক্তনের পথ অনুসরণ  
করিয়াছেন, এমন কোন প্রমাণ নাই ।

কেহ কেহ মনে করেন, মধ্ব মতবাদ হইতেই গোড়ীয় বৈষ্ণব  
আন্দোলন উদ্ভূত হইয়াছে এবং গোড়ীয় বৈষ্ণব সম্প্রদায় মধ্ব  
সম্প্রদায়েরই অন্তর্ভুক্ত । আসলে এ ধারণার কোন ভিত্তি নাই ।

১ মহাপ্রভু শ্রীচৈতন্য নিজের বা তাঁহার বিশিষ্ট শিষ্য ও অনুগামীরা কোন  
সময়েই মধ্বকে আদিগুরু বলিয়া বর্ণনা করেন নাই বা নিজের মধ্ব সম্প্রদায়  
ভুক্তও বলেন নাই । বরং নানাভাবে মধ্ব বা তত্ত্ববাদীদের সমালোচনা  
করিয়াছেন । গোড়ীয় গণোদ্দেশ দীপিকায় উদ্ধৃত মধ্বমঠের একটি গুরু-  
পরম্পরা এবং বলদেব বিজ্ঞানভূষণের উক্তি হইতেই ভ্রান্ত ধারণার উদ্ভব হইয়াছে  
আধুনিক গবেষণার গোড়ীয় গণোদ্দেশ দীপিকার প্রেক্ষিতে বলির  
প্রমাণিত হইয়াছে । বলদেব প্রথম জীবনে ছিলেন মধ্ব সম্প্রদায়ভুক্ত । পরে  
গোড়ীয় বৈষ্ণবসাধক রাধাকামোদর দাসের শিষ্যত্ব গ্রহণ করিয়া গোড়ীয়  
গোষ্ঠিতে যোগ দেন । মধ্ব-সম্প্রদায়ের প্রভাব ও আকর্ষণ বলদেব তখনও  
ছাড়িতে পারেন নাই । তাছাড়া, অল্পগুরে থাকিতে তিনি অপর সম্প্রদায়ের  
বৈষ্ণবদের তীব্র বিরোধিতার সম্মুখীন হন । গোড়ীয় বৈষ্ণবেরা প্রতি-অনু-  
নয় এবং তাঁহাদের নিজস্ব বেদান্ত-ভাষ্যই বা নাই কেন, এই সব প্রশ্নের উত্তর  
দিতে গিয়াও তাঁহাকে বিব্রত হইতে হয় । এই সব কারণে বলদেব গোড়ীয়  
সম্প্রদায়কে মধ্ব-সম্প্রদায়ের অন্তর্ভুক্ত বলিয়া ঘোষণা করিতে উৎসাহী হন ।

ব্যাসগুহা, বদরীনারায়ণ প্রভৃতি হিমালয়ের জাগ্রত তীর্থসমূহে কিছুদিন অবস্থানের পর মধ্বাচার্য্য সমতল ভূমিতে নামিয়া আসেন। এ সময়ে উত্তর ভারতের প্রধান প্রধান তীর্থ-নগর তিনি পরিভ্রমণ করেন এবং প্রচার করেন নিজের ব্যাখ্যাত ভক্তিবাদ।

অতঃপর আচার্য্য প্রত্যাবর্তন করেন দাক্ষিণাত্যে। গোদাবরী তীরের তীর্থ ও জনপদে বহু নরনারী তাঁহার শিষ্যত্ব গ্রহণ করেন। শোভন ভট্ট ও স্বামী শাস্ত্রী নামে দুই পণ্ডিতের খুব প্রভাব প্রতিপত্তি ছিল এই অঞ্চলে। মধ্বের সহিত শাস্ত্র-বিচারে পরাস্ত হইয়া এবং তাঁহার ব্যক্তিত্ব ও সাধন-ঐশ্বর্য্যে আকৃষ্ট হইয়া এই দুই শাস্ত্রবিদ ব্রাহ্মণই তাঁহার শিষ্যত্ব গ্রহণ করেন। শোভন ভট্টের সন্ন্যাস নাম হয় পদ্মনাভতীর্থ। মধ্বের পরে তিনিই হন উড়ুপীর অধ্যক্ষ।

মধ্বের গুরু আচার্য্য অচ্যুতপ্রকাশ অদ্বৈতবাদী সন্ন্যাসী হইলেও ভক্তিবাদের উপর তাঁহার আকর্ষণ ছিল সহজাত। প্রতিভাধর প্রিয় শিষ্যের সাহচর্য্য ও আকর্ষণ, তাঁহার ভক্তি-পর শাস্ত্রব্যাখ্যা ও দ্বৈত-বাদী নূতন সম্প্রদায়ের প্রবর্তন অচ্যুতপ্রকাশকে নবভাবে উদ্দীপিত

সাধ্য-সাধন সম্পর্কে চৈতন্ত-মত ও মধ্ব-মতে যুগলত পার্থক্য রহিয়াছে। চৈতন্তের ধর্ম্ম শ্রীমদ্ভাগবতের অল্পকূল, আর মধ্বের ধর্ম্ম মহাভারতের দ্বারা প্রভাবিত। চৈতন্ত গোপীপ্রেম, গোপীভজনকে উচ্চতম স্থান দিয়াছেন। মধ্ব বলিয়াছেন ইহার বিপরীত কথা। তাঁহার মতে, মহাভারতই শ্রেষ্ঠ শাস্ত্র। আরও বলিয়াছেন, কৃষ্ণভক্তিতে ব্রহ্মাই শ্রেষ্ঠ, গোপীরা ভক্তির অনেক নিম্নস্তরে অবস্থিত (ঙ্ঃ মধ্বাচার্য্য : ভাগবত তাৎপর্য্যম ১১।১২।২২)। তাছাড়া, “মধ্বাচার্য্য ব্রহ্মবধুগণকে স্বর্বেশ্বার সহিত তুলনা করিয়া শ্রীমদ্ভাগবত ও শ্রীমদ্ভাগবতাত্ত্বগ গোড়ীর সম্প্রদায়ের পারকীর সিদ্ধান্তকে হের প্রতিপাদন করিয়াছেন”—(ঙ্ঃ স্বন্দরানন্দ বিজ্ঞাবিনোদ : অচিন্ত্যভেদাভেদবাদ, শ্রীমদ্ভগবত বিজ্ঞানভূষণ, পৃ ১০২)। সুতরাং মহাপ্রভুর হুমহান গোড়ীর সম্প্রদায়কে মধ্ব-মতাবলম্বী বলার কোন বৌদ্ধিকতাই নাই। আসলে চৈতন্ত মহাপ্রভু স্বতন্ত্র গুরু—তিনি নিজেই নিজের ধর্ম্মসাম্রাজ্যের সংস্থাপক।

করিয়া তোলে। শেষটায় মধ্বের দার্শনিক মতবাদ ও সাধনপ্রণালী তিনি গ্রহণ করেন।

উপরোক্ত পণ্ডিতদের আগমনে মধ্বের বৈষ্ণব-আন্দোলন পূর্বাপেক্ষা অনেক বেশী শক্তিশালী হইয়া উঠে। শত শত নরনারী উড়ুপীর মঠে আসিয়া গ্রহণ করে তাঁহার পরমাশ্রয়।

মধ্ব-মতের এই প্রসার এবং ভক্তিবাদীদের সংখ্যাধিক্য শৃঙ্গেরী মঠের কর্তৃপক্ষকে চিন্তিত করিয়া তোলে। নূতন বৈষ্ণব-সম্প্রদায়ের ভক্তিবাদ, তজ্জন-পূজনের সহজ পন্থা, জনসাধারণের কাছে অনেক বেশী সহজবোধ্য। ইহার সঙ্গে যুক্ত হইয়াছে নবদীক্ষিত পণ্ডিত ও সন্ন্যাসীদের ত্যাগ তিতিক্ষা ও উত্তম। ফলে দিনের পর দিন আচার্য্য মধ্বের শিষ্য, ভক্ত ও অনুগামীর দল বাড়িয়া উঠিতেছে।

পদ্মতীর্থ তখন শৃঙ্গেরী মঠের অধ্যক্ষ। মঠের সন্ন্যাসীদের নিয়া তিনি এক গোপন সভা আহ্বান করিলেন। মধ্বাচার্য্যের প্রভাব কি করিয়া খর্ব্ব করা যায়, কিভাবে উড়ুপী মঠকে হীনবল করা যায় ইহাই বড় সমস্যা। বহু পরামর্শের পর স্থির হইল, মধ্বের ভক্তি-আন্দোলনকে একযোগে নানা দিক দিয়া আক্রমণ করিতে হইবে, চরম আঘাত হানিয়া করিতে হইবে বিধ্বস্ত। শৃঙ্গেরীর সন্ন্যাসীদের সবাইকে এই লড়াইয়ে নামিতে হইবে। যে সব রাজরাজড়া ও ধনী ব্যক্তির মঠের শিষ্য ও সমর্থক, তাঁহাদের যোগাইতে হইবে অর্থ ও লোকবল। প্রতি জনপদে, বিছাকেন্দ্রে, মঠে, মন্দিরে খণ্ডন করিতে হইবে প্রতিপক্ষের মতবাদ। উড়ুপীর মঠে মধ্বাচার্য্য ভক্তিশাস্ত্রের এক বিরাট গ্রন্থশালা গড়িয়া তুলিয়াছেন। এই গ্রন্থশালাটি ধ্বংস করার গোপন বড়যন্ত্রও এই সভায় করা হইল।

প্রচণ্ড উৎসাহে শৃঙ্গেরীর সন্ন্যাসীরা লড়াই-এ নামিয়া পড়েন। তাঁহাদের মঠ যেমন প্রাচীন, দলেও তেমনি আছে বহুসংখ্যক লোক। এ অঞ্চলের ধনী ও প্রভাবশালী ব্যক্তিদের অধিকাংশই তাঁহাদের সমর্থক। মধ্ব ও তাঁহার শিষ্যদের লাঞ্ছনা ও পীড়নের সীমা থাকে

না। তাঁহাদের প্রাণপ্রিয় গ্রন্থশালাটি বিনষ্ট করা হয় সুকৌশলে। রাত্রিযোগে আকস্মিকভাবে একদিন ইহা লুপ্তিত হয়। যেসব দ্বুপ্রাপ্য শাস্ত্র-গ্রন্থের উপর নির্ভর করিয়া মধব তাঁহার নূতন মতবাদ স্থাপন করিয়াছেন, তত্ত্ব শিষ্যদের প্রস্তুতি গড়িয়া তুলিয়াছেন, ছুটের চক্রান্তে তাহা কোথায় উধাও হইয়া গেল। আচার্য্য এবং তাঁহার অনুগামীরা এই চরম আঘাতে একেবারে মুৰ্ছিয়া পড়িলেন।

কিন্তু মধব হার মানিবার পাত্র নন। যে ঈশ্বরীয় কাজের ভার গ্রহণ করিয়াছেন, চরম দুর্দ্দেবের আঘাত আসিলেও সে কাজে তিনি বিরত হইবেন না। বিষ্ণুমঙ্গলের রাজা জয়সিংহ শৃঙ্গেরী মঠে যাতায়াত করিতেন, আবার এই রাজা আচার্য্য মধবের উপরও ছিলেন শ্রদ্ধাবান। ভাবিয়া-চিন্তিয়া মধব সেদিন জয়সিংহের কাছে গিয়া উপস্থিত হইলেন। কহিলেন, “মহারাজ, প্রাচীন পুঁথিপত্রের এই অপহরণ শুধু বৈষ্ণবদেরই ক্ষতি নয়, এ ক্ষতি দেশের সকল শাস্ত্রবিদের, সকল নরনারীর। ধর্ম ও সংস্কৃতির ভবিষ্যৎ গবেষক মাত্রেদেরই স্বার্থ-হানি হবে এতে। আপনি একটু উদ্যোগী হয়ে শৃঙ্গেরীর মঠাধ্যক্ষকে বুঝিয়ে বলুন, অমূল্য শাস্ত্রগ্রন্থের পুনরুদ্ধারে সহায়তা করুন।”

রাজা জয়সিংহ মধ্যস্থতা করিতে রাজী হন। শৃঙ্গেরীতে গিয়া মঠাধ্যক্ষকে নানাভাবে তিনি বুঝান, আপন প্রভাব প্রতিপত্তি প্রয়োগ করেন। তাঁহার এই দৌত্যকার্য্য সফল হয় এবং শাস্ত্রগ্রন্থগুলি তিনি উড়ুপীর গ্রন্থাগারে ফিরাইয়া দিবার ব্যবস্থা করেন।

এ ঘটনার পরও বেশ কিছুদিন উভয় মঠের মতবিরোধ ও বৈরিতা চলিতে থাকে। উত্তরকালে অবশ্য এই মতবিরোধের অবসান ঘটে, মধব বৈষ্ণব ও শৃঙ্গেরীর অদ্বৈতবাদী সন্ন্যাসীদের মধ্যে শান্তি স্থাপিত হয় এবং উভয়ে উভয়ের মর্যাদা ও সম্মান রক্ষায় যত্নবান হন। এ সময়ে উড়ুপী ও শৃঙ্গেরী মঠে তীর্থকামী বৈষ্ণব ও অদ্বৈতবাদীরা যাতায়াত করিতেন, ইহার প্রমাণ আছে।

যে সব বৈষ্ণব-বিরোধী প্রভাবশালী পণ্ডিত আচার্য্য মধবের শরণ



নিয়া বৈষ্ণবধর্ম গ্রহণ করেন তাঁহাদের অন্ততম ত্রিবিক্রম আচার্য্য। ইনি ছিলেন একজন খ্যাতনামা শৈব। শুধু মধ্বেয় যুক্তিতর্ক ও বিচার-মগ্নতা দেখিয়াই নয়, তাঁহার ত্যাগ তিতিক্ষাময় জীবন ও অপূর্ব সাধনানিষ্ঠায় মুগ্ধ হইয়াই ত্রিবিক্রম আত্মসমর্পণ করেন। তাঁহার বৈষ্ণবমত গ্রহণ বহুতর শৈবকে মধ্বে-মতের অনুরাগী করিয়া তোলে। এই নবদীক্ষিত পণ্ডিতের পুত্র নারায়ণ আচার্য্যই উত্তর-কালে হন মধ্বেয় জীবন-কাহিনীর রচয়িতা, দীক্ষাদান কালে মধ্বে ত্রিবিক্রম আচার্য্যকে একখানি নয়নমন-লোভন কৃষ্ণমূর্তি উপহার দেন। কোচিন রাজ্যে, দক্ষিণ কানাড়ায় আজিও ভক্ত বৈষ্ণবেরা সাগ্রহে এই অনুপম বিগ্রহটি তীর্থযাত্রীদের দর্শন করায়।

১২৭৫ খৃষ্টাব্দে মধ্বেয় পিতা দেহরক্ষা করেন। ইহার অল্পকাল মধ্যেই মধ্বেয় কনিষ্ঠ ভ্রাতা, পূর্ব পরিকল্পনা অনুযায়ী, সন্ন্যাস গ্রহণ করেন। দীক্ষার পর তাঁহার নূতন নাম হয় বিষ্ণুতীর্থ। আচার্য্য মধ্বেয় বৈষ্ণব আন্দোলনে সুপণ্ডিত বিষ্ণুতীর্থের অবদান প্রচুর।

জীবনের শেষপাদে মধ্বেয় ভক্তিসাধনা রূপান্তরিত হয়। নৈষ্ঠিক ভক্তিবাদ ধীরে ধীরে ঝুঁকিয়া পড়ে ভাবময়তা ও রসের দিকে। হৃদয়্যাসনে এতকাল অধিষ্ঠিত ছিলেন শেষশায়ী বিষ্ণু, এবার তাহা অধিকার করেন অখিলরসায়তসিদ্ধ—বালগোপালমূর্তি—শ্রীকৃষ্ণ।

ধ্যান-সমাহিত মধ্বেয় নয়নসমক্ষে প্রভু বালগোপাল সেদিন আবির্ভূত হন। আবদারের সুরে কহেন, “আচার্য্য, এত মঠ-মন্দির তো করলে, কিন্তু আমার জন্ত একটা ঠাই রাখলে না। তোমার ভক্তি-ভালবাসা কেমনতর গো? আমি শিগ্গীরই আসছি, আমার মূর্তি ভূমি পাবে। সাগর থেকে ফেরা নৌকোর ভেতর আমি থাকবো। আমার তুলে নিয়ে স্থাপন করবে তোমাদের মন্দিরে।”

ঠাকুর অন্তর্হিত হন। মধ্বেয় হৃদয়ে অনুরণিত হইতে থাকে

তাঁহার মধুনিশ্যন্দী কণ্ঠের স্বরকার। দিব্য আনন্দে আচার্য্য মধ্বের দেহ-মন-প্রাণ আশ্লুত হয়, দৈবী আশ্বাসের প্রেরণায় নব-চেতনায় তিনি উদ্ভুদ্ধ হইয়া উঠেন।

কয়েকদিন পরের কথা। শিষ্য ও ভক্তদের আমন্ত্রণে মধ্ব সেদিন সমুদ্রতীরে মালগী বন্দরে গিয়াছেন। অতি প্রভাত্রে ধ্যানজপ সারিয়া আচার্য্য বন্দরের মুখে, তটভূমিতে একাকী পাদচারণা করিতেছেন। ইঠাৎ দূরে নয়নপথে পড়িল একটি সমুদ্রগামী নৌকা। সাগর-মোহনার একপ্রান্তে কিছুদিন যাবৎ জাগিয়া উঠিয়াছে এক বিস্তৃত চড়া, নদীর উপরিভাগ হইতে সহসা ইহা দৃষ্টিগোচর হয় না। সমুদ্রগামী নৌকার মাঝি এই অদৃশ্য চড়ার কবলে বড় বিপন্ন হইয়া পড়িয়াছে। যেদিকে সে নৌকা চালনা করে চড়ায়ে ঠেকিয়া যায়, বাহির হইবার কোন সন্ধানই পাইতেছেন না।

দূর হইতে আচার্য্য মধ্বকে দেখিয়া মাঝি ডাকিয়া কাঁহিল, “সাধু-বাবা, আমি মহাবিপদে পড়েছি। চড়া থেকে নৌকো বাঁচাতে পারছিনে, দয়া ক’রে গভীর জলে বেরুবার পথ বলে দিন।”

মধ্ব হাঁক দিয়া কহিলেন, “ভয় নেই, মাঝি। আমার এই উত্তরীয় যেদিকে ঘুরিয়ে ফিরিয়ে নাড়াছি তা লক্ষ্য করে তুমি নৌকো চালাও। পথের সন্ধান পেয়ে যাবে।”

বলা বাহুল্য, সিদ্ধপুরুষ মধ্ব তাঁহার অলৌকিক বিভূতির বলে নদীতলের অবস্থা সবই জানিয়া নিয়াছেন। ঠিক কোন্ পথে চলিলে নৌকাটি চড়ার হুইচক্র এড়াইতে পারিবে, গভীর জলে পড়িয়া আবার সচল হইবে মাঝিকে সে নির্দেশ দেওয়া দরকার। তাই তীরে দাঁড়াইয়া বার বার তিনি উত্তরীয় আন্দোলন করিতেছেন আর মাঝি সেই অনুসারে করিতেছে নৌচালনা। অবশেষে দুঃসহ পরিস্থিতির অবসান ঘটিল, চড়া হইতে মুক্ত হইয়া নৌকাটি বন্দরের একপাশে আসিয়া ভিড়িল।

মাঝির হৃদয় কৃতজ্ঞতায় ভরিয়া উঠিয়াছে। ভক্তিতরে মধ্বকে

প্রণাম করিয়া কহিল, “প্রভু, আপনার কৃপায় নৌকাটি আজ বাঁচাতে পারলাম, নইলে ধনে-প্রাণে নিজেও মারা যেতাম। আমার বাড়ী এই দক্ষিণেরই আদমা গ্রামে। দ্বারকায় মালপত্র বিক্রি করতে গিয়েছিলাম, ফেরবার পথে এই বিপত্তি। ভাগ্যিস এ সময়ে এখানে আপনার দর্শন পেলাম। প্রভু, আমার একান্ত ইচ্ছে, আপনাকে আমি কিছু অর্থ দিই, আর আপনি তা ঠাকুরের সেবায় লাগান।”

“বাবা, তোমার অর্থের লোভে আমি এই ভোরবেলায় বন্দরের মোহনায় এসে দাঁড়াইনি। তুমি এখানে আসবে, আর নৌকাটি চড়ায় ঠেকবে, এসব আগে থেকেই আমার জানা। যাক, নৌকোর খোলের ভেতর কি আছে বল ?”

মাঝি ভাবিল, ‘সাধুবাবা নিশ্চয় ভেবে নিয়েছে, নৌকোর ভেতর বহুতর দামী মালপত্র আছে। তা থেকে তিনি কিছু বাছাই করে নিতে চান।’ হাসিয়া কহিল, “প্রভু, নৌকোর খোলে দামী বস্তু কিছুই নেই। রয়েছে শুধু একরাশ মাটির ঢেলা। দ্বারকায় সব মালপত্র বিক্রি হয়ে গেল। ফেরবার পথে শূন্য নৌকা কেবলই টাল খাচ্ছে। ভাবলুম, কিছু ভারী জিনিষ বোঝাই করা যাক। কাছেই গোপী-সরোবর। সেখানকার মাটি—গোপীচন্দন যাকে বলে, খুব পবিত্র। তারই কতকগুলো বড় বড় খণ্ড নৌকোর খোলে পুরে নিলাম। ভাবলাম, নৌকোর তলা ভারী করার কাজ এতে হবে, আবার ঐ গোপীচন্দন এখানকার ভক্ত মানুষদের বিলানোও যাবে। আর তো কোন দামী জিনিষপত্র আমার নেই।”

“ভাই, ঐ বস্তুই যে আমার কাছে মহাদামী, মহাপবিত্র।”—প্রসন্ন স্বরে উত্তর দেন আচার্য্য মধ্ব। “তুমি ওর থেকে বেছে সব চাইতে বড় খণ্ডটি আমায় দাও। তোমার মাটির ঢেলায় কোন্ পরম বস্তু লুকোনো আছে, তা তুমি জানো না, ভাই।”

“বেশ তাই হবে, আপনার যেমন অভিরুচি।” সানন্দে একথা

বলিয়া মাঝি একটি বৃহৎ গোপীচন্দন-খণ্ড নৌকোর তলা হইতে বাহির করিল, গড়াইয়া দিল আচার্য্য-মধ্বের দিকে ।

সঙ্গে সঙ্গে ঘটিয়া গেল এক অদ্ভুত কাণ্ড । উহার ভিতর হইতে বাহির হইয়া আসিল শিলাময় এক অনিন্দ্যসুন্দর বালগোপাল মূর্তি । গোপালের দক্ষিণহস্তে দধিমস্থনের দণ্ড, আর বামহস্তে মস্থনদণ্ডের সূত্র ।

সমুদ্রপ্রকটিত এই শ্রীমূর্তি নিয়া মধ্ব ও তাঁহার ভক্তশিষ্যেরা সাড়শ্বরে উড়ুপীতে আসিয়া পৌঁছেন । গোপীচন্দনলিপ্ত বালগোপালকে এখানকার বৃহত্তম সরোবরের<sup>১</sup> তীরে নামাইয়া স্নান-অভিষেক করানো হয়, পূজা অর্চনার শেষে স্থাপন করা হয় একটি নব-নির্মিত মঠে ।

আটজন প্রধান সন্ন্যাসী-শিষ্যের উপরে মধ্ব শ্রাস্ত করেন তাঁহার পরমপ্রিয় বালগোপালের অর্চনা, ভোগরাগ ও সর্ববিধ সেবাকার্যের ভার ।<sup>২</sup>

মধ্বের দীর্ঘজীবন ত্যাগ তিতিক্ষা ও তপস্তায় ভরা । দার্শনিক মতবাদের বিস্তার, ভক্তিধর্মের আন্দোলন এবং বৈষ্ণবগ্রন্থের রচনা<sup>৩</sup> ও প্রচারের মধ্য দিয়া ভারতের ধর্ম-সংস্কৃতির উপর তিনি দূরবিস্তারী প্রভাব রাখিয়া গিয়াছেন । তাঁহার উত্তর-সাধকেরাও তাঁহার দ্বৈত-

১ এই সরোবর আজো স্থানীয় জনসমাজে মধ্ব-সরোবর নামে পরিচিত ।

২ পরবর্তীকালে এই আটজন সন্ন্যাসী শিষ্য বিভিন্ন অঞ্চলে আটটি কৃষ্ণ-মন্দির প্রতিষ্ঠা করেন, এই আটটি মঠ আবার দুইটি করিয়া দ্বন্দ্বমঠ নামে পরিচিত হইয়াছে । উড়ুপীস্থিত মূল মধ্ব-মঠকে বলা হয়—উত্তরাধি মঠ । আচার্য্য মধ্বের পরে মূল মঠের অধ্যক্ষ হন তাঁহার মন্ত্রশিষ্য পদ্মনাভতীর্থ ।

৩ মধ্বের প্রধান গ্রন্থত্রয়ের নাম—গীতাভাষ্য, ব্রহ্মসূত্রভাষ্য, মহাভারত তাৎপর্য্যনির্ণয় । ইহা ছাড়াও আরো ৩৫টি ধর্মগ্রন্থ তিনি রচনা করিয়া গিয়াছেন ।

মতবাদ ও বৈষ্ণব আন্দোলনকে পরিপুষ্ট করার কাজে কম খ্যাতি অর্জন করেন নাই।<sup>১</sup>

আরব্ব ঈশ্বরীয় কণ্ঠের এক বিরাট অধ্যায় সমাপন করিয়া আচার্য্য একদিন অন্তরঙ্গ ভক্ত-শিষ্যদের কাছে ব্যক্ত করেন তাঁহার মর্তলীলায় ছেদটানার অভিপ্রায়। ১৩৫৩ খৃষ্টাব্দের শুক্লাবমী তিথি। এ সময়ে সরিদস্তুর নামক স্থানে প্রধান শিষ্যদের কাছে আচার্য্য ঐতরেয় উপনিষদের ভক্তিমূলক ব্যাখ্যা প্রদানে রত রহিয়াছেন। এই সময়ে লীলা অবসানের পরমমুহূর্তটি অগ্রসর হইয়া আসিল। ইষ্টধ্যানে সমাহিত হইয়া আচার্য্য মধ্ব শেষ নিঃশ্বাস ত্যাগ করিলেন, প্রবিষ্ট হইলেন ইষ্টধামের নিত্যলীলায়।

শুধু দাক্ষিণাত্যেরই নয়, সারা ভারতের আধ্যাত্মিক আকাশ হইতে ঘটিল এক ইন্দ্রপাত।

১ মধ্বমতাবলম্বী দার্শনিক ব্যালরাজের রচিত ‘জ্ঞানামৃত’—অষ্টমতবার বিরোধী এক প্রধান গ্রন্থ। উত্তরকালে ভারতবিশ্রুত মন্যমুখ্য নরসিংহীকে এই গ্রন্থের মুক্তিধ্বনে প্রচুর আয়াস স্বীকার করিতে হয়।

# সনাতন গোষ্ঠী

নীলাচল হইতে শ্রীচৈতন্য সে-বার নবদ্বীপে আসিয়াছেন। উদ্দেশ্য, জননীর চরণ দর্শন আর কিছুদিনের জ্ঞাপবিত্র গঙ্গাতীরে বাস। সে কাজ সাক্ষ হইয়াছে। এবার প্রাণ কাঁদিয়া উঠিয়াছে বৃন্দাবনের জ্ঞাপ। প্রাণগোবিন্দের লীলাভূমিতে গড়াগড়ি দিতে মন হইয়াছে উতল, যমুনায অবগাহনের লোভও হইয়া উঠিয়াছে ছুনিবার। প্রভু তাই সাক্ষোপাঙ্গসহ তাড়াতাড়ি ব্রজের দিকে ছুটিয়া চলিলেন।

কিন্তু একি বিচিত্র কাণ্ড? ঝাড়খণ্ডের পথে না গিয়া তিনি হঠাৎ উত্তরের দিকে বাদশাহ হুসেন শাহের রাজধানী গোড়ের দিকে চলিলেন কেন? তিনি কি পথ ভুলিলেন? অথবা কি আছে তাঁহার মনে, কে জানে?

কৃষ্ণপ্রেমে প্রভু গর্গর মাতোয়ারা। সঙ্গীদের অন্তরেও লাগিয়াছে এই প্রেমের ঢেউ। নৃত্য কীর্তনে সারা পথটি মুখর হইয়া উঠিয়াছে। আর এই দেবপ্রতিম সন্ন্যাসীর পিছে পিছে চলিয়াছে ভাবাকুল এক বৃহৎ জনতা। চলিতে চলিতে সেদিন প্রভুর এই দলটি আসিয়া উপস্থিত হয় গোড়ের উপকণ্ঠে, রামকেলীর অনতিদূরে।

রাত্রে প্রভু বিশ্রাম করিতেছেন। এমন সময় নিতান্ত দীনবেশে সেখানে সাক্ষাৎ করিতে আসিলেন স্থানীয় দুই কৃতী পুরুষ, দুই সহোদর ভ্রাতা। ধর্মনিষ্ঠা আর শাস্ত্রজ্ঞানের সহিত ভক্তি প্রেমের অপরূপ মিলন ঘটিয়াছে তাঁহাদের জীবনে।

যুক্তকরে, দস্তে তুণ নিয়া, উভয়ে প্রভুর চরণে লুটাইয়া পড়েন। ভক্তেরা পরিচয় করাইয়া দেন, “প্রভু, এঁরা দু’ভাই গোড়ের বাদশাহুসেন শাহের প্রধান অমাত্য। বড় ভাই হচ্ছেন অমরদেব। রাজকীয় উপাধি—দবীর খাস। আর ছোটভাই সন্তোষদেব, সাক্ষ মল্লিক বলে ইনি সরকারী মহলে পরিচিত। শাস্ত্রবিজ্ঞা,

ধর্মাচরণ ও দানধ্যানের খ্যাতি যেমন এঁদের আছে তেমনি আছে অর্থ, প্রতিষ্ঠা ও মান-মর্যাদা। কিন্তু সর্বোপরি রয়েছে সত্যকার কৃষ্ণভক্তি।”

প্রভুর চোখে মুখে ফুটিয়া উঠে প্রসন্নতার দীপ্তি। প্রবীণ ভক্ত অমর দেবকে সন্নেহে টানিয়া তোলেন, আবদ্ধ করেন প্রগাঢ় আলিঙ্গনে। মৃদু মধুর কণ্ঠে কহেন, “তোমার প্রেরিত পত্র আমি যথাসময়ে পেয়েছি, তার উত্তরও দিয়েছি। তোমরা ছুভাই যে কৃষ্ণ-কুপার মহা অধিকারী! তাইতো তোমাদের দর্শনে ছুটে এলাম। ত্যাগে আমার কুপাময় কৃষ্ণের কি অপূর্ব লীলা! ব্রজধামে যাবার জন্ত বেরিয়েছি, কিন্তু সোজা সেদিকে না গিয়ে অজ্ঞাত আকর্ষণে ছুটে এলাম এই অঞ্চলে। গোড়ে আসবার আমার কোন প্রয়োজনই নেই। এসে পড়েছি শুধু তোমাদেরই জন্ত।”

বৃন্দাবন যাত্রী প্রভুর পথভ্রান্তির মর্ম্ম এবার বুঝা গেল। ভক্তেরা নীরবে দাঁড়াইয়া একে অশ্রুর মুখ চাহিতে লাগিলেন।

প্রভুর একি অপার অনুগ্রহ, একি অহেতুকী কৃপা! অমরদেব ও সন্তোষদেবের নয়ন বাহিয়া ঝরিতে থাকে পুলকাক্ষর ধারা। পরিত্রাতা আজ স্বয়ং অযাচিতভাবে ছুয়ারে আসিয়া উপস্থিত। এষে তাঁহাদের কল্পনারও অতীত। কাল্মা আর আর্জিতে উভয়ে ভাঙ্গিয়া পড়েন।

চরণতলে পতিত হইয়া দৈন্ত্যভরে নিবেদন করেন, “প্রভু, কৃপা করে যদি এলেই, এবার তবে এই অধমদের উদ্ধার সাধন করো। তোমার ত্রীচরণের সেবক করে নাও। বিষয়-বিষে এ জীবন হয়ে উঠেছে দুঃসহ।”

হুই ভাইকে আশিস জানাইয়া ত্রীচৈতন্য কহিলেন, “ভয় নেই তোমাদের। অচিরে কৃষ্ণ তোমাদের কৃপা করবেন, তাঁর নিজ কর্ম্ম করবেন নিয়োজিত। তোমাদের যে আমি দেখছি কৃষ্ণের চিহ্নিত সেবকরূপে। আজ থেকে তোমাদের আমি নূতন নামকরণ করলাম।

অমর আর সন্তোষ—এখন থেকে পরিচিত হবে সনাতন আর রূপ নামে।”

প্রভুর সেদিনকার দর্শন ও স্পর্শন সনাতন ও রূপের জীবনে বিপ্লব ঘটাইয়া দেয়। তাঁহার আন্তরিক আশীর্বাদ হইয়া উঠে অমোঘ। উত্তরকালে ছই ভাই প্রসিদ্ধি লাভ করেন প্রভুর অন্ততম পার্শ্বদরূপে। সনাতন গোস্বামী নির্মাণ করেন গোড়ীয় বৈষ্ণবধর্মের সুদৃঢ় শাস্ত্রীয় ভিত্তি, স্থাপন করেন ভক্তিময় তপস্যার বলিষ্ঠ আদর্শ। আর তাঁহার অমুজ রূপ গোস্বামীর মাধ্যমে সাধিত হয় রাধাকৃষ্ণ লীলা-রসের পরিপুষ্টি ও বিস্তার—উদ্ঘাটিত হয় গোপীভক্তনের নিগূঢ় পদ্ধতি।

সনাতনের পূর্বপুরুষের জন্মভূমি দাক্ষিণাত্যে। চতুর্দশ শতকের মধ্যভাগে কর্ণাটদেশের পরাক্রমশালী নৃপতি ছিলেন সর্বজ্ঞ জগদগুরু। ইহার বংশধর রূপেশ্বরদেব এক সময়ে রাজ্যচ্যুত হইয়া গোড়দেশে আশ্রয় নিতে বাধ্য হন। শাস্ত্রবিজ্ঞা ও রাজকাৰ্য্য দুয়েতেই দেখা যাইত এই অভিজাত বংশের সমান পারদর্শিতা। ভাছাড়া, দাক্ষিণাত্যের বৈষ্ণবীয় সাধনার ধারাও ইহাদের জীবনে কিছুটা বহমান ছিল।

এই বংশের কুমারদেবের গৃহে ভূমিষ্ঠ হন তিন পুত্র—অমর, সন্তোষ ও বল্লভদেব। জ্যেষ্ঠ পুত্র অমর জন্মগ্রহণ করেন ১৪৬৫ খৃষ্টাব্দে; ইনিই উত্তরকালের বহু বিজ্ঞত বৈষ্ণবসাধক—সনাতন গোস্বামী। বৃন্দাবনের ধর্মজীবনের নিয়ন্তারূপে, মহাপ্রতিভাধর ভক্তিশাস্ত্রবিদ-রূপে তাঁহার খ্যাতি সারা ভারতে প্রচারিত হয়। আর গোড়ীয় সাধকসমাজে তিনি গণ্য হন প্রভু শ্রীচৈতন্যের জীবন-দর্শনের অন্ততম শ্রেষ্ঠ ভাষ্যকাররূপে।

সনাতনের পিতার নাম মুকুন্দদেব। গোড় রাজসরকারের এক উচ্চপদে তিনি নিয়োজিত ছিলেন এবং তাঁহার বাসস্থান ছিল দৌড়ের উপকণ্ঠস্থিত রামকেনীতে। ঐ স্থানটি কানাই-নাটশালা



নামেও সে সময়ে পরিচিত ছিল। মুকুন্দদেব নিজে ছিলেন ভক্তিমান সাধক। পূজা-পার্বণ, কৃষ্ণকীর্তন ও রামলীলার উৎসব অল্পষ্ঠানে তাঁহার প্রাসাদভবন সদাই থাকিত মুখরিত।

বালক পৌত্রদের লেখাপড়ার সুব্যবস্থা করিতে মুকুন্দদেব ক্রটি করেন নাই। সনাতন ও রূপের শিক্ষাদানের ভার পড়ে রামভদ্র বাণীবিলাস নামক পণ্ডিতের উপর। প্রাথমিক পাঠ সমাপ্ত হইলে ছই ভ্রাতাকে পাঠানো হয় তখনকার শ্রেষ্ঠ বিদ্যাকেন্দ্র নবদ্বীপে। সেখানে কয়েক বৎসরের মধ্যে নানা শাস্ত্রে তাঁহারা পারঙ্গম হইয়া উঠেন।

প্রথমে শিক্ষাগুরুর পদে বৃত্ত হন প্রখ্যাত পণ্ডিত বামুদেব সার্বভৌম। পরনতুনীকালে তাঁহার কনিষ্ঠ ভ্রাতা রত্নাকর বিদ্যা-বাচস্পতির টোলে থাকিয়া সনাতন ও রূপ শাস্ত্রের দুক্লহ তত্ত্বাদি অধ্যয়ন করেন। ছজনেই অসাধারণ মেধা ও প্রতিভার অধিকারী। তাই নবদ্বীপে থাকিতেই তাঁহাদিগকে সাহিত্য, ব্যাকরণ ও বিবিধ ধর্মশাস্ত্রে অসামান্য অধিকার অর্জন করিতে দেখা যায়।

কিন্তু সে যুগে সংস্কৃত সাহিত্য ও শাস্ত্র অধিগত করিলেই বৈষয়িক জীবনে উন্নতি সাধন করা যাইত না। বাদশাহের দরবারের ভাষা ছিল ফার্সী। এই ফার্সী ভালভাবে আয়ত্ত করিতে না পারিলে কোন দায়িত্বপূর্ণ কর্মে নিযুক্ত হওয়ার সম্ভাবনা ছিল না। পরিবারের কর্ত্তা তাই সনাতন ও রূপের ফার্সী শিক্ষার ভাল ব্যবস্থা করেন। সপ্তগ্রামে তাঁহাদের পাঠাইয়া দেওয়া হয়। সেখানকার মুসলমান শাসনকর্ত্তা ফকর উদ্দীন মুকুন্দদেবের বন্ধু। তাঁহার তত্ত্বাবধানে থাকিয়া উভয় ভ্রাতা ফার্সী ও আরবী বিশেষজ্ঞ মোল্লাদের কাছে পাঠ গ্রহণ করিতে থাকেন, অচিরে ঐ ভাষা ছইটি ভালভাবে আয়ত্ত করিয়াও ফেলেন।

ফার্সী ও আরবী সাহিত্যের ব্যুৎপত্তি কিন্তু সনাতন ও রূপের ব্যক্তিগত কৃষ্টি ও ধর্মপ্রচারণকে কোনদিন ব্যাহত করিতে পারে নাই।

রাজ-অমাত্যপদ তাঁহারা গ্রহণ করিয়াছেন, মুসলমান বাদশাহ ও আমীর ওমরাহদের সঙ্গে ঘনিষ্ঠতাও কম করেন নাই, কিন্তু নিজস্ব ধর্মীয় আচার-আচরণ ও ভাবধারাকে রক্ষা করিয়া চলিয়াছেন সতর্কভাবে।

তাঁহাদের রামকেলীর ভবন বরাবরই ছিল বিশিষ্ট সাহিত্যিক, শাস্ত্রবিদ ও ধর্মাচার্য্যদের মিলনস্থল। বিশেষ করিয়া শিক্ষক বিভাবাচম্পতি মহাশয়ের সহিত সনাতনের যোগ ছিল অত্যন্ত বেশী। এই ধর্মনিষ্ঠ আচার্য্যকে তিনি গুরুর মতই শ্রদ্ধা করিতেন। পরম সমাদরে প্রায়ই তাঁহাকে রামকেলীতে আমন্ত্রণ করিয়া আনা হইত। তাঁহার সহিত শাস্ত্র পাঠ ও ধর্মালোচনায় সনাতন দীর্ঘ সময় অতি-বাহিত করিতেন। উত্তরকালে চৈতন্যচরণে আশ্রয় নিবার পর হইতে সনাতনের শাস্ত্র পাঠের আগ্রহ কেন্দ্রীভূত হয় ভক্তিশাস্ত্রের দিকে।

বৃন্দাবনবাসের প্রথম যুগে পরমানন্দ ভট্টাচার্য্য নামক এক বিশিষ্ট ভক্তিসিদ্ধ আচার্য্যের কাছেও তিনি শিক্ষা গ্রহণ করেন এবং ভাগবত ও অষ্টাঙ্গ ভক্তিশাস্ত্রের নিগূঢ় তত্ত্ব হয় তাঁহার অধিগত।

পিতামহ মুকুন্দদেবের লোকান্তরের পর, তাঁহারই পদে সনাতন রাজসরকারে নিযুক্ত হন। তখন তাঁহার বয়স মাত্র আঠার বৎসর। তারপর ধীরে ধীরে নিজের প্রথর ব্যক্তিত্ব, বিচক্ষণতা ও কর্মনিষ্ঠার বলে পাঠান রাজ্যের অগ্রতম প্রধান অমাত্যের পদে উন্নীত হন।

রাজ্যের প্রতিরক্ষা, শাসন প্রভৃতি সমস্ত গুরুত্বপূর্ণ কার্য্যেই মূলতান হুসেন শাহকে সনাতনের পরামর্শ গ্রহণ করিতে দেখা যাইত। সনাতন ক্রমে বাদশাহের দক্ষিণহস্ত স্বরূপ হইয়া উঠেন; তাঁহার অনুজ্ঞা রূপ এবং অনুপমও তাঁহারই প্রভাবে উচ্চ রাজপদে নিযুক্ত হন।

তখনকার দিনে রামকেলীর দেবভাতাদের পদমর্যাদা, প্রভাব ও বিস্ত-বিভবের খ্যাতি ছিল অসাধারণ। তাঁহাদের প্রাসাদের চারিদিকে ছড়ানো ছিল বহুসংখ্যক মন্দির, মণ্ডপ ও নাটশালা। খ্যাত-

নামা হিন্দু বিদ্বজ্জন, আচার্য্য ও সাধু-সন্ন্যাসী মাঝেই রামকেলীতে সনাতনের সভাকক্ষে পদার্পণ করিতেন, গ্রহণ করিতেন তাঁহার সেবা ও পৃষ্ঠপোষকতা। সনাতন ও তাঁহার ভ্রাতাদের বদান্ধতায় দেশের দূর দূরান্তস্থিত শাস্ত্র-ব্যবসায়ী বহু ব্রাহ্মণ ও দীন দরিদ্র প্রতিপালিত হইত। এই সব কারণে রামকেলীর খ্যাতি ও সনাতনের প্রভাব প্রতিপত্তি সারা গৌড়দেশে ছড়াইয়া পড়ে।

সনাতন ছিলেন হুসেন শাহের দবীর খাস—একান্ত সচিব। তৎকালীন যে কোন শিক্ষিত, সম্ভ্রান্ত মুসলমানের মত তিনি ফার্সী ও আরবীতে অনর্গল কথা বলিতে পারিতেন। বিধর্ম্মী সুলতান এবং ওমরাহদের সামাজিক জীবন ও রীতিনীতির অনেক কিছু তাঁহাকে অনুসরণ করিতে হইত। গৌড় দরবার বা সুলতানের শিবিরে অবস্থান কালে তাঁহার বেশভূষা ও চালচলন দেখিয়া সাধারণ মানুষ তাঁহাকে ধরিয়া নিত মুসলমান ভাবাপন্ন বলিয়া। কিন্তু দিনান্তের কার্য্যশেষে রামকেলীতে গেলেই ফুটিয়া উঠিত তাঁহার আর এক রূপ। বাদশাহী দরবারের বাহ্য আচার-আচরণ, হাব-ভাব তিনি ত্যাগ করিতেন। স্নান তর্পণের পর শুরু হইত দানধ্যান, পূজা-অর্চনা, শাস্ত্রপাঠ ও ধর্ম্মীয় আলাপ-আলোচনা।

কিন্তু এত দানধ্যান, ধর্ম্মনিষ্ঠা ও দরবারী পদমর্যাদা সত্ত্বেও সনাতনের পরিবারের ভাগ্যে কিন্তু সামাজিক কোলিঙ্গ জুটে নাই। রক্ষণশীল হিন্দুসমাজের দৃষ্টিতে এই পরিবার ছিল পতিত—মুসলমানের ঘনিষ্ঠতা ও স্পর্শদোষের জন্য অবজ্ঞাত। এই জন্যই বঙ্গীয় কায়স্থদের কুসজীতে ইহাদের কোন উল্লেখ পাওয়া যায় না।

বিধর্ম্মীয় আচার-আচরণহীন সনাতন এতদিনে পাইয়াছেন প্রকৃত ক্রীচৈতন্যের চরিত দর্শন। সারা দেহ ও মনপ্রাণে আনিয়াছে দিব্য আনন্দের জোয়ার। প্রভুর এই দর্শনের পরে নূতন মানুষে তিনি হইয়াছেন রূপান্তরিত।

সনাতনের জীবনের এ পরিবর্তন শুরু হইয়াছে দীর্ঘদিন যাবৎ, অগ্রসর হইয়াছে প্রচ্ছন্ন ধারায়। বিস্তৃত বিষয় ও দরবারী মর্যাদার চাপে যে জীবন চাপা পড়িয়াছিল, আকুল হইয়া এতদিন তাহা কেবলি মাগিতেছিল বন্ধনমুক্তি। এবার সে মুক্তি সমাগত।

বাহ্যজীবনে সনাতন ছিলেন প্রভাবশীল রাজ-অমাত্য, আর অন্তরে দৈন্যময়, ত্যাগব্রতী মহাবৈষ্ণব। অন্তর্জীবনে তাই এতদিন ধীরে ধীরে জমিয়া উঠিতেছিল অধ্যাত্ম-সাধনার পরমসঞ্চয়, একান্ত-ভাবে গ্রহণ করিয়াছিলেন ভক্তি ও প্রেমধর্মের আদর্শ। তাঁহার এই গোপন প্রস্তুতিই সেদিন আকর্ষণ করিয়াছিল চৈতন্যদেবকে। স্নদূর রামকেলীতে প্রভু ছুটিয়া আসিয়াছিলেন। ভবিষ্যৎ জীবনের চিহ্নিত পার্শ্বদ ও লীলা-পরিকর সনাতন ও রূপ এই দুই তাইকে তিনি অবলীলায় করিয়াছিলেন আত্মসাৎ।

সনাতনের জীবন ছিল বৈষ্ণবীয় সাধনার জন্ত উন্মুখ, সদা ভক্তি-যুত। তাঁহার পক্ষে ইহা আকস্মিক কিছু নয়। এ মনোবৃত্তি ও সাধনধারা তাঁহার পূর্বপুরুষের মধ্যেও বর্তমান ছিল। বংশগত বৈশিষ্ট্যটিই অপক্লপ রূপে ফুটিয়া উঠিয়াছিল সাধননিষ্ঠ সনাতনের জীবনে। আর প্রভু শ্রীচৈতন্যের কৃপায় উত্তরকালে উহা লাভ করিয়াছিল চরম সার্থকতা।

হুসেন শাহের বড় প্রিয়পাত্র ছিলেন সনাতন। রাজ্যের জটিল কর্মের দায়িত্বভার তাঁহার উপর ছাড়িয়া দিয়া বাদশাহ নিশ্চিন্ত থাকিতেন। শুধু শাস্তির সময়েই নয়, যুদ্ধাভিযানে বাহির হইলেও হুসেন শাহ তাঁহার এই প্রতিভাধর অমাত্যকে সঙ্গে রাখিতেন। কিন্তু এই রাজাছত্রগ্রহ, এই দায়িত্বভার ও মর্যাদা ক্রমে ভারস্বরূপ হইয়া উঠে। বিষয়-কীট হইয়া দিন যাপন করা আর তাঁহার সহ্য হইতে চায় না। বাদশাহের সেনাধ্যক্ষেরা সে-বার নির্ধমভাবে উড়িয়া দেব-দেবীর মূর্তি ধ্বংস করে। ভক্ত সনাতনের হৃদয় বিদীর্ণ হয়। শুষ্ক হয় তাঁহার অন্তঃকরণের দহন। দিনের পর দিন ভাবিতে

থাকেন, একি পাষণ্ডীর জীবন তিনি যাপন করিতেছেন? সদাই অমুসন্ধান করিতে থাকেন উদ্ধারের উপায়।

রামকেলী ও তাহার আশেপাশে সনাতন গড়িয়া তুলিয়াছেন এক অপূর্ব ধর্মীয় পরিবেশ। অজস্র মঠ-মন্দির নির্মিত হইয়াছে, খনন করা হইয়াছে পবিত্র কুণ্ড। প্রায়ই তিনি দেশ-দেশান্তর হইতে এখানে আমন্ত্রণ করিয়া আনেন বিশিষ্ট শাস্ত্রবিদ ও ভক্ত সাধকদের। গোড় দরবারের কাজ শেষ হইলেই রামকেলীর ভক্তিময় পরিবেশে আসিয়া হৃদয়ের জ্বালা জুড়াইতে বসেন, সাধন-ভজনে রত হন।

এমনি পরিবেশে থাকিয়া সনাতনের জীবনে জাগিয়া উঠে ভক্তিপ্রেমের স্মৃতি চেতনা। রামকেলীতে তাঁহার নিজের তৈরী কৃষ্ণ-লীলাস্থলগুলি ঘুরিয়া ঘুরিয়া আহরণ করেন দিব্য আনন্দ।

বাড়ীর নিকটে অতি নিভৃত স্থানেতে

কদম্ব কানন ধারা শ্যামকুণ্ড তাতে।

বৃন্দাবনলীলা তথা করয়ে চিস্তন,

না ধরে ধৈর্য নত্রে ধারা অমুক্ষণ (ভক্তি রত্নাকর)

অতঃপর তীব্র আর্তি জাগে জীবনে, আর এই আর্তির মধ্য দিয়া নামিয়া আসে কৃষ্ণপ্রেমের রসস্রোত। সংসারের বিস্ত-বিভব, যশ মান সব কিছু নিরর্থক হইয়া উঠে। আকুলভাবে চিন্তা করিতে থাকেন—কোন পথে, কাহার নির্দেশে মিলিবে বহুবাস্তিত কৃষ্ণ দর্শন? কবে অপ্রাকৃত লীলারসে অবগাহন করিবেন? কবে এ জীবন হইবে কৃতকৃতার্থ?

এমনি সময়ে সনাতনের কাণে পৌছিল প্রভু শ্রীচৈতন্যের কথা। নীলাচলে তাঁহার অভ্যুদয় ঘটিয়াছে। প্রেমভক্তির প্রবল রসতরঙ্গে তিনি ভাসাইয়া নিতেছেন অগণিত ভক্ত সাধককে। এই তরঙ্গের ঢেউ সেদিন সনাতনেরও হৃদয়তটে আসিয়া আঘাত করে। জাগিয়া উঠে পরম উপলব্ধি—এই প্রভুই যে জীবের উদ্ধারকর্তা। আর ইনি যে তাঁহারই জীবনপ্রভু।

আকুল আবেদন জানাইয়া সনাতন শ্রীচৈতন্যকে পত্র দিলেন—  
“প্রভু, তুমি আবিস্কৃত হয়েছো জীবের উদ্ধারের জন্ত। একট্রিবার  
আমার মত অধমজনের প্রতি কৃপা দৃষ্টিপাত করো। আমি একে  
বিষয়-কীট, তত্পরি স্লেচ্ছাচারী—পতিত। আমার মুক্তির কি কোন  
উপায় নেই? মনে প্রবল ইচ্ছা জেগেছে, এ ঘৃণ্য সংসারজীবন  
ত্যাগ করবো। আমায় অনুমতি দাও, তোমার চরণতলে নিজেকে  
উৎসর্গ করি, সারা জীবন কাটিয়ে দিই তোমার দিব্য মুখচন্দ্র  
নিরীক্ষণ করে।”

নীলাচলের অন্তরঙ্গ ভক্তেরা প্রভুকে এই দৈন্যময় পত্র দিলেন।  
কহিলেন, “গৌড়ের বাদশাহ, দোদ্দিগু-প্রতাপ হুসেন শাহের  
ইনি প্রধান অমাত্য। রাজনৈতিক ও প্রশাসনিক কৰ্ম্মকুশলতার  
দিক দিয়ে এঁর জুড়ি নেই। এমন মানুষও তোমার নর্ভনে কীর্ভনে  
পাগল হয়ে উঠেছে; রাজৈশ্বর্য ছেড়ে দিয়ে তিখারী হতে চাচ্ছে—  
এ তো তোমার অলৌকিক কৃপালীলা ছাড়া আর কিছু নয়, প্রভু।”

প্রভুর অধরে যুহু মধুর হাসি দেখা দেয়। বার্তাবহের হস্তে  
তখনি তিনি এক পত্র প্রেরণ করেন। এ পত্রে আর কোন কথা  
নাই, আছে শুধু একটি মাত্র শ্লোকের উদ্ধৃতি—

পরব্যসিনি নারী ব্যগ্রাপি গৃহকর্ম্মসু। তদেবাস্বাদয়ত্যন্তনবসজ  
রসায়নং ॥

অর্থাৎ, পরপুরুষে আসক্তা কোন নারী যেমন গৃহকর্ম্মে থেকেও  
প্রেমিকের স্মৃতি সদাই ধরে রাখতে পারে, তেমনি বিষয়ে লিপ্ত  
থেকেও চিন্তকে ডুবিয়ে রাখা যায় তাঁর প্রেম-রসে।

সনাতন মহাপণ্ডিত ব্যক্তি, সর্ব্ব দর্শন ও অধ্যাত্মতত্ত্বে পারদ্রম।  
তাই প্রভু তাঁহাকে ইচ্ছা করিয়াই স্বামী বিজ্ঞানেশ্বর সুপ্রসিদ্ধ ঐহ  
পঞ্চদশী হইতে ঐ শ্লোকটি লিখিয়া পাঠান।

প্রভুর এই শ্লোকপত্রের ইজিত পরিকার। সনাতন বুঝিলেন,  
মিলনলয় এখনো উপস্থিত হয় নাই, তাই প্রভু তাঁহার সাধুনের অল্পমোহ

কৌশলে এড়াইয়া গেলেন। হৃদয়ের আগুন চাপিয়া রাখিয়া এখনো কিছুদিন তাঁহাকে সংসারে বাস করিতে হইবে।

প্রভুর কাছ হইতে ঐ পত্র পাইবার পর হইতে সনাতনের ব্যাকুলতা আরো বাড়িয়া যায়। দিনের পর দিন অতিবাহিত হয় করুণ আর্তি ও কান্নায়।

অবশেষে এই সেদিন রামকেলীতে বসিয়া প্রভুর কৃপা মিলিল। সুদূর পুরীধাম হইতে ছুটিয়া আসিয়া নিজে যাচিয়া সনাতনকে তিনি দর্শন দিলেন। সংসার ত্যাগের অমুমতি সেদিন না মিলিলেও তাঁহার প্রেমস্পর্শ ও আশ্বাসবাণী প্রাপ্ত হইয়া সনাতনের তাপিত হৃদয় কতকটা শান্ত হইল।

সনাতন ও রূপের নিকট বিদায় নেওয়া হইয়াছে, শ্রীচৈতন্য এবার বৃন্দাবনের দিকে রওনা হইবেন। তাঁহার নয়নাভিরাম রূপ, নর্তন-কীর্তন ও ভাবাবেশ এই কদিনের মধ্যেই সমগ্র অঞ্চলে আনিয়া দিয়াছে প্রাণচাক্ষু্য। অগণিত নরনারী ভীড় করিয়াছে এই পুণ্য-দর্শন দেব-মানবের আশেপাশে। তাহাদের অনেকেই প্রভুর সঙ্গী হইতে ব্যগ্র।

সনাতন বিচক্ষণ ও দূরদর্শী; ব্যাপার দেখিয়া তিনি প্রমাদ গণিলেন। উত্তর-পূর্ব ভারতের বিভিন্ন অঞ্চল তখন রাজনৈতিক ঝড়-ঝাপ্টা চলিতেছে। এ সময়ে এত লোক সঙ্গে নিয়া চলিলে প্রভুর বিপদ হইতে পারে।

করজোড় তিনি নিবেদন করেন, “প্রভু, বৃন্দাবনেই যদি যাবে, এত লোক কেন সঙ্গে নিচ্ছে? আজকাল রাজা বাদশাহদের দ্বন্দ্ব সংঘর্ষ চলছে চারদিকে। এসময়ে জনসম্মুখিত্ত নিয়ে চলা মোটেই যুক্তিযুক্ত হবে না। তাছাড়া প্রভু, বৃন্দাবনে তো একান্তে কাঙাল বেশেই যেতে হয়।”

প্রবীণ রাজ-অমাত্য সনাতনের কথাগুলি যুক্তিযুক্ত। আবার ভক্তবৃন্দকে সন্তুষ্ট এবং নিরাশ করিতেও প্রভুর মন সায় দেয় না।

অগত্যা বৃন্দাবন-যাত্রা ত্যাগ করিয়া রওনা হইলেন শান্তিপুর অভিমুখে। সনাতন হাঁফ ছাড়িয়া বাঁচিলেন।

প্রভুর রামকেলীতে আগমন ও দর্শনদান যেন সনাতন ও রূপের নবজন্মের উন্মেষ। তাঁহার অলৌকিক শক্তির প্রভাবে উভয়ের জীবনে আসিয়াছে কৃষ্ণপ্রেমের নূতন জোয়ার। এই জোয়ারের উচ্ছ্বাসে তাঁহারা এবার ভাসিয়া চলিলেন।

অনতিবিলম্বে রামকেলীর প্রাসাদে বিশিষ্ট একজন শাস্ত্রজ্ঞ বৈষ্ণব সাধককে আমন্ত্রণ করিয়া আনা হইল। সনাতন ও রূপ তাঁহার সাহায্যে ভক্তিভরে কৃষ্ণমন্ত্ৰের পুরস্চরণ করিলেন। রাজকর্ম্ম এখন তাঁহাদের কাছে দ্বর্ভহ ভারস্বরূপ। যত তাড়াতাড়ি ইহা হইতে নিষ্কৃতি পাওয়া যায় ততই মঙ্গল।

উভয় ভ্রাতার মধ্যে সেদিন গভীর রাত অবধি গোপন পরামর্শ চলে। সিদ্ধান্ত স্থির হয়, রূপ আগে গৃহত্যাগ করিবেন, আর সনাতন বহির্গত হইবেন কিছুদিন পরে।

সনাতনের উপর বাদশাহের বহু দায়িত্বপূর্ণ কাজ হস্ত রহিয়াছে, তিনি অকস্মাৎ এখনি পদত্যাগ করিলে সারা দেশে চাঞ্চল্য পড়িয়া যাইবে, রাজকার্য্যে দেখা দিবে নানা বিশৃঙ্খলা। কাজেই তাঁহার নিষ্ক্রমণ সঙ্গত নয়। রাজকীয় দায়িত্বের বোঝা কিছুটা হালকা করিয়া তবেই তিনি স্নযোগমত একদিন সরিয়া পড়িবেন।

সনাতন ও রূপের আশ্রিত ব্রাহ্মণ পণ্ডিত ও সাধু সঙ্জনদের সংখ্যা নিতান্ত কম নয়। ইহাদের এবং আত্মীয়স্বজনদের ভরণ-পোষণের মোটামুটি ব্যবস্থার জন্ত রূপ তখনই তৎপর হইলেন। অল্প দিনের মধ্যে একাজ সম্পন্ন হইয়া গেল এবং পূর্ব পরিকল্পনা অনুযায়ী রূপ চিরতরে করিলেন গৃহত্যাগ।

বাণ্যার আগে তিনি বিশ্বস্ত এক মুদির কাছে দশ হাজার টাকা



গচ্ছিত রাখিয়া গেলেন। কথা রহিল, জরুরী প্রয়োজন উপস্থিত হইলে সনাতন এই অর্থ তাঁহার কাজে লাগাইবেন।

রূপের নিষ্কমণের পর সনাতন আরো নিঃসঙ্গ হইয়া হইয়া পড়েন। বিষয়বিতৃষ্ণা চরমে উঠে। ক্রমে দরবারে যাতায়াতও বন্ধ হইয়া যায়। বাদশাহকে খবর পাঠান—তিনি অত্যন্ত গীড়িত, এখন হইতে স্বাভাবিকভাবে রাজসেবা সম্পন্ন করা তাঁহার পক্ষে আর সম্ভব হইবে না।

হুসেন শাহ বড় সন্দিগ্ধ হইয়া উঠেন। রূপ ইতিমধ্যে কাজকর্ম ছাড়িয়া কোথায় উধাও হইয়াছেন। দবীর খাসও তেমনি কোন মতলব আঁটে নাই তো? রাজ্যের চারিদিকে যুদ্ধবিগ্রহের মেঘ ঘনাইয়া আসিতেছে, ঠিক এসময়ে তাঁহার মত একজন বিশ্বস্ত ও কুশলী অমাত্য কর্মত্যাগ করিয়া বসিয়া থাকিলে যে মহাবিপদের কথা।

রাজবৈজ্ঞ প্রেরিত হইল সনাতনকে পরীক্ষা করার জন্ত। বৈজ্ঞ ফিরিয়া আসিলেন, মুচকি হাসিয়া জানাইলেন, “দবীর খাস শারীরিক বেশ সুস্থই আছেন, তাঁর জন্ত জাহাঁপনার চুশ্চিস্তার কোন কারণ নেই।”

হুসেন শাহ তো চটিয়া আগুন। পরদিনই তিনি অত্যন্ত সনাতনের রামকেলী-প্রাসাদে স্বয়ং উপস্থিত হন। দেখেন, দবীর খাসের দেহে রোগের চিহ্নমাত্র নাই, সাধু-সন্ন্যাসী ও শাস্ত্র-বিদদের দ্বারা পরিবৃত্ত হইয়া পরমানন্দে তিনি ধর্ম্মালোচনায় রত রহিয়াছেন।

বাদশাহ তাঁহাকে কার্য্যে যোগদানের জন্ত গীড়াগীড়ি করিলেন। অবশেষে ভীতি প্রদর্শন করিতেও ছাড়িলেন না। কিন্তু সনাতন তাঁহার সম্বন্ধে অটল। গোড়েন্থরের বদলে পরমেশ্বরের আসন

স্থাপিত হইয়াছে তাঁহার জীবনে, কোন চাওয়া-পাওয়ার প্রয়োজনই যে আজ আর তাঁহার নাই।

দৃষ্টিতে স্পষ্ট ভাষায় তিনি হুসেন শাহকে কহিলেন, “জাহাঁপনা, সত্য কথা বলতে কি, দরবারের কাজে আমি যোগদান করবো না বলেই স্থির করেছি। এখন থেকে আমি কেবলমাত্র শ্রীভগবানের দাস, আর কারুর নই। আমার এ সঙ্কল্প অপরিবর্তনীয়। আমায় আপনি মার্জনা করুন।”

ক্রুদ্ধ হইয়া বাদশাহ তখন সনাতনকে কারাগারে নিক্ষেপ করিলেন।

কিছুদিনের মধ্যেই রাজ্যে দেখা দিল এক জরুরী পরিস্থিতি। হুসেন শাহের সেনাপতি ইতিপূর্বে উড়িষ্যার যুদ্ধে পরাস্ত হইয়া ফিরিয়া আসিয়াছেন। এবার তিনি নিজেই সসৈন্তে রাজ্য প্রতাপরুদ্রের বিরুদ্ধে অগ্রসর হইতে চাহেন। প্রয়োজনীয় সব ব্যবস্থা প্রায় সমাপ্ত হইয়াছে। কিন্তু এসময়ে সনাতনের মত তীক্ষ্ণদী ও বিচক্ষণ অমাত্যের সাহায্য যে তাঁহার পক্ষে অপরিহার্য।

কারাগৃহ হইতে আনাইয়া বার বার সনাতনকে বুঝাইতে লাগিলেন, “দবীর খাস, এখনো তুমি তোমার পাগলামী ছাড়ো। আবার নিজের দায়িত্বপূর্ণ কাজে এসে যোগ দাও। আমার অনুরোধ শোন, আমার সঙ্গে তুমি উড়িষ্যা অভিযানে চল।”

সনাতন চরম কথা শুনাইয়া দিলেন,—“আপনার অভিযানের দৃষ্টে আমি মানসপটে চমৎকার দেখতে পাচ্ছি, জাহাঁপনা। আপনার সেনাবাহিনী সারা পথের দেবমন্দির ধ্বংস করবে, পবিত্র বিগ্রহ করবে কলুষিত। না—কোন মতে আমি আপনার এ পাপকার্যের সঙ্গী হতে পারবো না।”

অমাত্যকে তখন আবার কারাগারে প্রেরণ করিয়া হুসেন শাহ প্রতাপরুদ্রের বিরুদ্ধে যুদ্ধযাত্রা করিলেন।

সনাতনের এখন একমাত্র লক্ষ্য—কি করিয়া তিনি মুক্তিলাভ করিবেন, মিলিত হইবেন প্রাণপ্রভু শ্রীচৈতন্যের সঙ্গে ।

হঠাৎ সেদিন রূপের প্রেরিত এক পত্র গোপন পথে তাঁহার নিকট পৌঁছিল । তাহাতে নির্দেশ দেওয়া আছে— স্থানীয় মুদির কাছে যে টাকা গচ্ছিত আছে, তাহা হইতে, সনাতন যেন এই পত্র দেখাইয়া, সাত হাজার টাকা গ্রহণ করেন এবং উহা দ্বারা ক্রয় করেন নিজের মুক্তি ।

প্রভুর সহিত মিলনের জন্ত সনাতন উন্মত্তপ্রায় হইয়া উঠিয়াছেন । তাই উপায়ান্তর অভাবে কারামুক্তির জন্ত সেদিন রূপের প্রস্তাবিত পথই তাঁহাকে বাছিয়া নিতে হইল । রক্ষীকে উৎকোচে বশীভূত করিয়া তিনি বাহির হইয়া আসিলেন ।

শ্রীচৈতন্য এসময়ে বৃন্দাবনের পথে বারাণসীতে আসিয়া অবস্থান করিতেছেন । সনাতন আর এক মুহূর্ত্ত বিলম্ব না করিয়া পশ্চিম ভারতের দিকে ধাবিত হইলেন । সঙ্গে চলিল বহু দিনের বিখস্ত ভূত্য দৈশান ।

মুক্তির অমোঘ আহ্বান আসিয়া গিয়াছে সনাতনের জীবনে । এই মুক্তির জন্ত চরমতম মূল্য দিতে তিনি আজ প্রস্তুত । ধন মান রাজসম্পদ সব কিছু অবলীলায় ত্যাগ করিয়া, নিষ্কিঞ্চন মুমুকু সাধক ব্রহ্মপদে ছুটিয়া চলিলেন ।

বাদশাহের বক্ষীরা তাঁহাকে অনুসরণ করিতে পারে, এ আশঙ্কা যথেষ্টই রহিয়াছে । তাই পথ চলিতে লাগিলেন দীন দরিদ্র দরবেশের ছদ্মবেশে ।

পথ চলিতে চলিতে সেদিন এক ক্ষুদ্র ভূঁইয়ার অধিকারে তাঁহারা আসিয়া পড়িয়াছেন । কোন পরিচয় নাই, কিন্তু সাক্ষাৎ মাত্রেই ভূঁইয়া তাঁহাদের মহাসমাদর শুরু করিয়া দিল, যেন সে কত দিনের বান্ধব ।

এই আতিশয্য দেখিয়া সনাতন কিন্তু সন্দেহ হইয়া উঠিলেন । এই

শ্রেণীর ভুঁইয়াদের কুকীর্তির কথা আগেই কিছু কিছু তাঁহার শোনা ছিল। ইহারা বিদেশী পর্য্যটকদের আশ্রয় দেয়, প্রচুর আদর-যত্ন করে, তারপর রাত্রিযোগে সুযোগমত যথাসর্ব্বশ্ব লুণ্ঠন করিয়া করে হত্যা। সনাতনের নিজের জ্ঞান চিন্তা নাই। তিনি তো কপর্দকহীন। কিন্তু ঈশান ? সে তো অর্থাৎ লুকাইয়া রাখে নাই ?

চাপে পড়িয়া ঈশান স্বীকার করিল—সাতটি মোহর সে সংগোপনে নিজের কাছে রাখিয়াছে। প্রয়োজন হইলে সনাতন বা তাহার নিজের কাছে এগুলি ব্যবহার করা হইবে, ইহাই ছিল উদ্দেশ্য।

সনাতন ক্রোধে জ্বলিয়া উঠিলেন, কঠোর ভাষায় ভৃত্যকে তিরস্কার করিয়া কহিলেন, “সর্ব্বশ্ব ত্যাগ করে, বৈরাগ্যসাধন নিয়ে, আমি পথে বেরিয়েছি। আর তুমি আমার সেই সাধনার পথে স্ফুট করেছো এমনিতর বিদ্রোহ ! ছি—ছি !”

তখন ভুঁইয়ার সমীপে গিয়া কহিলেন, “আমার সঙ্গীর কাছে সাতটি সঞ্চিত মোহর রয়েছে। এগুলো আপনি গ্রহণ করুন, আর আমাদের নিরাপদে পার করে দিন সামনের ঐ দুর্গম পাহাড়।”

সনাতনের সততায় ও সত্যভাবে অর্থগৃহ্ন ভুঁইয়া খুব খুশী। তখন সে নিজে সঙ্গে করিয়া অতিথিদ্বয়কে সেখানকার বিপজ্জনক অঞ্চল পার করিয়া দিল।

ভুঁইয়া প্রস্থান করিলে ঈশান কথা প্রসঙ্গে কহিল, “হজুর, একটা কথা আপনার কাছে গোপন করে আমি আরো অপরাধী হয়েছি। আমার কাছে আসলে আটটি মোহর ছিল। ভুঁইয়াকে সাত মোহর দিয়ে দেবার পর আর একটি মোহর অবশিষ্ট রয়েছে। মিথ্যা বলার জ্ঞান আপনার কাছে আমি মাপ চাইছি।”

সনাতনের আনন মুহূর্ত্তে কঠোর হইয়া উঠে। দৃঢ়স্বরে কহেন, “ঈশান, আমার অনুসরণ করা তোমার ঠিক হবে না। এখনো অর্থের ওপর তোমার প্রবল আকর্ষণ রয়েছে। অর্থের উপর নির্ভর করেই তুমি চলতে চাও। আর আমি নিয়েছি বৈরাগ্য সাধনের

কঠিন পথ; একান্তভাবে নির্ভর করতে চাই ভগবানের উপর। নিষ্কিঞ্চন হয়ে জীবন যাপন না করলে আমি আমার ব্রত থেকে চ্যুত হবো। তুমি এখনি আমার কাছ থেকে বিদায় নিয়ে চলে যাও।”

মনিবকে প্রণাম করিয়া ঈশান সাশ্রনয়নে রামকেলীতে প্রত্যাবর্তন করিল।

দ্রুতপদে পথ চলিতে চলিতে সনাতন সেদিন শোনপুরে আসিয়া উপস্থিত। সেখানে তখন হরিহরছত্রের মেলা অনুষ্ঠিত হইতেছে। হঠাৎ মেলাক্ষেত্রে তাঁহার সাক্ষাৎ ঘটে ভগিনীপতি শ্রীকান্তের সঙ্গে। সনাতনেরই কৃপায় শ্রীকান্ত রাজসরকারের দায়িত্বপূর্ণ পদে অধিষ্ঠিত আছেন। ছত্রের মেলায় তিনি আসিয়াছেন বাদশাহের জ্ঞাত কয়েক লাখ টাকার ঘোড়া কিনিতে।

বহু অমুনয়-বিনয়েও শ্রীকান্ত সনাতনকে তাঁহার বৈরাগ্যের পথ হইতে বিচ্যুত করিতে পারিলেন না। শেষটায় ধরিয়া বসিলেন, “বেশ, যদি ঘর ছেড়ে যেতেই হয়, ভিখারীর বেশে যেতে দেবো না। অল্পমতি দিন, আমি আপনাকে কিছু নূতন পরিচ্ছদ কিনে দিই।”

সনাতন দৃঢ়স্বরে এ প্রস্তাব প্রত্যাখ্যান করিলেন। অগত্যা শ্রীকান্ত ধরিয়া বসিলেন, “এখন তো প্রচণ্ড শীত পড়েছে পশ্চিমে একখণ্ড ভোটকম্বল আপনাকে নিতেই হবে, নতুবা পথে যে কষ্টের অবধি থাকবে না।”

ভগিনীপতির নির্ব্বন্ধাতিশয্যে সনাতনকে ঐ কম্বলটি গ্রহণ করিতে হইল। সেটি কাঁধে ফেলিয়া আবার তিনি শুরু করিলেন পদযাত্রা। কয়েকদিন অবিরাম পথ চলার পর উপনীত হইলেন বারাণসীধামে।

বারাণসীতে পৌঁছিয়াই যে স্নানবাগিচা সনাতন গুনিলেন, তাহাতে তাঁহার আনন্দের অবধি রহিল না। প্রাণপ্রভু শ্রীচৈতন্য কিছুদিন

যাবৎ এখানেই অবস্থান করিতেছেন। তাঁহার নর্ভন-কীর্তনে কানীর তন্তসমাজে এক প্রচণ্ড সাড়া পড়িয়া গিয়াছে।

চন্দ্রশেখর মিশ্রের গৃহে প্রভু তখন অবস্থান করিতেছেন। দীনবেশে যুক্তকরে সনাতন মিশ্রের দ্বারে আসিয়া দাঁড়াইলেন।

গৃহের অভ্যন্তরে বসিয়া প্রভু ভক্তদের সঙ্গে ইষ্টগোষ্ঠী করিতেছেন। হঠাৎ চন্দ্রশেখর মিশ্রকে কহিলেন, “মিশ্র, আজ বড় শুভদিন। বাইরে গিয়ে ছাখো, তোমার দ্বারে সমাগত হয়েছেন এক মহাবৈষ্ণব। এখনি পরম সমাদরে তাঁকে আমার কাছে নিয়ে এসো।”

ভক্তেরা ত্রস্তব্যস্তে বাহিরে ছুটিয়া আসিলেন। কিন্তু কই, কোন বৈষ্ণব মূর্তি তো সেখানে নাই? ছয়ারে দণ্ডায়মান ছিন্নবাস পরিহিত এক দরবেশ। কণ্ঠিমালী, তিলক বা বৈরাগীর উত্তরীয় কোন কিছুই তাঁহার নাই। প্রভু অপর কাহারো কথা বলেন নাই তো!

কিছুক্ষণ ইতস্ততঃ করার পর চন্দ্রশেখর মিশ্র দরবেশ-বেশী সনাতনকে বাড়ীর ভিতরে নিয়া গেলেন।

প্রভুর দর্শন পাওয়া মাত্র সনাতনের ভাবাবেগ উথলিয়া উঠিল। ছুটিয়া গিয়া সাষ্টাঙ্গে তাঁহার চরণে প্রণত হইলেন। প্রাণপ্রিয় ভক্তের আগমনে প্রভুরও আনন্দের আর অবধি নাই। ভাবাবেগে সারা দেহ কম্পিত হইতেছে, নয়নে বহিতেছে পুলকাক্ষ। ভুলুষ্ঠিত সনাতনকে সহজে তুলিয়া ধরিয়া তখন আলিঙ্গনাবদ্ধ করেন।

দৈন্ত্রভরে সনাতন সরিয়া দাঁড়ান। কাতর স্বরে কহেন, “প্রভু, আমি অতি নীচ, হীনাচারী, তোমার দেবহর্ষত অঙ্গ দিয়ে আমায় এভাবে আর স্পর্শ করো না।”

চিহ্নিত লীলা-পার্বদ এতদিন পরে আজ প্রভুর চরণে আত্মসমর্পণ করিলেন। এ আনন্দ রাখার তাঁহার যে আর ঠাই নাই। প্রেমাবেগে বার বার সনাতনকে বক্ষে জড়াইয়া ধরিলেন—

প্রভু কহে তোমা স্পর্শি আত্ম পবিত্রিতে।

ভক্তি বলে পার তুমি ব্রহ্মাণ্ড শোধিতে।

অতঃপর প্রেমার্ককণ্ঠে সকলের কাছে সনাতনের নিগূঢ় পরিচয় জ্ঞাপন করিলেন, তাঁহার ত্যাগ ভিত্তিকা ও বৈরাগ্য সাধনের প্রশস্তি গাহিতে লাগিলেন উচ্ছ্বসিত কণ্ঠে।

মধ্যাহ্ন সমাগত। প্রভু কহিলেন, “সনাতন, বেলা অনেক হয়েছে। এবার তাড়াতাড়ি পতিতপাবনী গঙ্গার পুণ্য ধারায় স্নান তর্পণ সমাপন করে এসো। তারপর ভিক্ষা গ্রহণ করো।”

মিষ্ণুগৃহ হইতে একখণ্ড পুরাতন বস্ত্র সনাতন চাহিয়া নিলেন। উহা দ্বিখণ্ডিত করিয়া তৈরী করিলেন নিজের কৌপীন ও বহির্ব্বাস।

স্নানের ঘাট হইতে ফিরিয়া আসিতেই এক মারাঠী ব্রাহ্মণ সনাতনকে তাঁহার গৃহে ভোজনের নিমন্ত্রণ জানানাইলেন।

কিন্তু সনাতন তাহাতে সম্মত নন। কৃচ্ছ্রব্রত ও কাঙালের জীবনকেই যে তিনি পরম পথের প্রস্তুতি হিসাবে আজ প্রাণপণে আঁকড়িয়া ধরিয়াছেন। সারা জীবন কাটিয়াছে বাদশাহী দরবারের ভোগ-বিলাস ও ঐশ্বর্য্যের চাকচিক্যের মাঝখানে। তাইতো বৈষয়িকতার সূক্ষ্মতম অঙ্গুরটিকে নিঃশেষে দগ্ধ না করা অবধি তাঁহার স্বস্তি নাই। চরম বৈরাগ্যের মধ্য দিয়া পৌঁছিবেন কৃষ্ণ অমুরাগের মহাসমুদ্রে, ইহাই যে তাঁহার অভীক্ষা।

যুক্তকরে সনাতন নিবেদন করিলেন, “আপনারা আশীর্ব্বাদ করুন, নিষ্কিঞ্চন বৈষ্ণব হয়ে গৃহে গৃহে মাধুকরী করেই যেন আমি দিনাতিপাত করতে পারি।”

ভোট-কম্বলটি স্বন্ধে নিয়া, ভিক্ষার বুলি হস্তে সনাতন উঠিয়া দাঁড়াইলেন। এবার বাহির হইবেন দ্বারে দ্বারে ভিক্ষা মাগিতে।

প্রভু তো মহা উল্লসিত, বার বার গদগদ কণ্ঠে সবাইকে কহিতে লাগিলেন, “ছাখো ছাখো, সনাতনের কি অপূর্ব্ব বৈরাগ্য সাধন।”

প্রভু আনন্দ প্রকাশ করিতেছেন বটে, কিন্তু এই সঙ্গে তীক্ষ্ণ দৃষ্টিতে ঘন ঘন চাহিতেছেন সনাতনের স্বক্কাঙ্ক্ষিত ভোট-কম্বলটির দিকে।

তাঁহার এই দৃষ্টির গূঢ় তাৎপর্য্য বুঝিতে সনাতনের দেহী হইল না।

যুহুর্থে নিজ সিদ্ধাস্ত তিনি স্থির করিয়া কেলেদ, ছুটিয়া যান গজতীরে ।  
দীন দরিদ্র এক বৃদ্ধ নিকটস্থ ঘাটে বসিয়া তাহার জীর্ণ কাঁথাটি রৌদ্রে  
শুক করিতেছে । সনাতন তাহারই শরণ নিলেন । মিনতি করিয়া  
কহিলেন, “তাই, তুমি দয়া করে আমার একটা উপকার করো ।  
আমার এই নূতন কস্থলটির বদলে তোমার ঐ ছেঁড়া কাঁথাখানি  
আমায় দাও । এজন্ত চিরকৃতজ্ঞ থাকবো তোমার কাছে ।”

সংশয় ও সন্দেহে বৃদ্ধের ভ্রু কুঞ্চিত হইয়া উঠে । নূতন ভোট-  
কস্থলের বদলে এই অব্যবহার্য্য কাঁথা ? এ আবার কি অদ্ভুত  
প্রস্তাব ? এই বৈরাগীর মনে কোন অভিসন্ধি নাই তো ? না কি  
এ তাহার পরিহাস !

বহুক্ষণ নানাভাবে বুঝাইয়া সনাতন লোকটিকে রাজী করান ।  
তারপর মহাপ্রসন্ন মনে জীর্ণ কাঁথা গায়ে জড়াইয়া ফিরিয়া আসেন  
প্রভুর সমীপে ।

প্রভুর চোখে মুখে ফুটিয়া উঠে অপার আনন্দের দীপ্তি । বিশ্বায়ের  
ভান করিয়া জিজ্ঞাসা করেন, “একি সনাতন ! তোমার সেই ভোট-  
কস্থলটি কোথায় হারিয়ে এলে ?”

কস্থল বর্জনের কাহিনী শুনিয়া প্রভু আনন্দে ডগমগ । এই তো  
চাই । তাঁহার সনাতন যে লোকগুরু হওয়ার জন্ত আবির্ভূত । যে  
ভক্তি সাত্ত্বাজ্যের পন্থন প্রভু করিতেছেন তিনি যে তাহার অশ্রুতম  
নিয়ামক রূপে আগে হইতেই চিহ্নিত হইয়া আছেন । তাই তো  
লোকশিক্ষার জন্ত সনাতনের জীবনে প্রকটিত হওয়া প্রয়োজন ত্যাগ  
বৈরাগ্যের পরাকাষ্ঠা ।—

প্রভু কহে ইহা আমি করিয়াছি বিচার ।

বিষয় রোগ খণ্ডাইল কৃষ্ণ যে তোমার ।

সে কেন রাখিবে তোমার শেষ বিষয় ভোগ ।

রোগ খণ্ডি সঙ্কল্প না রাখে বিষয় রোগ ।

হসেন শাহের প্রধান অমাত্যের এই সর্বব্যাপী মহাবৈরাগীর



রূপটি শ্রীচৈতন্য সেদিন ইচ্ছা করিয়াই সর্বজন সমক্ষে প্রকটিত করিলেন। বৈষ্ণব সাধকসমাজের সম্মুখে রাখিয়া গেলেন কচ্ছুবরণ ও দৈন্যময়তার এক কালজয়ী আলোচ্য।

বারাণসীতে প্রভুর কাছে সনাতন এ সময়ে কিছুদিন অবস্থান করেন। ঘনিষ্ঠ সান্নিধ্যে রাখিয়া প্রভু তাঁহার এই চিহ্নিত পার্শ্বদিকে অনুপ্রাণিত করেন নিজ প্রবর্তিত বৈষ্ণবীয় সাধনায়। সাধ্য-সাধনার তত্ত্ব নিরূপণে দিনের পর দিন অতিবাহিত হয়। সনাতন প্রকৃত জিজ্ঞাসু, মহাপ্রতিভাধর, সর্বোপরি প্রভুর চরণে সমর্পিত-প্রাণ। পরমোৎসাহে একের পর এক তিনি প্রশ্ন করিয়া চলেন, আর প্রভু প্রসন্নোজ্জল মুখে উত্তর দিতে থাকেন। কিছুদিন আগে গোদাবরী-তীরে প্রভু ও রামানন্দের সংলাপের মধ্য দিয়া প্রকাশিত হইয়াছে গোড়ীয় বৈষ্ণবধর্মের নির্যাস—ব্রজরসতত্ত্ব। আর আজ বারাণসীর গঙ্গাতীরে প্রভু ও সনাতনের প্রশ্নোত্তরের মধ্য দিয়া উদ্ঘাটিত হইল গোড়ীয় বৈষ্ণবসাধনার ক্রম ও নিগূঢ় তত্ত্ব। প্রভুর ব্যাখ্যাত এই তত্ত্বের সংবাহকরূপেই সনাতন উত্তরকালে ব্রজমণ্ডলের বৈষ্ণব-সমাজের শীর্ষস্থানীয় হইয়া উঠিয়াছিলেন।

একে একে প্রভু বিবৃত করিলেন কৃষ্ণ-অবতার ও বৃন্দাবন-লীলার মর্মকথা। প্রকাশ করিলেন যুগলভজনের অপূর্ব পদ্ধতি। প্রথমে শ্রীমুখের বাণী শুনাইয়াই প্রভু সনাতনকে কৃতার্থ করিলেন। তারপর পরম কৃপাভরে তাঁহার মধ্যে করিলেন শক্তি-সঞ্চার। সনাতনের শিরে পদ্মহস্ত স্থাপন করিয়া কহিলেন, “সনাতন, আজ দেববাহিত যে সব তত্ত্ব তুমি শ্রবণ করলে, আশীর্বাদ করি, তা তোমার ভেতর সঞ্চারিত হয়ে উঠুক।”

ইতিপূর্বে রূপকেও প্রভু এমনি কৃপা করিয়াছেন। শক্তি সঞ্চার করিয়া পাঠাইয়া দিয়াছেন বৃন্দাবনধামে। এবার সনাতনকে সেখানে প্রেরণ করিলেন বিরাট দায়িত্বের ভার দিয়া। নির্দেশ দিলেন—

তুমিও করিহ ভক্তিরসের প্রচার ।  
 মথুরায় লুপ্ত ভীর্ষের করিহ উদ্ধার ।  
 বৃন্দাবনে কৃষ্ণসেবা বৈষ্ণব আচার ।  
 ভক্তি স্মৃতি শাস্ত্র করি করহ প্রচার ॥

আরো কহিলেন, “সনাতন, এর পর থেকে আমার কাছাকরঙ্গ-ধারী কাঙাল বৈষ্ণবেরা দলে দলে ব্রজমণ্ডলে গিয়ে আশ্রয় নেবে। তুমি তাদের ওপর দৃষ্টি রেখো, রক্ষণাবেক্ষণ ক’রো।”

প্রভুর এই আদেশ সনাতন নিষ্ঠাভরে পালন করিয়াছিলেন। প্রভুর ব্যাখ্যাত তত্ত্বের ধারক ও বাহকরূপে উত্তরকালে ব্রজমণ্ডলেই তিনি স্থায়ীভাবে বাস করিতে থাকেন এবং অচিরকাল মধ্যে সেখানকার বৈষ্ণবসমাজের মুখপাত্ররূপে চিহ্নিত হইয়া উঠেন।

বৃন্দাবনে পৌঁছিয়াই প্রবীণ ভক্ত সুবুদ্ধি রায়, লোকনাথ গোস্বামী ও ভৃগুর্ভ পণ্ডিতের সহিত সনাতন সাক্ষাৎ করিলেন। দৈন্ত্যভরে তাঁহাদের চরণে দণ্ডবৎ করার পর আশ্রয় নিলেন যমুনা-পুলিনের আদিত্যটিলায়।

স্থানটি ঘন অরণ্যময়। এখানকার নির্জন সুগভীর পরিবেশ ধ্যানভজনের বড় অনুকূল। নির্বিলম্ব সাধক সনাতনের এ জায়গাটি বড় ভাল লাগিল। এখানে বসিয়া একান্ত নিষ্ঠায় তিনি সাধনভজন শুরু করিয়া দিলেন।

সনাতনের এই সময়কার ত্যাগ-বৈরাগ্যময়, ভজননিষ্ঠ জীবনের চিত্র ‘ভক্ত পদাবলী’ হইতে পাওয়া যায়—

কভু কান্দে কভু হাসে কভু প্রেমানন্দে ভাসে

কভু ভিক্ষা কভু উপবাস ।

হেঁড়া কাঁথা, নেড়া মাথা মুখে কৃষ্ণ গুণগাথা

পরিধান-হেঁড়া বহির্বাস ।

কখনও বনের শাক অলবণে করি পাক

মুখে দেয় ছই এক গ্রাস ।

মাঝে মাঝে ভজনতত্ত্ব সাধকের স্বাভাবিক অবস্থা যখন কিরিয়া আসে, ঝুলি কাঁধে পদব্রজে মথুরায় চলিয়া যান। যৎকিঞ্চিৎ ভিক্ষা সেখানে মিলে, তাহাতেই হয় উদরপূর্তি।

কিছুদিনের মধ্যেই প্রভুর নির্দেশ মত সমাতন লুপ্ততীর্থ উদ্ধারে ব্রতী হন। আগে হইতেই লোকনাথ গোস্বামী এ কাজ কিছুটা শুরু করিয়াছেন। সনাতন তাঁহার সহিত নিজের প্রচেষ্টা যুক্ত করিলেন। যে সব প্রাচীন গ্রন্থে ব্রহ্মমাহাত্ম্য বর্ণিত আছে সেগুলি টুঁড়িয়া লুপ্ত তীর্থের সন্ধান বাহির করা এখন হইতে হয় তাঁহার এক বড় কাজ। এই উদ্দেশ্যে নিয়া দিনের পর দিন তিনি অরণ্যে পর্বতে ঘুরিয়া বেড়ান। শাস্ত্র, মহাজন বাক্য ও লোকগাথার ভিত্তিতে রাধাকৃষ্ণের এক একটি লীলাতীর্থ উদ্ধার করেন, আর আনন্দে উৎফুল্ল হইয়া স্থানীয় জনগণকে নিয়া মত্ত হন কীর্তনানন্দে।

বৎসরখানেক বৃন্দাবনে অতিবাহিত করার পর প্রভু ত্রীচৈতন্ত্যের জন্ম সনাতনের প্রাণ চঞ্চল হইয়া উঠে। তাছাড়া, প্রভু তাঁহাকে একবার নীলাচলে ঘুরিয়া আসিতেও বলিয়াছিলেন। তাই হঠাৎ একদিন ঝুলি কাঁধে নিয়া উড়িষ্যার পথে ধাবিত হইলেন।

ঝাড়খণ্ডের মধ্য দিয়া সনাতন দিন রাত পথ চলিতেছেন। হঠাৎ একদিন দেখা গেল, দেহে তাঁহার বিবাক্ত কণ্ঠ রোগের আক্রমণ ঘটিয়াছে। নির্বিবল সন্ন্যাসী মনে মনে ভাবিতে থাকেন, এই ছুই রোগের হুর্ভোগ যে তাঁহার প্রাপ্য। দবীর খাস জীবনে স্নেহ সুলভানের অধীনে থাকিয়া যে সব অশ্রু-অনাচার করিয়াছেন, এ যে তাহারই অনিবার্য পরিণতি। সঙ্গে সঙ্গে নিজ সঙ্কল্প স্থির করিয়া ফেলিলেন, ঘৃণ্য রোগে আক্রান্ত এই দেহভার আর শুধু শুধু বহন করিয়া বেড়াইবেন না। পুরীধামে পৌঁছিয়া ত্রীজগন্নাথ ও প্রভু

ঐচ্ছিক চন্দ্রবদন দর্শন করিবেন, তারপর রথচক্রতলে করিবেন  
প্রাণ বিসর্জন।

ধামে পৌঁছিয়াই সনাতন উপস্থিত হইলেন হরিদাসের তখন  
কুটিরে। হরিদাস নিজেকে মনে করেন যবন, পতিত, দীনাতিদীন।  
তাই ত্রীজগন্নাথের সেবক ও চৈতন্য-প্রভুর ভক্তদের স্পর্শ এড়াইয়া  
নগরের এক প্রান্তে নিজের পর্ণকুটির রচনা করিয়াছেন। সনাতনের  
মনেও এমন দৈন্ত্যভাব; নিজেকে মনে করেন আচারভ্রষ্ট ও অপবিত্র।  
তাই হরিদাসের কুটিরই যে তাঁহার আশ্রয়স্থল। জগদগুরু হরিদাস  
আর ত্যাগনিষ্ঠ শাস্ত্রবিদ সাধক সনাতন, এই দুয়ের মিলনে বিজ্ঞান  
টোটা মধ্যস্থ কুটির সরগরম হইয়া উঠে।

প্রভুর নিত্যকার এক কাজ ছিল পরম ভক্ত হরিদাসকে দর্শন  
দান। জগন্নাথের উপল ভোগের পর তিনি সাক্ষাৎসাক্ষ সহ এই  
কুটিরে উপস্থিত হইতেন, দীর্ঘ সময় কাটাইয়া গৃহে ফিরিতেন।

সেদিন প্রভু টোটায় পদার্পণ করা মাত্র সনাতন দৈন্ত্যভরে  
তাঁহাকে প্রণাম করিলেন। বাহু প্রসারিয়া প্রভু যতই আলিঙ্গন  
করিতে যান, সনাতন ততই পিছু হটেন। কাতর স্বরে বলেন,  
“প্রভু কৃপা করো, আমার মিনতি রাখ। এমন ক’রে তোমার  
দেবত্বভেদ দেহ দিয়ে আমায় স্পর্শ ক’রো না। আমি অতি হীন,  
ভ্রষ্টাচারী। তত্পরি সারা অঙ্গে রয়েছে কণ্ডুর ঘৃণ্য ক্লেদ। দোহাই  
তোমার, এই ক্লেদ তোমার গায়ে মেখে আমায় আর পাপের ভাগী  
ক’রো না।”

কিন্তু প্রভুকে রোধ করিবে এমন সাধ্য কার ? আনন্দের আবেশে  
বার বার প্রিয় পার্শ্বদকে বুকে জড়াইয়া ধরেন, কণ্ডুরস তাঁহার  
সারা শরীরে লিপ্ত হয়। আর সনাতন কেবলি জ্বলিতে থাকেন  
অসুখাপের তীব্র দহনে।

সনাতনের আত্মপ্রাণি কেবলি বাড়িতে থাকে। ভাবেন—কৃষ্ণ তাঁহাকে একি বিপদে ফেলিলেন। রোজই প্রভু তাঁহাকে এমনি ভাবে প্রেমালিঙ্গন দিবেন, আর তাঁহার দেহ হইবে অপবিত্র। এষে নিতান্ত অসহ্য। বরং এ পাপ-দেহ তাড়াতাড়ি বিসর্জন দেওয়াই

সেদিন ভক্তগণসহ শ্রীচৈতন্য হরিদাসের ভজনকুটির আলো করিয়া বসিয়াছেন, তাবাবেশে ও দিব্য আনন্দে তিনি উদ্দীপিত। শ্রীমুখ হইতে কৃষ্ণকথার অমৃতধারা ঝরিয়া পড়িতেছে।

হঠাৎ প্রভু সনাতনের দিকে ফিরিয়া কহিলেন, “সনাতন, একটা কথা মনে রেখো, দেহত্যাগ করলেই কিন্তু কৃষ্ণ মিলে না; কৃষ্ণ মিলে কৃষ্ণভজনে। ওসব অশুভ সঙ্কল্প ছেড়ে দাও, ডুব দাও লীলাময়ের লীলারসের মহাপাধারে। আমি আশীর্বাদ করছি, অচিরে তোমার মনস্কামনা সিদ্ধ হবে, পাবে পরমপ্রভুর দর্শন।”

প্রভুর ইঙ্গিতের মর্ম্ম সনাতন বুঝিলেন। অন্তর্যামীর কাছে সনাতনের আত্মহত্যার গোপন ইচ্ছাটি অজানা থাকে নাই।

প্রেমাবেগে সনাতন তাঁহার চরণতলে নিপতিত হইলেন। কাদিতে কাদিতে কহিলেন, “প্রভু, আমি পতিত, তায় মহাপাতকী। তবে এ দেহ জ্বিইয়ে রেখে কি লাভ, বলো? শ্রীজগন্নাথের রথচক্রেতলে আমি নিজেকে নিক্ষেপ করবো, আমার তুমি অনুমতি দাও।”

উত্তরে কৃপাময় প্রভু যে কথা কহিলেন, তাহার মধ্য দিয়া অন্তরঙ্গ ভক্ত সনাতনের মূল্যায়ন প্রকট হইয়া উঠে :

প্রভু কহে তোমার দেহ মোর নিজ ধন।

তুমি মোরে করিয়াছ আত্মসমর্পণ।

পরের জন্য তুমি কেন চাহ বিনাশিতে।

ধর্ম্মাধর্ম্ম বিচার কিবা না পার করিতে।

তোমার শরীর মোর প্রধান সাধন।

এ শরীরে সাধিব আমি বহু প্রয়োজন। ( চৈঃ চঃ )

চিহ্নিত পার্শ্বদ সনাতনকে দিয়া কি ঐশী কৰ্ম প্রভু করাইবেন তাহার আভাষ ইতিমধ্যেই কিছুটা ফুটিয়া উঠিয়াছে। কৃষ্ণভক্তি, কৃষ্ণ-সেবার প্রবর্তন, লীলাতীর্থ উদ্ধার, বৈরাগ্যময় আদর্শের প্রচার—এগুলি তাঁহার সন্ধানে রহিয়াছে। একাজে সনাতন তাঁহার অন্ততম প্রধান সহায়। নিজে প্রভু মাতৃআজ্ঞায় নীলাচলে বাস করিতেছেন, তাই এস্থান ত্যাগ করার ইচ্ছা তাঁহার নাই। এদিকে প্রাণপ্রিয় ব্রজেশ্বরনন্দনের লীলাধাম বৃন্দাবনের দিকে তাঁহার দৃষ্টি রহিয়াছে সতত নিবন্ধ। সেখানকার নব উজ্জীবিত ভক্তিদর্শন আন্দোলনের পুরোভাগে প্রিয় পরিকর সনাতনকেই যে তিনি স্থাপন করিতে চান। সনাতনের মাধ্যমেই যে তাঁহার নিজ প্রয়োজন অনেকাংশে সিদ্ধ করিবেন।

ভৎসনার পর সনাতন শির নত করিয়া রহিলেন। সত্যিই তো, প্রভুর চরণে যে জীবন উৎসর্গ করিয়াছেন, তাহার উপর যে তাঁহার সত্যকার কোন অধিকার নাই। তবে সে জীবন এখন নিজ ইচ্ছায় কি করিয়া বিসর্জন দিবেন?

প্রভুর বাণী শুনিয়া হরিদাসের আনন্দ আর ধরে না। প্রেমভরে সনাতনকে আলিঙ্গন করিয়া কহিলেন, “সনাতন, তোমার সৌভাগ্যের সীমা নেই। স্বয়ং প্রভু তোমার দেহকে নিজ ধন বলে দাবী করছেন। শুধু তাই নয়, নিজ দেহ দিয়ে যে কাজ সম্ভব নয়, তা করাতে মনস্থ করছেন তোমায় দিয়ে। ভাই, তুমি সত্যিই ধন্য। আমরা নিতান্ত অধম, তাই প্রভুর কোন কাজে লাগতে পারলুম না।”

“এ কি অদ্ভুত কথা তুমি বলছো, শ্রীপাদ?”—সনাতন যুক্তকরে উত্তর দেন। “প্রভুর এই মণ্ডলীতে তোমার মত ভাগ্যবান আর কে আছে? প্রভুর আবির্ভাব নামধর্ম প্রচারের জন্ত। এ কাজে তুমিই যে সবার অগ্রগণ্য। প্রভুর ভক্তদের সবাই সাধনভজন করছে নিজ নিজ কল্যাণের জন্তে। কিন্তু তুমি হচ্ছেো ব্যতিক্রম। নিজের উদ্ধারের জন্ত ব্যগ্র না হয়ে, অবিরাম উচ্চ কণ্ঠে জপ ও কীর্তন করে

তুমি জীবের উদ্ধারের জন্য তৎপর হয়েছো বেশী। তোমার প্রেমের তুলনা কোথায়, শ্রীপাদ ?”

সনাতন ও হরিদাসের এমনিতর প্রণয়-দ্বন্দ্ব ভজনকুটির মুখর হইয়া উঠিতে থাকে।

শ্রীচৈতন্যের অন্তরঙ্গ ভক্ত জগদানন্দ পণ্ডিত দেশ হইতে নীলাচলে আসিয়া পৌঁছিয়াছেন। সেদিন তিনি সনাতনের সঙ্গে সাক্ষাৎ করিতে গেলেন। কিছুক্ষণ কৃষ্ণকথায় অতিবাহিত করার পর সনাতন কহিলেন, “পণ্ডিত, আপনি প্রভুর একান্ত আপনার জন। আপনি আমায় সহপদদেশ দিন। প্রভু রোজ আমায় আলিঙ্গন করেন, আর তাঁর কনককাস্তি দেহে লিপ্ত হয় আমার বীভৎস কণ্ডু-রোগের রস। এ এক মহা অপরাধে আমি অপরাধী হয়ে পড়েছি। প্রভুকে নিরস্ত করা অসম্ভব। তাই ভেবেছিলাম, আত্মহত্যা করে এ সমস্যার সমাধান করবো, তাও হলো না। অন্তর্যামী প্রভু আগে থেকে সব বুঝতে পেরে তাতে বাদ সাধলেন। এখন আমি কি করি, বলুন তো !”

জগদানন্দ স্বভাবতঃই প্রভু-অন্ত প্রাণ। প্রভুর শরীরে বিষাক্ত রোগের স্পর্শ নিত্য লাগিতেছে শুনিয়া তিনি শিহরিয়া উঠিলেন। ব্যাকুল কর্তে কহিলেন, “সনাতন, তুমি এক কাজ করো। বৃন্দাবনধাম থেকে তুমি ছুটে এসেছো প্রভুর দর্শনের জন্য, সেই আসল কাজটি তো ভাই সাজ হয়েছে। তবে আর এখানে থেকে রোজ বিপদ ডেকে আনছো কেন? সামনেই রথযাত্রা উৎসব—তারপরেই তাড়াতাড়ি বৃন্দাবনে চলে যাও। তোমাকে আর রূপ গোস্বামীকে প্রভু বৃন্দাবনের নেতৃত্ব দিয়েছেন, আরো দিয়েছেন কত চক্রবর্তী কাজের ভার। তোমার কি ভাই বৃন্দাবন ছেড়ে অন্ত্র বাস করা সাজে? বৃন্দাবন যে তোমার স্বস্থান। কাল-বিলম্ব না করে সেই স্বস্থানেই তো তোমার চলে যাওয়া উচিত।”

পণ্ডিতের কথাগুলি যুক্তিবৃত্ত। তাবিয়া-চিস্তিয়া সনাতন স্বাহাতে সায় দিলেন।

পরদিন হরিদাস ও সনাতনকে প্রভু দর্শন দিতে আসিয়াছেন। অভ্যাসমত সেদিনও তিনি সনাতনকে বক্ষে ধারণ করিলেন। তীব্র অমুশোচনার দহন শুরু হইল সনাতনের মনে। করজোড়ে কাতর কণ্ঠে নিবেদন করিলেন, “প্রভু, রোজ রোজ এই পাণীর দেহ তুমি স্পর্শ করো, বিবাক্ত কণ্ঠর ছোঁয়া তোমার পবিত্র দেহে লাগে। আর আমি জলে পুড়ে মরি। প্রভু, এবার আমি স্থির করেছি, নীলাচলে আর থাকবো না, রথযাত্রার পরেই বৃন্দাবনে চলে যাবো। তাছাড়া, এইতো কাল পণ্ডিত জগদানন্দের সঙ্গে কথাবার্তা হলো। তিনিও আমায় উপদেশ দিলেন, তাড়াতাড়ি এখান থেকে চলে যাবার জ্ঞান।”

প্রভু রোষে গর্জিয়া উঠেন। হৃদয় দিয়া কহেন, “কি বললে তুমি সনাতন! সেদিনকার জগা, সে আসে তোমায় উপদেশ দিতে। এত বড় তার স্পর্ধা। সে কি জানে না—বুদ্ধিতে, শাস্ত্রজ্ঞানে, তজ্ঞ-সাধনে তুমি তার গুরু হবার যোগ্য? আমাকেও তুমি শাস্ত্রের নিগূঢ় তত্ত্ব শেখানোর শক্তি ধরো। তাছাড়া, তুমি আমার প্রাণাধিক প্রবীণ মুহূর্ত্ত। বালকবুদ্ধি জগা তোমায় উপদেশ দিতে আসে, এ ধৃষ্টতা তার কি করে হলো?”

প্রভুর ক্রোধোদ্দীপ্ত মূর্ত্তির দিকে সনাতন নির্নিমেষে চাহিয়া আছেন, গণ্ড বাহিয়া ঝরিতেছে প্রেমাক্ষর ধারা।

ক্ষণপরে আত্মসম্বরণ করিয়া কহিলেন, “প্রভু, আজ আমার পরম সৌভাগ্য—তোমার এই প্রেমমনোহর রূপটি আমার সামনে এমনি করে উদ্ঘাটিত হলো। আরো বুঝলাম, ভক্তপ্রবর জগদানন্দের মত ভাগ্যবান খুব কমই রয়েছে। তাঁকে তুমি যে কঠোর ভাষায় তিরস্কার করলে, তা করলে আত্মজন জ্ঞানে। তোমার সহজ আত্মীয়তার সে অধিকারী। একি সহজ কথা, প্রভু? আসলে দেখছি, প্রকৃত অন্তরঙ্গ জগদানন্দের জ্ঞান তুমি রেখেছ একান্তরিকতার মধু। আর নূর ব্যবধান থেকে আমাদের পান করাচ্ছে গৌরবস্তুতির নিষ নিষিদ্ধা রস।”



সনাতনের এই কথায় প্রভু একটু অপ্রস্তুত হইয়া পড়িলেন। তারপর প্রসন্ন মধুর কণ্ঠে কহিলেন, “সনাতন, আসল কথাটি শোন। তোমার চাইতে জগদানন্দ আমার প্রিয় নয়। আর জেনে রেখো, কারুর মর্যাদা লঙ্ঘন আমি কখনো সহ্য করতে পারিনে। তোমায় উপদেশ দিতে এসে জগদানন্দ তোমার মত ব্যক্তির মর্যাদাকে লঙ্ঘন করেছে। এই জগুই আমি তাকে ভৎসনা করেছি। আর বহিরঙ্গ জ্ঞানে আমি তোমার প্রশংসা করেছি, তা মনে ক’রো না। তোমার নিজস্ব গুণই প্রশংসা উৎসারিত করে।”

ভক্তদের লক্ষ্য করিয়া প্রভু আরো কহিলেন, “তোমরা জানো, আমি সর্বব্যাপী সর্ববন্ধনমুক্ত সন্ন্যাসী—চন্দন ও পঙ্কে আমার সমজ্ঞান রাখাই তো উচিত। তবে সনাতনের কণ্ঠরস আমার গায়ে লাগায় তোমরা এত চঞ্চল হচ্ছে। কেন, বল তো?”

প্রবীণ ভক্ত হরিদাস এবার নিবেদন করিলেন, “প্রভু, তুমি স্বেচ্ছাময়, স্বতন্ত্র ঈশ্বর। তোমার লীলার মর্ম্ম আমরা কি বুঝবো? বৈষ্ণবাপরাধ করে বাসুদেব ঠাকুর কুষ্ঠরোগে আক্রান্ত হয়েছিল, তা সত্ত্বেও তুমি তার প্রতি কৃপা করতে কার্পণ্য করো নি। তোমার প্রসাদে তার ছরারোগ্য কুষ্ঠ হয়েছিল নিরাময়। অথচ আজ দেখতে পাচ্ছি, তোমাতে সমর্পিতপ্রাণ পরমভাগবত সনাতনের বিষাক্ত কণ্ঠ কিছুতেই দূর হচ্ছে না। এর রহস্য শুধু তুমিই জানো, প্রভু।”

মুচকি হাসিয়া প্রভু উত্তর দিলেন, “হরিদাস, সনাতন আমার সমর্পণ করেছে তার দেহ মন প্রাণ। আর আমি আমার সব সমর্পণ করে বসে আছি আমার প্রাণপ্রভু কৃষ্ণের কাছে। সনাতনকে তিনি নিশ্চয়ই রক্ষা করবেন।”

ভক্তেরা সবিস্ময়ে লক্ষ্য করিলেন, কিছুদিনের মধ্যেই সনাতনের ছরারোগ্য ব্যাধি সম্পূর্ণরূপে দূরীভূত হইল, সারা দেহে ফুটিয়া উঠিল অগুরু লাবণ্যাক্তি।

ক্রমে রথযাত্রা আসিয়া যায়। গোড়ীয়া ভক্তগণ এ সময়ে সদলবলে নীলাচলে সমবেত হন, প্রাণপ্রভুকে কেন্দ্র করিয়া তাঁহাদের আনন্দরঙ্গ উচ্ছল হইয়া উঠে। এই সব প্রেমিক, প্রভুগতপ্রাণ ভক্তদের সাথে একে একে সনাতন পরিচিত হন, নিজেকে গণ্য করেন মহাভাগ্যবান।

এ সময়কার আর এক বড় আকর্ষণ—শ্রীজগন্নাথের রথের অগ্রভাগে ভাবাবিষ্ট শ্রীচৈতন্যের নর্তন। এবার এই অপূর্ব দৃশ্য দেখিয়া সনাতন আনন্দে আত্মহারা হইয়া যান।

চাতুর্মাস্ত শেষ হইলে গোড়ীয়া ভক্তগণ দেশে চলিয়া গেলেন। প্রভু কিন্তু সনাতনকে ছাড়িবেন না। তাই দোলযাত্রা অবধি সনাতনকে নীলাচলে অবস্থান করিতে হইল।

বারাণসীতে থাকা কালে বৈষ্ণব তত্ত্ব ও সাধনার যে শিক্ষা প্রভু সনাতনকে দিয়াছিলেন, এবার সমাপ্ত হয় তাহার পরবর্ত্তী অধ্যায়। তাছাড়া, বৃন্দাবনে প্রভু এক নূতন ভক্তিসাম্রাজ্য গঠন করিতে চান এবং তাহার ভিত্তি নির্মাণ ও সংগঠনের ভার দিয়াছেন প্রিয় পার্শ্বদ সনাতনেরই উপর। বিশেষ করিয়া এই দুইটি কারণে মাসের পর মাস সনাতনকে প্রভু ঘনিষ্ঠ সান্নিধ্যে রাখেন, দান করেন বহুতর গুরুত্বপূর্ণ নির্দেশ।

দোলযাত্রা উৎসব সাড়ম্বরে সমাপ্ত হইয়া গেল। এবার সাত্ৰ-নয়নে প্রভুর চরণে বিদায় নিয়া সনাতন নীলাচল ত্যাগ করিলেন।

বৃন্দাবনের আদিভ্য টিলার পর্ণকুটিরে বসিয়া আবার শুরু হইল তাঁহার ভজন কীর্তন ও প্রভুর নির্দেশিত কর্মসাধন।

স্থানটি ইষ্ট-ধ্যানের পক্ষে বড় অমূল্য। উপরে দিগন্তবিস্তৃত নীলাকাশ। নীচে কল্লোলিনী যমুনা বহিয়া চলিয়াছে অপক্লপ লীলাভঙ্গিমায়। দূরে বনানী বেষ্টিত পাহাড়ের শ্রেণীতে জড়ানো নীল সবুজের মাধুরিমা। সমগ্র পরিবেশে যেন ওতপ্রোত হইয়া আছেন প্রাণপ্রিয় ইষ্টবিগ্রহ—শ্রীমন্মন্দর। পরমানন্দে দিনের

পর দিন এই নির্জন রমণীয় অরণ্যাবাসে সনাতনের তপস্যা অগ্রসর হইয়া চলে।

বৃন্দাবনের আশেপাশে তখন জনমানবের বসতি খুব কম ছিল, তাই ভিক্ষা সংগ্রহ করিতে হইলে সাধুদের যাইতে হইত মথুরা অঞ্চলে। সনাতনকেও মাঝে মাঝে তাহাই করিতে হইত। হঠাৎ একদিন এই ভিক্ষার মধ্য দিয়া উন্মোচিত হইল তাঁহার সাধনজীবনের এক নূতন বাতায়ন। ইষ্টদেব প্রকটিত করিলেন তাঁহার এক নূতনতর সেবালীলা।

মাধুকরী করিতে গিয়া সনাতন সেদিন মথুরার দামোদর চৌবের বাড়ীতে উপস্থিত হইয়াছেন। অঙ্গনে পা দিতেই চোখে পড়িল নয়নাভিরাম বিগ্রহ, নাম শ্রীশ্রীমদনগোপাল। দর্শন মাত্রেই সনাতন কি জানি কেন এক অপূর্ব প্রেমাবেশে বিহ্বল হইয়া গেলেন। এই শ্রীমূর্তি যেন তাঁহার কত আপনার, কত পরিচিত। কত জন্মের সাধনার ধন আজ যেন তাঁহার সম্মুখে আসিয়া উপস্থিত।

ভাবাবিষ্ট সাধকের অন্তরে জাগিয়া উঠে প্রবল আন্তি, আর জাগে এই শ্রীবিগ্রহ সেবার জন্ত হৃদমনীয় আকাজক্ষা। কিন্তু অতি কষ্টে তাঁহাকে আত্মসম্বরণ করিতে হয়। নিজে তিনি কাহ্নাকরজধারী কান্ধাল বৈষ্ণব, শ্রীমূর্তির সেবার সামর্থ্য তাঁহার কই? তাছাড়া, চৌবে পরিবার তো প্রাণ গেলেও এই ইষ্ট-বিগ্রহ ত্যাগ করিবে না। ভিক্ষা গ্রহণের শেষে, লোভাতুর নয়নে বার বার ঐ শ্রীমূর্তির দিকে দৃষ্টিপাত করিয়া তিনি স্থান ত্যাগ করিলেন।

আদিত্য টিলার বিজন আবাসে সনাতন কিরিয়া আসেন, দৈনন্দিন ধ্যানভজনে হন নিবিষ্ট। কিন্তু একি বিপদে আজ তিনি পড়িলেন? যখনই নয়ন মুদ্রিয়া ভজন-আসনে উপবেশন করেন, কোথা হইতে সেই মদনগোপাল মূর্তি মানসপটে ভাসিয়া উঠে, প্রাণ মন কাড়িয়া নিয়া আবার কোথায় মিলাইয়া যায়। সনাতনের মনে আর স্বস্তি নাই, শান্তি নাই। মাঝে মাঝেই কাজে বা অকাজে

মথুরায় ছুটিয়া যান, চৌবেজীর অঙ্গনে দাঁড়াইয়া নির্নিমেষে চাহিয়া থাকেন ঐ নয়নমনবিমোহন ঠাকুরের দিকে।

ক্রমে চৌবে পরিবারের সঙ্গে সনাতনের ঘনিষ্ঠতা জন্মে। চৌবেজীর বিধবা পত্নীর সেবার ভাবটি বড় সহজ সুন্দর। এই ত্রীবিগ্রহ তাঁহার আদরের বালগোপাল—নিজের বালক জ্ঞানেই দিনরাত তিনি ইহার সেবা পরিচর্যা করেন। চৌবে গৃহিণীর পুত্রের নাম সদন। এই সদন যেমন তাঁহার এক পুত্র, মদনগোপালজীও তেমনি আর একটি। প্রাণপ্রিয় ছই পুত্রের লালনপালন তিনি সম্পন্ন করেন এক ভাবে, একই সহজ সরল মাতৃভাবে মধ্য দিয়া।

নিষ্ঠাবান ভক্ত সনাতনের মন কিন্তু খুঁতখুঁত করিতে থাকে। ইষ্ট-বিগ্রহের সেবা পরিচর্যা চলিবে গৃহেরই একটি বালকের সমপর্যায়ে? প্রকৃত ইষ্টনিষ্ঠা থাকিবে না, ইষ্টের সেবা ও পূজার বিশেষ ব্যবস্থা থাকিবে না, এ কেমন কথা?

সেদিন চৌবের গৃহিণীকে ডাকিয়া কহিলেন, “মা, তুমি পরম স্নেহে মদনগোপালজীর সেবা যত্ন করে যাচ্ছে, তা ঠিক। কিন্তু আমার মনে হয়, এতে একটু ক্রটি রয়ে যাচ্ছে। তুমি মাতৃভাবে, যশোদাভাবে, প্রভুজীকে লালন করছো। কিন্তু মা-যশোদার বাৎসল্য রস তো সাধারণ জীবের মধ্যে সঞ্চারিত হওয়া সম্ভব নয়। তাই আমার মনে হয়, তুমি প্রভুজীর সেবা সম্পন্ন করো সত্যকার ভক্তি ও শ্রদ্ধা নিয়ে। যে প্রণালীতে ভক্ত বৈষ্ণবেরা ভগবানকে সেবা পূজা করে, সেই প্রণালী তুমি অনুসরণ করো।”

মহিলা সবিনয়ে উত্তর দিলেন, “তাই তো, বাবাজী। তুমি যে আমায় নূতন করে ভাবিয়ে তুললে। বেশ, তাই হবে, তোমার উপদেশ মত এবার থেকে ঠাকুরের জন্ত বিধিমত সেবা-অর্চনার ব্যবস্থাই করবো।”

ইতিমধ্যে কয়েক দিন অতিবাহিত হইয়াছে। মদনগোপালজীর দর্শনের জন্ত সনাতন সেদিন মথুরায় গিয়াছেন, অঙ্গনে পদার্পণ

করামাত্রই চৌবে পত্নী তাড়াতাড়ি ছুটিয়া আসিলেন। শ্মিত হাস্তে কহিলেন, “নাঃ বাবাজী, তোমার কথামত কাজ আর করা গেল না। মদনগোপালজী বড় ক্ষুব্ধ হয়েছেন। সেদিন আমায় স্বপ্নাদেশ দিয়েছেন,—‘ওগো, তুমি আমার মা হয়ে ছিলে, সেই তো ছিল ভালো। এখন ঠাকুর জ্ঞানে আমায় দূরে সরিয়ে রাখছো, পূজো অর্চনার ভীড় লাগিয়েছো। এ আমার ভালো লাগছে না, বাপু। তোমার দুই ছেলে, সদন আর মদনের ভেতর তফাৎ রাখা কি ভালো?’”

সনাতন চমকিয়া উঠিলেন। তাই তো। সহজাত প্রেম ও প্রাণের স্বাভাবিক টান—ইহাই যে ঠাকুরের সেবার শ্রেষ্ঠ উপচার! চৌবে গৃহিণীর স্বপ্নাদেশের মাধ্যমে এই মূলতত্ত্বটিই যে মদনগোপাল আজ তাঁহাকে বুঝাইয়া দিলেন। প্রভুজীর এই কৃপা নির্দেশের কথা স্মরণ করিয়া বার বার সনাতনের নয়ন ছুটি অশ্রু সজল হইয়া উঠিতে থাকে।

মদনগোপালজীর আকর্ষণ কিন্তু সনাতনের জীবনে দিন দিনই হইয়া উঠে দুর্নিবার। দৈন্যময় সাধকের অন্তরের অন্তস্তল হইতে নিয়ত উদগত হয় কাতর প্রার্থনা—“হে প্রভু, হে দয়াল, তোমার বিরহ যে আর আমি সহ্য করতে পারছিনে। তুমি এসো—এসো, এই দীনহীন কাজালের কোলে এসো। এই ছুর্ভাগার জীবনে যে ভীত দহন শুরু হয়েছে, তোমায় না পেলে তার নিবৃত্তি আর হবে না।”

অচিরে এই প্রার্থনা ও আশ্বিত্তির কল কলিয়া যায়। দামোদর পত্নী সেদিন স্নানমুখে সনাতনের কাছে আসিয়া দাঁড়ান। অশ্রুরুদ্ধ কণ্ঠে কহেন, “বাবাজী আজ থেকে তুমিই নাও আমার মদনগোপালের সেবার ভার। গোপাল এখন বড় হয়েছে, মায়ের আঁচলের তলে আর বসে থাকতে চাইবে কেন? তোমার বুপড়িতে যাবে বলে বায়না ধরেছে, কাল রাতে স্বপ্নে এ কথা বার বার আমায় জানালে। তাছাড়া, আমাদের সাংসারিক অবস্থাও ক্রমে অসচ্ছল হয়ে পড়ছে।

ঠাকুরকে পাছে কষ্ট দিতে হয়, এই দৃষ্টান্তায়ই আমি মরছি। বাবাজী আজই এ বিগ্রহ তুমি নিয়ে যাও।”

সনাতনের প্রাণের আকাঙ্ক্ষা এভাবে পূর্ণ হইল। পরম আনন্দে শ্রীবিগ্রহ কোলে করিয়া তখন ছুটিয়া চলিলেন বৃন্দাবনের ভজনকুটির অভিমুখে। সেখানে সযতনে স্থাপন করিলেন তাঁহার প্রাণপ্রিয় এই কৃষ্ণমূর্তি।

চৌবেজীর ঘর হইতে যে মদনগোপাল বিগ্রহ সনাতন লাভ করিয়াছেন তাহার একটি বিশেষ ঐতিহ্য রহিয়াছে। কথিত আছে, শ্রীকৃষ্ণের প্রপৌত্র মহারাজ বজ্রনাভ এক সময়ে সারা ব্রজমণ্ডলে অহুসঙ্কান চালাইয়া যে আটটি প্রাচীন বিগ্রহ আবিষ্কার করেন, মদনগোপাল শ্রীমূর্তি তাঁহাদেরই অন্যতম।

প্রাণপ্রিয় বিগ্রহ তো হস্তগত হইল। কিন্তু এখন ইহার সেবা পরিচর্য্যার কি উপায়? সনাতন মহাসমন্তায় পড়িলেন। ভাবিয়া-চিন্তিয়া অবশেষে ভজনকুটিরের নিকটে এক ঝুপড়ি বাঁধিলেন, পরম যত্নে ঠাকুরকে সেখানে করিলেন সংস্থাপিত। সেবার জন্ম নূতন উৎসাহে শুরু হইল মাধুকরী। ভিক্ষাস্বরূপ সামান্য যাহা কিছু আটা মিলিত তাহাই পিণ্ডাকৃতি করিয়া আগুনে পোড়াইয়া নিতেন। তারপর প্রেমাপ্লুত হৃদয়ে দীন ভক্ত রোজ ইহা নিবেদন করিতেন প্রাণপ্রিয় ঠাকুরের সম্মুখে। অগ্নিদগ্ধ এই আটার পিণ্ডই ব্রজমণ্ডলের বৈষ্ণবসমাজে খ্যাতিলাভ করে সনাতন গোঁসাইর আঙাকড়ি-ভোগ নামে। উত্তরকালে বড় বড় ধনী ব্যক্তির মদনগোপালজীর সেবায় প্রচুর অর্থদান করিতে আগাইয়া আসেন। তখনকার সে বিপুল আয়োজন, ঐশ্বর্য ও আড়ম্বরের দিনেও কাজাল সনাতনের দগ্ধ আটাপিণ্ড ছিল শ্রীবিগ্রহের নিত্যকার ভোগের অপরিহার্য অঙ্গ।

আঙাকড়ি ছাড়া আর একটি বস্তুও সনাতনকে নিবেদন করিতে

দেখা যাইত। টিলার সান্নদেশে ইতস্ততঃ ছড়ানো ছিল নানা ধরণের বুনো শাক ; রোজ তিনি এগুলি তুলিয়া আনিতেন। সৈন্ধব প্রায়ই জুটিত না, দীনহীন বৈষ্ণব অধিকাংশ দিনই অলবণে রান্না-করা ঐ শাক দ্বারা ভোগ চড়াইতেন।

এভাবে কিছুকাল অতিবাহিত হয়। অতঃপর শ্রীবিগ্রহ একদিন বড় গোল বাধাইয়া বসেন। স্বপ্নে সনাতনকে দর্শন দিয়া কহেন, “ওগো, তোমার দেওয়া এই ভোগ আর গলাধঃকরণ করা যাচ্ছে না। তোমার আঙা কড়ি আর সৈন্ধব-মসলাহীন রান্না খেয়ে আর কতকাল চালাবো, বল ?”

সনাতনের নয়ন ছুটি অশ্রু ছলছল হইয়া উঠে। কাতরস্বরে নিবেদন করেন, “প্রভু, তুমি তো জানো, আমি তোমার এক নিষ্কিঞ্চন অধম সেবক। তুমি বিশ্বব্রহ্মাণ্ডের অধিরাজ, তোমার উপযুক্ত রাজভোগ আমি কি ক’রে যোগাবো ? দধি আটা আর এই শাক-সৈন্ধ খেতে রুচি না হয়, তুমি নিজেই নিজের সেবার যথাযোগ্য ব্যবস্থা ক’রে নাও।”

বড় জটিল, বড় হৃষ্টের প্রভুর লীলাখেলা। চৌবে গৃহিণীর এত দিনের বাৎসল্য ও সমাদর ছাড়িয়া স্থান নিয়াছেন এই সহায় সম্পদ-হীন কান্দাল সাধুর ঘরে। আবাব এখানে আসিয়া বায়না ধরিয়াছেন রুচিকর আহার্যের জন্ত। কিন্তু ডোর-কোঁপীন মাত্র সম্বল সনাতন এ ব্যাপারে কি করিতে পারেন ? তিনি যে একেবারে নিরুপায়।

দিনের পর দিন সনাতন চিন্তা করেন স্বপ্নে প্রভু মদনগোপালজীর দর্শনদানের কথা। অন্তর তাঁহার তীব্র ব্যথায় মুহুমান হয়, কপোল বাহিয়া ঝরিতে থাকে অশ্রুধারা।

নিরন্তর আকুতি ও অশ্রুর অর্ঘ্য এবার অন্তর্যামীর অন্তর স্পর্শ করে। ভক্তাধীন ভগবান অল্প কয়েক দিনের ভিতরই ভক্তের মনোবাঞ্ছা পূরণের ব্যবস্থা করিয়া দেন।

পাঞ্জাবের বিশিষ্ট ব্যবসায়ী রামদাস কাপুর সেদিন রাত্রে নৌকা

করিয়া বৃন্দাবনের পাশ দিয়া চলিয়াছেন। সঙ্গে একরাশ মূল্যবান মালপত্র, দূর শহরে গিয়া এগুলি বিক্রী করিবেন। হঠাৎ আদিত্য টিলার নীচে সূর্য্যঘাটের কাছে আসিয়া নৌকাটি এক বৃহৎ চড়ায় আটকাইয়া যায় ও সঙ্গে সঙ্গে কাৎ হইয়া পড়ে। মাঝি-মাল্লারা বহুক্ষণ ঠেলাঠেলির পর হার মানিতে বাধ্য হয়, মালভাণ্ডি ভারী নৌকা কোনমতেই নড়ানো সম্ভব হয় না।

কৃষ্ণপঙ্কের গভীর রাত্রি। বৃন্দাবনের অরণ্যে ও টিলায় টিলায় ঘন অন্ধকার জমাট বাঁধিয়া উঠিয়াছে। নিকটে কোথাও জনবসতির চিহ্ন দেখা যাইতেছে না। রামদাস কাপুর প্রমাদ গণিলেন। কিছু সংখ্যক স্থানীয় লোকজন সংগ্রহ করিতে পারিলে নৌকাটি চড়া হইতে টানিয়া বাহির করা যাইত। কিন্তু সে আশা ছরাশা। এই নিশ্চিতি রাত্রে, জনমানবহীন যমুনার তীরে কে আর তাঁহাকে সাহায্য করিতে আসিবে?

ক্রমে রামদাসের দুশ্চিন্তা বাড়িয়া চলে। নৌকা এরূপ কাৎ হইয়া থাকিলে অবশ্যই ডুবিলে এবং তাঁহার সর্ব্বস্ব বিলীন হইবে জলগর্ভে। তাছাড়া, না ডুবিলেও বিপদের আশঙ্কা কিছু কম নয়। তীরস্থিত এই বিজন অরণ্যে দস্যুদের আনাগোনা আছে। কখন তাহারা হা-রে-রে করিয়া নৌকায় চড়াও হয়, মালপত্র, টাকাকড়ি লুটপাট করিয়া নেয়, কে জানে?

নিরুপায় হইয়া কেবলি ভাবিতেছেন। হঠাৎ চোখে পড়িল, অদূরস্থিত টিলায় এক মুহূ দীপশিখা। সঙ্গে সঙ্গে আশার আলো জলিয়া উঠে রামদাসের অন্তরে। একবার শেষ চেষ্টা করিয়া দেখা যাক না কেন? হয়তো টিলার উপরে কোন বসতি রহিয়াছে। ওখানকার কাহাকেও দিয়া কি আশপাশ হইতে লোকজন সংগ্রহ করা যায় না?

সাঁতরাইয়া তখন তীরে উঠিলেন, আলো লক্ষ্য করিয়া ত্রস্তপদে আরোহণ করিলেন টিলার শীর্ষদেশে।



সঙ্গে সঙ্গে নয়নপথে পতিত হইল এক পৰ্ণকুটির। ভিতরে প্রদীপের ক্ষীণ আলো মিটিমিটি জ্বলিতেছে, আর এক পাশে স্থাপিত রহিয়াছেন নয়নাভিরাম কৃষ্ণবিগ্রহ। সম্মুখে এক দেবপ্রতিম বৈষ্ণব সাধক ভজনরত। কি জানি কেন এই সাধককে দর্শন করা মাত্র রামদাসের অন্তরে জাগিয়া উঠিল এক স্মৃষ্ট বিশ্বাস। ভক্তিতে সন্তুর্পণে তিনি প্রণাম নিবেদন করিলেন।

উঠিয়া দাঁড়াইতেই সপ্রশ্ন দৃষ্টিতে সনাতন আগন্তকের মুখের দিকে চাহিলেন। রামদাস করজোড়ে নিবেদন করিলেন তাঁহার বিপদের কাহিনী। কাতর কণ্ঠে মিনতি করিয়া কহিলেন, “মহারাজ, আমি আজ বড় বিপন্ন, যমুনাগর্ভে আমার সর্বস্ব খোয়াতে বসেছি। ভাগ্যক্রমে এই বিজন স্থানে আপনার মত মহাপুরুষের দর্শন পেলাম। আমার অন্তরাত্মা থেকে কে যেন কেবলি ডেকে বলছে, আপনার কৃপা ছাড়া আমার উদ্ধারের কোন আশা নেই। অকপটে চরণতলে আশ্রয় নিলাম, আপনি আমায় বাঁচান।”

আর্দ্রের কাতরোক্তিতে সনাতনের হৃদয় বিগলিত হইল। স্নিগ্ধমধুর কণ্ঠে কহিলেন, “বাবা, তুমি এত অধীর হ'য়ো না, শাস্ত হও, আমার মদনগোপালজী তোমায় কৃপা করবেন। এ বিপদ থেকে তুমি মুক্ত হবে। যাও নির্ভয়ে নেমে গিয়ে যমুনা তীরে অপেক্ষা করো।”

আশীর্বাদ ও অভয় লাভে রামদাসের হৃদয় কথঞ্চিৎ শান্ত হইল। টিলা হইতে অবতরণের আগে কহিলেন, “মহারাজ, আমি সঙ্কল্প করলাম, এ বিপদ থেকে উদ্ধার পেলে আমার এবারকার বাণিজ্যের সবটা মুনাফা আপনার এই দেববিগ্রহের সেবায় আমি নিয়োজিত করবো।”

সনাতনের শুভেচ্ছায় সেই রাতেই রামদাস কাপুরকে বিপদমুক্ত হইতে দেখা যায়। কোথা হইতে অলৌকিকভাবে যমুনাবক্ষে প্রবাহিত হয় নুতন স্রোতধারা। চড়ায় আবদ্ধ পণ্যবাহী বিপন্ন ভরী আবার নিজপথে ভাসিয়া চলে।

বাণিজ্য হইতে কিরিয়া রামদাস কাপুর তাড়াতাড়ি বৃন্দাবনে চলিয়া আসেন। সনাতনের নিকট হইতে সজ্জীক দীক্ষা গ্রহণ করিয়া ধন্য হন। তাছাড়া, সেবারকার বাণিজ্যের সবটা লভ্যাংশ মদনগোপালজীর সেবায় তিনি উৎসর্গ করেন। সেই বিপুল অর্থ নিশ্চিত হয় শ্রীবিগ্রহের জগ্নু সুরমা মন্দির, জগমোহন ও নাটশালা। প্রচুর ভূসম্পত্তি ক্রয় করিয়া ঠাকুরের সেবা ও ভোগ বিতরণের স্থায়ী ব্যবস্থাও এই সঙ্গে করা হয়।

সনাতনের সেবিত এই মদনগোপাল কিন্তু ক্রমে জনসাধারণের কাছে মদনমোহন নামেই পরিচিত হইয়া উঠেন। উত্তরকালে নানা ঘটনাচক্রের মধ্য দিয়া এই লীলাময় শ্রীবিগ্রহ জয়পুরে স্থানান্তরিত হইয়াছিলেন।

ইষ্টদেবের মন্দির নির্মাণ ও সেবাকার্যের চমৎকার বন্দোবস্ত এভাবে আপনা হইতেই হইয়া যায়। সনাতনের সকল হুশিচিন্তা দূর হয়, প্রাণমন ভরিয়া উঠে অপার তৃপ্তিতে।

প্রেমপূরিত হৃদয়ে, গলদশ্রবণে শ্রীবিগ্রহের সম্মুখে দণ্ডবৎ করিয়া কহিতে থাকেন, “ঠাকুর, আগে ছিলে চোবে ভবনে, তারপর এলে কান্দাল ভক্ত সনাতনের রূপড়িতে। এবার তুমি এসে দাঁড়িয়েছো ব্রজমণ্ডলের তীর্থকামী ভক্তসমাজের নয়নসমক্ষে তীর্থরাজরূপে। জীবের কল্যাণের জগ্নু কৃপাভরে যে সেবালীলা এখানে তুমি প্রকট করেছো, তা অব্যাহত থাকুক, এই মোর একান্ত প্রার্থনা। এবার এখান থেকে আমার ছুটি দাও, প্রভু।”

নবনির্মিত সুরমা ঐ ইষ্ট মন্দিরে সনাতন কিন্তু একদিনও বাস করেন নাই। পূর্ববৎ বৃক্ষতল আর পর্ণকুটিরই হয় সর্বভাগী কৃচ্ছ্রবতী সাধকের একমাত্র আশ্রয়।

এখন হইতে কখনো গোবর্দ্ধনের পাদমূলে, কখনো রাধাকুণ্ডের তীরে, কখনো বা গোকুলের অরণ্য অঞ্চলে রূপড়ি বাঁধিয়া একান্ত নির্ভায় তিনি সাধন-ভজন করিতে থাকেন।

লুপ্ত তীর্থ উদ্ধারের যে নির্দেশ প্রভু শ্রীচৈতন্যের নিকট হইতে সনাতন পাইয়াছেন ক্রমেক্রমে তরৈও তিনি তাহা বিস্মৃত হন নাই। এ সময়ে যখন যেখানে অবস্থান করিতেন, তাহার চারিদিকে তীর্থ ও তীর্থবিগ্রহের আবিষ্কার চেষ্টা ছিল তাঁহার সাধনার অন্ততম অঙ্গ। প্রভুর প্রেরণায় উদ্ধৃদ্ধ হইয়া সনাতন ক্রমে ক্রমে অনেকগুলি তীর্থকে পুনরুজ্জীবিত করেন, তারপর সেগুলিকে তুলিয়া ধরেন জন-চৈতন্যের সমক্ষে। এস্থলে বিশেষভাবে উল্লেখযোগ্য যে, নন্দগ্রামে নন্দ যশোদা, বলভদ্র ও কৃষ্ণবিগ্রহ স্থাপন করিয়া তিনি ভক্ত সমাজের ধন্যবাদভাজন হন।

লোকনাথ গোস্বামী ও ভূগর্ভ পণ্ডিত আগে হইতেই শ্রীচৈতন্যের নির্দেশ অনুযায়ী ব্রজমণ্ডলে সাধন-ভজন করিতেছেন। অতঃপর একে একে আসিয়া উপস্থিত হন রূপ গোস্বামী, গোপাল ভট্ট, রঘুনাথ ভট্ট, রঘুনাথদাস গোস্বামী প্রভৃতি। প্রত্যেকেই ভক্তিসাধনার এক একটি দিকপাল। ইহাদের অত্যাগ্র সাধনা, ত্যাগ, বৈরাগ্য ও শাস্ত্র-জ্ঞানের প্রভায় সারা উত্তর ভারতের অধ্যাত্মজীবন উদ্ভাসিত হইয়া উঠে। আর এই সাধকগোষ্ঠীর মধ্যমণিরূপে অধিষ্ঠিত থাকেন অশেষ শাস্ত্রবিদ ধীর-গম্ভীর আত্মকাম মহাপুরুষ সনাতন গোস্বামী।

প্রভু শ্রীচৈতন্যের নির্দেশ ছিল, ভক্তিশাস্ত্র উদ্ধার করিতে হইবে এবং প্রবল উত্তমে প্রচার করিতে হইবে নব নব বৈষ্ণবীয় দর্শন, স্মৃতি ও সাধন-ভজনের গ্রন্থ। এই নির্দেশ সনাতন একদিনের তরৈও বিস্মৃত হন নাই। ভক্ত ও অনুগত বহুবাক্যবদের সংখ্যা বৃদ্ধি পাইতে থাকিলে ইহাদের সাহায্যে দিনের পর দিন তিনি সংগ্রহ করেন অজস্র প্রাচীন ভক্তিশাস্ত্রের গ্রন্থ। শুধু তাহাই নয়, নবতর রচনার দিকেও তাঁহার দৃষ্টি প্রসারিত হয়। নিজে কতকগুলি শাস্ত্রগ্রন্থ যেমন রচনা করেন তেমনি তাঁহার আধ্যাত্মিক প্রেরণায় ও নেতৃত্বে লিখিত হয় গৌড়ীয় বৈষ্ণবদর্শন, স্মৃতি, ও ভজন-পূজনের গ্রন্থ ও নানা ধরনের টীকা ভাষ্য।

গৌড়ীয় বৈষ্ণবদের শাস্ত্রাভিত্তি নির্মাণে ও গৌরবময় ঐতিহ্য গড়িয়া তুলিতে যে অবদান সনাতন গোস্বামী রাখিয়া গিয়াছেন তাহার তুলনা বিরল। এই মহান কর্মকে তিনি গণ্য করিয়াছিলেন প্রভু শ্রীচৈতন্যের আদিষ্ট ব্রতরূপে। বলা বাহুল্য এ ব্রত সাফল্যের সহিত তিনি উদ্‌যাপন করিয়া যান।

ত্যাগ তিতিক্ষা, বৈরাগ্যময় সাধনা ও কৃষ্ণপ্রেমের পরম অমুভূতির সহিত সনাতন গোস্বামীর জীবনে মিলিত হইয়াছিল অসাধারণ প্রতিভা, শাস্ত্রজ্ঞান ও শ্রমনিষ্ঠা। বহুতর নিজস্ব রচনা, সঙ্কলন ও সম্পাদনার মধ্যে তাঁহার এই জীবন বৈশিষ্ট্যের ছাপ পরিস্ফুট হইয়া রহিয়াছে।

পাণ্ডিত্যের শাস্ত্রচর্চা ও সাধকের প্রত্যক্ষীভূত সূক্ষ্মলোকের অমুভূতি—এই দুইটি পৃথক বস্তু। কিন্তু যে সব ক্ষেত্রে এই দুটির সমাবেশ ঘটে, তাহা হইয়া উঠে এক চূর্ণভ সম্পদ। সনাতনের রচনা ও সম্পাদনায় এই বৈশিষ্ট্য দৃষ্টিগোচর হয়। তাঁহার নিজস্ব গ্রন্থাদির মধ্যে রহিয়াছে : লীলাস্তুব, বৈষ্ণবীয় স্মৃতি হরিভক্তিবিলাসের ‘দিগ্‌ দর্শিনী’ টীকা, বৃহৎ ভাগবতামৃত, ভাগবতামৃতের টীকা ও বৃহৎ বৈষ্ণবভোষণী টীকা।

ইষ্ট-বিগ্রহের ভজন-পূজনের সময় আশুকাম সাধক সনাতনের শ্রীমুখ হইতে অজস্রধারে নির্গত হইত লীলামাহাত্ম্যের স্তব ও দৈনন্দিন প্রার্থনা। ইহারই সঙ্কলন হইতেছে ‘লীলাস্তুব’।

গোস্বামী গোপাল ভট্টকৃত ‘হরিভক্তিবিলাস’ এক মহামূল্যবান বৈষ্ণব-স্মৃতি। গৌড়ীয় বৈষ্ণবদের কৃত্য ও আচারসমূহ ইহাতে বিস্তারিত ভাবে বর্ণিত হইয়াছে। গোপাল ভট্টের নামে এই গ্রন্থ প্রচারিত হইলেও ইহার সঙ্কলনে সনাতনের পাণ্ডিত্য ও প্রতিভার প্রভাব ছিল দূরপ্রসারী। সনাতন নিজে এই বিরাট স্মৃতিগ্রন্থের টীকা প্রণয়ন করেন। তাঁহার এই টীকার উদ্দেশ্য প্রামাণ্য শাস্ত্র বাক্যের উদ্ধৃতি ও ব্যথোচিত যুক্তিতর্ক প্রয়োগের দ্বারা জটিল সমস্তা-

সমূহের সমাধান করা। ‘হরিভক্তি বিলাস’এর গ্রন্থকাররূপে বয়ঃকনিষ্ঠ গোপাল ভট্টকে আগাইয়া দিয়া দিক্‌পাল শাস্ত্রবিদ সনাতন যে ভাবে বিরাট বনস্পতির মত ছায়া বিস্তার করিয়াছেন, নানা সিদ্ধাস্তময়, বিতর্কবহুল ঐ স্মৃতিগ্রন্থের পৃষ্ঠরক্ষার্থ দণ্ডায়মান হইয়াছেন, তাহা তাঁহার মত প্রবীণ সাধক ও মনীষীরই উপযুক্ত।

বৃহৎ-ভাগবতামৃত নামক প্রসিদ্ধ গ্রন্থে সনাতন ভক্তিশাস্ত্র-সাগর মন্থন করিয়াছেন। একদিকে বৈষ্ণবধর্মের মর্ম্মকথা যেমন ইহাতে উদ্ঘটিত হইয়াছে, অপরদিকে তেমনি বিস্তারিত হইয়াছে বিভিন্ন অবতারের তত্ত্ব ও প্রেমভক্তি-ধর্মের সাধনপ্রণালী। বৈষ্ণব সাধকদের কাছে এই গ্রন্থ অমৃতের খনি বিশেষ। এ গ্রন্থের সিদ্ধাস্ত ও নির্দেশ সহজতর করার উদ্দেশ্যে সনাতন একটি বিস্তৃত টীকা প্রণয়ন করেন, তাহা ‘দিগ্‌দর্শিনী’ নামে পরিচিত।

সনাতনের শাস্ত্রসাধনার চরম অবদান—বৃহৎ বৈষ্ণবভোষণী নামক ভাগবতের টীকা। বেদান্তের নিগূঢ় পরমতত্ত্ব ও ভগবৎ ভক্তির অমৃতময় ব্যাখ্যার মহামিলন ঘটিয়াছে মহামুনি বেদব্যাস রচিত শ্রীমদ্ভাগবতে। বৈষ্ণবধর্মের জ্যেষ্ঠ প্রবর্তক ও টীকা-ভাষ্যকারেরা প্রধানতঃ প্রেমভক্তি-শাস্ত্রের এই অমৃতনির্বার হইতেই পরম পথের পাথের সংগ্রহ করিয়াছেন, যাঁর যাঁর নিজস্ব সিদ্ধাস্ত ও সাধনার ধারা উন্মুক্ত করিয়া নিয়াছেন। গোড়ায় বৈষ্ণবসমাজের পক্ষ হইতে প্রবীণ সাধক সনাতন এই মহান আকরগ্রন্থের দশম স্কন্দ বা কৃষ্ণ জন্মখণ্ডের এক বিস্তীর্ণ টীকা প্রণয়ন করেন। পাণ্ডিত্য ও রসমাধুর্যের দিক দিয়া সনাতনের বৈষ্ণবভোষণী ভক্তিশাস্ত্রের জগতে এক বিশিষ্ট স্থান অধিকার করিয়া আছে। বিশিষ্ট গবেষকদের মতে, সনাতনের ‘বৈষ্ণবভোষণী’ যে ভাবে ভাগবতের চরম স্থলের ব্যাখ্যায় আলোকপাত করিয়াছে, অনেক প্রাচীন টীকায়ও তাহা পাওয়া যায় না।

বৈষ্ণবভোষণী টীকা রচনা করার কালে সনাতন ছিলেন অতিশয় বৃদ্ধ, প্রায় চলৎশক্তিহীন। এসময়ে বয়ঃকনিষ্ঠ ও অল্পগত গোস্বামীষয়

রঘুনাথ ভট্ট ও রঘুনাথ দাস সর্বদা তাঁহার সেবক ও সহকারীরূপে সঙ্গে থাকিয়া এই গ্রন্থ প্রণয়নে নানাভাবে সাহায্য করেন। বৈষ্ণব-তোষণীই সনাতন গোস্বামীর শেষ রচনা, যে বৎসর এই মহাগ্রন্থ সমাপ্ত হয়, সেই বৎসরই তাঁহার জীবনদীপ হয় নির্বাপিত।

সনাতনের দেহান্তের প্রায় পঁচিশ বৎসর পরে তাঁহার ভ্রাতৃপুত্র, শিষ্যপ্রতিম শ্রীজীব গোস্বামী, সুবিস্তৃত বৈষ্ণবতোষণীর এক সংক্ষিপ্ত ও সহজবোধ্য সংস্করণ প্রকাশ করেন। ইহার নাম দেওয়া হয়  
 ॥

অমূল্য রূপ গোস্বামীর সুপ্রসিদ্ধ গ্রন্থ ‘ভক্তিরসামৃতসিদ্ধির’ উপরও সনাতন গোস্বামীর যথেষ্ট প্রভাব ছিল। গোপাল ভট্টের হরিভক্তি-বিলাস-এর মত রূপের এই গ্রন্থখানির পশ্চাতেও রহিয়াছে সনাতনের অধ্যাত্ম-প্রেরণা, ক্ষুরধার পাণ্ডিত্য ও পরমতত্ত্বের ব্যাখ্যা বিশ্লেষণ। ভক্তিসাধনার নিগূঢ় প্রণালী ও ভাবরসের মাধুর্য্য প্রভৃতি যাহা কিছুই ইহাতে প্রকটিত হইয়াছে, অনেকাংশে তাহা সনাতনেরই প্রতিভা ও সাধনামুভূতির স্বাক্ষর বহন করে।

সমকালীন ব্রজমণ্ডলে গোড়ীয় সাধক ও শাস্ত্রবিদদের মধ্যে সনাতন ছিলেন বয়ঃক্যোষ্ঠ। তাছাড়া কৃচ্ছ্রব্রত, সাধনা, পাণ্ডিত্য ও প্রজ্ঞার দিক দিয়াও তাঁহার সমকক্ষ কেহ ছিলেন না। তাই দেখা যায়, এই মহাপুরুষের সুদীর্ঘ জীবনকালে সারা ব্রজমণ্ডল তাঁহার ব্যক্তিত্ব, প্রতিভা ও সিদ্ধির কাছে মস্তক অবনত করিয়া রহিয়াছে। ভক্তিশাস্ত্র সম্বন্ধে যিনিই যে গ্রন্থ এ সময়ে লিখিতেন, যে সিদ্ধান্ত ও মতবাদ স্থাপন করিতেন, সনাতনের সম্মতি ও সমর্থন ছাড়া তাহা ভক্ত সমাজে গৃহীত হইতে পারিত না।

শ্রীচৈতন্য নীলাচলে অপ্রকট হন ১৫৩৩ খৃষ্টাব্দে। এই হুঃসংবাদ শোনার পর হইতেই সনাতনের বহিরঙ্গ জীবনে ছেদ পড়িতে দেখা যায়। কর্তৃকালীন হইতে নিজেকে প্রায় গুটাইয়া নিয়া ইষ্ট বিগ্রহের

নিরন্তর ধ্যান ও ভজনে তিনি তন্ময় হইয়া যান। তারপর ধীরে ধীরে মহাসাধক প্রবিষ্ট হন ভক্তি-সাধনার গভীরতম স্তরে।

সনাতনের ত্যাগ, বৈরাগ্য, পাণ্ডিত্য ও প্রেমভক্তি সাধনার ঐশ্বর্যের কথা ইতিমধ্যে শুধু ব্রহ্মমণ্ডলেই নয়, সারা উত্তর ভারতে ব্যাপ্ত হইয়া পড়ে। দূর দূরাস্থ হইতে ভক্ত সাধকেরা দলে দলে আসিয়া তাঁহার দর্শনের জন্ত ভীড় জমায়। কুঞ্জকুটির আলো-করা এই দেবমানবের চরণে লুপ্তিত হইয়া সকলে হয় কৃতকৃতার্থ।

সনাতনের এ সময়কার সাধনৈশ্বর্য্য সম্বন্ধে নানা কাহিনী প্রচলিত আছে। সে-বার বারাণসী হইতে এক বৃদ্ধ ব্রাহ্মণ হস্তদন্ত হইয়া সনাতনের কুটিরে আসিয়া উপস্থিত। বর্দ্ধমান জেলার মানকড়ে তাঁহার বাড়ী, নাম জীবন ঠাকুর। সৎ ও ধর্মনিষ্ঠ বলিয়া লোকে তাঁহাকে জানে; চির জীবন কাটাইয়া আসিয়াছেন দারিদ্র্যের সহিত নিরন্তর যুঝিয়া। কিন্তু বৃদ্ধ বয়সে আর যেন দমে কুলাইতেছে না। সেদিন আর্ন্তভাবে বিশ্বনাথের চরণে বার বার প্রার্থনা জানাইলেন, “বাবা, দারিদ্র্যের এ জ্বালা আর যে সহ্য হচ্ছে না, এবার কৃপা করে আমায় রক্ষা করো, অর্থ প্রাপ্তির কোন সন্ধান বলে দাও।”

নিশাযোগে প্রত্যাদেশ মিলিল—“ওরে, তুই শিগ্গীর ব্রহ্মমণ্ডলে চলে যা। সেখানে গিয়ে সনাতন গোস্বামীর শরণ নে। মহার্ঘ রত্ন পড়ে রয়েছে তার সন্ধানে। তার করুণা হলে তোর সর্ব দারিদ্র্য-দুঃখ চিরতরে দূর হবে।”

কালবিলম্ব না করিয়া জীবন ঠাকুর ব্রহ্মমণ্ডলে আসিয়া উপস্থিত হন। সনাতন গোস্বামীর পদতলে পড়িয়া সবিস্তারে নিবেদন করেন স্বপ্নাদেশের কথা।

এ কাহিনী শুনিয়া গোস্বামী প্রভু তো মহা বিস্মিত। নিজে তিনি কাজাল বৈষ্ণব, রিক্ত সন্ন্যাসী। ব্রাহ্মণের এই দারিদ্র্য তিনি কি করিয়া বুচাইবেন? আজকাল ভজন-পূজন সারিবার পর যেটুকু সময় অবশিষ্ট থাকে, তাহা অতিবাহিত হয় ইষ্টদেবের ধ্যান জপে।

বাহিরের কাহারো সঙ্গেই বড় একটা সম্পর্ক রাখেন না। এ ব্রাহ্মণের সাহায্যের জন্য কাহাকে ধরবেন, কাহার কাছে উপস্থিত হইবেন, ভাবিয়া পান না।

সহসা স্মৃতিপটে ভাসিয়া উঠে পুরাতন একটি ঘটনার কথা। তাই তো। দারিদ্র্যক্লিষ্ট এই মানুষটির সাহায্য তো তিনি করিতে পারেন। সে অনেক দিন আগের কথা। যমুনার তট ধরিয়া সনাতন আপন মনে ভজন করিতে করিতে যাইতেছেন, হঠাৎ পায়ে ঠেকিল এক দুর্লভ রত্ন। মৃত্তিকা হইতে তখনি তাড়াতাড়ি উহা তুলিয়া নিলেন। পরক্ষণেই মনে খেলিয়া গেল চিন্তার ঝলক। সর্বভ্যাগী কৃচ্ছ্রব্রতী সন্ন্যাসী তিনি, এ রত্ন দিয়া তাঁহার কোন্ কাজ? বরং যত শীঘ্র এটিকে যমুনায় বিসর্জন দেওয়া যায় ততই মঙ্গল। আবার ভাবিলেন, শ্রীভগবানের কি ইচ্ছা তা কে জানে? হয়তো এই রত্ন দিয়া কোন দুঃখী বা বিপন্ন মানুষের প্রাণ বাঁচিতে পারে। জলে ফেলিয়া না দিয়া তটের বস্তু তটে রাখিয়া দেওয়াই সমীচীন। সামনেই একটি চিহ্নিত স্থানে রত্নটি প্রোথিত করিয়া সনাতন আপন কুটিরে ফিরিয়া আসিলেন।

এতকাল সেই রত্নের কথা তাঁহার স্মরণে ছিল না। এবার মহা উৎফুল্ল হইয়া ভাবিলেন, ভালই হইল, এই অভাবগ্রস্ত ব্রাহ্মণই তবে উহা গ্রহণ করুক।

যেস্থানে উহা প্রোথিত আছে তাহার সন্ধান বলিয়া দিলেন, প্রসন্ন মধুর কণ্ঠে কহিলেন, “বাবা, ঐ রত্ন তুমি এখনি তুলে নিয়ে যাও, দারিদ্র্যক্লেশ তোমার দূর হোক।” কথা কয়টি বলার পরই গোষামী আবার মগ্ন হইলেন ইষ্টধ্যানে।

জীবন ঠাকুর সোৎসাহে তখনি নদী তীরে ছুটিয়া আসেন। নির্দেশিত গোপন স্থান হইতে উদ্ধার করেন সেই দুর্লভ সম্পদ।

হস্তস্থিত রত্নখণ্ড সূর্য্যকরে ঝলসিয়া উঠে। দরিদ্র ব্রাহ্মণ বিস্ময়ে হন হতবাক্। একি অদ্ভুত দৈবী লীলা প্রকটিত তাঁহার জীবনে?



সাত রাজার ধন মণিক আজ যে তাঁহার মত চির কালালের মুঠোর মধ্যে। এই মহার্ঘ বস্তু বিক্রয় করা মাত্র মিলিবে অগণিত অর্থ, ঐশ্বৰ্য্যের তাঁহার সীমা থাকিবে না।

সনাতনের কৃপাতেই জীবন ঠাকুর আজ এই বিপুল সম্পদের অধিকারী। তাই তাঁহার কথা মনে হইতেই কৃতজ্ঞতায় নয়ন ছুটি অশ্রুসজ্জল হইয়া আসে।

হঠাৎ জীবন ঠাকুরের চেতনার দ্বারে এক প্রচণ্ড আঘাত লাগে। সমগ্র সত্তায় জাগে আলোড়ন। সবিস্ময়ে তাবিতে বসেন, ধন-সম্পদের লোভে পুণ্যধাম বারাণসী হইতে বৃন্দাবন অবধি তিনি পদব্রজে ছুটিয়া আসিয়াছেন, আর সনাতনের কৃপার ফলে করায়ত্ত হইয়াছে রাজভোগ্য রত্ন। অথচ সেই সনাতন গোস্বামীর বিন্দুমাত্র হুঁস নাই এই মহার্ঘ বস্তুটির দিকে। এতকাল এটির কথা বিন্দুতই ছিলেন, যদিই বা আর্তের কাতর ক্রন্দনে সে কথা মনে পড়িয়াছে, তাহার সন্ধানটি বলিয়া দিয়াই আবার ডুবিয়া গেলেন ধ্যান ভঞ্জে। কোন্ অমৃত ভুঞ্জনের ফলে গোস্বামী এমন বিভোর হইয়া আছেন? কোন্ পরম ধনের অধিকারী তিনি যাহা এমন রাজবাহিত রত্নকে তুচ্ছ জ্ঞান করায়? অতুল বিস্তুবৈভব, রাজসম্মান ত্যাগ করিয়া আসিয়া সনাতন ভজনানন্দে আত্মবিস্মৃত হইয়া আছেন, রূপান্তরিত হইয়াছেন দেবমানবরূপে। আর জীবন ঠাকুর শিবকৃপায় সেই দেবমানবেরই সান্নিধ্য ও কৃপাপ্রসাদ পাইয়া তুচ্ছ রত্নের মোহে হইয়াছেন আচ্ছন্ন, ঘৃণ্য বিষয়কীটের জীবন আঁকড়াইয়া ধরিতে চলিয়াছেন আরো দৃঢ়হস্তে।

পরম ধন লাভের তীব্র আকৃতি জাগিয়া উঠে ব্রাহ্মণের অন্তরে। এক অভূতপূর্ব দিব্য চেতনায় হন উদ্ভূক্ত। মুহূর্তমধ্যে সেই মহার্ঘ রত্ন লোষ্ট্রবৎ নিক্ষেপ করেন যমুনায়। তারপর ত্রস্ত পদে সনাতনের কুঞ্জে কিরিয়া যান। দণ্ডবৎ করিয়া গলদাশ্রলোচনে নিবেদন করেন, 'প্রভু, আমি অতি জীবাধম। নিজের তুচ্ছ ঘর সংসারের মায়ায়

আবদ্ধ হয়ে আছি। দারিদ্র্যে নিষ্পিষ্ট হয়ে সদাই উদগ্র হয়ে আছি অর্থলাভের জন্ত। আজ আপনার সান্নিধ্যে এসে আমার জ্ঞানচক্ৰ উন্মীলিত হয়েছে। যে ধনে ধনী হয়ে মণিকেও আপনি মণি বলে গণ্য করছেন না, কৃপা করে তারই কিছুটা আমায় দিন। অর্থের বদলে দিন পরমার্থ। আজ থেকে আপনার চরণেই নিজেকে উৎসর্গ করলাম।”

সনাতনের নিকট দীক্ষা গ্রহণের পর শুরু হয় জীবন ঠাকুরের অধ্যাত্মজীবনের অভিযাত্রা। নূতন মাহুবে তিনি রূপান্তরিত হন। উত্তরকালে তাঁহার বংশ খ্যাত হইয়া উঠে কাঠমাগুরার গোস্বামী পরিবার নামে।

জীবনের শেষ পর্যায়ে সনাতন নন্দীশ্বরের মানসগঙ্গা নামক পুণ্য সরোবরের তীরে আসিয়া সজোপনে অবস্থান করিতে থাকেন। উত্তরকালে এ স্থানটি বৈঠান বলিয়া খ্যাত হয়। নিকটেই চক্রেশ্বর মহাদেবের মন্দির। এই স্থানে এক বৃক্ষতলে বসিয়া মহাসাধক ত্রুতী হন তাঁহার চরম অধ্যাত্ম-সাধনায়। স্নানাহারের দিকে কোন হুঁস নাই, একেবারে অজগর বৃত্তি। অন্তরে সদা চলিয়াছে কৃষ্ণভজন আর কৃষ্ণলীলার অনুধ্যান।

সনাতন এ সময়ে অতিবৃদ্ধ, বয়স নব্বই বৎসরের কাছাকাছি। কথিত আছে এই বয়সে প্রাণপ্রিয় ভক্তের এই কৃচ্ছ্র সাধন দেখিয়া ইষ্টদেব নিজেই ব্যগ্রভাবে বৃক্ষতলে আসিয়া উপস্থিত হন। গোপ বালকের ছদ্মবেশে তার গ্রহণ করেন তাঁহার দৈনন্দিন আহার্যের। ‘ভক্তিবতাকর’ এই রসমধুর লীলার উল্লেখ করিয়া লিখিয়াছেন—

কৃষ্ণ গোপবালকের ছলে তৃষ্ণ লৈয়া।

দাড়াইলা গোস্বামী সম্মুখে, হর্ষ হৈয়া।

গোরক্ষক বেশ, মাথে উক্ষীষ শোভয়।

ছন্দভাঙ হাতে করি, গোস্বামীরে কয়।

আছহ নির্জনে, তোমা কেহ নাহি জানে ।

দেখিলাম তোমারে আসিয়া গোচারণে ।

এই হৃৎ পান কর, আমার কথায় ।

লইয়া যাইব তাত্ত, রাখিও এথায় ।

কুটিরে রহিলে, মো সভার সুখ হবে ।

ঐছে রহ, নহিলে ব্রজবাসী হুঃখ পাবে ।

( ৫ম তরঙ্গ, পৃ: ২৫০-২৫১ )

ক্রমে ভক্ত ভগবানের এই প্রেমলীলার কথা লোকমুখে প্রচারিত হইয়া পড়ে । সনাতনের ভক্ত ও গুণগ্রাহীরা ব্যাকুল হইয়া বৈঠানে ছুটিয়া আসেন । ইহাদের অনুরোধ উপরোধে সনাতন কৃচ্ছ্রসাধন হ্রাস করিতে বাধ্য হন । সবাই মিলিয়া ঐ বৃক্ষতলে তাঁহার জন্ম এক কুটির বাঁধিয়া দেন । এ কুটির ত্যাগ করিয়া সনাতন গোস্বামী বৃন্দাবনে আর ফিরিয়া যান নাই, শেষের দিন কয়টি এখানেই অতিবাহিত করেন । রূপ, রঘুনাথ প্রভৃতি বৃন্দাবনের গোস্বামীরা, সারা ভারতের দিগ্বিজয়ী পণ্ডিত ও সার্থকনামা সাধুরা, প্রায়ই আসিয়া উপস্থিত হইতেন বৈঠানের এই নিভৃত পর্ণ কুটিরে । আগুকাম সাধক সনাতনকে দর্শন করিয়া তাঁহারা ধন্য হইতেন, তাঁহার উপদেশ গ্রহণ করিয়া হইতেন উপকৃত ।

গিরি গোবর্দ্ধনের পরিক্রমা ছিল সনাতনের জীবনের এক প্রধান ব্রত । এই পুণ্যগিরি বৈঠান হইতে বেশী দূরে নয় । প্রথম প্রথম জরাজীর্ণ অশক্ত দেহ নিয়াও সনাতন পরিক্রমা সম্পন্ন করিতেন । পরের দিকে আর দৈহিক সাধ্যে তেমন কুলাইয়া উঠিত না । তখন তাঁহার সারা মনপ্রাণ পড়িয়া থাকিত ইষ্টদেব ত্রীকৃষ্ণের স্মৃতিপূত ঐ গিরির প্রদক্ষিণ পথের দিকে । অনুশোচনা ও বেদনায় পরম ভাগবতের অন্তর হইয়া উঠিত ভারাক্রান্ত ।

ভক্ত হৃদয়ের আশ্রিত আবার সেদিন টানিয়া আনে ইষ্টদেবকে । নরনাভিরাম মূর্তিতে গিরিধারীজী আবির্ভূত হন সনাতনের সমক্ষে ।

প্রসন্ন মধুর হাস্তে কহেন, “সনাতন, তোমার অন্তরে খেদ জেগেছে, আমার গোবর্দ্ধন গিরির পরিক্রমা আর তুমি করতে পারছো না। সেই জন্তেই তো আমি ছুটে এলাম। এই জাখো, আমার হাতে রয়েছে গোবর্দ্ধনের শিলাখণ্ড। আর এতে অঙ্কিত রয়েছে আমার চরণচিহ্ন। এই চরণ-পাহাড়ী ভক্তিভরে তোমার কুটিরে স্থাপন করবে, ভজন শেষে রোজ করবে এটিকে প্রদক্ষিণ। তাতেই হবে তোমার গোবর্দ্ধন পরিক্রমণের ব্রত উদ্ঘাপন। এতে এই জীর্ণ-দেহে তোমার শ্রম লাঘব যেমন হবে, তেমনি আমারও বাড়বে আনন্দ।”১

এখন হইতে এই চরণ-পাহাড়ীকে কেন্দ্র করিয়াই সনাতনের ভজন ও তপস্তার ধারা বহিয়া চলে। অতঃপর ধীরে ধীরে সমাগত হয় ১৫৫৪ খৃষ্টাব্দের আষাঢ়ী পূর্ণিমার তিথি। সনাতন গোস্থানীর জীবনদ্বারে সেদিন ধ্বনিত হয় তাঁহার প্রাণাধিক নওলকিশোরের পরম আহ্বান। চরণ-পাহাড়ীর পুণ্যময় বেদীতে দণ্ডায়মান হইয়া জ্যোতির্ময় মূর্তিতে ইষ্টদেব তাঁহার পরম ভক্তকে দর্শন দেন। মায়িক জগতের যবনিকা ভেদ করিয়া সনাতন গোস্থানী প্রবিষ্ট হন শাস্ত্রত লীলাধামে।

এই মহাপ্রয়াণের ফলে উত্তর ভারতের বৈষ্ণবীয় সাধনার, সারস্বত সাধনার, এক তুঙ্গ শিখর যেন সেদিন ধ্বসিয়া পড়ে। সারা ব্রহ্মমণ্ডলে নামিয়া আসে করুণ শোকের ছায়া। আর গোড়ীয়

১ অলৌকিক ভাবে লব্ধ সনাতনের এই চরণ-পাহাড়ী একটি বটপত্রাকৃতি শিলাখণ্ড। গোড়ীয় ভক্তেরা মনে করেন, ইহা পুণ্যগিরি গোবর্দ্ধনের প্রতীক এবং ইহাতে শ্রীকৃষ্ণের চরণচিহ্ন অঙ্কিত রহিয়াছে। সনাতন মরলোক ত্যাগ করার পর শ্রীজীব গোস্থানী ঐ চরণ-পাহাড়ী নিজের ইষ্টবিগ্রহ রাধাধামোদরজীর মন্দিরে স্থাপন করেন ও পূজা অর্চনার ব্যবস্থা করেন। আজ অবধি এই পবিত্র শিলা সেখানেই রহিয়াছে।

বৈষ্ণবসমাজ তাহার দূর বিস্তারী আলোক স্তম্ভটি হারাইয়া বিহ্বল হইয়া পড়ে।

সহস্র সহস্র শোকাক্ত ব্রজবাসীর সম্মুখে, প্রভু মদনমোহনজীর মন্দিরপ্রাঙ্গণে সনাতন গোস্বামীর মরদেহ সমাধিস্থ করা হয়। অগণিত ভক্তের শ্রদ্ধার্ঘ্য আজিও নিবেদিত হয় সেই পবিত্র ভূমিতে।

# সমর্থ বামদাস

ছোট ছেলে নারায়ণকে নিয়া রাণুবান্ধি বড় বিপদে পড়িয়াছেন। গ্রামের স্কুলে লেখাপড়া সমাপ্ত প্রায়; সে তাহার দাদা গঙ্গাধরের সঙ্গে থাকিয়া কাজকর্ম করিবে, ঘর-সংসার করিবে, ইহাই রাণুবান্ধি চান। কিন্তু নারায়ণ এ কথায় কান পাতে না। সাধু-সন্তের খোজ পাইলেই তাঁহাদের পিছনে করে ঘোরাঘুরি, মাঝে মাঝে মঠে-মন্দিরে গিয়াও চোখ বুজিয়া বসিয়া থাকে। আর গঙ্গাধরের কাছে বলিয়া বেড়ায়, ঘরে তাহার মন মোটেই টিকে না, সম্মাস নিয়া হইবে সে দেশত্যাগী।

জননী সেদিন নারায়ণকে নিকটে ডাকিলেন। যা হোক একটা বুঝাপড়া আজ তাহার সঙ্গে করিতেই হইবে। আর দেবী করা সঙ্গত নয়। কোমল স্বরে কহিলেন, “বাবা নারায়ণ, এখন তুমি বড় হয়েছিস, লেখাপড়াও কিছুটা শিখেছিস। তোর দাদা গঙ্গাধর তো সংসারের জন্ত খেটে খেটে সারা হল, তোর কি উচিত নয় তাকে সাহায্য করা, তার সংসারের ভার লাঘব করা? আরও একটা জরুরী কথা। আমার শরীর খারাপ হয়ে যাচ্ছে দিন দিন। বড় বউ পার্বতীর উপর অশ্রায় রকম সংসারের চাপ পড়েছে। তাকে সাহায্য করবার জন্ত বাড়িতে একটি বউ আনা দরকার। তাই আমি ঠিক করেছি, আসছে মাসেই তোর বিয়ে দেবো। ভাল ঘরের সুলক্ষণা একটি পাত্রীও আমি মনে মনে ঠিক করে ফেলেছি।”

“মা, তোমার ছোটো ইচ্ছের কোনটিই যে আমি পূরণ করতে পারছিনে। আমি বলি কি, আমার আশা বরং তুমি ছেড়েই দাও।” অবলীলায় উত্তর দেয় নারায়ণ।

“এসব কি তুই বাজে বক্‌হিস ? এ শুধু তোর দায়িত্ব এড়ানোর একটা ছুতো।”

“না, মা, সত্যি কথাই বলছি। গৃহস্থী আমায় দিয়ে কখনো হবে না। জানিনে কেন এক অজানা রাজ্যের হাতছানি কেবলই আমায় ডাকছে। আর ছাখো মা, প্রায়ই আমি স্বপ্নে প্রভু রামজীকে দেখি, ভক্তবীর মারুতীকেও দেখি। শুধু তাই নয়, কি এক অদ্ভুত শূন্যতায় আমার হৃদয় ছটকট করে। আর ভেতর থেকে কে যেন বার বার অশ্রুট স্বরে বলে ওঠে—ওরে সাবধান, সাবধান—সংসারের জালে যেন জড়িয়ে পড়িসনে—সদগুরুর কাছে ছুটে যা, মন্ত্র নে তাঁর কাছ থেকে, আর এই মন্ত্রের ভেলায় চড়ে পৌঁছে যা প্রভু রামচন্দ্রজীর চরণে।”

পুত্রকে হারানোর আশঙ্কায় জননীর হৃদয় কাঁপিয়া উঠে। নিজেকে সামলাইয়া নিয়া রাগুবাঈ বলেন, “বেশ তো বাবা, মন্ত্র নিতে হয়, রামজীর ধ্যান-জপ করতে হয়—তা বাড়ীতে বসেই তো ওসব করা যায়। এজন্ম সংসার ছাড়া কেন, বলতো?”

“না, মা। সন্ন্যাসীর মুক্ত জীবনই আমি নেবো। গ্রামে যখন সাধু-সন্ন্যাসীর জমায়েত আসে, আমি তাঁদের দেখে দেখে মুগ্ধ হই। কোন পিছুটান নেই, সঞ্চয় নেই। নেই কোন বন্ধন বা জটিলতা। একমনে ইষ্টধ্যান করার পরম সুযোগ রয়েছে তাঁদের। এই জীবনই আমার বড় ভাল লাগে।”

“বাবা নারায়ণ, শুধু নিজের ভালো লাগার পিছনেই চলতে নেই, বাপ মায়ের ভালো লাগার দিকেও যে চাইতে হয়। ভেবে ছাখ্, প্রভু রামজী তাঁর বাপ-মায়ের কি বাধ্যই না ছিলেন। তাঁদের তৃপ্তির জন্য কি-ই না করতে পারতেন তিনি। তুইও তোর অভাগিনী মায়ের দিকে একটু ফিরে তাকাস্, বাবা। সাত বছর আগে ভোদের বাবা স্বর্গে গেছেন, ছটি নাবালক পুত্র আমার হাতে সঁপে দিয়ে। তোর তখন মাত্র পাঁচ বৎসর বয়স। কত দুঃখে কষ্টে

তোদের ছ'ভাইকে আমি মানুষ করেছে! তোর বাবার কথা মনে ক'রে, এই ছঃখিনী মায়ের মুখ চেয়ে, তুই ঘর-সংসারে থাক, আমাদের ছঃখের ভার লাঘব কর, বাবা। আর জেনে রাখিস, তুই যদি আমাদের ছঃখ না বুঝিস, কথার অবাধা হোস, তবে আমিও আমার পথ দেখাবো। হবো আত্মঘাতিনী।”—সাক্ষনয়নে কাতর কণ্ঠে একথা বলিতে বলিতে জননী নারায়ণের হাত ছুটি ধরিয়া ফেলিলেন।

মায়ের অশ্রু, পিতার মৃত্যুর করুণ স্মৃতি, নারায়ণের সঙ্কল্প টলাইয়া দেয়। মন তাহার কোমল হইয়া আসে। ছলছল নয়নে উত্তর দেয়, “মা, তুমি এমন করে কাঁদাকাটি ক'রো না। বেশ তো, তোমার ইচ্ছা অনুসারেই আমি কাজ করবো।”

“তা হলে, তোর বিয়ের সম্বন্ধ আমি পাকাপাকি করে ফেলি, কি বলিস? আসন্ গোঁও-এ এক সং গৃহস্থ রয়েছে, নাম তাঁর ভন্জিপন্থ চোরালপুরকর। তাঁর একটি মেয়ে আছে, যেমনি সুন্দরী সুলক্ষণা, তেমনি স্বভাবটিও সুন্দর। প্রস্তাব নিয়ে তারা ঘোরাফেরা করছে। আমরা সম্মতি দিলেই হয়।” জননী রাগুবাদী এবার স্বস্তির নিঃশ্বাস ত্যাগ করেন। পরদিনই কন্যাপক্ষের সহিত কথা পাকা করার জন্ত লোক পাঠান। দিনক্ষণও ধার্য করা হয়।

বিবাহের রাত। বরষাত্রীরা সাড়ম্বরে কনের বাড়ীতে উপস্থিত হইয়াছেন। বরকর্তা গঙ্গাধর মহা উৎসাহে এদিক-ওদিক ছুটাছুটি করিতেছেন। আত্মীয়-কুটুম্বদের হাসি গান আনন্দ-কলরবে কান পাতা দায়। বাতুলতাও, মশালের আলো আর আতসবাজীতে আকাশ বাতাস সরগরম।

অল্পকাল মধ্যে অনুষ্ঠান শুরু হইয়া যায়। সুসজ্জিতা কনেকে নিয়া আসা হয় বিবাহ-সভায়। বরকনের মাঝখানে আড়াল রচনা



করিয়া আছে শুধু একটি পর্দা, এখনি উহা উত্তোলন করা হইবে, চার চোখের হইবে শুভ মিলন।

এমন সময় জ্বলন্ত মশালধারীদের সতর্ক করিতে গিয়া কে যেন গম্ভীর আওয়াজে বলিয়া উঠে—সাবধান ! বিদ্যুৎস্পৃষ্টের মত হঠাৎ শিহরিয়া উঠে বরবেশী নারায়ণ । চিস্তার ঝলক্ খেলিয়া যায় তাহার অন্তরে । সাবধান ? সে কি ! এ কথাটি যে তাহার পূর্বেকার শোনা ; অন্তর্লোক হইতে উদগত এই বাণী আরো কয়েকবার যে তাহার নিকট পৌঁছিয়াছে । আজো এই বাণী তাহারই উদ্দেশে উচ্চারিত । ভ্রান্তিবেশে সংসারের জালে আজ সে জড়াইতে যাইতেছে । আর তো কোন দিনই এই জাল ছিন্ন করিয়া সে বাহির হইতে পারিবে না । নাঃ, এই মুহূর্ত্তেই ইহার একটা প্রতিবিধান সে করিবে । বিবাহের শৃঙ্খল এড়াইয়া এখনই এই মুহূর্ত্তে এখান হইতে করিবে পলায়ন ।

সিদ্ধান্ত অনুযায়ী কাজ করিতে দেবী হয় না । তৎক্ষণাৎ বরের টোপের ও উত্তরীয় নারায়ণ ভূতলে নিক্ষেপ করে, ‘জয় রামজী’ বলিয়া উচ্চকণ্ঠে ধ্বনি দেয়, বিবাহের অঙ্গন হইতে ছুটিয়া বাহির হইয়া আসে । তারপর বাড়ীর পিছনের রাস্তা দিয়া ধাবিত হয় নিকটস্থ বনের দিকে ।

বিবাহ-সভায় উপস্থিত লোকজন এ কাণ্ড দেখিয়া হতবাক্ হইয়া গিয়াছে । ক্ষণপরেই তাহাদের চমক ভাঙিল—‘ধনু-ধনু’ শব্দে সবাই করিল পলাতক বরের পশ্চাদ্ধাবন ।

চারিদিকে অন্ধকার, রাস্তাঘাট কিছুই দেখা যায় না, ইতিমধ্যে সবার অলক্ষ্যে নারায়ণ কোথায় উধাও হইয়া গিয়াছে । অবশেষে উৎসাহী অনুসরণকারীরা নিবৃত্ত হয়, হতাশ হইয়া ঘরে ফিরিয়া যায় । আলো হাসি গান ভরা বিবাহ-বাড়ীতে নামিয়া আসে নৈরাশ্রের অন্ধকার । ভগ্নদূতের মত গঙ্গাধর গৃহে ফিরিয়া আসেন, জননীর কাছে বর্ণনা করেন এই দুর্দ্দৈবের কথা । মর্মান্বিত কান্নায় জননী ভাঙিয়া পড়েন । পুত্র নারায়ণ প্রায়ই যে তাঁহার কাছে প্রকাশ

করিত গৃহত্যাগের সঙ্কল্প। জননী বুঝিলেন, বিবাহ-বাসর হইতে পলায়ন করিয়া সেই সঙ্কল্পই আজ সে সিদ্ধ করিতে চলিয়াছে। সংসারে সে আর কোনদিন ফিরিয়া আসিবে না।

এদিকে বিবাহ-বাসর হইতে লাফাইয়া পড়িয়া নারায়ণ উর্দ্ধ্বাশে চলিয়াছে। গ্রামের চেনা রাস্তা তাহার পক্ষে মোটেই নিরাপদ নয়, অহুসরণকারীরা যে কোন সময়ে ধরিয়া ফেলিতে পারে, তাই অন্ধকার বনপথ দিয়াই সে অগ্রসর হইতেছে। দুই পা ক্ষত-বিক্ষত, গাছের গুঁড়ির আঘাতে মাথা ফাটিয়া গিয়াছে, কিন্তু তাহাতে কোন ক্রম্বেপ নাই। উদ্গাদের মত কেবলই সে ছুটিয়া চলিয়াছে।

দীর্ঘপথ অতিক্রম করার পর মনে হইল, এবার সে অনেকটা নিরাপদ। শরীর তাহার বড় শ্রান্ত, ক্ষত ও আঘাতের বেদনায় কাতর। এবার কিছুটা বিশ্রাম না নিলে আর চলে না। কিন্তু এই অন্ধকার রাত্রে, দুর্গম বনের মধ্যে আশ্রয় কোথায় ?

সম্মুখে দণ্ডায়মান এক বিশাল বটবৃক্ষ। নারায়ণ স্থির করিল, এই বৃক্ষশাখে উঠিয়া রাত কাটাইয়া দিবে। শয়নের অসুবিধা হইলেও এ ব্যবস্থায় অন্তত হিংস্রজন্তুর আক্রমণের ভয় নাই। বৃক্ষের প্রশস্ত শাখায় অবসর দেহটি এলানোর সঙ্গে সঙ্গে নিজায় সে অভিভূত হইয়া পড়ে।

পরদিন আবার শুরু হয় পথ চলা। বনের প্রান্তদেশে গিয়া এক ব্রাহ্মণের কুটিরে নারায়ণ আশ্রয় পায়। সেখানে স্নানাহার সম্পন্ন করার পর শরীর অনেকটা সুস্থ হইয়া উঠে।

ভাগ্যক্রমে একদল তীর্থযাত্রীর সঙ্গে তাহার সাক্ষাৎ। এই দলটি যাইতেছে পঞ্চবটি দর্শনে। প্রভু জীরামচন্দ্রের পুণ্যময় লীলা-এই স্থান। নারায়ণের মনপ্রাণ আনন্দে নৃত্য করিয়া উঠে ;

তীর্থচারীদের দলে তখনই সে ভিড়িয়া পড়ে। তারপর এগারো দিনের পদযাত্রা শেষে উপনীত হয় পঞ্চবটিতে।

এই পরম পবিত্রতীর্থে অবস্থানের সময়ই নারায়ণের জীবনে হয় নব অরুণোদয়, গুরুকৃপা ও অনন্ত সাধনার বলে সে পরিণত হয় প্রভু-রামচন্দ্রের কৃপাধন্য এক মহান সাধকে। তাঁহার নব নামকরণ হয়—রামদাস। শাস্ত্রবিদ, যোগবিভূতিসম্পন্ন মহাপুরুষ, সমর্থ রামদাস শুধু এক সিদ্ধ রামাই সাধুই নন, মহারাষ্ট্রের উজ্জীবনে ও দক্ষিণ ভারতে রামভক্তির প্রচারণে তাঁহার অবদান অসামান্য। ছত্রপতি শিবাজীর নব মহারাষ্ট্র নির্মাণের, ধর্মরাজ্য স্থাপনের, প্রেরণা ও পরিকল্পনা উদ্ভূত হইয়াছিল এই মহাত্মার সিদ্ধজীবন হইতে। বৈরাগীর উত্তরীয়কে রাষ্ট্রের পতাকারূপে চিহ্নিত করিয়া দিয়া রামদাস ভারতের জনজীবনের পুরোভাগে স্থাপন করিয়াছিলেন ত্যাগ-বৈরাগ্য ও অধ্যাত্মশক্তির কালজয়ী মাহাত্ম্য।

হায়দ্রাবাদ নগরীর পনের মাইল দূরে জাম্ব্ নামক একটি ক্ষুদ্র গ্রাম। মহারাষ্ট্রের অন্ত্যন্ত অঞ্চলের মত এ স্থানটি রুক্ষ ও পিঙ্গল নয়, চারদিক রহিয়াছে শস্তশ্যামল ক্ষেত্র দিয়া ঘেরা। এই গ্রামে বাস করিতেন সূর্য্যজী পন্থ নামে এক সদাচারী ব্রাহ্মণ। তাঁহার পত্নী রাণুবাই-ও পরিচিতা ছিলেন ধর্মপ্রাণা মহিলারূপে।

পন্থজীর বয়স যৌবনের কোঠা পার হইতে চলিয়াছে, কিন্তু এ যাবৎ কোন সন্তানাদি হয় নাই। স্বামী-স্ত্রী উভয়েরই মনে বড় অশান্তি। তাই তগবৎ অন্নগ্রহ লাভের জন্য নানা ধর্ম্মানুষ্ঠান ও ব্রত উদ্‌যাপনে তাঁহারা ব্রতী হন, দেবজিজ্ঞাসার সেবায় করেন আত্মনিয়োগ। অতঃপর কয়েক বৎসরের ব্যবধানে ইহাদের দুইটি পুত্র ভূমিষ্ঠ হয়। প্রথমটির নাম গজাধর, দ্বিতীয়টি নারায়ণ। এই নারায়ণই হন ভারতবিজ্ঞত মহাসাধক—সমর্থ রামদাস।

দ্বিতীয় পুত্রের জন্মের অব্যবহিত পূর্বে রাণুবান্ধব অস্ত্রজীবনে নানা ভাবান্তর দেখা যায়। রামদাসের অন্ততম জীবনীকার গিরিধর লিখিয়াছেন, এই সময়ে প্রায়ই রাণুবান্ধবের দেহে দেখা দিত দিব্য ভাবের আবেশ। লোকের সঙ্গ এড়াইয়া তিনি নির্জনে আপন মনে ঘুরিয়া বেড়াইতেন।

একদিন রাণুবান্ধব স্বামীকে কহিলেন, “ভাখো, আজকাল প্রায়ই আমি বড় অদ্ভুত রকমের স্বপ্ন দেখে থাকি। আর সেই সব স্বপ্নদৃশ্তে আবির্ভূত হন প্রভু রামচন্দ্র, মা-জানকী, লক্ষণ প্রভৃতি। কখনো বা সামনে দাঁড়িয়ে অপূর্ব কণ্ঠে স্তবগান করছেন রামদাস মারুতী। একই ধরণের এই দৃশ্য কেন বার বার দেখছি, বলতো?”

“ভালোই তো। এতে বোঝা যাচ্ছে, প্রভু শ্রীরামচন্দ্রের কৃপা হয়েছে আমাদের ওপর। তোমার কোলে হয়তো আসছে রামজীরই কোন চিহ্নিত সেবক। যাক্, এসব কথা যেন কারুর কাছে প্রকাশ করো না, আর খুব সাবধানে থেকো।”

অল্পকাল মধ্যেই ভূমিষ্ঠ হয় সূর্য্যজী পন্থের বহু প্রত্যাশিত এই দ্বিতীয় তনয়—রামদাস। ১৬০৮ খৃষ্টাব্দের এই শুভ জন্মদিনটি, ১৫৩০ শকাব্দের চৈত্র মাসের শুক্লা নবমীর এই পবিত্র তিথিটি, মহারাষ্ট্রের ধর্ম-সংস্কৃতির ইতিহাসে সংযোজন করিয়াছে এক উজ্জ্বল অধ্যায়।

পিতা সূর্য্যজী পন্থ ছিলেন আচারনিষ্ঠ রক্ষণশীল ব্রাহ্মণ। রামদাসের যখন পাঁচ বৎসর বয়স, তখন তিনি তাঁহার উপনয়ন সংস্কার করান। তারপর পুত্রকে প্রেরণ করেন গুরুগৃহে। বিদ্যায়কর মেধা ও প্রতিভা বালকের। অল্প সময়ের মধ্যেই পাঠশালার বিদ্যা তিনি আয়ত্ত করিয়া ফেলেন।

স্বল্পবিত্ত হইলেও রামদাসের পরিবারে এতদিন সুখ শান্তির অভাব ছিল না। কিন্তু এবার একদিন তাহাদের উপর পতিত হয় দৈবের নিকরূপ আঘাত। মারাত্মক রোগে ভুগিয়া সূর্য্যজী পন্থ হঠাৎ

পরলোকে গমন করেন। দ্বিতীয় পুত্র রামদাসের বয়স তখন মাত্র সাত বৎসর।

এই দারুণ বিপদে রাণুবাসী একেবারে ধৈর্যাহারা হন নাই। কিছুদিনের জন্ত শক্ত হাতে সংসারের দায়িত্ব ভার তিনি গ্রহণ করেন এবং বড় ছেলে গঙ্গাধর বয়ঃপ্রাপ্ত হইয়া রোজগার শুরু করিলে তাঁহাকে বিবাহ করান। ইহার কয়েক বৎসর পরে জননী রামদাসকে গৃহস্থীতে প্রবেশ করাইয়া নিশ্চিন্ত হইতে চাহেন। কিন্তু ভবিতব্য ছিল অন্তরূপ। পুত্রের সেদিনকার পলায়ন সংবাদ জননীর হৃদয়ে গিয়া বিদ্ধ হয় শেলের মত, দুঃসহ শোকের ভারে তিনি মুহূর্ত্তমান হইয়া পড়েন।

বিবাহ-সভা হইতে নাটকীয় অন্তর্ধানের পর প্রায় একপক্ষকাল কাটিয়া গিয়াছে। পদব্রজে দীর্ঘপথ অতিক্রম করিয়া রামদাস এবার উপনীত হইয়াছেন গোদাবরী তীরে, নাসিকের নিকটে, পঞ্চবটির মহাতীর্থে।

এখানে পৌছানোর পর দীর্ঘ পথের শ্রম যেন মুহূর্ত্তে দূর হইয়া গেল। স্বর্গীয় আনন্দের শিহরণ তখন রামদাসের সারা দেহে-মনে। পুণ্যতোয়া নদীতে স্নান সমাপন করিয়া তাড়াতাড়ি ছুটিয়া গেলেন রামচন্দ্রজীর মন্দিরে। শ্রীবিগ্রহের দর্শন পাওয়া মাত্র নিমজ্জিত হইলেন দিব্য আনন্দের সাগরে।

পঞ্চবটির আশেপাশে রামচন্দ্রজীর স্মৃতিপুত বহু স্থান রহিয়াছে। কয়েকমাস রামদাস মনের আনন্দে এই সব লীলাস্থল দেখিয়া বেড়ান। পরিব্রাজক সাধু-সন্ন্যাসীদের জমায়েত এখানে লাগিয়াই আছে। তরুণ রামদাস সোৎসাহে ইহাদের সঙ্গ করেন, সাধ্যমত রত হন সাধুদের সেবায়। কোন কোন মহাত্মার কাছে ভক্তনের উপদেশ তিনি প্রাপ্ত হন, নিষ্ঠাভরে তাহাই অনুসরণ করিয়া চলেন।

যত দিন যায় রামদাসের মনের ব্যাকুলতা বাড়িতে থাকে।

ভাবিতে থাকেন—পরমার্থের জ্ঞান, রামচন্দ্রজীর জ্ঞান ঘর-সংসার ছাড়িয়াছেন, জননীর স্নেহ-মমতার বন্ধন কাটাইয়া আসিয়াছেন, কিন্তু সেই পরমবস্তু মিলিবার উপায় কই ?

বালক বয়স হইতেই সাধু-সন্তদের কাছে শুনিয়া আসিয়াছেন, ইষ্টলাভের জ্ঞান চাই সৎগুরু, চাই অমোঘ দীক্ষামন্ত্র, চাই কঠোরতম সাধনা । কিন্তু তাঁহার জীবনে সর্বাত্মে প্রয়োজন সৎগুরুর আবির্ভাব । তাহা তো এ যাবৎ সম্ভব হইল না । এ সম্বন্ধে কি করিবেন, কাহার কাছে যাইবেন ভাবিয়া কোন কুল-কিনারা পান না ।

কিন্তু নিজের যাহা সাধ্য তাহা তো রামদাস করিতে পারেন । প্রতিদিন অতি প্রত্যুষে উঠিয়া গোদাবরীর পবিত্র সলিলে স্নান করেন, তারপর অনশ্বনিষ্ঠায় গুরু হয় ইষ্ট শ্রীরামচন্দ্রের নামজপ ও কীর্তন । জপে নিবিষ্ট হইয়া কোন কোন দিন একেবারে বেহুঁস হইয়া পড়েন, সেদিন আর মাধুকরীতে যাওয়া হয় না । উপবাসেই দিনরাত কাটিয়া যায় ।

এই ব্যাকুলতা, কৃচ্ছ্র ও নামসাধনের ফল অচিরে ফলিল । সৎগুরুর আবির্ভাব ঘটিল তাঁহার জীবনে ।

পঞ্চবটীর নির্জন অরণ্যের একপ্রান্তে, বৃক্ষমূলে বসিয়া তরুণ সাধক সেদিন সারা রাত নিবিষ্ট মনে জপ করিয়া চলিয়াছেন । ক্রমে রাত্রির অন্ধকার তরল হইয়া আসে । বনানীর শিরে দেখা দেয় উষার অরুণ রাগ, প্রভাত পাখীর কাকলী ছড়াইয়া পড়ে আকাশে বাতাসে । দেব-দেউলের কাঁসর ঘণ্টা আর সাধু-সন্তজনের ভজনের দুরাগত বন্ধার অন্তরলোকে উৎসারিত করে দিব্য আনন্দের ধারা । এমনি সময়ে বৃক্ষমূলে আসিয়া দাঁড়ান এক বৈরাগী মহাপুরুষ । গম্ভীর কণ্ঠের আওয়াজ ধ্বনিত হয়, “বৎস, চোখ মেলে চাও । তোমার আর্তি আর ভজন-নিষ্ঠায় রামজী প্রসন্ন হয়েছেন, সেই আনন্দ সংবাদ দিতেই আজ এখানে আমার আগমন ।”

চোখ মেলিতেই রামদাস দেখেন—সমুদ্রত দেহ, জটাজুট সমন্বিত এক মহাত্মা তাঁহার সম্মুখে দণ্ডায়মান। গলে বিলম্বিত একছড়া তুলসীর মালা। কোমরে একফালি কোঁপীন ছাড়া আর কোন আচ্ছাদন নাই। বয়সে প্রাচীন হইলেও দেহের গৌরবাস্তি এখনো অপরিমিত। আয়ত নয়ন দুইটি দিব্য আনন্দের দ্ব্যতিতে ঝক্‌ঝক্‌ করিতেছে।

দর্শন মাত্রেই রামদাসের সর্বসত্তায় উঠে প্রবল আলোড়ন। অন্তরাঙ্গা হইতে উদ্ভিত হয় আশ্বাস বাণী—‘ওরে ভয় নেই, রামজীর কৃপাপ্রসাদ পেতে আর দেবী নেই, এই যে সম্মুখে এসে দাঁড়িয়েছেন তোমার সদগুরু, ইষ্টদেবের চরণে ইনিই যে তোকে দেবেন পৌঁছে।’

মোহাবিষ্টের মত এগিয়ে যান তরুণ সাধক রামদাস। মহাত্মার চরণে লুটিয়ে পড়েন, সাক্ষাৎকালে আবেদন জানান, “কৃপা ক’রে যদি এসেছেনই, দিন আপনার পরমাশ্রয়, জীবন আমার কৃতার্থ হয়ে উঠুক।”

“হ্যাঁ, বৎস, তোমায় আমি মন্ত্র দেবো, সন্ন্যাস দেবো। আর দেবী ক’রে না। তাড়াতাড়ি গোদাবরীর পবিত্র নীরে তুমি স্নান সমাপন ক’রে এসো।”

দীক্ষা ও সন্ন্যাস সমাপ্ত হইয়া গেল।<sup>১</sup> গুরু তাঁর শিষ্যের নাম দিলেন রামদাস। কহিলেন, “বৎস, এখন থেকে শুধু নামেই রামদাস

১ এই গুরুর নামধাম আজো অজ্ঞাত। রামদাসের চিঠিপত্র, রচনা ও সংলাপ অজস্র প্রকাশিত হইয়াছে। কিন্তু দেখা যায়, সর্বত্রই তিনি গুরুর পরিচয় গোপন রাখিয়াছেন। হয়তো গুরুর নির্দেশেই তাঁহাকে এই গোপনীয়তা অবলম্বন করিতে হইয়াছিল। এ হলে উল্লেখযোগ্য যে, গুরুকরণ, গুরুদত্ত মন্ত্র ও গুরুশক্তিকে রামদাস অপরিহার্য মনে করিতেন।

গবেষকেরা মনে করেন, রামদাসের গুরু ছিলেন একজন বিশিষ্ট ব্রাহ্মইন্দ্র, তিনি ব্রাহ্মজী বা ব্রাহ্মানন্দী সাধক ছিলেন না। সাধ্য সাধন সম্পর্কে তাঁহার নিজস্ব মত ও আদর্শ ছিল। অবতার ব্রাহ্মচন্দ্রের তত্ত্ব এবং অবৈত বোদ্ধা, এই দুইয়ের সমন্বয় বাণী তিনি প্রচার করিতেন।

নও, কর্মেও সতত করবে শ্রীরামচন্দ্রজীর দাসত্ব। নিজের আদর্শরূপে রাখবে মহাবীর হনুমানজীকে, মারুতী মহারাজকে। মহাশক্তিদ্বর ছিলেন মারুতী, আর নিজের সর্বশক্তি তিনি নিয়োজিত করেছিলেন অবতার পুরুষ রামজীর ধর্মসংস্থাপনের মহান কর্মে। কত দুষ্কৃতের বিনাশ করেছিলেন এই রামভক্ত, আর কত সাধুদের করেছিলেন রক্ষণ। বহিরঙ্গ জীবনে মারুতীজীর এই কর্মসাধনা তুমি অনুসরণ করে চলবে। এই ভক্তবীরের অন্তর্লোকের সাধনতত্ত্বও তোমার অনুধাবন করা দরকার।”

“কৃপা করে, এ তত্ত্বটি বিশদ করে বলুন, মহারাজ।”

“মহাযোগী মারুতীর অন্তর্লোকে রামজী দীপ্যমান ছিলেন সচ্চিদানন্দ বিগ্রহরূপে। শ্রীরামচন্দ্রের এই অবতাররূপ আর সচ্চিদানন্দরূপ হুই-ই বিভাসিত ছিল রামভক্ত মহাসমর্থ মারুতীজীর সাধনজীবনে। এ কথাটি সব সময়ে স্মরণ রেখো, বৎস।”

গুরু মহারাজ সেদিন বিদায় গ্রহণ করিবেন। চরণতলে পতিত হইয়া রামদাস ডুকরিয়া কাঁদিয়া উঠিলেন। স্নেহে গুরু কহিলেন, “বৎস, অধীর হ’য়ো না, ধৈর্য ধরো। পরমার্থ লাভ করতে হলে চারটি কৃপা চাই। এ চারটি হলো—গুরু কৃপা, আত্ম কৃপা, শাস্ত্র কৃপা ও ইষ্ট কৃপা। গুরু কৃপার দ্বার তোমার সাধনজীবনের সম্মুখে উন্মুক্ত হয়েছে। এবার তোমার চাই আত্ম কৃপা, অর্থাৎ নিজের অনুষ্ঠিত কঠোর তপস্শ্রা, যার ভেতর দিয়ে সর্ব অহমিকা ও দেহবোধ যাবে লুপ্ত হয়ে।”

একটু থামিয়া আবার কহিলেন, “আর চাই শাস্ত্র কৃপা। শাস্ত্রের নিগূঢ় তত্ত্বসমূহ ভেতর থেকে উদ্ভাসিত হবে তোমার অন্তর সন্তায়। তারপর ইষ্ট কৃপার অবতরণ হতে দেবী হবে না, বৎস। তোমায় প্রাণভরে আশীর্বাদ করছি—অচিরে তুমি সিদ্ধকাম হও। আমার



অদর্শনে খেদ ক'রো না। প্রয়োজনমত আবার এই পুণ্যধামেই তুমি আমার সাক্ষাৎ পাবে।”

গুরু পরদিনই পঞ্চবটি ত্যাগ করেন; সাধক রামদাসও গুরু করেন তাঁহার মরণ-পণ তপস্শ্রা। দৈশ্র ও কৃচ্ছ্রসাধন হয় তাঁহার এই তপস্শ্রার বড় অবলম্বন। ক্ষুধা তৃষ্ণার বালাই নাই, আকাশবৃষ্টি নিয়া দিনাতিপাত করেন, ঈশ্বরের বিধানে যেদিন যেটুকু আহাৰ্য্য উপস্থিত হয় তাহা দিয়াই করেন ক্ষুৎপিপাসার নিবৃত্তি।

মাথা গুঁজিবার একটি ঝুপড়ি বা পৰ্ণকুটিরও তাঁহার নাই। একমাত্র আশ্রয় বৃক্ষতল। গুরুর মত একফালি কোপীন সম্বল করিয়া সেখানেই দিনরাত থাকেন, মাথার উপর দিয়া ঋতুর পর ঋতু গড়াইয়া যায়। শীত-গ্রীষ্ম সম্বন্ধে যেমন রামদাসের হুঁস নাই, তেমনি নাই বর্ষার ঝড় জলের নির্ঘাতনে বিন্দুমাত্র অশুবিধার বোধ। নবীন সন্ন্যাসীর এই ত্যাগ তিতিক্ষা, একনিষ্ঠা ও দৃশ্চর সাধনা দেখিয়া পঞ্চবটির তজনশীল প্রবীণ সাধকেরাও বার বার সাধুবাদ করিতে থাকেন।

অবশেষে রামদাসের সাধনা সফল হইয়া উঠে, ইষ্টদেব প্রভু শ্রীরামচন্দ্রের জ্যোতির্ময় মূর্তি উদ্ভাসিত হইয়া উঠে তাঁহার নয়ন সমক্ষে। দিব্য আনন্দের রসতরঙ্গে সর্বসত্তা তাঁহার প্রাবিত হয়, বাহ্যজ্ঞান হারাইয়া দেহখানি ভূমিতলে লুটাইয়া পড়ে।

সম্বিং ফিরিয়া আসিলে দেখিলেন, গুরু মহারাজ তাঁহার শিয়রে উপবিষ্ট। চোখে মুখে তাঁহার আনন্দের আভা। স্নিগ্ধকণ্ঠে রামদাসকে তিনি কহিলেন, “বৎস, তুমি ভাগ্যবান, ইষ্টদর্শন তোমার হয়েছে, তপস্শ্রার এক প্রধান ধাপ তুমি অভিক্রম করেছো।”

তাড়াতাড়ি ভূমিশয্যা ছাড়িয়া সাধক রামদাস উঠিয়া বসিলেন।

আনন্দাশ্রমধারায় স্নাত হইয়া সাষ্টাঙ্গে প্রণত হইলেন গুরু মহারাজের চরণতলে ।

পরের দিন গুরুজী তত্ত্ব রামদাসকে নিকটে ডাকিয়া কহিলেন, “বৎস, তোমার ইষ্টদর্শনের প্রাকালেই আমি উপস্থিত হয়েছিলাম। তোমার সাফল্য দেখে আমি প্রসন্ন হয়েছি।”

“প্রভু, এসবই আপনার কৃপা। আপনার প্রদত্ত মন্ত্র সাধনই হচ্ছে আমার বড় সম্বল।” নিবেদন করেন রামদাস।

“না বৎস, তোমার সাধনার ঐকান্তিকতা আর কৃচ্ছ্র, তোমার দৈন্য আর আত্মভিমানের বিলুপ্তি আমায় আনন্দ দিয়েছে। সাধনা ও আত্মগুদ্ধির বলে আত্ম-কৃপা তুমি পেয়েছো, শাস্ত্রের গূঢ় তত্ত্বসমূহ স্মরিত হয়েছে তোমার সাধনসত্যায়। এবার সেই অনুভূত তত্ত্বকে শাস্ত্র অধ্যয়নের মধ্য দিয়ে যাচাই করে নাও। আরো একটা কারণ আছে যে জন্ম তোমায় শাস্ত্র পারঙ্গম হতে হবে।”

“বুঝিয়ে বলুন, মহারাজ।”

“রামদাস, তুমি রামজীর দাস সর্ব্বতোভাবে, অন্তরঙ্গ ও বহিরঙ্গ এই দুইদিক দিয়ে। আশীর্ব্বাদ করি, অচিরে তোমার অন্তর্লোকে স্মরিত হোক প্রভু রামচন্দ্রের অদ্বৈত ব্রহ্মস্বরূপ। আর বাইরে তুমি অবতার জীরামের ধর্ম্মরাজ্য সংস্থাপনে তৎপর হও।”

“রামরাজ্য তো ত্রেতাযুগের প্রভু। এ যুগে তো তাঁর আসবার কথা নয়।” প্রশ্ন করেন রামদাস।

“বৎস, জীরামচন্দ্র হচ্ছেন পরম ঈশ্বর, পর-ব্রহ্ম। প্রতি যুগেই রয়েছে তাঁর অধিকার, রয়েছে তাঁর রাজ্যস্থাপনের কর্ম্মশ্রুতি। নামে কি আসে যায়, রামদাস। রামরাজ্য, ধর্ম্মরাজ্য, এ যুগেও প্রতিষ্ঠিত হতে যাচ্ছে।”

“এ বৃহৎ ঐশী কর্ম্মে আমার মত ক্ষুদ্র মানুষকীটের কি করবার আছে, প্রভু?”

“ভুল করলে, রামদাস। তিনি মহাযোগী হনুমানজীকে যেমন নিয়োজিত করেছিলেন, তেমনি কি কাঠবেড়ালীর সাহায্যও নেন নি ? তিনি আসছেন—তোমার আমার কাজ হচ্ছে, যে পথ দিয়ে তাঁর রথ আসবে সে পথকে কণ্টকমুক্ত করা।”

“এক্ষেত্রে আমার কি করার আছে ?”

“শোন রামদাস, বিধর্মীর অত্যাচারে জাতি পঙ্ক হয়ে গিয়েছে। ধর্মবুদ্ধি আজ বিলুপ্ত, নোংরা জঞ্জালে ভরা সর্বস্থান। পরম প্রভুর আসন পাত্‌বার মত ঠাঁই কোথাও নেই। এ সম্বন্ধে তুমি তোমার কাজ শুরু করো। মহারাষ্ট্র হোক তোমার কর্মক্ষেত্র। ধর্মবোধ ও অধ্যাত্মশক্তিকে ভিত্তি করে জাগিয়ে তোল এ দেশটাকে।”

“প্রভু, ভাবছি, আমার মত কাঙাল অসহায় ব্যক্তি, কি করে এ কাজে এগোবে।” দৈন্তের সুরে বলেন রামদাস।

“বৎস, ভেবো না। আমি তোমায় বর দিচ্ছি, অচিরে ঋদ্ধি-সিদ্ধি হবে তোমার করতলগত। দেশের শক্তিদর রাজা থেকে শুরু করে সাধারণ মানুষ সবাই দেবে তোমার এ মহান কর্মে সহায়তা।”

“নির্দেশ দিন, প্রভু, কিভাবে এ কাজে আমি অগ্রসর হবো।”

“এ ঐশী কর্মের দায়িত্ব ও গুরুত্ব অনেক, রামদাস। তাই এজ্ঞ প্রস্তুতি দরকার। এই প্রস্তুতি ঐশী কর্মেরই অঙ্গ ব্যতীত আর কিছু নয়। এখানে পঞ্চবটির তীড়ে এ কাজ হয়ে উঠবে না। গোদাবরীর অপূর্ণ তীরে তাকে নলীতে তুমি চলে যাও। সেখানে নির্জনে বাস করো দশ বৎসর কাল। সমাপ্ত করো তোমার অবশিষ্ট সাধনা ও শাস্ত্র অন্বেষণ। জনগণের ভেতর তোমায় কাজ করতে হবে, সেখানে শুধু তত্ত্ব ও প্রেমিক সাধক হলেই চলবে না, আচার্য্য হয়েই তোমায় বসতে হবে। এজ্ঞ চাই অসামান্য শাস্ত্র ব্যুৎপত্তি। রামজীর কৃপার ভক্তিশাস্ত্র ও অদ্বৈত ব্রহ্মবাদ ছুইয়েতেই থাকবে তোমার অনায়াস অধিকার। যাও, বৎস, রামজীর উপর সকল ফলের আশা ছেড়ে দিয়ে, অনাসক্ত যোগীরূপে তুমি এখন থেকে বিরাজ করো।”

বার বার রামদাসকে উৎসাহিত করিয়া, অন্তরের গভীর আশীর্বাদ জানাইয়া, গুরু মহারাজ বিদায় গ্রহণ করিলেন।

তাকেরুলীতে রামদাস একাদিক্রমে অবস্থান করেন প্রায় বারো বৎসর। এই দীর্ঘ সময় ব্যাপিয়া একদিকে অগ্রসর হন গুরু প্রদর্শিত নিগূঢ় যোগ সাধনার মার্গে—অপর দিকে আয়ত্তে আনিতে থাকেন জটিলতর শাস্ত্রতত্ত্ব।

পঞ্চবটির দুই মাইল দূরেই তাকেরুলী। তদ্বী শ্রোতস্থিনী নন্দিনী এই স্থানটি বিধৌত করিয়া প্রবাহিত হইয়াছে, অদূরে গিয়া পতিত হইয়াছে পুণ্যতোয়া গোদাবরীতে। পিছনে রহিয়াছে একটি অম্লচ্ছ নির্জ্জন পাহাড়। এখানকার নৈসর্গিক সুসমা আর শাস্ত্র পবিত্র আবহাওয়া হইতে আধ্যাত্মিক প্রেরণা সহজে লাভ করা যায়। তাকেরুলী পাহাড়ের এক প্রান্তে একটি পর্ণকুটিরে রামদাস অতিবাহিত করেন তাঁহার সাধনজীবনের দ্বিতীয় পর্য্যায়।

অল্পকাল মধ্যে এই শাস্ত্রবিদ ভজনশীল সাধকের খ্যাতি চারিদিকে ব্যাপ্ত হইয়া পড়ে। নবাগত ভক্ত ও গুণমুগ্ধদের সহায়তায় বহু হুপ্রাপ্য গ্রন্থ রামদাস সংগ্রহ করিতে সমর্থ হন। এই সব গ্রন্থের অল্পশীলন ও বিচার বিশ্লেষণের পর তিনি ব্রতী হন তাঁহার নিজস্ব ভক্তিবাদের ভিত্তি গঠনে।

বারো বৎসরের শাস্ত্রচর্চা ও ভক্তি সাধনা রামদাসের জীবনে আনিয়া দেয় বিপুল আত্মবিশ্বাস ও প্রশান্তি। এবার গুরু নির্দেশিত ঐশী কর্মের উদ্যাপনের কথাও বার বার মনে পড়িতে থাকে। এই সময়ে একদিন ধ্যান সমাহিত থাকাকালে রামদাস আবার ইষ্টদেব শ্রীরামচন্দ্রের "দর্শন লাভ করেন। দিব্য করুণাধারায় হৃদয়কুন্ত কানায় কানায় পূর্ণ হইয়া উঠে।

ইহার অব্যবহিত পরেই আবার ঘটে গুরু মহারাজের আবির্ভাব।

স্নেহপূর্ণ স্বরে প্রিয় শিষ্যকে তিনি কহেন, “রামদাস, তোমার প্রস্তুতি-পর্ব সমাপ্ত প্রায়। আর যেটুকু বাকী আছে তাও এবার শেষ করে ফেল। ঐশী কাজ শুরু করার আগে সারা দেশটাকে একবার ঘনিষ্ঠভাবে দেখে নাও। পদব্রজে বেরিয়ে পড়ো, প্রধান তীর্থগুলো দর্শন করে এসো। এই সঙ্গে হৃদয়ে তোমার গ্রথিত হোক সারা ভারতের মর্মস্বাদ বাস্তব চিত্র।”

অতঃপর একদল সন্ন্যাসী সঙ্গীর সহিত রামদাস পরিব্রাজনে বাহির হন। উত্তরে হিমালয়-তীর্থ কেদারবদরী হইতে শুরু করিয়া দক্ষিণে রামেশ্বর ও সিংহল এবং পশ্চিমে দ্বারকা বৃন্দাবন হইতে শুরু করিয়া বারাণসী গয়া জগন্নাথধাম প্রভৃতি দর্শন করিয়া আবার পঞ্চবটিতে তিনি ফিরিয়া আসেন।

এবার শুরু হয় তাঁহার অধ্যাত্মজীবনের সর্ব্বাপেক্ষা গুরুত্বপূর্ণ অধ্যায়। আচার্য্যের ভূমিকা গ্রহণ করিয়া রামাইৎ বৈষ্ণবধর্ম্মের এক নব সম্প্রদায় তিনি গড়িয়া তোলেন। রামদাসী সম্প্রদায় নামে তাহা খ্যাত হইয়া উঠে।

রামদাস ও তাঁহার শ্রম্মান্দোলনের প্রকৃত মূল্যায়ন করিতে হইলে তখনকার মহারাত্রের রাজনৈতিক ও সামাজিক পশ্চাদ্গতি জানিয়া নেওয়া দরকার। ইতিপূর্বে প্রায় তিনশত বৎসর কাল দাক্ষিণাত্য মুসলমান অধিকারে ছিল। চৌদ্দ শতক হইতে সতের শতক কাল অবধি দেখা যায় আমেদনগর ও বিজাপুর এই দুইটি রাজ্য উত্তরাগত মুঘল শক্তির প্রতিরোধে ব্যস্ত। রামদাসের সময়ে দক্ষিণাঞ্চলে মুঘল শক্তির প্রধান কেন্দ্র ছিল আমেদনগর; সম্রাট ঔরংজেব ইতিমধ্যে এই গুরুত্বপূর্ণ নগরটি দখল করিয়া নিয়াছিলেন।

মুসলমান রাজাদের যুদ্ধ বিগ্রহ ও অত্যাচার মারাঠার জন-জীবনে আনয়ন করে ঘোরতর অশান্তি ও উপজব। হিন্দুদের

দেব-দেউলের উপর বিশ্বাসীদের কোন শ্রদ্ধা ছিল না, সুযোগ পাইলেই দেববিগ্রহ তাহারা কলুষিত করিত, মঠ ও মন্দির করিত বিনষ্ট। ফলে হিন্দুদের মধ্যে দেখা দেয় হীনমস্ত ও অসহায়ের মনোভাব। সামরিক সংঘর্ষ প্রায়ই ঘটিতে থাকে, ফলে বিস্তীর্ণ অঞ্চল পড়িয়া থাকে অনাবাদী অবস্থায়। আর দরিদ্র চাষীরা পতিত হয় ঘোর সঙ্কটে। সরকারী ও বেসরকারী স্তরে উৎকোচ ও অশ্রান্ত দুর্নীতি চলিতে থাকে অবাধে। সমাজ-জীবন তাই ধীরে ধীরে হইয়া উঠে পঙ্গু ও নৈরাশ্রবাদী।

সব ক্রিয়ারই প্রতিক্রিয়া থাকে, মহারাষ্ট্রেও তাহার ব্যত্যয় দেখা যায় নাই। মারাঠার দূর দুর্গম স্থানগুলিতে মুঘলশক্তি তেমন দৃঢ় হইয়া বসিতে পারে নাই, এই সব স্থানে হিন্দু জাগৃতির চিহ্ন দেখা যাইতে থাকে। এই নব জাগৃতির মুখপাত্র শিবাজী ভোসলে। অসাধারণ নেতৃত্ব শক্তি, সংগঠন প্রতিভা ও রণচাতুর্য্য ছিল এই নেতার। এই সঙ্গে ছিল ধর্ম-ভিত্তিক হিন্দুরাজ্য গঠনের মহান পরিকল্পনা।<sup>১</sup> সিদ্ধপুরুষ রামদাসের অধ্যাত্ম-প্রেরণা শিবাজীকে যোগাইয়াছিল নূতনতর সঞ্জীবনী-শক্তি ও উদ্দীপনা।

স্বামী রামদাসের সমকালীন মহারাষ্ট্রে পক্ষারপুরের বৈষ্ণব আন্দোলনের প্রভাব বড় কম ছিল না। এই বৈষ্ণবেরা ছিলেন কৃষবিগ্রহ বিঠঠলজীর ভক্ত। অভঙ্গপদ কীর্ত্তন ও নাম প্রচারের মধ্য দিয়া মারাঠার জনজীবনকে অনেকাংশে ইঁহারা আত্মস্থ করেন, নূতনতর আত্মশক্তিতে উদ্বুদ্ধ করিয়া তোলেন।<sup>২</sup>

১ রাণাডে : রাইজ অব্‌ দ্য মারাঠা পাওয়ার—পৃষ্ঠা ২৭-৩৪

২ অনেকের ধারণা, মারাঠা বৈষ্ণব ও সাধক কবিরা মারাঠার জাতীয় অত্মদমে কোন সাহায্য করেন নাই। তাঁহাদের দৈন্ত ও ত্যাগ ভিত্তিকা বরং দেশবাসীকে হীনমস্ত ও হীনবল করিয়াছে। কিন্তু রাণাডে তাঁহার ‘রাইজ অব্‌ দ্য মারাঠা পাওয়ার’ গ্রন্থে প্রমাণ করিয়াছেন—এ ধারণা ভিত্তিহীন, ঐ সব বৈষ্ণব কবিরাই বরং মারাঠা জাগৃতির ভিত্তি গড়িয়া তোলে। শ্রবণ যত্নাধ, কিনকেড, রেভারেণ্ড এডওয়ার্ডস্‌ প্রভৃতি এক্ষেত্রে রাণাডের মতবাদের সমর্থক।

পঞ্চারপূরের বৈষ্ণবদের প্রধান ছিলেন জ্ঞানেশ্বর। ত্রয়োদশ খৃষ্টাব্দ তাঁহার অভ্যুদয় কাল। এই মহাপুরুষের লিখিত জ্ঞানেশ্বরী গীতায় যোগ ও ভক্তিবাদের সমন্বয় দেখা যায়। নামদেব, তুকারাম প্রভৃতির উপর সাধক জ্ঞানেশ্বরের প্রভাব প্রচুর। জ্ঞানেশ্বরের পরে চতুর্দশ শতকে আবির্ভূত হন নামদেব। তাঁহার ভক্তিবাদের ধারা মারাঠা হইতে শুরু করিয়া পাঞ্জাব অবধি বিস্তারিত হয়।

রামদাস এবং তুকারাম প্রায় সমসাময়িক। ঐতিহাসিক তথ্যাদি হইতে দেখা যায়, কৰ্ম্মক্ষেত্র ও বৈষ্ণবীয়তায় পার্থক্য থাকিলেও এই দুই মহাত্মা পরোক্ষভাবে উভয়ে উভয়কে সাহায্য করিয়াছিলেন। মারাঠার উজ্জীবনকে করিয়াছিলেন স্বরাশ্রিত।

বারো বৎসর ব্যাপিয়া সমগ্র ভারত পরিব্রাজনের পরে স্বামী রামদাস ১৬৪৪ খৃষ্টাব্দে মহারাষ্ট্রে কিরিয়া আসেন। দেশের যে চিত্র এই পরিব্রাজনের মধ্য দিয়া তাঁহার নয়ন সমক্ষে উদ্ঘাটিত হয় তাহা মন্থাস্তিক। এই ধর্ম্মযুত মহান দেশে ধর্ম্মবোধ সেদিন স্তিমিত। বিধর্ম্মীর প্রতাপের সম্মুখে দেশবাসী হারাইয়া বসিয়াছে তাহার আত্মবোধ, তাহার জাতীয় গৌরব। দেব-দেবীর মূর্ত্তি নানা স্থানে হইতেছে কলুষিত। সমাজ হইতে নীতিবোধ প্রায় লোপ পাইয়াছে। দারিদ্র্যের নির্যাতনও মানুষের মনুষ্যত্বকে কম অবনমিত করে নাই। এই পরিস্থিতিতে সদগুরু নির্দেশ তাঁহার মানসপটে জাগিয়া উঠিল। নিজ দেশ, লাঞ্চিত পদদলিত মহারাত্রিকে তিনি নির্বাচিত করিলেন তাঁহার কৰ্ম্মক্ষেত্ররূপে। নূতনতর উজ্জীবন ও ধর্ম্মরাজ্য সংস্থাপনের জন্ত হইলেন কৃতসঙ্কল্প।

নানা স্থান পরিভ্রমণের পর সাতারা অঞ্চলকে রামদাস বাছিয়া নিলেন তাঁহার কাজের প্রধান ক্ষেত্ররূপে। পশ্চিমঘাট পর্ব্বতমালার কাছে—শস্ত্র-শ্রামল নদী-উপত্যকার এক নয়নলোভন স্থান এই সাতারা। প্রাকৃতিক শোভায় ভরপুর। নদী, পাহাড় ও অরণ্যে ঘেরা এই অঞ্চলটিতে আসিয়া ভক্ত রামদাসের হৃদয় আনন্দে নাচিয়া

উঠিল। পাহাড়ের বুকে বসানো, নিভৃতি ও শান্তির নীড়, ছাকল গ্রাম। পাদদেশ দিয়া ক্ষীণকায়া এক তটিনী কুলকুলূরবে বহিয়া চলিয়াছে। এই গ্রামটির একপ্রান্তে কিছুকালের জন্য স্থাপিত হইল স্বামী রামদাসের সাধন-আশ্রম।

আশ্রম তো করা গেল, কিন্তু আশ্রমের বিগ্রহ কই? ইষ্টদেবের বিগ্রহ স্থাপন না করা অবধি রামদাসের মনে শান্তি নাই।

অল্পকাল মধ্যেই এ সমস্যা সমাধান হইয়া গেল। সেদিন গভীর রাতে ধ্যানাসনে বসিয়া স্বামী রামদাস এক অপূর্ব নির্দেশ পাইলেন। ইষ্টদেব রামচন্দ্র তাঁহাকে বলিতেছেন, “বৎস রামদাস, তোমার আশ্রম-মন্দিরে প্রবেশের জন্য যে আমি বহুকাল ধরে উৎসুক হয়ে আছি। তোমার স্নানের ঘাটের একপাশে নদীগর্ভে প্রোথিত রয়েছে আমার বিগ্রহ। কাল প্রত্যুষে এটিকে নদী থেকে উদ্ধার করো, স্থাপন করো তোমার আশ্রমে।”

শ্রীরামজীর এই প্রস্তাববিগ্রহ পরদিনই নদী হইতে উঠাইয়া আনা হইল। রামদাস পরম আনন্দে ইহার সেবা-পূজা শুরু করিলেন। কিছুদিন পর জাঁকজমক সহকারে মারুতীজীর একটি মূর্তিও এখানে স্থাপন করা হয়।

ছাকলের আশ্রমে রামদাস একাদিক্রমে বেশী দিন বাস করেন নাই। ইহার পর শিবধর নামক একটি অতি-নিভৃত স্থানে তিনি উপনীত হন। লোকালয় বর্জিত এই নির্জন অঞ্চলে প্রায় দশ বৎসর কাল তিনি অবস্থান করেন। বিশিষ্ট জীবনীকার ও শিষ্যদের মতে, এই স্থানটিতেই সমাপ্ত হয় রামদাসের অধিকাংশ জনপ্রিয় ধর্মসঙ্গীত ও তত্ত্বগ্রন্থের রচনা।

অতঃপর রামদাস আর নিভৃতি বা অবকাশ খুঁজিয়া বেড়ান নাই। বিপুল উদ্যম, কর্মশক্তি ও সৃজনী প্রতিভা নিয়া ঝাঁপাইয়া পড়েন ধর্ম সংগঠনের কাজে, মারাঠার জনজীবনে তোলেন অভূতপূর্ব আলোড়ন।



রামদাসের ব্যক্তিত্ব, আচার আচরণ ও ধর্মপ্রচার ছিল বড়ই আকর্ষণীয়। ভক্ত-শিষ্যগণসহ কোপীনধারী এই সর্বব্যাপী সন্ন্যাসী গ্রামে গ্রামে ঘুরিয়া বেড়াইতেন। শাস্ত্রের ব্যাখ্যা বিশ্লেষণ আর ভজন কীর্তনে তাঁহার ধর্মসভা জমজমাট হইয়া উঠিত। রামদাস একাধারে যেমন ছিলেন ভাবুক ভক্ত, কবি ও কীর্তন গায়ক, তেমনি বেদ-বেদান্ত, পুরাণশাস্ত্র ও যোগ মার্গে ছিল তাঁর অনায়াস অধিকার। বিশেষ করিয়া তাঁহার ভজন, কীর্তন ও ধর্মরাজ্য স্থাপনের আশ্বাস বাণী শত-শত ভক্ত নরনারীকে উদ্বুদ্ধ করিত নব প্রেরণায়।

গ্রামের উচ্চ নীচ, শিক্ষিত অশিক্ষিত, ধনী নিধন সকলেই পরম উৎসাহে ভাঁড় করে রামদাসের ধর্মসভায়। তাঁহার উজ্জল ব্যক্তিত্বকে ঘিরিয়া নানা স্থানে গড়িয়া উঠিতে থাকে সুস্বচ্ছ ভক্তগোষ্ঠী। ভাবাবেগের বহ্না উৎসারিত করিয়া, ভক্তদের হাসাইয়া কাঁদাইয়াই কিন্তু রামদাসের কর্তব্য শেষ হইত না। অসামান্য গঠন-প্রতিভা বলে অল্পকাল মধ্যে ভক্তদের নিয়া তিনি স্থাপন করিতেন এক একটি মঠ বা সাধন কেন্দ্র। ইষ্টদেব রামচন্দ্র আর মহাযোগী মারুতীজীর মূর্তির পূজা হইত সেখানে সাড়ম্বরে। এইভাবে এই মঠগুলিকে কেন্দ্র করিয়া বহিয়া চলে নব ভক্তিদর্শনের স্রোতধারা।

গুরুজী রামদাসকে বর দিয়াছিলেন, ঋদ্ধি-সিদ্ধি ছই-ই তাঁহার করায়ত্ত হইবে। এবার সে বর ফলিয়া উঠিতে থাকে। কয়েক বৎসরের মধ্যেই রামদাসী রামাইং সম্প্রদায়কে মহারাষ্ট্রের নানা অঞ্চলে ছড়াইয়া পড়িতে দেখা যায়। মঠ-মন্দিরও নিশ্চিত হয় অজস্র সংখ্যায়। সহস্র সহস্র মারাঠীর দৃষ্টিতে রামদাস গণ্য হন রামজীর শ্রেষ্ঠ ভক্তরূপে, মহাবীর মারুতীজীর অবতার রূপে।

রামদাসের জীবনসাধনায় ভক্তি, জ্ঞান ও কর্ম এই তিনটির সমন্বয় লক্ষ্য করা যায়। অবতার পুরুষ রামচন্দ্রের উপাসনা ও অর্চনার কথা তিনি সারা জীবন ভরিয়া বলিয়া গিয়াছেন। আজো বোড়শোপচারে এই ইষ্টদেবের পূজা তাঁহার সম্প্রদায়ে প্রচলিত।

আবার প্রভু রামজীকেই তিনি স্থাপন করিয়াছেন পরম ব্রহ্মরূপে । সে স্থলে দেখা যায়, অদ্বৈতবাদের তত্ত্বও তিনি নিষ্ঠাভরে বিশ্লেষণ করিতেছেন । রামরাজ্য অথবা ধর্মরাজ্য স্থাপনার যে মহান ব্রত তিনি গ্রহণ করেন তাহার মধ্য দিয়া ফুটিয়া উঠে ঐশী কল্প উদ্‌যাপনের আন্তরিক প্রয়াস । তাঁহার রচিত ভক্তিসঙ্গীত ও ধর্মগ্রন্থগুলিও সেদিনকার জনজীবনে প্রবল উদ্দীপনার সৃষ্টি করে ।

এই সময়ে মহারাষ্ট্রের পঞ্চারপুরকে কেন্দ্র করিয়া ও ভক্তিসাধনার স্রোত প্রবাহিত হইতেছিল । জ্ঞানেশ্বর, একনাথ, নামদেব, প্রভৃতি মহাত্মাগণ ছিলেন এই ভক্তিধারার উৎস । মহারাষ্ট্রের প্রাত জনপদে ইহাদের প্রভাব বর্তমান ছিল, তাই রামদাসও এই প্রভাব হইতে মুক্ত থাকিতে পারেন নাই । তবে তাঁহার ভক্তির আন্দোলন ছিল পঞ্চারপুর হইতে অনেকটা পৃথক । বিঠ্ঠলজী বা কৃষ্ণবিগ্রহ তাঁহার ইষ্ট নয়, তাঁহার ইষ্ট হইতেছেন রামচন্দ্র । অবতাররূপী এই রামজীর পূজা ও তাঁহার ধর্মরাজ্য প্রতিষ্ঠার প্রয়াসই নিরন্তর তিনি করিয়া গিয়াছেন, আর রামজীব মধ্য দিয়াই সাধন জীবনের শেষে পৌঁছিতে চাহিয়াছেন সত্যম-শিবম-অদ্বৈতম-এ, — অদ্বৈতব্রহ্মাত্মজ্ঞানে ।

রামদাসের গ্রন্থাদি হইতে দেখা যায়, বেদান্তের অদ্বৈততত্ত্বের উপর তাঁহার একটা স্বাভাবিক প্রবণতা ছিল । মনে হয়, তাঁহার রামাইংগুরু ভক্তিবাদী হইয়াও অদ্বৈতবেদান্তে পারঙ্গম ছিলেন এবং তাঁহার প্রভাব শিষ্য রামদাসের উপর পাতত হয় । তখনকার দিনে শৃঙ্গেরী মঠের বহু সাধক অদ্বৈতবেদান্তী হইয়াও রামচন্দ্রের উপাসক ছিলেন । এমনও হইতে পারে, ইহাদের কাহারো সহিত বিশেষ ঘনিষ্ঠতা হইবার পর রামদাসের মধ্যে রামভক্তি ও অদ্বৈতবাদের এই সমন্বয় গড়িয়া উঠিয়াছিল । তাকেরুলী ও ছাকলের নির্জন আবাসে থাকার কালে রামদাস দীর্ঘকাল গভীরভাবে বেদান্ত, জ্ঞানেশ্বরী-গীতা ও যোগ-বাশিষ্ঠ রামায়ণ অধ্যয়ন করেন । স্বভাবতই এই সব গ্রন্থের

জ্ঞানমার্গীয় তত্ত্ব তাঁহার অধ্যাত্মজীবনে দৃঢ়রূপে প্রবিষ্ট হয় এবং উত্তর জীবনে তাঁহার ভক্তিবাদ অদ্বৈতবোধের দিকে ঝুঁকিয়া পড়ে।

অধ্যাত্ম-জীবনের উপাদান রামদাস যেখান হইতেই আহরণ করুন, নিজ মতবাদ ও তত্ত্বাদর্শকে তিনি যে একটি বিশিষ্ট রূপ দিতে সক্ষম হন, প্রধানতঃ তাঁহাকে কেন্দ্র করিয়াই যে এই রামভক্তিবাদের পরমতত্ত্ব বিকশিত হইয়া উঠে, তাহাতে সন্দেহের অবকাশ নাই।

দার্শনিক ব্যাখ্যা অথবা তত্ত্ববাদ সম্পর্কে রামদাস যাহাই বলুন ব্যবহারিক জীবনে, জনসাধারণের আচার্য্য ও উপদেষ্টারূপে তিনি রামভক্তি ও রাম উপাসনার উপরই বেশী জোর দিয়া গিয়াছেন। তাঁহার সম্প্রদায়ের মঠ মন্দিরে ভক্তি সাধনা, পূজা অর্চনা ও নাম-কীর্তনের প্রাধান্যই বেশী চোখে পড়ে। তাঁহার অজস্র ভক্তিগাথায় রহিয়াছে ইষ্টের কৃপাভিক্ষা, শরণাগতি ও অনুশোচনার আকৃতি। করুণাষ্টকের একটি পদে সাধক কবি রামদাস প্রভুর চরণে সখেদে নিবেদন করিতেছেন :

হে রাম, নিতি নিতিই যে হৃদয় আমার  
যাচ্ছে জলে অনুতাপের দহনে।  
ঘোর চঞ্চল আমার এই মন,  
আমি পারছিনে তাকে বশে রাখতে।  
হে প্রভু, হে করুণাময়,  
ছিঁড়ে ফেলো আমার এই মায়ার বন্ধন,—  
যা সৃজন করে মরীচিকার মোহ।  
এসো, এসো, আমার হৃদয় কুটিরে,  
তোমা-হারা জীবনে এসেছে অবসাদের শূন্যতা,  
তোমার আরাধনা বিনা কেটেছে মোর দিন,  
বন্ধুজন আর বিস্তৃবিস্তরের মাঝে  
নিজেকে হারিয়েছি ঈর্ষা আর স্বার্থাক্রতায়।

হে রঘুপতি, হে করুণাময়,  
 দাও আমায় তোমার মনের উদারতা,  
 যেন অক্লেশে বিলিয়ে দিতে পারি আমার সর্বস্ব—  
 একান্ত বিশ্বাসে নিতে পারি তোমার চরণে ঠাই ।  
 ইন্দ্রিয়ের সেবায় কি করে পাবো পরমানন্দ ?  
 হে রঘুনাথ, তোমা বিনা  
 আমি যে হয়েছি রিক্ত, হতভাগ্য ।  
 হে প্রভু তাই আশিস্ মাগি চরণে—  
 জীবন যেন মোর হয় ব্রহ্মময় ।<sup>১</sup>

অপর একটি সংবেদনময় প্রার্থনায় রামদাস তাঁহার শরণাগতি  
 জানাইতেছেন :

হে প্রভু, কোটি কোটি জনম ধরে  
 হৃদয় আমার যাচ্ছে জলে-পুড়ে ছাই হয়ে  
 তাইতো হে কৃপালু রাম চাইছি তোমায়,  
 বস্ত্রার বিপুল প্লাবনে ছড়িয়ে পড়ো আমার বুকে ।  
 ছয়টা শত্রু ভেতর থেকে করছে প্রতিরোধ—  
 ভেঙ্গে চূরে দাও, ভাসিয়ে দাও তাদের ।  
 হে রাম, তুমি বিনা কেই বা আছে আমার ?  
 কেই বা জানে আমার মর্ম্মভেদী হৃদশার কথা ?  
 হে রাঘব, শ্রান্ত ক্লান্ত আমি সাধন সমরে  
 এসো, এসো প্রভু করো আমায় পরিত্রাণ ।

আবার প্রাপ্তির পরমানন্দে উচ্ছল হইয়া দাস রামদাসকে আর  
 একটি অভঙ্গপদে বলিতে শুনি :

হে দয়াল রঘুনাথ, হে আমার প্রভু,  
 কত পাপই যে করেছি এ জীবনে—  
 তার কোনটিই বা পায়নি তোমার ক্ষমা ?

<sup>১</sup> উইলবার এল ডেবিং : রামদাস অ্যাণ্ড রামদাসীজ, পৃ: ৩২ ; ১০-১৫,

গুণরাশি তোমার খচিত রয়েছে  
 অসীম আকাশে সংখ্যাতীত নক্ষত্রের মত—  
 তার কোনটি রাখা যায় স্মৃতিপটে ?  
 কি করেই বা শুধ্বে তোমার অপার ঋণ ?  
 দিনের শরণ তুমি প্রভু, তুমি পরমাগতি—  
 আর এই পরিচয়ই যে তোমার আসল পরিচয় ।  
 সুখ দিয়েছো তুমি, পরম সুখও চাই তোমার কাছে,  
 এই কাঙালের যা কিছু আছে চাওয়া আর পাওয়া  
 সবই যে তোমার জানা ।  
 অন্তর যে আমার দিয়েছো দানে ভরে  
 হে প্রভু, হে রঘুনাথ, বলতো এ অভাগা—  
 কি দিয়ে শুধবে তোমার ঋণভার ?

রামদাসের প্রধান গ্রন্থ ‘দাসবোধ’ তাঁহার অনুগামীদের কাছে  
 গীতার মত নিত্য পাঠ্য । এই গ্রন্থে ও অগ্ণ্যান্ত রচনায় রামদাস  
 ভক্তিমার্গের সাধককে শ্রবণ, স্মরণ, অর্চনা প্রভৃতি নয় প্রকার  
 অনুষ্ঠানের উপদেশ দিয়াছেন । গুরুসেবা নামজপ ও নামকীর্তনের  
 উপর রামদাসকে সর্বাধিক গুরুত্ব আরোপ করিতে দেখা যায় ।  
 তাঁহার মতে ভক্তি মুক্তির মূলে রহিয়াছে সদ্গুরুর কৃপা । সদ্গুরুই  
 আপন শক্তিবলে শিষ্যের অধিকারকে পরিশুদ্ধ করেন, প্রস্তুত করেন

১ সমর্থ রামদাস স্বামী প্রধান রচনাগুলির নাম নিয়ে দেওয়া হইতেছে :

(১) দাসবোধ—১৭৫২ কবিতা সম্বলিত এই গ্রন্থটিকে রামদাসী সম্প্রদায়ের  
 লোকেরা সম্মান করিয়া বলে ‘গ্রন্থরাজ’ । (২) ত্রিগ্লোক মনাচে—মনকে  
 বশে রাখার উপদেশ এই পদগুলিতে নিহিত । সাধুরা ভিক্ষা করার সময়  
 এগুলি গাহিয়া থাকেন । (৩) করুণাটকে—অনুশোচনা ও প্রার্থনায় ভরা  
 এই সমস্ত গ্লোক সাধ্যা ভক্তনের সময় গীত হয় । (৪) রামদাসের রামায়ণ  
 ( হৃদয়কাণ্ড, যুদ্ধকাণ্ড ও কিঙ্কিধ্যা কাণ্ড ) । (৫) শতক পঞ্চক ও ভূপালী  
 নামক প্রার্থনামূলক অভঙ্গপদ ।

তাঁহাকে ঈশ্বরপ্রাপ্তির জন্ত। তিনি বলেন, গুরু সেবার মধ্য দিয়া শিষ্যের অহমিকা যেমন ক্ষীণ হইয়া আসে তেমনি নামিয়া আসে গুরুকৃপার অমিয়ধারা।

নামজপ ও কীর্তন সম্বন্ধে তাঁহার প্রসিদ্ধ রচনা শ্রীশ্লোক মনাচে-তে তিনি বলিয়াছেন :

হে মন, ভ্রাস্ত বুদ্ধিবশে এই নামকে করো না ত্যাগ,  
 অন্ধাভরে নিরস্তুর করো এর অমুখ্যান।  
 যা কিছু দেখছো এই প্রপঞ্চে,  
 সবই রয়েছে বিধৃত, প্রভুর নামের বলে।  
 কোন কিছুরই হয়না তুলনা এর সাথে।

আপন ইষ্টনাম, রামনামের মাহাত্ম্য বর্ণনা করিতে গিয়া ভক্ত সাধক রামদাস প্রেমভরে কহিতেছেন :

ভজন ও জপের নাম তো রয়েছে অনেক,  
 কিন্তু ভাই রামনামের তুল্য কোন্ নাম ?  
 হীন আর চূৰ্ভাগা যারা  
 কি করে জানবে তারা এই পরম বস্তুর মহিমা ?  
 বাসুকীর হলাহল পান করে  
 পার্ব্বতীনাথ শঙ্কর জপেছিলেন এই মহানাম,  
 হয়েছিলেন তিনি মৃত্যুঞ্জয়—  
 তবে ছার মলুষ্য কেন করবেনা জপ  
 আমার প্রভুর এই অমৃতময় নাম ?

ভক্তি-মার্গীয় সাধনার প্রচারের সঙ্গে সঙ্গে বহুতর মঠ-মন্দিরের প্রতিষ্ঠা করেন রামদাস স্বামী। এইসব মঠকে তিনি পরিণত করেন তাঁহার ধর্মরাজ্যের এক একটি সুদৃঢ় ঘাটিকারে। ভক্তিদ্বারা প্রচার করিলেও রামদাস অতিরিক্ত ভাবোচ্ছ্বাসের প্রকাশ কখনো দেন নাই। রামচন্দ্রিত্বের সংযম, সত্যনিষ্ঠা ও স্তায়পরতাকে সত্তত তিনি

ভক্তদের নয়ন সমক্ষে তুলিয়া ধরিতেন। মঠ ও মন্দিরের মোহাস্ত বা পরিচালকদের করিতেন কঠোরভাবে নিয়ন্ত্রণ। একবার তাঁহার এক মঠের মোহাস্ত নীতিবিগর্হিত কোন কাজ করেন। রামদাস একজ্ঞ তাঁহার শাস্তিবিধান করেন—বেত্রাঘাত। অপর একজন মঠাধীশ উপযুক্ত প্রস্তুতির আগেই তাঁহার এক অনুগত ভক্তকে মজ্ঞ প্রদান করেন। দীক্ষার আগে কেন সতর্কতা অবলম্বন করা হয় নাই, এই দোষে রামদাস মঠাধীশকে কঠোরভাবে প্রহার করেন। কয়েকটি বিশিষ্ট কৌর্টনিয়া শিষ্যকে একবার তিনি দৃশ্চরিত্রা স্ত্রীলোকের সঙ্গ করিতে দেখিতে পান। কৌর্টনসভা হইতে ইহাদের তিনি তিন বৎসরের জ্ঞা বহিষ্কৃত করিয়া দেন। রামদাসের মঠ-মন্দিরের এই নীতিগত আদর্শবাদ ও নিয়মশৃঙ্খলা মারাঠার পুনর্গঠনে ও আত্মিক শক্তির উজ্জীবনে কম সাহায্য করে নাই।

আচার্য্য জীবনের শুরু হইতেই রামদাসের কাছে আশ্রয় গ্রহণ করেন একদল সং ও ধর্মনিষ্ঠ গুরুগতপ্রাণ শিষ্য। ইহাদের মধ্যে প্রথম সামিতে রহিয়াছেন—কল্যাণ, শ্রেষ্ঠ (রামদাসের ভ্রাতা), উদ্ধব গোসাবি, দিবাকর, বেনাবাঈ, আকাবাঈ প্রভৃতি।

শিষ্য কল্যাণ শুধু ত্যাগ তিতিক্ষা ও সাধনার দ্বারাই গুরুর অনুগ্রহলাভ করেন নাই, ডোমগাঁও মঠে রামদাসী সম্প্রদায়ের অন্ততম প্রধান মঠ স্থাপন করিয়া গুরুর আরক্ত মহান কার্য্যকে তিনি অনেকাংশে সফল করিয়া তোলেন।

কল্যাণ ছিলেন রামদাসের সর্ব্বাপেক্ষা বিশ্বস্ত পরিকর। তাঁহার গুরুভক্তির একটি আখ্যায়িকা মহারাষ্ট্রে প্রচলিত আছে। রামদাস মাঝে মাঝে নানা অভিনব উপায়ে তাঁহার শিষ্য ও ভক্তদের ভক্তির দৃঢ়তা ও অনুগত্যের পরীক্ষা নিতেন।

একদিন শিষ্যদের তিনি নিকটে ডাকিলেন। হাতে একটি তরবারি নিয়া গভীর স্বরে কহিলেন, “জাখো, আজ থেকে কেউ আর আমার ভোরবেলার ধ্যানজপের পর যেন প্রণাম করিবে না। যে

করবে, আমি তার মস্তক ছেদন করবো। রামদাস কোন মানুষের সঙ্গই যেন সহ্য করিতে পারিতেছেন না। সকলেই মহা শঙ্কিত। স্বামীজী মহারাজকে তাঁহারা যতটা পারেন এড়াইয়া চলিতেছেন।

কয়েকদিন পরে রামদাস আশ্রম ত্যাগ করিলেন। পরনে মাত্র একখানি কোপীন, হাতে একটি তীক্ষ্ণ তরবারী। এই বেশে প্রবেশ করিলেন নিকটস্থ অরণ্যে। যাইবার সময়ে শাসাইয়া গেলেন, “সাবধান, কেউ যেন আমার এই নির্জনবাসের সময় আমার সামনে না যায়, আর আমার চরণ কেউ স্পর্শ না করে।”

আশ্রমিকরা তো ভয়ে জড়োসড়ো। কেহই তাঁহার সঙ্গ নিতে সাহসী হইলেন না। চারিদিকে সংবাদ রটিয়া গেল, স্বামী রামদাস পাগল হইয়া গিয়াছেন। একথা অচিরে স্বামীজীর শিষ্য ডোমগাঁও-এর মহাস্ত কল্যাণের কানে গেল। তৎক্ষণাৎ ব্যস্ত-সমস্ত হইয়া তিনি ছুটিয়া আসিলেন আশ্রমে। কহিলেন, “এ কেমনতরো কথা? স্বামীজী মহারাজ একলা অরণ্যে বাস করছেন, আর তোমরা কেউ তাঁর সঙ্গে গেলে না? আমরা থাকতে তাঁর সেবার ব্যবস্থা হবে না? বেশ, তোমরা না যাও আমি যাবো সেখানে।”

“কিন্তু ভাই, খোলা তলোয়ার নিয়ে স্বামীজী বনে বনে ঘুরে বেড়াচ্ছেন, কেউ প্রণাম করতে গেলেই নিশ্চয় হবে তার শিরশ্ছেদ।” আশ্রমের একজন সতর্ক করিয়া দেয়।

কল্যাণ উত্তরে বলেন, “বেশ তো, গুরু মহারাজের সেবায় এগিয়ে যদি তাঁর হাতে আমার প্রাণ যায়, তবে তা হবে আমার পরম সৌভাগ্য।”

আত্ম বলিদানের জন্য প্রস্তুত হইলেন কল্যাণ। রক্ত-চন্দন ললাটে লেপন করিলেন, মুখে গুঁজিয়া দিলেন পর্ণপত্র, তারপর গুরুর নিকট উপস্থিত হইলেন করজোড়ে।

রামদাস স্বামী প্রথমে রোষ-কষাণ্ডিত নেত্র, ক্রুদ্ধস্বরে বেশ খানিকটা তর্জন-গর্জন করিলেন, বার বার আন্দোলিত করিলেন



তাঁহার তরবারি। কল্যাণ কিন্তু নির্বিবকার। গুরু উদ্গাদই হোন আর যা-ই হোন, তিনি তাঁহার চরণে প্রণাম নিবেদন করিবেনই, তাঁহার সেবায় হইবেন তৎপর।

মূহূর্ত্তমধ্যে রামদাস মহারাজের ক্রোধের অভিনয় বন্ধ হয়। হাতের তলোয়ার দূরে নিক্ষেপ করিয়া পরম স্নেহে কল্যাণকে করেন আলিঙ্গন। ভাব-বিস্ময় কণ্ঠে কহেন, “বৎস, তোমার মত বীর, আত্মোৎসর্গে সদা প্রস্তুত শিষ্যই যে আমার চাই। তাছাড়া কি করে হবে প্রভু রামজীর ধর্ম্মরাজ্য স্থাপন?”

নীলোপস্থ নামে রামদাসজীর এক গৃহী শিষ্য ছিলেন। একবার পরিব্রাজনের পথে ভক্ত সঙ্গে স্বামীজী তাঁহার গৃহে উপস্থিত হন। নীলোপস্থ তখন গ্রামের বাহিরে কি কাজে গিয়াছেন। তাঁহার পত্নী নিরুবাঙ্গি ব্যস্ত-সমস্ত হইয়া উঠিলেন। স্বামীজী ও তাঁহার সঙ্গীদের জন্য তাড়াতাড়ি কিছু ভোজনের ব্যবস্থা করা চাই। এ অঞ্চলে উপর্যুপরি কয়েকদিন ঝড়-জল হইয়া গিয়াছে, ঘরে আলানী কাঠ এক টুকরাও অবশিষ্ট নাই। অথচ স্বামীজী মহারাজকে বেনীক্ষণ ধরিয়া রাখা যাইবে না, এখনি গ্রামান্তরে যাইবার জন্তে তিনি তাড়া লাগাইতেছেন।

নিরুবাঙ্গির মাথায় আলানীর এক বিকল্প বাহির হইল। তৎক্ষণাৎ নিজের তোরঙ্গ খুলিয়া জামা কাপড় শাড়ী ও মূল্যবান শাল প্রভৃতি তুণীকৃত করিলেন, ঢুকাইয়া দিলেন উন্ননে। আলানীরূপে এগুলি ব্যবহার করিয়া পরমানন্দে প্রস্তুত করিলেন স্বামীজীর আহাৰ্য্য।

কিছুকাল পরেই নীলো পস্থ ঘরে ফিরিয়া আসেন। স্বামীজী মহারাজকে গৃহে পাইয়া তাঁহার আনন্দের আর সীমা নাই। বিদ্যার কালে স্বামী-স্ত্রী উভয়ে ভক্তিভরে গুরুর চরণে প্রণাম করিতেছেন, এমন সময় রামদাসজী প্রসন্ন কণ্ঠে কহিলেন, “নীলো পস্থ, তুমি জাগ্রাবান, এমন সাধ্বী স্ত্রী তোমার ঘরে রয়েছে। খোঁজ নিয়ে দেখাও, আমার আহাৰ্য্য তৈরী করতে গিয়ে মাতাজী নিরুবাঙ্গি তোমাদের

মূল্যবান পরিচ্ছদ সব আলিয়ে দিয়েছে। ভালোই করেছে, প্রপঞ্চের মায়া কিছু কেটেছে।”

নীলোপন্থ তো মহা খুশী। যুক্তকরে কহিলেন, “প্রভু, শত শত ভক্ত শিষ্য আপনার সেবার জন্য প্রাণপাত করছে। নিরুবাঙ্গি সে তুলনায় ভেমন কি আর করেছে? যাক্, যাবার আগে আপনি আমাদের আশীর্বাদ করুন। আপনার আশীর্বাদই যে হবে আমাদের পরম পাথের।”

ঝুলি হইতে রামদাসজী একটি ডাব তুলিয়া নিলেন, নীলোপন্থের হাতে এইটি দিয়া কহিলেন, “বৎস, নাও, এই রইলো আমার আশীর্বাদ। আমি জানি দীর্ঘদিন তোমরা অপুত্রক রয়েছো। আমার বরে মাতাজী নিরুবাঙ্গির কোল জুড়ে আসবে একটি শিশুপুত্র। প্রভু রামজীর প্রতি থাকবে তার অচলা ভক্তি।”

অতঃপর সঙ্গীগণ-সহ স্বামীজী মহারাজ ধীরে ধীরে সেখান হইতে নিজ্রাস্ত হইলেন। যথাকালে নিরুবাঙ্গি একটি পুত্র সন্তান লাভ করেন। উত্তরকালে এই পুত্র রামদাস মহারাজের কাছে দীক্ষা লাভ করিয়া ধন্ত হয়।

কল্যাণের গুরুভক্তির আর একটি কাহিনী প্রচলিত আছে। সেবার রামদাস মহারাজ স্থির করিলেন, কিছুদিনের জন্য নির্জনবাসে যাইবেন এবং একটি নিগূঢ় সাধনা সেখানে সমাপ্ত করিবেন। নদীর ওপারে রহিয়াছে এক দূর বিস্তারী অরণ্য, ইহারই এক কোণে পর্ণকুটির বাঁধিয়া স্বামীজী ধ্যানস্থ হইলেন।

কয়েকদিন পরেই ডোমগাঁও হইতে কল্যাণ সেখানে আসিয়া উপস্থিত। গুরুদেবের সঙ্কল্পের কথা শুনিয়া তিনি তো মহা চিস্তিত। বুঝিলেন, একান্তে সাধনভঞ্জন তাঁহার হয়তো ঠিকই চলিয়াছে, কিন্তু তাঁহার নিত্যকার আহাৰ্য্যের ব্যবস্থা কি? এজন্য নিশ্চয় তাঁহাকে কষ্ট পাইতে হইতেছে।

কল্যাণ স্থির করিলেন, এখন হইতে কিছুদিন একবার করিয়া

তিনি নদীর ওপারে স্বামীজীর ধ্যানকুটিরে যাইবেন, নিত্যকার খাবার দিয়া আসিবেন।

আগের দিন রাত্রে এ অঞ্চলে বর্ষার ঢল নামিয়াছিল। আশ্রমের সম্মুখস্থ ময়না নদী তাই ক্ষীতকায়া হইয়া উঠিয়াছে, শ্রোত বহিয়া চলিয়াছে খরবেগে। গুরুগতপ্রাণ কল্যাণ মোটেই দমিবার পাত্র নন। আহাৰ্য্যের পাত্র মাথায় বাঁধিয়া নিলেন। তারপর, জয় জয় রঘুবীর, জয় সমর্থ রামদাস স্বামী, বলিয়া বর্ষা-প্লাবিত নদীগর্ভে দিলেন ঝাঁপ। ওপারে গিয়া অনেক খোঁজাখুঁজির পর গুরুজীর সন্ধান পান, সম্মুখে দাঁড়াইয়া সমাপ্ত করান তাঁহার ভোজন। রামদাসজীর অরণ্যবাসের প্রতিটি দিন কল্যাণকে এই খরশ্রোতা বিপজ্জনক নদী সাঁতরাইয়া পার হইতে হয়।

হনুমন্ত স্বামীর রামদাস-চরিতে সমর্থ রামদাস স্বামীর বহুতর যোগবিভূতির বর্ণনা রহিয়াছে। ইহাদের একটি শিষ্য-প্রধান কল্যাণ সম্পর্কিত।

সেদিন গভীর রাত্রি অবধি স্বামীজী মহারাজ কতকগুলি অভ্যুপদ রচনা করিয়াছেন। শিষ্য-সেবকদের অনেকেই তখন নিদ্রায় অভিভূত। পান-সুপারী চর্কণের অভ্যাস তাঁহার বরাবরই ছিল। সেবকদের ডাকিয়া তুলিয়া কহিলেন, “গাখো তো কোঁটার তেতরে পান-সুপারী আছে কিনা। খানিকটা না চিবুতে পারলে ভালো লাগছে না।”

খুঁজিয়া দেখা গেল, কোঁটার সুপারী যথেষ্টই আছে কিন্তু পান একটিও নাই। “পান ছাড়া শুধু সুপারী কি ক’রে খাওয়া যায়—” এই বলিয়া রামদাস মহা হৈ-চৈ তুলিয়া দিলেন।

এত রাত্রে পাহাড়ে পান কোথায় পাওয়া যাইবে? যদি সংগ্রহ করিতেই হয়, নীচে নামিয়া গ্রামের অভ্যন্তরে যাইতে হইবে, যদি কোন গৃহস্থ বাড়ীতে সন্ধান মিলে। সেবকেরা সবাই এ উহার মুখ চাহিতেছেন, কিন্তু কল্যাণ তখনি উঠিয়া দাঁড়াইলেন। করজোড়ে

কহিলেন, “প্রভু আপনি কিছুকাল অপেক্ষা করুন। আমি নীচের গ্রাম থেকে এখনি কয়েকটি পান সংগ্রহ করে আনছি।”

একথা বলার সঙ্গে সঙ্গে অন্ধকার পাহাড়ী পথ দিয়া তিনি দ্রুত-পদে নীচে নামিতে লাগিলেন।

কয়েক মিনিট পরেই শোনা গেল কল্যাণের আর্ন্ত চীৎকার। একটি মিশ কালো কেউটে সাপের গায়ে পা দিতেই তৎক্ষণাৎ উহা তাহাকে ছোবল মারিয়াছে। রামদাস ও শিষ্য সেবকেরা মশাল নিয়া তখনি সেখানে ছুটিয়া গেলেন। সর্পদষ্ট কল্যাণ তখন ভূমিতে লুটাইয়া পড়িয়াছে। চোখে মুখে অসহ্য যন্ত্রণার ছাপ। মুখ দিয়া অবিরাম ফেন নির্গত হইতেছে।

রামদাস হাঁটু গাড়িয়া শিষ্যের সম্মুখে বসিয়া পড়েন। অশ্রুট স্বরে মন্ত্র উচ্চারণ করিয়া বার বার কল্যাণের দেহে করেন কর-সঞ্চালন, তারপর স্নেহপূর্ণ স্বরে বলিতে থাকেন, “বৎস কল্যাণ, এবার ওঠো—ওঠো।”

অল্পকাল মধ্যেই কল্যাণ চোখ মেলিয়া চান এবং ধীরে ধীরে উঠিয়া বসেন। বাহুজ্ঞান ফিরিয়া পাইয়া আবার উত্তত হন গুরু মহারাজের পান সংগ্রহের জন্ত।

সপ্রশংস দৃষ্টিতে শিষ্যের দিকে চাহিয়া গুরুজী বলেন, “বৎস, আর তোমায় কোথাও যেতে হবে না। এবার আশ্রমে ফিরে চল।”

পথ চলিতে চলিতে একটি তরুণ শিষ্য যুহুস্বরে মন্তব্য করেন, “এত গভীর রাতে, এভাবে একলা এমন করে চলে আসাটা কল্যাণের উচিত হয় নি।”

রামদাস স্বামী সহাস্তে উত্তর দেন, “জ্বাখো, যা ঘটেছে রামজী কৃপাতেই ঘটেছে। আমরা নিমিত্ত মাত্র। রামজী আমায় ইঙ্গিত দিয়েছিলেন, কল্যাণের আয়ু আর নেই।”

“সেকি প্রভু, তা কেনেও আপনি এই অন্ধকারের ভেতর বনপথে ওকে যেতে দিলেন?” সবিস্ময়ে প্রশ্ন করেন এক সেবক।

“সর্পাঘাতে ওর জীবনান্ত হবার কথা। অথচ ঈশ্বরের কাছে ওকে অনেক কিছু করতে হবে। তাইতো পান-সুপারীর জন্ত চেষ্টা-মেচি করে ওকে পথে নামালাম। কালসাপ ওকে দংশন করবে তা আমি জানতাম। আমার কাছাকাছি থাকে কালে এই দুর্ঘটনা হয়ে ভালই হলো। রামজীর কৃপায় ওকে বাঁচাতে পারলাম।”

রামদাস স্বামীর অন্ততম জীবনীকার ভীমস্বামী শিরগাভ্কার একটি মনোরম আখ্যায়িকা বর্ণনা করিয়াছেন—

সেবার বারাণসীর এক প্রখ্যাত পণ্ডিত ঘুরিতে ঘুরিতে মহারাষ্ট্রে উপনীত হন। ইনি একজন প্রসিদ্ধ বিচার-মন্ত্ৰ, যেখানেই যান সোৎসাহে সাধুদের তর্কযুদ্ধে আহ্বান করেন। আত্মবিশ্বাস ইহার অত্যন্ত বেশী। সদাই গলদেশের উপবীতের সঙ্গে প্রকাশ্যে বুলানো থাকে একটি তীক্ষ্ণ ছুরিকা, দম্ভভরে এটি সবাইকে দেখাইয়া বলেন, “শাস্ত্র বিচারে যখন কেউ আমায় পরাস্ত করবে, তখনই তার সম্মুখে এই ছুরিকা দিয়ে নিজের হাতে আমি কেটে ফেলবো আমার জিহ্বা।”

মহারাষ্ট্রে লোকের ঘরে ঘরে তখন রামদাস স্বামীর ‘দাসবোধ’ পঠিত হয়, স্বামীজীর বিজ্ঞাবত্তা ও সাধন-বিভূতির প্রসিদ্ধিও নবাগত পণ্ডিতটি শুনিয়াছেন। একদিন তিনি সদলবলে ছাকলে আসিয়া উপস্থিত। সংবাদ দিলেন, স্বামীজীর সহিত অবিলম্বে তিনি তর্কতর্ক অবতীর্ণ হইতে চান।

রামদাস ব্যস্ত-সমস্ত হইয়া শিষ্যদের कहিলেন, “যাও, যাও, এখনি ভোমরা ঐ মহাত্মাকে সসন্মানে আশ্রমে নিয়ে এসো। মশাল আর বাত্ৰভাণ্ড সঙ্গে নিতে ভুলো না। বারাণসীর এমন কৃতী পণ্ডিত। দেখো, কোন দিক দিয়ে যেন তাঁর অমর্যাদা না হয়?”

সাড়ঘরে শোভাযাত্রা করিয়া বারাণসীর তর্কশূরকে আশ্রমে

আনয়ন করা হয়। রামদাস স্বামী স্বয়ং অগ্রসর হইয়া তাঁহাকে অভ্যর্থনা ও অভিবাদন জ্ঞাপন করেন। কিন্তু স্বামীজীর অভিবাদনের দিকে পণ্ডিতের কোন লক্ষ্যই নাই। দর্পভরে কহেন, “আমার সময় অতি মূল্যবান। আর বিলম্ব না করে, আপনি আমার প্রশ্নগুলির উত্তর দিন, অবশ্য যদি সমর্থ হন।”

রামদাস সহাস্তে কহিলেন, “বিজ্ঞা মানেই সেই পরমবস্তু বা হৃদয় কন্দরকে আলোকিত করে। তবে শাস্ত্রপারঙ্গম হয়েও আপনি এমন অন্ধকারে ডুবে রয়েছেন কেন, বলুন তো?”

রোষে পণ্ডিতের ছই চোখ জ্বলিয়া উঠে, ছঙ্কার দিয়া বলেন, “বটে, এতো ঔদ্ধত্য তোমার? এখানে কার সম্মুখে দাঁড়িয়ে তুমি কথা বলছো, জানো?”

“খুব জানা আছে, পণ্ডিতবর। এবার একটু অনুগ্রহ করে আপনি আপনার শাস্ত্রতত্ত্বের প্রশ্ন উত্থাপন করুন, যথাযথ সব উত্তর এখনি পাবেন।” সবিনয়ে নিবেদন করেন রামদাস।

ক্রুদ্ধ উত্তেজিত পণ্ডিত তাঁহার প্রশ্নবাণ নিক্ষেপ করিলেন। সঙ্গে সঙ্গে স্বামী রামদাস প্রদর্শন করিলেন তাঁহার এক যোগবিভূতি। বহুলোক তাঁহাদের সম্মুখে ভীড় করিয়া আছে। এই ভীড়ের ভিতর হইতে একটি নিম্নশ্রেণীর অর্দ্ধশিক্ষিত মানুষকে রামদাস কাছে ডাকিলেন। কিছুক্ষণ একদৃষ্টে তাহার দিকে দৃষ্টি নিবদ্ধ রাখিয়া তাহার মধ্যে করিলেন শক্তি সঞ্চালন। এবার দৃঢ় কণ্ঠে দিলেন নির্দেশ, “বৎস, পণ্ডিতজীর সব ক’টা শাস্ত্রীয় প্রশ্নের যথাযথ উত্তর তুমি দিয়ে দাও।”

সর্বসমক্ষে ঘটিতে দেখা যায় এক অবিদ্বান্স কাণ্ড। অর্দ্ধশিক্ষিত লোকটির মুখ দিয়া অবিরলধারে নিঃসৃত হইতে থাকে শাস্ত্রের নানা ছরুহ তত্ত্বের ব্যাখ্যা-বিশ্লেষণ। বারাণসীর পণ্ডিত মহারাজ তো বিস্ময়ে হতবাক। ইতিমধ্যে তিনি বুঝিয়া নিয়াছেন, রামদাস এক সিদ্ধ মহাত্মা। অলৌকিক প্রজ্ঞা ও অলৌকিক শক্তির তিনি

অধিকারী। এ হেন ব্যক্তির সমক্ষে বিচার দণ্ড প্রকাশ করিয়া পণ্ডিত মারাত্মক ভুল করিয়াছেন।

রামদাসের চরণে পতিত হইয়া বার বার তিনি ক্ষমা ভিক্ষা মাগিতে থাকেন। নিজের জিহ্বা কর্তনের জন্তও উগ্ৰত হন।

উপবীতে ঝুলানো ছবিকাটি তৎক্ষণাৎ দূরে নিক্ষেপ করিয়া রামদাসজী পণ্ডিতকে কহিলেন, “আপনাকে অনেক আগেই আমি ক্ষমা করেছি পণ্ডিতবর। মনে রাখবেন, আপনার জিহ্বা, আপনার দেহ, সবই রামজীর। ছেদন করতে হয় তিনি করবেন। আপনার দেহ-মন-আত্মা কোন কিছুর ওপরই তো আপনার অধিকার নেই। ভালোই হলো, আপনার দর্প এবার ভূমিসাৎ হলো, এবার সত্যকার বিজ্ঞা এলো আপনার আধারে।”

এই পণ্ডিত অতঃপর দীনভাবে রামদাসের শিষ্যত্ব গ্রহণ করেন। বারাণসীতে ফিরিবার সময় সাগ্রহে রামদাসের রচনা দাসবোধের একটি প্রতিলিপি তিনি সঙ্গে নিয়া যান।

সিদ্ধপুরুষ বলিয়া রামদাসের তখন খ্যাতি রটিয়াছে, একটি সুসম্বন্ধ ভক্তিবাদী সম্প্রদায়ের নেতা রূপেও মহাবাহুে তাঁহার বিরাত মর্যাদা। এই সময়ে এক শুভলগ্নে রামদাসের সহিত মিলন ঘটে রাজা শিবাজী ভোঁসলের। এই মিলন যেন মণিকাঞ্চনের সংযোগ। রামরাজ্য, ধর্মরাজ্য, স্থাপনের যে স্বপ্ন রামদাস এতদিন দেখিয়া আসিতেছেন, যে স্বপ্নকে রূপায়িত করার জন্ত জীবন উৎসর্গ করিয়াছেন, রাজা শিবাজী হন সেই মহান ঐশী কর্মের ধারক ও বাহক। এই দুইয়ের মিলনে সারা মারাঠায় প্রবাহিত হয় আত্মিক শক্তি ও ক্ষাত্রশক্তির যুগ্মধারা। সারা ভারতেও ইহার ফল হয় সুদূরপ্রসারী। এক ও অখণ্ড ধর্মরাজ্যের পরম সম্ভাবনার আশা ছড়াইয়া পড়ে দেশের দিকে দিকে।

শিবাজীর অভ্যুদয়ের দিকে স্বামী রামদাস নিয়ত তাঁহার দৃষ্টি নিবদ্ধ রাখিয়াছেন। লক্ষ্য করিয়াছেন ঔরংজেবের নগণ্য ‘পার্বত্য মুষিক’ শিবাজী ভৌসলে ধীরে ধীরে গড়িয়া তুলিয়াছেন একটা দৃঢ় মূল স্বাধীন রাজ্যের বনিয়াদ। শুধু তাই নয় এই রাজ্য যাহাতে ধর্মকৃত হয়, উচ্চাধর্মে অনুপ্রাণিত হয় সেজন্ত তাঁহার ব্যাকুলতার সীমা নাই। অন্তরে অন্তরে রামদাস বুঝিয়া নিয়াছেন, শিবাজীকে তাঁহার সাহায্য নিতেই হইবে। তাঁহার কাছে আসিতেই হইবে। কিন্তু এখনই নয়, আরো কিছুকাল রামদাসকে অপেক্ষা করিতে হইবে, লগ্ন সমাগত হইলেই শিবাজী আকুল আগ্রহ নিয়া ছুটিয়া আসিবেন, গ্রহণ করিবেন রামদাসের পরমাশ্রয়।

সৈন্যবল ও রাজ্যপরিধির বিস্তারের সঙ্গে সঙ্গে শিবাজী ভৌসলের অন্তরেও জাগিয়াছে পরম কল্যাণের ভাবনা, আত্মিক উজ্জীবনের জন্ত তিনি ব্যগ্র হইয়া উঠিয়াছেন। যখন যে সাধু মহাত্মার সন্ধান পান, সাগ্রহে তাঁহাকে দর্শন করেন, সাধ্যমত করেন সেবা পরিচর্যা। সাধারণ সাধু-সন্ন্যাসী হইতে গুরু করিয়া পদ্ধারপুরের সাধু তুকারামজীর সঙ্গে, কোন কিছুই শিবাজী বাদ দেন নাই। কিন্তু মনের মানুষের সন্ধান, চিহ্নিত সদৃশর সন্ধান এখনও তিনি পান নাই।

রামদাস স্বামীর আদর্শ ও সংগঠনের নানা সংবাদ শিবাজী রাখেন, তাঁহার মাহাত্ম্য ও যোগৈশ্বর্যের খ্যাতিও তাঁহার অজানা নয়। এই মহাপুরুষের আশ্রয় গ্রহণের জন্ত অন্তর তাঁহার বড় ব্যাকুল হইয়া পড়িয়াছে। রামদাস তখন কোন মঠেই স্থায়ীভাবে বাস করিতেন না। স্বেচ্ছামত ঘুরিয়া বেড়াইতেন। তাই কিভাবে কোথায় মহাত্মার দর্শন করা যায় শিবাজী মাঝে মাঝে ভাবিতেছিলেন।

নরসোমল নাথ নামে শিবাজীর এক কর্মচারী সেবার খবর দেন, স্বামীজী এখন ছাকলের মঠে অবস্থান করিতেছেন। কয়েকজন পার্শ্বরক্ষী নিয়া শিবাজী তখন সেখানে ছুটিয়া যান। কিন্তু সাক্ষাৎ



হইল না। শুনিলেন, রামদাস স্বামী তখন সে স্থান ত্যাগ করিয়া অন্ত্র চলিয়া গিয়াছেন।

ছাফলের মঠটি ছোট হইলেও বড় মনোরম। শিবাজী সাধুদের জিজ্ঞাসা করিলেন, কিভাবে কাহার আনুকূল্যে, এই সুন্দর মঠটি নিশ্চিত হইয়াছে।

সাধুরা সবিস্ময়ে কহেন, “সে কি মহারাজ, আপনি কি জানেন না, এটি যে আপনার প্রদত্ত অর্থেই তৈরী হয়েছে। কয়েক বৎসর আগে পুনাতে, আপনার পুরোহিতের ভবনে গিরি গোসাবি নাসিখর নামে এক কীর্তনিয়া রামলীলা কীর্তন করছিলেন। কীর্তন শুনে খুশী হয়ে আপনি তাঁকে কিছু অর্থ দান করতে চান। ঐ কীর্তনিয়া রামদাস মহারাজের একজন পরম ভক্ত। তিনি অনুরোধ জানান— মহারাজের প্রতিশ্রুত অর্থ যেন রামদাস স্বামীজীকেই দেওয়া হয় ছাফলের রামমন্দির নির্মাণের জন্য। এটিই তো সেই মন্দির। আপনার সরকার থেকে তিন শত স্বর্ণমুদ্রা দেওয়া হয়েছিল এই পবিত্র কাজের জন্য।”

এ সংবাদে শিবাজী হত হইলেন। মন্দিরের চারপাশে ঘুরিয়া দেখিলেন, নদীর খরশ্রোত উহার ভিত্তির দিকে অগ্রসর হইতে চাহিতেছে। সরকারী অধিকর্তাকে ডাকিয়া তখনি তিনি হুকুম দিলেন, “যে কোন উপায়ে এই নদীর শ্রোত-ধারাকে ঘুরিয়ে দাও, স্বামীজীর এই মন্দিরকে রক্ষা করো। এ জন্য যে কোন অর্থব্যয়ে কার্পণ্য করো না।”

নির্দেশমত কার্য সম্পন্ন হইতে বিলম্ব হয় নাই। ফলে ছাফলের ঐ মন্দির ধ্বংসের হাত হইতে রেহাই পায়।

রামদাস স্বামীর কাছে শিবাজীর সব সংবাদই যথাসময়ে পৌঁছিল, ইহার কিছুদিন পরে শিবাজী মাহলীতে একটি ধর্ম্মানুষ্ঠানে

যোগ দিতে গিয়াছেন, সেখানে এক শুভ মুহূর্তে তাঁহার হাতে আসিল রামদাস স্বামীর এক ক্ষুদ্র লিপি। এ লিপি পাইয়া রাজা মহা উৎফুল্ল হইয়া উঠেন, সঙ্গে সঙ্গে মহাত্মাকে উত্তর দেন :

“হে মহাতাপস, আমি আপনার চরণে অপরাধী। আপনার হৃদয়ে রয়েছে অসীম করুণা—আপনার আশিস্পূত লিপি আমায় ভরপুর করে দিয়েছে পরম আনন্দে। কি ভাষায় আমি তার বর্ণনা দেব ? আপনি কৃপা করে আমার গুণগান করেছেন, কিন্তু আমি জানি আমি মোটেই তার উপযুক্ত নই। বহুদিন যাবৎ আপনার দর্শনের অভिलाষী রয়েছি, এবং সুযোগ পেলে এখনই আমি উপস্থিত হতে পারি আপনার সকাশে। হে প্রভু, আপনি কি আমায় গ্রহণ করবেন ? আমার তৃষ্ণা কি করবেন দূর ?”

এই পত্র পাঠাইয়া দিয়া পরদিনই শিবাজী তাঁহার রক্ষীদল নিয়া উপনীত হন ছাফলে। সেখানে গিয়া শুনিতে পান, রামদাস মহারাজ তখন সিংগন-বাড়ীতে অবস্থান করিতেছেন। মঠের সাধুরা তাঁহাকে বলেন, “মহারাজ, এই সময়ে স্বামীজীর কাছে আপনার যাওয়া ঠিক হবে না। কারণ, এখন তিনি হুম্মানজীর মন্দিরে একটি বিশেষ পূজা অনুষ্ঠানে ব্যস্ত। পূজা অর্চনা সমাধা করে স্বামীজী মহারাজ নিজের হাতে বহুতর ভোগরাগ প্রস্তুত করবেন। তারপর মারুতীজীকে তা নিবেদন করে দিনশেষে বসবেন প্রসাদ গ্রহণের জন্য। আপনি বরং পরে আর কোনদিন তাঁর সঙ্গে সাক্ষাৎ করুন।”

শিবাজী একথা মানিলেন না। কহিলেন, “হৃদয় বড় ব্যাকুল হয়ে পড়েছে, আর ধৈর্য ধারণ করা আমার পক্ষে সম্ভব নয়। তাছাড়া, আজ তো বৃহস্পতিবার—গুরুবার, এই শুভদিনেই স্বামীজীকে আমি দর্শন করবো।”

রক্ষীদল পশ্চাতে রাখিয়া তাড়াতাড়ি তিনি অগ্রসর হন। ছইজন সঙ্গী নিয়া সিংগন-বাড়ীর মঠে উপস্থিত হন, লুটাইয়া পড়েন রামদাসজীর চরণতলে।

রামদাস স্বামীর হস্তে তখনো ধৃত রহিয়াছে শিবাজীর সত্তাপ্রাপ্ত লিপি। প্রসন্ন মধুর কণ্ঠে কহিলেন, “রাজা, আপনি আসবেন তা আমি জানতাম। কিন্তু জিজ্ঞেস করি, সাক্ষাতের জন্য আপনি এত ব্যগ্র, কিন্তু আরো আগে কেন আপনার সঙ্গে দেখা হয়নি?”

“হৃভাগা আমি, তাই অভিলাষ থাকলেও এতদিন বঞ্চিত ছিলাম আপনার দর্শনে। প্রভু, এ অনিচ্ছাকৃত ক্রটির জন্য আমায় আপনি মার্জনা করুন। এখন দর্শন যখন মিলেছে, আর আমায় দূরে সরিয়ে রাখবেন না। অবিলম্বে দীক্ষা দিয়ে আমায় উদ্ধার করুন।”

শাস্ত্রীয় বিধান মত দীক্ষা অনুষ্ঠান সম্পন্ন হইয়া গেল। চৈতন্যময় মন্ত্র গ্রহণের পর গুরু মহারাজের কাছে শিবাজী চিরতরে আত্মসমর্পণ করিলেন। ১৬৪৯ খৃষ্টাব্দের এই শুভদিন, রামদাস ও শিবাজীর মিলনের দিন, মহারাষ্ট্রের ধর্ম-সংস্কৃতির ইতিহাসে স্মরণীয় হইয়া আছে।

গুরুর ধর্মরাজ্য স্থাপনের পরিকল্পনায় শিবাজীর অবদান যথেষ্ট। এই পরিকল্পনার পিছনে স্বামী রামদাস জোগাইয়াছেন অধ্যাত্মশক্তি, আর শিবাজী উৎসর্গ করিয়াছেন তাঁহার ক্ষাত্রতেজ ও অর্থবল। শিঘ্রই গ্রহণের পর হইতে শিবাজী তাঁহার রাজ কোষাগার উন্মুক্ত করেন নব নব মঠ-মন্দিরের প্রতিষ্ঠায়। বড় বড় জায়গীর দিয়া এই ধর্মকেন্দ্রগুলিকে দৃঢ় ভিত্তিতে স্থাপন করিতে তিনি সাহায্য করেন। গুরু ও শিষ্যের এই মহান যৌথ প্রয়াস সারা ভারতের রাষ্ট্রচিন্তা ও ধর্মাদর্শের সম্মুখে সেদিন উন্মোচন করে এক নূতন দিগন্ত, সহস্র সহস্র ধর্মপ্রাণ আদর্শবাদী মানুষের বুকে জাগাইয়া তোলে বিরাট প্রত্যাশার আলো।

রামদাস স্বামী একদিন শিবাজীকে নিভৃতে ডাকিয়া কহেন, “শিবাজী, গুরুত্বপূর্ণ একটা কাজ তুমি অসম্পূর্ণ রেখেছো, এবার সেটা শেষ করতে হবে।”

“কি সে কাজ, প্রভু, আদেশ করুন, সর্বশক্তি দিয়ে আমি তা পালন করবো।”—যুক্তকরে নিবেদন করেন শিবাজী।

“তোমার রাজ্যাভিষেক তো এখনো হয় নি। শাস্ত্রীয় বিধান অনুযায়ী এ অনুষ্ঠান সম্পন্ন করতে হবে। ধর্মরাজ্যের অধীশ্বর তুমি। শুধু মারাঠাই নয় সারা ভারতভূমি আজ তোমার মুখের দিকে তাকিয়ে আছে। তোমার এই শাসনকে শাস্ত্রীয় সমর্থনের ভিত্তিতে আমি দাঁড় করাতে চাই। তোমার শক্তি সত্যকার ক্ষাত্রশক্তি বলে গণ্য হোক, তাও আমি চাই। ভারতের শ্রেষ্ঠ শাস্ত্রবিদ ব্রাহ্মণ, সাধু-মহাত্মা, সমাজনেতা ও জনগণের সমক্ষে—প্রাচীন ভারতীয় প্রথায়—তোমার অভিষেক হোক। পবিত্র যজ্ঞ হোম সম্পন্ন হোক। অবিলম্বে এর উদ্বোধন আয়োজন করো।”

গুরুর আদেশ শিরোধার্য্য করিয়া শিবাজী তোসলে অচিরে এ কাজে ব্রতী হন। কাশীধামে তখন অশেষ শাস্ত্রবিদ গাঙ্গা ভট্টের প্রবল প্রতাপ। বেদের কণ্ঠকাণ্ড ও জ্ঞানকাণ্ড ছুইয়েতেই তিনি পারঙ্গম। তাঁহাকেই অভিষেক ক্রিয়ার প্রধান আচার্য্য রূপে মনোনীত করা হইল। ভারতের সর্বত্র ধর্মসংস্কৃতি ও সমাজের নেতাদের কাছে প্রেরিত হইল আমন্ত্রণ পত্র। সাড়শ্বরে ও শাস্ত্রোক্ত বিধান অনুযায়ী শিবাজী মহারাজের অভিষেক উৎসব সুসম্পন্ন হইল।

কাজকর্ম শেষ হইয়া গিয়াছে, পণ্ডিতবর গাঙ্গা ভট্ট আগামী এক সপ্তাহের ভিতর বারাণসীর দিকে রওনা হইবেন। হঠাৎ একদিন ভট্টজী দেখেন, প্রত্যাষে উঠিয়া শিবাজী ভক্তিভরে সর্বপ্রথমে মারাঠী ভাষায় লিখিত এক ধর্মগ্রন্থ পাঠ করিতেছেন।

“মহারাজ, এই মারাঠী পুঁথি কি রোজই আপনি এ সময়ে পাঠ করেন?”—প্রশ্ন করেন ভট্টজী।

“হ্যাঁ, পণ্ডিতবর, এটি যে আমার প্রাত্যহিক কাজ এবং প্রধান কৃত্য।”

“কি নাম এ গ্রন্থের? কার রচিত? কোন্ তত্ত্ব আছে এতে খুলে বলুন তো?”

“এ গ্রন্থ মারাঠীতে লেখা, নাম দাসবোধ, মহাত্মা রামদাস স্বামী আমার গুরু মহারাজ এর রচয়িতা।”

“এ বড় অদ্ভুত কথা মহারাজ। আপনার মত বিচক্ষণ, শাস্ত্র-প্রেমিক ব্যক্তির একি রুচিহীনতা? আপনার পক্ষে এ গ্রন্থপাঠ তে মোটেই শোভন নয়। বৈদিক ভাষা, সংস্কৃত ভাষা, তাই তো হবে আপনার আমার উপজীব্য। বেদ-বেদান্ত উপনিষদ সব কিছু ছেড়ে শেষটায় আপনি মারাঠী দাসবোধ নিয়ে মেতে উঠলেন? ছিঃ।”

মহারাজ শিবাজী সবিনয়ে উত্তর দেন, “পণ্ডিতবর, এ পুঁথি মারাঠীতে লেখা হলেও, আমাদের প্রাচীন শাস্ত্র থেকেই এর তত্ত্ব সঙ্কলিত হয়েছে। আমি মনে করি—প্রজ্ঞাবান, যোগসিদ্ধ মহাপুরুষের রচিত এ গ্রন্থ সব মানুষেরই কল্যাণ-সাধনে সক্ষম। তাই এটা আমার নিত্য পাঠ্য।”

গাগা ভট্ট শিবাজীর কথা দেখিয়া শ্লেষাত্মক হাসি হাসিলেন। এ প্রশঙ্গ নিয়া আর ঘাঁটাঘাঁটি করিলেন না।

শিবাজী কিন্তু ভট্টজীর কথাগুলি বিস্মৃত হইলেন না। মনে মনে স্থির করিলেন, পণ্ডিতবরকে অচিরে সমুচিত শিক্ষা দিয়া তবে মহারাষ্ট্র হইতে ছাড়া হইবে।

ছুই দিন পরেই রাজপ্রাসাদের চত্বরে স্বামী রামদাসের এক ধর্মসভার অনুষ্ঠান বসিল। এই সভায় প্রধান অঙ্গ—দাসবোধের ব্যাখ্যা ও রামলীলা কীর্তন। গাগা ভট্ট এবং অগাশ্র বড় পণ্ডিতদেরও এই সভায় নিমন্ত্রণ করা হইল।

সভা শুরু হইয়াছে। ইষ্টনাম ও ইষ্টলীলা গাহিতে গাহিতে স্বামী রামদাস দিবাভাবে উদ্দীপিত হইয়া উঠিলেন। কখনো তিনি হাসিতেছেন, কখনো বা কাঁদিতেছেন—এ যেন মহাভাবের উৎসারক এক অনির্বচনীয় অবস্থা। অগণিত শ্রোতা ও দর্শনার্থী এই কৌশলবস্ত

সর্বভাগী মহাপুরুষের দিকে নিনিমেষে চাহিয়া আছে। তাঁহার ভাব-  
রসের উত্তাল তরঙ্গ ছলিতেছে, উঠিতেছে, নামিতেছে। রামদাসের  
এই লীলা বর্ণনা যেন জীবন্ত। ভাববিহ্বল শ্রোতাদের নয়ন সম্মুখে  
রাম, সীতা, লক্ষ্মণ, ভরত আর মাকতী এক একটি মূর্তি যেন ভাস্বর  
হইয়া ফুটিয়া উঠিতেছে। ভাব ও তত্ত্বের মিশ্রণে রচিত হইয়াছে  
দিব্যালোকের অপরূপ পরিমণ্ডল।

গাঙ্গা ভট্ট অনিমেষ নয়নে এই ভাবময় ইন্দ্রজালের দিকে  
তাকাইয়া আছেন, আর হৃদয়ের অন্তস্তল হইতে উদ্গত হইতেছে  
এক ছনিবার আকৃতি। কোনমতে পণ্ডিত ধৈর্য্য ধরিয়া রহিলেন।  
তারপর সভার মধ্যে আবেগভরে ছুই হাতে জড়াইয়া ধরিলেন স্বামী  
রামদাসকে। গদগদ কণ্ঠে কহিলেন, “স্বামীজী, আমি আপনার  
কাছে মার্জনা ভিক্ষা চাই।”

“পণ্ডিতবর, না-না, এসব কথা বলে আমার পাপের পঙ্কে  
ডোবাবেন না।” বিনয়নম্র বচনে বলেন স্বামী রামদাস।

“না স্বামীজী, আমি সত্যই অপরাধী। আপনি যে কত বড়  
জ্ঞানী, কত বড় প্রেমিক পুরুষ, তা আমি বুঝতে পারি নি। আপনার  
মূল্য বুঝতে আমি ভুল করেছিলাম, আজ এই সভায় আপনার  
সত্যকার রূপ আমি চিন্তে পেরেছি।”

বারাণসীতে কিরিয়া গিয়াও স্বামী রামদাসের দিব্যোজ্জ্বল স্মৃতি  
গাঙ্গা ভট্ট দীর্ঘদিন ভুলিতে পারেন নাই। এই মারাঠী সাধকের  
প্রতি তাঁহার শ্রদ্ধা চিরদিন অটুট ছিল।

রামদাস স্বামীর অন্ততম জীবনীকার ভীমস্বামী সিরগাভকার  
স্বামীজীর যোগবিভূতির এক অত্যাশ্চর্য্য কাহিনী বর্ণনা করিয়াছেন।  
কয়েকটি শিশুসহ স্বামীজী তখন গ্রাম হইতে গ্রামান্তরে পরিভ্রাজন  
করিতেছিলেন। সেদিন একটি গ্রামের উপাস্তে তাঁহার বিজ্ঞান

করিতেছেন। পাশেই রহিয়াছে একটি শ্মশান। হঠাৎ এক সত্ত্ব বিধবার আর্ষ কান্না ও চীৎকার স্বামীজীর কানে গেল। বড় মশ্মভেদী এই কান্না। তাড়াতাড়ি শিষ্যদের নিয়া তিনি শ্মশানে ছুটিয়া যান। গিয়া দেখেন স্থানটি লোকে লোকারণ্য—গ্রামের পাটেল মারা গিয়াছে। এইমাত্র মৃতদেহ সেখানে আনা হইয়াছে। পাটেলের স্ত্রীর ললাট সিন্দুরলিপ্ত, পরিধানে লালপেড়ে একটি নূতন শাড়ী, সতীক্ৰমে স্বামীর সহমরণে যাইতে তিনি প্রস্তুত। শাস্ত্রীয় অনুষ্ঠান শেষে চিতায় আরোহণ করিতে যাইবেন, এমন সময় সত্ত্ব বিধবা কান্নায় ভাঙ্গিয়া পড়েন, স্বামীর মৃতদেহটি জড়াইয়া ধরিয়া বিলাপ করিতে থাকেন।

বড় মশ্মভুদ এই দৃশ্য। অসহায়া বিধবার ক্রন্দনে রামদাস স্বামীর হৃদয় বিগলিত হইল, মুহূর্ত্তে প্রকাশিত হইল করুণাঘন রূপ। অগ্রসর হইয়া কহিলেন, “মাস্তি, তুমি শাস্ত হও। ভয় নেই, রামজীর কৃপায় তোমার স্বামী আবার তাঁর প্রাণ ফিরে পাবেন।”

শবের পাশে কিছুক্ষণ ধ্যান-নিমীলিত নেত্রে রামদাস উপবিষ্ট থাকিলেন, তারপর কমণ্ডলু হইতে ছিটাইয়া দিলেন এক অঞ্জলি পবিত্র বারি। সঙ্গে সঙ্গেই দেখা গেল এক রোমাঞ্চকর দৃশ্য। মৃত পাটেল ধীরে ধীরে চোখ মেলিলেন।

জনতা তখন আনন্দে উৎফুল্ল হইয়া স্বামী রামদাসকে ঘিরিয়া ধরিয়াছে। আর স্বামীজীর শিষ্যগণ বার বার উচ্চারণ করিতেছে জয়ধ্বনি—জয় জয় সমর্থ রঘুবীর—জয় জয় সমর্থ রামদাস।

পাটেলের স্ত্রী এবার স্বামীজীর পা'ছুটি জড়াইয়া ধরেন। সজল চক্ষে মিনতি করেন, “প্রভু, দয়া যদি একবার করেছেনই, তবে এই দাসীর উদ্ধারও আপনাকেই করতে হবে। আমার স্বামী আর আমাকে আপনি দীক্ষা দিন। আপনার পরমাজ্ঞা থেকে রামজীর নামজপ করে বাকী দিন ক'টা কাটিয়ে দিই।”

রামদাস প্রশান্ত স্বরে কহেন, “কিন্তু মা, আমি তো প্রস্তুতি ছাড়া

কাউকে দীক্ষা দিইনে। আমার পা ছাড়া, শান্ত হয়ে উঠে বসো। জরুরী কাজ আছে আমার, এখনি আমায় যেতে হবে।”

“প্রভু, প্রস্তুতি কাকে বলে আমি জানিনে। কিন্তু আমার অন্তরাআ কেবলি ডেকে বলছে, আপনিই আমার উদ্ধারকর্তা। বেশ, আপনি চলে যাচ্ছেন যান। আমি বাধা দেবো না। কিন্তু জানিয়ে রাখছি, আজ থেকে আমি আমরণ উপবাস ব্রত গ্রহণ করলাম। যে ক’টা দিন বাঁচি, কাটাবো প্রভু রামজীর ধ্যানে। আমি যদি সত্যকার সতী হই, আপনাকে আমায় উদ্ধার করতে আবার আসতেই হবে।”

রামদাস স্বামী অতঃপর কার্যান্তরে চলিয়া যান। কিন্তু ভক্তি-মতী পাটেলের জ্বর সঙ্কল আবার তাঁহাকে এই গ্রামে টানিয়া আনে। একমাস পরে এখানে আসিয়া পাটেল ও তাহার জ্বীকে তিনি দীক্ষা দান করেন।

নিজের এক জন্মদিনে শিবাজী মহারাজ ছাফল মঠে রামদাসজীর আশীর্বাদ নিতে আসিয়াছেন। সঙ্গে আনিয়াছেন গুরুর জন্ত কয়েকটি মূল্যবান আঙুরাখা ও শাল।

প্রণাম ও কুশল প্রদানের পর উভয়ে নানা কথাবার্তা বলিতেছেন। বিশিষ্ট ভক্ত ও শিষ্যেরা আশেপাশে দণ্ডায়মান। হঠাৎ শিবাজী লক্ষ্য করিলেন, গুরুদেবের গায়ের উত্তরীয় কোঁপীন সব একেবারে ভেজা। মনে হয়, এই মাত্র তিনি যেন নদীতে স্নান সমাপন করিয়া আসিয়াছেন। সেবকেরা সবাই বিস্ময়ে হতবাক। স্বামীজী তো স্নান তর্পণ সূর্যোদয়ের অনেক পূর্বেই সারিয়াছেন, তারপর পরিধান করিয়াছেন তাহাদের দেওয়া শুষ্ক আঙুরাখা ও কোঁপীন। এমনভাবে ক্রি করিয়া হঠাৎ তাহা জলসিক্ত হইল ?

কোতুংহলী হইয়া শিবাজী প্রশ্ন করিলেন, “প্রভু, বলুন তো কি



এর রহস্য। নদীর জল এলো কোথা থেকে, কি করেই বা আপনা গুণ্ণবস্ত্র ভিজিয়ে দিল?”

“না, মহারাজ, নদীর জল নয়। এ সব ভিজিয়েছে সমুদ্রের জলে এই ছাখে।” মুচকি হাসি হাসিয়া রামদাসজী মহারাজের অঞ্জলি টালিয়া দিলেন উত্তরীয় নিংড়ানো কিছুটা জল।

এ জল মুখে দিতেই শিবাজী চমকিয়া উঠিলেন। তাই তে এ যে ঘোর লবণাক্ত, নদীর জল তো নয়—সমুদ্রের জলই বটে।

সপ্রশ্ন দৃষ্টিতে গুরুর দিকে তাকাইতেই তিনি কহিলেন, “মহারাজ আজকের তারিখটা তুমি বিশেষভাবে মনে করে রেখো। ঠি পনের দিন পরে এই সাগরজলের রহস্য উন্মোচিত হবে। তৎ আশ্রমে এলে সব টের পাবে।”

নির্দ্ধারিত দিনে শিবাজী আবার ছাফলে আসিয়া উপস্থিত দেখিলেন, একটি ধনী বণিক স্বামীজীর সহিত নিভূতে বসিয়া কথাবার বলিতেছেন। শিবাজীকে দেখিয়াই গুরু স্নেহভরে তাঁহাকে কান ডাকিলেন। সহাস্ত্রে কহিলেন, “মহারাজ, সেদিনকার সাগরজলে রহস্য, আজ বুঝা গেল। ইনি হচ্ছেন রাজাপুরের মুঞ্জেরী, আমি একজন আশ্রিত শিষ্য। এঁর মুখেই শোন সব কথা।”

মুঞ্জেরী এতক্ষণ স্বামীজীকে যে কাহিনী বলিতেছিলেন, শিবাজী কাছে করিলেন তাহারই পুনরাবৃত্তি। মারাঠার উপকূল বাণিজ্যে অশ্রুতম প্রধান বণিক এই মুঞ্জেরী। পনের দিন আগে জাহাজভা মালপত্র নিয়া তিনি সমুদ্রপথে চলিতেছিলেন, হঠাৎ ঝড়ের কবলে পড়িয়া জাহাজটি জলমগ্ন হইতে থাকে। মুঞ্জেরী এই সময়ে গুরুদে রামদাসজীর কথা স্মরণ করিয়া প্রাণপণ চীৎকারে তাঁহাকে ডাকিতে থাকেন, ধনপ্রাণ রক্ষার প্রার্থনা জানান। এই সময়ে জাহাজে খোলের উপরে জ্যোতির্ষ্ময় মূর্তিতে আবির্ভূত হন সমর্থ রামদাস স্বামী। বরাভয় দানে আশঙ্ক করেন আশ্রিত শিষ্যকে। ক্ষণকাল পরেই ঝড়ের তাণ্ডব হ্রাস পায়, সমুদ্র শান্ত হইয়া আসে। মুঞ্জেরী

বিশ্বাস, গুরুমহারাজের করুণাবলেই এ যাত্রা সে বাঁচিয়া গিয়াছে, জাহাজটিও রক্ষা পাইয়াছে ভরাডুবি হইতে। বন্দরে বন্দরে মাল পৌছাইয়া দিয়া মাত্র গতকালই মুঞ্জ দেশে ফিরিয়াছে। আজ আসিয়াছে স্বামীজীর চরণ দর্শনে।

শিবাজী প্রশ্ন করিয়া জানিলেন, পক্ষকাল আগে যে তারিখে ও যে সময়ে স্বামী রামদাসজীর বসন তিনি সিন্ত দেখিয়াছেন, ঠিক সেই সময়েই বণিকের জাহাজটি ঝটিকা-জুঁক সাগরে বিপন্ন হইয়া পড়ে।

শিবাজীর জীবনে এখন একটানা সাফল্যের কাল। দুর্গের পর দুর্গ মুঘলের হাত হইতে তিনি ছিনাইয়া নিতেছেন, রাজ্যের পরিধি হইতেছে বিস্তৃততর। সেনাবল ও অর্থবলও বিপুল। কিন্তু প্রবীণ নৃপতি শিবাজীকে কিন্তু এই জাগতিক সমৃদ্ধি বিভ্রান্ত করিতে পারে নাই। বরং ধর্মরাজ্যের ভিত্তি গড়িয়া তুলিতে তিনি আরো তৎপর হইয়াছেন, গুরু রামদাস স্বামীর পরমাত্মীয় আঁকড়াইয়া ধরিতেছেন আরো দৃঢ় হস্তে। স্বামীজীও বিশ্বাস করেন, যে ঐশী কার্যের ভার তিনি নিয়াছেন তাহার প্রধান সহায় হইতেছেন শিবাজী। তাই শিবাজীর জীবনকে অধ্যাত্মরসে উজ্জীবিত করিয়া তুলিতে তাঁহার প্রয়াসের অন্ত নাই। অনন্ত আশা নিয়া, সদা সতর্ক দৃষ্টিতে এই রাজ শিশুর দিকে দিনের পর দিন তিনি চাহিয়া আছেন।

সে-বার পদব্রজে ঘুরিতে ঘুরিতে রামদাস স্বামী সাতারায় আসিয়াছেন। শিবাজী তখন রাজধানীর দুর্গেই অবস্থান করিতেছেন, কিন্তু গুরুর আগমন সংবাদ তখনো পান নাই। রামদাসজী স্থির করিয়াছেন, অপর শিষ্যদের সহিত কয়েকদিন অতিবাহিত করিয়া তারপর দর্শন দিবেন শিবাজী মহারাজকে।

পদব্রজে পরিব্রাজন, আর মাধুকরী দুইটিই স্বামী রামদাসের

পরম প্রিয়। সাতারায় আসিয়া প্রতিদিনই তিনি দ্বারে দ্বারে ভিক্ষার তণ্ডুল সংগ্রহ করিতেন।

শিবাজী সেদিন দুর্গের বারহুয়ারীতে বসিয়া অনুচরদের সহিত আলাপ-আলোচনা করিতেছেন, হঠাৎ দৃষ্টি পড়িল সন্নিহিত মহল্লার এক কুটির দ্বারে। দেখিলেন, গুরুজী রামদাস স্বামী ভিক্ষাপাত্র হাতে সেখানে দণ্ডায়মান।

মুহূর্তে চিন্তার বলক খেলিয়া যায় তাঁহার মনে। একি অদ্ভুত কাণ্ড! রাজ্যের অধীশ্বর যাঁর পদানত—যাঁর বিশ্বস্ত সেবক, সেই রাজগুরু মহাসমর্থ রামদাস স্বামী রাজ্যের দ্বারে দ্বারে ঘুরিবেন দীন কালালের বেশে, ভিক্ষাশ্লে করিবেন জীবনধারণ? না-না, শিবাজী কিছুতেই তা আর চলিতে দিবেন না।<sup>১</sup>

বিশ্বস্ত অনুচর বালাজীকে ডাকিয়া তখনি তাহার হাতে এক পত্র দিলেন। কহিলেন, “গুরুজী ভিক্ষার ঝুলি নিয়ে পথে বেরিয়েছেন, কিছুক্ষণের মধ্যেই এসে পড়বেন দুর্গদ্বারে। তুমি আমার এই পত্র তাঁর চরণতলে রেখে দিও।”

দুর্গ তোরণে দাঁড়ানো মাত্র শিবাজীর পত্র রামদাসজীকে দেওয়া হইল। কৌতূহলভরে তিনি এটি পাঠ করিলেন। মহারাজ শিবাজী লিখিয়াছেন,—“প্রভু, আপনার এই ভিক্ষাবৃত্তির দৃশ্য আমি আর সহ করতে পারছিনে। এই সমগ্র রাজ্য, আর আমার যা কিছু ব্যক্তিগত বিস্তৃতিভব আছে সবই আমি আপনার চরণে উৎসর্গ করলাম। আপনি কৃপা করে এসব গ্রহণ করুন, ক্ষান্ত হোন ভিক্ষাবৃত্তিতে।”

মুহূর্তে হস্তে পত্রটি হাতে নিয়া রামদাস সেদিন সেখান হইতে চলিয়া যান। পরের দিনই সাক্ষাৎ করেন শিবাজীর সঙ্গে। বলেন, “মহারাজ, তোমার সবই তো দান করেছে। আমায়, তোমার নিজের বলতে আর তো কিছু অবশিষ্ট নেই। এবার তবে আমার সঙ্গে

১ স্মরণ বহুনাথ সরকার : শিবাজী আণ্ড টিভ টাইমস পঃ ৮ : আকওয়ার্থ : মারাঠী ব্যালাড্‌স : ছুমিকা

হুগের বাইরে এসে দাঁড়াও। আমার প্রকৃত চেলা হয়ে আমার সঙ্গে শুরু করো মাধুকরী।”

সানন্দে ভিক্ষাবুলি কাঁধে নিয়া শিবাজী গুরুর অনুসরণ করেন, দ্বারে দ্বারে মাগিয়া ফিরেন।

ভিক্ষুকের বেশে শিবাজী মহারাজ উপস্থিত। ঘরে ঘরে সোরগোল পড়িয়া যায়, সসঙ্কোচে, কম্পিত হস্তে রাজভিখারীকে মুষ্টিভিক্ষা দিয়া গৃহস্থেরা সরিয়া দাঁড়ায়।

দিন শেষে রাজধানীর উপান্তে এক অরণ্যে বসিয়া গুরু শিষ্য উভয়ে ভিক্ষান্ন ভোজন করিলেন। প্রসন্ন হাসি হাসিয়া রামদাস এবার কহিলেন, “বৎস শিবাজী, পরীক্ষায় তুমি উত্তীর্ণ হয়েছে। তোমার রাজ্য ও রাজৈক্যর্য আমায় দান করে তুমি ভিক্ষুক হয়েছিলে। আজ সব কিছু আবার আমি তোমাকেই ফিরিয়ে দিলাম। তুমি আবার রাজসিংহাসনে বসবে বটে, কিন্তু চিরদিনই রবে আমারই প্রতিনিধি রূপে। আমার গেরুয়া গাত্রবাস তোমায় দান করছি, বৈরাগীর এই উত্তরীয়ই হবে তোমার রাষ্ট্র-পতাকা।”

এই গেরুয়া পতাকা বা ভগোয়া কাণ্ডা মহারাজা শিবাজীর রাজ্যে যতদিন উড্ডীয়মান ছিল, ভারতবাসীর হৃদয়পটে ততদিন ত্যাগ-বৈরাগ্যের পরম আদর্শ ছিল দেদীপ্যমান। আজো সে আদর্শের স্মৃতি এদেশ বিন্দুত হয় নাই।

একদল ভক্ত ও শিষ্য নিয়া রামদাসজী একদিন দূর গ্রামের এক মঠে যাইতেছেন। দীর্ঘ দুর্গম পথ। চলিতে চলিতে সঙ্গীর ক্ষুৎপিপাসায় কাতর হইয়া পড়িয়াছে। সম্মুখেই একটি ভূট্টার ক্ষেত। ভক্তেরা নিবেদন করে, “প্রভু, এখানে তো কাছাকাছি কোন লোকালয় দেখছিনে। আমরা সবাই জ্ঞানন্ত অবসন্ন। ক্ষুধার জ্বালায় পথ চলা সম্ভব হচ্ছে না। আমরা বলছি কি, ক্ষেত থেকে কিছু ভূট্টা তুলে

আমরা প্রাণ বাঁচাই, তারপর অল্প সময়ে ক্ষেতের মালিককে এর দাম দিয়ে দিলেই হবে।”

শিষ্যদের হৃদয় দেখিয়া স্বামীজী এ প্রস্তাবে সায় দিলেন। প্রয়োজনীয় ভুট্টা সংগৃহীত হইল, সামনের এক বটগাছের নীচে আগুন জ্বালাইয়া, দক্ষ ভুট্টা ভোজনের পর সকলে শুষ্ট হইলেন।

এমন সময়ে যমদূতের মত গ্রামের পাটেল সেখানে আসিয়া উপস্থিত। ভুট্টার ক্ষেতটি তাহারই। সাধুদের কাণ্ড দেখিয়া সে ক্ষিপ্ত হইয়া উঠে। অকথ্য ভাষায় দলের নেতা রামদাসজীকে গালি-গালাজ করিতে থাকে। ভুট্টার কয়েকটি অবশিষ্ট আঁটি সম্মুখে পড়িয়া ছিল, সেগুলি উঠাইয়া নিয়া পাটেল সজোরে রামদাসজীকে আঘাত করিতে থাকে। স্বামীজীর দেহের নানা স্থানে কাটিয়া যায়, রক্ত ঝরিতে থাকে। আঘাতকারীকে কোন প্রকার বাধা না দিয়া স্বামী রামদাস প্রশান্ত বদনে রহেন দণ্ডায়মান।

স্বামীজীর এই সমদর্শিতা ও নির্বিকার ভাব ভক্ত-শিষ্যদের থাকিবে কেন? তাহারা ক্রোধে জ্বলিয়া উঠে, সবাই মিলিয়া পাটেলকে জাপটাইয়া ধরে, মুষ্টিঘাতে করে তাহাকে ধরাশায়ী।

রামদাসজীকে এবার উত্তেজিত হইতে দেখা যায়। শিষ্যদের হটাইয়া দিয়া পাটেলকে তিনি মুক্ত করেন, তিরস্কারের সুরে কহেন, “এ তোমাদের অশ্রায়। ভুট্টার ক্ষেতের মালিক এই পাটেল। তার ভুট্টা খেয়ে, আবার তাকেই ধরে মারবে এ কেমন কথা? না—একে তোমরা কিছু বলো না, অপরাধ তো বরং আমাদেরই। পরজব্য না বলে আমরা নিয়েছি।”

এই ঘটনার কয়েকদিন পরে শিবাজী মহারাজ একদিন গুরুর সঙ্গে দেখা করিতে আসেন। কৌপীনবস্ত্র রামদাসজী খালি গায়ে নিজ আসনে বসিয়া বিশ্রান্তালাপে রত, হঠাৎ তাহার দেহের কাঁচা ঘায়ের দিকে শিবাজীর দৃষ্টি পড়িল। ব্যস্ত-সমস্ত হইয়া এ বিষয়ে তিনি প্রশ্ন করিলেন। কিন্তু স্বামীজী একেবারে নিরুত্তর

পার্শ্বে দণ্ডায়মান এক সেবক কিন্তু মূল কথাটা কঁাস করিয়া দেয়।

ক্ষেতের মালিক পাটেলের মারধোরের কাহিনী সবিস্তারে বর্ণনা করে।

আনুপূর্বক সব শুনিয়া শিবাজী তো মহারুট। উত্তেজিত কণ্ঠে কহিলেন, “রাজগুরুর প্রতি এই অত্যাচার! আচ্ছা, এখনি এই পাটেলের সমুচিত দণ্ডবিধান আমি করছি।”

স্বামী রামদাস সহাস্তে বলেন, “বৎস, মনে রেখো, তুমি রাজ-সিংহাসনে বসলেও আসলে তুমি হচ্ছো ধর্ম্মের প্রতিনিধি, ভিক্ষুক সন্ন্যাসীর প্রতিনিধি। এ স্থলে অপরাধ হয়েছে আমাদেরই, পাটেলের নয়। ভক্তেরা ভুট্টা খাবার প্রস্তাব করার সময় আমি ভেবেছিলাম, পরে এসে ক্ষেতের মালিককে এর মূল্য দিয়ে যাবো। তুমি বরং আমার হয়ে তাই দাও এই পাটেলকে। তাকে কয়েক বিঘা জমি তুমি পুরস্কার স্বরূপ দান করো, তবেই আমি লাভ করবো অপার সন্তোষ।”

বলা বাহুল্য, গুরুর এই নির্দেশ প্রতিপালিত হইতে সেদিন বিলম্ব হয় নাই।

গুরুর প্রতি শিবাজীর আত্মসমর্পণ ও ভক্তিপ্রেমের তথ্য গবেষকেরা কতকগুলি চিঠিপত্র হইতে আবিষ্কার করিয়াছেন। রাজা শিবাজীর একটি পত্রের অনুবাদ নিম্নরূপ :

শ্রীশ্বামীজী মহারাজ ! মহন্তম গুরো !

আমি শিবাজী হিচ্ছি আপনার শ্রীচরণের ধূলি। শ্রীচরণে প্রণাম নিবেদন করে জানাচ্ছি আমার এই আবেদন। হে পরমপূজ্য, আপনি আমায় দীক্ষা দান করে ঢেলে দিয়েছেন কল্যাণবহু আলীক্বাদ। একটি স্বাধীন রাজ্যগঠন, ধর্ম্মসংস্থাপন, দেবদ্বিজের আরাধনা, জন-গণের রক্ষণ ও হুঃখ দূরীকরণ—এইসব মহৎ কার্য সাধনের নির্দেশ আপনি আমায় দিয়েছিলেন। তাছাড়া পরম বস্তুর অন্বেষণেও আপনি আমার উৎসাহ করেছিলেন, আর আশ্বাস দিয়েছিলেন—আমার সকল

৫৫

কিছু প্রচেষ্টা সফল হয়ে উঠবে প্রভু শ্রীরামজীর কৃপায়। তদনুসারে আমিও এগিয়ে চলেছি আমার কর্মসূচী নিয়ে। সফল হয়েছি ছুঁই মুসলমান শক্তির দমনে, বিপুল ধনরত্ন এসেছে আমার অধিকারে, নির্মাণ করেছি দুর্জয় দুর্গসমূহ। এ সবই, প্রভু, সম্ভব হয়েছে আপনার আশীর্বাদের বলে।

—বোধহয় আপনার মনে আছে, একদিন আমি আপনার চরণে ঈশে দিয়েছিলাম আমার সমগ্র রাজ্য ও বৈভব। বলেছিলাম—আমি আপনার সেবায় নিজেকে করবো উৎসর্গ। আপনি তখন উত্তরে বলেছিলেন, আমি যদি আমার রাজকর্তব্য নিষ্ঠাভরে পালন করে যাই, তবে তাই গণ্য হবে আপনার শ্রেষ্ঠ সেবাকার্যরূপে।

—আর এক প্রার্থনা ছিল, শ্রীরামজীর মন্দির যেন আমার কাছাকাছি কোথাও নির্মিত হয়, তাহলে আমরা পরস্পরের সঙ্গে দেখা সাক্ষাৎ করতে পারবো, আর রামদাসী সম্প্রদায়ও ছড়িয়ে পড়তে পারবে দিকে দিকে। হে আমার পরমপূজ্য, আপনি আমার সে প্রার্থনা শুনেছিলেন। আমার নিকটবর্তী পর্বতগুহায় এসে আপনি বাস করতে থাকেন, ছাফল-এ প্রভু রামজীর মন্দিরও নির্মিত হয়, এরপর সম্প্রদায়ের ভক্ত শিষ্যদের প্রভাবও বেড়ে চলে দিনের পর দিন। তাছাড়া, আরো একটা আন্তরিক অনুরোধ আমার ছিল। আমার আরো আবেদন ছিল, শ্রীরামজীর পূজায়, উৎসব-অনুষ্ঠানের ব্যয় নির্বাহে, ছাফল মন্দিরের নির্মাণকাজে এবং অগ্ন্যস্ত্র স্থানের মূর্তির সেবায় আমি যেন কিছু পরিমাণ জমিখণ্ড দান করতে পারি। তার উত্তরে আপনি আমাকে জানিয়েছিলেন,—এজন্য আমি যেন চিন্তিত না হই, যেসব জমি আমি এ উদ্দেশ্যে দান করা প্রয়োজন মনে করি তা যেন দিই, এবং সম্প্রদায়, রাজ্য এবং জাতির কল্যাণে যেন আত্মনিয়োগ করি। তারপর আমি আমার রাজকীয় নির্দেশনামা প্রদান করি এবং বিভিন্ন অঞ্চলে সরকার হইতে জমি অর্পণের ব্যবস্থা করা হয়। ছাফলের চারপাশে যে ১২১টি গ্রাম রয়েছে

তাদের প্রত্যেকটি থেকে ১১ বিঘা জমি দান করার নির্দেশ ইতিমধ্যে দেওয়া হয়ে গিয়েছে।<sup>১</sup>

অভিষেকের পর হইতেই শিবাজীর জীবনে অধ্যাত্ম-তৃষ্ণা বাড়িয়া উঠিতে থাকে ; স্বামী রামদাসের উপরও আসে পূর্বাপেক্ষা অনেক বেশী নির্ভরতা। যে কোন প্রশ্ন, তাহা সাধনতত্ত্ব সম্পর্কেই হোক, সামাজিক বা রাজনীতি সম্পর্কেই হোক, গুরুকে দিয়া তাহার মীমাংসা করিয়া না নিলে শিবাজীর চলে না। তাছাড়া, এখন হইতে গুরুর সঙ্গ ও ঘনিষ্ঠ সাহচর্যের জন্তও তাঁহার মন বড় বেশী ব্যাকুল হইয়া উঠে।

কিন্তু রামদাসজীকে কোন একটি বিশেষ স্থানে ধরিয়া রাখিবার জো নাই। তীর্থে-তীর্থে মঠে-মঠে স্বেচ্ছামত তিনি ঘুরিয়া বেড়ান।

পরলী দুর্গটি শিবাজীর অধিকারে আসার পর তিনি স্থির করেন, গুরুর জন্ত এখানে একটি স্থায়ী আবাস নির্মাণ করিয়া দিবেন। অনেক অহুনয় করিয়া রামদাসজীকে রাজী করানো হয়। শিবাজীর নির্দেশমত দুর্গ-শীর্ষে রামদাসজীর এক নূতন ভবনকে কেন্দ্র করিয়া গড়িয়া উঠে সাধু-সন্ন্যাসীদের একটি মঠ এবং উপনিবেশ। সাধু-সজ্জনের আবাস-ভূমি—তাই ইহার নাম দেওয়া হয় সজ্জনগড়। দুর্গের চারদিকের গ্রামগুলির আয় শিবাজী দান করিলেন এই সাধু-উপনিবেশের জন্ত। রামদাসজীর প্রবর্তিত বড় বড় ধর্ম-উৎসবগুলি সাড়ম্বরে এখানে পালন করা হইত। সে ব্যয়ও নির্বাহ হইত সরকারের প্রদত্ত নজরানা হইতে।

সজ্জনগড় সাতারা হইতে বেশী দূর নয়। শিবাজীর প্রিয় দুর্গ রায়গড়ও খুবই কাছাকাছি। শিবাজী প্রায়ই রায়গড়ে যাইতেন এবং নিকটবর্তী গুরুস্থান সজ্জনগড় ছিল তাঁহার এক বড় আকর্ষণ। অবসর পাইলে সেখানে গুরুর সমীপে গিয়া উপস্থিত হইতেন, গ্রহণ করিতেন সাধনভঞ্জন ও রাজকার্যের নানা গুরুত্বপূর্ণ নির্দেশ।



অনেকের ধারণা, রামদাস স্বামী তাঁহার শিষ্য শিবাজীর রাজ-নৈতিক জীবন ও রাষ্ট্র চিন্তার নিয়ামক ছিলেন, এবং ইহাই স্বামীজীর বড় পরিচয়। কিন্তু এ ধারণা একেবারেই যুক্তিসহ নয়। শিবাজী রামদাসজীর আশ্রয়ে আসেন জীবনের শেষপাদে। ধর্ম্মপুত্র রাজ্যের যে সঙ্কল্প তাঁহার মনে ছিল, রামদাসজীর শিষ্যত্ব গ্রহণের পর সে সঙ্কল্প আরো দৃঢ় হইয়া উঠে। প্রকৃতপক্ষে সিদ্ধপুরুষ রামদাসজী ছিলেন রাজা শিবাজীর অধ্যাত্মজীবনের আলোকদিশারী এবং তাঁহার সাধন জীবনেরই নিয়ন্তা। উত্তর জীবনে শিবাজীর মুমুক্ষা তীব্রতর হইয়া উঠে এবং গুরুর চরণে করেন তিনি আত্মসমর্পণ।

এ সম্পর্কে রামদাস স্বামীর অস্বাভাবিক জীবনীকার যাহা বলিতেছেন তাহা প্রাণিধানযোগ্য, তাঁহার মতে, “শিবাজীর উপর রামদাসের আধ্যাত্মিক প্রভাবই ছিল মুখ্য, রাজনৈতিক প্রভাব গৌণ। তথ্য প্রমাণ হইতে পরিষ্কারভাবে দেখা যায়, শিবাজীর রাজনৈতিক ও সামরিক জীবনে রামদাস খুব একটা গুরুত্বপূর্ণ ভূমিকা গ্রহণ করেন নাই। কাজেই রামদাসের রাজনৈতিক প্রভাবকে বড় করিয়া তোলাটা শুধু যে ঐতিহাসিক তথ্য দ্বারা অসমর্থিত তা-ই নয়, ইহা দ্বারা মহারাজা শিবাজী এবং স্বামী রামদাস উভয়কেই খাটো করা হয়। ধর্ম্ম ও অধ্যাত্মসাধনার ক্ষেত্রে স্বামীজী ছিলেন সর্ব্বময় প্রভু, এবং ইতিহাস নিশ্চয়ই তাঁহার এই প্রভুত্বকে স্বীকৃতি দিতে বাধ্য থাকিবে। কারণ, ধর্ম্ম ও অধ্যাত্মসাধনা সম্পর্কে তাঁহার জ্ঞান ছিল সুগভীর এবং সেখানকার সমস্তার সমাধানে তিনি ছিলেন অতি-মাত্রায় দক্ষ। প্রধানতঃ ধর্ম্মগুরুরূপে স্বীকৃতি না দিয়া তাঁহাকে যদি রাজনৈতিক গুরু বলিয়া আমরা প্রচার করি তবে তাঁহার প্রকৃত স্বরূপ নির্ণয়ে, ভুল করিব। একথা সত্য যে বড় জীবনের শেষ ভাগে প্রিয় শিষ্য ও আদর্শবাদী রাজা শিবাজীর কাজকর্ম্মের ধারা দেখিয়া তিনি পরিতুষ্ট হন এবং রাষ্ট্রীয় ব্যাপারে প্রয়োজন মত মাঝে মাঝে নির্দেশও তিনি দিতেন। তাঁহার ধর্ম্মগ্রন্থ দাসবোধের শেষ অংশে

সামাজিক ও রাজনৈতিক উপদেশ কিছুটা রহিয়াছে। শিবাজী মহারাজ শেষ জীবনে গুরুজীর কাছে আসিয়া রাষ্ট্রীয় চিন্তা ও কাজকর্ম সম্বন্ধেও তাঁহার মতামত জানিয়া নিতেন, কারণ স্বামীজীর জ্ঞান ও বুদ্ধিমত্তার উপর তাঁহার গভীর শ্রদ্ধা ছিল। এই দিক দিয়া দেখিতে গেলে স্বামী রামদাস ভক্ত-তুকারাম বা অগ্ণাশ্রু বৈষ্ণব সাধক হইতে ভিন্ন ধরনের ছিলেন। কিন্তু এই সঙ্গে এ কথাও স্বীকার করিতে হইবে যে রাষ্ট্রীয় কর্ম, সম্প্রদায়ের সংগঠন কর্ম প্রভৃতি ব্যবহারিক ক্ষেত্রের গুরুত্ব স্বীকার করিলেও স্বামী রামদাস মুখ্যত ছিলেন একজন সিদ্ধসাধক ও জনকল্যাণকর অধ্যাত্ম-আন্দোলনের নেতা।”

সজ্জনগড়ের পরিবেশ ছিল বড় পবিত্র, বড় রক্ষণীয়। চারিদিকে শস্ত-শ্যামল উপত্যকা বিস্তারিত। নদী-নালায় বন্ধিম রেখায় রেখায় প্রকৃতি যেন ক্ষীণ-শুভ্র আলপনা আঁকিয়া রাখিয়াছে পরম প্রভুর আগমন প্রতীক্ষায়। উল্কাকাশের মহাবিস্তারে তাকাইলে প্রাণমন মুহূর্তে কোথায় যেন উধাও হইয়া যায়। এই অনুকূল পরিবেশে আসিয়া রামদাস ধ্যান-ভজনে বিভোর হইয়া পড়েন। পাহাড়ের চূড়ায় ঘনিষ্ঠ ভক্তশিষ্য নিয়া তিনি বাস করিতে থাকেন।

মঠ এবং মণ্ডলীর সংখ্যা ও পরিধি বাড়িয়াছে, কাজও অনেক বাড়িয়াছে। কিন্তু রামদাসের জীবনে আসিয়াছে প্রচুর অবসর। বিশ্বস্ত, কর্মকুশল ও ত্যাগব্রতী শিষ্যেরা মঠ-মন্দিরগুলি সুষ্ঠুভাবে পরিচালনা করিতেছেন, তদুপরি রাজশিষ্য শিবাজীর জনবল ও কোষাগার সতত রহিয়াছে গুরুর সেবায় নিয়োজিত। প্রয়োজন বোধে মঠের মোহন্তেরা, শিবাজী ও তাঁহার উচ্চকর্মচারীরা, সজ্জনগড়ের নীর্বে ছুটিয়া আসেন, স্বামী রামদাসের পরামর্শ ও আদেশে হয় তাঁহাদের সমস্তার সমাধান।

স্বামীজীর সজ্জনগড়ের এই পরিবেশটি কিন্তু দীর্ঘস্থায়ী হয় নাই।

অল্পদিনের মধ্যেই নেপথ্যের মহানাট্যকার তাঁহার জীবনলীলাকে ঠেলিয়া দেন শেষ অঙ্কের দিকে।

১৬৭৯ খৃষ্টাব্দের শেষের দিকে শিবাজী একবার গুরুর সঙ্গে দেখা করিতে আসেন। নানা প্রসঙ্গের পর গুরু রহস্যময় হাসি হাসিয়া কহেন, “মহারাজ, মাটির মানুষ আমি, রঘুনাথজীর এক দীন সেবক। তাকে তুমি পাহাড়ের শীর্ষে আকাশে তুলে এনে রেখেছো। আকাশ হাতছানি দিচ্ছে বার বার। মহারাজ, স্পষ্টই বুঝতে পারছি, মরজীবনে ছেদ পড়তে বেশী বাকী নেই।”

“তা কি করে হয় গুরুদেব। লক্ষ লক্ষ লোক যে আপনার মুখ চেয়ে আছে, আপনার অভয় বাণী শোনার জন্য উৎকর্ণ হয়ে আছে। এত তাড়াতাড়ি আপনার চলে যাওয়া কি করে হয়? তাছাড়া, ধর্মরাজ্য স্থাপনের অনেক কিছুই যে এখনো বাকী।”—যুক্তকরে নিবেদন করেন শিবাজী।

“মহারাজ, আমরা বৃদ্ধ মাত্র, আমরা শুধু একটা ক্ষীণতম ক্ষীণ স্পন্দন তুলতে পারি। যা করবার সচ্চিদানন্দ ব্রহ্ম শ্রীরামচন্দ্রই করবেন। তবে তাঁর ভক্ত ও অনুচর হিসেবে আমরা তোমায় তাঁর পুনরাবির্ভাবের পটভূমি কিছুটা রচনা করতে হবে। তাঁর আসন পাততে হবে। ধর্মরাজ্যের আদর্শ আমরা তুলে ধরলাম, বীজ ছাড়িয়ে গেলাম—এই তো ছিল আমাদের কর্তব্য।”

নতশিরে শিবাজী গুরুর চরণসমীপে বসিয়া আছেন। মুখে একটি শব্দ নাই।

গুরু আবার কহিলেন, “বৎস, অতিরিক্ত পরিশ্রমে তোমার শরীর দুর্বল হয়েছে, অপটু হয়েও পড়েছে। খুব সাবধানে থেকো। রায়গড়ে গিয়ে তুমি পূর্ণ বিশ্রাম করো।”

শিবাজী রায়গড়ে ফিরিয়া গেলেন, কিন্তু উপযুক্ত পরিকল্পনা সামরিক অভিযান চালানোর ফলে স্বাস্থ্য তাঁহার একেবারে ভাঙিয়া পড়িয়াছে, আর তাহা জোড়া লাগে নাই।

১৬৮০ খৃষ্টাব্দের ৫ই এপ্রিল শিবাজী মহারাজ চিরবিদায় গ্রহণ করিলেন। স্বামী রামদাসের দক্ষিণবাহু যেন ভাঙ্গিয়া পড়িল, ধর্মরাজ্যে স্থাপনা ছিল রামদাসজীর কাছে এক মহান ঐশী ব্রত। আদর্শবাদী পরম ধার্মিক মহারাজা শিবাজীর আনুগত্য ও সেবা ছিল তাঁহার এই কর্মের বড় সহায়। বিধির বিধানে আজ তাহা অন্তর্হিত হইল।

রামদাস-শিষ্য শিবাজীর প্রকৃত মূল্যায়ন বিদেশী ঐতিহাসিকেরা করিতে পারেন নাই। পরবর্ত্তীকালে এ দেশের মনীষী গবেষকেরা তাঁহার আত্মিক জীবন ও ধর্মীয় জীবনের স্বরূপ নির্ণয় করিয়াছেন। এ যুগের শ্রেষ্ঠ কবি রবীন্দ্রনাথের অননুकरणीय ভাষায়ও মূর্ত্ত হইয়া উঠিয়াছে শিবাজীর ধর্মধৃত জীবনের পরম বৈশিষ্ট্য। একাধারে বিপুল আশা, আশ্বাস ও প্রতিশ্রুতি বিশ্বকবির অমর কণ্ঠে ধ্বনিত হইয়াছে :

সেদিন শুনিনি কথা—আজ মোরা তোমার আদেশ

শির পাতি লব।

কণ্ঠে কণ্ঠে বন্ধে বন্ধে ভারতে মিলিবে সর্বদেশ

ধ্যানমগ্নে তব।

ধ্বজা করি উড়াইব বৈরাগীর উত্তরীবসন

দারিদ্র্যের বল।

‘এক ধর্মরাজ্য হবে এ ভারতে’ এ মহাবচন

করিব সম্মল।

এবার পরপারের ডাক আসিয়া গিয়াছে সমর্থ রামদাসস্বামীর অন্তরসত্যায়। প্রাণপ্রভু রামজীর চরণকমলে নিজেকে এবার তিনি স্থলীন করিতে চান। দিনরাতের অধিকাংশ সময়ই অতিবাহিত হয় ইষ্টধ্যানে। ধ্যান তপস্বিতা ভাঙ্গাইরা সেবকেরা মাঝে মাঝে চেষ্টা

করেন খাওয়ানোর জন্ত, কিন্তু প্রায়ই তাহা সম্ভব হইয়া উঠে না। উপবাসে তন্মু দিন দিন ক্ষীণ হইতে থাকে।

প্রধান শিষ্য কল্যাণ ব্যাকুল হইয়া ছুটিয়া আসিলেন। কয়েকটি নিগূঢ় নির্দেশ নিয়া গুরু মহারাজের আদেশে ফিরিয়া গেলেন আপন কর্মক্ষেত্রে। অগ্ৰাণ্ঠ মঠ-মন্দিরের পরিচালক ও ভক্ত-শিষ্যেরা শেষবারের মত স্বামীজীকে দর্শন করিয়া গেলেন।

প্রধান শিষ্য উদ্ধব ও ভক্তিমতী আকাবান্দি গুরুজীর শয্যাপার্শ্বে সদা উপস্থিত। প্রাণপণে তাঁহারা সেবা করিয়া চলিয়াছেন, শঙ্কাকুল চিন্তে অপেক্ষা করিয়া আছেন বিচ্ছেদের মর্মস্তুদ মুহূর্তটির জন্ত।

কয়েকদিন আগে স্বামীজী তাঁহার অভিলাষ অনুযায়ী রাম, সীতা, লক্ষ্মণ ও মারুতীজীর নূতন নূতন নয়নলোভন বিগ্রহ গড়াইয়া আনিয়াছেন। এই বিগ্রহগুলি এবার তাঁহার শয়নঘরে স্থাপন করিতে বলিলেন। বহুক্ষণ ইহাদের সম্মুখে রহিলেন ধ্যানাবিষ্ট।

শয়নগৃহে তখন উপস্থিত একনিষ্ঠ সেবিকা আকাবান্দি আর প্রধান শিষ্য উদ্ধব। ধ্যান হইতে ব্যথিত হইয়া আকাবান্দি-এর হাত হইতে গুরু গ্রহণ করিলেন একপাত্র চিনির সরবৎ। তারপর প্রসন্ন মধুর হাস্তে কহিলেন, “বৎসে, এবার তবে তোমরা আমায় বিদায় দাও।”

কাল্লায় ভাজিয়া পড়িলেন আকাবান্দি। সাস্তুনা দিয়া গুরুজী কহিলেন, “চির আনন্দধামে যাচ্ছি, সচ্চিদানন্দ বিগ্রহ শ্রীরামজীর লীলা নিকেতনে আমি রওনা হচ্ছি। পরম মধুর মিলন-ক্ষেত্রে এই কাল্লা কেন?”

“প্রভু, মরদেহ ছেড়ে যাচ্ছেন, আর তো শুনতে পাবো না আপনার অমৃতবাণী, আর পাবো না আপনার পরম আশ্রয়।”

“এতদিন কি আমার কাছে থেকে তোমরা শুধু এই শিখলে? প্রপঞ্চস্বরূপ এ দেহ একদিন তো ত্যাগ করতেই হবে। প্রাণপ্রভুর নির্দেশ এসেছে, সানন্দে তাই আমি চলে যাচ্ছি। ভয় কেন প্লে, তোমাদের? এ মুখের কথা নাই বা শুনলে, কিন্তু ‘দাসবোধ’ তো

আছে। তাই রইল আমার মৰ্ম্মকথা। ‘দাসবোধ’ তোমরা সবাই নিত্যপাঠ করবে, থাক্বে রামজীর নিত্যদাস হয়ে।”

ইষ্টবিগ্রহের দিকে প্রেমাপ্লুত নয়নে তাকাইয়া রামদাস স্বামী যুগ্মকণ্ঠে উচ্চারণ করিলেন, “হর হর—রাম রাম, জয় সমর্থ রঘুবীর।” সঙ্গে সঙ্গে সিদ্ধ মহাপুরুষের প্রাণবায়ু ব্রহ্মরক্ত পথ দিয়া করিল উৎক্রমণ।

১৬৮১ খৃষ্টাব্দের এই মহাপ্রয়াণের দিনে সারা মারাঠার ভক্ত-সমাজে পতিত হয় গভীর শোকের ছায়া। রামদাসী সম্প্রদায়ের শত শত লোক সাশ্রনয়নে আসিয়া উপস্থিত হয়। উদ্ধব গোসাবী ও অগ্ৰ্য্য প্রাধান শিষ্য ও মহাস্তুরা ভারাক্রান্ত হৃদয়ে গুরুর শেষ-কৃত্যের আয়োজন সম্পূর্ণ করিলেন। পবিত্র তুলসীতরু জ্বালাইয়া রামদাস স্বামীর মরদেহ করা হইল ভস্মীভূত।

প্রভু রঘুবীরজীর নিত্যদাস—সমর্থ রামদাস ইহলোক ছাড়িয়া চলিয়া গেলেন। কিন্তু তাঁহার ধৰ্ম্মরাজ্যের, রামরাজ্যের, ধ্যানকল্পনার বীজ ছড়াইয়া দিয়া গেলেন সারা ভারতের আকাশে বাতাসে।

## একনাথ স্বামী

মারাঠার ভক্তি আন্দোলনের আদি ও প্রধান উৎস পঙ্করপুর। এখানকার জাগ্রত বিগ্রহ বিঠ্ঠলজীকে কেন্দ্র করিয়া ত্রয়োদশ ও চতুর্দশ শতকে প্রেমভক্তির যে প্রাবল উৎসারিত হয় তাহার নায়ক ছিলেন জ্ঞানদেব ও নামদেব। এই দুই মহাত্মার প্রয়াণের পর ভক্তি আন্দোলন কিছুটা স্তিমিত হইয়া আসে, সমাজজীবনে দেখা দেয় অস্বাভাবিকতা, বিশৃঙ্খলা ও ধর্মবিমুখতা। এই অবনতি ও অবক্ষয়ের দিনে, জ্ঞানদেব ও নামদেবের প্রায় দুইশত বৎসর ব্যবধানে আবির্ভূত হন একনাথ স্বামী। মারাঠার বৈষ্ণব আন্দোলনে তিনি সঞ্চারিত করেন নূতন প্রাণপ্রবাহ, ভক্তি ও প্রপত্তির পরম পাথেয় পৌছাইয়া দেন সমাজের উচ্চনীচ ধনো নিধন সকল মানুষের অঙ্গনে।

পঞ্চদশ শতকের তৃতীয় পাদের কথা। এসময়ে পৈঠান বা প্রতিষ্ঠানপুরে অভূদয় ঘটে সাধকপ্রবর ভাস্করদাসের। একজন সিদ্ধ বৈষ্ণব বলিয়া এ অঞ্চলের সর্বত্র তিনি পরিচিত ছিলেন। পঙ্করপুরের বিঠ্ঠলজী বিগ্রহের পুনঃপ্রতিষ্ঠা ও সেবা পূজার প্রবর্তন করিয়াও ভাস্করদাস প্রসিদ্ধ হন। মুসলমান রাজাদের অত্যাচারে পঙ্করপুরের মন্দির দুইবার বিধ্বস্ত হয়। বিজয়নগরের রাজা কৃষ্ণরায় তাই বিঠ্ঠলজী বিগ্রহের নিরাপত্তা বিধানের জন্ত তৎপর হইয়া উঠেন এবং নিজের রাজধানী হাম্পি নগরে এক নূতন মন্দিরে করেন ইহাকে সংস্থাপিত। রাজনৈতিক অশান্তি ও উপদ্রব অতঃপর কমিয়া যায় এবং পঙ্করপুরের ভক্তসাধক ভাস্করদাসের নেতৃত্বে বিঠ্ঠলজীকে বেশে কিরাইয়া আনার ব্যবস্থা হয়। কথিত আছে, সাধক ভাস্করদাসই বিজয়নগর হইতে এই ত্রিমুণ্ডি বহন করিয়া আনেন এবং প্রবর্তন করেন সেবা পূজার নবপর্যায়ের ব্যবস্থা।

এই ভানুদাসেরই বংশে তাঁহার প্রপৌত্ররূপে ১৫৩৩ খৃষ্টাব্দে জন্ম-গ্রহণ করেন সার্বজন্যকামা ভক্তসাধক একনাথ ।

একনাথের পিতার নাম সূর্য্যনারায়ণ, মাতা কল্পিনী বাদী । একনাথ যখন ছোট শিশু, তখন তাঁহার পিতা মাতা উভয়েরই প্রাণ-বিয়োগ ঘটে । অতঃপর পিতামহ ও পিতামহীর যত্নে তিনি পালিত হইতে থাকেন ।

শুভ সংস্কার নিয়া জন্মিয়াছেন, তাই বালককাল হইতেই একনাথের জীবনে প্রকাশ পায় ভগবদ্-ভক্তি । খেলাধুলায় কোন উৎসাহ নাই, স্বভাবে চাপল্য নাই—সৌম্য শাস্ত্র বালক অবসর পাইলেই গ্রামের উপাস্তে শিব-মন্দিরটিতে গিয়া উপস্থিত হয়, সারা দিন সেখানে কাটাইয়া ঘরে ফিরিয়া আসে ।

অপূর্ব্ব মেধা বালকের । মন্দিরে পুরাণপাঠ ও শাস্ত্রের ব্যাখ্যা-বিশ্লেষণ যাহা হয়, সবই তাঁহার কণ্ঠস্থ । ধর্ম্মজীবনের কাহিনী শুনিতে বসিলেই সে মাতিয়া উঠে, এবং প্রহ্লাদের পুণ্য কথা ভাবিতে ভাবিতে মন কোথায় উধাও হইয়া যায় ।

একনাথের বয়স তখন বারো বৎসরের বেশী নয় । একদিন জনবিরলপথে শিবমন্দির হইতে তিনি বাড়ীতে ফিরিয়া আসিতেছেন, হঠাৎ কানে আসে এক দৈবী প্রত্যাদেশ, “ওরে, বৃথা কেন আর কাল ক্ষেপণ করছিস, চলে যা দেবগড়ে জনার্দ্রন স্বামীর কাছে । তিনিই যে তোর চিহ্নিত সদগুরু, তোর জীবনের চাবিকাঠি রয়েছে তাঁরই হাতে ।”

বালকের মর্ম্মমূলে কে যেন এক গ্রন্থি ঝাঁকুনি দিয়া যায় । অজানা লোকের অদৃশ্য ইঙ্গিত মনকে বার বার উচ্চকিত, উদ্ভ্রান্ত করিয়া তোলে । সেইদিনই পিতামহীর হে হনীড় ছাড়িয়া, কাহাকেও কিছু না জানাইয়া পদব্রজে সে বাহির হইয়া পড়ে দেবগড়ের উদ্দেশে ।

কে এই জনার্দ্রন স্বামী, কি তাঁহার পরিচয়, কিছুই একনাথের



জানা নাই। পথ চলিতে চলিতে লোকের মুখে শোনে, তিনি দেবগড়ের কেল্লাদার, মুসলমান রাজার এক অতি বিশ্বাসভাজন ব্যক্তি। যুদ্ধকুশল ও রাজনীতিবিদ বলিয়া যেমন তাঁহার খ্যাতি আছে, তেমনি খ্যাতি আছে সিদ্ধ সাধকরূপে। সুপ্রসিদ্ধ মহাপুরুষ মুসিংহ সরস্বতী তাঁহার গুরু। সমর্থগুরুব কৃপা ও আপন সাধনবলে জনার্দনের সাংসারিক জীবন আর অধ্যাত্মজীবনের ঘটিয়াছে এক বিশ্বয়কর সমাহার। হিন্দু মুসলমান উভয় সম্প্রদায়ের লোকেই তাঁহাকে শ্রদ্ধা করে, ভালবাসে আন্তরিকভাবে।

কেল্লার ভিতরে জনার্দন স্বামীর দর্শন ঘটিল। সাষ্টাঙ্গ প্রণত হইয়া একনাথ কহিলেন, “প্রভু, আমি পৈঠানের লোক, ভানুদাসজীর প্রপৌত্র—একনাথ। ঈশ্বর কি বস্তু, কি করে তা লাভ করা যায়, কিছুই আমি জানিনি। কিন্তু কি জানি কেন, এক প্রচণ্ড ব্যাকুলতার বেগ আমায় কেবলি ঠেলে নিয়ে যাচ্ছে।”

“ভানুদাসের প্রপৌত্র তুমি? অতি আনন্দের কথা। তিনি ছিলেন পরম বৈষ্ণব, আমাদের সকলের নমস্কার। তা বংশ, এত সাধু সন্ত থাকতে আমার মত কেল্লাদারের কাছে তুমি এলে কেন বলতো?” প্রশ্ন করেন জনার্দন স্বামী।

“প্রত্যাদেশ শুনেছি, আপনিই আমার গুরু, আমার ইহকাল পরকালের চাবিকাঠি আপনারই হাতে।”

“কি করে বুঝলে, বালক, এ প্রত্যাদেশ সত্য?”

“আমার অন্তরাত্মা কেবলই ডেকে বলছে, এ দৈবী আদেশ এসেছে আমারই পরম কল্যাণের জন্ত।” কিছুক্ষণ নীরব থাকিয়া অশ্রুসঞ্ছল চক্ষে একনাথ বলেন, “প্রভু, শৈশবে পিতামাতা হারিয়ে অসহায় হয়ে পড়ি, ঈশ্বরের কৃপায় পিতামহীর আশ্রয় পাই। আজো আবার তেমনি অসহায় হয়ে এই বালক আপনার আশ্রয় চাচ্ছে, আপনি কি কৃপা করবেন না?”

“বংশ, শাস্ত হও। আমি তোমায় আশ্রয় দিবো। সত্য বলতে কি,

তোমার আগমন আমার অপ্রত্যাশিত নয়। তোমার ছবি আগে থেকেই আমার মানসপটে ফুটে উঠেছে। জন্মান্তরের ভালো সংস্কার আছে তোমার ভেতর। তাইতো এ বয়সে ঈশ্বরের জন্তে এমন ব্যাকুল হয়েছে।”

পরম যত্নে জনার্দন স্বামী একনাথকে দীক্ষা দেন, সেই সঙ্গে দেন নিগূঢ় ভক্তিসাধনার উপদেশ। বালক শিশুর শাস্ত্র পুরাণ অধ্যয়নের উপরও গুরুত্ব দেওয়া হয়। জ্ঞানেশ্বরী গীতা ও ভাগবতের তত্ত্বসমূহে অচিরে একনাথের আয়ত্তে আসিয়া যায়। তাছাড়া, একনিষ্ঠ সাধনার ফলে ভক্তির নবধা লক্ষণও তাঁহার সাধন-সত্তায় প্রকট হইয়া উঠিতে থাকে।

গুরুগৃহে একাদিক্রমে ছয় বৎসর অতিবাহিত হয়। বালকশিষ্য ক্রমে পদার্পণ করে যৌবনে। শাস্ত্রজ্ঞান, প্রেমাবেগ ও কাব্য প্রতিভার অপরূপ স্ফুরণ দেখা যায় তাঁহার মধ্যে। অপার স্নেহ মমতা দিয়া গুরুজী একনাথকে গড়িয়া তুলিয়াছেন, তাঁহার এই রূপান্তর দেখিয়া সেদিন তাঁহাকে নিভূতে ডাকিয়া কহেন, “বৎস, একনাথ, তোমার সাধনা ও শিক্ষা অনেক দূর এগিয়ে এসেছে। এবার তোমায় গুরু করতে হবে জীবনের একটা ছরুহ পর্য্যায়। সাধনজীবন ও অধ্যাত্ম-জীবনকে নিয়ে দূরে নিভূতে সরে থাকলে চলবে না। এ সাধন দৃঢ়মূল হয়েছে কিনা তা যাচাই হবে নিত্যকার ব্যবহারিক জীবনে। উপলব্ধিতে আনতে হবে ত্রীমদ্ভাগবতের পরমতত্ত্ব। সচ্চিদানন্দ বিগ্রহ কৃষ্ণই রূপায়িত হয়ে আছেন সৃষ্টির প্রত্যেকটি বস্তুতে। সর্ব্বঘটে ব্যাপ্ত রয়েছে মহাকাশ। তেমনি সর্ব্ব বস্তুতে সর্ব্ব ঘটে কৃষ্ণ বিরাজিত। তাই তোমার কৃষ্ণসেবা হবে সর্ব্বত্র পৰিব্যাপ্ত। এই তত্ত্ব ও সাধনকে জীবনে রূপায়িত করতে হলে ব্যবহারিক জীবন বা সাংসারিক জীবনের প্রত্যেকটি কর্ম করতে হবে কৃষ্ণের কর্ম বলে। আমি ভাবছি, তোমার অধ্যাত্মসাধনার সঙ্গে ব্যবহারিক জীবনের শিক্ষাও তোমাকে দেবো। ছোটোকে মিলিয়ে যদি চলতে

পারো, তবেই সার্থক হয়ে উঠবে তোমার এই ভাগবত-ভিত্তিক ধর্মসাধনা।”

অতঃপর একনাথকে গুরু সরকারী কাজকর্মের নানাবিধ শিক্ষা দান করেন। ছুর্গের কিছু কিছু দায়িত্বপূর্ণ কাজও ধীরে ধীরে তাঁহার উপর হস্ত হয়।

জনশ্রুতি আছে, এই সময়কার একটি ঘটনায় তরুণ একনাথ যে সাহস, বুদ্ধিমত্তা ও প্রত্যাশপূর্ণমতির পরিচয় দেন, তাহার ফলে দেবগড় কেল্লা রক্ষা পায় এবং কেল্লাদার জনার্দন স্বামীও এক ভয়ঙ্কর বিপদ এড়াইতে সক্ষম হন।

সেদিন গভীর রাত্রির অন্ধকারে নিতান্ত আকস্মিকভাবে শত্রুর এক সেনাবাহিনী দেবগড় আক্রমণ করিয়া বসে। জনার্দন স্বামী তখন কেল্লার অভ্যন্তরে একটি নির্জন কক্ষে রহিয়াছেন ধ্যানাবিষ্ট। শত্রুসেনা রণহুঙ্কার দিয়া প্রাণপণে গুলীবর্ষণ করিতেছে, হুই একটি দল পাহাড়ের গা বাহিয়া উপরে উঠার চেষ্টাও করিতেছে। এই সঙ্কট সময়ে কেল্লার নায়কের দেখা নাই, কেল্লার রক্ষীদল কিংকর্তব্য-বিমূঢ় হইয়া ইতস্ততঃ ছুটছুটি করিতেছে।

তরুণ একনাথ চকিতে এ বিপদের গুরুত্ব বুঝিয়া নিয়াছেন। গুরুদেবকে ধ্যানাসন হইতে উঠানোর উপায় নাই, অথচ শত্রুর প্রতিরোধ করিতেই হইবে। তড়িৎবেগে তিনি জনার্দন স্বামীর কক্ষে ঢুকিয়া পড়েন, নিজেকে সজ্জিত করেন তাঁহার বর্ম, শিরজ্ঞাণ ও অস্ত্রশস্ত্রে। তারপর ছুর্গপ্রাকারে দাঁড়াইয়া দক্ষ নায়কের মত দেন প্রতি-আক্রমণের নির্দেশ। রাত্রির অন্ধকারে যুদ্ধের হাঁকডাক ও উত্তেজনায় একনাথকে কেহই চিনিতে পারে নাই, ভাবিয়াছে ছুর্গের নায়ক জনার্দন স্বামীই তাঁহার হৃদেভগ্ন বর্ম শিরজ্ঞাণ পরিধান করিয়া দিতেছেন কৌশলপূর্ণ সামরিক নির্দেশ।

ভীত প্রতিরোধের ফলে শত্রুসেনার মনোবল সেদিন ভাঙ্গিয়া পড়ে, পরাস্ত হইয়া তাহারা পলায়নপর হয়।

ইতিমধ্যে জনার্দন স্বামী ধ্যান হইতে ব্যাধিত হইয়াছেন। বাহুজ্ঞান পাইবার সঙ্গে সঙ্গে ঘটনার গুরুত্ব বুঝিয়া নিতে তাঁহার দেহী হইল না। এ ঘোর বিপদে একনাথের উপস্থিত বুদ্ধি, বীরত্ব ও নেতৃত্বই আজ অসাধ্য সাধন করিয়াছে। শত্রু সেনা যেমন বিধ্বস্ত হইয়াছে তেমনি দুর্গবাসীদেরও হইয়াছে প্রাণরক্ষা।

একবার জনার্দন স্বামী সরকারের একটি জটিল হিসাব নিয়া বড় বিপদে পড়েন। হিসাবে একটা মারাত্মক ভুল রহিয়াছে কিন্তু সে ভুলের সূত্রটি খুঁজিয়া পাওয়া যাইতেছে না। কয়েকদিন ধরিয়া অবিরত চেষ্টা চলিল, কিন্তু সমস্তার সমাধান হইল না। একনাথের একটা বিশেষ গুণ, যখনি যে কাজে সে হাত দেয়, নিষ্ঠা ও দায়িত্ব নিয়া সে তাহা সম্পন্ন করে। জনার্দন স্বামী তাঁহার এই হিসাবের গরমিল সংশোধনের ভার শিশুর উপরই দিলেন।

একনাথ একাগ্র হইয়া এই হিসাব নিয়া পড়িলেন এবং বহু পরিশ্রমের পর ভুলের সূত্র খুঁজিয়া পাওয়া গেল। জনার্দন স্বামী তো মহা আনন্দিত। কহিলেন, “বৎস, একনাথ, তোমার নিষ্ঠা ও মনঃ-সংযম প্রশংসনীয়। এমনভাবে অধ্যাত্ম-সাধনের উপরেও মনকে করতে হবে কেন্দ্রীভূত। তোমার আমি একটি নিগূঢ় সাধন এবার দেবো। কেল্লার বাইরে যে অরণ্য রয়েছে, সেখানে বসে এই প্রক্রিয়াটি তুমি দীর্ঘকাল ধরে অনুষ্ঠান করো। আশীর্বাদ করি, তোমার সাধনা অচিরে জয়যুক্ত হয়ে উঠুক।”

গুরুর এই আশীর্বাদ সফল হইয়া উঠে, হস্তিপ্রেম-সিদ্ধ একনাথ জীহ্বির দর্শনলাভে হন কৃতকৃতার্থ।

শিশুর এ সাফল্যে জনার্দন স্বামীর খানন্দের অবধি নাই। স্নেহপূর্ণ স্বরে কহিলেন, “বৎস, একনাথ, আমার এখানে আর তোমার অবস্থান করার প্রয়োজন নেই। ইষ্টদেবের নাম স্মরণ করে, বেরিয়ে পড়ো, দর্শন করো দেশের প্রধান প্রধান দেবমন্দির ও তীর্থগুলি।”

পিতৃসম মমতায় গুরু এ কয়টি বৎসর একনাথকে সম্বীৰিত

রাখিয়াছেন, গুরুরূপে তাঁহার সাধনজীবনকে করিয়াছেন উদ্দীপিত। এবার আসিয়াছে বিচ্ছেদের পালা।

সজলচক্ষে করজোড়ে একনাথ কহেন, “প্রভু, এ ক’টি বৎসর এমন নিবিড় করে আপনাকে পেয়েছিলাম, কোনদিন ভাবতেও পারি নি, এভাবে আপনি আমায় দূরে সরিয়ে দেবেন।”

“না, বৎস, দূরে আমি কোনদিনই থাকবো না, দীক্ষামন্ত্রের মধ্যেই যে থাকে গুরুর নিবাস, ইষ্টধ্যানে জড়িয়ে থাকেন তিনি ওতপ্রোত হয়ে। তোমায় আমায় বিচ্ছেদ কোন দিনই হবে না, আর শোন—তীর্থ পরিক্রমায় একটা বড় লাভ আছে।”

“বুঝিয়ে বলুন আমায়, প্রভু।”

“হ্যাঁ, এই পরিক্রমা উপলক্ষে পথে প্রান্তরে, বনে জঙ্গলে কত ঘুরে বেড়াতে হবে, সাধু তপস্বর, যোগী ভোগী সবারই মুখোমুখী হতে হবে। পর্যটনের জীবনে আসবে কত সুখ-দুঃখ কত উত্থান পতন, কত বিচিত্র অভিজ্ঞতা। এই উত্থান-পতনের মধ্যে নামজপ আর ইষ্টধ্যান ঠিক থাকে কিনা, ইষ্টের উপলব্ধি আরো দৃঢ় হয় কিনা, সঠিকভাবে তা যাচাই করা হয়ে যাবে।”

পরিত্রাণন ও তীর্থদর্শনে কয়েক বৎসর অতিবাহিত হয়, তারপর একনাথ দেবগড়ে গুরুর সকাশে উপনীত হন। গুরু শিষ্যের পুনর্মিলনে দিব্য আনন্দ উৎসারিত হইয়া উঠে।

স্নেহপূর্ণ স্বরে জনার্দন স্বামী কহেন, “বৎস, তোমার উপর আমি প্রসন্ন হয়েছি। ঈশ্বর উপলব্ধি তোমার দৃঢ়তর হয়েছে, সাধনায় হয়েছে। তুমি সকলকাম। এবার নিজের ঘরে ফিরে যাও। বিবাহ করে সংসারী হও।”

একথা শোনা মাত্র আংকিয়া উঠেন একনাথ। তিনি কিছু বলার আগেই জনার্দন স্বামী হাসিয়া কহেন, “এতে বিস্মিত বা ক্রুদ্ধ

হবার কিছু নেই, একনাথ ! সাধনজীবনে জ্ঞান ভক্তি কর্মের সমন্বয় ফুটিয়ে তোলার উপদেশ দিয়েছিলেন আমার গুরুদেব শ্রীনৃসিংহ সরস্বতী। তার কিছুটা নিদর্শন তুমি দেবগড়ে থেকে প্রত্যক্ষ করেছে। তোমাকেও তেমনি জীবন যাপন করতে হবে। হ্যাঁ, তুমি বিবাহ করো,—যাপন করো অনাসক্ত কৃষ্ণভক্তের জীবন। কৃষ্ণ আর কৃষ্ণের রচিত এই বিশ্বসংসার এই উভয়কেই অবলম্বন করে থাকো। কৃষ্ণময় হও তুমি, আর প্রতি ভক্ত-মানুষের হৃদয়ে গড়ে তোল এক একটি কৃষ্ণমন্দির। আমার আর একটা নির্দেশ, সাধারণ ভক্তমানুষের উপযোগী সুখবোধ্য ভক্তি-গ্রন্থাদি তুমি রচনা করো, পুরাণ শাস্ত্রের তত্ত্ব ও কাহিনীকে জনমানসের গ্রহণীয় করে দিকে দিকে ছড়িয়ে দাও।”

গুরুর নির্দেশ একনাথ শিরোধার্য্য করিয়া নেন। পৈঠানে ফিরিয়া গিয়া মিলিত হন বৃদ্ধ পিতামহ ও পিতামহীর সঙ্গে। অতঃপর বিজ্ঞাপুরের এক সং ব্রাহ্মণের কন্যাকে তিনি বিবাহ করেন। নাম তাঁহার গিরিজাবাঈ। একনাথের সাধনা ও ধর্মাচরণে পতিব্রত। গিরিজাবাঈ চিরকাল অকুণ্ঠ চিন্তে সহযোগিতা করিয়া গিয়াছেন।”

এবার পৈঠানে বসিয়া একনাথ রচনা করেন বহুতর ভক্তিমূলক গ্রন্থ। ইহাদের মধ্যে সাহিত্য, দর্শন ও ভাবসম্পদের দিক দিয়া সর্বাপেক্ষা গরীয়ান তাঁহার ভাগবতের ব্যাখ্যা। একাদশ স্কন্ধকে ভিত্তি করিয়া এটি রচিত। মারাঠী জনসাধারণ এ গ্রন্থকে বলে একনাথী ভাগবত। বিশহাজার পদ-সমন্বিত এই মহান গ্রন্থ মারাঠী সাহিত্যের এক অক্ষয় কীর্তি।

ভাবার্থ রামায়ণ একনাথের অন্ততম সার্থক আধ্যাত্মিক সাহিত্য কীর্তি। একনাথ নিজে বলিয়া গিয়াছেন—রামভক্তির এক দৈবী প্রেরণায় উদ্ধুদ্ধ হইয়া এই গ্রন্থ রচনা তিনি শুরু করেন। কিন্তু যুদ্ধ-কাণ্ডের চতুর্দশ অধ্যায় অবধি গিয়া আর এটি তিনি শেষ করিয়া যাইতে পারেন নাই। তাঁহার অন্ততম প্রিয় শিষ্য গাবোয়া এটি সমাপ্ত

করেন। কল্পিণী স্বয়ম্বর একনাথের আর এক উল্লেখযোগ্য সৃষ্টি। কৃষ্ণ-কল্পিণীর সুমধুর প্রেমরসের ভি়ান চড়ানো হইয়াছে ইহাতে। ইহা ছাড়া, তাঁহার অশ্রান্ত রচনার মধ্যে রহিয়াছে চতুঃশ্লোকী ভাগবত, স্বাত্মমুখ ও কয়েক শত মনোজ্ঞ অভঙ্গপদ। এই সব রচনায় একনাথের অধ্যাত্ম অনুভূতি ও জীবনদর্শনই শুধু প্রকাশিত হয় নাই, তাঁহার কবিত্ব শক্তির মহিমাও চমৎকার রূপে ফুটিয়া উঠিয়াছে।

উত্তরসূরী জ্ঞানদেব ও নামদেবের প্রভাব একনাথের মধ্যে যথেষ্টই আছে, কারণ জ্ঞানদেবের জ্ঞানেশ্বরী গীতা, অমৃতানুভব এবং নামদেবের প্রেম-ভক্তি-আপ্লুত অভঙ্গের দ্বারা তিনি অনেকাংশে অনুপ্রাণিত। কিন্তু তৎসঙ্গেও নিজ সাহিত্য-কৃতিতে একনাথের স্বকীয়তা ফুটিয়া উঠিয়াছে। ভক্তিরসাত্মক সাহিত্য সৃষ্টি করিলেও জ্ঞানদেব ও নামদেব তাঁহাদের গুরু নাথযোগীদের দার্শনিক মতবাদ এড়াইতে পারেন নাই। কিন্তু একনাথের সময়ে মারাঠার ভক্তি-আন্দোলনে রামায়ণ, মহাভারত, ভাগবত প্রভৃতি পুরাণ শাস্ত্রের প্রচার বাড়িয়াছে, ভক্তিধর্ম তাহার উৎস খুঁজিয়া পাইয়াছে সনাতন ধর্ম ও অবতার পুরুষদের লীলা কাহিনীতে। এই উৎস হইতেই, বিশেষ করিয়া ভাগবত পুরাণ হইতে একনাথ সংগ্রহ করিলেন তাঁহার অধ্যাত্ম-সাহিত্যের মূল রস, তারপর গুরুর নির্দেশ অনুযায়ী সহজ ভাষায়, সর্বজনীন সংবেদনে, তাহা পরিবেশন করিলেন ভক্ত সাধারণের কাছে। ফলে অল্পকালের মধ্যে একনাথ চিহ্নিত হইয়া উঠিলেন এক ভক্তিসিদ্ধ আচার্য্যরূপে। তাঁহাকে কেন্দ্র করিয়া এক নবতর খাতে হরিকথা ও হরিভক্তির রসপ্রবাহ সারা দেশে বিস্তারিত হইয়া পড়িল। পৌরাণিক ভক্তিধর্ম মারাঠায় পুনরুজ্জীবিত হইয়া উঠিল তাঁহারই জীবন সাধনা ও সাহিত্যকৃতির মধ্য দিয়া।

অধ্যাপক পটবর্ধন একনাথের সাধনজীবন ও কবিত্ব শক্তির ব্যাখ্যা-বিশ্লেষণ করিতে গিয়া একস্থানে বলিয়াছেন—একনাথের রচনায় অন্তরের আবেগধর্মিতা ও ভাবরসের সহিত মিলিত হইয়াছে

ভক্তি-সাধনার পরমতত্ত্ব। তাই দেখা যায়, একনাথ শুধু একজন ভক্তি-সিদ্ধ মহাপুরুষ মাত্র ছিলেন না, এই সঙ্গে তিনি ছিলেন অতি উচ্চ শ্রেণীর একজন ভাবুক কবি। প্রধানতঃ এই কারণেই একনাথ কীর্তিত হন একজন অতিশয় জনপ্রিয় ধর্মগুরু রূপে।<sup>১</sup>

ভক্ত কবি সিদ্ধপুরুষ একনাথের খ্যাতি পৈঠান ও পদ্ধারপুর অঞ্চলে পরিব্যাপ্ত হইয়া পড়ে। শত শত লোক আসিয়া ভীড় জমায় তাঁহার কীর্তনের অঙ্গনে। মহারাষ্ট্রের সর্বত্র তিনি পরিচিত হইয়া উঠেন একনাথ স্বামী নামে।

একনাথের রচিত অভঙ্গপদে গুরুভক্তি ও গুরুর পদে আত্ম-সমর্পণের তত্ত্ব বার বার প্রচারিত হইয়াছে। একটি অভঙ্গে কৃতজ্ঞতা জানাইয়া তিনি বলিতেছেন—

গুরুর দেওয়া বিপুল ঋণ  
কি করে একনাথ শুধবে তার এই জীবনে ?  
গুরু দেখিয়েছেন এক চমকপ্রদ ইন্দ্রজাল—  
শিষ্য একনাথের অহমিকার ভীত বিধ  
নিঃশেষে করেছেন তিনি পান,  
দৃষ্টি টেনে নিয়েছেন অন্তরের গভীরে,  
যেখানে রয়েছে সেই দিব্য আলোকের উদ্ভাসন—  
নেই কখনো যার উদয় আর অস্ত। ( অভঙ্গ ৪ )

গুরুর কৃপা হইতেছে পরশ-পাথর, যাহার স্পর্শগুণে শিষ্য বস্ত্র হয়, তাহার সর্বসত্তায় ঘটে রূপান্তর। একনাথ আর একটি পদে গুরুদেব জনার্দন স্বামীর মহিমা জ্ঞাপন করিতেছেন :

এ কি পরম বিশ্বয় ঘটালেন গুরু আমায় দিয়ে,  
হৃদয় কন্দরে করিলেন শ্রীভগবানের দর্শন।



আর এমনি কৃপালু তিনি  
 ত্যাগ দুঃখের চরম মূল্য থেকে  
 দিলেন আমায় অব্যাহতি।  
 শোন তবে গুরু-কৃপার গোপন রহস্য।  
 এই কৃপার আলোয় সর্ব বস্তু আর সর্ব চরাচর  
 হয়ে ওঠে ঈশ্বরময়।  
 চোখে যা দেখি, কানে যা শুনি,  
 যে আশ্বাদ গ্রহণ করি জিহ্বায়,  
 সব কিছতেই পাই ঈশ্বরের পরিচয়। (অভঙ্গ ৮)

ভক্তি আর নাম-সাধনা সম্পর্কে একনাথের বাণী বড় মর্মস্পর্শী।  
 তাঁহার মতে জীবন-প্রভু ঈশ্বরের নিরন্তর স্মরণই জীবন। আর  
 ঈশ্বরের বিমুক্ততা ও বিস্মরণ হইতেছে মায়া-বিভ্রম।

স্মরণ মনন ও জপ কীর্তনের যে কোন সাধনই শ্রীভগবানকে  
 অমোঘ শক্তিতে আকর্ষণ করে, তিনি ছুটিয়া আসেন এই ধূলার  
 ধরণীতে। একটি পদে একনাথ গাহিতেছেন—‘সদা অনুধ্যানের  
 ফলেই তো। তিনি ত্রাণ করলেন যখন কোপন স্বভাব ঋষি ও তাঁর  
 ব্রাহ্মণ শিষ্যেরা এসে চাইলেন ক্ষুধার অন্ন; অর্জুনের ভাবনায় সদা  
 জাগ্রত ছিলেন কৃষ্ণ, তাই তো প্রভু বাঁচিয়েছিলেন তাঁকে বার বার।  
 ভক্তিতে শুধু শ্রীভগবান দর্শনই দান করেন না, ভক্তের বশুত্যাও তিনি  
 স্বীকার করেন। এমনি তাঁর মহত্ত্ব, আর এমনি ভক্তি-সাধনার  
 সাহায্য’ :

সদা ভক্ত-বশ আমার পরম প্রভু—  
 জ্যোপদীকে করেন উদ্ধার তার চরম বিপদে,  
 সুদামার দারিদ্র্য-দুঃখ মুহূর্ত্তে করেন দূর,  
 পরীক্ষিতকে মাতৃজঠরে বাঁচাতো কে  
 যদি না হতো তাঁর কৃপাঘন দৃষ্টিপাত ?

গোবর্ধন ধারণ ক'রে, তার নীচে গিরিধর  
রক্ষা করেন গাভী আর গোপগোপীদের ।  
গোরা কুমোরের সাথে বসে প্রভু আমার  
শুকিয়ে তোলেন ভেজা মাটির ভাণ্ড ।  
চোখা মেলার সাথে চড়ান পশুর দল,  
সাওতা মালীর পাশে বসে কাটেন বুনো ঘাস ।  
কবীরের সাথে টানা-পোড়েনে বুনেন কাপড়,  
রুইদাসের সঙ্গী হয়ে চামড়ায় রং লাগান,  
সজ্জন কষাইর মাংস বিক্রয়  
আর স্বর্ণকার নরহরির সোনা গালানোর কাজে  
হাত এগিয়ে দেন কুপালু প্রভু ।  
জনাবাদীর গোবর সানন্দে বহন করেন তিনি,  
আবার ভূমিকা নেন দামাজীর পারিয়া দূতের ।

মহারাত্ত্রের জনগণ পৌরাণিক সংস্কৃত সাহিত্যের সহিত বিশেষ  
পরিচিত ছিল না । একনাথ স্বামী এই পরিচয় সাধিত করিলেন  
প্রধানতঃ তাঁহার একনাথী ভাগবত ও রামায়ণ ভাষ্যের মধ্য দিয়া ।

জ্ঞানদেবের জ্ঞানেশ্বরী গীতার প্রভাব একনাথের সাধনজীবন  
ও সাহিত্যকর্মের উপর যথেষ্ট ছিল । একনাথ নিজের তাহা অকুণ্ঠ  
চিন্তে স্বীকার করিয়াও গিয়াছেন । কিন্তু তথা প্রমাণ হইতে দেখা  
যায়, গুরুর আদেশে ভাগবত-অনুকূল ভক্তিপ্রেমের যে সাধনা তিনি  
গ্রহণ করিয়াছেন, গুরুকৃপায় যে সাধনায় সিদ্ধ হইয়াছিলেন, উত্তর  
কালে তাঁহার ব্যক্তিত্ব ও জীবনদর্শনে তাই প্রতিকলিত হইয়া উঠে  
অধিক পরিমাণে ।

নিজের প্রেমভক্তি সাধনার অন্ততম উৎস ভাগবত সম্পর্কে  
একনাথের উক্তিটি বড় মনোরম । তিনি বলিতেছেন : শ্রীভাগবত  
হচ্ছে একটি বড় ক্ষেত । ব্রহ্মা প্রথমে এর জন্ত প্রদান করেন শস্ত্র-  
বীজ । নারদ এই ক্ষেত্রের অধিকারী, ঐ শস্ত্র-বীজ তিনিই বপন

করেন তাঁর নিপুণ হস্তে। ব্যাসদেব করেন ঐ ক্ষেতের নিরাপত্তার ব্যবস্থা—দশটি বাঁধ দিয়ে বেঁধে দেন এর চারদিকে। ফলে সে স্থান ভরে ওঠে দিব্য আনন্দ আর শান্তির ফসলে। শুক এই ফসল পাহারা দেবার ভার গ্রহণ করেন। হরিনাম অবিরত নিক্ষেপ করেন তিনি, আর পাপরূপ পাখীরা যায় দূরে পালিয়ে। ভক্ত উদ্ধব করেছিলেন কেটে-আনা শস্তের ঝাড়ু-বাছাই। কৃষ্ণজীর পরম বাণীর মূল্যবান শশুকণা বার করে রেখেছিলেন তা' থেকে। এ থেকে তৈরী হয়েছে দিব্যালোকের সৌরভ মাখানো কত আহাৰ্য্য। পরীক্ষিৎ এলেন তারপর। সংসার থেকে বিচ্ছিন্ন হয়ে বসে, শুক-দেবের মুখে পবিত্র ভাগবত কথা শুনে পান করেন তিনি ভাগবতী আনন্দের সুখ। তাঁর পদাঙ্ক অনুসরণ করে শ্রীধর ভাগবতের নিগূঢ় মর্মকথার ওপর করেন আলোকপাত, দিব্য আনন্দ লাভ করে নিজে হন কৃতকৃতার্থ। জনার্দন স্বামীর প্রিয় মক্ষিকা, একনাথ তাঁর মারাঠী ভাষার দুটি পাখনা মেলে উড়ে গিয়ে বসেছে সেই লোভনীয় আহাৰ্য্যের ওপর, প্রাণভরে ভোজন করে হয়েছে ধন্ত।”

ভক্তি-সাধনকে একনাথ স্বামী বলিয়াছেন—পরম ধামে যাইবার প্রশস্ত রাজকীয় পথ। শ্রীহরি স্বয়ং এ পথের রক্ষণাবেক্ষণকারী, পথে তিনি চক্র হস্তে দাঁড়াইয়া থাকেন। আক্রমণকারী দম্ব্য বা বৈরীদের করেন হনন। নিজস্ব অস্ত্র দিয়া প্রভু আরো একটি বড় কৃপার কাজ করেন। সাধনপথের বড় শত্রু—সাধকের অহংবোধ। এই অহং-বোধকে কৃপালু প্রভু চূর্ণ করেন তাঁর গদার আঘাতে। তাঁর মঙ্গল শব্দের ধ্বনিতে শুচিশুভ হয়ে ওঠে ভক্তের অন্তর, জ্ঞানালোক প্রবেশ করে তাতে। আর শ্রীহস্তের প্রস্ফুটিত কমল দিয়ে আপ্তকাম ভক্তের করেন তিনি সম্বর্দ্ধনা।

আদর্শ ভক্ত ও তাঁহার ভক্তিসিদ্ধির যে বর্ণনা একনাথ দিয়েছেন তাহা ভাগবত হইতেই নেওয়া :

—এই চরম অবস্থার পথ ও লক্ষ্যবস্তু এক হয়ে ওঠে—ঈশ্বরের

বরণীয়, কৃপাপ্রাপ্ত হুই-চারিটি সাধকের ভাগেই এটা ঘটতে দেখা যায়। এককনিষ্ঠা আর শরণাগতির ফলে, সাধক গুরুর কৃপা লাভে ধন্য হন, উপলব্ধি করেন আত্মার স্বরূপ। তিনি দেখতে পান, সব মানুষের হৃদয়েই বিরাজিত রয়েছে শ্রীহরির মন্দির। শ্রীহরিকে দেখেন তিনি ভিতরে ও বাইরে, সর্বত্র সর্ববস্তুতে। তারপর ধাতা আর ধোয়ের তেতর থাকে না কোন পার্থক্য। ভক্ত নিজেই হয়ে যান ভগবান—যিনি সারা বিশ্ব ব্রহ্মাণ্ডে রয়েছেন ওতপ্রোত। এখন থেকে অবস্থান, চলাফেরা সব কিছু ভগবানের মধ্যে, ভগবানের সারূপ্য লাভ করেন তিনি। নাম রূপ, কার্য কারণের বিভেদ ঘুচে যায়, এ অবস্থায় সর্ববস্তুর মধ্যে প্রকৃত ভগবৎ-সত্তাকে তিনি দেখতে পান। সৃষ্টির এত কিছু বৈচিত্র্য, বৈষম্য ও ভেদের মধ্যে—এক ও অদ্বিতীয় পরমবস্তু শ্রীভগবানকে নিরন্তর করেন তিনি প্রত্যক্ষ। একনাথ বলেন, সর্বভূতে ভগবৎ-দর্শন—এই হচ্ছে ভক্তি সাধনার চরম কথা। কিন্তু এ অবস্থা ভক্ত লাভ করতে পারে না—যদি না প্রভুর কৃপার আলোয় তাঁর হৃদয় হয় উদ্ভাসিত।<sup>১</sup>

গুরু জনার্দন স্বামীর কৃপায় ও নিজের সাধন বলে একনাথ-স্বামী পরিণত হন এক ভক্তিসিদ্ধ মহাপুরুষরূপে। নিজ জীবনে এই সিদ্ধি কি ভাবে আসিল, কি ছিল তখনকার অতীন্দ্রিয় অভিজ্ঞতা, এ তথ্য তাঁহার কতকগুলি অভঙ্গপদে নিহিত রহিয়াছে।

একটি পদে তিনি গাহিতেছেন :

অন্তরাঙ্গায় অধ্যাত্ম-সূর্যের ঘটলো দীপ্তিময় প্রকাশ—

দেখলাম আমি, এ প্রকাশের নেই উষা,

নেই মধ্যাহ্ন বা অস্তাচল।

নেই এর কোন আদি বা অন্ত।

সম্মুখে আমার আত্মিক সূর্যের চির উদ্ভাসন,

পূর্ব-পশ্চিমের পার্থক্য চিরকালের মত গেছে ঘুচে।

কর্ম আর নৈকর্ম্য ছুই-ই হয়ে গেছে অর্থহীন

দিনের আকাশে চাঁদের ছায়ার মত ।

একনাথ স্বামী ভক্তিসিদ্ধ মহাপুরুষ । বহুজনের বন্দিত, বহুজনের সাধনপথের আলোক দিশারী তিনি । কিন্তু গুরুদেব জনার্দন স্বামীর নির্দেশে, চিরদিন তিনি লোকালয়েই বাস করিয়াছেন, বাপন করিয়াছেন সাধারণ ভক্ত বৈষ্ণবের গৃহস্থ জীবন । ঘৃতের প্রদীপের মত এই জীবন পবিত্রতা আর স্নিগ্ধতায় ভরা, এই প্রদীপের আলো বিকীর্ণ হয় প্রায় চল্লিশ বৎসর ব্যাপিয়া । মহারাষ্ট্রের সহস্র সহস্র ভক্তের সাধনজীবন এই কল্যাণময় আলোকের দীপ্তিতে উজ্জ্বল হইয়া উঠে ।

পৈঠানে একনাথের দিনচর্যা ছিল এইরূপ : প্রত্যুষে উঠিয়া তিনি কিছুটা সময় ধ্যান-ভজনে অতিবাহিত করিতেন । তারপর নদীতে গিয়া সমাপন করিতেন স্নান তর্পণ । এবার শাস্ত্রপাঠের পর্ব । ভাগবত ও গীতার পাঠ ব্যাখ্যার আসরে সমবেত হইত অন্তরঙ্গ ভক্তমণ্ডলী । দিব্যভাবে আবিষ্ট পরম বৈষ্ণবের মুখনিঃসৃত বাণী ও উপদেশ সকলে উৎকর্ষ হইয়া শুনিতেন । মধ্যাহ্ন-ভোজনের একটা বিশেষ অঙ্গ ছিল অতিথি সংকার । অতিথিদের সঙ্গে নিয়া মিঠাহারী একনাথ আহার ক্রিয়া সম্পন্ন করিতেন । বিজ্রামের পর অপরাহ্নে আবার ভক্তিগ্রন্থ পাঠ । জ্ঞানেশ্বরী গীতা বা ভাগবত এই দুইটি প্রিয় গ্রন্থ প্রধানতঃ তিনি আলোচনা করিতেন । শ্রোতাদের মধ্যে তখন বহিয়া যাইত প্রেম-ভক্তি রসের প্রবাহ । সর্বাপেক্ষা আকর্ষণীয় ছিল একনাথের সাক্ষ্য সংকীর্ণন । নিজের রচিত অভঙ্গ পদ গাহিয়া-গাহিয়া একনাথ স্বামী ভাবরসে উদ্বেল হইয়া উঠিতেন । ভক্তদের মধ্যে জাগিয়া উঠিত ভক্তিপ্রেমের প্রবল উদ্দীপনা । দূর-দূরান্ত হইতে বহু দর্শনার্থীর আগমন ঘটিত পৈঠানের এই বৈষ্ণব মহাত্মাকে দর্শনের জন্য ।

একনাথ ছিলেন প্রকৃত বৈষ্ণব, ভক্তেরা ভগবানের আপনজন,

প্রিয়জন, তাঁহাদের মধ্যে বর্ষ বৈষম্য থাকিবে, তাঁহার কাছে এই চিন্তা ছিল অসহনীয়। কীর্তনের আসরে উচ্চ নীচ, ব্রাহ্মণ অন্ত্যজ, সকলের সঙ্গে তিনি একসঙ্গে উপবেশন করেন, নির্বিচারে যে কোন জাতির ভক্ত অতিথিদের নিয়া ভোজনে বসেন, গ্রামের ব্রাহ্মণেরা ইহা সূচক্ষে দেখেন নাই। কঠোর ভাষায় তাঁহারা একনাথের এই আচরণের বিরুদ্ধে বলাবলি করিতে থাকেন।

একনাথ এ বিষয়ে একেবারে নির্বিকার ; স্বরচিত অভঙ্গপদে তিনি গাহিলেন—

হো কাঁ বর্ণামাজী অগ্রণী ।

যো বিমুখ হরিচরণী ।

ত্যাহুনি স্বপচ শ্রেষ্ঠ মানী—

জো ভগবদ্ ভজনী প্রেমল ।

—শ্রীহরির চরণকমল থেকে যে বিমুখ, বর্ণের দিক দিয়ে অগ্রণী হয়েও সে যে নিষ্ফল, বার্থ। তার থেকে সেই চণ্ডালও শ্রেষ্ঠ যদি সে প্রেমভরে করে ভগবদ্ ভজন।

পৈঠান ও তাহার কাছাকাছি গ্রামের উচ্চবর্ণের লোকেরা স্বভাবতঃই রক্ষণশীল। একনাথ স্বামীর নৃত্য কীর্তন ও ধর্ম উপদেশ সমাজে বিশৃঙ্খলা আনিতেছে, সমাজকে ধ্বংসের পথে টানিয়া নিতেছে বলিয়া তাহারা সোরগোল তুলিলেন। জনগণের মধ্যে একনাথের প্রভাব দিন দিনই বৃদ্ধির পথে, ইহাতেও অনেকের ঈর্ষার অবধি নাই। গুরু হইল নানা নিন্দাবাদ। বিরোধীরা রটাইলেন, একনাথের-গুরুকরণ হয় নাই। সত্যকার কোন সাধনা ও সিদ্ধিও তাঁহার নাই। যশ ও অর্থের লোভে তিনি ভূয়া আচার্য্যগিরি করিতেছেন, লোক ঠকাইয়া বেড়াইতেছেন।

এই সব চূর্ণাম একনাথ স্বামী শুনিলেন, কিন্তু তাঁহাকে কিছুমাত্র

বিচলিত হইতে দেখা গেল না। উদার ক্ষমান্দের সাধক ইহার উত্তরে যাহা লিখিলেন যে কোন সাধক বা সমাজ-সংস্কারকের কাছে তাহা চিরকাল স্মরণ রাখার মত।

নিন্দক কামাচা কামাচা।

গড়ী আত্মারামাচা।

নিন্দক আমুচী গঙ্গা।

আমুচী পাতকেঁ নেতে ভঙ্গা।

নিন্দক আমুচা সখা।

আমুচী বস্ত্রে ধুনো ফুকা।

নিন্দক আমুচী কাশী।

আমুচী পাতকেঁ অবধী নানী—

নিন্দক আমুচা গুরু

একা জনার্দিন থোরু।<sup>১</sup>

—নিন্দকেরা আমার অতি প্রিয়, কারণ তারা যে সৃষ্ট একই আত্মারামের দ্বারা। নিন্দকেরা যেন গঙ্গার পবিত্র ধারা, আমাদের যত কিছু পাপরাশি করছে বহন। নিন্দকেরা আমাদের সখা, আমাদের কলুষিত বস্ত্র বিনামূল্যে দিচ্ছে ধুয়ে। নিন্দকেরা আমার কাশী, সব কিছু পাপ করছে বিনষ্ট। নিন্দকেরা আমার গুরু, কারণ, তারাই যে আমায় গড়ে তুলেছে জনার্দিন স্বামীর শিষ্যরূপে।

সাধক-কবি হিসাবে একনাথ স্বামীর দুইটি অবদান ধর্মসংস্কৃতির ইতিহাসে অমর হইয়া থাকিবে। প্রথমত, আপন রচনার মাধ্যমে বেদান্তের তত্ত্বকে তিনি সাধারণ মানুষের কাছে সহজবোধ্য করিয়া তুলিয়াছেন। দ্বিতীয়ত, তাঁহার ভক্তি সাহিত্য মারাঠী ভাষায় রচিত হওয়ার ফলে মারাঠী জনগণের অশেষ কল্যাণ সাধিত হইয়াছে।

বেদান্তের উচ্চতর তত্ত্বের আলোচনা আগে শুধু সংস্কৃতে শিক্ষিত মুষ্টিমেয় মানুষের মধ্যেই সীমাবদ্ধ ছিল। এবার তাহার জনপ্রিয়তা বৃদ্ধি পায়, সমাজের স্তরে স্তরে ছড়াইয়া পড়িতে থাকে। একনাথের অভঙ্গপদ গ্রামে গ্রামে নগরে নগরে গীত হইত। একনাথী ভাগবত ও রামায়ণ পঠিত হইত বহুতর ধর্মসভায়। কাজেই তাঁহার তত্ত্ব ও আদর্শের প্রচার দ্রুতবেগে বাড়িয়া চলে।

পূর্বসূরী জ্ঞানদেব তাঁহার গীতাভাষ্যে বেদান্তের তত্ত্ব আলোচনা যথেষ্টই করিয়াছেন, কিন্তু জ্ঞানদেবের দার্শনিক তত্ত্ব ও তাঁহার ভাষা ছিল জটিল ও দুর্বোধ্য। তাঁহার দর্শন-ব্যাখ্যা ছিল মেঘলোকের মত ধোঁয়াটে, সাধারণ মানুষের ধরা ছোঁয়ার উর্দ্ধে। কিন্তু একনাথের ব্যাখ্যা ছিল অতি প্রাঞ্জল, গ্রাম্য মানুষের পক্ষেও তাহার রসস্বাদ গ্রহণ করা কঠিন হইত না। মর্তের মানুষের কাছে স্বর্গীয় সুখ তিনি যেন নির্বিচারে অকুপণ করে বিলাইয়া গেলেন।<sup>১</sup>

মারাঠিতে রচিত একনাথের ধর্মসাহিত্যের প্রশংসায় মুখর হইয়া অধ্যাপক পটবর্দ্ধন লিখিয়াছেন : “পণ্ডিতদের জ্ঞান লিখে নাম-যশের অধিকারী হবার ইচ্ছে একনাথের ছিল না। তিনি লিখেছিলেন সমাজের সর্ব স্তরে সত্যবোধ ও জ্ঞানের আলোক বিস্তারের জ্ঞান। স্বীলোক, শূদ্র ও অশিক্ষিত জনসাধারণের কল্যাণেই লেখনী ধারণ করেছিলেন তিনি। পণ্ডিতের ঘৃণাকে তিনি করতেন ঘৃণা, আর লক্ষ লক্ষ নিরক্ষর দেশবাসীর দাবীকে অগ্রাধিকার দিয়ে সদাই লিখে চলতেন দেশজ ভাষায়।

“দেশজ ভাষার জ্ঞান তাঁকে অসম সাহসে যুঝতে হয়েছিল—এবং এতকালের ব্যবধানও, আজকের দিনেও, দেশজ ভাষার লড়াই আমাদেরও কম চালিয়ে যেতে হচ্ছে না। তখনকার দিনে সংস্কৃত জানা পণ্ডিতরা ছিলেন গর্ববশীত—মারাঠী ভাষা হচ্ছে অশিক্ষিত, নিম্নস্তরের গ্রাম্য লোকের ভাষা, এ ভাষায় লিখে নিজেকে হয়



করবো কেন—এই ছিল তাঁদের মনোভাব। একনাথ তাঁর মহান পূর্বসূরী জ্ঞানদেবেরই অনুসরণ করে চললেন। অন্ধ মূক জনগণের জন্ত তাঁহার হৃদয় কেঁদে উঠেছিল। তিনি উপলব্ধি করেছিলেন—ঐ হতভাগ্য জনগণের হৃদয়ে প্রবেশের পথ হচ্ছে তাদের মাতৃভাষা। তাই সেই ভাষাতেই নিজের ভক্তি সাহিত্য তিনি রচনা করলেন।”

দেশজ ভাষায় ধর্মগ্রন্থ রচনার জন্ত কাশীর শাস্ত্রবিদ পণ্ডিতেরা একনাথকে তীব্র ভাষায় ধিকার দিয়াছিলেন। মহারাষ্ট্রের রক্ষণশীল বিরোধিতাও বার বার তাঁহার বিরুদ্ধে উদগ্র হইয়া উঠে। এমনকি ঘরের মধ্যে নিজের পুত্রের গঞ্জন ও তাঁহাকে কম সহ্য করিতে হয় নাই। এই প্রতিকূল পরিবেশে যে দৃঢ়তা ও আত্মপ্রত্যয় নিয়া তিনি নিজের আরক্ৰ ত্রত উদ্‌যাপন করিয়াছেন তাহা বিস্ময়কর।

পুত্র হরি শাস্ত্রী সংস্কৃতশাস্ত্র অধ্যয়ন করিয়াছেন, ব্রাহ্মণ-সমাজে তাঁহার যথেষ্ট প্রতিষ্ঠা। একদিন পিতাকে তিনি খুব চাপিয়া ধরিলেন, কহিলেন, “পিতা, শাস্ত্রজ্ঞ ব্রাহ্মণের বংশে আমাদের জন্ম। সারা দেশের এক শ্রেষ্ঠ সাধকরূপে,—সুপণ্ডিত ও আদর্শবাদী আচার্য্যরূপে, আপনার কত সুনাম। আপনার মত লোক মারাঠী ভাষায় ধর্মগ্রন্থ লিখবেন, ভাষণ দেবেন? উত্তর ও দক্ষিণ ভারতের বিশিষ্ট পণ্ডিতেরা এ নিয়ে আপনার কত নিন্দাবাদ করছেন।”

“এসব তো আমার অজানা নয়, বৎস, তা এখন তোমার মূল বক্তব্যটা কি বল দেখি?” প্রশান্ত কণ্ঠে বলেন একনাথ স্বামী।

“আমার বক্তব্য আর সারা দেশের পণ্ডিতসমাজের বক্তব্য একই। এখন থেকে আপনি সংস্কৃত ভাষাতেই রচনা করুন আপনার ধর্মগ্রন্থ। প্রয়োজনমত মারাঠী সাহিত্যিকেরাই তা থেকে অনুবাদ করে নেবেন। হ্যাঁ, আমাদের বিশেষ অনুরোধ, মারাঠী ভাষায় আপনি আর লিখবেন না, ভাষণও দেবেন না।”

“এ অনুরোধ অগ্রায়। জাতির পক্ষে দেশের পক্ষে অকল্যাণকর, বৎস।”

অতঃপর স্বরচিত একটি অভঙ্গপদে একনাথ দেশবাসীকে  
উপরোক্ত প্রশ্নের উত্তর দিলেন :

সংস্কৃত বাণী দেবেঁ কেলী—

প্রাকৃত ওরী চোরাপাস্থনী ঝালী

অসোত যা অভিমান ভুলী ।

বৃথা বোলী কায় কাজ—

আঠা সংস্কৃত অথবা প্রাকৃত ।

ভাষা ঝালী জে হরি কথা

তে পাবনাচে তত্ত্বটা

সত্য সর্বথা মানলী—

দেবাসি নাই বাচাভিমান

সংস্কৃত প্রাকৃত তায় সমান ।

জ্যা বাণী জাহলে ব্রহ্মকথন

ত্যা ভাষা শ্রীকৃষ্ণ সন্তোষে ॥

—সংস্কৃত ভাষা কি দেবতার সৃষ্টি ?

আর প্রাকৃত সৃষ্টি করেছে চোরেরা ?

আসলে অহমিকার জালে

ভুল করে বলা হয় এমনতরো কথা ।

আসলে সংস্কৃত বা প্রাকৃত যা-ই হোক,

যে ভাষা বর্ণনা করে হরিকথা—

পবিত্র আর সত্য বাণী রূপে

সবাই মোরা দিই তার সম্মান ।

ভাষা নিয়ে দেবতার নেই পক্ষপাত,

সংস্কৃত আর প্রাকৃত দুই-ই তুল্য তাঁর কাছে ।

ব্রহ্মবাণী, ব্রহ্মজ্ঞান যে ভাষাতে হয় বর্ণন

তাতেই যে হয় প্রভু শ্রীকৃষ্ণের সন্তোষ ।

পৈঠান এবং পঙ্কাজপুরকে কেন্দ্র করিয়া একনাথ স্বামী অভিবাহিত করেন প্রায় চল্লিশ বৎসর। কর্মময় ও সাধনময় এই দীর্ঘ জীবনে তাঁহাকে ঘিরিয়া গঠিত হয় একটি বিরাট ভক্ত দল। শত শত ভক্ত সাধকে অন্তরঙ্গ ভক্তিসাধন দিয়া তিনি কৃতার্থ করেন, আর সহস্র সহস্র সাধারণ মানুষ তাঁহার ভাবসমৃদ্ধ কীর্তন, ভাষণ ও ধর্মসাহিত্য হইতে লাভ করে প্রেমভক্তির উদ্দীপনা।

১৫৯৯ খৃষ্টাব্দে ৬৬ বৎসর বয়সে পৈঠানে নিজ গৃহের অঙ্গনে হরিকথা বলিতে বলিতে এই হরিময় ভক্তিসিদ্ধ মহাপুরুষ সজ্ঞানে অমরলোকে প্রয়াণ করেন।

# বিশুদ্ধানন্দ সরস্বতী

উত্তর ভারতের সাধক ও সারস্বত সমাজের এক অত্যাঞ্জল ব্যক্তিত্ব ছিলেন স্বামী বিশুদ্ধানন্দ সরস্বতী। উনিশ শতকের দ্বিতীয়পাদ হইতে শুরু করিয়া অর্দ্ধশত বৎসরেরও অধিককাল অধ্যাত্ম-ভারতের প্রাণকেন্দ্র বারাণসীতে এই মহাত্মা বিরাজিত থাকেন, বিস্তারিত করেন তাঁহার তপস্তার আলোক। সন্ন্যাসী ও গৃহস্থ দুই-ই দলে দলে শরণ নিত এই মহাত্মার চরণে। ত্যাগ বৈরাগ্য ও জ্ঞানের হরিহর-মুক্তি এই মহাসাধকের জীবন হইতে সংগ্রহ করিত মুক্তিপথের পাথেয়।

বিশুদ্ধানন্দের পূর্বাশ্রমের পিতার নাম সংগমলাল, মাতা যমুনা দেবী। উত্তর প্রদেশের বৌড়ী গ্রামে এক সদাচারী ব্রাহ্মণ বংশে সংগমলালজীর জন্ম। সংসারে আর্থিক সচ্ছলতা তেমন ছিল না। ভাগ্য অধেষণে দেশের নানাস্থানে ঘোরাফেরা করিয়া অবশেষে তিনি হায়দ্রাবাদ অঞ্চলের কল্যাণী নামক স্থানে আসিয়া উপস্থিত হন। সবসুখরাম এখানকার নবাব সরকারের এক উচ্চপদস্থ ব্যক্তি, ইহারই আশ্রয়ে থাকিয়া সংগমলাল সরকারী কাজে নিযুক্ত হন। কিছুদিন পরে সবসুখরামের ভগিনী যমুনাদেবীকে বিবাহ করেন।

১৮০৯ খৃষ্টাব্দে, ভাদ্রমাসের জন্মাষ্টমীর পূণ্যদিনে মাতুলগৃহে বিশুদ্ধানন্দের জন্ম হয়। গৌরকান্তি, অনিন্দ্যসুন্দর এই নবজাত শিশুটিকে পাইয়া সকলের আনন্দের অবধি নাই।

জন্মাষ্টমীর পবিত্র দিনে জন্ম, তাই ভাবিয়া-চিন্তিয়া শিশুর নাম রাখা হইল—বংশীধর। পিতা সংগমলালজী তাড়াতাড়ি ছুটিয়া গিয়া শহরের এক জ্যোতিষীকে ডাকাইয়া আনিলেন। ইতিপূর্বে পর পর দুইটি সন্তান ভূমিষ্ঠ হওয়ার অল্পকাল মধ্যে মারা গিয়াছে। তাই নবজাত শিশুটিকে নিয়া হুশিয়ার অবধি নাই। কিন্তু জন্মলগ্ন বিচার

করিয়া জ্যোতিষী কহিলেন, “আপনারা ঘাবড়াবেন না। আমি দেখতে পাচ্ছি, এ শিশু দীর্ঘজীবী হবে, শুধু তাই নয় সহস্র সহস্র মানুষকে সে দেবে আশ্রয়।”

বৎসর খানেক পরে ধুমধাম করিয়া বংশীধরের অন্নারস্ত উৎসব সম্পন্ন হয়। শিশুর কল্যাণের জন্ত পূজা হোম যাগযজ্ঞের অমুষ্ঠানও কম করা হয় নাই। কিন্তু দুর্ভাগ্যক্রমে অল্পকালের মধ্যে বংশীধর আক্রান্ত হয় তুশ্চিকিৎস রোগে। তাহার দেহে দেখা দেয় মূর্ছা বা অপস্মার রোগ। এ রোগের আক্রমণের শেষে দেহটি দুর্বল ও অসাড় হইয়া পড়িত।

দিন দিন শিশুর দেহ ক্ষীণ হইয়া আসিতে থাকে। সকলেরই ধারণা হয়, এ যুগী রোগ আর সারিবার নয়। সারা গৃহে নামিয়া আসে বিষাদ ও হতাশার অন্ধকার।

মাতুল সবসুখরাম বড় ভালবাসেন বংশীধরকে। অবসর পাইলেই মাঝে মাঝে তাহাকে নিয়া বেড়াইতে বাহির হন, নানা গল্পকথায় তাহাকে উৎফুল্ল রাখিতে চেষ্টা করেন।

বংশীধরের বয়স তখন চার বৎসর। মাতুলের সঙ্গে একদিন সে ভ্রমণে বাহির হইয়াছে। পথ চলিতে চলিতে হঠাৎ দেখা যায় বালকের অদ্ভুত ভাবান্তর। চোখদুটি বিফারিত, ভাবাবেশে সারা দেহ থরথর করিয়া কাঁপিতেছে। মাতুলের হাতটি সজোরে আঁকড়াইয়া ধরিয়া হঠাৎ সে থামিয়া পড়ে। ব্যগ্র দৃষ্টিতে তাকাইয়া সবসুখরাম প্রশ্ন করেন, “কিরে বংশীধর কি হয়েছে? অমন করছিস কেন? আমায় কিছু বলবি?”

“মামাজী, মামাজী! আমার কেতাব কোথায়?” উত্তেজিত স্বরে বলিতে থাকে বালক বংশীধর।

“কোন কেতাব, কিসের কেতাব, ভাল করে বুঝিয়ে বল, এখনই তোকে আমি তা কিনে দিচ্ছি।”

“আমার নিজের সেই কেতাবটি এনে দাও। তা পেলেই আমার

ব্যারাম সেরে যাবে। আমি ভালো হয়ে উঠবো।” মোহগ্রস্তের মত কথাটি সে বার বার আওড়ায়।

সবস্বথরাম ভাবেন, রোগে ভুগিতে ভুগিতে বালকের মস্তিষ্কের ধারণশক্তি কমিয়া গিয়াছে। মাথায় হঠাৎ খেয়াল চাপিয়াছে, একটা বই চাই। তাই নিয়াই সে এমন উত্তেজিত। বাড়ীতে ফিরিয়া রংবেরং-এর বই দুই চারটি আনিয়া দিলেন, কিন্তু বংশীধরের সেদিকে কোন দৃষ্টিপথই নাই। এগুলি দূরে ছুঁড়িয়া ফেলিয়া সে কাঁদিতে বসে তাহার কোন্ এক কাল্পনিক বই-এর জন্ত।

মাতুল সান্ত্বনা দেন, “বেশ তো, বংশী, এনে দেবো তোর বই। কিন্তু কোথায় রয়েছে তা তো বলবি।”

সজলচক্ষে বালক উত্তর দেয়, “তা রয়েছে আমার কুঠিয়ায়। শিগ্গীর তোমরা খুঁজে নিয়ে এসো। নইলে আমি বাঁচবো না।” এ অদ্ভুত কথার কি রহস্য তা কে জানে? বাড়ীর লোকেরা আর ইহা নিয়া মাথা ঘামান নাই।

অস্ব্থ কি করিয়া ভাল হইবে, এই চিন্তায় জননীর মনে কিন্তু একটুও শান্তি নাই। সাধুসন্তের সন্ধান পাইলেই তাড়াতাড়ি সেখানে ছুটিয়া যান। শাস্ত্রজ্ঞ ব্রাহ্মণ দেখিলেই তাঁহাকে ঘরে আনাইয়া শাস্তি-স্বস্ত্যয়ন করান, কিন্তু কোন কিছুতেই কাজ হইতেছে না। যমুনাদেবী ক্রমে একেবারে হতাশ হইয়া পড়েন।

কল্যাণীতে সে-বার এক সতীদাহ অনুষ্ঠিত হইবে। একটি ক্ষত্রিয়া নারী পতির চিতায় আরোহণ করার সঙ্কল্প নিয়াছেন; সংবাদ পাইয়া দলে দলে লোক ছুটিয়া চলিয়াছে শ্মশানের দিকে।

সাধারণ মানুষের ধারণা, চিতাশয্যায় উপবিষ্টা সতী নারীর আশীর্ব্বাদ একেবারে অমোঘ, তাহা কখনো ব্যর্থ হয় না। যমুনাদেবী স্থির করিলেন, বালক বংশীধরকে নিয়া সতীর কাছে যাইবেন, রোগমুক্তির জন্ত মাগিবেন তাঁহার আশীর্ব্বাদ।

চিতাশয্যার কাছে গিয়া সাধুনয়নে পুত্রের জটিল রোগের কথা

নিবেদন করা মাত্র সতী বলিয়া উঠেন, “বহিন, তুমি তোমার এ ছেলের জন্য মোটেই ভেবো না। সিদ্ধযোগীর চিহ্ন রয়েছে এর দেহে। অকালমৃত্যু কখনো এর ঘটবে না। তবে একে হয়তো তোমরা ধরে রাখতে পারবে না, ঘর ছেড়ে এ ছেলে সন্ন্যাসী হবে।”

পুত্রকে নিয়া যমুনাদেবী গৃহে ফিরিয়া আসেন। যে কারণেই হোক, বেশ কিছুদিন বংশীধর মূর্ছা-রোগে আক্রান্ত হয় নাই। কিন্তু বৎসরখানেক বাদে আবার ইহার পুনরাবৃত্তি ঘটিতে শুরু করে। আত্মীয়স্বজনদের উদ্বেগ আরো বাড়িয়া যায়।

কল্যাণীর কাছেই কীর্ণা ও মঞ্জিরা নদীর পবিত্র সঙ্গমস্থল। প্রতি বৎসর হাজার হাজার নরনারী এখানে স্নান করিতে আসে। একটি বৃহৎ মেলা উৎসবও এই উপলক্ষে অনুষ্ঠিত হয়।

সবসুখরাম আত্মপরিজন ও বন্ধুদের নিয়া সে-বার এই মেলায় আসিয়াছেন। স্নান-তর্পণের শেষে একজন সঙ্গী কহেন, “এখানে ঘাটের খুব কাছেই একটা পর্ণ কুটিরে একান্তে বাস করেন এক বড় মহাত্মা। যাবে তাঁকে দর্শন করতে?”

সাধুদর্শনের কথায় সবাই মহা উৎসাহী হইয়া উঠে। সবসুখরাম বিচক্ষণ ব্যক্তি। তিনি বলেন, “না, এত লোক নিয়ে গিয়ে মহাত্মার শান্তিভঙ্গ করা ঠিক নয়। ছোট ছেলেমেয়েরা এই ঘাটে বসে থাকুক। চল, আমরা আর সবাই সেখানে যাই।”

সঙ্গীরা সবাই এ কথায় সায় দেয়—কিন্তু গোল বাধাইয়া বসে পাঁচ বৎসরের বালক বংশীধর। সে বায়না ধরে, “না—আমি যাবোই সাধুজীকে দেখতে। আমায় নিয়ে চল। আমি এখানে থাকবো না।”

বালককে বুঝাইয়া নিরস্ত করা যায় না, তখন সে শুরু করে চীৎকার আর কান্না। মাতুলকে হার মানিতে হয়, বংশীধরসহ সবাইকে নিয়া উপস্থিত হন সাধুর আশ্রমে।

প্রণাম নিবেদনের পর সাধু একে একে সবাইকে আশীর্বাদ জ্ঞাপন করেন। এবার বালকের দিকে সহাস্তে তাকাইয়া মাতুল

সবসুখরাম কহেন, “বংশী এখানে আসবার জন্ত তো এতো কাদাকাটি করলি। কিন্তু এসে কি তোর লাভ হলো, বলতো?”

বলিক ইতিমধ্যে ভাবাবিষ্ট হইয়া পড়িয়াছে। পর্ণকুটিরের এদিক ওদিকে তীক্ষ্ণ দৃষ্টিতে কি যেন সে খুঁজিয়া বেড়ায়। হঠাৎ দৃঢ় স্বরে সে বলিয়া বসে, “মামাজী, এই তো, এই কুঠিয়ার ভেতরেই আছে আমার সেই কেতাব, আমার নিজের হাতে লেখা কেতাব। হ্যাঁ, এখানেই রয়েছে।”

মহাত্মার দিকে ফিরিয়া সবসুখরাম যুক্তকরে বলেন, “প্রভু, দেখুন এ বালক কি বলছে। তার নিজের হাতে লেখা একটা বই নাকি এখানে রয়েছে। এ বইয়ের কথা আগেও ওর মুখে আমরা শুনেছি। কিন্তু ব্যাপারটা কি, এর ভেতরে কোনও রহস্য আছে কিনা, তা আমরা কি করে বুঝবো?”

মহাত্মা শাস্ত্র স্বরে কহেন, “আর কি বলে এই বালক, আমায় খুলে বল তো?”

“প্রভু, আমার এই ভাগ্যেটি মৃগীরোগে ভুগছে অনেকদিন। শরীর বড় দুর্বল, আর বেশী দিন বাঁচবে বলে মনে হয় না। এই বই প্রসঙ্গে বালক কিন্তু একটা অদ্ভুত কথা বলে। এ বই ওর নিজস্ব বই, আর এটা খুঁজে পেলে ওর রোগ নাকি সেরে যাবে। এখন আপনার আশ্রমে এসে তো দৃঢ়স্বরে বলছে বইটি এখানেই রয়েছে।”

ক্ষণকাল চুপ করিয়া থাকিয়া সাধু মহারাজ কহেন, “ত্যাখো, এ বালক কিন্তু ঠিক বালকভাব থেকে কথাগুলো বলছে না, একটা দিব্যভাবে আবিষ্ট হয়ে রয়েছে। তোমরা তন্ন তন্ন করে আমার কুটিরে অনুসন্ধান করো। কোন পুরাণো হাতে-লেখা পুঁথি আছে কিনা, ত্যাখো।”

ছোট খড়ো ঘর। গ্রন্থপেটিকা ছাড়া অশ্রু আসবাবপত্র তেমন বেশী কিছু নাই। অনুসন্ধানের কাজ শেষ হইল, কিন্তু বালকের কথিত বই-এর পাভুলিপি কোথাও পাওয়া গেল না।



ভাবাবিষ্ট বংশীধরের দেখা গেল এক নূতন রূপ। কি এক অজ্ঞাত আনন্দে সে ভরপুর। সারা দেহ রোমাঞ্চিত, কম্পমান। ছুই চোখ বাহিয়া ঝরিতেছে পুলকাক্রম, নাসিকায় ঘন ঘন বহিতেছে দীর্ঘশ্বাস। আত্মপ্রত্যয়ের সুরে সে বলিয়া ওঠে, “কুটিরের চালের বাতা ভাল করে খুঁজে ছাখো। ওখানেই পাষে আমার বই। হ্যাঁ, আর ভয় নেই, এবারে আমার রোগ যাবে পালিয়ে, তোমাদেরও আর থাকবে না কোন কষ্ট।”

বালকের নির্দেশিত সেই স্থানটিতেই পাওয়া গেল একখানি পুরাতন হস্তলিখিত জীর্ণ পুঁথি, এক খণ্ড কাপড় দিয়া সযত্নে জড়ানো।

বংশীধরের হাতে বইয়ের মোড়কটি দেওয়া মাত্র চোখ-মুখ উজ্জল হইয়া উঠে, ভাবাবেশ অন্তর্হিত হয়। স্বাভাবিক বালক-ভাব আবার ফুটিয়া উঠে তাহার দেহে-মনে

সাধুজী গ্রন্থটি সতর্কভাবে পরীক্ষা করেন, বিস্ময়ে তাঁহার চোখ দুইটি বিস্ফারিত হইয়া উঠে। সজল চক্ষে আবেগভরা কণ্ঠে কহেন, “এ যে আমার গুরুদেবের স্বহস্ত লিখিত গ্রন্থ। গীতার নির্ঘ্যাস এতে তিনি লিখেছেন, এ গ্রন্থ তাঁর বড়ই প্রিয় ছিল। পাঁচ বৎসর আগে, তাঁর দেহান্তের প্রাকালে বার বার এটি তিনি চেয়েছিলেন। তখন খুঁজে পাওয়া যায় নি এবং এ জন্ত মর্মান্বিত হয়ে শেষ নিঃশ্বাস ত্যাগ করেন।”

উপস্থিত সকলে তো এ কাহিনী শুনিয়া মহা বিস্মিত। সবসুখরাম কোতুহলভরে প্রশ্ন করেন, “মহারাজ, সেই গ্রন্থের সঙ্গে এ বালকের কি সম্পর্ক তাতো বুঝতে পারছিনে। একটু বিশদ করে বলুন।”

“ভগবান গীতাতে বলেছেন, মৃত্যুর সময়ে মানুষ যে ভাবে ভাবিত হয় পরবর্তী জীবনে সেই ভাব ও সেই সংস্কার উদ্‌গত হতে দেখা যায় তার ভেতর। তোমাদের এই জাতিস্মর বালক পূর্বজন্মে ছিলেন আমাদের গুরুদেব। এ আশ্রমেরই অধ্যক্ষ তিনি ছিলেন। এখন থেকে এর দেহ রোগমুক্ত হলো। তোমরা দেখো, অনুর

ভবিষ্যতে এর সাঙ্খিক সংস্কার জেগে উঠবে। আর পূর্বজন্মের মত এ জন্মেও গ্রহণ করবেন সন্ন্যাস-জীবন।”

অতঃপর বাড়ির সবার সঙ্গে বংশীধর কল্যাণীতে ফিরিয়া আসে। এই ঘটনার পর হইতে আর কোনদিন কিন্তু মূর্চ্ছা-রোগে সে আক্রান্ত হয় নাই। ধীরে ধীরে সে একটি সুস্থ সবল কিশোরে পরিণত হয়।

কিশোর বংশীধরের জীবনে এবার আসে এক বড় দুর্দ্দৈব। অল্পদিনের ব্যবধানে পিতামাতা উভয়েই ইহলোক ত্যাগ করিয়া চলিয়া যান। মাতুল সবসুখরাম এই কিশোর ভাগ্নেটিকে বড় ভালোবাসেন। এখন হইতে তিনিই গ্রহণ করেন বংশীধরের সকল কিছু দায়িত্ব। শিক্ষার সর্বপ্রকার সুযোগ দিয়া প্রকৃত মানুষরূপে তাহাকে গড়িয়া তোলার জন্য তিনি সচেষ্ট হন।

ভট্টজী নামে এক বিখ্যাত পণ্ডিত নিকটেই থাকেন, তাঁহার টোলে বংশীধরকে পড়িতে দেওয়া হয়। বালক অতি অল্প সময়ে সংস্কৃত ব্যাকরণ, কাব্য, অলঙ্কার প্রভৃতির পাঠ শেষ করিয়া ফেলে। স্মৃতিশক্তি তাহার অতিশয় প্রখর, একবার যাহা শ্রবণ করে, আর কখনো বিস্মৃত হয় না। শিক্ষাগুরু ভট্টজী এজন্য তাহাকে বড়ই স্নেহ করিতেন, ডাকিতেন ঋতিধর বলিয়া।

কয়েক বৎসর সংস্কৃত সাহিত্য ও বেদ বেদান্ত পাঠে অতিবাহিত হয়। অতঃপর সবসুখরাম বংশীধরের ফার্সী ও মারাঠী ভাষা শিক্ষার ব্যবস্থা করেন। এই দুইটি ভাষার উপর দখল না থাকিলে তখনকার দিনে দাক্ষিণাত্যে কেহ সরকারী দপ্তরে উন্নতি করিতে পারিত না। তাই সবসুখরাম তাড়াতাড়ি ভাগ্নেকে এই ভাষা দুইটি শিখাইয়া নিতে চেষ্টিত হন। প্রতিভাধর বংশীধরও অনতিবিলম্বে ইহাতে ব্যুৎপন্ন হইয়া উঠেন।

বংশীধর তখন সবেমাত্র যৌবনে পদার্পণ করিয়াছেন। সুন্দর স্মৃতিম দেহ ও পরিপূর্ণ স্বাস্থ্য সহজেই আকর্ষণ করে। খেলার মাঠে

দৈহিক শক্তি ও মনোবলের দিক দিয়া কেহই তাঁহার সঙ্গে আঁটিয়া উঠিতে পারে না।

মাতুল সবসুখরাম নবাব সরকারের সেনাবিভাগের একজন উচ্চপদস্থ কর্মচারী। তাছাড়া, নবাব মমতাজুল ওমরাহ্ তাঁহার প্রতি স্নেহসম। তাই সবসুখরাম ভাবিলেন, ভাগ্যনেকে সেনা বিভাগে ভর্তি করাইয়া দিবেন। দৈহিক বল, সাহস ও দক্ষতা বংশীধরের যথেষ্ট। কাজেই এ বিভাগের কাজে তাড়াতাড়ি সে উন্নতি করিতে পারিবে। এসব ভাবিয়া বংশীধরকে অশ্বচালনা ও যুদ্ধবিজ্ঞায় নিপুণ করিয়া তুলিতে তিনি উদ্যোগী হন। অল্প কিছুদিনের মধ্যেই দেখা যায়, বংশীধর একজন সুদক্ষ ঘোড়সওয়ার হইয়া উঠিয়াছে। অতঃপর সুযোগমত মাতুল তাঁহাকে সেনাদলের শিক্ষা-নবীশের কাজে ভর্তি করিয়া দিলেন।

নবাবের সেনা শিবিরে সেদিন একটি তেজী আরবী ঘোড়া কেনা হইয়াছে। বড় ছরস্ত ও চঞ্চল এই ঘোড়াটি, সহজে বশে আসিতে চায় না। সওয়ার তেমন দক্ষ নয় বুঝিলেই ঝাঁকুনি দিয়া তাহাকে ফেলিয়া দেয়। তাই এ ঘোড়াটি নিয়া কর্তৃপক্ষ বড় সমস্যায় পড়িয়া গিয়াছেন। বংশীধর কহিল, “আপনারা যদি অনুমতি দেন, আমি এই দুই ঘোড়াটাকে সায়েস্তা করতে পারি।”

দুর্ভিক্ষ ঘোড়াটি নিয়া শিবিরের অধ্যক্ষের দৃষ্টিস্তার অবধি নাই। কহিলেন, “এতো খুব ভালো কথা। বংশীধর, তুমি এখনই ঘোড়াটাকে কিছুক্ষণ ছুটিয়ে নিয়ে এসো।”

বংশীধরের অপর দুই শিক্ষানবীশ বন্ধু সেখানে দণ্ডায়মান। ইহাদের একজন নবাবের পুত্র মেহেদি হুসেন, অপরজন বকর হুসেন—নবাবের অগ্রতম ভ্রাতৃপুত্র। সেনাবিভাগের নূতন শিক্ষার্থীদের মধ্যে বংশীধর সাহস, কৌশল ও দক্ষতায় শীর্ষস্থানীয়। তাই উপরোক্ত দুই বন্ধুর কিছুটা ঈর্ষা আছে তাঁহার প্রতি। বংশীধরকে কোন কৃতিত্বের সুযোগ দিতে তাহারা ইচ্ছুক নয়। ভয় দেখাইয়া তাহারা

বলে, “এই পাগ্‌লা ঘোড়াটায় সওয়ার হয়ে, কেন ভাই শুধু শুধু প্রাণটা খোয়াবি?”

বংশীধর নিরস্ত হওয়ার পাত্র নয়। হাসিয়া বলে, “দেখি একবার কে জেতে, ঘোড়া না তার সওয়ার।”

এই আরবী ঘোড়ার উপর অবলীলায় সে চড়িয়া বসে। অদ্বুত কৌশলে তাকে আয়ত্তে আনে, তারপরে সপাসপ্‌ চাবুক চালাইয়া বহুদূরে এটিকে নিয়া উধাও হইয়া যায়। উর্দ্ধ্বাসে কয়েক ঘণ্টা অবিরাম দৌড়ানোর পর ঘোড়াটি ক্লান্ত হইয়া পড়ে। শিবিরে ফিরিলে দেখা যায়—পূর্বের সে অবাধ্যতা আর নাই, দুর্জয় আরবী ঘোড়া সম্পূর্ণরূপে তাহার সওয়ারের বশে আসিয়া গিয়াছে। উপস্থিত অনেকেই বংশীধরকে সাধুবাদ করিতে থাকে।

ঘোড়াটিকে দানাপানি দিয়া আদর জানাইয়া বংশীধর ঘরে ফিরিয়া যায়। পরের দিন ভোরে উঠিয়াই কিন্তু শুনে এক দুঃসংবাদ। এত পরিশ্রম করিয়া যে ঘোড়াটাকে সে আয়ত্তে আনিয়াছে গত রাত্রে সেটি হঠাৎ মারা গিয়াছে।

শিবিরের অধ্যক্ষ বড় ভীত সম্বস্ত হইয়া পড়েন। নবাব বাহাদুর নিজে সখ করিয়া, বহু অর্থব্যয়ে এই তেজী আরবী ঘোড়াটি বিদেশী বণিকদের কাছ হইতে কিনিয়াছেন। এটির মৃত্যু হইয়াছে শুনিলে তাহার ক্রোধের সীমা থাকিবে না।

এদিকে বংশীধরের সাক্ষ্যে নবাবের পুত্র ও ভ্রাতৃপুত্রেরও গুরু হয়েছে গাত্রদাহ। তাড়াতাড়ি নবাবকে তাহারা ঘোড়াটির মৃত্যু-সংবাদ দেয়। আরো জানায়, “এজন্য দায়ী বংশীধর। অবিরাম চাবুক মেরে ঘোড়াটাকে অনর্থক সে দূর দূরান্তে ছুটিয়েছে। অতিরিক্ত শ্রান্ত হবার ফলেই ঘটেছে তার মৃত্যু।”

নবাব বাহাদুর ক্রোধে অধীর হইয়া উঠেন। বংশীধরকে তখনি সেখানে ডাকাইয়া আনা হয়। অভিযোগ শুনিয়া শাস্ত্রশ্রমে সে বলে, “হজুর, কাল সন্ধ্যার পর আস্তাবলে কিরে এসে ঐ ঘোড়া আমার

হাত থেকে সাগ্রহে দানাপানি খেয়েছে। অসুস্থ অবস্থায় পশুরা সহজে কোন কিছু খেতে চায় না। কিন্তু এ ঘোড়াটি খেতে তখন কোন অনিচ্ছা প্রকাশ করে নি। কাজেই বহুক্ষণ ছুটাছুটির পরেও সে বেশ সুস্থই ছিল। মৃত্যু ঘটেছে গভীর রাতে। হয় কোন সংক্রামক রোগে, নয় তো সহিসদের দোষে এ দুর্ঘটনা ঘটেছে। এজ্ঞা আমাদের দায়ী করা কি সম্ভব ?”

নবাব রুষ্ট হইয়াই আছেন, এ কথায় কোন কান দিলেন না। বংশীধরের জ্ঞান ব্যবস্থা হইল হাজতবাসের। মাতুল সবসুখরাম দরবারের প্রভাবশালী ব্যক্তি, তিনি কাছে থাকিলে নবাবকে বুঝাইয়া নরম করিতে পারিতেন। দুর্ভাগ্যক্রমে সরকারী কাজে কয়েকদিনের জ্ঞান তিনি হায়দাবাদে গিয়াছেন। কাজেই বংশীধরকে হাজতে প্রবেশ করিতেই হইল।

কয়েকদিনের মধ্যেই সবসুখরাম কল্যাণীতে ফিরিয়া আসিলেন। আত্মপূর্বিক সব ঘটনা শুনিয়া তিনি তো স্তম্ভিত। অতঃপর নবাব বাহাদুরকে অনেক বুঝাইয়া সুঝাইয়া তিনি শাস্ত করেন, ভাগিনেয়কে মুক্ত করেন হাজতবাস হইতে।

এদিকে এ কয়দিন কারাকক্ষে বাস করার ফলে বংশীধরের অন্তরে জাগিয়াছে নির্বেদ, সংসারের সব কিছুতে আসিয়াছে চরম বিরক্তি। বসিয়া বসিয়া কেবলই ভাবেন, যেখানে প্রতি পদে ঈর্ষা, স্বার্থবুদ্ধি আর বিশ্বাসঘাতকতার সঙ্গীন উঁচানো, সেখানে কোথায় আনন্দ, কোথায় শান্তি? নাঃ, এমন স্থানে বাস করার কোন সার্থকতা নাই। এর চাইতে সন্ন্যাসী হইয়া পাহাড়ে জঙ্গলে ঘুরিয়া বেড়ানো অনেক ভাল।

কল্যাণীর একপ্রান্তে লোকালয় হইতে দূরে একটি প্রাচীন শিব মন্দির আছে। মনে শান্তি নাই, নানা হুচিস্তায় ভারাক্রান্ত বংশীধর

আজকাল প্রায়ই সেখানে ছুটিয়া যান, নির্জনে আপন মনে চূপচাপ বসিয়া থাকেন। সেদিন সেখানে আসিয়া উপস্থিত হন জটাজুটমণ্ডিত সৌম্যদর্শন এক প্রবীণ সন্ন্যাসী। পরমহংসজী নামে এ অঞ্চলে তিনি খ্যাত। পূর্বাশ্রমে ছিলেন পেশোয়া বংশের সন্তান। মোক্কালাভের আশায় বহুদিন আগে ঘর ছাড়িয়া বাহির হন, কঠোর তপস্যায় হন আপ্তকাম।

পরমহংসজীকে দেখা মাত্র বংশীধর উচ্চকিত হইয়া উঠেন, নিকটে গিয়া নিবেদন করেন সাষ্টাঙ্গ প্রণাম।

আশিস্ জানাইয়া পরমহংসজী কহেন, “বৎস, দেখছি, অন্তরে তোমার শাস্তি নেই। এক দুঃসহ জ্বালা বয়ে নিয়ে বেড়াচ্ছে। কি তোমার সঙ্কট, আমায় খুলে বল।”

“প্রভু, আপনি সর্বজ্ঞ, ঠিকই ধরেছেন। অন্তরের জ্বালা আমার অসহনীয় হয়ে উঠেছে। সংসারের সব কিছুই হয়ে গিয়েছে তিক্ত, বিশ্বাস অর্থশূন্য। স্থির করেছি, মনের দুঃখ-জ্বালা এড়াবার জন্য গ্রহণ করবো সন্ন্যাসীর জীবন।”—কাতর স্বরে নিবেদন করেন বংশীধর।

“এই তরুণ বয়সে, কেন সংসারের প্রতি তোমার এই বিরক্তি, বৎস?”

“সাত বৎসর বয়সে পিতামাতা দুই-ই হারিয়েছি। বালক-জীবনের ওপর পড়েছে বিধাতার নির্দম আঘাত। তারপর মাতুলের আশ্রয়ে দিন মোটামুটি ভালোই কাটছিল। কিন্তু এবার যেন জীবনের বাস্তব রূপ, নির্ভুর রূপটাই, আমার অভিজ্ঞতায় বেশী ধরা পড়েছে।”

“বিশদ করে সকল কথা আমায় বলো, বৎস।”

“যাদের আমি অকৃত্রিম বন্ধু বলে জানতাম, তাদের চক্রান্তে আমায় যেতে হয়েছে কারাগারে। দেশের শাসক ও প্রতিপালক মতিচ্ছন্ন হয়েছেন, ঘোরতর অবিচার করেছেন আমার প্রতি। কয়েকদিনের কারাবাসই আমার জ্ঞানচক্ষু খুলে দিয়েছে। বুঝেছি, গোটা গৃহস্থ-জীবনই আসলে একটা বন্দী জীবন। শাস্তি নেই,

আনন্দ নেই, এখানে পড়ে পড়ে অদৃষ্টের মার খাওয়া ছাড়া আর কোন উপায়ও নেই। তাই তো সন্ন্যাস নেবো বলে সঙ্কল্প করেছি। কৃপা করে আপনি আমায় এ বিষয়ে সাহায্য করুন।”

“বৎস, যিনি তোমার আমার প্রভু, সবার প্রভু, তিনি আগে থেকেই তোমার অবস্থার কথা আমায় জানিয়ে দিয়েছেন। এজ্ঞাই ঠিক এই সময়ে তোমার সমক্ষে আমার আগমন।”

“আশা হচ্ছে, আনন্দ হচ্ছে, আপনার কথা শুনে। এবার কৃপা করে বলুন, কি আমায় করতে হবে।”

“বৎস, সন্ন্যাস বড় কঠিন ব্রত। এ ব্রত নেবার আগে যথেষ্ট প্রস্তুতি চাই। শুধু গৃহত্যাগ করলেই হবে না। সন্ন্যাসীকে এ জন্মেই ব্রহ্মলাভ করতে হবে এবং এজ্ঞ সর্বাত্মে চাই ত্যাগ বৈরাগ্য, ব্রহ্মচর্য্য—চাই শাস্ত্রাভ্যাস ও কঠোর সাধনা। প্রস্তুতির এই ধাপগুলি পেরিয়ে যেতে পারলে তবেই আসবে পরাশাস্তি ও পরাজ্ঞান—যেজ্ঞ অজানিতে তোমার মন ব্যাকুল হয়ে উঠেছে।”

“বেশ প্রভু, আপনার কথিত মত দীর্ঘ-প্রস্তুতির পথই আমি বেছে নেবো। কিন্তু একটা প্রার্থনা। কৃপা করে যখন এসেছেনই, আপনি আমায় দীক্ষা দিন, সন্ন্যাস দিন, এ জীবন কৃতার্থ হোক।”

“না—বৎস, আমি তোমার গুরু নই। তোমার চিহ্নিত গুরু রয়েছেন উত্তর ভারতে। যথা সময়ে তাঁর দর্শন পাবে। হ্যাঁ, এবার শোন আমার কথা। প্রথমে তুমি পুণ্যতীর্থ নাসিকে যাও। সেখানে বৈরাগ্য ও ব্রহ্মচর্য্য অবলম্বন করে বেদ বেদান্তের অধ্যয়ন শুরু করো।”

“আপনার দর্শন ও উপদেশ আবার কবে পাবো, প্রভু?” সজল চক্ষে প্রশ্ন করেন বংশীধর।

“প্রয়োজনমত আমি নিজেই আবির্ভূত হবো তোমার সকাশে।” একথা বলার পর পরমহংসজী মন্দির চত্বর ছাড়িয়া প্রবেশ করেন সন্নিহিত অরণ্যে। তারপর ধীরে ধীরে অদৃষ্ট হইয়া যান।

ঘরে কিরিয়া আসিয়া বংশীধর মাতুল সবসুখরামের উদ্দেশে এক চিঠি লিখিলেন। সতের বৎসরের বালকের সেই চিঠির মর্ম্ম :

“জীবনে যেটুকু অভিজ্ঞতা এই অল্প বয়সে আমার হয়েছে, তাতে দেখেছি—এ সংসার নিতান্ত দুঃখময়। এর জটিল জালে জড়িয়ে অসহায়ের মত কেবলি নির্ঘাতন সহ্য করতে হয়। আর এটাও আমি বুঝেছি—সংসারের সব কিছুই নশ্বর, ক্ষণস্থায়ী। একমাত্র ঈশ্বরই অবিনশ্বর, তাঁর ধামেই রয়েছে পরম শান্তি, পরম আনন্দ। আমি ঈশ্বরলাভের আকাঙ্ক্ষা নিয়েই চিরতরে গৃহত্যাগ করে যাচ্ছি। আমায় অনুসন্ধান করার চেষ্টা করবেন না, কারণ ঘরে ফেরা আমার কোন মতেই সম্ভব নয়। পুত্রনির্বিশেষে আপনি আমায় পালন করেছেন, মাতা পিতার অভাব বুঝতে দেন নি কোনদিন, আপনার স্নেহ মমতা ও কল্যাণেচ্ছার ঋণ কখনো শোধ করার নয়। আমায় আপনি মার্জনা করবেন, গ্রহণ করবেন আমার শ্রদ্ধাপূর্ণ প্রণাম।”

সেই রাত্রেই গোপনে বংশীধর কল্যাণী ত্যাগ করিলেন। পদব্রজে চলিলেন নাসিকের উদ্দেশে। পরের দিন তাঁহার চিঠি পড়িয়া মাতুল মাথায় হাত দিয়া বসিয়া পড়েন। সারা গৃহে নামিয়া আসে নৈরাশ্রের অন্ধকার।

নাসিকের এক নিষ্ঠাবান সুপণ্ডিত ব্রাহ্মণের আশ্রয়ে থাকিয়া বংশীধর বেদ বেদাঙ্গ অধ্যয়ন করেন। অসাধারণ প্রতিভা ও ধীশক্তি তাঁহার। তিন বৎসরের মধ্যে শিক্ষাগুরুর গ্রন্থাদি তিনি আয়ত্ত করিয়া ফেলেন। শাস্ত্রপাঠের সঙ্গে সঙ্গে তপস্যার জগ্গ, প্রত্যক্ষ অনুভূতি লাভের জগ্গও তিনি ব্যাকুল হইয়া পড়েন। কোথায় তাঁহার চিহ্নিত সদগুরু, কবে তাঁহার কৃপা পাইবেন, কোন্ সাধন নিয়া অগ্রসর হইবেন, ভাবিয়া কুল-কিনারা পান না।

বিবাদ-খিন্ন হৃদয়ে গোদাবরীর ঘাটে সেদিন বসিয়া আছেন, এমন



সময়ে দ্বিতীয়বার দর্শন দিলেন কল্যাণকামী সন্ন্যাসী পরমহংসজী। স্নেহমাখা স্বরে কহিলেন, “বৎস বংশীধর, তুমি এবার পদব্রজে বেরিয়ে পড়ো উত্তর ভারতের দিকে। পথে ওঙ্কারনাথের জ্যোতির্লিঙ্গ আর উজ্জয়িনীর মহাকাল দর্শন করে যেও। ব্রহ্মচারীদের পক্ষে মহাকাল মন্দিরে ব’সে শিবপঞ্চাক্ষর মন্ত্রের জপ সাধকদের পক্ষে কল্যাণকর। তুমি এই জপ-সাধন সেখানে সম্পন্ন ক’রো।”

ওঙ্কারনাথ তীর্থ লক্ষ্য করিয়া বংশীধর চলিতে থাকেন। তখনকার দিনের পথঘাট মোটেই নিরাপদ ছিল না। মারাঠা শক্তির সবে মাত্র পতন ঘটিয়াছে। তাই চারিদিকেই রাজনৈতিক অশান্তি আর সামাজিক বিশৃঙ্খলা। পথে ঠগী ও ডাকাতদের উপদ্রবও বৃদ্ধির পথে। এ অবস্থায় একাকী কোথাও যাওয়া অত্যন্ত বিপজ্জনক। একদল বণিকের সঙ্গে মিলিত হইয়া বংশীধর পথ চলিতেছেন।

এই দলে কখন যে কয়েকজন ডাকাত কারবারীর বেশে ঢুকিয়া পড়িয়াছে তাহা কেহ বুঝিতে পারে নাই। বংশীধরের কান্দি সুগৌর, দেহ সুন্দর সুঠাম, চোখে মুখে আভিজাত্যের ছাপ। ডাকাতরা ভাবিল, নিশ্চয়ই এ যুবক কোন সম্ভ্রান্ত জমিদারের পুত্র, কোন জরুরী কাজে দূরদেশে যাইতেছে। কোমরের পেটিতে প্রচুর অর্থ যে লুকানো আছে তাহাতেও কোন সন্দেহ নাই। স্থির করিল, পথের মধ্যে কোথাও তাহাকে হত্যা করিয়া টাকাকড়ি ও সোনারানা লুটিয়া নিবে।

যাত্রীদল সেদিন দৌলতাবাদের কাছে আসিয়া পৌঁছিয়াছে। এ সময়ে এক চটিতে অবস্থান করার সময় ছবুঁস্তেরা বংশীধরের খাছে বিষ মিশাইয়া দেয়। অল্পক্ষণের মধ্যেই সে ভূমিতে লুটাইয়া পড়ে, দেহটি হয় নীলবর্ণ, অসাড়—মুখ দিয়া ঘন ঘন ফেনা নির্গত হইতে থাকে। সঙ্গীরা প্রমাদ গণিতে থাকে। এই মুমূর্ষু যুবক সম্বন্ধে আর মাথা না ঘামাইয়া ভাড়াভাড়ি সেখান হইতে তাহার প্রস্থান করে। ডাকাতেরা দেহ তল্লাস করিয়া দেখে টাকাকড়ি

বংশীধরের কাছে কিছুই নাই। অগত্যা তাহারাও সেখানে হইতে চম্পট দেয়।

স্থানীয় এক বিদ্বান পাটেল এই সময়ে দৌলতাবাদের দিকে যাইতেছিলেন। চটির সম্মুখে আসিয়া দেখেন, এক সুদর্শন যুবক মৃতপ্রায় হইয়া পড়িয়া আছে। ব্যাকুল হইয়া তখন তিনি গ্রাম হইতে এক চিকিৎসক ডাকাইয়া আনেন। চিকিৎসা ও পরিচর্যার ফলে বংশীধর অনেকটা সুস্থ হইয়া উঠেন। যুবকটির উপর পাটেলের ইতিমধ্যে বড় মমতা পড়িয়া গিয়াছে। পরম যত্নে তাঁহাকে তিনি এবার দৌলতাবাদের নিজ গৃহে নিয়া যান, সেবা ও শুশ্রূষার যথোচিত ব্যবস্থা করেন। অতঃপর কয়েকদিনের মধ্যেই বংশীধরকে অনেকটা ভালো হইয়া উঠিতে দেখা যায়।

পাটেলের স্ত্রী সানন্দে গ্রহণ করিয়াছেন বংশীধরকে। মায়ের মমত্ব ও স্নেহ দিয়া সদাই তাঁহাকে ঘিরিয়া রাখিতে তিনি ব্যস্ত। বংশীধরকে তিনি জানাইয়া দেন, “ছাখো বাবা, ভগবানের দয়ায় মৃত্যুর মুখ থেকে তুমি উঠে এসেছ। স্বাস্থ্য তো একেবারেই ভেঙ্গে পড়েছে। সাফ কথা বলে দিচ্ছি—তোমার শরীর না সারলে আমরা তোমায় কোথাও যেতে দেবো না। মনের আনন্দে আমাদের কাছে কয়েকমাস থাকো, ভালো করে খাওয়া-দাওয়া করো, তারপর যাবার কথা ভাববে।”

শুধু স্নেহময়ী গৃহকর্ত্রীই নয়, বাড়ীর আর সকলেও বড় ভালো-বাসিয়া ফেলিয়াছে বংশীধরকে, কেহই তাঁহাকে ছাড়িয়া দিতে রাজী নয়। অগত্যা কিছুদিনের জন্য তাঁহাকে স্থান ত্যাগের সঙ্কল্প ত্যাগ করিতে হয়।

পরম আনন্দে ও আরামে দিনগুলি কাটিয়া যাইতেছে। এভাবে প্রায় তিন মাস অতিক্রান্ত হইল। পাটেলের বৃদ্ধা জননী বংশীধরকে

নিজের নাতির মতই স্নেহ করেন, বংশীধরও তাঁহার প্রতি কম  
 আদ্যবান নয়। প্রতিদিন সন্ধ্যায় বুদ্ধাকে তিনি ভাগবত পাঠ করিয়া  
 শুনান। সেদিনও পাঠ চলিতেছে। প্রসঙ্গক্রমে জড়ভরতের  
 উপাখ্যান শুরু হয়। রাজ্য, বিস্তৃতিভব ও আত্মপরিজন সব কিছু  
 ত্যাগ করিয়া আসিয়া বনবাসী রাজা শেষটায় আবদ্ধ হন এক  
 হরিণশিশুর মায়ায়। অদৃষ্টের একি নিদারুণ পরিহাস! এই করুণ  
 কাহিনীটি বর্ণনা করিতে গিয়া বংশীধর ক্রন্দন করিতে থাকেন, গণ্ড  
 বাহিয়া ঝরিতে থাকে অশ্রুধারা।

বুদ্ধা চমকিয়া উঠেন, ব্যাকুল হইয়া প্রশ্ন করেন, “বংশী, কি হয়েছে  
 তোমার? এমন করে তুমি কাঁদছো কেন? কেউ কি তোমায়  
 গালমন্দ দিয়েছে, ছুঃখ দিয়েছে?”

“না—দাদী, ছুঃখ আমিই দিয়েছি আমার নিজেকে। ছুঃখের  
 সাগরে পড়ে এখন হাবুডুবু খাচ্ছি। আমার অবস্থা ভরত রাজারই  
 মত—অথবা তাঁর চাইতে আরো শোচনীয়। সন্ন্যাস নেবো বলে  
 আত্মীয়স্বজনের স্নেহ প্রেম ঠেলে ফেলে এসেছিলাম। কিন্তু কি  
 চরম দুর্ভাগ্য আমার—এখানে দৌলতাবাদে এসে এ গৃহপরিজনদের  
 মায়ায় আবদ্ধ হয়ে পড়েছি। নাঃ—আর নয়। আজই আমি এ স্থান  
 ত্যাগ করবো, সিদ্ধ করবো নিজের পবিত্র সঙ্কল্প।”

বুদ্ধা দাদী অনেক করিয়া বুঝাইলেন। পাটেলের স্ত্রী আসিয়া  
 শুরু করিলেন করুণ ক্রন্দন। কিন্তু বংশীধর নিজ সিদ্ধান্তে রহিলেন  
 অচল অটল।

আঁচলে চোখ মুছিয়া পাটেলের স্ত্রী কহিলেন, “বেশ বেটা,  
 সন্ন্যাসের পথে তুমি যখন যাবেই, যাও। আর তোমায় আমরা  
 বাধা দেবো না। কিন্তু তোমায় আমি নিজ সন্তানের মত দেখি,  
 এভাবে কপর্দকহীন অবস্থায় তুমি যেতে পারবে না। আমার  
 নিজের কাছে জমানো রয়েছে পঞ্চাশটি সোনার মোহর। এগুলো  
 তোমায় সঙ্গে নিতে হবে। খাওয়া-পরা আর আরামের জন্ত

এগুলো তুমি খরচ করবে। হ্যাঁ, এতে তুমি আপত্তি ক'রো না, বেটা।”

“ঘোর আপত্তি আছে আমার। ঘর-সংসার ছেড়ে কাঙাল সন্ন্যাসীর জীবন যে গ্রহণ করতে চলেছে, একগাদা মোহর সে কি করে কোমরে বেঁধে রাখবে? কেনই বা রাখবে? ছি-ছি এ প্রলোভন আমায় আপনারা যেন দেখাবেন না। তাছাড়া, এই তো সেদিন নিজের অভিজ্ঞতা থেকে দেখলাম। সঙ্গে একটি কানাকড়ি নেই, অথচ ডাকাতেরা আমায় বিষ খাওয়ালো। সোনার মোহর সঙ্গে থাকলে কি আর রক্ষে আছে? না—এসব দেবেন না?”

সাক্ষাৎসাক্ষ্যে বাড়ীর সবাই বংশীধরকে বিদায় দেন। স্নেহাঙ্ক পাটেল গৃহিণী কিন্তু এক সময়ে এক কাণ্ড করিয়া বসেন। সামনেই আসিতেছে প্রচণ্ড শীত ঋতু। তাই ঝুলিতে ভরিয়া বংশীধরের জন্য একটি জীর্ণ কাঁথা দেওয়া হয়। পাটেল গৃহিণী গোপনে এই কাঁথাটির ভাঁজে পঞ্চাশটি মোহর তাড়াতাড়ি সেলাই করিয়া দেন। মনের একান্ত ইচ্ছা, পথে অর্থের প্রয়োজন হইলে বংশীধর ইহার সদ্যবহার করিবেন।

অনেকটা দূর পথ চলিয়া আসিয়াছেন। ইঠাৎ একসময়ে বংশীধরের হাতে ঠেকিল ঐ জীর্ণ কন্থার একপ্রান্ত। স্থানটি যেন বড় ভারী ঠেকিতেছে। ভাঁজ খুলিয়া তো তাঁহার চক্ষু স্থির। দেখেন, পঞ্চাশটি মোহর গাদাগাদি করিয়া সেখানে সেলাই করিয়া রাখা হইয়াছে।

মাতৃরূপিণী মহিলার এই স্নেহ নিদর্শন দেখিয়া চোখ দুটি তাঁহার শ্রদ্ধায় কৃতজ্ঞতায় অশ্রুসজল হইয়া আসে। কিন্তু কোনমতেই যে তাঁহার পক্ষে এগুলি গ্রহণ করা সম্ভব নয়। পথ চলতে চলিতে স্থির করিলেন, অচিরে কোন দরিদ্র এবং যোগ্য পাত্রকে মোহরগুলি দান করিবেন।

কয়েকদিন পথ চলার পর বংশীধর গুজরনাথে আসিয়া পৌঁছেন। পুরাণে বর্ণিত সুপ্রসিদ্ধ জ্যোতির্লিঙ্গ এখানে বিরাজিত।

দর্শন করিয়া বংশীধরের আনন্দের সীমা নাই। দীর্ঘ সময় মন্দিরে ধ্যানজপ করিয়া কাটাইয়া দিলেন, নিবেদন করিলেন প্রাণের আকৃতি। করজোড়ে কহিলেন, “প্রভু, অদৃশ্যলোক থেকে তোমার হাতছানিই আমায় ঘর-সংসার ত্যাগ করিয়েছে। দেখো, ত্যাগ-বৈরাগ্য থেকে, তোমার আরাধনার পথ থেকে, কোনদিন যেন বিচ্যুত না হই।”

সঙ্গে সঙ্গে মনে পড়িয়া যায়, কাঁথায় সেলাই করা স্বর্ণমুদ্রাগুলির কথা। সামুন্নে মহেশ্বরের চরণে প্রার্থনা জানান, “প্রভু, এ সোনার শৃঙ্খল আর যে সহ্য করতে পারছি নে। তোমার সত্যকার কোন দরিদ্র ভক্তকে এগুলো দিয়ে দাও।”

মন্দির হইতে বংশীধর নামিয়া আসিয়াছেন, হঠাৎ প্রাজ্ঞের একপাশে তাঁহার দৃষ্টি পড়িল। এক দরিদ্র বৃদ্ধ ব্রাহ্মণ ভাবাবেগ জড়িত কণ্ঠে শিবস্তোত্র পাঠ করিয়া চলিয়াছেন—জ্যোতির্ময়্যায় পুনরুদ্ভব বারণায়, দারিদ্র্য-দুঃখ দহনায় নমঃ শিবায়।

বংশীধরের অন্তর হইতে কে যেন ডাকিয়া বলে,—ওরে এই তো তোর স্বর্ণমুদ্রার ভার লাঘব করার সুযোগ উপস্থিত, যোগ্যপাত্র যে সামনেই রয়েছে।

নীরবে ঐ বৃদ্ধ ব্রাহ্মণের পাশে কিছুক্ষণ তিনি বসিয়া থাকেন। তারপর স্তোত্রপাঠ সাজ হইলে সবিনয়ে নিবেদন করেন—

“দ্বিজবর, দেবাদিদেব আপনার প্রার্থনা শুনেছেন। দারিদ্র্য-দুঃখ থেকে আপনাকে ত্রাণ করার জন্ত আমার হাত দিয়ে পাঠিয়েছেন কিছু অর্থ। আপনি তা গ্রহণ করুন।”

উত্তরে ব্রাহ্মণ কহেন, “দেখুন, নিজে আমি পরম আনন্দে আছি। শিবধামে বাস করি, আকাশবৃষ্টিই আমার সম্বল। প্রভু নিজেই তাই নিত্যকার আহার জুটিয়ে দেন। আমার স্তোত্রপাঠ ও ধন-প্রার্থনা সেজন্ত নয়।”

“তবে কিসের জন্ত।”

“আমার একটি কন্যা অনেক দিন বিবাহযোগ্য হয়েছিল। সম্প্রতি একটি পাত্রের সন্ধানও মিলেছে। কিন্তু আমার মত ভিক্ষুকের পক্ষে বিবাহের ব্যয় নির্বাহ করার মত টাকাকড়ি কই? তাই তো রোজ এখানে এসে মহেশ্বরের চরণে প্রার্থনা জানাচ্ছি।”

“আপনার প্রার্থনা সফল হয়েছে, দ্বিজবর।” বলিয়াই বংশীধর জীর্ণ কাঁথার সেলাই খুলিয়া ঝকঝকে একরাশ স্বর্ণমুদ্রা ব্রাহ্মণের কৌচড়ে ঢালিয়া দেন।

বিস্ময় বিস্ফারিত নয়নে ব্রাহ্মণ তাঁহার কৌচড়ের দিকে তাকাইয়া আছেন। মুখে কোন কথা সরিতেছে না।

বংশীধরের চোখে মুখে তৃপ্তির হাসি। কহিলেন, “দ্বিজবর নিশ্চিন্ত মনে এগুলো গ্রহণ করুন। এ অর্থ অতি শুদ্ধ, কোন অসৎ উপায়ে অর্জিত হয়নি। কোন সম্পন্ন সং-গৃহস্থ এই মোহরগুলো জমিয়েছিলেন। পুত্রাধিক স্নেহে তা আমায় দান করেছেন। আমি কাঙাল, ত্যাগ-বৈরাগ্য ও সন্ন্যাসের পথে বেরিয়েছি। এসব দিয়ে আমি কি করবো? বরং এ অর্থ আপনার মত ভক্ত দরিদ্র ব্রাহ্মণের কাজে লাগুক। প্রভু জ্যোতির্লিঙ্গের কৃপাতেই আমাদের এ যোগাযোগ সাধিত হয়েছে, তাতে সন্দেহ নেই।”

অপার ঐশী কৃপার এই স্পর্শ পাইয়া, দারিদ্র্য-দুঃখ দহনের এই চমৎকারিতা দেখিয়া ব্রাহ্মণ একেবারে স্তব্ধ, আবেগ বিহ্বল। ছুই নয়নে তাঁহার কেবলি ঝরিতেছে পুলকাক্রম।

অতঃপর কয়েকদিন পদব্রজে পথ চলার পর বংশীধর উজ্জয়িনী তীর্থে আসিয়া উপস্থিত হন। প্রাচীনকাল হইতেই এখানকার মহাকাল মন্দিরের প্রসিদ্ধি রহিয়াছে। তাছাড়া, সাধু সন্ন্যাসী ও ভক্ত গৃহস্থেরা মহাকাল বিগ্রহকে পরম জাগ্রত বলিয়াও মনে করেন। পরমহংসজ্ঞী বংশীধরকে এখানকার মন্দিরে শিবপঞ্চাক্ষর মন্ত্র জপের

নির্দেশ দিয়াছিলেন। বংশীধর পরমনিষ্ঠায় সে নির্দেশ প্রতিপালন করেন। জপসিদ্ধির ফলে অন্তর তাঁহার পরম শান্তিতে ভরিয়া উঠে, নূতনতর অধ্যাত্ম-চেতনায় উদ্দীপিত হয়।

প্রায় একমাস কাল তিনি মহাকাল মন্দির চত্বরে অবস্থান করেন। কৃচ্ছ্রসাধন ও কঠোর তপস্তার জগ্ৰত মন তাঁহার আকুল। একাদি-ক্রমে পাঁচদিন কাটে নিরন্তর উপবাসের মধ্য দিয়া। অবশিষ্ট দিনগুলি আকাশবৃষ্টি করিয়াই অতিবাহিত করেন। এই সময়ে এক বৃদ্ধা চানাওয়ালী দিনান্তে বংশীধরকে একমুঠা ভিজ্জা ছোলা দিয়া যাইত, তাহা দিয়াই বৈরাগ্যবান তরুণ সাধক করিতেন ক্ষুধার নিবৃত্তি। দেবাদিদেব মহেশ্বরের ধ্যানরূপে এসময়ে এমন গভীরভাবে তিনি নিমগ্ন থাকিতেন যে দিনরাত কোথা দিয়া চালিয়া যাইত, হুঁস থাকিত না।

এই সময়ে আর একবার ঘটে তাঁহার জীবনের অগ্রতম পথ-প্রদর্শক পরমহংসজ্ঞীর আবির্ভাব। পরমহংসজ্ঞী কহেন, “বৎস, এখানে আর তোমার থাকার প্রয়োজন নেই। তাড়াতাড়ি উত্তর ভারতের গঙ্গাতীরের দিকে অগ্রসর হও। বিঠৌরে বান্মীকি তপোবনে রয়েছেন অশেষ শাস্ত্রবেত্তা, প্রবীণ সাধক, রাঘবেন্দ্র স্বামী। তাঁর আশ্রয়ে কিছুকাল বাস ক’রে শাস্ত্রের উচ্চতর পাঠ তুমি আয়ত্ত ক’রে নাও। তোমার সাধন প্রস্তুতির এ হবে একটা বড় অঙ্গ। আরও একটা কথা। পথে আজকাল নানা গোলযোগ হচ্ছে, ইঠাৎ কোন বিপদে পড়লে ঘাবড়ে যেয়ো না। প্রভু মহেশ্বর তোমায় রক্ষা করবেন।”

কয়েকজন পথচারীর সহিত মিলিত হইয়া বংশীধর সিদ্ধিয়া রাজ্যের মধ্য দিয়া চলিয়াছেন। এখানকার শাসনব্যবস্থায় তখন চরম বিশৃঙ্খলা ও গোলযোগ। উত্তরাধিকারীরা সিংহাসনের দাবী নিয়া উদগ্র হইয়া উঠিয়াছে। চারিদিকে চলিয়াছে চক্রাীদের ষড়যন্ত্র, গ্রেপ্তার ও নির্যাতন। সন্দেহবশে বংশীধরও কয়েকজন সঙ্গীসহ ধৃত হন। নিক্ষিপ্ত হন কারাগারে। কয়েকদিনের মধ্যে কর্তৃপক্ষ

নিজেদের ভুল বুঝিতে পারিয়া তাঁহাদের মুক্ত করিয়া দেন। ইহার কয়েকদিন পরেই বিদ্যাচলের তীর্থাদি পরিক্রমা করিয়া বংশীধর কানপুরের কাছে বিঠৌরে উপনীত হন।

সুপ্রাচীন যুগে মহর্ষি বাল্মীকির আশ্রম বিরাজিত ছিল আধুনিক বিঠৌরের সংলগ্ন পবিত্র ভূমিতে। আদিকবির পুণ্যময় স্মৃতিকে জনমানসে চির উজ্জ্বল রাখার জন্ত পণ্ডিতবর রাঘবেন্দ্রজী এখানে একটি উচ্চতর শাস্ত্র অধ্যয়নের চতুষ্পাঠী খুলিয়াছেন, নাম বাল্মীকি তপোবন।

এখানে পৌঁছিয়াই বংশীধর রাঘবেন্দ্রজীর চরণে প্রণত হইলেন, নিবেদন করিলেন অন্তরের আকাজক্ষা। দিব্যকাস্তি, বৈরাগ্যবান এই ব্রহ্মচারীকে দেখিয়া আচার্য্য প্রীত হইলেন। দুই একটি প্রশ্ন জিজ্ঞাসা করার পর প্রশ্ন কণ্ঠে কহিলেন, “বৎস, এ আশ্রমে তোমায় আমি আশ্রয় দিচ্ছি। সঙ্গে সঙ্গে এ আশাও পোষণ করছি, শ্রদ্ধা ও নিষ্ঠার সঙ্গে অধ্যয়ন সমাপ্ত করে তুমি তৈরী করবে তোমার অধ্যাত্মজীবনের শাস্ত্র-ভিত্তি।”

বিঠৌরের এই আশ্রমে বংশীধর তিন বৎসরকাল অধ্যয়ন করেন। তাঁহার অমানুষী মেধা, প্রতিভা ও শ্রমনিষ্ঠা দেখিয়া আচার্য্যের বিস্ময়ের অবধি নাই। পরম যত্নে নিজের অধীত বিদ্যা তাঁহাকে শিখাইতে থাকেন।

এই সময়ে ঘটনাচক্রে একদিন বংশীধর তাঁহার অসাধারণ গুরু-ভক্তির পরিচয় দেন। আচার্য্য রাঘবেন্দ্রজী সন্ধ্যাবেলায় প্রায়ই শিষ্যদের নিয়া গঙ্গাতীরে বেড়াইতে যাইতেন। সেদিনও গিয়াছেন। বর্ষার প্লাবন দেখা দিয়াছে কিছুদিন যাবৎ। ক্ষীণকায় গঙ্গা খরবেগে বহিয়া চলিয়াছে। আশ্রমের কয়েকটি ছাত্র আনন্দ কলরব করিতে করিতে স্নান শুরু করিয়া দিল। একটু পরেই দেখা গেল, ইহাদের



একজন প্রবল শ্রোতের টানে ভাসিয়া চলিয়াছে। রক্ষার কোনই উপায় নাই। কিংকর্তব্যবিমূঢ় হইয়া সবাই শঙ্কিত হৃদয়ে ঐ অসহায় ছাত্রটির দিকে তাকাইয়া আছে।

চরম বিপদের আর দেৱী নাই। ক্ষণকাল পরেই অবসন্নদেহ ছাত্রটি গঙ্গাগর্ভে ডুবিয়া যাইবে। রাঘবেন্দ্র আচার্য্য উত্তেজিত স্বরে ছাত্রদের কহিলেন, “পুরাণে তোমরা তো গুরুভক্তির কত কথাই পড়েছো। তোমাদের ভেতর এমন একজনও কি নেই যে গুরুর আশ্রিত এ যুবকটিকে উদ্ধার করে আনতে পারে?”

বংশীধর নীরবে উঠিয়া দাঁড়ান, মুহূর্ত্ত মধ্যে ঝাঁপাইয়া পড়েন বর্ষা-বিক্ষুব্ধ উত্তাল গঙ্গায়। সম্ভরণে চিরদিনই তিনি পটু, দেহের শক্তি ও সাহসও যথেষ্ট। শ্রোতের অল্পকূলে প্রায় এক ক্রোশ সাঁতরাইয়া গিয়া শেষটায় বিপন্ন ছাত্রটিকে ধরিয়া ফেলিলেন, টানিয়া আনিলেন তীরের দিকে।

ইতিমধ্যে রাত্রির অন্ধকার গঙ্গার দুইকূল ছাইয়া ফেলিয়াছে। আচার্য্য রাঘবেন্দ্রজী মশাল হাতে, অগ্ন্যাশ্র ছাত্রদের সঙ্গে নিয়া, বংশীধর ও তাঁহার সহপাঠীকে খুঁজিতে বাহির হইয়াছেন। অবশেষে তাহাদের দেখা মিলিল। সকলে হাঁফ ছাড়িয়া বাঁচিলেন।

বার বার আশীর্ব্বাদ জানাইয়া গুরু কহিলেন, “বংশীধর, তুমি ধন্ত। তোমার মত অন্তঃবাসী পেয়ে আচার্য্য হিসেবে আমি গর্ব্ব বোধ করছি। তোমার এই গুরুভক্তি, পরহিতে প্রাণ বিপন্ন করবার এই মহৎ প্রয়াস সবাইকে উদ্ধৃত্ত করুক, এই আমার কামনা।”

শাস্ত্রচর্চায় অনেকদিন অতিবাহিত হইয়াছে, এবারে বংশীধরের হৃদয়ে জাগিয়া উঠে যোগসাধনার আকাঙ্ক্ষা। জ্ঞান সাধনার উপর বেশী ঝোঁক থাকিলেও ঈশ্বরলাভের অগ্ন্যাশ্র শাস্ত্রসম্মত পথের অভিজ্ঞতাও তিনি পাইতে চান। এবার তাই বিঠৌর ত্যাগ করিয়া

তিনি উপনীত হন হিমালয়ে, উচ্চকোটির যোগীমহাত্মাদের অনুসন্ধান শুরু করেন। কয়েকদিন হরিদ্বার কন্থল ও হ্রদিকেশ কাটাইয়া অবশেষে আসিয়া পৌঁছান কেদার বদরীর মহাতীর্থে।

এখানে থাকাকালে সংবাদ পান, নীচে বিষ্ণুপ্রয়াগের পর্বতগুহায় হঠযোগে সিদ্ধ এক মহাপুরুষ বাস করেন। বড় দুর্গম ও জনহীন সেই অঞ্চল। বহু দুঃখ কষ্ট ও পথশ্রম স্বীকার করিয়া বংশীধর যোগীবরের গুহায় গিয়া উপস্থিত হন। ভক্তিভরে প্রণাম নিবেদনের পর ব্যক্ত করেন মনের অভিলাষ। এই যোগীর কৃপায় ও নিজের অনন্ত নিষ্ঠায় কয়েক বৎসরের মধ্যে হঠযোগে তিনি পারঙ্গম হইয়া উঠেন।

হঠযোগের ফলে বংশীধরের দেহকান্তি উজ্জ্বল হইয়া উঠে, দেহে মনে উদ্ভূত হয় এক অভূতপূর্ব শক্তি। সিদ্ধাই ও যোগসামর্থ্যও ধীরে ধীরে দেখা দেয়। কিন্তু এসব কোন কিছুতেই বংশীধরের শাস্তি নাই, আনন্দ নাই। এতকালের পরিত্রাঙ্কন, তপস্যা ও শাস্ত্রচর্চার মধ্য দিয়া ঈশ্বরলাভের জন্ত, ব্রহ্মসাক্ষাৎকারের জন্ত, মন তাঁহার উদগ্র অধীর হইয়া উঠিয়াছে—পরম প্রাপ্তির সঙ্কল্প হইয়াছে দৃঢ়তর। কিন্তু হঠযোগের সাধনক্রমের মধ্য দিয়া জীবনের সেই লক্ষ্যে তো পৌঁছিতে পারিতেছেন না।

নিরপেক্ষ মন নিয়া দিনের পর দিন ভরিয়া দেখিলেন, নিজের সম্পর্কে বিচার-বিশ্লেষণও কম করিলেন না। চিন্তের যে শুদ্ধতা, প্রশান্তি ও স্থৈর্য সাধিত হইলে পরা চৈতন্যের উদয় হয়, হঠযোগের সাধনায় তাহা লাভ করা দুষ্কর। বরং এই যোগ সাধনার ফলে যে সিদ্ধাই ও বিভূতির স্মরণ হয়, তাহার ফলে নবীন সাধকের আত্ম-ভিমান বাড়িবারই আশঙ্কা থাকে। হৃদয়ে তাঁহার এবার দৃঢ় প্রতীতি জন্মিল, রাজযোগের পথ ছাড়া পরমপ্রাপ্তির অন্য পথ নাই। এবার সেই রাজযোগের রাজপথই তিনি অনুসরণ করিবেন একান্ত নিষ্ঠায়।

অতঃপর শিক্ষাদাতা হঠযোগী মহাত্মাকে অন্তরের গভীর কৃতজ্ঞতা

জানাইয়া বংশীধর বিষ্ণুপ্রয়াগ হইতে বাহির হইয়া পড়েন। উপস্থিত হন হ্রষিকেশে।

হ্রষিকেশে তখন গোবিন্দ-গুরুজী আশ্রমের খুব প্রসিদ্ধি। এই আশ্রমে স্বামী পূর্ণাশ্রম ও সতুয়া স্বামী নামে দুই মহাত্মা অবস্থান করিতেছেন। বেদান্তের ব্রহ্মাত্মজ্ঞান ও রাজযোগের ব্যাখ্যা বিশ্লেষণে ইঁহারা পারঙ্গম। ইঁহাদের সান্নিধ্য ও সাহায্য পাইবার জন্ত বংশীধর গোবিন্দ-গুরুজী আশ্রমে আশ্রয় নিলেন।

সুদর্শন, শাস্ত্রবিদ, বংশীধর অল্পদিনের মধ্যেই প্রবীণ স্বামীজীদ্বয়ের অত্যন্ত স্নেহভাজন হইয়া উঠেন। নবীন সাধক হঠযোগে পারদর্শী হইয়া আসিয়াছেন, এজন্ত স্বামীজীরা আদর করিয়া তাঁহার নাম দেন—বীরভদ্র। এখানকার শাস্ত্রচর্চা ও সাধন-অনুকূল পরিবেশে পরমানন্দে বংশীধর প্রায় তিন বৎসর কাটাইয়া দেন।

এই সময়ে আবার একদিন তাঁহার সম্মুখে আবিভূত হন তাঁহার চিরকল্যাণকামী পরমহংস মহারাজ, প্রদান করেন তাঁহাকে প্রয়োজনীয় নির্দেশ।

প্রসন্ন মধুর কণ্ঠে পরমহংসজী বলেন, “বৎস বংশীধর, তোমার ব্রহ্মলাভের আকৃতি দেখে, শাস্ত্রবুৎপত্তি দেখে, আমি আনন্দিত হয়েছি। ইতিমধ্যে হঠযোগ-সাধন তুমি নিয়েছো ভালোই করেছো। হঠযোগে ব্রহ্মলাভ হয় না, কিন্তু ব্রহ্মলাভের জন্ত দৃষ্টির তপস্যা করতে হয়—তাতে অবশ্যই সাহায্য হয়। দেহ হঠযোগ-কুশল ও দৃঢ় থাকলে কচ্ছ ও ত্যাগ বৈরাগ্যের প্রস্তুতি ভালোভাবে গড়ে ওঠার অবকাশ পায়। কিন্তু বৎস, সদাই দৃষ্টি নিবদ্ধ করতে হবে মূল লক্ষ্যের ওপর। আর সে দৃষ্টি যে তোমার আছে, তা আমি জানি। রাজযোগই তোমার আসল পথ, এ পথ নিজেই তুমি খুঁজে নিতে বেরিয়েছো এটা বড় আনন্দের কথা। হ্যাঁ বৎস, এবার তোমায় আমি একটা নূতন নির্দেশ দেবো।”

“মহারাজ, আপনার আশীর্ব্বাদই আমায় এগিয়ে দিচ্ছে ধাপে

ধাপে। আপনার কল্যাণ কামনা আমার সতত রক্ষা করছে বর্ষের মত। আপনার যে কোন নির্দেশ আমার শিরোধার্য।” যুক্তকরে নিবেদন করেন বংশীধর।

“বৎস, সময় হয়ে এসেছে। তোমার চিহ্নিত সদৃশ্য তোমার প্রতীক্ষায় বসে আছেন। অবিলম্বে তুমি কাশীধামে যাও। সেখানে গুরুর কাছে তত্ত্বজ্ঞান লাভ করো। ব্রহ্মসাক্ষাৎকার ক’রে জীবন তোমার সফল হয়ে উঠুক।

পরমহংসজীর নির্দেশপালনে বংশীধর আর বিলম্ব করেন নাই। দীর্ঘদিনের তিতিক্ষা, তপস্তা ও প্রত্যাশা সফল করার জন্ত তিনি উপনীত হন কাশীধামে।

আনন্দদায়িনী কাশী বিভাদায়িনী কাশী—মোক্ষদায়িনী কাশী। যুগ যুগ ধরিয়া শাস্ত্রত ভারতের ললাটে শুচিশুভ্র তিলকরূপে জ্বলজ্বল করিতেছে এই পুণ্যময়ী তীর্থনগরী। বিশ্বনাথ আর অন্নপূর্ণার লীলা-নিকেতন এই কাশীকে বেষ্টন করিয়া রহিয়াছে গঙ্গার পবিত্র ধারা, আর রহিয়াছে অগণিত ব্রহ্মবিদ পুরুষদের তপস্তার অনন্ত প্রবাহ। তেজঃপুঞ্জকলেবর ব্রহ্মবিদ মহাত্মা, ব্রহ্মচারী সাধকদল ও মুমুক্শুদের দর্শন যেমন এখানে পাওয়া যায়, তেমনি পাওয়া যায় শাস্ত্রবিদ আচার্য্য আর সনাতন ধর্ম ও সমাজের বিশিষ্ট ধারক বাহকদের। এখানকার কত মঠে মন্দিরে সোৎসাহে চলিতেছে বেদান্ত ও ব্রহ্মবিদ্যার অনুশীলন, আবার কত বড় বড় ধর্মসভায় অনুষ্ঠিত হইতেছে নানা দেশ হইতে আগত তর্ক-শূরদের বিচার দ্বন্দ্ব। অধ্যাত্ম-জীবন আর সারস্বত জীবনের মিলিত আলোকচ্ছটায় এই পুণ্যময়ী নগরীর দিক্-দিগন্ত উদ্ভাসিত। তাই এই কাশীধামে উপনীত হইয়া বংশীধরের আনন্দের অবধি নাই।

কয়েকদিন ঘুরিয়া ঘুরিয়া তিনি নগরীর শ্রেষ্ঠ মঠ মন্দির পীঠস্থান

ও বিছাকেন্দ্রগুলি দর্শন করিয়া বেড়ান। আশ্রয়ের স্থান কোথাও মিলে নাই, ব্রহ্মচারী বেশে যত্রতত্র ঘুরিয়া বেড়ান, সত্রে একবেলা আহার জুটিয়া যায়, তারপর নিশাযোগে দশাশ্বমেধ ঘাটের সিঁড়িতে ঘাটিয়ালাদের ছাতার নীচে শয়ন করিয়া গভীর নিদ্রায় ঢলিয়া পড়েন।

কাশীতে তখন শক্তিধর মহাত্মাদ্বয় তৈলঙ্গ স্বামী ও ভাস্করানন্দের খুব প্রসিদ্ধি। বংশীধর সাগ্রহে ইঁহাদের দর্শন করিলেন, ভক্তিভরে প্রণাম নিবেদন করিয়া ফিরিয়া আসিলেন।

অন্তরে তাঁহার বড় প্রশ্ন—কোথায় তাঁহার চিহ্নিত সদগুরু যাঁহার নিকট হইতে নিবেন সন্ন্যাস দীক্ষা, যাঁহার চরণে চিরতরে করিবেন আত্মসমর্পণ। মনপ্রাণ তাঁহার রাজযোগের সাধন গ্রহণে উন্মুখ হইয়া উঠিয়াছে। এ সাধন যিনি দিবেন তাঁহাকে একাধারে হইতে হইবে বৈরাগ্যবান, তপস্তাপরায়ণ, বেদান্তের অদ্বৈত বিচারে পারঙ্গম এবং রাজযোগের নিগূঢ় সাধনায় সিদ্ধকাম। যে সাধন-প্রস্তুতি এ যাবৎ বংশীধরের জীবনে গড়িয়া উঠিয়াছে তাহাকে সার্থক করিয়া তুলিতে হইলে এমনি এক মহাত্মাকে খুঁজিয়া বাহির করিতে হইবে।

পরমহংসজী আশ্বাস দিয়াছেন, এই কাশীধামেই গুরু তাঁহার জন্য অপেক্ষমান। ব্রহ্মবিদ পুরুষের এ আশ্বাসবাণী তো কখনো মিথ্যা হইবার নয়। আশায় আশায় দিন গুণিতে থাকেন বংশীধর।

ইতিমধ্যে সংবাদ পাইলেন, গঙ্গাতীরে মহাযোগী অহল্যাবাদীর প্রতিষ্ঠিত মঠে এক পরমজ্ঞানী অশেষ শাস্ত্রবেত্তা মহাপুরুষ অবস্থান করেন। বিশেষ করিয়া বেদান্ত বিচারে ও রাজযোগের সাধনায় তাঁহার তুল্য ব্যক্তি সমকালীন উত্তর ভারতে কেহ নাই।

প্রত্যুষে গঙ্গান্নান সারিয়া ভস্ম-ভূষিত ললাটে, প্রদীপ্ত ভাস্করের মত সন্ন্যাসীবর গোড়স্বামী অহল্যাঘাটে শিষ্যগণ সহ বসিয়া আছেন। ছরুহ শাস্ত্রতত্ত্ব ও সাধনতত্ত্বের ব্যাখ্যা ও আলোচনা চলিয়াছে। আর প্রবীণ অন্তরঙ্গ শিষ্যেরা তৃণার্ঘ্য চাতকের মত স্বামীজীর অমৃতবাণী শ্রবণ করিতেছেন।

অনেকক্ষণ যাবৎ এই তত্ত্বালোচনা শুরু হইয়াছে। মণ্ডলীর এক কোণে বংশীধর নীরবে নির্নিমেষে প্রজ্ঞানঘন দিব্যোজ্জ্বল মূর্তির দিকে চাহিয়া আছেন। সর্ব্ব অস্তর দিয়া উপলব্ধি করিতেছেন,—যে পরম বস্তুলাভের জন্ত তিনি সংসার ছাড়িয়াছেন, ভিখারীর মত দেশ দেশান্তরে ঘুরিয়া মরিতেছেন, তাহা এই মহান পুরুষেরই করায়ত্ত। আত্মসমর্পণ করিতে হয় তো এমন মহাত্মার চরণেই করিতে হয়।

শাস্ত্র ব্যাখ্যা ও আলোচনার শেষে বংশীধর উঠিয়া দাঁড়ান, আচার্য্য গোড়স্বামীর পদপ্রান্তে ভক্তিভরে লুটাইয়া পড়েন। তারপর নিজের পরিচয় দিয়া করজোড়ে নিবেদন করেন তাঁহার অস্তরের আকাজক্ষা—“প্রভু, সারা দক্ষিণ ও উত্তর ভারত পরিভ্রম্য করে এই অভাগার জীবনতরী আজ আপনার চরণপ্রান্তে এসে ঠেকেছে। আপনি এর ভার নিন। কৃপা করে আমায় সন্ন্যাস দান করে, খুলে দিন মোক্ষপথের দ্বার।”

অনিন্দ্যাসুন্দর যুবক, চোখে-মুখে প্রতিভা ও সাধন-নিষ্ঠার ছাপ। আচার্য্য গোড়স্বামী মুগ্ধনয়নে কিছুক্ষণ বংশীধরের দিকে চাহিয়া আছেন। তারপর প্রশান্ত স্বরে প্রশ্ন করা শুরু করেন। কি তাহার নাম, বংশপরিচয়, কোথায় কোন্ আচার্য্যের কাছে কোন্ কোন্ শাস্ত্র অধ্যয়ন করিয়াছেন, কোন্ সাধন নিয়া কতটা অগ্রসর হইয়াছেন, খুঁটিনাটি সকল তথ্যই স্বামীজী মহারাজ জানিয়া নিলেন।

শাস্ত্রালাপ শুরু করিতেই দেখা গেল, বয়সে তরুণ হইলেও বংশীধর একজন অসামান্য শাস্ত্রবেত্তা। দীর্ঘদিনের ত্যাগ বৈরাগ্যের সহিত জ্ঞানানুশীলন তাঁহার জীবনে যুক্ত হওয়ায় ব্রহ্মকারা বৃত্তির এক বিরাট আধার রূপে সে পরিণত হইয়াছে। বহুদিন যাবৎ অস্তরে অস্তরে ব্রহ্ম-সাধনার এমনি এক উপযুক্ত অধিকারী পুরুষের, এমনি এক উত্তরসূরীর প্রতীক্ষায় ছিলেন গোড়স্বামী।

তৃপ্তি ও প্রসন্নতায় আচার্য্যের স্মৃগৌর আননখানি প্রদীপ্ত হইয়া উঠিয়াছে। কিন্তু বংশীধরকে তাঁহার এ ভাবান্তর বুঝিতে দিলেন না।

কণ্ঠস্বরে গাঙ্গীর্ষ্য টানিয়া আনিয়া কহিলেন, “বৎস, উত্তম কথা। আমি তোমায় আমার কাছ থেকে সন্ন্যাস নেবার সুযোগ দেবো। কিন্তু তার আগে কয়েকটা মাস আমার কাছে নূতন করে তোমায় বেদান্তের পাঠ নিতে হবে। তোমার গ্রহণ ক্ষমতা যদি সন্তোষজনক হয়, তবেই তোমায় দীক্ষা দেবো, নতুবা আর কোথাও তোমায় যেতে হবে।”

বংশীধর তো আকাশের চাঁদ হাতে পাইলেন। বুঝিলেন, আচার্য্য তাঁহাকে কঠোরভাবে পরীক্ষা করিয়া নিতে চান। বেশ, তাহাতেই তিনি সন্মত।

আচার্য্য গোড়স্বামী আবার কহেন, “হ্যাঁ বৎস, আর একটা কথা। আমার এ আশ্রমে এখন তোমার স্থান হবে না। তুমি যেমনভাবে দিনাতিপাত করছো, তাই করে যাবে। আর প্রতিদিন দুই বেলা আশ্রমে এসে গ্রহণ করবে তোমার পাঠ।”

“যে আজ্ঞে মহারাজ। আপনার নির্দেশ আমার শিরোধার্য্য”। আচার্য্যকে প্রণাম জানাইয়া নির্বিকার চিত্তে বংশীধর স্থান ত্যাগ করেন।

এবার গোড়স্বামীর ভক্ত শিষ্যদের মধ্যে শুরু হয় মৃৎ গুণ্জন। আচার্য্য কোতূহলী হইয়া প্রশ্ন করেন, “তোমরা কি আমায় কিছু বলতে চাও?”

“হ্যাঁ, প্রভু, আমাদের একটা নিবেদন আছে।” সবিনয়ে বলেন এক প্রধান শিষ্য। “আপনার এই বৃহৎ আশ্রমে স্থানের অভাব বিন্দুমাত্র নেই, রাজকীয় ভাণ্ডারা তো প্রায়ই লেগে আছে। তবে নবাগত ব্রহ্মচারীটিকে এখানে স্থান দিলেন না কেন, বুঝতে পারছিলাম না। ওকে তো বৈরাগ্যবান ও তপস্বী-পরায়ণ বলেই মনে হলো।”

“ঠিকই বলেছো। এ যুবকটির ভেতর বিরাট সম্ভাবনা লুকিয়ে রয়েছে। আধার বড় ও শুদ্ধ বলেই তো পরীক্ষা হবে কঠোরতর।

সত্বের শুকনো রুটি খেয়ে আর ঘাটিয়ালের ছাতার নীচে রাত্রিবাস করে আরো কিছুদিন কাটিয়ে দিক। ত্যাগ বৈরাগ্যের শোধন ওকে পাকা সোনায় পরিণত করুক। এটাই আমি চাই।

কিছুক্ষণ নীরব থাকিয়া গৌড়স্বামী আপন মনে কহিতে থাকেন, “ভালো মন্দের কথা নয়—তবে একটা পরিবর্তনের সূচনা কিন্তু দেখা যাচ্ছে। কাশীর মঠ-মন্দির ও বিছাকেন্দ্রে এতদিন দক্ষিণী দণ্ডী সন্ন্যাসীদেরই ছিল একচেটিয়া নেতৃত্ব। উত্তর ভারতের এই প্রতিভাধর যুবকটি সেই ধারা এবার পাণ্টে দেবে বলে মনে হচ্ছে।”

পরের দিন হইতেই বংশীধর গৌড়স্বামীর কাছে পাঠ নেওয়া শুরু করেন। ত্যাগ-বৈরাগ্যময় পথে জীবনযাত্রা তাঁহার আগেকার মতই চলিতে থাকে।

গৌরকান্তি, সমুন্নত দেহ, প্রতিভা-সমুজ্জ্বল বংশীধরের প্রতি এ সময়ে অনেক মঠ-মণ্ডলীর মোহান্তের দৃষ্টি আকৃষ্ট হয়। নানা প্রলোভন দেখাইয়া এই শাস্ত্রবিদ তরুণকে তাঁহারা দলে ভিড়ানোর চেষ্টা করিতে থাকেন। কিন্তু তাঁহাদের সকল চেষ্টাই হয় ব্যর্থ। গৌড়স্বামী এখন বংশীধরের জীবন-আকাশের ধ্রুবতারা, অনন্ত-নিষ্ঠায় এই কুপালু আচার্য্যের দিকে লক্ষ্য রাখিয়া অধ্যাত্মপথের অভিযাত্রায় তিনি অগ্রসর হইতে থাকেন।

উত্তর ভারতে তখন সিপাহী যুদ্ধের ঘোর তাণ্ডব চলিয়াছে। যারাগসীতেও এই সময়ে বিক্ষোভ ও সংঘর্ষ দেখা দিতে থাকে। শাস্ত্রিরক্ষার জন্ত কর্তৃপক্ষ এ অঞ্চলে একদল গোরা সৈন্য মোতায়েন রাখেন। কিছু সংখ্যক সেনা মাঝে মাঝে গঙ্গাবক্ষে টহল দিয়া বড়ায়—সেদিনও তাঁহারা নদীতে ঘুরিয়া বেড়াইতেছে। ইংরেজ সেনার আবির্ভাব দেখিয়া ঘাটের লোকজন ভয়ে দূরে সরিয়া পড়িয়াছে। এমন সময়ে বংশীধর ঘুরিতে ঘুরিতে নদীতীরে আসিয়া উপস্থিত।



নির্জন ঘাটে কে এই লোকটি, কি তাহার অভিসন্ধি ? বজ্রার ইংরেজ সৈনিকেরা সন্দিহান হয়, তাড়াতাড়ি তীরে নামিয়া আসে। বহির্বাস-পরা অর্জনগ্ন বংশীধরের সম্মুখে তাঁহারা সজীন উঁচাইয়া ধরে, ভাঙ্গা-ভাঙ্গা হিন্দিতে নানা প্রশ্নবাণ বর্ষণ করিতে থাকে। বংশীধরও যথাযথ উত্তর দেন। এই প্রশ্নোত্তরের মর্মার্থ—

“ওহে, একলাটি এখানে তুমি ঘুরে বেড়াচ্ছে কেন, বলতো ?”  
গোরা সৈনিকেরা জিজ্ঞাসা করে।

“কেন, আমায় দেখে কি বিজ্রোহী বলে মনে হচ্ছে ? পরিচ্ছদ দেখে বুঝতে পারছে না যে আমি একজন ভিক্ষাজীবী সাধু ?”—বংশীধর মুচকি হাসিয়া উত্তর দেন।

বংশীধরকে আপাদমস্তক নিরীক্ষণ করিয়া, তাহার সপ্রতিভ হাসি দেখিয়া গোরারা একটু আশ্বস্ত হয়, বলে—“না, তোমায় দেখে মনে হচ্ছে তুমি বদমায়েস নও। তুমি সাধু—জ্যোতিষী। আচ্ছা, তুমি জ্যোতিষী গণনা করতে পারো ?”

“কি তোমাদের প্রশ্ন বলই না সাহেব, একবার চেষ্টা করে দেখি পারি কিনা।” সকৌতুকে বলেন বংশীধর।

“তাঁখো, সাধু, এলাহাবাদে এখন জোর লড়াই চলছে। বিজ্রোহী সিপাইরা ইংরেজ সরকারের কেলা ধিরে ফেলেছে। আমরা বড় ছশ্চিন্তায় আছি। বলতে পারো ঐ কেল্লার পতন ঘটেছে কিনা ?”

“খুব পারি। আচ্ছা তোমরা আমার পায়ের কাছে মাটির দিকে তাকিয়ে দেখতো। কি দেখছো ? পিঁপড়ের সারি মাটির একটা উঁচু চক্রের চারপাশ ঘিরে রয়েছে, ভেতরে ঢুকছে না,—তাই না ? এলাহাবাদ দুর্গের অবস্থাও এমনি। সিপাইরা দুর্গ অবরোধ করেছে, কিন্তু ঢুকে পড়ার মত শক্তি সঞ্চয় এখনো করে নি।”

গোরা সৈনিকেরা এ সংবাদে উৎফুল্ল হইয়া উঠে। বলে, “সাধু, তুমি বড় ভালো লোক। আচ্ছা যাও, তুমি তোমার খুশী মত নদীর ঘাটে চলাফেরা করতে পারো।”

নির্ব্বিকার চিত্তে বংশীধর ঘাটের এক কোণে বসিয়া পড়েন, তারপর ধ্যান-ভজনে রত হন।

কয়েকমাস গত হইয়াছে। সাধনা, স্বাধ্যায় ও গুরুসেবার মধ্যে দিয়া বংশীধর আচার্য্য গোড়স্বামীর আরো ঘনিষ্ঠ আরো প্রিয় হইয়া উঠিয়াছেন। পরীক্ষার কয়েকটি পর্য্যায় সমাপ্ত হইয়াছে। গুরু এবার নবীন তপস্বীকে সন্ন্যাস দীক্ষাদানের সিদ্ধান্ত করিলেন। উত্তরায়ণের পূর্ণিমায়, শুভ নক্ষত্রে, এই অনুষ্ঠান সম্পন্ন হইয়া গেল। বংশীধরের সন্ন্যাস নাম হইল—বিশুদ্ধানন্দ সরস্বতী।

অলৌকিক মেধা প্রতিভার অধিকারী, সং ব্রাহ্মণকুলে জাত এই নবীন শিষ্য। গুরু মনে মনে স্থির করিয়াছেন তাঁহাকেই করিবেন গদির উত্তরাধিকারী, তাঁহার সন্ন্যাসী মণ্ডলীর ভবিষ্যৎ-নেতা। কাশীধামের সারস্বত সমাজে ও শাস্ত্রবিদ সন্ন্যাসী সমাজে যাহাতে সে শীর্ষস্থানীয় হইয়া উঠে, সে প্রস্তুতি সাধনেও গোড়স্বামী কোন ক্রটি রাখিলেন না। প্রাচীন শাস্ত্র ও অধিবিজ্ঞায় তাঁহাকে পারঙ্গম করিয়া তুলিতে লাগিলেন।

মীমাংসা দর্শন, বেদান্ত, প্রাচীন ও নব্যজ্ঞায়, কপিল দর্শন, শৈবতন্ত্র, প্রভৃতির মূল, প্রকরণ, টীকা ভাষ্য বিশুদ্ধানন্দ সরস্বতী একে একে আয়ত্ত করিয়া ফেলেন। কয়েক বৎসরের মধ্যে গুরু তাঁহাকে নিজস্ব সন্ন্যাসী সম্প্রদায়ের অধ্যাপনা কার্য্যেরও দায়িত্ব অর্পণ করেন।

কাশী ও উত্তর ভারতের শাস্ত্রার্থ বিচারসভাগুলিতে অশেষ শাস্ত্র-বিদ বিশুদ্ধানন্দ মহারাজ আবির্ভূত হইতেন অলস পাবকের মত। শাস্ত্রের নিহিতার্থ উদ্ঘাটনে, সনাতন ধর্ম্মের বিজয়কেতন সংস্থাপনে তিনি ছিলেন এক অপ্রাতদ্বন্দ্বী নেতা। কাশীর মঠ মণ্ডলী আখড়া

ও গৃহীমণ্ডল যেখানেই বিশুদ্ধানন্দ যাইতেন, লাভ করিতেন সকলের স্বতঃস্ফূর্ত শ্রদ্ধা ও সম্মম। শিষ্যের এই সাফল্যে আচার্য্য গোড়স্বামীর আনন্দের সীমা নাই।

এ সময়ে মণ্ডলীর সকল সন্ন্যাসীকে একদিন তিনি সমবেত করিলেন, ঘোষণা করিলেন,—তঁাহার দেহান্তের পর বিশুদ্ধানন্দ সরস্বতীই হইবেন মঠ-মণ্ডলীর মোহান্ত এবং পরিচালক। তাই যতদিন এই মহাত্মা জীবিত ছিলেন, মঠের ভাবী উত্তরাধিকারী বিশুদ্ধানন্দের আচার-আচরণ ও আদর্শের বিশুদ্ধতা রক্ষার দিকে ছিল তঁাহার সূতীক্ষ্ণ দৃষ্টি। প্রিয় শিষ্যের অন্তরে আত্মাভিমান যেন কখনো না আসে, ত্যাগ-বৈরাগ্যের সাধনায় তঁাহার জীবন যেন সদাই থাকে সমুজ্জ্বল, এ জন্ম তঁাহার সতর্কতার অবধি ছিল না। মঠের একদিনকার একটি ক্ষুদ্র ঘটনায় ইহার প্রমাণ মিলে।—

বিশুদ্ধানন্দের আগমনের কয়েকবৎসর পূর্বে আচার্য্য গোড়স্বামী তিনজন ব্রহ্মচারীকে সন্ন্যাস দেন। ইহাদের মধ্যে স্বামী বিশ্বরূপ ছিলেন প্রবীণতম এবং গুরুদেবের সর্ব্বাপেক্ষা স্নেহভাজন। সেদিন একটি তত্ত্বের মীমাংসা নিয়া বিশুদ্ধানন্দের সহিত স্বামী বিশ্বরূপের বিতর্ক উপস্থিত হয়। উভয়েই দক্ষতার সহিত শাস্ত্র প্রমাণ উপস্থাপিত করিতে থাকেন এবং অবশেষে বিশুদ্ধানন্দই জয়ী হন। কিন্তু বিতর্কের কালে হঠাৎ এক সময়ে বিশুদ্ধানন্দ শাস্ত্রভাব হারাইয়া ফেলেন, ক্রুদ্ধস্বরে প্রধান গুরুভ্রাতাকে কিছু কড়া কথাও তাঁহাকে বলিতে শুনা যায়।

এভাবে বিশুদ্ধানন্দ তঁাহার চিন্তের প্রশান্তি হারাইবেন, গুরু তাহা ভাবিতে পারেন নাই। তাই দুঃখিত অন্তরে তঁাহার দিকে একবার দৃষ্টিপাত করিয়াই তিনি তুষ্ণীভাব অবলম্বন করিলেন, দীর্ঘ সময় কাহারো সহিত কোন বাক্যালাপ করিলেন না।

বিশ্বদ্বানন্দ বুঝিলেন, সাময়িক উদ্বেজনা বশে গুরু-মহারাজের অন্তরে আজ তিনি আঘাত দিয়াছেন। তখন ছুটিয়া গিয়া আচার্য্য গোড়স্বামীর পদতলে পতিত হইলেন, ক্ষমা ভিক্ষা করিলেন অকুণ্ঠ চিত্তে। দৃঢ়স্বরে কহিলেন, “প্রভু, আপনি প্রসন্ন হোন। আপনাকে আমি কথা দিচ্ছি, স্বামী বিশ্বরূপজীকে এখন থেকে আমি পরমপূজ্য জ্যেষ্ঠ ভ্রাতার মতই দেখবো, আজীবন গুরুজ্ঞানে তাঁর সেবা করে যাবো। এতে কোনদিনই অশুধা হবে না।”

এ অঙ্গীকার বিশ্বদ্বানন্দ কোনদিন বিন্ধ্যত হন নাই, উত্তরকালে অক্ষরে অক্ষরে ইহা পালন করিয়া গিয়াছেন।

১৮৫৯ খৃষ্টাব্দে আচার্য্য গোড়স্বামী ইহলোক ত্যাগ করিয়া যান। সন্ন্যাসী মণ্ডলীর সবাই সর্বসম্মতিক্রমে বিশ্বদ্বানন্দকে তাঁহার উত্তরাধিকারীরূপে বরণ করেন, কিন্তু আপত্তি উঠে বিশ্বদ্বানন্দজীর দিক হইতে। প্রবীণ গুরু-ভ্রাতা বিশ্বরূপজীর চরণে প্রণাম করিয়া তিনি বলেন, “মণ্ডলীর সবাকার স্নেহ ও সমর্থন আমার ওপর আছে জেনে আমি আনন্দিত, গৌরবান্বিত। কিন্তু আপনি বর্তমান থাকতে আমি এ পদাধিকার গ্রহণ করতে পারি নে। আপনি বয়োজ্যেষ্ঠ, আপনিই এ পদের উপযুক্ত। তা ছাড়া, আপনি নিজেই অবগত আছেন, আপনাকে গুরুজ্ঞানে এত বৎসর যাবৎ আমি সেবা করে আসছি। আপনাকে মঠের মোহান্ত গুরুরূপে রেখে সেই সেবাকৰ্ম্মই অব্যাহত রাখতে চাই।”

বিশ্বরূপ স্বামী চমকিয়া উঠেন। বলেন, “এ তুমি কি অদ্ভুত প্রস্তাব করছো বিশ্বদ্বানন্দ। গুরু মহারাজ স্বয়ং তোমায় ঘোষণা করে গেছেন তাঁর উত্তরাধিকারী বলে। আমরা সবাই সাগ্রহে আজ সে মনোনয়ন সমর্থনও করছি। আর তুমি বলতে চাচ্ছো—আমি বয়োবৃদ্ধ। তা হলে কি হয়, আমি তো জানি আমার চাইতে বয়সে ছোট হলেও তুমি—জ্ঞানবৃদ্ধ। তাছাড়া, গুরুজীর অবর্তমানে তুমি যদি আমাকেই গুরু বলে মানতে চাও, তবে তোমায় আমি আদেশ

দিচ্ছি, অবিলম্বে তুমি মোহাস্তের গদীতে অধিষ্ঠিত হও, সবারই অভিলাষ পূর্ণ করো।”

বিশুদ্ধানন্দজী গুরু গোড়ামীর গদীতে আরোহণ করিলেন। কিন্তু যতকাল তিনি বাঁচিয়া ছিলেন, জ্যেষ্ঠ গুরুভ্রাতা ও গুরুপ্রতিম বিশ্বরূপ স্বামীর পরামর্শ না নিয়া কোন কৰ্ম্মে ব্রতী হন নাই, কোন গুরুতর সিদ্ধাস্তও গ্রহণ করেন নাই।

একাদিক্রমে দীর্ঘ উনচল্লিশ বৎসরকাল কাশীর অধ্যাত্ম-সমাজে ও সারস্বত-সমাজে বিশুদ্ধানন্দ সরস্বতী একাধিপত্য করেন। প্রতিদিন গঙ্গান্নান ও ধ্যান-জপের পর ভস্ম-তিলকাস্থিত ললাটে এই সন্ন্যাসী-ভাস্কর শিষ্য ও ভক্ত দর্শনার্থীদের সম্মুখে পরমতত্ত্বের উপদেশ দিতেন। তাঁহার ত্রীমুখ নিঃসৃত বেদাস্তের অদ্বৈত বিচার ও রাজযোগের নিগূঢ় সাধন তত্ত্ব শুনিয়া শত শত শ্রোতা হইত কৃতকৃতার্থ।

সনাতন ধর্ম্মের দুর্গশিখরের শীর্ষপতাকা ছিলেন স্বামী বিশুদ্ধানন্দ সরস্বতী। উত্তর ভারতের সন্ন্যাসী সম্প্রদায়ের তিনি ছিলেন অগ্রতম অগ্রণী সাধক ও শক্তিধর নেতা। ধর্ম্ম ও সমাজের বহুতর সমস্যা, বহুতর বিচার বিতর্ক উপস্থাপিত করা হইত এই মহাপুরুষের সম্মুখে। বেদোজ্জ্বলা বুদ্ধির সাহায্যে সব কিছু সমস্যা, সংশয় ও বিতর্কের সমাধান অনায়াসে তিনি করিয়া দিতেন।

শাস্ত্রার্থ বিচারসভায় অমুগামী সন্ন্যাসীদের নিয়া বিশুদ্ধানন্দ বিরাজিত থাকিতেন শাস্ত্রমূর্তিরূপে, ব্রহ্মসাধনার নিষ্কল দীপশিখা রূপে। সাধু সন্ন্যাসী, শাস্ত্রজ্ঞ ব্রাহ্মণ ও নিরক্ষর জনগণ সকলেরই সহজ শ্রদ্ধা, প্রেম ও আনুগত্য কি করিয়া তিনি অনায়াসে লাভ করিতেন তাহা ছিল এক পরম বিস্ময়।

পুরীধামের সর্বজনপ্রিয় আত্মজ্ঞানী সন্ন্যাসী নাজাবাবার সহিত বিশুদ্ধানন্দজী দীর্ঘদিনের সখ্যতানুজ্ঞে আবদ্ধ ছিলেন। কাশীতে

আসিলেই নাজাবাবা মহারাজ প্রায়শঃ তাঁহার মঠে আসিয়া দর্শন দিতেন। ছই ব্রহ্মবিদ্ মহাত্মার মিলনে আনন্দের তরঙ্গ উচ্ছলিত হইয়া উঠিত। অসিঘাটের হরিহরবাবা ও বনপুরোয়ার বীতরাগানন্দজী তখন নবীন সাধক। এ সময়ে প্রায়ই তাঁহারা বিশুদ্ধানন্দজীর চরণতলে গিয়া উপবেশন করিতেন, লাভ করিতেন শাস্ত্র ও সাধনার নিগূঢ় উপদেশ।<sup>৮</sup> মণ্ডলী ও সম্প্রদায় নির্বিশেষে জিজ্ঞাসু ও মুমুক্স সন্ন্যাসীরা বিশুদ্ধানন্দজীকে সর্বদা দর্শন করিতে আসিতেন, জানিয়া নিতেন পরম তত্ত্বের রহস্য।

সন্ন্যাসী শিরোমণি বিশুদ্ধানন্দজীর সারস্বত প্রতিভা দেশ-বিদেশ হইতে বহু বিদ্যার্থীকে আকর্ষণ করিয়া আনিয়াছে। উত্তরকালে ইহাদের এক একজন চিহ্নিত হইয়াছেন দিক্‌পাল পণ্ডিতরূপে।<sup>৯</sup>

উত্তর ভারতের রাজরাজড়াদের মধ্যে স্বামীজীর প্রতিষ্ঠা ছিল অসামান্য। ইহাদের কেহ কেহ ছিলেন তাঁহার গুণমুগ্ধ, কেহ বা ভক্ত শিষ্য। কঙ্করের মত তাঁহার আদেশ পালনে ইহাদের অনেকে যত্নবান ছিলেন।<sup>১০</sup> স্বামীজীর আদেশে বহু সত্র, সন্ন্যাসী-মঠ ও আশ্রমাদায় এই রাজারা অন্নবস্ত্রের যোগান দিতেন।

আর্য্য সমাজের প্রবর্তক, সংস্কারপন্থী নেতা, দয়ানন্দ স্বামী তখন সনাতন ধর্মের উপর প্রবল আঘাত হানিতেছেন। উত্তর ভারতের সর্বত্র সফর করিয়া পণ্ডিত ও সাধু মণ্ডলীকে স্বমতে আনয়নের জ্ঞাত্তাহার প্রয়াসের অন্ত নাই। সেবার কাশীতে আসিয়াও তিনি বহু ভাষণ দিতে থাকেন। কাশীর মহারাজা ঈশ্বরীপ্রসাদ শাস্ত্রার্থ নির্ণয়ের জ্ঞাত্ত এক বিচারসভার অনুষ্ঠান করেন। এই সভায় দয়ানন্দের প্রতিপক্ষ রূপে উপস্থিত থাকেন স্বামী বিগ্গ্গদ্বানন্দ ও তাঁহার ছাত্র কাশীরাজের সভাপণ্ডিত তারাচরণ তর্করত্ন। বিচারে দয়ানন্দের পরাজয় ঘটে, এবং ইহার পর উত্তর-পূর্ব ভারতে তাঁহার নূতন মতবাদ আর বেশী বিস্তারিত হওয়ার সুযোগ পায় নাই।

১৮৯০ সালের কুম্গ্গমেলায় যোগদান স্বামীজীর জীবনের এক উল্লেখযোগ্য ঘটনা। ধর্ম্মমেলায় যোগদান তো নয়, এ যেন এক বিজয় অভিযাত্রা। সন্ন্যাসী, ভক্ত ও শাস্ত্রবিদ্ পণ্ডিতদের এক বিরাট বাহিনী মন্থরগতিতে অগ্রসর হয় বিগ্গ্গদ্বানন্দজীর সঙ্গে। চলার পথে যেখানেই যান, কাশীধামের এই বহুলখ্যাত মহাত্মার শিবিরের চারিপাশে দেখা যায় ভক্ত জনতার ভীড়। রাজরাজড়া ও শেঠের দল থাকেন স্বামীজী মহারাজের সেবায় সদা তৎপর।

মেলাক্ষেত্রে শাস্ত্রমূর্ত্তি, ব্রহ্মবিদ্ এই মহাপুরুষ প্রতিভাত হন এক দর্শনীয় পুরুষ রূপে। সহস্র সহস্র মুমুক্গ নরনারী সদা তাঁহাকে বেষ্টন করিয়া থাকে। আর্ত ভক্তেরা সমাগত হয় দলে দলে। স্বামীজীর কৃপাপ্রসাদ লাভ করিয়া তাহারা আনন্দ সাগরে নিমজ্জিত হয়।

মেলা হইতে ফিরিবার পথে কাশ্মীরের মহারাজা রণবীরসিংজীর অনুরোধে স্বামীজী ত্রীনগরে পদার্পণ করেন। এই কাশ্মীর যাত্রাকে উপলক্ষ্য করিয়া স্বামীজী সে-বার উত্তর-পশ্চিম ভারতের সহস্র সহস্র নরনারীকে দর্শন দেন, সর্বত্র সঞ্চারিত করেন নূতনতর আধ্যাত্মিক উদ্দীপনা।

অতঃপর আটবৎসর স্বামীজী মরদেহে অবস্থান করেন এবং এই

সময়ে কাশীধাম ত্যাগ করিয়া আর কোথাও তিনি গমন করেন নাই। ভারতের শ্রেষ্ঠ অধ্যাত্মগীঠ ও বিজ্ঞানক্ষেত্রে সন্ন্যাসী সমাজের শ্রেষ্ঠ পুরুষ বিরাজিত থাকেন এক অত্যাঙ্গুল আলোক স্তম্ভরূপে।

বিধি নির্দিষ্ট কর্ম প্রায় উদ্ঘাপিত হইয়াছে। এখন শেষ লগ্নটির জন্ত স্বামীজী প্রতীক্ষমান। শরীর প্রাচীন হইয়া পড়িয়াছে, আজকাল মঠের বাহিরে কোথাও তাঁহার যাওয়া হয় না, চিত্তবৃত্তি সদাই থাকে ব্রহ্মধ্যানে নিমগ্ন। মাঝে মাঝে স্বেচ্ছামত সন্ন্যাসী শিষ্যদের স্বাধ্যায়ে তিনি সহায়তা করেন।

গঙ্গাতীরে অহল্যাবান্ধ ঘাটের উপরেই স্বামীজীর মঠ। মঠের দ্বিতলকক্ষে বসিয়া উদাস নেত্রে সেদিন গঙ্গার স্রোতধারার দিকে তাকাইয়া আছেন। এক নবীন সন্ন্যাসী শিষ্য একখণ্ড কঠোপনিষৎ নিয়া চরণতলে উপবেশন করেন। প্রসন্ন মধুর হাস্তে ঐশ্বর্য হাতে তুলিয়া নিয়া স্বামীজী ধীরে ধীরে গুরু করেন তাঁহার পাঠ ও ব্যাখ্যান। ক্রমে আসিয়া পড়ে সেই প্রসিদ্ধ কারিকাটি যাহাতে বলা আছে—সুবুঝা নাড়ীর কথা। দেহের শত শত নাড়ীর মধ্যে এই নাড়িটি মুর্দ্ধস্থলে গিয়া সংলগ্ন হয় এবং এই পথেই আপ্তকাম যোগীর প্রাণ উৎক্রমণ করে।

কারিকাটি ব্যাখ্যা করার সময় নবীন সন্ন্যাসী ছাত্রটি হঠাৎ একটু উনমনস্ক হইয়া পড়ে। বড় বিরক্তি বোধ করেন স্বামীজী মহারাজ। দৃঢ়স্বরে বলিয়া উঠেন, “এখন তো এ নাড়ীর কথায় কান দিচ্ছো না, দেখো অতি শীঘ্রই এই নাড়ী পথে হবে আমার দেহান্ত। তারপর এই নাড়ীর কথা আর হয়তো তোমার স্মৃতি থেকে মুছে যাবে না।”

নবীন সন্ন্যাসী বড় লজ্জিত হন, বার বার করজোড়ে গুরু মহারাজের ক্ষমা ভিক্ষা করিতে থাকেন।



কয়েকদিন পরেই বিষ্ণুদ্বানন্দ মহারাজের প্রতীক্ষিত পরম লয়টি আসিয়া পড়ে।

১৮৯৮ খৃষ্টাব্দের চন্দন একাদশীর পুণ্যতিথি। সময় আসন্ন জানিয়া স্বামীজী শিষ্যদের আদেশ দেন, “আর কালবিলম্ব না ক’রে আমার দেহটি স্থাপন করো গঙ্গা বিধৌত ঐ বুরুজের ওপর। তোমরা সবাই তাড়াতাড়ি তৈরী হয়ে নাও।”

শিষ্যেরা শোকবিহ্বল হইয়া পড়েন। যুহু কণ্ঠে স্বামীজী তাঁদের আশ্বাস দেন, “শোক কেন বলতো? আত্মজ্ঞানীর জন্মই বা কই, মৃত্যুই বা কই? তোমরা চিন্তের স্থৈর্য্য অটুট রাখো।”

বুরুজের উপর নিয়া যাওয়া হইলে জরাজীর্ণ দেহটি নিয়া স্বামীজী ঋজু হইয়া উপবেশন করেন। তারপর সজ্জানে প্রাণবায়ুকে চালিত করেন সুষুম্নার মধ্য দিয়া ব্রহ্মরন্ধ্রের পথে।

তৎক্ষণাৎ চারিদিকে এ সংবাদ রটিয়া যায়। দশাশ্বমেধ ঘাটে সমবেত হয় সহস্র সহস্র ভক্ত ও দর্শনার্থী নরনারী। ব্রহ্মলীন মহাত্মার মরদেহটি পুষ্পচন্দনে সুসজ্জিত করিয়া বিসর্জন দেওয়া হয় পুতসলিলা ভাগীরথীর গর্ভে।

# স্বামী বিবেকানন্দ

ভাগীরথীর ছই তীরে নামিয়া আসিয়াছে সঙ্ঘার অঙ্ককার।  
আকাশের বৃকে ছই চারিটি তারা মিটমিট করিয়া জ্বলিতেছে।  
নদীবক্ষ স্তব্ধ, নিস্তরঙ্গ, নোঙর-করা বজ্রাখানিতেও তেমনই অখণ্ড  
নীরবতা। একটি সুদর্শন যুবক ত্রস্তপদে সিঁড়ি বাহিয়া উপরে  
উঠিয়া আসেন, নিভৃত কক্ষের দ্বারে বার বার করেন করাঘাত।

সৌম্য, প্রশান্ত মূর্ত্তি এক বৃদ্ধ ধ্যান-কক্ষ হইতে বাহির হইয়া  
আসেন। স্নেহপূর্ণ স্বরে প্রশ্ন করেন, “কি বাবা, কি চাই তোমার?”

যুবকের চোখে-মুখে উদ্বেজনার ছাপ। ব্যাকুল কণ্ঠে বলিয়া  
উঠেন, “মশাই, আপনি কি ঈশ্বর দর্শন করেছেন? আমায়ও কি  
দর্শন করাতে পারেন?”

ধ্যানোখিত বৃদ্ধ তাপস সর্বজনশ্রদ্ধেয় ব্রাহ্ম নেতা—দেবেন্দ্রনাথ  
ঠাকুর। গঙ্গার উপরে এই হাউস বোটে নিভৃত তপস্তায় কিছুদিন  
যাবৎ দিন কাটাইতেছেন। তাঁহার সম্মুখে দণ্ডায়মান যুগ্ম তরুণ—  
নরেন্দ্রনাথ দত্ত।

যুবকের হৃদয়োচ্ছ্বাস ও ব্যাকুলতার মর্ম্ম বৃষ্টিতে দেবেন্দ্রনাথের  
বিলম্ব হইল না। স্নেহে নিকটে বসাইয়া তাহাকে শান্ত করিলেন,  
দিলেন নানা আশ্বাস ও উপদেশ। তারপর নিম্পলক নেত্রে কিছুক্ষণ  
চাহিয়া থাকিয়া বলিলেন, “বাবা, তোমার চোখ ছুটি ঠিক যোগীদের  
মত। একনিষ্ঠ হয়ে সাধন করো। তুমি সফলকাম হবে।”

নরেন্দ্রনাথ বজরা হইতে নিজস্ব হইলেন। দেবেন্দ্রনাথের  
ব্যক্তি ও প্রবোধবাক্য তাঁহার উদ্বেজনা হ্রাস করিয়াছে সত্য, কিন্তু  
প্রাণের অদম্য পিপাসা মিটিল কই? মূল প্রশ্নের উত্তর তো তিনি  
সাধক দেবেন্দ্রনাথের কাছে পাইলেন না।

নরেন্দ্রনাথের জীবন-জিজ্ঞাসার আর এক চিত্র। দক্ষিণেশ্বরের গঙ্গা তীরে দেবী ভবতারিণীর মন্দিরে সন্ধ্যারতির কঁাসর-ঘণ্টা বাজিয়া সবেমাত্র শেষ হইয়াছে। ঠাকুর শ্রীরামকৃষ্ণ তত্ত্ব পরিবৃত্ত হইয়া বসিয়া আছেন। নরেন্দ্রনাথ ধীরে ধীরে সম্মুখে আসিয়া দাঁড়ান। ঝড়ের আলোড়ন তাঁহার অন্তরে। ব্যাকুল কণ্ঠে প্রশ্ন করেন, “মশাই আপনার কি ঈশ্বর সাক্ষাৎকার হয়েছে?”

বহু সাধু-পুরুষকে একথা বার বার তিনি জিজ্ঞাসা করিয়াছেন। কেহই তো এ পর্য্যন্ত ‘হাঁ’ বলেন নাই। ইনিও যদি আজ তাঁহাকে নিরাশ করেন?

সহজ কণ্ঠে, প্রত্যয়ের সুরে, অবিলম্বে রামকৃষ্ণ উত্তর দিলেন, “সে কি গো! দেখেছি বই কি? এই যেমন তোমাদের দেখছি—এমনি করেই তো রোজ দেখছি। শুধু তাই নয়, তোমাকেও দেখাতে পারি। কিন্তু আমার কথামত চলতে হবে।” সঙ্গে সঙ্গে স্মিতহাস্তে বটুয়া হইতে কিছুটা সুপারী তুলিয়া লইয়া ঠাকুর চিবাইতেছেন। নরেন্দ্রনাথ অপার বিশ্বয়ে এই দেব-মানবের দিকে নির্নিমেবে তাকাইয়া আছেন। বাক্য মনের অতীত ঈশ্বরকে এমন করিয়া পাওয়া যায়, এই ছুঃসাহসের কথা এমন সহজ প্রত্যয় ভরা কণ্ঠে কেহ তো আজ অবধি বলে নাই।

যে প্রশ্ন তিনি আজ দক্ষিণেশ্বরের পূজারী ব্রাহ্মণের পদতলে বসিয়া করিলেন, তাহা শুধু তাঁহার নিজ জীবনেরই প্রশ্ন নয়, তাহা যে ঊনবিংশ শতাব্দীর সকল বুদ্ধিজীবীদেরই সংশয় পীড়িত প্রশ্ন! যুক্তি, বিজ্ঞান ও অধিবিচার জটিল গ্রন্থি ভেদ করিয়া প্রত্যক্ষ অনুভূতি ও দর্শনের কামনা ইহাতে নিহিত।

দীর্ঘদিনের সেই প্রশ্নের উত্তর আজ মিলিয়াছে। সে উত্তর বাস্তব অনুভূতিতে প্রোজ্জ্বল, সহজ প্রত্যয়ে পূর্ণ। ঠাকুর অকুণ্ঠ কণ্ঠে দাবী করিতেছেন, তিনি তাঁহাকে ভগবৎ দর্শন করাইয়া দিবেন, যেমনটি নিজে দর্শন করিয়াছেন তেমন করিয়াই দিবেন।

এবার বলিবার পালা নরেনের। আত্মসমর্পণের প্রয়োজন সর্ব্বাধিক, সে প্রস্তুতি আজ তাঁহার কোথায়? রামকৃষ্ণের তত্ত্ব তাঁহার হৃদয়ে ফুটিয়া উঠিতে পারিতেছে কই? এই অর্দ্ধোন্মাদ অর্দ্ধশিক্ষিত সাধকের পদে তাঁহার সমস্ত কিছু ব্যক্তিত্ব, শিক্ষা-দীক্ষা উৎসর্গ করিতে পারিতেছেন কই?

কিন্তু নরেনকে পারিতে হইয়াছিল। দীর্ঘ পাঁচ বৎসরের পরীক্ষা নিরীক্ষার ফলে এই আত্মসমর্পণকে আমরা সম্ভব হইতে দেখি। এই পাঁচ বৎসরের ইতিহাস ঠাকুরেরই করুণালীলার এক নিরবচ্ছিন্ন ইতিহাস। দিনে দিনে পলে পলে সহজ স্বচ্ছন্দ ভালবাসার মধ্য দিয়া রামকৃষ্ণ তাঁহার স্বরূপটিকে, তাঁহার পরমতত্ত্বকে নরেন্দ্রনাথের জীবনে প্রতিকলিত করিয়া তুলিয়াছেন। ঠাকুরের এই আত্মসাৎ-ক্রিয়াই নরেনের আত্মসমর্পণকে সহজতর করিয়া তোলে, অধ্যাত্মশিল্পী রামকৃষ্ণের মহান সৃষ্টি তাঁহারই মধ্যে ধীরে ধীরে রূপায়িত হইয়া উঠে। আচার্য্য বিবেকানন্দের ঘটে চমকপ্রদ অভ্যুদয়। ভারতবর্ষের অধ্যাত্ম-জীবনে এ অভ্যুদয় ঘটায় কল্যাণকর উজ্জীবন, হরাস্থিত করে প্রাচ্য ও পাশ্চাত্যের আত্মিক সেতুবন্ধন।

এক ছুজ্জের্য্য ঐশীশক্তির আকর্ষণে যুবক নরেন্দ্রনাথ দক্ষিণেশ্বরে ঠাকুরের পদপ্রান্তে উপনীত হইয়াছিলেন। এই একই ঐশীশক্তির লীলা তাঁহার বাল্য ও কৈশোর জীবনকে নিয়ন্ত্রিত করিয়াছে, স্রোত-ধারার গতিপথের মোড় ঘুরাইয়াছে বার বার—উত্তরণ ঘটাইয়াছে মুক্তির মহাসাগরে।

শিমুলিয়ার অভিজাত দত্ত-পরিবারে নরেন্দ্রনাথ জন্মগ্রহণ করেন। এই বংশের রামমোহন দত্ত ছিলেন সুপ্রীম কোর্টের প্রতিষ্ঠাবান উকিল। বিপুল বিত্তবিষয় তিনি রাখিয়া যান, কিন্তু পুত্র হুর্গাচরণ ইহাতে আকৃষ্ট হন নাই, পঁচিশ বৎসর বয়সে পন্নী ও একমাত্র শিশু-পুত্র বিশ্বনাথের মায়া কাটাইয়া তিনি সন্ন্যাস গ্রহণ করেন। এই বিশ্বনাথ দত্তই স্বামী বিবেকানন্দের জনক।

বিশ্বনাথ কলিকাতার প্রসিদ্ধ এটর্নী রূপে পরিচিত হইয়া উঠেন। ধনজনপূর্ণ বিশাল ভবনে রাজসিকতার সহিত বাস করিতে তিনি অভ্যস্ত হন। উদার ও আশ্রিত জনের পালক বলিয়া তাঁহার খ্যাতি ছিল। আর পত্নী ভুবনেশ্বরী ছিলেন এক ধর্মপ্রাণা প্রাচীনপন্থী মহিলা। প্রতিদিন স্বহস্তে শিবপূজা না করিয়া তিনি জল গ্রহণ করিতেন না। ইষ্টনিষ্ঠা, তেজস্বিতা ও কর্মকুশলতায় তিনি ছিলেন অনন্ত-সাধারণ।

একদিন ভুবনেশ্বরী শিবার্চনায় বসিয়াছেন। সেদিন কি জানি কেন এক গভীর ধ্যানতন্ময়তা তাঁহাকে পাইয়া বসে। প্রায় সমস্ত দিনই ধ্যানাবেশে কাটিয়া যায়, তারপর রাত্রিতে ক্লান্ত দেহে পূজা-কক্ষেই নিজায় অভিভূত হইয়া পড়েন।

এই সময়ে তিনি এক বিচিত্র স্বপ্ন দেখেন। জটাজুটমণ্ডিত রক্ত-গিরিসন্নিভ মহেশ্বর তাঁহার সম্মুখে আবির্ভূত হইয়া সম্ভানরূপে ক্রোড়ে আসিতে চাহিতেছেন। ‘শিব—শিব’ উচ্চারণ করিতে করিতে ভুবনেশ্বরী নিজা হইতে উথিত হইলেন।

ইহার পরের বৎসর, ১৮৬৩ সালের ১২ই জানুয়ারী ভুবনেশ্বরী দেবীর অঙ্ক আলো করিয়া আসে এক সুদর্শন শিশু। সেদিন ছিল পৌষ-সংক্রান্তি, মকর-বাহিনী পূজার দিন। এই নবাগত শিশুপুত্রই নরেন্দ্রনাথ, উত্তরকালের শক্তিদর সন্ন্যাসী,—স্বামী বিবেকানন্দ।

বাল্যকাল হইতেই নরেন্দ্র ছরস্তু, প্রাণচঞ্চল। কি যেন এক অব্যক্ত অধীরতা নিয়া সে ছুটাছুটি করিয়া বেড়ায়। আবার এই অশান্ত বালকের আধারে কখনো কখনো এক হৃৎকোষ ধ্যানের ধারা নামিয়া আসে, অকস্মাৎ কি করিয়া সে রূপান্তরিত হইয়া যায়।

বালক তাহার সাথীদের সহিত একদিন পূজা-অর্চনার খেলায় রত। চক্ষু মুদিয়া ধ্যানজপের অভিনয়ও বেশ শুরু হইয়াছে। হঠাৎ কোথা হইতে এক গোখরা সাপ ফণা নাচাইয়া আসিয়া উপস্থিত। খেলার সঙ্গীরা তো ভীত ভ্রস্ত হইয়া সেখান হইতে ছুটিয়া পলাইল।

নরেনের কিন্তু কোনই ছঁস নাই। হুই চকু মুদিয়া অচঞ্চলভাবে উপবিষ্ট, সম্মুখে সাপটিও ফণা মেলিয়া স্থির হইয়া আছে। বালকের খেলার অভিনয় কোন্ অজানা মুহূর্তে ধ্যানের গভীরে তলাইয়া গিয়াছে কে জানে? বাড়ীর লোকে মহা সন্তুষ্ট, পাছে বালকের অনিষ্ট হয় এই ভয়ে সবাই চুপ করিয়া আছে। কিছুকাল পরে সাপটি ধীরে ধীরে সেখান হইতে চলিয়া গেল, আর আশ্মীয়-স্বজনরা স্বস্তির নিঃশ্বাস ফেলিয়া বাঁচিলেন।

নরেন পরে বলিয়াছেন, “বালক বয়সে একদিন ধ্যান করিতে-ছিলাম। ধ্যান শেষে চুপ করিয়া বসিয়া আছি, হঠাৎ দেখিলাম—ঘরের দক্ষিণ দেয়াল ভেদ করিয়া এক জ্যোতির্ময় দিব্য মূর্তি সম্মুখে দণ্ডায়মান। মূণ্ডিত মস্তক, হাতে দণ্ড ও কমণ্ডলু, নয়নে অপরূপ স্নিগ্ধতা। জ্যোতির্ময় পুরুষ কি যেন বলিতে যাইতেছিলেন। অবাক হইয়া তাঁহার দিকে এতক্ষণ চাহিয়াছিলাম। হঠাৎ যেন ভয় হইল—দরজা খুলিয়া বাহিরে আসিয়া পড়িলাম।” কোন্ এক দিব্য পুরুষ যেন তাঁহার উপর লক্ষ্য রাখিতেছেন।

বালক নরেনের নিজার ভঙ্গিটিও বড় অদ্ভুত। উপুড় হইয়া তাঁহার শয়নের অভ্যাস। নিজা আকর্ষণের সময়ে, বহির্জগতের চেতনা ধীরে ধীরে কমিয়া আসে, আর সঙ্গে সঙ্গে দেখা দেয় এক অলৌকিক অমুভূতি। দেখেন, আলোকোজ্জ্বল পথ বাহিয়া একটি দিব্য বালক একটি গোলাকার জ্যোতির্ময় পিণ্ড ঠেলিয়া নিয়া তাঁহার দিকে অগ্রসর হইতেছে। এই জ্যোতি-গোলক ক্রমে তাঁহার জন্মধ্যে আসিয়া স্থির হয়, তারপর জ্যোতির রাশি অজস্র ধারায় উহা হইতে বরিয়া ঝরিয়া পড়ে। এই দিব্য আলোক ধারায় তলাইয়া গিয়া অতঃপর ধীরে ধীরে সে নিজায় চলিয়া পড়ে।

নরেনের নিজের কিন্তু ইহা বিশ্বয়কর মনে হইত না। ভাবিতেন, এ তো সকলেরই নিজার অভিজ্ঞতা। শ্রীরামকৃষ্ণ উত্তরকালে এই

অমৃত্যুর কথা শুনিয়া বলিয়াছিলেন, “এটা যে ধ্যান-সিদ্ধির লক্ষণ গো।”<sup>১</sup>

নরেনের তখন চৌদ্দ বৎসর বয়স, রায়পুরে পিতার সঙ্গে বায়ু পরিবর্তনে আসিয়াছেন। একদিন একাকী গো-শকটে বিদ্যা পাহাড় দিয়া যাইতেছেন। এখানে হঠাৎ তাঁহার এক অলৌকিক অভিজ্ঞতা হয়। পাহাড়ের গায়ে তৈরী হইয়াছে একটি মৌমাছির চাক। সে দিকে হঠাৎ দৃষ্টি পড়িতেই অন্তরে জাগিয়া উঠে এক অভূতপূর্ব আনন্দের শিহরণ। উত্তরকালে স্বামীজী নিজে এ সম্বন্ধে বলিয়াছেন, “বিশ্বয়ে মগ্ন হইয়া সেই মক্ষিকা রাজ্যের আদি অন্তের কথা ভাবিতে ভাবিতে মন জগৎ-নিয়ন্তা ঈশ্বরের অনন্ত উপলব্ধিতে এমনভাবে তলাইয়া গেল যে, কিছুকালের জন্ত বাহ্য-সংজ্ঞার লোপ হইল। কতক্ষণ যে ঐভাবে গো-যানে পড়িয়াছিলাম, স্মরণ হয় না। যখন পুনরায় চেতনা হইল তখন দেখিলাম উক্ত স্থান অতিক্রম করিয়া অনেক দূরে আসিয়া পৌঁছিয়াছি।” প্রথম জীবনে নরেনের ধ্যানাবেশের ইহা এক অপূর্ব নিদর্শন।

১৮৭৯ সালে নরেন্দ্রনাথ এনট্রান্স পাস করিয়া কলেজে ঢুকিলেন। ব্যক্তিত্ব, মেধা ও প্রাণশক্তি তাঁহার প্রচুর, তাই ক্লাসের ছেলেদের নেতা হইয়া উঠিতে দেবী হইল না। অধ্যাপকেরাও তাঁহাকে চিনিয়া নিলেন এক অসাধারণ ছাত্র বলিয়া। জেনারেল এসেম্বলীতে তখন প্রতিভাবান ছাত্রের অভাব ছিল না। ব্রজেন্দ্রনাথ শীলও তখন এখানেই পড়িতেন, নরেন্দ্রনাথের এক ক্লাস উপরে। একবার এক বিতর্কসভায় নরেনের উপর খুসী হইয়া দর্শনবেত্তা অধ্যক্ষ হেষ্টি সাহেব বলেন, “এই তরুণ দর্শনশাস্ত্রের এক প্রতিভাধর ছাত্র। আমার মনে হয়, জার্মানী ও ইংলণ্ডের বিশ্ববিদ্যালয়েও এর মত একটি ছাত্র খুঁজে পাওয়া যাবে না।”

নরেন তখনও এক-এ পরীক্ষা দেন নাই। কিন্তু ডেকার্ট, হিউম ও বেন-এর নৃশাস্ত্র দার্শনিক তত্ত্ব তিনি পড়িয়া ফেলিয়াছেন। ডারুইন ও স্পেন্সারের চিন্তাধারার সহিতও তাঁহার পরিচয় নিবিড়। পাশ্চাত্য দার্শনিকদের যুক্তিবাদ ও বিচার বিতর্কের মধ্যে সত্যের প্রকৃত পথটি তিনি খুঁজিয়া পাইতেছেন না। দিক্‌ভ্রান্ত পথিকের মত অবস্থা তাঁহার।

বাংলায় সংস্কার আন্দোলন চলিতেছে প্রায় সাত বৎসর যাবৎ। রামমোহনের ধর্ম দেবেন্দ্রনাথ ও কেশবের দ্বারা কিছুটা রূপান্তরিত। নৈতিক জীবনের দৃঢ় আদর্শ ও সমাজজীবনে আত্মপ্রকাশ করিতেছে। কিন্তু তাহাতে নরেনের প্রাণের পিপাসা মিটিতেছে কই? অধ্যাত্ম-সাধনার রসে জীবনের শুষ্কতরু মুঞ্জরিত হইয়া উঠে, প্রত্যক্ষ অনুভূতির মধ্য দিয়া সাধকের প্রাণে আসে পরম শান্তি। কই সে শান্তি তো পাওয়া যাইতেছে না?

পাশ্চাত্য দর্শনের বিচার-বিশ্লেষণে নব্য শিক্ষিত নরেন দিশেহারা। ব্রাহ্মসমাজের ছায়াতলে আসিয়া দাঁড়াইলেন, ভাবিলেন, শাস্ত্রত সত্যের সন্ধান এবার হয়তো মিলিবে, কিন্তু কোথায় তাহা? সংশয় জাগে মনে, ঈশ্বর কি সত্যই আছেন? জীবন পথের শেষে অমৃত কুণ্ডলি হাতে নিয়া যে জীবনপ্রভু প্রসন্ন মধুর হাসি হাসেন, তিনি কি শুধু কবির কল্পনা?

সন্দেহ সংশয় যাহা কিছু আসুক না কেন নরেন্দ্র কিন্তু ব্যবহারিক জীবনের পবিত্রতা, বিশুদ্ধতা একই ভাবে রক্ষা করিয়া যাইতেছেন। শুভ সংস্কার নিয়া তিনি জন্মিয়াছেন। বড় হইয়াও উচ্চতর প্রেরণায় তিনি উদ্ভুদ্ধ—ত্যাগী সাধকের জীবনই যাপন করিতেছেন।

সংশয় ও বিচার বুদ্ধির গহন অরণ্যে কিন্তু এক দিব্য অনুভূতি মাঝে মাঝে স্কুরিত হইয়া উঠে। ধ্যান করিতে যখন বসেন, তখন তো কোন অবিশ্বাস অসন্তোষের ছায়াপাত অন্তরে হয় না? স্বচ্ছন্দ ধ্যানাবেশে তিনি অন্তর্লীন হইয়া যান।



প্রায়ই একটা জ্যোতিঃপুঞ্জ আবির্ভূত হয় আর তাঁহার নয়ন সমক্ষে এক ত্রিভুজ যন্ত্রের অপরূপ ছবি রচনা করে। অজানা আনন্দে নরেন্দ্রনাথের হৃদয় রসায়িত হইয়া উঠে। ভাবেন, এ কোথাকার ইঙ্গিত? অতীন্দ্রিয়লোকের অন্তরালে তবে তো তাঁহার জীবন-প্রভু বিরাজ করিতেছেন। কিন্তু কে তাঁহাকে এই পরমধন মিলাইয়া দিবে? অন্তর মথিত করিয়া প্রশ্ন উঠিতে থাকে, কোথায় সেই সত্যজ্ঞষ্ঠা মহাপুরুষ যিনি ভগবৎ সাক্ষাৎকার করিয়াছেন, অতীপ্তিত পথে তাঁহাকে যিনি চালনা করিবেন?

১৮৮০ খৃষ্টাব্দের নবেম্বর মাস। শিমুলিয়া পল্লীতে একটি ক্ষুদ্র আনন্দোৎসবের ব্যবস্থা হইয়াছে। নরেনের প্রতিবেশী সুরেন্দ্রনাথ মিত্র পরম ভক্তিভরে দক্ষিণেশ্বরের শ্রীরামকৃষ্ণকে নিয়া আসিয়াছেন। ভক্তি সঙ্গীত গাওয়া হইবে, তাই নরেনের ডাক পড়িল। নরেন যেমন নানা বৈঠকে ঘুরিয়া বেড়ান—তেমনই আসিয়া উপস্থিত। তাঁহার কণ্ঠে গান শুনিয়া পরমহংসদেবের আনন্দের অবধি নাই। সন্মুখে নিকটে ডাকিয়া এই প্রিয়দর্শন যুবকের দেহলক্ষণ মিলাইয়া দেখেন। পরিচয় গ্রহণের পর আমন্ত্রণ জানান, “দক্ষিণেশ্বরে একবার যোগো, কেমন?”

এক, এ পরীক্ষার ব্যস্ততায় কয়েক মাস নরেন দক্ষিণেশ্বরের কথা ভুলিয়াই ছিলেন। আত্মীয় রাম দত্ত ও প্রতিবেশী সুরেন্দ্রনাথ ঠাকুরের ভক্ত। তাঁহাদের কথায় সেদিন ঠাকুরের কথা মনে পড়িল, কয়েকজন বন্ধুসহ দক্ষিণেশ্বরে উপস্থিত হইলেন।

উত্তরকালে রামকৃষ্ণ এই ঐতিহাসিক সাক্ষাতের বিবরণ দিয়াছেন—“দেখলাম, নরেনের নিজের দেহের দিকে কোনই লক্ষ্য নেই। মাথার চুল ও বেশভূষার বাহার নেই। বাইরের কোন জিনিষেই ইতর সাধারণের মত আঁট নেই। সবই যেন আলগা। চোখ দুটো

দেখে মনে হয়, ওর মনের অনেকটা কে যেন ভেতর থেকে টেনে রেখেছে। মনে হল, বিষয়ী লোকের জায়গা কলকাতায় এতবড় সবুগুণী আধার থাকাও সম্ভব।”

ঠাকুর রামকৃষ্ণের সম্মুখে নরেন উদাস সুরে গান ধরিলেন—

মন চল নিজ নিকেতনে,  
সংসার বিদেশে বিদেশীর বেশে  
ভ্রম কেন অকারণে ?  
বিষয় পঞ্চক আর ভূতগণ  
সব তোর পর কেহ নয় আপন,  
পর প্রেমে কেন হয়ে অচেতন  
ভুলেছ আপন জনে ?

নিজের অজ্ঞাতসারে এ কি গান নরেন গাহিলেন ? যাহার কাছ হইতে আসিয়াছেন, যাহার কাছেই আবার ফিরিতে হইবে, এ যে সেই পরমাত্মীয় পরমাত্মার কথা।

সেই পরমাত্মারই আনন্দধন ঠাকুর রামকৃষ্ণ এখানে বসিয়া আছেন। ঠাকুরকে নরেন সেদিন চিনেন নাই, কিন্তু ঠাকুর নরেনকে তখনি চিনিয়াছেন। মন প্রাণ ঢালিয়া নরেন গাহিলেন—আর ঠাকুর ততক্ষণে হইয়াছেন ভাবাবিষ্ট। ক্রমে বাহুজ্ঞান তাঁহার তিরোহিত হইল।

নবপরিচিত রামকৃষ্ণ সেদিন ‘আপনজনের’ মতই তাঁহার সহিত ব্যবহার করিলেন। লৌকিক জীবনের চেনা-পরিচয়ের উর্দ্ধে, জন্ম-জন্মান্তরের যোগসূত্রে গাঁথা রহিয়াছে এই আত্মীয়তার বোধ।

নরেনকে হাতছানি দিয়া ঠাকুর উত্তরের বারান্দায় নিভৃত স্থানে নিয়া যান। দুই নয়নে দরবিগলিত প্রেমাশ্রুর ধারা। ঘনিষ্ঠ মুহূর্তের মত বলিতে থাকেন “এত দিন পরে আসতে হয় ? আমি যে এককাল অপেক্ষা করে আছি, তা ভাবতে নেই ? বিষয়ী লোকের

বাজে কথা শুনতে শুনতে আমার কান বলসে যাচ্ছে। প্রাণের কথা বলতে না পেয়ে পেট ফুলে গেল!”

তারপর ঠাকুরের অবিশ্রান্ত কান্না। নরেন তো বিস্ময়ে হতবাক। আবার এই উন্মাদ ব্রাহ্মণ হাত জোড় করিয়া তাঁহাকে সাশ্রনয়নে বলিতেছেন, “জানি, জানি প্রভু, তুমি সেই ঋষি, জীবের দুর্গতি দূর করতে তুমি এসেছ।”

বিশ্বনাথ দত্তের পুত্র, ব্রাহ্মসমাজের সভ্য, আধুনিক শিক্ষা-দীক্ষায় উদ্বুদ্ধ তরুণকে এই ব্রাহ্মণ কি বলিতে চাহিতেছেন? যেন কোন্ এক প্রচ্ছন্ন দেবতার উদ্বোধনের জন্ত তাঁহার এই আকুতি। অথবা এটা কল্পনা বিলাস? নরেনের চিন্তাধারা বিপর্যাস্ত হইয়া যায়!

ঠাকুর ক্ষণকাল পরেই নিজের ঘরে ছুটিয়া যান। কিছু মাখন মিছরি ও সন্দেশ আনিয়া নরেনকে স্বহস্তে খাওয়াইয়া দিতে থাকেন। নরেন তাঁহার সঙ্গীদের সহিত এসব ভাগ করিয়া খাইতে উৎসুক—কিন্তু তাহা শুনে কে?

রামকৃষ্ণ স্নেহমাখা স্বরে বলেন, “ওরা খাবে এখন। তুমি আগে খেয়ে নাও।”

সবটা ভোজন করাইয়া ঠাকুর হাত ধরিয়া অনুনয় করিতে থাকেন, “বল শিগ্গীর আর একদিন এখানে আসবে, একজাতি আমাব কাছে আসবে!” নরেনকে কথা দিতেই হয়। তারপর সঙ্গীদের কাছে ফিরিয়া গিয়া তিনি হাঁফ ছাড়েন।

নরেনের অন্তরে তখন চিন্তার ঝড় বহিতেছে। এই ব্রাহ্মণ কি উন্মাদ? আর তাই বা কি করিয়া হয়? ঈশ্বরের জন্তই তো সর্বস্ব ছাড়িয়াছেন। উত্তরকালে তিনি বলিয়াছেন, “নির্বাক হইয়া ভাবিতে লাগিলাম, উন্মাদ হইলেও ঈশ্বরের জন্ত ঐরূপ ত্যাগ জগতে খুব কম লোকই করিতে সক্ষম। উন্মাদ হইলেও এ ব্যক্তি মহাপণ্ডিত, মহাত্যাগী এবং ঐজন্ত মানব হৃদয়ের আস্থা, পূজা ও সম্মান পাইবার যথার্থ অধিকারী। ঐরূপ ভাবিতে ভাবিতে সেদিন তাঁহার চরণ

বন্দনা ও তাঁহার নিকটে বিদায় গ্রহণপূর্বক কলিকাতায় ফিরিয়া আসিলাম।”

নরেন চলিয়া গেলে ঠাকুরের কি অবস্থা ? তাঁহার নিজের বর্ণনায়, “নরেন চলে গেলে, তাকে দেখবার জন্তে প্রাণের ভেতরটা চকিবশ ঘণ্টা এমন ব্যাকুল হয়ে রইল যে বলবার নয়। সময় সময় এমন যন্ত্রণা হত যে মনে হত বুকের ভেতরটা যেন কে গামছা নিংড়ানোর মত জোর করে নিংড়াচ্ছে। নিজেকে তখন সামলাতে পারতুম না। ঝাউতলায় নির্জনে গিয়ে ডাক্ ছেড়ে কাঁদতুম,—ওরে তুই আয়রে, তোকে না দেখে আর থাকতে পারছি না।”

এ আহ্বান আত্মার আত্মীয়ের। এ আহ্বান ঈশ্বরীয় কর্মযজ্ঞের। এ অমোঘ আহ্বান নরেনকে চুম্বকের মত ধীরে ধীরে আকর্ষণ করিয়া আনিয়াছিল।

মাসখানেক পরে নরেন আবার দক্ষিণেশ্বরে আসিলেন। রামকৃষ্ণ একাকী তক্তাপোষের উপর বসিয়া আছেন। নরেনকে দেখিয়াই তিনি আনন্দে অধীর। পরম স্নেহে শয্যার এক পাশে তাঁহাকে বসাইলেন। ইহার পরই একেবারে ভাবাবিষ্ট। কিছুক্ষণ অশ্রুটস্বরে কি বলিতে বলিতে নরেনের কাছে আসিয়া দক্ষিণ পদ দিয়া তাঁহাকে স্পর্শ করিলেন। সঙ্গে সঙ্গে ঘটিল নরেনের দিব্য ভাবান্তর।

তিনি নিজেই ইহা বিবৃত করিয়াছেন, “আমার এক অপূর্ব উপলব্ধি উপস্থিত হইল। চাহিয়া দেখিতে লাগিলাম, দেয়ালগুলির সহিত গৃহের সমস্ত বস্তু বেগে ঘুরিতে ঘুরিতে কোথায় লীন হইয়া যাইতেছে এবং সমগ্র বিশ্বের সহিত আমার আমিষ যেন এক সর্ব-প্রাসী মহাশূন্যে একাকার হইতে ছুটিয়া চলিয়াছে! তখন দারুণ আতঙ্কে অভিভূত হইয়া পড়িলাম, মনে হইল—আমিষের নাশেই মরণ, সেই মরণ সম্মুখে, অতি নিকটে! সামলাইতে না পারিয়া চীৎকার করিয়া বলিয়া উঠিলাম, ‘ওগো তুমি আমায় একি করলে, আমার যে বাপ মা আছেন! অদ্ভুত পাগল আমার ঐকথা শুনিয়া

খল্খল্ করিয়া হাসিয়া উঠিলেন, এবং হস্তদ্বারা আমার বক্ষ স্পর্শ করিতে করিতে বলিতে লাগিলেন, “তবে এখন থাক্। একবারে কাজ নেই, কালে হবে।”<sup>১</sup>

ইহার পরই নরেন্দ্র আত্মসম্বিং ফিরিয়া পান। স্থির হইয়া তিনি ভাবিতে থাকেন, এই উন্মাদ ব্রাহ্মণের মধ্যে কোন্ বিরাট শক্তি বিরাজিত? নরেনের শ্রায় স্বাতন্ত্র্যবাদী, দৃঢ়চেতা, বিচারশীল যুবকের ইচ্ছাশক্তিকে অবলীলায় ইনি চূর্ণ করতে পারেন। শুধু তাহাই নয়, একতাল কাদার মত উহাকে ছানিয়া স্বেচ্ছামত রূপ দান করিতেও তিনি সক্ষম। দিব্যশক্তিসম্পন্ন এমন মানুষকে পাগল বলিয়া উড়াইয়া দেওয়াই বা যায় কি করিয়া?

আর এক দিনের অলৌকিক অভিজ্ঞতাও অনুরূপ। দক্ষিণেশ্বরে যত্ন মল্লিকের বাগানে ঠাকুর ও নরেন সেদিন বেড়াইতেছেন। কিছুক্ষণ পর ঠাকুর ধ্যানবিষ্ট হইয়া পড়েন। তারপর অকস্মাৎ নরেন্দ্রকে স্পর্শ করামাত্র তাঁহার সংজ্ঞা লোপ পায়।

বাহুজ্ঞান ফিরিয়া আসিলে নরেন দেখেন, রামকৃষ্ণ তাঁহার বক্ষে যত্নভাবে হাত বুলাইতেছেন, আননখানি তাঁহার দিব্য আনন্দের আভায় সমুজ্জল।

এই দিনকার বাহুজ্ঞান লোপের অবস্থায় নরেনের সহিত ঠাকুর রামকৃষ্ণের এক অলৌকিক প্রাশ্নোত্তর চলিয়াছিল। অতীন্দ্রিয় রাজ্যের এ কথোপকথনের সারমর্ম ঠাকুর উত্তরকালে ভক্তদের কাছে নিজেই বর্ণনা করিয়াছিলেন।

বিলুপ্ত-সংজ্ঞা নরেনকে সেদিন তিনি তাঁহার স্বরূপ ও পরিচয় জিজ্ঞাসা করেন। কোথা হইতে, কেন সে আসিয়াছে এবং কোন্ কর্মসাধনের দায়িত্ব তাঁহার, এই প্রশ্নও তাহাকে করা হয়। নরেন ঠাকুরকে যথাযথ উত্তর প্রদান করেন। ঠাকুর বলিতেন, “এ থেকেই জেনেছিলাম, নরেন যেদিন জানতে পারবে সে কে, সেদিন আর

ইহলোকে থাকবে না। দৃঢ়সঙ্কল্প সহায়ে যোগমার্গে সে তার দেহ ত্যাগ করে চলে যাবে। নরেন যে ধ্যানসিদ্ধ মহাপুরুষ।”

ঠাকুরের দিব্য দেহের এতটুকু স্পর্শ, তার ফলেই একি বিচিত্র অধ্যাত্ম-অমুভূতি। নরেন ভাবিতে থাকেন, তবে কি এই মহা-সাধকের করুণা সম্পাতে অসম্ভবও সম্ভব হয়? মানুষের জন্ম-জন্মান্তরের সংস্কাররাশি হয় অপমৃত? তাঁহার নিজ দেহের গবেষণা-গারেই যে ইহার কিছুটা সত্যতা প্রমাণিত হইয়াছে।

এই সঙ্গে যুক্তিবাদী মনের নানা সন্দেহও দেখা দেয়। এই দিব্যকাস্তি ব্রাহ্মণ কোন সম্মোহন বিভ্রা আয়ত্ত্ব করে নাই তো? নরেনের আত্মবিশ্বাসের মূলে এক প্রচণ্ড আঘাত লাগে। স্থির করেন,—বেশ কিছুদিন খুঁটিয়া খুঁটিয়া না দেখিয়া, পরীক্ষা-নিরীক্ষা না চালাইয়া রামকৃষ্ণকে তিনি গ্রহণ করিবেন না।

ঠাকুর কিন্তু দিব্যদৃষ্টি বলে জানিয়া বসিয়া আছেন, নরেন তাঁহারই বাণীবাহ, তাঁহার ঐশী নির্দিষ্ট লীলার সে প্রধান পরিচর। নরেন যে তাঁহার চোখে এক সহস্রদল কমল—কবে এটি ফুটিয়া উঠিবে রঙে রসে সৌগন্ধে, এ জ্ঞানই যে তিনি প্রতীক্ষমান। একথা মাঝে মাঝে লোকের কাছে প্রকাশ করিয়াও বসেন।

একদিন দক্ষিণেশ্বরে কেশব সেন ও বিজয়কৃষ্ণ প্রভৃতি পরিবৃত হইয়া রামকৃষ্ণ ধর্মকথা কহিতেছেন। সহসা ভাবাবিষ্ট হইয়া কেশব, বিজয় ও নরেনের দিকে তাকাইতে লাগিলেন। কি যেন তিনি ইহাদের মধ্যে খুঁজিতেছেন।

সভা ভাঙ্গিয়া গেলে কহিলেন, “দেখলাম, কেশবের ভেতরে একটা শক্তি, যার ফলে সে জগৎ বিখ্যাত হয়েছে। আর নরেনের ভেতর সেরকম আঠারোটা শক্তি বর্ত্তমান। আবার দেখলাম, কেশব ও বিজয়ের হৃদয়ে প্রদীপের মত জ্ঞানালোক জ্বলছে, কিন্তু

নরেনের দিকে চেয়ে দেখি—তার ভেতরে জ্ঞান সূর্য্য উদিত হয়ে রয়েছে। মায়া মোহের লেশ পর্য্যন্ত নেই।”

নরেন চমকিয়া উঠেন। প্রতিবাদ করিয়া বলেন, “মশাই কি সব বলছেন? লোকে যে আপনাকে উন্মাদ বলবে। কোথায় জগদ্বিখ্যাত কেশব ও মহামনা বিজয়কৃষ্ণ, আর কোথায় আমার মত এক নগণ্য ছোড়া!”

ঠাকুর অসহায়ের মত উত্তর দেন, “কি করবো রে, তুই কি ভাবিস যে আমি এসব বলেছি। মা যে আমাকে সমস্ত দেখালেন, তাই তো বল্লুম। মা তো আমাকে সত্য বই মিথ্যা কখনো দেখাননি, তাই তো আমি একথা বলেছি।”

তেজস্বী, তর্কবিশারদ নরেন সহজে ছাড়িবার পাত্র নহেন। বলিয়া বসেন, “ওসব অতীন্দ্রিয় রূপ-টুপ, মা কালীর দর্শন, নির্দেশ, আপনার নিজের মাথার খেয়াল। দেহ-বিজ্ঞান বলছে, আমাদের ইন্দ্রিয়ের বিকার অনেক সময় আমাদের প্রভাবিত করে।”

ঠাকুর যেন ছোট বালকটি, ভীত হইয়া ভাবেন—তাই তো! সত্যনিষ্ঠ নরেন তাঁহাকে ভুল বুঝাইতে যাইবে কেন?

মা জগদম্বার নিকট সব কিছু জিজ্ঞাসা করিয়া তবে তিনি আশ্বস্ত হন। বলিতে থাকেন, “মা আমাকে বলে দিলেন, ওর (নরেনের) কথা শুনিস কেন? কিছুদিন পরে ও সব কথাই সত্য বলে মানবে।”

তরুণ ভক্তদের কথা উঠিলেই রামকৃষ্ণ নরেনের প্রশংসায় পঞ্চমুখ। বলেন, “নরেনের মত একটি ছেলেও দেখতে পেলুম না। যেমন গাইতে বাজাতে, তেমনি লেখাপড়ায়, তেমনি বলতে-কইতে, আবার তেমনি ধর্ম্ম বিষয়ে। সে রাতভোর ধ্যান করে, ধ্যান করতে করতে সকাল হয়ে যায়, হুঁস থাকে না।—আমার নরেনের ভেতর এতটুকু মোঁকি নেই। বাজিয়ে দেখ টং টং করছে। আর সব ছেলেদের দেখি, যেন চোখ-কান টিপে কোনও রকমে দু-তিনটে পাস করছে, বাস্, এই পর্য্যন্ত। ঐ করতেই যেন তাদের সব শক্তি

বেরিয়ে গেছে। নরেনের কিন্তু তা নয়—হেসে খেলে সব কাজ করে, পাস করাটা যেন তার কাছে কিছুই নয়! সে ব্রাহ্ম সমাজেও যায়, সেখানে ভজন গায়, কিন্তু অশ্রু সকল ব্রাহ্মের মতন নয়—সে যথার্থ ব্রহ্মজ্ঞানী। ধ্যান করতে বসে তার জ্যোতি দর্শন হয়। সাথে কি তাকে ভালবাসি!”

নরেনের সম্বন্ধে ঠাকুরের বড় সহজ প্রত্যয়। প্রায়ই বলেন,—  
“ও খাপ খোলা তলোয়ার, ও অখণ্ডের ঘর, ধ্যানসিদ্ধ ঋষি।”

নিজের আচার-ব্যবহারেও এই তরুণ ভক্তের অসামান্যতাকে সকলের সামনে ফুটাইয়া তুলেন। দক্ষিণেশ্বরের বণিক সম্প্রদায়ভুক্ত অনেক ভক্ত যাওয়া-আসা করিত, ঠাকুরের জন্তু নিয়া যাইত ফলমূল মিষ্টি। এই সব সকাম নিবেদনের বস্তু ঠাকুর নরেনকেই খাইতে দিতেন। বলিতেন, “ওর কোন হানি হবে না।”

নরেন ব্যক্তিস্বাতন্ত্র্যবাদী, বাহ্বাফোর্ট তাঁহার বড় কম ছিল না। একদিন ভক্তমণ্ডলী পরিবৃত ঠাকুরের সম্মুখে আসিয়া দর্পভরে বলেন, “মশায়, আজ হোটেলে, সাধারণে যাকে অখাণ্ড বলে তাই খেয়ে এসেছি।” ঠাকুর এ কথায় গুরুত্ব না দিয়া উত্তর দেন, “ওরে তোর ওতে দোষ লাগবে না। শোর গরু খেয়ে যদি কেউ ভগবানে মন রাখে, তা হবিষ্যের তুল্য, আর শাকপাতা খেয়ে যদি কেউ বিষয় বাসনায় ডুবে থাকে তবে তা শোর গরু খাওয়ারই সমান।”

সমাগত ভক্তদের দিকে চাহিয়া বলিতেন, “নরেনের ব্যতিক্রমে দোষ নেই। ওর ভেতরে জ্ঞানায়ি সব সময়ে জ্বলছে, আহারের সব রকম দোষকে ভস্ম করে দিচ্ছে। এসব অনাচারে ওর মন কলুষিত হবে না।”

তার পর সকলের বিশ্বয় উৎপাদন করিয়া ঠাকুর এই চিহ্নিত ভক্ত সম্বন্ধে বলেন, “ও জ্ঞান-খড়্গ সহায়ে মায়াময় সব বন্ধনকে খণ্ড বিখণ্ড করে কেলেছে। মহামায়া তাই তো ওকে নিজের আয়ত্তে আনতে পারছে না!”



নরেন কিন্তু মনের দ্বিধাদ্বন্দ্ব, মতবিরোধ সবকিছু সকলের সাক্ষাতে স্পষ্টভাবে ব্যক্ত করেন। শুধু তাহাই নয়, তাঁহার তীব্র গ্লেশে, যুক্তি আর বাক্যবাণে সকলে জর্জরিত হন।

নরেন সাধারণ ব্রাহ্ম সমাজের সদস্য, নিয়মিত প্রার্থনায় সেখানে যোগ দেন। ঠাকুরের সাকার আরাধনা, তাঁহার অদ্বৈত উপলব্ধির কথা, স্বেচ্ছামত হাসিয়া উড়াইয়া দেন। রামকৃষ্ণের কিন্তু তাঁহার এই ভাবী উত্তরসাধকের উপর স্থির বিশ্বাস। এই রাজকীয় শিকারকে, লক্ষ্যবস্তু এই সিংহকে, আয়ত্তে আনার সুযোগের প্রতীক্ষা তিনি করিতেছেন।

শীঘ্রই এক আকস্মিক ঘটনায় তাঁহার ও নরেনের সম্পর্ক নিকটতর হইল। নরেন ব্রাহ্ম-সমাজ হইতে বিচ্ছিন্ন হইয়া পড়িলেন।

নরেন কিছুদিন দক্ষিণেশ্বরে আসিতেছেন না। ঠাকুর তাঁহার অদর্শনে অধীর। তাই এক রবিবার তাঁহার সহিত সাক্ষাতের জন্ত সোজা সাধারণ ব্রাহ্ম-সমাজে গিয়া তিনি উপস্থিত। রামকৃষ্ণের সংস্পর্শে আসিয়া কেশব, বিজয়, চিরঞ্জীব, প্রভৃতি ব্রাহ্ম-নেতাদের পরিবর্তন ঘটিয়াছে।<sup>১</sup> শিবনাথ প্রভৃতি একদল ব্রাহ্ম আচার্য্য তাই তাঁহার সংশ্রব তেমন পছন্দ করিতেছেন না। তাঁহার সংস্পর্শ যথা-সম্ভব এড়াইয়া চলিতেই তাঁহারা চান। কিন্তু আগ্রহাকুল রামকৃষ্ণের এতকিছু ভাবিবার অবসর কোথায়? নরেনের খোঁজে, বৎসহারা গাভীর মত সেদিন তিনি সমাজগৃহে আসিয়া উপস্থিত।

সমাজ মন্দিরে ঢুকিয়াই ঠাকুর ভাবাবিষ্ট। দেহ রোমাঙ্কিত, পা দুটি টলিতেছে। এই অবস্থায় বেদীর দিকে অগ্রসর হইলেন। নরেন্দ্র প্রতি রবিবারে সমাজ-গৃহে আসেন। সেদিনও উপস্থিত। ঠাকুর কেন আসিয়াছেন, বুঝিতে তাঁহার বিলম্ব হইল না।

<sup>১</sup> মাক্স মুলের : রামকৃষ্ণ—হিজ্ লাইফ্ এণ্ড্ সেইন্স্

বেদীর আচার্য্য বা আর কোন ব্রাহ্ম নেতাই কিন্তু ঠাকুরকে অভ্যর্থনা জানাইলেন না। শিষ্টাচার বর্জিত এক বিরূপ পরিবেশ। ঠাকুরের কিন্তু কোন হুঁসই নাই, অচিরে সমাধিস্থ হইয়া পড়িলেন। কোঁতূহলী জনতার ভীড় এড়ানোর জন্ত মন্দিরের গ্যাসের আলোক নিভাইয়া দেওয়া হইল। অতিকষ্টে ঠাকুরকে নিয়া নরেন মন্দির হইতে নিষ্কাশিত হইলেন, উপনীত হইলেন দক্ষিণেশ্বরে।

তঁাহার সহিত সাক্ষাতের জন্তই ঠাকুরের এই অপমান বরণ। নরেনের মর্মে এ ঘটনাটি তীক্ষ্ণভাবে বিদ্ধ হইল। ভালবাসা উপলব্ধির সঙ্গে সঙ্গে ক্রোধও কম হয় নাই। রামকৃষ্ণের এই দুর্বলতার জন্ত তঁাহাকে তীব্র ভাষায় তিরস্কার করিলেন। তারপর ভয় দেখাইয়া বলিলেন, “মশাই, শেবটায় এই মায়ার জন্ত আপনাকে বিপদে পড়তে হবে। পুরাণে আছে, ভরত রাজা হরিণের কথা ভাবতে ভাবতে—হরিণ হয়ে যান, আপনারও ভাগ্যে আছে তেমনি পরিণাম।

রামকৃষ্ণ যেন জগদম্বার বালক পুত্রটি। বিষম মনে তখনই মায়ের নিকট ছুটিয়া যান। আবার তঁাহার বাক্যে আশ্বাসিত হইয়া যখন ফিরিয়া আসেন, আননখানি আনন্দের আভায় উজ্জ্বল। স্মিত হাস্তে নরেনকে বলিতে থাকেন, “যা শালা! আমি তোর কথা শুনবো না। মা বলে দিলেন,—তুই যে ওকে সাক্ষাৎ নারায়ণ বলে জানিস। তাই এত ভালোবাসিস। যেদিন ওর ভেতর সেই নারায়ণকে না দেখতে পাবি, সেদিন ওর মুখ দেখতেও পারবি না।”

এই দেব-শিশুর কাছে, জগন্মাতার চরণে সমর্পিত-প্রাণ সম্ভানের কাছে, নরেন্দ্রনাথকে সেদিন হার মানিতে হইয়াছিল।

নরেন দক্ষিণেশ্বরে আসিলেই ঠাকুরের আনন্দ উথলিয়া উঠে। মাঝে মাঝে তঁাহাকে দেখিয়া এমন উদ্দীপনা হয় যে তিনি সমাধিস্থ হইয়া পড়েন।

সামনেই বি-এ পরীক্ষা। পড়া তৈরী করার জন্ত নরেন কিছুদিন

যাবৎ ব্যস্ত, দক্ষিণেশ্বরে আসিতে পারিতেছেন না। ঠাকুর তাঁহার জ্ঞান অস্থির হইয়া পড়িলেন। একদিন নরেনের সহিত সাক্ষাতের জ্ঞান নিজেই কলিকাতায় আসিয়া উপস্থিত। পড়াশুনা ও ধ্যান-ধারণার সুবিধার জ্ঞান নরেন্দ্র তখন তাঁহার মাতামহীর বাসাবাড়ীর এক নিভৃত কক্ষে বাস করিতেছেন। দোতলার এই ক্ষুদ্র ঘরটির নামকরণ করিয়াছেন “টং।” একটি ক্ষুদ্র তক্তাপোষের উপর মাতুর পাতা, চারিদিকে ছড়ানো রহিয়াছে বইখাতা। মেজের একদিকে স্থপ করা তামাকুর গুল ও ছাই। অপর দিকে তানপুরা ও বাঁয়া-তবলা। ঘরের মালিকের অশাস্ত মনেরই এ যেন এক ছবছ প্রতিচ্ছবি।

ঠাকুর নীচ হইতে ‘নরেন, নরেন’ বলিয়া চীৎকার করিতে থাকেন। নরেন ছুটিয়া আসিয়া, ঠাকুরকে অভ্যর্থনা করিয়া উপরে নিয়া যান। সাক্ষাৎকালে, গদগদ স্বরে ঠাকুর বলিতেছেন, “তুই এতদিন যাসনি কেন রে? তুই এতদিন যাসনি কেন?”

প্রেমলীলার শেষ এখানেই নয়। দক্ষিণেশ্বর হইতে গামছায় বাঁধিয়া নরেনের জ্ঞান সন্দেশ আনিয়াছেন। ব্যগ্রভাবে তাহা খুলিয়া বলিলেন, “ধর খা, খা।”

স্নেহপূর্ণ স্বরে কহেন, “একটা গান শোনা দেখি, অনেকদিন তোর কণ্ঠ শুনিনি।”

বড় অযাচিত এ আগমন আর বড় অহেতুক এ কৃপা। নরেন অভিভূত হইয়া গিয়াছেন। তানপুরা লইয়া ধীর কণ্ঠে সঙ্গীত শুরু করিলেন—

জাগ মা কুলকুণ্ডলিনী,  
( তুমি ) ব্রহ্মানন্দ স্বরূপিণী ।  
( তুমি ) নিত্যানন্দ স্বরূপিণী,  
প্রমুগ্ধ ভুজগাকার।  
আধার-পদ্ম-বাসিনী ।

ঠাকুরের মন তখন ধীরে ধীরে উর্দ্ধতর চেতনায় উঠিয়া যাইতেছে।  
ক্রমে সমাধিমগ্ন হইয়া পড়িলেন।

নরেন ঠাকুরের ধারণ-ধারণ আজকাল কিছুটা বুঝিয়া নিয়াছেন।  
ভজ্ঞন গানের মাধ্যমেই ঠাকুরকে বাহু-জ্ঞানের ভূমিতে অবতরণ  
করাইতে হইবে। তাই গাহিতে লাগিলেন, ‘একবার তেমনি তেমনি  
তেমনি করে নাচ মা শ্যামা।’

ধীরে ধীরে ঠাকুর সহজ অবস্থায় আসেন। তারপর আদরের  
ধন নরেনকে দক্ষিণেশ্বরে নিয়া গিয়া তবে শাস্ত হন।

স্বার্থগন্ধহীন এই অপার্থিব প্রেমের বশ্চা দিনের পর দিন যেন  
নরেনের জীবনের ভিত্তিমূল শিথিল করিয়া দিতেছে। ইহারই  
উল্লেখ করিয়া স্বামী বিবেকানন্দ উত্তরকালে বলিতেন, “ঠাকুরের  
এই ভালবাসাই আমাকে চিরকালের মত বাঁধিয়া ফেলিয়াছে।  
এক্সা তিনিই ভালবাসিতে জানিতেন ও পারিতেন—সংসারের অশ্রু  
সকলে স্বার্থসিদ্ধির জন্ত ভালবাসার ভানমাত্র করিয়া থাকে।”

দিব্য প্রেমের চুষকাকর্ষণে নরেন ধীরে ধীরে ঠাকুরের অস্তিত্বের  
সহিত মিশিয়া যাইতেছেন। কিন্তু ইহার পরই আসে ঠাকুরের আর  
এক রকম পরীক্ষা। কিছুদিন পর্যন্ত তিনি নরেনের দিকে মোটেই  
দৃষ্টি দেন না। অহেতুক কুপার ধারাটি যেন প্রত্যাহার করিয়া  
নিয়াছেন। নরেনকে দেখা মাত্র আগে উল্লসিত হইয়া উঠিতেন।  
এখন আর সেরূপটি দেখা যায় না। ডাকিয়া একবার একটি কথাও  
জিজ্ঞাসা করিতেছেন না। নরেননাথেরও যেন এই তাক্কিলো  
আজকাল তেমন আর কিছু যায় আসে না। পূর্ববৎ নিয়মিত ভাবে  
ঠাকুরকে গিয়া তিনি দর্শন করেন। তারপর ভক্তদের সহিত  
বাক্যালাপ করিয়াই ফিরিয়া আসেন নিজগৃহে।

এই অবহেলা ও ঔদাসীন্যের পালা প্রায় একমাস চলিল।  
ঠাকুর একদিন জিজ্ঞাসা করিলেন, “আচ্ছা, আমি তো তোকে ডেকে

আজকাল একটা কথাও বলি না। তবে তুই এখানে কি করতে আসিস্ বল্ দেখি ?”

নরেন্দ্র অবলীলায় উত্তর দিলেন, “আপনার কথা শুনে তো আসি না। আপনাকে ভালবাসি, সব সময়ে দেখতে ইচ্ছে করে—তাই আসি।”

হৃদ্বর্ষ সিংহ এইবার ধরা পড়িয়াছে শিকারীর জাল বেঁধে নীতে। নরেনের এই অকপট স্বীকারোক্তিতে ঠাকুরের তাই আনন্দের অবধি নাই। স্মিত হাস্তে বলিলেন, “আমি তোকে বিড়ে (পরীক্ষা করে) দেখছিলাম—আদর-যত্ন না পেলে তুই পালিয়ে যাস্ কিনা : তোর মত আধারই এতটা ত্যাগ করা সহ্য করতে পারে।”

রামকৃষ্ণ একদিন দক্ষিণেশ্বরে বসিয়া নরেনকে অদ্বৈত তত্ত্বের মর্ম-কথা বুঝাইতেছেন। বলিতেছেন, জীব ও ব্রহ্ম অভেদ। নরেন ব্রাহ্ম-সমাজের দ্বারা প্রভাবিত, এমন কট্টর অদ্বৈতবাদের কথায় তাঁহার মন সায় দেয় না। মন্দির চত্বরের এক পাশে প্রতাপ হাজরা থাকেন। নরেন সেখানে বসিয়া মাঝে মাঝে গল্পগুজব করেন, তামাক খান। কথা প্রসঙ্গে নরেন হাজরার সম্মুখে বসিয়া সেদিন বলিতেছেন, “আচ্ছা! মশাই, একি কখনো হতে পারে? ঘটিটা ঈশ্বর, বাটিটা ঈশ্বর, যা কিছু ছ’চোখে দেখছি সকলই ঈশ্বর!”

হাজরাও এ কথার উপর ব্যঙ্গ করিয়া এক মন্তব্য করেন। উভয়ের মধ্যে হাসির রোল উঠে। ঠাকুর তাঁহার কক্ষে ভাবাবিষ্ট। নরেনের হাস্তরস কানে যাইতেই বাহিরে চলিয়া আসেন। নয়ন আধ-নিমীলিত, পরনের কাপড়খানি বালকের মত বগলে ধরা। নিকটে আসিয়া স্মিত হাস্তে অক্ষুট স্বরে প্রশ্ন করিলেন, “তোরা কি বলছিস রে?” তারপর একটু কাছে ঘেঁষিয়া নরেনকে স্পর্শ করিতেই ঘটে এক অদ্ভুত কাণ্ড। নরেন সমাধিমগ্ন হইয়া যান।

এ যেন ঐশ্বর্যজালিকের স্পর্শ! হস্ত-পরিহাসরত নরেনের সন্তায় বিপ্লব ঘটয়া গেল। মুহূর্ত্ত মধ্যে সমস্ত চেতনার, সমস্ত অস্তিত্বের যেন এক বিরাট রূপান্তর সাধিত হইয়া গিয়াছে। সঙ্গে সঙ্গে নরেনের উপলব্ধি হইল, ঈশ্বর ভিন্ন বিশ্বব্রহ্মাণ্ডে আর কিছুই কোন অস্তিত্ব নাই। এই অপূর্ব দিব্য অনুভূতি জাগ্রত রহিল সারাদিন ব্যাপিয়া।

তারপর বাড়ীতে ফিরিয়া আসিলেও দেখা গেল এই চৈতন্যময় অবস্থা এক্ষণে রহিয়াছে। আহারে বসিয়া তিনি প্রত্যক্ষ করিতেছেন, অন্ন, খালা, পরিবেশনকারী, সব কিছুই সেই এক পরম ব্রহ্মেরই রূপায়ণ। রাস্তা-ঘাটে, কলেজে সেই একই অভিজ্ঞতা। শুধু দুই একদিন নয়, কয়েকদিন এই চিন্ময় অনুভূতি সর্বসময় ওতপ্রোত রহিল।

স্বামীজী বলিয়াছেন, “যখন আচ্ছন্ন ভাবটা একটু কমে যেত তখন জগৎটাকে মনে হত স্বপ্ন। হেতুয়া পুকুরে বেড়াতে গিয়ে তার চারদিকের লোহার রেলিঙে মাথা ঠুক দেখতাম, যা সব দেখছি তা স্বপ্নময় না বাস্তব। হাত পা’র অসাড়তার জ্ঞান মনে হত, পক্ষাঘাত হবে না তো? বেশ কিছুকাল এই ভাবের ঘোর ও আচ্ছন্নতার হাত থেকে পরিত্রাণ পাই নি। যখন প্রকৃতিস্থ হলাম তখন ভাবলাম—এই হচ্ছে অদ্বৈত বিজ্ঞানের আভাস। তবে তো শাস্ত্রে যা লেখা আছে, তা মিথ্যে নয়। সেই অবধি অদ্বৈততত্ত্বের ওপর আর সন্দেহ জাগে নি।”

শুদ্ধতম প্রেমের চূর্ণভাষ্য বেড়াফালে ঠাকুর নরেনকে জড়াইয়া ফেলিয়াছেন। এইবার বাস্তব অনুভূতি ও প্রত্যক্ষ দর্শনের মধ্য দিয়া ধীরে ধীরে তাঁহাকে চৈতন্যের তোরণ-দ্বারে উপস্থিত করিয়া দিলেন। পরিহাস ও অস্বীকৃতির মধ্য দিয়া স্বাধীনচেতা যুক্তিবাদী নরেন তাঁহার অনুসন্ধান শুরু করিয়াছিলেন। পূর্ণ প্রত্যয়ের মধ্য দিয়া ধীরে ধীরে আজ তাহারই ঘটিল আত্মপ্রকাশ।

সিংহ এবার এক লক্ষ লক্ষ্যবস্তুর উপরে ঝাঁপাইয়া পড়িয়াছে—  
রামকৃষ্ণতত্ত্ব প্রবিষ্ট হইয়াছে নরেনের সর্বসম্ভায়।

নরেনের স্বীকৃতি ও শরণাগতির এক অপূর্ব চিত্র শরৎ মহারাজ  
অঙ্কিত করিয়া গিয়াছেন। ১৮৮৪ সালের শীতকাল। শরৎ ও  
শশীর সহিত হেতুয়ায় বেড়াইতে বেড়াইতে নরেন তাঁহার প্রত্যয়ভরা  
মৰ্ম্ম-কথা উদ্ঘাটন করিলেন। রামকৃষ্ণের ঐশী নির্দিষ্ট কৰ্ম্মলীলার  
আভাস তখন তিনি পাইয়াছেন। তাঁহার কৃপাবলে কত শরণাগত  
ভক্তের কত সংস্কার বন্ধন কাটিতেছে, দিব্য আনন্দের অধিকারী  
তাঁহারা হইতেছেন, ইহার অপূর্ব বর্ণনা দিলেন। প্রত্যক্ষ অনুভূতি-  
লাভে তিনি নিজেও যে আজ ধন্ত। তারপর সজল নয়নে প্রেম  
গদগদ স্বরে নরেন গান ধরিলেন—

প্রেমধন বিলায় গোরা রায়,  
চাঁদ নিতাই ডাকে আয় আয়,  
(তোরা কে নিবিরে আয়।)  
প্রেম কলসে কলসে ঢালে

তবু না ফুরায়।

তরুণ সাধকের হৃদয়ের কপাটখানি সেদিন উন্মুক্ত। আপন  
মনে অক্ষুট স্বরে তিনি কহিয়া যাইতে লাগিলেন, “হ্যাঁ, সত্য সত্যই  
তিনি বিলাচ্ছেন। যা কিছু শ্রেয়, প্রেম বল, ভক্তি বল, জ্ঞান বল,  
মুক্তি বল, গোরা রায় যাকে যা ইচ্ছে তাকে যেন তাই বিলাচ্ছেন।  
কি অদ্ভুত শক্তি!—রাত্রে বিছানায় শুয়ে আছি, সহসা আকর্ষণ করে  
দক্ষিণেশ্বরে হাজির করালেন—শরীরের ভেতরে যেটা আছে  
সেইটাকে। তারপর কত কথা কত উপদেশের পর আবার ফিরতে  
দিলেন। সব করতে পারেন—দক্ষিণেশ্বরের গোরা রায় সত্যিই  
সব করতে পারেন।”

অতীন্দ্রিয়লোকের অভ্যন্তরে, পরম চেতনা ও শক্তির মৰ্ম্মক্ষেত্রে  
মহাসাধক রামকৃষ্ণ সমাসীন। তাঁহার সহিত নরেন্দ্রনাথের পরিচয়

এইবার সাধিত হইতেছে। সেই নিগূঢ় অধ্যাত্মলোকের চমকপ্রদ বার্তারই আভাস তাঁহার সেদিনকার কথায় ফুটিয়া উঠে।

সাধনপথের দিগ্‌নির্গয় হইয়াছে—নরেন্দ্র ত্রীধামকৃষ্ণকে তাঁহার জীবনপ্রভুরূপে স্বীকার করিয়াছেন। তাই বৃষ্টি এবার ঠাকুর স্তব করিলেন নরেনের পরীক্ষা ও জীবনমন্ডন। দারিদ্র্যের পীড়ন আসে বার বার। তারপর ঘটে পিতার আকস্মিক মৃত্যু। এই দুর্দ্দৈবময় অধ্যায়ের সূত্রপাত হয় ১৮৪৪ খৃষ্টাব্দের প্রথমভাগে। ইহার কিছুকাল আগে নরেন বি, এ, পরীক্ষা দিয়া উঠিয়াছেন।

পিতা বিশিষ্ট এটর্নী হইলেও তিনি ছিলেন অমিতব্যয়ী। সঞ্চয় দূরের কথা স্বর্ণের বোঝা-ই কিছুটা রাখিয়া গিয়াছেন। আর সেই সঙ্গে রহিয়াছে মা ও কয়েকটি ভাইবোনের খাওয়া পরার দায়িত্ব। মাতা ও পুত্র সাহসের সহিত এই সংগ্রামে রত হইয়াছেন। যে সংসারের মাসিক ব্যয় হাজার টাকা, আজ তাহা ত্রিশ টাকায় চালাইতে হইতেছে। কিন্তু এই টাকারই বা সংস্থান কোথায় ?

এই সময়কার সঙ্কটের বাস্তব চিত্রটি উত্তরকালে বিবেকানন্দের নিজের ভাষায়ই ফুটিয়া উঠিয়াছে, “মৃত্যুশোচের অবসান হইবার পূর্ব হইতেই কষ্টের চেষ্টায় ফিরিতে হইয়াছিল। অনাহারে নগ্নপদে চাকুরির আবেদন হস্তে লইয়া মধ্যাহ্নের প্রথর রৌদ্রে অফিস হইতে অফিসান্তরে ঘুরিয়া বেড়াইতাম—অন্তরঙ্গ বন্ধুগণের কেহ কেহ দুঃখের দুঃখী হইয়া সঙ্গে থাকিত, কোনদিন থাকিতে পারিত না, কিন্তু সর্বদাই বিফল হইয়া ফিরিতে হইয়াছিল। সংসারের সহিত এই প্রথম পরিচয়েই বিশেষভাবে আমার হৃদয়ঙ্গম হইতেছিল, স্বার্থশূন্য সহানুভূতি এখানে অতীব বিরল দুর্বলের, দরিদ্রের এখানে স্থান নাই। দুইদিন পূর্বেও যাহারা আমাকে সাহায্য করিতে পারিলে ধন্য হইত, সময় বুঝিয়া তাহারাই এখন আমাকে দেখিয়া মুখ বাঁকাইতেছেন।...যেদিন বুঝিতাম গৃহে সকলের প্রচুর আহাৰ্য্য নাই এবং হাতে পয়সা নাই সেদিন মাতাকে ‘আমার নিমন্ত্রণ আছে’



বলিয়া বাহির হইতাম এবং সামান্য কিছু খাইয়া, কোনদিন বা অনশনে, কাটাইয়া দিতাম।”

এত কিছু হুঃখ-কষ্ট ও অভাব-অনটনের উপর ছিল জ্ঞাতীদের শক্রতা। বাড়ী হইতে উচ্ছেদ করার জন্য তাহারা জোর মামলা শুরু করিয়া দিয়াছেন।

এই সব উৎপীড়নের সঙ্গে আছে আর এক ধরনের উৎপাত। এক ধনী মহিলার দৃষ্টি আগে হইতেই সুদর্শন তরুণ নরেনের উপর পড়ে। সুযোগ বুঝিয়া এবার তিনি লোভ দেখাইতে থাকেন, তাঁহাকে গ্রহণ করিলে নরেন অচিরে এই অর্থকষ্ট হইতে নিষ্কৃতি লাভ করিতে পারেন। নরেন্দ্র কিন্তু ঘৃণাভরে এ প্রস্তাব প্রত্যাখ্যান করেন।

এক ধনী বন্ধু আমোদ-প্রমোদের জন্য এই সময়ে নরেনকে তাঁহার বাগান ‘বাড়ীতে’ নিয়া যায়। নরেন গিয়া দেখেন, সুরা এবং বারান্দারও ব্যবস্থা সেখানে রহিয়াছে। সকলে যুক্তি করিয়া স্ত্রীলোকটিকে হঠাৎ নরেনের বিশ্রাম-কক্ষে প্রেরণ করে। যুবতীর দিকে স্থির দৃষ্টিতে তাকাইয়া তেজস্বী নরেন প্রশ্নের পর প্রশ্ন করিতে থাকেন,—কেন সে এই পাপের পথে নামিয়াছে? সত্যকারের সুখ তাঁহার জীবনে কখনো মিলিয়াছে কি?

তারপর তীক্ষ্ণ পুরুষদৃষ্ট কণ্ঠে বলিয়া উঠেন, “বাছা, এই ছাইভস্ম দেহটার তৃপ্তির জন্য তো কত কিছু করলে। কিন্তু মৃত্যু কি তোমায় ছাড়বে? সে তো ক্রমেই এগিয়ে আসছে। পারের সম্বল কিছু করেছ কি? এসব ছেড়ে, ভগবানকে ডাকো।”

রমণী লজ্জিতা ও অনুতপ্তা হয়, ফিরিয়া আসিয়া অনুযোগের সুরে বলে, “ছিঃ এমন লোকের কাছেও কি আমায় পাঠাতে হয়।”

সাহস ও অকপটতা নরেনের আজন্ম বৈশিষ্ট্য। বাগানবাড়ী হইতে ফিরিয়া আসিয়াই সবাইকে বলিতে থাকেন, “জানো, আজ বাগানে গিয়া কত আমোদ-প্রমোদ করে এসেছি। তাছাড়া, মদ, মেয়েমানুষ সবই সেখানে ছিল।”

এ সব কথা পল্লবিত হইয়া পরমহংসদেবের কানে পৌঁছিল। নরেন অধঃপাতে গিয়াছে! রামকৃষ্ণ গজিয়া উঠিলেন, “চূপ কর, শালারা। মা বলেছেন, সে কখনো অমন হতে পারে না। যোষিৎ-সংসর্গ ওর হবে না। আর কখনো আমাকে ওসব কথা বললে আমি তোদের মুখ দেখবো না।”

নরেনের জীবনপ্রভু তাঁহার জ্যোতিঃনিগ্ৰহী তৃতীয় নয়নটি যে সতত তাঁহার দিকেই নিবদ্ধ রাখিয়াছেন। সে নয়নের দৃষ্টি-সীমা এড়াইয়া চলার উপায় তাঁহার কই?

কখনো অভিমানে, কখনো বা দারিজ্যের পেষণে নরেন তাঁহার উন্মাদ প্রকাশ করেন, ঈশ্বরের অস্তিত্বে সন্দেহ জানান।’ কিন্তু ঠাকুরের সুহিত সাক্ষাতের পর হইতে যে প্রত্যক্ষ অনুভূতি তিনি লাভ করিয়াছেন, যে অপ্রাকৃত দর্শন তাঁহার হইয়াছে, তাহা তো বিস্মৃত হইবার নয়। অন্তঃসঞ্চারী আলোকশ্রোত ধীরে ধীরে তাঁহার জীবনের গভীরে প্রবাহিত হইতে আরম্ভ করিয়াছে। আর ঠাকুর রামকৃষ্ণের কৃপার উৎস হইতেই যে সে প্রবাহ নামিয়া আসিতেছে তাহা অস্বীকার করিবার উপায় কই?

নরেন্দ্রনাথ তখন বেকার। সেদিন ভগ্ন হৃদয়ে অবসন্ন দেহে গৃহে কিরিতেছেন। শেষটায় রাস্তার পাশে বারান্দায় শুইয়া পড়িতে বাধ্য হন। চেতনা তখন বিলুপ্ত প্রায়। এই সময়ে জাগিয়া উঠে এক বিস্ময়কর অতীন্দ্রিয় অনুভূতি। উত্তরকালে নিজেই তিনি ইহা বিবৃত করিয়াছেন,—“সহসা উপলব্ধি করিলাম, কোন্ এক দৈবশক্তি প্রভাবে একের পর অল্প—এইরূপে ভিতরের অনেকগুলি পর্দা যেন উত্তোলিত হইল। তখন শিবের সংসারে অশিব কেন, ঈশ্বরের কঠোর জ্ঞায়পরতা ও অপার করুণার সামঞ্জস্য কোথায়—এই শ্রেণীর যে সকল বিষয় নির্ণয় করিতে না পারিয়া মন এতদিন

নানা সন্দেহে আকুল হইয়াছিল, সেই সকল বিষয়ের স্থির মীমাংসা অন্তরের নিবিড়তম প্রদেশে দেখিতে পাইলাম। আনন্দে উৎফুল্ল হইয়া উঠিলাম। অনন্তর বাটী ফিরিবার কালে দেখিলাম, শরীরে বিন্দুমাত্র ক্লান্তি নাই, মন অমিত বল ও শাস্তিতে পূর্ণ; এবং রজনী অবসান হইবার স্বপ্নই বিলম্ব আছে।”

ইহার পর অন্তরে গুরু হয় এক নূতনতর আলোড়ন। তীব্র বৈরাগ্যের ঝড় বহিতে থাকে। জীবনের ক্ষয়-ক্ষতি, নিন্দা-প্রশংসায় তাঁহার কি আসে যায়? জাগিয়া উঠে দৃঢ় প্রত্যয়,—সংসারের গণ্ডিতে আবদ্ধ হইয়া থাকার জন্ম তাঁহার জন্ম হয় নাই। মুক্তির আশ্বাদ তাঁহাকে গ্রহণ করিতেই হইবে। স্থির করিলেন, সংসার ত্যাগ করিয়া নিবেন সন্ন্যাস জীবন।

কয়েকদিন পরে রামকৃষ্ণ কলিকাতায় এক ভক্তগৃহে আসিয়াছেন। নরেনকে সেদিন এক রকম জোর করিয়াই তিনি দক্ষিণেশ্বরে নিয়া গেলেন। ঘরের মধ্যে বহু ভক্তের সমাগম। ঠাকুর ভাবাবিষ্ট হইয়া বসিয়া আছেন। হঠাৎ নরেনের নিকটে আসিয়া একদৃষ্টিতে তাঁহার দিকে তাকাইয়া থাকেন। তারপর সজল চক্ষে গুণ্গুন স্বরে গান ধরেন,—

কথা কহিতে ডরাই

না কহিতেও ডরাই,

( আমার ) মনে সন্দ হয়

বুঝি ভোমায় হারাই, হা—রাই !

এ প্রচ্ছন্ন ইঙ্গিতের মর্ম্ম বুঝিতে নরেনের দেৱী হইল না। সর্ব্বজ্ঞ ঠাকুর তাঁহার সন্ন্যাস গ্রহণের সঙ্কল্পটি ধরিয়া ফেলিয়াছেন। আসন্ন বিচ্ছেদের ব্যথা তাঁহার এই গানের পদে লুকানো।

নরেনের মনের রুদ্ধ ভাবপ্রবাহ যেন মুহূর্ত্তে অর্গলমুক্ত হইয়া গেল। ঠাকুরের মত তাঁহার চোখ দুটিও অশ্রু ছলছল।

উভয়ের এই রহস্যময় আচরণে বিস্মিত হইয়া সবাই নীরবে

বসিয়া আছেন। ঠাকুর সহাস্তে তাঁহাদের দিকে তাকাইয়া বলিলেন, “আমাদের ভেতর একটা ব্যাপার হয়ে গেল।”

সেই রাত্রে দক্ষিণেশ্বরে নরেনকে ডাকিয়া রামকৃষ্ণ গোপনে বলিলেন, “ওরে আমি জানি, তুই মায়ের কাজের জগুই এসেছিস্। সংসারে থাকা তোর হবে না। কিন্তু আমি যতদিন আছি, আমার জগু থাক্।” কথা কয়টি নরেন্দ্রনাথের জীবনে যেন আলোক-সংকেত। সরাসরি মর্শ্মমূলে গিয়া এগুলি বিদ্ধ হইল। আর ইহার সঙ্গে সঙ্গে মনে পড়িল ঠাকুরের ছলছল দুটি আয়ত নয়ন আর অন্তরের প্রেম-প্রবাহ। এ প্রবাহ নরেন্দ্রনাথের মত ঐরাবতকেও ভাসাইয়া নিবার পক্ষে যথেষ্ট।

বাড়ীর মামলা ক্রমে আরো জটিল হয়। জ্ঞাতিরা উৎখাতের মামলায় তাঁহাকে কাবু করিতে চাহিতেছে। পুস্তক প্রকাশক ও এটর্নীর অফিসে চূড়ান্ত পরিশ্রম করিয়া এই সময়ে কিছু কিছু উপাঞ্জন করেন বটে, কিন্তু তাহাতে মা ও ভাই-বোনদের অন্ন-সংস্থান হয় না। তত্বপরি মোকদ্দমার ব্যয়। অর্থাভাব ক্রমে চরমে উঠিল।

আত্ম-পরিজনের অন্নকষ্ট আর সহ্য হয় না। নরেন একদিন ঘর হইতে ছুটিয়া বাহির হইলেন। স্থির করিলেন, যে ঠাকুরের উপর জীবনের সমস্ত ভার চাপাইয়া তিনি বসিয়া আছেন, আজ মা ও ভাই-বোনের অন্নসংস্থানের জগু তাঁহারই কৃপা ভিক্ষা মাগিয়া নিবেন। সর্ব্ব অন্তর খুঁজিয়া দেখিলেন, শ্রীরামকৃষ্ণই যে তাঁহার জীবনের একমাত্র সম্বল। ঐহিক পারত্রিক যাহা কিছু চাহিবার, তাঁহার নিকট ছাড়া আর কাহার কাছে চাহিবেন? আধ্যাত্মিক ও সাংসারিক দুই জীবনেরই বোঝা আজ তিনি ঠাকুরের পদে সমর্পণ করিতে পারিলে বাঁচেন। আত্মবিশ্বাস তাঁহার চিরতরে ধূলিসাৎ হইয়া গিয়াছে।

তখন দক্ষিণেশ্বরে গিয়া ঠাকুরকে চাপিয়া ধরিলেন। কহিলেন,

“মশায়, সংসারের ভাবনা আর আমি ভাববো না। আপনি মাকে বলে যা হয় একটা ব্যবস্থা করুন।”

“ওরে, আমি যে ওসব কথা বলতে পারি না। তুই নিজে মাকে জানাস্ না কেন? মাকে যে মানিস না, তাই এত বিপদ হচ্ছে। কালীঘরে গিয়ে মায়ের কাছে আজ তুই যা চাইবি, মা তোকে তাই দেবেন। মা যে আমার চিন্ময়ী, ব্রহ্মশক্তি। ইচ্ছেমাত্র সবকিছু করতে পারেন। তুই যা না তাঁর কাছে।”

গভীর রাত। নরেন ধীর পদে ভবতারিণীর মন্দিরে গিয়া বসেন। নিবিড় ভাবের ঘোরে তিনি আবিষ্ট। সেদিনকার অনুভূতি সম্বন্ধে বিবেকানন্দ পরে বলিয়াছেন, “যাইতে যাইতে একটা গাঢ় নেশায় সমাচ্ছন্ন হইয়া পড়িলাম, পা টলিতে লাগিল। মাকে সত্য সত্য দেখিতে ও তাঁহার শ্রীমুখের বাণী শুনিতে পাইব—এইরূপ স্থির বিশ্বাসে মন অশ্রু সকল বিষয় ভুলিয়া অত্যন্ত একাগ্র ও তন্ময় হইয়া ঐ কথাই ভাবিতে লাগিল। মন্দিরে উপস্থিত হইয়া দেখিলাম, সত্য সত্যই মা চিন্ময়ী, সত্য সত্যই তিনি জীবিতা এবং অসীম প্রেম ও সৌন্দর্যের প্রস্রবণরূপিণী। ভক্তি ও প্রেমে হৃদয় উচ্ছ্বসিত হইল, বিহ্বল হইয়া বারংবার প্রণাম করিতে করিতে বলিতে লাগিলাম, ‘মা বিবেক দাও, বৈরাগ্য দাও, জ্ঞান দাও, ভক্তি দাও, যাতে তোমার অবাধ দর্শন নিত্য লাভ করি, এইরূপ করে দাও।’ শাস্তিতে প্রাণ আশ্লুত হইল, জগৎ সংসার নিঃশেষে অন্তর্হিত হইয়া একমাত্র মা-ই হৃদয় পূর্ণ করিয়া রহিলেন।”

পাষণ প্রাতিমায় ঘটিয়াছে চিন্ময়ী জগজ্জননীর দিব্য আবির্ভাব। নরেনের সমগ্র সত্তার মূলে জাগিয়াছে প্রচণ্ড আলোড়ন। অন্নবস্ত্রের নগণ্য সমস্তা তিনি একেবারে বিস্মৃত হইয়াছেন, তাই মায়ের কাছে তাহা জানাইতে পারেন নাই। ঠাকুরের নির্দেশে তিন তিন বার মন্দিরে গিয়া বসিলেন। কিন্তু সে প্রশ্ন আর উঠাইতে পারিলেন কই?

বার বারই ভাবেন, কোন্ লজ্জায় এই তুচ্ছ কথা জগজ্জননী আত্মশক্তিকে তিনি জানাইতে যাইবেন? ঠাকুরের মূল্যবান কথাটি অমনি তাঁহার মনে পড়িয়া যায়। ভক্তদের প্রায়ই তিনি বলিতেন, “রাজার প্রসন্নতা লাভ করে তাঁর কাছে তুচ্ছ লাউ-কুমড়া চাওয়া— সে যে নির্বোধের কাজ রে।”

মায়ের কাছে সেদিন শুধু জ্ঞানভক্তি প্রার্থনা করিয়াই নরেন্দ্রনাথ ফিরিয়া আসিলেন।

সহসা এই ঘটনার অর্থ তাঁহার নিকট পরিষ্কার হইয়া উঠিল। বুঝিলেন, ইহা ঠাকুরেরই এক রহস্যময় লীলা। নতুবা যে সমস্তার কথা বলিতে তিনি ব্যাকুল হইয়া দক্ষিণেশ্বরে আসিয়াছেন, মুখ ফুটিয়া তাহা বলিতে এমন ভুল বার বার হইবে কেন?

বাড়ীর অন্তর্যমিত্র নিবারণের জন্ত এবার তাই ঠাকুরকেই ধরিয়া বসিলেন। উপায়ান্তর অভাবে রামকৃষ্ণকেই সেদিন বলিতে হয়, “খাচ্ছা, যা মোটা ভাত-কাপড়ের কষ্ট কখনো হবে না।”

সব কিছু ভালমন্দ ঠাকুরের পায়ে নরেন ইতিপূর্বে বিলাইয়া দিয়াছেন। কিন্তু মা ভাই-বোনের কর্তব্যের বোঝাকেও সেখানে নামানোর কথা তো কখনো ভাবেন নাই? রামকৃষ্ণ আজ যেন নিজেই কৃপা করিয়া এ বোঝা কাড়িয়া নিলেন। দায়িত্ববোধ ও আত্ম-প্রত্যয়ের সঙ্গে জড়িত থাকে একটা সূক্ষ্ম অহংবোধ। তাও ঠাকুর নরেনের জীবন হইতে বুঝি মুছিয়া ফেলিতে চাহিলেন।

চিন্ময়ী জননীর অপরূপ দর্শন! এ দর্শন নরেনের অন্তরে সেদিন অবিরাম আনন্দের প্রস্রবণ বহাইয়া দেয়। ঠাকুরকে ধরিয়া তখনই জগজ্জননীর এক স্তুতি-গান শিখিয়া নেন। আনন্দাবেশে সারা রাত তাঁহার ঘুম হয় না, গানের কলি কেবলই কণ্ঠে গুঞ্জরণ করিয়া ফিরিতে থাকে—

তোরে জানি মা ও দীনদয়াময়ী,

( আমার ) মা স্বংহি তারা।

তুমি ত্রিগুণধরা পরাংপর।

তোরে জানি মা ও দীনদয়াময়ী

তুমি দুর্গমেতে দুঃখহরা।”

নরেন ব্রহ্মময়ীকে দেখিয়াছেন, ব্রহ্মের সাকার রূপ মানিয়া  
নিয়াছেন, তাই রামকৃষ্ণের আজ্ঞা আনন্দের অবধি নাই। বালকের  
মত তিনি হাস্যমুখর। সবাইকে ডাকিয়া বার বার বলিতেছেন,  
জানো, “নরেন মাকে মেনেছে! বেশ হয়েছে—না?”

পরদিন নরেন কলিকাতায় ফিরিবেন। প্রণাম করিতেই ঠাকুর  
ভাবাবিষ্ট। ছোট ছেলেটির মত নরেনের কোলে উঠিয়া বসেন,  
ভাবজড়িত কণ্ঠে কহেন, “দেখছি কি—এটা (নিজের দেহ) আমি,  
আবার এটাও (নরেনের দেহ) আমি। সত্য বলছি, কিছুই তফাৎ  
বুঝতে পারছি না। যেমন গঙ্গার জলে একটা লাঠি ফেলায় দুটো  
ভাগ দেখাচ্ছে—সত্য সত্য কিছু ভাগাভাগি নেই, একটাই রয়েছে।  
—তা, মা ছাড়া আর কি আছে বল, কেমন?”

অর্দ্ধবাহু অবস্থায় ঠাকুর এবার তামাক খাইতে শুরু করিলেন।  
তারপর কল্কেটি নরেনের মুখের সামনে নিয়া কহিতে লাগিলেন,  
“খা, আমার হাতেই খা।” নরেন সসঙ্কোচে মুখ ফিরাইয়া নেন,  
কিন্তু ছাড়া পাইবার উপায় নাই। ঠাকুরের হস্তে তাঁহাকে এই  
তামাক খাইতেই হইল।

কিন্তু কল্কেটি ঠাকুর যেই নিজ মুখে লাগাইতে যাইবেন নরেন  
শিহরিয়া উঠিলেন, হাত চাপিয়া ধরিলেন। খাবারের অগ্রভাগ  
কাহাকেও দেওয়া হইলে ঠাকুর উচ্ছিষ্ট জ্ঞানে তাহা গ্রহণ করিতেন  
না। এখন যেন সবই বিপরীত।

ঠাকুর ক্রুদ্ধ হইয়া কহিলেন, “দূর শালা! তোর বড় ভেদ বুদ্ধি।  
তুই আর আমি কি আলাদা?”

ঠাকুরের এই আচরণ গুরু ও শিষ্যের একাত্মকতা ও অভেদত্ব যেমন বুঝাইতে চাহিতেছে, তেমনি সামনে তুলিয়া ধরিতেছে অষ্টভূত-অমুভূতির আদর্শ।

আর একদিনের কথা। রামকৃষ্ণ সেদিন নিভূতে নরেনকে দক্ষিণেশ্বরের পঞ্চবটীতে ডাকিয়া নিয়া যান, তারপর স্নেহ-পূর্ণ স্বরে কহেন, “আখ, তপস্তার ফলে আমার ভেতর অনেক কাল হল অগ্নিমাди বিভূতি সব এসে গেছে। কিন্তু আমি তা দিয়ে কি করবো? যার পরনের কাপড় ঠিক থাকে না, এসব সে কি করে কাজে লাগাবে? কিন্তু মা তো বলেছেন, তাকে তাঁর অনেক কাজ করতে হবে। তোর ভেতরে শক্তি সঞ্চার করে ওগুলো এবার দিয়ে দি, তুই কাজে লাগাতে পারবি। কি বলিস?”

ঈশ্বর লাভের দৃঢ় সঙ্কল্প তখন নরেনের হৃদয়ে জাগিয়া উঠিয়াছে। যোগ বিভূতির ঐশ্বর্য্য প্রলোভন তাঁহাকে টলাইতে পারিবে কেন? উত্তর দিলেন, “কিন্তু মশায়, এসব তো আমার ঈশ্বর দর্শনে সাহায্য করবে না! তবে এতে আমার কি লাভ? আগে ভগবৎ-দর্শনরূপ আসল কাজটি হয়ে যাক, তারপর এর কথা ভাবা যাবে।

প্রিয় ভক্তের এই নিস্পৃহতায় ঠাকুরের চোখে-মুখে সেদিন ফুটিয়া উঠে অপার প্রসন্নতার দীপ্তি।

ভক্তজন পরিবৃত্ত রামকৃষ্ণ একদিন স্থায়ী কক্ষে বসিয়া ধর্ম্মকথা কহিতেছেন। ‘সর্ব্বজীবে দয়া’ কথাটি বলিতে বলিতেই তিনি সমাধিস্থ হইয়া পড়িলেন। তারপর বাহুজ্ঞান ফিরিয়া আসিলে আবেশজড়িত কণ্ঠে বলিতে লাগিলেন, “জীবে দয়া—জীবে দয়া? দূর শালা! কীটাণুকীট তুই—জীবে দয়া কি করবি? দয়া করবার তুই কে? না, না, জীবে দয়া নয়—শিবজ্ঞানে সেবা!”

নরেন সকলের সঙ্গে বসিয়া ঠাকুরের অমৃতবাণী শ্রবণ করিতে



ছিলেন। এক মুহূর্তে তাঁহার অন্তর্লোক হইতে একটা পর্দা যেন উঠিয়া গেল। ঠাকুরের প্রজ্ঞানঘন বাণীতে আত্মপ্রকাশ করিল সেবা-ধর্মের মহিমা।

বিবেকানন্দ উত্তরকালে মুম্বন্ধু গুরুভ্রাতাদের কহিয়াছিলেন, “কি অদ্ভুত আলোকই সেদিন ঠাকুরের কথায় দেখিতে পাইলাম! শুদ্ধ, কঠোর ও নিশ্চয় বলিয়া প্রসিদ্ধ বেদান্ত জ্ঞানকে ভক্তির সহিত সম্মিলিত করিয়া কি সহজ, সরস ও মধুর আলোকই তিনি প্রদর্শন করিলেন। অদ্বৈত জ্ঞান লাভ করিতে হইলে, সংসার ও লোকসঙ্গ সর্বতোভাবে বর্জন করিয়া বনে যাইতে হইবে এবং ভক্তি ভালবাসা প্রভৃতি কোমল ভাবসমূহকে হৃদয় হইতে সবলে উৎপাটিত করিয়া চিরকালের মত দূরে নিক্ষেপ করিতে হইবে—এই কথাই এতকাল শুনিয়া আসিয়াছি। কিন্তু ঠাকুর আজ যাহা ভাবাবেশে বলিলেন, তাহাতে বুঝা গেল—বনের বেদান্তকে ঘরে আনা যায়, সংসারের সকল কাজে উহাকে অবলম্বন করিতে পারা যায়। মানব যাহা করিতেছে, সে সকলই করুক তাহাতে ক্ষতি নাই, কেবল প্রাণের সহিত এই কথা সর্বত্র বিশ্বাস ও ধারণা করিলেই হইল—ঈশ্বরই জীব ও জগৎরূপে তাহার সম্মুখে প্রকাশিত রহিয়াছেন। জীবনের প্রতি মুহূর্তে সে যাহাদিগের সম্পর্কে আসিতেছে, যাহাদিগকে ভালবাসিতেছে, যাহাদিগকে শ্রদ্ধা, সম্মান অথবা দয়া করিতেছে, তাহার সকলেই তাঁহার অংশ—তিনি। সংসারের সকল ব্যক্তিকে যদি সে ঐরূপে শিবজ্ঞান করিতে পারে, তাহা হইলে আপনাকে বড় ভাবিয়া তাহাদিগের প্রতি রাগ, দ্বেষ, দন্ত অথবা দয়া করিবার তাহার অবসর কোথায়? ঐরূপে ‘শিবজ্ঞানে জীবের সেবা’ করিতে করিতে চিত্তশুদ্ধ হইয়া সে স্বল্পকালের মধ্যে আপনাকেও চিদানন্দময় ঈশ্বরের অংশ, শুদ্ধবুদ্ধ মুক্ত স্বভাব বলিয়া ধারণা করিতে পারিবে।

“ঠাকুরের ঐ কথায় ভক্তিপথেরও বিশেষ আলোক দেখিতে পাওয়া যায়। সর্বভূতে ঈশ্বরকে যতদিন না দেখিতে পাওয়া যায়,

ততদিন যথার্থ ভক্তি বা পরাভক্তি লাভ সাধকের পক্ষে সুদূরপর্যন্ত থাকে। শিব বা নারায়ণ-জ্ঞানে জীবের সেবা করিলে ঈশ্বরকে সকলের ভিতর দর্শনপূর্বক যথার্থ ভক্তিলাভে ভক্তসাধক স্বল্পকালেই কৃতকার্য হইবে, একথা বলা বাহুল্য। কর্ম বা রাজযোগ অবলম্বনে যে সকল সাধক অগ্রসর হইতেছে তাহারাও ঐ কথায় বিশেষ আলোক পাইবে। কারণ, কর্ম না করিয়া দেহী যখন একদণ্ডও থাকিতে পারে না, তখন ‘শিবজ্ঞানে জীবসেবা’-রূপ কর্মামুষ্ঠানই যে কর্তব্য এবং উহা করিলেই তাহারা আশু লক্ষ্যে পৌঁছাইবে, একথা আর বলিতে হইবে না। যাহা হউক ভগবান যদি কখনো দিন দেন তো আজ যাহা শুনিলাম, এই অদ্বুত সত্য সংসারে সর্বত্র প্রচার করিব,—পণ্ডিত মূর্থ, ধনী দরিদ্র, ব্রাহ্মণ, চণ্ডাল সকলকে সুনাইয়া মোহিত করিব।”

ঠাকুরের কথাগুলি নরেনের জীবনে সেদিন উপস্থিত হয় নূতন দিগ্‌দর্শনরূপে। উত্তরকালে এই দিগ্‌দর্শন তিনি কাজে লাগাইয়া ছিলেন।

ভক্ত শিষ্যদের ঠাকুর প্রধানতঃ ভক্তি-শাস্ত্র পড়িতে বলিতেন। কিন্তু নরেনের জ্ঞান অগ্নি ব্যবস্থা। জানিতেন, নরেন উত্তরকালে চিহ্নিত হইবেন এক বিশ্বখ্যাত আচার্য্যরূপে, বিশ্বজনীন অদ্বৈতবাদের ব্যাখ্যাতা রূপে। তাই অদ্বৈতভাবের উদ্দীপক শাস্ত্রাদি যখন নরেন পড়িতে বসিতেন, ঠাকুর বরং আনন্দিতই হইতেন। নরেনকে এ সময়ে প্রায়ই উপনিষদ, ব্রহ্মসূত্র, যোগবাশিষ্ঠ প্রভৃতি গভীরভাবে অধ্যয়ন করিতে দেখা যাইত।

সহজাত জ্ঞান-বৈরাগ্যের অধিকারী ছিলেন নরেন, কিন্তু তাঁহার সত্তার গভীরে লুকানো ছিল প্রেমভক্তির এক বিপুল উৎস। ঠাকুর তাই বলিতেন, “এ রকম চোখ কি শুদ্ধজ্ঞানীর কখনো থাকে রে ?

জ্ঞানের সঙ্গে ভক্তির ভাবও যে তোর ভেতরে বয়ে যাচ্ছে।” বাহিরে জ্ঞানমার্গী হইলে কি হয়, ঠাকুর যখন কীর্তনানন্দে মাতিতেন, দেখা যাইত—নরেনও সকলের সঙ্গে হাত ধরাধরি করিয়া ভাবাবেগে নৃত্য শুরু করিয়া দিয়াছেন।

রামকৃষ্ণ জানিতেন, নরেন নিত্যসিদ্ধ, মুক্তপুরুষ, সর্ব মায়ামোহের উর্দ্ধে সে অবস্থিত। তাই কেবলি তাঁহার ভয় হইত—মায়ার প্রভাব নরেনের উপর কিছুটা না থাকিলে ঐশী নির্দিষ্ট কর্ম তো সে সম্পন্ন করিতে পারিবে না। নিজের স্বরূপ চিনিতে পারিয়া যে কোন মুহূর্তে দেহটি ছাড়িয়া দিবে, চলিয়া যাইবে স্বস্থানে। সজল নয়নে ঠাকুর তাই জগজ্জননীর কাছে প্রার্থনা জানান, “মাগো, ওর ভেতর তুই একটুখানি মায়া প্রবেশ করিয়ে দে, নতুবা কোন কাজই তো করতে পারবে না।”

১৮৮৩ খৃষ্টাব্দে নরেন ও অন্যান্য ভক্তদের জীবনে আসে চরম দুর্দৈব। ঠাকুর শ্রীরামকৃষ্ণের গলায় ছুরারোগ্য ক্যান্সার রোগের আক্রমণ ঘটে। চিকিৎসার জন্ত তাঁহাকে কিছুদিন কলিকাতায় রাখা হয়, তারপর নিয়া যাওয়া হয় কাশীপুরের বাগানে।

ঠাকুরের সেবা গুণ্ণা ও সান্নিধ্যকে কেন্দ্র করিয়াই এই সময়ে ভক্তমণ্ডলীর পরম প্রস্তুতিটি গড়িয়া উঠিতে থাকে। তরুণ সাধকদল নরেনের নেতৃত্বে ঠাকুরের সেবায় একাগ্রভাবে আত্মনিয়োগ করেন। আর গুরুর অধ্যাত্ম-শক্তি ধীরে ধীরে তাঁহাদের ভিতরে প্রবিষ্ট হইতে থাকে। বীজাকারে রামকৃষ্ণ মণ্ডলীর সূচনা এইখানে।

যুবক ভক্তেরা পালাক্রমে ঠাকুরের সেবা করেন আর অবসর পাইলেই জপ, ধ্যান ও কীর্তনে নিবিষ্ট হইয়া থাকেন। নরেন এই সময়ে ঈশ্বর লাভের জন্ত একান্ত ব্যাকুল। পরমহংসদেবের অমুমতি নিয়া এ সময়ে পঞ্চবটীতলে প্রায়ই তিনি সাধন করিতেন।

বিশ্ববৃক্ষতলে রাতের পর রাত ধুনি জ্বালানো থাকিত। আর নরেন উহার সম্মুখে নয়ন নিম্নীলিত করিয়া থাকিতেন গভীর ধ্যানে নিমগ্ন। এ সময়ে ধ্যান করিতে করিতে তিনি প্রায়ই দর্শন করিতেন একটা ত্রিকোণাকৃতি জ্যোতি। ঠাকুরকে এই দর্শন সম্পর্কে প্রশ্ন করিলে সংক্ষেপে উত্তর দেন, “ওরে, শুটা ব্রহ্মযোনী।”

এক একদিন নরেনের ধুনির ধারে অতীন্দ্রিয় রাজ্যের অপূর্ব দর্শন সব ঘটতে থাকে। চিন্ময়লোকের দেবদেবীরা অনেকে সেখানে আবির্ভূত হন। এই সময়কার সাধনকালে সাধক নরেনের প্রাণে বিরাজিত ছিল অপূর্ব শাস্তি ও স্থৈর্য। শক্তির প্রকাশও মাঝে মাঝে দেখা যাইত।

একদিন কালী তপস্বী (স্বামী অভেদানন্দ) ও তিনি পাশাপাশি বসিয়া ধ্যান করিতেছেন। হঠাৎ নরেনের ইচ্ছা হইল, কালীকে তিনি স্পর্শ করিবেন। এ ইচ্ছা কার্যে পরিণত করার সঙ্গে সঙ্গে ঘটিল এক চাক্ষু্যকর কাণ্ড। স্পর্শ করা মাত্রই গুরুভ্রাতার দেহে বৈজ্ঞানিক তেজের মত এক শক্তি সঞ্চারিত হইয়া গেল, বাহ্যজ্ঞান হারাইয়া দিবা চেতনায় তিনি আচ্ছন্ন হইয়া পড়িলেন।

সদা সজাগ দৃষ্টি রামকৃষ্ণ তৎক্ষণাৎ নরেন্দ্রনাথকে ডাকাইলেন। তাঁহাকে সতর্ক করার জন্য সহাস্রে কহিলেন,—“কি কচ্ছিস্ রে! এ যে দেখছি, না জমাতেই খরচ?”

কাণীপুরে ও দক্ষিণেশ্বরের পঞ্চবটীতে নরেনের সাধন চলিয়াছে। ধীরে ধীরে তিনি ধ্যানলোকের গভীর স্তরে ডুবিয়া যাইতেছেন। এক এক দিন বিচিত্র অমুভূতি ও অপ্রাকৃত দর্শনাদিও হইতেছে। ধ্যানাবস্থার পর একদিন দেখিলেন, তাঁহারই এক অবিকল প্রতিমূর্তি চিন্ময় দেহে সম্মুখে আবির্ভূত। এই অপ্রাকৃত মূর্তি প্রায়ই বহুক্ষণ ধরিয়া তাঁহার সম্মুখে অবস্থান করিত। তাঁহারই হাবভাব ও কথা-বার্তা অনুকরণ করিয়া যাইত। রামকৃষ্ণ ইহা শুনিলেন। নরেনকে আশ্বস্ত করিয়া বলিলেন, “এতো ধ্যানের উচ্চাবস্থার লক্ষণ রে।”

এই সময়ে একদিন নরেনের মন গোঁতম বুদ্ধের তপস্বাক্ষেত্র, বুদ্ধগয়া দর্শনের জন্তু ব্যাকুল হইয়া উঠে। স্থির করেন, সেখানে গিয়া কয়েকদিন সাধনা করিবেন। গুরুতাই তারক ও কালী সহ তিনি হঠাৎ একদিন দক্ষিণেশ্বর ত্যাগ করিলেন, কাহাকেও কিছু বলিয়াও গেলেন না। ব্যস্ত হইয়া সকলে ঠাকুরকে এ সংবাদ জানাইলেন। শ্রিতহাশ্বে তিনি উত্তর দিলেন, “তোরা ভাবিস নি, নরেন কোথাও যাবে না, তাকে এখানে আসতেই হবে।—এদিক ওদিক এখন যাচ্ছে বটে, কিন্তু এখানে যে রস পেয়েছে সে রস ছেড়ে যাবে কোথায়?”

বুদ্ধগয়ার পবিত্র পরিবেশে ধ্যান করার সময় নরেন এক দিব্য অমুভূতি লাভ করেন। কিন্তু তৎসঙ্গেও মন সেখানে টিকে নাই। অল্প কিছুদিন পরেই পরমহংসদেবের জন্তু ব্যাকুল হইয়া নবীন সাধকেরা দক্ষিণেশ্বরে ফিরিয়া আসেন।

ঠাকুরের ভক্ত বুড়োগোপাল নানা তীর্থ দর্শন করিয়া কাশীপুরে প্রত্যাবর্তন করিয়াছেন। তাঁহার অভিলাষ এই উপলক্ষে সাধুদ্বিগকে ভোজন করান ও কিছু দান করেন। রামকৃষ্ণের কাছে এ ইচ্ছা ব্যক্ত করিলে বলিয়া উঠিলেন, “কোথায় আর সাধু খুঁজে খুঁজে বেড়াবি, বলতো? এই সব ছেলেদের খাইয়ে দে। তাতেই তোর কাজ হবে।”

নির্দেশ মত ব্যবস্থাদি করা হইল। প্রত্যেক তরুণ ভক্তকে এই উপলক্ষে ঠাকুর নিজ হাতে একটি করিয়া গৈরিক বস্ত্র, বহির্কাস, মালা ও কমণ্ডলু দান করিলেন। আনুষ্ঠানিক কৃত্যে ঠাকুর সেদিন যান নাই, কিন্তু এই গৈরিক দানের মধ্য দিয়া প্রচ্ছন্নভাবে সূচনা করিলেন তাঁহার গৈরিকধারী সাধক-বাহিনীর।

সমাধির গভীরে ডুব দিবার জন্তু নরেন এবার ব্যাকুল হইয়া

উঠিয়াছেন। নিষিকল্প সমাধির জন্ত বার বার ঠাকুরকে এসময়ে তিনি ধরিয়া বসেন, উদ্ভাস্ত করিতে থাকেন।

পরমহংসদেব একদিন আশ্বাস দিলেন, “ওরে আমি ভাল হয়ে উঠলে, তুই যা চাইবি তাই দেব।”

নরেন্দ্রনাথ তখন পরম প্রাপ্তির আগ্রহে অধীর চঞ্চল। অবুঝ বালকের মত বলিয়া বসেন, “কিন্তু, আপনি যদি আর ভাল না হন, তবে আমার দশা কি হবে?”

অক্ষুটস্থরে ঠাকুর মন্তব্য করেন, “শালা বলে কি?”

দেহী বা বিদেহী যে কোন অবস্থায়ই থাকুন, ঠাকুর তাঁহার আশ্বাসবাণীকে রূপায়িত করিবেন। এই সহজ প্রত্যয় থাকাই তো নরেনের পক্ষে স্বাভাবিক! নরেনের কথায় ইহার ব্যতিক্রম দেখা গেল। ঠাকুর বুঝিলেন, শিষ্যের ব্যগ্রতা সীমা ছাড়াইয়া যাইতে বসিয়াছে। ধীর প্রশান্তকণ্ঠে জিজ্ঞাসা করিলেন, “আচ্ছা, ঠিক করে বল দেখি তুই কি চাস?”

নরেন্দ্রনাথ এবার সোৎসাহে বলিয়া উঠিলেন, “আমার ইচ্ছা হয়, শুকদেবের মত একেবারে পাঁচ ছয় দিন সমাধিতে ডুবে থাকি। তারপর শুধু শরীর রক্ষার জন্ত খানিকটা নীচে নেমে এসে আবার সমাধিতে চলে যাই।”

রামকৃষ্ণ এইবার উত্তেজিত হইয়া উঠিয়া বসেন। তিরস্কারের সুরে নরেনকে বলেন, “ছি! ছি! তুই এত বড় আধার তোর মুখে এই কথা? আমি ভেবেছিলুম, বটগাছের মত হবি, তোর ছায়ায় হাজার হাজার লোক আশ্রয় পাবে, তা না হয়ে তুই কিনা নিজের মুক্তি চাস! এতো তুচ্ছ কথা, অতি হীন কথা রে! না না অত ছোট নজর করিস্নি। আমি বাপু সব ভালবাসি—মাছ খাবো তো ভাজাও খাবো, সিদ্ধও খাবো, ঝোল অম্বলও খাবো। তাঁকে সমাধি অবস্থায় নিগুণভাবে উপলব্ধি করি, আবার নানা

র ভেতর ঐহিক সম্বন্ধের বোধেও ভোগ করি। একঘেয়ে

ভাল লাগে না---তুইও তাই কর। একাধারে জ্ঞানী আর ভক্ত তুই-ই হ।”

কিন্তু এই তিরস্কারের কয়েক দিন পরে পুরস্কারের ব্যবস্থাও ঠাকুর করিয়াছিলেন। নরেন এক রাত্রিতে কাশীপুরের নিভৃত কক্ষে বসিয়া ধ্যানমগ্ন। সঙ্গে অপর এক বয়স্ক ভক্তও সাধন নিরত—ইহাকে নরেন গোপালদা বলিয়া ডাকেন। নিবিড় ধ্যানে আবিষ্ট নরেন হঠাৎ এক সময় চাৎকার করিয়া বলিতে থাকেন, “গোপালদা, ও গোপালদা! আমার শরীর কোথায় গেল?”

গোপালদা বার বার তাঁহার অঙ্গে করাঘাত করিতেছেন, কিন্তু দেহে চেতনার কোন লক্ষণই নাই। ক্রমে অন্য গুরুভাতারাও সেখানে উপস্থিত হইলেন।

এই সংবাদটি শুনার পর পরমহংসদেবের সংক্ষিপ্ত মন্তব্য হইল, “বেশ হয়েছে, থাক্ খানিকক্ষণ ঐরকম হয়ে। ওরই জন্ম যে আমায় জ্বালাতন করে তুলেছিল।”

গভীর রাত্রে বাহুজ্ঞান ফিরিয়া আসে, নরেন ধীরপদে ঠাকুরের শয্যাপাশে গিয়া উপস্থিত হন। ঠাকুর বলেন, “কেমন, মা তো আজ তোকে সব দেখিয়ে দিলেন। চাবি কিন্তু আমার হাতে রইল। এখন তোকে কাজ করতে হবে—যখন আমার এই কাজ শেষ হয়ে যাবে তখন আবার চাবি খুলবো।”

নরেন নির্নিমেষে দিব্যালোকের এই ঐন্দ্রজালিকের দিকে চাহিয়া রহিলেন। তারপর অসীম শ্রদ্ধায় শক্তিদর গুরুর চরণে নিবেদন করিলেন তাঁহার প্রণতি ও আত্মসমর্পণ।

উত্তরকালে বিবেকানন্দ বলিয়াছিলেন, “সেদিন দেহাদি বুদ্ধি একেবারে তিরোহিত হয়েছিল। প্রায় লয় হয়ে গিয়েছিলুম আর কি। একটু ‘অহং’ ছিল, তাই সেই সমাধি থেকে ফিরেছিলুম। একরূপ সমাধিকালেই ‘আমি’ আর ব্রহ্মের ভেদ চলে যায়—সব এক

হয়ে যায়। যেন মহাসমুদ্রে জল, জল ছাড়া আর কিছুই নেই। ভাব আর ভাষা সব ফুরিয়ে যায়।”

সমাধি হইতে বাখানের পর সেদিন নরেনের মনে হইতেছিল — যেন মস্তক ব্যতীত তাঁহার দেহের আর সমস্ত কিছুই অস্তিত্ব অবলুপ্ত হইয়া গিয়াছে।

তারপরই অর্দ্ধবাহ্য অবস্থা আসার সঙ্গে সঙ্গে পার্শ্বে উপবিষ্ট গোপালদাকে ব্যাকুল কণ্ঠে ডাকিয়া উঠিয়াছিলেন।

আর একদিনের কথা। গিরিশ ঘোষের সহিত নরেন এক বৃক্ষতলে ধ্যানে বসিয়াছেন। মশার দংশনে গিরিশচন্দ্র ভোঁ অতিষ্ঠ। খানিক বাদেই তিনি আসন ত্যাগ করিলেন। ততক্ষণে নরেন্দ্রনাথ ধ্যানের গভীরে ডুবিয়া গিয়াছেন। শরীরে এত মশা বসিয়াছে যে মনে হয়, দেহখানি কালো কবলে আবৃত। গিরিশ উচ্চ স্বরে নরেনকে ডাকিতে থাকেন, কিন্তু তাঁহার দেহে চেতনার কোনই লক্ষণ নাই। অবশেষে আসন ধরিয়া তাঁহাকে টানিয়া ফেলা হইল। দেখা গেল, দেহ একেবারে বাহ্যজ্ঞানহীন— মৃতবৎ কঠিন। বহুক্ষণ পরে সেদিন নরেনের জ্ঞান সঞ্চার হয়।

সাধন ভজন ও ধ্যানের মধ্য দিয়া নরেন গুরুকৃপার বহুতর নিদর্শন পাইতেছেন। দিব্য আনন্দে হইতেছেন ভরপুর। এই সঙ্গে মনে জাগিতেছে প্রবল আশঙ্কা। পরম কারুণিক শ্রীরামকৃষ্ণ যে আর বেশীদিন এই মরদেহে থাকিবেন না, এই হৃশিক্ষতা এবার তাঁহাকে পাইয়া বসে।

একদিন মনে এক দৃঢ় সংকল্প করিলেন। কালরোগের কবল হইতে শ্রীরামকৃষ্ণকে উদ্ধার করিতে পারে এমন এক ঐশী শক্তির আবাহন তিনি করিতে চান। সেদিন সন্ধ্যার পর হইতে সমস্ত রাত্রি তিনি উন্মাদের মত ‘রাম’ নাম উচ্চারণ করিতে করিতে



বাগানের চারিদিক প্রদক্ষিণ করিতে থাকেন। তাঁহার বাহুজ্ঞান তখন তিরোহিতপ্রায়।

উন্মত্ত অধীর নরেনের ‘রাম রাম’ শব্দ ক্রমশঃ উচ্চতর হইতেছে। গভীর রাতে ঠাকুরের কানে পশিল এই নামের ধ্বনি। তাঁহার আদেশে অর্দ্ধবাহু অবস্থায় নরেনকে ধরিয়া আনা হইল। স্নেহমধুর কণ্ঠে পরমহংসদেব কহিলেন, “ওরে, কেন তুই এসব করে এত কষ্ট পাচ্ছিস? তোর মত এমন উন্মত্ত যে আমি বারো বছর ছিলাম! এক রাত্তিরে তুই আর কতটা করবি, বাপু?”

ঠাকুরের দিব্য সান্নিধ্য ও প্রশান্ত মুখচ্ছবি নরেনের হৃদয়ে সাস্তুনার স্নেহ-প্রলেপ বুলাইয়া দেয়, তিনি শান্ত হন।

দেহত্যাগের কিছুদিন পূর্ব হইতে প্রতি সন্ধ্যায় রামকৃষ্ণ নরেনের সাহিত নিভৃত সাক্ষাৎ করিতেন। গুরু-শিষ্যের এই মিলন ছিল বড় রহস্যময়। অপর ভক্তগণ তখন ঠাকুরের নির্দেশে কক্ষ হইতে বাহির হইয়া যাইতেন, আর রুদ্ধদ্বার কক্ষে ঠাকুর ও নরেন্দ্রনাথ দুই তিন ঘণ্টা কাল নিমজ্জিত থাকিতেন অধ্যাত্ম-চেতনার গভীরে।

শেষের দিনটি আসন্ন। ঠাকুর সেদিন নরেনকে আহ্বান করিয়া সম্মুখে বসাইয়াছেন। নিষ্পলক দৃষ্টিটি নরেনের দিকে স্থির নিবদ্ধ। ধীরে ধীরে ঠাকুর সমাধিস্থ হইয়া পড়িলেন। নরেনের সত্তার গভীরে চলিয়াছে অবিরাম মন্তন। উপলব্ধি করিতেছেন—শ্রীরামকৃষ্ণের শরীর হইতে তড়িৎ কম্পনের মত একটা সূক্ষ্ম তেজ-রশ্মি তাহার দেহের ভিতরে সঞ্চালিত হইতেছে।

নরেন ক্রমে বাহুজ্ঞানশূন্য হইয়া পড়েন। চৈতন্য লাভের পর তিনি দেখেন, নীরবে উপবিষ্ট ঠাকুরের চোখে অশ্রুধারা।

“একি রহস্য, কিছুই যে আমি বুঝতে পারছি নে।” প্রশ্ন করেন নরেন্দ্রনাথ।

ঠাকুর ধীর কণ্ঠে কহেন, “ওরে, আজ যথাসর্বশ্ব তোকে দিয়ে

ফকির হলাম। তুই এই শক্তিতে জগতের অনেক কাজ করবি। কাজ শেষ হলে তারপর ফিরে যাবি।”

নবেনের দুই চোখও অশ্রু ছলছল হইয়া উঠিয়াছে। জীবন-প্রভুর দিকে তাকাইয়া অসহায় বালকের মত তিনি কাঁদিতে লাগিলেন।

ঠাকুরের মরলীলা সংবরণের দুইদিন পূর্ব্বেকার কথা। ঠাকুর সেদিন ব্যগ্রভাবে নরেনকে নিজের কক্ষে আহ্বান করিলেন। কহিলেন, “দাখ্ নরেন, তোর হাতে আমি এদের সবাইকে দিয়ে যাচ্ছি। তুই সবার চাইতে বুদ্ধিমান, শক্তিধর। এদের ভালবাসা দিয়ে বেঁধে রাখবি। যাতে এরা ঘরে ফিরে না গিয়ে সাধনভজন নিয়ে পড়ে থাকে, তার ব্যবস্থা কিন্তু তাকেই করতে হবে।”

নরেন্দ্রনাথ নত মস্তকে স্তব্ধ হইয়া ঠাকুরের নিকটে বসিয়া আছেন। বুলিলেন, ঠাকুরের দেহত্যাগের দিনটি প্রায় সমাগত। যে ঐশী কর্মের আভাস ঠাকুর মাঝে মাঝে তাঁহাকে দিতেন, আজ কি তাহাই করিলেন স্পষ্টতর? অনেক কিছুই দায়িত্বভার কি তাঁহাকে দিয়া গেলেন? নরেনের মনে পড়ে, কিছুদিন আগেকার কথা। ঠাকুরের সামনে বসিয়া ডাঃ মহেন্দ্রলাল সরকার নরেনের প্রশংসা করিতেছিলেন। ইহার উত্তরে শ্রীরামকৃষ্ণ সোৎসাহে বলিয়া উঠেন, “ওগো, কথায় বলে অষ্টদ্বৈতের ছন্দারেই গৌর নদীয়ায় এসেছিলেন—সেই রকম নরেনের জগ্গেই তো সব গো। ওর জগ্গেই এবার আমার আসা।”

ঠাকুর শুইয়া আছেন। দর্শনার্থী ও ভক্তেরা মাঝে মাঝে তাঁহার কক্ষে আসা-যাওয়া করিতেছে। হঠাৎ ঠাকুরের কি খেয়াল হইল, এক টুকরা কাগজ চাহিয়া নিয়া ধীরে ধীরে লিখিলেন—“নরেন লোকশিক্ষা দিবে।”

আধ্যাত্মিক মণ্ডলীর নায়করূপে প্রিয়তম শিষ্যকে তিনি নির্বাচন করিয়া রাখিয়া গেলেন, ভক্তদের মধ্যে এ তথ্যটিই কি তিনি সেদিন

জানাইয়া দিলেন ? কিন্তু নরেনের অন্তরের সম্মতি ইহাতে মিলিতেছে কই ? তিনি বলিয়া উঠেন, “আমি কিন্তু ওসব পারবো না।”

দৃঢ়কণ্ঠে রামকৃষ্ণের আদেশ উচ্চারিত হইল, “তোকে কণ্ঠেই হবে, তোর ঘাড় করবে।”

১৮৮৬ খৃষ্টাব্দের ১৬ই আগস্ট। ঠাকুরের মহাপ্রয়াণের দিন। ভক্তদল চরম মুহূর্তটির কথা চিন্তা করিয়া মুহমান। এই সঙ্কটে নরেন বিষাদখিন্ন হৃদয়ে চুপচাপ বসিয়া আছেন। হঠাৎ মাথায় বিদ্যাত্মক মত খেলিয়া গেল একটা বড় প্রশ্ন। ঠাকুর তাঁহার ভগবৎ-সত্তা সম্বন্ধে নানা ধরণের ইঙ্গিত এযাবৎ জানাইয়াছেন। কিন্তু মরলীলা অবসানের পূর্ব মুহূর্তে তাঁহার প্রকৃত স্বরূপটি কি স্পষ্টরূপে জানাইয়া যাইবেন না ? এই ভক্তদল যাঁহার সহিত নিবিড় যোগসূত্রে আবদ্ধ, শেষের দিনে সেই দেবমানবের পরিচয় তাঁহারই শ্রীমুখে ধ্বনিত হইয়া উঠুক, ইহাই নরেনের অন্তরের আকুল প্রার্থনা।

সর্ব্বজন সঙ্গুরু সমস্তই বুঝিয়াছেন। রোগযন্ত্রণা বিস্মৃত হইয়া তিনি নরেনের দিকে মুখ ফিরাইলেন। অল্পক্ষণ, তীক্ষ্ণ কণ্ঠে কহিলেন, “ওরে এখনও তোর জ্ঞান হলো না ? সত্যি সত্যি বলছি, যে রাম যে কৃষ্ণ, সে-ই ইদানীং এ শরীরে রামকৃষ্ণ—তবে তোর বেদান্তের দিক দিয়ে নয়।”

নরেন তো বিস্ময়ে একেবারে হতবাক। ভাবাবেগে তাঁহার নয়ন দুটি অশ্রুসজল হইয়া আসিল।

ঠাকুর রামকৃষ্ণের মুখোচ্চারিত এই কথা কয়টিই উত্তরকালের মহান আচার্য্য, স্বামী বিবেকানন্দকে জোগায় দিব্য প্রেরণা, উদ্ভুদ্ধ করে তাঁহাকে বিশ্বব্যাপী কর্ত্ত্বসাধনায়।

ঠাকুর চলিয়া গিয়াছেন। শিষ্যদের তাপিত হৃদয় তখন শুধু মরু প্রান্তরের মত খাঁ খাঁ করিতেছে। জীবনের পরমাত্মীয় দূরে সরিয়া

গিয়াছে ; আশা, আনন্দ ও উৎসাহের লেশমাত্র কাহারো জীবনে অবশিষ্ট নাই ।

নরেন ও তাঁহার এক গুরুতাই সেদিন শোকাকুল হৃদয়ে কাশীপুরের বাগানে ঘুরিয়া বেড়াইতেছেন । হৃদয়ে তাঁহাদের প্রচণ্ড শূন্যতা । ভাবিতেছেন, ঠাকুর মরদেহ ত্যাগ করিয়া তাঁহাদের এ কোন্ নিরালস্য অবস্থায় রাখিয়া গেলেন ? এমন সময় অদূরে ভাসিয়া উঠে এক অভাবনীয় দৃশ্য ? নরেন দেখেন, গুরুদেবের দিব্যদেহ অদূরে দণ্ডায়মান । সর্ব্বশরীর তাঁহার অব্যক্ত আনন্দে শিহরিয়া উঠে । তবে কি মহাপ্রয়াণের পরেও ঠাকুর তাঁহার ভক্তদের উপর পূর্ববৎ কৃপাদৃষ্টি রাখিতেছেন ! চিন্ময় দেহে আবির্ভূত হইয়া দিতেছেন পরম আশ্বাস !

হৃদয়ের চঞ্চল্য দমন করিয়া নরেন মৌন হইয়া আছেন । মনে আশঙ্কাও কম নাই । ওই অলৌকিক দর্শন তাঁহার নিজের দুর্বল মনের ভ্রান্তি নয় তো ?

সর্ব্ব সন্দেহের নিরসন করিয়া সঙ্গীয় গুরুতাই এবার চীৎকার করিয়া উঠেন, “নরেন, ঐ ছাখো, ঐ ছাখো ।”

জ্যোতির্ম্ময় দেহে ঠাকুরের এই আবির্ভাব ! অধ্যাত্ম-সন্তানদের এ আবির্ভাবের মধ্য দিয়া বুঝাইয়া দিলেন—শিষ্যেরা যেমন আছেন, তেমনি আছেন তাঁহাদের সদগুরু । আনন্দে অধীর হইয়া উচ্চকণ্ঠে তাঁহারা অপর গুরুভাইদের ডাকিতে লাগিলেন । ঠাকুরের অলৌকিক ততক্ষণে অন্তর্হিত হইয়া গিয়াছে !

শ্রীরামকৃষ্ণের তিরোধানের পর কাশীপুরের বাগান ছাড়িয়া দেওয়া হইয়াছে । কিন্তু এবার তরুণ সন্ন্যাসীদের মাথা গুঁজিবার ঠাই হইবে কোথায় ?

ঠাকুরের পরমভক্ত সুরেন মিত্র এ হুঃসময়ে আগাইয়া আসেন ।

কহেন, “একটা বাড়ী ভাড়া করে একত্রে থাকো, ঠাকুরের স্মৃতি বৃকে নিয়ে সাধনভজন করো। এর মাসিক ভাড়া আমি চালিয়ে যাবো।” নরেন প্রভৃতি যুবক-ভক্তেরা হাঁক ছাড়িয়া বাঁচেন।

বরাহনগরে গঙ্গার ধারে যৎসামান্য ভাড়ায় একটি বাড়ী নেওয়া হয়। জঙ্গলাকীর্ণ বাড়ীটি পুরাতন এবং দীর্ঘদিন মনুষ্য পরিত্যক্ত। ইহাই বরাহনগরের মঠ।

এইবার নরেন্দ্রনাথের নেতৃত্বের পালা। ভক্তদের কেহ কেহ তখন পরীক্ষার পড়া তৈরীর জন্য স্বগৃহে বাস করিতেছিলেন। নরেন এক একদিন ঝড়ের মত তাঁহাদের উপর নিপতিত হন, তেজোদৃশ্য কণ্ঠ বলেন, “তোরা এই অমূল্য জীবনটা কি একজামিন দিয়েই কাটাবি, ঠিক করেছিস? এই কি ঠাকুরের উপদেশ পালন করা? এ জন্মই তিনি জগতে এসে এত কষ্ট করে গেলেন? তোরা সন্ন্যাসা, ত্যাগমন্ত্রে দীক্ষিত—তবু একজামিন পাস করে সংসারের উন্নতি কামনা করিস? ত্যাগ আর ভোগ-বাসনা কি এক সঙ্গে থাকতে পারে? ধিক্ ধিক্ তোদের! শিগগীর ও সব ছেড়ে-ছুঁড়ে দিয়ে মঠে চল।”

নরেনের সাহস, প্রেরণা ও বৈরাগ্যের আহ্বান তরুণদলকে প্রভাবিত করে। একে একে তাহারা মঠে যোগ দিতে থাকেন। ইতস্ততঃ বিক্ষিপ্ত এই ভক্তদল নিয়া যে নবগঠিত সঙ্ঘ আত্মপ্রকাশ করিল, নরেন হইলেন তাহার অধিনায়ক।

এই গুরুভ্রাতাগণ অতি সহজেই নরেনের হাতে আত্মসমর্পণ করিতে পারিয়াছিল। কারণ, তাহারা মনেপ্রাণে বিশ্বাস করিত—নরেন ঠাকুরেরই প্রতিনিধি, তাহার নেতৃত্ব মানিয়া চলা, তাহাকে আনুগত্য দেওয়া মানেই ঠাকুরের সন্তুষ্টি বিধান করা।

ঈশ্বর দর্শনের জন্য ব্যাকুল ভক্তদল এবার ঘর ছাড়িয়া বাহির হইয়াছেন। একান্ত নিষ্ঠায়, হৃৎচর সাধন-পথ অতিক্রম করিতে তাহারা কৃতসঙ্কল্প। এই পথের কোন বাধা কোন হৃৎখদনই তাহারা আমল দিতে চায় না।

বিবেকানন্দ উত্তরকালে বলিতেন, “বরাহনগরে এমন কত দিন গিয়েছে যে খাবার কিছুই নেই। ভাত জোটে তো হুন্, জোটে না। দিন কয়েক হয়তো হুন্-ভাত চললো, কিন্তু কাঠারও গ্রাহ্য নাই। জপ-ধ্যানের প্রবল তোড়ে তখন আমরা ভাসছি। কখন কখন শুধু তেলাকুচো পাতাসিদ্ধ ও হুন্-ভাত—এই মাসাবধি চলছে। আতা, সেসব কি দিনই গেছে। সে দিনের কঠোরতা দেখলে ভূত পালিয়ে যেত।”

কোপীন-সম্মল এই ভক্তদের একযোগে ঘবের বাহিরে যাইবারও উপায় ছিল না। দেওয়ালে একখানা মাত্র কাপড় টাঙানো থাকিত, যে যখন মঠবাড়ীর বাহিরে যাইত, এই কাপড়খানিই থাকিত তাহার কোমবে জড়ানো।

এই চবম অবস্থার মধ্যেই কিন্তু তাঁহাদের ধর্মালোচনার বা দর্শনের কটাক্ষের বিবাম ছিল না। কাঠার সাধনায় বাহির পর রাত্রি আতবাহিত হইয়া যাইত। তপস্রার অগ্নিতে প্রদাপ্ত এক এক জনের চক্ষু হইতে যেন অগ্নি বসিত হইত। মঠে দেখা করিতে গিয়া ঈশ্ববোন্মাদ এই তরুণদল ও তাঁহাদের দলপতিকে দেখিয়া সকলের বিস্ময়ের সীমা থাকিত না।

এই সময়ে এক একদিন রামকৃষ্ণের স্মৃতিতে দৈদীপিত হইয়া নরেন কহিতেন, “সত্যাব প্রচার কার্যে অনেকটী বাস্ত হয় কিন্তু তারা না জেনেই তা করে। আমি সেটা জেনে -তারপর করবো।”

ইহার অব্যবহিত পরেই নরেনের জীবনে দেখা যায় এক নূতন অধ্যায়ের সূত্রপাত। সারা ভারত পর্যটন ও তীর্থ পরিক্রমার তীব্র আকাজকা তাঁহাকে পাইয়া বসে। পরিধানে গৈরিকবাস, হস্তে দণ্ড কমণ্ডলু দিব্যকাণ্ডি সন্ন্যাসী সেদিন মঠের বাহির হইয়া পড়েন।

কখনো ‘নারায়ণ হরি’ বলিয়া গৃহস্থদের দ্বারে ভিক্ষার জন্ত দাঁড়ান, কখনো বা করেন আকাশবৃষ্টি। অভিজ্ঞতা ও অমূল্যত্বের বৈচিত্র্যে এই পরিব্রাজন ভরপুর হইয়া উঠে।

সে-বার নরেন্দ্রনাথ বৃন্দাবনের পথে চলিয়াছেন। ক্ষুৎপিপাসা ও পরিশ্রমে দেহ অবসন্ন। পথপার্শ্বে বসিয়া এক দরিদ্র, নীচ জাতীয় ব্যক্তি ধূমপান করিতেছে। নরেন তাহার নিকট কলিকাটি চাহিলে সে ব্যস্তসমস্ত হইয়া বলিল, “মহারাজ, মায় ভাঙ্গী হুঁ।”

উত্তর শুনিয়া সন্ন্যাসীর নিরন্ত হন, কিন্তু কিছুদূর গিয়াই তাবিত্তে থাকেন, ‘নাঃ এতো ঠিক নয়। ঠাকুরের এত আশীর্বাদ, অদ্বৈত-বাদেব এত বিচার-বিশ্লেষণ - ইহার পরও দেখছি আমার ভেদজ্ঞান তিরোহিত হয় নি? জাতিভেদেব সংস্কার যে মনের অন্তস্তলে আজও তেমনি উদগ্ৰ হয়ে আছে।’ তৎক্ষণাৎ তিনি ফিরিয়া আসেন। সেই মেথরের হাত হইতে কলিকাটি টানিয়া নিয়া ধূমপান করেন। তারপর তাহার হৃদয় শান্ত হয়।

স্বামীজী বৃন্দাবনে আসিয়াছেন। রাধাকৃষ্ণের ভীরে কৌপীনটি রাখিয়া উলঙ্গ হইয়া তিনি স্নানে নামিলেন। জল হইতে উঠিয়া দেখেন, একটি বানর এটি টানিয়া নিয়া দূরে পলাইয়া গেল। বহু চেষ্টার পর ইহা পুনরুদ্ধার করা গেল বটে, কিন্তু তখন কৌপীনটি একেবারে ছিন্নভিন্ন। লজ্জা নিবারণের কোনই উপায় নাই। বড় অভিমান জাগে এবার স্বামীজীর মনে। কুণ্ডেশ্বরী রাধা-রাণীর নিকট সঙ্কল্প জানান, লোকালয়ে আর না আসিয়া বনাঞ্চলেই তিনি বাস করিবেন। দেখা যাক তাহার জন্ত কোন সুব্যবস্থা হয় কিনা।

অরণ্যে প্রবেশ করা মাত্র ঘটে এক অদ্ভুত কাণ্ড। স্বামীজী দেখেন—এক ব্যক্তি তাঁহাকে পিছন দিক হইতে ডাকিতেছে, ছুটিয়া আসিতেছে দ্রুতবেগে। উলঙ্গ স্বামীজীও ধাবিত হইয়াছেন সম্মুখের দিকে। কিছুক্ষণ পরে কোনক্রমে নিকটস্থ হইয়া হাঁপাইতে হাঁপাইতে

লোকটি নিবেদন করিল, “মহারাজ, এই বনের পাশেই আমার ঘর। কৃপা করে আপনি সেখানে পদার্পণ ককন, আপনাকে নববস্ত্র ও ভোজ্য নিবেদন করে আমরা কৃতার্থ হই।”

বলা বাহুল্য স্বামীজী সানন্দে স্বীকৃত হইলেন, ভোজন ও নববস্ত্র পরিধানের পর বাহির হইলেন লোকালয়ে।

আর একবার গাজীপুরের অপর পারে তিনি এক স্টেশনে বসিয়া আছেন। পথশ্রমে ও ক্ষুধাতৃষ্ণায় বড় কাতর, দেহভাব আর যেন বহিতে পারিতেছেন না। নিকটস্থ বৃক্ষছায়ায় বসিয়া এক শেঠজী সোৎসাহে প্রচুব পুরী-কচুরী-হালুয়া উদরস্থ করিতেছে। ভোজন শেষে লোকটি বিদ্রূপ শুক করে, সংসার-ভাগী মহারাজ কপদকহীন, আর তাহাব মত সংসারীরা খাইয়া-দাইয়া কেমন পরম সুখে দিনযাপন করিতেছে।

হঠাৎ কিন্তু এক বিস্ময়কর কাণ্ড ঘটিল। এক বাণ্ডি ব্রহ্মবাস্তে পুঁটলীতে বাঁধিয়া কিছু মিষ্টদ্রব্য ও এক কুঁজো জল নিয়া স্বামীজীর সম্মুখে উপস্থিত। সজ্ঞানভাবে খাদ্যাদি নিবেদন করিয়া সে তৎক্ষণাৎ তামাক সাজিতে বসিয়া যায়। স্বামীজীর প্রশ্নের উত্তরে জানায়, নিকটেই তাহাব একটি খাবারের দোকান রহিয়াছে জাতিতে সে হালুইকর। আজই প্রত্যাষে সে দেখে এক বিচিত্র স্বপ্ন। এক সন্ন্যাসীবাৰা তাঁহাকে কহিতেছেন—স্টেশনের একপ্রান্তে এক সাধু অনাহাবে রহিয়াছেন অবিলম্বে সে যেন তাঁহার সেবা নির্বাহ করে। প্রথমবারের স্বপ্ন-দর্শনকে হালুইকর তেমন গুরুত্ব দেয় নাই। তারপর শয্যায় শুইয়া আরও দুইবার সে একই রকমের স্বপ্নাদেশ পায়। তাই এমন ব্যস্তসমস্ত হইয়া ছুটিয়া আসিয়াছে।

স্বামীজীর দুই চোখ অশ্রুসজল হইয়া উঠে। পরমাশ্রয়দাতা ঠাকুরের কৃপার ধারা মরজগতের পরপার হইতেও তাঁহার জন্ত এমনভাবে বহিয়া আসিতেছে।



গাজীপুরে উপনীত হইয়া স্বামীজী পওহাবাবার সান্নিধ্যে আসেন। সিদ্ধপুরুষ বলিয়া এ অঞ্চলে তাঁহার খুব প্রসিদ্ধি। তা ছাড়া, পওহারীবাবার গুহায় শ্রীরামকৃষ্ণের একখানি ছবি টাঙ্গানো রহিয়াছে দেখিয়া তিনি এই সাধুর প্রতি আকৃষ্ট হইলেন।

স্বামীজী এই সময়ে অজীর্ণ ও কোমরের বাতবোগে ভুগিতে ছিলেন। ভাবিলেন, পওহারীবাবাব নিকট হঠাৎ যোগ ও বাজযোগের শিক্ষা কিছুটা গ্রহণ করিলে ক্ষতি কি? এই মহাত্ম্যাব কাছে দীক্ষা নিবেন বলিয়াও তিনি স্থির করিলেন। পওহারীবাবা সম্মতি জ্ঞাপন করিলেন এবং অস্থান্যের দিনক্ষণও স্থির হইয়া গেল।

দীক্ষার পূর্বদিন রাত্রে কিন্তু এক বিচিত্র ব্যাপার ঘটে। স্বামী বিবেকানন্দের অধ্যাত্মজীবনে এ ঘটনাটির গুরুত্ব অপরিমীম।

স্বামীজী শয়ন করিয়া আছেন। অকস্মাৎ লক্ষ্য করিলেন, তাঁহার কক্ষটি দিবালোকের শুভ্র জ্যোতিতে উদ্ভাসিত হইয়া উঠিয়াছে। আব উহার মধ্যে ফুটিয়া উঠিয়াছে শ্রীরামকৃষ্ণের মূর্তি। শাকুরের কাকণাভরা নয়ন দুইটি স্বামীজীব দিকে নিবদ্ধ, অপরিমেয় স্নেহ মমতা উহা হইতে বরিষা পড়িতেছে।

গুরুদেবের এই অলৌকিক আবির্ভাব গ্রাহ্য সমগ্র সত্তাব মূলে জাগাইয়া তোলে প্রচণ্ড আলোড়ন। আত্মগানির আশুনে হৃদয় জ্বলতে থাকে। এ তিনি কি করিতে যাউতেছেন? ঠাকুরের প্রাতি যে অচলা ভক্তি, যে আত্মসমর্পণ এতকাল ছিল তাহা কি লোপ পাইয়াছে? তিনি কি গুরুদেবের অবিস্থাসী শিষ্য? উত্তেজনায তাঁহার শরীর কম্পিত ও ঘর্ম্মাক্ত হইয়া উঠে। তাবপর স্বামীজী উচ্চ স্বরে স্বগতোক্তি করিয়া উঠেন, “না, না, কখনোই তা হবে না। শ্রীরামকৃষ্ণ ব্যতীত আর কেউ এ হৃদয়ে ঠাই পাবে না। প্রভু, এ দাস যে চিরদিন তোমারই চরণে বিক্রান্ত। জয় বামকৃষ্ণ।”

ইহার পরেও কয়েকদিন ধরিয়া ঠাকুরের দর্শন তিনি প্রাপ্ত হন। সবিস্ময়ে ভাবিতে থাকেন, সত্যিই তো, বিদেহী রামকৃষ্ণের সদাজাগ্রত

চক্ষু দুইটি আজিও তাঁহার প্রিয় শিষ্যের সতর্ক প্রহরায় নিযুক্ত। স্বামীজী শিহরিয়া উঠেন, ঠাকুরের করুণার স্বরূপ উপলব্ধি করিয়া দুই নয়নে ঝরিতে থাকে পুলকাক্ষ।

ইহার পর নৈনিতালের নিকটে, হিমালয় ক্রোড়ে স্বামীজীর এক দুর্লভ অধ্যাত্ম-অনুভূতি লাভ হয়। সঙ্গী গঙ্গাধর মহারাজকে ডাকিয়া সেদিন তিনি আনন্দোচ্ছল হৃদয়ে বলিয়াছিলেন, “গঙ্গাধর, আজ এই অশ্বখবৃক্ষের তলে আমার জীবনের এক অমূল্য ক্ষণ উপস্থিত হয়েছিল। এর ফলে আমার জীবনের একটা প্রধান সমস্যার সমাধান হয়ে গিয়েছে।”

তখনকার দিনলিপিতে স্বামীজী তাঁহার নিগূঢ় সাধন-অনুভূতির কথা লিখিয়াছিলেন— আমি আজ ক্ষুদ্র দেহপিণ্ড আর বিরাট মহা-সৃষ্টির একাত্মকতা অনুভব করেছি। বিশ্বের যা কিছু সব এই ক্ষুদ্র দেহমধ্যেই রয়েছে। উপলব্ধি করলাম, প্রাতি পরমাণুর মধ্যেই বিশ্ব-সংসার রয়েছে বিরাজমান।

হৃষিকেশের বিখ্যাত সাধু ধনরাজ-গিরির আশ্রমে স্বামীজী কিছুদিন ছিলেন। কয়েকজন গুরুভ্রাতাও এই সময় তাঁহার সঙ্গে থাকিতেন। হিমালয়ে বসিয়া কঠোর তপস্যায় কিছুদিন কাটাইবেন বলিয়া স্বামীজী মনে মনে স্থির করিয়াছেন। কিন্তু কোথা হইতে এক আকস্মিক দুর্দৈব আসিয়া উপস্থিত হয়, তিনি এক দুর্শ্চিকিৎসার ধরণের জ্বরে আক্রান্ত হন। একদিন অবস্থা নিতান্ত সঙ্কটাপন্ন হইয়া পড়ে। দেখা যায়, সর্বশরীর হিম হইয়াছে, নাড়ীর গতি স্তব্ধপ্রায়। অস্তিমকাল উপস্থিত জানিয়া গুরুভ্রাতারা শোকে মুহমান, কেহ কেহ ইষ্টনামও স্মরণ করিতেছেন।

ইহাৎ তাঁহার কুটিরদ্বারে আসিয়া দাঁড়ান জটা-জুটমণ্ডিত এক বৃদ্ধ সাধু। তরুণ সন্ন্যাসীদের এই সঙ্কটের কথা শুনিয়া তাঁহার হৃদয় বিগলিত হয়। গৃহমধ্যে ঢুকিয়া মৃতকল্প স্বামীজীকে তিনি কিছুটা মধু ও পিপুল চূর্ণ খাওয়াইয়া দিলেন। অতি সাধারণ একটি ওষুধ

কিন্তু তাঁহার ক্রিয়া যেন অমোঘ মন্ত্রোষধির মত। রোগী ধীরে ধীরে চক্ষু মেলিয়া চাহিলেন। ইতিমধ্যে বৃদ্ধ সাধুটি পাহাড়িয়া পথে নামিয়া কোথায় অদৃশ্য হইয়া গিয়াছেন।

সুস্থ হইয়া উঠিয়া স্বামীজী গুরুভাইদের কাছে ডাকিলেন, কহিলেন, “বাহুজ্ঞানহীন অবস্থায় পড়ে থাকবার সময় কি দেখেছিলাম জানিস? দেখলাম, আমি যেন জগতে বিধাতার এক বৃহৎ কাজের ভার নিয়ে এসেছি। সে ঐশী কাজ যতদিন শেষ না হবে, আমার যেন বিশ্রাম নেই—শান্তি নেই।”

এখন হইতে গুরুভাইরা স্বামীজীর জীবনে এক উল্লেখযোগ্য পরিবর্তন লক্ষ্য করেন। তাঁহার কর্মজীবনে আসে নূতনতর উৎসাহ, প্রাণচাঞ্চল্য ও উদ্দীপনা, আর অধ্যাত্মজীবন হইয়া উঠে আত্মবিশ্বাসে ভরপুর।

স্বামীজী ও তাঁর গুরুভাইরা স্পষ্টতই বুঝিতে পারিলেন, মৃত্যুর দ্বারে গিয়াও নরেন এক অদৃশ্য কল্যাণময় শক্তির ইঙ্গিতে ফিরিয়া আসিলেন। ঐ বৃদ্ধ সন্ন্যাসী ছিলেন সেই অদৃশ্য নিয়ন্তা-শক্তিরই দূত। স্বামীজীর জীবনে ঐ ঘটনাটির মধ্য দিয়া এক নূতন পরিবর্তন ঘটিয়া গেল।

ইহার পর হইতে স্বামীজী একাকী সমগ্র ভারত পরিভ্রাজন করিতে থাকেন। ১৮৯১ খৃষ্টাব্দ হইতে শুরু করিয়া কয়েক বৎসর তিনি গুরুভ্রাতাদের হইতে নিজেকে বিচ্ছিন্ন করিয়া নেন, নিঃসঙ্গ জীবন যাপন করিতে থাকেন। এই সময়ে তাঁহাকে বলিতে শুনা যাইত, “গুরুভাইদের মায়াও মায়া—বরণ ত্রা আরও প্রবল। এ মায়ার পাকে পড়লে সাধনার পথে বিগ্ন ঘটে। আমি আর কোন মায়ার বেড়া-ই রাখতে চাইনে।”

ত্যানী দণ্ডী সন্ন্যাসীর বেশে স্বামীজী ভারতবর্ষের দিক্‌দিগন্তে

ঘুরিয়া বেড়ান। এ দেশের অগণিত পল্লী ও জনপদে—ভান্ধী, দোসাদ ও দিনমজুরের গৃহ হইতে নৃপতির রাজপ্রাসাদে, ভারত-আত্মার সন্ধানে তাঁহার এই অভিযান! ভারতের মুক্তিকার বৃকে কান পাতিয়া শুনিলেন তাঁর হৃদস্পন্দন, ভারতের লক্ষ লক্ষ মানুষের চোখে মুখে রূপায়িত দেখিলেন পরমাত্মার ছায়া। অদ্বৈতবাদী সন্ন্যাসীর মুক্তির সঙ্গীতে আসিল নূতন স্পন্দন, নূতন গতিবেগ।

এই ভারত পরিক্রমা স্বামীজীর অধ্যাত্মজীবনের এক বড় প্রস্তুতি। বেদান্তবাদের নব প্রচারক, সন্ন্যাসী-সৈনিক বিবেকানন্দের যোদ্ধা-জীবনের পাথেয় এই সময়েই সঞ্চিত হইয়া উঠে।

আলোয়ার, খেতড়ি, পোরবন্দর, রামনাদ প্রভৃতি রাজাদের শ্রদ্ধা ও আনুগত্য তিনি এই সময়ে প্রাপ্ত হন। এই নিস্পৃহ, তেজস্বী সন্ন্যাসীর পদপ্রাস্তে এই রাজগৃহদের শির সেদিন লুটাইয়া পড়ে।

• স্বামীজী সে সময়ে খেতড়ির মহারাজের সম্মানীয় অতিথি। একদিন মহারাজার জয়পুরস্থিত রাজ-উদ্যানে বসিয়া নানা ধর্মকথা হইতেছে। এমন সময় এক সুকণ্ঠী বাদ্জীকে আহ্বান করিয়া আনা হইল, রাজ-অতিথির সম্মুখে সে ভজন সঙ্গীত গাহিবে।

স্বামীজী কিন্তু এই রমণীকে দেখিয়াই স্থান ত্যাগের জন্ত উঠিয়া দাঁড়ান। তরুণী সঙ্গীত-ব্যবসায়িনীর সম্মুখে বসিয়া গান শুনিতে তাঁহার সংস্কারে বাধিল। খেতড়ির নৃপতি সান্নুয়ে বলেন, “স্বামীজী, এ কিন্তু চমৎকার ভজন গায়। এর গান শুনে অনেকেই মুগ্ধ হয়েছেন। আপনি দয়া করে একটু শুনুন।”

ঐ নারীর কণ্ঠে বৈষ্ণব-সাধক সুরদাসের প্রার্থনা ঝঙ্কত হইয়া উঠে—

প্রভু মেরা অওগুণ চিত না ধরো,  
সমদরশী হ্যায় নাম তুমহারো।  
এক লোহা পূজামে রহত হ্যায়।

এক রহে ব্যাধ ঘর পর  
পরশকে মন দ্বিধা নাহি হোয়  
ছ'ছ এক কাঞ্চন করো।

সুর-মূর্ছনা বার বার ঘুরিয়া ফিরিয়া একই তত্ত্বকে উদ্ঘাটিত করিতে চাহিতেছে আর বলিতেছে—“অজ্ঞানোসে ভেদ হ্যায়, জ্ঞানী কাহে ভেদ করো!”

স্বামীজী উচ্চকিত হইয়া উঠেন। মুহূর্ত্তে চক্ষুর সম্মুখ হইতে একটি পর্দা সরিয়া যায়। সংস্কার হয় বিদূরিত। সত্যিই তো! সমদর্শী তিনি কায়মনোবাক্যে হইতে পারেন নাই। ভেদবুদ্ধি ও সংস্কারের মূল অন্তস্তল হইতে উৎপাটিত আজিও হয় নাই। সর্বভূতে ব্রহ্মানুভূতির জগু, পরম উপলব্ধির জগু, তপস্তা শুরু করিয়াছেন। কিন্তু সে তপস্তার মূলেই যে আপন ভেদবুদ্ধি দিয়া কুঠারাঘাত হানিয়া বসিয়াছেন। এই বাঈজীর ভজন গানের মধ্য দিয়া তাই কি ঠাকুর তাঁহার জীবনে অভেদজ্ঞানের সাড়া নূতন করিয়া আজ জাগাইয়া তুলিলেন?

তখনি গায়িকা নারীর কাছে অগ্রসর হইয়া কহিলেন. “মা, আমি তোমার নিকট ঘোর অপরাধ করেছি। তোমাকে ঘৃণা করে আমি এস্থান ত্যাগ করতে চেয়েছিলাম। কিন্তু তোমার এই গানের মধ্য দিয়ে তুমি আমার চৈতন্যকে জাগ্রত করেছো।”

দেশীয় রাজ-রাজড়া ও অমাত্য যখনই যিনি স্বামীজীর দর্শনে আসিতেন, তিনি তাঁহার সম্মুখে নিজের নবাবিষ্কৃত ভারতকেই তুলিয়া ধরিতেন।

স্বদেশের পরিচয় তাঁহার নিকট ছইরূপে পরিস্ফুট হয়। একটি তাহার শাস্ত্ররূপ—প্রাচীন ঐতিহ্য ও আধ্যাত্মিক সম্পদের গরিমায় ভাস্বর। আর একটি তাহার বর্তমানের রূপ—যাহা দারিদ্র্য, কুসংস্কার ও নিপীড়িত আত্মার হাহাকারে ভরা।

ভারতের আত্মিক পরিচয়ের মধ্য দিয়াই দেশাত্মবোধ ও আত্ম-

মর্যাদাকে জাগাইয়া তুলিতে হইবে, ঋষিদের শিক্ষাদীক্ষার পুনঃপ্রবর্তন করিতে হইবে, দেশীয় রাজসভাগুলির নিকট ইহাই ছিল তাঁহার বক্তব্যের নির্যাস। আরো কহিতেন, “ধর্ম ভারতের বর্তমান দুর্দশার কারণ নয়, ধর্মের অভাবই দায়ী এই দুর্দশার জন্য। ধর্মের শক্তি তখনই বাড়ে যখন তা মানুষের কর্মজীবনে হয় রূপায়িত।”

দেশীয় রাজাদের অনেকে তাঁহাকে শ্রদ্ধাভক্তি দেখাইয়াছেন কেহ কেহ গুরুজ্ঞানে পদসেবাও করিয়াছেন। কিন্তু কখনো এই রাজসেবার আকর্ষণ বা মোহে তিনি পড়েন নাই। এই তেজস্বী অপ্রতিগ্রাহী রাজ-সন্ন্যাসীর পদে রাজাদের শির বার বার লুষ্ঠিত হইয়াছে, স্বামীজীর অকুতোভয়তা ও বৈরাগ্য তাঁহাদের বিস্মিত করিয়াছে।

একবার মহাশূররাজ স্বামীজীকে একটি উপহার গ্রহণের জন্য পীড়াপীড়ি করিতে থাকেন। সন্ন্যাসীকে মূল্যবান দ্রব্য গ্রহণ করিতে নাই বলিয়া স্বামীজী এড়াইতে চান, কিন্তু মহারাজও ছাড়িবেন না। অগত্যা স্বামীজী সকলকে বিস্মিত করিয়া সামান্য একটি ছঁকা চাহিয়া বসিলেন। সর্ষ থাকিল—উহাতে কোন ধাতুর সংশ্রব থাকিবে না। মহারাজ অবিলম্বে দেশীয় শিল্পীদের কারুকার্যে খচিত একটি সুদৃশ্য ছঁকা তাঁহাকে উপহার দিলেন। মাদ্রাজে পৌঁছিবার পরই কিন্তু এই ছঁকার সদগতি হইয়া গেল। এক তড়ালোকের বাড়ীতে স্বামীজী আশ্রয় নিয়াছেন। লক্ষ্য করিলেন, তাঁহার পাচক ব্রাহ্মণ এই ছঁকাটির দিকে বার বার লুরু দৃষ্টিতে তাকাইতেছে। স্বামীজী এই ছঁকাটি তৎক্ষণাৎ তাহাকে দিয়া দিলেন। মহারাজের উপহারের মূল্য তাঁহার নিকট যেন এক কানাকড়িও নয়।

গুজরাটের পোরবন্দর রাজসভায় স্বামীজী উপস্থিত হইয়াছেন। শঙ্কর পাণ্ডুরং সেখানকার এক প্রখ্যাত পণ্ডিত। তিনি তখন বেদের অনুবাদ করিতেছিলেন। স্বামীজী নয় মাস কাল সেখানে থাকিয়া

তঁাহার কাজের সহায়তা করেন এবং বেদ এবং পতঞ্জলির মহাভাষ্য এই সময়েই পাণ্ডুরাং-এর সাহায্যে তিনি আয়ত্ত করিয়া নেন।

নবীন সন্ন্যাসীর অপূৰ্ব শক্তির পরিচয় পাঠিয়া পণ্ডিতশিরোমণি পাণ্ডুরাং বলিয়াছিলেন, “স্বামীজী, আমার মতে আপনার মনীষা ও প্রতিভার উপযুক্ত মর্যাদা শুধু পাশ্চাত্য দেশেই হতে পারে। আপনি সেখানে আমাদের সনাতন সভ্যতার তত্ত্ব ব্যাখ্যা করুন। পাশ্চাত্য ও প্রাচ্য উভয় দেশেরই কল্যাণ হবে।”

পাশ্চাত্য দেশ পর্য্যটনের চিন্তা বীজাকারে স্বামীজীর অন্তরে এই সময় হইতেই প্রবেশ করে।

ঠাকুর রামকৃষ্ণের বাণী—জীবরূপী শিবের সেবা—বার বার তঁাহার মনে পড়ে। ভাবেন, মাতৃভূমি ভারতের কোটি কোটি নিরন্ন শিক্ষা-দীক্ষাহীন মানুষকে অন্ন জেগাইতে হইবে—আধ্যাত্মিক চেতনায় তাহাদিগকে স্বপ্রতিষ্ঠা করিতে হইবে। কিন্তু তার আগে প্রয়োজন জনগণের দারিদ্র্য ও তামসিকতা দূর করা।

কিন্তু সে উদ্দেশ্য সফল করিবার উপকরণ কই? মনে তাই দৃঢ় প্রতীতি জন্মিল—পাশ্চাত্যদেশে যাওয়া ছাড়া আর উপায় নাই। ভোগসর্বস্ব, উদ্ভ্রান্ত জড়বাদের কেন্দ্রে তিনি ভারতের অধ্যাত্মবাণী প্রচার করিবেন আর ইহার পরিবর্তে আনিবেন সে দেশের সাহায্য, যাগ দ্বারা এ দেশ হইবে সমৃদ্ধতর।

ঐশী নির্দিষ্ট ব্রতের জগ্নু শ্রীরামকৃষ্ণ তঁাহাকে চিহ্নিত করিয়া গিয়াছিলেন। তাহারই উদ্ভোগপর্ব যেন এই সময়ে অনুষ্ঠিত হইতে দেখিতেছি। এই সময়ে গুরুভাই অভেদানন্দজীর সহিত বোম্বাইতে স্বামীজীর সাক্ষাৎ হয়। স্বামীজীর অন্তরলোকের প্রস্তুতির কথাটি স্বামী অভেদানন্দ বর্ণনা করিয়াছেন—“এই সময়ে স্বামীজীর হৃদয়টি যেন অগ্নিকুণ্ডের মত হইয়াছিল। আর কোন চিন্তা নাই। কেবল কি করিয়া ভারতের প্রাচীন আধ্যাত্মিকতার পুনঃপ্রতিষ্ঠা করা যায়—অহনিশ তাহাই ভাবিতেন।...স্বামীজীকে তখন দেখিলে মনে হইত

যেন একটা প্রচণ্ড ঝড়বাত ! আমাকে তিনি একদিন বলিয়াছিলেন—  
 “জাখ্ কালী, আমার ভেতর এমন একটা শক্তি জমেছে যে, ভয় হয়  
 পাছে ফেটে যাই।”

এই সময়ে মাদ্রাজে স্বামীজীর প্রকাণ্ড এক ভক্তদল জুটিয়া গেল।  
 ইহাদের উৎসাহে ও নিজ অন্তরের প্রেরণায় তিনি পাশ্চাত্য দেশে  
 ধর্মপ্রচারে যাওয়ার সিদ্ধান্ত স্থির করিলেন। সিকাগোতে বিশ্বধর্ম-  
 সম্মেলন অনুষ্ঠিত হইবে। সেখানে তাঁহাকে প্রেরণের জন্ত সকলেই  
 অত্যন্ত ব্যগ্র।

স্বামীজীর ভক্ত আলাসিজা পেরুমল প্রভৃতির চেষ্টায় জনসাধারণ  
 হইতে চাঁদাও কিছু উঠিল। মাদ্রাজী শিষ্যদের কাছে স্বামীজী  
 নিজের অভিপ্রায় স্পষ্টভাবেই ব্যক্ত করিলেন,—“এখন হিন্দুধর্মকে  
 জগৎবাসীর কাছে প্রচার করার সময় এসে গিয়েছে। ঋষিদের  
 এই মহান ধর্মকে আর সঙ্কীর্ণ বেষ্টনীর মধ্যে আবদ্ধ করে রাখলে  
 চলবে না, জগৎময় একে ছড়িয়ে দিতে হবে। সনাতন ধর্মের প্রাচীন  
 তুর্গ জীর্ণ হয়েছে, শুধু বৈদেশিক আক্রমণ থেকে তাকে কোন রকমে  
 রক্ষা করে জড়ের মত বসে থাকলে চলবে না। এর পুনঃসংস্কার করে  
 জগতের সমক্ষে বার হতে হবে, পূর্ণ উজ্জ্বলের সঙ্গে চারদিকে প্রচার  
 করতে হবে এর মহিমা।”

আমেরিকায় যাওয়ার জন্ত চাঁদা তোলা হয়। কিন্তু স্বামীজী  
 পতিত হন মহা সমস্যায়। অন্তরে প্রশ্ন জাগে, কেন তিনি বিদেশে  
 যাইতে উত্তত হইয়াছেন? দেশের কাজে? ধর্মের কাজে? না নিজের  
 প্রচ্ছন্ন অহংবোধ তাঁহাকে এদিকে ঠেলিয়া নিতেছে?

ভগবানের নিগূঢ় উদ্দেশ্য যদি কিছু থাকিয়া থাকে, তাহা জানিবার  
 উপায় কই? এযাবৎ কোন স্পষ্ট নির্দেশ তো তিনি পান নাই।  
 এক্ষেত্রে বিদেশ গমনের পরিকল্পনা স্থগিত রাখাই সমীচীন। ভক্ত ও  
 বন্ধুবান্ধবদের এ সিদ্ধান্ত তখন জানাইয়া দিলেন। সংগৃহীত চাঁদার  
 অর্থ দরিদ্রের মধ্যে বিতরণ করিয়া দেওয়া হইল।



কিন্তু মাজাজের তত্ত্ব শিষ্যেরা দমিবার পাত্র নন। কিছুদিন পরেই তাঁহাদের উত্তম ও হৈ-চৈ আবার শুরু হয়। তাঁহাদের উৎসাহের শ্রোতে পড়িয়া স্বামীজীও আবার ভাবিতে বসেন। ঠাকুর সশরীরে নাই, তাঁহার নির্দেশ পাইবার আশা আর কোথায়? কিন্তু শ্রীমা তো রহিয়াছেন। তিনি তো তাঁহারই অংশস্বরূপিণী। মায়ের অনুমতি চাহিয়া পাঠাইলেই তো সব সমস্তার সমাধান হয়? স্থির করিলেন, তাঁহার নির্দেশ চাহিয়া এখনি পত্র দিবেন। ইতিমধ্যে সেদিন এক অলৌকিক কাণ্ড ঘটয়া গেল।

স্বামীজী রাত্রে শয়ন করিয়া আছেন, ঘুম আসিতেছে না। এমন সময়ে হঠাৎ এক অতীন্দ্রিয় দৃশ্য উদ্ঘাটিত হয় তাঁহার নয়ন সমক্ষে। দেখেন, শ্রীরামকৃষ্ণের জ্যোতিষ্মন দিব্যমূর্তি ভারত সাগরের তীর হইতে দোশাস্তুর অভিমুখে যাত্রা করিয়াছে। সোজাসৃজি সমুদ্রের উপর দিয়া ঠাকুর অপর পারে চলিয়াছেন, সঙ্গে সঙ্গে স্বামীজীকেও আদেশ দিতেছেন তাঁহাকে অনুসরণ করার জন্ত। বিস্মিত স্বামীজী শয্যায় উঠিয়া বসিলেন! তবে কি এটাই ঠাকুরের অভিপ্রেত? ঠাকুরের অক্ষুট ধ্বনি তখনও তাঁহার কানে বাজিয়া চলিয়াছে—  
“আয়, আয়।” তবে দ্বিধা-দ্বন্দ্বের অবকাশ আর কোথায়?

অবিলম্বে স্বামীজী সারদা দেবীকেও একখানা পত্র লিখিলেন। তখন আর মতামত চাওয়া নয়, ঠাকুরের নির্দেশে সঙ্কল্প তিনি স্থিরই করিয়াছেন। এবার মাতা ঠাকুরাণীর আশীর্ব্বাদটি তাঁহার চাই।

লিখিলেন, “মাগো, মহাবীর যেমন রামনাম স্মরণ করিয়া সমুদ্রের উপর দিয়া লক্ষ প্রদান করিয়াছিলেন, আমিও তেমনি শ্রীশ্রীঠাকুরের নাম লইয়া সমুদ্রের পরপারে চলিলাম।”

নরেন অনেকদিন হয় একলা নানা স্থান ঘুরিতেছেন, সারদামণি বেশ কিছুদিন তাঁহার সংবাদ পান নাই। পত্র পাইয়া তাঁহার আনন্দের আর সীমা রহিল না। নরেন তাঁহার দৃষ্টিতে শুধু ঠাকুরের প্রধান শিষ্যই নয়—এই শিষ্যের মাধ্যমে ঠাকুর একটা বড় ঐশীকাজ সম্পন্ন

করিবেন ইহাও সারদা দেবী মনে প্রাণে জানেন। ঠাকুরের মরদেহ ত্যাগ করার পর অলৌকিক অনুভূতির মধ্য দিয়া এ তত্ত্বটি তাঁহার কাছে পরিস্ফুট হইয়া উঠিয়াছিল। একদিন স্বচক্ষে দেখিয়াছিলেন— ঠাকুরের জ্যোতির্ময় সূক্ষ্ম দেহ ধীরে ধীরে নরেনের দেহে প্রবেশ করিতেছে। ঠাকুর একদিন নরেনের দেহের মাধ্যমেই তাঁহার মহা-লীলার বিস্তার সাধন করিবেন, এ বিশ্বাস এখনো তাঁহার আছে।

আজ সেই নরেন ঠাকুরের কর্মযজ্ঞের ঋত্বিক রূপে পাশ্চাত্যদেশে যাইতে অনুমতি চাহিতেছে। আর এই সম্বন্ধে প্রত্যাদেশও যে ইতিমধ্যে শ্রীমা প্রাপ্ত হইয়াছেন! তিনিও ধ্যানবেশে দেখিয়াছেন,— সমুদ্র তরঙ্গের উপর দিয়া ঠাকুর অগ্রসরমান, আর নরেন্দ্র তাঁহার অনুগামী। নরেনকে তাঁহার নিজের এই অলৌকিক দর্শনের কথা জানাইয়া তিনিও তখনই পত্র দিলেন। জানাইলেন অন্তরের পরিপূর্ণ আশীর্বাদ।

স্বামীজী তাঁহার ভক্ত শিষ্যদের আহ্বান করিলেন, সানন্দে কহিলেন, “আমেরিকায় যেতে এবার আমি সম্পূর্ণরূপে প্রস্তুত। মার আশীর্বাদ আমি পেয়ে গেছি!”

মাদ্রাজের ভক্তদের উৎসাহ এবং স্বামীজীর শিষ্য খেতড়ি-রাজের অর্থানুকূলে স্বামীজীর যাত্রার বন্দোবস্ত সম্পূর্ণ হইল।<sup>১</sup>

১৮৯৩ সালের ৩রাশে মে তারিখ। বোম্বাই হইতে জাহাজে তিনি জন্মভূমি ত্যাগ করিলেন। পরিধানে রঙীন রেশমী আংরাখা ও উষ্ণীষ। পরিচয়ের জন্ত থাকিল নূতন একটি নাম—স্বামী বিবেকানন্দ।

শ্রীরামকৃষ্ণের দেহান্তের পর শিষ্যেরা আঁটপুরে বিরজা হোম করিয়া সন্ন্যাস নেন। এই সময়ে নরেন্দ্রনাথের নাম হয় - বিবিদিষানন্দ। হিমালয়ে ও ভারতের অন্যান্য অঞ্চলে পরিভ্রাজন কালে স্বামীজী মহারাজ নানা সময়ে নানা নাম গ্রহণ করিতেন। এবার বিদেশে

যাওয়ার প্রাক্কালে কি নাম নিবেন ভাবিতেছিলেন। প্রিয় শিশু খেতড়ি-রাজ বলিলেন, “স্বামীজী আপনি জগতের বিবেক উন্মেষ করার জন্ত তৈরী হচ্ছেন—আপনার এবাবকার নাম হোক, বিবেকানন্দ।”

সিকাগোতে তখন বিশ্ব-মেলায় অবিবেশন বসিয়াছে। এইখানেই বিশ্ব-ধর্মসভা বসিবার কথা। সেখানে পৌঁছিয়া খবরাখবর করার পর তো স্বামীজীর চক্ষুস্থির। প্রতিনিধি নির্বাচনের শেষ তারিখ গত হইয়াছে। তাছাড়া, তখন জুলাই মাস—সেপ্টেম্বরের আগে ধর্মসভার অবিবেশনও বসিবে না। তিনি নিজে বা তাঁহার উৎসাহী ভক্তেরা কেহই আগে হইতে এ বিষয়ে সংবাদ সংগ্রহ করার প্রয়োজন বোধ করেন নাই। আগামী কয়েক মাসের ব্যয় নির্বাহ কি করিয়া হইবে তাহাই এক বড় সমস্যা।

আমেরিকায় পদার্পণ করিবার সময় তাঁহার নিকট মাত্র ১৭৯ পাউণ্ড অবশিষ্ট ছিল। সামান্য পুঁজি, আর দেশটিও ব্যয়বহুল। অর্থ যা কিছু ছিল তাড়াতাড়ি ফুরাইয়া আসিতেছে। সম্মুখে মার্কিন দেশের নিদারুণ শীত। পর্যাপ্ত শীতবস্ত্রও তিনি সঙ্গে আনেন নাই। এই দেশ ভারত নয়, জড়বাদী ডলার পূজারীদের দেশ। এখানে সন্ন্যাসীর ভিক্ষা মিলে না—স্বামীজী বিষম বিপদে পড়িলেন।

কিন্তু এ অবস্থায় হাল ছাড়িবার পাত্রও তিনি নহেন। খরচ কমানোর জন্ত কিছুদিন সিকাগো ছাড়িয়া বোস্টন শহরে গিয়া বাস করিতে থাকেন। এই সময়েই স্বাক্ষরিকভাবে হার্ভার্ড বিশ্ব-বিদ্যালয়ের গ্রীক ভাষার অধ্যাপক মিঃ রাইটের সহিত তাঁহার পরিচয় হয়। স্বামীজীর লোকোত্তর প্রতিভা ও বিদ্যাবস্তা দর্শনে অধ্যাপক তো বিমুগ্ধ। সোৎসাহে তখনি তাঁহাকে ধর্মসভায় গ্রহণ করিতে তিনি উজোগী হইলেন।

হিন্দুধর্মের প্রতিনিধিত্ব করার কোন নিদর্শনপত্র স্বামীজীর কাছে নাই, একথা রাইট সাহেবকে তিনি জানাইলেন। সুবিজ্ঞ অধ্যাপক তৎক্ষণাৎ উত্তর দিলেন, “স্বামীজী, আপনার কাছে এই নিদর্শন চাওয়া, আর সূর্য্যকে তার কিরণ দেবার অধিকার সম্বন্ধে প্রশ্ন করা—একই কথা।”

ধর্মসভাব প্রতিনিধি যে সংস্থা নির্বাচন করেন তাব সভাপতি ছিলেন মিঃ রাইটেব বন্ধু। স্বামীজীর পরিচয়পত্রে তিনি সেই বন্ধুকে লিখিলেন, “ইনি এমনি একজন মনোবী যে, আমাদের বিশ্ব-বিদ্যালয়গুলির সব ক’টি বিজ্ঞ অধ্যাপকের বিদ্যা একত্র করলেও তা এর পাণ্ডিত্যেব সমতুল হয় না।”

স্বামীজীর অর্থাভাব রহিয়াছে বুঝিতে পারিয়া সহৃদয় অধ্যাপক তাঁহাকে সিকাগো স্টেশনের একখানি টিকেট আর মেলা অভ্যর্থনা কমিটির নামে একটি পরিচয়পত্র দিয়া রওনা করিয়া দেন।

কিন্তু স্বামীজীর পরীক্ষার যেন আর শেষ নাই। সিকাগো শহরে পৌঁছিয়া দেখেন, মেলা স্থানের ঠিকানাটি তিনি হাবাইয়া ফেলিয়াছেন। শীতের রাত্রি ঘনাইয়া আসিয়াছে, এ অপরিচিত স্থানে আশ্রয় পাইবারও কোন সম্ভাবনা নাই।

ধনী লোকের দরজায় গেলেই পরিচারকেরা তাঁহাকে নিম্নো ভাবিয়া দ্বার রুদ্ধ করিতেছে। রাত্রির জন্ত মাথা গুঁজিবার একটা স্থানও মিলিতেছে না। অনশ্বোপায় হইয়া সে রাত্রির মত স্টেশনের এক খালি প্যার্কিং বাস্কের ভিতরে আশ্রয় নিতে হয়। পরদিন প্রভাতে ক্ষুধার্ত হইয়া ছুই এক স্থানে ভিক্ষার চেষ্টা করেন। কিন্তু সে দেশে ভিক্ষা দিবার রীতি নাই। শ্রান্ত ক্লান্ত মলিন বেশধারী এই বিদেশীকে বহু ধনী গৃহস্থই তাড়াইয়া দেয়। এক বর্ষায়সী মহিলা ঘরের জানালা দিয়া দেখিতে পান নিরাশ্রয় বিদেশী তরুণ অর্থের জন্ত ঘোরাঘুরি করিতেছেন, কিন্তু কোথাও কিছু মিলিতেছে না। মনে তাঁহার জাগিয়া উঠিল সহানুভূতি। তখন নিচে

আসিয়া স্বামীজীকে দোর খুলিয়া দিলেন—দিলেন আহার ও আশ্রয়। এই মহিলার নাম মিসেস হেইল্।

স্বামীজী সুস্থ হইলে এই সহৃদয়া মহিলা তাঁহাকে ধর্ম্মমেলায় পৌছাইয়া দিলেন। পরম কাকণিক ঠাকুরের কৃপাদৃষ্টি তাঁহার উপর সতত নিবদ্ধ রহিয়াছে, অনেকবারের মত এবারও স্বামীজী এই ঘটনায় তাহা উপলব্ধি করিলেন।

১৮৯৩ সালের ১১ই সেপ্টেম্বর। সিকাগোব আর্ট ইনষ্টিটিউটের প্রাসাদোপম ভবনে সাড়ম্বরে বিশ্বধর্ম্ম মহাসম্মেলন আবিস্কৃত হইয়াছে। কাউন্সিল গিবনসকে কেন্দ্র করিয়া সাবা পৃথিবীর ধর্ম্মপ্রতিনিধিরা উপস্থিত। জ্ঞোতাদের মধ্যে রহিয়াছেন ইউবোপ আমেরিকার বহু মনোবী, অধ্যাপক ও শ্রেষ্ঠ নাগরিক।

তরুণ সন্ন্যাসী স্বামী বিবেকানন্দ মঞ্চোপবি উপবিষ্ট। গৈবিক রঙে রঞ্জিত রেশমী আংরাখা ও উষ্ণীষে ভূষিত এই হিন্দু প্রতিনিধির আকর্ষণ যেন সবাইকে ছাড়াইয়া গিয়াছে। সুন্দর স্মৃতি দেহ, চোখে মুখে প্রতিভার দীপ্তি। আভিজাত্য ও আত্মপ্রত্যয়ে ভরা এই সন্ন্যাসী যেন এক স্বতন্ত্র পুরুষ। দৃপ্তভঙ্গী ও তেজ দেখিয়া মনে হয়, আদর্শবাদ ও ধর্ম্মের ক্ষেত্রে ইনি যেন এক হৃদ্ধি ক্রান্তিহীন যোদ্ধা—চিহ্নিত অধিনায়ক।

স্বামীজীকে তাঁহার জীবনে এমন গুরুগম্ভীর, এমন গুরুত্বপূর্ণ বক্তৃতা মঞ্চে কখনও দাঁড়াইতে হয় নাই। পাশ্চাত্য সমাজের শ্রেষ্ঠ দার্শনিক ও ধর্ম্ম-নেতাগণ ইহাতে ভাষণ দিতেছেন। নিজ নিজ সম্প্রদায়ের মতবাদ তাঁহারা অপূর্ব পাণ্ডিত্য ও বাগ্মিতার সহিত বিশ্লেষণ করিতেছেন। স্বামী বিবেকানন্দকেও তাঁহার ধর্ম্মের তত্ত্ব, পৃথিবীর প্রাচীনতম ও বৃহত্তম ধর্ম্মের তত্ত্ব জানাইতে হইবে—এবং এখনই তাহা জানাইতে হইবে। অস্বাভাবিক প্রতিনিধিদের মত পূর্ব

হইতে কোন কিছু লিখিয়া বা তৈরী হইয়াও তিনি আসেন নাই। পৃথিবীর শ্রেষ্ঠ ধর্মাধিবেশনের সভামঞ্চে বসিয়া এই ত্রিশ বৎসর বয়স্ক দুঃসাহসী যুবকের হৃদয় আজ যেন হঠাৎ কাঁপিয়া উঠিল।

এবার স্বামী বিবেকানন্দের ভাষণের পালা। সভাপতি আহ্বান জানাইলেন তাঁহাকে। স্বামীজী কিন্তু এড়াইয়া গেলেন, কহিলেন, ইহার পরে তিনি বক্তৃতা করিবেন। কিছুক্ষণ পরে আবার তাঁহার ডাক পড়ে, ঘণ্টা বাজাইয়া তাঁহাকে ডাকা হয়। কিন্তু এবারও বিবেকানন্দ উত্তর দিলেন—এখন নয়। সভাপতি আর তাঁহাকে এড়াইতে দিতে রাজী নন। দৃঢ়স্বরে বলিয়া বসিলেন, ইহাই এই প্রতিনিধির বক্তৃতা প্রদানের শেষ সুযোগ। কি আর করা যায়, স্বামীজীকে এইবার উঠিয়া দাঁড়াইতে হয়।

ইষ্টনাম গ্রহণ করিয়া সমবেত নরনারীকে তিনি আহ্বান জানাইলেন, “আমেরিকাবাসী ভগ্নি ও ভ্রাতৃবৃন্দ!” মুহূর্ত্ত মধ্যে যেন এক ইল্লুজাল ঘটিয়া যায়। এই আহ্বানের আন্তরিকতা অভিভূত করিয়া ফেলে সভার প্রতিনিধি ও দর্শকদের। যুবক সন্ন্যাসীর অভিনন্দন আর শ্রোতাদের করতালি ধ্বনি যেন থামিতে চাহে না। শত শত লোক উঠিয়া দাঁড়াইয়া জানায় বিপুল সম্বর্ধনা।

ক্ষণকাল মধ্যেই স্বামীজীর আত্মবিস্মৃতি কাটিয়া গেল। বুঝিলেন, এই অভিনন্দন ও এই স্বীকৃতি শ্রীরামকৃষ্ণেরই ইচ্ছায়। জগজ্জননী আত্মাশক্তির এ এক নিগূঢ় লীলা। এ লীলারই ক্রৌড়নক হিসাবে আজ তিনি এখানে দণ্ডায়মান। স্বভাবসিদ্ধ সাহস ও নেতৃত্ব ফিরিয়া পাইতে স্বামীজীর বিলম্ব হইল না। অতঃপর হৃদয়ের অনর্গল উৎস হইতে বহিতে থাকে তাঁহার চাঞ্চল্যকর ভাষণ।

অমোঘ শক্তিমত্তায় মগ্নিত হইয়া স্বামীজী সেদিন ধর্ম-সভার চিন্তা জয় করিলেন। সমগ্র পৃথিবীর ধর্মপ্রচারক ও দার্শনিকদের সমক্ষে ইহা যেন এক চাঞ্চল্যকর বিস্ফোরণ। শ্রোতাদের মধ্যে মার্কিন সমাজের বুদ্ধিজীবীর সংখ্যাই অধিক। ইহাদেরই স্বীকৃতির

মধ্য দিয়া মার্কিন দেশের সম্মুখে সেদিন ফুটিয়া উঠিল বিবেকানন্দে তাম্বুর মূর্তি। বেদান্তধৃত সনাতন হিন্দুধর্মের সংবাহকরূপে পাশ্চাত্য দেশের প্রাণ-কেন্দ্রে ঘটিল তাঁহার অভ্যুদয়। এক বিরাট সম্ভাবন সূচিত হইল ইহার মাধ্যমে।

রামকৃষ্ণ-বিবেকানন্দের লীলা-জীবনে সেদিনকার এই ঘটনা ছিল বড়ই তাৎপর্যপূর্ণ। রামকৃষ্ণ ছিলেন সচ্চিদানন্দ সাগরবিহা। এক রাজহংস। ধ্যানময় প্রশান্ত মহাকারণে তাঁহার সন্তা স ভাসমান। আর বিবেকানন্দ সেই রাজহংসেরই পক্ষ-বিধুনন। ধর্ম মহাসভার সেদিনকার এই আলোড়ন—গতি-চঞ্চলতা কি এই পক্ষ-বিধুননেরই প্রথম প্রতিক্রিয়া ?

বিবেকানন্দ তাঁহার আনন্দচঞ্চল শ্রোতাদের নিকট ঘোষণা করিলেন, “পৃথিবীর প্রাচীনতম সন্ন্যাসীসঙ্ঘের পক্ষ থেকে আমি আজ আপনাদের সাধুবাদ জানাচ্ছি। সর্বধর্মের জননী-স্বরূপ সনাতন ধর্মের প্রতিনিধিরূপে, সকল শ্রেণীর সকল মতের কোটি কোটি হিন্দুর পক্ষ থেকে আপনারা গ্রহণ করুন আমার আন্তরিক ধন্যবাদ।”

সনাতন ধর্মের সমন্বয়কারী রূপটি উদ্ঘাটন করিয়া তিনি আর বলেন, “যে ধর্ম সমগ্র জগৎকে পরমতসহিষ্ণুতা এবং সকল মতে সর্বজনীন স্বীকৃতি শিক্ষা দিয়েছে, আমি সেই ধর্মভূক্ত বলে গৌরব করে থাকি। আমরা কেবল সর্বজনীন পরমতসহিষ্ণুতায়ই বিশ্বাস নই, আমরা সকল ধর্মকেই সত্য বলে বিশ্বাস করি। যে জাতি পৃথিবীর সর্বদেশের উৎপীড়িত ও আশ্রয়প্রার্থীদের জাতিবিশেষে আশ্রয় দিয়েছে, আমি সেই জাতির অগ্রতম মানুষ বলে মনে মনে গর্বিত। আমি আপনাদের গর্বের সঙ্গে বলবো, বৎসর রোমানরা ইহুদীদের পবিত্র দেবালয়গুলো ধ্বংস করে ফেলে সেই বৎসর হতাবশিষ্ট ইসরাইল বংশীয়দের আমরাই দক্ষিণ ভারতবা

স্থান দিয়েছিলাম। যে ধর্ম জরথুষ্ট্রপন্থী মহান পারসীক জাতির অবশিষ্টাংশকে আশ্রয় দিয়েছে, অত্যাধি লাগন-পালন করছে, আমি সেই ধর্মভুক্ত বলে গৌরব বোধ করছি।”

ধর্ম-মহাসভার বিরাট কক্ষ প্রতিধ্বনিত করিয়া স্বামীজীর উদাত্তকণ্ঠে নির্গত হইল সেই পবিত্র শ্লোক। অগণিত ভারতবাসী শৈশবকাল হইতে যাহা আবৃত্তি করে—

রুচীনাং বৈচিত্র্যাদৃজুকুটিল

নানাপথ জুযাং ।

নৃণামেকো গম্যন্তমসি

পয়সামর্ণব ইব ॥

—নদ-নদী সকল যেমন নানা ধারায় নানা পথে সাগর অভিমুখে বহিয়া যায়, তেমনি রুচির বৈচিত্র্যাহেতু, সরল ও কুটিল নানা পথগামী মানব-ধারার, হে প্রভো, তুমিই একমাত্র গন্তব্যস্থল।

গীতা-প্রচারিত মহান সত্যের কথাও তিনি শুনাইলেন। পুরুষোত্তম বলিয়া গিয়াছেন,—যে আমাকে যেভাবে উপাসনা করে, আমি তাহার নিকট সেই ভাবেই প্রকাশিত হই। হে পার্থ, মনুষ্যগণ সর্বতোভাবে আমার নির্দিষ্ট পথেই চলিয়া থাকে।

ভারতধর্মের মূল সুরটি ব্যাখ্যা করার পর ধর্মসভার সম্মুখে অগুরু আশার বাণীও তিনি ধ্বনিত করিলেন—“সাম্প্রদায়িকতা, গোঁড়ামী ও ধর্মাক্রতার মৃত্যুকাল আসন্ন। আমি সর্বাত্মকরণে ভরসা করি, এই মহাসমিতির উদ্বোধনে আজ প্রভাতে যে ঘণ্টাধ্বনি বেজে উঠলো তা ধর্মোন্মত্ততার মৃত্যুবর্তী জগতে ঘোষণা করুক। একই চরম লক্ষ্যে মানব জাতি আজ এগিয়ে চলেছে, এবার তার ভেতরকার পারস্পরিক সন্দেহ ও অবিশ্বাস দূর হোক, তরবারি বা লেখনীর দ্বারা পরপীড়নের দুর্মতির ঘটুক অবসান।”

মনীষী রম্য রঙ্গ্যার ভাষায় সম্মেলনের অপর বক্তারাও প্রত্যেকেই ভগবানের কথাই বলিয়াছিলেন—কিন্তু সে ভগবান



ছিলেন তাঁহাদের স্ব-সম্প্রদায়ের ভগবান। কিন্তু বিবেকানন্দ – একা বিবেকানন্দ সকলের ভগবানের কথা বলিলেন, সকলের ভগবানকে বিশ্বসত্তায় মিলাইয়া দিলেন। ইহা ছিল রামকৃষ্ণবই উষ্ণ নিশ্বাস, যাহা সমস্ত বাধা-বিঘ্ন অতিক্রম করিয়া আজ তাঁহাব শ্রেষ্ঠ শিষ্যের মাধ্যমে উদ্গত হইল। আব বিশ্বধর্ম সম্মেলন এই তরুণ সন্ন্যাসীকে জ্ঞাপন করিল তাহার স্বতোৎসারিত অভিনন্দন।

ইহার পর স্বামীজীকে প্রায় দশ বারটি বক্তৃতা এই সম্মেলনে দিতে হয়। মুক্তি, প্রেরণা এবং আদর্শবাদিতার শক্তিতে তাহা অমোঘরূপে আত্মপ্রকাশ করে। সম্মেলনের সদস্যদের ডিঙাইয়া তাঁহার প্রচাৰিত শাস্ত্র সত্যের মহাবাক্য অবিলম্বে জনচিত্ত আলোড়িত করিয়া তুলে। বিশ্বধর্ম মহাসভাব প্রখ্যাত মনীষী ও জনসাধারণ, একযোগে উভয়েব চিত্ত স্বামী বিবেকানন্দ অবলীলায় অধিকার করিয়া বসেন। এই বিবেকানন্দ কিন্তু তাঁহারই শিষ্য যিনি বাবহাবক শিক্ষার গৌন ধারই ধারিতেন না, নিজ নাম দস্তখত করিতে গিয়া লিখিতেন ‘রামকৃষ্ণ’। স্বামীজীব সর্বকর্মের প্রচ্ছন্ন নিয়ামক সেই শ্রীবামকৃষ্ণ। শ্রীবামকৃষ্ণবই তিনি যেন এক ক্ষুদ্র জাতদণ্ড। জাতদণ্ডধারী ঠাকুর সোদন বৃষি বা সবার অলক্ষ্যে মিটি মিটি হাসিতে ছিলেন।

মার্কিন সংবাদপত্রগুলি স্বীকার করিয়া নেয়, স্বামী বিবেকানন্দ নিঃসন্দেহে ধর্মমেলাব শ্রেষ্ঠ ব্যক্তিত্ব। নিউইয়র্ক হেরাল্ড এই সময়ে লিখে, “হাজার বক্তৃতা শুনিবাব পব মনে হইবে, ভারতবর্ষের জায় জ্ঞানৈশ্বর্যমাণ্ডিত দেশে আমাদের দেশের ধর্মপ্রচারক প্রেরণ করা নির্বুদ্ধিতার কাজ।”

মার্কিন দেশের মনীষী, সমাজনেতা ও ধনকুবেরগণ স্বামীজীর প্রজ্ঞা পাণ্ডিত্য ও ব্যক্তিত্বে একেবারে মুগ্ধ হইয়া গেলেন। তাঁহার এই

জনপ্রিয়তাকে ধর্মসম্মেলনের সভাপতিও তাঁহার কাজে লাগাইতে ছাড়িতেন না। নীরস তত্ত্বালোচনার আসরে যখন শ্রোতাদের ধৈর্য্যচ্যুতি ঘটিতে থাকিত তিনি তখন ঘোষণা করিতেন, অধিবেশনের শেষের দিকে স্বামী বিবেকানন্দ তাহার ভাষণ দিবে। জনমণ্ডলী অমনি আগ্রহী হয় উঠে, স্বামীজীর বক্তৃতা শোনার আকর্ষণে ধৈর্য্য ধরিয়া ঘণ্টার পর ঘণ্টা অপেক্ষা করিত

স্বামীজীর ভ্রমণ ও অনুরাগী পাশ্চাত্য দেশীয় চরিত্রকারেরা লিখিয়া গিয়াছেন, “সিকাগোবাসীরা ধর্ম-মহাসভায় স্বামীজী যে মহাসভা প্রচাৰ করেন, যে ‘বস্ময়কর আশার বাণী শ্রবণ কবান, খ্রীষ্টের পর আর কোন প্রাচ্যবাসীর মুখ থেকে পাশ্চাত্য দেশ তেমন কথা শ্রবণ করে নাই। তাব ভাববাণী চিবদিন পাশ্চাত্যের ধর্মোন্মত্ত ও ধর্ম বিস্তারের সহায়করূপে গণ্য হবে, গৃহীত হবে জগতের ভবিষ্যৎ অধ্যাত্মজ্ঞানের প্রধান অবলম্বনরূপে।”

‘শুধু মাত্র কয়েকটি প্রাণস্পর্শী বক্তৃতা এবং ব্যক্তিত্বের বলে জন-মানসের এমন দিগ্বিজয় পৃথিবীতে খুব কমই দেখা গিয়াছে।

এই অপ্রত্যাশিত সম্মান ও খ্যাতিব প্লাবন স্বামীজীর অন্তরে সেদিন কিরূপ প্রতিক্রিয়ার সৃষ্টি করে? প্রসিদ্ধ সংবাদপত্রগুলির স্তম্ভে স্তম্ভে তখন তবণ হিন্দু সন্ন্যাসীর বিজয়গাথা। এই জয়গোবব কিন্তু স্বামীজীর হৃদয়কে ভিতরে ভিতরে ভারাক্রান্ত করিয়া তোলে। ভাবিতে থাকেন, খ্যাতির একি বিড়ম্বনা আজ শুরু হইয়াছে তাঁহার জীবনে? ত্যাগী এবং একান্তচরা সন্ন্যাসী জীবনে মুক্ত বিহঙ্গের মত তিনি ছিলেন স্বাধীন, স্বতন্ত্র। সে জীবন কি আর ফিরিয়া পাঠবেন না? তপস্শায় জীবন, ঈশ্বরবৃত্ত জীবন—তাঁহারও ঘটিতেছে অবসান। আশঙ্কা আসে অন্তরে। আমেরিকায় আসিয়া এ যাবৎ পদে পদে দারিদ্র্য ও প্রত্যাখ্যানের সহিত তাঁহাকে যুঝিতে হইয়াছে—এইবার বুঝি ঈশ্বরের প্রাচুর্য্য তাঁহাকে গ্রাস করিতে চায়।

স্বামীজী রাতারাতি সমগ্র মার্কিন দেশে প্রসিদ্ধ হইয়া উঠিয়াছেন। কেটিপাত্ত গুণগ্রাহিগণ তাঁহার যে কোন আজ্ঞা নিমেষে পালন করিতে সমুৎসুক। এক রাত্রে এক ধনী প্রাসাদে তিনি আতিথ্য গ্রহণ করিয়াছেন। চারিদিকে বিলাসের প্রাচুর্য। রসনাভৃগ্নিকর ভোজ্যভব্যের অবধি নাই। ভোজন ও আপ্যায়ন শেষে সুকোমল শয্যায় শয়ন করিলেন। কিন্তু ঘুম আসিল না। এই বিলাস বৈভবের পরিবেশে তাঁহার হৃৎকণ্ঠ জন্মভূমির স্মৃতি বৃশ্চিকের মত দংশন করিয়া উঠিল। নিরন্ন শিক্ষা-দীক্ষাশীল কোটি কোটি দেশবাসীব হৃৎথে তিনি যুগ্মমান হইলেন। সমস্ত রাত্রি ভূতলে শয়ন করিয়া রহিলেন, নিদ্রা আসিল না।

স্বামী বিবেকানন্দের বার্ত্ত্ত্ব ও বাগ্মিতা তখন সম্মোহনের কাজ করিতেছে। এই সময়ে এক গুণগ্রাহিনী ধনাঢ্য তরুণী স্বামীজীকে নিবেদন করিতে চায় তাঁহার বিত্ত-বিষয় ও কপযৌবন প্রশান্ত কণ্ঠে তিনি উত্তর দেন, “আমার কাছে এমনতর প্রস্তাব করতে নেই। আমি যে সন্ন্যাসী! নিখিল বিশ্বের সমস্ত নারীই যে আমার—মা।”

আমোবকার বক্তৃতা প্রতিষ্ঠানগুলিও মধ্য দিয়া স্বামীজী যেন ঝটিকাবেগে বিভিন্ন অঞ্চলে নিপতিত হইতে থাকেন। বেদান্ত ও মানবধর্মের শাস্ত্রতরু ফুটিয়া উঠে তাঁহার শাক্তদৃষ্ট ভাষণে। সংবাদপত্রে তাঁহাকে অভিহিত করা হয় ‘সাইক্লোনিক হিন্দু’ নামে।

গৌতম বুদ্ধের আড়াই হাজাব বৎসব পরে ভাবত বহির্দেশে এই তাহার প্রথম প্রচাবক ও বাণীবাহককে প্রেরণ করিয়াছে। প্রতীচ্য সভ্যতার অগ্রদূত মার্কিনদেশে তাঁহার সেই বাণী এবার কান পাতিয়া শুনিল।

পৃথিবীর প্রাচীনতম সভ্যতা স্বামী বিবেকানন্দের মাধ্যমে তাহার সত্যাবিষ্কারের অপূর্ব উপহার লইয়া আজ পশ্চিমের দ্বারে উপস্থিত।

আর সেই বিবেকানন্দ হইতেছেন শ্রীরামকৃষ্ণের সন্তান—শ্রীরাম-কৃষ্ণেরই অধ্যাত্মসত্তার তিনি প্রাণময় প্রকাশ। এই শক্তিধর দৃতকে সহসা ফিরাইয়া দিবার উপায় কই ?

প্রতীচ্য সভ্যতাব মৰ্ম্মকেন্দ্র, আমেরিকা তাই বিবেকানন্দকে গ্রহণ করিল। শুধু তাহার বাগ্মিতার নধা দিয়া নয় ব্যক্তিষ্ট, সত্যনিষ্ঠা ও ত্যাগধৃত জীবনের প্রাণে শ্রদ্ধাযুক্ত হইয়াই তাহাকে গ্রহণ করিল।

ইহার জন্ম কিছুটা প্রাথমিক প্রস্তুতিও মার্কিন দেশের ছিল, একথা অস্বীকার করিবার যো নাই। বিবেকানন্দ উর্নাবংশ শতকের শেষ দশকে আমেরিকায় উপস্থিত হন। মার্কিন বুদ্ধিজীবীদের মধ্যে তখন যে মানসিকতা বর্তমান, তাহা তাহার ধর্ম্ম-প্রচারের পক্ষে কিছুটা অনুকূলই ছিল। মনীষী এমার্সন এবং থোরো ইতিপূর্বে তাহাদের বচনায় ভারতীয় ব্রহ্মবাদ ও অতীন্দ্রিয় অনুভূতির সমর্থন জানাইয়া গিয়াছেন। ক্রিষ্টিয়ান সায়েন্স-এর সমর্থকেরা ও কবি হুইটম্যানের আধ্যাত্মিকতাও যেন এজন্ম কিছুটা ভূমি প্রস্তুত করিয়া রাখিয়াছিল।

কবি হুইটম্যানের কবিতায় বুঝি ভারতদূত বিবেকানন্দেরই আসন্ন পদধ্বনির ইঙ্গিত ফুটিয়া উঠিয়াছিল :

হে মোর নগরী.....

ঐ দ্বাখো, আমাদেরই দ্বারে

আসছে ঐ আদি-মাতা।

ভাবার প্রথম কাকলী

শোনা গিয়েছিলো তাঁর নীড়ে,

আর, সমস্ত কাব্যের ছিল সে উৎস-মুখ

সুপ্রাচীন তাঁর বংশধারা ....

ঐ শোন, আসছে সে,

—ব্রহ্মের সন্ততি !”

আবার অপর দিকে দেখি, মার্কিন সমাজে সাধারণ মানুষ ভোগ-সর্বস্ব জীবনের পিছনে ছুটিয়া হইতেছে দিশাহারা, মানসিক ভারসাম্য সে হারাইয়া বসিয়াছে। এই উদ্ভ্রান্ত, অস্থির ক্রান্ত মানুষদের সামনে স্বামীজী হুগিয়া ধরিলেন আত্মিক জীবনের আদর্শ, প্রচার করিলেন ভারত-আত্মার শাস্ত্র বাণী। রামকৃষ্ণের প্রত্যক্ষ অধ্যাত্ম-শক্তির স্পন্দনে তাহা প্রাণবন্ত, বিবেকানন্দের নিজের প্রত্যক্ষ দর্শন ও অনুভূতির প্রত্যয়ে তাহা প্রোজ্জ্বল—মস্তৃচৈতন্যময়!

স্বামীজী তখন প্রচারের উৎসাহে মত্ত। প্রতি সপ্তাহে বার চৌদ্দটি করিয়া বক্তৃতা তাঁহাকে দিতে হয়। এক এক দিন শরীর ও মন ক্লান্তিতে নিস্তেজ হইয়া পড়ে। নূতন বক্তব্যও অনেক সময় যেন খুঁজিয়া পান না। ভয় হয়, তবে কি তাহার জ্ঞানের পুঞ্জি নিঃশেষিত? আবার এই সংশয় ও নৈরাশ্যের মুহূর্ত্তে হঠাৎ হৃদয়ে জাগিয়া উঠে অলৌকিক অনুভূত, প্রত্যয় ও প্রাণের আবেগে উচ্ছল হইয়া উঠেন। এক এক দিন রাত্রে তন্দ্রাবশে শুনিতে পান পরবর্ত্তী দিনের ভাষণটি কে যেন তাঁহার কানের কাছে পরিষ্কাররূপে বলিয়া যাইতেছে। পরের দিনের বক্তৃতায় এই অলৌকিক ভাষণের স্মৃতিই তাঁহাকে সাহায্য করিত।

বিবেকানন্দের চতুর্দিকে এবার আরো ভীড় জমিয়া উঠে। এ ভীড় মুমুক্শু, অধ্যাত্মপন্থী, সংশয়বাদী, আর অজস্র হুজুগ-প্রিয় নরনারীর। সত্যানুরাগী তেজদগ্ধ সন্ন্যাসীর নিকট রবাহৃত জন-সংঘট্ট ভাল লাগে না। জনসভায় দাঁড়াইয়া প্রশ্ন করেন, ‘খৃষ্টান বলে তোমরা পরিচয় দাও, কিন্তু খৃষ্টের আত্মার কি সম্মান তোমরা দিয়েছো? যীশু আবার যদি আসেন তাঁর শয়নের জগ্ন একখণ্ড প্রস্তরও কি আজ তাঁর জুটেবে?’

তীব্র কষাঘাতে পাক্রীদল ক্ষেপিয়া যায়। শ্রোতাদের কাহারো কাহারো চৈতন্য সত্য সত্যই জাগিয়া উঠে, স্বামীজীর কাছে তাহার। করে আত্মসমর্পণ।

স্বাধীনচেতা স্বামীজী কিছুদিনের ভিতর বক্তৃতা-প্রতিষ্ঠানদের কবল হইতে নিজেকে মুক্ত করিয়া নিলেন। ইহার ফলে প্রচুর আর্থিক ক্ষতি হইল, কিন্তু তিনি তাহাতে দৃকপাত করিলেন না। ধনী বন্ধুরা তাঁহার কাজের জন্ত এই সময়ে অজস্র অর্থ দিতে চান, কিন্তু সৰ্ত্ত—তাঁহাদের অনুমোদিত সমাজ ছাড়া স্বামীজী অপর স্থানে মিশিতে পারিবেন না। ক্রুদ্ধ হইয়া তিনি বলিলেন, “শিব! শিব! কখনো দেখেছো কি, পৃথিবীর কোনও বিরাট কাজ ধনীরা করতে সক্ষম হয়েছে? হৃদয় আর মস্তিষ্কই সৃষ্টি করে—টাকার থলির সে ক্ষমতা নেই।”

গঠনমূলক কাজ এখন হইতে শুরু হয়। স্থির করেন, সত্যিকার মুক্তিকামী নরনারী যাহারা, ঘনিষ্ঠ সান্নিধ্যে থাকিয়া তাহাদের মধ্যে বিতরণ করিবেন তত্ত্ব উপদেশ। কয়েকজন দরিদ্র ভক্তের আর্থিক সহায়তা নিয়া কাজ আরম্ভ হয়।<sup>১</sup> নিউইয়র্কের এক সাধারণ অঞ্চলে ঐটিকয়েক ঘর ভাড়া নেওয়া হয়। আসবাবপত্র-হীন কক্ষে পাশ্চাত্য ভক্তগণ পা মুড়িয়া ঘণ্টার পর ঘণ্টা বসিয়া থাকেন। স্থান সঙ্কুলান না হওয়ায় বহু লোক সিঁড়িতে বসিয়াও শোনেন তাঁহার ভাষণ ও ব্যাখ্যা। কিছুদিন পরে, বেদান্ত শিক্ষার এই প্রতিষ্ঠানটি প্রশস্ততর ভবনে স্থানান্তরিত হয়।

এই সময়ে ধীরে ধীরে স্বামীজীর চারিদিকে আসিয়া জুটেন একদল বিশ্বস্ত ভক্ত ও কর্মী। ইহাদের মধ্যে উল্লেখযোগ্য—ম্যাডাম মেরী লুইস ( স্বামী অভয়ানন্দ ), ডাঃ স্মাগ্‌সবার্গ ( স্বামী কৃপানন্দ ), মিসেস ওলি বুল, মিস ওয়াল্ডো, গুডউইন, মিঃ লিগেট, মিস মেরী ফিলিপ, মিসেস আর্থার স্মিথ, মিসেস গুডইয়ার, প্রভৃতি।

ইহাদের উপলক্ষ করিয়া স্বামীজী যে ভাষণ দেন তাহা হইতে সঙ্কলিত হয় তাঁহার রাজযোগ, জ্ঞানযোগ ও ভক্তিযোগ। এই গ্রন্থ কয়টি প্রকাশের পর পাশ্চাত্য সমাজে আলোড়ন পড়িয়া যায়।

১ মেরী লুই বার্ক : স্বামী বিবেকানন্দ ইন্ আমেরিকা।

শিষ্য ও শিষ্যাদের শুধু প্রেরণা দিয়াই তিনি কান্ত হইতেন না। আধ্যাত্মিক সাধনের পথে ঈহাদের তিনি সতর্কভাবে পরিচালিত করিতেন। এই সময়ে বিবেকানন্দের জীবনে ঐশী শক্তির নানা প্রকাশ ঘটিতে দেখা যায়। সিস্টার ক্রিস্টিনের স্মৃতিকথায় ইহার কিছু কিছু উল্লেখ রহিয়াছে। স্বামীজীর বিশ্বস্ত শিষ্য ও লিপিকার গুডউইন সম্পর্কিত এক ঘটনাতে ইহার প্রমাণ মিলে। একদিন গুডউইন জড়বাদের সমর্থন করিয়া স্বামীজীর সহিত তুমুল তর্ক জুড়িয়া দিয়াছেন। কিছুতেই বিতণ্ডার অবসান হইতেছে না। হঠাৎ স্বামীজীর মনশ্চক্ষে গুডউইনের অতীত জীবনের চিত্রগুলি একের পর এক ভাসিয়া উঠিতে থাকে। স্বামীজী সেই ঘটনাবলীর উল্লেখ করিয়া দৃঢ়স্বরে গুডউইনকে বলেন, “তুমি তো এই ধরণের জীবনই যাপন করে এসেছো? তোমার বুদ্ধিতে আর কত ধরবে, বল?”

অতীন্দ্রিয় শক্তির সাক্ষাৎ পরিচয়ে প্রচণ্ড ধাক্কা খাইলেন গুডউইন। জড়বাদ সমর্থন করিয়া যে গলাবাজী করিতেছিলেন,<sup>১</sup> তখন তাহা নীরব হইয়া পড়িল।

নিউইয়র্কে স্বামীজী তাঁহার স্থায়ী সংগঠন বেদান্ত সমিতি<sup>২</sup> স্থাপন কবিলেন। বিশ্বস্ত কয়েকটি শিষ্য-শিষ্যার উপর কন্ঠভার গ্রস্ত করিয়া অতঃপর তিনি প্রচার কার্যের জন্য উপনীত হন ইংল্যাণ্ডে। ইংল্যাণ্ড সতর্ক ও রক্ষণশীল দেশ। কিন্তু এখানেও স্বামীজীর ব্যক্তিত্ব যথেষ্ট আলোড়নের সৃষ্টি করে। বহু ইংরেজ সাধক স্বামীজীর উপদেশ নিয়া অধ্যাত্মপথে অগ্রসর হন।

স্বনামখ্যাত রাজনীতিক নেতা ও মনীষী বিপিনচন্দ্র পাল ১৮৯৬ সালের ফেব্রুয়ারী মাসে ইংল্যাণ্ডে অবস্থান করিতেছিলেন। তাঁহার এক চিঠিতে সেখানকার সমাজে বিবেকানন্দের কন্ঠসাক্ষ্যের পরিচয় রহিয়াছে। তিনি লিখিয়াছেন, “আমি ইতিপূর্বে ‘দি ডেড পুলপিট’ নামক প্রবন্ধ থেকে ‘বিবেকানন্দ-ইজম’ সম্বন্ধে যে অংশটি উদ্ধৃত

১ সিস্টার ক্রিস্টিন : আন্থোপলিশ্‌ড রেজিনিমেল

করেছি, তা থেকেই আপনি অবগত হয়েছেন যে, বিবেকানন্দের প্রচারিত মতবাদের প্রসারহেতু বহুশত ব্যক্তি প্রকাণ্ডভাবে খুঁটান চার্চের বন্ধন ছিন্ন করেছেন।...এছাড়া, আমি বহু শিক্ষিত ইংরেজ ভদ্রলোককে দেখেছি যারা ভারতকে শ্রদ্ধা করতে শিখেছেন এবং ভারতীয় ধর্মমত ও আধ্যাত্মিক তত্ত্ব শ্রবণ করবার জন্য সততই আগ্রহ প্রকাশ করে থাকেন।”

ইংল্যাণ্ডে অধ্যাপক মাক্সমুলার এবং জার্মানীতে দার্শনিক পল ডয়সনের সহিত স্বামীজীর গভীর সৌহার্দ্য স্থাপিত হয়। কিন্তু স্বামীজীর ইউরোপ ভ্রমণের শ্রেষ্ঠ ফল হইতেছে তাঁহার একদল একনিষ্ঠ ভক্তের আত্ম-নিবেদন। মিস মুলার, মিস নোবল (ভগ্নি নিবেদিতা) মিঃ স্টার্ডি ও সেভিয়ার দম্পতি ইহাদের অগ্রতম। এই শিষ্য-শিষ্যাগণ স্বামীজী ও ভারতবর্ষের জন্য নিজ নিজ জীবন উৎসর্গ করিয়া ধন্য হন।

‘আমেরিকার রামকৃষ্ণ মিশন ও শিক্ষাকেন্দ্রের কাজ তখন দিন দিন বাড়িতেছে। প্রধান ভক্তেরা গুরু পতাকা একান্ত নিষ্ঠায় বহন করিয়া চলিয়াছেন। কিন্তু বিবেকানন্দের সম্মুখে যেন নূতনতর জীবনের দৃশ্যপট খুলিয়া যাইতেছে। ভারতবর্ষের হৃৎক-দারিদ্র্য মোচনের জন্য, বিদেশ হইতে সাহায্য সংগ্রহের জন্য আমেরিকায় তাঁহার আগমন। কিন্তু উদ্দেশ্য তাঁহার তো সফল হয় নাই। দেশে তাই ফিরিতে তিনি এবার ইচ্ছুক। ভারতে বসিয়াই যে ভারতকে আজ বাঁচাইতে হইবে! রোগীর সঞ্জীবনী শক্তি রহিয়াছে তাহার অন্তঃসঞ্চারী প্রাণধারায়, সেই শক্তি দিয়াই তাহাকে উজ্জীবিত করিতে হইবে। বিবেকানন্দ এবার ভারত-ভূমির দিকেই দৃষ্টি ফিরাইলেন। কিন্তু সেই স্বভাব-যোদ্ধার অন্তরলোকে আজ যেন নূতনতর, নিগূঢ়তর জীবনের আশ্বাদ।

১৮৯৬ সালের ৬ই জুলাই তারিখে স্বামীজী তাঁহার ভক্ত মিঃ ক্রাজিস লেগেটকে এক পত্র লিখেন। তাঁহার জীবনধারার গুরুত্বপূর্ণ



পরিবর্তনের ইঙ্গিত ইহাতে ফুটিয়া উঠিয়াছে।—“প্রেমময় ভগবান লীলাময়; আমি তাঁহার লীলার সঙ্গী। তাঁহার এই জগতের না আছে যুক্তি, না আছে চন্দ। আর কোন্ যুক্তিই বা তাঁহাকে বাঁধিতে পারে? তিনি লীলাময়, তাঁহার খেলার আগাগোড়াই হাসি-কান্নার খেলা। কি মজা, কি আনন্দ! এই পৃথিবীর খেলার মাঠে স্কুলের ছেলেমেয়েদের যেন তিনি ছাড়িয়া দিয়াছেন। কাহাকে প্রশংসা করবে, কাহাকে তিরস্কার করবে? তাঁহাদের না আছে মাথা, না আছে বুদ্ধি। তিনি আমাদের মাথায় একটু বুদ্ধি ঢুকাইয়া দিয়া আমাদের মাথা কলিয়ে দিতেছেন। এবার কিন্তু আর তামাসা চলবে না। ..তুই একটা জিনিষ আমি এবাব শিখিয়াছি। জ্ঞান ও যুক্তি তর্কের উপরে আছে, ‘অমুভূতি’, ‘প্রেম’, আর ‘প্রেমময়’। সেই প্রেমে রসে পাত্র পূর্ণ করিতে পারিলে আমরা আনন্দে ভরপুর হইব, পাগল হইব।”

বিবেকানন্দ নিজ দেশে ফিরিয়া আসিলেন। “এবার কেন্দ্র ভাবতবর্ষ।” পাশ্চাত্যের শিক্ষিতমহলে চাঞ্চল্য সৃষ্টি করার পর বীর সন্ন্যাসী ভারতের নিস্তরঙ্গ জীবনে তুলিলেন এক প্রচণ্ড আলোড়ন। স্বপ্নময় জাতিব উপব পাড়ল ঝটিকার আঘাত। আত্মবিস্মৃত, পরনির্ভর ভারতবর্ষের সম্মুখে সেদিনকার স্বামী বিবেকানন্দ যেন এক পরম বিস্ময়! এই দেশেরই মধ্যে সেদিন এমন এক বিরাট পুরুষ অভ্যুত্থিত হইয়াছেন, যাহার কণ্ঠ-নিষেধ সমগ্র পাশ্চাত্য দেশকে কাঁপাইয়া তুলিয়াছে, যাহার চরণ-ধূলি নিবার জন্ম আধুনিক সভ্যতা-গব্বী মানুষের দল ভীড় করিয়া দাঁড়াইতেছে। জয়গৌরবদীপ্ত এই সন্ন্যাসীর ললাটে রহিয়াছে ভারতবর্ষেবই আত্মপরিচয়েব তিলকচিহ্ন। ভারতেরই অধ্যাত্মচেতনার মহিমায় তাহা সমুজ্জ্বল। ত্যাগী সন্ন্যাসী বীর সন্ন্যাসী বিবেকানন্দের জীবনে জীবন লাভ করিয়া সমগ্র দেশ সেদিন জাগিয়া উঠিল।

ঐন্দ্রজালিক রামকৃষ্ণের জাহ্নদণ্ড দেশে ও বিদেশে নূতন নূতন দৃশ্যপট উন্মোচন করিয়া চলিয়াছে।

অগণিত দেশবাসী বিবেকানন্দের সম্বন্ধনায় সেদিন উন্মত্ত। স্কুল কলেজের ছাত্র আর দেশীয় রাজ-রাজড়া সবাই হাত মিলাইয়াছে, একযোগে টানিতেছে তাঁহার শোভাযাত্রার গাড়ী। সে এক অপূর্ব দৃশ্য। ধনী-নিধন রাজা প্রজা সকলেরই মধ্যে দেখা দিয়াছে স্বতন্ত্র আনন্দ উচ্ছ্বাস। এই সন্ন্যাসী প্রতিনিধির জয়-গৌরবের পট-ভূমিকায় ভারতবাসী তাহাব নিজের রূপ, নিজের পরিচয়, যেন নূতন কবিতা দেখিয়া নিতে চাহিতেছে। জাতীয় উল্লাস ও গর্বের যে বিস্ফোবণ সেদিন ঘটিয়া গেল, তাহার মধ্য দিয়া আমাদের নব-জাগৃতির ইতিহাসে দেখা দিল এক নূতন পদক্ষেপ।

এই রাজোচিত সম্মান ও সম্বন্ধনার উস্তরে বিবেকানন্দ কহিলেন, “ঐ সম্বন্ধনা আমার নয়, আমাব মধ্য দিয়া দেশবাসী আজ সম্বন্ধনা জানাইয়াছে ভারতের সন্ন্যাস-ধর্মকে, ভ্যাগপুত জীবনকে, আর নিজের অধ্যাত্মশক্তিকে।

রুগ্ন-ক্লান্ত দেহে তিনি স্বদেশে ফিরিয়াছেন—দীর্ঘ অবকাশ ও বিজ্রাম এবার তাঁহার প্রয়োজন। কিন্তু যোদ্ধা সন্ন্যাসীর সত্যকার অবসর কোথায়? জীর্ণ অপটু দেহ নিয়াই কন্মশ্রোতে তাঁহাকে ঝাঁপাইয়া পড়িতে হইল। তাঁহার দেশই যে তাঁহার ঐশীত্রত উদযাপনের প্রধান ক্ষেত্র।

স্বামীজী চাহিয়াছিলেন, আমেরিকায় গিয়া ভারতের অধ্যাত্ম-সম্পদ সেখানে বিলাইবেন, পাশ্চাত্যের ভোগ সর্বস্ব জীবনের সম্মুখে তুলিয়া ধরিবেন আত্মিক জীবনের বার্তা। আর ইহার পরিবর্তে ব্যবহারিক জীবনে দক্ষ, বিস্তবান মার্কিন সমাজ হইতে এদেশের জন্ত আনিবেন আর্থিক উন্নয়নের চাবিকাঠি। নিরন্ন যুতকল্প জনগণকে বাঁচাইয়া তুলিবেন অন্নবস্ত্র ও প্রাণ-প্রাচুর্য্য দিয়া। সে উদ্দেশ্য তাঁহার ব্যর্থ হইয়াছে বটে, কিন্তু প্রকাণ্ড জয়-গৌরব নিয়া তিনি দেশে

কিরিয়াছেন। পাশ্চাত্যদেশে অধ্যাত্ম-ভারতের জয়পতাকা তিনি প্রোথিত করিয়া আসিয়াছেন। ফলে জাতির লাভ হইয়াছে—দুইটি বিরাট বস্তু। একটি, নিদ্রিত ভারতের জাগরণ—অপরটি, ধর্ম-মহাসভার বিজয় ও পাশ্চাত্য ভ্রমণের মধ্য দিয়া আধুনিক ভারতের জনসমাজে বিবেকানন্দের নেতৃত্ব প্রতিষ্ঠা। পাশ্চাত্যের জয়মালা লাভের ফলে দেশের জনমানসের অধিকার অবলীলায় তাঁহার করায়ত্ত হইয়াছে। জাতির আশা ও আকাঙ্ক্ষা আজ তাঁহাতেই কেন্দ্রীভূত হইতে চাহিতেছে। আর এই কেন্দ্রস্থল হইতেই স্বামীজী তাঁহার অধ্যাত্মশক্তির উষ্ণ ধারাস্রোত সমগ্র সমাজ দেহে সঞ্চারিত করিলেন।

দেশকে জাগাইয়া তুলিতে, তাহার প্রাণশক্তির উদ্বোধন করিতে যে প্রয়াস এতদিন করিয়া আসিয়াছেন, তাহা কি এবার সার্থক হইবে? মহান হিমগিরির তুষার স্তূপ এবার তবে কি গলিয়া ঝরিয়া পড়িবে?

দেশবাসী উৎকর্ণ হইয়া বিবেকানন্দের বাণী শুনিল। এ বাণী ভারতাত্মার বাণী, রামকৃষ্ণের অধ্যাত্ম-সন্তানের বাণী পাশ্চাত্যের ধর্মযুদ্ধের অভিজ্ঞতায় ইহা সমৃদ্ধ। ভারতবর্ষের প্রতি ধূলি-কণার প্রতি আঁকায় ইহা ভরপুর, আধ্যাত্মিক ভারতের চেতনায় ইহা মহিমময়। আধুনিক ভারত এমন শক্তি-দৃষ্ট এমন উদ্দীপনাময় ভাষণ আর কখনও শুনে নাই।

স্বামীজী আহ্বান জানাইলেন, “হে আমার ভারত! জাগ্রত হও! কোথায় তোমার জীবনী শক্তি? সে শক্তি যে তোমারই আত্মায়।”...প্রত্যেক ব্যক্তির মতই প্রত্যেক জাতির জীবনেও একটি করিয়া মূল স্রব বর্তমান থাকে। ইহাই তাহার প্রধান ও কেন্দ্রীয় স্রব, ইহাকে কেন্দ্র করিয়াই গড়িয়া উঠে তাহার মহান জীবনের একতান। ভারতবর্ষের এই মূল স্রব রহিয়াছে তাঁহার অধ্যাত্ম-সত্তায়। ইহাকেই ধারণ করিয়া জাতির পুনরুজ্জীবন সাধনের নির্দেশ

তিনি দিলেন। কহিলেন, “তোমার ধর্মের প্রাণশক্তির মধ্য দিয়েই সমাজ সংস্কার আর রাজনীতির কথা প্রচার করতে হবে। প্রত্যেক মানুষকে তার নিজের পথটি বেছে নিতে হয়, তেমনি প্রত্যেক জাতিও তার নিজের পথ গ্রহণ করে। আমরা ভারতবাসী, আমাদের পথ অনেক আগেই বেছে নিয়েছি। সে পথ হলো—অবিনশ্বর আত্মার প্রতি বিশ্বাস।”

ভাষণ শুনিয়া মনে হয় জাতির চৈতন্য উদ্বোধনের জন্য স্বামী বিবেকানন্দ ডুব দিয়াছেন, প্রাচীন ভারতের আত্মার গভীরে। সেখান হইতে প্রাণরস আকর্ষণ করিয়া আনিয়া নব জাগ্রত ভারতবাসীর মানসক্ষেত্রে ভারতধর্মের বীজ বপন করিয়া চলিয়াছেন।

ভারতের এই আধ্যাত্মিক চেতনার বিকাশ শুধু ত্রাহার নিজের জাগরণের জন্য, নিজের স্বাক্ষি সিদ্ধির জন্য নয়। সারা পাশ্চাত্য জগৎও রহিয়াছে ইহারই প্রতীক্ষায়। এই চেতনাকে উদ্ভুদ্ধ করিয়া স্বামীজী ডাক দিলেন, “তোমার হাতে যে শক্তি আছে তা ব্যবহার কর। সে শক্তি এত বিরাট যে, যদি তুমি শুধু তাহা মনে-প্রাণে উপলব্ধি কর ও নিজেকে তার যোগ্য করে তোল, তবে তুমি বিশ্বের আমূল পরিবর্তন সাধন করতে পারবে। কারণ, ভারতবর্ষ হচ্ছে—বিশ্বজগতের মানস-গঙ্গা।”

এদেশের সমাজজীবনে তখন সংস্কার আন্দোলন প্রবল বেগে চলিতেছে। কিন্তু এ আন্দোলন ছিল পাশ্চাত্য শিক্ষা-দীক্ষা হইতে উদ্ভূত। স্বামীজী মনেপ্রাণে বুঝিয়াছিলেন, এ সংস্কার আন্দোলন জাতির মর্ম্মমূলে প্রবেশ করিতে পারে নাই। ভারতের ঐতিহাসিক ধারা এবং সনাতন ধর্মের বিশেষত্ব ও স্বাভাব্য সংস্কারকামীরা বুঝিতে পারেন নাই। তাই ইহাদের সহিত পার্থক্য জানাইয়া নিজ আদর্শ তিনি ঘোষণা করিলেন—“সমাজকে ভেঙে-চুরে সংস্কারকেরা উন্নয়নের যে পথ দেখালেন তা সাফল্যের পথ নয়। এই সংস্কারকদের আমি বলতে চাই, তাদের চাইতে আমি আরও বড় সংস্কারক। তাঁরা

এক-আধটুকু সংস্কার চান—আর সেন্সলে আমি চাই আমূল সংস্কার। আমাদের পার্থক্য সংস্কারের কৰ্ম-পদ্ধতিতে। তাঁদের প্রণালী ভেঙে-চুরে ফেলা—আমার প্রণালী সংগঠন। আমি সংস্কারে বিশ্বাসী নই, আমি স্বাভাবিক এবং মূলগত উন্নতিতে বিশ্বাসী।”

এই ধ্বংসমূলক সংস্কার আর যুক্তিহীন রক্ষণশীলতা—এই দুইটি হইতেই বিবেকানন্দ নিজেকে পৃথক করিয়া নিলেন। বেদান্তের তত্ত্বকে সমাজের সর্বস্বত্বের ছড়াইয়া দিয়া এক অখণ্ড অধ্যাত্মসমাজ তিনি গড়িয়া তুলিতে চান। তামসিক জড়বুদ্ধি ও সামাজিক ভেদ-বৈষম্য এই দেশে এক চরম বিপর্যয় আনিয়াছে। ইহার বিরুদ্ধে স্বামীজী ঘোষণা করিলেন বৈদান্তিক অভেদ-তত্ত্ব। সর্বজীবের অভ্যন্তরে অনুস্রুত রহিয়াছেন শিব। এই শিবের পূজায় জানাইলেন আহ্বান—“যিনি তোমার অন্তরে বাহিরে, তুমি যাহার স্কুলদেহ ও যিনি ‘সর্বত পাণিপাদো’, শুধু সেই বিরাট আত্মার পূজা কর।” জাতি-সংগঠনের জন্ত চাই বৈরাগ্যবান তেজস্বী কৰ্মীদল। এ জন্তও তিনি সেদিন জানান তাঁহার উদাত্ত আহ্বান।

ঈশ্বরামকৃষ্ণের সাধন-তত্ত্বে শক্তি, ভক্তি ও জ্ঞান এই তিনেরই সমন্বয় রহিয়াছে। সর্ব মত ও পথকেও ঠাকুর মিলাইয়া নিয়াছেন। কিন্তু স্বামীজীর মধ্যে যেন তাহার কিছুটা ব্যতিক্রম দেখা যাইতেছে। বিবেকানন্দ তাঁহার পরম প্রিয় অধ্যাত্ম-সন্তান। অদ্বৈতবাদের প্রতি তাঁহার আত্যন্তিক নিষ্ঠা যেন একদেশদর্শিতার পরিচয় দিতেছে। ঠাকুরের সমন্বয়ের বাণীর মূলকথা কি তাঁহার শ্রেষ্ঠ শিষ্য ভুলিয়া বসিয়াছেন?

স্বামীজীর ‘বেদান্তের আদর্শ’ নামক বক্তৃতায় এ প্রশ্নেরই উত্তর সেদিন পাওয়া গেল : “আমি অভিযোগ শুনেছি যে, আমি অদ্বৈত-বাদের কথা খুব বেশী করে বলি আর দ্বৈতবাদের কথা খুব কম বলি। ই্যা, আমি খুব ভাল করেই জানি, দ্বৈতবাদের মধ্যে কি অপরিমেয় ভাব রসের উদ্গাদনা, কি অলীম আনন্দোচ্ছ্বাস রয়েছে। সমস্তই

আমি জানি। কিন্তু এখন আমাদের কঁাদবার সময় নয়--এখন কোমল হবার সময়ও নয়। এই কোমলতা এদেশে যুগ যুগ যাবৎ বর্তমান—আর আমরা যেন তুলার মতই নরম হয়ে গিয়েছি। আজ আমাদের দেশ যা চায়, তা হলো লৌহের পেশী, ইম্পাতের স্নায়ু, বিপুল ইচ্ছাশক্তি, যা অপ্রতিরোধ্য, যা অমোঘ। এতে যদি সমুদ্রের অতল গভীরে নামতে হয়, মৃত্যুর মুখোমুখি দাঁড়াতে হয়, তাতেও ক্ষতি নেই। তাই আজ আমাদের একান্ত প্রয়োজন দৃঢ়তা। এ দেশকে গড়ে তুলবার জন্য, শক্তিশালী ও সুপ্রতিষ্ঠিত করবার জন্য, আবশ্যক অদ্বৈতবাদের আদর্শকে উপলব্ধি করা--একোর আদর্শকে উপলব্ধি করা, আয়ত্ত করা। আমাদের চাই বিশ্বাস, বিশ্বাস—প্রবল আত্মবিশ্বাস।”

১৮৯৭ সালের ১লা মে স্বামীজী বলরামবাবুর ভবনে শ্রীরামকৃষ্ণের গৃহী ও সাধু ভক্তদের এক সভা আহ্বান করিলেন। সকলের অনুমোদনক্রমে স্থাপন করা হইল ‘রামকৃষ্ণ মিশন’। বিবেকানন্দ হইলেন ইহার মূল সভাপতি আর স্বামী ব্রহ্মানন্দ কলিকাতা কেন্দ্রের সভাপতি।

মিশন প্রতিষ্ঠিত হইল বটে, কিন্তু গুরুভাইদের অনেকে প্রথমটায় স্বামীজীর আদর্শ ও কর্মসূচী সোৎসাহে গ্রহণ করিতে পারিতেছেন না। কাহারও কাহারও মনে নানা দ্বিধা দ্বন্দ্ব আসে, প্রশ্ন জাগে—‘জীব-সেবা, লোকশিক্ষা, সভা-সমিতি এসব কি শ্রীরামকৃষ্ণের অতিপ্রেত ছিল? নিজের কথা-বার্তায়, উপদেশে, আচরণে ঠাকুর কি ঈশ্বর উপলব্ধির উপরই সর্বদা জোর দিতেন না? স্বামীজীর পথে চলতে গিয়ে ঠাকুরের পথ থেকে কি তারা দূরে সরে যাচ্ছেন না?

শ্রীরামকৃষ্ণের উপদেশের নূতন ভাষা করিতেছেন বিবেকানন্দ। কেউ কেউ এ ভাষ্যের বিরুদ্ধে মত প্রকাশ করিলেন।

স্বামীজী উত্তেজনায় ফাটিয়া পড়িলেন। কহিলেন, “অনন্ততাবয়ব ঠাকুরকে তোরা বুঝি তোদের বুদ্ধির গণ্ডিতে বন্ধ করে রাখতে চাস? ”

তা হবে না। আমি এ গণ্ডি ভেঙ্গে তাঁর ভাব সারা পৃথিবীময় ছড়িয়ে দিয়ে যাব। আমাদের তিনি কখনও তাঁর পূজা প্রচার করতে বলেন নি। ধ্যান ধারণা আর ধর্মের যে সব উঁচু তত্ত্ব আমাদের শিখিয়ে গেছেন, সেগুলি উপলব্ধি করে জগৎকে শিক্ষা দিতে হবে। মনে করিসনি, আমি আব একটা নূতন দল স্থাপন করতে বাসেছি। প্রভুর পদতলে আশ্রয় পেয়ে আমরা সবাই ধন্য হয়েছি। এবার ত্রিজগতের লোকের কাছে তাঁর ভাব বিতরণ করতে হবে। একাজের জন্তই যে আমাদের জন্ম।”

ইহার পর স্বামীজী দৃঢ় কণ্ঠে যাহা বলিলেন, তাহা আত্মপ্রত্যয়ের শক্তিতে উদ্ভুদ্ধ, আর ঠাকুরের সাক্ষাৎ প্রেরণায় সমুজ্জ্বল। বলিলেন, “জ্ঞাথ্, প্রভুর দয়ার বহু নিদর্শন আমি এ জীবনে পেয়েছি। বেশ অনুভব করেছি, তিনি আমার পেছনে দাঁড়িয়ে এসব কাজ করিয়ে নিচ্ছেন। যখন খেতে না পেয়ে আমি গাছতলায় পড়ে থাকতুম, যখন কোপীন বাঁধবার কাপড় পর্যাপ্ত ছিল না, যখন এক পয়সাও সম্বল নেই অথচ পৃথিবীটা ঘুরবো মনে করেছি, তখনও দেখেছি তাঁর দয়ায় যেখানে আমি গিয়েছি, সেখানেই সাহায্য পেয়েছি। আবার যখন বিবেকানন্দকে দেখবার জন্ত সিকাগোর রাস্তায় মেয়ে মন্দর গাঁদি লেগে যেত তখনও তাঁরই দয়ায় তত মানসম্মত—যার শতাংশের একাংশ পেলেও সাধারণ লোক একেবারে ক্ষেপে যায়—অনায়াসে হজম করেছি। প্রভুর ইচ্ছায় যেখানে গেছি, বিজয় লাভ করেছি। এখন চাই এই দেশের জন্ত কিছু করতে। তোরা সন্দেহ ছেড়ে আমার কাজে সাহায্য কর, দেখবি তাঁর ইচ্ছায় সকলেরই কল্যাণ হবে।”

আর একদিনের বাদামুবাদেও স্বামীজী গঞ্জিয়া উঠিয়া ধ্যান ভজন-পরায়ণ, ঈশ্বর দর্শনের জন্ত ব্যাকুল গুরুভাইদের বলেন, “মনে করেছিস এতেই তোদের মুক্তি আসছে হাতেব মুঠোয়? আর শেষের দিনে রামকৃষ্ণাকুর এসে তোদের হাতে ধরে একেবারে গোলোকের টেনে নিয়ে যাবেন! আর জ্ঞানের চর্চা, লোকশিক্ষা এবং আর্ন্ত অনাখের

সেবা, এ সব মায়া—কেননা পরমহংসদেব ওসব করেননি। আর কাকে কাকে নাকি বলেছিলেন, ‘আগে ভগবান লাভ কব্—তারপব আর সব। পরের উপকাব করতে যাওয়া অনধিকার চর্চা’—যেন ভগবান লাভ কবা মুখের কথা। ভগবান একটা খেলনা কিনা যে, খুঁজলেই মুঠোব মধ্যে এসে পড়বে।”

বিবেকানন্দ মনেপ্রাণে বিশ্বাস করেন, ঠাকুর শ্রীরামকৃষ্ণ ঐশী কৰ্ম্মের মহানায়ক। ঠাকুরের ককণাঘন রূপটিই তাঁহার অমৃতের চির-ভাস্বর হইয়া রহিয়াছে। তাই তাঁহার শ্রীমুখের বাণী—শিবজ্ঞান জীবের সেবা স্মরণ রাখিয়াই ব্যাকুল হইয়াছেন সেবাধর্ম্ম অনুসরণের জন্ত, কৰ্ম্মযোগের একটা ভিত্তিভূমির জন্ত। ককণাঘন ঠাকুরের জীব-প্রেমের ভিত্তিতে স্বামীজী তাঁহার সেবাধর্ম্মের নব ব্যাখ্যা—কৰ্ম্মযোগানুষ্ঠানের নব পরিকল্পনা স্থির করিলেন।

• গুরুভ্রাতারা বিশ্বাস করিতেন, ঠাকুর তাঁহার প্রিয়তম সম্বান স্বামীজীর মধ্য দিয়াই তাঁহার লীলা প্রকটন করিতেছেন। অপার স্নেহ ভালবাসায় ও নেতৃত্ব শক্তিতে স্বামীজীও তাঁহাদের বাঁধিয়া রাখিয়াছেন। কিন্তু তবুও সন্দেহের যে ছায়াপাত মাঝে মাঝে হয়, আজ তাহা দূরীভূত হইল।

ইহার পর দেখা যায়—দৃশ্যপট একবারে বদলাইয়া গিয়াছে। যে রামকৃষ্ণানন্দ ঠাকুরের পূজা ও ভোগরাগ ছাড়িয়া বার বৎসরের মধ্যে একদিনও মঠের বাহরে যান নাই, তিনি মাজাজে প্রচার-কার্য্যে বাহির হইলেন। অখণ্ডানন্দ মুর্শিদাবাদের ছুঁতিল্লি ত্রাণকার্য্যে আত্মনিয়োগ করিলেন। সাবদানন্দ এবং অভেদানন্দ ইতিপূর্বে প্রচারের উদ্দেশ্যে ভারতের বাহিরে চলিয়া গিয়াছেন। লোকাহতে তৃতী ‘মিশনের’ প্রকৃত ভিত্তি এইবার ধীরে ধীরে গড়িয়া উঠিল।

আমেরিকা হইতে স্বামীজী যে অর্থ সংগ্রহ করিয়া আনেন, মঠ নির্মাণের উদ্দেশ্যে তাহা দ্বারা পয়তাল্লিশ বিঘা জমি ক্রয় করা হয়। অথচ এই মঠ ও সেবা-সংস্থার এই ভিত্তিকে গোড়াতেই তিনি



কিন্তু প্রয়োজনবোধে উড়াইয়া দিতে চাহিয়াছিলেন। কলিকাতায় তখন প্লেগের মহামারী শুরু হইয়াছে জনগণ আতঙ্কে অস্থির। মঠের কর্মীদের স্বামীজী সেবাকার্য্যে উদ্বুদ্ধ করিতেছেন, এমন সময়ে একজন প্রশ্ন তোলেন, প্রচুর অর্থ ছাড়া এ কাজ সম্ভব নয়। কিন্তু সে অর্থ কোথা হইতে পাওয়া যাইবে ?

মহাবৈরাগী বিবেকানন্দ তৎক্ষণাৎ উত্তর দিলেন, “প্রয়োজন হলে এখনি মঠের সবটা জমি বিক্রি করে দেবো, কাজ চালিয়ে যাবো। আমরা ফাঁকির, মুষ্টিভিক্ষা কবে আর গাছতলায় শুয়ে দিন কাটাতে পারি। যদি জায়গা জমি বিক্রয় করলে হাঙ্গাব হাজার লোকের প্রাণ বাঁচাতে পারি, তবেই তো এসব সার্থক। নইলে কিসের এই জায়গা, কিসের জমি ?” সারা জীবনের আদর্শকে নিঃশেষে অবলুপ্ত করার এমন সাহস ও মনোবৃত্তি কয়জনেব আছে ? ভাগ্যক্রমে সেবাত্রতীদেব কল্প উদ্যাপনে এই চরম ব্যবস্থাও প্রয়োজন দেখা দেয় নাই।

সেদিন বিবেকানন্দ এক ভক্তকে বেদান্ত পড়াইতেছেন। এমন সময় গিরিশ ঘোষ সেখানে আসিয়া উপস্থিত। স্বামীজী তাঁহাকে উদ্দেশ্য করিয়া রহস্যচ্ছলে কহিলেন, “জি-সি, তুমি তো এসব কিছুই পড়লে না, শুধু কোষ্টো বিষ্টু নিয়েই দিন কাটালে।”

গিরিশচন্দ্র উত্তর দিলেন—“স্বামীজী, ওসবে তোমারই বেশী প্রয়োজন। কারণ, তোমাকে দিয়েই ঠাকুর লোকশিক্ষা দিতে চেয়েছিলেন।”

তারপর গিরিশচন্দ্রের কৌশলে এক বিচিত্র দৃশ্যের অবতারণা হইল। গিরিশ মুচকি হাসিয়া ধীরে ধীরে বলিতে আরম্ভ করিলেন, “আচ্ছা নরেন, তুমি তো বেদবেদান্ত চের পড়েছ, কিন্তু তাতে অগণিত হুঃখীরা হুঃখ, বুদ্ধকুর আর্তনাদ, আর পাপাচাবগুলো নিবারণিত হয় কি ?” সঙ্গে সঙ্গে প্রতিভাবান নাট্যকার তাঁর অনবদ্য ভাষায় হুঃখ দারিদ্র্যাক্লিষ্ট বাস্তব জগতের এক হুঃসহ, বীভৎস চিত্র আঁকা শুরু

করিলেন। স্বামীজীর হৃদয় ততক্ষণে বেদনায় বিকোচে অধীর হইয়া উঠিয়াছে। নয়নের উদ্গত অশ্রু গোপনের জন্ত তিনি দ্রুতপদে কক্ষ হইতে বাহির হইয়া যান। গিরিশ তখন উপস্থিত ভক্তটিকে যে কথাটি বলিলেন, বিবেকানন্দের অধ্যাত্ম-জীবনের তাহা এক চমৎকার ভাষ্যস্বরূপ। বলিলেন, “দেখলি তো তোর গুরুর হৃদয়টা! এই যে পরের হৃৎখে এমন অশ্রুমোচন, এই যে মহাপ্রাণতা- এই জন্তই আমি তাঁকে বড় বলে মানি, তাঁর বিদ্রোহবুদ্ধির জন্ত নয়! হৃৎখ-হৃদশার কথা যেই শোনা, অমনি বেদ-বেদান্ত ফেলে উঠে যাওয়া। সমস্ত বিদ্রোহ-বুদ্ধি যেন পরপ্রমে গলে গেল। তোদের স্বামীজী যেমন জ্ঞানী ও পণ্ডিত, তেমনি ঈশ্বরভক্ত ও লোকসেবক।”

১৮৯৮ সালের জুলাই মাস। উত্তর ভারতের বিভিন্ন স্থানে ভ্রমণ করার পর স্বামীজী অমরনাথ দর্শনে রওনা হইলেন। সঙ্গে রহিয়াছেন স্নেহধরা শিষ্যা নিবেদিতা। বুটেন-কন্যা মিস্ মার্গারেট নোবল একদিন স্বামীজীর আত্মিক প্রেরণায় উদ্বুদ্ধ হন এবং স্বামীজীকে গুরুরূপে বরণ করেন। তারপর গুরুর মাতৃভূমি ভারতের সেবায় নিজেকে করেন নিবেদন। নাম হয় তাঁর নিবেদিতা। এ সময়ে স্বামীজীর শিক্ষা ও প্রেরণায় সাধিকা নিবেদিতার আত্ম-নিবেদনের সার্থকতম রূপটি যেন মূর্ত হইয়া উঠিতেছে। স্বামী বিবেকানন্দের মানস-কণ্ঠ্যরূপে ঘটিতেছে তাঁহার আত্মপ্রকাশ।

নিবেদিতার আগে কোন পাশ্চাত্য রমণী হিন্দুধর্মের সম্মানসম্ভ্রম গ্রহণ করে নাট এদিক দিয়া তিনি অনন্য। এই পাশ্চাত্য-শিষ্যার জীবনে যেটুকুও বা ভাবালুতার স্পর্শ বর্তমান ছিল স্বামীজীর কঠোর নিয়ন্ত্রণ ও সাধন-নির্দেশ তাহা নিকরূপে ভুজিয়া দিয়াছিল।

স্বামীজী চাহিয়াছিলেন, নিবেদিতা হিন্দু নারীদের শিক্ষায় ব্রতী হোক, কায়মনোবাক্যে শুদ্ধাচারিণী হিন্দু নারীরূপে গাড়িয়া উঠুক। এ বিষয়ে স্পষ্ট নির্দেশও দিয়াছিলেন ‘তোমার এখন চিন্তায়, ভাবে, অভ্যাসে ও প্রয়োজনে সম্পূর্ণ হিন্দু হইতে হইবে। তোমার জীবনকে

এখন ভিতরে বাইরে নৈষ্ঠিক ব্রাহ্মণ-ব্রহ্মচারিণীর আদর্শে গঠিত করিতে হইবে। যদি তোমার খুব প্রবল আগ্রহ থাকে তবে উপায় ঠিক জুটিয়া যাইবেই। কিন্তু তোমার অতীত জীবনটাকে ভুলিতে হইবে—এমন কি তার স্মৃতিটুকু পর্য্যন্ত তুমি রাখিতে পারিবে না।” নিবেদিতা ছিলেন স্বামীজীর চরণে উৎসর্গীত পাশ্চাত্যের শ্রেষ্ঠ অর্ঘ্য। গুরু তাঁহার এই শিষ্যাকে ভারতীয় ধর্ম ও সমাজের সেবায় এক যোগিনীরূপে গাড়িয়া তুলিয়াছিলেন।

অমরনাথে যাওয়ার কালে দেখা যায় স্বামীজীর এক অদ্ভুত রূপান্তর। অদ্বৈতবাদের পতাকাবাহী সেই যোদ্ধা সন্ন্যাসী আর নাই। এখন তিনি এক তীর্থচারী তক্ত সাধক, প্রভু অমরনাথের নিষ্ঠাবান উপাসক। শ্রীরামকৃষ্ণের ভক্তি-আপ্নুত সত্তাখানি যেন তাঁহাতে এবার সঞ্চারিত হইয়াছে। গুরুদেবের এই নতুন মূর্তি ও দিব্য কমিনীয়তা দর্শনে সেদিন শিষ্যা নিবেদিতার বিস্ময়ের অন্ত ছিল না।

স্নানান্তে অমরনাথেব তুষার-লঙ্ঘের সম্মুখে স্বামীজী সাষ্টাঙ্গে প্রণত হইলেন। গুহামধ্যে শত শত ভক্তের কণ্ঠে উদ্গীত হইতেছে স্তবগান। এই স্তবগানের অনুরণন চলিয়াছে আগ্রহাকুল দর্শনার্থীদের হৃদয়ে। শিব বিগ্রহের দর্শনে ভাগ্যবান সাধকেরা লাভ করিতেছেন দিব্য অম্লভূত।

প্রভু অমরনাথের দিব্য দর্শন পাইলেন স্বামীজী, ধ্যানাবিষ্ট দেহ হারাইয়া ফেলিল বাহুদ্ব্যান। বহুক্ষণ পরে চেতনা ফিরিয়া আসিলে দেখা গেল, চোখ মুখ স্বর্গীয় আনন্দের ছটায় উদ্ভাসিত।

সঙ্গীরা বার বার প্রশ্ন করেন, অতীন্দ্রিয় লোকের কোন্ দর্শন কোন্ অভিজ্ঞতা স্বামীজীর হইয়াছে। কিন্তু উত্তরে তিনি কোন কিছুই সেখানে প্রকাশ করিলেন না।

উত্তরকালে ঘনিষ্ঠ মহলে স্বামীজী এই প্রশ্নে বলিতেন—স্বয়ং অমরনাথ তাঁহাকে কৃপা করিয়া এই সময়ে দর্শন দেন এবং প্রভু

তাঁহাকে ইচ্ছামৃত্যুর বরও প্রদান করেন। সমাধিমগ্ন মহাযোগী শঙ্কর চিরদিনই বিবেকানন্দের উপাস্ত। তাঁহার দিব্য দর্শন সেদিন স্বামীজীর সর্বসম্মুখ আনন্দময় অল্পভূতির তরঙ্গ তুলিয়া দেয়। অন্তর্লোকে ‘শিব শিব’ ধ্বনি নিবন্তর ধারায় স্পন্দিত হইতে থাকে।’

অমরনাথ হইতে নামিয়া আসিয়া বিবেকানন্দ আবাব এক নূতনতর ভাবময় রাজ্যে প্রবেশ করিলেন। আত্মশক্তির ধ্যানে দেহ-মন প্রাণ তখন তন্ময় হইয়া উঠিয়াছে। তিনি দেখিতেছেন, চাবিদিকে জগজ্জননী মহামায়ার লীলা প্রকটিত, আব স্বামীজী যেন তাঁহাবই অঙ্কেণ এক ক্ষুদ্র শিশুটি হইয়া বহিয়াছেন। মুখে নিরন্তর বামপ্রসাদী সুরের গুনগুনানি, আর অধরে স্বর্গীয় আনন্দের উচ্ছ্বাস।

শিষ্যদেব একদিন বহিলেন, “যে দিকে ফিরাচ্ছি, কেবলই মায়ের পরাভয় মূর্ত্তি দেখছি। তিনি যেন আমায় ছোট ছেলের মত করে, নিজের হাতে ধরে নিয়ে, বেড়িয়ে বেড়াচ্ছেন।”

মাতৃসাধকের অন্তরে তখন ভক্তির প্রবল প্রস্রবণ বহিতেছে। কাশ্মীরেব ডাল-ভ্রূদের উপর হাউসপোটে অবস্থান করিতেছেন। মুসলমান মাঝির কত্যাটিও তাঁহার চোখে যেন আত্মশক্তির এক কল্যাণময়ী প্রকাশ। জননী উমা জানেন যখন এই বালিকা মুসলমান কুমারীটিকে তিনি অর্চনা করিতে এসিতেন, ভক্ত ও দর্শনার্থীদের নয়ন অশ্রুসজ্জল হইয়া উঠিত।

ধ্যান-তন্ময়তার মধ্য দিয়া ক্রমে বিবেকানন্দের হৃদয়ে জাগিয়া উঠে ব্রহ্মময়ী মহাকালীর উপলব্ধি। ‘জননী মহাকালী’ নামক কাব্য-বন্দনাটি এই সময়ে তাঁহার লেখনী হইতে নিঃসৃত হয়। ভাবাবিষ্ট অবস্থায় ইহা রচনা করিবার পরই স্বামীজীর বাহ্য চেতনা দীর্ঘ সময়ের জন্য বিলুপ্ত হইয়া যায়।

অদ্বৈতবাদী, বেদান্তকেশরী স্বামীজীর অন্তর এখন মাতৃধ্যানে

ভরপুর। আত্মশক্তির প্রলয়ঙ্করী মূর্তির উপাসনা যেন তাঁহাকে পাইয়া বসিয়াছে। এই সময়ে প্রায়ই বলিতেন, “ভীমার উপাসনা দ্বারাই যে ভয় থেকে পরিত্রাণ পাওয়া যায়, অনন্ত জীবন লাভ করা যায়। মৃত্যুকে চিন্তা কর — লোলবসনা কালীকে ধান কর। মা-ই স্বয়ং ব্রহ্ম। তাঁর আঘাত, অভিশাপও যে আশীর্ব্বাদ! হৃদয়টিকে শ্মশান করে ফেল। তবেই না মার দেখা পাবে।”

‘নাচুক তাহাতে শ্যামা’ কবিতায় স্বামীজীর অন্তর্লোকে উদ্ভাসিত এই সংহারকপিণী তত্ত্বটি ফুটিয়া উঠিয়াছে :—

সত্য তুমি মৃত্যুরূপা কালী,  
সুখ বনমালী তোমার ছায়া  
করালিনী কর কণ্ঠচ্ছেদ,  
হোক মায়া ভেদ—  
সুখ স্বপ্নে দেহ দয়া ॥

স্বামীজী সেদিন কাশ্মীরের ক্ষীভবানী দেবী-বিগ্রহ দর্শন করিতে আসিয়াছেন। কি এক দৈবী মায়ায় এই প্রাচীন বিগ্রহের প্রতি তিনি খুব আকৃষ্ট হইয়া পড়েন। কয়েকদিন মায়ের মন্দিরে বসিয়া নিবিষ্ট হন পূজা ও ধ্যান-জপে।

একমনে সেদিন মন্দিরে বসিয়া জপ করিতেছেন। এক সময়ে দৃষ্টি নিবদ্ধ হইল ভগ্ন দেউলের উপর। বিধর্ম্মীর আক্রমণ ও অত্যাচারে স্থানে স্থানে ইহা বিধ্বস্ত হইয়াছে। এক অব্যক্ত বাথায় সাধকের অন্তর বার বার গুম্মারিয়া উঠে। মনে খেলিয়া যায় চিন্তার ঝলক, “মায়ের ভক্তেরা মন্দির ও বিগ্রহের এই অত্যাচার অবমাননা কি করিয়া সহ্য করেছে? আমি সে সময়ে উপস্থিত থাকলে কিছুতেই এটা ঘটতে দিতুম না, নিজের প্রাণ আহুতি দিয়ে করতুম মায়ের মন্দির রক্ষা।”

সহসা শোনা যায় এক অলৌকিক কণ্ঠস্বর!—“ওরে, আমার মন্দির ভেঙ্গেছে, তোর তাতে কি? তুই কি আমায় সর্বত্র রক্ষা করিস,—না আমিই তোকে রক্ষা করি? আমার ইচ্ছায় কি এখানে সাত-তলা স্বর্ণখচিত মন্দির এখনি গড়ে উঠতে পারে না?”

বিবেকানন্দ চমকিয়া উঠিলেন। এই দৈববাণীর আঘাত তাঁহার অন্তর-সত্তায় তুলিল প্রচণ্ড আলোড়ন। সত্যই তো। আত্মাশক্তি, জগজ্জননী যিনি, সর্বশক্তির উৎস যিনি, তাঁহার শক্তিকে এমন সীমিত বলিয়া তিনি ভাবিবেন কেন? কেন তাঁহার এই ধ্বংসতা? মায়ের নিরাপত্তা বিধান তিনিই করিবেন, কেনই বা তাঁহার এই অহংবোধ? মায়ের সংসার মা-ই তো চালাইয়া থাকেন। পরাশক্তি তিনি—তাঁহার শক্তিতে বিশ্বব্রহ্মাণ্ড বিধৃত। গ্রহ-তারা-দল তাঁহারই প্রেমের সূত্রে গাঁথা। তাঁহারই জ্ঞানে সর্বসৃষ্টি চৈতন্যময়, স্পন্দিত। বিশ্বব্রহ্মাণ্ডের এক কোণে, ক্ষুদ্র অঙ্গনে ক্রৌড়ারত শিশু, এই বিবেকানন্দের শক্তি সত্যই কতটুক?

ক্ষীরভবানী মন্দিরের অলৌকিক অভিজ্ঞতা স্বামীজীর জীবনে এক নূতন অধ্যায়ের সূচনা করিয়া দেয়। ত্রীনগরে যখন ফিরিলেন, সঙ্গীরা তাঁহার চোখে মুখে দিব্য জ্যোতির আভা দেখিয়া চমকিয়া উঠিলেন।

দেবী ভবানীর প্রসাদীফুল সকলের মাথায় ঠেকাইয়া, ভাব গদগদ স্বরে, বিবেকানন্দ বলিলেন, “ওরে, এখন আর ‘হরি ঠু’ নয়। এখন আমার শুধু—‘মা’ আর ‘মা’। মা যে নিজে আমায় বৃহত্তম সত্যটি বুঝিয়ে দিলেন, তাঁর সংসার তিনি নিজেই দেখছেন, আমার কেন একে রক্ষা করবার এমন স্পর্ধা? তবে স্বদেশের ভাবনা ভাব্বারই বা আমার কি দরকার? ব্রহ্মময়ী মায়ের কোলে আমি যে একটি ক্ষুদ্র সন্তান মাত্র!”

তারপর বিশ্বয়াবিষ্ট শিষ্যদের লক্ষ্য করিয়া কহিলেন, “আর যা

কিছু বলবার ব্যাপার আছে তা প্রকাশ করতে পারতেন। বলার আদেশ নেই।”

সকল মায়িক আবরণের উর্দ্ধে নিজের অধ্যাত্ম-সত্তাকে প্রসারিত করিয়া দিতে বিবেকানন্দ এবার প্রয়াসী হইয়াছেন। ব্যবহারিক জীবনের চারিদিকে বহুতর কর্মের তন্তু জড়ানো। ক্ষীর-ভবানীর কলাগ-বাগী আজ সেগুলি শিথিল করিয়া দিল।

অন্তরের অমৃত্তলে স্বামীজী উপলব্ধি করিতে চাহিতেছেন, আব তিনি কোন ধর্ম্মান্দোলনের স্রষ্টা নহেন, জননেতা নহেন, তিনি এখন সর্ব মায়া,মাহ-ছিন্ন সন্ন্যাসী -জগজ্জননীর কোলে উপবিষ্ট তিনি এক গৈবাগী বালক।

ধানভস্ময় স্বামীজী এই সময়ে প্রায়ই একলা থাকিতে পছন্দ করিতেন। ভাবাবেশে মাঝে মাঝে কোথায় কোন সুদূবে যেন অদৃশ্য হইয়া যাইতেন।

একদিন সঙ্গীরা বিস্মিত হইয়া দেখেন কোথা হইতে মস্তক মুগুন করিয়া এক দীন সন্ন্যাসীর বেশে তিনি আসিয়া উপস্থিত। মুখে স্বরচিত ‘জননী মহাকালীর’ শ্লোকগাথা। মায়ের প্রলয়ঙ্করী শক্তির বর্ণনা দিতে গিয়া বলিয়া উঠিলেন, “জাখ্, এর প্রত্যেকটা কথা সত্য। আর আমি তা কাজেও প্রমাণ করেছি। জাখ্ আমি মৃত্যুকে বরণ করেছি।”

মায়ার সূক্ষ্মতম আবরণ তিনি দূর করিয়াছেন, সর্ব বন্ধন-জাল করিয়াছেন ছিন্ন,— এই কি তাঁর মৃত্যুবরণ ?

বেলুড়ে সেদিন মঠ স্থাপনের উৎসব দিবস। গঙ্গাস্নান করার পর স্বামীজী ঠাকুরের ভস্মান্ধিপূর্ণ তাম্র আধারটি শিরে বহন করিয়া চলিলেন। নূতন মঠে কবা হইল ইহার প্রতিষ্ঠা।

এই সময়ে তিনি এক সন্ন্যাসীকে বলিয়াছিলেন, “ঠাকুর আমায়

বলেছিলেন, ‘তুই কাঁধে করে আমায় যেখানে নিয়ে যাবি, আমি সেখানেই যাবো, সেখানেই থাকবো—সে গাছতলাই কি আর কুঁড়ে ঘরই কি?’ সেজগেই আজ আমি নিজেই এই আত্মারামের কোটা মাথায় বয়ে নিয়ে এলাম।”

মঠের ব্রহ্মচারী শিষ্যদের অন্তরে সন্ন্যাস জীবনের ত্যাগপূত মহিমা স্বামীজী সর্বদা কীৰ্ত্তন করিতেন। জীবসেবার মূল তত্ত্বটিও তাহাদের অন্তরে প্রবেশ করাইয়া দিতেন। তাঁহার তেজোগর্ভ বাণীতে তরুণ শিষ্যদের মধ্যে জলিয়া উঠিত ত্যাগ ও আত্মবিশ্বাসের অগ্নিশিখা।

উৎকর্ণ হইয়া তাহারা শুনিত স্বামী বিবেকানন্দের অভয় বাণী, “ওরে, ভয় পাস্নে। জগতের ইতিহাস হচ্ছে কতকগুলো স্বাধ্ব-শক্তিতে বিশ্বাসমান লোকের ইতিহাস। প্রকৃত বিশ্বাসই ভেতরকার দৈবীশক্তিকে জাগ্রত করে তোলে। ..মনে রাখিস, গুটিকয়েক শক্তিমান লোক জগৎ টলমল করে ফেলতে পারে।”

স্বামীজীর দৃষ্টিতে তাঁহার গুরুর নামাঙ্কিত মঠ ও মিশন ছিল জীবসেবা ও দীক্ষারোপলব্ধির পবিত্রভূমি। ইহাদের স্বাতন্ত্র্য বৈশিষ্ট্য ও গৌরবকে কোন মতেই ক্ষুণ্ণ হইতে দিতেন না। এ বিষয়ে একদিন দৃপ্তভঙ্গীতে তিনি তাঁহার মতবাদ ঘোষণা করিয়াছিলেন—“জ্ঞাখো, মঠের ব্যাপারে কিন্তু গৃহস্থদের কোনই কর্তৃত্ব চলবে না। সন্ন্যাসীরাও টাকাওয়ালা লোকের সঙ্গে ব্যক্তিগত সম্পর্ক রাখবে না। গরীবদের সাথেই তাদের কারবার। গরীবদেরই যত্ন করবে, ভালবাসবে ও যথাসাধ্য সেবা করবে। এ দেশের অধিকাংশ মঠ ও সন্ন্যাসী সম্প্রদায় বড় মানুষের দাসত্ব করেছে—তাদের দয়ার উপর নির্ভর করেছে, তাই তো তারা উচ্ছন্ন গেছে। প্রকৃত সন্ন্যাসী তাদের ত্রিসীমায় যাবে না। কাম-কাঙ্ক্ষনের দাস যারা, তারা কি করে কাম-কাঙ্ক্ষনত্যাগীর প্রকৃত শিষ্য, প্রকৃত বান্ধব হতে পারে?”

তরুণ ব্রহ্মচারীদের সন্ন্যাস নির্ভার প্রতি বিবেকানন্দের দৃষ্টি ছিল



সদা জাগ্রত, শাসন ছিল অতি কঠোর। তিনি বলিতেন, “একথাটা যেন ভুলো না। যখন দেখবে সন্ন্যাস-আদর্শ থেকে পিছিয়ে পড়ছ, এ কঠোর জীবনের পক্ষে তুমি অল্পপযুক্ত, তখন গার্হস্থ্য আশ্রমে প্রবেশ করা বরং ভাল, কিন্তু সন্ন্যাসাশ্রম কলুষিত করা অমুচিত। সকালে উঠবে, ধ্যানরূপ করবে, আর খুব তপস্যা লাগাবে। স্বাস্থ্য আর সময়মত খাওয়া-দাওয়ার উপব নজর রাখবে। আর কথাবার্তা কইবে শুধু ধর্ম্ সম্বন্ধে। সাধনাবস্থায় এমন কি খবরের কাগজ পড়া বা গৃহস্থদের সঙ্গে মেশাও সমীচীন নয়।”

সাধনার্থী তরুণ ব্রহ্মচারীদের জন্য এমন কঠোর বিধিনিয়মই এ সময়ে তিনি প্রবর্তন করিয়া যান।

সে-বার কাশ্মীরের তীর্থদর্শন হইতে ফিরিয়া আসিয়া স্বামীজী দেখেন একটি তরুণ ব্রহ্মচারী মা-সারদামণিব আশ্রমে কাজকর্ম দেখাশুনা করিতেছে। ব্রহ্মচারীটি সৎ এবং শুদ্ধস্ব, কিন্তু স্বামীজী কাতারো কথায় নিবৃত্ত হইবার পাত্র নন। তৎক্ষণাৎ গজিয়া উঠিয়া তিরস্কার করিতে লাগিলেন। শ্রীমায়ের আশ্রমে নারী ভক্তগণ বাস করিতেন, শ্রীমাকে দর্শনের জন্যও মহিলাদের সমাগম ছিল। ব্রহ্মচারী ভক্তদের পক্ষে এই নারী সান্নিধ্যকে স্বামীজী ক্ষতিকারক মনে করিতেন। এমনই ছিল তরুণ সাধকদের সম্পর্কে তাঁহার ব্রহ্মচর্যের নৈষ্ঠিক বিধান। এই ভৎসনার পর অবিলম্বে মায়ের আশ্রমের কাছে একজন প্রবীণ সন্ন্যাসীকেই নিযুক্ত করা হয়।

‘শিববোধে জীবের সেবায়’ মঠের কর্মীদের বিবেকানন্দ সদাই অনুপ্রাণিত করিতেন। ভাবময় উদাত্ত কণ্ঠে কহিতেন,—“ওরে, সর্ব-জীবের সমষ্টি যে ভগবান। একমাত্র সেই ভগবানেই আমি বিশ্বাস করি। সকল জাতির যারা হৃৎকৃত, দরিদ্র ও নিপীড়িত তারাই যে আমার ভগবান। এই ভগবানের জন্য আমি বারে বার জন্মাতে চাই; এজন্য জন্ম জন্ম ছুঃখ পেলেও আমার খেদ নেই।”

যুগ যুগ ধরিয়া এদেশের নরম স্মৃতিকায় ভাবালু ও কোমল

মানুষের জন্ম হইয়াছে। কঠোর সংযম, নিষ্ঠা ও শক্তিব অভাবে অনেক কিছু মহতী প্রচেষ্টা বিফল হইয়া গিয়াছে। তাই নবীন সন্ন্যাসীদের উদ্দেশ্য করিয়া স্বামীজী তাঁহার সংকল্প বাণী বার বার উচ্চারণ করিয়া গিয়াছেন।

আজীবন বিবেকানন্দ স্বপ্ন দেখিয়াছেন; সে স্বপ্ন সফল করার জন্য কারয়াছেন জীবনপণ। তিনি চাহিয়াছেন, আত্মতাগী সর্বস্ব-পণকারী শত শত তরুণ সন্ন্যাসী তাঁহাকে করিবে অনুসরণ। ভারতের আত্মক উজ্জীবনে, তাঁহার ধ্যানের ভারত গঠনে তাহারা করিবে জীবনপাত। সে স্বপ্ন তাঁহার সফল হয় নাই, ধ্যানবল্লনা রূপায়িত হয় নাই। কিন্তু বিবেকানন্দের অভ্যুদয় কি বার্থ হইয়াছে? তাহা তো হয় নাই। তাঁহার বিপুল অধ্যাত্মশক্তি ও কল্পব্রতের মধ্য দিয়া ভারতাত্মা সেদিন জাগিয়া উঠে— ধর্ম ও সমাজে উঠে নূতনতর প্রাণ-স্পন্দন। আর সমাজের সংস্কার ও ধর্মের পরিবর্তে জাগিয়া উঠে সৃষ্টিধর্মী দৃষ্টিভঙ্গী। সনাতন অধ্যাত্ম-জীবনের উৎস হইতে প্রাণশক্তি আতরণে জাতি প্রবৃত্ত হয়। এই জাগরণের পরোক্ষ ফলশ্রুতি বাংলার আত্মধর্মের যুক্তিপ্ৰয়াস, তিলক ও গান্ধীজীর যুক্তি-সংগ্রাম। স্বামী বিবেকানন্দের আন্দোলনের ফলে ভারতের অন্তর্নিহিত ঐক্যের বোধও সবার অলক্ষ্যে জাতীয় জীবনে আত্মপ্রকাশ কবিতে থাকে।

শ্রীরামকৃষ্ণের অগ্রতম শ্রেষ্ঠ শিষ্য নাগমশাই একদিন বেণুড় মঠে বিবেকানন্দকে দর্শন করিতে আসিয়াছেন। নাগমশাই ছিলেন ভক্তি ও দৈন্তের মূর্তি বিগ্রহ। এই সাধক সম্মুখে স্বামীজী বলিতেন, “ছাখো, সারা পৃথিবীটা ঘুরে এলাম কিন্তু নাগমশাইর মত মহাপুরুষ চোখে পড়লো না।”

বিবেকানন্দ ও নাগমশায়ের এই সাক্ষাতের পটভূমিকায় স্বামীজীর অধ্যাত্ম-পরিচয়টি ভক্ত ও দর্শনাধীদেব কাছে সেদিন স্পষ্টতর হইয়া উঠে।

নাগমশাই স্বামীজীর চরণ বন্দনার উদ্দেশ্যে সাষ্টাঙ্গে ভুলুষ্ঠিত

হইলেন। “ও কি করছেন, ও কি করছেন,”—বলিয়া স্বামীজী তখন উঠিয়া দাঁড়াইয়াছেন। নাগমহাশয় করজোড়ে বলিয়া উঠেন, “আমি যে দিবাচক্ষে দেখাছি—আজ সাক্ষাৎ শিবের দর্শন পেলাম। আপনার দর্শনে আমার ভবক্ষুধা একেবারে দূর হয়ে গেল। জয় ঠাকুর বামকৃষ্ণ! জয় ঠাকুর রামকৃষ্ণ!”

বেদান্ত পাঠ নিরত ব্রহ্মচারী ও সন্ন্যাসীদের স্বামীজী আহ্বান করিলেন। মুক্তপুরুষ নাগমশাই ঠাকুরের কথা আজ ইহাদের কিছু শুনাইবেন, হহাই তাঁহার অভিলাষ। কিন্তু অহং-বোধ বিরহিত সাধু নাগমশাইকে দিয়া এসব বলানো শ্রুতিন। তিনি বলিয়া উঠিলেন, “আমি আর কি বোলবো, আমি আর কি বোলবো? আমি এখানে শুধু দেখতে এসেছি ঠাকুরের লীলার সহায়ক মহাবীরজীকে দেখতে এসেছি। ‘জয় রামকৃষ্ণ!’”

কিছুক্ষণ ভাবাবিষ্ট থাকার পর নাগমহাশয় আবার কহিলেন, “আপনাকে কে বুঝবে? দিবাচক্ষি না খুললে তো চেনবার যো নেই। একমাত্র ঠাকুরই চিনেছিলেন; আর সকলে, তাঁর কথায় বিশ্বাস করে মাত্র, কিছুই বুঝে না।”

সিংহবিক্রম, ভুবনবিজয়ী যোদ্ধা সন্ন্যাসী মুহূর্ত্ত মধ্যে তাঁহার মহিমার উন্নত শিখর হইতে নামিয়া আসেন। বালকের সরলতা ফুটিয়া উঠে চোখে মুখে। বিনয় নম্র বচনে প্রবাণ গুরুভাইকে বলেন, “নাগমশাই, কি যে করছি, কি না করছি—কিছুই বুঝতে পারছিনে। এক এক সময়ে এক এক দিকে মহা ঝাঁক আসে, আর সেই মত কাজ করে যাই। এতে ভাল কি মন্দ হচ্ছে—কিছুই বুঝতে পারছিনে।”

নাগমশাই উত্তরে কহিলেন, “মনে নেই? ঠাকুর যে বলেছিলেন, চাবি দেওয়া রইল। তাই এখন বুঝতে দিচ্ছেন না। বুঝা মাত্রই যে লীলা ফুরিয়ে যাবে।”

গুরুর চরণে নিবেদিত-প্রাণ নাগমশাই ছিলেন এক সিদ্ধপুরুষ। লৈল ও আত্মগোপনতার আড়ালে অবস্থিত এই মহাপুরুষকে

জীবনের গতি আজ স্বর্গীয় আনন্দের ও চির প্রশান্তির দ্বারে আসিয়া থমকিয়া দাঁড়াইয়াছে।

মঠের হাঁস, গরু, ছাগলছানা মটরু আজ তাঁহার খেলার সাথী, ভুঁকুর 'বাঘা' তাঁহার বিশ্বস্ত অনুচর। এ যেন দিব্যসভায় মণ্ডিত এক মনোবিশিষ্ট, অধ্যাত্ম-সিদ্ধির পবিপক্বতার ফলে ইহা পেলব, নিটোল ও সমধুর। ব্রহ্মচারীর দল ও গুরুভ্রাতারা তাঁহার আনন্দের স্বর্গীয় আভ্যন্তরীণ দেখিয়া অবাক হইয়া চাহিয়া থাকেন।

ব্রহ্ম দেবে বোগের প্রাণে বাড়াই চলিয়াছে। শেষের দিনটি সমাগত—তরঙ্গায়িত তুর্বার নদী এবার মহাসাগরে আত্মবিলুপ্তির জ্ঞান প্রতীক্ষমান। স্বামীজী যেন তাহার পরম সত্তার সহিত মুখো-মুখি পরিচয় সাধন করিয়াছেন, প্রশান্ত হৃদয়ে বসিয়া আছেন মহা-মিলনের প্রতীক্ষায়। সেবারত ভক্তের সাহায্যে পঞ্জিকার কি একটা বিশিষ্ট দিন তিনি দেখিয়া রাখিলেন। অপরাহ্নে একদিন ময়দানে ধীরে ধীরে বেড়াইতেছেন। সহসা থামিয়া যান, গম্ভীর স্বরে সঙ্গী ভক্তকে একটি বিশেষ স্থান অঙ্গুলি দিয়া দেখাইয়া বলেন, “তোরা ঐখানই আমার দেহের সংস্কার করিস্।”

১৯০২ সালের ৪ঠা জুলাই। বিবেকানন্দের প্রতীক্ষিত দিবসটি আশিয়া গিয়াছে। এবার তাঁহার বিদায়ের পালা। ধ্যানমগ্ন মহাপুরুষ ধীরে ধীরে নিমজ্জিত হইলেন মহাসমাধিতে।

মনীষী রম্যা রল্যা সেদিনকার এই মহাপ্রয়াণের মধ্যে দেখিয়াছেন এক নূতন সম্ভাবনা, নূতন কল্যাণের ইঙ্গিত। অনুকরণীয় ভাষায় তিনি বলিয়াছেন :

“বিবেকানন্দের নিকট জীবন ও সংগ্রাম ছিল একার্থে বাচক। তাঁহার জীবনের দিনগুলিও ছিল অতি সংক্ষিপ্ত। রামকৃষ্ণের ও তাঁহার এই মহান শিষ্যের মৃত্যুর মধ্যে ব্যবধান ছিল মাত্র ষোল বৎসর। কিন্তু এই অল্প সময়ের ব্যবধানেই বিবেকানন্দ প্রজ্জ্বলিত

করেন অগ্নিময় উদ্দীপনা। তারপর চল্লিশ বৎসরেরও কম বয়সে এই মহান যোদ্ধা চিতা-শয্যা গ্রহণ করেন।

“কিন্তু সে চিতাগ্নি আজিও নির্বাপিত হয় নাই। প্রাচীনকালের ফিনিক্স পক্ষীর মতই তাঁহার চিতাভস্ম হইতে নূতন করিয়া উথিত হইয়াছে ভারতের বিবেক—এ যেন কিম্বদন্তীর আর এক ইন্দ্রজালময় পক্ষী। এ বিবেকময় বাণী উথিত হইয়াছে ভারতের শাস্ত, সাধনময় জীবন হইতে, মনুষ্যের আশা ও প্রত্যয় নিহিত রহিয়াছে ইহাতে এই বাণীর কথা ভারতের প্রাচীন ধ্যানী ও জ্ঞানীর দল বৈদিক যুগ হইতে চিন্তা করিয়া আসিয়াছেন। এই বাণীর নিহিতার্থ আজ ভারতবাসীকে উদ্ঘাটন করিতে হইবে, ছড়াইয়া দিতে হইবে অবশিষ্ট  
“মানবপ্রতিদ্বন্দ্ব্যে।”



















